


El Nuevo Testamento
en mixe de Coatlán



New Testament in Mixe, Coatlán (MX:mco:Mixe, Coatlán)

El Nuevo Testamento en mixe de Coatlán
New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

Contents

SAN MATEO	1
SAN MARCOS	58
SAN LUCAS	98
SAN JUAN	156
HECHOS	207
ROMANOS	260
1 CORINTIOS	289
2 CORINTIOS	317
GÁLATAS	336
EFESIOS	347
FILIPENSES	357
COLOSENSES	364
1 TESALONICENSES	371
2 TESALONICENSES	377
1 TIMOTEO	381
2 TIMOTEO	388
TITO	393
FILEMÓN	397
HEBREOS	399
SANTIAGO	419
1 PEDRO	426
2 PEDRO	434
1 JUAN	439
2 JUAN	446
3 JUAN	448
JUDAS	450
APOCALIPSIS	452

SAN MATEO

Jaayhui'my Jadu'n Nej Jesucristo Ytun Yjajti

Je Jesucristo ymij'ap ymijteedy

¹ Cham ngapxa'ñ nmiydäga'ñich pin Jesucristo y'ap'ajt yteedy'ajt jadu'n nej yhui'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acaz. Acaz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías mïd y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzimiy yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxii María, yi' ti anajty ycapxytungixy co ypigaangixy mïd José; e ma anajty ca'ni ñaybudigiiyigixy, chi María oy y'ungdzimigy mïd yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyjoty. Hue' janchtiy yhuinma'ñybaty co ixmadza'ñ ayüch ameech ca' pin yajnejhuíhua'ñ. ²⁰ Huin'it ma jadu'n anajty nihuinmayiy, chi Huindzin Dios tüg y'ángel ñayquëxici cumäyjoty ma José, chi ñimaayi:

—José, David y'ap y'oc, ca' mijcajee mdzachhuinmay nej m'octöxyijc'adiiyb María, com yi' y'ung huidibi yajma'xung'adamy hue' mïd Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuipy Jesús. Jadu'n yi' xii'adiiyb com jégix co yi' yajpocyniñhuádzam ñaax ycajp.

²² Tüg'óciy jada ytundaayi yajtaayi yciyxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapxiyip ma anajty jadu'n yjaybetyity:

²³ Je töxyjäy huidibi ca' yëdyjc mïddzinäy hue' je' ung tzimicip. Chi ypadamyb tüg je y'ung hue' je' yxii'adaanip Emanuel. Emanuel hue' yhuimbizimiy Dios mïd ich ajt.

²⁴ Co José ymäyhuijy, chi cuyduñ jadu'n nej anajty Dios y'ángel ti nímäyii, chi huoy María jadu'n nej jihuüy töxyijc'adyii. ²⁵ Per ni ca' ajcxy jadu'n chinaay jadu'n nej jäy ypicxy chinäy ixti cooni oy María y'ung yajma'xung'aty. Chi yximoy Jesús.

2

Madza' ni'ixpigiyb oy co'ixiygixy pi'c'ung

¹ Jesús yma'xung'ajty ma tüg cajp huidi yxii Belén, jim ma Judea ñaaxjot, huin'it co anajty Herodes yrey'aty ma yi jimbi naaxjot. Chi huin'it yja'ty ma Jerusalén cajp nijējity yēydijctijc huidibi anajty ti choñ ma xii ypidzimy, yi huidibi anajty ajcxy xii madza' ti ni'ixpigiygixy. ² Chi ajcxy yajtiy:

—¿Ma je judíojäy yrey tibi yma'xung'aty? Ti ich ajcxy n'ixxi yi' ymadza' jim ma xii ypidzimy, e yi' ich ajcxy ya miñ nhuindzigihuaangixy.

³ Co je rey Herodes jadu'n midooy, chi ooy ytigiiy tajpi maybi miid tüg'óciy cajpjäy jim Jerusalén. ⁴ Huin'it je rey huomujctay tüg'óciy teedytjic huindzindijc huidibi anajty yaj'ixpijcp yi Dios yley, chi yajtiy ma anajty yma'xung'ada'ñ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcaxiiybi jadu'n je' cojaay:

⁶ E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi israeljäy.

⁷ Huin'it Herodes oy yajhuoyii ameech huidibi anajty ti ijxcixy yi madza'. Chi tiybicy yajxon mina anajty oga'n ti ijxcixy je madza'. ⁸ E huin'it ajcxy quejxy jim Belén. Chi jadu'n nímay:

—Níxcix jim e ocnidiu ocyajtiugixy je pi'c'anäg; e co anajty ti mbatcixy, miñ miich ajcxy xyajnimáaygixyich jaydebi ich nicxy nañ jadu'n nhuindzigiyich.

⁹ Co jadu'n rey najtzcaxiyday, chi ajcxy choñ. E je madza' tibi anajty ijxcixy ma xii ypidzimy, chi ajcxy ijxy jayijp je' anajty ñicxy ma je' ajcxy, ixti coní oy je madza' yhuäcxipy ma anajty je pi'c'anäg yajpaady. ¹⁰ Co je rey ixpijctijc jadu'n ijxy yi madza', chi ajcxy oy janch jotcuje ñayjihuiyii. ¹¹ Co ajcxy ytiyctigiiy, chi ajcxy ijxy je pi'c'anäg miid ytaj je María. Chi jada' ajcxy ñaygojxtinaydaaci huindzigiiy ojadajty ajcxy je pi'c'anäg. Chi ajcxy yaj'ahuach yxuumy aguejtucy abijctucy, chi ajcxy yajpidzimy oori, poom, etz tüg tzooy huidi yxii mirra. Chi ajcxy moy je pi'c'anäg. ¹² Chi cumäjoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynicx.

Co José etz María yqueegyñicxixy Egipto

¹³ Co je rey ixpijctijc ajcxy yhuimbijttaayñi, chi cumäjoty José ijxy tüg Dios y'ángel, chi nimaayi:

—Pidig, nicx jim Egipto ñaaxjot miid yi pi'c'anäg etz miid yi' ytaj, e jim mhui'mipy ixti cooni ich miich nimahuipy. Com yi Herodes y'ixtahuamy yi' yi pi'c'anäg e yaj'öga'ñ yi'.

¹⁴ Chi huin'it José ypidigy miid tzoon coodz je pi'c'anäg miid ytaj, chi ajcxy ñicxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti yminañ ma yi' y'ayucnajtzcaxiiybi: “Jim Egipto ich n'ung ti nhuoy.”

Herodes pidacy y'ane'min co huen pi'c'anäg yaj'öctäyii ajcxy

¹⁶ Co Herodes oy huinma'ñ yajyöy co ti anajty ooy yhuin'iiñyii je rey ixpijctijc ajcxy co ca' anajty ti ñihuimbidyii, chi ooy yjot'ambijcy, chi

ni'ane'mdiy co huen nicxy jim Belén etz majaty cajp mihuingon Belén, yaj'öctaaygixy tüg'óciy yi pi'c'anäg huidibi mejtz jimijt etz huidibi ca'ni nigooty mejtz jimijt. ¹⁷ E jadu'n jada yajcuyduñ jadu'n nej anajty Dios y'ayucnajtzcaxiybi, je Jeremías, anajty ti cojaay:

¹⁸ Jim Ramá yajmidoy co anajty chachjy chachyaxy jäy ajcxy; yi Raquel tzachjy tzachyaaxp müd y'ung ajcxy ycixpi, ca' ajcxy anajty yjotcujc'aty müd co anajty y'ung ti y'öctäy.

¹⁹ Co oy y'öcni Herodes huin'it jim Egipto, Dios tüg y'ángel ñayguëxici cumäyjoty ma José. Chi ñimayi:

²⁰ —Pidig, müdnicx yi pi'c'anäg etz yi' ytaj jim ma yi Israel ñaaxjot jadügtecy com ti y'öctaayni yi huidibi anajty yaj'ögam yi pi'c'anäg.

²¹ Huin'it José ypidigy, müd nicxy yi pi'c'anäg etz yi' ytaj jim ma Israel ñaaxjot. ²² Per co José nejhuüy co je Arquelao yi' anajty jim ane'mb jadu'n nej anajty je yteedy Herodes, ooy chigiy nej ñicxip jim. E co jadu'n anajty ti ycumäy co ca' jim ñicxip, chi ajcxy ñicxy jim Galilea ñaaxjot. ²³ Co jim yjäty, chi jim chinaydapijcy ma je cajp huidi yxi Nazaret. Jadayaabi je' jadu'n tun jajtj jadu'n nej anajty ycojaayty ma Dios y'ayucnajtzcaxiybi ñecy co Jesús xii'adiyb Nazareno.

3

Juan el Bautista y'ayuc capxhuäcxy ma tidz naax it

¹ Huin'it tiempo nañ jadu'n Juan je Bautista (huidibi jäy yajniibejtpi) ymiñ tüg tigidum ma Judea ñaaxjot capxhuäcx Dios y'ayuc, ² yminañ:

—Jothuimbijtcix ma Dios com yi Dios y'ane'min huingoniñ yi'.

³ Jada Juan yi' je' huidibi je profeta Isaías nigapxy yminañ: Jim migtigidum yajmidoy tüg ayuc mina'ñ: “Ni'ixiygixy yi mHuindzin ytü'aa, ni'ixiygixy tüg tü'aa tiybi.”

⁴ Je Juan hue' anajty yhuinip iyujc ac, e yi' anajty yjicxy'ajtpy mu' etz tijaty iyujc päg jim tüg tigiduum. ⁵ Chi choon jim Jerusalén jäy etz tüg'óciy huidijaty tzinaayb ma Judea ñaaxjot, nañ jadu'n huidijaty tzinaayb ma Jordán mijniiba', ñicx ajcxy ma Juan amido'ijty yi' y'ayuc. ⁶ Co anajty ajcxy nigapxtaaygixy yi ypocy huidi anajty ti tundigooygixy, huin'it anajty ajcxy Juan yajniibedyii ma Jordán mij ni.

⁷ Per yi Juan y'ix co may fariseo jäy etz saduceo jäy miñ anajty ajcxy niibejtcixy, chi ajcxy nimay:

—iMiich ajcxy, m'ajuugy m'amigüg ahua'n iyujc! ¿Pin ti xyajni'ixiygixy nej jëbi huaad mgögueeccixy yi ayo'n huidibi huingomb? ⁸ Yajxon jäy'ajtcix tiydudägy huen niguëxigy co ti mjothuimbijtcixy. ⁹ Ca' jadu'n mdzachminaangixy co Abraham xy'ap'adyii xy'oc'adyii. Hich miich ajcxy yam ndimnimaayb co Dios ixti jëbi yi' yaj'ap'adyii yaj'oc'adyii Abraham jada tzaajot ca'ydi miich ajcxy. ¹⁰ Yi jach ni'ixi yi' y'ijtni ma quipy y'ijx, tüg'óciy quipy huidi ca' oy ytim'aty yajpujx yi', e chi jada' yajnögy jijnjoty. ¹¹ Hich, janch yajniibejtpich müd ni, yi' yi' jadu'n nej tüg ixpejt co ti mjothuimbijtcixy; per jacminamb tzojc huidi ajcxy xyajniibedipy müd Dios yjihuñ etz müd jijn. Je' ymüd mic'ajtin etz cötujcin, nigä ca'ydi ich, ni xycapaadyich nicxy ycig nyajtecyjendügyich. ¹² Ymüd mic'ajtin pijc-huäcxamy yi jäy jadu'n nej jäy huimbojy moc, abicy pidäga'ñ actz, abicy moc pajc. Yujcpiga'ñ moc pajc ma tze'x ninögihua'ñ yi moc actz moc jaam jijnjoty ma je jijn huidibi nicaminaaxii ycapich.

Co Jesús ñiibejty

¹³ Huin'it Jesús chooñ ma Galilea ñaaxjot, chi ñicxy ma Jordán mij ñi ma ana-jty Juan yjāyayñibety, ñibedam anajty yí' nañ jadu'n. ¹⁴ Juan ca'jadim'a'ixiy, chi ñimay Jesús:

—Ñich miich ixypy xyajñibejtpich, ¿e miich mimb ma ñichi?

¹⁵ Chi Jesús y'adzooy:

—Jadachambi oc'a'ixi jadu'n, com ooy yí' ycopityity co nguydundayim tüg'óciy tiibi Dios xyaj'ane'mim.

Huin'it Juan a'ixiy chi yajñibejty Jesús. ¹⁶ Co Jesús ñibejttay, chi Jesús ijxy Dios yjihui'ñ ñigidägyi jadu'n nej tüg pi'cmuuxy. ¹⁷ E huin'it yajmidoy tzajpcíxy tüg ayuc ymina'ñ:

—Jada je' ñich n'ung'ajtypich huídibi ooy ndzocyich huídibi ooy mñd jotcuje nayjihuiyijich.

4

Je mujcu' tuñ ijxta'ni Jesús

¹ Chi Dios yjihui'ñ yajnicxy Jesús mjtigíduum jaydēbi je ca'oybi yjot'ixiyb yhuinma'ñ'ixiyb. ² Jim y'ijty jaygay huixchigui'px xi huixchigui'px tzuum, e huin'itni ooy yiböccodyi. ³ Chi je ca'oybi nimijhuägy Jesús ocjot'ixa'ñ oc-huinma'ñ'ixa'ñ, chi ñimay:

⁴ —Pen Dios miich xy'ung'ajtp, ñima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzajcaagyti'ajty nitzinähuiipy, nañ jadu'n nitzinähuiipy tüg'óciy yí' ayuc huídibi Dios ycapxp.”

⁵ Chi je ca'oybi mñdnicxy Jesús jim Jerusalén, chi ymñdpejty tzajptijc cöduum. ⁶ Chi ñimay:

—Pen janch co miich Dios xy'ung'adyii, cödiypnax jiiby naaxcíxy, ca' yí' nej mjadipy com jaybety jadu'n ymiñ co jadu'n ymina'ñ:

Dios yquexyp yí' y'ángeles jigix xycuend'adipy xyhuidzipy mñd yci', ca'ydi ninej mgönepy ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' mjt'ixipy mhuinma'ñ'ixipy yí' mhuindzin Dios.”

⁸ Jadüg'oc je ca'oybi ymñd'ajty Jesús ma tüg copñicx janch cijxpi, e jim yajni'ixiyday tüg'óciy naax cajp co ooy mñdity oy'ajtin etz mic'ajt. ⁹ E chi ñimay:

—Ñich jada miich nmoydähuiipy tüg'óciy, pen miich cojxtina' xyhuindzigiyich xy'ojadatyich.

¹⁰ Huin'it Jesús y'adzooy:

—Huinhuäctucich miich mujcu', com jadu'n yjaybetyity: “Tügpaic yí' mhuindzin Dios yí' mhuindzigihuiipy m'ojadadipy.”

¹¹ Huin'it je ca'oybi huinhuäctucy Jesús, chi Jesús ñimiini ángeles ycuend'ajti.

Jesús ytung yajtzondacy jim Galilea

¹² Co Jesús nejhuüy co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³ E ni ca' yhui'müy jim Nazaret, chi ñicxy jim Capernaum, jim ma Zabulón etz Neftalí y'it. ¹⁴ Jada je' jadu'n tuni jaiti jadu'n nej Dios y'ayucnajtzcapxiybi Isaías anajty ti cojaay:

¹⁵ Zabulón etz Neftalí ñaaxjot. Je tü'aa huídibi mejypa' huídibi a'oy'amy ma Jordán mij ñi. Jim Galileajäy chinäy huídibi ca' yjudiojäyity.

16 Yi jäy ajcxy huídibi jim tzinaayb agootztuuby ijxpaty ajcxy tüg tücxin jajin. Je huídijaty anajty ajcxy tzinaayb ma je jibicpi y'anicíy, chi ajcxy ycodicxiy tügi tücxin jajin.

17 Ixti huin'it Jesús ytigíy ayuccapxhuäcxp ymíñañ:

—Jothuimbijtcix, yajmingix yajmejtzcix mjot mhuinma'ñ ma Dios, com yi Dios y'ane'min huingonip yi'.

Jesús nimay nimídaax je acxmajtzpi: “Pajamgich”

18 Jesús tüyöyb anajty ma Galilea mejypa', co ijxpaty metz yëydijc ac tüg quëxpi, hue' anajty yi' je' je Simón, huídibi nañ jadu'n yxii Pedro, e je jadügpí hue' je' anajty Andrés. Acxmadzi anajty ajcxy yi' ytung'ajty e jim anajty ajcxy yi' tzachnigöhuich y'acxmadzi'ñ. 19 Chi Jesús nimay ajcxy:

—Pajamgich, ich miich ajcxy nyajni'ixihuipy nej jäy myaj'ixpiipy je Dios ytiy'ajt.

20 Huin'it je' ajcxy ixmajtztay tüg'óciy yi' y'acxtzaay, chi ajcxy panicy Jesús.

21 Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tüg barco müd yteedy, yi' anajty ajcxy yi' jim chach'adagíy y huídibi mi'acxmajtzciy. Chi ajcxy Jesús yhuoohui. 22 E huin'it ajcxy ixmajtztay je barco etz yi' yteedy, chi ajcxy panicy Jesús.

Jesús yaj'ixpiy mayjäy

23 Huídijtay Jesús ma tüg'óciy Galilea ñaaxjot, yaj'ixpiy jäy majaty je naymujctac cajp cajp. Capxhuäcxy yi' Dios ytiy'ajt etz nañ jadu'n pa'mjäy yajtzocy huen ytimyhuídipá'mity anajty ajcxy ymüd. 24 Chi Jesús oy yajnejhuíyñi ma tüg'óciy yi' Siria ñaaxjot, e chi ajcxy müdmiñ ma Jesús tüg'óciy huídijaty anajty ajcxy ca'oybi müd, etz huídijaty anajty ajcxy cíxuxy tecyxuxy, chi Jesús yajtzocy. 25 Huin'it Jesús ypanicy mayjäy huídijaty anajty ajcxy tzinaayb ma Galilea ñaaxjot etz yi' Decapolis jäy, nañ jadu'n Jerusalén jäy etz huídijaty tzinaayb ma Judea ñaaxjot, nañ jadu'n huídijaty anajty ajcxy tzinaayb a'oy'amy ma Jordán mij nii.

5

Je tiy'ajt huídibi Jesús ycapx ma tüg cögop

1 Co Jesús ijxy tüg'óciy je mayjäy, chi nicxy ma tüg copnicx, e chi jim y'ixtacy. E huin'it je' y'ixpijcpidijc ajcxy yjübigíy. 2 Chi Jesús ytigíy yaj'ixpijcp ymíñañ jadu'n:

Je pinjaty ajcxy jotcújcip

3—Janch jotcujc je jäy ajcxy huídibi nejhuíy co yajmayajtpy Dios y'oy'ajt, yi' ajcxy paatip Dios y'ane'min.

4 Janch jotcujc je jäy ajcxy huídi yajpatp taj may, yi' ajcxy yajmöhuam jotcujc'ajtin.

5 Janch jotcujc je jäy ajcxy huídibi yung naxpy jäy'ajtp, yi' ajcxy padaamb tüg'óciy je huídi Dios ti yaj'ahuaníyii.

6 Janch jotcujc je jäy ajcxy huídibi cuydunamb huídibi Dios chojcpy, Dios yi' ajcxy pubedíib.

7 Janch jotcujc je jäy ajcxy huídibi pa'ayoob huenyimpinjáyity, Dios nañ jadu'n ajcxy pa'ayohuíib.

8 Janch jotcujc je jäy ajcxy huídibi huädz yjot yhuinma'ñ, yi' ajcxy y'ixipy yi' Dios.

9 Janch jotcujc je jäy ajcxy huídibi ca' ti tzip tzojccixy, com yi' ajcxy Dios ung'adíib.

¹⁰ Janch jotcuje je jäy ajcxy huidibi yajnixicp yajnigapxp mïd je Dios ytiy'ajt ycixpi. Yi' ajcxy idamb ma Dios y'ane'min.

¹¹ Janch jotcuje miich ajcxy co jäy jibic xytungixy co nigoob xyñihuambejtcixy etz capxcixy huidijaty ca' ytiy'ajtiy mïd ïich ycixpi. ¹² Xondaaccix jotcuj'ajtcix co mbadaangixy tüg oy'ajtin jiiyby tzajpjoty. Nañ jadu'n ajcxy ixhuidijty pahuidijty je Dios y'ayucnajtzcapxiiybï jecy'ajty.

Miich ajcxy je tudägyjäy ya naaxhuiñ

¹³ Jadu'n nej caan ca' yajpüch je tzüch jücxxy tim jadu'n miich ajcxy myajpaady ya naaxhuiñ. Pen je caan ca' mïd ti xücx'ajtin, ¿nej jëbi nyajtuunim? Ca' y'oc'oyajtunity, chi yajnajtzxidiyñi, chi yhuaani tembejt hua'cpejt.

¹⁴ Oc'ix tüg je cajp jim copcix, ca' jëbi mhuijtyüzdim mgoyüdzim. ¹⁵ Co tüg jiin nyajtoyicim, ca' huaad tu'tz ngöjupim. Hue janchtiy co nyajticxim cix, huin'it jëbi xycodicxtaayim jadu'n nej ajt nyajpaatim ma tijc. ¹⁶ Nañ jadu'n miich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi miich ajcxy mdumyb. Huin'it ajcxy ojadadipy je mDios teedy huidibi jiiyby tzajpjoty.

Jesús yaj'ixpiy nej yi' yi Dios ycötujcin

¹⁷ Ca' mhuinmay co ïich ti nmiñich ya co nbïgaanich je Dios y'ayuc je' huidibi anajty ti jaay Moisés etz je profetiijc. Ca' ïich nyajmijaagixa'ñ je cötujcin, ïich ti nmiñich co nguyduna'ñich jadu'n nej ymiñ jaaybety. ¹⁸ Janch tiy'ajt jadu'n nej nimaaygixy, je huidibi mimb jaaybety jadu'n tundähuam jajtähuam. Ni tüg letra oy mabaad ymúdzity nicxy ycayajcuyduñ. ¹⁹ Je jäy huidibi ca' nimidooy je Dios ytiy'ajt oy yjadim mutzjaty etz yaj'ixpiy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huidibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpiy, je' ajcxy padamb tüg je mijpi tigiydac ma Dios y'ane'min. ²⁰ ïich miich ajcxy nimaayb, pen ca' miich ajcxy jac'oy mdungixy ca'ydi fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpiy co ca'p huaad pin yjotmädy

²¹ Miich ajcxy mnejhuuygixy jadu'n nej yi m'ap mdeedy ajcxy ayuc yajhui'my: "Ca' jäy myaj'ögip; e pin anajty jäy yaj'öcp ypaadip je tzaachypi." ²² ïich miich ajcxy jadu'n nimaayb pinjaty ymigüetijc mijotma'tp, je' Dios tiydunaanipy; e pin ymigüg xidiijp tzuudijp, yajtiydunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³ Pen myajnicxpy miich mhuindzigi'ñ ma Dios ytiy, e pen jim jäy metzgodyi co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhui'm je huindzigi'ñ ma je altar yhuinduu, e nicx jayijp nayyaj'oyihuï mïd je migüg, huin'it mhuimbedip e chimgyeyecy je mhuindzigi'ñ.

²⁵ Tzojc naygapxjotcidägi mïd je midzip, pen yam mïd tüyöy ni'am tü'am, ca' jecyity co je midzip xcyiyegip ma juez, e je juez xcyiyegip ma je policia, e je' nicxy xpidägy pujxtigoty. ²⁶ Janch tiy'ajt ïich miich nimäy co ca' jiiyby mbidzimipy ixti cooni mgüejtähuipy je meeñ.

Jesús yaj'ixpiy co ca'p ndundigóoyimipy mïd huingbi töxyjäy

²⁷ Miich ajcxy mnejhuuyb co jecyip tiy'ajt ymina'ñ: "Ca' mmidundigoyipy huingbi töxyjäy." ²⁸ ïich miich ajcxy nimaayb, pen ji pin huindicxy tüg töxyjäy, e jot'adiiyb nejaty, ti je' anajty ñitundigooyni ma yjot yhuinma'ñ.

²⁹ Pen yi mhuin a'oy'amybi xyajtundigoyamb tim yajpidzim; jac'oy co tüg'idu'mbi mhuin ytiyoyipy ca'ydi co cixyca'px mnicxipy jiiinjoty. ³⁰ E pen yi

mgí' a'oy'amybi xyajtundigoyamb tím ixpux etz najtzjibibi' jiguem; jac'oy co tüg mgí' ytigoyipy ca'ydí co mminicxipy metz mgí' jijnjoty.

Jesús yaj'ixpicy co jäy ca'p huaad ytöxyijc ixmach mañ'ajtningixy

³¹ Nañ jadu'n ymiñ jaaybety: “Pín ixmajtzp ytöxyijc, huen möhuipy tüg necy ti ycixpi co ñay'ixmájtzigixy.” ³² Hich miich ajcxy nimaayb, pen ji pín ixmach ytöxyijc, e ca' anajty ti ytundigooy miid huingbi yëydijc, je yëydijc anajty nigiydeyiyb ytöxyijc co anajty ytundigooy miid huingbi yëydijc; pín yëydijc pijcp miid je töxyjäy huidibi anajty ti yaj'ixmach, pocytumyb je' anajty.

Jesús yaj'ixpicy nej nguyduunim tibi n'ahuaniyim ma Dios yhuinduu

³³ Miich ajcxy mnejhuüyb nej jecy'ajty m'aptijc mdeedytjic ajcxy yajnimay: “Ca' nigo ti m'ahuanihuipy, mguyduunipy jadu'n nej anajty ti mminañ.” ³⁴⁻³⁶ Per hich miich ajcxy nimaayb: ni mga'ibaadip ni mgacapxpaadip; ni mgamina'nip; “y'ijxpy tzajpjoty,” com yí' Dios chinaydac. E ni mgamina'nip; “y'ijxpy naaxhuiñybi,” com Dios yajpatp oy ytimymaajty. E ni mgamina'nip; “y'ijxpy Jerusalén,” com jim je' Dios chajptjic; ni mga'ibaadip ni mgacapxpaadip mgohuajc, com ca' mjaty myaj'ahuimbity poob o tzixy tüg cöhuay. ³⁷ Hue' janchtiy, tiydudägy minaangixy: “oy” o “ca'.” E pen miich ajcxy anaxy jaccapx jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸ Miich ajcxy mnejhuüyb co jecy'ajty yajminañ: “Pen ji jäy mhuin xyajpidzimi, nañ tím jadu'n yhuin myajpidzimipy; pen ji migüg mdütz xyajpidzimi, nañ jadu'n myaj'ahuimbidity.” ³⁹ Per hich miich ajcxy nimaayb: Ca' myaj'ahuimbidity jibicpi ma migügtjic; pen ji pín xycoxy ma mhuiñyijp tüg adu'mbi, jac tím mo' jadüg adu'm'amybi. ⁴⁰ Pen ji pín xyxiy e xypigaani yí mnijen, najtz'ixi', huen xyajnicxi nañ jadu'n mjocx huit. ⁴¹ Pen ji pín adzip tzimiy xyajminicxañ tüg kilómetro jiguemity, yajnicx jac tím jadüg kilómetro. ⁴² Pen tijaty xypijctzoohei, mo'. E pen ji pín xyminuucxañ, yajnuucx.

Co ndzojcm nmidzip

⁴³ Jadu'n ymiñ jaaybety nej jecy'ip Moisés yjay: “Migüg'adii yí' huidibi xymigüg'ajtp, e midzip'adii yí' huidibi xymidzip'ajtp.” ⁴⁴ Hich miich ajcxy nimaayb: Tzoc yí' huidibi ajcxy xymidzip'ajtp, etz mibijctzoohei ma Dios huen y'oy'ajtin paady yí' huidibi xyñigapx xyni'ojüyb, e nañ m'oyjäy'at yí' huidibi xyca'ixamb. ⁴⁵ Huin'it miich ajcxy xy'ung'adii by yí' Dios tzajpjotyí' huidibi yxi' yajtixcp yajjajp ma oyjäydijc etz ma jibicjäydijc, nañ jadu'n yajtüy ma jibicjäydijc etz ma oyjäydijc. ⁴⁶ Pen miich ajcxy mdzojcpy je' huidibi xychojcp, ¿ti jäygidaacin yí' m'ocpadamyb? Nañ jadu'n yí' ajcxy yja'idützp yí' pocyjäydijc etz yí' yajcogüejtpidijc. ⁴⁷ Pen miich ajcxy mgapxpocxyp yí' mjugymigüg, ¿ti oybi yí'? Nañ jadu'n ajcxy yí' yja'idützp yí' huidibi ajcxy ca' Dios nejhuüygyxy. ⁴⁸ Jäy'ajtcix tudägy jadu'n nej ajcxy yí' mdeedy tzajpjotyí' ytudägy.

6

Jesús yaj'ixpicy co nduunim oy yjäy'ajtin

¹ Ca' mdungixy je' oybi ma jäy y'ixy yhuindicxy miid co mdzachya-huindicxaangixy co mdungixy oybi. Pen jadu'n m'idützcixy mDios Teedy huidi jiiby tzajpjoty tzinaayb, ca' ajcxy xymöhua'ñ je' oy'ajtin. ² Paady co mbubedipy mmigüg, je' ayooibi jäy huidi yajmayajtpy tijaty, ca' huaad mni-gapxy mnimiydägy o mnaygömayii co anajty ti mmöy tijaty. Yí' jadu'n idützp je' jäy huidi mij' cix najjihuüyip huidi anidaacp co huen jäy y'ixyii mijpidägyii co

anajty jadu'n y'idíich. Janch ñich miich ajcxy jadu'n nimaaygix co yí' ti patcixy je oy'ajtín. ³ Co miich mmöhuipy mmigüg tijaty yajmayjajtpy, hue' janchtiy mdunipy ca' myajnejhuíhuipy huídi m'id mnaymigüg'adyii. ⁴ E co miich amoñ m'idipy, mDios Teedy huídi iixp co amoñ tijaty mduñ, je' xymöhuamb tüg oy'ajtín mayjäyduum.

Jesús yaj'ixpiy nej Dios mibijctzoohuim

⁵ Co miich ajcxy Dios mibijctzoy, ca' jadu'n m'iditczixy jadu'n nej je jäy huídibi capxtacp ma Dios huin aguy ahuac aguy. Yí' ajcxy capxtacp ma Dios huactina' jii by tzajptigoty jaydebi jäy y'ixiyyb etz ymijpidägiyyb. ñich jeyi jadu'n nimaayb, co jadu'n oy'ajtín'adiyy. ⁶ E co miich Dios mibijctzoy, nicx tigoty etz m'agíhuipy je mdijc aguu. Huin'it Dios mibijctzou. E je Dios y'ijxpy ymidooyb co jadu'n mibijctzoy, e je' je m'oy'ajtín xymöhuipy mayjäyduum.

⁷ Com Dios mibijctzoy, ca' m'agapxiyo'cip je huídi anajty ti m'occapxi, jadu'n nej ajcxy y'iditczixy huídi ca' nejhuíygiy Dios ytiy'ajt. Yí' ajcxy huinma'ñpidägy co m'id ajcxy ymay'ayuc huin'it ajcxy ymidoohuuyb. ⁸ Ca' jadu'n m'iditczixy jadu'n nej je' ajcxy; mDios ñejhuuyb ti miich ajcxy myajmayjajtpy ma anajty ca'ni mbijctzooyñi. ⁹ E jadu'n miich ajcxy Dios mibijctzohuipy, jadu'n mina'nip:

Dios Teedy, miich huídibi tzajpjoty tzinaayb; huindzigíy miich mxii y'ity.

¹⁰ Huen miñ ya miich yí' m'ane'min. Huen mdzojcin yajcuyduñ ma je jäy yjot yhuinma'ñ jadu'n nej yajcuyduñ jii by tzajpjoty.

¹¹ Mooygich ajcxy ngaayin n'uucin jabom jabom.

¹² Méecxibich ajcxy nbocy ngaydey huídibi ñich ajcxy ndundigooyb, jadu'n nej ñich ajcxy meecxyich huídibi ajcxy xymidundigooybich.

¹³ Ca' m'aixiy co ñich ajcxy nhuinma'ñ tigoyipich. Yajñhuaatzcich ajcxy ma yí' jibicpi. Co miich yí' mje' je cötujcin, je mic'ajtín etz je oy'ajtín huinixii huinitiempo. Amén.

¹⁴ Pen miich ajcxy mhuinmeecxyp je huídibi xymidundigooygixp, je mDios Teedy huídibi tzajpjoty je' nañ jadu'n xyhuinmeecxip miich ajcxy mbocy. ¹⁵ E pen miich ajcxy ca' pin jäy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Jesús yaj'ixpiy nej huaad n'ijtím jaygaay

¹⁶ Com ajcxy m'ida'nip jaygaay jay'ügy (mina Dios mibijctzoogixy), ca' mnaybidáaccigixy tajy may, jadu'n nej ajcxy iditczixy yí' huídibi ajcxy minamb co Dios mibijccixy e ca' yjanchity. Yí' ajcxy yajtigajchpy yhuiñyijp jigix jäy ajcxy oc'ixiyyb co jaygaay jay'ügy y'ijtcixy; jeyi jadu'n oy'ajt'adiyyb.

¹⁷ Miich ajcxy co m'idipy jaygaay jay'ügy jotcuyc naybidägi, caax mgohuajc etz puj mhuin mjijp, ¹⁸ ca'ydi myajniguëxig mayjäyjoty co m'ity jaygaay jay'ügy, hue' janchtiy myajniguëxig ma je mDeedy huídibi ca' yaj'ijxy; e je mDeedy huídibi iixp huídibi miich ajcxy ca' mduñ iixna' quëxna' yí' xymöhuipy oy'ajtín mayjäyduum.

Je jugy'ajtín tzajpjoty

¹⁹ Ca' nigí m'adzocy huídibi ya naaxhuiñ, je' co ya huindigooyb oy ytimtijty huídibi yí' huech yajhuindigooyb, huídibi tougaayip etz ma je meetzpi ajcxy meetzcixy pigiccixy tijaty. ²⁰ Je' miich nijot'ajtcixy je' oy'ajt huídibi miich ajcxy Dios xymöhuamb jii by tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigiccixy tijaty.

²¹ Ma miich ajcxy m'idity je oy'ajt nañ jii by ajcxy mjot mhuinma'ñ pidäg.

Yí' mhuin jadu'n yí' nej tüg tñcxin

22 Yi mhuiin yi' yi' jadu'nip nej tüg tücxin jain ma mninix, e paady pen ca' miich yi' mhuiin xyajtundigoy, tüg'óciy mjot mhuiinma'n huadz yi'. 23 Pen miich mhuiin xyajtundigoyb nañ jadu'n mjot mhuiinma'n huadi miich mïd ca' y'oyity, jadu'n yi' nej coodzpï jac tim nigï ca' y'oyity ca'ydi je coodzpï!

Dios etz je comeeñ'ajtin

24 Ni tüg pin ca' huaad mïd tuñ metz huindzin com mijotma'ti tüg je', e jadügpi chogipy; o ixtijipy tüg e jadüg ymigüg'adiyb. Nañ jadu'n ca' huaad miich ajcxy metz m'ojadajtcixy, Dios etz je meeñ.

Dios ycuend'ajtpy yi' yjyä

25 Paady iich miich ajcxy nimaaygixy: Ca' mdzachhuinmaaygixy ti ajcxy mnitzinahuipy, ti ajcxy mgayipy m'ügipy o ti ajcxy mhuit'adiyb mducxy'adiyb. MDios yi' ti xymooygixy je mjogy'ajtin, e paady ycixpi yi' nejhuïyb ti ajcxy myajmayajtpy. 26 Oc'ix miich ajcxy yi' joon huadi queec-huidijtp. Yi' ajcxy ycaniipcixy ycatungixy, nañ ni ca' yi' ajcxy yujcpijccixy ma tze'x. Miich ajcxy mDios Teedy huadi tzajpjoty tzinaayb, je' moydaayb huadi ajcxy yi' yjïcxyp. E miich ajcxy mjactzoobatp ca'ydi yi' joon. 27 ¿Pin ji ma miich ajcxy, ooy mij jahuinmay, jëbi tüg nuux yjacyeegyï?

28 ¿E na'amy co miich ajcxy mdzachnidajy mdzachnimay mïd je mhuit mducxy ycixpi? Oc'ix miich ajcxy nej yoñ tüg je pijy huadi yajpatp tun nigap. Ni yi' ycatuñ ni piidy. 29 Per janch tïy'ajt jadu'n nej nimaaygixy, ni je comeeñjyä huadi yxiï rey Solomón, ni ycaquipxiy je' yxoixin mïd je pijy. 30 E pen mDios xoxpy jadu'n je aay ujtz cham etz tzojcy ytïtztäy ñicxtäy, jac nigï miich ajcxy Dios xymöhua'n huadibi myajmayajtpy, miich ajcxy huadibi hueeni mmibijcin. 31 Paady ca' nigooibi mdzachhuinmaaygixy ma ajcxy mbaadip ti mgayipy m'ügipy o ti mhuit'adiyb mducxy'adiyb. 32 Yi' jyä ajcxy huadibi ca' mibicy yi' Dios oy tzach nijot'ajtcixy jadayaabi, per miich mDeedy huadibi tzajpjoty je' ñejhuïyb ti miich ajcxy myajmayajtpy. 33 E pen miich ajcxy mbidacpy Dios jayjip ma mjot mhuiinma'n etz mguydun ajcxy yi' y'ane'min, huin'it miich ajcxy Dios xymöhuiipy tijaty myajmayajtpy. 34 Paady ca' mhuiinmaaygixy cham mïd je jabom cixpi, je' co je jabombi ymimiñ je tajin mayin. Tzoc mijotcujc'ajtim je tajin mayin huadi cham mninajx nyajnajxim.

7

Ca' mbocy ixy yi' mmigüg

1 Ca' m'ix'ijxpy mba'ijxpy ti mmigügtjic ytundigooyb, jigix ca' Dios xtyidunipy chaachytunipy. 2 Pen miich m'ix'ijxpy mba'ijxpy mmigügtjic ti ytundigooyb, nañ jadu'n miich Dios xtyidunipy xychaachytunipy, e yi' quipxi'n huadibi miich mhuamyb quipxi'n, nañ yi' Dios yajtunamyb ma miich. 3 ¿Nej co miich m'ixy huadibi mmigüg ytumy e hueeni ytundigooyb, e ca' mnay'ixyï huadibi miich jac mij mdundigooybi? 4 ¿Nej jëbi mmigüg m'ocnimäy: “Nbubedamybich miich ca'ydi mjacpocytuñ”, e miich yam m'ocmïdipi jac mij pocy? 5 Miich ci'm mnayhuin'ïñyï. Nicx jayjip mbocy mgaydey ocyajhuadz, huin'it jëbi mbubety je mmigüg.

6 Ca' mmöy yi' jibicjäydjic huadibi Dios yjë'ajty co nicx camij'ijx camijpidaaccixy; ni mgayegipy Dios y'ayuc ytiy'ajt ma yi' jyä ajcxy huadibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

7 Mibijctzougix yi' Dios e yi' xymöhuiipy ajcxy; ixtaaygix, huin'it mbáatcixipy; cogapxiygix e ahuadzïp ajcxy mdiçc agu. 8 Com pin tijaty pijctzoob

ypaatyp yi'; e pin tijaty ixtaayb ypaatyp yi'; e pin cogapxiiyb ma tijc aguu, yaj'ahuaatzip ytiyc aguu.

⁹ ¿Nej ji jada' miich ajcxy nidügti co m'ung pijtzoohuipy tzajcaagy nej mmöhuipy tüg tzaaji? ¹⁰ ¿O pen ypijctzooby tüg acx nej mmöhuipy tüg tza'ñi?

¹¹ Miich ajcxy oy mjbicjäyity e mjaity ajcxy nej m'ung m'anäg mmöhuipy je oybi. ¡Nīgi Dios Teedy tzajpjotipi möhua'ñ je oybi pinjaty pijtzoob!

¹² Tzinaaygix tiydudägy mäd je mmigügtijc, pen miich ajcxy mdzojcpy co je mmigügtijc chinähuipy tudägy mäd miich ajcxy; com jadu'n y'ane'my Moisés yley etz yi Dios y'ayuc najtzcaxiiyb ajcxy ñecy.

Je xützpi tü'aa

¹³ Tigiiygix ma yi tigiyyidac xützpi: yi tigiyyidac etz yi tü'aa huidibi ja'tp ca'oydactuuby mij huin yi', e may jäy ajcxy oy ji ytiyiygixy. ¹⁴ E janch je tigiyyidac etz yi tü'aa huidibi ja'tp ma je jugy'ajtin huinixibi, xüdz je' etz tzip naxiiyñi; janch tim hueeni jäy huidibi ji nicxiiyb.

Yi jäy yhuinma'ñ mäd ñiguëxägy pen oyyäy o pen ca'

¹⁵ Nayguend'ajtigix mäd yi jäy anijatyipi huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejhuüy ooy oy huinma'ñ mädity; nigooobi ajcxy jadu'n ñaybidägyii, ymäd ajcxy jibic-huinma'ñ. ¹⁶ Miich ajcxy jëbi m'ijxcapy nejaty ajcxy mädity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tim tucy ma jaam'apy quipy. ¹⁷ Je quipy huidibi ooy y'oyity, oy yi' ytiim'aty. Je quipy huidibi ca' y'oyity, ca' yi' oy ytiim'aty. ¹⁸ E je oybi quipy ca' huaad ytiim'aty jibic. E je quipy huidibi ca' y'oyity ca' ytiim'aty oy. ¹⁹ Tüg'óciy je quipy huidi ca' oy ytiim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jëbi mnejhuüy jadu'n nej jäy yjäy'aty co m'ixipy nej chinäy.

Ca' nidüg'óciy jäy ajcxy ytiği huipy ma Dios

²¹ Ca' nminaanim nidüg'óciy jäy ajcxy ytiği huipy jii by tzajpjoty huidibi xyñimaaybich: “Huindzin, Huindzin”, jëda'ajty ajcxy tigi huamb huidibi ycapxymidooyb je Dios chojcän y'ane'män. ²² Mayjäy oy mina'na'ñ huin'it xi huin'it tiempo: “Huindzin, Huindzin”, ti ich ajcxy ngapxhuäcxy miich m'ayuc, e mäd miich mxii ti ich ajcxy nyajpidzimy je ca'oybi; etz mäd miich mxii ti nduñ ich ajcxy mij huinma'ñ. ²³ Huin'it nimähuipy: “Caminaabi miich ajcxy ti nga'ixy'adyii; huinhuäctucich miich jibic tumbidijc ajcxy.”

Je mejtznajxpi je tiy'ajt cop

²⁴ Nidüg'óciy pinjäy huidibi xymibijcpich etz midooyb jadu'n nej ich n'ane'myich yi' ajcxy quipxyjaty mäd je jäy huidibi cohuinma'ñ huidibi ytiyc ycojp ma yhuingixity. ²⁵ Co ymicpojtüy etz ycomy je mij nii, ca' ypadyii nügom je tijc, je' co anajty cixy je' ycojyity. ²⁶ Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jäy huidi janch loci huidi ytiycjcoj ma pu' jot. ²⁷ Co ymiñ je mic poj tuu, chi ycomy je mij nii. Chi yciday je ytiyc; mij ayo'n oy yjajti.

²⁸ Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huidibi cötujcän mäd, ca' yjadu'nity nej je escribas ajcxy.

8

Jesús yajtzögy tüg jibic nibützpa'mmädipi

¹ Co Jesús oy chooni ma je cögop, chi ypagidaci mayjäy. ² Huin'it ñimiini tüg jäy jibic pützpa'mmiidpi. Chi ycojxtinay'ahuüy ma Jesús yhuinduu. Chi minañ: —Huindzin, pen m'a'ixiyyb jëbi xyajtzögyich.

³ Huin'it Jesús nīdooñ je jäy. Chi ñimay:

—Ndzojcpyich, jëbi mdzögy.

Co Jesús jadu'n ñimay je pa'mjäy huin'ítty je ypützpa'm oy ytigooy. ⁴ Chi Jesús ñimay:

—Ca' pin myajnimäy; nicx janchtiy ma je teedy. Minicx tüg huindzigi'ñ huidi Moisés y'ane'my. Huin'it jëbi y' jäy ajcxy ixipy co ti m'agidägy.

Jesús yajtzögy tüg capitán romano ymang

⁵ Co Jesús yja'ty jim Capernaum huin'it tüg capitán ñimiini e ycohuanüy. ⁶ Chi ñimaayi:

—Huindzin, jim ich tüg ndumbi ma ich ndijc huidi tim cöcnaayñip, ca' y'ocyücxni.

⁷ Chi Jesús minañ:

—Ich nicxy nyajtzögy.

⁸ Chi je capitán y'adzooy:

—Huindzin, ca'p ich n'oyjäyity, ca' yhuaadity mdigihuipy ma ich ndijc, jëyi miich nigoo capxy e ti anajty ich ndumbi chögy. ⁹ Ich nañ jadu'n ane'my n'ityich, e nañ nmīdich soldadtijc c'am. Co ich ñimäy: “Nicx”, nicxp; e co ich ñimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n midooy, chi nigooibi yciyxy ycuejty. Chi ajcxy ñimay huidi pahuidijtip:

—Janch tiy'ajt jadu'n nej ñimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadayaabi yëdyjc. ¹¹ Ich jadu'n ñimaayb co mayjäy oy miinaangixy xipidzimy'amy xicidägy'amy, chi ixtäga'ñ quipxyi miid Abraham, Isaac etz Jacob jiiyby ma Dios y'ane'min. ¹² Je judíojäy huidibi ixipy ajcxy jëbi yjatzinäy jiiyby tzajpjoty, je' ajcxy nicxamb agootztuby, jiiyby ajcxy yjihuipy yäxipy etz y tützmúcxipy ytützqueedipy.

¹³ Huin'it Jesús ñimay je capitán:

—Nicx ma mdijc. Jadu'n nej miich xymibicyich, ti ich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymīd töxyjäybi

¹⁴ Chi Jesús ñicxy ma Pedro ytijc. Chi ijxy je Pedro ymīd co jim cijx'am ycöcnäy miid je toyba'm. ¹⁵ Co Jesús cñixajy huin'it je toyba'm ñajxy. Chi pidigy. Chi mic'amy ni'ixiy je caayin uucin.

Jesús yajtzögy mayba'mjäy

¹⁶ Co oy chu'üyñi ycoodzüyñi huin'it yajmimiñ ma Jesús may je huidi ca'oybi miid. E miid y' y'ayuc yjēda'ajty ypidzimday je ca'oybi, e huin'it tüg'ócy je pa'mjäy chooctay. ¹⁷ Jadayaabi je' ytuni yjajti jigix yajcuyduñ jadu'n nej je profeta Isaias minañ: “Y' ci'm ajt nyuu nba'm ti xyajtzocaa'yim etz y' pijcin ixin ti yajnicxtäy.”

Je pinjaty anajty panicxam Jesús

¹⁸ Co Jesús ijxy janch mayjäy anajty ti yjübigiyii, chi ñimay co huen nájxcixy jim'amy mejy ninaxy. ¹⁹ Huin'it ñimiini tüg escriba. Chi ñimay:

—Huindzin, nbanicxamybich miich oy janch tim ma'amy ma anajty mnicxy.

²⁰ Chi Jesús y'adzooy:

—Je huaax ymiid je' ajcxy yjut, e je joon ymiid je' ajcxy ype'ñ. Per ñch, je jäy huídibi tsoon jiiby tzajpjoty, ca' nmíididyich ma nmáhuibich ma nbócxibich.

²¹ E jadügpí ydiscípulo ymíañ:

—Huindzin, nicx jayijp ndeedyich n'ocyajnaaxtigíyich huin'it nbanicxip.

²² Huin'it Jesús y'adzooy:

—Pamiingich, ixmajtzcix yí öcpi huen ymií'öcpi yajnaaxtigíyii.

Jesús jijpcogapxíy je micpoj etz je mejy co anajty ooy ypidígy

²³ Huin'it Jesús oy ybarcotigíyñi. Chi ypadzooni je ydiscípulos ajcxy.

²⁴ E jim anajty ytüyöy mejyhuingíxy, huin'it mic poj ñaymibídzimi. Janch mic y'ocpidicni je mejy jigo jigo je barco cayajnidigoy, pero Jesús anajty chachmaab. ²⁵ Huin'it oy ymígapxyii yajmäybídígyii je' ydiscípulos ajcxy. Chi ñimaayi:

—¡Huindzin, ocyajtzoogich ajcxy! ¡Cheeby ñch ajt n'ocquiniim!

²⁶ Huin'it Jesús y'adzooy:

—¿Na'amy co mdzachtzigíyigixni? ¡Miich ajcxy hueeni miidíty mibijcin!

Huin'it Jesús ypidígy. Chi mígapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigoobi y'occix y'occuejtni chachminaangixy:

—¿Pín yéydijc jada jada', co je mejy je poj ti ycapxymídooyii?

Je Gadara jäy ajcxy huídibi anajty ca'oybi míid

²⁸ Co Jesús yja'ty ma yí níiba' ma yí Gadara ñaax ycajp, chi metz yéydijc, huídi anajty ca'oybi míid oy yijpcoyöyíyii anajty ajcxy, ti chooñ ma je öcpi jut. Yí jäy ajcxy ooy janch ahua'n, e ca' anajty huaad jim ni pín ñaxy ma je tü'aa. ²⁹ E co anajty Jesús jim ñaxy huin'it janch ahua'n ymígapxqueeci:

—¿Ti miich mdunamyb míid ñch ajcxy, Jesús, miich Dios y'ung? ¿Nej ti mmiñ jayijp co xychaachtúngixich ma ca'ni xi tiempo paady?

³⁰ Jiguem ma anajty ajcxy je' yajpaady jim anajty may'idzim y'ojccixy. ³¹ Chi je ca'oybi ymíañ:

—Pen miich xyajpidzim ñch ajcxy, xyaj'adigíyigixy xyajjottigíyigixy yí may'idzim.

³² Chi Jesús ñimay yí' ajcxy:

—Nicxcix.

Huin'it ñíhuaatzi je yéydijc je ca'oybi. Chi oy ytigíyigixy je ca'oybi ma je idzim. Huin'it je idzim oy ñígöboyictäy. Jiiby ajcxy yjicxtäy.

³³ E je jäy ajcxy huídibi anajty idzim ycuend'ajtp, huin'it ajcxy yqueegy míid je tzigí'ñ. Chi co ajcxy yja'ty cajpjoty, huin'it ajcxy ytigíy míydaacpi jadu'n nej anajty ti ytuñyii ti yjadyii. ³⁴ E huin'it chonday je mayjäy ma je cajp. Chi ajcxy ninicxy je Jesús. E co ajcxy ijxpaty, huin'it ajcxy cohuaníy co huen pidzimni ma je naax je cajp.

9

Jesús yajtzögy tüg jäy címätpi tecymätpi

¹ Chi Jesús ybarcitigíy. Chi ñicxy jim'amy mejyñaxy. Chi ooyjäty ma yci'mgajp. ² E jim yajmimiñ tüg yéydijc huídibi anajty címät tecymät. Yajciy ymiñ ma'ndzaayjoty. E co Jesús ijxy co ymiid je mibijcin, chi nimay je pa'mjäy:

—Jotcugí' miich, ti je mbocy nhuinmeecxyich.

³ Huin'it nijéjty je escribas ajcxy, je ley yhuindzin, jot'ajti: “Jadayaabi yéydijc capxtigooyb yí' ma Dios co jadu'n ymíañ.” ⁴ Com Jesús ñejhuíy jadu'n nej anajty ajcxy je jäy tzachjot'ájtigixy, chi ajcxy nimay:

—¿Nej co ajcxy jibic mdzachjot'ájtigixy jotjoty huinma'ñyjoty? ⁵ ¿Huídibi ca' chipity, co nminá'ñibich: “Ti yi mbocy nhuinmeecxich”, o co nminá'ñibich: “Pidig etz tüyöy”? ⁶ Hich ndzojcpyich co miich ajcxy mhujnhuñhuip co hich ti ndzooñich tzajpjoty e paady nmüdich je cötujcin ya naaxhuiñ e jëbi nhuinméecxibich pocyjäy ajcxy.

Huin'it Jesús nimay je cümätpi tecymätpi:

—Pidig, huijtzig yi mdögy etz nicxni ma mdijc.

⁷ Chi je cümätpi tecymätpi ypidigy. Chi ñicxy ma ytijc. ⁸ E co je mayjäy jadu'n ijxy, huin'it ajcxy ooy jihuñy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús nimay Mateo: “Pajamgich”

⁹ Co Jesús oy chooni jim, huin'it ijxy tüg yëydijc, yxñ Mateo, huídibi anajty iñaayb ma yajcogüejttac. Chi nimay:

—Pajamgich.

Huin'it Mateo ytinayigy. Chi panicxy Jesús.

¹⁰ Jadu'n ytuni yjati co Jesús jim ycaj ma Mateo ytijc, e may nañ jadu'n ymiñ yajcogüejtpidijc etz pocyjäydijc. Chi ajcxy jim tú'ciy y'ixtactay müd Jesús etz müd yi' ydiscípulos. ¹¹ Co je fariseos jadu'n ijxy ajcxy, chi nimay ajcxy je' ydiscípulos:

—¿Na'amy co yi mHuindzin ycaymucy müd je yajcogüejtpidijc je pocyjäydijc?

¹² Co Jesús jadu'n midooy huin'it nimay ajcxy:

—Ca' yajmayjaty tzoydumbi huídi ca' ajcxy ypigyii, jëyi huídi ajcxy pijcip.

¹³ Nicx ixpijccixy nej ymiñ jaaybety ma Dios ñecy: “Hich ndzojcpyich co miich ajcxy müd'adipy je pa'ayo'n, ca'ydi co myajhuindzigiy tijaty iyujc.” Ca' hich ti nmiiñich ma je jäy ajcxy huídibi ca' pocy müdity. Hich ti nmiiñich müd yi pocyjäy ycixpi co huen jothuimbijttaaygixy ma Dios.

Amidoogixy Jesús müd je' ycixpi co jaygay y'ijtcixy

¹⁴ Huin'it ajcxy ymiñ Juan ydiscípulos ma Jesús. Chi je ajcxy nimay Jesús:

—¿Na'amy co hich ajcxy etz fariseo ajcxy ayuu'ijtcixy, e yi' ajcxy huídibi xymüdhuidijtp ca' ajcxy ayuu'ijtcixy?

¹⁵ Huin'it Jesús y'adzooy:

—¿Nej jëbi yaj'ayuu'aty jäy ajcxy huídi yajpaatpi ma je pijcpi yajnixñduñyi, pen quipxyi yam yajpaady müd je huídibi pijcp? Minamb je xñ je tiempo mina je pijcpi yajtzonñyb, huin'it janchtiy ajcxy jëbi y'ayuu'ajtcixy.

¹⁶ Ni pin tuc huit ca' agiyñy müd tüg pedas jemyhuit, com ñigi je tuc huit ñajtzñdzñy, chi ñigi o'ctiy yjajtni. ¹⁷ Ca' pin pidägy vino ñi ma tucpi cochac, ycñdzñp je', e tüg'ócñy anajty ti y'ayoodäy je vino ñi müd ñigochac. Pidägipy ajcxy jemy vino ma jemy cochac, chi jadu'n ca' ayooñuipy je vino, ni huindigoyipy je cochac.

Je Jairo ññx, etz je töxyjäy huídibi Jesús yhuit ñidoni

¹⁸ Ma anajty Jesús jim ycapxy ymiydägy huin'it ymiñ tüg mijjäy. Chi ñaygojxtinay'ahuñy ma Jesús yhuinduu. Chi yminañ:

—Nññixich ti y'ögy. Nicx ma hich ndijc etz mgññajipy, jugypigipy ya.

¹⁹ Huin'it Jesús ypidigy. Chi ñicxy müd je ydiscípulos ajcxy. ²⁰ Ma anajty ajcxy jim ytüyöy huin'it ymiñ jixci'py'amy tüg töxyjäy huídi yxñ ybo' ti mi'ijtiyñi majmetz jimijt. Chi ñidoni Jesús yhuitpa'. Huin'it ñajxy je' ypa'm. ²¹⁻²² Jadu'n anajty ti yjot'adyii: “Oy Jesús jëda'ajty yhuitpa' nnidónibich, ti

hich anajty n'agidäygiçh." Huin'it Jesús yhuäc-huimbijty. Chi huindixpejty je töxyjäy. Chi nimay:

—Jotcuje'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³ Chi Jesús oy yjäty ma je mijjäy ytijc. Chi ijxy je xuuxpidijc müd je ymügügtijc ajcxy huidi chachyaaxcixy co anajty ti y'ögy je töxy'anäg. ²⁴ Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. ²⁵ Co anajty je jäy ti ixquejxtäy, chi Jesús ytijctigüy ma anajty je töxy'anäg huijtnäy. Chi majch ma yci'. Chi ypidigy. ²⁶ Chi je jäy oy yajnejhu#ydaayñi ma je jimb# naax cajp nej anajty ti ytuñyii ti yjadyii.

Jesús yajtzögy metz jäy huintzpi

²⁷ Ma anajty jim ti choñ huin'it metz jäy huintzpi ypamiini. Chachñimäyii jadu'n:

—iPa'ayoogich ajcxy, miich David y'ap y'oc!

²⁸ Chi Jesús yajpajäty ma anajty ti yjättägy. Co ytigüy tigoty, chi Jesús yajtiy:

—¿Nej mmibijcpy miich ajcxy co jëbi nyajhuindixcixy?

Huin'it je' ajcxy y'adzooy:

—Mibijcy hich ajcxy, Huindzin.

²⁹ Huin'it Jesús nidoñ je jäy ajcxy huintzpi ma yhuin. Chi nimay ajcxy:

—Jadu'n nej miich ajcxy mmibicy, jadu'n ytuniib yjadib.

³⁰ Chi je' ajcxy y'ijxigy. Huin'it Jesús y'ane'min pidacy:

—Ca' huaad pin myajnejhu#ygyxy.

³¹ Co je' ajcxy ñicxni, chi ajcxy ooy nigapxy nimydacy co Jesús anajty ti yaj'ijxicigy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëdyjc huidibi uum huidibi anajty ca'oybi müd. ³³ E co Jesús yajpidzimy je ca'oybi, chi je mayjäy ooy yciyxy ycuejty ajcxy. Chi ajcxy minaangixy:

—Ni camina jadu'n ycayaj'ixy ya ma jada Israel naax cajp.

³⁴ Per je fariseos jadu'n yminaangixy co Jesús je' müd je ca'oybi ymic'ajt yajpidzimy ca'oybi ma jäy.

Jesús ymüid pa'ayo'n ma mayjäy

³⁵ Jesús jadu'n yhuidijty cajp cajp yaj'ixpijcy majaty tzajptijc. Yajhuin-gapxiy je jäy Dios y'ayuc. Etz nañ jadu'n yaj'agidacy huen ytim huidi yuu huen ytim huidi pa'mity. ³⁶ Co Jesús jadu'n ijxy je mayjäy, chi oy pa'ayooni co yi' ajcxy ca' müidity ni pin huidibi jëbi ñajtcapxiy Dios y'ane'min. Yi' ajcxy jadu'n yajpatp nej cöbixy huidi ca müidity cuend'ajtpi. Ca' nejhu#ygyxy pin y'ane'mip e pin ypanicxip. ³⁷ Huin'it Jesús nimay yi' ydiscípulos ajcxy:

—Tiy'ajt yi', janch mij je tung e hueeni je tumbidijc. ³⁸ Paady pijctzou miich ajcxy ma Dios co huen quexy tumbidijc ma yi' ytung.

10

Jesús huin'ixy je majmetz ydiscípulos

¹ Huin'it Jesús huoy je nimajmetz discípulos. Chi moy ajcxy cötujcin jëbi huaad yajnihuäch je huidi ca'oybi müd. Etz nañ jadu'n yaj'agidägip huen ytim huidi yuu huen ytim huidi pa'mity.

² Jada je' je nimajmetzp yxii: Simón, huidi nañ jadu'n yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³ Felipe, Bartolomé,

Tomás, Mateo, je yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴ Simón, je cananista; e Judas Iscariote, je huidi ycíyeyc Jesús agojix.

Jesús quejxy je' ydiscípulos ajcxy ayuccapxhuäcxpi

⁵ Chi Jesús quejxy yi nimajmetzpi, e jadu'n najtzcapxíy ajcxy:

—Ca' ajcxy mnicxipy ma je naax cajp ma ajcxy je jäy chinäy huídibi ca' ajcxy Israeljäyity. Ni mgatigíhuipy ajcxy ma Samaria naax cajp. ⁶ Nigi jac'oy co ajcxy mnicxipy ma je Israeljäy huídibi ca' nejhuíy huídibi ca' paduñ Dios ytiy'ájtín. ⁷ Nicx miich ajcxy capxhuäcx Dios y'ayuc co ti yhuingoni Dios y'ane'mín. ⁸ Yaj'agídaaccixy yuujäy pa'mjäy huídijaty pützpa'm ymíid. Myajjugypíccixy tiibi ögy. Myajnihuädzip huídi ca'oybi ymíid. Ninigoobi miich jada cötujcín ti myajmoogyixy, nañ ninigoobi yejccixy.

⁹ Ca' ni ti meeñ mminicxcixy. ¹⁰ Ca' mbijty mminicxcixy tü'amgixpi. Mminicxcixy jéda'ajty yi mhuit huídi míid ma mníicx. Ni mgaminicxip huingbi mgíg etz mdajc; com ycopicity co je cajpjäy xyajcáaygixipy xyaj'úuccixipy miich ajcxy.

¹¹ Co anajty mjäty miich ajcxy ma tüg cajp nídiu yajtiu pinjäy jim tudäcyip. Jim ajcxy mhui'mípy ma je' ytijc ixti cooni ajcxy mdzoonip. ¹² Co anajty miich ajcxy mdigíy tigoty huín'it mgapxpócxixipy je codijc jadu'n nej tzocy. ¹³ E pen je codijc ymíhuaad'ajtpy, yejccixy jim íbocxín capxpooxín. E pen je jäy ca' ytudägyity, ñaadigí'adip huídi anajty ti mgapxcixy. ¹⁴ E pen ca' pin xycöbígaaangixy, e ni pin xycamidohuaani ajcxy m'ayuc, pídzimgix jim ma je tíjc o ma je cajp. Chi ajcxy mdecy huinnebípy, je' je' je' tiy'ajt co ca' miich ajcxy ti pocy míidity. ¹⁵ Janch tíy'ajt jadu'n nej nimaaygixy co anajty je xii tiempo paady ma anajty yajtiyduna'ñ je naaxhuíñjyä, jac nigi yajtzaachytuna'ñ yi' ajcxy ca'ydi yi jäy ajcxy huídibi tzinaayb ma Sodoma cajp etz ma Gomorra cajp.

Ixhuídjín pahuídjín

¹⁶ ¡Ocmídoogix! Íich yam miich ajcxy nguejxyp majaty yi jäy huídi jibích huínma'ñ míid. Jadu'n nipaady nej íich nguexyích cöbixy ma je lobi. Huijy cujc ajcxy mnaypidägíib jadu'n nej tza'ñ, per yung naxy jadu'n nej muuxy. ¹⁷ Mnayguend'adiib ajcxy je' co yi jäy ajcxy xycíyegaangixy ma ajcxy míjtungmíidpi etz myajhuobaangixy ma je judíojäy ajcxy ñaymujctac, ¹⁸ ixti xyajnicxaangixy ajcxy ma je gobernador etz je reydiyc ajcxy míid íich ycixpi; e jim íich miich ajcxy xyñigapxipy ma je jäy ajcxy yhuínduu, e nañ jadu'n majaty anajty je jäy ajcxy huídibi ca' yjudíojäyity. ¹⁹ Co anajty ajcxy xyajcídígíy je míjtungmíidpi, ca' ajcxy oy mhuímmaayipy nej m'ocnimáhuipy. Co anajty paady je tiempo, huín'it íich miich ajcxy myajnimáhuipy nej ajcxy mgapxipy. ²⁰ E je ayuc huídibi miich anajty ajcxy mgapxpy, ca' miich anajty je' ajcxy m'ayuc'ájtigixy, je Dios Teedy anajty yjihuí'ñ, je Espíritu Santo, xyajcapxp miich ajcxy.

²¹ Huín'it yi jäy ajcxy ñaygíyegáangixy miñ xyipy tüg quéxtijc co huen yaj'ögyii. E je ungededy cíyega'ñ y'ung; je ung'anäg mibídiga'ñ je ytaj yteedy etz yaj'ócíp ajcxy. ²² Tüg'ócíy je jäy ajcxy ca' ajcxy xy'ix'anípy xychoga' nipy míid íich nxii ycixpi. E pin xymibíjcpich amumdügjot ixti mabaad y'ögy, yi' ajcxy y'alma tzögípy. ²³ E co anajty miich ajcxy jäy xy'ixhuíidity xypahuíidity ma tüg cajp, nicxcix ma huingbi cajp. Janch tíy'ajt jadu'n nej nimaaygixy co ca'ni anajty mgapxhuäcxty ayuc tíy'ajt ma tüg'ócíy je Israelcajp co nhuimbidípyích, íich, je jäy huídibi tzoón tzajpjoty.

²⁴ Tüg yaj'ixpijcpí jac nīgi mij'ajtín miiđity ca'ydi je huidi ixpijcp, e tüg huindzin jac nīgi mij'ajtín miiđity ca'ydi je' ytumbi. ²⁵ Jëb jotcuyc idipy je discipulo co jadu'n yajpaadipy jadu'n nej yhuindzin, e je tumbi jotcuyc idipy nej yhuindzin. Pen jāy minamb co ñch nmiiđich ca'oybi, jac nīgi ymina'na'ñ co miich ajcxy miiđity.

Pin jëbi yajtzigiy

²⁶ Ca' ajcxy mdzigiy yi jāy ajcxy. Ca' ji ni ti yüch ity nicx ycaniguëxigy; nañ ni ti ji ycayajtuñ ayüch ameech nicx ycayajnejhuïy. ²⁷ Huidi ñch miich ajcxy ayüch nyajñimaayb, capxpídzimgix miich yi' mayjäyjoty, e huidi ajcxy midooyb ameech, capxpídzimgix miich yi' mic ma tüg cögop. ²⁸ Ca' ajcxy mdzigihuip je jāy huídib ninicx yaj'öcp etz ca' huaad yi' ajcxy yaj'ögy je alma. Yi' miich ajcxy mdzigiygixy je Dios huídib pidacp je alma etz je ninicx mijjinjoty.

²⁹ ¿Nej ca' jāy ajcxy toogy metz pi'cjoon miiđ tügpi pi'cmeëñi? Per ca' ni tüg huaad ycäy naaxhuiñ, pen ca' tzocy je mDios Teedy huidi jiiby tzajpjoty. ³⁰ Miich ajcxy mgöhuay ac michoy yi'. ³¹ Paady miich ajcxy ca' mdzigihuipy, jac nīgi miich ajcxy mdzoubaady ca'ydi je joon.

Pinjaty ca'p midzöydu'ñ Jesucristo mayjäyjoty

³² Yi jāy ajcxy huidi xymibijcpich etz xyñidiy'ajtyich ma jāy yhuinduu, nañ jadu'n ñch yi' nidiy'ajtyich ma ñch nDeedy huídibi jiiby tzajpjoty. ³³ Per je jāy ajcxy huidi ñch xycoyützpich ma mayjäy ajcxy yhuinduu, nañ jadu'n yi' ngoyützip ma ñch nDeedy yhuinduu huídibi jiiby tzajpjoty.

Miid Jesús ycixpi yjiijity naymidzip'adii

³⁴ Ca' miich ajcxy mhuinmay co ñch ya ti nmiñich miiđ co nmöhuaangixy jotcuyc'ajtín ya naaxhuiñ. ³⁵ ñch ti nmiñich co nyajtziptunipyich jāy miiđ yteedy; töxyjäy miiđ ytaj etz xecy miiđ yxecy. ³⁶ E jadu'n miich ajcxy mdzip'adiiyb mgi'mjuugy mgi'mmigüg.

³⁷ Yi jāy ajcxy huídibi tzojcp ytaj yteedy jac nīgi ca'ydi ñch, ca' yi' ypaadyii co njäy'adiiybich; e pin ymang o ñix tzojcp nīgi ca'ydi ñch, ca' ypadyii co njäy'adiiybich; ³⁸ e pin ca' yci'mdzojcin y'ijxmajztäy etz ca' ñaybidägyii ycixjot huinjot ma ñch, ca' mihuaadity nicx njäy'adiiybich. ³⁹ Pin yjugy'ajtín najtztzogyb, yajtigoyipy yi'; e pin yjugy'ajtín tigooyb miiđ ñch ycixpi, ypaadipy jugy'ajtín huinixii tzajpjoty.

Premio nganar'ajtim

⁴⁰ Pin miich ajcxy xycöbijcp, ñch yi' anajty xycöbijcp; e pin ñch anajty xycöbijcp, nañ ycöbijcpy anajty je huídibi ñch ti xyquejxyich ya naaxhuiñ. ⁴¹ Je huídibi cöbijcp je jāy huídibi Dios y'ayuc capxhuacxip, je' co yi' ymiñ miiđ Dios ycixpi, yi' jadu'mbi je oy'ajtín ypaadipy. Nañ jadu'n je huidi cöbijcp je oybi jāy miiđ co oy yjäyity, yi' jadu'mbi oy'ajtín ypaadipy. ⁴² Je huidi yaj'ucp tüg vaso ñii ma huenyimpinjäy miiđ co xymibicyich, janch ñch miich nimaaygixy, ypaadipy oy'ajtín.

11

Juan je Bautista yquexyöybi

¹ E co Jesús anajty ti najtzcaxiydäy je tiyy'ajt ma je nimajmetzpi ydiscipulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuiy tijaty mijhuinma'ñ anajty Jesús ytumyib, chi quejxy metz je' ydiscípulos ajcxy ma Jesús yajpaady. ³ Chi Juan ydiscípulos ajcxy y'amidooy Jesús:

—¿Nej miich je' je Cristo huidibi anajty minamb o jëbi ñch ajcxy huingbi n'ahuijxcixy?

⁴ Chi Jesús y'adzooy:

—Ñicxcix miich ajcxy nimaaygix yi Juan, je Bautista, tijaty miich ajcxy m'ijxpy mmidooyb co ndumyibich. ⁵ Miich ajcxy yajmüdmüydäg je Juan, jadu'n nej je huintzpi nyajhuindicxigiyich; je címät tecymät nyajtzoocypich; je huidibi jibic nübützpa'm ymüid nyajtzoocpyich; je' ajcxy huidibi cönat nyajmidohüicpyich; je öcpi ajcxy nyajjugypijcpiyich; etz je ayoobtjic, je huidibi yung naxy yjothuinma'ñ nyajmüdmüydacypich Dios y'ayuc. ⁶ Jotcujc yi' ajcxy pinjaty xymibijcpi amumdügiot etz ca' ni nej yjotmetzci' müid ñch.

⁷ Co Juan je Bautista ydiscípulos ajcxy ñicxni, chi Jesús ytigüy nimüydaccoty Juan je Bautista ytung ma je mayjäy, chi ymiinañ:

—¿Ti miich ajcxy oy m'ixy jim müjtigüduum? ¿Tüg nähuaax huidibi poj xijpi?

⁸ ¿Ti ajcxy oy m'ixy? ¿Ti oy m'ixy, tüg jäy huidibi ooy y'oyxöxyity? ⁹ ¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxxiybi? Janch co ti m'ijxcixy tüg jäy jac mij ca'ydi tüg Dios y'ayucnajtzcaxxiybi. ¹⁰ Je' jada je jäy huidibi Dios nigapxy ma ñecy co Dios jadu'n ymiinañ:

Cham nguexyich ñch nguexyöyp jayjip ma miich. Je' yaj'oyihuip je jäy yjot yhuinma'ñ müid ñch ycixpi, tim jadu'n nipaady nej jihuüy jäy tü'aa yaj'oyiy co rey ymiinañ.

¹¹ Co yi jäy ajcxy huidibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty ñch xymibijcp, yi' jac mij naxam ma Dios y'ane'my ca'ydi Juan.

¹² Maabi Juan je Bautista ytundigiy, ixti chamni janch mayjäy amumdügiot ñejhuühua'ñ Dios y'ayuc, je' co ajcxy ytigühua'ñ ma Dios y'ane'my. ¹³ Tüg'öciy ajcxy je Dios y'ayucnajtzcaxxiybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴ Pen miich ajcxy mübijcpi Moisés ycötujcin etz Dios y'ayucnajtzcaxxiybi ajcxy, Juan je Bautista je' je' je Elías huidibi anajty miinamb. ¹⁵ Pinjaty mido'n müid huen mido'mbügipy ñch n'ayuc.

¹⁶ Jesús yjacmiinañ:

—¿Pin müid n'ocyajtügühuibyich yi jäy huidi ajcxy cham tzinaayb? Tim jadu'n yi' ajcxy nej pi'ctijc huidibi ajcxy iyiyb ma mayjäy yjuygixy ytooccixy, müyaaxcixy müdinaaygixy ymüigügtijc: ¹⁷ “Ti njayajxüxyich flauta e ni ca' ti m'ejtzcixy; ti ñch ajcxy öcpi njahuinyäxich, e miich ajcxy ca' ti myäxy.” ¹⁸ Chi Juan, je Bautista, anajty müiñ, e je' ca' ycay y'ügy. E miich ajcxy münaangixy co Juan ca'oybi ymüidity. Jada pi'c'anäctijc nipaady nej miich ajcxy. ¹⁹ Chi ñch je' je jäy huidibi tsoon tzajpjoty nmüiñich, e caaybich uucpich, e miich ajcxy münaangixy: “Ijxcix, cha tüg yëydijc, janch cax janch vino'ucp huidibi mügüg'ajtpy yajcuetpidijc etz pocyjäydijc.” Je Dios tiy'ajt ji je' ñiguëxigy.

Je cajp huidibi ca' ycapxymidoogixy

²⁰ Chi Jesús ojcoty je maygajpjäy ma anajty may mijhuinma'ñ ti tuñ, com je mayjäy ca' anajty yjothuimbidaangixy ma Dios. Chi Jesús ymiinañ:

²¹ —¡Ay miich ayoob ajcxy huidibi tzinaayb jim Corazín! ¡Ay miich ayoob ajcxy huidibi tzinaayb jim Betsaida! Co ixypy ñch ti nduñich jecy'ajty je mijhuinma'ñ müjtzög'ajtín ma je Tiro etz Sidón cajp, jadu'n nej ñch ti nduñich ma miich ajcxy, ti ixypy je Tiro jäy etz Sidón jäy nijothuimbijtcixy etz iñaaygixy saco ñjen ñcuyjam icuyjam, je' je tiy'ajt co ooy ytajcixy ymaygixy

miid ypocy ycixpi. ²² Paady miich ajcxy yam nimaaygixy. Co anajty Dios tıyduna'ñ je naaxhuiñybi jäy, huin'it miich ajcxy Dios xychaachytuna'ñ jac nigı, ca'ydi je jäy ajcxy huıdibi jecy'ajty tzınay jim Tiro etz Sidón.

²³ Miich ajcxy, Capernaum jäy, mnaybidáacigixy jadu'n nej jihuıy mdigıhuaangixy jiıby tzajpjoty. Per ca' yjadu'nıty. Mdigıhuam miich ajcxy ayoodactuuby. Ayo'n tzaachypi mbadaangixy. Co ixypıy ıch ti nduñıch jecy'ajty je mıjhuınma'ñ mıj tzög'ajtın ma Sodoma cajp, jadu'n nej ti nduñıch ma miich ajcxy mgajp, chambaad ixypıy ity yı jadu'mbi cajp, ca' ixypıy Dios cayajtıgooy. ²⁴ Paady ıch miich yam nimaaygixy. Co anajty Dios tıyduna'ñ je naaxhuiñyjäy, huin'it miich ajcxy myajtzaachytuna'ñ jac nigı, ca'ydi je jäy huıdibi jecy'ajty tzınay ma Sodoma ñaaxjot.

Mingixy ma ıch e mbóocxcixıpy

²⁵ Chi Jesús ytigıy Dios mıbijctzooyb, ymınañ:

—Dios Teedy, ıch miich n'ıbaatpıch ngapxpaatpıch. Miich miid je mıj cötujcın jiıby tzajpjoty etz ya naaxhuiñ. Com miich ti mnajtzcaxıy yı m'ixpıjcin ma je ayooıtıjc huıdibi tzınaayb jotxeemy, e ti myüch yı m'ixpıjcin ma yı ixpıcytıjc cohıınma'ñydıjc. ²⁶ Jadu'n, Tat, ti mduñ, com jadu'n miich ti mdzocy ti mjäygidägy.

²⁷ Jesús yjacmınañ:

—ıch nDeedy ti xyajcıdigıydäyıch tüg'ócıy mıc'ajt oy'ajt. Ni pın ca' ijxcapy pın je' y'ung, jäy nDeedyıch tügpajc. Ni pın ca' ijxcapy pın je' nDeedy'ajtpıyıch, jäy ıch, je Dios y'ung tügpajc, etz jacjadyıı huıdibi ıch, je Dios y'ung, nya-jnıguëxıgamyıch. ²⁸ Min ma ıch nidüg'ócıy miich ajcxy huıdıjaty taj mayb myajpatp ma mjot mhuınma'ñ, ıch miich ajcxy nmöhuamyb jotcujc'ajtın. ²⁹ Cöbıcy ycögi'. İxpıc ajcxy ıch ndıy'ajt etz cuydun ıch n'ayuc, com ıch nmıdıch mecxtujcın etz ca' ıch amıj agıx nayjıhuıyııjıch. ³⁰ Ca' ıch n'ane'mın ymıcity, e ıch ndung ca' nımıjaajty.

12

Je discıpulos ajcxy moc cojc yajmujcp pocxxıduum

¹ Chi tüg xıı Jesús yhuıdıty miid ymıgügtıjc ma tüg camjot. E hue' anajty sábadı xıı, je pocxın xıı. Chi Jesús ydiscıpulos ajcxy oy anajty yubögyıı. Chi ajcxy ytıgıy trıgo tım nıxajtzıttı etz yjıcxıy ajcxy je ypajc. ² E co je farıseos ajcxy ijxy nej Jesús ydiscıpulos ajcxy y'ıdııtzcıxy, chi ajcxy nımay Jesús:

—Oc'ix nej miich mdiscıpulos ajcxy y'ıdıch. Hue' ajcxy tumıyb huıdibi ca' huaad ma sábadı xıı yajtuñ.

³ Per Jesús mınañ:

—¿Nej ca' miich ajcxy mgapxyñı ma Dios ñecy, jadu'n nej David etz ymıgügtıjc ajcxy ıdıch jecy'ajty co yuböccıti? ⁴ Pues yı' ajcxy tıgıy ma Dios ytıjc. Chi cay ajcxy je tzajcaagy huıdibi anajty jäy ajcxy ti yajhuındzıgıy Dios. Je' je tzajcaagy huıdibi teedy ajcxy anajty paatıp cayıpy. ⁵ ¿Nej ca' miich ajcxy ti mgapxyñı Moısés ycötujcın necy co je teedy ajcxy jėbi ytuñ ma Dios ytıjc sábadı xıı, e ca' nan tundıgooyb je' ajcxy?

⁶ ıch miich ajcxy nımaaygıxyp, jac nigı mıj cötujcın nmıdıdııch, ca'ydi je cötujcın huıdibi je teedy ajcxy yajtuñ ma Dios ytıjc. ⁷ Pen miich ajcxy ti mhuınjıhuıy nej yhuımbıdzımy jada Dios y'ayuc, co Dios jadu'n ymınañ: “ıch ndzojcpy co miich ajcxy mıdıdıpy pa'ayo'n ca'ydi co ajcxy myegıpy huındzıgı'ñ.” Pen miich ajcxy ti mhuınjıhuıy jada ayuc, ca' ixypıy mbocy'ixy ma ıch nmıgügtıjc huıdibi ca' ma ti ytundıgooy. ⁸ ıch, je jäy huıdibi tzoon

tzajpjoty, nm̄dich ane'min, jaydēbi nimāyich je jāy ajcxy ti jēbi tungixy sábado x̄i.

Je yēydijc huīdibi anajty ycītīdzip

⁹ Chi Jesús choñ jim, ñicxy ma je judío jāy ñaymujctac. ¹⁰ E jiiby ma je naymujctac anajty tūg yēydijc huīdibi ycītītz. Je fariseo ajcxy x̄ihuamyb Jesús, paady ajcxy y'amidooy, ymīnañ:

—¿Nej jēbi tūg pa'mjāy chōgy sábado x̄iji?

¹¹ Chi Jesús y'adzooy:

—Pen ya ma miich ajcxy ji tūg jāy huīdibi cōbixy yjutcōgāy sábado x̄i, ¿nej ca' je' ñicxy yajpīdzimy mic'amy? ¹² Nīgi tzobaatp tūg yēydijc ca'ydi tūg cōbixy, paady Moisés ycōtujcin ca' capx'aducy co tūg oy'ajtin nduunim sábado x̄i, je pōocxin x̄i.

¹³ Chi Jesús nimay je yēydijc:

—Xajtiy yī mgi'.

¹⁴ Co xajtiy yci', chi choocy, e huī'my quipxyjaty m̄id je yci' oybi. Chi je fariseos ajcxy yjotmātcoty, yhuinma'ñ ixtaaygixy ajcxy nej huaad Jesús ocyaj'o'ccixy.

Tūg ayucnajtzcax̄iyin m̄id Jesús ycixpi

¹⁵ E co Jesús nejhuīy nej yī' ajcxy yhuinma'ñ m̄idity, chi jim choñ. E ooy mayjāy ypanicxi Jesús, Jesús yajtzoopy anajty tūg'óciy pinjaty pa'm m̄id.

¹⁶ Jesús ane'my je pa'mjāy ajcxy co ca' huaad nīgapxy nimīydāgy co yī' je' je Cristo. ¹⁷ Jadu'n Jesús ane'my je pa'mjāy jigix ycixipy yca'pxipy je ayuc huīdibi je profeta Isaías yjaay jecy'ajty, co Dios jadu'n ymīnañ:

¹⁸ Jada je' ñich ndumbi huīdi ti nhuin'ixyich. Yī' ñich ooy ndzocyich njihuīyich etz ooy njotcujcich m̄id yī'. ñich yī' nmōhuamybich ñich njihuī'ñ mic'ajt. Yī' capxhuācxip ñich n'ayuc jadu'n nej ndzaachytuna'ñich naaxhuiñjāy ajcxy m̄id ajcxy ypocy ycixpi.

¹⁹ Yī' ni ymīgūgtijc ca' oja'ñ, ni yca'yaxa'ñ, ni ycatināhua'ñ, ni pin ca' m̄idoohuipy ma cajp cujc.

²⁰ Ca' yī' tzaachytuna'ñ ayoobitijc etz huīdibi ayo'ndumb ijtp. Etz nañ ni ca' yajtigoya'ñ huīdibi ayoobitijc yco'ōgy'ungdijc yjijp'ijxpy. Jadu'n nej jāy cayajhuindigoy tzajcapy huīdi huīdyip etz ni cayajpich je mecha huīdibi uuxy uuxy tūcxp. Ixti mabaad anajty yajcopicy y'ane'min tudāgyipi.

²¹ E yī' mayjāy ooy yjijp'ixa'ñyii.

Xīgixy Jesús co m̄idity mujcu' ymic'ajt

²² Chi m̄id mīñ ajcxy ma Jesús tūg jāy huīdibi huīntzip etz uum. Je' anajty m̄id ca'oybi. Chi Jesús yajtzoogy, e chi y'ijxigy etz ycapxigy. ²³ Co Jesús jadu'n tuñ, chi je mayjāy ytigīy huīnmay'ahuīdijt, chi ajcxy ymīnañ:

—¿Nej jada je', je David y'ap y'oc huīdibi rey'adam?

²⁴ Per co je fariseos ajcxy nejhuīy nej je jāy huīnmay, chi ajcxy ymīnañ:

—Jadaabi yēydijc yajpīdzimy ca'oybi m̄id je mujcu' huīndzin ymic'ajt (ca' yī' yjējity je Cristo).

²⁵ Per Jesús ñejhuīyib anajty ti je fariseos ajcxy yhuinmaayb, chi ymīnañ:

—Pen tūgpicy tungm̄idpi ixipy ñaybijc-huācxigixy, etz ñaymīdziptzōonīgixy ixipy ac jēyi, pues cixipy yī' ajcxy y'ane'min. Pen tūg cajp o tūgpicy jugymīgūg ixipy ñaybijc-huācxigixy, pues ca' ajcxy y'idaangixy tūgmucy. ²⁶ Pen Satanás, je ca'oybi huīndzin, yajpīdzimy ixipy ca'oybi ma je jāy ajcxy, chi cī'm ixipy je ca'oybi ti ñaybijc-huācxigixy, e je Satanás ymic'ajt ca' y'ida'ñ. ²⁷ Miich ajcxy minamb co ñich nyajpīdzimyich ca'oybi m̄id je

ca'oybi huindzin, je Beelzebú ymic'ajt. Pen tiy'ajt jadu'n nej miich ajcxy mina'nñ, je jäy ajcxy huídibi xymijnicxpejt miich ajcxy, ¿nej yi' ajcxy paady mic'ajt ma je mujcu' co ajcxy yajpidzimy ca'oybi ma je pa'm jäy? Pues ca', paady yi' ajcxy tiy'ajt yejcp co miich ajcxy ti mgapxtigoy co yminaangixy co ñich nyajpidzimyich ca'oybi miid Satanás ymic'ajt. ²⁸ Per ñich nyajpidzimyich ca'oybi ma pa'mjäy miid Dios yjihuññ ymic'ajt. Paady miich ajcxy nejhuiyb co ti ymiññ yjaty je Dios y'ane'min ma miich ajcxy.

²⁹ (Dios ycötujcin jac mic ca'ydi je ca'oybi ycötujcin, paady jëbi nyajpidzimyich ca'oybi.) ¿Nej jëbi tüg jäy ytigüy ma tüg micpi jäy ytijc etz pigaani tijaty yi' ymiid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jëb pijcip tijaty ymiid. ³⁰ Pinjaty ca' xymijnicxpetyich, xymidzipich yi'. Pinjaty ca' tuñ miid ñich co jäy nyaj'ixpicyich, hue' je' ajcxy jäy yajhuinma'ñyigooyb.

³¹ Janch ñich miich ajcxy nimäy co Dios jëbi huinmecxip tüg'óciy pocy huídibi jäy ytungixp etz tüg'óciy jibicpi huídibi jäy ycapxcixp. Jëyi janchtiy co pinjaty capxtigooyb miid je Espíritu Santo, je Dios yjihuññ ymic'ajt, ca' Dios huinmecxip nimina. ³² Pinjaty jibic xyñigapxpich xyñimiydaccpich, je' huinmecxam. Per je huídibi jibic ñigapxpy je Espíritu Santo, je' ca' huinmecxa'ñ ni jadachambi tiempo, etz ni camina xii.

Yi quipy yi' ytüm yi' miid yaj'ijxcapy

³³ Pen miich ajcxy mnejhuñhuamy je quipy pen oy quipy, o pen ca', jëbi mnejhuñhuapy co je quipy nicxy ytüm'aty. Pen oy je ytüm, miich mina'nip co oy je quipy. E pen ca' oy ytüm'aty, huin'it miich ajcxy mina'nip co ca' y'oyity je quipy. ³⁴ Jibic jäy miich ajcxy, jadu'n nipaady nej jihuñy ahua'n iyujc xy'ung'ajtp. Pen miich ajcxy jibic jäy'ajtp, ¿nej jëbi miich ajcxy oybi ayuc mgapxipy? Jadu'n nej jäy ajcxy yjot yhuinma'ñ miidity, ac tim jadu'n ajcxy ycapxy. ³⁵ Je jäy huídibi oy ayuc ycapxpy, ymiid oyjot oyhuinma'ñ paady oy ayuc capxy. Je jäy huídibi jibic ayuc capxp, ymiid jibic jot jibic huinma'ñ, paady jibic ayuc capxy. ³⁶ ñich miich ajcxy nimay co anajty paady je xii je tiempo mina Dios tiyduna'ñ je naaxhuiñyjäy, huin'it ajcxy y'adzohuipy miid huen tim huídibi ayuc huídibi anajty ajcxy ti mgapxy. ³⁷ Com nejjaty miich anajty ajcxy ti mgapxy je m'ayuc jadu'n miich ajcxy Dios xytiydunip. Com miid yi' mgi'm ayuc yi' miid m'oybidzimipy mhuätzpidzimipy. E nañ jadu'n miid yi' mgi'm ayuc yi' miid mbocycähuipy.

Jibicjäydijc ajcxy pijctzoogixy tüg ijxpejt mijhuinma'ñybi

³⁸ Chi nijëjity fariseos ajcxy etz escribas ajcxy Jesús nimayí:

—Huindzin, n'ixamy ñich ajcxy miich tüg m'ijxpejt.

³⁹ Chi Jesús y'adzooy:

—Yi jibic jäydijc ajcxy etz ajcxy huídibi ca' mibiga'ñ Dios ypijctzooyb tüg ijxpejt huídibi tzomb tzajpjoty. Per Dios ca' yega'ñ jadüg ijxpejt. Ti Dios yecy tüg ijxpejt ma Jonás. ⁴⁰ Com jadu'n nej Jonás jecy'ajty ijxpejt yejcy co y'ijty tugüg xii tugüg tzuum mejyoty ma acx ymoxac, nañ tim jadu'n ñich, je jäy huídibi tsoon tzajpjoty, nyegamy ijxpejt jadachambi tiempo co n'idipyich tugüg xii etz tugüg tzuum naaxjoty. ⁴¹ Je mayjäy huídibi anajty tzinaayb ma Nínive cajp, ti jothuimbijtcixy etz ti ixmach ajcxy huídijaty jibicpi ajcxy ytumyb co Jonás capxhuäcxy Dios y'ayuc ma yi' ajcxy. Cha ñich ngapxhuäcxyich Dios y'ayuc ma miich ajcxy, etz jac niği cötujcin nmüdidyich, ca'ydi Jonás; e ca' miich ajcxy mjothuimbity. Paady co anajty Dios tiyduna'ñ je naaxhuiñyjäy, je Nínive jäy miich ajcxy xyajpocycähuam. ⁴² Nañ jadu'n je töxyjäy reina huídibi tzinay jecy'ajty ma madza'cruudz ypidzimy, yi' je' xidähuam je jäy ajcxy huídibi

tzinaayb jadachambi tiempo, etz yajpocycähuüb ajcxy. Je reina tzoön jiguëgy nicxy co amido'ida'ñ je rey Salomón ma capxhuäcxi Dios y'ayuc. Ji naaxhuiñ jadachambi tüg Dios ytiy'ajtmüdpí jac nügí ymijity, ca'ydi Salomón anajty, e ca' je jäy ajcxy mijpídäga'ñ.

Je jibic espíritu co jadüg'oc yhuimbity

⁴³⁻⁴⁴ Yi jäy ajcxy huidibi cham tzinaayb, quipxyjaty ajcxy müd je ca'oybi. Co je ca'oybi ypidzimy ma je jäy, chi je' ñicxy jim mijtigüduum y'ijxtacy. Co ca' paty ypocxtac, huin'it ymína'ñ: “Huimbidaambich ma je jäy yjot yhuinma'ñ ma ñich ti n'octzombi.” Co je ca'oybi yjäty ma anajty ti chinäy, chi paty je jäy yjot yhuinma'ñ ooy yhuätzity etz yajxon ypedigity oy oyduñ. ⁴⁵ Chi je ca'oybi ñicxy oy yajtzoön jahuixtujc ca'oybi jac jibicpi ca'ydi je'. Chi ajcxy ytigüy ma je jäy yjot yhuinma'ñ, e chinay ajcxy jüby. Huin'it je jäy jac'öctiy oy yjajtni, ca'ydi jadu'n nej anajty jayijp'aty.

Jesús ytaj etz y'uch miguëx ajcxy

⁴⁶ Jesús yaj'ixpijcpy anajty je mayjäy, co oy yja'ty je' ytaj etz y'uch miguëx ajcxy. Hue' ajcxy yhui'my tiba'y. Je' ajcxy anajty ymígapxamy Jesús. ⁴⁷ Chi jäy yajnimay Jesús:

—Yi mdaj etz m'uch miguëx ajcxy, chiiby ajcxy tiba'y, miich xyjamígapxamb.

⁴⁸ Jesús y'adzooy, nimay je jäy huidibi ytaj y'ayuc yajnajxi ma yi':

—¿Pín jäy miich ajcxy mdijy co ñich ndaj'adyii etz ñich n'uch'adyii nmigüg'adyii?

⁴⁹ Huin'it Jesús nitziihuüy je' ydiscípulos ajcxy e ymínañ:

—Jada ñich ndiscípulos ajcxy jadu'n nipaady nej ñich ndaj etz ñich n'uch nmiguëx. ⁵⁰ Huen ytimpínity huidibi ytumyb ñich nDeedy chojcín, huidibi jüby tzajpjoty, pues jadu'n yi' ajcxy nipaady nej ñich ndaj etz ñich n'uch miguëx.

13

Je ayuccapxhuäcxi y'ijxpejt (niipi ijxpejt)

¹ Je huin'it xi Jesús choñ ma je tijc. Chi ñicxy ma je mejypa' jim oy y'iñay'ihuüy. ² E co mayjäy ooy ñaymujci jim ma anajty Jesús iñay, chi Jesús ytigüy barcojoty. Per tüg'ócüy je mayjäy yhui'mday ma mejypa'. ³ Jesús ytigüy jäy yaj'ixpijcp müd jihuimbit ayuc, ymínañ:

—Tüg jäy choñ trigotüm huijp. ⁴ E ma anajty jim ytimhuüy, huin'it je ytim oy naagity ycäy ma tü'aa. Chi jada' je joon ajcxy oy ymüñ etz ypiihuüy je tim. ⁵ Nijëjity ytim ycäy ma tzaanïc x ma anajty hueeni naax. Jada tim tzojc ymujxy. ⁶ Com hueeni anajty je naax ma je tzaanïc x, chi co oy xi'an ypadyii, chi ytitztay, com ca' anajty je ytictz yeegity. ⁷ Nijëjity tim oy ycäy ma ujtz'aayjot ma apyjot, e ujtz'öctay je trigo mang. ⁸ Per je tim huidibi ca'u ma oy ñaax, je' yon yajxon e tim'ajt may'amy; tüg ypi'cpajc üpxmajc oy yco'ity, jadüg pi'cpajc tugi'px oy yco'ity, jadüg pi'cpajc migo'px oy yco'ity. ⁹ Pinjaty mido'n müd huen mido'mbicy jada ayuc.

Ti ycxipi je ijxpejt

¹⁰ Chi je' ydiscípulos ajcxy nimijhua'cy Jesús, chi ajcxy yajtiy:

—¿Na'amy co myajtuñ jihuimbit ayuc co myaj'ixpijcy je mayjäy?

¹¹ Chi Jesús y'adzooy, ymínañ:

—Miich ajcxy jaydeb mnejhuühuüpy huidibi Dios ñigapxyp ñimiydacpy coyüch'amy ma y'ane'mín. Jacjadyii jäy ca' ajcxy huinjihuühuüpy. ¹² Pinjaty

ymiid yajmöhuiꝑ nīgi, pinjaty hueen miid yajꝑigipy nīgi, oy ixyipy hueen jadim miidity. ¹³ Paady jihuimbit'amy nyajnimaaꝑich; jaydebi pinjaty ijxcixy, ñipaty nejihuíy ca' ti ijxcixy; etz co ajcxy midoogixy, ca' ajcxy huinjihuíy, ñipaty nejihuíy ca' ti midoogixy. ¹⁴ Jadayaabi ytunyii yjadyii jadu'n nej je profeta Isaías jaaybejty yajhui'my ma jadu'n yminañ:

Miich ajcxy midohuamy, per ca' mhuijihuíhuangixy. Miich ajcxy m'ixamy, nañ ca' mhuijihuíhuaangixy huídibi ti m'ijxcixy.

¹⁵ Com jadayaabi jāy ooy ajcxy yjot yhuinma'ñ ti y'ahuimbity juuñ. Nej ajcxy yjamidoy, ca' ajcxy ymidohui'mgixy. Nej ajcxy ja'ixy, ca' y'ijxhui'mgixy. Nej ajcxy yjahuinjihuíygyx, per ca' yhuinjihuíy ma yjot yhuinma'ñ. Yí' ajcxy ca' yjothuimbidaangixy ma iich, jaydeb nyajnidzögibich ajcxy.

¹⁶ Per jotcuꝑc miich ajcxy, co miich ajcxy ijxhui'my miid mhuiin huídibi ndumybiꝑ, e mmido'mbiꝑy ajcxy iich n'ayuc. ¹⁷ Janch tıy'ajt jadu'n nej iich miich nimaagyx. Janch tıy'ajt co may profetas ajcxy etz tudägy jāy ajcxy huídibi tzinaayb jecy'ajty, ooy ajcxy ja'ixañ huídibi miich ajcxy m'ijxyp cham, per ca' ajcxy ixy. E ooy ajcxy jamidohuañ je ayuc huídibi miich ajcxy midooyb cham, per ca' ajcxy midoy.

Jesús najtzcapxıy je ijxpejt ma je niipi

¹⁸ Amido'it miich ajcxy, jadu'n nej yhuimbizımy jada jihuimbit ayuc maabi je tım huiꝑi. ¹⁹ Je jāy ajcxy huídibi amido'ijtp Dios y'ayuc, e mic'amy je ca'oybi yajꝑidzımy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tım huídibi cāb tıgıꝑc, e je joon ajcxy mic'amy yꝑıımuꝑtayı. ²⁰⁻²¹ Je jāy ajcxy huídibi amido'ijtp Dios y'ayuc janch jotcuꝑc, per co agapxıyꝑ paady, co tzaachꝑi minaxy yajnaxy miid Dios y'ayuc ycıꝑi, chi mic'amy ajcxy ixmajtznı Dios y'ayuc, jadu'n ajcxy nej je trigotım huídibi ti ycāy ma tzaanıꝑ, huídibi ca' oy ytictz miidity. ²² Je jāy ajcxy huídibi amido'ijtp Dios y'ayuc, e co ñıꝑnı, chi jāy dıgooyñı Dios y'ayuc miid jotcuꝑc'ajtıñ tzinaayın, comeeñ'ajtıñ etz adzoꝑcın. Jadu'n ajcxy nipaady nej trigotım huídibi ti ycāy uꝑtꝑoty, e ca' ytım'aty miid co oy y'ujt'ögy. ²³ Je jāy ajcxy huídibi amido'ijtp etz cöbıꝑc yajxon Dios y'ayuc amumdüꝑot etz Dios y'ayuc ytumyꝑ ma ajcxy yjot yhuinma'ñ, jadu'n ajcxy nipaady nej je tım huídibi ti ycāy ma oy ñıax etz ti ytım'aty may'amy. Tıg ꝑı'ꝑajc iıꝑx majc oy yco'ity, etz jadüꝑ ꝑı'ꝑajc tıgı'ꝑx oy yco'ity, etz jadüꝑ ꝑı'ꝑajc mıgo'ꝑx oy yco'ity.

Je ijxpejt co je jıbic uꝑtz ymıxy ma je trigo cam

²⁴ Chi Jesús yaj'ıꝑıꝑcy jadüꝑ jihuimbit ayuc, yminañ:
—Je Dios y'ane'mın jadu'n nipaady nej tıg yēy dıꝑc huídibi trigo tım huiꝑ ma je' ycam. ²⁵ Per co ajcxy yma'öctay nidüꝑ'óꝑıy je cogam, chi ytıgıy tıg ymidzıꝑ ma je ycamjot. Chi je midzıꝑ jıbic uꝑtz tım oy huiꝑy ma je trigo cam. Chi ñıꝑnı. ²⁶ E co je trigo oy yooñ, chi yꝑıꝑy. Nañ jadu'n je jıbic uꝑtz oy yooñ. ²⁷ Chi je ytumbıdıꝑc oy yhuındzın yajnimay: “Huındzın, ¿nej ca' ti mnıꝑy ac trigotım? ¿Nej co jım nañ jadu'n jıbic uꝑtz yajpaady?” ²⁸ Chi je cogam yminañ: “Huen jada' nmıdzıꝑıꝑ jadu'n ti y'ıdıꝑh.” Chi je tumbıdıꝑc y'amıdoohui: “¿Nej mdzoꝑcꝑy co iich ajcxy nhuijxıgıꝑıꝑc je jıbic uꝑtzı?” ²⁹ Chi je cogam yminañ: “Ca'. Pen miich ajcxy mhuijxıꝑcꝑy je jıbic uꝑtz, ca' jecyıty co m'ahuijxmıgıꝑy nañ jadu'n je trigo. ³⁰ İxmatz, huen je jıbic uꝑtz yeegy tıgmıcy miid je trigo, ixtı coonı anajty yꝑıdıꝑy je cosecha. Co cosecha paty, huin'ıt nguexa'ñıch je ndumbıdıꝑc co huen jayıꝑ ꝑıjıꝑy je jıbic uꝑtz etz axotzıꝑy etz nõgıꝑy. E co yajꝑıdıꝑtayı je jıbic uꝑtz, chi yajꝑıdıꝑıꝑy je trigo e ꝑıdäꝑıꝑy ma je tze'x.”

Je ijxpejt ma je mostazapajc

31-32 Nañ jadu'n Jesús yaj'ixpijcy jadüg jihuimbit ayuc, ymínañ:

—Je Dios y'ane'mín jadu'n nipaady nej tüg mostazapajc huídibi tüg jáy ñiip ma je' ycam. E je mostaza ytiim je' jac tím mutz ca'ydi ni huídibi ujtz tiim. Per co je mostaza ytiim ymujx etz yoñ, chi y'ahuimbijty jac mij ca'ydi jacjadyii ujtz. E hue' ñicxy yjaty janch mij, ixti joon ajcxy oy yqueec miiñ yqueec xijpy jim, pidägy je ype'ñ ma je mostaza y'aacx.

Je iixpejt ma je levadura huídibi ca' y'oyity

33 Nañ jadu'n Jesús yaj'ixpijcy jadüg jihuimbit ayuc, ymínañ:

—Je Dios y'ane'mín jadu'n nipaady nej levadura huídibi tüg töxyjäy ypidacpy miiid je harina, jigix je harina oy ypidägy.

Nej anajty Jesús yajtuñ je iixpejt

34 Tüg'óciy Jesús yaj'ixpijcy je mayjäy, jihuimbit'amy yaj'ixpijcy, e ni ti ca' jáy yaj'ixpijcy cayajnimäy jihuimbit ayuc. 35 Jadu'n Jesús ytúuñ, jigix yajcuyduñ je ayuc huídibi je profeta Isaías yjaayhui'm jecy'ajty, co jadu'n ymínañ: ñich ngapxamyich ac tím jihuimbit ayuc. ñich nigapxamybich tijaty huídibi ca' pin nejhuíy, mabaad Dios oga'n yajcojy je naaxhuiñybi.

Jesús capxticxni nej yhuimbizimye je jibic ujtz ma je trigo cam

36 Chi Jesús capxycijxy miiid je mayjäy, chi ñicxy ma tüg tijc. Chi ytiigiy tigoty miiid je' ydiscípulos ajcxy. Chi Jesús ydiscípulos ajcxy nimijhua'cy Jesús, ymínañ ajcxy:

—Tun may'ajt ñich ajcxy xyajhuinjihuñygy je jihuimbit ayuc co ti mnigapxy je jibic ujtz ma je trigo cam.

37 Chi Jesús yajnimay:

—Ñich, je jáy huídibi tsoon tzajpjoty, jadu'n ñich nipaady nej je jáy huídibi niip je oybi tím ma je ycam. 38 Je cam jadu'n nipaady nej tüg'óciy naaxhuiñyjäy. Je oybi tím jadu'n nipaady nej je jáy ajcxy huídibi cöbijcp Dios y'ane'mín. Je jibic ujtz jadu'n nipaady nej je jáy ajcxy huídibi cöbijcy ajcxy je mujcu' y'ane'mín. 39 Je jáy huídibi niipy je jibic ujtz, jadu'n yi' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytiigoy. Je ajcxy huídibi yajpidic je cosecha, nipaady nej je ángeles ajcxy. 40 Jadu'n nej je jibic ujtz oy yajpujxigy etz yajpidacy jinjoty, nañ tím jadu'n ñicxy yjaty miiid je jáy ajcxy huídibi cöbijcp je mujcu' y'ane'mín co anajty je naaxhuiñ cixy ytiigoy. 41 Co anajty je naaxhuiñ ycixy ytiigoy, chi ñich, je jáy huídibi tsoon tzajpjoty, nguexamyich n'ángeles huen yajmujctäy je jáy huídibi je ymígüg yajtundigooyb, etz yi huídibi ajcxy jibic-huinma'ñ tumb. 42 Co yajmujctähuipy je jibicjäydic, chi ajcxy yajpidägipy mijjinjoty, jiiiby ajcxy yäxa'ñ etz ytitzmucxy ytitzqueecy miiid je ayo'n ycixpi. 43 Per je jáy ajcxy huídibi cuydumb Dios chojcín, idam ajcxy miiid Dios Teedy jiiiby tzajpjoty. Ymii'idamy ajcxy tüg oy'ajti, jadu'n nipaadip nej je xii ytícxin yjajin. Pen miich ajcxy mido'n miiid, mido'mbijc ajcxy ñich n'ayuc.

Je y'ixpejt je meen huídii yüchip

44 Je Dios y'ane'mín jadu'n nipaady nej meen huídibi yüch ijtp ma tüg cam. Per co tüg jáy paady je meen, chi mic'amy jadüg'oc yüdz tigach. Chi ooy yxondägy. Chi ñicxy etz tooctäy tüg'óciy huídibi ymiiid etz juy je naax.

Je y'ixpejt je perla huídibi tzoohuip

45 Nañ jadu'n Dios y'ane'mín jadu'n nipaady nej tüg ajuuyb adoocpi huídibi ijxtaayb tüg oybi perla huídibi tzoobatp. 46 E co anajty paady tüg perla huídibi janch tzou, chi ñicxy tooctigoydäy tüg'óciy huídibi ymiiid etz juy je perla.

Je acxmadzi'ñ y'ixpejt

⁴⁷ E nañ jadu'n Dios y'ane'min jadu'n nipaady nej tüg acxmadzi'ñ huidibi jäy mïd ycojibibby mejyjoty. Chi jibby ytigiy huen ytim huidibi acxity. ⁴⁸ E co anajty je acxmadzi'ñ y'uch mïd je acx, chi je jäy ajcxy yajpidzimy ma mejypa'áy. Chi ñay ajcxy jim mejypa'áy etz huin'ixy ajcxy je oyjatypi acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹ Tim jadu'n nej ti yjaty mïd je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jäydijc e pidäga'ñ ajcxy abicy, nañ jadu'n huin'ixa'ñ je oy jäydijc, e pidäga'ñ ajcxy nañ jadu'n abicy. ⁵⁰ Chi je ángeles ajcxy pidäga'ñ je jibicjäydijc mij jijnjoty. Jibby jijnjoty ajcxy yäxa'ñ ytinähua'ñ etz ytüz mucxaangixy ytüz queedaangixy mïd je ayo'n mïd je tzaachypí ycixpi.

Je jäy huidibi jajt nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhuinjihuïyb mïch ajcxy tüg'óciy huidibi ñch ti ngapxich?

Chi ajcxy y'adzooy:

—Huindzin, ti nhuinjihuïy ñch ajcxy.

⁵² Chi Jesús ajcxy nimay:

—Nidüg nidüg escriba co ti ixpiçytäy tüg'óciy Dios ytiy'ajt y'ane'min huidibi tzajpjoty tzoön, hue' jadu'n nipaady nej tüg codijc comeñybi huidijaty ymïd yjajty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpiçtay jada jihuimbit ayuc, chi chooñ jim. ⁵⁴ Co Jesús chooñ jim, chi ñicxy ma yci'mnaax yci'mgajp. Chi Jesús ytigiy ma je judio ñaymujctac, e ytigiy yaj'ixpiçp. Chi je mayjäy jibby ooy jihuïy huinmay nej yí' yaj'ixpiçy, ymïnañ ajcxy:

—¿Ma jada' jada yëydijc ti paady jada ixpiçin? ¿Ma mic'ajt paady co ooy mijhuinma'ñ tzachtuñ? ⁵⁵ Jadayaabi yëydijc hue' yteedy'ajtpy je tzejtzpi, etz ytaj'ajtpy María. E ñch ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma ñch ajt je' y'uch ajcxy töxyjäy. ¿Ma oy ti paady jada ixpiçin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amyity tüg'óciy je mayjäy ajcxy ooy yajmij'aty yí' jäy ajcxy huidibi najtzcapxïyb Dios y'ayuc, ca' ydi huidibi y'ayucnajtzcapxïyb ma yci'mnaax yci'mgajp yci'mjin yci'mdijc.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, mïd co je jäy ajcxy ca' mijpidägyii.

14

Juan el Bautista co y'ögy

¹ Je huin'it tiempo Herodes huidibi anajty ane'mb jim Galilea tiy'ajt paty nej Jesús ytuñ. ² E yí' nimay je ymidungmïdpidijc:

—Yijibi jäy huidibi tzachtumb mijhuinma'ñ, yí' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt mïd jaydëb mijhuinma'ñ tuñ.

³ Herodes ti anajty ni'ane'mdiy co Juan huen yajmach, e yajpidägipy pujxtigoty. Jadu'n Herodes tuñ mïd Herodías ycixpi. Je Herodías je' anajty mïd jayijp'aty ti ypiçy Felipe, je Herodes y'ajch, chi ti ixmajch Felipe, chi ypiçy mïd Herodes. ⁴ Juan ti anajty nimäy Herodes co ti ytundigooy co ti piçy mïd Herodías.

⁵ Je rey Herodes ooy anajty jayaj'öga'ñ yí Juan, per tzigüyb anajty müid je mayjäy. Com je mayjäy ti anajty mibicy ajcxy co Juan hue' anajty tügí Dios tñy'ajt müidpi, tüg profeta. ⁶ Co Herodes yjimijtprejty, chi anajty ñayñixíduñyí, e chi Herodías ñix ñicxy ejtzp ma Herodes yhuinduu. Je rey ooy jáygidacy nej anajty Herodías ñix y'ejch. Paady Herodes Herodías ñix nimay:

⁷ —Dios ích yam ngapxpatpy co nmöhuamyb ti mdimypijctzooyb.

⁸ Chi Herodías nimay je' ñix co huen pijctzoohui je Juan, je Bautista, ycohuajc ma tüg texy. Chi Herodías ñix je rey nimay:

—Ndzojcyích co miich xymöhuip Juan, je Bautista, ycohuajc ma tüg texy.

⁹⁻¹⁰ Co jadu'n midooy je rey, chi ytigüy tajp maybi mij cajee. Per co ti anajty Dios capxpaatni, ymínaaní mayjäy yhuinduu co ymöhuamyb tijaty ypijctzooyb. Paady ane'my tüg soldado co huen nicxy yajtzoñyí Juan ycohuajc, e möhuipy Herodías ñix. ¹¹ Huin'it je soldado oy je Juan ycohuajc yajmínajci jilby pujxtigoty. Chi moy je töxy'anäg, e je töxy'anäg yejcnaixni ma ytaj.

¹² Huin'it xí je Juan ydiscípulos ajcxy yja'ty. Chi ajcxy oy yajnaaxtigüy je Juan ñinícx. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuüy ti anajty ti ytuñyí ti yjadyí müid Juan, chi ytigüy ma tüg barco naydüg, e nicxni ma tüg it ma ca' pín chinäy. Co je mayjäy nejhuüy co Jesús ti ñicxy, chi ajcxy choday canaag agajp, nicxy ajcxy ma Jesús yajpaady, hue' tecygi'm ajcxy nicxy. ¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huidibi anajty ajcxy jim ymüid miiñ. ¹⁵ Com ti anajty chuu'íñi, paady je' ydiscípulos ajcxy nimíjhua'cy Jesús, e nimay ajcxy:

—Ti chuu'íñi, e ca' ya pín china'y, paady capxcíxy müid jada mayjäy ajcxy, jaydeb ajcxy nicxy íxtäy ycaayín y'uucín ma yí mutz cajp ajcxy huígonbi.

¹⁶ Chi Jesús ymínañ:

—Ca' ycopícyíty co ajcxy nicxy jicxy íxtäy. Miich ajcxy möhuip caayín uucín.

¹⁷ Chi je' ajcxy ymínañ:

—Per ích ajcxy jeyí yeeby nmüidity migoox tzajcaagy etz metz acx.

¹⁸ Chi Jesús ymínañ:

—Mimiingix yam'amy.

¹⁹ Chi Jesús nimay je mayjäy co huen íñay'ihuíydaaygíxy ma pí'cmüy'ung nícx. Huin'it Jesús je migooxpí tzajcaagy conígy etz je metzpi acx. Chi ypa'tíjxy jilby tzajpcíxy, e yajnajxy Dioscojuyipy. Chi tujc-huäcxy je tzajcaagy etz moy je' ydiscípulos ajcxy, co huen yajhuäcxycíxy ma je mayjäy.

²⁰ Nidüg'ócíy je mayjäy ajcxy ycaý cüxyí. Co je mayjäy ycaýday, chi je discípulos ajcxy yajmujcy je cayduc jicxtuc, e yaj'ujch ajcxy majmetz cach.

²¹ Migoox mil anajty ajcxy je yëydíjctijc huidibi cay uuc. E ca' ajcxy michoy je töxyjäydíjct ajcxy etz je y'ung y'anäg ajcxy.

Jesús yöy ñíhuíngíxy

²² Chi Jesús ane'my yí ydiscípulos ajcxy co huen barco tigüygíxy mic'amy, jigix ñicxipy ajcxy jim meyy nínaxy. Namí yí ydiscípulos ajcxy choñ barcojoty, Jesús ycapxycíjxy müid je mayjäy huen nícxíxni. ²³ Co anajty Jesús ti ycapxycíxy müid je mayjäy, chi ñicxy naydüg ma tüg cögop Dios mibíjctzoobi. Co ycoodzíñ Jesús naydüg anajty yajpaady. ²⁴ Co ycoodzíñ, meyy cujc anajty je barco cujc nicxy. E je ní ooy anajty ymíjjetzpety ma je barco, je' co ooy anajty mic yjanchpojy. ²⁵ E co oy ymoñy, huin'it Jesús ymíjhua'cy ma je'

ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús anajty ymiiñ mejyhuingíxy, chi ajcxy ooy ñay'adzigiíy. Ooy ajcxy yaaxqueecy ymíñañ ajcxy:

—Hue' ñich ajt ijxmaníyím.

²⁷ Chi Jesús mic'amy ymígapxy ajcxy etz nimay:

—Huinmic jotmic naybidáacigíxy, ñich yí'. Ca' mdzigiíyigíxy.

²⁸ Chi oy Pedro Jesús ymígapxyii, nimaayí:

—Huindzin, pen janch miichity, ane'mgích co huen ñich miich ninicxip adüyöyip mejyhuingíxy.

²⁹ Chi Jesús Pedro nimay:

—Min.

Huin'it Pedro ymínajcy ma je barco etz ñicx ma Jesús adüyöyip mejyhuingíxy. ³⁰ Per co Pedro jihui'ñybijcy jadu'n nej anajty ooy mic yjanchpojoy, chi ooy chigíy, chi oy oga'n ytigíyñi quimbi, chi yaaxqueecy, ymíñañ:

—¡Huindzin, ñich yajtzóocigích!

³¹ Huin'it Jesús oy yci' mímajtzi, chi nimay:

—Miich, janch hueeni mmibijcin. ¿Nej co ca' yajxon xymibicyich?

³² Co Pedro etz Jesús ytigíy barcojoty, huin'it je mic poj ñajxy. ³³ Huin'it je' ajcxy jibby barcojoty ycojxtinay'ihuiydaay ma Jesús yhuinduu. Chi ymíñañ ajcxy:

—Janch tity'ajt co miich Dios xy'ung'adyii.

Jesús yajtzoctay je pa'mjäy ajcxy jim Genesaret

³⁴ Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuíy co Jesús ti yjaty ma yí' ajcxy naaxjot, chi ajcxy tity'ajt quejxy ma tüg'óciy cajp etz rancho huinduy agonbi co Jesús yjimity. Chi je mayjäy miiñ tüg'óciy je pa'mjäy ma Jesús. ³⁶ Chi ajcxy cohuaníy Jesús, pen jeb je pa'mjäy ñidoñyii je yhuit. E tüg'óciy je huídijaty ñidonip je' yhuit, je' ajcxy chooctay y'agidactay.

15

Huidi jäy yaj'ahuimbijty janch jibic

¹ Chi ymiiñ ma Jesús nijéjity fariseo jäy ajcxy, je huindzindijc huídibi tzachpadumb judío ycostumbre. Nañ jadu'n miiñ nijéjity escribas, je huindzindijc huídibi ajcxy nijaydutp anajty Dios ñecy. Je fariseos etz escribas ajcxy ti choongíxy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungíxy judío ñi'ap costumbre? Yí' ajcxy ycaaygíxy y'uuccíxy, e ca' jayijp ycibujcixy, ca' ixpujcxixy ixjétcixy ypocy.

³ Chi Jesús y'adzooy, yajtiy:

—¿Na'amy co miich ajcxy mgapxycömíodögy Dios? Mdzachcuydungíxy mgí'mgostumbre ma yjapadyii mguydungíxy ixypy Dios ycötújcin. ⁴ Com Dios ti y'ane'my ma ycötujcin: “Yajmij'at mdaj mdeedy, e pinjaty jibic nigapxy ni'ojíyb ytaj yteedy, ögípy yí'.” ⁵ Per miich ajcxy minamb co tüg je yéydijc jebi nimäy ytaj yteedy: “Ca' ñich miich ajcxy nbubedañ, com ti n'ahuaníyich ma Dios tüg'óciy tijaty nmíidich.” ⁶ Chi huen yimpinity jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangíxy mgí'mgostumbre. ⁷ Miich ajcxy naybidaacip jadu'n nej jihuíy tudägy jäy, e ca' yjanchity. Janch tity'ajt jadu'n nej jecyip Isaías jaaybejty yajhuímy co Dios jadu'n ymíñañ:

⁸ Jadayaabi jāy xyajmij'ajtpich ahuac aguy, per ca' ajcxy xyajmij'atyich cixy jot huinjot.

⁹ Naadigi' co ajcxy xyhuin'iygixyich xyhuinyáaxcixyich. Mnayyaj'ixpíjicixy ayuc tiy'ajt huídibi jāy ajcxy ti cojy ti maacxy.

¹⁰ Huin'it Jesús huomujctay je mayjāy, ymīnañ:

—Amidoo'ijtcixy ich n'ayuc etz mhuinjihu'iygixip. ¹¹ Ca' ji ni ti jicxy huídibi jāy ypidacpy ma y'ahuac nicxy yajpocycāy. Yi' janchtiy je jibic ayuc huídibi pidzim ma jāy ajcxy y'ahuac, yi' ajcxy yajpocycāhuib.

¹² Chi ymīñ ma Jesús je' ydiscípulos ajcxy, chi ajcxy ñimaayi:

—¿Nej miich mnejhu'iyb co je fariseos ajcxy ñijotma'tpy co ajcxy midoy je ayuc jadu'n nej miich mīnañ?

¹³ Chi Jesús y'adzooy, ymīnañ:

—Huen tim huídibi ane'min huídibi ca' Dios ti pidāgy, Dios yajtigoyam, tim jadu'n nej jāy ajcxy huixigy ujtz huídibi ca' y'oy'ujtziy. ¹⁴ Ixmajtcix yi fariseos etz escribas ajcxy. Ca' ajcxy huinjihu'iy Dios ytiy'ajt. Jadu'n ajcxy nipaady nej jāy huintzpi, e co tūg huintzpi huijtzhuidity jadūg huintzpi, chi nimetz nicxy yjutcōgāgixy.

¹⁵ Huin'it Pedro nimay Jesús:

—Yajhuinjihu'iyg ich ajcxy jada jihuimbit ayuc.

¹⁶ Chi Jesús ymīnañ:

—¿Nej miich ajcxy nañ jadu'n ca' mhuinjihu'iy jada jihuimbit ayuc? ¹⁷ ¿Nej ca' miich ajcxy mnejhu'iy co tūg'óciy huídibi tigiyb ma miich ajcxy m'ahuac, je' nicxp ma miich ajcxy mjot etz ypidzimy ma ajcxy mninix? ¹⁸ Per je jāy huídibi jibic capxp, capxp je' je jibic ayuc huídibi ymīd ma yjot yhuinma'ñ. Jada jibic ayuc yajpocychimīcp je jāy. ¹⁹ Yi' jibicpi huídibi tzomb ma jāy ajcxy yjot yhuinma'ñ, yi' je' jāyyaj'ōgii huinma'ñ, je töxyjāy migapxtigoyii huinma'ñ, meedzii huinma'ñ, je indāgii huinma'ñ, je piitz capx huinma'ñ. ²⁰ Yijadu'mbi jibic-huinma'ñ yajpocycāb jāy ajcxy ma Dios. Per co jāy ajcxy ycaay y'ūgy, ma ca'ni ajcxy pocy ixpujicixy jayijp, ca' je' ypocycāy ajcxy ma Dios.

Tūg töxyjāy huídibi ca' judíojäy mibijc Jesús

²¹ Chi Jesús jim chooñ, nicxy ma je Tiro etz Sidón naaxjot. ²² Jim anajty tūg töxyjāy chināy. Jada töxyjāy hue' anajty cananeajāy, canan judíojäy. Chi yi' nimīñ Jesús, chi nimay:

—Huindzin, David y'ap y'oc, pa'ayoogich. Ich nmīdich tūg niix huídibi ymīd ca'oybi etz oy tzaachypa paady.

²³ Per ca' ni nej Jesús y'adzohui. Huin'it je' ydiscípulos ajcxy mīñ ma Jesús, e ycohuaniiy, mīnañ ajcxy:

—Capxycix mīd jada töxyjāy, com nigo xypayaax xypadinaayim.

²⁴ Chi Jesús ymīnañ:

—Dios ich ti xyquexyich jēda'ajty ma je israelitasjäy huídibi y'alma tigoyam.

²⁵ Chi je töxyjāy ymijhua'ci ma Jesús, e ycojxtinay'ihuiy ma je yhuinduu, chi ymīnañ:

—Huindzin, tun may'ajt pubejtcich.

²⁶ Chi Jesús ymīnañ:

—Ca' jadu'n y'oyity co n'ixmadzipich je israelitasjäy (Dios yjäy), e nbubedipich miich ajcxy. Co jadu'n ndunipich, jadu'n nipaadip nej jāy ajcxy y'idich co ajcxy pijci je ajcxy y'ung ycaagy, e möy je uc.

²⁷ Huin'it je töxyjāy y'adzooy:

—Janch tiy'ajt jadu'n nej miich mīnañ, per ixti ycaayb je uc je tzajcaagy y'abu'x huídibi cāb ma yhuindzin mesa.

28 Chi Jesús je töxyjäy nimay:

—Janch mij mmibijcin. Hich ndunaamybich jadu'n nej miich mdzocy. Huin'it hori je töxyjäy ñix choocy.

Jesús yajtzögy mayba'mjäy

29 Chi Jesús jim choon. Chi ñajxy ma Galilea mejypa'. Chi ypejty ma tüg cögor, jim ñay'ihuüy. 30 E huin'it oy mayjäy miidmiin pa'mjäy huidibi huintz, uum, címucy tecymucy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e yi' yajzooctay. 31 E je mayjäy ooy tzachjihuiy tzachhuinmaay ajcxy co anajty je uumbi ti capxigy, je huintzpi ti y'ixxigy, je címucpy tecymucpyi ti yöyigy. Chi je mayjäy ytiigy hbaady capxpaady Dios, je Dios huidibi je Israel jäy ymijpidacy.

Jesús yajcay midaan mil jäy

32 Chi Jesús mijhuoy je' ydiscipulos ajcxy, nimay:

—Ooy nba'ayooyich jadaaab jäy ajcxy. Com cujc midugig xii ijtcixy ya miid hich etz ca' ajcxy miidity ti ycaayipy. Ca' nguexhuimbida'ñich ajcxy ayuu ma ytijc, ca' yjetyity yajpa'mgojip ajcxy tü'am.

33 Chi je' ydiscipulos ajcxy minañ:

—¿Per ma n'ocpatim ti jada jäy ajcxy ycaayipy yjicxipy ya ma jada abac it ma ca' pin chinäy? Co ooy mayjäyity.

34 Chi Jesús yajtiy:

—¿Naag jii by tzajcaagy miich ajcxy mjacmiidity?

Chi ajcxy y'adzooy:

—Jeyi huixtujc tzajcaagy etz hueen acx.

35 Chi Jesús nimay je mayjäy co huen ñay'ihuیداایگی naaxcixy. 36 Chi Jesús conigy je huixtujcpi tzajcaagy etz je hueenip acx, e yajnajx Dioscojuyip ma Dios. Chi tujc-hua'cx etz moy je' ydiscipulos ajcxy. E yi' ajcxy yajhua'cx je jicxy picy ma je mayjäy. 37 Chi je mayjäy nidüg'ócay ycaay cuxi. Jesús ydiscipulos ajcxy yajpidigy huixtujc cach cayduc uuctuc tiibi anajty yconaxy. 38 E je huidibi ajcxy cay hue' anajty naybaatigixy nimidaan mil, abicy je töxyjäydic etz pi'ctijc ajcxy. 39 Chi Jesús ycapxycixy miid je mayjäy huen ajcxy nicxixyñi ma ytijc. Chi Jesús ytiigy barcojoty etz ñicxni ma Magdala naax jot.

16

Je fariseos etz je saduceos ajcxy pijtzoogixy tüg ijxpejt mijhuinma'ñybi

1 Chi je fariseos etz saduceos y'oy ajcxy ixty Jesús. Yi' ajcxy ijxta'n octu-naangixy miid Jesús, paady ajcxy pijtzoy co Jesús huen yaj'ixyii ajcxy tüg ijxpejt huidibi tzomb tzajpjoty. 2 Chi Jesús y'adzooy je' ajcxy:

—Co miich ajcxy m'ixy tzuu yi' tzajp tzaptz, chi miich ajcxy minañ com jabom oy tiempo yajpadañ. 3 Per co miich ajcxy m'ixy jopy je tzajp tzaptz etz huimbicy, chi ajcxy minañ co ca' y'oyity yi' tiempo. Miich ajcxy ooy mnaybidägyii nejihuüy ooy m'ixpicity ma Dios ytiy'ajt, e ca' yjanchity. Miich ajcxy jebi yi' tzajp myajcapxy, per ca' mnejhuüygixy nej yhuimbizimy yi' mijhuinmañ ijxpejt huidibi Dios ytumyb ma jadachambi xii tiempo. 4 Yi' jäy ajcxy huidibi cham tzinaayb, ooy yjibicjäyity ajcxy, ca' ajcxy capxymido y Dios. Yi' ajcxy chojcpy co nyaj'ixipyich tüg ijxpejt mijhuinmañ huidibi tzomb tzajpjoty. Ca' Dios yaj'ixa'ñ ajcxy jadüg mijhuinmañ, com miid miich ajcxy jaybetyity je mijhuinmañ ijxpejt huidibi Dios ytuun miid Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpicin

⁵ Co Jesús etz ydiscípulos ajcxy yja'ty ma jadüg niiba', chi je' ajcxy yjäydigoy je tzajcaagy. ⁶ Chi Jesús ymínañ:

—Naygüend'ájtigix miid yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscípulos ñayñimáayigixy miñ xyipy:

—Paady jadu'n ymínañ, je' co ti ñich ajt je tzajcaagy njäydigooym.

⁸ Jesús nejhuíy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy mīnaangixy co ca' ajcxy tzajcaagy mīdity? Janch hueeni miich ajcxy mmībijcīn. ⁹ ¿Nej ca'ni miich ajcxy mhujñihuíy? ¿Nej ca' mjäymechyii co ñich migoox tzajcaayg nyajhuäcxy etz ni migoox mil je yēdyjtijc anajty huídibi ajcxy cay? ¿E ni mga'ajihuíyii ajcxy naag cach cayduc uuctuc ti myajpidigy? ¹⁰ ¿E ni mga'ajihuíyii ajcxy co huixtuc tzajcaagy nyajhuäcxyich ma nimīdaax mil yēdyjc ajcxy huídibi caay etz naag cach cayduc uuctuc myajpidigy ajcxy? ¹¹ ¿Nej co ca' miich ajcxy mhujñihuíy, co ca' ñich yam nigapxy yi' tzajcaagy huídibi miich ajcxy ti mjäydigoy, co ti nyajñimaaygixy je levadura huídibi je fariseos etz saduceos ajcxy ymīd?

¹² Huin'it Jesús ydiscípulos ajcxy huinjihuíy co Jesús ca' anajty je' ti yajñimāyii ajcxy co huen naygüend'ájtigixy mīd tzajcaagy levadura. Hue' janchtiy Jesús yajñimay ajcxy co huen naygüend'ájtigixy mīd je fariseos etz saduceos ajcxy y'ixpijcin.

Pedro nidíy'aty co Jesús yí' je' je Cristo

¹³ Co Jesús yja'ty ma Cesarea Filipo naaxjot, chi Jesús y'amīdooy je' ydiscípulos ajcxy:

—¿Nej jäy ajcxy ymína'ñ, pīnic ñich?

¹⁴ Chi ajcxy ymína'ñ:

—Nijējity jäy ymína'ñ co miich je' Juan je Bautista. Nijējity jäy ymína'ñ co miich je' Elías, e nijējity ymína'ñ co miich je' Jeremías o jadüg profeta (huídibi tzīnay jecy'ajty).

¹⁵ Chi Jesús ymínañ:

—¿E miich ajcxy nej mīnaangixy, pīn ñich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pīn xycayajñimāy jada tiy'ajt, tūgpajc je Dios Teedy nDeedyich huídibi jīiby tzajpjoty, yi' ti xyajnejhuíy jada tiy'ajt. ¹⁸ ñich miich nīmaayb co miich mxī'adiyib Pedro, e hue' yhuimbīdzīmy tzaa (hue' je', je tzaa tija'ñ je ayuc huídibi Simón ycapxy co je Cristo hue' je' anajty Dios), e ma jada tzaa ji ngoja'ñich ñich ndzajptijc (hue' yhuimbīdzīmy, ma ñich n'ane'mīn chondāga'ñ), e ni ca' oybi ymic'ajt ycamīmadāgipy. ¹⁹ ñich miich nmōhuamyb je cōtujcīn jadu'n nipaady nej tūg ahuaast huídibi mīd myaj'ahuädzīpy Dios y'ayuc ytiy'ajt. Tūg'óciy huídibi miich mgapx'adujcipy ya naaxhuíñ, Dios nañ jadu'n capx'adugipy jīiby tzajpjoty, e huídibi miich ya naaxhuíñ ca' capx'aducy, Dios nañ ca' capx'adugipy jīiby tzajpjoty.

²⁰ Huin'it Jesús nīmay je' ydiscípulos ajcxy, co ca' huaad ni pīn nīmāy co yi' je' je Cristo.

Jesús nigapxy je' y'öcīn

²¹ Ixti huin'itni Jesús ytiy'ayajñimay je' ydiscípulos ajcxy co nīcxamb jīm Jerusalén etz co jīm ooy y'ayoohua'ñ. Jīm Jerusalén je judío mījjäydyjc, je teedytījc huídibi tungmīdipi, etz yi' escribas ajcxy ooy chaachytuna'ñyīi etz

yaj'ōga'ñyii. Per codug'ig xii huin'it yjugyp'iga'ñ jadüg'oc. ²² Huin'it Pedro m'iidn'icxy Jesús ahuingujc, e oy ogy, ym'inañ:

—Huindzin, ca' Dios tzocy n'icx jadu'n m'jaty. M'iid miich ca' j'ebi jadu'n m'jadipy.

²³ Per Jesús yhuäc-huimbijty, chi n'ipay Pedro:

—Huinhuäctuatc'ich Pedro, je mujcu' miich jadu'n xyajcapxp. Ca' n'igoo xy'adzipy'ich. Ca' miich m'huinma'ñybidägy nej Dios tzocy. Yi' jancht'iy miich m'huinma'ñ'ajty nej j'äy ajcxy tzocy.

²⁴ Huin'it Jesús je' ydiscípulos ajcxy n'ipay:

—Pen je p'injaty xypamina'ñich, huen yci'mdzojcin ixmajtztäy etz huen yhuinma'ñypidägy co ayoohipy m'iid ñich ycixpi, ixti mabaad y'ögy. ²⁵ Huen p'injäy hu'idibi ca' ayoohua'ñ m'iid ñich ycixpi, hue' je' yajtigoyamy yi' yjugy'ajtin. Per p'injaty xypan'icxp'ich oy nej yt'inyjadipy, hue' je' ypadamyb yjugy'ajtin hu'idibi ca' ycixipy ytigoyipy n'imina. ²⁶ ¿Ti j'äygidacin yi' co t'üg j'äy y'ocn'ayajpad'iyb yi' meeñ etz m'ic'ajtin huindu'my ñaaxhuiñybi, e yjugy'ajtin cixipy tigoyipy tücc'i'y? ¿Jadu'ñyi j'ebi j'äy y'alma yjugy'ajtin occojuyi? N'igi choohuity j'äy ajcxy y'alma yjugy'ajtin, ca'ydi jac ni ti. ²⁷ ñich, je j'äy hu'idibi tzoon tzajpjoty, miinaamb'ich jadüg'oc ya naaxhuiñ m'iid je ángeles ajcxy etz m'iid nDeedy'ich y'oy'ajtin. Huin'it m'icuejtähua'ñ t'üg'óciy je j'äy nej anajty ti ytuungixy, pen oy, o ca' y'oy'ity. ²⁸ Janch t'iy'ajt jadu'n nej n'imaaygixy co ji ya naag'ity hu'idibi ca' y'ōga'ñ ixti cooni xy'ixipy'ich jadüg'oc co ñich anajty n'imiñ ane'mbi.

17

Co Jesús ñin'icx yajtigach

¹ Codudujc xii huin'it Jesús m'iidn'icxy Pedro, Jacobo, etz y'uch Juan ma t'üg m'ijcop, ma t'üg cop hu'idibi ooy ycixity. ² E jim copc'ixy Jesús ñin'icx ñaygojtigajtzi ma Pedro, Jacobo etz Juan ajcxy yhuinduu. Jesús yhuiñy'ijp ytig'iy ad'icxp nej je xii yt'icxin. E Jesús yhu'it y'ahuimbijty janch poob jadu'n nej t'üg t'icxin. ³ E t'imetriini oy ijxcixy Moisés etz Elías ycapxy m'iydägy anajty m'iid Jesús. ⁴ Chi Pedro n'ipay Jesús:

—Huindzin, oy y'oy'ity co ñich ajt ya. Pen miich mdzojcpy j'ebi ñich ajcxy nyaj'oy'iy tug'ig t'ijcquemy. T'üg miich m'je', t'üg Moisés y'je', etz t'üg Elías y'je'.

⁵ Pedro capxp anajty, tim huin'it'iy t'üg joc yajn'idigoyday je' ajcxy hu'idibi ooy ad'icxp anajty. E ma je joc yajmidoy t'üg ayuc hu'idibi ym'inañ:

—Jadayaabi y'eydijc ñich je' n'ung'ajtpy hu'idibi ooy ndzocy njihu'iy'ich etz yi' ñich m'iid njotcujcity. Am'idoo'it miich ajcxy yi' y'ayuc.

⁶ Co Pedro, Jacobo, etz Juan jadu'n m'idooy je ayuc chooñ jocjoty, chi ajcxy ooy ch'ig'iy etz ñayñitziitc'idaaci ajcxy.

⁷ Huin'it ajcxy Jesús ñimiini etz n'idoñ ajcxy, e ym'inañ:

—P'idic'ix, ca' mdzig'iygixy.

⁸ E co ajcxy y'ijx'igy, ca' anajty jim Elías etz Moisés. Naydügpajc Jesús yjac-hui'my m'iid je' ajcxy. ⁹ E co ajcxy ym'inajcy ma je cop, chi ajcxy Jesús n'ipay:

—Ca' ni p'in miich ajcxy nyajnim'ahu'ipy jadu'n nej ti m'ijxcixy cham, ixti cooni ñich anajty ti njugyp'icy'ich jadüg'oc ma anajty ti n'ögich.

¹⁰ Huin'it je' ydiscípulos ajcxy yajtiy Jesús:

—¿Nej co yi' escribas, yi' ajcxy hu'idibi n'ijayd'utp etz yajn'ig'uejp Dios y'ayuc, ym'inaangixy co Elías yi' miinaam jay'ijp etz axam je Cristo?

¹¹ Chi Jesús y'adzooy:

—Janch t'iy'ajt co Elías ymiina'ñ etz yaj'oy'idähuamy t'üg'óciy m'iid Dios ycixpi. ¹² Per ñich miich ajcxy n'imaayb co Elías ti y'oy. E je j'äy ajcxy ca' nejhu'iy

pín yí', e ooy jib'ic tuuñ ajcxy, nej tím tzojccixy. E nañ jadu'n ñch, je jäy huídibi tzoon tzajpjoty ayoohuaamb'ich ma yí' ajcxy.

¹³ Huin'it je' ydiscípulos ajcxy huinjihu'iy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmüdpí

¹⁴ Co Jesús, Pedro, Jacobo etz Juan yjäty jim ma je mayjäy ajcxy, chi ñimiini tüg jäy. Chi je jäy ycoxtinay'ihu'iy ma Jesús yhuinduu, chi ym'inañ:

¹⁵ —Huindzin, ñch nmang pa'ayoohuic. Je' co ym'üd mo'tpa'm etz oy yaj'iyoooyii. Canaag'oc ti ycäy jünjoty ñijoty. ¹⁶ Paady ñch ti nm'üdmiiñich ma miich mdiscípulos ajcxy, per ca' ajcxy ymadacy yajtzögipy.

¹⁷ Chi Jesús y'adzooy:

—Miich ajcxy huídibi jugy'ajtp jadachambi xii tiempo, ca' miich ajcxy mm'ibiga'ñ Dios, ca' miich ajcxy mgapxym'idoohua'ñ Dios. ¿Naag xii naag tiempo ñch miich ajcxy njacm'imecxtugipy? Yajmiingix yí yeeg'anäg.

¹⁸ Co je yeeg'anäg yajm'üdjaty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹ Jac co hueeñi, je' ydiscípulos ajcxy m'üdm'iydac Jesús ahuingujc, chi ajcxy yajtiy ma Jesús:

—¿Nej co ñch ajcxy ca' ti nmadägy nicx nyajp'idz'imgixyich je ca'oybi ma je yeeg'anäg?

²⁰ Chi Jesús ym'inañ:

—Je' co miich ajcxy hueeni mm'ibijcin. Janch tiy'ajt jadu'n nej nn'imaaygixy, co ixypy miich ajcxy xy'ocm'ibicyich, ooy ixypy jeda'ajty jadu'n nej je jac mutzpi ujtz tím, huin'it jébi ixypy mnimäy jadayaabi cop co huen jühuäcy ya etz huen nicxy huingduum, chi ñicxip je cop. Ni ti ji ycatzipity pen janch miich ajcxy m'üddy m'ibijcin. ²¹ Jadayaabi picy ca'oybi pidzimipy co Dios nm'ibijctzoohuim mictägy etz ayuu'ijit, ca' jac ti huinma'ñ.

Jesús nigapxy jadüg'oc y'öcín

²²⁻²³ Co anajty ajcxy yhuidity tügmucy jim ma Galilea y'it, chi Jesús ñimay je' ydiscípulos ajcxy:

—Ñch, je jäy huídibi tzoon tzajpjoty, yajc'iyegipyich ma jäy. E yí' ajcxy xyaj'ögibich etz codugüg xii njugypigipyich jadüg'oc. Co je' ydiscípulos ajcxy jadu'n m'idooy, chi ajcxy ooy yjotmaybaty.

Je cogüejtín ma je tzajptijc

²⁴ Co Jesús yja'ty m'üd je' ydiscípulos ajcxy jim ma je Capernaum cajp, chi huídi anajty ajcxy meeñ yajmujcp m'üd tzajptijc ycixpi, oy ajcxy ijxcixy je Pedro, chí ajcxy y'am'idooy:

—¿Nej miich mhuindzin ycuejcpy meeñ m'üd tzajptijc ycixpi?

²⁵ Chi Pedro y'adzooy:

—Cuejtpy.

E huin'it hora co anajty Pedro ytig'iy tigoty, chi Jesús jay'ijp ym'igapxy, ñimay:

—Simón, ¿nej m'ina'ñ? ¿Pín je rey ajcxy yajcuejcpy? ¿Yí' yjäy o huingjäy?

²⁶ Chi Pedro y'adzooy:

—Ma huingjäy huídibi ane'my ijtp.

Chi Jesús y'adzooy:

—Ah, ca'tz yí' yjäy huaad ti cuejtcixy. ²⁷ Per ca' ndzocyich co je cogüejtpi nyajcapxmay'iyim, nicx miich ma yí' mij laguun e cohuidzi' jiiy mxu'ñ, e je acx huídibi anajty jay'ijp huomb, je' myajpidzimipy, e ma y'ahuac jiiy mbaadipy tüg meeñ, yajpidzim je meeñ e nicx cuet m'üd ñch ycixpi etz m'üd miich ycixpi.

18

¿Pin je' jac nīgi mijip?

¹ Je huin'it hora je' ydiscípulos ajcxy ymijhuäctay Jesús etz yajtiy:

—¿Pinjäy je'jac nīg ymüid je mij'ajtin ma Dios y'ane'my jiiiby tzajpjoty?

² Chi Jesús mijhuoy tüg je pi'c'anäg. Chi pidacy je pi'c'anäg cujc'amy ma yi' ajcxy. ³ Chi Jesús ymīnañ:

—Janch tiy'ajt ñich miich ajcxy nimäy, pen ca' miich ajcxy jothuimbijtcixy etz naybidaaccixy mhuinma'ñ jadu'n nej jada pi'c'anäg huinma'ñ müid, pues ca' mdigihuipy ma Dios Teedy y'ane'my jiiiby tzajpjoty. ⁴ Paady, pinjaty müid yhuinma'ñ yung nax jadu'n nej jada yaabi pi'c'anäg müid yhuinma'ñ yung nax, je' je' je huidiib jac nīgi mij'ajtin ymüid jiiiby ma Dios y'ane'my. ⁵ Hueñypinity huidibi müid ñich ycixpi cöbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngöbicyich, hue' jadu'n nipaady nej jihuüy ti xycöbicyich ti xychocyich.

Je huidibi ooy ycojotmayity co nbocycähuim

⁶ Hueñypinity huidibi jibic-huinma'ñ ymibidzimy, e yajpocycäy yi jadu'mbi pi'ctijc huidibi ajcxy xymijnicxpejtpich, jac'oy ixypy co yi jadu'mbi jäy ytimyñayyöcxodziyüi tüg paandzaa etz ñayñajtzjibibihuipy mejyoty. ⁷ Ooy ayo'ñity ooy jibicity co ji naaxhuiñybi yajpaady tijaty huidibi yajtundigooby jäy ajcxy. Ni mina xü ca' tigooy y'idipy tijaty huidi yajtundigoy je jäy ajcxy. Per mij ayo'n padañ müid yi Dios pinjaty cojp tundigooyü. ⁸ Pen miich mgi' o miich mdecy xyajtundigooyb, jac'oy ixypy co mdim'ixpuxy etz ixjibipy jigüem. Nigi oy co mdigihuipy ciduc tecytuc jiiiby tzajpjoty etz ca'ydi co mdigihuipy müid metz mgi' etz metz mdecy mijjinjoty huidibi nimina ycapich. ⁹ E pen yi mhuiin tug xyajpocycähuamb, tim yajpidzim etz ixcätz jigüem. Com jac'oy mdigihuipy müid tüg mhuiin ma jugy'ajtin huinixübi, ca'ydi co mdigihuipy müid metz mhuiin ma yi jin huidibi camina xü ycapich.

Je y'ixpejt, je cöbixy huidibi tigooy

¹⁰ Ca' m'ixtijcixy ni tüg pi'c'anäg huidibi xymibijcpich. Yi' ajcxy je' y'ángeles tim ijtiib jiiiby tzajpjoty ma Dios Teedy, ñich nDeedy yhuinduu. ¹¹ ñich je jäy huidibi tsoon tzajpjoty, ti nmüiñich ya naaxhuiñ, je' co nyajnitzöga'ñich je jäy ajcxy y'alma huidibi tigooyam. ¹² ¿Nej miich ajcxy mina'ñ? Pen tüg jäy ymüid migo'px cöbixy, etz pen yöydgoooyb nidügti cöbixy, ¿nej ca' jëbi ixmach je nimida'px majmocx midaax cöbixy etz nicxy ixtäy je jadügpi huidibi yöydgoooy? ¹³ E pen ypatpy je tügpi huidibi yöydgoooyb, chi ooy xondägy müid co anajty ti paady huidibi anajty ti ytigooy, ca' jadu'n yxondägy müid je nimida'px majmocx midaax huidibi ca' anajty ti yöytigooygixy. ¹⁴ Tim jadu'n nipaady müid Dios Teedy jiiiby tzajpjoty, ca' tzocy co ni tüg jäy y'alma tigooypy.

Nej huaad tüg mmigüg nhuinmeecxim

¹⁵ Pen miich mmigüg xytuñ jibic, müidmüydac ahuingujc e yajhuinjihu' ma ti ytundigooy, pen xy'ayuchuinjihuüy ti anajty mmīnaymügüpgigyüi je mmigüg. ¹⁶ Pen ca' xy'ayuc-huinjihuüy, chi huominipy tüg o metz mmigüg huidibi jëbi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuühua'ñ, müidnicxip ma mibijcpidijc yöymujctac e jim ajcxy myajnaxipy jadu'n nej tüg huidibi ca' Dios mibicy etz jadu'n nej tüg yajcogüejtpi huidibi ooy pocymüidity. ¹⁸ Janch tiy'ajt ñich miich ajcxy nimäy, tüg'öciy huidibi miich ajcxy mgapx'adujcya ya naaxhuiñ, Dios nañ jadu'n capx'adugipy jiiiby tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugipy jiiiby tzajpjoty. ¹⁹ E nañ jadu'n ñich miich ajcxy nimäy, pen ya

naaxhuiñ miich ajcxy nimetz mnaygáp̄xigixy co tijaty mmibijctzohuaangixy ma Dios, Dios, ñch nDeedy huiðibi jiiiby tzajpjoty, xymöhuipy huiðibi ajcxy mbijctzooyb. ²⁰ Com ma miich ajcxy nimetz o nidugñig naymúj̄cigixy, jim ñch n'ity cuj'amy ma miich ajcxy.

²¹ Chi Pedro y'amidooy Jesús ymíñañ:

—Huindzin, ¿naag'oc huaad nhuinmeecxyich yi' ajcxy huiðibi xymidundigooybich? ¿Nej nméecxibich ixti cooni huixtujc'oci?

²² Chi Jesús y'adzooy:

—Ca' yhuixtujc'ócity, hue' meecxipy mídaax migo'px jamída'px majmocx mídaax'oc.

Je tumbi y'ijxpejt huiðibi ca'p ymígüg huinmeecxy

²³ Dios y'ane'min jiiiby tzajpjoty jadu'n nipaady nej tüg rey huiðibi huijtz'oyñyb mïd je ytumbidijc jajadu'ñi ajcxy yjacminucxy'adyii. ²⁴ Je rey ytimyhuijtz'oyñychondacyñi anajty cuentas, co oy yjady tüg ytumbi huiðibi anajty minuucxy'ajtip canaag millón. ²⁵ Com je' ytumbi ca' anajty mïdity ti mïd migüedib je' yhuindzin. Huin'it je huindzin ane'my co huen je' ytumbi yajtoocnax quipxyi mïd y'ungdöxyijc etz tüg'ócity tijaty ymïd, jaydëb ñuucxy y'adujctähuipy. ²⁶ Huin'it ytumbi ycoxtinay'ihuñy ma yhuindzin yhuinduu etz nimay: “Huindzin, pa'ayoogich, etz ñch miich nmígüejtähuipy.” ²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je' ypidzimy pujxtigoty, chi yminaybati tüg ymígüg huiðibi anajty mïd quipxyi ti ytuñ. Je' anajty minuucx'ajtip tim hueeni, chi je' yöcmimadzïy je' ymígüg huiðibi mïd ytuuñ, chi nimay: “Cuet huiðibi mnuucx'ajtpy ma ñch.” ²⁹ Huin'it ymígüg ycojxtinay'ihuñy ma je' yhuinduu. Chi minuucxtaacy nimay: “Pa'ayoogich. ñch miich nmígüejtähuipy.” ³⁰ Chi je jadügp̄i ca' mecxtujcin yajtuuñ. Chi oy ymígüg pidägy pujxtigoty, ixti cooni anajty micuedyïi. ³¹ Co je jacjadyïi ymidumbidijc oy ixy jadu'n nej ti yajtuñ je' ymígüg, chi ooy ajcxy jihuñy. Chi ajcxy nicx ma je yhuindzin etz yajnimayday tüg'ócity nejjaty anajty ti ijxcixy. ³² Huin'it je' ajcxy yhuindzin oy yajhuoyii je huiðibi minuucx'ajtip canaag millón. Chi nimay: “Miich ooy mdzachjibicjäyity. Ti ñch miich nhuinmeecxi tüg'ócity je mnuucxy, mïd co miich pa'ayohuin mbijctzooy ma ñch. ³³ E miich nañ jadu'n ixypy ti mba'ayoy je mígüg huiðibi mïd mmiðuñ, huiðibi xyminuucxy'ajtp, jadu'n nej ñch miich ti nba'ayooy.” ³⁴ Chi je huindzin ooy chachjotma'ty, chi pidacy ane'min co huen yajtzaachytuñ je' ytumbi mabaad cuejttäy tüg'ócity huiðibi ñuucxy'ajtpy. ³⁵ Chi Jesús ycapxycijxni, mínañ:

—Tim jadu'n nej jada rey ti tuñ mïd je ytumbi, nañ tim jadu'n Dios tunipy mïd miich ajcxy, pen ca' nidüg nidügti miich ajcxy ca' mhuinmeecxy je mmiüggtijc amumdügjot.

19

Jesús yaj'ixpicy mïd co jäy ytöxyijc ixmach

¹ E co Jesús capxtay jada ayuc, chi choñ Galilea, chi oy yjady ma Judea it jim Jordán mij niñ nínaxy. ² Chi ooy mayjäy ypanicxi, e jim yajtzoocy huiðijaty anajty yuu mïd pa'm mïd.

³ Huin'it nijëjity je fariseos ajcxy nimiiñ Jesús co yajmachcähuaangixy anajty. Chi ajcxy y'amidooy:

—¿Nej janch co Dios ti xymooyim cötujcin co jëbi tüg yëdyijc ixmadzip ytöxyijc mïd tim hueeni ti capxy ti ayuc?

⁴ Chi Jesús y'adzooy:

—¿Nej ca'ni miich ajcxy m'ixy mgapxy ma ymiiñ jaybety ma Dios ñecy co je naaxhuiñybi chondacy, co Dios oga'ñ yajcojy tüg'óciy tijaty huídibi ji'ajtp co “Dios yajcojy tüg'yéydijc etz tüg'töxyjäy”? ⁵ Nañ jadu'n Dios ymínañ: “Je yéydijc y'ixmadzip ytaj yteedy etz pudigihuipy je' ytöxyijc. E je yéydijc etz ytöxyijc tú'ciy idaangixy.” ⁶ Paady ca' ñimetzity ajcxy, com je yéydijc etz ytöxyijc tüg'mucy y'idaangixy. Com Dios ti huijtzmucy je yéydijc mïd je töxyjäy, paady ca' huaadity co jäy ajcxy huijtzhuäcxyp tiibi Dios huijtzmucy.

⁷ Huin'it je fariseos ajcxy y'amidooy Jesús:

—¿Na'amy co Moisés cötujcin ti yejcy jecy'ajty co tüg'yéydijc jëbi huaad ixmach ytöxyijc, e möhuipy ñinecy ñidiy'ajt e jadu'n jëbi ixmach?

⁸ Chi Jesús ymínañ:

—Moisés jada cötujcin ti xymooygixy co jëbi m'ixmajtzciy mdöxyijc mïd co miich ajcxy mdzachcöjuuñity, ca' mgapxymidohuaangixy Dios. Per co je naaxhuiñybi chondacy ca' anajty jadu'nity. ⁹ Janch tiy'ajt jadu'n nej ñch miich ajcxy nimaaygixy co je yéydijc huídibi yajjayhuäcxp mïd je ytöxyjäy, e je ytöxyjäy ca' anajty ti ytundigooyb mïd huingbi yéydijc, hue' je' yéydijc ytundigooy co ixmach ytöxyijc etz ypijctigach mïd huingbi. Nañ tim jadu'n pen tüg'yéydijc ypiy mïd tüg'töxyjäy huídibi ñäy ti y'ixmachyii, hue' tundigooyb anajty je yéydijc.

¹⁰ Co Jesús ydiscípulos ajcxy mïdooy jada ayuc, chi ajcxy ymínañ:

—Pen jadu'n jëdu'n je tiy'ajt co je yéydijc ca' huaad ixmadzip ytoxyjäy, jac'oy co ca' nbijcim.

¹¹ Chi Jesús ymínañ:

—Ca' tüg'óciy je jäy huinjihuïy jadayaabi tiy'ajt. Jëyi ajcxy huinjihuïhuip pin ajcxy Dios pidaaci co huinjihuïhuip. ¹² Ji canaagnax je ayuc je huinma'ñ nej ca' yjëbity ypiyipy je yéydijc. Naagity pi'ctijc yma'xung'aty e ca' yca'pxity ñinicy, paady ca' picy ajcxy. E nijëjity je yéydijc ca' huaad ypiy, mïd jëgixpi co anajty je' ti ymijaapigyii. E nijëjity yéydijc huim'y jaybicy mïd jëgixp co ajcxy ytuñ ma Dios ytung, je Dios huídibi ane'myb tzajpjoty. Pinjaty cöbigamy ñch n'ayuc huen cöbicy.

Jesús conucxy maybi'ctijc

¹³ Chi naagity je jäy mïdnicxy y'ung y'anäg ma Jesús jaydëb yajcñixajipy etz Dios mibijctzoy mïd yi' ajcxy ycixpi. Chi Jesús ydiscípulos ajcxy oty je jäy ajcxy huídibi anajty mïd miimb je y'ung y'anäg, nimaaygixy co ca' jadu'n y'oyity.

¹⁴ Per Jesús ymínañ:

—Huen mïd miiñ ajcxy pi'c'anäg ma ñch, ca' mjijpcogapxiygyixy. Com pinjaty ymibijcp ñch ngapxy n'ayuc, jadu'n nej jadayaabi pi'c'anäg ajcxy ymibicy, je' ajcxy tigihuam ma Dios y'ane'my jüby tzajpjoty.

¹⁵ Chi Jesús cñixajy je pi'c'anäg ajcxy. Chi ñicxni.

Tüg'yeeg'anägnip comeñybi mïdmïydägy Jesús

¹⁶ Chi tüg'yéydijc oy icy Jesús. Chi y'amidooy:

—Huindzin, ¿ti jada' co oy ñch ndunipyich jaydëb nbaadibich jugy'ajtin huídibi ca' ycixipy ytigoyipy?

¹⁷ Chi Jesús y'adzooy:

—¿Na'amy co xyñimäyich co oy huindzin ñch? Dios tüg'pajc oyip, ca' jac pin. Pen miich mdzojcpy co mbada'ñ jugy'ajtin huídibi ca' ycixipy ytigoyipy nimina mguydunipy je Dios ycötujcin huídibi Moisés ycojaay jecy'ajty.

¹⁸ Chi je yeeg'anäg yajtiñhuimbijty:

—¿Huídibi cötujcin miich mdiip?

Chi Jesús ymínañ:

—Ca' miğüg myaj'ögipy. Ca' miğüg ytöxyijc miğapxtigooyipy. Ca' mmeedzip. Ca' mmigüg mhuiñ'iniñ. ¹⁹ Yajmij'at mdaj mdeedy. Mdzogipy mjihuñhuip miich mmigügtijc, tim jadu'n nej miich ci'm mnaychogyii.

²⁰ Chi je yeeg'anäg Jesús nimaayi:

—Ti nguyduñdäyich jadaayaabi cötujcin ajcxy maabi ñich nbi'c'atyich. ¿Ti jada njacyajtigoy'ijtpyich?

²¹ Chi Jesús jadüg'oc y'adzooy:

—Pen miich m'idam tudägy, nicx tooctigoyda' huñdijaty miich miid, etz mo' je meeñ je jäy ajcxy huñdijaty ayoob. Co jadu'n mdunipy, chi mbaadipy oy'ajtin jii by tzajpjoty. Co jadu'n mdooctähuipy tijaty miich miid, chi miinip jadüg'oc ma ñich nyajpaadyich, e pajamgich.

²² Co je yeeg'anäg jadu'n midooy, chi ñicxni taj may com ooy anajty chachcomeñity.

²³ Huin'it Jesús nimay je' ydiscípulos ajcxy:

—Janch tiy'ajt jadu'n nej nimaaygixy co ooy ymijhuinmañity co tüg comeñiyjäy ytiğihuipy ma Dios y'ane'my jii by tzajpjoty. ²⁴ Jadüg'oc nmına'ñich co ooy chipity co tüg comeñiyjäy tiğihuipy ma Dios y'ane'my, niği ca' chipity co tüg camello ñaxipy ma tüg xu'ñ'ijx yxutity.

²⁵ Co Jesús ydiscípulos ajcxy jadu'n midoy, chi ajcxy ooy jihuñy huinmay. Chi ajcxy ñay'amidoohui miñ xyipy:

—¿Pin jëbi paady je' y'alma nidoocin?

²⁶ Chi Jesús ajcxy huñdixpejty etz nimay:

—Je huñdibi jäy ajcxy chipjihuñyb, miid Dios ca' ni ti chipity.

²⁷ Huin'it Pedro ymına'ñ:

—Huñdzin, ñich ajcxy ti n'ixmajtztäyich tüg'óciy huñdijaty anajty ñich ajcxy nmuid etz nbanicx ñich ajcxy miich. ¿E ti jada' ñich ajcxy nbaadaamybich?

²⁸ Chi Jesús y'adzooy:

—Janch tiy'ajt nmına'ñich co anajty je xi je tiempo paady mina Dios yajtigajtztähuipy je tzajp etz naaxhuiñybi, co anajty ñich, je jäy huñdibi tzoon tzajpjoty, n'ityich ma ngötujctacich oybi jii by tzajpjoty, chi miich ajcxy huñdi ti xypahuñdityich, miich ajcxy mbadamy majmetz cötujctac, e miich ajcxy mdiydunipy je majmetz picypí Israeljäy ajcxy. ²⁹ E tüg'óciy jäy ajcxy huñdibi ti ixmajtztäy yjin ytijc, y'uch ymiğüg, y'ung ytöxyijc, y'ung y'anäg, ytaj yteedy, o ycam ytu' miid ñich ycixpi, yi' ajcxy ypadamyb miğo'px'oc, ca'ydí huñdibi ti ixmach. E ypadamy je jugy'ajtin huñdibi ca' ycixipy ytiğoyipy ni mina.

³⁰ Mayjäy ajcxy huñdibi cham ymiid mij'ajtin cötujcin, tzajpjoty ca' ajcxy miid'adañ mij'ajtin cötujcin. E mayjäy huñdibi cham ca' miidity ajcxy mij'ajtin cötujcin, tzajpjoty ymiid'adamy ajcxy mij'ajtin cötujcin.

20

Je naymiduniptijc y'ijxpejt

¹ Jadu'n Jesús ymına'ñ:

—Je Dios y'ane'min jii by tzajpjoty jadu'n nipaady nej tüg cogambi huñdibi ooy mij cam miidity. Chi je cogam jopyñi choñ ma oy nicxy ixtäy tumbidijc ajcxy huñdibi yajpidigipy yi uva cosecha. ² Chi ycapxytuñ miid nidüg nidüg ytumbi co mujuya'ñ tüg denario meeñ tüg xiibi. Chi quejxy nidüg nidüg ytumbi ma je uva cam. ³ Chi petyxi je cogam ñicxy jadüg'oc tumbi ixtaayb. Chi paty cajp cujc nijëjity tumbi huñdibi ca' ti tung miidity. ⁴ Chi je cogam je tumbi ajcxy nimay: “Nicx miich ajcxy tuñ ma ñich ngosecha. Cham nmujuyipy jadu'n nej ytiy'ajtity.” Chi ñicxy ajcxy midumbi. ⁵ Chi je cogam ñicxy jadüg'oc cujcxñ tumbi ijxtaayb. Nañ jadu'n nicxy jadüg'oc minacyxi.

⁶ Nañ tim jadu'n tzuu jadüg'oc je cogam ñicxy tumbi ijxtaayb, chi paty nijëjty cajpcujc huidibi ca' ti tung mïdity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷ Chi je' ajcxy y'adzooy: “Je' co ca' ñich ajcxy pin ti xycapxytuñ.” Chi je cogam ajcxy nimay: “Nïcx miich ajcxy tun ma ñich nnaaxjot. Cham ñya nmujuyipy jadu'n nej ypaadyii.” ⁸ Co oy ycodziyñi, chi je huindzin nimay je huidibi nigop'ajtp je tung: “Nïcx mijhuoodäy je tumbidijc etz mujuyipy. Mujuy jayjip huidibi ti ymiñ axam tumbi etz jim nicxy myajcogixiy ma huidibi anajty ti miiñ jayjip tumbi.” ⁹ Chi ajcxy jayjip yajmujuy je tumbi ajcxy huidibi anajty ti ytigiy tumbi axam. Chi yajmujuy ajcxy jadu'n nej anajty jäy ñaymujuyii je tüg xibi. ¹⁰ Co miiñ je tumbi ajcxy je huidibi ajcxy jayjip tigiy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meen nidüg'ociy je tumbidijc. ¹¹ E co ajcxy quipxyjaty yajmujuy, chi ajcxy ytigiy jotma'tpi. ¹² Chi ajcxy nimay je cam huindzin: “¿Na'amy co quipxyjaty ñich ajcxy ti xymujuyich mïd je huidibi ti miiñ axam tumbi? Yi' ajcxy tüg jaxigy ti ytuñ, e ñich ajcxy tüg xi je anbi ti ngöbicyich.” ¹³ Chi je cam huindzin y'adzooy, nimay nidügti je' ajcxy: “Miich, ñich nmigüg, ca' ñich jibic ti nduñich mïd miich. ¿Nej ca' ñich ajt ngapxytuunim co jadu'n nmujuya'ñ tüg denario meeni? ¹⁴ Con yi mmeen, e nicxni. Jadu'n ndzocyich co quipxyjaty nmujuya'ñich miich mïd huidibi ti ymiñ axam ma je tung. ¹⁵ ¿Nej ca' huaad ñich nduñich mïd ñich nmeen nej ndzócyichi? ¿O co xyajca'oyixyich, co ñich ooy n'oyjäyity?” ¹⁶ E huidibi ajcxy jaccogixiyb, yi' ajcxy jayjip'adam. E huidibi ajcxy jayjip'ajtp cham, yi' ajcxy yjaccogixihuamb. May ooy yjayajhuoomiñ e hueeni huidi huin'ijxipy.

Jesús capxyidzimy jadüg'oc co y'öga'ñ

¹⁷ E co Jesús anajty ñicxy ma Jerusalén tü'aa, chi mïd nicxy ahuingujc je nimajmetzpi ydiscípulos. Chi ajcxy nimay:

¹⁸ —Jadu'n nej miich ajcxy m'ijxy mnejhuüy cham ñich ajt nba'ttigiyim jim Jerusalén. Jim Jerusalén ñich, je jäy huidibi tsoon tzajpjoty, xyajcüyegaamich je teedy mïjtungmïdipi etz escribas ajcxy. Nyajtïyduna'ñich etz pidäga'ñ ajcxy ané'min co n'ögibich. ¹⁹ E yi' ajcxy xycüyega'ñich ma je huidibi ca' yjudiojäyity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugüg xi.

Huidibi Jacobo etz Juan ytajyijctzou

²⁰ Chi je Zebedeo ytöxyjic nimiiñ Jesús mïd metz je ymang; Jacobo etz Juan. Huin'it je ungdaj huingojxtinay'ihuüy Jesús, pijctzoy may'ajt. ²¹ Chi yajtiy Jesús:

—¿Ti mdzojcpy?

Chi je ungdaj y'adzooy:

—Tun may'ajt möhuipy ñich metzpi yi nmang yi jacmïjtung ma miich m'ane'min, jaydeb ññahuipy ma miich mmijc, tüg a'oy'amy etz jadüg anajty'amy.

²² Chi Jesús y'adzooy:

—Miich ajcxy ca' mhuinjihuüy ti ajcxy mbijctzooyb. ¿Nej mmínaxa'ñ myajna'ñ miich ajcxy je tzaachypi huidibi ñich nmínaxamy nyajna'ñich? Jadu'n nej jihuy m'üga'ñ ajcxy je ta'm nñ huidibi ñich n'ügamy e mbaada'ñ je nñbejtin huidibi ñich nbadamyb.

Chi je' ajcxy y'adzooy:

—Jëbi.

²³ Chi Jesús ymina'ñ:

—Janch t̄y'ajt nej miich ajcxy m̄ina'ñ co m̄minájxc̄ix̄ipy myajnájxc̄ix̄ipy je tzaachyp̄i hūidib̄i nnaxa'ñich. Per ca' ñich c̄otujc̄in nm̄id̄idȳich co ñich miich ajcxy nb̄idäḡipy m̄ijtungm̄id̄, co myajpaad̄ip̄ t̄üg ma ñich nm̄ijc̄ a'oy'amy e jad̄üg anajty'amy. Hue' jancht̄iy Dios Teedy ym̄id̄ ni'ix̄i' p̄injayt̄y t̄i hūin'ix̄y jayd̄eb̄ yajñic̄x̄ip̄ je m̄ijtung ma ñich n'ane'mdac.

²⁴ Co je nimajc̄p̄i ydisc̄ipulos ajcxy nejhūiȳy jadu'n nej Jacobo etz Juan p̄ijctzooy may'ajt ma Jesús, chi ajcxy ooy m̄ijotma'ty Jacobo etz Juan.

²⁵ Huin'it Jesús m̄ijcapxy je' ydisc̄ipulos ajcxy, chi n̄imay jadu'n:

—Miich ajcxy m̄nejhūiȳy co ȳi jāy ajcxy hūidib̄i m̄ijtungm̄id̄p̄i ma je mayb̄i naax cajp̄, m̄ic̄ ajcxy ane'my je naax cajp̄. Nañ jadu'n ȳi' ajcxy hūidib̄i m̄ic'ajt m̄id̄ ma je mayb̄i naax cajp̄, m̄ic̄ ajcxy ane'my je jāy ajcxy. ²⁶ Per miich ajcxy ca' m̄jadu'n̄ity nej je m̄ijtungm̄id̄p̄i ma je mayb̄i naax cajp̄. P̄injayt̄y miich ajcxy je m̄ij tung yajñic̄x̄ip̄, cop̄icy ñayb̄idäḡiȳb̄ nej t̄üg tumbi. ²⁷ Pen ji miich ajcxy nid̄üg nigohuajc'ada'ñ, cop̄icy ñayb̄idäḡiȳb̄ nej t̄üg tumbi. ²⁸ Com ñich nañ jadu'n, je jāy hūidib̄i t̄zoon t̄zajp̄joty, t̄i nm̄iñich ya naaxhūiñ jayd̄eb̄i nb̄ubed̄ipȳich ȳi mayjāy ajcxy. E canan ȳi' ajcxy xyp̄ubed̄ip̄ich. Nḡiyegaamȳich njugy'ajt̄in ma ȳi o'cin̄ m̄id̄ je mayjāy yc̄ix̄p̄i, jayd̄eb̄i ngo-hua'nich jāy ajcxy y'alma hūidib̄i t̄igoyam.

Jesús yajtzoocy metz jay huintzpi

²⁹ E co Jesús etz ydisc̄ipulos ajcxy ycajpp̄id̄z̄imȳ j̄im Jericó, chi ypan̄ic̄x̄i ajcxy mayjāy. ³⁰ E j̄im anajty ñ̄aay n̄imetz huintzpi t̄üba'áy. E co ajcxy nejhūiȳy co j̄im anajty ñ̄axy Jesús, chi ajcxy yaaxp̄i j̄ojc̄p̄i:

—Huindz̄in, David y'ap y'oc, tun may'ajt ñich pa'ayoog.

³¹ Chi je mayjāy ajcxy ojcooty je metzpi jāy huintzpi, n̄imay ajcxy co huen amoñ. Per je huintzpi n̄igi m̄inan'id̄ich:

—Huindz̄in, David y'ap y'oc, tun may'ajt ñich pa'ayoog.

³² Huin'it Jesús ytinayx̄ijp̄, e ym̄inañ:

—Ocmin miich ajcxy ya.

Huin'it yajt̄iȳy:

—¿Ti mdzojcp̄y ndun̄ipȳich m̄id̄ miich?

³³ Chi ajcxy ñ̄imaaȳi:

—Huindz̄in, ndzojcp̄ȳich co xyajhuind̄ic̄x̄iḡib̄ich.

³⁴ Huin'it Jesús pa'ayoogoty ajcxy. Chi ajcxy n̄idoni ma je' yhuin, e m̄ic'amy je huintzpi ajcxy y'ijx̄igy. Chi Jesús ajcxy pan̄ic̄x̄y.

21

Jesús ytiḡiȳy j̄im Jerusalén

¹ E co anajty Jesús etz je mayjāy ajcxy t̄i m̄ihuingoni Jerusalén, chi yja'ty ma Betfagé cajp̄ m̄ihuingon je Olivos c̄ogop. E j̄im Jesús quejxy n̄imetz ydisc̄ipulos ajcxy. ² Chi ajcxy n̄imay:

—N̄ic̄xc̄ix̄ ma je cajp̄ hūidib̄i j̄im'amy. E j̄im t̄üg burro ycoxoch̄ity m̄id̄ y'ung. Coguejt̄t̄ud̄ip̄ ajcxy je burro e yajm̄inḡix̄ ya ma ñich. ³ E pen j̄im p̄in nej xyñim̄ay, n̄ima' co je Huindz̄in yajtunam, e yajhuimbida'ñ m̄ic'amy.

⁴ Jadayaab̄i oy jadu'n ytuñȳii yjadȳii yc̄ix̄y yca'pxy jadu'n nej je profeta jecȳip̄ jaay, co jadu'n ym̄inañ:

⁵ Yajñima' je jāy ajcxy hūidib̄i t̄zinaayb̄ j̄im Sión (Jerusalén), oc'ijxc̄ix̄, chi m̄iñ ajcxy je mrey, yung nax yjot yhuinma'ñ m̄id̄ity je mrey, etz burrocx̄y m̄iñ. Ma t̄üg burro mang hūidib̄i ytaj t̄z̄imy yajyöyp̄.

⁶ Chi je metz ydisc̄ipulos ajcxy cuyduñ nej anajty Jesús t̄i y'ane'mȳii.

⁷ Yajja'ty ajcxy je burro m̄id̄ ymang. Chi Jesús ydisc̄ipulos ajcxy j̄ibe'ñ je

metzpi burro miid ajcxy yjocxhuit, chi Jesús yaj'iñay je burro mang. ⁸ E je mayjäy ooy yajhuinyëbiy ajcxy je tü'aa miid yhuit, chi ajcxy oy ypuxy quipy y'aacx. Chi ajcxy pidacy ma je tü'aa. ⁹ E jim ñajxy je burro, e je mayjäy huidibi nicxp jayijp, e nañ jadu'n huidibi anajty mimb axam, ooy ajcxy ytigiiy huambi jihuiyb, chach minaangixy:

—¡Hosana! ¡Gloria a Dios! ¡Ooy ycömayity Dios! Huen capxpaady idipy jada yëydijc huidibi mimb ma yi nHuindzin Dios yxii etz miid ymic'ajt. ¡Gloria a Dios!

¹⁰ Co Jesús ytigiiy jim Jerusalén, chi tüg'óciy je mayjäy huinmay'ahuidijty, chi ñay'amidóohuigixy miñ xyipy:

—¿Pin yi' yjiibi jäy?

¹¹ Chi mayjäy y'adzooy:

—Yi' je' je profeta Jesús huidibi tsoon ma Nazaret cajp ma Galilea it.

¹² Huin'it Jesús ytigiiy ma Dios ytijc. Chi ixquejxtay tüg'óciy je ajuybi adoocpi huidibi anajty yajpatp jiiby. Chi tijhuimbijttay tüg'óciy je mesa ma anajty jäy jim ymeeñyhuingogongixy, etz nañ jadu'n tijhuimbijttay je muuxytoocpi ñaybejt. ¹³ Chi jadu'n nimay ajcxy:

—Jaaybety jadu'n ymiiñ ma Dios ñecy: “ñich ndijc je' yi' ma jäy ajcxy Dios mibijctzoy”, per miich ajcxy hue' yi' mhua'ñ meetzpi tijc.

¹⁴ E co anajty jiiby tzajptigoty Jesús, chi jiiby ñimiini huidijaty anajty huintz, huidijaty anajty cïma'ty tecyma'ty, chi Jesús yajtzoocay. ¹⁵ Per je teedy ajcxy huidibi mijtungmiid etz je escribas ajcxy ooy mijotma'ty Jesús co ajcxy ijxy nejhuuiy jadu'n nej Jesús anajty tuñ mijhuinma'ñ. Etz nañ jadu'n ajcxy ijxy co je pi'c'anäg anajty ajcxy yhuaangixy yjihuiygixy jiiby tzajptigoty, yminaangixy: “¡Huen cömay'idipy je rey David y'ap y'oc!” ¹⁶ Chi je teedy etz escribas ajcxy Jesús nimay:

—¿Nej ca' miich mmidooy nej je pi'c'anäg chach minaangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiiñ jaaybety co jadu'n ymina'ñyi?:

Ti myaj'ixpicy iyy ma je pi'ctijc ma'xungdijc jaydëbi ajcxy iibaadip capxpaadip Dios.

¹⁷ Chi Jesús ycapxycijxy miid je teedy etz escribas ajcxy etz chooñ jiiby tzajptigoty. Chi ñicxy ma Betania cajp, e jim yajnajxy je tzumbi.

Jesús capxpojcy je higueri ca'p anajty ytïm'aty

¹⁸ E co yxïmiy ytïcxïgy, chi Jesús yhuimbijty Jerusalén. E ma anajty tim ytüyöy, jim yuuböccooti. ¹⁹ E jim ijxy ma tüba' tüg cop je higueri quipy. Chi ninicxy. Chi pä't'ijxy, per ca' anajty ni tüg ytïm, jëda'ajty je' y'aay. Chi Jesús nimay je higueri quipy:

—¡Ni ca' minaa xii mdïm'adipy!

E mic' micyi je higueri quipy ytïch. ²⁰ E co je' ydiscipulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yi' higueri quipy mic'amy ti ytïch?

²¹ Chi Jesús y'adzooy:

—Janch tiy'ajt jadu'n nej nnïmaaygixy. Pen miich ajcxy miid je mibijcin, etz ca' ajcxy mmibicy aametz jotmetz, jëbi mijhuinma'n mdungixy nej iich ti nduñich. E nañ jadu'n jëbi jac mijpi mijhuinma'ñ mdunipy ajcxy. Jëbi ajcxy tun cop mnimäy: “Quëg ya, tigi' mejyoty” e xycapxymidohuipy ajcxy je tun je cop. ²² E tüg'óciy tijaty miich ajcxy mbijctzooyb huen ytïmytijyity, pen mmibijcp ajcxy, mbaadip ajcxy.

Jesús ycötujcín

²³ Co Jesús yja'ty Jerusalén, chi ytiñiy jadüg'oc ma Dios ytiñc. E jiiby anajty yaj'ixpicy je mayjäy, chi ñimiini je teedy miñtungmüdpí etz judío miñjäydijc ajcxy. Chi ajcxy y'amidoohui:

—¿Ma cötujcín ti mbaady co jadu'n mduñ tzajtigoty? ¿Pín jada cötujcín ti xymöy?

²⁴ Chi Jesús y'adzooy:

—Nañ jadu'n ñich miich ajcxy nyaj'amidoohuamy tüg ayuc. Pen m'adzooyb ajcxy jada ayuc, huin'it ñich miich ajcxy nyajnimähuipy ti cötujcín ñich müd nduñ huidijaty. ²⁵ ¿Pín quejxy je Juan, je Bautista, yajniñbejtpí, Dios o jäy ajcxy?

Chi ajcxy ñayñimáayigixy miñ xyipy:

—Co ixypy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibijcy Juan?” ²⁶ Per nañ jadu'n ca' huaad nmínaaním co jäy ajcxy yajniñbijcy Juan, com nejhuiñyim co yí mayjäy miñbijcixy co je' anajty Dios tüg y'ayucnajtzcaxiñybi.

²⁷ E paady ajcxy jadu'n adzooy Jesús:

—Ca' ñich ajcxy nejhuiñyigixy.

Huin'it Jesús ymínañ:

—Nañ jadu'n ñich ca' nigapxa'ñich pín je' ycötujcín müd nduñich huidijaty.

Je metzpi ung iñxpejt

²⁸ Chi Jesús ymínañ:

—¿Nej m'oc'ixy m'ocjaygugi' jadayaabi iñxpejt? Tüg je yëydijc ymüd anajty metz je' ymang. Chi ñimay je mijpi: “Ñicx cham m'octuñ ma ñich n'uva cam.” ²⁹ Huin'it je' ymang y'adzoohui: “¿Ca' nnicxa'ñich!” Chi jacobhueñyí je' ymang yhuinmaydigajch, chi ñicxy tumbi. ³⁰ Chi je ungedeedy oy ixy je ymang mutzpi. Chi nañ jadu'n ñimaay co huen ñicxy tuñ. Chi je' ymang mutzpi y'adzooy: “Oy, cham ñicxibich.” Per ca' ñicxy. ³¹ ¿Huidi je' nidügti ycuycuuñ nej anajty yteedy tzocy?

Chi ajcxy ymínañ:

—Je' ymang mijpi huidibi jayijp ñimay.

Huin'it Jesús ñimay ajcxy:

—Janch tiy'ajt jadu'n nej ñimaaygixy co je huidibi ajcxy yajcogüejtpí etz je töxyjäy ajcxy huidibi tundigooyb müd yëydijc, je' ajcxy tigihuamb jayijp ma Dios y'ane'my jiiby tzajpjoty, ca'ydi miich ajcxy. ³² Paady ycixpi oy ymíñ je Juan huidibi jäy ajcxy yajniñbejt, Juan yajni'ixiñyigixy je mayjäy nej ajcxy jëbi yjothuimbidiñy ma Dios. E müch ajcxy ca' miñbijcy jadu'n nej Juan ymínañ. Per je' ajcxy huidibi yajcogüejtp etz je töxyjäydijc huidibi tundigooyb müd yëydijctijc, ymibijc je' ajcxy Juan. Oy müch ajcxy mja'ijxy, per ca' mjothuimbidaangixy etz ca' miñbigaangixy.

Je naymiduuniptijc jibicjäybi ajcxy y'ijxpejt

³³ Chi Jesús ymínañ:

—Oc'amidoo'ijtcix jadayaabi iñxpejt. Ji anajty tüg je huidibi niñuindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyiñy ma anajty jëbi je uvas ñiñ yajniñidägaani. Nañ jadu'n cojy tüg tzaaboch cixpi, jigix jëbi cuend'aty ycam. Co yaj'oyiyday, chi je cogam yejcy pijctzoy je ycam ma je jäy ajcxy huidibi naymidunaanip. Chi oy chooni je cogam ñicxy viaje tumbi. ³⁴ Je huin'it tiempo co yhuaad'ajtni je cosecha, chi je cogam quejxy nijëjity ytumbi jim ma huidibi anajty ti yajpijctzoy je ñaax co huen möyii je huidibi yí paadaanip. ³⁵ Per je jäy huidibi anajty ti naax pijctzoy, chi

ajcxy majch je tumbi. Chi ajcxy ooy huinhuojpy jiphuojpy tüg. Chi ajcxy huingäch jipcäch jadüg. Chi ajcxy je midugigpi yaj'o'cy. ³⁶ Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷ Chi yci'm'ung oy quejx cogixiyñi. Hue' jot'ajti co yajmij'adiyb je' y'ung. ³⁸ Per co ajcxy je tumbidijc ijxpaty je cogam je' y'ung, chi ajcxy ñaygapxi: “Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtin je ypidägy. E co ajt nyaj'o'cim, chi ñich ajt nmihu'mim je cam.” ³⁹ Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰ Huin'it Jesús ymīnañ:

—Co anajty ti mīñ je conaax je cogam, ¿ti jada' y'octunipy mīd je tumbidijc ajcxy?

⁴¹ Chi je teedytjic etz mijjädijc y'adzooy:

—Je cogam yaj'ögipy yijibi jibicjäydijc, ca' ajcxy pa'ayoohuipy, etz yegipy je uvas cam pijctzoy ma je huingbi jäy huidibi yegipy je pidägy huidibi cogam paatip.

⁴² Chi Jesús ymīnañ:

—¿Nej ca'ni miich ajcxy mgapxy ma mīñ jaaybety ma Dios ñecyi? Jadu'n ymīnañ:

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi.

Tim jadu'n nipaady nej tüg tzaa oybi huidibi je pojtzpidijc ca' ajcxy yajtuna'ñ, e je' je' oy ti yhui'mni ma anajty yjaccopicyity. Je Huindzin Dios jada tung ti tuñ, e ooy oy n'ijxim yi' ytung.

⁴³ E paady jadu'n ñich miich ajcxy nimäy co miich ajcxy myajpiga'ñ yi' m'it mlu-gar jiihy tzajpjoty ma Dios y'ane'my etz yajmöhua'ñ je huingbi jäy je huidibi amuumdügjot naygiyecip ma Dios. ⁴⁴ Pinjaty ca' cöbīga'ñ jada mij'ane'mbi, ayo'n ypadaamb, ytimnipatp nej jihuiy jim ycixciday ma je tzaa ñicx, tijhuïdz yjajtähuiipy. O pen je mij'ane'mbi midziptzoñ je jäy, chi ytigoydähuiipy ajcxy, tim jadu'n nej jihuiy je tzaa ñigidaagoodyii ajcxy, e janch jaam püx nicxy yjaty.

⁴⁵ Co ajcxy midooy, chi je teedytjic etz je fariseostijc huinjihuuy co yi' ajcxy yajni-gapxyp, ⁴⁶ chi Jesús ajcxy jamadzaañ. Per tzigiiyb anajty ajcxy mīd je mayjäy, je' co je mayjäy anajty mibijccixy co Jesús najtzcapxiyb Dios ytiy'ajt.

22

Je ijxpejt ma jäy anajty pijcpidijc nixiuduñ

¹ Chi Jesús jadüg'oc ytiigiiy capxp mīd ijxpejt, ymīnañ jadu'n:

² —Je Dios y'ane'min jadu'n nipaady nej je rey ymang ocnixiuduñ co ti ypic. ³ Chi je rey quejxhuäcxtay je ytumbi co huen nicxy huoomujctaaygixy je huidijaty anajty ti yaj'nimaaygixy co míngixipy ma ytuna'ñyii yjada'ñyii je pijcin. Per ca' je' ajcxy ymīnañ ma je pijcin nixiuduñ. ⁴ Chi quejxnip huingbi ytumbi, nimay ajcxy: “Nimaaygix je tibi oy jayijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Ti je huaj ñicxpi nyaj'ögyich. E ni'ixi' ijtaayñi, huen mīñ ajcxy ma je pijcin ytuna'ñyii yjada'ñyii.” ⁵ E je' ajcxy tibi anajty yaj'nimaaygixy, ca' ajcxy je' ytimy tuñ cuendi. Nijëjity ajcxy ñicxy ma ytundac. Nijëjity ajcxy ñicxy toocp yejc; ⁶ e nijëjity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jäyyaj'öcp ajcxy etz ytoydähuiip je ycajp. ⁸ Chi je rey nimay je ytumbi ajcxy: “Ni'ixi' ijttäy ma jadaayaabi je pijcin yajnixiduna'ñ. Per je huidibi ajcxy ti yajnimäy ca' ajcxy mihuaadity co ymíngixipy. ⁹ Nicx miich ajcxy majaty jäy yjin ytiyc. Nimaaygixy tüg'öciy pinjaty ajcxy mbaty,

co huen miingixy ma je pijcpi.” ¹⁰ Chi ñicxy je rey ytumbi ajcxy. Chi ajcxy miidmiunday je mayjäy, je oyjäybi etz je jibicjäybi. Chi y'ujztay je rey ytijc miid je mayjäy. ¹¹ Huin'it je rey ytigüy mayjäyjoty, ixa'ñ anajty huidijaty ti yajhuomiñ. E jiiiby tüg yëydijc ti ijxpaty huidibi ca' anajty ti ñayxoxyii, jadu'n nej jäy nayxóxiigixy co ajcxy nicxy ma tüg pijcin. ¹² Huin'it je rey minañ: “Migüg, ¿nej ya ti mdigüy tigoty, e ca' mxojx miidity nej ypaadyii?” E je yëydijc amoñyi je' yhui'my. ¹³ Chi je rey nimay huidibi anajty jim pubejtp: “Cixotz tecyotz jada yëydijc etz pidäg agootztuuby. E jiiiby yjihuipy yäxipy, jiiiby ytitz huinqueedip miid jotmay.” ¹⁴ Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüejtin ñimiydägy

¹⁵ Je huin'it tiempo je fariseos ajcxy tuuñ quipxycapxy co anajty xihuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huidibi minicxpejt je fariseos ajcxy ytiy'ajt etz naagity huidibi mijnicxpejt je Herodes ytiy'ajt. Chi ajcxy Jesús nimay:

—Huindzin, nejhuuybich ich ajcxy co miich mgapxy je tiy'ajt. Tudägy myaj'ixpicy jäy ajcxy jadu'n nej huaad ajcxy cuychinaangixy Dios ytiy'ajt. E ca' mgüendituñ nej jäy ajcxy yminaangixy. Tú'ciy miich mduñ miid comeeñyjäy etz miid ayoobtijc, ca' huin'ixpety myaj'ixpicy. ¹⁷ Nejhuihuamy ich ajcxy nej miich mina'ñ pen tiy'ajt jadu'n: ¿Nej ndundiogooyim ma Dios ycötujcin, co ngüejtim ma César, je romano mij'ane'mbi?

¹⁸ Per Jesús ñejhuuyb anajty ajcxy yjibic-huinma'ñ, e chi ajcxy nimay:

—Ooy miich ajcxy naybidáacigixy nej jihuuy ooy mdudägyity, e ca' yjanchity. ¿Na'amy co ajcxy xychachjot'ixy xychachhuinma'ñ'ixyich? ¹⁹ Yaj'ijxcich tüg meeñ huidi miid migüéjtigixy César.

Chi ajcxy mimiñ tüg meeñ. ²⁰ Chi co Jesús y'ijxy je meeñ, chi yajtiy:

—¿Pin y'ahuinax e pin yxi cixjaay ma jada meeñ?

²¹ Chi ajcxy y'adzooy:

—Je romano mij'ane'mbi y'ahuinax etz yi' yxi.

Huin'it Jesús je' ajcxy nimay:

—Mo' je César huidibi yi' yjé'ajtpy, etz mo' Dios huidibi Dios yjé'ajtpy.

²² E co ajcxy jadu'n midooy, chi ajcxy ooy jihuuy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypjcin co pin ti y'ögy

²³ Je huin'it xii je saduceos ajcxy oy ixxy Jesús. Yi' ajcxy ymina'ñ co ca' yjugypiga'ñ je öcpi ajcxy. E jadu'n ajcxy huinma'ñ pidägy, e yminaangixy:

²⁴ —Huindzin, jadu'n miiñ ma Moisés ycötujcin co je yëydijc huidibi ypijychinaayb miid ytöxyijc, e pen öcp je yëydijc, e ca' ni tüg y'ung yajhui'my, copicy co co'öcytöxyjäy ypijctigadzipy miid je yëydijc ymiguëx. ²⁵ Pues jii ma ich ajcxy anajty tüg quëx je yëydijc nihiuxtujc. Je ungoob ypijcy, e chi ix'ögy ytöxyijc, e ca' ni tüg y'ung yajhui'my. Chi je miguëx ypijctigajch miid je töxyjäy. ²⁶ Nañ jadu'n je mimetzpi yëydijc ix'o'cy ytöxyijc. Nañ jadu'n je midugigpi yëydijc ix'o'cy ytöxyijc. E jadu'n oytuñyii yjadyii miid je töxyjäy co ti anajty miiddzinay'abidzimday je nihiuxtujcpi yëydijc tüg quëxpi. E je nihiuxtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy yi' tibi ajcxy y'ögy, ¿huidibi jada' ajcxy nidügti je yëydijc töxyijc'adaanip je töxyjäy? Com ti ajcxy jadu'n nihiuxtujcpi miiddzinay'abidzimgixy.

²⁹ Chi Jesús je' ajcxy y'adzooy:

—Miich ajcxy ca' mhuinjihuüy je t'iy'ajt, com ca' mnejhuüygyxy Dios y'ayuc yt'iy'ajt, e com ni ca' mnejhuüygyxy je mic'ajt huídibi Dios ymüd. ³⁰ Pues co anajty yjugypijccixy je jäy t'ibi y'öccixy, chi ca' ajcxy ypiga'ñ, e nañ jadu'n ni ca' ajcxy ñaymöhüüyb y'ung huen pijccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángeles ajcxy chinaaygixy jugy'ajtcixy. ³¹ Per je t'iy'ajt co jäy ajcxy t'ibi y'öccixy yjucypigaangixy jadüg'oc, jëbi mbaatcixy jada t'iy'ajt ma Dios ñecy. Dios ci'm jadu'n minañ: ³² “Ích je' je Dios huídibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi' öcpi ajcxy. Yi Dios Dios'ajtp yi' ma yi' juugypí ajcxy.

³³ E co je mayjäy jadu'n midooy, chi ajcxy ooy tzachjihüüy tzachhuinmaay je Jesús y'ixpijcin.

Je ane'min huídibi ooy ycopicyity

³⁴ E co je fariseos ajcxy nejhuüy co Jesús anajty ti yaj'amoñyii je saduceos ajcxy, chi ajcxy ñayyöymujctaayi. ³⁵ E jim anajty tüg leyhuindzin huídibi Jesús anajty jot'ijxyp huinma'ñ'ijxyp, chi y'amidooy:

³⁶ —Huindzin, ¿ma yi maybi Dios ycötujcin, huídibi yi' jaccopicyip?

³⁷ Chi Jesús y'adzooy:

—Tzoc jihui' etz yajmij'at nHuindzin'ajtim Dios müd tüg'óciy m'aa mjot, etz müd tüg'óciy m'alma, etz müd tüg'óciy mhuinma'ñ. ³⁸ Jada je' jadu'n je Dios ycötujcin huídibi jaccopicyip, etz huídibi tim jayijpi. ³⁹ Je mimetzpi Dios ycötujcin jahueengi tú'ciy ñaybadyii müd je jayijpi, yi' huídibi jadu'n minamb: “Tzojccix jihüügix yi' mmigügtijc, tim jadu'n nej mnaychogyii nayjihüüyii ci'm.” ⁴⁰ Jada Dios metzpi ycötujcin jaccopicy jacmic'ajt müd ca' jac huídibi cötujcin huídibi Moisés etz je profetas ajcxy yejc.

¿Pin je' y'ung je Cristo?

⁴¹ E ma anajty jim tüg'mucy yjac'ijtcixy je fariseos, huin'it Jesús yajtiy:

⁴² —¿Nej miich ajcxy huinmay müd Cristo? ¿Pin je' y'apmang?

Chi ajcxy y'adzooy:

—Je David je' y'apmang.

⁴³ Chi Jesús ajcxy nimay:

—¿Na'amy co David anajty ti ymina'ñ co Cristo hue' je' yi' yhuindzin? Jadu'n ti capxy David anajty müd je Dios yjihui'ñ ymic'ajt, ymina'ñ:

⁴⁴ Je Huindzin Dios nimay ich nHuindzin: “Íña' ma ich n'a'oy'amy, ixti cooni ich miich nyajmimadägip ma je mmidzip ajcxy.”

⁴⁵ ¿Nej jëbi David ymij'ap'adyii je Cristo? Com David ci'm ymina'ñ co Cristo yi' je' yhuindzin.

⁴⁶ E nitüg'aa ajcxy yca'adzohuimbijty. E jadu'n nej je xii tiempo yjacnicx anajty ca' ni pin ocjacyajtiyñi huídijaty ayuc.

23

Jesús xiy ajcxy je fariseos etz escribas

¹ Chi Jesús nimay je mayjäy etz yi' ydiscípulos ajcxy:

² —Je escribas etz je fariseos ajcxy chachnaygömáayigixy co yi' ajcxy jajtp nej capxti'cxipy je cötujcin huídibi Moisés yjaay jecy'ajty. ³ Oy co ajcxy mguydunipy jadu'n nej yi' ajcxy xyaj'ixpijccixy Dios y'ayuc, capxymidoogix nej xyñimaaygixy per ca' mdungixy huídibi yi' ajcxy ytumb, com yi' ajcxy oy ycapxcixy e ca' ajcxy cuydungixy. ⁴ Yi' ajcxy nigo yajcojciy canaag costumbre huídi je jäy ajcxy ca' mimadäga'ñ, e ca' ajcxy pa'ayoy je jäy, tim jadu'n nipaady nej jihüüy tüg tziy ti mooygixy jemxypí huídibi ca' je jäy ajcxy mimadäga'ñ, e yi' escribas etz fariseos ajcxy ni ca' ycihuax

yajpaadaangixy je tziomy. ⁵ Tüg'óciy huidi yi' ajcxy ytumyb, je' ajcxy ytumyb co huen jäy ajcxy ixyii, jaydëbi yajcömay ajcxy. Yi' ajcxy yajhuimboc-huiniyigixy etz ñayyajcihuiniyigixy Dios y'ayuc. Nayxojxcixy müd huit yooñjatypi co chachcömayaangixy. ⁶ Ooy ajcxy tzocy iñaybejt ma je' iñay je ane'mbi ma jäy ajcxy yxiidun. Ooy ajcxy tzocy yi' cödumbi iñaybejt ma je naymujctac. ⁷ Yi' escribas etz fariseos ajcxy oy tzojccixy co ajcxy yajcapxpooxip huindzigi'ñ'amy mayjäyduum. Etz nañ jadu'n ajcxy tzocy co jäy ajcxy yajmij'adüyb nej huindzindijc ixpiyitijc. ⁸ Miich ajcxy ca' jadu'n m'a'ixihuipy co ajcxy xytijipy huindzin com nidüg'óciy miich ajcxy mnaymigüg'ájtigixy, etz tügpajc je' huidibi miich ajcxy mhuindzin'ajtpy yi' je' Cristo. ⁹ E nañ jadu'n miich ajcxy ya naaxhuiñ, ca' oy ni pin mdeedy'adüyb co müd miich ajcxy tügpajc je mDeedy, huidibi jiiby tzajpjoty. ¹⁰ E nañ ni mganaydijüyb ajcxy mij ane'mbi, com yi' Cristo je' tügpajc miich ajcxy mmij'ane'mbi. ¹¹ Je pin jaccapxymidoob ymigügtijc, je' je' mij'ajtin müd ma miich ajcxy. ¹² Pinjaty huidibi ci'm naygömayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidáacigixy nej jihuüy ooy mdudägyjäy, e ca' yjanchity. Miich ajcxy mgoyüchpy je Dios ytiy'ajtin nej huaad jäy ajcxy ytiyü jiiby tzajpjoty ma Dios y'ane'my. Ni miich ajcxy mgatigüygixy, e nañ ni mga'a'ixiygixy co huingbi ytiyühuip.

¹⁴ ¡Ay miich ayoob ajcxy fariseos etz escribas ajcxy! ¡Miich ajcxy m'aanüdacp! Miich ajcxy myajcijxtaayi yi' co'ögy ytöxyjäy ypidägy müd ajcxy m'adzojcin, e mdungixy ooy jecy tzajpcapxycapxi, jigix capxpaady mbidzimipy. Dios nigi chaachytunip miich ajcxy müd mbocoy ycipi, ca'ydi jac pin jäy.

¹⁵ ¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'ñ je m'ixpijcin ma je tügpä jäy. E co ajcxy je' myajmibicy, huin'it mejtz jadu'ñyi je pocy anajty müdity je jäy, ca'ydi miich ajcxy.

¹⁶ ¡Ay miich ayoob ajcxy huidibi jadu'n idüitzp nej tügi huintzpi huinhuoy! Miich ajcxy minamb co pen tüg jäy tuñ yhuandaacin, e iibaati capxpaati Dios ytiy, chi ca' cuyduñ je huandaacin. Per pen iibatpy capxpatpy je oori huidibi jiiby ma Dios ytiy, huin'it janchity cuyduñ je huandaacin. ¹⁷ Tzuudijc locidijc huidibi ca' huinjihuüy je tiy'ajt. ¿Huidibi jaccopicyip: je oori o je Dios ytiy ma je oori yoxy ity?

¹⁸ Nañ jadu'n miich ajcxy mina'ñ: “Pen tüg jäy huandaacin tuñ, e capxpaady je altar ma Dios yajhuindzigiy, chi ca' cuyduñ je huandaacin. Per pen capxpaady je huindzigi'ñ tzüch ma je altar ma Dios yajhuindzigiy, chi cuyduñ yhuandaacin.” ¹⁹ ¡Tzuudijc locidijc huidibi ca' huinjihuüy je tiy'ajt! ¿Huidibi jacmij'ajtin ymüd je huidibi ti yajyoxy o je altar? ²⁰ Pinjaty capxpatp je Dios ytiy ma Dios yajhuindzigiy y'agapxmuctaayb anajty huidijaty jiiby yajpaatp ma Dios yajhuindzigiy. ²¹ Pinjaty capxpatp je Dios ytiy, ca' anajty jeyi capxpaady Dios ytiy, nañ ycapxpatp anajty Dios huidibi jiiby tzinaayb. ²² Pinjaty capxpatp je tzajp, nañ capxpatp anajty Dios y'ane'mdac quipxy müd Dios huidi tzinaayb jiiby.

²³ ¡Ay miich ayoob ajcxy fariseos etz escribas ajcxy, huidi naybidaacip tudägy, e ca' yjanchity! Miich ajcxy mooyb Dios je tügpicy je majcpi huidibi je' paatip, ixti yi' tzajnimang, yi' ruda etz je pi'c'ujtz'ay ung. Per ca' ajcxy mduñcuenti je cötujcin huidibi jaccopicyity. Miich ajcxy ca' mdzinäy tiydudägy

müid je mügügtijc. Müich ajcxy ca' müüidity pa'ayo'n müid je' ajcxy hüidibi ayooob jottigooyb, etz ca' müübijccixy Dios. Jada ixypy ajcxy mbaadumy, e mooygixy Dios je tügpicy je majcpi. ²⁴ ¡Tzuudijc locitijc! Müich ajcxy ti m'anajxyp je uux, e mgojüinnaaxcixy je camello, je müjpi iyujc.

²⁵ ¡Ay müich ayooob ajcxy fariseos etz escribas ajcxy, müich ajcxy naybidaacip nej tudägy jäy, e ca' yjanchity! Jüiby jotjoty hüinma'ñyoty müich ajcxy müidity jüicipi. Müich ajcxy müid je ca'oy'ixü etz je adzojcin. Tim jadu'n nipaady nej jühuüy myajhuächpy ajcxy yi tasi ninücx yi texy ninücx, e chi myajhuü' my jüicipi ma tasijot ma texyjot. ²⁶ ¡Tzuudijc müich ajcxy! Jayijp yajhuädz jüiby jotjoty texy tasi, hüin'it hüi'm nañ jadu'n huädz nügix'amy.

²⁷ ¡Ay müich ayooob ajcxy fariseos etz escribas ajcxy, müich ajcxy naybidaacip nej tudägy jäy, e ca' yjanchity! Jadu'n müich ajcxy nipaady nej öcpi jut. Je öcpi jut nügix janch oy yquëxügy, per jüiby jutjoty ujtz jüiby müid je öcpi pajc etz müid jüicipi. ²⁸ Jadu'n ajcxy mguëxügy mayjäyduum nej jühuüy ooy m'oyjäyity, per jüiby jotjoty müid jüic-hüinma'ñ.

²⁹ ¡Ay müich ayooob ajcxy fariseos etz escribas ajcxy, müich ajcxy naybidaacip nej tudägy jäy, e ca' yjanchity! Müich ajcxy mgo'abojtzcixy yajxon je öcpi jut ma profeta ajcxy ñaaxtügy, etz mxoxy ajcxy müid je pijy ma ñaaxtügy je tudägy jäy ajcxy, ³⁰ e müich ajcxy nayñimaayigixy müñ xyipy: “Co ixypy anajty n'octzinaayim jecy'ajty ca' ngapubejtim co ajt nmüj'ap nmüjteedy yaj'ögy je profetas ajcxy etz je tudägy jäy ajcxy.” ³¹ Müid jada ycixpi müich ajcxy nejhuüyb co müich ajcxy m'ap'adyii mdeedy'adyii je jüicipi jüidijc ajcxy hüidibi yaj'öc je profetas. ³² Müich ajcxy yajcüxcixy je jüicipi hüidibi ajcxy müüj'ap müüjteedy yajtzondac!

³³ ¡Jadu'n müich ajcxy nipaady nej mayxoox! Ca' müich ajcxy madägüpy cöguëgüpy je tzaachypi jüiby ayoodactuuby. ³⁴ E paady nguexaamybich ma müich ajcxy profetas etz hüidibi ixpicyip ma Dios y'ayuc, etz hüidibi xyaj'ixpigamb ajcxy yi Dios ñecy. Per müich ajcxy myaj'ögamyb myajcruutzpedamyb nüjüjity, etz nüjüjity mgoxamyb mhüobamyb ajcxy jüiby tzajtigoty etz m'ixhüidida'ñ mbahüidida'ñ ajcxy cajp cajp. ³⁵ Je müjpocy xyñügidaccoda'ñ müich ajcxy, jadu'n nej je oyjäy ñi'py temy yojcy jecy'ajty, oga'ñ chondacy müid je oyjäy Abel etz ycogixüy müid Zacarías, je Berequías y'ung hüidibi müich ajcxy müüj'ap müüjteedy myaj'o'c jüiby tzajtigoty ma altar. ³⁶ Janch tüy'ajt jadu'n nej nümaaygixy co je müjpocy nügidaccoda'ñ je jäy ajcxy hüidibi tzinaayb jadachambi tiempo.

Jesús yäxy müid Jerusalén cajp ycixpi

³⁷ Müich ajcxy Jerusalén jäy! Müich ajcxy Jerusalén jäy! Jerusalén jäy hüidibi jecy'ajty yaj'ögy je profetitijc etz ycögächpy ajcxy je Dios ycogapxy. Canaag'oc ti njayajtügmüjctähua'ñich müich ajcxy, jadu'n nej tzeydaj yajtügmüjctäy je' y'ung ma yqueec pä, per müich ca' m'a'ixügyixy. ³⁸ Oc'ix müich ajcxy nej mdijc abac yhuü'maangixy. ³⁹ Janch tüy'ajt jadu'n nej nümaaygixy co camina müich ajcxy xy'ixüpyich jadüg'oc, ixti cooni paadüpy je xü je tiempo co jäy ajcxy ymüina'nüpy: “Cömay yi hüidibi müimb müid nhuindzin Dios yxü etz ymüic'ajt.”

24

Jesús ymüina'ñ co Dios ytijc yhuindigoyüpy

¹ Ma anajty Jesús ti ypidzimni ma Dios ytijc, nücxp anajty, hüin'it Jesús ydiscüipulos ajcxy nüimüjhuäci. Yi' ajcxy anajty yaj'ixüydähuamyb je Dios ytijc, com ooy anajty chachmüjtijcity.

² Chi Jesús ymüinañ:

—Huindicx miich ajcxy jada maybi mijjaty ytjc. Miinipy xii tiempo mina tüg'óciy jada tijc nicxy yhui'my taj xit, ca' ma tzaamacxy. Huindigoydáhuipy tüg'óciy.

Je t'iy'ajt ma ca'ni naaxhuiñybi ycixa'ñyi ytigoya'ñyi

³ Chi oy ñicxni ajcxy ma Olivos cōgop. E co anajty jim, Jesús y'iñäy, chi ñimaayi ameech je' ydiscipulos ajcxy:

—Hich ajcxy nejhuihuamyb mina jëdu'n ytuna'ñyii yjada'ñyii. ¿Ti je' quëxigamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adib ajcxy, ca'ydi pin xyhuin'ingixy. ⁵ Ooy mayjäy ñaybidägáangixy müd ich nxi, naybidägáangixy co je' ajcxy je Cristo, ymina'na'ñ ajcxy: “Hich je' je Cristo.” ⁶ Co miich ajcxy ayuc midohuipy co jäy ajcxy chachtziptungixy ñayñibidigigixy xi ya, chi ca' ajcxy mdzig'iygixip, com ooy ycopicyity co jadu'n jayijp ytuniyb yjadiyb. Ca' nan hue' je' anajty tim cijxp tim tigooyb je xii je tiempo. ⁷ Nayñibidigib naax cajp müd huingbi naax huingbi cajp, e gobierno müd huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypi ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajc'iyegipy, jigix xychaachtungixipy e xyaj'ögixipy. E tüg'óciy je maynaaxhuiñjäy xyca'ixáangixipy, müd ich nxi ycipi. ¹⁰ Je huin'it tiempo may je jäy ajcxy yajtigoya'ñ ymibjcin. E nañ jadu'n ñayca'oy'ixáangixy etz ñayñigapxáangixy ñi'ojihuáangixy miñ xyipy. ¹¹ Ooy may quëxigaangixy aanidaacpidjic mina'naangixy co Dios y'ayuc ytiy' ajt nimiydaci, e mayjäy oy huin'inaangixy. ¹² E je' co ajcxy xii jimijt ñajtninicxiyñi jac tim nigijibicpi tunaangixy, ca' ajcxy y'ocnaychójcinipy miñ xyipy. ¹³ Per pinjaty tiydudägy panixp je mibjcin, je' ajcxy ypaadip y'alma nidoocin. ¹⁴ Copicy co jayijp yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydebä jäy ajcxy nidüg'óciy nejhuiy Dios ytiy'ajt. Huin'it je naaxhuiñybi ycijxni ytigooyñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huinjihu'iygixy) ma minañ: Miich ajcxy co m'ixy pinjaty jibic-huinma'ñ tumb nej ca' ypadyii ma Dios ytjc, huidibi ooy ycodzig'ijity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixipy mic'amy ma tungop. ¹⁷ Pinjaty huidibi yajpatp ma ytjcnicx ca' nicxy tijaty yajpidzimy ma ytjc. ¹⁸ Yi jäy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytjc. ¹⁹ Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi müd y'ungma'xung. ²⁰ May'ajt ajcxy mbijctzoohuipy yi Dios co jada jadu'mbi ayo'n ca' ytuniyb yjadiyb ma anajty ytichtiempojity, etz ma anajty pocxinxiijoty. ²¹ Huin'it oy ayo'n jotmay ytuna'ñyii yjada'ñyii huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycajactuniyb ycajacjadiyb. ²² Pen ca' Dios capx'aduga'ñ yjiibi ayo'n xii ayo'n tiempo, ni pin ca' chögipy. Per Dios ycapx'adugamy yjiibi ayo'n tiempo müd je mibjcpidjic ycipi huidibi Dios ti huin'ixy. ²³ Co yi jadu'mbi xii tiempo anajty ymiñ, ca' mmibijccixipy, pen ji pinjaty xyñimaangixy: “Ijxcix, cha yajpaady je Cristo”, o “Jim'amy yajpaady je Cristo.” Ca' mmibijccixipy. ²⁴ Pues miinip jäy ajcxy huidibi huin'inaangixy ymigügtijc. Ci'm ñayajnaxáangixy jadu'n nej jihu'iy je' yCrístity, e ymináangixy co capxhuäcxy ajcxy Dios y'ayuc, e ca' yjanchity. Ytunip ajcxy mijhuinma'ñ etz mijpi ijxpejt, ixti jëbi jahuin'ingixip je mayjäy

huidibi Dios ti yhuin'ixyii. Per ca' Dios a'ixihuipy co yhuin'innyb yi' yjāy. ²⁵ Ti ich yi' jayijpni nigapxich. ²⁶ E co pinjaty ajcxy xyñimāhuipy: “Chim je' je Cristo mijtigādumb”, ca' ajcxy mninicxip. O co pinjaty ajcxy xyñimāhuipy: “Chiiby je' tigoty yhuingoyūch”, ca' ajcxy mmibigipy. ²⁷ Ich je' je jāy huidibi tsoon tzajpjoty, nhuimbidaambich ya naaxhuiñ mūd je tūcxin je jājin, jadu'n nej je huīdzuc huīdi tūcxp xībīdzīmyb ixti xīgīdāgy. ²⁸ Ma je öcp ninīcx yajpaady jim nīmujctāhua'ñ je luud ajcxy.

Nejjada' je' Dios y'ung ymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodzygidāga'ñ, je po' ca' ytūcxa'ñ, je madza' ycādāhua'ñ etz janch mic je tzajp yūcxa'ñ. ³⁰ Co yi' jadu'mbi ytunīyb yjadīyb, chi quēxīga'ñ tzajpjoty je iixpejt co ich, je jāy huidibi tsoon tzajpjoty, nhuimbida'ñich ya naaxhuiñ. E chi tūg'ócy je mayjāy tájip máyip yjihuīhuipy yāxipy, chi ajcxy ixipy je jāy huīdi tsoon tzajpjoty miñ anajty jocjoty mūd ymic'ajt y'oy'ajt. ³¹ Chi nguexipyich ángeles ajcxy co huen mic yajxūxy ajcxy ytrompeta, jigix yōymujctāhuipy tūg'ócy pinjaty huin'ijxyp xi ya ma ajcxy yajpaady ya naaxhuiñ; ma xii pidzīmyb, ma xii cidāgy, ma jīnboj pidzīmyb, ma tichpoj pidzīmyb.

³² Jim miich ajcxy iixpejt mbigipy ma je higueri quipy jadu'n nej je xii tiempo ymiñ cidāgy. Co je higueri quipy jadūg'oc pidāgipy je' y'aay'ung, huin'it miich ajcxy nejhuīhuipy co yhuingoni mina ypottigīyñi. ³³ Tim jadu'n nej tīy'ajt mbijccixy ma je higueri quipy co jada ajcxy jadu'n ixipy nejhuīhuipy co yhuingoni anajty je xii je tiempo jīn'aguy tījc'aguy. ³⁴ Janch tīy'ajt jadu'n nej nīmaaygixy co tūg'ócy ytuna'ñyī yjada'ñyī ma ca'ni anajty je jāy y'öctāy huidibi anajty jactzīnaayb huin'it tiempo. ³⁵ Je tzajp etz je naaxhuiñybi cīxam tīgoyam yi', per ich n'ayuc ca' ycīxa'ñ ytīgoya'ñ nīmina.

³⁶ Ca' ni pin nejhuīy je xii je hora mina nhuimbida'ñich ya naaxhuiñybi. Ni je ángeles ajcxy canejhuīy, ni je Dios y'ung canejhuīy. Tūgpajc je Dios Teedy nejhuīy.

³⁷ Com jadu'n nej yajti ya naaxhuiñ jecy'ajty, co je Noé chinay, nañ tim jadu'n yjadīpy co anajty nhuimbityich, yi' jāy huidibi tsoon tzajpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiñ ya naaxhuiñybi, hue' je' mayjāy ajcxy chinay agujc jotcujc, ycaaygixy y'uuccixy etz yajpīccixy je y'ung y'anāg, ixti cooni paty je xii tzuu co ytīgīy Noé barcojoty. ³⁹ Je mayjāy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e öctay ajcxy je jāy nījoty. Jadu'n nej yajty jecy'ajty mūd je mayjāy huidibi tzīnaayb anajty quipxy mūd Noé, nañ tim jadu'n yjada'ñ mūd je jāy ajcxy huidibi tzīnāhuip jac jīni co ich anajty nhuimbityich ya naaxhuiñ jadūg'oc. ⁴⁰ Je huin'it tiempo co nhuimbidityich jadūg'oc ya naaxhuiñ, chi metz yēydīc yajpaadipy ma ytundac, tūg je' yajmīnicxa'ñ, e tūg je' yhuī'ma'ñ. ⁴¹ E mejtz tōxyjāy yajpaadip anajty yjich, tūg je' yajmīnicxa'ñ, e tūg je' yhuī'ma'ñ.

⁴² E paady miich ajcxy ni'ixī ijtīcīx, xyjīp'ixipyich com ca' mnejhuīygyxy mina miich ajcxy je mhuīndzīn ymiina'ñ. ⁴³ Mnejhuīygyxy miich jada co ixipy je ungededy nejhuīy ti hora je meetzpi miina'ñ, ca'p je' ymāhuipy, e ca'p a'ixihuipy co je meetzpi ytīgīhuipy tigoty. ⁴⁴ Nañ tim jadu'n miich ajcxy ni'ixī ijtīcīx, je' co ich, je jāy huidibi tsoon tzajpjoty, nhuimbida'ñich ma ca' ni pin anajty nejhuīy.

Je tumbi tudāgypi etz je huidibi ca'p ytudāgyty

⁴⁵ ¿Huidibi tumbi je' ya huidibi tumb mūd yhuīndzīn janch cīxyjot huīnjot huīdibi mūd ixpījcīn, huīdibi je' yhuīndzīn mooyipy ane'mīn ma ytījc, huīdibi

yajniḡdagihuiḡpy ma ymiḡḡtjic caayin uucin mina ypadyii? ⁴⁶ Janch jotcuje je tumbi co yhuimbidiḡpy je' yhuindzin, e je' cuyduñ jadu'n nej je' yhuindzin ti ñimäyii. ⁴⁷ Janch tiy'ajt jadu'n nej nimaayḡixy co je huindzin ytumbi yajniḡohuajc'adyii tüḡ'óciy huidibi ymiid. ⁴⁸ Pen je tumbi jibicjäybi mina'ñ jotjoty huinma'ñjoty: "Huäcxijpni ñich je nhuindzin." ⁴⁹ E chi ñimajtztagip ymiḡḡtjic, e ytiḡihuiḡp caaybi uucpi miid amüḡyjäydijc; ⁵⁰ chi je tumbi yhuindzin minipy ma ytijc huidi xi mina je tumbi ca' anajty aa'ixy jijp'ixy e ni je hora anajty canejhuiḡy. ⁵¹ Chi huindzin tzaachytunip je' ytumbi, etz ypidäḡipy miid je jacjadyii jäy ajcxy yajpaady huidibi naybidáacigixp nej tudäḡyjäyity e ca' yjanchity. Jiiby ayoodactuuby yjihua'ñ yäxa'ñ etz huinmucxa'ñ huingueeda'ñ ytiitz miid jotmay.

25

Je ijxpejt ma je majcpi töxy'anäg

¹ Co anajty nhuimbityich jadüḡ'oc ya naaxhuiñybi jadu'n nipaadip nej je nimajcpi töxy'anäg co ñicxy ajcxy ñayjijpcobadihuáanigixy miid je yëydijc huidi pigamb. Chi minicxy ajcxy aceite lámpara co yajticxaangixy. ²⁻⁴ Nimigoox je töxy'anäg huidi cohuinma'ñity etz ahuing minicxy jadüḡ quiig ujtz miid aceite. E nimigoox je töxy'anäg ca'pi ajcxy cohuinma'ñity, e ca' ajcxy ahuing minicxy jadüḡ quiig aceite. ⁵ E je yëydijc huidibi anajty pigamb huäcxijpni ooy, chi je töxy'anäg ajcxy ooy ytiḡiiyñi mä'uuybi. ⁶ E mijcuctz ajcxy midoy co tüḡ jäy mic mina'ñ: "Chi miñ je yëydijc huidibi pigamb, nicx jijpcobadiḡyḡixy." ⁷ E huin'it je nimajcpi töxy'anäg ajcxy ypidictay. Chi ajcxy yjin ni'ixiy nidüg nidüg. ⁸ Chi je nimigooxpi huidibi ca' ycohuinma'ñity nimay je nimigooxpi huidibi cohuinma'ñip: "Ñich ajcxy hueeni mooyḡich yi m'aceite, co pidzaanip ñich ajcxy njin." ⁹ Chi y'adzooy je cohuinma'ñybi ajcxy: "Ca' nyega'ñich, je' co ca' ñich ajcxy nje' yhuaadihua'ñ. Nicx miich ajcxy juy jim ma ytoogyii." ¹⁰ E ti anajty ajcxy ñicxy aceite juuyb je huidibi ajcxy ca' ycohuinma'ñity, co oy yjäty je yëydijc huidibi pigaanip. Chi je cohuinma'ñybi ajcxy miid tigiy tigoty je yëydijc huidibi pigaanip. Chi tijc yaj'agiiy. ¹¹ E com jecyñi oy yhuimbity ajcxy je huidibi ca' ycohuinma'ñity. Chi ajcxy yminañ: "¡Huindzin, Huindzin, ocyaj'ahuadz mdijc!" ¹² Chi je' y'adzooy: "Ca' ñich miich ajcxy n'ixy'adyii."

¹³ Chi Jesús yminañ:

—Nayñi'ixiiyigix, je' co ca' mnejhuiḡyḡixy mina ñich nhuimbida'ñich jadüḡ'oc ya naaxhuiñ.

Je ijxpejt ma je meeñ

¹⁴ Co ñich anajty nhuimbida'ñich jadüḡ'oc ya naaxhuiñybi, jadu'n nipaadip nej jadayaabi ijxpejt, co anajty tüḡ comeeñjáy chona'ñ viajetumbi, chi je' ytumbi ajcxy mooy je meeñ co huen cuend'ajtcixy. ¹⁵ Je ymidüḡpi tumbi moy migoox mil meeñ. Je mimetzpi moy mejtz mil. E je ymidüḡpi moy tüḡ mil. E jadu'n ajcxy moy nije' nije' nej huaad cuend'ajtcixy. Chi choñ je huindzin viajetumbi. ¹⁶ Je tumbi huidibi cidigiiyi migoox mil meeñ, ytiḡiy ajuybi adoocpi. Chi je' ymeeñ y'ung'ajty jamigoox mil. ¹⁷ Nañ jadu'n huidibi cidigiiy mejtz mil, ytiḡiy tumbi miid je meeñ. Chi je' ymeeñ y'ung'ajty ja mejtz mil. ¹⁸ Je huidibi cidigiiy tüḡ mil hue' oy pidäḡy je meeñ tützjoty. Chi tajiy, e yützi je yhuindzin ymeeñ. ¹⁹ E com jecyñi oy yhuimbity je huindzin. Chi ytiḡiiy cuenta yaj'oyiiyb miid je ytumbi ajcxy. ²⁰ Chi miñ jayjip je huidibi anajty ti cidigiiyi migoox mil meeñ. Chi je tumbi yajcidigiiy je' yhuindzin majc mil meeñ. Chi yminañ: "Miich ti xymooyich migoox mil meeñ, e ñich ti nyaj'ung'atyich jamigoox mil."

21 Chi je' yhuindzin mīnaañ: “Janch jotcuje ñich cham co jadu'n ti mduñ mīd je hueenbi meēñ. Miich ooy mdudägy etz oy ti mduñ, e paady njacmōhuamyb jacmay. Tig'i' ma ñich, e xondäg mīd ñich.” 22 Chi ymiñ je huídibi anajty ti cidigiyii mejtz mil meēñ. Chi nimay je yhuindzin: “Miich xymooyich mejtz mil meēñ, e ti nyaj'ung'atyich jamejtz mil.” 23 Huin'it je' yhuindzin ñimaayi: “Janch jotcuje ñich cham, co jadu'n oy ti mduñ mīd ñich nmeēñ, e paady njacmōhuamy jacmay. Tig'i' xondäg mīd ñich.”

24 E co oy yja'ty je huídibi cidigiyb tüg mil meēñ, chi nimay je' yhuindzin: “Huindzin, hue' ndijyich miich myēdyjc'aty janch jibic jāy. Miich cosecha myajpidīcypy ma ca' ti mnīpy etz miich mgosecha myajpidīcypy ma ca' ti ti mhuijy. 25 Paady ooy ndzigiyich co je meēñ ngayaj'ung'adīpyich. E co miich mhumbida'ñ, mdzogamy je mmeēñ, e paady je mgi'mmeēñ ti nyüchich, je' co ndzigiyich co nicxy nyajtigooyich miich mmeēñ. Cha je meēñ huídibi ti xymooyich.”

26 Chi je' yhuindzin ñimaayi: “Jibic tumbi miich, ooy mnuuxity. ¿Nej ti mnejhuīy miich co ñich cosecha nyajpidīgyich ma ca' ti ti nnībyich, etz cosecha nyajpidīgyich ma ca' ti ti nhuijyich? 27 Oy co ixipy miich je ñich nmeēñ ti myejc'anuucxy, e jim ixipy y'ung'at. E cham co ti nhuimbityich cham ixipy je nmeēñich xycidigiyich mīd nimeēñ'ung.”

28 Chi je huindzin nimay je jacjadyii tumbidijc: “Pijci ajcxy yi meēñ huídibi ymīd, e mooygix yi huídibi majc mil ymīd. 29 Je huídibi oy tumb jacyajmōhuamb je' anaxy, e ymīd'adamy je' conaxpi. Je' huídibi hueen mīd yajpigamb je' huídibi ymīd, je' co ca' oy ti ytuñ mīd je hueenbi. 30 Yi jibi tumbi huídibi ca' oy ytuñ, pidäg ajcxy agootztuuby ma yjihuipy yāxipy, ma ytiitz huinmuucx huingueedip mīd jotmay.”

Co anajty naaxhuiñjāy ajcxy yajtyduñ

31 Co ñich, je jāy huídibi tsoon tzajpjoty, nhuimbity ñich anajty jadüg'oc ya naaxhuiñybi, huin'it n'ixtāga'ñich ma ñich n'ane'mdac etz ane'mañich mīd ñich nmij'ajtín etz n'oy'ajtín. 32 Chi tüg'óciy je naaxhuiñjāy yajtügmujectāhua'ñ ma ñich. Nhuäcxamybich jadüg jadüg jadu'n nej jāy ajcxy huäcxy je cōbixy etz je chiibo ajcxy. 33 Nbidāgaamybich a'oy'amy je jāy ajcxy huídibi oy ti ytungixy mīd ñich. E yi' ajcxy jadu'n nipaadip nej cōbixy. Nbidāgaamybich anajty'amy yi jāy ajcxy huídibi jibic ti ytungixy mīd ñich. E yi' ajcxy jadu'n nipaadip nej chiibi.

34 Chi nnimāhuibich yi jāy ajcxy huídibi a'oy'amy: “Miingix miich ajcxy huídibi Dios Teedy ti xyconuucxy ajcxy. Je' ajtigix ane'mdac huídibi ijtp ni'ixi mīd miich ajcxy ycixpi maabi naaxhuiñybi chondägy. 35 Ma anajty ñich nyuubōgyii miich ajcxy ti xyajcaayich; ma anajty ñich ndidziyii, miich ajcxy ti xyajni'ügyich; ma anajty ñich nihudityich, miich ajcxy jättac ti xymōyich; 36 ma anajty ñich je nhuit ti nyajmayjatyich, miich ajcxy ti xymōyich je huit; ma anajty ñich nbigyijich, miich ajcxy ti xycuend'atyich; etz co anajty ñich pujxtigoty nyajpaady, miich ajcxy ti xycogapxīyich.”

37 Huin'it ymīna'na'ñ je jāy ajcxy huídibi oy ti ytungixy mīd ñich: “Huindzin, ¿mīna ñich miich ajcxy ti n'ixy ayuu, e ti nyajcay? O ¿mīna ñich miich ajcxy ti n'ixy co mdidziyii, e ti nyajni'ügy? 38 ¿Mīna ñich miich ajcxy ti n'ixy co miich mnihudity, e ti nmōy jättac? O ¿mīna mhuit ti myajmayjaty, e ti nmōy je mhuit? 39 ¿Mīna ñich miich ajcxy ti n'ixy, co miich mbigyii, e oy ti ngüend'aty? etz ¿mīna ñich miich ajcxy ti n'ixy co pujxtigoty myajpaady, e oy ti ngogapxīy?” 40 ñich, je mij'ane'mbi, n'adzohuimbidityich: “Janch tiy'ajt jadu'n nej nnimaaygixy co yi jāy ajcxy huídibi oy ti ytungixy mīd pinjaty

huidibi xymijnicxpejtpich, nañ jadu'n oy ti ytungixy müd ich. Ca' ñejity co jäy ajcxy ymíañ co ca' ypinity je jäy huidibi xymijnicxpejtpich.”

⁴¹ Chi ich, je mij'ane'mbi, nimähuibich je jäy ajcxy huidibi yajpatp: “Huin-huäctuutcich miich ajcxy jibicjäydijc. Nicxy miich ajcxy mijjinjoty, huidibi ijtp ni'ixi müd je mujcu' ycixpi etz müd je' y'ángeles ajcxy ycixpi. ⁴² Ma anajty ich nyuubögyii, ca' miich ajcxy xyajcaayich; ma anajty ich ndidziyii, ca' miich ajcxy xyajni'ucyich; ⁴³ ma anajty nnihuidityich, ca' miich ajcxy xyajjätagyich; ma anajty ich nhuit xytigoy'ijtigich, ca' miich ajcxy huit xy-mooyich; etz ma anajty ich nbigyii e nyajpaadyich pujxtigoty, ca' miich ajcxy xycogapxiyich.” ⁴⁴ E chi je' ajcxy ymíañ: “Huindzin, ¿míañ ich ajcxy miich ti n'ijxcixy co anajty miich yubögyii tidziyii, o co anajty mnihuidity? ¿Míañ ti n'ijxcixy co ca' mhuit müdity, o co mbigyii, o co anajty pujxtigoty myajpaady, e ca' ich ajcxy miich nbubejty?”

⁴⁵ Chi ich, je mij'ane'mbi, n'adzohuañich: “Janch tiy'ajt jadu'n nej nnímaayixy. Huen tim pinity huidibi ca' müdity pa'ayo'n müd je' ajcxy huidibi xymijnicxpejtpich, oy jäy ymíañ co ca' ypinity, ich miich ajcxy anajty jadu'n ti xytuñich.” ⁴⁶ E jada ajcxy nicxip huinixi ayoodactuuby, e yi tudägyi ajcxy nicxip ma yi jugy'ajtin huinixibi.

26

Je huinmañ nej anajty Jesús madzaangixy

¹ Co Jesús nigapxtay tüg'óciy jadayaabi ayuc, chi nímay yi' ydiscípulos ajcxy:

² —Miich ajcxy mnejhuüyb co huixtic je amayxi, je pascua xi. Pascua xijoty ich, je jäy huidibi tzoön tzajpjoty, nyajciyegañich ma nmidzipich etz xyajcruutzpedañich, xyaj'ögañich ajcxy.

³ Je huin'it xi je teedy huidibi tungmüd ajcxy, je escribas, etz je mijjäydijc ajcxy ñayyömuçtayi ma je' ytiba' je teedy huidi jacmijtungmüd huidi anajty yxi Caifás. ⁴ E jim ma Caifás ytiba' jim ajcxy huinmañyixtay nej jëbi yaj-machycägixy Jesús müd anii etz yaj'ögaangixy. ⁵ Chi ajcxy ñayñímaayi miñ xyipy:

—Ca' y'oyity co xijoty nmajtzim Jesús. Ca' jecyity co je mayjäy xymijotma'ttayim etz ytiñhuip ajcxy huambi jihuüybi.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytijc, je Simón huidibi anajty ymüd je jibic nibüdz pa'm. ⁷ E ma anajty Jesús yca, huin'it ymiñ tüg töxyjäy müd tüg quüig ujtz müd perfume huidibi ooy oy yxuugy, jada perfume ooy anajty choohuity. Chi je töxyjäy yaj'ahuäch je quüig, e yajcöyogiy Jesús je perfume huidibi ooy oy yxuugy. ⁸ Co Jesús ydiscípulos ajcxy jadu'n ijxy, chi ajcxy mijotma'ty je töxyjäy. Chi ajcxy ñayñímaayi miñ xyipy:

—¿Ti co jada perfume huidibi ooy oy xuugy ayoy? ⁹ Tzou ixypy ooy jada yajtoocy, jaydëbi ixypy müd yajpubet je ayoobtijc.

¹⁰ E co Jesús nejhuüy nej ajcxy ymíañ, chi nímay:

—¿Na'amy co m'amayiy jadayaabi töxyjäy? Yi' huidibi ti tuñ, je' yi' tüg oybi.

¹¹ Je ayoobtijc ca' ytigoy'idañ ma miich ajcxy nímíañ. Huen huidibi xi huen huidibi tiempo jëbi miich ajcxy mbubedipy ayoobtijc. Ich ca' n'idañich jecy ya müd miich ajcxy. ¹² Jada töxyjäy ti pidägy ma ich nninix perfume huidibi ooy oy xuugy, jayijp ca'ni nnaaxtigiyich. Jadu'n je' jipp'ijxpy míañ nnaaxtigihuañich. ¹³ E huentímma'amyity je Dios y'ayuc anajty yajcapx-huäcxy huindu'my naaxhuiñ jim yajnigapxañ jadu'n nej je töxyjäy ti tuñ cham müd ich, e jadu'n je mayjäy jäymedzipy jada töxyjäy.

Judas c̄iyecy yi Jesús ma ymidzip agoj̄ix

¹⁴ Chi nidüg je' ydiscípulos huidibi yx̄i Judas Iscariote oy nimäy je teedy mijtungm̄idpi, ¹⁵ nimay ajcxy:

—¿Ti ajcxy xymöhuibich co nḡiyegipyich Jesús?

Chi ajcxy moy iipxmajc plata meeñ. ¹⁶ Co ajcxy meeñ ymooy, chi mic'amy Judas yhuinma'ñ'ixtay nej jēbi c̄iyecy Jesús ma ymidzip.

Jesús y'adzuu'ajty pascua x̄ijoty

¹⁷ Je ymidügp̄i x̄i, je amayx̄i, je pascua x̄i ma anajty yajcay je tzajcaagy huidi ca' levadura m̄idty, huin'it je' ydiscípulos ajcxy nimiiñ Jesús. Chi ajcxy yajtiy:

—¿Ma mdzocy co ñch ajcxy ni'ix̄ihuip huidi ngayamy je pascua x̄i c̄ixpi?

¹⁸ Chi Jesús y'adzooy:

—Ñicx miich ajcxy jim Jerusalén ma tüg jäy ytijc, e mnimähuiip: “Ñich nHuindzin jadu'n minamb co yhuingoñ je' yx̄i yhora, e paady ma miich mdijc yi' tuna'ñ je pascua x̄i adzu'ajt̄in m̄id ydiscípulos ajcxy.”

¹⁹ Huin'it Jesús ydiscípulos ajcxy cuyduñ jadu'n nej Jesús anajty ti ñimäyii. Chi ni'ix̄iy ajcxy je pascua adzuu'ibi.

²⁰ E co chu'iy, chi Jesús y'ixtacy ma je mesa m̄id je nimajmetzpi ydiscípulos.

²¹ E ma anajty ycaaygixy, huin'it nimay je nimajmetzpi:

—Nidügti miich ajcxy huidibi xyc̄iyegaambich ma nm̄idzipich.

²² Huin'it ajcxy yajtay taj may. Chi ajcxy yajtiy:

—Huindzin, ¿nej ñch jada'ji?

²³ Chi Jesús y'adzooy:

—Yi huidi m̄id ndocxmucyich, yi' je' jadu'n xyc̄iyegaambich ma nm̄idzipich. ²⁴ Janch tiy'ajt co ñch n'oga'ñich, jadu'n nej je profeta jaay jecy'ajty. ¡Ay ayoob je yēdiyc huidi xyc̄iyegaambich! Jac'oy co ca' ycama'xung'aty je huidibi xyc̄iyegaambich.

²⁵ Chi Judas yminañ:

—Huindzin, ¿nej ñch jada'ji?

Chi Jesús y'adzooy:

—Miich jadu'n minamb.

²⁶ E ma anajty ajcxy ycaay, huin'it Jesús tzajcaagy con̄igy. Chi yajnajxy Dioscojuyip. E chi jada' tujchuäcxy je tzajcaagy. Chi moy je nimajmetzpi ajcxy je tzajcaagy, e yminañ:

—Cay miich ajcxy jadayaabi tzajcaagy, yi' je' ñch je nnin̄icxich.

²⁷ Huin'it Jesús c̄iȳgy je y'ügy. Chi yajnajxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, ²⁸ yi' je' ñch je nni'pyich. Yi' ñigapxy co Dios ti yaj'aducy je jemybi ayuc. E ñch nni'py ytema'ñ yoga'ñ m̄id je mayjäy yc̄ixpi, jaydēbi ajcxy paadip je huinmeecx̄in m̄id je ypocy yc̄ixpi. ²⁹ Janch tiy'ajt jadu'n nej nnimaaygixy, co ca' n'oc'ügaanich jadüg'oc je pascua x̄i ügy, ixti cooni je x̄i tiempo paadip co ñch ajt n'uucim huinjemybi je pascua x̄i ügy ma ñch nDeedy y'ane'min.

Jesús nigapxy co Pedro ycoyütza'ñyii

³⁰ E co ti y'iidäy, chi ajcxy chooñ ñcxy ma Olivos cögop. ³¹ Chi Jesús je' ydiscípulos ajcxy nimay:

—Nidüg'óciy miich ajcxy xy'ixmajtztähua'ñich cham coodz. Je' co jaay-bejty jadu'n miiñ ma je Dios ñecy: “Ögip je cuend'ajtpi, huin'it je cōbixy

yöyhuäcxtähua'ñ.” ³² E co anajty ñich njugypicyich jadüg'oc ma anajty ti n'ögyich, chi jayijpni nnicxa'ñich ma Galilea, e jim naybaatim nidüg'óciy.

³³ Chi Pedro ymíñañ:

—Oy yi jacjadyiibi migügtijcich xyjadim'ixmajtztäy, per ni camina xii ñich miich n'ixmadzipy.

³⁴ Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey yaxigy, miich tugig'oc mina'nip co ca' xy'ixy'adyiijich.

³⁵ Chi Pedro ymíñañ:

—Oy ñich ndim'ögip müd miich, ni camina ngaminá'nibich co ca' miich n'ix'adyii.

E nidüg'óciy je' ydiscípulos ac tim jadu'n ymíñañ.

Jesús mibijctzoy Dios jim Getsemaní

³⁶ Chi Jesús ñicxy müd je' ydiscípulos ajcxy, oy yja'tcixy jim Getsemaní. Chi jim Jesús nimay je ydiscípulos ajcxy:

—Ya miich ajcxy oc'ña', miin ñich n'ocnicxyich jim'amy Dios mibijctzoobi.

³⁷ E chi Jesús ñicxy müd Pedro etz nañ jadu'n müd je Zebedeo ymang nimetzpi. E jim Jesús ñayjihuiyij janch tajy may mij cajee. ³⁸ E chi jim yajnimay je nidugiigpi discípulos:

—Nayjihuiybich taj may ma njot nhuinma'ñ, ixti mabaad anajty n'ögich müd tájin máyin. Hui'm miich ajcxy ya müd ñich etz ca' mmaagixy.

³⁹ Huin'it Jesús ñajtzyöyiy mijci'm jahui'. Chi jim ñaygojxtinaydaci naaxcíxy, e ytiigiy Dios mibijctzoobi, ymíñañ:

—Dios Teedy, ñich nDios, pen jébi jadu'n, mduñ may'ajt píjciyich jadayaabi tzaachypi ayo'n, per ca' yjadu'nity nej ñich ndzojcin mdunipy, jadu'n mdunipy janchtiy nej miich mdzojcin.

⁴⁰ Huin'it Jesús yhuimbijty jim ma anajty ti yajhui'my je nidugiigpi. E oy paady ac tim maab anajty ajcxy. Chi nimay je Pedro:

—¿Nej ca' madäga'ñ miich ajcxy co m'idipy juugy tüg hora müd ñich ycixpi? ⁴¹ Hui'mi' ya, juugy m'idipy etz mibijctzoo Dios, jaydeb ca' je ca'oybi xymimadägip. Janch tiy'ajt co jotjoty ooy mnijot'ajtcixy com tunaangixy yi oybi. Per yi mninix ca' ymadäga'ñ nicxy tuñ oybi.

⁴² Chi mimetz'oc Jesús ñicxy oy Dios mibijctzoy, ymíñañ:

—Dios Teedy, pen copicy co ñich nbaadibich je ayo'n, huen jadu'n yjadiyb müd ñich nej miich mdzojcin.

⁴³ Chi jadüg'oc Jesús huimbijty ma je nidugiigpi discípulos, e oy pátnibi maab ajcxy, je' co ca' anajty ajcxy mimadägy máhui. ⁴⁴ Chi yajhui'my ajcxy, e midugiig'oc ñicxy Dios mibijctzoobi. E nañ tim jadu'n oy minaanip jadu'n nej anajty ti y'ocminamb. ⁴⁵ Chi jadüg'oc huimbijtni jim ma je nidugiigpi, chi nimay ajcxy:

—¿Máagixni? Póxcix jadachambi. Ti je tiempo yhuaad'ajtni mina ñich, je jäy huidibi tsoon tzajpjoty, nyajciyega'ñich ma yi jibicjäydijc ajcxy. ⁴⁶ Pidiccix, tzoc jámim, chi ymiñ je huidibi xyciyegaambich ma nmidzipich.

Tzummy mach ajcxy Jesús yajnicxy

⁴⁷ Jesús capxni anajty jim co yjaty je Judas. Judas hue' je' nidügti je majmetzpi discípulos huidibi Jesús yhuin'ijx. E je Judas müd ja'ty mayjäy, je huidibi anajty ti quexy je judío teedy mijtungmüdpí etz je mijjäydijc. E je mayjäy hue' anajty ajcxy müd ypujx etz quipy. ⁴⁸ Judas, je huidibi anajty ciyejcp Jesús, ti anajty jayijp yecy tüg ijxpejt huidibi müd jébi ajcxy ijxcapy Jesús. Jadu'n jayijp Judas ycapxtuñ müd je' ajcxy, e ymíñañ:

—Je jäy huídibi anajty ndzücxypich, yí je' Jesús. Májtzcix.

⁴⁹ Huin'it Judas nimijhuägy Jesús co capxrocxa'ñ, chi ymíñañ:

—¡Huindzin!

Chi tzücx.

⁵⁰ Chi Jesús ñimayí:

—Migüg, ¿na'amy co xyñimijhuägyich?

E co jadu'n ñimay, chi mic'amy yí' ajcxy majch Jesús. Chi ajcxy yajnicxy tzumy mach.

⁵¹ E huin'it nidüg je Jesús ymigüg, juudy je ypujx. Chi tatzpujxtucy je teedy migtungmídpí ytumbí. ⁵² Chi Jesús ñimay je' ydiscípulo:

—Pidäg yí mbujx ma ytijc. Com pinjaty tziptumb míd pujx, nañ jadu'n y'ögipy míd pujx. ⁵³ ¿Nej ca' mnejhuíy co ích jébi nbijctzooyich cham adzu'x may ángeles, je huídibi xyñihuá'ñibich ma nmídzpích? ⁵⁴ ¿Per nej ycixipy yca'pxipy nej miiñ jaaybety, jadu'n nej cham ytuñyí yjadyí míd ích ycixpi?

⁵⁵ Chi Jesús ñimay je mayjäy:

—Miich ajcxy tí xyñidzoníyich míd je pujx míd je quiipy. ¿Nej mdiy ích meetzpi o jäy yaj'öcpích? Ích jabom jabom anajty íñäyich nyaj'ixpícyich miich ajcxy jíby ma Dios ytijc. E ca' miich ajcxy xymajchich. ⁵⁶ Huinjihu' miich ajcxy co tüg'óciy yam ytuñyí yjadyí ca'px tím jadu'n nej je profeta ajcxy cojaay jecy'ajty.

Huin'it nidüg'óciy je' ydiscípulos ajcxy yqueectay. Chi Jesús yhuí'my naydügpajc.

Jesús ma naymujcpídjic yhuinduu

⁵⁷ Je' ajcxy huídibi anajty tí mach Jesús, yajnicx ajcxy jim ma Caifás ytijc. E jim ma Caifás ytijc ma anajty tí ñayyöymujctáayigíxy je escribas etz je mijiäydíjic ajcxy. ⁵⁸ E je Pedro anajty axam nicxy jigügy jíhuíy, ixti cooni yajja'ty ma Caifás ytíba'. Chi jim ytigíy. Chi ixtacy míd je cuend'ajtpí ajcxy, je' co oc'íxa'ñ ocnejhuíhua'ñ nej Jesús yjada'ñ.

⁵⁹ Je teedy ajcxy migtungmídpí etz tüg'óciy je judíojäy migtungmídpí ajcxy huinma'ñ ixtaaygíxy nej jébi Jesús yajpocycägíxy míd ajcxy xíhuin, e jadu'n jébi mooygíxy yí o'cín. ⁶⁰ Mayjäy níhuambejty Jesús míd aní, per ni pin anajty ca' mídity tíy'ajt co Jesús anajty tí ytundígooy míd judíojäy ajcxy ycötujcín. Jac com jecy miin metz testigos míd aaní. ⁶¹ Je' ajcxy ymíñañ:

—Jadayaabi yéydíjic míñañ co jébi nyajhuindígooyích Dios ymíjtajptíjic, e codugíjic xí tí anajty nyaj'oyíyich jadüg'oc.

⁶² Huin'it je teedy migtungmídpí ytínayígy, e ñimay Jesús:

—¿Nej co ca' m'adzooy? ¿Nej janch tíy'ajt nej jadayaabi metzpi testigo ymíñañ?

⁶³ Per Jesús ca' y'adzooy. E huin'it je teedy migtungmídpí ñímaayí:

—Ñímaayg ích ajcxy Dios ycixpi, pen janch miich je' je Cristo je Dios y'ung.

⁶⁴ Chi Jesús ymíñañ:

—Miich jadu'n mánamb. Nañ jadu'n ích miich ajcxy ñimäy, co ích je jäy huídibi tzoon tzajpjoty, miich ajcxy xy'ixípyích tzajpjoty ma Dios ymíjic a'oy'amy. Nañ jadu'n miich ajcxy xy'ixípyích jócjoty co anajty nhuimbityích jadüg'oc ya naaxhuiñ.

⁶⁵ Chi je teedy jacmigtungmídpí oy yhuít huindzecxy huinma'ch, chi ymíñañ:

—Jadayaabi yéydíjic tí capxtígooy Dios. ¿Tí testigo njac-huaaním? Miich ajcxy cí'm tí mmídoogíxy co yí' tí ycapxytígooy ma Dios, e míñañ: ⁶⁶ ¿Nej miich ajcxy mínaangíxy?

Chi ajcxy ymīnañ:

—Ti ycapxytigooy, copicy co y'ögipy.

⁶⁷ Chi ajcxy huindzuju jįptzuju etz cojxy ajcxy. Chi jacjadyii huingojxy jįpcojxy. ⁶⁸ E chi ajcxy nīmay:

—Pen janch co miich je' je Cristo octiygapx pin ti xycoxy.

Pedro ymīnañ co ca'p Jesús ix'y'adyii

⁶⁹ Je huin'it moñi Pedro anajty iñay tibāgujc. Chi ñimiini tūg tōxy'anāg tumbi, chi ñīmaayi:

—Miich nañ jadu'n ti mhuidity mīd Jesús je Galilea jāy.

⁷⁰ Chi Pedro ymīnañ mayjāyjoty:

—Ca' nhuinjihuñyich ti mgapxpy.

⁷¹ Pedro hue' anajty pidzimnip co ñimiini huingbi tōxy'anāg. Chi je tōxy'anāg nīmay je' ymīgūgtijc:

—Jadayaabi yēydijc ti yhuidity nañ jadu'n mīd Jesús je Nazaretpi.

⁷² Chi Pedro jadūg'oc coyūch je Jesús cixyjot huinijot ymīnañ:

—Ca' n'ixy'adyiijich yijūbi yēydijc.

⁷³ Jac co hueeni, je jāy huidibi anajty ajcxy jimip ñīmay ajcxy je Pedro:

—Janch co miich nañ jadu'n anajty mīd mhuidity yi Jesús, com yi m'ayuc yi' xyajniquēxīcp.

⁷⁴ Chi Pedro tigñy capxpi janch oy ñinej mīnañ huinijot:

—Ca' n'ix'adyiijich yi yēydijc.

E tim huin'itiy je tzey yaxīgy. ⁷⁵ Chi Pedro jāymejtzcody jadu'n nej anajty Jesús ti ñīmāyii: “Ma ca'ni anajty tzey yaxīgy cham coodz, miich tugñg'oc xycoyützibich.” Chi Pedro pidzimy tiba', e jūby oy yāxy mībaad yjotcidāgy.

27

Chi Jesús yajcīyeycy ma Pilato

¹ E co oy yximñy yticñy, chi je teedy mįtungmīdipi etz je mįjāydijc ajcxy quipxycapxy co yaj'ōgaangixy Jesús. ² Chi ajcxy yajnicxy cīxoch oy ajcxy cīyecy ma Poncio Pilato je gobernador.

Judas ñayyōctñy

³ Co je Judas je huidibi anajty ti cīyecy Jesús, co ijxy co yaj'ōgaanip Jesús, chi oy yjotmaybaatni. Chi conhuimbijty je iipxmajcpi plata meñ ma je teedy mįtungmīdipi etz mįjāydijc ajcxy. ⁴ Chi Judas nīmay je teedy mįtungmīdipi etz je mįjāydijc ajcxy:

—ñich ti ndundigooyich co ti ngīyecyich yi tudāgyjāy ma miich ajcxy.

Chi je' ajcxy y'adzooy:

—Ti ñich ajcxy n'occuent. Miich yi' mñigixp tñibi mduñ.

⁵ Huin'it Judas cohuiñy je meñ jūby tzajtīgoty. Chi ñicxy. Chi ñayyōctñy.

⁶ Huin'it je teedy mįtungmīdipi yajpidīgy je meñ. Chi ajcxy ñayñīmaayi mīñ xyipy:

—Jadayaabi meñ ca' yjēbity co nbīdaacim ma ofrenda ñigidāgy. Je' co yi' yjējity je huidi ni'py ti tzoo'adyii.

⁷ Huin'it je teedy ajcxy tuñ je quipxycapxy co juyaangixy mīd je meñ tūg naax huidibi jāy ytijp, tütznaax it, ma ajcxy yajnaxtigīhuipy pinjaty ca' ycogajpity jim Jerusalén. ⁸ Ixti chambaad jadu'n xñ'adyii jejimbi it: Ni'py naax. ⁹ E jadu'n ycijx yca'px nej je profeta Jeremías ymīnañ: “E jadu'n ajcxy je' yajpidīgy meñ iipx majcpi plata meñ (je' choou nej anajty ajcxy Israeljāy

ti yajniğöduğiy), ¹⁰ e miid je meen ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹ Jesús yajpaady jim anajty ytinäy ma je gobernador Poncio Pilato yhuindu, chi y'amidoohui:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judío teedy ajcxy huidibi mijtungmiidpi etz je mijjäydijc tzachxigixy Jesús ma je gobernador. Ni jadu'ñyi Jesús ca' y'adzooy. ¹³ Chi je Pilato ñimay Jesús:

—¿Nej ca' mmidooy nej yi' ajcxy yxiiyi?

¹⁴ Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuuiñi ti ycapxy.

Jesús ycödujcy y'o'cin

¹⁵ Je gobernador jadu'n anajty ycostumbre miidity co jimijt jimijt najtzmaziy tüg machyjäy pascua xijoty, je huidibi je mayjäy ti ytimychojcpy. ¹⁶ E jim anajty tüg je machjäy huidibi anajty ajcxy ix'y'ajttaayb, e yxiiñity Barrabás. ¹⁷ E co anajty jim ti ytügmujctaaygixy, chi Pilato ajcxy y'amidooy:

—¿Pin miich ajcxy mdzojcpy co ich nnajtzmazihuibichi? ¿Najtzmaziyich Barrabás o Jesús huidibi jäy ajcxy ytipty je Cristo? ¹⁸ Pilato ñejhuuiyb anajty co mañ'ajtingix anajty ti ciyejccixy Jesús.

¹⁹ Jimni anajty iñäy Pilato me je ycötujctac co je ytöxyijc tiy'ajt quejxy ma yi', ymíñañ: “Ca' huaad myajtzaachytuñ yi tudägyjäy. Je' co ich amygoodz ti ngumäyich janch jibic miid yi' ycixpi.”

²⁰ Per je teedy ajcxy etz je mijjäydijc ti anajty capxyjotcidaaccixy je mayjäy co huen yajnajtzmaziy Barrabás etz huen yaj'öccixy Jesús. ²¹ Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazihuibichi?

Chi je mayjäy y'adzooy:

—Najtzmaziy Barrabás.

²² Chi Pilato y'amidooy je mayjäy:

—¿E nej ndunipyich yi' Jesús, huidibi jäy ytipty Cristo?

Huin'it ajcxy nidüg'óciy y'adzoday:

—¡Yajcruutzpet yi' Jesús!

²³ Chi Pilato ymíñañ:

—Pues, ¿nej ti ytundigooy?

Per je mayjäy ni goob y'adzoday:

—¡Yajcruutzpet! ¡Yajcruutzpet!

²⁴ Pilato yjapubedaan Jesús, per co ijxy nejhuuiy co je mayjäy ca' ni nej niducy. Hue' ajcxy oy ytiñiy huambi jihuiybi, chach ñayñajtztijiygixy miid jot'an. Huin'it Pilato capxyñiguejxy je huadz ni. Chi ytiñiy cibujp ma je mayjäy yhuindu, e ymíñañ:

—Ca' ich ngo'adzohuipyich jadayaabi tudägyyëydijc y'o'cin. Miich ajcxy yi' mgo'adzoohuipy.

²⁵ Chi je mayjäy y'adzoday:

—Ich ajcxy ngo'adzohuipyich yi' y'o'cin miid n'ung anäg etz n'ap n'oc.

²⁶ Chi Pilato najtzmaziy je Barrabás. Per Pilato ane'my co huen Jesús yajhuojp. E co yajhuojptay, chi ciyejcy, co huen yajcruutzpedy. ²⁷ Chi Pilato ysoldados ajcxy yajnicxy Jesús ma agujctijc. E jiiyby tüg'óciy soldadtijc

ñayyöymujci ma Jesús. ²⁸ Chi je soldado ajcxy je' yhuit yajniñenducy. Chi ajcxy yajniñeny je tzapx huit huídibi je rey ajcxy yajtuumyb. ²⁹ Chi ajcxy tacy tüg corona mïd apy. Chi ajcxy yajcöjeniy ma Jesús. E huin'it ajcxy a'oy'amy yajcigabiiy tüg je paxy. Chi ajcxy huingoxtinay'ahuüy. Chi ajcxy nixiicy yajxiicy, e ymïnaangixy:

—iOoy ymijity yjanchity, je judíos ajcxy yrey!

³⁰ Chi ajcxy huindzujy jiptzujy. Chi ajcxy yajcigajptucy je paxy, e yajcöhuojpïgy ajcxy. ³¹ E co ajcxy nixiictay yajxiictay, chi yajniñenducy je rey yhuit etz yajniñeny je yci'm huit. Chi ajcxy yajnicxy ma yajcruutzpedaangixy.

Co Jesús yajcruutzpejti

³² E jim ma anajty hueeni ti ytüyöy, jim ti paty tüg Cirene yëydijc anajty yxijity Simón. Chi ajcxy adzip nimay Simón co huen jaccapi Jesús ycruudz.

³³ E co ajcxy yja'ty ma tüg je it yxijip Gólgota, jadu'n yhuimbizim Öcpi Cohuajc Cögor. ³⁴ E jim ajcxy Jesús jayaj'üga'ñ vino temhuídity mïd tzooy, jigix ca' jihuihuip je tzaachypi. Per co uucmajch, chi jihui'ñybijc co ca' y'oy'uucnity.

³⁵ E co anajty ajcxy yajcruutzpety Jesús, chi je soldadtijc suerte ijxy, pin jëbi ocjè'adyii Jesús yhuit, chi yciyxy yca'pxy jadu'n nej je profeta cojaay jecy'ajty: “Yajhuäcxipy ajcxy ñch nhuit e mïd ñch nhuit ycixpi ixipy ajcxy suerte.” ³⁶ E jim anajty ajcxy ñaaygixy cuend'ajtcixy. ³⁷ Je xihuín ayuc huídibi ajcxy yjaay ma Jesús ycöduu jadu'n ymïnañ: “Jadayaabi je' Jesús, je judíos ajcxy je yrey.”

³⁸ Quipxy mïd Jesús ajcxy yajcruutzpejty metz meetzpi. Tüg a'oy'amy, e jadüg anajty'amy. ³⁹ Je mayjäy huídibi ajcxy naxiïyb anajty ma Jesús, ooy anajty oy ycöjigiñ, nixigy yajxigy ajcxy Jesús, ⁴⁰ ymïna'ñ ajcxy:

—Bah, miich huídibi Dios ytijc jidaanip, e codugig xii huingbi myajpidäga'ñ. Miich ci'm cham naygohuäni, e minac cruudzcixy, pen janch miich Dios xy'ung'adyii.

⁴¹ Nañ jadu'n je teedy ajcxy huídibi mijtungmïdipi, etz je escribas, etz je fariseos ajcxy etz je mijjäydijc nixiicy yajxiicy ajcxy Jesús, ñayñimáayigixy miñ xyipy:

⁴² —Huingbi ti cohua'ñ, e ca' jaty nej ci'm ñaygohua'niiyb. Pen janch co yi' jëjity je Cristo je Israel jäy rey, huen minacy jadachambi ma cruudz, huin'it nmibijcim. ⁴³ Yi' ti pidägy ymibijcin ma Dios; huen jadachambi je Dios yajniñdzögyii, pen janch Dios chogyii; yi' ti ymïna'ñ co Dios y'ung'adyii.

⁴⁴ Nañ jadu'n je metzpi meetzpi ajcxy huídibi cruudzpejt quipxy mïd Jesús nixiicy yajxiicy ajcxy ooy Jesús.

Jesús y'ögy cruudzcixy

⁴⁵ Co ycuycxijiiy, chi ycoodziyday tüg'ócay naaxhuiñybi. E jadu'n je naaxhuiñybi y'ijty coodz, ixti minacy yxii. ⁴⁶ Huin'ity Jesús ycapxyqueecy janch mic ymïnañ:

—Elí, Elí, ¿lama sabactani? —yi jadu'mbi ayuc hue' yhuimbizimy: Dios Teedy, Dios Teedy, ¿ti co ti xy'ixmachich?

⁴⁷ Nijëjity jäy huídibi anajty jim yajpatp huington ma Jesús co jadu'n midoogixy Jesús y'ayuc, chi ajcxy ymïnañ:

—Jadayaabi yëydijc cham yaaxtaayb je profeta Elías.

⁴⁸ Huin'it nidüg jäy ñicxy janch poyigy etz oy yajtzoñ je pixy. Chi je pixy yajxoogy mïd je xun vino. Chi pidacy je pixy ma je paxyjip. Chi yujctijy ma Jesús y'ahuac co huen ügy. ⁴⁹ Huin'it nijëjity ajcxy ymïnañ:

—Ixmatz, tzoc ajt oc'ixim, pen nimiinip Elías, pen janch yajniñdzögyii.

⁵⁰ Jadüg'oc Jesús yaaxqueegy janch mic. Chi oy y'o'cni. ⁵¹ Co Jesús y'o'cy, tim huin'ítiy jim ma Dios ytijc je mapxy yhuít yciitzhua'cxy tiná'amy. E nañ jadu'n je naaxhuiñybi ooy chuyuy mïd ujx micpi etz je mijjatychaa oy jüitzhua'cxy. ⁵² May öcpi jut y'ahuach etz yjugypijcy mayjäy tiibi anajty y'o'ccixy tiibi anajty mibijccixy Dios. ⁵³ Co Jesús yjugypijcy, chi je may'öcpi tiibi anajty jugypijccixy etz tiibi anajty pidzimgixy ma öcpi jut, chi ajcxy ytigiiy ma je Dios ycajp, je Jerusalén. E mayjäy ajcxy ijxy. ⁵⁴ Co je mic ujx oy ñaxy etz jac tijaty anajty ti ytuñyii ti yjadyii, chi je capitán etz mïd jadyii ymígügtijc huídibi anajty cuend'ajtp Jesús ooy ajcxy chigiy yjihuiy, e minaangixy:

—Janch tiy'ajt co yijiibi yëdyjc Dios yi' anajty y'ung.

⁵⁵ May anajty nañ jadu'n töxyjädyjc ymij'ijxcixy jigüem huídibi anajty ajcxy Jesús ti mïddzoon jim Galilea. Yi' anajty ajcxy Jesús ypubejtp. ⁵⁶ E ma je' ajcxy jim anajty chooñity, María Magdalena, María huídibi Jacobo etz José ytaj'ajtpy, etz je huídibi Zebedeo y'ung ytaj'ajtpy.

Jesús yajnaaxtigiiy

⁵⁷ Co oy chuu'iiyñi ycoodziiyñi, huin'it chooñ ma Arimatea tüg comeeñyjäy huídibi yxi José. E je' ymijnicxpejty anajty Jesús. ⁵⁸ Chi José ninicxy Pilato oy pijtzou Jesús ñinicx. Huin'it Pilato pidacy y'ane'min co huen möyii. ⁵⁹ Chi José ycidigiiy Jesús ñinicx. Chi huinmojch mïd tüg poob sábana. ⁶⁰ Chi yajnaaxtigiiy ma je yci'm jut jemybi huídibi anajty ti yajtzejtztüty ti yajpädüty ma tüg tzahuingueetz. Chi adigüejectujcy je öcpi jut mïd tüg tzaa. ⁶¹ Chi José ñicxni. E jim yhuí'my María Magdalena etz je jadügpí María, y'ñäy ajcxy ymihuingon öcpi jut.

Je cuend'ajtpi ajcxy ma Jesús ñaaxtigiiy

⁶² E com jabom ma anajty Jesús ixiiybi ti y'ögy, ma anajty ti ni'ixiydäy mïd je sábado xii yciixpi, chi je teedy ajcxy huídibi tungmïd etz je fariseos ajcxy ñayyöymujci ma je Pilato. ⁶³ Chi ajcxy ymínañ:

—Huindzin, yi' ñich ajcxy njäymejchpyich co je anidacpi ymínañ ma anajty yjuugyity co codugüig xii jugypigañ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigiiy huen cuend'ajtcixy ixti cooni tugüig xii paadipy. Ca' yjegyity co ñiminib adzuum agoodz je' ajcxy huídibi mijnicxpejtip etz tzingüegipy ajcxy Jesús ñinicx. E chi nicxy jäy ymínañ: “Ti yjugypicy je öcpi.” Chi anajty jac'anaxy je anii ti yajtni ca'ydi je jayijpi.

⁶⁵ Chi Pilato ajcxy nimay:

—Miich ajcxy mïd tüg picy soldados huídib cuend'ajtp ma miich ajcxy. Níxcix miich ajcxy yaj'adujccixy je öcpi jut, jadu'n nej m'a'ixiiygixy.

⁶⁶ Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huídibi ajcxy je jut yaj'adigüejectujcy.

28

Co Jesús yjugypijcy

¹ E com jabom co yximiiy yticxigy je domingo xii, huin'it ñicxy María Magdalena etz je jadügpí María ma Jesús ñaaxtigiiy. ² Chi tüg mij ujx ñajxy. Huin'it ycidacy Dios tüg y'ángel huídibi tzomb tzajpjoty. Chi jidigejcy je tzaa ma je öcpi jut aguu. Chi y'ixtacy ma tzaa ñicx. ³ Janch adicxp je ángel anajty yhuinjip jadu'n nej huídizuc, e je yhuít janch poob'ögy. ⁴ E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhuí'my jahuengi ögy. ⁵ Huin'it je ángel y'adzooy je metz töxyjäy:

—Ca' miich ajcxy mdzig'iy. Hich nejhu'iybich co miich ajcxy m'ixtäy Jesús je hu'idibi ajcxy yajcruudzpejty. ⁶ Per ca' je' cham ya. Ti je' yjugypicy, jadu'n nej yminañ. Min miich ajcxy oc'ix ma ñaaxtig'iy. ⁷ Nicx miich ajcxy jottigooyb ma je' ydiscípulos ajcxy e nima': “Ti Jesús yjugypicy jadüg'oc, e yi' ñicxip jim Galilea e jim ajcxy mm'idnaybad'iyb.” Hich miich ajcxy yam nnimaaygixy.

⁸ Huin'it je töxyjäy ajcxy chooñ janch poy'gy ma anajty ti ñaaxtig'iy Jesús. Chi ajcxy ñicxy m'id tzigi'ñ, per agujc jotcuyc. Poy'gy ajcxy oy t'iy'ajt yecy ma je discípulos ajcxy. ⁹ E jim anajty je metzpi töxyjäy ytüyöy, timetini Jesús ñayguëx'ici ma je' ajcxy yhuinduu. Chi Jesús ajcxy capxocxy. Chi je' ajcxy mihuingoñ Jesús etz mineeni je' ytecy. Chi ajcxy huindzig'iygixy. ¹⁰ Jesús minañ:

—Ca' mdzig'iygixy. Nicx miich ajcxy nima' je nmigügt'icich co huen ajcxy nicxy jim Galilea, e jim naybad'iybich m'id yi' ajcxy.

Hu'idibi ajcxy je soldadot'ic ñigapx

¹¹ E tüyöybñi anajty je töxyjäy nimetzpi co nijëjity je soldados ajcxy chooñ ma Jesús ñaaxtig'iy ñicxy jim Jerusalén, m'idmiydäga'ñ je teedy hu'idibi tungm'idpi nej anajty ti ytuñyii ti yjadyii ma Jesús ñaaxtig'iy. ¹² E huin'it je teedy ajcxy ñayyöymujctayi m'id je mijjäyd'ic, tunaangixy quipxy capxy. Huin'it je teedy ajcxy etz je mijjäyd'ic moy ajcxy je soldados may meeñ. ¹³ Chi ajcxy nimay:

—Miich ajcxy mina'nip co maab anajty miich ajcxy mijcoodz co ymiiñ Jesús ydiscípulos ajcxy etz tzingueeci Jesús ñin'icx. ¹⁴ Etz pen ymidooyb anajty yi gobernador, hich ajcxy ngapxjotcidägich, jigix ca' nej xytungixipy.

¹⁵ E huin'it ajcxy je soldados y'c'dig'iyi je meeñ. Chi ajcxy ñicxy cuyduñ jadu'n nej anajty ajcxy ti ñimäyii. E ixti chambaad jadu'n judíojäy capx je ayuc.

Hu'idibi Jesús yajnib'ic ydiscípulos ajcxy

¹⁶ E jadu'n ajcxy ñicxy je nimajctügp'i Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñimáayigixy. ¹⁷ E co ajcxy ijxpaty Jesús, chi ajcxy oy huindzig'iy. Per jim nijëjity hu'idibi ca' m'ib'icy co anajty yjëjity. ¹⁸ Huin'it Jesús ymijhua'cy ma yi' ajcxy, e nimay:

—Hich ti nyajmöy'ich je cötujc'in jii by tzajpjoty etz ya naaxhuiñ. Hich ti nyajmöy'ich je mij cötujc'in, jaydëbi n'ane'my'ich jii by tzajpjoty etz ya naaxhuiñ. ¹⁹ E paady nicx miich ajcxy huindu'my naaxhuiñ capxhuäcx'icx je ayuc, jaydëbi jäy ajcxy xym'ib'ig'ipy'ich. Tüg'ócy jäy ajcxy hu'idibi xym'ib'icp'ich myajni'ibed'ipy ajcxy m'id Dios yxii, Dios y'ung yxii, etz m'id je Espíritu Santo yxii. ²⁰ Miich ajcxy myaj'ixp'ig'ipy je mayjäy co copicy cuydun'ipy ajcxy hich ngötujc'in tüg'ócy jadu'n nej ti n'ane'my'ich miich ajcxy. E miich ajcxy mnejhu'iyb co nm'id'ity'ich miich ajcxy huin'ixii huin'tiempo, ixti mabaad naaxhuiñybi anajty ycixpi ytigooy. Jibaad ycixy. Amén.

SAN MARCOS

Jaayhui'my Jadu'n Nej Jesucristo Ytun Yjajti

¹ Jadu'n oga'ñ chondacy je oybi ayuc t̄y'ajt jadu'n nej Jesucristo, je Dios y'ung ytun etz yjajti.

² Je Dios y'ayucnajtzc̄apx̄īybi je Isaías jecy'ajty jayhui'my jadu'n nej Dios nimay je Cristo:

Nguexaamyich ñich ngogapxy jayj̄p ma nidüg nidüg cajp ma miich m̄nicxa'ñ jac'axam, jigix j̄eb je cogapxy nim̄ahuīpy je jāy ajcxy co huen nayñi'ix̄īyigixy ma yjot yhuinma'ñ m̄id miich yc̄ixpi, jadu'n nipaady nej j̄ihūy jāy ajcxy ni'ix̄īy t̄ü'aa co t̄üg rey yj̄ada'ñ.

³ Nañ jadu'n jadüg it Isaías jayhui'my jada ayuc ma jadu'n ym̄inañ:

Jim m̄j̄tiḡiduum jāy ajcxy m̄idooy co t̄üg jāy y'ayuccapxhūäcxy, jadu'n ym̄inañ: “Nayñi'ix̄īyigix ma mjot m̄huinma'ñ ajcxy jayd̄eb naybaatim m̄id ajt n̄Huindzin Dios. Ixm̄ajtz̄c̄ixy yi m̄j̄bicjot m̄j̄bic-huinma'ñ. Jadu'n nipaady nej jāy ajcxy yajtiy t̄ü'aa hūidibi ooy y'adijy y'a'och.”

⁴ Jim m̄j̄tiḡiduum anajty Juan je Bautista miñ e ytiḡīy mayj̄y yajñībejtp̄i. Chi Juan capxhūäcxy Dios y'ayuc ma je mayj̄y ajcxy hūidibi anajty mimb n̄ībejtp̄. Juan ayuc capxhūäc̄x co cop̄icy co jāy ajcxy huen jothuimb̄j̄tc̄ixy etz ixm̄ajtz̄c̄ixy ajcxy je yj̄ibichuinma'ñ, etz n̄ib̄éjtc̄ixy, jigix j̄ebi Dios yhuinmecz̄ib ajcxy ypocy. ⁵ T̄üg'óciy je mayj̄y ajcxy hūidibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'am̄idoo'ijty anajty ajcxy je'y'ayuc. Co je jāy ajcxy capxp̄idzīmy nej anajty ypocyt̄ungixy, chi Juan yajñībejty ajcxy ma je Jordán m̄ijn̄ī.

⁶ Juan hue' anajty yhuit'ajtpy camello n̄ib̄ic, e nañ j̄eyim anajty m̄id ñayhuīñyii, e hue' anajty yj̄icx'ajtpy mu' etz uxp̄äg. ⁷ Juan ycapxhūäc̄yp anajty Dios y'ayuc ma je mayj̄y, e ym̄inañ:

—ñich jayj̄p ti nmiñich ngapxhūäcxy Dios y'ayuc. Jac'axam min̄ipy t̄üg jāy hūidibi jacn̄iḡi m̄ic'ajt m̄id̄ity ca'ydi ñich, ca' xypaadyich nic̄xy nguejyich yi' yc̄ighuin. ⁸ ñich ti nyajñībetyich miich ajcxy m̄id n̄ī. Per je jāy hūidibi yjacm̄id Dios ym̄ic'ajt, ca'ydi ñich. Yi' xyaj'adiḡihuip xyajjotiḡihuip Dios yj̄ihu'ñ ym̄ic'ajt, jadu'n nipaadip nej j̄ihūy xyajñībedip m̄id Dios yj̄ihu'ñ ym̄ic'ajt.

Co Jesús ñībejty

⁹ Je huin'it x̄ī huin'it tiempo Jesús chooñ ma je cajp hūidibi yx̄ī Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it x̄ī Juan yajñībejty Jesús ma je Jordán m̄ijn̄ī. ¹⁰ Pidzim̄b anajty Jesús ma je m̄ijn̄ī, e tim huin'ityi Jesús īx co je tzajp anajty y'ahuäch, e īx je Esp̄iritu Santo chooñ tzajpjoty, e ycid̄ägy ma yi'. Jadu'n je Esp̄iritu Santo yqūex̄igy anajty nej t̄üg muuxy. ¹¹ Chi Jesús m̄idooy capxy ayuc choñ tzajpjoty, nim̄äyii:

—ñich miich n'ung'ajtpy. Ooy ñich miich ndzocy nj̄ihūy. Ooy jotcūjc nayj̄ihūyij̄ich m̄id miich.

Je mujcu' tuñ ijxta'nī ma Jesús

¹² Huin'it m̄ic'amy je Esp̄iritu Santo yajñic̄xy Jesús m̄j̄tiḡiduum. ¹³ E hue' Jesús yhui'miy jim m̄j̄tiḡiduum huixchiḡulpx x̄ī ahua'n iyujc agujc. Huin'it je mujcu' jot'ijxy yhuinma'ñ'ijxy je Jesús. Chi je ángeles ajcxy miñ ypubejty ypūdiḡīy je Jesús.

Jesús yitung yajtzondägy jim Galilea

¹⁴ Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuäcxy Dios y'ayuc etz yi Dios y'ané'min. ¹⁵ Jesús yminañ:

—Ti je xii je tiempo yhuaad'ajtñi. Ti nigoody je xii je tiempo mina Dios pidäga'ñ yi y'ané'min ya naaxhuiñ. Jothuimbijtcix ajcxy, etz ixmajtzcix ajcxy mjibicjot mjibic-huinma'ñ. Mibijccix Dios y'ayuc jadu'n nej jëb ajcxy m'alma ñidzögipy.

Jesús huodzoñ midaax jäy huidibi anajty acxmajtzp

¹⁶ Jesús huidijtp anajty ma je mejypa' huidib yxii Galilea mejy, co oy'ixpaady Simón etz y'uch Andrés. Simón etz Andrés acxmadzi anajty yitung'ajtpy, ytipidacpy anajty y'acxmadzi'ñ mejyjoty co ajcxy Jesús ixpaty.

¹⁷ Chi Jesús nimay Simón etz Andrés:

—Min mïd ñich. ñich miich ajcxy huingbi tung nmöhuipy. Jadu'n mdung nipaadip nej jihuïy mjäymájtzcixipy.

¹⁸ Mic'amy Simón etz Andrés ajcxy ixmajch y'acxmadzi'ñ, e ñicxy ajcxy mïd Jesús.

¹⁹ Chi Jesús yjacyöy anajty hueen, e ixpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyiïyb je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen nicxy mïd yi'. Mic'amy je' ajcxy ixmajch yteedy, je Zebedeo, barcojoty mïd ytumbi, chi ajcxy ñicxy mïd Jesús.

Tüg jäy huidibi anajty jibic espíritu mïd

²¹ Huin'it Jesús mïd ymigügtijc yja'ty jim Capernaum. Je huin'it sábado, je pocxin xii, Jesús ytigiiy ma je judíojäy ajcxy ñaymujctac jim Capernaum, chi yjäyyaj'ixpijctzondacy. ²² Je mayjäy ooy ajcxy jihuïy huinmay je ayuc huidibi Jesús anajty ajcxy yaj'ixpijcp. Com Jesús hue' anajty yaj'ixpiïy jadu'n nej jihuïy yci'm'ané'min mïdity. Ca' Jesús anajty yaj'ixpiïy jadu'n nej je jäy ajcxy huidibi yaj'ixpijcp anajty Moisés ycötújcïn je jécyïp. ²³ E ma je naymujctac tüg yëydijc huidibi mïd anajty ca'oybi. Chi je ca'oybi ooy mic ycapxcoody, e yminañ:

²⁴ —¿Ti co xy'amayïy ñich ajcxy, Jesús huidibi tzomb jim Nazaret? ¿Nej ti mmiñ co xyajhuindigoyáangixyichi? ñich n'ixcajpy miich, e nejhuïybich co miich je' je Huätzpi Dios.

²⁵ Chi Jesús ix'oïy je ca'oybi, e nimay:

—Amon miich, e pidzim ma jada yëydijc.

²⁶ Huin'it je ca'oybi yajyajch yajquïdy je yëydijc, e mic yaaxqueegy, e ypidzimy ma je yëydijc. ²⁷ Tüg'ócïy je mayjäy jiiïy ma je naymujctac ooy ajcxy ñay'adzigiiyi, e ñayñimaayi ajcxy miñ xyïpy:

—¿Ti jada' yi'? Jada yëydijc ymïd jemybi ixpijcin. Yi' mïd mic'ajt etz ane'm'ajt, paady yciïpi yi' ane'my yi' ca'oybi, e ycapxmidoohuip.

²⁸ Mic'amy je mayjäy ajcxy huidijaty tzinaayb ma tüg tüg cajp jim Galilea nejhuïy ajcxy nej Jesús ytuñ, e cömaagyxy Jesús.

Jesús yajtzögy Simón Pedro ymïd töxyjäybi

²⁹ Tim huin'itïy Jesús ypidzimy ma je naymujctac, chi ñicxy mïd Jacobo etz Juan jim ma Simón etz Andrés ytijc. ³⁰ Simón ymïd töxyjäybi píjcp anajty. Cijx'am anajty y'ity, e mic anajty ooy ytoyii. Tim huin'itïy Jesús ñimaayi co Simón ymïd ooy mic ypiïy. ³¹ Chi Jesús nimijhuägy je pa'mjäy. Chi majtzi yci', e huïjtzigy. Tim huin'itïy yi toyii y'ixmajtzi, e chi yajcay yaj'uucy Jesús etz ymigügtijc.

Jesús yajtzögy may pa'mjäy

³² Co xii oy ycidacni, e chuu'iiyñi, chi je mayjäy miid miñ ajcxy ma Jesús tüg'óciy pa'mjäydijc, etz huidijaty ajcxy ca'oybi ymiid. ³³ Tüg'óciy je mayjäy ajcxy ma je jimbi mij cajp nimujcy je tijc ma Jesús anajty ti yjättägy. ³⁴ Jesús yajtzoctay tüg'óciy je may pa'mjäy huenytimytiibá'mity, etz yajpidzimy may ca'oybi majaty jäy ajcxy. Per Jesús ca' anajty a'ixiy nicxy je ca'oybi ñigapxyii, com y'ixy'ajttaayb anajty ajcxy Jesús.

Jesús y'ayuc t'iy'ajt capxhuäcxy jim Galilea

³⁵ Tim mooñi Jesús ymaybidigy, ca' anajty yximiiyñi, e ypidzimy ma je cajp. Chi ñicxy ma tüg mijtig'ituduum Dios miibictzoobi. ³⁶ Huin'it je Simón etz je ymigügtijc ooy ajcxy ja'ijxtäy Jesús. ³⁷ Co ajcxy paty je Jesús, chi ajcxy nimay: —Tüg'óciy je mayjäy xyjadim'ixtäy.

³⁸ Chi Jesús nimay Simón etz je ymigügtijc ajcxy: —Tzoc ajt jámim ma yi jacjadyii cajp huinduy agonbi, jaydeb ngapxhuäcxibich Dios y'ayuc nañ jadu'n ma yi jäy ajcxy jim. Paady yci xpi ndzooñich tzajpjoty, jigix jëbi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judío jäy ñaymujctac, e yajpidzimy anajty ca'oybi majaty jäy.

Jesús yajtzögy tüg jäy nibützpa'mmiidpi

⁴⁰ Tüg jäy huidibi ymiid anajty jibic pützpa'm, je micpi, chi nimijhuägy Jesús, e ycojxtinay'ahuuy ma Jesús yhuinduu, ymiñañ:

—Pen miich jadu'n tzojcpy, jëb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinicx, e ymiñañ: —Ndzojcpyich, cham nyajtzögy.

⁴² Co Jesús jadu'n ymiñañ, chi mic'amy je jäy huidibi anajty miid je jibic püd chögy. ⁴³⁻⁴⁴ Mic'amy Jesús ycapxci xy miid je jäy huidibi anajty ti chögy, e nimay:

—Ix pin myajnimäy co ti mdzögy. Nicx jayijp jibby ma Dios ytijc ma je judío teedy ajcxy, e mo' Dios yhuindzigi'ñ jadu'n nej Moisés ycötújcín ane'my, jigix jëbi huadz mbidzimipy ma Dios ycötújcín. Cuydun miich huidibi Moisés ñajtz'ane'miyy jecy'ajty, jigix jëbi je mayjäy ajcxy nejhuñhuip co ti mdzögy.

⁴⁵ Per je yëydijc ca' capxymidoy Jesús. Co ñicxy, chi ytigiiy capxy yajyöybi jadu'n nej anajty ti yajtzögyii. Com je mayjäy nejhuñyib huidibi anajty Jesús ti tuñ, paady yci xpi Jesús ca' anajty ocjajtni nej ytigiihuipy iixna' jigüe'xna' majaty cajp. Hue' anajty huidity ma ca' pin chinäy. Per miñ anajty y'oy'ixyii huenytimypinjäyity, choon ma nidüg'óciy cajp huinduy agonbi.

2

Jesús yajtzögy tüg jäy c'ima'tpi tecyma'tpi

¹ Ti anajty xii tiempo ñajtninicxiiyñi co Jesús yhuimbijty jadüg'oc jim Capernaum. Je mayjäy ñejhuñyib anajty co Jesús yajpaady ma tüg tijc. ² Chi mic'amy mayjäy ñayyöymujci ma anajty Jesús yajpaady, e ca' anajty tigi ydac ma je tijc, miid co tzach mayjäy anajty ti miingixy. Y'adujctaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xii, midaax yëydijc ciymiñ cijx'am ma Jesús yajpaady tüg pa'mjäy huidibi yci' ytecy ti yxujxtäy anajty. ⁴ E com ca' anajty ni nej y'oyiy nej yajjadip ajcxy ma Jesús je pa'mjäy, je' co anajty chach újtzyty je tijc miid je mayjäy, chi ajcxy yajcöhuaach hueeni je tijcnicx ma anajty Jesús yajpaady. Chi ajcxy cödiyñajxy je pa'mjäy cijx'am. ⁵ Co Jesús ijxy je jäy ajcxy ymiibijcín, chi nimay je pa'mjäy:

—Migügich, yi mbocy ti yajhuinmecxtäy.

⁶ Per nijëjity huindzindijc huídibi ajcxy nijaydutr anajty Dios ñecy co ajcxy midoy nej Jesús ymínañ, chi ajcxy ymínañ jotjoty huinmañjoty: ⁷ “¿Nej co jada jäy jadu'n ymínañ co ti yajhuinmecxy jada pa'mjäy ypocy? Capxtigooyb yi' miid Dios. Com ca' nipinjäy jëb ypocyhuinmecxy. Tügpaic Dios yi' huídibi jëb ypocyhuinmecxy.” ⁸ Per Jesús ñejhuíyb anajty nej je' ajcxy chachmínañ jotjoty huinmañjoty, paady mic'amy ymínañ:

—¿Na'amy co mdzachhuinmaaygixy? ⁹ ¿Huídibi jada jac'ooy co nnimäyich yi pa'mjäy: “Ti mbocy yajhuinmecxytäyi.” O jac'ooy co nnimähuiich: “Pidig, e yajpidig yi mdögy, e tüyöy?” Tú'ciy yi'.

¹⁰ Chi Jesús yjacmínañ:

—Jadachambi janchtiy nyajquëxígañich co ñich, je jäy huídib tzoon tza-jpoty, e huídibi cham yajpaady ya naaxhuiñ, nmíidich mic'ajt jaydeb nhuinmecxyich jäy ypocy.

Co Jesús jadu'n ymínañ, chi nimay je pa'mjäy huídibi yci' ytecy anajty xuxy:

¹¹ —Ñich miich yam jadu'n nimäy: “Tinayig, yajpidig yi mmabejt e nicx ma mdijc.”

¹² E mic'amy je pa'mjäy ypidigy, e yajpidigy ymabejt, chi ytüyöchoñ jüby ma je mayjäy ajcxy anajty y'ixy yhuindicxy. Paady ycixpi tüg'óciy je mayjäy ooy jihuíy huinmay etz jäymejch ojadajty ajcxy Dios, ymínaangixy:

—Nimínaabi ajt jadu'n nga'íxim mijhuinmañ jadu'n nej cham ti n'íxim.

Jesús nimay je Leví: “Pajamgich”

¹³ Chi jadüg'oc Jesús ycajppidzimy, ñicxy jim ma mejypa'. E co mayjäy ñayöymujcy jim ma Jesús anajty yajpaady, chi Jesús yaj'ixpijc je mayjäy. ¹⁴ Co Jesús yjactüyöy anajty, chi ijxpaady Leví je Alfeo ymang. E Leví ñaayb anajty ma je yajcogüejttac jäy yajcogüejtp anajty. Chi Jesús nimay Leví:

—Pajamgich.

Tim huin'ítiy Leví ytínayigy, ixmajch ytung, e panicxy Jesús.

¹⁵ Jadu'n yajti co tüg xii Jesús caayb anajty me Leví ytijc. Mayjäy huídibi ytung'ajtpy anajty yajcogüedi, etz jacjadyii jäy huídibi anajty tundigooyb miid judío jäy ycostumbre y'íñaaygixy ma je caydac quipxy miid Jesús etz je' ydiscípulos ajcxy. Com may jäy anajty ooy Jesús tzach miid huídijtcixy.

¹⁶ Jim anajty ma Leví ytijc nijëjity fariseojäy, je huindzindijc huídibi tzach padumb judíojäy ycostumbre. E co je' ajcxy ijxy co Jesús caayb uucp anajty tügmucy miid tüg'óciy je mayjäy ajcxy huídibi tundigooyb miid judíojäy ytiy'ajt ycötújcín, etz yajcogüejtpidijc, chi ajcxy migapxy Jesús ydiscípulos, je' ajcxy huídibi mijnicxpejtp anajty Jesús, nimay ajcxy:

—¿Nej co Jesús miich ajcxy mhuindzin ycaymucy y'ucmucy miid yi yajcogüejtpidijc ajcxy, etz jacjadyii jäy ajcxy huídibi tundigooyb miid judíojäy ycötújcín?

¹⁷ Co Jesús jadu'n midoy nej je fariseo jäy nigapxyii, chi ajcxy nimay:

—Ca' tzocy tzoydumbi yi jäy ajcxy huídibi mic'ajtp oy'ajtp. Yi' janchtiy yi huídibi ajcxy yuuba'm ymiid chojcpy ajcxy tzoydumbi. Nañ tim jadu'n yi jäy ajcxy huídibi ca' ypocymíidity, ca' ajcxy tzocy pocyhuinmeecxín. ñich ti nmiñich co nyajjothuimbidipyich pocyjäydijc. ñich ca' ti nmiñich co nyajjothuimbidipyich oyjäydijc tudägyjäydijc.

Jesús yaj'amidoogixy nej co jäy y'ity jaygay

¹⁸ Jadu'n yajti tüg tiempo ayuu'ijtp anajty je jäy ajcxy huídibi mijnicxpejtp anajty Juan je Bautista. Nañ jadu'n ayuu'ajtp anajty je fariseojäy ajcxy. Chi nijëjity ajcxy ymiñ ma Jesús e amidoy:

—¿Nej co yi jäy ajcxy huídibi mijnicxpejtp ajcxy Juan etz nañ jadu'n yi fariseojäy ajcxy ayuu'ajtp ajcxy, e je jäy ajcxy huídib miich xymijnicxpejtp, ca' y'ayuu'ájtcixy?

¹⁹ Chi Jesús y'adzooy:

—Co ya nyajpaadyich ya naaxhuiñ, ca' ycopicity co ich ndiscípulos ajcxy y'ayuu'adip. Jadu'n nipaady nej jäy ajcxy huídibi píjcin nixidumy ca' ajcxy y'ayuu'aty ma yam yi píjcin nixiduñ, e peni ca'ni je píjcpí ymígügtijc y'ixmajtztäyíi. Nami je píjcpí ca'ni choñ, chi ca' pin y'ayuu'adañ huídibi nixidum je píjcin. ²⁰ E paadip je xii je tiempo mina ca' nmíid'idañich ya naaxhuiñ yi' huídibi ajcxy xymijnicxpejtpich, e huin'it ajcxy y'ayuu'adaangixy.

²¹ Com jemybi Dios y'ayuc nyaj'ixpicpyich, paady ca' ytügíy miiid je jécyp ayuc huídibi je fariseo jäy ajcxy yaj'ixpíjcpí. Jadu'n nej miich ajcxy mnejhuíy co ni pin ca' agiyíy tuc huit miiid tüg pedaas jemy huit, con je' co je jemy huit nímujcp je', e chi nígi najtzcídzihuip je tuc huit. ²² E nañ ni pin ca' jéb huaad pídagy jemy vino ma tuc cochac. Je' co je vino jemybi ycídzamy je tuc cochac, e chi y'ixyojctáhuip je vino etz je cochac ñitigoydáhuip. Hue' janchtiy jéb ajcxy pídacý jemy vino ma jemy cochac.

Je discípulos ajcxy yajmújcixy je moc cojc sábado xii

²³ Tüg sábado xii Jesús miiid ydiscípulos ajcxy ñaxiiy ma tüg trigo cam. E huin'ítíyí je ydiscípulos ajcxy ytígíy je trigo tujcp. ²⁴ Co je fariseo jäy ajcxy ijxy jadu'n nej Jesús ydiscípulos ajcxy anajty tujcmujc trigo tím, chi ajcxy nímáy Jesús:

—Ix miich. ¿Na'amy co miich mdiscípulos túngixy huídibi judío ycötújcin capx'adujcý sábado xii?

²⁵ Per Jesús ymínañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tügtecy jecy'ajty, co David etz ymígügtijc yuu'ögaangixy anajty? ²⁶ Je huin'it tiempo jecy'ajty co je judío teedy Abiatar mjtungmíidpí anajty ma Dios ytíj, chi David ytígíy ma Dios ytíj, e caay je tzajcaagy huídibi ti anajty yoxy ma Dios yhuinduu. Dios ycötújcin ymínañ co je teedy ajcxy ycaagy'ajtpy jada tzajcaagy, ca' jac'ooyñipín. Nañ jadu'n David moy je tzajcaagy je jäy huídib anajty ajcxy ymíid.

²⁷ Nañ jadu'n Jesús yjacmínañ:

—Ich, je jäy huídibi tsoon tzajpjoty, nmíidich ané'mín, jaydéb nímáyich je jäy ajcxy ti jéb túngixy sábado xii. ²⁸ Com Dios ti ixmach je sábado xii, paady ycíxpi, ich je jäy huídibi tsoon tzajpjoty, nmíidich ané'mín jaydéb nímáyich jäy ajcxy co jéb tijaty tuñ sábado xii.

3

Je yéydijc huídibi anajty yci' tídzip

¹ Jesús ytígíy jadüg'oc ma je judío naymujctac. Jiiby anajty tüg yéydijc huídibi anajty ymíid tüg yci' títz. ² Je fariseojäy jiiby ma je naymujctac y'ijx'ijtpy anajty Jesús, co anajty nejhuíhuañ pen Jesús yajtzögamy je pa'mjäy sábado xii, jigix jébi ajcxy xihuip Jesús co ti ytundigoy miiid judíojäy ycötújcin.

³ Jesús nímáy je jäy huídibi miiid tüg yci' títz:

—Pídíg, mín ya ma ich.

⁴ Huin'it Jesús y'amídooy je jäy ajcxy e nímáy:

—¿Nej miich ajcxy mínaangixy: Nej jébi jada nduñich je oybi o je jibicpi sábado xiioty? ¿Jébi nyajtzögich jäy o jébi nyajtigoyich jugy'ájtín?

Per je jäy amoñ ajcxy ijty, ca' ajcxy je' y'adzooy. ⁵ Huin'it Jesús huindicxpejty je jäy ajcxy mïid chip y'ahua'n, e mïid jotmay, je' co ooy ajcxy jotjuuñity, e chi nimay je yëydijc:

—Xajtiu yi mgi'.

Chi je yëydijc xajtiy yci', e chi yci' oy chögy. ⁶ Chi je fariseojäy ypidzimday ma je naymujctac, ooy yjotmädy ajcxy, e ñicxy ajcxy ñaymújcip mïid je jadügpiicy judío huindzindijc huidibi ymijnicxpejt je rey Herodes. Huinma'ñ ixtaayb anajty ajcxy nej jëb ocyaj'ögip Jesús.

Mayjäy ma tüg nïiba'

⁷ Per Jesús chooñ mïid yi' ydiscípulos ajcxy, ñicxy ma mejypa'. E ooy mayjäy huidibi ajcxy tzomb Galilea ñaaxjot etz Judea ñaaxjot panicxy ajcxy Jesús. ⁸ Nañ jadu'n mayjäy panicx ajcxy Jesús huidibi ajcxy tzomb jim Jerusalén, huidibi ajcxy tzomb jim Idumea ñaaxjot, huidibi ajcxy tzomb jim Jordán mijniñ n'inaxy ma xi ypidzimyb, huidibi ajcxy tzomb jim Tiro etz Sidón ñaaxjot. Ñicxtäy je mayjäy ma Jesús yajpaady, com ñejhuñiyb anajty ajcxy je mijhuinma'ñ huidibi Jesús anajty ytumyb. ⁹ Com tzach mayjäy anajty ymingixy, paady Jesús ni'ane'mdiy ma yi ydiscípulos ajcxy tüg barco ma jëb iñäy, ca'ty je mayjäy ooy y'adijyiyi y'agodiyii. ¹⁰ Com Jesús ti anajty yajtzögy may jäy, paady ycipxi tüg'óciy je pa'mjäy nimujcy Jesús, adzip tzachnidonaangixy. ¹¹ Co je jäy ajcxy huidibi ca'oybi ymïid ijxpaty Jesús, chi ajcxy ñayhuijojtaci ma Jesús yhuinduu, e mic ycapxcooty, ymïinaangixy:

—Miich je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimiydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögop, e capxyñiguexy co huen miñ ma yi' je ymigügtijc huidibi yhuin'ixamy co ytunam mïid yi'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huidibi ymïid'idamy, e huidibi yquexamy y'ayuccapxhuäcxp. ¹⁵ Jesús moy je majmetzpi discípulos ajcxy huidibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nimajmetzpi discípulos ajcxy yxiñ nidüg nidüg: Simón, je huidibi Jesús yximoy Pedro; Jacobo mïid y'uch Juan, yi Zebedeo y'ung y'anäg, je huidibi ajcxy Jesús yximoy Boanerges (je ayuc Boanerges jadu'n yhuimbizimy: “Enee ymang”). ¹⁸ E jacjadyii huidib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huidibi Alfeo ymang'ajtpy; Tadeo; e je jadügpi Simón, je cananista. ¹⁹ Nañ jadu'n Jesús huin'ijxy Judas Iscariote, je huidibi agojix cïyejc Jesús ma ymidzip.

Yajñibijccixy Jesús co mïidity mujcu'ymic'ajt

(Co jadu'n huin'ijxtaay je majmetzpi discípulos ajcxy), Jesús ytigiy ma tügtijc mïid yi' ajcxy. ²⁰ Huin'ityi tzach mayjäy ñayyöymújcigixy ma je tijc ma Jesús y'ity, ixti Jesús etz ymigügtijc ca' y'oyiy nej jëb ycaaygixy y'uuccixy. ²¹ Co Jesús y'amigügtijc jadu'n nejhuñiy, chi ajcxy nimiiñ Jesús yajnicxaangixy anajty mach, com hue' anajty tíjixy co Jesús ylociib.

²² Nijëjity escribas ajcxy, je huindzindijc huidibi nijaydutr anajty Dios ñecy, miin ma Jesús co choñ ajcxy Jesusalén, ymïinaangixy:

—Jada Jesús ymïid Beelzebú, je ca'oybi yhuindzin, ma y'aa yjot. E yi' yajpidzimy je ca'oybi ajcxy ma jäy ajcxy yjothuinma'ñ mïid Beelzebú ymic'ajt.

²³ Chi Jesús huoomiñ ma yi' je escribas ajcxy, e yajmïidmïydacy ajcxy tüg jihuibit ayuc. Chi Jesús ymïinañ:

—¿Nej tiy'ajt jada nej miich ajcxy mīna'ñ co Satanás jēb ci'm ñayyajpidzimyii ma jāy ajcxy y'aa yjot? Ca' tiy'ajt nej miich ajcxy mīna'ñ. ²⁴ Pen tūgpicy tungmīdipi ixyipy ñaybijc-huá'cxigixy, etz ñaymidziptzoonigixy ixyipy ac jēyi. Pues cixip yī' ajcxy y'ané'min. ²⁵ Nañ jadu'n pen tūgpicy tūg juugy tūg migūg ixyipy ñaybijc-huá'cxigixy, ca' ajcxy y'idaangixy tūgmucy. ²⁶ Nañ jadu'n pen Satanás ixyipy ti ñaybijc-huācxyii, e ci'm ixyipy ti nayñibidīguyii, ca' ixyipy yī' ymic'ajt ida'ñ. Hue' janchtiy Satanás cixipy tigoyipy. (Paady ca'tiy'ajtity nej miich ajcxy ymīnañ.) ²⁷ Ca' ni pīn jēb huaad ytīgihuip ma tūg micpi jāy ytijc etz meedzipy tijaty ymīd, pen ca' jayijp cixoch tecyoch je jāy micpi. Pen ti cixoch tecyoch ixyipy je micjāy, huin'it janchtiy mīmadāgipy, e pījcip tijaty ymīd.

²⁸ Janch iich miich ajcxy nimāy co Dios jēb huinmeecxip tūg'óciy pocy huidibi jāy ytūngixp etz tūg'óciy jibicpi huidibi jāy ycapxp. ²⁹ Jēyi janchtiy co pīnjaty capxtigooyb mīd je Espīritu Santo, je Dios yjihui'ñ ymic'ajt, ca' Dios huinmecxi nimīna. Huinixii y'ida'ñ pocymīd.

³⁰ Mīd co jāy ajcxy chach ymīnaangixy co Jesús anajty mīdity ca'oybi, paady Jesús jadu'n ymīnañ.

Jesús ytaj etz y'uch miguēxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytīnaaygixy tība'y, e chi ajcxy capxñiguejxy Jesús. ³² Je mayjāy huidibi anajty ajcxy iñaayb jūhuiditi ma Jesús, ymīnañ ajcxy:

—Miich mdaj etz m'uch cheeby ajcxy tība'y miich ixtaayb.

³³ Chi Jesús ymīnañ:

—¿Pīnjāy miich ajcxy mdijy co iich ndaj'adyii etz iich n'uch'adyii?

³⁴ Huin'it Jesús huindixpejty je jāy ajcxy huidibi anajty iñaayb ajcxy jūhuidity ma je', e ymīnañ:

—Tūg'óciy jada jāy ya jadu'n ajcxy nipaady nej iich ndaj etz iich n'uch.

³⁵ Huenytimypīnity huidibi ajcxy cuydumb yī Dios chójcīn, yī' je' jadu'n nipaady nej iich n'uch, iich n'ajch, iich ndzi' etz iich ndaj.

4

Je niipi y'ijxpejt

¹ Jadūg'oc Jesús ytīgīy yaj'ixpijcpī ma mejypa'. E ooy mayjāy ymujcpejty ma anajty Jesús yajpaady. Mīd co ooy anajty chachmayjāyity, paady Jesús ytīgīy ma tūg barco jahuengi mejyjoty. Jesús iñaayb anajty barcojoty, e je mayjāy iñaayb anajty ajcxy ma mejypa'. ² Huin'it Jesús yaj'ixpijcy je mayjāy mīd canaag jihuibit ayuc. Co yaj'ixpicy, chi ymīnañ:

³ —Amīdoo'ijtcix miich ajcxy iich jada n'ayuc. Tūg jāy chooñ niipi. ⁴ Co je niipi yhuijpy anajty trigo tīm, chi je trigo tīm nijējity oy ycāy tīm tūgūj. Chi je joon ajcxy ymīñ jicxy je trigo tīm huidibi tūgūj ti ycāy. ⁵⁻⁶ E nijējity trigo tīm oycāy ma tzaanīcx, ma nihueēñ oyñaax yajpaady. E je trigo tīm ca' tzip mujx je', je'co ca'anajty ooy naax mápxity. E co je xīi ypidzimy, chi no'cy je trigo mang, com ca' anajty ytictz mīdity naaxjoty, chi ytīch. ⁷ E nijējity trigo tīm oycāy ma apyjot. Co jada trigo tīm ymujxy, chi y'ujtz'ōgtāy je trigo mang, e ca' ytīm'ajty. ⁸ Per jacjadyii trigo tīm oycāy ma oyñaax, chi ymujxy, e ytīm'ajt may'amy: tūg pi'c pajc iipxmajc oyco'ity, jadūg pi'c pajc tugi'px oyco'ity, jadūg pi'c pajc mīgo'px oyco'ity.

⁹ Co Jesús je mīydāgīi yajmay, chi ymīnañ:

—Pīnjaty mīd ytātzac, pīn mīdohuamy, huen mīdo'mbicy jada ayuc.

Ti yī' ñigapxyp yī' ijxpejt

10 Co je mayjäy ñicxni, e Jesús yhuim'y naydüg, chi je nimajmetzpi ydiscípulos ajcxy etz jacjadyii huídib mijnicxpejt Jesús ñimijhua'cy, e amidoy nej yhuimbídzim'y je jihuimbit ayuc. 11 E Jesús ymínañ:

—Miich ajcxy jaydëb mnejhuíhuipy huídibi Dios ñigapxpy ñimiydacpy coyüch'amy ma y'ané'min ycötújcin. Jacjadyii jäy ajcxy jihuimbit'amy nyajmídmíydaacyich. 12 Jadu'n jihuimbit'amy nyaj'ixpijcpyich je mayjäy, jaydëb co pinjaty ijxp, ca' ajcxy ixipy; etz pinjaty mídoob, ca' ajcxy mído'mbígiipy. E jadu'n ca' ajcxy yjothuimbidip, e nañ ni ycayajmeecxipy ajcxy ypocy.

Jesús najtzcapxiy nej yhuimbídzim'y je niipi'y'ijxpejt

13 Chi Jesús yjacmínañ:

—¿Nej ca' miich ajcxy mhuinjihuíy jada jihuimbit ayuc? Pen ca' miich ajcxy mhuinjihuíy jada jihuimbit ayuc, ca' miich ajcxy mhuinjihuíy yí jacjadyii jihuimbit ayuc. 14 Je huídibi capxhuäcxp Dios y'ayuc, jadu'n yí' nipaady nej je huídibi niip trigo tím. 15 Je jäy ajcxy huídibi amído'o'ijtp Dios y'ayuc, e mic'amy je ca'oybi yajpidzim'y Dios y'ayuc ma ajcxy yjot yhuinma'ñ, jadu'n ajcxy nipaady nej trigo tím huídibi cáb tügujc, e je joon ajcxy mic'amy piimujctay. 16-17 Je jäy ajcxy huídibi amído'o'ijtp Dios y'ayuc janch jotcujc, e mibíjccixy tzojccix, chi ajcxy ixmajtzi Dios y'ayuc co agapxiy paady, e co tzaachypí minaxy yajnaxy míd Dios y'ayuc ycixpi. Jadu'n ajcxy nipaady nej je trigo tím huídibi ti ycäy ma tzaanícx. 18-19 Je jäy ajcxy huídibi amído'o'ijtp Dios y'ayuc, e co ñicxni, chi jäy digooyñi Dios y'ayuc míd jotcujc'ájtín tzaaayín, etz comeeñ'ájtín etz adzójcin. Jadu'n ajcxy nipaady nej trigo tím huídibi ti ycäy ujtzjoty, e ca' ytím'aty míd co oy y'ujtz'ögy. 20 Je jäy ajcxy huídibi amído'o'ijtp etz cöbijcp Dios y'ayuc amumdüjot etz Dios y'ayuc tumb ma ajcxy yjot yhuinma'ñ, jadu'n ajcxy nipaady nej je trigo tím huídibi ti cáb ma oyñaax etz ytím'aty may'amy: tüg pi'cpajc iipxmajc, etz jadüg pi'cpajc tugi'px, etz jadüg pi'cpajc migo'px.

Je lámpara ñi'ijxpejt

21 Chi Jesús yjacmínañ:

—Co jäy ajcxy jindicxi'ñ nöctzoy, chi canan ajcxy cöjujpy míd tu'tz, ni ca' ajcxy pidacy cijxpa'tci'py, hue' janchtiy pidaaccixy ma jindicxpejt jaydëb mij ytíicxy. 22 E nañ ni ca' ni pin ni ti jëb ameech tunípy, e nicxy ycayajnejhuíy. E ca' ni pin ni ti ayüch tunípy, e nicxy ycayajnejhuíy. 23 Pinjaty ytátzac ymíd, pin mídoohuamb, huen mído'mbíjccixy ich n'ayuc.

24 Nañ jadu'n Jesús ymínañ:

—Cuendtúngix jada ayuc huídibi miich ajcxy yam mmídooyb. Yí quipxi'ñ huídibi ajcxy myajquipxiy, nañ jadu'n yí' míd Dios ajcxy xyquipxyhuimbidípy, e ixti jacyajmöhuiip ajcxy huídijaty mídoob ich n'ayuc. 25 Pinjaty ymíd, yajmöhuiip nígi, pinjaty hueen míd, yajpigipy nígi (oy ixipy hueen jadim mídity).

Je tím huídibi yeecp ñi'ijxpejt

26 Nañ jadu'n Jesús ymínañ:

—Yí Dios y'ané'min jadu'n yí' nej co tüg jäy nicxy ñípy ma ycamjot. 27 Chi jada' co ñiíptay ñicxni ma ytíjc e ymi'o'cni ymäybídigni com jabom, e jadu'n yajnaxy canaag xii tzuu. E je moc pajc mujxp je' etz yomb. Per je cogam ni ca' nejhuíy nej je moc yoñ, ma mic'ajt paady. 28 Je' co yí naax ci'm mic'ajt mídity jaydëb yajyoñ je moc. Jayíjp ypidzim'y je moc ung, jac'axam ypidzim'y yí moc

píjy, e chi jada' ytíim'ajtni. ²⁹ Co je moc ymajaani, chi je jäy ajcxy nicxy moc tzijcp, com ti yhuindiy je moc.

Ijxpejt ma je mostazi pajc

³⁰ Nañ jadu'n Jesús ymínañ:

—¿Nej m'oc'a'ixíiygixy yí Dios y'ané'mín? ¿Ti míid n'ocyajquipyxíhuibích?
³¹ Jadu'n Dios y'ané'mín nipaady nej mostaza pajc huídibí tüg jäy nicxy níipy ma ycam. Yí mostaza pajc jacnígi ymútzity ca'ydi jacjadyíi ujtzpajc huídibí yajpatp ya naaxhuiñ. ³² E co yajnípy je mostaza pajc, chi yoñ, e chi yeegy ooy janch mij, ca'ydi jacjadyíi ujtz. E janch mij yeegy tüg'ócíy yci' y'aacx, íxti joon ajcxy pe'mb ma je yci'y'aacx y'anicíy.

Nej anajty Jesús yecy je tíy'ajt míid je íjxpejt ycixpi

³³ Jadu'n anajty Jesús yaj'ixpícy je mayjäy ajcxy Dios ytíy'ajt míid canaag jíhuimbit ayuc, íxti míbaad ajcxy jéb huínjíhuíy. ³⁴ Ac jíhuimbit ayuc Jesús yajnímay je mayjäy. Per míid yíydiscípulos Jesús ycapxtícxtaayb anajty je jíhuimbit ayuc.

Jesús capxtícx nej huimbídzímy je íjxpejt

³⁵ Je huín'it xí co ycoodzíy, chi Jesús nímay yí ydiscípulos ajcxy:

—Tzoc ajt jámím jíim'amy ahuin ma yí jadügpí mejypa'.

³⁶ Huín'it Jesús ydiscípulos ajcxy íxmajztay je mayjäy, e míid tzoón Jesús barcojoty. Nañ jadu'n jacjadyíi barco ajcxy choñ quípxy míid Jesús ydiscípulos ajcxy ybarco. ³⁷ Je huín'it coodz tüg poj míiñ janch mic. E je mejy nígoo anajty y'ocpidígni. Janch tígíyb anajty níi barcojoty, jagoo jagoo yca'ujztay je barco míid níi. ³⁸ Jesús maab anajty ma je barco íjx ma tüg mabejt. Chi yajmáybídígi, e nímay ajcxy:

—Huíndzin, ¿nej ca'mduñcuend co hích ajt yam nguinaaním?

³⁹ Huín'it Jesús ymáybídígy, e jípcogapxíy je poj. Etz nímay je mejy:

—¡Amon! ¡Huäcxíp!

Chi mic'amy je poj ymongíductay yhuäcxíjptay jadu'ñyi. ⁴⁰ Huín'it Jesús ymínañ:

—¿Na'amy co mdzachtzigíygyíy ajcxy? ¿Nej ca' mmíbíjccíxy co nmídích Dios ymic'ajt?

⁴¹ Jesús ydiscípulos ajcxy ooy chígíy, e ñayñímaayi ajcxy míñ xyípy:

—¿Pín jäy jada' jada Jesús? Ooy chachmíjhuínma'ñ co yí poj etz je mejy ycapxymídoyyi.

5

Je Gadarajäy huídibí anajty ca'oybí míid

¹ Chi Jesús míid ydiscípulos ajcxy oyja'tcíxy ma je mejypa' ma je Gadara jäy ñaaxjot. ² Tím mic'amy co Jesús ybarcobídzímy, chí nímiñ tüg jäy huídibí ca'oybí míid anajty. Hue' anajty choñ ma ócpi jut. ³ Je yéydíj, ca'oybímíidpi, tzínaayb anajty ma ócpi jut. E ní pín anajty ycamímadágyii. Ní pín camímadacy nícx cíxoch tecyxoch jada je ca'oybímíidpi, e ní ca' ajcxy mímadacy míid cadena. ⁴ Canaag'oc ajcxy jacíxojch jatecyxojch míid cadena, e ypojtaayb anajty je cadena. Ní pín camíhuínma'ñybaady nej jéb ocmímadaaccíxy je ca'oybímíidpi. ⁵ Je ca'oybímíidpi xím tzuum anajty yhuídity tüg yuugjot etz ma ócpi it, janch mic anajty yäxytíñäy. E chachnayya-jtzaachíyyi anajty míid tzaa.

⁶ Jiguëgy anajty je ca'oybimüdpí ymiiñ, co ijxpaty Jesús, chi poyügy ninicxy Jesús, e ycojxtinay'ahuüy ma Jesús yhuinduu. ⁷ Je ca'oybimüdpí mic migapxcooty Jesús, e nimay:

—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' ich jëb huaad xychaachytuñich. ⁸ Je ca'oybi jadu'n yminañ, com Jesús ti anajty nimäy:

—Ca'oybi, pidzimb ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je' “ni may”, com ni may ich ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyüi ma huingbi it lugar. ¹¹ Huingon anajty je cop ma anajty may idzim yjüxcixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexüyg ma yí may idzim, jigix jëbi n'adigüyich njottigüyich yí may idzim.

¹³ Chi Jesús jadu'n a'ixiy co jëbi adigüygixy jotigüygixy je may idzim. Chi je ca'oybi ypidzimday ma je yëydijc, e yajtigüyday je may idzim ajcxy. Jim anajty yajpaady jahuengi mejtz mil idzim. Chi je idzim ylocjüydaay, e ycögänaxtaay ajcxy ma tüg tzajijp, e oy ycädaaygixy nijoty, e chi ajcxy ñii'ögtay.

¹⁴ Je idzim cuend'ajtp ajcxy ooy ajcxy ñay'adzigüyüi, e nicxtay ajcxy poyügy ma ytijc. E oy nimüydaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy ijxcixy nej anajty ti ytunyüi ti yjadyüi. ¹⁵ Co je mayjäy ajcxy yja'ty ma Jesús yajpaady, chi ajcxy ijxy je yëydijc huidibi anajty mayca'oybi ymüid. Ijxy ajcxy co iñäy huit müid etz huijycujc, ti anajty y'oyüy. E huin'it ooy ajcxy je mayjäy ñay'adzigüyüi. ¹⁶ Je jäy ajcxy huidibi anajty huindixp co anajty je ca'oybimüdpí ti y'oyüy, etz ijxcixy nej ti ytunyüi ti yjadyüi müid je may idzim, chi yajmiydactay je maycajpyäy jadu'n nej anajty ti ijxcixy. ¹⁷ Huin'it ajcxy pijctzoy may'ajt ma je Jesús, co huen tzooñ ma ajcxy je ñaaxjot.

¹⁸ Co Jesús ytigüy jadüg'oc ma je barco, chi je yëydijc huidibi anajty ca'oybi ti ñibidzimyüi ti ycöbidzimyüi, pijctzoy may'ajt ma Jesús co huen a'ixiy möhuip co huen müid'idyüi Jesús. ¹⁹ Per Jesús ca' a'ixiy co ymüid'idyüi, chi nimay:

—Huimbit ma mdijc etz mjugymigüg, e yajmüdmüydäg jada mijpi tung mijpi huinma'ñ huidibi je Huindzin Dios ti tuñ müid müich. Müdmüydägüpy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huidijtp anajty cajp cajp jim Decápolis ñaaxjot, e nimüydactay tüg'óciy jadu'n nej Jesús ti yajtzögyüi, e tüg'óciy je mayjäy ooy jihuüy huinmay.

Je Jairo ñüx etz je töxyjäy huidibi Jesús yhuit nïdoni

²¹ Co Jesús huimbijty barcojoty ma je mejypa' ma anajty ti chooñ, chi mayjäy ymiiñ ma Jesús yajpaady, chi Jesús yhuäcxüpy ma je mejypa'. ²² Huin'it Jesús ñija'ti tüg mijtungmüdpí ma yí judíojäy ajcxy ñaymujctac. Je yëydijc hue' anajty xüijty Jairo. Co Jairo ijxpaty Jesús, chi ñayhuüjotac ma Jesús yhuinduu. ²³ Jairo may'ajt pijctzoy, yminañ:

—Huindzin, ögaanip ich nnüx. Tun may'ajt nicxy ma ich ndijc, e mgüñixájip ma ich nnüx, jigix jëbi myajtzögüp, e yjactzinähuip.

²⁴ E Jesús nicxp anajty müid Jairo, e mayjäy panücxü anajty Jesús. E je mayjäy ooy anajty tzach'adiji'y tzach'agodi'y Jesús. ²⁵ E ma je mayjäy ymiiñ anajty tüg töxyjäy pa'm müid, jécyñ anajty ymüjtacni. Majmetz jimüjt yxü ybo' anajty cujc

payöy, ca' anajty y'oc-huäcxijpni je ni'py. ²⁶ Jada töxyjäy ti anajty yajtzoyduñ mïid may tzoydumbi, ti anajty ymeen yajtundäy ma je tzoydumbi ajcxy. E je'ni anajty ypa'm'ity. Ni ti pubéjtin ti capaady, ixti nigi anajty ypa'm mijhua'ñ.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady nimiiñ etz nimijhuägy jixci'py'amy, chi nidooni Jesús yhuitpa'. ²⁸ Jada töxyjäy nayñimaayi jotjoty huinma'ñyoty: “Co nnidónibich Jesús yhuitpa', mïid tim yi'yi ndzögibich.” ²⁹ Co je töxyjäy nidoñ Jesús yhuitpa', tim huin'ítiy mic'amy yhuäcxijp je ni'py. Huin'it je töxyjäy jihuüy co anajty ti chögy.

³⁰ E Jesús jihuüy co anajty ti yajtzögy tüg jäy mïid ymic'ajt, paady ni'ijxhuimbijty je mayjäy huídibi anajty pamíinip, y'amidooy ajcxy:

—¿Pin ich nhuit ti xyñidoni?

³¹ Huin'it Jesús ñimaayi ajcxy ydiscípulos:

—Miich m'ijxpy co yi mayjäy xychach'adijy xychach'agodiy, e miich mina'ñ: “¿Pin ti xyñidónich?”

³² Per Jesús huindixypejty je mayjäy jühuidity ma yi', oc'ixañ ocne-jhuíhua'ñ pin anajty ti ñidonyii. ³³ Huin'it je töxyjäy, com ñejhuüy anajty jadu'n nej Jesús ti yajtzögyii, paady nimijhua'cy Jesús janch tziyuuyb mïid tzig'iñ ñayhuíjotaci ma yi' yhuinduu. ³⁴ Jesús ymina'ñ:

—Töxyjäy huídibi ooy ndzócyich, ti mdzögy mïid co ti xymibícyich. Nicx agujc jotcujc, ti mba'm ñaxy.

³⁵ Capxp miydacp anajty Jesús mïid je töxyjäy co nijéjity jäy ñimiini, choñ ma je judío jäy ñaymujctac mijtungmïdipi ytijc, e nimay je töxy'anäg yteedy:

—Yi mnix ti je y'ögy. Ca' huaad mjac'amayiy nig yi Huindzin Jesús.

³⁶ Per Jesús ca' tuñcuend jadu'n nej ajcxy yjamina'ñ, chi nimay je naymujctac huindzin:

—Ca' mdzigiy, mibic nigoda'ajty.

³⁷ E ni ca' jac'a'ixiy nicxy yjacmïdnicyii jacpinjaty. Jëda'ajty mïdnicy je Pedro, Jacobo etz Juan, je Jacobo y'uch. ³⁸ E co Jesús ytijctigiy ma yi naymujctac huindzin ytijc, chi ijxy jadu'n nej jäy jii by chachne'mgixy chachjygyixy chachyaaxcixy. ³⁹ Co Jesús tijctigiy, chi nimay je jäy ajcxy:

—¿Nej co nigoo ajcxy mdzachne'mni, e mdzachyáaxcixni? Yi pi'c töxy'anäg ca' yi' ti y'ögy, maab yi'.

⁴⁰ Per nigoo ajcxy Jesús nixiicy co jadu'n ymina'ñ. Huin'it Jesús yajpidzimday tüg'óciy pinjaty anajty jii by tigoty, e mïid tijc tigiy jëda'ajty je ungedeedy etz ungday, e nañ je tugigpi ydiscípulos huídibi anajty ti mïid miiñ. Chi ajcxy ytigiy jii by ma anajty je töxy'anäg yajpaady. ⁴¹ Chi Jesús májtziy yi töxy'anäg yci', e chi nimay:

—Talita, cumni —jadayaab ayuc hue' yi' yhuimbizimy: Töxy'anäg, ich miich yam nimaayb, pidig.

⁴² Huin'ítiy je töxy'anäg, je huídibi anajty majmetz yjimijt, ypidigy e ytüyöychoñ. E tüg'óciy yi mayjäy ooy ajcxy jihuüy huinmay. ⁴³ Huin'it Jesús najtzcapxiy co ca' huaad pin yajnimay jadu'n nej je töxy'anäg ti chögy, nañ jadu'n ni'ane'mdiy co huen ajcxy yajcay je pi'c töxy'anäg.

6

Jesús yajpaady jim Nazaret

¹ Huin'it Jesús choñ ma je jimbi it lugar, e yhuimbijty ma yci'mgajp. E mïid ñicxy yi' ydiscípulos ajcxy. ² Sábado xijoty Jesús ytigiy yaj'ixpijcp ma je mayjäy huídibi yöymújccixp ma je judío jäy ñaymujctac. E je mayjäy huídibi amidoo'ijtp anajty ooy jihuüy huinmay ajcxy, e ñayñimaayi ajcxy miñ xyipy:

—¿Ma jada' jadayaab jäy ti ni'ixpi'gíy jadayaab ixpí'cin? ¿Ma ti paady jada huijy'ajt cujc'ajt huídibi ymíid? ¿Ma jada' ti paady yi mic'ajt huídibi míid mijhuima'ñ tumyb? ³ Je' jada je tzejtzpi, yi María y'ung. Yi' y'uch ymígüg, yi Jacobo, yi José, yi Judas, etz yi Simón. Nañ jadu'n yi' y'uch töxyjäybí cha ajcxy chinäy quipxy míid ñch ajt.

E je mayjäy ca'ajcxy anajty ixa'ñ cöbígá'ñ Jesús. ⁴ Huin'it Jesús nimay je mayjäy ajcxy:

—Huenma'ámyity tüg'óciy je mayjäy ooy yajmij'aty je jäy ajcxy huídibi najtzcapxíyb Dios y'ayuc. Jéyi janchtiy, ma yci'm naax ma yci'mgajp ca' je jäy ajcxy yajmij'adyii, etz nañ ytim jadu'n yi' y'amígügtijc etz ymíjin ymíidijc.

⁵ Ma yci'm naax yci'm gajp Jesús ca' jaty nej mijhuinma'ñ tunipy míid co ca' ajcxy mijpidägyii. Jéyi ycipidacy ma nijéjity pa'mjäy etz yajtzoocy. ⁶ Jesús ooy jihuíy huinmay nej je jäy ajcxy ca' ymípidägyii ma yci'm naax yci'm gajp. Chi Jesús chooñ jim ñicxy ma jacjadyii cajp huinduy agonbí, e yaj'ixpijcy anajty je mayjäy ajcxy.

Jesús quexy ydiscípulos ayuccapxhuäcxp

⁷ Huin'it Jesús mijhuoy je majmetz ydiscípulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jéb yajpidzimy ajcxy ca'oybí ma jäy ajcxy. ⁸ Nañ jadu'n y'ane'my Jesús je' ydiscípulos ajcxy co ca' huaad ti miníxcixy tü'amgixpi, jéyi jéb miníxcixy tüg tajc nidüg nidügti. Ca' huaad miníxcixy ymorral, e ca' huaad miníxcixy ycaagy, e ca' huaad miníxcixy ymeeñ. ⁹ Jéyi je ycíg etz je yhuit huídibi anajty ajcxy ymíid huen miníxcixy. ¹⁰ Chi Jesús ymíinañ:

—Co anajty ajcxy mjättaccixy ma tüg tijc, jim ajcxy mhuí'mipy ixti coon mdzóonip ma yijimbi cajp. ¹¹ Pen mdígíygixp ma tüg cajp, e je jäy ajcxy ca' ajcxy xycöbígá'ñ, ca' ajcxy amido'ida'ñ miich m'ayuc, mbidzimgix ma je cajp, chi mhuinhuójpíxipy mgíg. Jada je' je tíy'ajt co ca' ajcxy mjotcújcity. Janch ñch miich ajcxy nimäy co Dios anajty ytiyduñ jada naaxhuiñ jäy, jacniği tzaachypi paada'ñ yi jäy ajcxy huídibi ajcxy anajty ca' xycöbígá'ñ, ca'ydi je' ajcxy huídibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbíjtcixy, huen ixmajtzaaygixy yi pocytuní. ¹³ Nañ jadu'n ajcxy yajpidzimy ca'oybí majaty jäy, e pidaaccixy aceite majaty pa'mjäy, e yajtzóoccixy anajty.

Co Juan je Bautista y'ögy

¹⁴ Huin'it je rey Herodes nejhuíy co Jesús canaag mijhuinma'ñ tzachytuñ anajty, com tüg'óciy je mayjäy anajty nimíydaaccixy Jesús. Herodes ymíinañ co Juan je Bautista ti yjugypicy jadüg'oc ma anajty ti y'ögy, paady mic'ajt míidíy jaydéb mijhuinma'ñ tuñ. ¹⁵ Nijéjity jäy ymíinaangixy:

—Jesús yi' je' Elías.

E naagity jäy ymíinángixy:

—Yi' je' tüg Dios tíy'ajtmíidpi huídibi quipxyñby míid je Dios ytiy'ajtmíidpi huídibi tzinay jecy'ajty.

¹⁶ Co Herodes nejhuíy nej je mayjäy nimíydaaccixy Jesús, chi ymíinañ:

—Janch jada co Juan ti yjugypicy, je huídibi nni'ane'mdíyich co huen yajmínagyii ycohuajc.

¹⁷ Míid Herodías, Herodes ytöxytíjc yci'xi, Herodes n'ane'mdíy co Juan yajmach, e píidägyii pujxtigoty. Jada Herodías jayijp ypijcy míid je rey Herodes y'ajch Felipe, per ti anajty ixmach Felipe, e ypijctigajch míid je ycapy Herodes.

¹⁸ Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytjic miich müddzinaayi.

¹⁹ Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'ñybaty nej ocyaj'ögip; ²⁰ com je rey Herodes ñejhuñyb co tudägy jäy huädz jäy anajty je Juan, e tzigñyb anajty müd Juan. Paady ycixpi anajty je rey Herodes Juan müdity cuend'aty pujxtigoty. Naag'oc naag'oc anajty Herodes ñicxy amido'ity Juan y'ayuc, ooy anajty huinmay nej yhuimbizimy, per jotcujc anajty amido'ijty.

²¹ Huin'it Herodías ypat huinma'ñ nej jëb yaj'ögy Juan je huin'it xii co je rey Herodes anajty ñayñixiuduñy. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yi mic jäydijc huñdibi ajcxy tzinaayb naag naag cajp jim Galilea. ²² Xiñduñyoty anajty co Herodías ñix oy y'ech ma je rey anajty yajpaady müd je may jäy huñdibi anajty yajcaayb yaj'uucy. E jadu'n nej je Herodías ñix y'ejch, ooy je rey jadu'n jäygidacy, etz tüg'óciy je jäy je huñdijaty anajty müd ajcxy ycaaygixy y'uuccixy. Chi je rey ñimay je töxy'anäg:

—Pijctzóhuigich ti mdimdzojcpy, ñich miich nmöhuipy.

²³ Je rey ñigi capxcödujcy janch cixyot huñijot co möhua'ñ ti ytimy ypijctzooyb, ixti jëb jamöy cuñhuäcxy yi' y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, ñimay:

—¿Ti nbijctzohuipich?

Chi je' ytaj y'adzooy:

—Pijctzohui yi Juan je Bautista ycohuajc.

²⁵ Mic'amy je Herodías ñix niñhuimbity je rey e ymíñañ:

—Ndzojcy pich co xymöhuibich mic'amy je Juan je Bautista ycohuajc ma tüg texy.

²⁶ Co jadu'n midoy je rey, chi ytigñy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuanñy je töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen ñicxy yajtzoni Juan ycohuajc. ²⁸ Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajcñidigiy je töxy'anäg, e je töxy'anäg yajcñidigiy ytaj.

²⁹ Co je jäy ajcxy huñdibi anajty mijñicxpejtp Juan ñejhuñy ajcxy co je rey ti yaj'ögy Juan, chi ajcxy y'oy e yajpñidici Juan ñinñcx, e yajnaaxtigñy ajcxy.

Jesús yajcaay migoox mil yëydijc

³⁰ Co je majmetzpi apóstoles ajcxy yhuimbijty huñdibi anajty Jesús ti quexy y'ayuccapxhuäcxi ma canaag cajp, chi ajcxy yajmüdmüydacy Jesús tüg'óciy tijaty anajty ti tünigixy, etz tüg'óciy ayuc huñdijaty ti yaj'ixpijccixy. ³¹ Huin'it Jesús ñimay je ñimajmetzpi huñdibi anajty ti quexy y'ayuccapxhuäcxi:

—Tzoc jámim ma tüg it ma ca' pin, jaydëb nbócxim tüg xii metz xii.

Paady ycixpi Jesús jadu'n ymíñañ, com tzach mayjäy ja'ttiñb tzondñb ma Jesús yajpaady, e ca' ajcxy tiempo anajty müdity mina ycáaygixipy y'úuccixipy müd je mayjäy ycixpi. ³² E Jesús müd ydiscípulos ajcxy ñicxy barcojoty ma ca' pin. Ac jëyi ajcxy ñicxy ca' jac pin jäy müd ñicxy. ³³ E mayjäy ijxy co Jesús ajcxy choñ, e ñañ ijxcajpy pin anajty tzoñ barcojoty. Paady mayjäy choñ ma canaag cajp tegyi'm, ñicxcixy poyigy anajty ma Jesús ñicxa'ñ. Mayjäy oy yja'ty jayijp ca'ydi Jesús ajcxy, e jim ajcxy yöymujctay. ³⁴ Co Jesús ybarcopidzimy, chi ixy janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huñdibi ca' müdity ycuend'ajtpi. Chi Jesús ytigiy yaj'ixpijcp, canaag nax ixpijcin anajty yecy. ³⁵⁻³⁶ Co anajty ti chu'ñyñi, chi Jesús ydiscípulos ajcxy ñimaayi:

—Ca' ni pin chinäy ma jadaayaabi it lugar, e ti chu'ñyñi. Capxycix müd jada mayjäy ajcxy, jaydëb ñíxcixyñi ma yi cajp huinduy agonbi, huen nicxy júygixipy ycaayin y'uucin.

³⁷ Huin'it Jesús y'adzooy yi' ydiscipulos ajcxy:

—Miich ajcxy móoygix jada mayjäy caayin úcin.

Chi ajcxy Jesús y'adzooy:

—¿Huaad ñich ajcxy nicxy njuy mejtz migo'px denario tzajcaagy, jigix ycaayipy y'ügipy jada mayjäy?

³⁸ Chi Jesús y'amidooy ydiscipulos ajcxy:

—¿Naag tzajcaagy miich ajcxy müdity ya? Nicx íjxcix.

Co ajcxy tiy'ajt paty, chi ajcxy Jesús nimay:

—Ñich ajcxy nmüd migoox tzajcaagy etz metz acx.

³⁹ Chi Jesús ni'ane'mdüy co je mayjäy huen ixtaaccixy naaxcixy tügpicyjaty.

⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huixchiguüpxmajjatypi.

⁴¹ Chi Jesús conigy je migooxpi tzajcaagy etz je metzpi acx, e ypa'tijxy tzajpcixy, e yajnajxy Dios cojuyip ma Dios müd je tzajcaagy etz je acx ycixpi. Huin'it Jesús tujc-huäcxy je migooxpi tzajcaagy, e yajcídigi'y je' ydiscipulos ajcxy, jaydëb ajcxy yajhuäcxip ma je mayjäy. Nañ jadu'n Jesús yajcídigi'y je metzpi acx je' ydiscipulos ajcxy, jaydëb yajhuäcxip ma je mayjäy. ⁴² Nidüg'óciy je mayjäy ajcxy yca'y uucy cüxyi. ⁴³ Co je mayjäy yca'yday, chi je discipulos ajcxy yajmujcy je cayduc tzütztuc, e yaj'ujch ajcxy majmetz cach. ⁴⁴ Migoox mil anajty ajcxy je yéydijctijc huídibi cay uuc.

Jesús yöy nñhuingíxy

⁴⁵ Huin'it Jesús ane'my je' ydiscipulos ajcxy co huen barcotigíygy mic'amy. Huen nicxícixy jayijp jim Betsaida jim me'y ññajxy. Co yi discipulos ajcxy ybarcotigíyday, chi Jesús ycapxycíjxy müd je mayjäy. ⁴⁶ Co anajty Jesús ti ycapxycíxy müd je mayjäy, chi ñicxy ma tüg cögop Dios mibijctzoob. ⁴⁷ Co ycoodzñyñi je discipulos ajcxy anajty yajpaady mejyjoty ma je barco. Jesús naydüg anajty yajpaady mejypa'. ⁴⁸ Jesús y'ijx co je'ydiscipulos ajcxy anajty ti y'anucñygyxy müd mejycabi, je' co je barco anajty chachijpcoboijy. E co oy moñy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discipulos ajcxy. ⁴⁹ Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmaññygyxy. ⁵⁰ Com tüg'óciy yi discipulos ajcxy anajty ti íjxcixy Jesús, e ooy ajcxy chigíy, paady mic'amy Jesús migapxy je' ydiscipulos ajcxy, e nimay: —Jotmic naybidáacigíxy, ca' mdzigíygyxy. ñich yi'.

⁵¹ Huin'it Jesús ybarcotigíy, e mic'amy je poj yxeemy, e je discipulos ajcxy ooy jihuy huinmay. ⁵² Ooy ajcxy jihuygyxy huinmaaygyxy, com ca' ajcxy huinjihuygyxy anajty nej Jesús je mayjäy yajcay müd je migooxpi tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'. ⁵⁴ Co ajcxy ybarcopidzimy, chi mic'amy je mayjäy ajcxy jim íjxcajpy Jesús. ⁵⁵ Poyigy je jäy ajcxy chooñ, e yajyöyñajxtay je cajp ajcxy huinduy agonbi, capxhuäcxixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñytim ma'amyty anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij tüba',

e cohuaniiygixy Jesús co huen nidoñyii yi yhuitpa', e tüg'óciy huídijaty anajty ajcxy nidomb, najxp ajcxy anajty je' ypa'm.

7

Huidi jäy yaj'ahuimbijt pocyjayity

¹ Huin'it ymiiñ ma Jesús nijējity fariseojäy ajcxy, je huindzindijc huídibi tzachpadumb judío ycostumbre. Nañ jadu'n miid miñ nijējity escribas, je huindzindijc huídibi ajcxy nijaydutr anajty Dios ñecy. Hue' je fariseos etz escribas ajcxy anajty ti choongixy Jerusalén. ² Je fariseos etz escribas ajcxy ijxy co Jesús ydiscípulos ajcxy ytiğiy caaybi uucpi jayğibuju, ca' anajty cuydúngixy judíojäy ycostumbre. ³ (Com yi fariseojäy etz jacjadyii judíojäy ajcxy cuydumby anajty ajcxy ñi'ap costumbre, e ixpocypújcixy jayijp ma ca'ni ytiğiygixy caaybi uucpi. Com yi judíojäy ajcxy co ajcxy ñicxy mayjäyoty etz yhuimbijtcixy jadüg'oc ma ytiğc, ca' ajcxy yca yixti cooni jayijp ajcxy ycibújcixy canaag'oc. ⁴ Yi judíojäy ymiid canaagnax costumbre huídibi cuydúngixyp jadu'n nej ajcxy yajhuaatzcixy ajcxy ytaasi ytexy ytütz etz ypujxtexy.) ⁵ Chi je fariseos etz escribas ajcxy y'amidooy Jesús, nimaayi:

—¿Na'amy co miich mdiscípulos ajcxy ca' cuydúngixy judíojäy ñi'ap costumbre? ¿Na'amy co ajcxy ycaaygixy y'úccixy, e ca' jayijp ixpújcixy yi' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmiiđpi Isaías jayhui'my jecy'ajty miid miich ajcxy yciłpi. Miich ajcxy huídibi naybidaacip jadu'n nej jihuıy ajcxy tudägyjäy, e ca' yjánchity. Com jadu'n Isaías jaybejty co Dios jadu'n ymınañ: Jada jäy jadu'n ajcxy ycapxcixy ymiydaaccixy jadu'n nej jihuıy xyajmij'atyich. Per ca' ajcxy xyajmij'atyich cixyot huiniıot.

⁷ Naadigi co ajcxy xyhuin'igixich xyhuinyáaxcixich. Ñayyaj'ixpıjcıgıxy ayuc tiy'ajt huídibi jäy ajcxy ti cojy ti macxy.

⁸ Chi Jesús ymınañ:

—Miich ajcxy ti m'ixmájtcixy Dios ycötújcın, e myajmij'átcixy ayuc huinma'ñ huídibi jäy ci'm ti cojy ti macxy. ⁹ Miich ajcxy ca' mgüendtúngixy Dios ycötújcın Dios ytiy'ajt jıgıx jėbi cuydúngixy mgi'm costumbre. ¹⁰ Com Moisés je cötújcın ypidac jecy'ajty: “Yajmij'at mdaj mdeedy”, e “Pınjaty jıbic nigapx ni'ojıyb ytaj yteedy, copıcy y'ögıp.” ¹¹ E miich ajcxy mınañ co tüg jäy nımáhuıp ytaj yteedy co ca' pubeda'ñ ajcxy jadu'n nej padyii, miid co tüg'óciy tijaty yi' ymiid huídibi ytaj yteedy jė'adánıp, hue' ti ahuanıy nigoo ma Dios. ¹² E pen jadu'n mınañ, chi miich ajcxy mınaangixy co ca' copıcyıty mbubéjtcıxıpy mdaj mdeedy. ¹³ Miich ajcxy midundıgooyb Dios ycötújcın miid mgostumbre huídibi myajnajxyp myajtiğıyb, etz jacjadyii jıbic-huinma'ñ myaj'ixpıjccıxy.

¹⁴ Jadüg'oc Jesús mijhuoy yi mayjäy ajcxy, e chi nımay:

—Mıdo'mbıjccıx miich ajcxy iıch n'ayuc, e mhuiñjıhuıııp ajcxy. ¹⁵ Ca' yi' yajpocycáhuıyb huídibi jäy ajcxy ypidacy ma yhuin y'ahuac. Yi' janchtiy huídibi pidzim ma jäy ajcxy yjot yhuinma'ñ, yi' yi' yajpocycáhuııb. ¹⁶ Miich ajcxy mmiid mdátzac, mıdo'mbıjccıx iıch n'ayuc.

¹⁷ Co Jesús ixmajch je mayjäy, e ytiğtiğıy, chi je discıpus ajcxy yaj'amıdoohıı nej yhuimbıdzımy jada ayuc. ¹⁸ Chi Jesús ydiscıpus ajcxy nımay:

—¿Nej nañ jadu'n miich ajcxy ca' mhuiñjıhuııy jada ayuc? ¿Nej ca' mhuiñjıhuııygıxy co huídibi tiğıy ma yi jäy y'ahuac (yi caayın uucın), ca' yi' yajpocycäy yi jäy? ¹⁹ Yi caayın uucın hue' yi jäy ypidägy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n ymína'ñ, chi nejhuyim co Dios ca' capx'aducy ni ti caayin ni ti uucin. ²⁰ E Jesús yjacmínañ:

—Dios yajpocycähuij jäy ajcxy mïd huídibi pidzimb ma ajcxy yhuinma'ñ. ²¹⁻²² Ma yí jäy ajcxy yhuinma'ñ jiiy chooñ jibic-huinma'ñ; jiiy chooñ migapxtigoyi töxyjäy yhuinma'ñ; jiiy chooñ je tundigooyi yëydijc mïd töxyjäy etz töxyjäy mïd yëydijc huinma'ñ; jiiy chooñ jäyyaj'ögü huinma'ñ; jiiy chooñ meedzi huinma'ñ; jiiy chooñ mügü huídidi huinma'ñ; jiiy chooñ jibic-huinma'ñ; jiiy chooñ je huin'in huinma'ñ; jiiy chooñ nayca'oy'ixi huinma'ñ; jiiy chooñ je piitzcapxi huinma'ñ; jiiy chooñ je amij agix huinma'ñ; jiiy chooñ je tzuu huinma'ñ je loci huinma'ñ. ²³ Yí jadu'mbi jibicpi jiiy chooñ ma jäy ajcxy yjot yhuinma'ñ, paady jibicpi jäy ajcxy túngixy, e ypocycäy ajcxy ma Dios.

Tüg töxyjäy huídi ca' yjudiojáyity mibijc Jesús

²⁴ Chooñ Jesús ma yijimbi it, e ñicxy jim ma Tiro etz Sidón ñaaxjot. Jesús ytigiy ma tüg jäy ytijc, e ca' anajty tzocy co je mayjäy ñejhuíhuíyb ma y'ity. Per ca' jajty nicx yhuingoyüch. ²⁵ Mic'amy tüg töxyjäy nejhuyi ma Jesús anajty yajpaady. Hue' je töxyjäy ypi'cnix ymïd anajty ca'oybi. Je töxyjäy ymiiñ ma Jesús, e ycojxtinay'ahuíy ma yí yhuinduu. ²⁶ Je töxyjäy hue' anajty ycojápiy Sirofenicia (e hue' anajty griegojäy). Yí töxyjäy may'ajt pijctzoy ma Jesús co huen yajpidzimy je ca'oybi ma ypi'cnix yjot yhuinma'ñ. ²⁷ Chi Jesús je töxyjäy nimay:

—Ooy ycopicyity co nbubedipyich jayijp Dios yjäy (yí judiojäy). Jadu'n nipaady nej tüg ungedeedy. Tim copicy co je ungedeedy yajcayipy jayijp yci'm ung, e ca' möhuip uc je huídibi y'ung yajjicxaamy.

²⁸ Chi je töxyjäy y'adzooy:

—Huindzin, tiy'ajt nej miich mmína'ñ, per nañ jadu'n yí uc ajcxy yjicxyp je caagy abu'x huídi cáb naaxcíxy ma mesi'pa't ma je jäy y'ung ajcxy ycaay.

²⁹ Chi Jesús je töxyjäy nimay:

—Tiy'ajt jadu'n nej iich miich ti xy'adzooy, paady yci'xpí jëb mhuimbidipy ma mdi'jc jotcu'jc, je ca'oybi ti ypidzimy ma mnix yjot yhuinma'ñ.

³⁰ Co je töxyjäy huimbijty ma ytijc, chi paty ypi'cnix cijx'am, ti anajty je ca'oybi ñibidzimyii ycobidzimyii.

Jesús yajtzögy tüg jäy huídibi cönat etz ahuí'mb

³¹ Chi Jesús jim tzojci chooni Tiro ñaaxjot. Chi chooñ jim ñicxy anajty Galilea, e nicxy ma je tü'aa huídibi najxp Sidón etz je cajp huídibi yajpatp jim Decápolis ñaaxjot, chi yja'ty ma Galilea mij laguunba'. ³² Jim ajcxy mïd miiñ tüg jäy huídibi cönatip etz aahuí'mb. Chi ajcxy may'ajt pijctzooy ma Jesús huen cínixajy je pa'mjäy. ³³ Chi Jesús mïdnicxy je pa'mjäy ahuingujc ma ca' mayjäy, e pidacy yci'hua'x ma je pa'mjäy ytätzac. Chi chujy, e huin'it nidoni je ytoodz.

³⁴ Chi Jesús ypa't'ijxy tzajpcix, e ymicxejy, e chi ymínañ Aramaico'amy:

—Efata —jada ayuc hue' yhuimbidzimy: Ahuädz.

³⁵ E mic'amy je jäy cönatpi ytätzac y'ahuaach etz ytoodz yungüy etz ycapxni yajxon. ³⁶ Chi Jesús ane'my je pa'mjäy etz ymigügtijc co ca' huaad ni pin yajmïdmïydägi'py jadu'n nej anajty ti chögy. Co Jesús jadu'n mictägy ane'my co ca' huaad ni pin yajmïdmïydägi'py je mijhuinma'ñ huídibi ytumy, chi nigí je pa'mjäy etz ymigügtijc mïdmïydaaccixy hueñypínity. ³⁷ Je mayjäy ooy tzachjihuíy huinmay ajcxy, ñayñimaayi ajcxy miñ xyipy:

—Jada Jesús ooy oy chachtuñ. Ymimadactaayb yí'huenytimytíjity, ixti yajmidohuicpy yí yí cönatpi etz yajcapxigy yí uumbi.

8

Jesús yajcay midax milyedyjic

¹ Je huin'it xii je huin'it tiempo mayjäy anajty ti ñaymújcigixy ma Jesús yajpaady, e ca' anajty je mayjäy ajcxy midity ti ycaaygixipy y'úuccixipy. Jesús capxyñiguejxy je' ydiscípulos ajcxy, co huen miingixy ma yi' yajpaady. Co ajcxy ymiiñ, chi nimay:

² —Ooy nba'ayooyich yi mayjäy. Yi' co cham midugiiig xii maabi ya mid y'ityich je mayjäy, e ni ca' ajcxy midity ti ycaipy. ³ Co ixypy nguexhuimbityich ajcxy ma ytijc ayuu, ca' yjécyty yajpa'mgójipy ajcxy tü'am, com nijëjity ajcxy jigüegy ti choongixy.

⁴ Chi je discípulos ajcxy Jesús adzooy:

—¿Ma ich ajt nbaatim je caayin uucin huidibi jëb mid nyajcaayim nyaj'úucim jada mayjäy? Com mijtigíduum ya nyajpaatim ma ca' pin chinäy.

⁵ Chi Jesús y'amidooy je' ydiscípulos ajcxy:

—¿Naag tzajcaagy miich ajcxy midity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen iñay'ahuuygixy naaxcixy. Huin'it Jesús conigy je huixtujcp tzajcaagy, e yajnaxxy Dioscojuyip ma Dios mid tzajcaagy ycixpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymid anajty nijëjity pi'c acx. Chi Jesús yajnaxxy Dioscojuyip ma Dios mid je pi'c acx ycixpi, e moy je' ydiscípulos ajcxy huen yajhuäcxtaygixy ma je mayjäy. ⁸ Chi je mayjäy nidüg'óciy ycaay cüxyi, e co ajcxy ycaayday, chi je Jesús ydiscípulos ajcxy yajpidigy huixtujc cach cayduc jicxtuc tiibi anajty yconaxy. ⁹ Jahueeni anajty ycamidaaxmility je jäy huidibi ajcxy cay uuc cüxyi. Chi Jesús ycapxy ycixy mid je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigiy mid ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg ijxpejt pijctzooob mijhuinma'ñybi

¹¹ Nijëjity fariseos ajcxy, je huindzindijc huidibi padumb judío ycostumbre, ymiiñ ajcxy ma Jesús yajpaady, e ytigiy ajcxy ijxquípcixy y'ixpijcin mid Jesús. Pijctzoogixy co Jesús huen yaj'ixyii ajcxy tüg ijxpejt huidibi tzomb tzajpjoty. Ijxta'n octunaangixy mid Jesús. ¹² Chi Jesús tajy may ñayjihuiiyi jotjoty huinma'ñyoty, chi ymicxejy, e ymíañ:

—¿Na'amy co jada jäy ajcxy huidibi jugy'ajtp cham, pijctzoogixy ijxpejt huidibi tzomb tzajpjoty? Janch ich miich nimaaygixy co ca' nyaj'ixaangixy ijxpejt huidibi tzomb tzajpjoty.

¹³ E Jesús ytimycapxycixy mid je fariseos ajcxy, e chi puyöyduuty ajcxy. Chi Jesús ybarcotigiy, e ñicxy mid ydiscípulos ajcxy ma mij laguun ñinaxy.

Fariseojäy ajcxy yaj'ixpijcin

¹⁴ Je' ydiscípulos ajcxy ti anajty jaydigoygixy je jicxy picy co ajcxy ybarcotigiy. Jëyi ajcxy mimiñ tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e ymíañ:

—Ca' mmijpidaaccixy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huidibi ca' y'óyity.

¹⁶ E je Jesús ydiscípulos ajcxy nimiydaaccixy Jesús y'ayuc ñayñimáayigixy ajcxy miñ xyipy:

—Je' co ca' ich ajt nmimiinim caayin uucin.

17 E Jesús ñejhuuyb anajty nej je' ydiscípulos ajcxy ñayñimaay; miñ xyipy, paady ymíñañ:

—¿Na'amy co mdzachnimiydaaccixy je caayin uucin huídibi ti mjäydi gooygixy? ¿Nej ca' mhujñihuiygixy e ca' mguenditungixy ñich n'ayuc? ¿Nej co ajcxy mdzachcöjuuñity? 18 Miich ajcxy mñid mhuiin: ¿Nej co ca' m'ijxcixy huídibi ndumybich? Miich ajcxy mñid mdädzac: ¿Nej co ca' mmido'mbíjccixy ñich n'ayuc? ¿Nej co ca' mjäyméjtzcixy ti ti nduñich? 19 Jayhuin co ndujc-huäcxyich je migooxpí tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidígy?

Chi ajcxy y'adzooy:

—Hue' ñich ajcxy nyajpidígyich majmetz cach cayduc jicxtuc.

20 Chi Jesús ymíñañ:

—E jayhuin co ndujc-huäcxyich je huixtujcpí tzajcaagy, e nyajcaayich mídaax mil jäy: ¿Naag cach cayduc ti ajcxy myajpidígy?

Chi ajcxy y'adzooy:

—Hue' ñich ajcxy nyajpidígyich huixtujc cach cayduc jicxtuc.

21 Chi Jesús ymíñañ:

—¿Nej chambaad miich ajcxy ca' mhujñihuiy?

Jesús yajtzögy tüg jäy huintzpi jim Betsaida

22 Jesús etz ydiscípulos ajcxy oy yjá'tcixy jim Betsaida. Jim Betsaida nijéjity jäy mñid miiñ ma Jesús tüg huintzpi, e pijctzoy ajcxy may'ajt co huen nidoñ jigix je huintzpi y'ijxigipy. 23 Huin'it Jesús huixtztzooñ je huintzpi ma yci', chi mñid cajppidzimy. E chi Jesús yajjaaxy yi chujyñi je huintzpi yhuin, etz cñixajy, e chi amidoy pen y'ijxpy anajty tigati yinjaty huenjaty. 24 Chi je huintzpi huindicxpejty Jesús, e nimay:

—N'ijxypich yëdijctijc, e jadu'n ajcxy yquëxígy nej quipy, per yöyp ajcxy.

25 E jadüg'oc Jesús yci' pidacy ma je huintzpi yhuin, e chi je huintzpi yhuindicxpejpty anajty, e chi yhuin y'oyñy yajxon, huin'it oy huadz y'ijxy.

26 E Jesús ycapxycíjxy mñid je', e quejxhuimbijty ma ytijc. Chi ymíñañ:

—Ca' mdigihuij cajpjoty, e ni pin jada mgayajmñidmíydägipy.

Pedro capxpidzimy co Jesús yi' je' je Cristo

27 Chi Jesús ñicxy mñid ydiscípulos ajcxy jim ma nijéjity mutz cajp mihuingon je mij cajp Cesarea Filipo. E tü'am Jesús amidoy ajcxy ydiscípulos, nimay:

—¿Nej jäy ymíñaangixy pin ñich?

28 Chi ajcxy je' ydiscípulos y'adzooy:

—Nijéjity jäy ymíñaangixy co miich je' je Juan, je Bautista. E nijéjity ymíñaangixy co miich je' je Elías. E jacjadyii ymíñaangixy co miich je' tüg Dios y'ayucnajtzcaxñybi huídibi tügñyb mñid nijéjity Dios ytiy'ajtmñidpi huídibi tzinaay jecy'ajty.

29 Jesús y'amidooy je' ydiscípulos ajcxy:

—Miich ajcxy, ¿nej miich mmíñaangixy pin ñich?

Chi Pedro y'adzooy:

—Miich je' je Cristo.

30 Chi Jesús nimay je' ydiscípulos ajcxy co ca' huaad ni pin nimaaygixy, co yi' je' je Cristo.

Jesús capxpidzimy co y'ögañ

31 Chi Jesús jacyaj'ixpijcy je' ydiscípulos ajcxy, e ymíñañ:

—Copicy co ñich, je jäy huídi tzoon tzajpjoty, nyajnaxipyich mij tzaachpyi etz mij ayo'n. Yi mijjäydijc ajcxy, yi judío teedy mijtungmñidpi, etz yi escribas,

je huindzindijc huídibi nįjayduutćixyp Dios necy, ca' ajcxy xy'ixa'ñich, e xyaj'öga'ñ ajcxy, e codugüig xii njugypigipyich jadüg'oc co ñich anajty ti n'ögy. ³² Co Jesús jadu'n nigapxy nimıydacy huädz huädz nej yjada'ñyii anajty, chi Pedro huobıbzımy Jesús ahuingujc, chi ooy ooy. ³³ Chi Jesús ni'ijxhuımbıjty ydiscı́pulos ajcxy, e ooy je Pedro, ñımay:

—Huinhuäctıutćich, miich Satanás. Com miich ca' mhıinma'ñ mbıdägy nej Dios tzocy. Yi' janchtıy miich mhıinma'ñ'ajtpy nej jäy ajcxy tzocy.

³⁴ Huin'ıt Jesús huoomıñ yi' ydiscı́pulos ajcxy etz yi mayjäy, e chi nımay:

—Pen ji pinjaty xypanıćxa'ñich, huen jäydgoydäy yci'mdzójcin etz huen xypanıćxich jabom jabom. Oy nej ytimyjadıpy ytimy'ayoohuıpy. Jadu'n nıpaady nej jıhuıy ajcxy anajty mgruudz mgabıccıxy, etz naygıyėjcıgıxy ma yi ó'cin huen ytimyñėjıty mıid ñich ycıxpi. ³⁵ Huenpinjäy huídibi ca' yega'ñ yi yjugy'ájtın ma yi ó'cin mıid ñich ycıxpi, hue' je' yajtıgoyamy yi'yjugy'ájtın. E huenpinjäy huídibi yegamy yjugy'ájtın ma yi ó'cin mıid ñich ycıxpi etz ñich y'ayuc oybı ycıxpi, hue' je' ypadamyb yi jugy'ájtın huídibi ca' cıxıpy tıgoyıpy ni mınaa. ³⁶ ¿Ti oy'ájtın yi' co tüg jäy y'ocnayıajpadıy y meeñ etz mıc'ájtın (huıdi yajpaatp ya ñaaxhuiñybi) e y'alma yjugy'ájtın cıxıpy tıgoyıpy tügćıy? ³⁷ ¿Jadu'ñyi jėb jäy y'alma yjugy'ájtınoccojuyı? Nıgi tzoohuın mııdıty jäy ajcxy y'alma yjugy'ájtın, ca' jac ti. ³⁸ Huentımpıńıty yi huídibi xymıdzo'ydúnıbıch yi n'ayucıch ndıy'ájtıch ma yi pocyjäyđıjć yhuınduu huídibi tziıaayb cham ma jada naaxhuiñybi. Pues nañ jadu'n ñich, je jäy huídibi tzoon tza-jpıoty, nmıdzo'ydúnıbıch yi jadu'mbı jäy co ñich anajty nhuımbıty ya naaxhuiñybi mıid ñich nDeedy, je Dios Teedy, ymıc'ajt y'oy'ajt etz mıid tüg'ócıy yi may'ángeles ajcxy tudägypı.

9

¹ Jadu'n Jesús yjacmınañ:

—Janch tıy'ajt jadu'n nej ñich miich ajcxy cham nımäy, co nıjėjıty miich ajcxy huídibi cham ma ñich nhuınduu, ca' m'ögaangıxy, ıxtı coonı ajcxy jayıjp m'ıxıpy je Dios y'ané'mın etz ymıc'ajt.

Co Jesús ñinıćx yajtıgajch

² Co tuctujc xii naxy, chi Jesús mıid tzoon Pedro, Santiago etz Juan, e mııdpa'ttıgıy ma tüg mııcop ma tüg it ooy ycıxıty. E jım copcıxy Jesús ñinıćx naygojtıgajtznı ma Pedro ajcxy yhuınduu. ³ Chi Jesús yhuıt oy y'ahuımbıty janch poob, e janch adıćxp. E ni pin jadu'n yhuıt cayajhuäch janch poob jadu'n nej je' anajty yhuıt mııdıty. ⁴ E chi oy nayguėxıgyıı ma ajcxy yhuındu Elıas etz Moısés. Elıas etz Moısés mıydacp anajty ajcxy mıid Jesús. ⁵ Huin'ıt Pedro nımay Jesús:

—Huındzın, janch oy jadu'n co ñich nyáajıty. N'occojyıch ajcxy tugıg tıjćquemy: tüg miich mje'; tüg Moısés yje'; etz tüg Elıas yje'.

⁶ Com Pedro, Jacobo etz Juan ooy anajty chıgıygyıxy, paady Pedro ca' anajty nejhuıy ti ycapxyp. ⁷ Tım huın'ıtıy tüg joc yajnıdıgoy je' ajcxy, e mıdooy ajcxy ayuc jocıoty, e je ayuc ymınañ:

—Jada je' ñich n'ung, huídibi ooy ndzocyıch. Mıdo'mbıc miich ajcxy Jesús y'ayuc.

⁸ E tım huın'ıtıy Pedro, Jacobo etz Juan ajcxy yujc'ıjxy, e yja'ıjxhuıdıjty ajcxy, e ca' ni pin ma ocjac'ıjxnı, jėda'ajty Jesús naydügıajc.

⁹⁻¹⁰ Tı anajty choongıxy copcıxy, e cidacp anajty ajcxy, co Jesús nımay Pedro, Jacobo etz Juan, co ca' huaad yajmııdmıydaaccıxy pinjaty huídibi ajcxy

anajty ti íjxcixy, ixti cooni ñich, je jäy huídibi tzoon tzajpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacmíydägy mïd jacpínjaty huídibi anajty ti íjxcixy. Per ooy ajcxy huinmay etz naymïdmíydáacígixy miñ xyípy ti Jesús ytijamy co ymínañ: “N'ögibich etz njugypigipyich jadüg'oc.”

¹¹ Huin'it ajcxy Jesús y'amídooy:

—¿Na'amy co yi escribas ymínañ co yi Elías huídibi chinay jecy'ajty jayíjp miínañ ca'ydí je Cristo?

¹² Chi Jesús y'adzooy:

—Tíy'ajt jadu'n co miñ jaybety ma Dios ñecy jecy'ajty co Elías yhuimbidity jacjayíjp ca'ydí je Cristo, e yaj'oyíydáhuípy huinjemybi tüg'ócíy mïd Dios ycíxpi. E nañ tíy'ajt jadu'n co jaybety ymíñ ma Dios ñecy co je Cristo, je jäy huídib tzoon tzajpjoty, yajnaxañ ayo'n etz tzaachypí etz mayjäy ca' y'íxa'níby. ¹³ ñich miích ajcxy nimaayb co je Elías ti je' yhuimbity ya naaxhuiñ, e je mayjäy ti túngixy mïd Elías nej anajty tím tzójcixy. E cuyduñ ajcxy nej jaybety miíñ ma Dios ñecy mïd Elías ycíxpi.

Jesús yajtzögy tüg mutz'anäg huídibi ca'oybi mïd

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhuí'míy, chi ajcxy íjxy mayjäy jühuidity ma Jesús ydiscípulos ajcxy. Etz íjxy ajcxy nijéjity escribas huídibi ayuc tzachyajtzyb mïd Jesús ydiscípulos ajcxy. ¹⁵ E co je mayjäy íjxcixy nejhuygixy co Jesús ti yhuimbity anajty, chi mic'amy ajcxy ninícxí Jesús poyígy, e capxpooxcixy, e may je' ajcxy ooy jíhuíy huinmay. ¹⁶ Chi Jesús y'amídooy je mayjäy, nímay:

—¿Ti ayuc miích ajcxy mdzachyajyomyb mïd ñich ndiscípulos ajcxy?

¹⁷ Chi nidüg je jäy ajcxy y'adzooy:

—Huindzín, ti nmídmíñ ñich nmang huídibi ymíd ca'oybi, e je ca'oybi ti yaj'umíyíi. ¹⁸ E janam jadojic je ca'oybi yajyachyíi yajquídyíi ñich nmang, e oy cäy naaxcíxy, e ooy y'aa'opy ypidzímíy, e nañ jadu'n oy ytíitz queety etz ñinícx janch ögy yhuí'míy. Ti nbíjctzoyích may'ajt mïd miích ndiscípulos ajcxy co huen yajpidzímíxíy je ca'oybi ma ñich nmang, e ca' ajcxy ymadacy nícxí yajpidzímíxíy.

¹⁹ Jesús nímay je mayjäy:

—Miích ajcxy huídibi jugy'ajtp jadachambi xíi tiempo huídibi ca' mípíädägy Dios y'ayuc, ¿naag xíi naag po' ñich njac-huí'mmíhuíbich mïd miích ajcxy? ¿Naag xíi naag po' n'ocmímecxtuguípích miích ajcxy? Mídmíin yí mmang ya ma ñich nhuínduu.

²⁰ Chi ajcxy mídmíñ je pa'mjäy ma Jesús yhuínduu. E co je ca'oybi íjxpaady Jesús, chi mic'amy yajyajch yajquídy je pa'mjäy, e chi oy cíday naaxcíxy, e ooy yajch yquídy, yajpidzímíy ooy y'aa'opy ma y'ahuac. ²¹⁻²² Jesús y'amídooy je pa'mjäy yteedy:

—¿Mínaag jíimíjt cujc yöy maabi mmang ypa'mbety?

Chi je ungedeedy y'adzooy:

—Ma'xung anajty co pa'mbedyíi. Canaag'oc je ca'oybi yajyachyíi yajquídyíi ñich nmang, ixti ti oy ycogídahuíy jíinjoty etz níijoty. Je ca'oybi canaag'oc jayaj'ögy ñich nmang. Pen miích mïd tzóc'ajt mic'ajt jaydéb xypubedípyích, tun may'ajt pa'ayoogích etz pubejtcích.

²³ Chi Jesús y'adzooy nímay je pa'mjäy yteedy:

—Pen miích míbijcpi, ca' ti chípíty ma pín míbijcp.

²⁴ Mic'amy je pa'mjäy yteedy mic'ycapxy ymínañ:

—Nmíbijcyích, pubéjtcích nej huaad jacmíj nmíbicyích.

25 E co Jesús ijxy co nīgi mayjäy chach ymiñ poyigy ma yí', chi ix'ojy je ca'oybi, e ymiñañ:

—Miich ca'oybi huídib ti yajhui'my jada pi'c'anäg uum etz nat, ich miich yam n'ane'myb: “Pidzim ma yí pa'mjäy, e ca' mjactigihuiipy ma yí yjot yhuinma'ñ jadüg'oc.”

26 Jayijp je ca'oybi yaaxqueecy janch mic, yajyajch yajquidy je pa'mjäy. Co jadu'n tuñ, chi ypidzimy. Je pa'mjäy oy ñinix yhui'my nej jihuiy ti y'o'cni. Je mayjäy huídibi anajty ajcxy jim huindixp ymiñangixy:

—Ti ayooob y'ögy.

27 Chi Jesús majtz je pa'mjäy yci', e yajpidigy e huin'it je pa'mjäy ytinayigy mic oy.

28 Co Jesús ytigiy ma tüg tijc, chi je' ydiscípulos ajcxy y'amidou ameech, miñañ ajcxy:

—¿Na'amy co ich ajcxy ca' ti nmadägyich nej nyajpidzimip ich ajcxy yí ca'oybi?

29 Chi Jesús y'adzooy:

—Yijiibi ca'oybi ca' yí' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yí jadu'mbi ca'oybi, jeyi co Dios nmibijctzoohuim n'íjtim ayuu.

Jesús capxidzimnip jadüg'oc co y'ögañ

30 Chi Jesús miid yí' ydiscípulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjäy ñejhuihuib ma yí' ñicxy. 31 Com Jesús hue' anajty yaj'ixpicy yí' ydiscípulos ajcxy, co ooy ycopicyity co yí jäy huídibi tsoon tzajpjoty, yajcüyegipy ma yí ymidzip, etz yaj'ögüyb, e co anajty ti y'ögy codugüg xii jadüg'oc yjugypigipy. 32 Jesús ydiscípulos ajcxy ca' huinjihuiy anajty Jesús y'ayuc, e nañ jadu'n tzigüyb anajty ajcxy co Jesús yaj'ójip, paady ca' ajcxy amidoy nej huimbizimiy yijiibi ayuc.

¿Pín je' nīgi jacmijip?

33 E Jesús miid ydiscípulos ajcxy oyjäty jim Capernaum. Co ajcxy ytiictigy, chi Jesús yaj'amidou ydiscípulos ajcxy, nimay:

—¿Ti ayuc miich ajcxy naymiidmiydáacigixy jim ma anajty mdüoygixy?

34 Per amonday ajcxy, com jégixpi co anajty ajcxy ooy ti ñaymiidmiydáacigixy tüyoyjoty co pín jada' ajcxy nidügti ocjaccopicyip.

35 Huin'it Jesús y'ixtacy, e chi mijhuoy je nimajmetzpi ydiscípulos ajcxy, chi ajcxy nimay:

—Pín nayyajnaxaanip mij, huen ity nej jihuiy ca' ytiijity e huen capxmido ymigügtijc.

36 Chi Jesús tzenigy tüg pi'c'anäg, e chi pidacy cujc'amy ma yí' ydiscípulos ajcxy. Chi tzenigy jadüg'oc, e nimay ajcxy:

37 —Pín cöbije tügpajc pi'c'anäg jadu'n nej jada pi'c'anäg miid ich nxi ycipi, ich yí' anajty ti xycöbicyich, e pín ich xycöbijcpich, ca nan ich anajty naydügpajc ti xycöbijcyich, nañ jadu'n anajty ti cöbicy huídi ti xyquejxich.

Pín ich ajt xycamidzip'ájtím, ich ajt je' miid y'ity

38 Juan Jesús nimay:

—Huindzin, ti ich ajcxy n'ijxpaady tüg jäy co ca'oybi yajpidzimiy miid miich mxii, e ti ngapx'aducyich miid co ca' yí' ich ajt xypahuídíjtim.

39 Per Jesús ymiñañ:

—Ca' mgapx'adugipy yi jadu'mbi jäy, com huenpínity huidibi mijhuinma'ñ tumb miid ñich nxii, ca' yi' jibic xyñigapxich. ⁴⁰ Com yi' huidibi ajt ca' xymidzip'ájtím, yi' yi' miid ñich ajt nbidzimim. ⁴¹ Janch janch ñich miich ajcxy jadu'n nimäy co huenpinjäy huidibi ixypy miich ajcxy xyajñi'uucp tüg vaso ñi' miid co miich ajcxy ti mmijnicxpety je Cristo, yi' jadu'mbi jäy ypadamy yi' y'oy'ájtín ma Dios.

Je huidibi ooy ycojotmáiyty co nicxy nbocycáhuim

⁴² Huenpínity huidibi jibic-huinma'ñ mibidzim, e yajpocycäy yi' jadu'mbi pi'ctijc huidibi ajcxy xymijnicxpejtpich, jac'oy ixypy co yi' jadu'mbi jäy ytimyñayajyöcxodzyii tüg paandzaa etz ñayñajtzjibibihuyb mejyoty. ⁴³ Pen miich mgi' xyajtundigoyamb jac'oy co mdim'ixpuxipy, com jac'oy co mdigihuipy ma yi' jugy'ájtín huinixibi ciduc, ca'ydí co Dios xypidägip miid metz mgi' jii'by jijnoty ca'oydactuuby, ma yi' jijn ni camina ycapich. ⁴⁴ Jii'by ca'oydactuuby yi' ucxyting ca' y'ögy etz ni jijn ycapich nicaminaaxii. ⁴⁵ E pen miich yi' mdecy xyajpocycáhuamb, ixpux, com jac'oy co mdigihuip ma yi' jugy'ájtín huinixibi tecytuc ca'ydí co mdigihuip miid metz mdecy jii'by ca'oydactuuby, ma yi' jijn ni camina ycapich. ⁴⁶ Jii'by ca'oydactuuby yi' ucxyting ca' y'ögy etz ni jijn ycapich ni caminaaxii. ⁴⁷ E pen yi' mhuiin tüg xyajpocycáhuamb, tím yajpidzim, jac'oy yi' co mdigihuip ma yi' Dios y'ane'mdac miid tügpajc mhuiin, ca'ydí co mdigihuip ca'oydactuuby miid metz mhuiin. ⁴⁸ Ma yi' ucxyting ni caminaaxii yca'ögy etz yi' jijn ni caminaaxii ycapich, ⁴⁹ e ma nidüg'óciy ñi'cágooda'ñ jijn xut jijn ye'n tím jadu'n nej jäy tzüch caan xiducy. ⁵⁰ Yi' caan ooy yi' y'óyity, pen ymiid xücx'ájtín. Co je caan ytigoy yxücx'ájtín, ca' ji' ni ti' huidibi jeb miid nyajxücxiiyim. Miid'ájtíx ñich n'ayuc ma mjot mhuiinma'ñ, jadu'n ñich n'ayuc nipaady nej caan, e tzina' miich ajcxy jotcuyc miid mmigügtijc nidüg nidüg.

10

Jesús yaj'ixpi'cy miid co jäy ytöxyijc ixmach

¹ Chi Jesús chooñ jim Capernaum, nicxy jim Judea ñaaxjot ma je it lugar Jordán mijñi' ninaxy xii ypidzimy'amy. E mayjäy ooy ñayyöymujci ma Jesús anajty yajpaady. E Jesús yaj'ixpi'cy je mayjäy jadu'n nej anajty yaj'ixpi'cy'adyii. ² Chi nijëjity fariseos ajcxy ñicxy ma Jesús anajty yajpaady. Hue' ajcxy yhuinma'ñ pidaaccixy co anajty Jesús tzu'ixaangixy. Chi ajcxy y'amidooy, pen huaad tüg yëydijc ixmach ytöxyijc. ³ Chi Jesús y'adzooy, yminañ:

—¿Nej Moisés ymina'ñ ma yi' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tüg yëydijc jeb huaad ixmach ytöxyijc, e möhuipy ñinecy ñidiy'ajt co nej ñay'ixmájtzigixy, e jadu'n anajty ti' y'oyiy nej jeb yi' ytöxyijc ixmach.

⁵ Chi Jesús yminañ:

—Moisés cojaay jada ycötújcín miid miich ajcxy ycipi, co ooy miich ajcxy mdzachcapxycömídodaaccixy ca' mgapxymídohuaangixy Dios. ⁶ Per co je naaxhuiñybi chondacy, co Dios oga'n yajcojy tüg'óciy tijaty huidi ji'ajtp, chi Dios yajcojy yëydijc etz töxyjäy. ⁷ E je yëydijc ixmadzipy ytaj yteedy etz pudigihuipy yi' ytöxyijc. ⁸ E je yëydijc etz ytöxyijc tú'ciy idaangixy. Paady je yëydijc tügmucy yajpaady miid ytöxyijc. ⁹ Com yi' huidibi Dios ti' huijtzmucy, ca' ni pin huaad huijtzhuägy.

¹⁰ Co Jesús m̄id ydiscípulos ajcxy yhuimbijt ma anajty ti yjättáccixy, chi Jesús ydiscípulos ajcxy yajtihuimbijtcixy je ayuc huídibi anajty ti yaj'ixpicy ma je píjcin. ¹¹ Chi Jesús ym̄inañ:

—Je yēydijc huídibi ti ixmach yi ytōxyijc, e picy m̄id huingbi, hue' yi' anajty ymidundigooyb yi ytōxyijc huídibi m̄id jayijp ypijcy. ¹² Nañ tim jadu'n co tūg tōxyjāy ixmach je yēydijc huídibi m̄id ti ypijcy jayijp, e ypijctigach m̄id huingbi yēydijc, hue' ymidundigooyb je yēydijc huídibi m̄id ti ypijcy jayijp.

Jesús conucxy pi'ctijc

¹³ Je huin'it tiempo jāy ajcxy m̄id miñ pi'ctijc ma Jesús, jaydēb c̄in̄ixajy etz conuucxip. Co Jesús ydiscípulos ajcxy jadu'n ijxy co jāy ajcxy nimijhuāgy Jesús m̄id ajcxy ypi'c'ung, chi je' ydiscípulos ajcxy ix'o'jy je jāy ajcxy. ¹⁴ Co Jesús jadu'n ijxy nejhuñy nej yi' ydiscípulos ajcxy y'idich, chi o'jy ajcxy, ym̄inañ:

—Ooy y'óyity co je pi'ctijc ajcxy xyñimijhuāgyich, ca' miich ajcxy mgapx'aducy. Com yi jāy ajcxy huídibi yajpatp ma Dios y'ané'min, jadu'n ajcxy nipaady nej pi'ctijc. ¹⁵ Janch ich miich ajcxy nimāy co pinjaty huídibi ca' cōbigañ Dios y'ané'min, jadu'n nej pi'ctijc cōb̄ijccixy Dios y'ané'min, hue' yi' jadu'mbi jāy ajcxy ca' ytigihua'ñ ma yi Dios y'it lugar.

¹⁶ Chi Jesús am̄inenmujctay je pi'ctijc ajcxy, e chi c̄in̄ixajiy etz conuucxcixy.

Tūg mutz'anäg comeñybi ym̄ydägy m̄id Jesús

¹⁷ Co Jesús chooñ jadüg'oc, chi ñimiini poyigy tūg yēydijc, ycojxtinay'ahuñy ma Jesús yhuinduu, e ym̄inañ:

—Miich, oybi Huindzin, ¿ti huaad ndunipyich jigix jēbi nbadipyich jugy'ájtin huídibi ca' ycixipy ytigoyipy?

¹⁸ Chi Jesús ym̄inañ:

—¿Na'amy co xyñimāyich co oy huindzin ich? Dios tūgpajc óyip, ca' jac ni pin. ¹⁹ Miich mnejhuñyb Dios ycōtújcin huídibi jadu'n m̄inaam: “Ca' mm̄igapxtigoyip tōxyjāydijc; ca' mjāyay'ōgipy; ca' mmeedzip; ca' m'ñndaacip; ca' pin mhuin'ñip; etz myajmij'adip mdaj mdeedy.”

²⁰ Chi je jāy Jesús nimay:

—Huindzin, ti nguydundāyich jadyaab cōtújcin ajcxy maabi ich nbi'c'atyich.

²¹ Chi Jesús huindixpejty je yēydijc m̄id tzójcin jihuñyin, e chi nimay:

—Per jactigoy'ijtni jadūgnax. Nicx toog tūg'óciy huídijaty miich mm̄id, etz mo' yi' ayoobtijc. Co jadu'n mdunipy, chi mbaadipy oy'ájtin jiiby tzajpjoty. Co jadu'n mdooctāhuipy tijaty miich m̄id, chi minip jadüg'oc ma nyajpaadyich, e xypanicxibich, e mnaybidāḡiib cixyjot huinjot oy nej md̄imyjadipy m̄id ich ycixpi.

²² Co jadu'n je yēydijc midoy nej anajty Jesús ti ñimāyii, chi yhui'my taj may e co ñicxni, chi ooy ytajy ymay, com hue' je' anajty ooy ycomeñity.

²³ Co Jesús jadu'n ixxy co je comeñybi taj may yhuimbijtni, chi huindixpejty je' ydiscípulos ajcxy huídibi tinaayb jūhuídity ma yi', e ym̄inañ:

—Ooy chachtzipity co tūg comeñybi ytigihuiipy ma Dios y'it lugar.

²⁴ Jesús ydiscípulos ajcxy ooy tzachhuinmay'ahuídity m̄id jada ayuc nej Jesús anajty ti ym̄inañ. Paady Jesús yjacm̄inañ jadüg'oc:

—Miich ajcxy migügtijc huídibi ooy ndzocyich, ooy chachtzipity co ytigihuiip ma Dios y'ane'mdac tūg comeñy jāy huídibi tzachnijot'ajt ycomeñ'adii. ²⁵ Nigi chípity co tūg comeñ jāy ytigihuiip ma Dios y'ane'my, ca'ydi co tūg camello ñaxipy ma tūg xu'ñ'ijx yxūtity.

²⁶ Co jadu'n ajcxy midoy nej Jesús ym̄inañ, chi ooy ajcxy yhuinmay'ahuídijty, e nayñimāyigixy miñ xyipy:

—Pen janch t̄y'ajt jadu'n, ¿pinj̄y jada' huaad j̄eb y'alma ñ̄dzöḡipy?

²⁷ Je huídibi j̄y ajcxy ca' ni minax̄i huaad ca' yaj'oȳy, Dios ȳi' yaj'oȳihuip, com m̄id Dios ca' ȳi' ni ti chíp̄ity.

²⁸ Chi Pedro ym̄inañ:

—Huindz̄in, occuend̄tun, ñ̄ch ajcxy ti n'ixmajtzt̄äȳich t̄üg'óc̄y tijaty anajty nm̄id̄ich, e ñ̄ch ajcxy nban̄icxp̄ich miich.

²⁹⁻³⁰ Chi Jesús y'adzooy, minañ:

—Janch t̄y'ajt nej ñ̄ch miich ajcxy n̄im̄äy co huenp̄in̄ity huídibi m̄id ñ̄ch yc̄ixpi ti ixmach yt̄ijc, ti ixmach y'uch ym̄igüḡ ajcxy etz ytaj yteedy, etz yt̄öxyijc, etz y'ung ajcxy, etz nañ jadu'n ti ixmach ycam ñ̄ch yc̄ixpi, etz ñ̄ch n'ayuc̄ich etz m̄id Dios yt̄iy'ajt yc̄ixpi, ȳi' ypadamy n̄iḡi oy'ájt̄in ya naaxhuiñ, ixt̄i ypadamy m̄igo'px jadu'ñȳi yt̄ijc ajcxy, y'uch ajcxy, ytaj ajcxy, y'ung ajcxy, etz ypadamy n̄iḡi ym̄ij cam, m̄id tzaachyp̄i m̄id ayo'n m̄id ñ̄ch n'ayuc̄ yc̄ixpi. Etz nañ jadu'n ma je x̄i tiempo huídibi mimb cidacp̄i ypadamy jugy'ájt̄in huídibi ca' yc̄ixipy yt̄igoȳipy. ³¹ Ji yajpaady ya naaxhuiñ nij̄j̄ity j̄y huídibi cōmay ijtp, e co yj̄aty ajcxy tzajpjoty, chi ca' ajcxy cōmay ida'ñ. Nañ jadu'n ji yajpaady ya naaxhuiñ nij̄j̄ity huídibi ca' cōmay y'ity, e co ajcxy yj̄adipy tzajpjoty, chi j̄iiby ajcxy cōmay y'idipy.

Jadüg'oc Jesús capxp̄idz̄im̄ip co y'öga'ñ

³² Jesús m̄id ydiscípulos t̄yöyp anajty ajcxy, hue' anajty yp̄ättiḡiyḡixy j̄im Jerusalén. Jesús jaȳjp anajty ñ̄icxy, e je' ydiscípulos ajcxy etz nañ jadu'n mayj̄y pan̄icxy anajty ajcxy Jesús. Je Jesús ydiscípulos ajcxy ooy chachhuinmay'ahuíd̄j̄tc̄ixy, e jacjadyii j̄y huídibi anajty ypan̄icxy Jesús ooy ajcxy ch̄iḡiyḡixy. Chi Jesús huodzooñ ab̄icy je majmetzp̄i ajcxy, e yajm̄idm̄iydactay je' ajcxy jadu'n nej ytuna'ñȳi yjada'ñȳi j̄im Jerusalén co anajty ajcxy j̄im yja'tc̄ixy. ³³ Jesús je nimajmetzp̄i n̄imay:

—Miich ajcxy m'ijxpy mnejhūiyb co nn̄icx̄im cham j̄im Jerusalén. E j̄im Jerusalén, ñ̄ch je j̄y huídibi t̄zoon tzajpjoty, nyajc̄iyega'ñ̄ich mach ma ȳi Teedy m̄ijtungm̄idp̄i, etz ma ȳi escribas ajcxy. E chi ajcxy ane'm̄in pid̄äga'ñ co huen xyaj'öc̄ix̄ich. Nañ jadu'n xyc̄iyegaanḡix̄ich mach ma ȳi' ajcxy huídibi ca' yjudioj̄äȳity. ³⁴ Ȳi' ajcxy xyñ̄ix̄iḡipy xyajx̄iḡibȳich, xyhuob̄ipyich ajcxy m̄id coochac, xyhuindzuj xyj̄ijptz̄új̄ib̄ich ajcxy, e xyaj'öḡib̄ich ajcxy. Coduḡiḡ x̄i maabi anajty xyaj'öcc̄ixyich, chi njugyp̄iḡipyich jadüg'oc.

Jacobo etz Juan p̄ijctz̄óoḡixy t̄üg may'ajt

³⁵ Huin'it Jacobo etz Juan, ȳi Zebedeo ajcxy ymang, nim̄ihuägy Jesús, n̄imay:

—Huindz̄in, ndzojcpyich ajcxy co mdun̄ipy may'ajt jadu'n nej yam n̄imaayḡixy.

³⁶ E Jesús ym̄inañ:

—¿Ti mdzojcpy co ndunip̄ich m̄id miich ajcxy yc̄ixpi?

³⁷ Chi ajcxy ym̄inañ:

—Tun may'ajt co anajty mbaady ȳi m'ané'm̄in etz m'oy'ájt̄in, xym̄öhuib̄ich ȳi m̄ij tung ma m'ané'm̄in jayd̄eb n'ñ̄āhuib̄ich ma miich mm̄ijc. Nidüḡti ñ̄ch ajcxy n'ñ̄āhuipy a'oy'amy ma miich etz jadüḡ anajty'amy.

³⁸ Chi Jesús n̄imay Jacobo etz Juan:

—Ca' miich ajcxy mnejhūiy ti ti mb̄ijctz̄ooḡixy. ¿Nej myajnaxamyb miich ajcxy je tzaachyp̄i ayo'n huídibi nyajnaxaamyb̄ich, jadu'n nej j̄ihūy m'üga'ñ ajcxy ñ̄ch n'üḡy e mbaada'ñ ajcxy ñ̄ch nn̄ib̄éjt̄in?

³⁹ Jacobo etz Juan y'adzooy:

—İch ajcxy nmımadägıbıch mıanaxıpyıch nyajıanaxıpyıch ajcxy yı tzaachypı huıdıbı mınaxamyb myajıanaxamyb.

Chi Jesús ymınañ:

—Janch tiy'ajt jadu'n nej mııch ajcxy mına'ñ co mınaxaangıxy myajı-naxaangıxy yı tzaachypı jadu'n nej İch mınaxaamyıch nyajıaxaamyıch yı tzaachypı, tım jadu'n nej jıhuıy m'ügaangıxy İch n'ügy, e mbadaangıxy İch nııbéjtın. ⁴⁰ Per ca' İch cötújcin nmıdıdyıch co İch mııch ajcxy nbıdägıpy tungmıd, co myajpaadıp tüg ma İch nmıjc a'oy'amy, e jadüg anajty'amy. Hue' janchtıy Dios Teedy ymıd ni'ixı' pınjaty tı huın'ıxy jaydeb yajıncıxp je mıjtung ma İch n'ané'mın.

⁴¹ Co je jacjadyıı Jesús ydiscıpusos ajcxy nejhuıy jadu'n nej Jacobo etz Juan may'ajt pıjctzoy ma Jesús, chi ajcxy ooy mıjotmäty Jacobo etz Juan. ⁴² Per Jesús huomiñ yı jacjadyıı ydiscıpusos ajcxy, e ymınañ:

—Jadu'n nej mııch ajcxy mnejhuıygyxy, yı jäy ajcxy huıdıbı mıjtungmıd ma je maybı naax cajp, mıc ajcxy ane'my je naax cajp. Nañ jadu'n yı' ajcxy huıdıbı mıc'ajt mıd ma je maybı naax cajp, mıc ajcxy ane'my je jäy ajcxy. ⁴³ Per mııch ajcxy ca' mjadú'nıty nej mıjtungmıdpy ma je maybı naax cajp. Pınjaty ma mııch ajcxy mıjtung yajıncıxaamb, copıcy ñaybıdägıyb nej tüg tumbı. ⁴⁴ Pınjaty mııch ajcxy huıdıbı nıgohuajc'ajtp, copıcy ñaybıdägıyb nej tüg tumbı. ⁴⁵ Com İch nañ jadu'n, je jäy huıdıbı tzoon tzajpjoty, tı nmııñıch ya naaxhuıñ jaydeb nbubedıpyıch yı mayjäy ajcxy, e ca' nan yı mayjäy İch xypubedıpy. Tı nmııñıch jaydeb nyegıpyıch njugy'ájtın ma yı o'cin. E co jadu'n nyegıpyıch njugy'ájtın ma yı o'cin, chi ngohua'na'ñıch yı jäy ajcxy y'alma.

Jesús yajtzögy Bartimeo huıdı anajty huıntzıp

⁴⁶ Chi oy jäty Jesús mıd ydiscıpusos ajcxy jım Jericó. E co Jesús tzoon Jericó ytübıjcy jadüg'oc, chi yı' ydiscıpusos ajcxy etz janch mayjäy ñıcxıxy anajty mıd Jesús. Co ajcxy ycajp pıdzımy, chi tıba'ay anajty yajpaady tüg huıntzıpı huıdıbı limosna anajty ypıjctzooyb jabom jabom. Hue' anajty yxıı Bartimeo, e Timeo anajty xıjıty yı' yteedy. ⁴⁷ Co Bartimeo nejhuıy co Jesús je Nazaretpı najxp anajty ma je tü'aa, chi mıc yaaxqueegy ymınañ:

—Jesús, David y'ap y'oc, tun may'ajt İch pa'ayoog.

⁴⁸ Chi je mayjäy ajcxy ogy je huıntzıpı, nımay ajcxy co huen amon. Per je huıntzıpı nıgy ymınan'ıdıch:

—Mııch, David y'ap y'oc, tun may'ajt İch pa'ayoog.

⁴⁹ Chi Jesús ytınayxıjpy, e ymınañ:

—Huomiıngıx yı huıntzıpı.

Chi je jäy ajcxy oy yajtzoongıxy je huıntzıpı, nımaaygyxy:

—Jotcugı', e pıdıg, com Jesús xyaaaxtzoob.

⁵⁰ Chi mıc'amy je huıntzıpı, najtz'oxıy je ñıbe'ñ, chi ypıdıgy, e nıncıxy Jesús.

⁵¹ Chi Jesús je huıntzıpı y'amıdooy:

—¿Tı mdzojcpy ndunıpyıch mıd mııch ycıxpı?

Chi je huıntzıpı ymınañ:

—Huındzın, ndzójcpyıch co xyajhuındıcxıgıbıch.

⁵² Chi Jesús je huıntzıpı nımay:

—Jeb mncıxy ma mdıjc. Com tı xymıbıcyıch, paady tı mhuındıcxıgy.

Tım huın'ıt je huıntzıpı yhuın'oyıy, e yhuındıcxıgy, e panıcy Jesús co ytübıjcy jadüg'oc.

11

Jesús ytıgy jım Jerusalén

¹ Co Jesús etz je mayjäy oyjá'tcixy huington ma je Jerusalén cajp ma yajpaady mejtz mutz cajp huidi xiijipy Betfagé etz Betania, huington ma je cop huidibi xiijip Olivos, chi Jesús quejxy metz ydiscípulos huen nicxy jayijp. ² Jesús nimay je metzpi ydiscípulos:

—Nicx miich ajcxy ma yijimbi cajp huingtonbi. Co jim mjädipy, chi mic'amy mbaadip tög burro ycoxóchity huidibi ca' pin yaj'iñayñi chambaad. Coguetuutcix je burro e yajmiingix ya ma ich. ³ Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mmimähuipy: “Je Huindzin (Jesús) yajtunamyb tzojc, e yajhuimbidamy mic'amy.”

⁴ Chi je metzpi ydiscípulos ñicxy ma je cajp huingtonbi, e oypaatcixy tög burro ycoxóchity huington ma tög tijc'aguu. Chi ajcxy coguetuuty je burro.

⁵ Ycoguetuutyp anajty ajcxy je burro co nijëjity jäy jim huington yminañ:

—¿Ti mdungixyp? ¿Na'amy co mgoguetuutcixy yi burro?

⁶ Chi je metzpi Jesús ydiscípulos je jäy ajcxy yajmüdmüydacy Jesús y'ayuc nej anajty ti ñimäyii. Je jäy ajcxy yminaangixy co jëb yajnicxcixy je burro.

⁷ Mic'amy ajcxy mija'ty je burro ma Jesús yajpaady. Je Jesús ydiscípulos ajcxy jibeñ je burro ajcxy müd yjocxhuit, chi Jesús yaj'iñay je burro. ⁸ Mayjäy ajcxy ooy yëby yhuit tögujc ma Jesús anajty ñaxa'ñ, e jacjadyii jäy pujxy ajcxy quipy'aacx, e pidaaccixy tögujc.

⁹ Je mayjäy huidibi anajty ajcxy nicxp jayijp etz axam ma Jesús, chi ajcxy ytigüy capxp mic, yminaangixy:

—¡Hosana! ¡Gloria a Dios, ooy ycomáyity Dios! Huen capxpaady y'idipy jada yëdyjc huidibi mimb müd yi nHuindzin Dios yxii etz ymic'ajt. ¹⁰ Huen capxpaady y'idipy je ané'min huidibi jada Jesús yajtzondacp cham. Jada je' je ané'min huidibi nmij'ap nmijteedy David anajty ymüd. Hosana, huen je tzajpjoty tzinaayb ajcxy iibaatcixy capxpaatcixy jada mij'ane'mbi.

¹¹ E jadu'ñyi Jesús ycajptigüy jim Jerusalén, e ytigüy tigoty ma Dios ytijc. Co huindixtay tög'óciy tijaty jüby tzajtigoty, chi chooñ jüby, e ñicxy jim ma je cajp huidibi yxii Betania. Chi Jesús je majmetz ydiscípulos ajcxy müdnicxy.

Jesús capxocy je higueri ca'pi anajty ytiim

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús ijxpaty jigügy tög higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ymüd ytiim. Co Jesús ymech ma je higueri, chi ijxy co je higueri ca' anajty ytiim müdity, jëyi müdity anajty y'aay, com ca' anajty ni tiempity mina higo ytiim'aty. ¹⁴ Chi Jesús migapxy je higueri nimay:

—Jadu'n nej tiempo yjacnicxni, ni pin cajacpaadipy higo tiim ma miich.

Chi Jesús ydiscípulos ajcxy midoy nej Jesús nimay je higueri.

Jesús quejxidzimdiay ajuybi adoocpi ma Dios ytijc

¹⁵ Co ajcxy oy yjädy jim Jerusalén, co Jesús ytigüy jadüg'oc jüby ma Dios ytijc, chi Jesús yajpidzimdiay je ajuuybi adoocpi ajcxy jüby tzajptigoty. Chi Jesús tijhuimbijtay je mesa ajcxy me je meñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huidibi muuxy toocp. ¹⁶ Jesús ca' anajty tzocy co pinjaty midigihuipy juydoogy ma Dios ytijc. ¹⁷ Jesús yaj'ixpijcpy anajty je mayjäy, e yminañ:

—Ma Dios y'ayuc necy Dios jadu'n yminañ: “Fich ndijc hue' je' tzajpcapx-capxtac ma tög'óciy jäy ajcxy chooñ ma nidüg'óciy naax cajp ymiingixy Dios ojadajtp”, per miich ajcxy hue' yi' mhua'ñ meetzpitijc.

¹⁸ Co ajcxy je teedy mijtungmüdpí etz je escribas nejhuüy nej anajty Jesús ti y'idich jüby ma Dios ytijc, chi ajcxy ooy ijxtaaygixy nej ajcxy jëb yaj'ögipy Jesús. Per ca' ajcxy yhuinmañybaady mic'amy nej yaj'ögipy, tzigüyb ajcxy

müid je mayjäy com je mayjäy ooy tzachjihuiy huinmay jadu'n nej Jesús yaj'ixpíjigixy. ¹⁹ Co oycoodziyñi, chi Jesús ycajppidzimy.

Je higueri ytützní

²⁰ Je com jabom Jesús müid ydiscípulos ajcxy najxp anajty tím jopyñi ma je higueri anajty ytinäy. E je higueri ti anajty ytütztay mabaad ytictz. ²¹ Huin'it Pedro jäymejtzcooty nej Jesús nimay je higueri, chi Pedro Jesús nimay:

—Huindzin, ix jada higueri huidibi ixiy mgapxpoj, ti yi' ytich.

²² Chi Jesús Pedro nimay:

—Mibic yi Dios. ²³ Janch ich miich ajcxy nimäy, co ixypy pin migapxy jada huingtonbi cop, e nimäy ixypy: “Miich cop pidig, e nicx cidäg mejyoty”, pen ca' ti mijotmetzcüy, e mibicy co jadaanip nej yi' ti ane'my je cop, chi jadu'n ytunüyb yjadüyb. ²⁴ Paady ich miich ajcxy nimäy co tüg'óciy tijaty miich ajcxy mbijctzooyb ma Dios, chi Dios xymöhüipy ajcxy huidibi ti mbijctzoogixy. Pen janch miich ajcxy mibicy co Dios ti xymoogixy ajcxy je huidibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy müid tüg jäy, huinméxcix yi mmidzip tím jayijp, jigix jëbi Dios Teedy huidib jüby tzajpjoty xyhuinmecxip miich ajcxy ma ti mduñigoogixy. ²⁶ Pen ca' miich ajcxy mhuinmecxy yi mmidzip huidibi ti xymidundigoogixy, ca' miich ajcxy xyhuinmecxa'ñ Dios Teedy huidibi yajpatp tzajpjoty.

Jesús je'ycötújcín

²⁷⁻²⁸ Je huin'it tiempo Jesús müid je' ydiscípulos ajcxy yhuimbijty jim Jerusalén. E co Jesús anajty yhuidity tzajtigoty, chi nijëjty huindzindijc huidibi nigohuajc'ajtp anajty je teedytjic etz escribas ajcxy huidibi nijayduutpi Dios ñecy, nimiiñ ajcxy Jesús, e ymíñañ ajcxy:

—¿Pin cötújcín ti xymöy huidibi ti mduñ ya tzajtigoty? ¿Ma cötújcín ti mbaady co jëb m'ane'my ya tzajtigoty?

²⁹⁻³⁰ Chi Jesús ymíñañ:

—Ich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähüipy ma ich ti nbaady yi mic'ajt etz yi cötújcín, co jadu'n nduñich jüby tigoty ma Dios ytjic. ¿Pin yajñibijc Juan, je Bautista, co huen jäy yajñibety? ¿Dios, o naaxhuiñyjäy? Adzoogich ajcxy.

³¹ Chi ajcxy ytigüy huinmay'ahuidijtpi, ñayñimáayigixy miñ xyipy:

—Pen minaanim co Dios tzajpjotypi ti yajñibicy Juan, chi Jesús xyñimáayimipy: “¿Nej co ca' miich ajcxy mibijcy Juan y'ayuc?” ³² Nañ ni ca' jëbi ich ajt minaanim co jäy ajcxy ti quejxy Juan.

Com chigüyb anajty jäy com ñehuiyb anajty ajcxy co Juan je Bautista Dios anajty ytiy'ajt ymüid. ³³ Chi ajcxy Jesús nimay:

—Ca' ich ajcxy nejhuiy pin ti yajñibicy Juan.

Chi Jesús ymíñañ:

—Ich nañ jadu'n ca' nnigapxa'ñich pin ti xycötujcmöyich co jëb nduñich huidibi ndumybich.

12

Je naymidúnipitjic jibicjäybi ajcxy y'ixpejt

¹ Je huin'it xü Jesús jacmigapxy je mayjäy müid jihuimbit ayuc, ymíñañ:

—Ji yajpaady tüg yëdjic huidibi camuuxy ti cojy ma ycam, e ti co'aguemy je camuuxy cam, e yaj'oyüy tüg tang ma huinmicxa'ñ je camuuxy. Nañ jadu'n je yëdjic tüg poch yajpidigy ma ycamuuxy yaj'ixhua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yejcy ajuyducy ma nijëjty tumbidijc. Chi chooñ viaje tumbi jigüegy it. ² Je huin'it tiempo co yhuaad'ajtni

je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yéjccixy je cosechi, jadu'n nej anajty ti ycapxytuñ mïid je' ajcxy. ³ Chi je cam tumbidijc ajcxy majch je cogam yquexyöyp, chi huinhuojpy jïjphuojpy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajtzachiy ajcxy ma ycohuajc, chi ajcxy ooy ogy oyñinej. ⁵ Chi je cogam jacquejxy jadüg ytumbi e ajcxy tumbidijc yaj'o'cy je midugigpi quexyöpy. Chi je cogam jac tim quejxy jadyii ytumbi. Chi je tumbidijc ajcxy je cogam ytumbi huinhuojpi jïjphuojpi nijëjity, e nijëjity ajcxy yaj'o'cy.

⁶ Je cogam ymïid anajty tügpajc ymang huïdibi anajty ooy tzocy jïhuïy. Je' oy quejxcogixïy ma je ycam yajpaady. Je cogam huinmay jadu'n co je tumbidijc ajcxy yajmij'adïyb je' ymang. ⁷ Chi je tumbidijc ajcxy ñayñimaayi miñ xyïpy: “Jada yëydijc je cogam jada ymang huïdibi jë'adaanip je yteedy ypidägy. Tzoc yaj'ó'cim, e jadu'n je cam një'ájtïm.” ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzïmy camjoty, e jïbijptacy agajjïxcï'py.

⁹ Co Jesús jadu'n miydactay je jïhuïmbit ayuc, chi ymïnañ:

—¿Ti ytunamyb je cogam mïid je tumbidijc ajcxy? Hue' min ci'm ma je' ycam, e yaj'öctähuiïpy je tumbidijc ajcxy huïdibi tundïgoy. E yegïpy pijctzoy je' ycam mïid huïngbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n ymïnañ?

Je yëydijc huïdibi je jäy ajcxy ca' anajty tzocy, Dios ti pidägy mij'ane'mbi.

Tim jadu'n nipaady nej tzaa oyjatypi huïdibi je pojtzpidijc ca' ajcxy yajtuna'ñ, e je' oy ti yhuï'mni ma anajty yjaccopïcyity.

¹¹ Jada tung je Huïndzin Dios ti tuñ, e ooy oy n'ïjxim njäygïdaacim.

¹² E huin'it je judïojäy ajcxy ytungmïidpi ooy jamadzaañ anajty Jesús, com ñejhuïïyb anajty ajcxy co Jesús ñïgapxyii yi' ajcxy. Com tzïgïïyb anajty ajcxy mïid je mayjäy, chi ajcxy tim huïnyöyducy, chi ñïcxcïxni.

Yajnidïygyxy pen jëbi cogüéjtïn yajyecy o pen ca'

¹³ Jac'axam je judïojäy ajcxy ytungmïidpi quejxy ajcxy ma Jesús yajpaady mejtzcïcy ixpïcytïjc. Tügpcïcy anajty ñaygomájtzigïxy mïid yi fariseos ajcxy, etz jadügpcïcy ma je rey Herodes. Hue' anajty ajcxy huinma'ñ ixtaayb nej ajcxy ocxïhuïpy Jesús. ¹⁴ Jada mejtzcïcypï ixpïcytïjc ñïcxy ajcxy ma Jesús, e ymïnañ ajcxy:

—Huïndzin, ïch ajcxy nejhuïïyb co myaj'ixpïcy je tïy'ajt, ca' jäy mdzigïy, com ca' huin'ïjxpety myaj'ixpïcy. Tú'cïy miich mduñ mïid mic jäy, mïid comeeñyjäy, etz mïid ayoob jäy. Tudägy jäy ajcxy myaj'ixpïcy jadu'n nej huaad ajcxy cuychïnaaygïxy Dios ytïy'ajt. Nejhuïhuaamybïch ajcxy nej miich yaj'ixpïcypï je mayjäy. ¿Nej tundïgooyïm mïid yi Dios ycötújcïn co nmïgüéjtïm César, je romano jäy mij'ane'mbi, o ca'ji? ¿Nej jëb nmïgüéjtïm, o ca'ji?

¹⁵ Per Jesús ñejhuïïyb anajty ajcxy yjïbïc-huinma'ñ, e chi ajcxy nimay:

—¿Na'amy co miich ajcxy xyjot'ixy xyhuinma'ñ'ïxyïch? Yajmiingïx tüg meeñ jigïx n'oc'ixïpyïch.

¹⁶ Chi ajcxy mïmïiñ tüg meeñ e co Jesús ijxy je meeñ, chi ymïnañ:

—¿Pïn y'ahuanax etz pïn yxïi ijtp ma jada meeñ?

Chi ajcxy y'adzooy:

—Hue' yi' César.

¹⁷ Chi Jesús ymïnañ:

—Mo' je César huïdibi yi' yjë'ajtpy, e mo' Dios huïdibi Dios yjë'ajtpy.

Chi ajcxy ooy jïhuïy huinmay jadu'n nej anajty Jesús ti y'adzooy.

Yajnidiiygixy pen je tibi öccixy jugypigipy jadüg'oc

¹⁸ Je huin'it tiempo nijëjity saduceos ajcxy ymiiñ ma Jesús. Yi saduceos ajcxy yminaangixy co ca' pin yjugypigañ tibi y'o'ccixy. ¹⁹ Chi je saduceos ajcxy Jesús nimay:

—Huindzin, Moisés jayhui'my je cötújcín co tüg yëydijc y'ögy, e co'ögy yhui'my je ytöxyijc e ca'ni ytöxyijc ung'ixy. Pues copicy je co'ögy ytöxyjäy ypigipy mïid ña'y y'uch yëydijcpi jigix jëbi je töxyjäy y'ung'ixipy huídibi huimihuijpadu'n nej codijc cobidägy ma je yteedy y'ajch ypidägy. ²⁰ Pues jim ma tüg cajp anajty chinäy huixtujc yëydijc tüg que'x. Je ungoob ypijcy, e chi ix'o'cy ytöxyijc, e ca' ni tüg y'ung yajhui'my. ²¹ Je mimetzpi yëydijc ypijcy mïid je co'ögytöxyjäy, e nañ jadu'n ix'o'cy ytöxyijc e ca' ni tüg ung yajhui'my. E nañ jadu'n je midugigipi mïid ypijcy je töxyjäy, e nañ jadu'n ix'o'cy je ytöxyijc, e ca' ni tüg y'ung yajhui'my. ²² E jadu'n oytuñyii yjadyii mïid je töxyjäy co ti anajty mïiddzinay'abidzimdäy je nihuixtujcpi yëydijc tüg que'xpi. E je nihuixtujcpi ix'o'cy ajcxy je töxyjäy, e ca' ni tüg y'ung ajcxy yajhui'my. E chi je töxyjäy oy y'öcni. ²³ E co anajty xii tiempo paaty, co anajty Dios yajjugypicy yi tibi ajcxy y'ögy, ¿huídibi jada' ajcxy nidücti je yëydijc töxyijc'adaanip je töxyjäy? Com ti ajcxy jadu'n nihuixtujcpi mïid tzinay'abidzimgixy.

²⁴ Chi Jesús je saduceos ajcxy nimay:

—Miich ajcxy ca' mhuinjihuüy je tiy'ajt, com ca' mhuinjihuüy Dios y'ayuc ytiy'ajt, e com ni ca' mnejhuüy je mic'ajt huídibi Dios ymïid. ²⁵ Pues co anajty yjugypijccixy je jäy tibi y'o'ccixy, chi ca' ajcxy ypiğañ, e nañ jadu'n ni ca' ajcxy ñaymöhuiyb y'ung huen pijccixy. Hue' ajcxy yjugy'adaangixy chinähuaangixy jii by tzajpjoty, tim jadu'n nej je ángel ajcxy chinaaygixy yjugy'ajtcixy. ²⁶ Per je tiy'ajt co jäy ajcxy tibi y'o'ccixy yjugypigaangixy, ¿nej ca'ni mgapxyi Moisés ytiy'ajt ma anajty Dios ymigapxyii co je aay ujtz anajty chachtoy? Chi ymïañ: “ñich je' je Dios huídib Abraham, Isaac etz Jacob yDios'ajtpy.” ²⁷ Com yi Dios ca' yi' yDios'aty ma yi öcpi ajcxy huídibi y'alma ti ycixy ti ytigoy. Yi Dios Dios'ajtp yi' ma yi juugypí ajcxy. Paady miich ajcxy ooy mij mdundigoogixy co ca' mhuinjihuüy Dios ytiy'ajt.

Je ané'min huídibi ooy nigí ycopícyity

²⁸ Nañ jadu'n je huin'it tiempo nimiiñ Jesús tüg escriba. E yi' anajty y'amido'ijtpy co Jesús adzooy je jäy huídibi ca' mibicy co yi öcpi yjugypigipy ajcxy jadüg'oc. Jada escriba ñejhuüy co Jesús ooy oy ti y'adzooy je saduceos ajcxy, paady yi' Jesús amidooyi:

—¿Huídibi je' Dios y'ané'min jacmijpi?

²⁹ Chi Jesús y'adzooy:

—Yi Dios ycötújcín huídibi jaccopicyip, yi' je' huídibi minamb: “Midoogix Israel jäy, je Huindzin Dios huídibi nDios'ajtim, yi' je' ajt nHuindzin Dios tügpaicpi. ³⁰ Tzoc jihui' etz yajmij'at mHuindzin Dios mïid tüg'óciy m'aa m jot etz mïid tüg'óciy m'alma, etz mïid tüg'óciy mhuinma'ñ, etz mïid tüg'óciy mmic'ajt.” Jada je' je jaccopicyip ané'min. ³¹ Je mimetzpi Dios ycötújcín jahueengi tú'ciy ñaybadyii mïid je jayjipi, yi' huídibi jadu'n minamb: “Tzojccix jihuiygix yi mmigügtijc tim jadu'n nej mnaychogyii mnayjihuiyii ci'm.” Jada metz Dios ycötújcín jaccopicy jacmic'ajt mïid ca'ydi jac huídibi cötújcín.

³² Chi je escriba ymïañ:

—Ooy oy ti m'adzooy. Janch tiy'ajt jadu'n nej miich mïañ, co ji yajpaady tügpaicpi Dios, e ca' ji jadüg Dios mic'ajt mïidpi. ³³ E janch tiy'ajt co copicy nmijpidaacim nyajmij'ajtim Dios cixyjot huinjot mïid tüg'óciy ajt nhuinma'ñ, mïid tüg'óciy ajt n'alma, etz mïid tüg'óciy ajt nmic'ajt. E copicy

ndzójcim njihuiiyim nmigügtijc tim jadu'n nej naychójcim nayjihuiiyim ci'm. Jactzoobatp jada ca'ydi co tüg'óciy yi huindzig'i'ñ huídibi anajty yajno'cpi miid Dios ycixpi.

³⁴ Co Jesús ijxy jadu'n nej je escriba tıydudägy anajty ti y'adzoyii, chi ymınañ:

—Jahuenjaty miich mmıbíjcın ytıgoy'ıtyñi jaydëb mdıgıhuıpy ma Dios y'ane'my.

Co Jesús anajty jadu'n ti y'adzooy je escriba, chi ca' jac pın ti ayuc yja-cyaj'amıdoohui.

¿Pın je' y'ung je Cristo?

³⁵ Jesús yaj'ixpijcpy anajty je mayjäy jııby ma Dios ytıjc, e ymınañ:

—¿Na'amy co yi escribas ajcxy ymınaangıxy co Cristo hue' je' David y'ap y'oc? ³⁶ Com je Espıritu Santo ymoy David jada ayuc huídibi jaybety ma je Salmo necy ma jadu'n ymınañ:

Yi Huındzin Dios nımay ıch nHuındzin: “İña' ya a'oy'amy ma ıch nmıjc, ıxtı cooni anajty miich mmıdızip ti nmımadactäyıch, jadu'n nıpaadıpy nej jıhuıy ti nbıdägyıch miich mmıdızip jadu'n nej tüg tınaybejt.”

³⁷ ¿Per nej co yjadu'nıty co jäy ajcxy ymınaangıxy co je Cristo David je' y'ap y'oc? ¿E David ci'm ymınañ co je Cristo yi' yHuındzin'ajtpy?

Jotcuyc anajty je mayjäy amıdoo'ıjti Jesús y'ayuc.

Jesús ca'p jäygidaci leyhuındzin ajcxy yhuınma'ñ

³⁸ Jesús yaj'ixpijcpy anajty je mayjäy, e ymınañ:

—Naycuend'ájtıgıx miid yi escribas ajcxy. Com yi escribas ajcxy ooy jotcuyc co nayxójıgıxy miid yhuıt oyjatypı yoñjatypı. Ooy ajcxy tzocy co yajcapxpócxııpy huındzig'i'ñ'amy mayjäyduum. ³⁹ Yi escribas ooy ajcxy tzóccıxy yi cödumbı iñaybejt ma je naymujctac, etz ooy ajcxy tzóccıxy iñaybejt ma yi cömaybı jäy iñay ma jäy ajcxy yxııduñ. ⁴⁰ Yi escribas ajcxy yajcıjxtaayıpy yi co'ögy ytöxyjäy ypidägy miid ajcxy y'adzójcın. Yi' ajcxy ooy túngıxy jecy tzajpcapxycapxıı jıgıx ajcxy capxpaady idıpy. Dios nıgı tzaachytunıpy yi escribas ajcxy miid ypocy ycıxpi, ca'ydi jac ni pın.

Je ayoobı töxyjäy y'ofrendı

⁴¹ Tüg xıı anajty Jesús iñay jııby tıgoty ma Dios ytıjc. İñaayb anajty ma je limosna caja huınduu. Jesús yhuındıcxyp anajty je jäy ajcxy huídibi meeñ pıdaaccıxp ma je ofrenda caja. E maycomeeñyjäy ooy ymeeñ pıdaaccıxy janch may. ⁴² Tım huın'ıtıy yja'ty tüg co'ögy töxyjäy janch ayoob pıdacy metz pı'c meeñyhuäcxy, huídibi ca' ooy choobaady. ⁴³ Chi Jesús huoomujcy je' ydiscıpułos, e nımay ajcxy:

—Janch tıy'ajt jadu'n nımaaygıxy co jada co'ögy ytöxyjäy ayoob jac'anaxy jada ti pidägy ofrenda, ca'ydi jac ni pın. ⁴⁴ Tüg'óciy comeeñydıjc ajcxy ypidacpy ma y'ofrenda yi meeñ huídibi yajconajxyp. Jadayaabi co'ögytöxyjäy ti pıdacy tüg'óciy huídibi anajty ymıd, je meeñ tüg'óciy huídibi anajty ñıgayamy yi' ymooyb Dios.

Jesús ymına'ñ co Dios ytıjc yhuındıgooyıpy

13

¹ Co Jesús ypidzımy ma Dios ytıjc, chi nidügtı ydiscıpułos ñımayı:

—Huındzin, ıx jada maychaa mıjıjatypı etz jada maybı tıjc ooy y'oy'oydúñıty.

² Per Jesús y'adzooy, ymınañ:

—Huindicx miich ajcxy jada maybi mijjaty ytijc. Minip tiempo mina tüg'óciy jada tijc nicxy yhui'my taj xit, ca' ma tzaa macxy. Huindigoydähuiip tüg'óciy.

Je t'ij'ajt ma ca'ni naaxhuiñybi ycixa'ñi ytigoya'ñi

³ Jesús m'iid ydiscípulos ajcxy ñicxy ma je cop huidibi xijip Olivos. Jim ajcxy co'ijxnaxy je Dios ytijc. Iñaayb anajty Jesús jim copc'ixy co Pedro, Jacob, Juan etz Andrés ameech migapxy Jesús, ym'inaangixy:

⁴ —Tun may'ajt ñich ajcxy yajnimaaayg mina jada ytuna'ñyii yjada'ñyii co huindigoydähuiip Jerusalén cajp. ¿Ti ijxpejt'adam co anajty jadayaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos ym'inañ:

—Ix pinjaty xyhuin'ñingixy. ⁶ Ooy jäy may ymiinañ m'iid ñich nxii. Ñaydijáangixy co je' ajcxy je' je Cristo, ym'ina'na'ñ ajcxy: “Ñich je' je Cristo.” E ooy jäy may huin'ñinaangixy.

⁷ Co miich ajcxy ayuc mmidohuipy co jäy chachchiptúngixy xii ya, ca' mdzig'iygixip, com ooy ycopicyity co jada jadu'n jayijp ytun'iyb yjad'iyb. Ca' nan hue' je' anajty tim cijxp tim tigooyb je xii je tiempo. ⁸ Nayñibidig'ib tüg naax cajp m'iid huingbi naax cajp, e gobierno m'iid huingbi gobierno. E minipy mic uyx canaag'it etz mij yuu mijpa'm xii ya. E jäy ajcxy ooy yhuänipy yjihuihuipy ycanaymijotcuyc'ájtigixipy. Jada tzaachypi ayo'n tzondacni yi' anajty.

⁹ Chi Jesús yjacm'inañ:

—Nayguend'ájtigix miich ajcxy, com yi' mmidzip ajcxy xymájtzcixip, e xyc'iyéjccixip ma tungm'iidpidijc, e xychachytúngixip xyhuópcixip ma yi' judíojäy ñaymujctac ajcxy. Xyajnicxcixip mach ma rey etz ma gobernador ajcxy yhuinduu m'iid ñich ycixpi com miich ajcxy xymibicyich. E miich ajcxy t'ij'ajt myegipy m'iid ñich ycixpi, ixti ma rey ajcxy etz ma gobernador ajcxy yhuinduu. ¹⁰ Ca' anajty xii tiempo paady mina ycixa'ñ naaxhuiñybi, chi ajcxy capxhuäcxtähuiipy ñich n'ayuc huindu'myb ñaaxhuiñ ma tüg'óciy naax cajp. ¹¹ Co jäy ajcxy xyajnicxip mach ma codungdijc co xyt'iydúngixipy, chi ca' ni nej m'iot'ad'iyb, ni ca' mhuinmayipy nej m'adzóogixipy. Mgápxcixipy je ayuc huidibi Dios xymóoygixipy, com je ayuc huidibi mgápxcixip, ca' nan miich je' anajty ajcxy m'ayuc. Hue' je' je Espíritu Santo xymóoygixipy capxy ayuc. ¹² Yéydijc ajcxy yc'iyegamyb ma tungm'iidpi yci'm y'uch ajcxy co huen yaj'ögyii. E ñañ jadu'n je ungedeedy yc'iyegamy yci'm y'ung ajcxy ma tungm'iidpi. Nañ jadu'n yi' y'ung ajcxy c'iyegipy yci'mdeedy co huen yaj'ögyii. ¹³ May naaxhuiñjäy ca' xychogipy xyjihuihuipy miich ajcxy m'iid ñich ycixpi. Pen miich ajcxy mmict'inaayb ma mmib'ijcin, ypaadip miich ajcxy m'alma n'idoocin.

¹⁴ Chi Jesús yjacm'inañ:

—Co anajty m'ijxcixy je huidibi Daniel ñimiydac jecy'ajty, co pinjaty jibic-huinma'ñ tumb ma ca' ypadyii ma Dios ytijc, huidibi ooy ycodzig'ijity. Miich ajcxy huidibi tz'inaayb jim Judea, co jadu'n m'ijxcixipy, chi nicx mgueect-zoocix ma tungop. ¹⁵ Yi' jäy ajcxy huidibi yajpatp ma ytijcnicy ca' ñicxity tigoty ma ytijc. E ni ti jüby cayajpidzimipy. ¹⁶ Yi' jäy ajcxy huidibi yajpatp camjoty, ca' ajcxy nihuimbidity je' yjocxy huit huidibi ym'iid. ¹⁷ Huin'it xii huin'it tiempo ayo'n pada'ñ je töxyjäy huidibi anajty ti y'ungtzim'igy, e ñañ jadu'n yi' ajcxy huidib m'iid y'ung ma'xung yajtzitzp. ¹⁸ May'ajt ajcxy mbijctzoohuipy ma Dios, co jada jadu'mbi ayo'n ca' ytun'iyb yjad'iyb ma

anajty ytich tiempity. ¹⁹ Yi jadu'mbi xii tiempo jäy ajcxy ayo'n tzaachypi minaxipy yajnaxipy. Ni caminaaxii jäy jadu'n tzaachypi mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E caminaaxii jadüg'oc ycajadüyb jadu'n. ²⁰ Pen ca' Dios capx'aduga'n yjiibi ayo'n xii ayo'n tiempo, ca' ni pin chögipy. Per Dios ycapx'adugamyb yjiibi ayo'n tiempo müd je mibijcpidijc ycixpi huidibi Dios ti huin'ixy.

²¹ Co yi jadu'mbi xii tiempo anajty ymiiñ, ca' mmibigipy, pen ji pinjaty xyñimaaygixy: “Ijxcix, cha yajpaady je Cristo”, o “jim'amy yajpaady je Cristo.” Ca' mmibijccixipy jäy y'ayuc. ²² Minip jäy ajcxy huidibi ñayajnaaxánigixy nej Cristo, e yminángixipy co capxhuäcxy ajcxy Dios y'ayuc, e ca' yjanchity. Ytunipy ajcxy mij huinma'n etz mijpi ijxpejt, ixti jahuin'ina'n je mayjäy ajcxy huidibi Dios ti yhuin'ixy. ²³ Nayquend'ájtigix müd yi jadu'mbi jäy ajcxy, com jayijp ich müch ajcxy yi' ti nyajmüdmüdyägy.

Nejjada' je Dios y'ung yminipy jadüg'oc

²⁴ Chi Jesús yjacmínañ:

—Co anajty yi jadu'mbi ayo'n tiempo ti ñaxy, ycoodzihua'n etz je po' ca' y'ana'n. ²⁵ Maymadza' ycähuip, e nañ yücxiip huidijaty mic'ajt müd tzajpjoty. ²⁶ Je huin'it xii je huin'it tiempo co jadu'n anajty ytunyii yjadyii, huin'it ajcxy m'ixipy, ich je jäy huidibi tsoon tzajpjoty, co ich anajty nmiiñich jocjoty müd tüg'óciy nmic'ajt n'oy'ajtich. ²⁷ Co jadu'n anajty nmiiñich, chi mic'amy nguexipyich ich n'ángeles ajcxy ma xii ypidzimy, ma xii ycidägy, ma jimboj ypidzimy etz ma tichpoj ypidzimy. N'ángeles ajcxy yajmuga'n tüg'óciy ich njäy, huidibi ti nhuin'ixyich, xim yam ma ajcxy yajpaady ya naaxhuiñ, etz jii by tzajpjoty.

²⁸ Chi Jesús yjacmínañ:

—Jeb müch ajcxy tiy'ajt mbigipy ma yi higuere jadu'n nej je xii je tiempo mimb cidaacni. Co je higuere jadüg'oc ñihuamüy, chi müch ajcxy mnejhuüy co ti yhuingoni mina ypottigüyñi. ²⁹ Nañ tim jadu'n co m'ixipy tuniüyb yjadüyb tüg'óciy ijxpejt nej ti nnimaaygixy, chi mnejhuühuip co ti yhuingoni je tiempo mina nhuimbidiipyich jadüg'oc ya naaxhuiñybi. ³⁰ Janch ich müch ajcxy nimäy co jada huidibi ti nnimüydacyich tuniib jadiib ca'ni anajty y'öctay je jäy ajcxy huidibi jacjugy'ajtp jadachambi xii jadachambi tiempo. ³¹ Je tzajp etz je naaxhuiñybi cixipy tigoyipy. Ich n'ayuc huidibi ngapxyich, ca' ycixipy ytigoyipy ni caminaaxii. ³² Ca' ni pin nejhüy je xii je tiempo mina ytuna'ñyüi yjada'ñyüi jadu'n nej ti ich müch ajcxy nnimaaygixy. Ni je ángeles ajcxy jii by tzajpjoty ca' nejhüügixy, nañ ni ich, Dios y'ung', ca' nejhüyich. Jeyi Dios Teedy tügpajc nejhüy.

³³ Ni'ixi' ahüjxcix. Mibijctzoogix Dios jabom jabom, com ca' mnejhuüygixy mina anajty ytuna'ñyüi yjada'ñyüi yi huidibi ti nyajnimaaygixy. ³⁴ Yi xii yi tiempo huidibi minip jadu'n nipaady nej tüg comeeñyjäy huidibi ñicxa'n ma tüg it lugar huidibi jigüegy yajpatp. Jayijp ca'ni anajty choon, chi yajnibijcy je ytumbi ajcxy nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc'aguu. ³⁵ Ni'ixi' m'idipy müch ajcxy. Com ca' mnejhuüygixy mina je codijc yhuimbida'n ma ytijc, pen namgodziy, o mij coodz, o moñi, o ma anajty ti yximüyñi. ³⁶ Ca' jécüty co yjadipy timetiini, e xyajyöybéjtcixipy anajty mdzachmaagixy. ³⁷ Yi huidibi ich müch ajcxy ti nyajnimaaygixy, nañ jadu'n nimäyich tüg'óciy jäy co huen ajcxy nidüg'óciy ahüjxcixip ni'ixi' je xii je tiempo mina nhuimbidiipyich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíoJay ajcxy nixiiduna'nñ je pascua xii, mina ajcxy tzajcaagy cay huidibi ca' levadura miiidity. Je judío teedy ajcxy huidibi jacmijtungmiiid etz je escribas ajcxy huinma'nñixtaaygixy nej jëb ameech májtzciixipy Jesús, e yaj'ögaangixy, ca'ydi je mayjáy nejhuüy. ² Chi ajcxy ñayñimayi miñ xyipy:

—Ca' y'óyity co nmájtzim Jesús xiiyoty. Com ca' yjécyity co je mayjáy yjotmátcottáhuipy, e ytiñhuip huambi jihuüyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymiiid nibüdz pa'm. Jesús iñaayb anajty ma caydac co ymiiñ tüg töxyjäy miiid tüg tzaadüdz quiiig ujtz miiid perfume huidibi ooy oy yxuugy. Jada perfume ooy anajty chóohuüty. Chi je töxyjäy yaj'ahuäch je quiiig, e yajcöyogiy Jesús je perfume huidibi ooy oy yxuugy. ⁴ E nijéjity jäy ajcxy huidibi anajty jim, ca' anajty ajcxy yjotcújcity miiid huidibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixyipy yajtoogy yi perfume tugiiig migo'px peexy, jigix yajpubedipy ayoohtijc.

E ca' jadu'n ajcxy tim jäygidacy nej je töxyjäy ytuuñ miiid Jesús, chi ix'ojy ajcxy je töxyjäy ayooob.

⁶ Chi Jesús yminañ:

—Ixmajtzciix jada töxyjäy. ¿Nej co m'amayiygixy? Yi huidibi ti tuñ miiid iich, ooy yi' y'óyity. ⁷ Je ayoohtijc ca' ytigoy'idipy ma miich ajcxy nimina. Huen huidibi xii huen huidibi tiempo jëb mbubedip ajcxy ayoohtijc. Per iich ca' n'ida'nñich ya jecy miiid miich ajcxy. ⁸ Jada töxyjäy ti tuñ miiid iich jadu'n nej ti ymadägy. Yi' ti pidägy ma iich nninicx perfume huidibi ooy oy yxuugy. Yi' jijp'ixpy mina naaxtigihua'nñich. ⁹ Janch iich miich ajcxy nimaaygixy co huen yma'amyity ya naaxhuiñ ma anajty yaj'ihuächy yajcapxhuächy jada ayuc jada tiy'ajt huidibi nidzoocin miiid, yajnimiydägipy huiidi jada töxyjäy ti tuñ, jigix capxpaady y'idipy.

Judas cüyecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy miiid ñaygapxyii je teedy mijtungmiiidpi nej jëb cüyecy Jesús ma yi teedy ajcxy. ¹¹ Co je teedy mijtungmiiidpi ajcxy jadu'n midoy, co je Judas cüyega'nñ Jesús ma yi' ajcxy, chi ajcxy ooy yjotcugiiy. Chi ajcxy Judas meeñ yajhuinhuaniiy. Chi Judas yhuinma'nñixtay nej jëb occüyecy Jesús ma yi' ajcxy.

Co Jesús y'adzu'ajty pascua xiiyoty

¹² Chi paty je mij xii mina je xii'ajtpidijc tzajcaagy cay huidibi ca'p levadura miiidity, e yaj'öccixy je cöbixy huidibi ajcxy yajhuindzigiiyb anajty Dios. Chi ydiscípulos ajcxy y'amidooy Jesús:

—¿Ma'amy mdzocy co ni'ixiiyim je pascua xii adzu'ajtin?

¹³ Chi Jesús quejxy metz ydiscípulos ajcxy cajpjoty, chi nimay:

—Jim miiid mnaybadiiyb tüg yëydijc huidibi nii tzimnicxp ma tüg majt. Miich ajcxy mbanicxiiyb je yëydijc. ¹⁴ Mbanicxipy ajcxy je yëydijc, ixti coon mbajädipy ma ytijc. E miich ajcxy mnimähuiipy je codijc: “Je Huindzin Jesús ñejhuñhuam ma miich miiidity tüg cuarto ma je Huindzin Jesús miiid ydiscípulos ajcxy jëb caaygixy yi pascua xii adzu'ajtin.” ¹⁵ Je codijc ci'm xyajni'ixiiygixyipy

tüg cuarto mijpi ma je mimetz piso huídibi ti yajni'ixíy. Ma yijimbi cuarto miich ajcxy mni'ixíhuipy yi pascua xii adzu'ájtín.

¹⁶ Chi je metz Jesús ydiscípulos ajcxy tüyöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp yminañ. E jim ajcxy ni'ixíy je pascua xii adzu'íbi.

¹⁷ Nam coodziiyñi anajty co Jesús yja'ty ma je cuarto miid jacjadyii ydiscípulos ajcxy. ¹⁸ Co anajty jim ycaaygixy ma je caydac, chi Jesús yminañ:

—Janch ich miich ajcxy nimay co nidüg miich ajcxy huídibi cham caayb miid ich, xyciyegaambich ma nmidzipich.

¹⁹ Co je Jesús ydiscípulos jadu'n midooy, chi ooy ytigiiy tajpi maybi ajcxy, e ñay'amidóohuigixy miñ xyipy, e tüg yminañ:

—¿Nej ich jada'ji?

E jadüg yminañ:

—¿Nej ich jada'ji?

²⁰ Chi Jesús yminañ:

—Yi' yi' nidügti yi nimajmetzp huídibi tocxmujcp miid ich ma tügpi texy.

²¹ Pues janch ich je', je jäy huídibi tsoon tzajpjoty, nbadaamybich tzaachypí ayo'n jadu'n nej yjaybétyity ma yi Dios ñecy. Per mij ayo'n padañ je jäy huídibi xyciyegaamich ma ich nmidzip. Jac'oy co ca' ycadimma'xung'ajty jada yéydijc.

²² Caayb ajcxy anajty, co Jesús conigy tüg tzajcaagy, e jayijp yajnajx Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi yminañ:

—Caaygix jada tzajcaagy. Jada tzajcaagy ich jada nninícx.

²³ Chi Jesús conigy je ügy vaso, e co Dioscojuyip yajnajxy, chi moyday ajcxy je ügy, e nidüg'ócíy ajcxy uucy je ügy. ²⁴ Chi Jesús yminañ:

—Jada ügy ich nni'py'ajtpy huídibi temamb yogamb. Je' jada jemybi Dios ycötújcín huídibi Dios yejc miid jäy ajcxy ycixpi. ²⁵ Janch tiy'ajt jadu'n nej ich miich ajcxy nimaaygixy, co ca' jadüg'oc n'üga'ñich vino nií, ixti cooni anajty njädyich tzajpjoty ma yi Dios y'ane'my.

Jesús capxidzimy co Pedro ymina'nañ co ca' y'ixy'adyii

²⁶ E co Jesús etz ydiscípulos ajcxy iiy tüg himno, chi ñicxy ajcxy ma je cop huídibi xiiijp Olivos. ²⁷ Chi Jesús yminañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n yminañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuip.” ²⁸ Per co ich anajty njugypícyich jadüg'oc, co ich anajty ti n'ögyich, nícxibich jim Galilea jacjayijp, ca'ydi miich ajcxy.

²⁹ Chi Pedro Jesús nimaayi:

—Oy ixipy yi jacjadyii miich mdiscípulos ajcxy xycöguectäy, per ich ca' miich ngöguëga'ñ.

³⁰ Per Jesús nimay Pedro:

—Janch tiy'ajt jadu'n nej yam nimäy, jadachambi coodz ma ca'ni anajty tzeyyaxígy mejtz'oc miich xycoyüdzan'ñich tugig'oc, mina'nañ co miich ca' xy'ixy'adyiich.

³¹ E Pedro ca' anajty cöbigañ nej Jesús yminañ, chi mictägy minañ:

—Ca' ich miich ngoyüdzan'ñ, oy ixipy ndim'o'c'ich quipxy miid miich.

E nañ actim jadu'n jacjadyii Jesús ydiscípulos ajcxy yminañ nej Pedro ti yminañ.

Jesús mibijctzoy Dios jim Getsemani

³² Jesús miid ydiscípulos ajcxy oyja'ty ma tüg it huídibi xíjip Getsemaní, chi Jesús je ydiscípulos ajcxy nimay:

—Íña' miich ajcxy ya, nami n'ocnicxyich jim'amy Dios mibijctzoob.

³³ Chi Jesús miid nicxy jéda'ajty Pedro, Jacobo etz Juan ma tüg it ahuingujc. Chi Jesús ytigüy tajpi maybi jihuüy jotmay. ³⁴ Chi Jesús yminañ:

—Njihüybich tüg jotmay nej n'öga'ñich. Huí'ngix miich ajcxy ya etz juugy m'íjtcixipy, ca' mmáagixipy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixipy ca' minaxy yajnaxy je tzaachypi huídi anajty ypadamy je huin'it hora. ³⁶ E Jesús anajty Dios mibijctzoy yminañ:

—Dios, miid miich ca' ni ti chípity. Píjci'gich jadayaabi tzaachypi ayo'n, per ca' yjadú'nity nej ñch ndzójcin, huen tuñyíi jadu'n nej miich mdzójcin.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'ó'ccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadága'ñ m'idipy juugy tüg hora?

³⁸ Jugy'íjtcix, e mibijctzoogix Dios ca'ydi jibictuuyb mdigüygixy. Janch t'y'ajt co jotjoty ooy mnijot'ájtci'xy mdunaangixy yí oybi. Per yí mninícx oy amaayty.

³⁹ Chi Jesús jadüg'oc huinhuáctuity je' ydiscípulos ajcxy, e jadüg'oc ñicxy Dios mibijctzoob. May'ajt pijctzoy tim jadu'n nej je jayíjp'atypí anajty ti yminañ. ⁴⁰ Chi Jesús yhuimbijty ma anajty ajcxy ydiscípulos yajpaady, e jadüg'oc oy pátcixy ti anajty ymi'öccixy, com ca' ajcxy mimadágy máhuüi, e ni ca' ajcxy jajty nej adzohuípy Jesús. ⁴¹ Midugüig'oc Jesús ñicxy ma je' ydiscípulos ajcxy, e yminañ:

—¿Nej ya mjacmáagixp mjacpooxcixp? Maagix pooxcix jadachambi. Ti miid jadu'nyí. Ti je tiempo huaad'ájtñi mina ñch, je jáy huídibi tzoon tzajpjoty, xycíyegípy ajcxy ma yí jibic jáydíj. ⁴² Maybidígci'x, tzoc jámim. Chi ymiñ je jáy huídibi xycíyegaambich ma nmídzípich.

Mach ajcxy Jesús yajnicxixy

⁴³ Capxp anajty Jesús, co Judas oyjaty ma Jesús yajpaady. Judas hue' je' nidügti je majmetzpi huídibi Jesús yhuin'ijx. Judas miid miñ mayjäy huídibi ajcxy miid pujx etz quipy. Je teedy mjtungmídpi, je escribas ajcxy, etz je mijjäydíj ajcxy ti anajty quexy je mayjäy huídibi anajty madzamb Jesús. ⁴⁴ Judas, je huídibi anajty cíyegamb Jesús, hue' anajty jayíjp ti moy je mayjäy tüg íjxpejt huídibi miid jéb ajcxy íjxcabip Jesús. Jadu'n jayíjp Judas ycapxytuñ miid yí' ajcxy, e yminañ:

—Je jáy huídibi anajty ndzücxypich, yí' je' anajty Jesús. Madzípy ajcxy, e myajnicxip miich ajcxy yajxon cuend'aty.

⁴⁵ Mí'amy co Judas oyjädy ma Jesús yajpaady, chi nimíjhua'cy, e nimay:

—Huindzín, Huindzín.

E co jadu'n yminañ, chi Judas Jesús tzücx. ⁴⁶ Chi mí'amy je mayjäy Jesús mach, e yajnicxy ajcxy mach.

⁴⁷ Per nidügti Jesús ydiscípulos juudy ypujxy ma ytíj, chi je teedy mjtungmídpi tüg ytumbi yajtzaachíyí, quejtzpujxi tüg ytátzac. ⁴⁸ Chi Jesús je mayjäy nimay:

—¿Ti co miich ajcxy xyñimiñich miid pujx etz quipy, jadu'n nej jihuüy ñch tüg meetzpi? ⁴⁹ Jabom jabom nyaj'ixpijcyich jáy jüby ma Dios ytíj ma miich ajcxy myajpaady, e ni ca' miich ajcxy xymajchich. Paady jadu'n ytunyíi yjadyíi jigix yí' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhuí'my Jesús naydügpajc. Chi je' ajcxy yqueegy.

Je jäy mutz'anägnip huídibi quectzög

⁵¹ Per tög yujcyeeg anäg huídibi anajty payöy Jesús nímóchity anajty miid tög sávana. Chi Jesús ymidzip ajcxy majch je yujcyeegpi. ⁵² Chi je yujcyeegpi cíqueegtuty je mayjäy, yajhui'my ysábana, e yquectzögy nihuädz ixhuädz.

Jesús mij juntajoty

⁵³ Chi ajcxy yajnicxy Jesús mach ma je teedy mijtungmíidpi yajpaady. Chi mic'amy ñaymujci tög'óciy teedy ajcxy huídibi mijtungmíidp, e tög'óciy mijjäydijc, etz tög'óciy escribas ajcxy. ⁵⁴ Chi Pedro jiguégy anajty panicxy je mayjäy ajcxy ixti oy yja'ty ma je teedy mijtungmíidpi ytíba'. E jim ixtacy quipxy miid policia ajcxy agujc, yxaamgixy anajty ma jñnba'.

⁵⁵ Je teedy ajcxy mijtungmíidpi etz tög'óciy je judíojäy ytungmíidpi ajcxy yhuinma'ñ'ixtaaygixy nej ajcxy jëb Jesús yajpocyc'a' miid ajcxy yxíhuin, e jadu'n jëb mooygixy yi ócin. Per ca' ajcxy paady huinma'ñ. ⁵⁶ Mayjäy nihuambejty Jesús miid anii, e ca' ajcxy y'ayuc ytügy. ⁵⁷ Nijëjity jäy ytínayigy juntajoty, e nihuambety ajcxy Jesús, ymínaangixy:

⁵⁸ —Ich ajcxy amído'ijt Jesús y'ayuc tög tecy, co jadu'n ymínañ: “Njidaamybich jada Dios ytijc huídibi jäy ti cójciy, e codugüig xii gojtigadzipich huingbi huídibi ca' jäy cojy.”

⁵⁹ Per ni ca' ytügy ajcxy y'ayuc nej ajcxy Jesús nihuambejty, ac tigachjaty nidüg nidüg ymínañ ajcxy.

⁶⁰ Chi je teedy huídibi je jacmijtungmíid ytínayigy juntajoty, chi y'amídooy Jesús e nimay:

—Jesús, ¿ca' nej m'adzohua'ñyi? ¿Ca' mmídooy nej xychachxigixy?

⁶¹ Per Jesús amóñ y'ijty. Ca' ti ayuc adzohuimbijty. Chi je teedy jadüg'oc migapxy Jesús nimay:

—¿Nej miich je' je Cristo, je Dios y'ung?

⁶² Chi Jesús ymínañ:

—Janch jadu'n, ich je' je Cristo, je jäy huídibi tsoon tzajpjoty, e miich ajcxy xy'ixipich iñäyich ma je mijpi Dios ymijc a'oy'amy. Nañ jadu'n xy'ixipyich miich ajcxy jocjoty co anajty nhuimbityich jadüg'oc ya naaxhuíñ.

⁶³ Chi je teedy huindzech huinhuocy yci'm yhuit, je' je' tiy'ájtíp co ca' anajty yjotcújcity miid Jesús y'ayuc, chi ymínañ:

—¿Ti testigo njac-huaanim? ⁶⁴ Miich ajcxy ci'm ti mmídoogixy yi' y'ayuc, jadu'n nej ycapxtigoy miid Dios. ¿Nej miich ajcxy mínaangixy?

Chi nidüg'óciy ajcxy ymínañ co janch jadu'n Jesús mij oy ti ycapxtigoy miid Dios ytiy'ajt, paady huaad mooygixy yi o'cin.

⁶⁵ Chi nijëjity jäy yhuindzujigy Jesús. Chi ajcxy huingoxodziy, cójciy, e chi ajcxy nimay:

—Octiygapx. ¿Pin ti xycojxy?

E je policiatijc ajcxy cojxy Jesús ma yhuíñyjijp.

Pedro ycoyüch Jesús

⁶⁶ Pedro tibäy anajty y'ahuixy. Chi ñimijhuäci tög tumbi töxyjäybi huídibi anajty tumb ma je teedy ytijc. ⁶⁷ Co je töxyjäy ijxpaty Pedro iñäy anajty jñnba'áy, yxaamb anajty. Chi huindicxpejty Pedro, e nimay:

—Miich nañ miidhuídijtpy anajty je Jesús yi Nazaretpi.

⁶⁸ Per Pedro ca' cöbijcy je töxyjäy y'ayuc, e ymínañ:

—Ca' n'ixy'adyiijich jada Jesús. Ni ca' nhuinjihuüyich ti miich nimiydacpy.

E mic'amy Pedro ypidzimy jüiby, e tim huin'ítiy tög tzeyñi'aa oy yaaxigy.

⁶⁹ Chi jadüg'oc je tumbi töxyjäybi huindicxpejty Pedro, e nimay je jäy ajcxy huídibi jim yajpatp huingon, e ymínañ:

—Jada je' nidügti huidi anajty müd huidity Jesús.

⁷⁰ Chi Pedro jadüg'oc ymínañ co ca' ix'adyii. Co hueeñi, je jäy ajcxy jadüg'oc Pedro nimay:

—Janch co miich je' nidügti ma Jesús yjäy miñ, Galileo jäy miich, com nmidooybich miich m'ayuc nej Galileo jäy ycápxcixy.

⁷¹ Co ajcxy jadu'n ymínañ, chi Pedro mictägy ñaygogapxi co ca' yi' müdhuidity Jesús, ymínañ:

—Dios y'ijxpy ñejhuiyb co tiy'ajt ngapxyich, co ca' n'ixy'adyiijich yi Jesús huidibi miich ajcxy mnigapxyp.

⁷² Co Pedro ycapxymaayi tim huin'itiy tüg tzeyñi'aa yaaxigy mímeytz'ocpi. Huin'it Pedro jäymetzcoody nej Jesús ñimäyii: “Cham coodz jayijp ca'ni anajty tzeyñi'aa yaaxigy metz'oc, ti anajty miich mína'ñ tugig'oc co ca' xy'ix'adyiijich.” Co Pedro jadu'n jäymeitzcoody Jesús y'ayuc, chi tajy may ñayjihuiyi, e ytigiy yaaxpi.

15

Jesús ma Pilato yhuinduu

¹ Co yximiiy, chi je teedy ajcxy huidibi mij tung müd, je mijjäydijc, je escribas ajcxy, etz tüg'ócüy judíojäy huidibi mij tung müd yöymujctay ajcxy. Chi nidüg'ócüy ajcxy yajnicxixy Jesús cixoch ma Pilato, je gobernador. ² Pilato Jesús y'amidooy, nimay:

—¿Nej miich rey'ajtp ma yi judíojäy ajcxyi?

Chi Jesús ymínañ:

—Miich jadu'n minamb.

³ Je judío teedy ajcxy huidibi mijtungmüdpí mictägy tzachxigixy Jesús müd canaagnax xihuín. ⁴ Chi Pilato jadüg'oc Jesús y'amidooy, nimay:

—¿Ca' nej m'adzohua'ñi? Ix nej yi mmidzip ajcxy ychachxigixy.

⁵ Chi Jesús ca' ni nej y'adzooy. E Pilato ooy chachhuinmay'ahuidijty.

Jesús yajmoy ysentencia co y'ögipy

⁶ Com xiioty anajty, je gobernador Pilato najtzmazhiy tüg machyjäy, je huidibi je mayjäy anajty ypijctzoogixyp. ⁷ Pujxtijc iñaayb anajty jim Jerusalén tüg machyjäy huidibi anajty yxi Barrabás. Barrabás pujxtijc iñaayb anajty quipxy müd jacjadyii jäy huidibi anajty ti midziptzoon je gobierno romano, e ti anajty yjäyay'ó'ccixy. ⁸⁻⁹ Co anajty je may yxi'ajtpidijc may'ajt pijctzoogixy ma Pilato co najtzmazhihuip tüg machyjäy, chi Pilato ymínañ:

—¿Nej mdzojccixyp co nnajtzmazhihuibich je judíojäy ajcxy yrey?

¹⁰ Pilato ñejhuiyb anajty co mañ'ajtingixy anajty ajcxy je teedy mijtungmüdpí ti cíyejccixy Jesús. ¹¹ Per co Pilato jadu'n ymínañ, chi je teedy ajcxy mijtungmüdpí ooy ajcxy yajhuamgoty yajjihuiygoty je mayjäy co huen je Pilato najtzmazhiy je Barrabás. ¹² Chi Pilato y'amidooy je mayjäy jadüg'oc:

—¿Nej miich ajcxy mdzocy ndunipyich müd jada yëydijc huidibi jäy ajcxy ytijpy co yrey'aty ma yi judíojäy ajcxy?

¹³ Chi je mayjäy mic yminangottay:

—Yajcruutzpet.

¹⁴ Chi Pilato ymínañ:

—Per ¿ti yi' ti tundigoy?

Huin'it je mayjäy ñigi mic ymínañ:

—¡Yajcruutzpet!

¹⁵ Co jadu'n je mayjäy ajcxy mictägy yminanday, chi Pilato anajty yajjotcuje'adaangixy je mayjäy, chi najtzmadzhy je Barrabás. E co yajci'ajttay yi Jesús, chi cïyejcnï co huen yajcruutzpedyïi.

¹⁶ Chi je soldados ajcxy yajnicxy Jesús ma je agujctijc tïba', e jim ñaymujci tüg'óciy soldados ajcxy huidibi yajpatp anajty jim Jerusalén. ¹⁷ Chi ajcxy yajnïjenhy je Jesús tüg rey yhuit, color ucypï e yajcojenhy ajcxy apy corona.

¹⁸ Chi je soldados ajcxy ymïnañ:

—¡Viva jada judío rey!

¹⁹ Chi je soldados ajcxy huoippy Jesús ma ycohuaic mïd paxy, e huindzuj jïjptzujcïxy ooy, e huingojxtinay'ahuïygyïxy janch ypaad nej jïhuïy ooy huindzïgyïxy. ²⁰ Co je soldados ajcxy nixiïctay yajxiïctay Jesús, chi ajcxy jeeni je yreyhuit color ucypï, e yajnïjenhy ajcxy yci'm yhuit jadüg'oc. Chi ajcxy Jesús mïdcajppidzïmy co anajty yajcruutzpedaangixy.

Co Jesús yajcruutzpejtï

²¹ Tü'am ajcxy tüg jäy mïdnyabati, hue' anajty yxï, Simón, ycogájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycrudz.

²² Chi ajcxy yajnicxy Jesús ma tüg it lugar huidibi yxï Gólgota, je ayuc Gólgota jadu'n yhuimbïdzïmy o'cpi cohuaic. ²³ Chi ajcxy moy Jesús vino huen ügy tem huïdity mïd mirra tzoy. Per ca' Jesús cöbijcy je vino nï. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuit yajhuäcxaani, oc'ixaangixy pin anajty ocjé'ájtïp.

²⁵ Petyxï anajty co ajcxy yajcruutzpejty Jesús. ²⁶ Je ayuc huidibi ajcxy yjaay ma Jesús cruudz, jadu'n ymïnañ:

—Je judíojäy ajcxy yRey. ²⁷ Quipxy mïd Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymïc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n ymïnañ: “Yaj'amichoomujc je Cristo mïd je pocyjäy ajcxy.”

²⁹⁻³⁰ Je mayjäy huidibi ajcxy naxïyb anajty ma Jesús yajpaady cruutzcïxy, ooy anajty ajcxy ycöjïgyïñ, nixiïcy yajxiïcy ajcxy Jesús, ymïnañ ajcxy:

—Bah, miich huidibi Dios ytïc mjïdaanïp, e codugïg xï huingbi myajpidïga'ñ, miich ci'm cham naygohuaani, e minac cruutzcïxy.

³¹⁻³² Nañ jadu'n je teedy ajcxy mïjtungmïdipi etz je escribas ajcxy nixiïcy yajxiïcy ajcxy Jesús ñayñïmayï miñ xyïpy:

—Jada Jesús ti cohua'ñ jacjadyïi jäy, e ca' jaty nej ci'm ñaygohua'nïyb. Pen janch, co jada Jesús yjëtïty je Cristo huidibi rey'adamb ma yi judíojäy ajcxy, ymïd ixïpy mic'ajt jaydëb ci'm yminagïpy cruutzcïxy. Co jadu'n ixïpy n'ïxim co ci'm ti yminacy cruutzcïxy, huin'it mïbïcïm co janch jada jëtïty je Cristo huidibi rey'ajtp ma yi Israel jäy.

Nañ jadu'n je metz meetzpi ajcxy huidibi cruutzpejt quipxy mïd Jesús nixiïcy yajxiïcy ajcxy je Jesús.

Co Jesús y'ögy

³³ Co yucjcxïjïy, chi ycoodzïygiday tüg'óciy naaxhuiñ. E jadu'n je naaxhuiñ y'ijty coodzixti minacyxï. ³⁴ Minacyxï Jesús mic ymïnañ mïd aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimbïdzïmy: Tat Dios. Tat Dios. ¿Na'amy co ti xy'ix'ixïch?

³⁵ Nijëtïty jäy huidibi anajty jim yajpatp huingon ma Jesús, co midoo jadu'n ajcxy Jesús y'ayuc, chi ajcxy ymïnañ:

—Midoogix, Elías yi' yaaxtaayb.

³⁶ Chi nidügti ajcxy ninicxy Jesús poyigy, ti anajty yajxoogy pixy miid vinoni ta'mbi, e yajjijpxodziy je pixy ma tüg paxy, e jadu'n yajja'ty je vino ni ta'mbi ma Jesús y'ahuac, huen muucip je vino ni ta'mbi. Co jadu'n tuñ, chi yminañ: —Tzoc oc'ahuixim pen mimb Elías, e miñ yajminagyii ma yi cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuit yciitzhua'cxy tinä'amy huidibi anajty miid y'adiydútyty je Dios ycuarto ma je teedy mijtungmiidpi ytigiy tüg tecypajc jimijt jimijt. ³⁹ Je soldado huindzin huidibi anajty tinaayb ma Jesús yhuinduu, co jadu'n midoy nej Jesús mic yaaxqueegy, e ijxy nej y'ögy, chi yminañ:

—Janch co jadayaabi yëydijc anajty Dios ung'adyii.

⁴⁰ Nañ jim anajty nijëjty töxyjäydijc ymij'ijxcixy jiguëgy. Jim anajty yajpaady María Magdalena, etz je jadügpí María, Jacobo je mutz'anägnip ytaj, etz José ytaj. Nañ jim anajty yajpaady Salomé. ⁴¹ Jadayaabi töxyjäy ajcxy miidhuidijt Jesús, e ti anajty pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydijc ajcxy huidibi anajty ti ycoody jim Jerusalén quipxy miid Jesús.

Jesús yajnaaxtigiyii

⁴²⁻⁴³ Paady co chu'iyñi hue' anajty viernes mina judíojäy ñayajpocyñihuáatzigixy, jaydëb anajty amay'adaangixy je sábado xi je com jabom. Chi José huidibi anajty cogajp Arimatea yjotmictuñ, chi ytigiy ma je gobernador Pilato, pijtzooy may'ajt co yajnaaxtigihuaani Jesús ñinix. E hue' je' José anajty tungmiid ma yi judíojäy ajcxy. José yjijp'ijxpy anajty mina Dios pidäga'ñ yi' y'ané'min ya naaxhuiñ. ⁴⁴ Pilato ooy tzachhuinmay co Jesús tim mic'amy ti y'ögy anajty, paady huoodzoy je soldado huindzin, e t'y'ajt pijtzooy pen janch co Jesús ti anajty y'ögy. ⁴⁵ Co je soldado huindzin t'y'ajt yejcy co Jesús ti anajty y'ögy, chi nimay José co huen yajnaxtigihuiipy Jesús. ⁴⁶ Chi José juy poob huit, e co yajminajcy Jesús ñinix, chi mo'ñ miid je poob huit, e chi pidacy ma tüg tzaajut huidibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut miid tüg mij tzaa. ⁴⁷ E je metzpi töxyjäy María Magdalena etz je jadügpí María huidibi José ytaj'ajtpy huindicxp anajty ajcxy co Jesús ñaaxtigiy.

16

Jesús yjugypicy jadüg'oc

¹ Com jabom jopy, domingo, chi je tugüg töxyjäy ajcxy María Magdalena, María Jacobo ytaj etz Salomé juy ajcxy tzoy huidibi ooy oy xuugy, pidägaangixy anajty ma Jesús ñinix. ² Je tugügpi töxyjäy choñ domingo, semaan ixtigi', tim jopyñi. Ti anajty ypidzimni je xi co ajcxy oyjädya ma je öcpi jut. ³ Chi je tugügpi töxyjäy ajcxy nayñimaayi miñ xyipy:

—¿Pin xy'ocpubéjtim jigihuiipy je mij tzaa huidibi miid agiyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huidibi je öcpi jut anajty agiydujcp. ⁵ Chi ajcxy ytigiy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymiid. Co ajcxy jadu'n ijxy je yeeg'anäg jüby jutjoty, chi je töxyjäy ajcxy ooy chigiy. ⁶ Chi je yeeg'anäg nimay je töxyjäy ajcxy:

—Ca' ooy mdzigiygixy. Miich ajcxy je' m'ijxtaaygixp je Jesús huidibi cogajp Nazaret, je huidibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷ Nicxcix, nimaaygix Pedro etz yi jacjadyii Jesús ydiscípulos ajcxy co Jesús nicxip jayjip jim Galilea, e jim Galilea ñaybadiiyb ajcxy miid Jesús, jadu'n nej ajcxy ñimaayi jayjip'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigiiygixy. Ooy anajty ajcxy chiyuy miid tzig'iñ. E ni ca' ajcxy nimay ni pin nej anajty ti íjxcixy, com ooy anajty chigiiygixy.

Jesús ñaygue'xici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayjip ma María Magdalena, je' je' je töxyjäy huidibi anajty Jesús ti yajpidzimi huixtujc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi miid yhuidijty, e nimaaygixy nej anajty yi' ti ixy Jesús co ti yjugypicy jadüg'oc. E Jesús ydiscípulos ajcxy ooy anajty ytájycixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti ixy Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

¹² Co hueeñi, Jesús ñayguëxici nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy nimaaygixy je jacjadyii discípulos ajcxy co ti íjxcixy Jesús. E je jacjadyii discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajñibijc

¹⁴ Jac com jecy, Jesús ñayguëxici ma je majctügpi discípulos ajcxy ma anajty y'iñaaygixy ma caydac. Chi Jesús ogy ajcxy co ca' ajcxy mibíjccixy co ooy ajcxy yjot yjuuñity, ca' ajcxy mijpidägy jacjadyii pin anajty ti y'íjxcixy Jesús. ¹⁵ Jesús je' ydiscípulos ajcxy nimay:

—Ñicxcix miich ajcxy ma tüg'óciy naaxhuiñyjäy, ma tüg'óciy naax cajp, e capxhuäcxcix ajcxy je oybi ayuc nej jäy ajcxy jëb y'almanidzögipy. ¹⁶ Pinjaty mibijc etz ñiibejtcixy, ypaadip ajcxy y'almanidzoocin. Per, pinjaty ca' mijpidägy tiy'ajt hue' ajcxy y'alma tigoyip miid ypocy ycixpi. ¹⁷ Yi jäy ajcxy huidibi mibijcp, ooy ajcxy iixpejt túngixipy. Miid iich nxi iich nmic'ajt yajpidzimipy ajcxy ca'oybi ma jäy ajcxy yjot yhuinma'ñ. Nañ jadu'n ycápxgixipy huingbi ayuc. ¹⁸ Ymadzipy ajcxy tza'ñ, e ca' nej yjajtcixipy. E co ajcxy veneno ügip, ca' ajcxy ypa'mdunib. E co ajcxy cñixáipy pa'mjäy, tzögip je pa'mjäy.

Jesús ypätigiiyñi tzajpjoty

¹⁹ E co je Huindzin Jesús ycapxy ycixy miid je' ydiscípulos ajcxy, chi ypätigiiyñi tzajpjoty. Jiiby tzajpjoty Jesús yajpaady ma Dios ymijc a'oy'amy, miid mij'ane'min. ²⁰ Chi Jesús ydiscípulos ajcxy chooñ ñicxcixy cajp cajp capxhuäcxy ajcxy Jesús y'ayuc ma nidüg'óciy naax cajp. E je Huindzin Jesús ooy ajcxy ypubejti ypuđigiiyi, mic'ajt moy je' ajcxy miid je iixpejt je mijhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

Jaayhui'my Jadu'n Nej Jesucristo Ytun Yjajti

¹ Mayjäy ti cojaay je ayuc je tıy'ajt huıdi ıch ajt nejhuıym co janch ytiy'ajtıy, tög'óciy jadu'n nej Jesús chondacy yjugy'ajtin ya naaxhuiñ ixti mabaad ycogixıy. ² Tög'óciy je tıy'ajt jadu'n nej ajt xyñimaayım huıdi ci'm ijx midou nej chondacy ixti mabaad ycogixıy, je' ajcxy huidibi capxhuäcxy Jesús y'ayuc ytiy'ajt. ³ İch nañ jadu'n ti nyajcıyöyich ti nyajtecyöyich yajxon je tıy'ajt nej Jesús chondacy je' chinaayın ya naaxhuiñ ixti mabaad ycogixıy. Paady ycıxpı ıch nhuinma'ñ pidägy co ıch miich nyajnijayıhua'ñ tög'óciy je tıy'ajt, miich oyjäybı, Teófilo. ⁴ Jıgix miich nañ jadu'n mnejhuıhuıpy yajxon je tıy'ajt, jadu'n nej miich ti m'ixpıcy.

Tüg ángel nigapxy co Juan el Bautista ypi'c'ada'ñ

⁵ Jadu'n ytuni yjajti co anajty Herodes yrey'aty ma Judea naax cajp, jim anajty tög judıo teedy hue' anajty yxıı Zacarías. Je' anajty semandumb mıd Abías y'ajugytıjc y'amıgügtıjc. Je Zacarías ypijcy mıd Aarón y'ocnıx, hue' je' anajty yxıı Elisabet. ⁶ Dios y'ijxyp ñejhuıyb co je' anajty ajcxy ytudägyjäyıtıy nimetz. Je' ajcxy ycuydumyb tög'óciy yı Huindzin Dios ycapxy y'ané'mın. ⁷ Je' ca'p anajty ajcxy y'ung ni tög, e jadu'n ajcxy ymıjäyıñ nimetz.

⁸ Chi tögtecy Zacarías mıd y'ajugy y'amıgüg yteedy'ajtcıxy anajty ma Dios ytıjc. ⁹ Jadu'n nej teedy ajcxy ycostumbre mıdıty, chi ñıgootı tung je Zacarías mına ypoomjogıpy jııby ma yı Huindzin Dios ytıjc. ¹⁰ Tög'óciy je mayjäy ooy anajty Dios mıbijctzoogıxy tıba'y. Yam Zacarías tzajtigoty ypoomjocy, ¹¹ co ñayquëxıci Huindzin Dios y'ángel tög ytinäy a'oy'amy ma je poomjoctac. ¹² Co Zacarías ijxy je ángel, chi ooy chıgıy. ¹³ Chi je ángel nımaay Zacarías:

—Ca' mdzigıy, ti Dios mıdooy yı mjuydácin mnucxtácin. Yı mdöxyıjc Elisabet ypaadıpy tög ung yëydıjcpı, e mxımöhuıpy Juan. ¹⁴ Mjotcujc'adıp mxondägıp miich etz mdöxyıjc, nañ may yı jäy yjotcugıhuıpy co anajty m'ung ti ypi'c'aty. ¹⁵ Chi yı m'ung ycömay'ida'ñ ma Dios. Ni ca' ügıpy vino ni jocnıı. Ma ca'ni anajty yma'xung'aty ymıd'adıpy yı Dios yjıhui'ñ ymic'ajt. ¹⁶ Yı' yajjothuımbıdıpy may Israel jäy ma yı' ajcxy yHuindzin Dios. ¹⁷ Je' nıcxy ycogapxy'aty ma yı jäy ajcxy huınmıc jotmıc mıd Dios yjıhui'ñ ymic'ajt, tim jadu'n nej Elías jecy'ajty ycogapxy'ajty huınmıc jotmıc mıd Dios yjıhui'ñ ymic'ajt. Je' m'ung yajjothuımbıdıpy je ungdeedy ajcxy huıdibi ca' y'ung ixaangıxy, nañ yajjothuımbıdıpy je jäy ajcxy huıdibi ca' capxycöbıcy yı Dios, jıgix ajcxy paadıpy oyjot oyhuınma'ñ. Nañ m'ung ñımähuıpy je jäy ajcxy huen nayñı'ixıyigıxy mıd yHuindzin Dios ycıxpı.

¹⁸ Chi Zacarías nımay je ángel:

—¿Nej jada ıch nejhuıhuıpy penı janch huıdibi xyajnimaaıybıch? Ti nmıjjäyıyñıch, cham ndöxyıjcıch nañ ti ymıjjäyıyñı.

¹⁹ Chi je ángel y'adzooy:

—İch Gabriel, ma Dios yhuınduu ni'ixı' n'ıtyıch. Dios ti xyquexyıch cogapxy'ajtpı ma miich co nyajnimähuıpy jada oybı ayuc. ²⁰ Jadachambi miich mhui'mıpy uum, ni ca' m'ocjájtnıp nej mgápıpy, mıd co ca' mmıbıcy jada ıch n'ayuc huıdibi yajcuydunıp co anajty tiempo patni.

²¹ Yam je mayjäy ooy ja'ahuıjxcıxy Zacarías, ooy anajty ajcxy tzachhuınmaaygıxy ti co chachhuäcıpy jııby ma Dios ytıjc. ²² Co Zacarías ypidzımy, chi

ca' anajty y'occapxni. Chi je jäy ajcxy huinjihu#y co ti anajty ixy tijaty jiiy ma Dios ytijc. Hue' je' yjacmiydacy a'ixiy'amy, e oyhuimiy uum.

²³ Co je semandung yajmay, chi Zacarías ñicxni ma ytijc. ²⁴⁻²⁵ Co jadu'n yjajty, chi Elisabet jihu#y co ti anajty y'ung tzi#migy ciy# gy. Chi yüch'ijty migoox po', e ymíñañ: “Jadu'n yi Huindzin Dios ti ytuñ m#id #ch jadachambi tiempo, ti xyjäy#mechich ti yajquëgy #ch ndzöydu'n ma yi mayjäy ajcxy.”

Tüg ángel nigapxy co Jesús ypi'c'adañ

²⁶ Co tudujc po' maabi Elisabet anajty y'ungtzi#migy, chi Dios quejxy je' y'ángel Gabriel jim Galilea naaxjot ma je cajp huidi anajty yx# Nazaret. ²⁷ Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëydijc. Je töxy'anäg ti anajty co'adzoy co piga'ñ m#id tüg yëydijc huidi yx# José. José hue' anajty David y'ap y'oc. Je töxy'anäg hue' anajty yx#ijty María. ²⁸ Co je ángel yti#iy ma anajty María, chi nimay:

—María, Dios ti xy'ijxtiy, je Huindzin Dios y'oy'ajt m#id miich. Miich je' cömay y'idip ma tüg'óciy töxyjäydijc.

²⁹ Chi María co y'ijxy je ángel, chi chig#iy m#id je' y'ayuc, chi huinmay ooy m#id jada copxpócxin nej co yjadú'ñity. ³⁰ Chi je ángel ymíñañ:

—María, ca' mdzig#iy, miich Dios ti xy'ijxtiy. ³¹ Jadachambi, m'ungdzim#igip, myajpi'c'adipy tüg mang, huidibi mx#imöhui#py JESUS. ³² Je Jesús mij y'idipy, hue' je' yajt#ipy Dios tzajpjotypi y'ung. Chi je Huindzin Dios möhui#yb je ané'min huidi yi' ymij'ap ymijteedy David ym#id anajty. ³³ Je Jesús ané'mip huinix# ma yi Jacob y'ap y'oc. Je' y'ané'min camina ycix#py.

³⁴ Chi María je ángel nimaay:

—¿Nej jada co yjadú'ñity? #ch ca'ni nyëydijc m#id tzinäy.

³⁵ Chi je ángel y'adzooy:

—Je Dios yjihu'ñ ymic'ajt minip ma miich, je Dios tzajpjotypi ymic'ájtin xyajnidujttähui#p, je oyjäybi jäy huidi pi'c'adam, hue' yajt#ipy Dios y'ung. ³⁶ E cham Elisabet miich m'amigüg nañ jadu'n yajpi'c'adamy tüg mang ma ti ymijjäy#yñi. Cham midudujc po'bi maabi y'ung tzi#migy je huidibi jäy yti#py ca' y'ung'ixaani, ³⁷ com m#idi Dios ca'ni ti chí#ity.

³⁸ Chi María ymíñañ:

—Jotujc nguydun#pyich yi Huindzin Dios chójcin, huen jadu'n tuñy# jady# ma #ch jadu'n nej miich m'ayuc xymöyich.

Chi je ángel ñicxni.

María y'oy cogapx#y Elisabet

³⁹ Huin'it x# María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi yti#iy ma Zacarías ytijc, e capxpocxy Elisabet. ⁴¹ Chi jadu'n yjajty co Elisabet midoohui María ycapxpócxin, chi jihu#y co y'ung yücx# ma yjot. E chi je Elisabet ooy yjotcug#y m#id je Dios yjihu'ñ ymic'ajt. ⁴² Chi ymíñañ janch mic:

—Cömay miich ma tüg'óciy töxyjäydijc, e cömay y'ida'ñ m'ung huidibi pi'c'adamb. ⁴³ ¿Nej #ch jada co jadu'n ti n'ahuäg#y co nHuindzinich ytaj miñ xycó'ix#yich? ⁴⁴ Co ti nmidooyich yi mgapxpócxin, ti #ch n'ung yücx# ma #ch njot co chachjotcú#ity. ⁴⁵ Jotujc'adip pinjaty ti ymibicy, co cuyduñ y'ida'ñ je ayuc m#id je Huindzin Dios ycixpi. ⁴⁶ Chi María ymíñañ:

Ooy mij n'ojadatyich yi Huindzin Dios.

⁴⁷ Ooy nxondägyich m#id Dios ycixpi, #ch nnihuambi nyajtzoocpi,

⁴⁸ co yi' ti xyñi'ijxcidägyich, co #ch ayoobi xytumbi'ady#yich. Jadachambi etz jacnicxp x# tiempo, tüg'óciy jäy ajcxy oy m#ina'nip co jotujc'á#tpich.

- 49 Yi Dios tügpajc mijip, tibi tun mid ich, ooy yi' yxi ymijity.
- 50 Dios ypa'ayooyb hueñypinity huidibi huindziguyip jadachambi etz jancixni xi tiempo.
- 51 Dios ti ooy tuñ mijpi huinma'ñ, ti jibicy pinjaty amij agix nayjihuiyip ma yjot yhuinma'ñ.
- 52 Dios ti yajpidzimy yi mijpi rey ma y'ane'my, ti mij'ajt möy ayoobidijc.
- 53 Pinjaty ayuu'ijtp anajty ymooy ti mid yjotcujc'adip, etz yi comeenyjäydijc ajcxy ti ixmach ca' ni ti.
- 54 Dios ti pubety yi Israel jäy, yi' ajcxy ytumbi, mid co anajty ti pa'ayogoty je' ajcxy,
- 55 jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb mid je' ajcxy huinixi.
- 56 Chi María tugig po' jim y'ijty mid Elisabet, chi yhuimbijtni ma ytijc.

Juan el Bautista co ypi'c'ajty

- 57 Co je Elisabet oy yajhuaad'ajtni xi tiempo, chi yajpi'c'ajty tüg ymang.
- 58 Chi ayuc midooy ajcxy je ymijin ymidijc etz y'ajugy y'amigüg jadu'n nej Dios may'ajt ti tuñ mid Elisabet. Chi ajcxy ooy yjotcugiy mid je' ycixpi. 59 Chi jadu'n yajty coductujc xi je ymijin ymidijc etz y'ajugy y'amigüg miñ ma Zacarías ytijc co anajty tiy'ajttihuaangixy je pi'c'anäg. Chi ajcxy yajxi'ada'nyii anajty jadu'n nej yteedy yxi Zacarías. 60 Chi ytaj yminañ:
—Ca' xii'aduyb Zacarías, hue' yi' huen xii'adyii Juan.
- 61 Chi je' ymigügtijc ajcxy yminañ:
—¿Na'amy? Ni tüg miich m'amigüg jadu'n ca' xijity.
- 62 Chi ajcxy y'amidoohui je' yteedy jadu'n a'ixiy'amy, nej yi' yajxi'ada'nyii.
- 63 Chi Zacarías pijctzoy tüg necy, e jaay jadu'n: “Juan huen xii'adyii.” Chi je ymigügtijc ajcxy nidüg'óciy ooy jihuuy huinmaay. 64 Chi mic'amy Zacarías y'ahuac ahua'cxy e ytoodz yunguy, chi oy ycapxigy e jäymejch cömay yi Dios.
- 65 Chi tüg'óciy ymijin ymidijc ooy chiguy. Chi ajcxy nimydactay nej Zacarías ti yjaty ma tüg'óciy jäy huidibi tzinaayb Judea yuugjotypi tzinaaydac. 66 Tüg'óciy pinjaty anajty midoob je ayuc, chi jäymejtzhui'm ajcxy ma yjot yhuinma'ñ, chi ñayñimáayigixy:
—¿Ti jada' ytunamyb jada pi'c'anäg?
Com je Huindzin Dios je' mid y'ity.

Je Zacarías y'iy

- 67 Chi je ungedeedy Zacarías mid je Dios yjihuiñ ymic'ajt Dios y'ayuc najtzcaxiyi yminañ:
- 68 Cömay yi Israel jäy yHuindzin Dios, co ti ni'ijxcidägy, ti cohua'ñ yi' ñaax ycajp,
- 69 Dios ti quexy tüg mij nihuaambi yajtzoopi, ma yi' ytumbi, David y'ap y'oc ajcxy.
- 70 Com Dios jadu'n yminañ jecy'ajty mid yi' y'ayuc najtzcaxiyb huidibi huätzjäyip;
- 71 je' xyñihuãnaanim ma ich ajt nmidzip, ñañ xypubedaanim xypudigihuaanim ca'ydi xycigähuiyim huidibi ca' xy'ixaanim xychogaanim.
- 72 Jaydëbi pa'ayoohuipy ich ajt nmij'ap nmijteedy, etz jäymedziyb jadu'n nej ayuc ahuanuy mid je' ajcxy.
- 73 Jadu'n nej Dios janch huinjot y'ayuc ahuanuy mid ich ajt nmij'ap nmijteedy Abraham jecy'ajty huidi anajty xymöhuaanim.

- 74 Co nihuätzictuutim ma nmidzip, huin'it jaydëbi miyaaxim n'ojadajtim ca' ma tzigi'ñ jihu'i'ñ,
- 75 mïid huätzhuinma'ñ etz tudägy huinma'ñ ma yi' yhuinduu jabom jabom ixti mibaad ndzinaayim.
- 76 Miich ma'xung, jäy hue' myajtijip mijpi Dios y'ayucnajtzcapxiybi. Miich n'icxi cogapxy, nicx yajni'ixi jäy mïid Huindzin Dios ycixpi.
- 77 Yajni'ixi' yi cajpjäy jadu'n nej huaad ajcxy y'alma paadipy nihuáanin yajnidzoocin, etz jadu'n nej huaad ajcxy ypocy huinmecxiyb.
- 78 Jadu'n nej Dios ich ajt ti xypa'ayoohuim co ti xyñi'ijxcidaacim etz xymooyim t'icxin jájin huidibi tzomb tzajpjoty,
- 79 jaydëbi yajmöhuiipy jäy ajcxy Dios ytiy'ajt huidibi ajcxy tzinaayb agootz-tuum etz o'c j'ijp'am, jigix ajcxy xytümooyim ma je tudägypi tü'aa.
- 80 Je pi'c'anäg yeeg yjodijy huinmic jotmic mïid yi Dios yjihu'i'ñ ymic'ajt. Chi chinaay adügtuum ma ca' pin, ixti cooni xii tiempo paty mina n'icxiy cogapxy ma Israeljäy ajcxy.

2

Jesús yma'xung'ajty

1 Huin'it xii Augusto César pidacy y'ané'min huen tüg'óciy jäy nicxy necype-jttaaygixy. 2 Je jayijp'atyp'i padrón hue' je'yaj'oyi Cirenio huidibi anajty gobernador'ajtp jim Siria ñaaxjot. 3 Chi jäy ajcxy nidüg'óciy n'icxtay yajco-jayiybi nidüg nidüg ma yci'mgajp. 4 Chi José choon jim Galilea naaxjot ma je cajp huidi yxii Nazaret, n'icxy ajcxy jim Judea naaxjot ma je David ycajp, huidi yxii Belén. Yi José n'icxy jim Belén com ymij'ap'ajtpy ymijteedy'ajtpy je David. 5 Chi José yajcojayiy padrónjoty mïid María, je töxyjäy huidibi anajty ymïid capxytuñ, huidi anajty ung tzim'ijtp. 6 Chi jadu'n yajty co ajcxy anajty yjimity Belén, chi oyhuaad'aty co María paadipy y'ung. 7 Chi yma'xung'ajty je ungoob, e chi nibe'ñ nímüxy mïid ymotz, e chi agögiiy ma iyujc pëcxi'ñ, co ca' anajty ti paady jättac.

Je ángeles ajcxy etz je cöbixycuend'ajtpi ajcxy

8 Chi mihuingon je cajp anajty jäy ycöbixycuend'aty. Hue' anajty ajcxy yhuin'iñaayb huintzuumnajxyp je' ycöbixy ajcxy. 9 Chi Huindzin Dios tüg y'ángel ñigidaaci je' ajcxy, e yi Huindzin Dios y'oy'ájtin y'adixcoody jühuidity ma je' anajty ajcxy ymijc, chi ajcxy ooy chigiiy. 10 Huin'it je ángel yminañ:

—Ca' mdzigiiygixy, cham ich miich nyajnimaaaygixy oybi ayuc huidibi yajjotcugihuiipy tüg'óciy naax cajp. 11 Mïid miich ajcxy ycixpi ti ypi'c'aty cham ma je David ycajp tüg jäy huidibi miich ajcxy xyñihuánaam xycohuánaam ma ajcxy mmidzip. Hue' je' je CRISTO, je Huindzin Dios. 12 Yi' je' ijxpéjtip huidi mïid m'ijxcabipy. Mbáadipy ajcxy je ung ma'xung nímóchity mïid ymotz, ycöcnäy ma iyujc pëcxi'ñ.

13 Chi janch mic'amy ñayguëxici mïid je ángel may yi tzajpjotychinaaybi, chach Dios ojadajtcixy yminaangixy:

14 ¡Ooy ycómáity ooy ymijity yi Dios tzajpjotypi, ji naaxhuiñ jotcuyc'ajt mïid jäy ajcxy ycixpi huidibi Dios yjäygidacpy!

15 Jadu'n yajty co je ángel ajcxy n'icxtay tzajpjoty, chi je cöbixy cuend'ajtpi ajcxy ñayñimay:

—Tzoc jámim jim Belén, jaydëbi n'ijxim ti ti ytunyii ti yjadyii huidibi nHuindzin'ajtim Dios ti xyajnimáayim.

16 Chi ajcxy n'icxy jottigoy, chi oy pátcixy María, José etz je ung ma'xung y'agögiiyity ma je iyujc pëcxi'ñ. 17 Co ajcxy ijxy je María etz je ung ma'xung,

huin'it ajcxy nigapxtay nimiydactay jadu'n nej je ángel ajcxy ñimayi mïid je pi'c'anäg ycixpi. ¹⁸ Tüg'óciy jäy huïdi midou ooy jihuïy huinmay jadu'n nej je cöbixycuend'ajtpi ajcxy yminañ. ¹⁹ Chi María mido'mbijctay, e yajhui'my ma yjot yhuinma'ñ. ²⁰ Chi yhuimbijty je cöbixycuend'ajtpi ajcxy cömay jäy mech ajcxy yi Dios, etz ooy alabanza ajcxy ñy mïid Dios ycixpi mïid tüg'óciy jadu'n nej anajty ti ñjxcixy ti midóogixy, etz jadu'n nej anajty ti ñimáayigixy.

Pi'c Jesús yajcapxquëxïgy ma Dios ytïjc

²¹ Coductujc xï maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yxïmoy JESUS, jadu'n nej je ángel anajty jayïjp ti ymina'ñ ca'ni anajty chimïgyii yciyïgyii.

²² Co je xï oypaatni mina je María anajty yhuätzpïdzïmaamni, jadu'n nej Moisés ycötújcïn je jécyïp yminañ. Chi ajcxy mïidnicxy je ung ma'xung jim Jerusalén capxquëxïgaangixy ma yi Huindzïn Dios yhuinduu. ²³ Com jadu'n anajty yjaybétyity ma Huindzïn Dios ñecy:

Tüg'óciy ungoob yëydïjcpï huïdi ma'xung'ajtp, abïcy yhuï'mïpy mïid je Huindzïn Dios ycixpi.

²⁴ José etz María ooy yéjccixy huindzïgi'ñ jadu'n nej Huindzïn Dios ñecy ymina'ñ co jëbi yecy metzc jam muuxy o pajctza'm muuxy.

²⁵ Jim Jerusalén anajty chinäy tüg jäy huïdi anajty yxï Simeón, tudägyjäy je', etz ooy Dios jäy mech. Simeón y'ahuijxyp anajty mina Dios miñ yajjotcujc'ada'ñ Israeljäy ajcxy, e mïid je' anajty Dios yjihui'ñ ymic'ajt. ²⁶ Dios yjihui'ñ ymic'ajt ti anajty yajnejhuïyïi co ca' chojc öga'ñ, jayïjpnï oc'ixïpy je Huindzïn Dios yCristo. ²⁷ Je Dios yjihui'ñ ymic'ajt yajmin yajmejtzi Simeón yhuinma'ñ huen nicxy ma Dios ytïjc; huin'it Jesús ytaj yteedy ymïidnicxi ma Dios ytïjc, cuyduñ ajcxy jadu'n nej Dios ñecy y'ane'my. ²⁸ Chi Simeón tzendzoy etz capxpaady je ung ma'xung, e chi Dios mïbijctzoy mïid je' ycixpi, chi yminañ:

²⁹ Jadachambi capxcïx jotcujc, Huindzïn Dios, mïid ñch miich mdumbi, com ti mguyduñ jadu'n nej ti xyñimäyïch co n'ixïpyïch je Cristo.

³⁰ Cham ti n'ixyïch je nihuambi cohuambi,

³¹ huïdibi ti mni'ixïy ma tüg'óciy jäy ajcxy yhuinduu.

³² Jada ung ma'xung ytïy'ajt yegïp ma yi jäy ajcxy huïdi ca' yjudiojäyity. Jadu'n yi' nipaady nej tüg jin huïdi codïcïp je jäy. Cömay y'idïpy yi Israel jäy mïid yi' ycixpi.

³³ José etz Jesús ytaj ooy jihuïy huinmaay jadu'n nej Simeón ñigapxy je pi'c ma'xung. ³⁴⁻³⁵ Chi Simeón conuucx yi' ajcxy, e nimay María, Jesús ytaj:

—Jadayaabi pi'c'anäg hue' jada aminïy co may Israel jäy yjothuinma'ñ yaj'oyïhuïpy mïid yi Dios etz nañ jadu'n may Israel jäy yjothuinma'ñ ca' yaj'oyïhuïpy mïid yi Dios. Yi' je' tüg ijxpejt co ca' jäy y'ixa'nïyb choga'nïyb, e jadu'n tüg'óciy yajnejhuïhuïpy nej ajcxy nidüg nidüg yjothuinma'ñ mïidity. E miich m'idïpy jotmaymïid jadu'n nejihuïy tüg espada ti xyajtzaachïy.

³⁶⁻³⁷ Nañ jim Jerusalén anajty tüg töxyjäy huïdibi anajty yxï Ana, Dios je' anajty y'ayucnajtzcapxïybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypijcy e jëyi huixtujc jimïjt chinay mïid yña'y, mada'px mïdaax jimïjt anajty cujc co'ögy chinäy, e ca' anajty ytïgoy'ity ma Dios ytïjc. Ana ytumb anajty tzajtïgoty xïm tzuum jopy ayuu anajty ycapxtägy. ³⁸ Chi Ana nimiñ José etz María jïiby ma Dios ytïjc, e quipxy mïid ajcxy huïgapxtacy je Huindzïn Dios. Chi je Ana nimiydacy je pi'c Jesús mïid tüg'óciy jäy jim Jerusalén huïdi anajty ajcxy jïjp'ïjxp mina Dios cohua'na'ñ Jerusalén ma ymidzip.

Co ajcxy nicxni jim Nazaret

³⁹ Co oy yajcuydundäy tüg'óciy jadu'n nej je Huindzin Dios ñecy ymina'ñ, chi José etz María ñícxcixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy mïid huijy'ajt cujc'ajt, etz ymïid je' Dios ymay'ájtïn y'oy'ájtïn.

Je pi'c Jesús yajpaady ma Dios ytijc

⁴¹ Jimïjt jimïjt yi ungdaj ungedeedy ñicxy anajty ajcxy jim Jerusalén co anajty je Pascua xï paady. ⁴² Co Jesús anajty ymajmetzjimïjt'ajty, chi ajcxy ypättigïy jim Jerusalén jadu'n anajty ajcxy costumbre mïdity co xï paady. ⁴³ Co je xï ñaxtäy, chi ajcxy huimbítcixni, e Jesús yhuimïy je' jim Jerusalén. Ca' José etz ytaj nejhuïy ajcxy co ti anajty yhuimïy. ⁴⁴ Hue' ajcxy anajty tijj je' ymiñ axaam mïd ymïgügtijc. Co tüg xï yöyixni, chi ajcxy ixtay je' y'ung ma y'amïgügtijc ajcxy, etz huïdi mïd ñay'ixy'adyii ñaymïgüg'adyii. ⁴⁵ Co ca' ajcxy y'ung paady, chi yhuimbítcixni jim Jerusalén ung ixtaaybi.

⁴⁶ Chi jadu'n yajty codugïg xï oypaatcixy jim ma Dios ytijc, Jesús y'iñäy anajty agujc'amy ma je huindzindijc. Yi' anajty y'amïdo'ijtyp yi huindzindijc y'ayuc, e nañ yaj'amïdooy anajty tijaty. ⁴⁷ Tüg'óciy je huindzindijc huïdibi midou Jesús y'ayuc, chi ooy ajcxy huinmay etz jihuïy jadu'n nej je Jesús huinjihuïydäy etz jadu'n nej anajty tiydudägy y'adzooy. ⁴⁸ Co Jesús ytajyteedy y'ixpati, chi ooy ajcxy tzachjihuïy. Chi ungdaj yminañ:

—Aay ung, ¿nej co miich jadu'n xytúngixyich? Yi mdeedy etz ïch yam tzachjottigooyb nay'adzïyïijich n'ixtáaygixich miich.

⁴⁹ Chi Jesús y'adzooy:

—¿Na'amy co miich xy'ixtáaygixyich? ¿Ca' mnejhuïygixy co copity n'ida'ñich ma nDéedyich ytung?

⁵⁰ Chi ajcxy ca' huinjihuïyi Jesús y'ayuc huïdibi ycapxy.

⁵¹ Chi Jesús mïd nicxy je' ajcxy jim Nazaret. Chi Jesús capxymïdoy ytaj yteedy. Chi yi' ytaj yajhuimday ma yjot yhuinmañ tüg'óciy nej ytunyï yjadyii. ⁵² Chi Jesús ixpijc'adïtzp anajty ooy, etz yeegy yjägoyj huijycujc. E yi Dios etz jäy ajcxy ooy anajty jäygidaaccixy.

3

Juan el Bautista y'ayuccapxhuäcxy mïjtigïduum

¹ Ma anajty je Tiberio César yjimïjtoty, mïmajmocx jimïjt anajty maabi y'ane'mtigïy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisanas anajty rey'ajtp jim Abilina. ² Chi je Anás etz Caifás je' ajcxy anajty teedy mïjtungmïd ma Dios ytijc. Je huin'it tiempo Dios y'ayuc yja'ty ma je Juan, Zacarías ymang, huïdibi anajty tzinaayb mïjtigïduum. ³ Chi Juan choñ ñicxy ma tüg'óciy cajp mïhuïngon je Jordán mïjnï, capxhuijy je jäy ajcxy, co huen jothuimbijttaaygixy etz huen nïbejtcixy jigix ajcxy ypocy yajhuinmeecxp. ⁴ Jada jadu'n tuni jajtï nej je ayucnajtzcaxïybi Isaías anajty ti cojaay:

Jim mïjtigïduum yajmïdooy tüg jäy mina'ñ: “Yaj'oyïygix yi Dios ytü'aa, tim jadu'n nej jäy ajcxy yaj'oyïygixy yi jibic tü'aa co tüg rey mina'ñ.”

Yajtïygixy yi tü'aa huïdibi ooy y'adijy y'a'och.

⁵ Tüg'óciy anï ahuoc huen joyïydäy, tüg'óciy tungop huen nañ jadu'n joyïydäy. Tüg'óciy nï'aa tü'aa huïdibi tijmin tijxïjp huen tïydäy. Yi tü'aa huïdibi ca' quipxyjátty huen quipxyjaty tïydäy.

⁶ Tüg'óciy yi jäy ajcxy ixïpy ñejhuïhipy nej Dios yega'ñ je nihuambi cohuambi.

⁷ Chi Juan ogy ajcxy je jäy pinjaty anajty miimb n̄ibejtpi, ym̄inañ:

—iMiich ajcxy tza'ñ ajcxy y'ajugy y'amigüg! ¿Pin miich ajcxy ti xynimäy quëg ma yi ayo'n huidibi Dios yquexaamy? ⁸ Túngix oybi, jothuimbíjtcix, ca' ajcxy m̄inaangixy miñ xyipy: “Abraham ñich ajcxy n'ap'ajtpy ndeedy'ajtpy”. ñich miich ajcxy n̄imaayb co Dios ixti jēbi yi' yaj'ung'adyii yaj'anäg'adyii Abraham jada tzaa ca'ydi miich ajcxy. ⁹ Dios ni'ixi y'ity jaydēbi yajcōdigoyipy jäy ajcxy y'alma huidibi jibic-huinma'ñ m̄id. Tim jadu'n nipaady nej jäy ni'ixi y'ity m̄id jacha co pujxiga'ñ tüg quipy huidi ca' oy ytim'aty, etz yajnōgtāhua'ñ.

¹⁰ Chi je mayjäy ajcxy y'amidooy je Juan:

—¿Ti ñich ajcxy jēbi nduñ?

¹¹ Chi je Juan y'adzooy, ym̄inañ:

—Pinjaty yhuit m̄id metz, jaydēbi möy pin ca' m̄idity ni tüg. Etz pinjaty caagy m̄id nañ jadu'n möhuipy pinjaty ca' m̄idity.

¹² Chi miñ jadyii yajcogüejtpi co anajty ñ̄ibedaangixy, ym̄inañ ajcxy:

—¿Ti huaad ñich ajcxy nduñ (jigix Dios xymijotcujc'adipyich)?

¹³ Chi Juan y'adzooy:

—Ca' ñigi anaxy myajcogüety jadu'n nej je cōtújcin y'ane'my.

¹⁴ Chi soldado ajcxy ym̄inañ:

—¿Ti ñich ajcxy ndunipy (jigix Dios xymijotcujc'adipyich)?

Chi Juan y'adzooy:

—Ni pin ajcxy ti mgapíjciy, ni mgan̄ihuambedipy ajcxy. Nañ jadu'n mijotcujc'ajtcixy nej myajmujuuuygixy.

¹⁵ Je mayjäy yjijp'ijxyp anajty ajcxy ooy, etz ooy jihuüy huinmaay ne-jhuñhuaangixy pen yi Juan je' anajty Cristo. ¹⁶ Chi Juan nimay ajcxy nidüg'óciy:

—ñich janch nyajñibéjtypich jäy m̄id n̄i. Miimb je' axaam huidibi jacmij ca'ydi ñich, ca' huaad yi' ycighuin ngejich. Je' miich ajcxy xyajñibedipy m̄idi Dios yjihuñ ymic'ajt etz m̄idi j̄in. ¹⁷ Je Cristo ni'ixi y'ity co oybi möhua'ñ je jäy huidibi ajcxy oyhuinma'ñ m̄id, etz ym̄ohuaamy tzaachyp̄i je jäy ajcxy huidibi jibic-huinma'ñ m̄id, tzaachyp̄i huidibi nicamina ycixipy. Tim jadu'n nipaady nej tüg jäy ni'ixi y'ity co ymoc-huimboja'n, e chi je oybi mocpajc pidāga'ñ ma che'x, etz je mocjaam ninögihua'ñ, e cam̄inaxi ycapidza'ñ je j̄in.

¹⁸ Je Juan ooy jäy capxhuijy, etz canaagnax oybi ayuc capxhuäcxy. ¹⁹ Chi yi' ogy je rey Herodes, co y'uch Felipe ytōxyjic Herodías m̄id tzinaayi, etz jacjaydiiybi jibic-huinma'ñ t̄ibi Herodes anajty tuñ. ²⁰ Chi je rey Herodes ñigi pocytuñ co Juan pidacy pujxtigoty.

Je Jesús ñ̄ibejt̄in

²¹⁻²² Chi jadu'n yjajty co jadu'n tüg'óciy jäy ñ̄ibejttay nañ jadu'n Jesús ñ̄ibejty. Yam anajty Jesús ycapxtägy co je tzajp y'ahuaach, etz je Dios yjihuñ ymic'ajt ym̄inajcy ma Jesús ycōduu m̄id ñ̄in̄icx jadu'n nej muuxy ñ̄in̄icx. Nañ jadu'n yajm̄idoy tüg ayuc choñ tzajpjoty ym̄inañ:

—Miich n'ung'ajtpy, ooy ñich miich ndzocy ooy njihuüy, ooy njotcújciyich m̄id miich.

Jesús ym̄ij'ap ym̄ijteedy

²³ Jesús hue' anajty yjimij̄t oy ni iipxmajc co ytungtiḡiyy. Hue' je' anajty jadu'n jäy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je' Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je'

Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel, je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

4

Je mujcu' tuñ ijxta'ni ma Jesús

¹ Jesús ym'iid'ajtpy anajty je Dios yjihui'ñ ymic'ajt. Co Jesús jim choñ ma Jordán mij nii, chi je Dios yjihui'ñ ymic'ajt yajnicxi m'ijtig'iiduum. ² Jesús y'ijty huixchigui'px xii jim m'ijtig'iiduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xii ñajxni, chi oy yuuböccodyii. ³ Chi je mujcu' nimay:

—Peni janch miich Dios xy'ung'adyii, nimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan m'iid tzajcaagy t'ajty jäy ajcxy yjugy'aty, nañ jadu'n tzocy t'üg'óciy Dios y'ayuc.

⁵ Chi je mujcu' m'iidpejty Jesús ma t'üg cop janch cixpi, chi t'üg jaxigy yajni'ixiiy t'üg'óciy je naax cajp hu'idi jii naaxhuiñbi. ⁶ Chi je mujcu' y'minañ:

—Hich miich möhuipy t'üg'óciy mic'ájtin ané'min etz oy'ájtin, com hich ngi'am y'ity t'üg'óciy, e nmöhuibich hueñyimp'inity. ⁷ Pen xyhuingoxtinäybych xy'ojadajtpich miich, ac miich jada mje' t'üg'óciy.

⁸ Chi Jesús y'adzooy, y'minañ:

—Huinhuägtuut'c'ich miich mujcu', com jadu'n jaybéty y'ity: “Co yi Huindzin miich m'Dios mhuingoxtinähui'py m'ojadadipy, etz yi' je' t'üg pajc myajmij'adipy.”

⁹ Chi je mujcu' m'iidnicxy Jesús jim Jerusalén, chi m'iid pejty ma Dios ytijc coduu, e nimay:

—Pen Dios miich xy'ung'ajtp cödijpnax naaxcíxy, ¹⁰ com jaybety jadu'n y'ity ma Dios ñecy co quexipy Dios yí y'ángeles ajcxy e xycuend'adipy. ¹¹ Cígíxy ajcxy xyhuidzipy, ca'ydi mdzaachiy ma tzaajot.

¹² Chi Jesús ymínañ:

—Ji Dios y'ayuc huídi jadu'n minam co ca' mjot'ixipy mhuinmañ'ixipy yí mHuindzin Dios.

¹³ Co je mujcu' yajcixy jadu'n nej anajty jot'ixañ huinmañ'ixañ Jesús, chi huinhuágtuuty tüg tiempo.

Jesús yajtzondägy je' ytung jim Galilea

¹⁴ Chi Jesús nicxy jim Galilea, e Jesús mïid'ajtpy je Dios yjihuiñ ymic'ajt. Chi Jesús ooy cömay y'ijty ma tüg'óciy cajp huinduy agonbi. ¹⁵ Hue' Jesús anajty yaj'ixpicy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jim Nazaret

¹⁶ Chi Jesús ymíñ Nazaret ma anajty ti yeegy. Chi Jesús ytigiy ma naymujctac, jadu'n nej costumbre anajty mïidity pocxxiuduum. Chi ytinaay'ahuíy, chi ytigíy necycapxi. ¹⁷ Chi ajcxy mooy je necy huídibi je Dios y'ayucnajtzcapxiybi Isaías yjaay. Chi ciyhuácxy je necy, paty jiiby tüg it ma anajty yjaybétyity jadu'n:

¹⁸ Je Huindzin Dios yjihuiñ ymic'ajt xymïid'ajtpich, co xyajñibicyich co nyajñimähuibich ayoobitijc je oybi ayuc. Ti xyquexyich co nyajjotcugihuibich je jäy ajcxy huídi jotmay ymïd, etz nhuinméecxibich huídibi ajcxy pujxtigótyip, nañ jadu'n ajcxy je huídibi huíntzíp nyajhuindicxigibich, e nbidägibich ahuátztuum huídibi yajtzaachytumb.

¹⁹ Ti xyquexyich co ngapxhuácxibich je tiempo mina Huindzin Dios may'ajt oy'ajt tunañ mïid je jäy ajcxy ycixpi.

²⁰ Chi jada' Jesús abidijty je ñecy, yajcïdigíy je tungmïdipi, huin'it y'ixtacy. Chi tüg'óciy mayjäy jiiby ma naymujctac ooy ajcxy huindicxy je Jesús. ²¹ Chi Jesús yminandacy:

—Cham yajcuydun je' huídi jaybety ma Dios ñecy jadu'n nej miich ajcxy cham ti mmidooy.

²² Chi nidüg'óciy ajcxy ooy jäygidacy nej Jesús minañ, etz huinmay ajcxy ooy je ayuc huídibi Jesús ycapxy, chi ñayñimáayigixy:

—¿Nej ca'y José jada jada' y'ung?

²³ Chi Jesús ymínaañ:

—Ca' yjécyity miich ajcxy xyajñimähuibich jada ayuc: “Tzoydumbi naychoyñhuñ ci'm. Tüg'óciy jadu'n nej ñich ajcxy nmidooyich ti mduñ jim Capernaum, nañ jadu'n miich octun ma mgi'mgajp.”

²⁴ Chi Jesús yjacmínañ:

—Janch ñich miich ajcxy nnimäy co ni tüg jäy huídibi Dios y'ayucnajtzcapxiybi ca' jäy ajcxy cöbicy ma yc'mgajp. ²⁵ Janch ñich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinaay, co je tzajp adujcy tugíj jimijt jatudujc po', co oy yuu miñ ma tüg'óciy naax cajp. ²⁶ E Dios ca' quejxy je Elías ma yí Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huídi jim. ²⁷ Nañ jadu'n anajty ooy mayjäy püd pa'm mïidity ya Israel jecy'ajty co je Dios y'ayucnajtzcapxiybi Eliseo chinay. Chi ni tüg jäy huin'it catzoocy, jéy tügpaic choocy pa'mjäy huídibi anajty yxñ Naamán huídi tzoon Siria naaxjot.

28 Huin'it tög'óciy jäy huidi anajty jii by ma naymujctac ooy yjotma'tcoty co jada yaab ayuc ajcxy midooy. 29 Chi je mayjäy ajcxy nibidígy Jesús etz yajpidzimy ma je cajp. Chi ajcxy yajnicxy jim ma je tzaahuingueetz, co je cajp copcíxy anajty yajpaady, e jim anajty cödi jpnaxaangixy. 30 Chi Jesús ñajxy cujc'amy ma je' ajcxy, chi ñicxni.

Tüg yëydijc huidibi anajty mïid jibic espíritu

31 Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpicy pocxxiduum. 32 Huinmay ooy ajcxy jadu'n nej je' yaj'ixpicy. Ñayñimáayigixy co je Jesús yaj'ixpicy nejihuüy mijtung mij'ané'min mïidity.

33 Jii by ma je naymujctac jii by anajty tüg yëydijc huidibi mïid tüg ca'oybi, chi je ca'oybi mic yaaxqueecy yminañ:

34—Ixmajtcich ajcxy, ¿ti mdunamy mïid ñich ajcxy Jesús je nazaretpi? ¿Nej ti mmiñ co xyajhuindigoyáanigixyich? ñich miich n'ijxcapy co miich je' je Huätzpi Dios.

35 Chi Jesús je ca'oybi ooy, nimay:

—Amon, pidzim ma yi jäy.

Chi je ca'oybi najztijiy je yëydijc agujc'amy ma je jäy ajcxy, huin'it ypidzimy, e ca' ni nej jactuuñ. 36 Tüg'óciy jäy jim ooy ajcxy ñay'adzigiiyi miñ xyipy yjanayñimáayigixy:

—¿Ti ayuc jada' yi'? Co mïid y'ané'min etz mic'ajt ane'my ca'oybi etz yajpidzimy ma jäy.

37 Chi Jesús capxpaady y'ijty ma tüg'óciy cajp huidi huinduy agónip.

Jesús yajtzoocy Pedro ymïd töxyjäybi

38 Chi Jesús ypidígy choñ ma naymujctac, ytigiiy ma Simón ytijc. Jadu'n anajty Simón ymïd töxyjäybi mic ytoyii. Chi ajcxy cohuaniiy Jesús mïid je' ycixpi. 39 Chi Jesús yhuindacy ma je' yhuinduu, ix'ooy je toyii, e jadu'ñi ñajxy. Chi je' mic'amy ypidígy, yajcay yaj'uucy ajcxy.

Jesús yajtzoocy mayba'mjäy

40 Tzuu tzuu anajty jäy ajcxy yajnicxy tüg'óciy jäy ajcxy pa'mmïidpi ma Jesús. Chi Jesús cñixajy nidüg nidüg, e jadu'n anajty ajcxy chögy. 41 Chi nañ jadu'n je' ca'oybi yajpidzimy ma mayjäy, mic je ca'oybi anajty yhua'ñ yjihuüy, yminañ:

—Miich je' Dios xy'ung'ajtp.

Chi Jesús nigí ix'ooy, ca' anajty yajhuäcxipy nicxy yjaccapxy, com ti anajty nejhuüygixy co yi' je' je Cristo.

Jesús y'ayuccapxhuäcxy jim Galilea

42 Co yximiiy, chi choñ Jesús, ñicxy mijtigiduum. Ooy jäy yja'ixtäyii, chi ajcxy oy paatcixy, yajhuäcxijpy ajcxy ooy, ca' anajty oc'ixmadzáangixni. 43 Chi Jesús yminañ:

—Ooy jada chachcopícyity co canaag agajp ñich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuiñ.

44 Jadu'n anajty je' capxhuäcxy majaty jäy ñaymujctac jim Galilea.

5

Je acxmajtzin mijhuinma'ñybi

1 Tügtecy jadu'n yajti, jim anajty Jesús ma je Genesaret mejypa', co jäy ñimiini janch ñay'adijiiy ñay'agodiiygixy, tzach'amidohuaangixy Dios y'ayuc.

2 Chi yí' i'xpaty mejtz barco jahueengi mejypa'áy. Je acxmajtzpidijc ti anajty ypidzímgi'xy ma je barco, jim anajty y'acxxuomy pújccixy. 3 Chi Jesús yajtigiyíy tüg barco huidi Simón anajty je'ajtpy. Chi may'ajt pijtzoy co huen yajjihuägy hueeni yí' barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjäy ajcxy. 4 Co ycapxymaayi, chi Jesús Simón nimay:

—Nícx pidäg m'acxmadzi'ñ mejyjoty, jaydëbi májtzcixipy acx.

5 Chi Simón y'adzooy:

—Huindzin, ti ñich ajcxy ooy njatuñ tüg tzuum, ni ti ti ngapáatcixyich. Per miid miich m'ayuc ycixpi yí' acxmadzi'ñ nbidägibich mejyjoty.

6 Co ajcxy pidacy je acxmadzi'ñ mejyjoty, chi yajco'adujcy ooy may acx, jahueeni acxmadzi'ñ ycaciich miid je may acx ycixpi. 7 Chi Pedro yemi ymigügtijc huidi anajty jim ma je jadügpí barco, huen miñ ajcxy pubedyii. Chi ajcxy ymiñ pubejtp, yaj'ujch ajcxy metzpi barco miid may acx, jagoo jagoo ycaquiñ je barco miid may acx ycixpi. 8 Co Simón Pedro ijxy jadu'n, chi ycojxtinaay'ahuíy ma Jesús yhuinduu, nimay:

—Huinhuäctútcich, Huindzin, com ñich pocyjäy ñich.

9 Com Pedro janch tzigíyb anajty, etz nañ tzigíyb tüg'óciy huidi anajty miid ti ytuñ, co anajty ooy may acx tzachyajñibéjtcixy. 10 Nañ jadu'n tzigíyb anajty je Jacobo etz Juan je Zebedeo ymang ajcxy huídibi Simón anajty ti pubety. Chi Jesús ñimay Simón:

—Ca' mdzigíy, jadachambi etz jacnicxni xii tiempo mdunipy jäymadzii.

11 Co je barco yajmejypidzimy, chi ajcxy y'ixmajch tüg'óciy, chi ajcxy panícxty Jesús.

Jesús yajtzögy tüg jäy nibützpa'mmiidpi

12 Chi jadu'n yjajti co anajty Jesús yjimíty ma tüg cajp, co ñimiini tüg yëdijc ymiid anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, nimay:

—Huindzin, pen mdzojcpy jëbi xyajtzögibich.

13 Chi Jesús yci' najtzxajíy nidoon, nimay:

—Ndzojcpyich, hui'm huädz.

Chi mic'amy je jäy choocy. 14 Chi Jesús ane'my, nimay:

—Ca' ni pin myajnimähuipy, nícx janchtiy nayguëxigíib ma teedy, jaydëbi möhuipy Dios huindzigi'ñ, jadu'n nej Moisés ycötújcín je jécyip y'ane'my, miid yí' ycixpi co ti mhuätzpidzimy, jaydëbi jäy ajcxy nejhuíhuipy co ti mdzögy.

15 Je capxy'ayuc nígi y'oc-huäcx'adítzní, e janch mayjäy y'ocnimújcin, jim pin ayuc midohuaam, e jim huidi tzögaam. 16 Jesús ycögueecpy anajty je mayjäy, ñícxty anajty mijtigíduum Dios ojadaajtpi.

Jesús yajtzögy tüg jäy cixuxypi tecyxuxypi

17 Tüg teczy yjajti, Jesús anajty yaj'ixpijcp, e jim anajty ajcxy iñäy ma Jesús yhuinduu fariseojäy ajcxy, etz huidi jäy yaj'ixpijcp Dios ñecy huídijaty anajty ti choongíxy canaag agajp ma Galilea naaxjot Judea naaxjot, etz cham huídijaty anajty ti choon Jerusalén. E Jesús ymiid anajty Huindzin Dios ymic'ajt co jäy yajtzögipy. 18 Chi nijëjity jäy yajja'ty cijx'am tüg pa'mjäy yëdijcpi huidi ca' anajty yci' ytecy yücxy. Chi ajcxy ixtaay ma yajtijctigíhuipy pidäga'ñ anajty ajcxy je pa'mjäy ma Jesús yhuinduu. 19 Com ca' anajty ni ma tigiyíydac miid co je tijc anajty ooy y'újtzy miid mayjäy. Chi ajcxy miidpejty tijc nígíxy, chi ajcxy tijc yajcöhuach, e chi ajcxy cödiyñajxy cijx'am je pa'mjäy ma Jesús yhuinduu. 20 Co Jesús ijxy jadu'n nej je' ajcxy ymibicy, chi nimay:

—Yëdijc, yajmeecxp mbocy.

21 Chi je' ajcxy huidi yaj'ixpijcp Dios ñecy etz je judío ixpicytjic huidi naydíjigixp fariseojäy huinmaygoty, ñayñimáayigixy: “Jada Jesús ooy ycapxtigoy müd Dios. Ni pin yéydjic huaad ca' ti pocymeecxy. Tügpaic nHuindzin'ájtım Dios huidi pocyhuinmecxp.”

22 Jesús ñejhuııy je' ajcxy yjot yhuinma'ñ, paady ajcxy nimay:

—¿Ti mdzachhuinmaayb ajcxy ma mjot mhuinma'ñ? 23 ¿Ti jactzip co minaanım co ti mbocy yajmeecxy o minaanım: “Pidig etz nicxni?” 24 Jaydëbi miich ajcxy mnejhuııhuıpy co ich je' je jäy huidi tzoon tzajpjoty, nmıdich ané'mın etz mic'ajt ya naaxhuıñ jëbi jäy nbocyhuinmeecxyich, paady cham nnımäyich yi pa'mjäy: “Pidig etz yajpidig mmaabejt, nicx ma mdijc.”

25 Chi mic'amy je pa'mjäy ytinayıgy ma je jäy ajcxy yhuinduu, etz yajpidıgy je' ymaabejt ma anajty ycögnäy. Chi ñicxni ma ytıjic, chi ooy cömay jäymejch Dios. 26 Huin'it nidüg'ócıy je mayjäy ooy ajcxy jıhuııy, e chi ajcxy ooy cömay etz jäymejch Dios. Chi ajcxy ooy chıgyıgy, ymınaangıxy:

—Cham janchtıy n'ıjım mıjhuinma'ñ.

Jesús huodzoñ je Levı

27 Co jadu'n ytunı yjajtı, chi Jesús jım choñ, chi ijxy tüg yajcogüejtpı huidi anajty yxıı Levı. Levı jım anajty ıñäy ma yajgogüejttac. Chi Jesús nimay je Levı: —Pajaamgıch.

28 Chi je Levı ixmajtztay huidi anajty ytuummyb etz padzoñ je Jesús.

29 Chi Levı mayjäy yajcay yaj'uucy ma ytıjic, cham may yajcogüejtpı ajcxy etz jacjadyıı jäy huidi ıñaayb ma yi mesa müd Jesús etz yi' ydiscıpusos ajcxy. 30 Chi je' ajcxy huıdibi yaj'ixpijcp Dios ñecy etz je ixpicytjic huidi naydíjigixp fariseojäy tzachni'ameechycápxcıxy ni'ojıgyıgy je Jesús ydiscıpusos ajcxy, ymınaangıxy:

—¿Na'amy co mgaaygıxy m'uuccıxy müd yajcogüejtpı etz müd pocyjäy ajcxy?

31 Chi Jesús ymınañ:

—Ca' yajmayjatı tzoydumbı huıdibi ca' ajcxy ypıgyıı, jëyi huıdı ajcxy pıjıcp.

32 Ca' ich ti nmiñich ma je jäy ajcxy huıdibi ca' pocy müdıtıy. Ich ti nmiñich müd yi pocyjäy ycıxpı co huen jothuımbıjttaaygıxy ma Dios.

Yaj'amıdooy ajcxy Jesús ti co jäy ajcxy y'ayunas'ájtıxy

33 Chi je mayjäy ajcxy Jesús nimay:

—Nej co yi' (Juan) ydiscıpusos ajcxy janam jadojıc jaygay y'ıjtıxy etz ycapxtáccıxy, nañ jadu'n je fariseojäy ydiscıpusos ajcxy janam jadojıc jaygay y'ıjtıxy. Chi miich mdiscıpusos ajcxy ca' ajcxy jaygay y'ıjtıxy, caaby uucp ajcxy jabom jabom.

34 Chi Jesús ymınañ:

—¿Nej jëbi yaj'ayuu'aty jäy ajcxy huıdı yajpatpı ma je pıjıcpı yajnıxıduñ, pen quıpxıy yam yajpaady müd je huıdibi pıjıcp? 35 Minamb je xıı je tiempo mına je pıjıcpı yajtzonıyb, huin'it janchtıy ajcxy jëbi y'ayuu'ájtıxy.

36 Nañ jadu'n ajcxy yajnımay tüg jıhuımbıt ayuc:

—Ni pin ca' huaad agıyıy tuc-huit müd jemyhuit, canaan jëyi ycıdzıp yi jemybi, nañ jadu'n je tucpı ca' oy yhuı'ma'ñ müd je jemyhuit agıyı'ñ. 37 Ni pin ca' pidägy jemy vino ma je tucpı cochac, pen janch jadu'n octuñ, je vino jemybi ycıdzıp je tucpı cochac, chi y'ıxyojctähuıpy je vino etz je cochac ñıtıgoydähuıpy. 38 Pidägıpy ajcxy jemy vino ma tüg jemybi cochac, chi jadu'n ca' ytıgoyıpy je vino ni je cochac. 39 Ca' ni pin tzocy vino jemybi, pen ti anajty ügy vino tııbi yjejcni, co jadu'n ymınañ co jac oy je tııbi yjejcni.

6

Je discípulos ajcxy yajmújccixy trigo cojc pocxx#duum

¹ Chi jadu'n yjajti tüg pocxx#duum co Jesús oy ñaxy ma tüg trigo cam, e yí' ydiscípulos ajcxy oy anajty yajminájccixy trigo tiim, chi ajcxy nixajztüdy, e chi ajcxy jicxy. ² Chi nidügti fariseojäy ymínañ:

—¿Ti co ajcxy jadu'n mdundigooy co mdúngixy huidi ca' ñigodúcyity ajcxy mdunipy pocxin x#duum?

³ Chi Jesús ymínañ:

—¿Nej ca'ni miich ajcxy mgapxy Dios ñecy nijadu'ñy? ¿Nej ca' mnehuiygixy ti David ytuun co anajty yuubögyii etz nañ co ymigügtijc anajty yuubögyii? ⁴ David ytigíy ma Dios ytiç, chi conígy je tzajcaagy huídibi anajty jiiby ma Dios yhuinduu, chi caay, nañ jadu'n moy je ymigügtijc ajcxy. Je' tzajcaagy ca' anajty ypadyii nicxy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacmínañ:

—Hich je' je jäy huídibi tsoon tzajpjoty, jébi nnimäyich je jäy ajcxy ti jébi huaad ytúngixy sábado xii.

Je yëdyjc huídibi anajty yci' t'ádzip

⁶ Chi jadügtecy yjajti tüg pocxx#duum, co Jesús ytigíy ma tüg naymujctac, chi jäy yaj'ixpijcy. Jiiby anajty tüg yëdyjc huidi y'a'oygi' anajty t'ádzip. ⁷ Chi huidi ajcxy yaj'ixpijcp Dios ñecy etz fariseojäy ajcxy ix'ijxy pa'íjxcixy Jesús nej pen jäy yajtzögam pocxx#duum, e je' ajcxy anajty m#d ycixpi xíhua'ñ. ⁸ Jesús ñejhuíyb je' anajty ajcxy yjot yhuinma'ñ. Chi Jesús nimay je yëdyjc huídibi anajty yci' t'ádzip:

—Pidig, tinayíg mayjäy'agujc.

Chi je' ytinaayígy. ⁹ Chi Jesús ymínañ:

—Nyaj'amidohuaamybich miich ajcxy tüg ayuc. ¿Nej Dios ñecy ymína'ñ, jébi oybi nduunim pocxx#duum o jébi jibicpi nduunim, nyajtzoocim jäy o nyajtgooyim jäy yjugy'ajt?

¹⁰ Chi Jesús ajcxy huindixpejtay nidüg'ócay, chi nimay je pa'mjäy:

—Xajtiu mgi'.

Chi je' yci' xajtiy, huin'it je' yci' choocy. ¹¹ Chi je' ajcxy huidi yaj'ixpijcp Dios ñecy etz je ixpiçytijc huidi ajcxy mijpidacp judío ycostumbre ooy ajcxy yjot'ambijcy, ñayñimáayigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discípulos ajcxy

¹² Jadu'n yjajti huin'it xii Jesús ñicxy mijtig#duum Dios ojadajtpi. Tüg tzuum ooy Dios mibijctzooy. ¹³ Co yximíy, chi Jesús huoomiñ yí' ydiscípulos ajcxy. Chi huin'ijxy je majmetzpi, etz yximoy ajcxy, apóstoles. ¹⁴⁻¹⁶ Chi Jesús yhuin'ijxy je Simón huidi yximoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huidi jäy ytijpy Zelote; Judas, Jacobo y'uch; etz Judas Iscariote huídibi nañ jadu'n Jesús cäyejc ma ymidzip.

Jesús yaj'ixpiçy mayjäy

¹⁷ Chi Jesús m#d'idacy je discípulos ajcxy, chi oy yhuäcxipy ma tüg ajoy m#d ydiscípulos ajcxy etz mayjäy huidi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayjäy co am#doo'idáani Jesús y'ayuc etz nañ chögaangixy je pa'm huidi ajcxy ym#d.

¹⁸ Cham je huidi anajty ayo'n tzachpaatp m#d ca'oybi, nañ tzoocp je' anajty

ajcxy. ¹⁹ Chi tüg'óciy je jäy ajcxy janch ñidonamy anajty ajcxy je Jesús, co ymüid mic'ajt co jäy tüg'óciy yajtzög.

Je jotcuyc'ajt etz je cajotcuyc'ajt

²⁰ Chi Jesús huindicxpejtay je mayjäy huüdi ajcxy ixpigaam yi' y'ayuc, e ymüinañ:

—Jotcuyc miich ajcxy ayoobtjic, com miich ajcxy cham xypaat Dios y'ané'min.

²¹ Jotcuyc miich ajcxy huüdi cham yuubó'cip, co mgüxüüb miich ajcxy. Jotcuyc miich ajcxy huüdi cham jotmay müid, co ypáadip xü tiempo müna mxondáaccixipy.

²² Jotcuyc miich ajcxy müna anajty jäy ca' xy'ixaangixy, co pin xy'ixtjicixipy, e co jäy ajcxy jibic xyñigapxa'ñ xyñixiga'ñ müid üch ycixpi, je jäy huüdi tzoon tzajpjoty. ²³ Mxondäg miich ajcxy huin'it xü, etz mjotcugüygixip, com ooy chachmüjity huüdi ajcxy mbadaamy tzajpjoty. Com jadu'n anajty jecy'ajty miich mmij'ap mmijteedy ca' ixangixy je huüdi anajty Dios y'ayucnajtzcapxüipy.

²⁴ Miich ayoob ajcxy comeñyjäy, com ca' ti jotcuyc'ajtün mjacpadaangixy huin'it xü (co Dios tüydunip je naaxhuiñyjäy).

²⁵ Miich ayoob ajcxy huüdi cham oc'agujc'ajtp ocjotcuyc'ajtp, ayo'n jotmay ajcxy mbaadip, e myajmayjadipy miich ajcxy tijaty.

²⁶ Miich ayoob ajcxy co ajcxy myajnigapxipy myajnimüydägipy, com jadu'n jecy'ajty miich ajcxy mmij'ap mmijteedy nümay je jäy ajcxy co ooy y'oyjäy huüdi ajcxy anajty najtzcapxüyb ayuc huüdibi ca' ytiy yjáncity.

Nej huaad nmügüg ndzójim

²⁷ Chi Jesús yjacmünañ:

—Miich ajcxy huüdi cham amüdo'ijtp üch n'ayuc, üch miich ajcxy nümaayb: Tzójccix mmüdzip, mü'oyjäy'ajtcix huüdijaty ca' xy'ixaangixy. ²⁸ Mügapx je jäy ajcxy müid oyjot oyhuinma'ñ huüdi ajcxy jibic xyñigapxp xyñi'ojüyb. Mübijctzoogixy yi Dios müid je' ajcxy ycixpi huüdibi xyñigapxp xyñi'ojüyb. ²⁹ Pen ji pin xycojxy ma yi mhüinjüjp, mo' jadüg adu'm'amy ahüin hueñ coxy. Pen ji pin xypügaani yi mjocxhuit, jactimmo' müñjen huen yajnicx. ³⁰ Pin xypüjctzohüip tijaty, mo'. Pin xypüjccip huüdi miich mjé'ajtpy, ca' mübijctzohüipy jadüg'oc. ³¹ Nej mdzocy tunipy jäy müid miich ajcxy, nañ jadu'n miich ajcxy mdunipy müid yi' ajcxy.

³² Pen miich ajcxy jeyi mdzójccixpy pinjaty xychojccixp, ¿ti oyjäy'ajtin jada' miich ajcxy m'ocpaadipy? Nañ jadu'n je pocyjäy ajcxy chojcpy pinjaty yi' ajcxy tzójcip. ³³ Pen mdumyb oybi huüdijaty müid ooy mnaymügüg'adyii. ¿Ti oyjäy'ajtin jada' miich ajcxy m'ocpáadip? Nañ jadu'n je pocyjäy ajcxy tuñ oybi müid ymügügtjic. ³⁴ Pen myejcpüjctzou müid je jäy huüdibi miich ajcxy müjüjp'ijxpy co nañ jadu'n xymöhuüipy tigatii, ¿ti oyjäy'ajtin miich ajcxy mdumyb? Nañ jadu'n yi jibic jäydjic jayejcpü tijaty püjctzoy co nañ jadu'n jüjp'üjccixy co ymöhuüipy tigatii. ³⁵ Miich ajcxy, tzójccix mmüdzip, mü'oyjäy'ajtcix mmüdzip, yajpüjctzoogix tijaty, e ca' ni ti müjüjp'üjccixipy co ajcxy jac müj mbaadip. Jadu'n miich ajcxy müj mbaadip oy'ajtin e mnaydüjüyb ajcxy je müjpi Dios y'ung. Com Dios pa'ayoodaayb tüg'óciy yi jäy ajcxy huüdibi ca' ti jäygidägy, etz huüdi jibicjäy. ³⁶ Miich ajcxy pa'ayoo mügügtjic ajcxy, jadu'n nej müDios Teedy tzajpjoty ypa'ayoo huenyümpüinity.

Ca' mümügüg ni ti myaj'ix'ixipy myajpa'ixipy

³⁷ Ca' mmigüg ni ti myaj'ix'ixipy myajpa'ixipy, huin 'it ca' pin xy'ix'ixipy xypa'ixipy. Ca' mmigüg mbocy'ixipy, e huin'it ca' pin xypocy'ixipy. Huinmecx mmigüg, e huin'it nañ jadu'n Dios myajhuinmeecxip. ³⁸ Mo' mmigüg etz huin'it miich ajcxy Dios xymöhuipy quipxy ooy tijtäch etz janch yajxon y'útzity cödünaayb. Com yi quipxi'ñ tibi myajquipxy, nañ yi' mid xyquipx-huimbidity.

³⁹ Chi Jesús yajnimay je mayjäy tüg jihuimbit ayuc:

—¿Nej jëbi tüg jäy huintzpi ymigüg huintzpi huijzyöyñi? ¿Nej ca' mdiy nimetz yjutcögäxipy? ⁴⁰ Ca' ji ni tüg ixpijcpí huidi nigí ixpícyip ca'ydi yhuindzin, pen ji pin huädz yjadim'ixpícy najtzpadíhuipy yhuindzin.

⁴¹ ¿Na'amy co mic'amy mbocy'ixy mmigüg co hueeni ytundigoy, e miich jac mij ooy mdundigoy, e ca' mjihuifñybicy? Tim jadu'n nipaady nej jihuüy ti m'ixy pi'cpüx ma mmigüg yhuin, e ma miich mgí'mhuin jac jüby mij quipy, e ca' m'ixy je quipy ma mgí'mhuin. ⁴² Ca' huaad mnimáhuipy mmigüg: “Nayyegí miñich püx n'ocyajpidzim maabi mhuin”, e miich ca' m'ixy mij quipy ma mgí'mhuin. Jibicjäy miich. Jayijp miich myajhuädzip mjot mhuinma'ñ, huin'it jëbi mmigüg m'ihuüjip mgapxhuüjip, jadu'n nipaady nej jihuüy ti myajpidzimy je quipy maabi mhuin, jachuädz m'ixigipy e chi jëbi yi pi'cpüx myajpidzimipy maabi mmigüg yhuin.

Je quipy je ytüm, yi' mid ycixpi yaj'ijxcapy

⁴³ Ca' yi' y'oyjäyity huidi jibic tuumb, nañ jadu'n ca' jibicjäy huidi oy tuum, tim jadu'n nipaady nej tüg quipy. Ca' ji yi' oyguipy huidi jibic tím'ajt, nañ jadu'n ni ca' yjibicquipyity huidi oy tím'ajtp. ⁴⁴ Com ni je' quipy yaj'ijxcapy mid ytüm ycixpi. Ca' pin higueri tím tucy ma quipy apymüdpí. Nañ ni pin ca' uvas cha'm piy ma aadz apymüdpí. ⁴⁵ Je jäy oyjäybi ma yjot yhuinma'ñ yajpidzimy oybi. Je jibicjäybi ma yjot yhuinma'ñ yajpidzimy jibicpi. Huidibi yhuinmaayb jotjoty huinma'ñjoty yi' ycapxyp.

Je mejtznajxpi poch y'ijx

⁴⁶ Chi Jesús yjacmínañ:

—¿Nej co nigo mīnaangixy: “Huindzin, Huindzin”, ni ca' ajcxy mdúngixy huidi nyajnimaaigyipy? ⁴⁷ Tüg'óciy jäy huidi xyñimimbich etz xymidoohui ñch n'ayuc etz cuyduñ, ñch nyajni'ixihuipy pin je' ymidügnax. ⁴⁸ Quipxyiyb tüg yëydijc huidibi ytijcojpp ma tzaa nīcxy, chi nidajiy ooy cūcy, chi pidägy poch'ijx tzaa nīgixy, co mijñi ycomy nimiñ je tijc, mid tüg'óciy ymijaa jayajpidíga'ñ je tijc, e ni ca' jadu'ñyi yajyücx, com tzaagixy anajty ypojtzooñity. ⁴⁹ Yi jäy huidi midoob ñch n'ayuc e ca' cuyduñ, midquipxy jadu'n yi' nej tüg yëydijc co ti ytijcojy. Ni ca' poch cūcy ypojtzooñity, jëyi naaxhuingixy nidajiy hueeni. Co je mijñi ymiñ mid ymijaa, chi yajpidigy je tijc, chi oy yhuindigoydäy.

7

Jesús yajtzögy tüg mijtungmüdpí Romano ytumbi

¹ Co Jesús ycapxtaay ymydactaay mid je mayjäy huidi anajty jim amido'ijtp, chi ytigüy jim Capernaum. ² Jim anajty tüg Capitán tüg ytumbi hue' anajty pijcip, janch tim ögaanip anajty, e je soldado huindzin ooy anajty tzocy je ytumbi. ³ Co je capitán ayuc midooy jadu'n nej Jesús ytuñ, chi quejxy judío mijjäydijc, huen nīcxy minuucxtaaccixy Jesús co je' ymīipy ma ytijc yajtzögüyb je' ytumbi. ⁴⁻⁵ Chi je mijjäydijc ajcxy ymiñ ma Jesús, chi ajcxy cohuanüy ooy, pijctzou may'ajt, nimay:

—Jadayaabi capitán ymihuaad co mbubedipy, com yajmij'ajtpy ñch ajcxy ngajp, ti cojy ñch ajt naymujctac.

⁶ Chi Jesús ñicxy miid je' ajcxy. Co ajcxy mihuingooñ je tijc, chi je capitán quejxy ymígüg huen nicxy jipcobadiy Jesús, nimähuipy:

—Huindzin, ca' nej mnayjihuiyii, ca' ñch mihuaadity co mdig'huipy ma ñch ndijc. ⁷ E paady ca' ñch njot ti mictuñ co ñch miich ci'm n'ixc n'ixtäy. Jëda'ajty miich nigoo capx, e ti anajty ndumbich chögy. ⁸ Nañ jadu'n ñch nmüdich soldados ajcxy huidi ajcxy xycapxcöbijcpich. Nimäyich tüg: “Ñicx”, e nicxp; nimäyich jadüg: “Min”, e mimb; nimäyich ndumbi: “Tun jada”, e ytumyb.

⁹ Co Jesús midoy nej je capitán ymïnañ, chi jihuiy ooy, chi ni'ijxhuimbijty nimay ajcxy huidi pamiinip:

—Ñch miich yim nimaaygixyp co ca' nbaadyich Israel jäy huidibi xymibijcpich jadu'n nej jadayaab agatz jäy.

¹⁰ Co ajcxy je quexyöybi yhuimbijtcixni ma je tijc, chi oy páatcixni je tumbi ti anajty y'agidägy.

Jesús yajjugypijcy tüg co'ögytöxyjäy y'ung tñbi anajty y'ögy

¹¹ Chi jadu'n yajty huin'it xii co Jesús anajty ñicxy ma tüg cajp huidi anajty yxii Nañ. Miid anajty ñicxy jadyii ydiscipulos ajcxy etz mayjäy. ¹² Co yhuingooñ ma anajty ycajp tigihuaani, chi minaybaati jäy ajcxy, ñicxy anajty ajcxy tüg öcpi yajnaaxtigiygixy, huidi anajty ungdaj tügpajc y'ung'ajtpy. Hue' je' anajty co'ögy je töxyjäy, e miid anajty ñicxy maycajppjäy. ¹³ Co je Huindzin Jesús ijxy, chi pa'ayogoty je töxyjäy, chi nimay:

—Ca' myäxy.

¹⁴ Chi Jesús ymijhua'cy, nidoñ je öcpi cajón. Chi ajcxy ytinayxijpy je huidi anajty ajcxy öcpi ciyñicxp. Chi Jesús ymïnañ:

—Yëydijc, ñch miich yam nimaayb, pidig.

¹⁵ Chi je yëydijc ññayigy huidi anajty ti y'ögy, e ytigiy miydaacp. Chi Jesús yajcidigiyñi je' ytaj. ¹⁶ Chi ajcxy nidüg'óciy ooy ñay'adzigiyygoti, e Dios jäymejch cömay, ymïnaangixy:

—Tüg mijpi Dios tiy'ajtmütpi cham yajpatp ma ñch ajt.

Nañ jadu'n ajcxy ymïnaangixy:

—Ti Dios ni'ijxcidägy yi yñaax ycajp.

¹⁷ Ooy Jesús yajcömay ma tüg'óciy Judea naaxjot, etz ma tüg'óciy jac huinduy agonbi naax cajp.

Je Juan je Bautista yquexyöybi

¹⁸⁻¹⁹ Chi je jäy ajcxy huidi anajty Juan je Bautista yaj'ixpijcpy nimydactay jadu'n nej miid ytuni yajti Jesús. Chi Juan huooy metz yi' ydiscipulos ajcxy, e quejxy ma Jesús yajpaady. Chi Juan nimay co huen nicxy amidoogixy Jesús, pen yi' je' je Cristo huidi anajty miinaam, o pen n'ahuíjxpy ajcxy huingbi.

²⁰ Chi je Juan yquejxyöybi miin ma Jesús nimay:

—Yi Juan je Bautista ñch ajcxy ti xyquéxyich ma miich amidohua'ñ pen miich je' je Cristo huidi minaamb, o ¿n'ahuíjxypich ajcxy huingbi?

²¹ Tim huin'itiy Jesús ooy mayba'mjäy yajtzoocy. Yajtzoocy nañ jadu'n huidi anajty ajcxy ooy mij yuu mij pa'm yaj'ayoyii, etz nañ yajtzoocy pinjaty anajty ca'oybi miid ma yjot yhuinma'ñ. ²² Chi Jesús je Juan yquejxyöybi nimaayi:

—Ñicx nimaaygix je Juan jadu'n nej ti m'ijxcixy ti mmidoogixy, co yi huintzpi ti yhuindicxigy, yi tecyma'tpi ti yöyigy, yi nibützpa'mmiidpi ti chögy, je cönatpi ti ymidohuicxixy, je öcpi ajcxy ti yjugypijcy, e ngapxhuäcxyich oybi ayuc ma ayoohtijc. ²³ Jotcujc yi' ajcxy huidi ca' huinma'ñytigooygixy miid ñch ycixpi.

²⁴ Co je Juan yquexyyöybi yhuimbijttay, chi Jesús nimíydaccoty je Juan ma je mayjäy ajcxy, ymíñañ:

—Co ajcxy ti m'oy mijtigíduum, ¿ti ti m'íjxcixy? ¿Nej ti m'íjxcixy tüg jäy ametz jotmetz, jadu'n nejhuíy tüg nāhuaax huídi pojmiimb pojxiip? ²⁵ Chi jada', ¿ti oy ti m'íjxcixy? ¿Tüg yéydijc huídi míid oy yhuít yxöxyity? Yi jäy ajcxy oy yxojxypi huídi agujc jotcuic tzinaaygixp hue' ajcxy yajpaady ma yi rey ytijc. ²⁶ ¿Ti ajcxy ti m'ixy jim mijtigíduum? ¿Tüg jäy huídi Dios ytiy'ajt míid? Janch ti m'íjxcixy tüg Dios ytiy'ajtmíidpi, etz jacnigi ymíjity je' ca'ydi Dios y'ayucnajtzcapxiybi huídi jecy'ajty tzinay. ²⁷ Je' jada je jäy huídi Dios ñigapxyp ma ñecy ma Dios jadu'n ymíñañ:

Cham nguejxyich ñich nguexyöybi jayijp ma miich, je' yaj'oyíhuip je jäy ajcxy yjot yhuinma'ñ míid ñich ycixp, tim jadu'n nipaady nej jihuíy jäy tü'aa yaj'oyíy co rey ymíñañ yjáda'ñ.

²⁸ ñich miich ajcxy yam nimaayb co huídijaty ajcxy töxyjäydijc yajpi'c'ajtpy, ca' ji ni tüg Dios y'ayucnajtzcapxiybi huídibi jacnigi ymí jity ca'ydi Juan, je Bautista. Chi jada' je jac mutzpi huídi jiiyby tzajpjoty yajpaatp ma Dios y'ane'my, jacmij je' ca'ydi Juan.

²⁹ Co ajcxy je mayjäy jadu'n midoy nañ jadu'n je yajcogüejtpíidijc ajcxy huídi anajty ñibéjtcixy ma Juan, chi ajcxy míñañ co Dios ytudägyity. ³⁰ E je fariseos ajcxy etz je escribas ajcxy huídi anajty ca' ñibéjtcixy ma Juan, ca' ajcxy mijpíidacy huídi anajty Dios ytunamy míid je' ajcxy ycixpi. ³¹ Chi je Huindzin Jesús ymíñañ:

—¿Ti míid nyajquipxiñhuibich jadayaabi jäy huídi tzinayb ma jadachambi tiempo? ¿Huídi míid nyajtügíhuibich? ³² Jadu'n nej pi'ctijc huídi ajcxy iyíyib ma jäy yjuygixy ytoocixy. Mijhuan mijjihuiygyixy ymígügtijc: “Ti njayajxüxich flauta e ni ca' ti m'éjtcixy; ti nja'ñhuí ajcxy ñy jotmaymíidpi, e ca' ti myaaxcixy.” ³³ Chi Juan je Bautista ymiñ, e je' ca' anajty cay, ni ca' vino ügy, chi miich ajcxy mínaangixy co Juan ymíid ca'oybi. ³⁴ Chi ñich, je jäy huídi tzoön tzajpjoty, nmiñich, chi caaybich uucpich, e miich ajcxy mínaangixy: “Ijxcix, cha tüg yéydijc janch cax janch vino uucp, huídi migüg'ajtpy yajcuéjtpíidijc etz pocyjäydijc.” ³⁵ Je tiy'ajt ji je' ñiguëxígy ma je pinjaty nigapxp nimíydaacp tiy'ajt.

Jesús ma Simón je fariseojäy ytijc

³⁶ Chi tüg fariseojäy may'ajt píjctzoy, co Jesús anajty míid ycaya'ñ. Chi Jesús ytigíy ma je fariseojäy ytijc, chi ññay'ahuíy ma mesa. ³⁷ Chi jim anajty tüg töxyjäy huídibi anajty jibic tzinaayb jibic jugy'ajtp ma je jimbi cajp. Co je' nejhuíy jiiyby Jesús ma fariseojäy ytijc ññay ma mesa, chi mimiñ tüg quiig aceite huídibi ooy oy xuugy, chi midigíy tigoty. ³⁸ Chi ypi guetz'ahuíy ma Jesús ytecy ymijc, e chi yajxooci Jesús ytecy míid huinni e yajpöt míid ycöhuay, chi yajjaaxy je aceite huídi ooy oy xuugy. ³⁹ Co jadu'n ijxy je fariseojäy, je' huídibi anajty ti huoy Jesús, chi jot'ajti ymíñañ:

—Co ixypy jada Jesús y'ocjéjity Dios ytiy'ajtmíidpi, y'ijxcajpy ixypy pin jäy nejpy jäy yi töxyjäy huídibi nidoonip co yi' yjibictzinäy yjibicjugy'aty.

⁴⁰ Chi Jesús ymíñañ:

—Simón, cham ñich tüg ayuc nmíididyich huídi nyajnimāhuamy.

Chi je' y'adzooy:

—Yajnimāygyich, Huindzin.

⁴¹ Chi Jesús ymíñañ:

—Tüg comeñjyay ymíid anajty metz jäy huídi ti ñuucxy. Tüg jäy anuucxy migoox migo'px denario meeñ, e je jadügpí anuucxy huixchigui'px majc.

42 Com je' ajcxy ca' anajty m̄id̄ity ti m̄id̄ cued̄ip, chi je comeeñȳj̄y huinmecxy nimetz. Miich ocn̄imaayḡich, ¿je metzpi jāy hūidi nuucxy, hūidibi je' n̄iḡi chojpy?

43 Chi Simón y'adzooy:

—Hue' n'a'ix̄īyich je t̄ibi huinmecxy jac'anaxy.

Chi Jesús ym̄inañ:

—T̄i mdiygapxy.

44 Chi Jesús ni'ijxhuimbijty je töxyj̄y, e nimay Simón:

—¿Nej m'ijxyp jadayaabi töxyj̄y? Co ndiḡīyich ma md̄ijc, ca' miich n̄i xymooyich co ndecy nb̄uj̄ibich. Jadayaabi töxyj̄y ñch ndecy ti xyp̄uj̄ip m̄id̄ yhuinn̄i, e ti xyméxyich ndecy m̄id̄ ycöhuay. 45 Ca' ñch miich ti xychücxy. Jada töxyj̄y jadu'n nej ti yt̄ijc t̄iḡy, xychücxt̄iyb ñch ndecy. 46 ñch miich ca' aceite mb̄id̄ägy ma ñch ngohuajc. Jada töxyj̄y ti xyajjaaxi ndecyich aceite hūidi ooy oy xuugy. 47 Paady ñch miich nyajnim̄y co jada töxyj̄y huinmeecxi y' ymaybocy, co t̄ibi oyhuinma'ñ yajtuñ c̄ixyot huin̄ijot. Pinjaty hueeni ypocy yajhuinmecxi, hueeni y' ch̄ójcin yajniquēx̄igy.

48 Chi Jesús je töxyj̄y nimay:

—T̄i miich mbocy yajhuinmecxt̄y.

49 Pinjaty anajty ñ̄aayb ma je mesa ñ̄ayñ̄im̄aayiḡixy miñ xȳipy:

—¿Pin jāy jada jada' co nañ yhuinmeecxīpy jāy ypocy?

50 Chi Jesús nimay je töxyj̄y:

—T̄i m'alma ñ̄dzögy co ti xym̄ibicyich. N̄icx jotcujc.

8

Töxyj̄yd̄ijc hūidibi anajty Jesús pubejtp

1 Co jadu'n yjajti, chi Jesús ñ̄icxy ma t̄üg'óc̄iy je mij cajp etz mutz cajp, capxhuäcxy je oybi ayuc maabi Dios y'ané'm̄in. Je nimajmetzpi ydisc̄ipulos ajcxy m̄id̄ ñ̄icxy. 2-3 Etz nañ ym̄id̄nicx nij̄j̄ity töxyj̄yd̄ijc hūidi anajty Jesús ti yajtzögy hūidi ca'oybi anajty ym̄id̄ etz jac tijaty pa'm. Hue' je' ajcxy anajty je María je töxyj̄y hūidi anajty x̄ij̄ip Magdalena, je hūidibi Jesús yajpidzimi huixt̄ujc ca'oybi ma je'; etz Juana, je hūidibi ñ̄ay anajty x̄ij̄ip Chuza, e je Chuza hue' je' je rey Herodes ytungm̄id̄pi; etz Susana, etz jacjadyii ajcxy hūidi anajty ajcxy pubejt Jesús m̄id̄ tijaty anajty ajcxy ym̄id̄.

Je niipi y'ijxpejt

4 Co mayj̄y ooy ñ̄ayyöymujc ma Jesús yhuinduu hūidi tzoön ma t̄üg t̄üg cajp, chi Jesús nimay je mayj̄y ajcxy:

5 —Cha t̄üg ayuc nyajnim̄ahuaanḡixy. Jadu'n jāy t̄üg choñ niipi, ñ̄icxy trigo t̄im̄ hūijpi. Co je trigo t̄im̄ hūijy, chi nij̄j̄ity ypajc oy yc̄ay m̄ij̄t̄ugujc, chi je jāy ajcxy yajhuägpejty, e hūidi ca' yajhuägpejty, chi joon piihūigy. 6 Chi nij̄j̄ity trigo pajc oyc̄ay ma tzaa n̄icx. Co ymujxy chi je' yt̄ich, je' co anajty naax ca' yxooḡity. 7 Chi nij̄j̄ity trigo pajc oyc̄ay ma apyot, chi ymujxy quipxy m̄id̄ apy'ung, chi y'ujtz'o'ctay. 8 Chi nij̄j̄ity trigo pajc oyc̄ay ma je naax oybi huinn̄atzcujc, chi ymujxy, chi yeectzooñ, yt̄im̄'ajty oyjaty, t̄üg trigo pajc m̄igo'px oyco'ity.

Co Jesús je m̄iyd̄äḡi yajmay chi yjactimcapxcoty, ym̄inañ:

—Pin midohuamb jada ayuc, huen midooy.

Nej yhuimb̄idz̄imy je niipi y'ijxpejt

9 Chi je disc̄ipulos ajcxy y'am̄idooy:

—¿Nej jada jadu'm̄bi j̄ihuimbit ayuc yhuimb̄idz̄imy?

10 Chi Jesús ym̄inañ:

—Miich ajcxy jaydëbi mnejhuïhuipy huïdi Dios ñigapxpy ñimiydacpy coyüch'amy ma y'ané'min ycötújcïn. Jacjadyiibi jäy jihuimbit'amy nyajnimayich, jaydëbi pinjaty huïdi ijxp ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ijxpejt

¹¹ Jadu'n je jihuimbit ayuc yhuimbïdzïmy: Je trigo pajc Dios je' y'ayuc. ¹² Je trigo pajc tiibi tügujc ycäy, je' je' jadu'n nej jäy huïdi midoob Dios y'ayuc, chi mic'amy ñiminyii je ca'oybi, e piibïdzïmdäy je Dios y'ayuc ma yjot yhuinma'ñ, ca'ydi mibic etz ca'ydi y'alma yajnïdzögyii. ¹³ Je trigopajc huïdi cähui ma tzaajot, je' y'i' ajcxy huïdi je ayuc midoob, chi cöbicy jotcujc, chi je' ca' ytictztigiy, tzojccixy y'ocmibicy, co agapxiyb paaty chi ixmajtznï. ¹⁴ Je trigo pajc huïdi ti cähui apy'agujc, je' je' ajcxy huïdibi midoob, chi co ñicxnï jäy digooynï Dios y'ayuc miid jotcujc'ájtïn tzinaayïn etz jugy'ájtïn etz comeen'ájtïn, e chi ca' Dios y'ayuc yhuï'my ma yjot yhuinma'ñ. ¹⁵ Je trigo pajc huïdi cähui ma oyñaax huinnätzcujc, je' ajcxy huïdi oy etz tudägy yjot yhuinma'ñ miidity. Chi je Dios y'ayuc midohuï'my, e oñdägy'amy Dios y'ayuc ymayiy ma yjot yhuinma'ñ.

Je lámpara ñi'ijxpejt

¹⁶ Co jäy ajcxy jïndicxi'ñ nöctzoy, chi ca' ajcxy cöjupy miid tu'tz, nañ ca' huaad pidägy cijx pätcï'py, hue' janchtiy pidaaccixy ma jïndicxpejt, co pin ytigiy jëbi icy je jïin. ¹⁷ Ca' ni pin ayüch tunipy e nicxy ycayajnejhuïy, ca' ni pin ti tunipy ameech e nicxy ycaniquëxigy. ¹⁸ Paady miich ajcxy midoogix yajxon co pin tijaty miid, jacyajmöhui'p yï'. Pin ti camïd, yajpigipy je' huïdi anajty yjamïd.

Jesús ytaj etz je jugymigüg

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon miid mayjäy ycixpi. ²⁰ Chi Jesús yñimaayi:

—Cheeby mdaj etz m'uch ajcxy tïba'y, miich ajcxy xyjamigapxam.

²¹ Chi Jesús ymïnañ:

—Yi jäy ajcxy huïdibi Dios ayuc midoohuipy etz cuyduunip, yï' ñich ndaj'ájtïpich etz n'uch'ájtïpich.

Jesús yajxemy je poj etz je ni co anajty chachpidigy

²² Chi tüg teczy yjajti Jesús ytigiy ma tüg barco miid ydiscípulos ajcxy, chi Jesús ymïnañ:

—Tzoc jïm'amy ñïnaxy nájxim.

Chi ajcxy chooñ. ²³ Chi ñïgujc anajty níxcixy co Jesús ymï'ögy. Chi tüg mic poj miñ ma je mejy. Chi je barco ñï yajtigiyiyi, janch yinjaty jahueenjaty ycaquiñ. ²⁴ Chi ajcxy Jesús nimijhuägy, tijyücxxy ajcxy nïmaaygixy:

—¡Huindzin! ¡Huindzin! Cham ajt n'ocquiinim.

Co Jesús oy ymäyhuijy, chi jïjpcogapxiy je poj etz je mejy co anajty chachmijjëtzpety ma barco. Chi je poj yhuäcxijptay, y'amoonday. ²⁵ Chi Jesús ymïnañ:

—¿Ma miich ajcxy je mmibïjcïn?

Chi ajcxy yjanchchigiygoty janch yhuinmay ajcxy ñayñimáayigixy miñ xyipy:

—Pin yëdyjc jada jada' co je poj etz ni jïguexy, etz yajhuäcxipy, etz ycapxycöbigyii.

Je Gadarajäy huïdibi anajty ca'oybi miid

²⁶ Chi ajcxy ymejch ma je gadarenos naaxjot, huidi hui'm jim'amy ñinaxy ma je Galilea mijlaguunba'. ²⁷ Co Jesús ñibidzimy, chi jipcobadiy tüg yéydjic huidi anajty ti choñ ma je Gadara cajp. Je' anajty ymiid ca'oybi, ti anajty yjejni maabi ypadyii. Ca' je' anajty huit yajtuñ, nañ ni ca' anajty chinäy ma ytijc, öcpjut anajty yajtzinähuiyb. ²⁸ Co je' ixpaty Jesús, chi yaaxqueecy, e ycoxtinay'ahuüy ma Jesús yhuinduu, ymínañ janch mic:

—¿Ti ñich miich co xyñimiiñich, Jesús, tügpajc mijpi Dios y'ung? Tun may'ajt ca' nijot xychachchaachytúñich.

²⁹ Jadu'n mínañ com co anajty Jesús ixqueexy je ca'oybi ma je jäy, ti anajty yjejni ma je ca'oybi anajty tzach'ane'my je jäy. Coxoch anajty ymigügtijc ymiid'adyii miid cadena. Janch ypojtpy cadena, chi ca'oybi anajty yajnicxyii mijtigüduum. ³⁰ Chi Jesús y'amidooy je locijäy:

—¿Ti miich mxii?

Chi je ca'oybi ymínañ:

—Ñich nxii Legión (hue' yhuimbidzimy nimay).

Jadu'n mínañ com nimay anajty ca'oybi ti ytigüygixy ma je jäy. ³¹ Chi je ca'oybi may'ajt pijctzoy ma Jesús co ca'ydi yquexyii ma ayoodactuuby. ³² Jim anajty tüg quepy idzim chachjicxcixy ma je ujtzjot. Chi je ca'oybi may'ajt pijctzoy co huen yajtigüyihuipy je' idzim. Chi Jesús ni'adzooy. ³³ Co je ca'oybi ypidzimy ma je jäy, chi ytigüy ma je may'idzim. Huin'it je may'idzim ñañajtzjibibydaayi ajcxy ma tüg ahuoc, chi oy ajcxy ycädäy nijoty, chi y'ögtay.

³⁴ Chi je idzim cuend'ajtpi ajcxy co ixxy jadu'n nej ti yjadyii miid ajcxy y'idzim, chi ajcxy yqueecy, oy nimiydaaccixy cajpjoty etz majaty tundac. ³⁵ Chi mayjäy ajcxy choñ oy ijxcixy jadu'n nej anajty ti ytunyii ti jadyii, oyja'tcixy ma Jesús. Chi je mayjäy ajcxy paty je yéydjic, tiibi anajty ca'oybi ñibidzimyii ycöbidzimyii, iñäy ma Jesús yhuinduu, huit miid etz huigy quejy, chi ooy je jäy ajcxy chigüy. ³⁶ Chi pinjaty ajcxy ixx miid miydacy jadu'n nej yi' choocy, je jäy huidi anajty ca'oybi miid. ³⁷ Huin'it tüg'óciy je mayjäy ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigüygixy. Chi Jesús ytigüyñi barcojoty yhuimbijtni. ³⁸ Chi je jäy tiibi anajty ca'oybi ñibidzimyii ycöbidzimyii pijctzoy may'ajt co miid'idan Jesús. Chi Jesús miid capxycijxy, nimay:

³⁹ —Nihuimbit mdijc, etz nimiydäg jada mijpi tung huidibi Dios ti tuñ miid miich ycixpi.

Chi je' ñicxy capxhuäcxy je tiy'ajt cajp cajp jadu'n nej anajty mijhuinma'ñ Jesús ti tuñ miid je' ycixpi.

Je Jairo ñix etz je töxyjäy huidibi Jesús yhuitpa' nïdoni

⁴⁰ Jadu'n yjajti co Jesús yhuimbijty co choñ Galilea, chi je jäy ajcxy cöbijcy Jesús janch agujc jotcuyc, com nidüg'óciy anajty ooy jip'ijxcixy. ⁴¹ Chi tüg yéydjic huidi anajty yxi Jairo huidibi anajty mijtungmiid ma judíojäy ñaymujctac ymiñ ma Jesús, chi minucxtacy Jesús pijctzoy may'ajt co huen nicxy ma je' ytijc. ⁴² Jairo ymiid anajty tügpajc ñix, hue' anajty yjimijt majmetz, janch tim ögaanip anajty. Co Jesús ñicxy miid je', chi janch mayjäy anajty chach'adijyii chach'agodiyii.

⁴³ Chi tüg töxyjäy huidi anajty yxi ybo', ca' anajty y'oc-huäcxijpni, mimajmetz jimijt anajty cujc jadu'n mi'ijtni. Ti anajty ymeeñ yajtundäy ma je tzoydumbi ajcxy, etz ni pin anajty ycayajtzögyii. ⁴⁴ Chi je töxyjäy nimijhuägy je Jesús, chi nïdoni yhuitpä. Janch mic mic je yxi ybo' oy yhuäcxipy.

⁴⁵ Chi Jesús ymínañ:

—¿Pin xyñidoñ ich nhuit?

Chi ajcxy y'adzooy co ca' pin. Chi Pedro etz tüg'óciy mïd je' ymïnañ:

—Huindzin, jäy ti xy'adijïy ti xy'abodïy etz miich mïnañ: “¿Pin ti xyñidoñich?”

⁴⁶ Chi Jesús ymïnañ:

—Nidügti ti xyñidoñich. Nnejhuïybich co mïd nmic'ájtich ti nyajtzögyich pinjaty.

⁴⁷ Co je töxyjäy jihuïy co ca' coyüch yhuï'mañ, chi nimiiñ janch tziyuuyb. Chi yhuindacy ma Jesús yhuinduu, chi capxpïdzïmy mayjäy'agujc ti ycïxpi anajty co ti nïdooni Jesús yhuitpa', e co anajty mic'amy ti chögy. ⁴⁸ Chi Jesús nimay je töxyjäy:

—Töxyjäy, ti mdzögy co ti xymibicyich, nicx jotcujc.

⁴⁹ Yam Jesús anajty ycapxpy, co ymiiñ tüg jäy huïdi anajty ti chooñ ma Jairo ytïjc; je Jairo nihuindzin'ajtp anajty je judiojäy naymujctac, chi nïmaayï:

—Ti y'ögy miich mnïx, ca' mjac'amayïy nigï yi Huindzin Jesús.

⁵⁰ Co Jesús jadu'n midooy, chi ymïnañ:

—Ca' mdzigïy, mibïjcich janchtiy, etz tzögïp yi mnïx.

⁵¹ Co Jesús ytigïy ma je tïjc, chi ca' a'ixïy nicxy ytigïy hueñypïntïy mïd je'. Jëyi Pedro, Jacobo, Juan etz je töxy'anäg ytaj yteedy ytigïy mïd Jesús. ⁵² Chi tüg'óciy je mayjäy ajcxy janch yaaxp, janch ñé'mgïxy mïd je töxy'anäg ycïxpi. Chi Jesús ymïnañ:

—Ca' myaaxcïxy, ca' yi' ögïty, maab yi'.

⁵³ Chi nigooob ajcxy nixiicy com ti anajty nejhuïygïxy co ti y'ögni. ⁵⁴ Chi Jesús majch je töxy'anäg ma yci', chi migapxy mic, ymïnañ:

—Töxy'anäg pidïg.

⁵⁵ Chi je' yjugypïjcy, e mic'amy ypidïgy. Chi Jesús ymïnañ co huen yaj-caaygïxy yaj'uuccïxy. ⁵⁶ Chi ytaj yteedy ajcxy ooy chigïy yjihuïy. Chi Jesús nimay co ca' huaad pinjaty mïdmïydägïpy jadu'n nej ti ytuñyï yjadyïi.

9

Jesús quejxy ayuccapxhuäcxp je nimajmetzpi ydiscípulos ajcxy

¹ Co Jesús yajyöymujctay je ni majmetzpi ydiscípulos ajcxy, chi moy je mic'ajt jaydëbi yajtzögïpy pa'mjäy, etz moy ajcxy nañ jadu'n cötújcïn co ajcxy ixquexïpy je ca'oybi. ² Chi quejxy je' ajcxy ñïcxy capxhuäcxïxy jadu'n nej Dios y'ane'my, etz yajtzooccïxy pa'mjäy. ³ Chi Jesús ymïnañ:

—Ca' ni ti tü'amgïxpi mminíxcïxy; ni mgaminícxïp mdajc, ni mmorral, ni mgaagy, ni meeñ, e ni mgaminíxcïxïpy ajcxy metz mhuit. ⁴ Huen tim huïdi tïjc ma anajty mdigïygïxy, jim ajcxy huï'mgïxïpy, e jim ajcxy nayyöyhuäcxïyb.

⁵ Hueñy'ma'amyty ma ca' jäy xycöbïjccïxy, co ajcxy mbïdzïmgïxïpy ma je' cajp mhüinnéjpcïxïpy mhüinjáaxcïxïpy je naaxjoc ma mdecy. Jada je' tïy'ájtïp co Dios tzaachytunïpy yi jadu'mbi jäy ajcxy.

⁶ Chi ajcxy ñayyöyhuäcxtaayi, ñïcxy ajcxy cajp cajp capxhuäcxïxy je oybi ayuc, etz yajtzooccïxy pa'mjäy hueñytïmma'ámyty.

Co Juan el Bautista y'ögy

⁷ Je rey Herodes co nejhuïy jadu'n nej Jesús anajty mijhuinmañ tuñ, chi ooy anajty tzachnejhuïhuañ pin je' anajty. Com nijëjity jäy anajty ymïnaangïxy co ti Juan jugypïcy. ⁸ Chi jacnaagïty ymïnaangïxy co Elías ti ñayguëxïgyïi, e jacnaagïty ymïnaangïxy co tüg Dios y'ayucnajtzcapxïybi je' ti yjugypïcy huïdi jecy'ajty octzinaybi. ⁹ Chi Herodes ymïnañ:

—Ich yi' ni'ane'mdiy co huen ajcxy Juan ycohuajc yajminajci. ¿Pin jada jada' huidi ich nmidooybich co tzachnimiydaaccixy?

Herodes ooy anajty ja'ixa'n Jesús.

Jesús yajcay migoox mil jäy

¹⁰ Co je apóstoles ajcxy yhuimbijty, chi yajm#dmiydactay ajcxy Jesús tüg'óciy tiibi anajty túngixy. Chi ac jëyi ydiscípulos m#d'ajty Jesús mijtig#duum huington ma tüg cajp huidi yx# Betsaida. ¹¹ Co je mayjäy ajcxy nejhu#y, chi ajcxy panixy Jesús. Chi Jesús je mayjäy cöbijctay etz yajm#dmiydacy ajcxy Dios y'ayuc ytiy'ajt nej ané'min cötújc#n m#dity. Jesús nañ yajtzöc#y anajty hu#dijaty yajtzoy#huaam.

¹² Co oy chu'hyñi, chi ym#jhuägy je nimajmetz#y ydiscípulos ajcxy ma Jesús, chi ajcxy nimay:

—Capxycijxni m#d jadayaabi mayjäy ajcxy, jaydëbi ajcxy ñicxipy ma yi cajp huidi huindyuy agon yajpaat#y, huen nicxy ixtaaygixy jättac etz jim ajcxy paadipy caay#n uuc#n. Com hue' jada it ma ich ajt yam nyajpaat#m mijtig#duum.

¹³ Chi Jesús ym#nañ:

—Mooygix miich yi' ajcxy ycaay#n y'uuc#n.

Chi je' ajcxy y'adzooy:

—Jëyi ich ajcxy nm#didy#ch migoox tzajcaagy e mejtz acx, nigo co ca' ich ajcxy njuy caay#n uuc#n m#d jadayaab mayjäy.

¹⁴ Hue' anajty oy nimigoox mil je jäy. Chi Jesús nimay je discípulos:

—Yaj'ixtaaccix ajcxy yi mayjäy.

¹⁵ Chi ajcxy jadu'n cuyduuñ, yaj'ixtactay ajcxy je mayjäy. ¹⁶ Chi Jesús con#gy je migoox#y tzajcaagy, etz je metz#y acx, chi ypa't'ijxy tzajpc#xy conuucxy je tzajcaagy etz acx, huin'it tujc-huäcxy moy je' ydiscípulos ajcxy, huen yajhuäcxc#xy ma tüg'óciy mayjäy. ¹⁷ Chi ajcxy ycaay cüxyi, huin'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxypidz#my co Jesús yi' je' je Cristo

¹⁸ Chi jadu'n yjajt# co Jesús anajty ycapxtägy ahuingujc m#d je' ydiscípulos ajcxy, chi Jesús je' ajcxy y'am#doy:

—¿Pin ich jäy xytijy?

¹⁹ Chi ajcxy y'adzooy:

—Nijëjity jäy xytijy co miich je Juan je Bautista; nijëjity ym#naangixy co miich je' Dios y'ayucnajtzcax#ybi huidi jecy'ajty tz#nay e ti yjugypicy.

²⁰ Chi Jesús ym#nañ:

—¿Miich ajcxy, pin ich miich ajcxy xyt#jcixy?

Chi Pedro y'adzooy:

—Dios yCristo.

Jesús capxypidz#my co y'öga'ñ

²¹ Chi Jesús pidacy ané'min etz cötújc#n co ca' ajcxy ni pin yajnim#ahuip co yi' je' Cristo. ²² Chi Jesús ym#nañ:

—Ooy ycop#cyity co ich, je jäy huidi tzoon tzajpjoty, canaag nax ayo'n nbáadibich, ca' xym#jpidägibich je mijjäyd#jc, je teedy tungm#d#y, etz je' ajcxy huidi yaj'ixpicy Dios ñecy, e co n'ögip njugypig#pyich codug#g xi.

²³ Chi Jesús nimay ajcxy nidüg'óciy:

—Pen ji pin xypanicxa'ñich, huen jäyd#goydäy yci'm tzójc#n etz huen xypanicxy#ch jabom jabom, oy nej ytimyjad#py ytimy'ayoohu#py, tim nipaady nej j#hu#y ti cab#gy mgruudz jabom jabom etz pajamgich. ²⁴ Huen pinjäy

huidibi ca' yega'ñ yi yjugy'ájtín ma yi o'cín m̄id ìch ycìxpi, hue' je' yajtigoyamy yi' yjugy'ájtín. E huen p̄injäy huidibi yegamy yjugy'ájtín ma yi o'cín m̄id ìch ycìxpi hue' je' ypadamy yi jugy'ájtín. ²⁵ ¿Ti t̄üg j̄äy ypatpy, pen ti paady t̄üg'óc̄iy cohuit'ájtín comeen'ájtín ya naaxhuiñ e nayyajtigoyii, etz ca' y'alma yajn̄dzögy? ²⁶ Yi j̄äy ajcxy p̄injaty xym̄idzöydúnibich n'ayuc, ìch je' je j̄äy huidi tzoön tzajpjoty, nañ nm̄idzöydun̄ibich je' ajcxy co anajty nhuimbityich ya naaxhuiñ, m̄id ìch n'ané'm̄in etz nm̄ic'ajtich etz nDéedyich y'ane'm'ajt, etz ym̄ic'ajt, etz m̄id je ángeles ajcxy ym̄ic'ajt huidibi huadz yjot yhuinma'ñ. ²⁷ Janch ìch miich ajcxy n̄im̄äy co ji j̄äy ma miich ajcxy huidibi ixipy Dios y'ané'm̄in jayijp ca'ni anajty y'ögy.

Jesús yajtigach je ñin̄icx

²⁸ Chi miductujc xiibi maabi anajty jada ayuc jadu'n capxy, Jesús huodzoñ Pedro, Juan etz Jacobo, chi m̄id'ajtpy jim ma t̄üg copjijp Dios m̄ibijctzoob. ²⁹ Yam anajty Dios ooy m̄ibijctzoy, co Jesús yhuin̄yijp oytigach, e je yhuit yajty janch poob janch ad̄icxp. ³⁰ Chi metz j̄äy ñayguëx̄ici, m̄idgapxy m̄idm̄iydägy Jesús, Moisés je' anajty etz Elías. ³¹ Huidi ajcxy naygëx̄ici janch j̄uhuidityi anajty ajcxy je t̄icxin j̄ájin m̄id̄ity, nigapxc̄ixy n̄im̄iydaacc̄ixy je o'cín huidi Jesús ypadamy jim Jerusalén. ³² Pedro, Jacobo etz Juan ooy anajty ajcxy chachm̄ahuani, chi ajcxy m̄i'ögtigooy. Co oy ym̄äyhuij̄ic̄ixy, ijxy ajcxy Jesús y'ad̄icxin y'ajájin, etz nañ jadu'n ijxy ajcxy je nimetzpi j̄äy ajcxy huidi anajty Jesús m̄idm̄iydäc̄py. ³³ Jadu'n yajty co yi j̄äy ajcxy puyöyduutni Jesús. Chi Pedro Jesús n̄im̄ay:

—Huindzin, jotcujc ìch ajt ya. Tzoc tuḡüg t̄ijc yaj'oȳiyim, t̄üg miich mjed̄iiby, jadüg Moisés jed̄iiby, etz jadüg yi Elías jed̄iiby.

Pedro ca' anajty nejhūiy ti ycapxy. ³⁴ Yam ñigi anajty ycapxy co joc ñaaxcidacy huidi yajn̄idigoy je' ajcxy. Chi ajcxy ooy ch̄iḡiy co oy joc ya-ñid̄igoydáayiḡixy. ³⁵ Chi t̄üg ayuc yajm̄idooy ma je joc ym̄inañ:

—Ìch jada n'ung'ajtpy, ooy ndzocyich nj̄ihūiyich. Am̄ido'ijti miich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhuim̄y, chi ajcxy nañ jadu'n amoñ. Huin'it x̄i ni ca' ajcxy m̄iydacy m̄id ni p̄in jadu'n nej anajty ti y'ijxc̄ixy ti ym̄idooḡixy.

Jesús yajtzögy t̄üg yeegy'anäg huidibi anajty ca'oybi m̄id

³⁷ Com jabom co Jesús, Pedro, Jacobo etz Juan ajcxy ym̄inajcy ma je copjijp, chi ooy mayj̄äy choñ oyjijpcobad̄iyii. ³⁸ Chi nidügti j̄äy ycapxy janch m̄ic, ym̄inañ:

—Huindzin tun may'ajt ix ìch n'ung, yi' ìch t̄ügpajc n'ung'ajtpy. ³⁹ Huen m̄inájity ca'oybi ymachyii, chi timetiini yaaxquëgy yajyachyii yajqūidyii, etz yajpidz̄im̄y oy yhuin'opy y'aa'opy e adzaach y'ixmachyii. ⁴⁰ Ti ìch may'ajt nbijctzooyich ma yi m̄discipulos ajcxy, co huen yajpidz̄im̄y je ca'oybi, per ca' yi' ajcxy ti m̄imadägy.

⁴¹ Chi Jesús ym̄inañ:

—iMiich j̄äy ajcxy huidibi ca' m̄ibijcp ca' ajcxy mm̄ijpidäga'ñ yi t̄iy'ajt! ¿Naag x̄i ìch njac'id̄ipy ma miich ajcxy nm̄imecxt̄ujcc̄ixipy? M̄imin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ōjy je ca'oybi, e yajtzoocy je yeeg'anäg, chi yteedy yajcid̄iḡiyñi. ⁴³ Chi t̄üg'óc̄iy je mayj̄äy ajcxy ooy ch̄iḡiy m̄id je m̄ijhuinma'ñ huidi Dios ytuun.

Jesús capxp̄idz̄im̄y jadüg'oc co y'öga'ñ

Jesús ydiscípulos ajcxy ooy jihuuygixy huinmaaygixy co Jesús jadu'n ymínañ:

⁴⁴—Miich ajcxy yajxon mido'mbíjccix jada ayuc. Ich je' je jäy huídi tzoon tzajpjoty, hue' nyajc'yega'ñich ma pocyjäydijc ajcxy ycí'am.

⁴⁵ Je' ydiscípulos ajcxy ni ca' anajty huinjihuuygixy, tzig#yb anajty ajcxy, paady ca' ajcxy jaty nej yaj'amidóogixipy.

¿Pín je' nígí jacmíjip?

⁴⁶ Chi Jesús ydiscípulos ajcxy ytig#y huinmay'ahuídiijt, nejhuhuaangixy pín je' jacmíjídám. ⁴⁷ Jesús nejhuiy je' ajcxy yjot yhuinma'ñ huídi nayyajmídmíydáacip ajcxy, chi tüg pi'c'anäg huijtzígy, ypidacy ma ymíjic.

⁴⁸ Chi Jesús ymínañ:

—Pínjaty xycöbíjcpích jadu'n nej jada pi'c'anäg xycöbicyich míd ich nxí ycixpi, ich yí' anajty tí xycöbicyich; je huídibi ich xycöbíjcpích, cöbígíib je huídi tí xyquexyich ya naaxhuiñ. Yí' huídibi jacmútzíp ma miich ajcxy, yí' je' jacmíjipi.

Pín ich ajt ca'p xymíjotma'tím, je' ajt xymíjnicxpejtím

⁴⁹ Chi Juan ymínañ:

—Huíndzin, tí ich ajcxy n'íjxcixy co tüg jäy tí yajpidzimy ca'oybi míd miich mxí miich mmíc'ajt. Tí ich ajcxy yí' nyaj'ojyich com ca' yí' ich ajt xypahuídijtím.

⁵⁰ Chi Jesús ymínañ:

—Ca' myaj'ójcixy yí'; pínjaty ca' xymídzíp'ajtím, ich ajt yí' nmíd.

Jesús jípcogapxíy Jacobo etz Juan

⁵¹ Jadu'n yjajtí co tiempo yhuingoní mína Jesús ñícxíp tzajpjoty, chi yhuinma'ñ pídacý co nícxá'ñ jíim Jerusalén. ⁵² Chi Jesús quejxy cogapxy jayíjp jättac píjctzoobi. Chi je cogapxy'ajtpí ñícxý ytigíy ma je samaritano jäy ajcxy ycajp, jättac píjctzoobi. ⁵³ Chi je' samaritano jäy ajcxy ca' yega'ñ jättac, com ñejhuuygixyp co Jesús etz ymígügtíjic ñícxý anajty ajcxy jíim Jerusalén. ⁵⁴ Co jadu'n Jesús ymígüg ajcxy nejhuiy co je samaritano jäy ca' jättac yega'ñ, chi Jacobo etz Juan nímay Jesús:

—Huíndzin, ¿nej m'a'ixíyb ich ajcxy n'ocni'ane'mdíyich huen jíin cáy huídibi tzomb tzajpjoty, jígix yí samaritano jäy ajcxy ycíjxtáhuipy jadu'n nej je profeta Elías ytúuñ jecy'ajty?

⁵⁵ Chi Jesús y'íjxhuimbíjty, oý Jacobo etz Juan, nímay:

—Miich ajcxy ca' mnejhuuygixy tí jot tí huinma'ñ miich ajcxy míd. ⁵⁶ Ich, je jäy huídi tzoon tzajpjoty, ca' tí nmíñich ya naaxhuiñ co jäy yjugy'ajt míñ nyajtígooyich, hue' jánchtíy tí nmiñich co jäy yjugy'ajt nyajtzóogíibich.

Chi ajcxy ñícxni huíngbí cajp jättacp.

Je pínjaty anajty Jesús panícxam

⁵⁷ Jadu'n yjajtí co anajty ñíxcixy ma tüg tü'aa, chi tüg jäy Jesús nímay:

—Huíndzin, ich miich nbanícxamy oy tím ma'amy miich mnicxy.

⁵⁸ Chi Jesús y'adzooý:

—Yí huaax ymíd yí' ajcxy yjut, etz yí joon ajcxy ymíd ajcxy ype'ñ, ich je jäy huídi tzoon tzajpjoty ca' nmídidyich ma nmáhuíibich ma nbócxíibich.

⁵⁹ Chi Jesús nímay jadüg jäy:

—Pajamgíich.

Chi je jäy y'adzooý:

—Huíndzin, jayíjp ich ndeedy n'ocyajnaaxtigíhuipy.

⁶⁰ Chi Jesús ymínañ:

—Jëbi yajnaaxtigíhuipy huídibi ca' xypanícxaníich. Nícx miich capxhuäcxi Dios y'ayuc y'ané'mín.

⁶¹ Chi jadüg jáy ymínañ:

—Huindzin, nbanícxamy yam. Tun may'ajt ocnajtzmadzíyigich nícx n'ocmíidcapxycíxyich njuugy nmígügích huídí jim ma ích ndíjc.

⁶² Chi Jesús ymínañ:

—Pínjaty yhuinma'ñ tí pídágy co Dios ytung tunaani, ca' huaad íxmach je tung, tím jadu'n nipaady nejhuiy tüg jáy tí ytigíy naaxjídziitzi míd arado, e ca' huaad y'íjxhuimbity com co huinduum arado nícxíhuipy.

10

Jesús quejxhuäcxy je nidugi'pxmajcpi

¹ Huin'it co jada jadu'n tí ñaxy, chi je Huindzin Jesús huin'íjxy jatugi'pxmajc y'íxpijcpídíjc, chi quejxígy cogapxy metz metz ma tüg tüg cajp majaty ñícxaní.

² Chi Jesús nímáy yí' ajcxy:

—Janch je cosecha ooy tí yhuindíy, yí mídumbí janchtíy hueeni. Chojcxy co nbíjctzóohuim ma nHuindzin Dios co huen quexy ytumbídíjc ma yí cosecha. ³ Nícxícx, ích miich ajcxy nguejpxy jadu'n nej cóbixy y'ung yhuídity pa'uc agujc. ⁴ Ca' mminícxícxíy mbíjty, ní mxäcxuumy, ní mgíg, e ní pín ca' mgapxpócxícxípy tú'am. ⁵ Co ajcxy mdígíhuipy huenyítíítíjcity, jayíjp ajcxy mínángíxípy: “Jí jotcuje'ájtín ma jada tíjc.” ⁶ Pen yung naxy je' ajcxy yajpaady, miich ajcxy je mgapxpócxín jotcuje'ajt myegípy ma je' ajcxy; pen ca' ajcxy yjadú'níty, naadígí'adíp huídí anajty tí mgápícxíy. ⁷ Nañ huí'ngíx ma je tíjc, chí ajcxy mgayípy m'ügípy huídí je jáy anajty ajcxy xymooyb, com je tumbí paatíp je' je ymuju'ñ. Ca' ajcxy mhuidídípy jayjín jaydíjc. ⁸ Huenyítímyhuídí cájpitíy ma anajty mdígíyíxíy, pen je jáy ajcxy xycóbíjcp, caaygíx uuccíx huídí anajty jáy ajcxy xymooyb. ⁹ Yajtzóccíx yuujáy pa'mjáy huídíjaty jim ma je' ajcxy yajpaady, etz yajnímaaygíx: “Je Dios y'ané'mín huíngóníñ yí' ma miich ajcxy.” ¹⁰⁻¹¹ Huenyítímyhuídí cájpitíy ma anajty mdígíyíxíy, e ca' anajty jáy xycóbígaangíxíy, co ajcxy mdzónaaníp, nímáaygíx: “Yí mgajp naaxjoc huídí tí ypety ma ích ndecy nhuinnébáamyíx, yí' je' íjxpejt co Dios ajcxy xychaachytunípy. Chí nejhuiyíxíy miich ajcxy jada co je Dios y'ané'mín tí ymíhuíngóní.” ¹² Ích miich ajcxy nímáyb co huin'it xí co anajty yajhuaad'aty, Dios nígi tzaachytunaangíxíy je jáy huídí ajcxy ca' miich ajcxy xycóbíga'ñ, ca'ydí Sodoma cajpjáy.

Je cajp huídíjaty ca'p ycapxymídoy

¹³ Chi Jesús yjacmínañ:

—Ímíich ayoob ajcxy Corozín jáy! Ímíich ayoob ajcxy Betsaida jáy! Co jim ma je Tiro cajp etz Sidón cajp caytuní cayjajtí je Dios ymíjhuinma'ñ huídí tí ytuníyí tí yjadyíy ma miich ajcxy, jécíyp íxyípy ajcxy yjothuimbíjtní, etz tí yajníquëxíccíxy íxyípy míd je yhuít íñaaygíxy sací níjen nícuuyjam íxcuyjam (je' je tíy'ajt co ooy ytajcíxy ymaygíxy míd ypocy ycíxpi). ¹⁴ Janch jadu'n yjadípy co anajty Dios yajnígödugíy, nígi o'ctíy miich ajcxy ayo'n mbaadíyb ca'ydí jadu'n nej Tiro jáy etz Sidón jáy. ¹⁵ E miich ajcxy Capernaum jáy ajcxy, ¿nej mmináangíxy mjátcíxípy tzajpjotyí? Hue' m'ídaaccíxyp miich ajcxy ma yí ayoodactuuby.

¹⁶ Je jáy ajcxy huídí miich ajcxy m'ayuc xymídoohuíp, nañ xymídoohuíb yí' ajcxy ích n'ayuc. Je jáy ajcxy huídí miich ajcxy ca' xy'íxa'ñ, nañ ca' je' ajcxy

xy'ixa'ñich; e pinjaty ca' xy'ixa'ñich, nañ ni ca' yi' ixaangixy je Dios je huidi ti xyquexyich ya naaxhuiñ.

Chi ajcxy je nidugi'pxmajcpi yhuimbjtcixni

¹⁷ Chi je nidugi'pxmajcpi huidi Jesús yquejx ayuccapxhuäcxpi yhuimbijttay ajcxy janch jotcujc, ymınaangixy:

—Ixti je ca'oybi ti ñich ajcxy xycapxycöbįjccixy mįd miich mxii.

¹⁸ Chi Jesús ymınañ:

—Ti n'ixyich nej je ca'oybi yhuindzin ti ycäy, jadu'n nej jihuıy ti ycäy ti ycödigiıy tzajpcıxy, jadu'n nej tüg huıdzuc. ¹⁹ ñich miich ajcxy mic'ajtın ti nmooygixy, jaydebı ca'oybi ca' xymımadaaccixıpy, tim jadu'n nipaady nej jihuıy tza'ñ etz ca'ty myajhuäcpejtcixy e ca' nej mjajtıxy. ²⁰ Nįgi miich ajcxy jotcujc'ajtıx co ajcxy mxii y'įjtcixy cojay jııby tzajpjoty, ca'ydi co ajcxy ca'oybi xycapxymıdoogixy.

Chi ooy Jesús yjotcugıy

²¹ Huin'it Jesús yjotcugıy mįd je Dios yjihuı'ñ ymic'ajt, ymınañ:

—Nyajnaxypıch Dioscojuyıp ma miich, Dios Teedy, tzajpjotyıpi Huindzin etz je naaxhuiñybi Huindzin, co ti myüch jada mjihuınma'ñ ma yi cohuınma'ñ jäydıj, etz ti myajnejhuıy je jäy huıdi ca' y'ixpıcyıty. Dios Teedy, jadu'n miich ti mduñ com jadu'n miich ti mjäygıdacy.

²² Ndéedyıch ti xyajcıdigıydäyıch tüg'ócyıy tijaty mic'ajt oy'ajt. Ni pin ca' ijxcajp pin je' Dios y'ung'ajtpy, jeyı ndéedyıch tügıpjıci pin xy'ijxcajpıch. Ni pin ca' ijxcapy pin je' ndéedy'ajtpıch, jeyı je Dios ung tügıpjıci huıdi ijxcajp, etz jacjadyıı ma je ung yajnguëxıga'ñ.

²³ Chi Jesús ni'ijxhuimbijty yi' ydiscıpulos ajcxy, ahuingujc ajcxy nımay:

—Jotcujc ajcxy je jäy ajcxy huıdi ijxcıxp jadu'n nej miich ajcxy ti m'įjxcıxy.

²⁴ ñich miich ajcxy nımayb co ooy may Dios y'ayucnajtzcapxııyb etz rey ajcxy ja'ixa'ñ huıdibi miich ajcxy m'įjxpy, e ni ca' ajcxy ıxy; etz jamıdoo'ıda'ñ huıdi miich ajcxy mıdooyb, e ni ca' ajcxy mıdooy.

Ijxpejt ma tüg samaritano ojjäybi

²⁵ Chi tüg jäy huıdi yaj'ixpıjcp Dios ñecy ytınaay'ahuıy jot'ixy huınma'ñ'ıxy Jesús, chi y'amıdooy:

—Huindzin, ¿ti huaad ndunıpıch co ñich jugy'ajtın huınıxııbi nbáadıbıch?

²⁶ Chi Jesús y'adzooy:

—¿Ti jaybétyıp ma yi Dios ñecy? ¿Nej mhuinjıhuıy co mnecycapxy?

²⁷ Chi je ley huindzin y'adzooy:

—Mdzogıpy mjıhuıhuıpy mHuindzin Dios mįd tüg'ócyıy m'aa mjot, mįd tüg'ócyıy m'alma, mįd tüg'ócyıy mmıjaa, etz mįd tüg'ócyıy mjot mhuinma'ñ, e mdzogıpy yi mjıın mıdıjı jadu'n nej miich cı'm nıychogyıı.

²⁸ Chi Jesús y'adzooy:

—Ti ooy yajxon m'adzooy. Tun yi', e mdzınähuıp huınıxıı.

²⁹ E je' nañ jadu'n tim tıy ñejhuıhua'ñ, nımay Jesús:

—¿Pın ñich nmıdıjı'ajtpy?

³⁰ Chi Jesús y'adzooy:

—Tüg jäy choñ jim Jerusalén ycıdägy anajty jim Jericó, chi oy meetzpi mınaybadyıı. Chi ajcxy tüg'ócyıy yhuıt e tijaty yi' anajty ymııd pıjctaayı. Chi ajcxy ooy huınhuojpy jıphuojpy huıngoıxy jıjpcıjxy, chi ajcxy ıxmach jahueengı ögy, chi ajcxy ñıcxni. ³¹ Tüg judıo teedy ymınagııy ma je jimbi tü'aa. Co y'ıjxy je tzaachıjäy, chi jüyöyñajxy. ³² Nañ jadu'n ymınagııy ma je jimbi tü'aa tüg levıta jäy huıdi tuumb ma Dios ytıjı, co jim yjaty mıhuıgon je tzaachıjäy,

co oy ixy, nañ chi jüyöyñajxy (ca' pa'ayooy). ³³ Chi tüg samaritano jäy anajty jim naxiy, co mihuingoñ je tzaachijäy, co oy ixy, huin'it ooy pa'ayogooty je tzaachijäy. ³⁴ Chi je' nimijhuaäy, chi puji e xojtzi je chaachi'au, nañ tzoyiiyi chaachi'au müd aceite etz vino. Chi yaj'iyujcpety, e yajnicxy jim ma yjättac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meeñ, moy je codijc nimay: “Cuend'at jadayaabi tzaachijäy, jadu'n nej anajty mjacmeeñyajtuñ, co ñich anajty nhuimbityich huin'it nmigüedipy.” ³⁶ ¿Ma je nidugigpi jäy pin je oybi ti tuñ müd je jäy huidi anajty je meetzpi ti ymeechyii ti yajtzaachiyii?

³⁷ Chi je jäy huidi Dios ñecy yaj'ixpijcp Jesús y'adzooy:

—Je huidi ti yajtuñ je pa'ayo'ñ.

Chi Jesús ymínañ:

—Ñicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yajty co Jesús anajty ytüyöy, chi ytigiiy ma tüg mutz cajp. Jim anajty tüg töxyjäy huidi anajty yxii Marta, yi' yajjättaci ma ytijc. ³⁹ Je Marta ymüid anajty tüg y'uch töxyjäybi huidi anajty yxii María, chi je' y'ixtacy ma Jesús ymijc, amidoo'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuiyiii co ñich naydüg yam tzach nayyajuñyijichich? Nima' yi María co huen xypubétyich.

⁴¹ Chi Jesús ymínañ:

—Marta, Marta, yi maytung miich mdzachmijottigooyb. ⁴² Tügpaic ji, huidibi ooy ycopicyip. Yi María ti yi' huin'ixy je oybi huidi ni pin ca' ypiigiyb.

11

Jesús yaj'ixpijc nej jëbi mibijctzoohuim Dios

¹ Jadu'n yajti co Jesús anajty Dios mibijctzoy ma tüg it lugar, co yajmay, chi tüg discípulo ñimaayi:

—Huindzin, yajni'ixiiygich ajcxy tzajcapxycapxi, jadu'n nej Juan yajni'ixiiy yi' ydiscípulos ajcxy.

² Chi Jesús ymínañ:

—Co ajcxy Dios mmibijctzohuipy, jadu'n minángixipy:

Dios Teedy, miich huidi tzajpjoty tzinaayb, huindzigiiy miich mxii y'ity. Huen miñ ya miich yi m'ané'min. Huen mdzójcin yajcuyduñ ma je jäy yjot yhuinma'ñ jadu'n nej yajcuyduñ jiiby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huidibi ñich ajcxy ndundigooyb, jadu'n nej ñich ajcxy nmeecxyich huidibi ajcxy xymidundigooybich. Ca' m'a'ixiiy co ñich ajcxy huinma'ñ tigoyipich. Yajnihuaatzcich ajcxy ma yi jibicpi.

⁵ Chi Jesús yjacmínañ:

—Pinjaty ji ma miich ajcxy huidi tüg ymigüg müd, co ninícxipy mijcoodz e mnimahuipy: “Migüg, tun may'ajt yajpijctzoogich tugüig mdzajcaagy. ⁶ Tüg ñich nmigüg ti xyñimiñich huidi tüyöyp, etz ca' nmídidyich ti nmöhuibich.”

⁷ Chi je jäy y'adzooy jiiby tigoty, ymínañ: “Ca' xy'amayiyich. Ti ñich ndijc n'agiiyñi, etz n'ungich yam nmüidich cijx'am; ca' njatyich nej nbidigibich etz nmöhuipy huidi mbijctzooyb.” ⁸ ñich miich nimaayb, oy ca' tzojc nipidiga'ñ ymöhuamy huidi pijctzou co migüg'adyii, hue' ymöhuamy jaydëbi ca'ydi yjac'amayiyii, chi yegipy tüg'ócay huidi yajmayajtpy. ⁹ ñich miich ajcxy

nimaayb: Pijctzóogix, e myajmóhuipy ajcxy. Ixtaaygix, e mbaadipy ajcxy; cogapxiiygix, ahuádzip ajcxy mdijc'aguu. ¹⁰ Tüg'óciy je' pín pijctzoob tijaty ma Dios, cidigihuib; pín y'ixtaayb, ypaadipy; pín cogapxiiyb, yaj'ahuatzib ytijc'aguu.

¹¹ ¿Pín ungedeedy ji ma miich ajcxy pen y'ung ypijctzoob tzajcaagy, nej mmóhuipy tüg tzaaji? ¿E pín ypijctzooyb acx, nej jébi mmóhuipy tüg tza'ñi? ¹² ¿Pen ypijctzooyb tzeydüty, nej jébi mmóhuipy ca'ty? ¹³ Pen miich jibicjäy ajcxy mnejhuib nej oybi m'ung móoygixipy, ¿nej ca' mdijy yjáncity co mDios Teedy tzajpjtopy xymóoygixipy je Espiritu Santo, pen miich ajcxy mmibijctzohuipy?

Yajñibijccixy Jesús co mñidity mujcu'ymic'ajt

¹⁴ Chi Jesús anajty yajpidzimy tüg ca'oybi ma tüg jäy huidi anajty uumip. Jadu'n yajty co je ca'oybi ypidzimy, chi je uum ycapxigy. Chi je mayjäy ooy jihuiy huinmay. ¹⁵ Nijëjity jäy ymínaangixy:

—Jesús mijhuinma'ñ ytumyb mñid je Beelzebú ymic'ajt, je ca'oybi yhuindzin, paady ca'oybi yajpidzimday.

¹⁶ Jacjaydiibi jäy ajcxy co jot'ixaangixy huinma'ñ'ixaangixy Jesús, pijctzooy ajcxy Dios tüg ymijhuinma'ñ. ¹⁷ Co Jesús nejhuib nej je' ajcxy jot'adyii huinma'ñ'adyii, chi nimay:

—Co tüg gobierno ñaybijc-huäcxyii, chi ñaychiptúnigixy miñ xyipy; ñayyajcixigixy ñayyajtigóoyigixy; co tüg quëx jäy ñaybijc-huäcxyii, nañ jadu'n je' ñayyajcixigixy ñayyajtigóoyigixy. ¹⁸ Pen je mujcu' ajcxy ñaybijc-huäcxip, ¿nej jada je mujcu' y'ané'min yjac'idipy? Miich ajcxy minamb co ñich mñid ndúñich je Beelzebú ymic'ajt co ñich ca'oybi nyajpidzimy. ¹⁹ Pen jadu'n yi', ¿pín je mic'ajt mooyb huidi miich ajcxy xypahuidijtp co yajpidzimy je ca'oybi? Paady yi' ajcxy c'm yajniquëxícip co miich ajcxy mdundigooygixy mgapxtigooygixy. ²⁰ Pen ñich mñid Dios y'ané'min nyajpidzimyich ca'oybi, janch jada co Dios y'ané'min ti yjäty ma miich ajcxy.

²¹ Co tüg micjäybi mñidity maydujt, e ñaycuend'adyii yajxon, ca' je' ytigoyipy tijaty ymñid. ²² Co yjäty jadüg jäy jacmicpi ca'ydi je', chi ymimadägyii, e ypijctäyii tüg'óciy ytujt huidi anajty ooy jot'amij'adyii, e yajhuäcxipy tijaty anajty ymñid.

²³ Pínjaty ca' xymijnicxpétyich, nmidzipich yi'. Pínjaty ca' ytuñ mñid ñich co jäy nyaj'ixpicyich Dios yty'ajt, hue' je' ajcxy jäy yajhuinma'ñdyigooyb.

Je ca'oybi co jadüg'oc yhuimbijty

²⁴ Co je ca'oybi ypidzimy ma je jäy, chi je' ñicxy jim títznaax ijxtägy co ypocxa'ñ. Co ca' paty ypocxtac, huin'it ymína'ñ: “Huimbidaambich ma je jäy yjot yhuinma'ñ ma ñich ti n'octzombi.” ²⁵ Co je ca'oybi yja'ty ma anajty ti chinäy, chi paady je jäy yhuinma'ñ janch yhuádzity janch ooy jadu'n nej tüg tijc huidi janch huádz pedigity. ²⁶ Chi je ca'oybi ñicxy, e mñid miñ jahuixtujc ca'oybi jacjibicpi ca'ydi je'; chi ajcxy ytigiiy ma je jäy yjot yhuinma'ñ, e chinay ajcxy jüby; huin'it je jäy jac'o'ctiy oy yajtni ca'ydi jadu'n nej anajty jayjip'aty.

Huidi ajcxy janch jotcúcip

²⁷ Co Jesús jadu'n anajty ymína'ñ, chi tüg töxyjäy mayjäy agujc mic ymína'ñ: —Jotcujc je töxyjäy huidi ti xyajpi'c'aty etz huidi xyajyeegy.

²⁸ Chi Jesús ymína'ñ:

—Je' jacjotcujc pínjaty Dios y'ayuc midoohuip etz cuyduunip.

Jibicjädydjic pijctzoogixy tüg ty'ajt mijhuinma'ñybi

²⁹ Co je mayjäy ajcxy jübigiiy, chi Jesús ymínandacy:

—Jadachambi jäy ooy ajcxy yjibicjäyity, ypjctzooyb ajcxy mijhuinma'ñ ijxpejt. Ni camina Dios ajcxy ycamöhuuyb ijxpejt, jëyi tügpajc Jonás y'ijxpejt yajmöhuyb. ³⁰ Com jadu'n nej je Jonás jecy'ajty ijxpejt yecy ma je Nínive jäy, nañ jadu'n iich, je jäy huidi tsoon tzajpjoty, nyegaamyich ijxpejt jadachambi tiempo müd jäy ycixpi. ³¹ Je töxyjäy reina huidi tzinay jecy'ajty ma madzäcruudz ypidzimy, yi' je' xidähuam jadachambi tiempo jäy co anajty Dios tıyduna'ñ mayjäy, etz yajpocycähuiipy ajcxy. Ixti ma naaxhuiñybi ycoğixiy jim je reina choon co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios ytiy'ajtmüdpı jacnigi ymıjity ca'ydi Salomón anajty. ³² Co anajty Dios tıyduna'ñ yi may naaxhuiñyjäy, chi je jäy ajcxy huidibi anajty cogajpı jim Nínive pidıgaangixy etz yajpocycähuaangixy jadachambi naaxhuiñyjäy. Com je Nínive jäy jothuimbıjt je' ajcxy co Jonás Dios y'ayucnajtzcapxiyi. Ji jadachambi tüg Dios y'ayucnajtzcapxiybi jacnigi ymıjity ca'ydi jadu'n nej anajty je Jonás.

Je tiy'ajt huidibi nipaady nej lámpara ma ajt nninıcx

³³ Ni pın ca' yüch je jın huidi ti nögpıty, ni ca' pidägy jıiby cajón pa'tci'py, jëyi janchtıy pidägy je jın ma jıındıcxpejt, jaydëbi co pınjaty ytiğihuiipy tiğoty, codıcxıb je jın. ³⁴ Je jın ma müich ajcxy mninıcx je' yi' müich ajcxy mhuiin. Pen oy müich ajcxy mhuiin, nañ jadu'n tüg'ócıy müich ajcxy mninıcx ymıd yi' tııcxın. Pen ca' y'óyity mhuiin, nañ jadu'n ajcxy yi' mninıcx yajpaty agootztuum. ³⁵ Cuend'ájtıx yi tiy'ajt huidi müich ajcxy müd, ca' mgoyützcıxy, com co jadu'n nıcxıy y'ahuimbıty nej cootzpı. ³⁶ Pen müich mdıy'ajt codıcxıy y'ity müd Dios ytiy'ajt, tüg'ócıy quëxıgtähua'ñ janch huädz.

Jesús ca'p jäyğıdaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pıjctzoy huen nıcxıy müd cayıı. Co Jesús ytiğtığıy, chi y'ıxtacy ma je caybejt. ³⁸ Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayajpocyhuächıy müd nı jayıjpnı ma anajty ca'ni ycaayñı. ³⁹ Chi je Huindzın Jesús ymınañ:

—Müich ajcxy fariseojäy, ooy mnaybıdaaccıxy tudägyjäy ma jäy ajcxy yhuinduu e ca' yjanchıty; chi jada' ma mjot mhuiinma'ñ müich ajcxy ooy m'adzocy, etz müd ajcxy jıbic-huinma'ñ; tim jadu'n nipaady nej myajhuäch ajcxy yi tasi ninıcx, yi texyñinıcx e chi ajcxy yajhuı'mgıxy jıbicpı je tasıjoty je texyjoty. ⁴⁰ ¡Müich ajcxy ca' Dios y'ayuc huinjıhuıybi! ¿Ca' mnejhuıyğıxy co yi pın ti texyñinıcx yajcojy nañ ti yajcojy texyjot? ⁴¹ Tun müich ajcxy ojjäy'ájtın, huinıt janchtıy anajty ajcxy mhüädzıty ma mjot mhuiinma'ñ.

⁴² ¡Ay müich ayoobi ajcxy fariseojäy! Com mbıdaaccıxy abıcy tüg pıcy je majcpı müd yi Dios ycixpi ixti yi tzajnimang, yi ruda, etz tüg'ócıy aay ujtz. Chi jada' ca' mduñ je ojjäy'ájtın etz tiy'ájtın jadu'n nej Dios tzocy. Hue' je' oy mduñ co tijaty abıcy mbıdägy müd Dios ycixpi, nañ jadu'n copıcy ojjäy'ájtın mdunıpy etz Dios ytiy'ajt mguydunıpy.

⁴³ ¡Ay müich ayoobi fariseojäy ajcxy! Co ooy m'adzójccıxy je iñaybejt huidi cöduum ma naymujctac, etz ooy m'adzójccıxy co huen jäy ajcxy xycapxpooocıxy oy huindzığıy mayjäy agujc.

⁴⁴ ¡Ay müich ayoobi ajcxy huidi yaj'ıxpıjcp Dios yley etz müich fariseojäy ajcxy! Oy mjanaybıdáacığıxy ojjäy e ca' yjanchıty, ca' mguydungıxy Dios ytiy'ajt, jadu'n nipaady müich ajcxy nej öcpı jut huidi ca' yquëxıgy, chi jäy yö nığıx, com co ca' ñıguëxıgy.

⁴⁵ Chi tüg jäy huidibi yaj'ıxpıjcp Dios y'ayuc ymınañ:

—Huindzin, co jadu'n miich mīna'ñ, nañ jadu'n ñch ajcxy ooy jibic nayjihuiyigixy.

⁴⁶ Chi Jesús ymīnañ:

—¡Ay ayoob miich ajcxy Dios y'ayuc huindzin! Miich ajcxy mgójcixyp canaag costumbre huidi je jāy ajcxy ca' mīmadāga'ñ, e ca' ajcxy mba'ayoogixy, tim jadu'n nipaady nej jihuiy tūg tziimy ti mmooygixy jemxypī huidi ca' je jāy ajcxy mīmadāga'ñ, e miich ajcxy ni ca' mgihuāx jēda'ajty mgayajpadaangixy je tziimy.

⁴⁷ ¡Ay miich ayoob ajcxy! com myajcojciy je ōgpi jut ma je Dios ayucnajtzcaxiibi naaxtigiy, je huidi m'ap mdeedy ajcxy yaj'o'c. ⁴⁸ Jadu'n yajhuinjihuiy nej jihuiy miich ajcxy ooy mjāygidāgy jadu'n nej ajcxy m'ap mdeedy ytundigoy. Janch yi' ajcxy yaj'ōgy Dios y'ayucnajtzcaxiibi, e miich ajcxy myajcoj je ōcpi jut ma ajcxy je' ñaaxtigiiy.

⁴⁹ Paady yi' Dios jadu'n huinmay, e mīnañ: Nyajniguexipyich miich ajcxy profetas etz y'ayuccapxhuācxpi, e miich ajcxy myaj'ōgip nijējity, etz jacnaagity mbahuidijttāccixipy. ⁵⁰ Dios yajcomidohuipy jadachambi tiempo jāy ajcxy je ypocy huidi y'ap yteedy ajcxy ytuñ, com maabi naaxhuiñ chondāgy, yi' ajcxy yaj'ōgy Dios ytiy'ajtmīdipi. ⁵¹ Janch nīmaaybich miich ajcxy co Dios yajcomidohuipy jadachambi tiempo jāy ajcxy je y'ap yteedy ypocy co ajcxy yaj'o'cy Dios ytiy'ajtmīdipi chondāgy ma Abel, ixti Zacarías huidi jāy yaj'o'c ma Dios ytiy'ajtmīdipi.

⁵² ¡Ay miich ayoob ajcxy Dios y'ayuc huindzin! Ca' miich ajcxy m'ixpīga'ñ Dios ytiy'ajt, nañ ca' mdzocy co yi' jāy ajcxy ixpīgipy; tim jadu'n nipaady nej jihuiy ti mbiy je tiy ahuaast e ca' miich ajcxy mdigīhua'ñ, e ni mgatzojccixy co huingbi nicxy ytiy'ajtmīdipi.

⁵³ Co Jesús anajty jadyaab ayuc yajnīmaaygixy, chi je Dios y'ayuc huindzin etz yi' fariseojāy ajcxy jotmātcooty chi yaj'amidogoty ajcxy may ayuc. ⁵⁴ Ñayñimāayigixy miñ xyipy co huen amido'ijt Jesús y'ayuc, jigix jēb páatcixipy huidi jēb mīd xīgixipy.

12

Jesús yaj'ixpicy co ca' huaad pīnjaty naybīdaaci oyjāy pen ca' yjānchity

¹ Chi je mayjāy ooy nimujcy Jesús, janch jadu'n ñay'adijy ñay'agodiiyigixy, chi Jesús nīmaydacy je' ydiscipulos jayijp:

—Nigüendi mīd yi' fariseojāy ajcxy nej ajcxy yjāy'ixpījccixy. Yajxon yi' ajcxy ycapxy ymīydāgy, chi ca' cuydungixy. ² Ca' ji ti huidi ijtp ayūch nicxy ycajajnejhuiy, nañ ni ca' ji ti huidi ijtp ameech nicxy ycaniguēxīgy. ³ Huen huidi ayuc miich ajcxy ameech mgapxy, yajnejhuihuip yi'. Huen huidibi ayuc huidi ti mnayyajnīmaayigixy ameech jūiby tīgoty, mīc yajcapxhuācxip tiy nīgixy.

Pīn jēbi huaad ndzigīyim

⁴ Chi Jesús yjacmīnañ:

—Miich ajcxy nmīgūgtijc, ñch miich ajcxy nīmaayb co ca' mdzigīyigixy yi' jāy ajcxy huidibi nīncx yaj'o'cp, com ca' jac ni ti ajcxy tunipy. ⁵ ñch miich ajcxy nyajni'ixihuiipy pīn huaad jēbi mdzigīyigixy. Yi' janch mdzigīyigixy yi' Dios huidibi jugy'ajt pījcp, e huin'it mīd je' ymīc'ajt jēbi quexipy m'alma ma je mij jūin. Yi' janch mdzigīyigixy yi'.

⁶ ¿Nej ca' jäy ajcxy ytoogyii migoox joon m'id metz pi'cmeen? Dios ni tüg yi' ajcxy ca' jäy digooyity. ⁷ Ixti mgöhuay ajcxy ac michoy Dios m'idity. Ca' mdzigiygixy, jactzou nigi miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyii Jesús mayjäyjoty

⁸ Ich miich ajcxy nimaayb co pinjaty ma miich ajcxy huidi capxp'idzim mayjäyjoty co xymibicyich xymijpidägyich, ich, je jäy huidi tzoon tzajpjoty, ngapxp'idzimipyich co ti ngöbicyich jadu'mbi jäy ma Dios y'angeles ajcxy yhuinduu. ⁹ Pinjaty ca' xycöbicyich mayjäy'agujc, nañ jadu'n ich yi' ca' ngöbigipyich jilby ma Dios y'angeles ajcxy yhuinduu.

¹⁰ Tüg'öciy jäy huidi jadu'n ich, je jäy huidi tzoon tzajpjoty, xyñigapxp xyñi'ojhybich Dios huinmecxib. Chi jada' pinjaty nigapxp ni'ojhyb je' Dios yjihu'iñ (je Espíritu Santo), yi' janchtiy Dios ca' yhuinmecxib.

¹¹ Co mmidzip ajcxy xyajnicxip ma naymujctac, ma codungdijc, etz tungm'idi yhuinduu, ca' mdájp mmáyip nej m'adzogixipy, e ca' mhuinmayipy nej ajcxy m'adzohuipy. ¹² Com je Dios yjihu'iñ huin'itiy ajcxy xya-jni'ixihuip nej huaad m'adzoogixy.

Naygüend'ajtigixy ca'p adzojccixy comeeñ'adii

¹³ Chi nidügti je mayjäy ymínañ:

—Huindzin, nima' n'ajchich co huen yajhuäcxy m'id ich huidi ndaj ndeedyich ñidungiy.

¹⁴ Chi Jesús ymínañ:

—Yëydijc, ca' ich ni pin ti xypidägyich ane'mbi ma miich ajcxy etz yajhuäcxpi.

¹⁵ Chi Jesús nimay je jäy ajcxy:

—Ijxcix naygüend'ajtigix, ca' m'adzojccixy comeeñ'adii, com je m'alma yjugy'ajtín ca' je' n'adzoocin'adyii huidijaty miich ajcxy m'id.

¹⁶ Chi ajcxy yajnimay tüg ayuc, ymínañ:

—Jim anajty tüg comeeñyjäy huidibi anajty ooy mij ypidägy yajpidägy.

¹⁷ Je comeeñyjäy anajty ooy c'm huinmay ma yjot yhuinma'ñ, ymínañ: “¿Ti n'octunipich com ca' nm'ididyich ma nyajnidägibich yi' tibi y'ity?” ¹⁸ Chi ymínañ jotjoty huinma'ñyoty: “Nyajpidicnibich ndzëx, e ngöjibich jacmijpi, chi tüg'öciy jilby nbidactahuibich tibi y'ity.” ¹⁹ Co jadu'n ndunipyich, chi jëbi jotcuyc ndzinahuibich, com ooy anajty nm'ididyich pidägy yujcpiy, jëbi canaag jimijt niboocxyich etz jëbi ngay n'ügyich jotcuyc. ²⁰ Chi Dios nimay je comeeñyjäy: “Ooy jibic-huinma'ñ miich m'idity. Cham coodz ich miich nibijctzohuiahuanay yi' m'alma (m'ögip), e co anajty ti m'ögy yi' huidibi ti myujcpiy, ¿pin yi' je'adib?” ²¹ Jadu'n yajty yi' ajcxy huidibi ymeeñ'idi'ñ c'm yujcpiy, ca' yi' ajcxy jilby ycomeeñyity ma Dios yhuinduu.

Dios ycuend'ajtpy y'ung y'anäg

²² Chi Jesús nimay je y'ixpijcidijc:

—Paady ajcxy nimaaygixy co ca' huaad mjottigooygixy ma yi' mdzináayin yi' mjogy'ajtín, huidi mjicxcixipy mgáaygixipy, huidi m'id mninix mxójxcixipy.

²³ Yi' jugy'ajt jacnigi tzou yi', ca'ydi yi' caayin uucin, etz je mninix jacnigi choohuity ca'ydi huit. ²⁴ Ijxcix yi' joogy ni ca' ñipy, ni ca' chijccixy, ni ca' m'idity ytijc ni chëx, e Dios yi' ajcxy mooyipy huidi yjicxcixyp, ¿nej cayjacnigi miich ajcxy mdzoohuity ca'ydi joon ajcxy? ²⁵ Ca' ji ni pin ma miich ajcxy pin jadipy nej ñayjijptzomihuib jadüg c'nuux. ²⁶ Pen ca' m'ajtcixy nej mdúngixipy huidi hueen huinma'ñ, ¿nej co mdzachmijottigooygixy yi' tzinaayin yi' comeeñ'ajtín?

²⁷ Ijxcix yi aaybijy nej xóxyity, ca' ytaaccixy ni ca' yxuuygixy. Hich miich ajcxy nimaayb, co ni je rey Salomón mïid tüg'óciy ymeeñ ca' ñayxoxi jadu'n nej jada aaybijy ujtzpijy. ²⁸ Pen jadu'n Dios xoxy yi aay yi ujtz huídibi cham jajtíp ma yi tungop, e com jabom ti anajty ñiicxni, Dios xypubedipy xypudigihuiipy ñigi miich ajcxy huídi hueen mibijcp. ²⁹ Ca' miich ajcxy mhuinmay'ahuídítcixipy ajcxy ti mgáaygixipy m'úuccixipy. ³⁰ Yi naaxhuiñjáy ajcxy ymijottigoyb anaxy tüg'óciy caayin uucin, huit etz tijaty. Miich ajcxy huídi mijpidacp Dios, Dios Teedy ñejhuíyb co copicy ajcxy mïid'adipy caayin uucin etz huit tucxy. ³¹ Jayijp mijottigooygix Dios y'ayuc ytiy'ajt, chi jada' tüg'óciy huídi ajcxy myajmayjaty mbáatcixipy yi'.

Jugy'ájtín mijpí jiiiby tzajpjoty

³² Chi Jesús yjacmínaañ:

—Ca' miich ajcxy mdzigiiygixy, miich ajcxy mnihueeñity, per mDios Teedy yega'ñ ane'mdac tzajpjoty mïid miich ajcxy ycixpi. ³³ Tooccix tijaty miich ajcxy mïid, nimooygix ayoobitijc. Yaj'oyiiygix meeñ'idi'ñ huídi ca' y'amijihuiipy ni camina. Yaj'oyiiygix tüg pidägy, janch mij e janch oy, jiiiby tzajpjoty huídi ca' ycixipy ytigoyipy, ma ca' meetzpi huaad ytiyíy, ni ucxyting ca' yajhuindigoyipy. ³⁴ Pen miich ajcxy mïid mgomeeñ'ájtín ya naaxhuiñ, yaayi je mjot mhuinma'ñ ajcxy. Pen mdzojcpy ajcxy je oybi huídibi Dios yegamy, nañ mïid'ájticy jim jabom jabom mjot mhuinma'ñ ajcxy ma Dios.

Tzoc íjtím ni'ixí'

³⁵ Chi Jesús yjacmínaañ:

—Ni'ixiiygix mjot mhuinma'ñ jadu'n nej jihuíy mhuit myujc'ameetcixy co mdunaangixy, etz jadu'n nej jihuíy lámpara mnögpjccixy co mdzumnaaangixy m'ahuixaangixy je huindzin. ³⁶ Ni'ixí'íjtcix jadu'n nej jáy huídi yhuindzin ahuijxp, co anajty yhuimbity co anajty ti y'oy ma jáy ti ypicy, chi co anajty minipy ycogapxiy, mic'amy myaj'ahuädzity ytijc. ³⁷ Jotcuje ajcxy je tumbi co je yhuindzin anajty yjady, e paady chumnajx juugy. Janch nimaaybich miich ajcxy co je tumbi ajcxy yhuindzin anajty yjady, chi yhuít yujc'ameedipy, chi ajcxy yaj'ixtägipy ma caybejt, yajcayipy yaj'ügipy. ³⁸ Oy miinipy je huindzin mijcoodz o moñiyi, e páadip je tumbidijc ajcxy jim chumnájxcixy juugy, jotcuje je' ajcxy je jadu'mbi tumbidijc. ³⁹ Nejhuíygix jada co je codijc ixipy nejhuíhuipy ti hora ymina'ñ je meetzpi, chi juugy ixipy chuumnaxa'ñ, e ca' ciyegipy ytijc nicxy jáy tigoty ymeech. ⁴⁰ Miich ajcxy nañ jadu'n íjtcixy ni'ixí', mína anajty ca' ti mhuinmaaygixy, huin'it miina'ñich ñich, je jáy huídi tzoón tzajpjoty.

Je tumbi tudägyipi etz je tumbi ca'pi ytudägyity

⁴¹ Chi Pedro Jesús nimay:

—¿Pín jada ti myajnimayb jada ayuc huídi ti mgapxy, ñich ajcxy, o nidüg'óciy jáy?

⁴² Chi je Huindzin Jesús ymínaañ:

—Huídibi tumbi je' ya huídi tumb mïid yhuindzin janch cixyjot huinijot huídi mïid yhuijy'ajt ycuje'ajt huídi je yhuindzin mooyip ané'mín ma ytijc, huídi yajnigidägiiyb tumbidijc nej ypaadyii. ⁴³ Jotcuje je tumbi co anajty je' yhuindzin yhuimbity e padiiyb ti cuyduñ jadu'n nej anajty ti ñimäyii. ⁴⁴ Janch ñich miich ajcxy nimäy co je tumbi huindzin yajmihui'mdähuiipy jada ytumbi tüg'óciy pidägy huídi ymïid. ⁴⁵ Pen je tumbi yhuinmaayb jotjoty huinma'ñjoty co je yhuindzin yhuäcxijpni mína ymiina'ñ, chi midziptzooni jacjadyii tumbidijc ajcxy, huojpni, cojxni, nañ ytiyíyñi caayb uucp anaxy etz

ymügyii. ⁴⁶ Chi je tumbi yhuindzin miinipy ma je xii hora anajty ca' jipp'ixy e ni canehuiy anajty, e huin'it ooy tzaachytunipy yi tumbi e chi pidägyipy ma je huidi ajcxy ca' ytudägyity.

⁴⁷ Je tumbi huidi nejhuiyb nej yhuindzin chójcin, e ca' cuyduñ, ni ca' ycapxymidoy, ni ca' ni'ixi' ity co yhuindzin anajty yhuimbity, je' je' nigí yajtzaachytunip. ⁴⁸ Je tumbi huidi ca' yajxon huinjihuý nejjihuý yhuindzin chójcin, hueeni je' yajtzaachytunipy. Huenpínity huidi may yajmooyb, may yi' yajmibijctzohuiyb; etz huenpínity huidi ti mihui'my ooy, yajmibijctzohuib nigí.

Jesús ycixpi ñaybije-huäcxyii jäy

⁴⁹ Chi Jesús yjacmíañ:

—Hich ti nmiiñich ya naaxhuiñ co jin nbidägebich. ¡Ooy njadzocyich ji ixyipy ñitooyñi! ⁵⁰ Nyajnaxipyich tüg tzaachypi, e ¡ooy ndajy nmayich ixti mabaad yajcuydundäy! ⁵¹ ¿Nej miich ajcxy mdijy co ti nmiiñich ya naaxhuiñ co nyajcixipyich je tzipi? Hich miich ajcxy nimaayb co ca'. Hue' janchtiy nyajnaybije-huäcxáanibich jäy ajcxy. ⁵² Jadachambi etz yjacnixni xii tiempo ji migoox tüg quëxjäydije huidibi ajcxy ñaybije-huäcxib, tugig mid je metzpi, e metzpi mid je tugigpi. ⁵³ Je ungededy tziptunip mid ymang etz je mang mid yteedy. Nañ je ungdaj tziptunip mid yñix etz je nix mid ytaj. Nañ jadu'n je xecy tziptunip mid yxecy.

Je xii tiempo ytiy'ajt

⁵⁴ Chi Jesús nimay je mayjäy ajcxy:

—Co ajcxy m'ixy je joc ypidägy ma xii ycidägy, chi mīnaangixy co tühuaam, e janch jadu'n yjadyii. ⁵⁵ Co ymiiñ je jinboj, chi miich ajcxy mīnaangixy co ambigaamb, chi janch jadu'n yjadyii. ⁵⁶ ¡Miich jibic jäy ajcxy! Ooy mjajtciy nej myajcaxciy yi xii tiempo huidi ajcxy m'ijxpy tzajpcixy etz ya naaxhuiñ: ¿Nej co ca' mjajtciy nej myajcápcixipy xii tiempo ymiiñ ycidägy?

Naymi'oyihu mid midzip

⁵⁷ ¿Nej co miich ajcxy ca' ci'm mnaydiyduunigixy nej ytudägyity je tiy'ajt?

⁵⁸ Co mñicixy ma yi codung mid yi mmidzip jac'oy co mnayyaj'oyihuipy mid yi mmidzip tü'am, ca'ydí mid mjädip ma yi codung, e chi je codung xyciyegipy ma je xueetz, e je xueetz xpidägip pujxtigoty. ⁵⁹ Hich miich nimaayb co ca' jiiyby mbidzimipy, ixti cooni mgüejtähuiipy tüg'óciy.

13

Ooy ycopicyity nyajtigajzim nhuinmañ

¹ Huin'it jäy midmidyacy Jesús jadu'n nej je gobernador Pilato yaj'ögy nijëjity jäy jim Galilea, chi tem huidijti ajcxy ñi'py mid iyujc ñi'py huidi je' ajcxy mid huindzig'iñ tuuñ. ² Chi Jesús y'adzooy nimay ajcxy:

—¿Nej mdijy, nigí anajty ypocymidity je galileojäy ajcxy huidi jadu'n ayo'n patp, ca'ydí nidüg'óciy galileojäy? ³ Hich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigiyyigixy ma Dios, nidüg'óciy miich ajcxy mgijxtähuiip mdigoydähuiip. ⁴ E je' ajcxy je majmocxtugigpi huidi je mijtije jim Siloé nigidaagootti, yaj'óci ajcxy. ¿Nej mdijy nigí ajcxy ypocymidity, ca'ydí nidüg'óciy je jäy huidi tzinayb jim Jerusalén? ⁵ Hich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtähuiip mdigoydähuiip miich ajcxy nidüg'óciy, jadu'n nej je' ajcxy.

Ijxpejt ma je higeri ca'pi anajty ytäm'aty

⁶ Chi Jesús yajnimay ajcxy jada ayuc:

—Tüg jäy anajty müdity higueri cojy ma y'aguemy, chi ñicxy jüby ma y'aguemy higueri tím ijxtaaybi, ni ca' paty. ⁷ Chi nimay je' ytumbi: “Cham midugüg jimijt müñich ya higueri tím ijxtayb ma jada higueri cop, ni tüg nga-paadyich. Huen yajpujxciday jada higueri cop, nej co nigoobi ñaaxnihua'ñ.”

⁸ Chi je' ytumbi y'adzooy: “Huindzin, oc'ixmatz. Huen jadüg jimijt jëyi ocjactinäy, octajyich jayjyp yi naax jühuidityi, etz oc'abonijjyich. ⁹ Pen tím'ajt ca' nyajpuxipy, pen ca' ytím'aty jëbi nbújxigipy.”

Jesús yajtzögy pocxx#duum tüg töxyjäy jigojopyi

¹⁰ Chi Jesús anajty yaj'ixpicy ma tüg naymujctac pocxx#duum. ¹¹ Jim anajty tüg töxyjäy huidi anajty mimajmocxtugüg jimijt cujc m'ijtni yj#bojpa'm, agojoty anajty yöy, ni nej anajty yca'oyiy nej ytinaaygugihuipy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yjix, e chi je' yjix ytiy, huin'it ytiigiy Dios ojadajtpi. ¹⁴ Huin'it je naymujctac huindzin ooy yjotmäty müd co anajty Jesús jäy ti tzoyiy pocxx#duum. Chi je naymujctac huindzin nimay ajcxy je mayjäy:

—Jëyi tudujc xii jäy huaad ytuñ, huen müñ semaanjoty pin yajtzoyihuam, ca' ypocxx#duumity.

¹⁵ Chi je huindzin Jesús ymíñañ:

—¿Müch ajcxy naybidaacip nej tudägyjäy, e ca' yjanchity! ¿Nej ca'müch ajcxy mmigüejy mhuaajuubi, etz mburro ma ypëcxtac pocxx#duum, e myajnicxy ajcxy ni'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugüg jimijt, ¿nej ca' ypadyii nyajtzögibich pocxx#duum?

¹⁷ Co Jesús jadu'n y'adzoy, chi yajtzöyduuñ ymidzip. Chi tüg'óciy cajpjäy oy ajcxy yjotcugiygixy müd je oybi huidi Jesús ytuun.

Ijxpejt ma je mostaza pájc

¹⁸ Chi Jesús ymíñañ:

—¿Nej m'oc'a'ixiygixy yi Dios y'ané'min? ¿Huidi müd n'ocyajquipxihuibich?

¹⁹ Jadu'n Dios y'ané'min nipaady nej mostaza pájc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'ñ pidaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc ymíñañ:

—¿Huudibi müd n'ocyajquipxihuibich yi Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy ytijhuidijt müd tugüg quipxi'ñ harina ixti cooni yajxunday je harina.

Je tü'aa xützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc ytiy'ajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nüdögip?

Chi Jesús y'adzooy:

²⁴ —Mijpidaaccix Dios ytiy'ajt amuumdügjet, jëbi ajcxy m'alma nüdögipy, jadu'n nipaady nej jäy ajcxy ñaymic'ijxigixy co ytiühuaangixy ma je tijc agu xützpi. Jadu'n ich müch nimaayb co mayjäy ooy ja'a'ixiy ytiühuaangixy ma Dios y'ane'my e ca' ajcxy jadipy nej ytiigiygixipy. ²⁵ Co je codijc ypidigipy etz agiyñip ytiyc, huin'it müch ajcxy pinjaty tibäy huim, chi jüby tibäy müch ajcxy mmínandägipy: “Huindzin, yaj'ahuädz”, e chi je tijc huindzin müch ajcxy xy'adzohuipy: “Ca' ich müch ajcxy nejhuüyich ma müch ajcxy

mdzoongixy.” ²⁶ Chi huin'it miich ajcxy minandägipy: “Miid ich ajcxy miich ti nmüdgaaгыxy ti nmüd'uuccixy, e miich ti myaj'ixpicy ma ich ajcxy ngajp.” ²⁷ Chi je Huindzin y'adzohuipy ajcxy: “Ich miich ajcxy nimayb co ca' nnejhuüyich ma miich ajcxy mdzoongixy. Jihuäccix ma ich nhuinduu, miich ajcxy pocy ytumbi.” ²⁸ Chi miich ajcxy jim ooy mdäjcixipy mmäгыxipy, myáaxcixipy mdiitzquéetcixipy, co miich ajcxy m'ixipy Abraham, Isaac, Jacob etz tüg'óciy yi Dios y'ayucnajtzcaxxiiybii jiiiby ma Dios y'ane'my, e miich ajcxy tibäy anajty ti mhuim'gixy. ²⁹ Minip yi jäy ajcxy huudibi tzoomb ma xii ypidzimy, ma xii ycidägy, ma jayhuixtuyc ypidzimy, etz cham ma madzäcruudz ytinaay'ahuüy, chi y'ixtääccixipy ma je caydac jiiiby ma Dios y'ane'my. ³⁰ Paady ji jäy ajcxy huudi cham axam'ajtp, je' ajcxy jayijp'adip, etz ji jäy ajcxy huudibi cham jayijp'ajtp, etz je' ajcxy axam'adip.

Jesús taj may miid Jerusalén ycixpi

³¹ Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

³² Chi Jesús y'adzooy:

—Nícx nimaagyix yijiiibi huaax co nyajpidzimybich ca'oybi etz nyajtzoocypich jäy cham etz jabom, codugüig xii ti ndung mayijich. ³³ Ooy ycopicyity co ich njactüyöyibich cham, jabom etz huixtic. Com ypaadyii co Dios y'ayuccaxhuäcxpi y'ögip ajcxy jim Jerusalén.

Chi Jesús yjacmínaañ:

³⁴ —¡Jerusalén jáy! ¡Jerusalén jáy! huudibi yaj'o'cp Dios y'ayucnajtzcaxxiiyb ajcxy, etz ycögadz ajcxy je jäy huudibi Dios ti xyajniguéjx ajcxy. Janch canaag'oc ich miich ajcxy njahuijtzmugañ jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixiiygixy. ³⁵ Chi jada' ijxcix cuenditungix, com jadachambi mgajp yhui'my najtz'ixi'. Ich miich ajcxy nimayb co ca' xy'ixipyich jadügtecy, ixti cooni anajty tiempo paaty mina mmináangixipy: “Capxpaaty je' huudi miimb miid Huindzin'ajtin Dios ycixpi.”

14

Jesús yajtzögy tüg yëydijc quixypa'mmüdpi

¹ Chi jadu'n yajti co tüg pocxxiiduum Jesús ytigiy ycayañ anajty ma tüg fariseojäy ytijc, hue' anajty judío tungmüdpi. Chi yi judío ixpicytjic ajcxy tzach'ix'ijtcixy Jesús, amidoo'ijtcixy Jesús y'ayuc. ² Huin'it tüg jäy huudibi ymiid anajty quixypa'm miin ma Jesús yhuinduu. ³ Chi Jesús ymigapxi je' ajcxy huudibi yaj'ixpijc Dios ñecy etz yi fariseojäy ajcxy, nimay:

—¿Nej je Dios ytiy'ajt ymínaañ? ¿Huaad o ca' huaad chögy jäy pocxxiiduum?

⁴ Chi ajcxy y'amonday. Huin'it Jesús cñixajiiy je pa'm jäy, chi yajtzoocy. ⁵ Chi Jesús nimay je fariseos ajcxy:

—¿Nej miich ajcxy pen niijutcögäp ajcxy mhuajyuubi o mburro pocxxiiduum, nej ca' mic'amy nícxxy yajpidzim'gixy oy ypocxxiiduumi?

⁶ Chi ca' ajcxy jajty nej y'adzohuimbijtcixipy.

Je pinjaty huodzoöñyip ma je pijcpi yajnixüduñyi

⁷ Co Jesús ijxy jadu'n nej yi' ajcxy jac'oybi iñaybejt huin'ijxcixy jim ma je caybejt, chi ajcxy tüg ayuc yajnimaa yi, je tübi anajty yajhuomiingixy:

⁸ —Co miich myajhuoohuipy ma pijcpi yajnixüduñ, ca' m'ixtägipy ma je iñaybejt cödumbi, ca' jécyity co yajhuoomiñ huudi je' iñaybejt ymihuaad. ⁹ Chi jada' xyñimähuiipy je huudibi anajty ti xyhuoomiñ: “Mo' jada migüg jada iñaybejt cödumbi.” Chi miich tzöydu'n miid mnicxpy ma je' iñaybejt axambi.

¹⁰ Co jäy xyhuoohuipy ma je pijcin yajnixüduñ, jim m'ixtägip ma je axambi

iñaybejt, e co yminiipy je huidibi anajty ti xyhuomiñ, chi xyñimähuiipy: “Migüg, nax ma yi iñaybejt cödumbi.” Huin'it capxpaady m'idipy ma je' ajcxy huidibi anajty iñayb ma caybejthuinduu müd miich. ¹¹ Pinjaty ci'm naygömáyip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹² Chi Jesús nimay pinjaty huidi anajty ti yhuoomiñyii:

—Co miich mxüduunipy ca' mhuoohuiipy je jäy ajcxy huidibi ooy müd mnaymigüg'ájtigixy, ni mmidügquëx, ni m'ajuugy m'amigüg, ni mmidijc comeeñybi, ca' jécyity co nañ jadu'n xyhuohuiipy, e chi anajty jac mij yejchumbijty. ¹³ Co mxüduunipy, chi huohuiipy ayoobitijc, tzaachijäy ajcxy, tecymätpi ajcxy, etz jäy huiintzpi. ¹⁴ Huin'it miich mjotcuyc'adipy co yi' ajcxy ca' jadipy nej yejchumbidipy. Jiini Dios xymigüedipy co anajty yajjugypicy je tudägypi jäy ajcxy.

Je ijsxpejt ma tüg adzoo'ájtin mijpi

¹⁵ Tüg jäy huidi anajty iñayb müd Jesús ma caybejt thuinduu co midooy nej Jesús ymíañ, chi nimay Jesús:

—Jotcuyc je jäy ajcxy huidi cayip jiiiby ma Dios y'ane'my.

¹⁶ Chi Jesús y'adzooy:

—Tüg jäy may anajty jäy yaj'adzu'ada'ñ, chi jayijpni oy mayjäy nimay co anajty yaj'adzuu'ada'ñ. ¹⁷ Co je adzoo'ibi paty, chi quejxy tüg cogapxy huen nicxy huogixy je tiibi anajty ajcxy yajnimäy, nimay ajcxy: “Jámgiç, ti jim yajni'ixiy je caayin uucin.” ¹⁸ Chi ajcxy nidüg'óciy yminandacy: “Tun may'ajt meecxcich, ca' y'oyiy nej nyajnicxibich.” Chi je' jayijp jäy y'adzoy: “Ti njuyich tüg rancho je' copicy jayijp nicxy n'ixyich, paady ca' nicxa'ñich; tun may'ajt meecxcich.” ¹⁹ Chi jadüg jäy ymíañ: “Ti njuyich migoox par huaj yuubi, nicxy n'oc'ixmadza'ñich jayijp, paady ca' y'oyiy nej nicxibyich, tun may'ajt meecxcich.” ²⁰ Chi jadüg jäy ymíañ: “Tim chamni nbicyich, paady ca' oyiy nej nicxibyich.” ²¹ Co je cogapxy yhuimbijty, chi yajnimay je' yhuindzin jadu'n nej je jäy ajcxy y'adzooy huidi anajty oy ti huoy. Huin'it je huindzin ooy yjotmätcoty, chi nimay je ytumbi: “Nicx tzojcyi cajpjoty ma yi jäy ajcxy yöygixy ñajxcixy etz ma yi mij tü, e chi huomiinipy pin mdimypaatyp ayoobitijc, yi tzaachijäy etz huiintzpi.” ²² Chi je' ytumbi ymíañ: “Huindzin, ti nduñich jadu'n nej ti xyñimäyich, etz jac chiini iñaybejt.” ²³ Chi je huindzin nimay je' ytumbi: “Nicx ma yi mij ni mij tü yajmin je jäy ajcxy adzip, huen ich ndijc uch. ²⁴ Chi ich miich nimäy co ni tüg yi jäy ajcxy huidi jayijp yajnimay, ca' ajcxy y'adzuu'adipy müd ich.”

Nej ooy chípity co Cristo nbanicxim

²⁵ Chi may anajty jäy ñicxy müd Jesús, chi Jesús yhuäc-huimbijty, nimay ajcxy:

²⁶ —Pen ji pin xypamiñich, e ooy nigí tzocy yi' ytaj yteedy, yi' ytöxyijc, yi' y'ung, y'ajch o chi', etz nañ ooy nigí tzocy yi' yjugy'ájtin, ca' ich yi' huaad ndiscípulo'adyiijich. ²⁷ Yi' jäy ajcxy huidi xypamiimbich huidi ich ndiscípulo'adaanip, copicy yajnaxipy ajcxy ayo'n, jadu'n nipaady nejihuüy ycrudtz ti cabiccixy e nicxy yajcrudzpeda'ñyii. ²⁸ Co miich ajcxy mmijtijc mgoja'ñ, chi miich ajcxy jayijp m'ixtaaccixy e m'a'ixiygixy jadu'ñyi meeñydunaangixy, nej pen müd ajcxy huidi jëbi müd myajmaaygixy je mmijtijc, o peni ca'. ²⁹ Ca' yjécyity co anajty je tijc ti yajpojtzigy, chi anajty ca' m'ocajtini nej myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jäy ajcxy ymíañ: “Jadayaabi yëydijc nigoo ti yajtzondägy tijc poch, e ca' ti ocyajmaayñi.” ³¹ O huidi rey ji co chona'ñ tziptumbi müd

huingbi rey, ¿ca' jayijp huinmayipy pen jëbi chiptuñ mïd majc mil jäy, pen je ymidzip miimb mïd iipx mil jäy? ³² Ca' yjécyity co je tügpï rey jiguemni anajty miñ, chi quexipy tüg huingapxpï pijctzohuipy may'ajt ca'ydi yi tzip yjadyii. ³³ Hueñypínity ma miich ajcxy pen ca' m'ixmájtzcixy tüg'óciy tijaty miich ajcxy mmïd, ca' ñch yi' huaad ndiscípulo'adyii.

Co je caan ytamtz'ajt ytigooyñi

³⁴ Yi caan ooy yi' y'óyity pen ymïd ytamtz'ájtïn. Co je caan ytigoy ytamtz'ájtïn ca' ji ni ti xücx'ájtïn yegipy. ³⁵ Yi caan huïdi ti ytigoy ytamtz'ájtïn ni ca' y'oybidägnity ma je naax, ni ma je püx huïdi aboon'ajtp. Hue' janchtïy yaj'ixjidejtp tibäy. Pinjaty ñch n'ayuc xymïdohuaanip huen mïdo'mbicy.

15

Ijxpejt ma je cöbixy huïdibi tigooy

¹ Chi ajcxy je yajcujtpïdijc etz pocyjäydijc nimijhuägtay ajcxy Jesús tzach'amïdoo'idaani ajcxy je' y'ayuc. ² Chi ajcxy huïdi ooy tzachmijpidägy judíojäy ytiy'ajt etz huïdi ajcxy yaj'ixpijc Dios ñecy ameech nigapxcixy ni'ojïygixy je Jesús, chi ajcxy ymïnañ:

—Yi Jesús pocyjäydijc ajcxy ymïgüg'ajtpy, e yi' mïd ycaaygixy.

³⁻⁴ Chi Jesús jadayaabi ayuc ajcxy yajnimay:

—Huïdi jäy ji ma miich ajcxy pen ymïd mïgo'px cöbixy co ytigoy nidügti, ¿nej ca' yajhui'mïpy je mada'px majmocx mïdaaxpï jim ma chinaaydac, chi nicxy ixtäy huïdi anajty ti ytigoy ixti cooni paadip? ⁵ Co paadip, chi mic'amy pidägyip ma quejycoj janch jotcujc. ⁶ Co yajjädip ma ytïjc, chi huomucy ymïgügtïjc etz ymïjïn ymïdijc, nimähuipy ajcxy: “Jotcugïygix mïd ñch, ti ñch ngöbixy nbaady huïdi anajty ti ytigooy.” ⁷ ñch miich ajcxy nimaayb co nañ jadu'n tzajpjoty ooy jotcujc'ájtïn nïgi mïd co tüg pocyjäy yjothuimbity, ca'ydi mïd mada'px majmocx madaax tudägyipi jäy huïdi ca' ytundigoy.

Ijxpejt ma je meen huïdibi tigooy

⁸ Chi Jesús yjacmïnañ:

—¿Huïdi töxyjäy ji pen ymïd majc ymeen, co ytigooy tüg meen, nej ca' jïn nöctzohuipy, e ytigïhuipy pedïgpï ixtähuipy ymeen oñydägy ixti cooni paadipy?

⁹ Co paady, chi huomucy ymïgügtïjc etz ymïjïn ymïdijc, e chi nimähuipy: “Xondaaccix mïd ñch, ti ñch nmeen nbaty huïdibi ñch anajty ti nyajtigoy.”

¹⁰ Jadu'n ñch miich ajcxy nimäy co nañ jadu'n Dios y'ángeles ajcxy ooy yjotcújcity co yjothuimbity tüg pocyjäy.

Ijxpejt ma je ungu huïdibi ymeen yajtïcxtay

¹¹ Nañ jadu'n Jesús yjacmïnañ:

—Tüg yëydijc ymïd anajty metz ymang. ¹² Chi je jacmutzpï nimay yteedy: “Tat, mooygïch yi' pidägy huïdi xypaatpïch.” Chi je' yteedy je pidägy yajhuäcxy.

¹³ Hueeni anajty xïi tzuu cujc ñicxy, co je' ymang mutzpï yajmujctay tüg'óciy huïdi yi' yjë'ajtpy, chi choon ñicxy huingnaax huinggajp. Chi jim mic'amy yajtunday yajtigoyday tüg'óciy huïdi anajty ymïd. ¹⁴ Co anajty ymeen tüg'óciy yajtunday, chi miñ tüg mij yuu ma je cajp. Chi ooy je mang mutzpï caayïn uucïn huit meen jayajmayjajtni.

¹⁵ Chi je' ninicxy tüg jäy ma je jimbi naaxjot ymiduna'ñ anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñyïi mïd je pëtztïm huïdi anajty idzim y'ojcpy. Chi ni pin anajty ni ti ycamöyïi. ¹⁷ Co yhuinma'ñ yajmejch, chi ymïnañ ma yjot yhuinma'ñ: “Jim janch maytumbi ma ñch ndeedy ytïjc, ymïd ajcxy jïcxy picy janch may'amy. ñch ya tzach'ayoob mïd yuu xïi. ¹⁸ Tzonaambich

ya, ñicxa'ñich ma ñich ndeedy, ñimähuibich: Tat, ti ndundigóyich mïd Dios tzajpjotyti etz mïd miich. ¹⁹ Cham ca' ypadyii miich ñina'ñip co miich xy'ung'adyiijich. Yajtungich jadu'n nej mdumbidijc.” ²⁰ Chi je' choñ, ñicxy ma yteedy. Jegügyñi anajty ymiñ co yteedy y'ijxpaati. Chi yteedy ypa'ayogoti, e ñicxy poyigy oy jipcobadiy. Chi yögmennajxy etz tzücxxy. ²¹ Chi je ung ymiñ: “Tat, ti ndundigooyich mïd Dios tzajpjotyti etz mïd miich. Cham ca' ypadyii ñicxy miich ñina'ñ co ñich miich xy'ung'adyii.” ²² Chi je ungedeedy ñimay je' ytumbi: “Yajpidzim je huit oybi, mic'amy yajñijenñygyx jada n'ungich, chi moogyx yi çijitiz etz ycig. ²³ Ñicx yajtzoongix yi huaj mang ñicxpi, yaj'öccix, chi ngaayim n'uucim e nxïduunim. ²⁴ Jada n'ungich jadu'n nipaady nejñihuñy anajty ti y'ögy, e chi ti yjugypicy. Tigooy yi' anajty e ti yjädy.” Chi ajcxy ooy yjotcugiiy.

²⁵ Chi je ymang mijpi camjoty je' anajty. Co yja'ty mihuingon je ytijc, chi midoy co jäy ooy yxüxy etz y'ech. ²⁶ Chi yaaxi tüg ytumbi y'amidooy: “¿Ti yi' tünip jajtíp?” ²⁷ Chi je tumbi y'adzooy: “Ti yjädy m'uch, ti mdeedy yaj'ögy tüg huaj ñicxpi, co ymang ti huimbity juugy.” ²⁸ Chi je ungoob ooy yjotmät, ca' anajty ytigihua'ñ tigoty. Huin'it je yteedy ñibidzimi, ycohuanñyi co huen tigiy tigoty. ²⁹ Chi je' y'adzooy, ñimay yteedy: “Janch micanaag jimijt ñich miich mïd nduñ, ni ca' ngapxhuimbityich. Ca' chambaad miich ni xycamooyich tüg pi'ccöbixy jaydeb njotcujc'adipyich nxïdunipyich mïd nmigügtijcich. ³⁰ Per co yi mmang ti yjädy huidi oy ti yajtundäy yi ymeeñ mïd jibic-huinma'ñ mïd jibic töxyjädyijc ajcxy, chi ti myaj'ögy huaj mang ñicxpi mïd yi' ycixpi.” ³¹ Chi je ungedeedy ñimay je' ymang: “Miich ung huinixi ya mïd n'ity. Tüg'óciy huidi nmïdich miich yi' mje'. ³² Ooy ycopicyity co nxïduunim etz njotcugiiyim, co yi m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady.”

16

Je ijxpejt ma je mayordomo huidibi ca' yhuindzin miduñ tudägy

¹ Nañ jadu'n Jesús ñimay yi' ydiscípulos:

—Jim anajty tügjäy comeñybi, ymïd tüg ytumbi huidi yi' ypidägy cuend'ajtíp. Chi oy ñimäyii co tüg je ytumbi nigoo anajty tzachyajtuñ je meeñ ma ycapaadyii. ² Chi je huindzin oy yajhuoyii je' ytumbi, chi ñimay: “¿Nej jada co ñich jadu'n ñimäyijich mïd miich ycixpi? Ya yi cuenti çimoydaaygich nej ti mduñ, etz ca' ñich miich n'ocjactumbi'adaanin.” ³ Chi je pidägy cuend'ajtpi jot'ajti: “¿Ti ndunipich? co yi' nhuindzin xyajpidzima'ñich ma yi ytung. Juttajii ca' njatyich, co limosna nbijctzohuipyich tzöydumbich. ⁴ Nejhuñyibich ti ndunipich jaydeb jäy ajcxy xycöbigipyich ma ajcxy ytijc.” ⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayijpi: “¿Jadu'ñyi miich minuucxy'adyii ñich nhuindzin?” ⁶ Chi je' y'adzooy: “Migo'px garafón aceite.” Chi ñimay: “Matz mnecy, iña' mic'amy, e cojayi' huixchiguipxmajc.” ⁷ Chi jadüg ñimay: “¿Miich jadu'ñi mminuucxy'adyii?” Chi je' y'adzooy: “Migo'px quipxi'ñ trigo.” Chi ñimay: “Matz mnecy, cojayi' mida'px.” ⁸ Chi je pidägy huindzin capxpaaty je jibicjäybi huidi cuend'ajtp yi' ypidägy co oy yhuinma'ñybaady mij; co jadachambi naaxhuiñyäj huidi ca' mibicy Dios, ñigi ajcxy ypëgyity mïd yhuinma'ñ, ca'ydi yi' jäy ajcxy huidi huinñihuñyb Dios ytiy'ajt.

⁹ ñich miich ajcxy yam ñimaayb migüg'ajtigixy yi' jäy ajcxy mïd yi' meeñ huidibi ca' ytimytiijyity, jigix co je meeñ anajty myajmayajtcixy ji pin miich ajcxy xycöbigip ma jugy'ajttac huinixibi.

10 Je' jäy ajcxy huidibi yajxon cuydunam je ané'min huidi hueeni, nañ ycuydunamy je ané'min huidibi mijp. Je jäy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. 11 Pen ca' mjaajtcixy nej mgüend'ájtciixy yí jugy'ájtín huidibi ya naaxhuiñ yajpatp, ¿pin miich ajcxy m'ocyajmihui'mamy je jugy'ájtín je riqueza oybi janchypi? 12 Pen ca' mjaajtcixy nej mgüend'ájtciixy tibi mihui'mgixy huidi huingjäy yje'ajtpy, ¿pin miich ajcxy xymöhuiip huidibi ajcxy yje'ajtpy?

13 Ni tüg tumbi ca' jëbi ytuñ mïd metz yhuindzin; com tüg je' ixtijipy etz jadüg mijnicxpedipy; o tüg huidi ycapxycöbigipy, etz jadüg ca'. Miich ajcxy ca' huaad mijpidägipy Dios etz nañ jadu'n mijpidägipy yí comeeñ'ájtín.

14 Nañ jadu'n midooy jada ayuc yí fariseojäy ajcxy, com ooy anajty ajcxy meeñ adzójccixy. Chi ajcxy ooy nixiici yajxiici Jesús y'ayuc. 15 Chi Jesús ymínañ:

—Miich ajcxy fariseojäy jadu'n mnaybidáacigixy ma jäy ajcxy yhuinduu nejjihuyi ajcxy ooy m'oyjäyity. Dios ñejhuuydaayb co miich ajcxy mïd jibicpi ma mjot mhuinma'ñ. Tijaty huinma'ñ huidi jäy ya naaxhuiñ y'oy'ixyp, Dios ca' yí oy'ixy.

Je Dios ycötújcín etz je Dios y'ane'mdac

16 Chi Jesús yjacmínañ:

—Je taabi je Juan anajty yjijity, jii'ajtp anajty Moisés ycötújcín etz je y'ayucnajtzcaxiybi ajcxy y'ixpíjcín. Huin'it tiempo etz ixti jadachambi jadu'n yajnajtzcaxiy je Dios y'ané'min, e mayjäy ooy ñaybidáacigixy co ytigíhuaangixy ma Dios y'ane'my.

17 Ca'chípy co je tzajp etz naaxhuiñybi ñajxtähuiipy, pero je Dios ycuydundáhuamy tüg'óciy jadu'n nej ñecy ymínañ. Ni tugi letra oy mabaad ymúdzity nicxy ycayajcuyduñ.

Jesús capxticxy nej ypöcyity co jäy ytöxyjic ixmach

18 Chi Jesús yjacmínañ:

—Huenpinjäyity co ytöxyjic ixmach etz ypic y mïd huingbi töxyjäy, ooy anajty mij pocy tuñ. Nañ huenpinjäyity huidibi pijcp mïd je töxyjäy huidi ñäy ti y'ixmachyí, nañ mij anajty ypocytuñ.

Je comeeñjyay etz je Lázaro

19 Chi Jesús yjacmínañ:

—Ji anajty tüg jäy comeeñybi ñayxoxyii anajty janch ooy mïd oyjatypi huit, etz janch oy yca y'ügy jabom jabom. 20 Nañ ji anajty tüg ayoobi jäy huidi limosna pijctzoob, hue' anajty yxií Lázaro. Lázaro jabom jabom anajty ycögnäy ma je comeeñjyay ytíjc'aguu, janch nībuutzp anajty ooy. 21 Lázaro ooy anajty jani'ixy caya'ñ je cayduc tzütztuc huidibi cáb ma je comeeñjyay yca ybejt. Oy uc anajty ymíñ yhueyí je ñíbüdz. 22 Chi jadu'n yajti co oy y'o'cni je jäy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeeñybi nañ jadu'n y'o'cni, e oy yajnaaxtigíyí. 23 Chi je comeeñybi jilby ca'oydactuuby tzaachypí anajty jihuíy, chi mij'ijxy jigüey je Abraham etz je Lázaro. 24 Chi je comeeñybi ycapxy janch mic, ymínañ: “Apteedy Abraham, ñich pa'ayoog. Tun may'ajt quex Lázaro, huen yí ycihuäx yajxoogy mïd nñ etz xyajtíjtízbich ndootz, co ñich ooy ayo'n nbaadyích ma jada mij jñn.” 25 Chi Abraham y'adzooy: “Oc'ungích, ajihuíhuí co ti mdzínäy ti mjogy'aty mïd mhuit mmeeñ aguyc jotcuyc, e yí Lázaro ooy ayo'n paty. Jadachambi Lázaro yjotcuyc'aty, etz miich jilby mbatpy tzaachypí. 26 E jadügnax, ji tüg mij huoc ma ñich ajcxy etz miich ajcxy. Pen

ñich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma ñich nyajpaadyich.” ²⁷ Chi je comeeñybi jacnimay Abraham: “Apteedy Abraham, tun may'ajt quex yi Lázaró ma ñich ndeedy ytijc. ²⁸ Jim ma ñich ndeedy ytijc jim migoox miguëx nmíididyich, huen nicxy yajmíidmiydaaccixy, ca'ydi je' ajcxy nañ jadu'n ya minipy ma jada ayoodac.” ²⁹ Chi Abraham y'adzooy: “Yi' ajcxy ymíid necy huídibi Moisés etz Dios y'ayucnajtzcaxiybi ycojaay, huen cuydungixy.” ³⁰ Chi je comeeñybi ymíinañ: “Janch jadu'n apteedy Abraham. Pen nidüg yi ögpí ñicxy ma je' ajcxy, jothuimbip yi ajcxy.” ³¹ Chi Abraham ymíinañ: “Pen ca' je' ajcxy mijpidägy Moisés y'ayuc je jécyip etz huídibi ajcxy jecy'ajt Dios y'ayucnajtzcaxiy, nañ ni ca' mibíjccixipy pen nidüg ögpí yjugypicy.”

17

Huídibi ooy ycodzigijity co n'agánáxim ma pocy

¹ Chi Jesús nimay yi' ydiscípulos:

—Janch tiy'ajt jadu'n co yminip jäy ajcxy huídibi yajhuinma'ñydygoyip yi mayjäy ajcxy míid aaní. ¡Ay yi' ayooob ajcxy! pinjaty jäy ajcxy yajhuinma'ñydygoyaangixy. ² Nigi y'óyity co ixypy yajyo'cxodziyi tüg tzaa janch mijpi, e chi yajcöjibijpnaxipy mejyoty, ca'ydi co yajhuinma'ñydygoyipy jada jäy ajcxy huídibi ixpíjcin hueeni míid ma Dios ytíy'ajt. ³ Naygüend'ájtigix miich ajcxy co ca' mgapxtigóoygixipy.

Co m'uch xymíidundigooyipy, e chi mgapxhuíjip, e pen jothuimbijit, chi mbocymeecxipy. ⁴ Pen m'uch huixtujc'oc xymíidundigooy tüg xiibi, nañ huixtujc'oc xyñimíin tüg xiibi, e ymíina'niipy: “Ti njothuimbityich”, huinmeecxipy miich yi', chi jada' miich huixtujc'oc mbocymeecxip.

Je mibíjcin ymic'ajt

⁵ Chi je apóstoles ajcxy nimay je Huindzin Jesús:

—Yajyeeg ñich ajcxy nmibíjcin.

⁶ Chi je Huindzin Jesús y'adzooy:

—Co ixypy miich ajcxy mmíbicy Dios jadu'n nej tüg pi'c mostaza pajc, e mníma' ixypy jada paadzim quipy: “Nayyajpidígíi, nicx tina' mejyoty, e ycapxymíidohuip yi'.”

Ti huaad tuñ je pin yajcaayb yaj'uuc

⁷ Pen ji miich ajcxy nidüg pin ymíid tüg ytumbi huídibi tumb ñaaxjidzitzíi o yhuaj cuend'aty, co yja'ty ma mdíjic, ¿nej jébi nimay: “Tigi', ixtäg ma mesa etz adzu'at?” ⁸ Hue' janchtiy mnímáhuipy: “Yaj'oyíyigich n'adzuu'íbi, co'amedí' mhuit, e xymooygich ngaayin n'uucin. E huin'it miich mgayipy m'ügipy.” ⁹ ¿Nej yajnaxipy je' Dioscojuyip míid co je' anajty ti tuñ huídibi yaj'ane'my? ñich minamb co ca'. ¹⁰ Nañ jadu'n miich ajcxy co ti mguydungixy tüg'ócy tiibi Dios xyaj'ane'mgixy, chi mmíináangixipy: “Je' ñich ajcxy je tumbi huídibi ca'p ycapxpaadyity, jéyi ti ndúngixich huídibi ñich ajcxy huaad ndungixy.”

Jesús yajtzögy majc jäy jibic pützpa'mmíidpi

¹¹ Nicxp jim Jerusalén anajty Jesús, chi ñaxiy ma Samaria etz Galilea ñaymídziba'n'ájtigixy. ¹² Co anajty mihuingoñ tüg cajp, chi jipcoyöyiy majc jäy pützpa'mmíidpi. Chi ajcxy yhuäcxijpy jigügyñi. ¹³ Chi ajcxy mic ycapx-coody ymíinaangixy:

—Huindzin Jesús, pa'ayoog ñich ajcxy.

¹⁴ Co Jesús je' ajcxy ijxy, chi nimay ajcxy:

—Nicx nayguëxícigix ma yi teedy ajcxy.

Chi jadu'n yjajti, co ajcxy ñicxy, chi tüyöyjoty oy choocxicy. ¹⁵ Nidügti je' ajcxy co ñay'ixi co ti anajty chögy, chi nihuimbijty Jesús, ooy Dios jäymeche cömay janch cixyot huinijot. ¹⁶ Chi je' ycojxtinay'ahuñy ma Jesús ytecymijc, chi pidacpy yhuñyijp naaxcixy yajnaxy Dioscojuipy. Samaritanojäy je' anajty. ¹⁷ Chi Jesús ymínañ:

—¿Nej ca' nimajc miich ajcxy huidi ti mdzoocxicy? ¿Ma ajcxy je' janidaxtu-jcpi? ¹⁸ ¿Nej ca' pin jac yhuimbijty miñ jäy medza'ñ cömaya'ñ Dios, jeyi tügpajc ti yhuimbity jada samaritanojäy?

¹⁹ Chi Jesús nimay je jäy:

—Pidig, nicxni. Yi mmibijcin ti xyajtzögy.

Nej je' yminipy Dios y'ané'min

²⁰ Chi je fariseojäy ajcxy y'amidooy Jesús mina anajty yi Dios ya miñ ya naaxhuiñ y'ane'mañ. Chi Jesús y'adzooy:

—Je Dios y'ané'min ca' je' yminipy jadu'n nej ti yaj'ixy o yajmidoy. ²¹ Ni mgaminángixipy co cha je' o jim'amy je'. Dios y'ané'min ya je' cham ma miich ajcxy.

²² Chi Jesús nimay yi' ydiscípulos ajcxy:

—Miim je xii je tiempo ma miich ajcxy anajty ooy xyjamid'idángixich tüg xii, e ca' iich miich ajcxy xy'ixipy, iich je jäy huidi tsoon tzajpjoty.

²³ Chi jäy ajcxy yminá'nip: “Chaa'amy je', je Cristo”, o “Chim'amy je'.” Ca' miich ajcxy yi' mniníxcixipy, e ni mgabaníxcixipy. ²⁴ Co anajty nmiñich jadügtecy ya naaxhuiñ, iich, je jäy huidi tsoon tzajpjoty, co iich anajty nmimiñ n'ané'min, jadu'n je' yjadipy nej huizuc co y'aa'an ma tüg tzajp'ix e nañ jadu'n y'aa'an jadüg tzajp'ix. ²⁵ Nañ ooy ycopicyty co jayijp ocpaadibich ayo'n, e chi jada xyca'ixa'nibich xycatzoga'nibich yi jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadipy co anajty iich, je jäy huidi tsoon tzajpjoty, co anajty nxii ndiempo paty mina anajty nmiñich ane'mbi. ²⁷ Janch caayb janch uucp anajty je jäy ajcxy agujc jotcujc co je Noé ytigüy ma ymijcajoon. Chi je ayo'nduu ymiñ huidi cijx yaj'ögtigoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytoocxicy, etz ytiçcojxicy. ²⁹ Huin'it xii co Lot chooni jim Sodoma, chi ycäy tzajpjoty jin etz huidi jindzaa mid conhuidity toy, chi cajp ytigoyday. ³⁰ Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadipy ayo'n co anajty nmiñich jadüg'oc ya naaxhuiñ, iich je jäy huidi tsoon tzajpjoty.

³¹ Je huin'it xii huin'it tiempo pin anajty iñaayb ma ytiçcop, e ymiid anajty ypidägy jii by tigoty, ca' nimiragipy nicxy ti yajpidzimy, e huidi jäy anajty jim camjoty nañ ni ca' yhuimbidity ma ytiç. ³² Ajihuuygix jadu'n nej Lot ytöxyjic ayo'n paty. ³³ Tüg'óciy jäy ajcxy pinjaty yjugy'ajt tzögam, tigoyipy yjugy'ajt. Tüg'óciy jäy ajcxy pinjaty yjugy'ajt tigooyb (mid iich ycixpi), hue' je' yjugy'ajt ypaadipy chögipy.

³⁴ Iich miich ajcxy nimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhu'müyb. ³⁵ Nimetz töxyjäy anajty yjitzcixy, tüg yajnicxiyb, etz jadüg yajhu'müyb. ³⁶ Nimetz yëdyjc anajty ytungixy camjoty, tüg yajnicxiyb etz jadüg yajhu'müyb.

³⁷ Chi je jäy ajcxy huidi xpijcp Jesús y'ayuc ymínañ ajcxy:

—¿Ma jadu'n yjadipy nej miich ti mina'ñ, Huindzin?

Chi Jesús ymínañ:

—Ma anajty je ögpi yajpaady, jim yi luud ajcxy ñimuga'ñ.

18

Je ijxpejt ma je ayoobitöxyjäy etz je juez

¹ Chi Jesús yajnimay ajcxy tüg ayuc huindijaty ixpijcp ma yi' co ooy ycopícyity Dios nmibijctzoohuim jabom jabom, ni ca' nmidziipim. ² Chi Jesús yminañ:

—Ji anajty tüg juez ma tüg cajp, ni Dios anajty ca' tzigiy, etz ni jäy ajcxy anajty ca' huindzigiy. ³ Nañ ma je cajp jim anajty tüg co'ögy ytöxyjäy. Je' anajty yminög janam jadojoc ma je juez, nimäy anajty: “Nihuaangich ma je nmidzipich.” ⁴⁻⁵ Chi je codung ca' co'adzoy ca' a'ixiy tzojc. Chi je juez jot'ajti, yminañ jotjoty huinma'ñyoty: “Oy Dios ca' ndzigiyich, ni jäy ca' nhuindzigiyich, per com jada co'ögytöxyjäy nigí xychach'amayiyich, miñ n'ocnihua'ñich, ca'ydi jadüg'oc ymiñ e xyajcijxich anajty nmecxtújcín.”

⁶ Chi je Huindzin Jesús yminañ:

—Mido'mbic miich ajcxy nej je juez jibicjäybi ti nihuañ je töxyjäy co anajty ti yajtzibyii. ⁷ ¿Nej ca' Dios ñihuaanip yi huindibi ti huin'ixy, huindibi mibijctzooob xim tzuum? ¿Huäcxibip, nicx ca' tzojc adzooyi? ⁸ Hich miich ajcxy nimaayb co Dios ñihuänamy mic'amy yi' yjäy. Co anajty nhuimbity ya naaxhuiñ, ñch, je jäy huidi tzooc tzajpjoty, ¿nej nbáadibich mibijcín ya naaxhuiñ?

Je ijxpejt ma je fariseo etz ma je yajcogüejtpi

⁹ Jesús ñimiydac je jäy ajcxy huidi ci'm ooy ñaygömayyii co ooy y'oyjäyity, etz pejxy yi jacjadyibi jäy ajcxy, chi yajnimay ajcxy tüg jihuimbit ayuc:

¹⁰—Mejtz jäy ajcxy ytigiy ma Dios ytijc capxtacpi. Tüg hue' je' fariseojäy, e jadüg yajcogüejtpi. ¹¹ Chi je fariseojäy ytinay'ahuüy ycapxtägy, chachmina'ñ jadu'n: “Dios Teedy, Dioscojuyip yajnajxpich com co ca' ñch nbocytuñich jadu'n nej jacjadyii jäy ypocytúnngixy, ca' nmeechich, ca' njibicjäyidyich, ca' nmigapxich huingjäy ytöxyijc, ca' nbocytuñich jadu'n nej jada yajcogüejtpi. ¹² Mejtz xii n'ityich jaygay tügpí seaman. Chi huen ytim ti nmidich ngüejtptyich ma Dios majcjaty.” ¹³ Per je yajcogüejtpi jiguem ytinay'ahuüy, ni ycapät'ixy tzajpcijx, jeyi ycaachtzachcoxy yminañ: “Dios Teedy, pa'ayoogich, ñch pocyjäyich.” ¹⁴ Hich miich ajcxy nimaayb co jada yajcogüejtpi y'idacy ma ytijc ti anajty yajhuinmecxy ypocy, e je fariseojäy ca' yajpocyhuinmecxy. Huenpínity huidi ci'm naygömayipy, Dios yajtzöydunib; e pinjaty ca' ñaygömayyii ci'm, Dios ycömayib.

Jesús conucxy je pi'ctijc ajcxy

¹⁵ Chi jäy ajcxy mñdmñ pi'c'anäg ma Jesús huen nidoñyii. Co je' ydiscípulos ajcxy ijxy, chi ajcxy oyy ungdaj. ¹⁶ Chi Jesús yaaxi ymügügtijc nimay ajcxy:

—Ixmatz, huen yi pi'ctijc xyñimiñich, ca' ajcxy mjijpcogapxygyxy, com yi jäy ajcxy huindibi yajpatp ma Dios y'ané'min, jadu'n ajcxy nipaady nej pi'ctijc. ¹⁷ Janch ñch miich ajcxy nimäy co hueñpínity huidi ca' cöbijci yi Dios y'ayuc ytiy'ajt jadu'n nej yi pi'ctijc ajcxy cöbijcy Dios y'ayuc ytiy'ajt, ca' yi' ajcxy ytiy'ajti ma Dios y'ané'min.

Tüg comeñ'anäg ymiydägy mñd Jesús

¹⁸ Chi tüg micjäy y'amidooy Jesús, nimay:

—Miich oyjäybi Huindzin, ¿ti huaad nduñich co ñch n'alma nñdzoocín paadipy?

¹⁹ Chi Jesús y'adzooy:

—¿Nej co xytijich oyjäy? Ni pin ya yca'oyjäyity, je'yi Dios tügpajc y'oyjäyity. ²⁰ Miich mnejhuüybi yi Dios ycötújcín. Ca' mmigapxtigoyipy huingbi töxyjäy, ca' jäy'aj'ögipy, ca' mmeedzip, ca' mmigüg nihuambedipy, yajmij'at mdaj mdeedy.

21 Chi je' y'adzooy:

—Ti tüg'óciy nguydundäyich jada cötújcin maabi nyeecpidzimyich.

22 Co Jesús jadu'n midooy, chi nimay:

—Tigoy'ijtni ja tüg huidi ca' mduñi. Toocta' tüg'óciy tijaty miich mñid, e mo' je meeñ ayoobtjic, huin'it mgomeeñ'adipy jibby tzajpjoty; miin, e pajamgich.

23 Co je comeeñybi jadu'n ayuc midoy, chi ooy yjottigoygoty com ooy anajty ycomeeñity. 24 Co Jesús ijxy co je comeeñybi anajty ti yjotmaybicy, chi mñinañ:

—Ooy chachchípiy ytigíhuipy tüg comeeñyjäy ma Dios y'ané'min. 25 Jac ca' chípiy co ñaxipy tüg camello ma yi xu'ñ yxútity, ca'ydi co tüg comeeñyjäy ytigíhuipy ma Dios y'ané'min.

26 Chi je jäy ajcxy anajty tiibi ajcxy midoogixy Jesús y'ayuc, ymñinaangixy:

—¿Pin jada' jëbi y'alma paadipy nñdzoocin?

27 Chi Jesús y'adzooy:

—Huidibi naaxhuiñyjäy ajcxy ca' jaty nej yaj'oyíhuipy, Dios jëbi yaj'oyíy.

28 Chi Pedro ymñinañ:

—Ich ajcxy ti nbidägy n'ixmajtztaaygixy, co nbanicxaangixy.

29-30 Chi Jesús y'adzooy:

—Janch ich miich ajcxy nnimaaygixy co yi jäy ajcxy huidi ytjic ixmajtz etz ytaj yteedy, ymiguëx, etz y'ung y'anäg mñid Dios y'ané'min ycixpi, ypaadipy ajcxy ya naaxhuiñ nigí oy'ájtin, etz ypaadipy ajcxy tzajpjoty tzinaayin huidi ca' ycixipy ytigoyipy nimina.

Jesús capxypidzimy jadüg'oc co y'ögañ

31 Chi Jesús huodzon je nimajmetzpi, nimay ajcxy:

—Jadachambi tzoc jámim jim Jerusalén. Nguydunaamyich tüg'óciy jadu'n nej yi Dios y'ayucnajtzcaxiybi ajcxy jaybejty jecy'ajty mñid ich ycixpi, ich, je jäy huidi tzoön tzajpjoty. 32 Chi nyajciyegañich ma je romano gobernador, xycamij'ixipy xycamijpidägibich ajcxy. Xy'ójibich xyhuindzújibich xyjijptzújibich ajcxy. 33 Xychaachtunipyich ajcxy, xyaj'ögibich ajcxy, e codugig xii njugypigipyich jadüg'oc.

34 Chi yi majmetzpi ajcxy ni jadu'ñyi ca' huinjihuñy ajcxy nej yhuimbidzimy Jesús y'ayuc. Yüch anajty jada ayuc mñid yi' ajcxy ycixpi, paady ca' huinjihuñy nej anajty yajñimaaygixy.

Jesús yajhuindicxigy tüg huintzpi jim Jericó

35 Chi jadu'n yjajti co Jesús mihuingoñ je cajp huidi yxi Jericó, chi tüg huintzpi anajty iñäy tüba'áy pijctzoy anajty limosna. 36 Co midooy mayjäy ñaxy, chi je' yajtiy:

—¿Pin yi' ñajxp?

37 Chi ajcxy nimay co Jesús nazareno najxp. 38 Huin'it je huintzpi mic ymñinañ:

—Jesús, David y'ap y'oc, ich pa'ayoog.

39 Je jäy ajcxy huidi anajty jayjip nicxp ooy ooy je huintzpi, nimay co huen amoñ. E je' nigí mic ymñinan'idich:

—David y'ap y'oc, ich pa'ayoog.

40 Chi Jesús ytinayxipy oy yajhuoyii. Co je' jim ymejch, chi amidoy, nimay:

41 —¿Ti mdzojcpy ndunipyich mñid miich?

Chi je' y'adzooy:

—Huindzin, yajhuindicxíccich.

42 Chi Jesús mñinañ:

—Huindicxig, yi mmibíjcin ti xyajtzögy.

⁴³ Chi je huintzpi mic'amy yhuin y'ixigü, chi panicxy Jesús, chi ooy jäymejch cömay yi Dios. Cham tüg'ócüy je cajp jäy co ajcxy jadu'n ijxy, nañ ycömay yjäymejtz yi ajcxy Dios.

19

Jesús müd Zaqueo

¹ Co Jesús ytiigüy jim Jericó, ñajxy cajpcujc anajty. ² Chi jadu'n yjajty jim anajty tüg jäy hue' anajty yxü Zaqueo. Hue' je' anajty yajcogüejtpi huindzin, e comeeñ anajty. ³ Ooy yi' anajty tzach'ixa'ñ Jesús, nejhuñhua'ñ pin jäy je', chi ca' jajty nej ixipy, je' co anajty ñaxity, etz co anajty ooy mayjäy jim. ⁴ Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy. ⁵ Co Jesús jim ymejch, chi pä't'ijxy je Zaqueo, e nimay:

—Zaqueo, tzojc minac, com copicy co nicxy njättäga'ñich ma mdijc.

⁶ Chi je' yminajty janch jottigoy, e jotcujc cöbijcy Jesús. ⁷ Co jadu'n ijxy, chi je mayjäy ajcxy nigapxy ni'ojigixy Jesús, yminaangixy:

—Ti ñicxy jättacpi ma tüg pocyjäy ytijc.

⁸ Chi Zaqueo ytinayigy, nimay Jesús:

—Huindzin Jesús, cha je' je njugy'ajtich huidi cup nbijc-huäcxaamyich nmöhua'ñich ayoobitijc. Pen ti ñich nyajcujcjtanaxy, nyajhuimbidityich midaax jadu'ñyi.

⁹ Chi Jesús yminañ:

—Jadachambi jada jäy ma jadyaabi tijc ti y'alma ñndzögy, com co yi' nañ jadu'n Abraham y'ap'adyii y'oc'adyii. ¹⁰ Hich, je jäy huidi tzoon tzajpjoty, ti nmiiñich ya naaxhuiñ co n'ixtähuibich etz nyajndzögibich tübi anajty ytigooy.

Je ijxpejt ma je majci meeñ

¹¹ Co je jäy ajcxy midooy jadu'n, chi Jesús jacyajnimay ajcxy tüg ayuc, com ytimymihuingónip anajty Jerusalén, etz je jäy ajcxy tzachhuinmaaygixy co Jesús mic'amy anajty pidäga'ñ y'ané'min. ¹² Chi Jesús yminañ:

—Tüg micjäy, comeeñjäy anajty, ñicxy ma tüg naaxjot jigüembü, nicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjäy mijhuooy nimajc ytumbü, chi moy ajcxy majc meeñ nidüg nidüg, chi ajcxy nimay: “Meeñ yaj'ung'ajtcix ji ixti cooni ñich anajty nhuimbityich.” ¹⁴ Chi je ymigogajp ajcxy ca' anajty ixa'ñyii ajcxy je comeeñybi, chi ajcxy yajpaguejxy huingapxpi ma anajty je comeeñybi ñicxy, chi je huingapxpi yminañ: “Ca' ñich ajcxy ndzocy co jada comeeñjäy rey'adipy ma ñich ajcxy.” ¹⁵ Chi jadu'n yjajty co je comeeñjäy yhuimbijty ti anajty yreytigüy. Chi oy yajhuoyii je ytumbü ajcxy, je huidi anajty je meeñ ti yajmihui'mgixy, nejhuñhua'ñ anajty jadu'ñi ti yaj'ung'ajtcixy je meeñ nidüg nidüg. ¹⁶ Chi tüg jayijp ymiñ yminañ: “Huindzin, yi meeñ majcjadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxycöbicy müd huidi hueeni, cham m'ané'mipy majc ciudad.” ¹⁸ Chi je mimetzpi ymiñ, yminañ: “Huindzin, yi mmeeñ migoox jadu'ñyi ti nyaj'ung'atyich.” ¹⁹ Chi je rey nimay je mimetzpi: “Cham m'ane'mipy migoox ciudad.” ²⁰⁻²¹ Chi je midugügpi ymiñ, yminañ: “Huindzin, cha je mmeeñ huidi ti nmi'ityich, ti nyujcpiyich ma tüg paayi. Ndzigüybich miich co miich mjäy'aty ahua'ñ, myajpidigtäy huidi ca' mjé'adyii, nañ mdzijcpy huidi ca' ti mnipy.” ²² Chi je rey yminañ: “Miich jibic ti mduñ, cham ndiyduna'ñ müd mgi'm'ayuc ycxipi. Miich mnejhuiyb co nyajpidigyich huidi ca' njé'adyiijich, e ndzicyich huidi ca' ti nnibyich. ²³ ¿Nej co ca' ti mbidägy ñich mmeeñ ma je banco, jigix co ixipy nhuimbityich, may meeñ ixipy xycidigüyich müd meeñ'ung?” ²⁴ Chi je rey nimay huidi anajty ajcxy jimip:

“Pijci ajcxy yi' ymeeñ, etz mooygixy yi' tibi meñ yaj'ung'aty majc jadu'ñyi.”
²⁵ Chi je jäy ajcxy y'adzooy: “Huindzin, ymüd yi' cham majc jadu'ñyi meñ.”
²⁶ Chi je rey y'adzooy: “Hich minam co tüg'óciy pinjaty müd, jacyajmöhüip; e huidi ca' ti müdity, oy jamüdity yajpictähüip huidi ymüd. ²⁷ Nañ jadu'n ajcxy je nmidzipich huidi ca' anajty tzojccixy co hich nrey'adipyich ma yi' ajcxy, yajmiingix ya, yo'cpujxtutaaygix ma hich nhuinduu.”

Jesús ytigüy Jerusalén

²⁸ Co Jesús jadu'n yminanday, chi choñ jim, ñicxy Jerusalén. Jesús jayjip anajty ytüyöy ma je mayjäy. ²⁹⁻³⁰ Jadu'n yajty co jim yja'ty mihuingon Betfagé etz Betania ma je cop huidi yxii Olivos, chi Jesús quejxy metz ydiscípulos, nimay ajcxy:

—Níxcix ma yjiibi cajp huidi ji huington. Co ajcxy mgajptugihüip mbáatcixipy tüg burro mang ycoxochity, huidi ca' ni pin yaj'ñaayñi. Mgoguejtútcixipy, etz mmimíingixipy. ³¹ Pen jim pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohüipy: “Je nhuindzinich jim tzojcp.”

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäyii. ³³ Jim anajty ajcxy je burro mang coguejtuutcixy, co ñihuindzin ñimaayi ajcxy:

—¿Nej co yi burro mang mgoguejtuutcixy?

³⁴ Chi je' ajcxy y'adzooy:

—Je nhuindzinich jim tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ müd yhuit, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuit yé'pcixy tügüj. ³⁷ Co ajcxy mihuingoñ je minac ma je cop huidi yxii Olivos, chi tüg'óciy je mayjäy yjotcugiyday, e ytigüy ajcxy ooy alabanza hibi Dios ojadajtpi müd je mij huinma ñ ycixpi co anajty ti íjxcixy huidi anajty Jesús ti tuñ. ³⁸ Chachminaangixy:

—¡Capxpaady je rey huidi miimb müd Huindzin Dios yxii ycixpi! ¡Jotcujc'ajt jiiiby tzajpjoty etz cömáyin ma Dios!

³⁹ Huin'it nijejty fariseojäy huidi anajty ajcxy jiiiby jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Hich miich ajcxy ñimaayb pen yi' ajcxy amomb, yi tzaa tigihüip mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy müd je cajpjäy ycixpi. ⁴² Chi Jesús yminañ:

—¡Pen mhuinjihuüyb ixipy miich ajcxy nej mbáatcixipy mjotcujc'ájtín jadachambi xii tiempo! Yüch jada tiy'ajt cham ity ma miich ajcxy, ca' huaad m'íjxcixy. ⁴³ Minip je xii je tiempo ma miich ajcxy je mmidzip ajcxy xyajjüdugipy mgajp müd tzaamacxy, e tziptunipy ajcxy müd miich, yajxon xyajco'adugipy ajcxy jühuidity ma je mgajp. ⁴⁴ Xyñigidaagoodip mdzaaboch ni'ung ni'anäg, ni ca' yhuí'mip tzaagop tzaamacxy, jadu'n yjadipy com miich ajcxy ca' mnejhuüy je tiempo mina je Dios xyñigidägy.

Jesús yajpidzimy je jibicjäydijc ma Dios ytijc

⁴⁵ Chi Jesús ytigüy ma Dios ytijc yajpidzimday tüg'óciy jäy huidi anajty jiiiby ajuuyb adoocp. ⁴⁶ Chi Jesús nimay je jäy ajcxy:

—Jadu'n minañ ma jaybétyty: “Hich ndijci tzajpcapxycapxtägi'ñ yi'.” E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytijc, chi je teedy tungmüdpí, etz huídí ajcxy yaj'ixpijcp anajty Dios ñecy, etz mijjädijc ajcxy nihuinmayigixy co yaj'ögaangixy Jesús. ⁴⁸ Chi ajcxy ca' ni nej mihuinmañybaty nej yaj'öccixy, com tüg'öciy jäy anajty ooy tzach'amídooy Jesús y'ayuc.

20

Jesús ycötújcín

¹ Chi jadu'n yajty tüg xii anajty Jesús yaj'ixpijcy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmüdpí ajcxy etz huídí ajcxy yaj'ixpijc Dios ñecy etz mijjädijc ajcxy. ² Chi ajcxy migapxy Jesús nimay:

—Yajnimaygich, ¿ma cötújcín tí mbaady co jäy myaj'ixpijcy ya ma Dios ytijc? ¿Pín je' tibi xycötujc möy?

³ Chi Jesús y'adzooy:

—Hich nañ jadu'n nyaj'amídohuamy ich miich ajcxy tüg ayuc, e m'adzógixip. ⁴ Co Juan (je Bautista) jäy yajniibejty, ¿pín je' cötújcín moy, je Dios tzajpjoty o jäy ajcxy?

⁵ Chi ajcxy ytigüy huinmay'ahuídijtpi ñayñimáayigixy miñ xyipy:

—Pen minaanim co tzajpjoty choñ je Juan ycötújcín, Jesús xyñimayimip ya: “¿Nej co ca' miich ajcxy mijpidacy yí' y'ayuc?” ⁶ Pen minaanim ajt co jäy cötújcín moy je Juan, chi tüg'öciy cajpjäy tzojc xycögädzim, com ymibijcpxy ajcxy co yí' Juan, Dios yí' y'ayucnajtzcapxiybi.

⁷ Chi ajcxy y'adzooy co ca' ajcxy nejhuigixy pín Juan tí quexyii. ⁸ Chi Jesús nimay je' ajcxy:

—Hich nañ jadu'n ca' nigapxañich pín tí xycötujcmöyich.

Je ijxpejt ma je tumbidijc ajcxy jibicjäybi

⁹ Chi Jesús yminandacy yajnimay tüg'öciy je jäy ajcxy tüg ayuc, ymíñañ:

—Tüg jäy pidacy tüg camuuxy ycam, chi yajpijctzoy ytumbidijc, co anajty chonañ ñicxañ jigüem jecy jecy. ¹⁰ Co cosecha paty, chi quejxy tüg ytumbi ma je ytumbidijc, huen cümöyii huídibi je' anajty paatip. Chi je ytumbidijc huinhuojpy jiphuojpy je quejxyöybi yajhuimbijty ca' ni tí mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'ojoy jip'ojoy ajcxy, yajhuimbijty ajcxy, ca' ajcxy ni tí mooy. ¹² Chi midugügpí ytumbi quejxy, nañ jadu'n ajcxy je' yajtzaachüy etz yajhuimbijty ajcxy.

¹³ Huin'it je camuuxycam huindzin ymíñañ: “¿Tí ndunipyich? Ocquejxyich nmang huídibi ooy ndzocyich. Ca' jécyity co ajcxy ixipy nmangich, yajmij'adipy ajcxy.” ¹⁴ Chi je ytumbidijc co ajcxy ijxy je' yhuindzin ymang, chi ajcxy huinmaygoty nayñimáayigixy miñ xyipy: “Tí ymiñ je cogam ymang, yí' je' jada cam jédaanip. Tzoc yaj'o'cim jigix ich ajt jada cam njé'ajtim.” ¹⁵ Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amídooy:

—¿Tí jada' ytunipy je cam huindzin? ¹⁶ Minip je', miñ yajtigoydäy je ytumbidijc ajcxy, e chi je' je ycam yegipy müd huingbi tumbi.

Co je jäy ajcxy jadu'n midoy, chi ajcxy ymíñañ:

—Ni catzogipy Dios, nicxy jadu'n njajtim.

¹⁷ Chi Jesús huindixpejty je mayjäy nimay ajcxy:

—¿Tí tijamy huídí yjaybétyip ma Dios ñecy?

Jadu'n:

Je yéydijc huídí je jäy ajcxy ca' anajty tzocy, tí Dios pidacy mij'ane'mbi. Tim jadu'n nipaady nejihuüy je tzaa oyjatypí huídibi je pojtzpidijc ajcxy ca' yajtunañ, je' oy tí yhu'mni ma anajty yjaccopícyity.

18 Pinjaty ca' cöbigañ jada mij'ane'mbi, ayo'n ypadamy, tim jadu'n nipaady nej jihuüy jim ycixciday ma je tzaa nicx e tijhuütz yjajtähüpy; e pen je tzaa nigidagoty, je' ajcxy janch jaam püx nicxy yjajtcixy.

Yajnidüygixy pen jëbi cogüéjtín yajyecy o pen ca'

19 Je teedy tungmüdpí etz huídi ajcxy yaj'ixpijc Dios ñecy ooy anajty ni-huinmayüygixy madzaangixy je Jesús mic'amy, co ajcxy huinjihuüy co Jesús nimüydáacigixy müid je jihuimbit ayuc, e chigüyb anajty ajcxy je cajp jäy.

20 Chi ajcxy chachhuinmañ'ixtaaygixy nej huaad xigixy Jesús, chi quejxy ajcxy iix'ijtpí ma Jesús yajpaady huídi naybidaacip janch ypaat tudägyjäy; chi amidoo'ijtcixy Jesús y'ayuc huídi müid xihuaangixy, chi cüyegaangixy ma je gobernador. 21 Chi je iix'ijtpí ajcxy y'amidooy Jesús nimay ajcxy:

—Huindzin, nejhuüyb ich ajcxy co müich m'ayuc ooy y'óyity, etz myaj'ixpicy yajxon, ca' huin'ixpety jäy myaj'ixpicy, etz myaj'ixpicy Dios ytiy'ajt nej jäy jëbi huaad chinaaygixy. 22 ¿Nej copicy ich ajcxy migüedipy je César je romanojäy mij'ane'mbi, o ca'iji?

23 Chi Jesús huinjihuüy yi' ajcxy yjibic-huinmañ, paady ajcxy nimay:

—¿Ti co müich ajcxy xyjot'ixy xyhuinmañ'ixyich? 24 Yaj'ixcich tüg meeñ. ¿Pin y'ahuinax etz pin yxü mimb ma jada meeñ?

Chi ajcxy y'adzooy:

—Yi César.

25 Chi Jesús nimay ajcxy:

—Cuet ma César huídi César paatip, e ma Dios huídi Dios paatip.

26 Ca' mimadacy ajcxy nej tzu'ixcixy ma mayjäy yhuinduu. Chi ajcxy ooy huinmaay jadu'n nej anajty Jesús ti y'adzóohuigixy, chi ajcxy amoñyi.

Yajnidüygixy je jugy'ájtín ycixpi

27 Chi ñija'tti Jesús tüg saduceojäy, e yi saduceojäy ajcxy ymíañ co jäy ögy ca' y'ocjuyujcni. Chi je' yajtiy:

28 —Huindzin, Moisés jaybety ma yi' ñecy, je jécyip, co tüg yëydijc ytöxyijc yajhuímy ix'ögp, e ca' ymang ti paatcixy. Jëbi je yëydijc y'uch müdtzinäy je töxyjäy jaydëbi yaj'ung'ixip müid y'ajch ycixpi. 29 Jadu'n anajty tügpicy jäy, nihiuxtujc ajcxy ytügquëx'ájtixy, ac yëydijc ajcxy. Je mijpi müdtzinay töxyjäy, chi ix'o'cy, e ca' ymang paty. 30 Chi je mimetzpi ypijcy müid je töxyjäy, e ni ca' ajcxy ung paty. 31 Chi je midugügpí ypijcy müid je töxyjäy, e jadu'n je nihiuxtujcpi müdtzinay ajcxy je töxyjäy, ix'o'cy ajcxy, ni ca' ajcxy ung paty. 32 Chi nañ jadu'n je töxyjäy y'ögni. 33 Co anajty je nihiuxtujcpi jugypijccixy, ¿huídi jada' octöxijc'adüyb je töxyjäy? Com nihiuxtujc ajcxy ti töxyijc'ájtigixy.

34 Chi Jesús y'adzooy:

—Jadachambi jäy pijccixp, ñaymooyigixy y'ung huen pijccixy. 35 Je jäy ajcxy huídi paatip anajty chinähüp ma je tiempo huídi mimb co ögpí yjugypijccixipy, ni ca' ajcxy ypigipy, ni ca' ajcxy ñaymóoyigixipy y'ung huen pijccixy. 36 Co jäy ajcxy yjugypicy, chi ca' huaad y'ögcixy jadüg'oc, quipxyjaty ajcxy müid je ángeles ajcxy, e Dios yi' ajcxy ung'adüib co yjugypigipy müid jemybi jugy'ájtín. 37 Janch co yi' ögpí yjugypigipy, jëbi mbaadip je tiy'ajt ma Moisés ñecy ma jadu'n yjaybéyity, je taab anajty aay'ujtz ytoy, co je Huindzin Dios migapxy Moisés, nimay: “Ich Abraham yDios, Isaac yDios, Jacob yDios.” 38 Je ögpí ca' müdity Dios. Je jäy ajcxy huídi juugyip janchtiy ajcxy ymüid Dios, com co müid Dios ycixpi tüg'ócy jäy ajcxy ymüid yjugy'ajt.

39 Chi jäy ajcxy huídi yaj'ixpijc Dios ñecy nimay Jesús:

—Oy ti m'adzoy, Huindzin.

40 Ca' ajcxy ocjajtni nej jac nimáaygixipy.

Pin je' y'ung je Cristo

⁴¹ Chi Jesús je' ajcxy nimay:

—¿Nej co miich ajcxy mīna'ñ co Cristo David y'ap y'oc? ⁴² David ci'm mīna'ñ ma je Salmo necy:

Yi Huindzin Dios nimay ich nHuindzin: “Iña' ya a'oy'amy ma ich.

⁴³ Ixti cooni anajty miich mmidzip ti nmimadactäyich, jadu'n nej jihuïy ti nbidägyich yi mmidzip ma miich mdecypocxpejt.”

⁴⁴ Co David yximoy Cristo ich nHuindzin, ¿nejtz yi' co y'ap'adyii y'oc'adyii?

Jesús xïy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix mīd yi' escribas ajcxy ydiscípulos, co ajcxy ooy tzojccixy yhuiddaangixy mīd yhuitt oyjatpyi, ooy ajcxy tzojccixy co huen capx-pocxyii ma jäy y'amugïy, e ooy ajcxy tzojccixy yi cödumbi iñaybejt ma naymujctac, etz ooy ajcxy tzojccixy cödumbi iñaybejt ma jäy ajcxy yxidungixy. ⁴⁷ Chi ajcxy yajcixtayi yi co'ögytöxyjäy ypidägy, e tungixy ooy jecy tzajpcapxycapxi ma jäy yhuinduu. Yi jadu'mbi jäy ajcxy nigi ajcxy Dios chaachytunïyb mīd ypocy ycipi ca'ydi jacnipin.

21*Je ayoobitöxyjäy co'ögyi y'ofrenda*

¹ Jiiby anajty Jesús ma Dios ytijc co ijxy comeñyjäy may'amy ofrenda pidaaccixy ma meeñygaax. ² E nañ ijxy co tüg co'ögytöxyjäy pidägy anajty metz pi'cmeeñ. ³ Chi Jesús ymīnañ:

—Janch ich miich ajcxy nimäy co jadayaabi co'ögytöxyjäy ayoob jac anaxy jada, ti pidägy ofrenda ca'ydi jacnipin. ⁴ Tüg'óciy comeñydijc ajcxy ypidacyp ma ofrenda je meeñ huidi conajxp. Jadayaabi co'ögytöxyjäy ti pidägy huidi anajty ñigayamy.

Jesús ymīnañ co je Dios ytijc yhuindigoyañ

⁵ Nijëjty jäy co ytigïy ma Dios ytijc nimīydacy ajcxy co Dios ytijc ooy chach'oy'oyduñity mīd tzaa oyjatpyi, e mīd tibi jiiby yojxcixy. Chi Jesús ymīnañ:

⁶ —Tüg'óciy jada huidi ajcxy m'ijxpy ma Dios ytijc, minip xii tiempo mīna jada nicxy yhui'my taj xit jada tzaa, ca' ma pochycop.

Je tïy'ajt ma ca'ni naaxhuiñybi ycixa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mīna jada jadu'n ytunïyb yjadïyb nej miich ti mmīnañ? ¿Ti tïy'ajt ji yaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'ingix. Ooy mayjäy ymīna'ñ ñaybidägáanigixy co je' ajcxy je Cristo, ymīna'ñ ajcxy: “Ich je' je Cristo; huingóniñ anajty je xii je tiempo mīna je naaxhuiñybi ycixa'ñ ytigoya'ñ.” Ca' ajcxy axam mbanicxipy. ⁹ Co miich ajcxy ayuc midohuipy co jäy chachiptungixy, e ñayñibidicigixy, ca' mdzigïyigixipy, com ooy ycopicyty co jada jadu'n jayjip ytunïyb yjadïyb, ca'nan hue' je' anajty tim cijxp tim tigooyb (je naaxhuiñybi).

¹⁰ Chi Jesús yjacmīnañ:

—Nayñibidägiib naax cajp mīd huingbi naax huingbi cajp. ¹¹ E minip mic'ujx, etz mij yuu mij pa'm xii yaa. E jadib mij'adzigi'ñ, etz ooy ijxpejt huidi quexigip tzajpcixy.

12 Ma ca'ni anajty jadu'n jadyii, xypahuidijtcótcixipy jäy, xymájtzcixipy, xyciyéjcxipy ma judíojäy ñaymujctac. Chi jäy ajcxy xypidägipy pujxtigoty, xyajnicxcixipy mach ma rey etz ma gobernador ajcxy yhuinduu. Jadu'n jäy ajcxy jibic xytunipy mïid miich ajcxy com co anajty ti xymijpidaaccixyich. 13 Miich ajcxy tiy'ajt myegipy mïid ïich nxïi ycixpi. 14 Co jäy ajcxy yxihuipy ma codungdijc, ca' ni nej ajcxy mjot'adiyb, ni ca' ajcxy mhuintmayipy nej m'adzógixipy. 15 Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadipy nej xy'adzógixipy, e nej xyjacxigixipy. 16 Miich ajcxy mgi'mdeedy, mgi'm'uch, mgi'm'ajch, etz mgi'm'ajuugy amigüg xyciyéjcxipy ma cötujctac. Nijëjity miich ajcxy m'ögipy mïid co anajty ti mmijpidaaccixy ïich n'ayuc. 17 Mayjäy ajcxy ca' xy'ixaanipy xychogaanipy mïid co anajty ti mmijpidaaccixy ïich nxïi. 18 Ni tüg miich ajcxy mgöhuay ca' ytigoyipy. 19 Pen ooy ajcxy mmecxtucy, chi m'alma ñidzögipy huinixi.

20 Co ajcxy m'ixipy Jerusalén anajty ti ñaducy mïid ymidzip, huin'it ajcxy mnejhuihuipy co huingon je'anajty ma yhuindigoyaani. 21 Huin'it tiempo je jäy ajcxy huidi jim Judea naaxjot yquéeccixipy ñicxcixipy ajcxy yuugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajptigiyñi ma je Jerusalén cajp. 22 Je tiempo mina yjadiyb ayo'n mïid co anajty judío jäy ti ytundigoogyxy, je' jada yajcuydundaayb jadu'n nej yjaaybétyity ma Dios ñecy. 23 ¡Ayoob yi töxyjäy ajcxy huidi anajty ung tzim'ijtp huin'it xi, etz huidi anajty mïid y'ungma'xung! Ooy jadiib mij ayo'n ya naaxhuin etz tzip éjcin ma jada cajp. 24 Nijëjity ajcxy y'ögipy tzipjoty, e nijëjity yajnicxip tzumy mach ma huingbi cajp huingbi naax. E Jerusalén naxmihuägïydähuib yi jäy huidi ca' yjudiojäyity, minipy je tiempo mina anajty Dios yajcixaani yajtigoyaani yi' ajcxy y'ané'min.

Nejjada yminipy je Dios y'ung

25 Huin'it xi huin'it tiempo quëxigip ijxpejt ma xi po' etz ma yi madza', ya naaxhuiñ ooy jäy ajcxy jotmay mï'idipy. Je jäy ajcxy ooy chigihuipy yjihuhuipy yhuinmay'ahuididipy ajcxy ooy, mïid je mejy ycixpi co anajty chachpidigy chachnögy chachmina'ñ. 26 Yi jäy ajcxy anucxi'ñ yajcidahuib co anajty ajcxy ixey nej yjadyii huindu'mybi naaxhuiñ; e huidijaty mic'ajt yajpatp jiiby tzajpjoty yüxtähuipy yi'. 27 Huin'it miich ajcxy xy'ixipyich, ïich je jäy huidi tzoön tzajpjoty, nmiiñich jocjoty mïid je nmic'ajtich, nmiiñich mïid ïich ngötújcin etz ïich n'oy'ájtin mijpi. 28 Co je ayo'n tiempo jadu'n yjatzondägipy, chi mba't'ijxcixipy com huingoniñ anajty mina Dios xyñihuáangixipy xycohuáangixipy.

29 Chi Jesús yajnimay ajcxy tüg ayuc, yminañ:

—Ijxcix yi higueri etz tüg'óciy quipy, 30 co yhuamigy huin'it miich ajcxy nejhuüy co ti yhuingoni mina ypottigiyñi. 31 Tim jadu'n nej miich ajcxy ijxpejt mbicy ma higueri quipy co pottitempo ytigiyñi, nañ jadu'n co miich ajcxy m'ixipy je ijxpejt tzajpcixy jadu'n nej yam nyajnimaaaygixy, mnejhuihuipy ajcxy co huingónip je tiempo mina Dios y'ane'mañ ya naaxhuiñ.

32 Janch nimaaybich miich ajcxy co jadu'n yjadiyb ytuniyb jayijp, ca' anajty o'ctäy je jäy ajcxy huidibi tzinaayb jugy'ájtixyp jadachambi xi tiempo. 33 Yi tzajp etz naaxhuiñybi naxip tigoyip yi'. ïich n'ayuc ca' ñaxipy ytigoyipy ni camina.

34 Naygüend'ájtigix miich ajcxy ca' mnijot'ájtixy yi jocni yi mügii, etz yi tzinaayin jugy'ájtin, jigix ca' ajcxy xyniminipy jotcömoñyi je ayo'n xi je ayo'n tiempo. 35 Timetiini minipy je ayo'n tiempo mïid jäy ajcxy ycixpi huidi ya tzinaayb ma tüg'óciy naaxhuiñybi. Tim jadu'n nej tüg iyujc ayo'nbaady co

tímetiini yajtúxuuch. ³⁶ Ni'ixi' ijtcix, mibijctzoogix Dios, ca'ydi ayo'n ajcxy mbaatcixy huídi jadaanip, jigix jiiiby myajpáatcixipy tzajpjoty ma ich nhuindu, ich, je jäy huídi tzoon tzajpjoty.

³⁷ Xim anajty Jesús yaj'ixpicy ma Dios ytijc, e coodz anajty chooñ ñicxy jim ma cögop huídi yxi Olivos. ³⁸ Jabom jabom jopy jopy ñiminyii tüg'ócicy cajpjäy jiiiby ma Dios ytijc tibäy co y'amídooy'idaani ajcxy Jesús y'ayuc.

22

Xiicyöyigixy capxyöyigixy nej huaad Jesús májtzcixy

¹ Huígon anajty je xi mína jäy tzajcaagy caaygixy huídi ca' ylevadura miiidity, huídi jäy ytijpy pascua xi. ² Chi je teedy migtungmiiidpi etz je escribas yhuinma'ñ'ixtaaygixy nej ajcxy ocyaj'ögipy Jesús. Chigiiyb anajty ajcxy je cajpjäy.

³ Chi je mujcu' ytigiiy ma Judas yjot yhuinma'ñ. Je Judas hue' anajty ymimetz xi Iscariote, je' nidügti je majmetzpi discípulos. ⁴ Chi Judas ñicxy oy migapxy je teedy migtungmiiidpi etz tzajptijc soldado huíndzin, e ycapxytuñ miiid je' ajcxy nej jébi ciiyey Jesús. ⁵ Huin'it je Jesús ymidzip ooy ajcxy yxoondaccottay. Chi ajcxy ñaygapxi co meen möhuangixy je Judas. ⁶ Chi Judas cöbijcy je meen, chi yhuinma'ñ'ixtay nej jébi ciiyegipy Jesús ma ca'p mayjäy y'ixyii yhuíndicxyii.

Je huíndzin Dios y'adzu'ájtín

⁷ Chi paty je xi mína jäy cay je tzajcaagy huídi ca' ylevadura miiidity com huin'it anajty ajcxy yaj'ögy cöbixy ymang pascua xigixp. ⁸ Chi Jesús quejxy Pedro etz Juan, nimay:

—Nícx miich ajcxy yaj'oyi' je pascua adzu'íbi, jaydëbi ajt ngaayim.

⁹ Chi ajcxy y'amídooy:

—¿Ma mdzocy co nyaj'oyihuíbiich ajcxy?

¹⁰ Chi Jesús ymínañ:

—Co mdigihuípy ajcxy cajpjoty, mbaadipy tüg yëydijc huídi yajnicxp tüg majt ni. Mbanicxyp ajcxy je yëydijc cooni yjädipy ma ytijc. ¹¹ Co miich ajcxy mjädipy ma je jäy ytijc, chi ajcxy mnimáhuípy je codijc: “Nhuíndzinich jadu'n mínaam: ¿Ma yaj'ahuädz yajpaady ma ngayipyich je pascua adzu'íbi miiid ich ndiscípulotijci?” ¹² Je codijc miich ajcxy xyajni'ixihuíp tüg cuarto ma mímejtzpi piso. Ni'ixi' jim je adzu'íbi. ¹³ Chi Pedro etz Juan ñicxy, chi paty jadu'n nej anajty ti ñimäyii, e jim ajcxy ni'ixiiy je pascua caayin uucin.

¹⁴ Co je hora paty, chi Jesús y'ixtacy ma je mesa miiid je' ydiscípulos ajcxy.

¹⁵ Chi Jesús ymínañ:

—Ti ooy nijot'atyich co nmídgayaangixy jada pascua adzu'íbi ma ca'ni n'ögyñich. ¹⁶ Ich miich ajcxy jadu'n nímaayb co ich ni mína ca' njaccayipyich jadüg'oc je pascua adzu'íbi, ixti cooni yajcuydundáhuípy je pascua xi ytiy'ajt ma Dios y'ané'min.

¹⁷ Chi Jesús conigy je ügy co Dioscojúyip yajnaxy, huin'it ymínañ:

—Uccix jada ügy, naymóoyigixy miich ajcxy. ¹⁸ Cham ich miich ajcxy nímay co jadu'n nej yjacnicxa'ñ xi tiempo ca' vino ni üga'ñich ixti cooni Dios y'ané'min yminipy ya naaxhuiñ.

¹⁹ Nañ yconigy Jesús tüg tzajcaagy co mibijctzooy Dios, huin'it tujc-huäcxy moy discípulos ajcxy, e chi ajcxy nimay:

—Jada tzajcaagy ich nninícx'ajtpyich huídi ngiiyepcyich ma yi o'cin miiid miich ajcxy mbocy ycixpi. Jada ijxpejt miich ajcxy miiidipy oy jäyimech miiid ich ycixpi.

²⁰ Co anajty ti ycaйдаaygixy, chi Jesús conigy je ügy jadüg'oc, chi yminañ:

—Jada vino je' jada Dios y'ayuc ytiy'ajt jemybi jadu'n yi' nej ñich nni'py huidi temam yogam miid miich ajcxy ycixpi.

²¹ Jadachambi yi jäy huidi xyciyegaambich ma nmidzipich, ya je' cham miid'ñäyich ma jada mesa. ²² Janch jadu'n njada'ñ n'ayoohua'ñich jadu'n nej ti nyajnidogugiyiijich. ¡Ayo'n padamy je jäy ayoob huidi xyciyegaamyich ma nmidzipich!

²³ Chi je nimajmetzpi ajcxy ñayñimaayi miñ xyipy:

—¿Pin jada' yi' ma ñich ajt huidi jadu'n tundigoyam?

Yajcapxcójixy pin jada' jacnigi ymijity

²⁴ Chi je nimajmetzpi huidi Jesús anajty ti huin'ixy ca' ajcxy ñay'ayuc-huinjihuiyi pin jada' jac mijpi oc'idipy. ²⁵ Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej tüg huindzin, yi' ajcxy huidibi ane'mb yajtijycixy co ooy oytuungixy. ²⁶ Miid miich ajcxy ca'ydi yjadú'nity. Hue' janchtiy je mijpi ma miich ajcxy huen ñaybidägyii nej jihuiy ymúztity. E je huidi nigohuajc'ajtp huen ñaybidägyii nej jihuiy je' je' je tumbi.

²⁷ ¿Pin je' jacmijip? ¿Huidi ñaybi ma mesa, o huidi ni'ixiib a'ixiib caayin uucin? Yi' je' jacmijip huidi ñaayb ma mesa. Per ñich ijtpich miid miich ajcxy jadu'n nej huidi ni'ixiib aa'ixiib caayin uucin.

²⁸ Miich ajcxy ti m'íjtcixy miid ñich ma anajty ayo'n ti nyajnaxyich. ²⁹ Paady ñich miich ajcxy tüg ané'min nmooyb, jadu'n nej ñich ndeedy ti xymöyich.

³⁰ Jaydëbi miich ajcxy mgáaygixipy m'uuccixipy ma ñich nmesa jiiyby ma ñich n'ané'min e m'ñähuiipy ajcxy ma je ane'mdac, e mdiydúngixipy m'ané'mgixipy je nimajmetz picy Israel ñaax ycajp.

Jesús capxidzimy co Pedro ymina'na'ñ co ca'p Jesús ix'yadyii

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xy-huinma'ñ'ixaangixy jadu'n nej jäy trigo huimbojy co yajhuätzaangixy. ³² Per ñich Dios nmibijctzooyich miid miich ycixpi, jigix miich ca'ydi mmibijcin ytigoy'ity. Mina anajty miich ti mjothuimbity, jotmic migápxipy yi mmigügtijc ajcxy.

³³ Chi Pedro yminañ:

—Huindzin, jotcuje ñich nñicxa'ñich miid miich oy pujxtigótyity, etz oy ndimy'ögibich miid miich.

³⁴ Huin'it Jesús nimay Pedro:

—Ñich miich nimaayb co ca'ni anajty tzey yaxigy jabom jopy co miich miná'nip tugig'oc co miich ca' xy'ix'adyiijich.

Huingomb hori ma Jesús y'ocyaj'ijxmadza'ñ

³⁵ Chi Jesús nimay ydiscípulos ajcxy:

—Co ñich miich ajcxy jayhuin nguejxy, ni mmoral, ni ca' mmeeñydijc, ni mgig ti mmi'oygixy, ¿nej myajtigoy'ijt ajcxy ti jatyi?

Chi ajcxy y'adzooy:

—Ni ti.

³⁶ Chi Jesús yminañ:

—Jadachambi pin ymeeñydijc etz ymorral miid, huen minicx; nañ pin ca' miidity y'espada, huen toogy yjocx huit, chi juyipy y'espada. ³⁷ Ñich miich ajcxy nimaayb co copicy jada yajcuydunipy huidibi mimb jaybety miid ñich ycixpi ma Dios ñecy ma jadu'n yminañ: “Yaj'amichomujc (je Cristo) miid yi'

ajcxy huidi jibicjäyip.” Tüg'óciy mimb jaybéty ma Dios ñecy miid ñich ycixpi, yajcuydunipy yi'.

³⁸ Chi Jesús ydiscípulos ajcxy ymíñañ:

—Huindzin, cha metz espada.

Chi Jesús y'adzooy:

—Huen miid yi'yi.

Jesús Dios mibijctzoy jim Getsemani

³⁹ Chi Jesús jim choñ ñicxy ma je cop huidi yxii Olivos, com jim anajty nicxy coodz coodz, chi je' ydiscípulos ajcxy ypanicxi. ⁴⁰ Co ajcxy yja'ty ma je cop, chi Jesús ymíñañ:

—Mibijctzoogix Dios huen xypubedipy xypudigihuipy ajcxy ca'ydi mdigiygixy jibic tuum.

⁴¹ Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahuüy ytigüy Dios mibijctzoob. ⁴² Chi Jesús ymíñañ:

—Dios Teedy, pen miich m'a'ixiüyb píjigich jada tzaachypi, ca' ñich huaad nyajnaxyich, per ca' ñich huaad ngi'mdzójcin nguyduñich, miich mdzójcin huen myajcuyduñ.

⁴³ Chi ñayguëxici tüg ángel tzajpjoty choñ, jotmic migapxy je Jesús. ⁴⁴ Yam anajty Jesús ooy ytaj ymay, chi Dios mibijctzooyb jacmictägy. E je yxibitniü ypidzimy janch jadu'n yi' anajty nej ni'py janch mijjaty y'ocnajtza'cxiiyñi.

⁴⁵ Co ypidigüy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy miid jotmay. ⁴⁶ Chi Jesús nimay ymígügtjic ajcxy:

—¿Ti co mdzachmaagixy? Pidiccix mibijctzoogix Dios, ca'ydi jibic tuum mdigiygixy.

Yajnicxcixy mach je Jesús

⁴⁷ Jim Jesús anajty ymígügtjic ajcxy miidcapxy miidmiydägy, co je mayjäy oy yjäty. Jayijp anajty ymiñ je huidi anajty xijip Judas, yi' je' anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzücxan. ⁴⁸ Chi Jesús ymíñañ:

—Judas, ¿nej miid tüg tzücxin mgüyecy ma ymidzip, je jäy huidi tzoon tzajpjotyí?

⁴⁹ E je' ajcxy huidi anajty Jesús ymiid, co ajcxy ijxy jadu'n nej ytuñyü yjadyii, chi ajcxy ymíñañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachüy je teedy mijtungmiidpi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús ymíñañ:

—Ixmajtcix, huen jadu'ñyi.

Chi nidoni je jäy ytätz'ac, e jadu'n yajtzoocy. ⁵² Chi Jesús nimay ajcxy huidi nimiini, yi teedy tungmiidpi ajcxy, yi Dios ytijc policia huindzin etz mijjäydjic:

—¿Nej co xyñimíngixyich miid pujx etz mguipyjijpxu'ñ jadu'n nej jihuiy ñich tüg meetzpi? ⁵³ Jiiby ñich anajty jabom jabom ma Dios ytijc, e ca' miich ajcxy ti ti mduñ miid ñich. Per cham jedu'n je tiempo mina miich ajcxy xy'ane'myich etz je jibicpi xymimadägyich.

Pedro ymíñañ co ca' ix'yadyii Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mijtungmiidpi ytijc. Je Pedro jigügyjihu' anajty ypanicxyii. ⁵⁵ Jim ajcxy jin yajmijty tibägujc chi ajcxy y'ixtactay nidüg'óciy. Pedro y'ixtacy nañ jadu'n ma je jäy ajcxy.

⁵⁶ Huin'it tüg pödumbi ijxy Pedro ñäy ma jimba', chi huindixpejty nimay:

—Jada yëydijc nañ ymïid anajty Jesús.

⁵⁷ Chi Pedro ca' cöbijcy, ymïnañ:

—Töxyjäy, ca' ïich yí' n'ixy'adyii.

⁵⁸ Nañ jahueengi huin'it jadüg jäy Pedro yhuindicxpejti, ñïmaayi:

—Miich, yí Jesús ajcxy anajty mïid m'ity.

Chi Pedro ymïnañ:

—Ca' n'ïichity.

⁵⁹ Ti anajty tüg hori ñïnaxni co oy huingbi ymïnandägy:

—Janch co jada yëydijc yí' anajty mïid y'ity Jesús. Com nañ galileojäy yí'.

⁶⁰ Chi Pedro ymïnañ:

—Ca' ïich nhuinjihuíy nej miich mmïna'ñ.

Capxni anajty je Pedro co tzey oy yaaxïgy. ⁶¹ Chi je Huindzin Jesús ni'ijxhuimbijty je Pedro. Huin'it Pedro jäymetzcootti je' ayuc nej anajty yHuindzin Jesús ti ñïmäyïi: “Ni ca'ni anajty tzey yaaxïgy cham coodz co miich tugïg'oc xycoyüdzybyich.” ⁶² Chi Pedro ypidzimy tibäy, oy jüby yäxy mïid tájin máyin.

Nixiiccixy yajxiiccixy yí Jesús

⁶³ Je jäy ajcxy huïdi anajty Jesús cuend'ajtp, ooy ajcxy nixiicy niyaaxy, etz nañ ooy ajcxy huingojxy jïpcojxy. ⁶⁴ Chi ajcxy huingoxodzy, e cojxy ajcxy ma yhuïnyjïp, ñïmaaygïxy:

—Octiygapx, ¿pin ti xycoxy?

⁶⁵ E ooy anajty mïid yjibic ayuc cixy cuety ñïmaaygïxy.

Jesús mijjuntajoty yajpaady

⁶⁶ Co yxïmïy, chi yöymujcy yí teedy mijtungmïdipi ajcxy, yí mijjäydijc ajcxy, etz yí escribas ajcxy, chi ajcxy y'amïdooy:

⁶⁷ —Ñïmaaygïch ajcxy ¿nej miich je' je Cristo?

Chi Jesús y'adzooy:

—Co ixypy nnigapxich, ca' miich ajcxy mïbigïpy. ⁶⁸ E pen ïich miich ajcxy n'amïdooyb, ca' miich ajcxy xy'adzohuïpyich, etz canan huin'it xyñajtmadzïhuïbich miich ajcxy. ⁶⁹ Jadachambi e ñïcxa'ñi ïich, je jäy huïdi tzoon tzajpjoty, n'ixtäga'ñich a'oy'amy ma Dios mïc'ajtmïdipi.

⁷⁰ Chi nidüg'ócïy je' ajcxy y'amïdooy:

—¿Nej janch co miich Dios xy'ung'adyii?

Chi Jesús y'adzooy:

—Miich ajcxy jadu'n mïnamb co ïich njëjity.

⁷¹ Chi ajcxy ymïnañ:

—¿Ti ajt njac-huáanim testigo? Ti ajt yam ci'm nmïdoohuim nej mïna'ñ.

23

Jesús ma Pilato yhuinduu

¹ Chi tüg'ócïy je mayjäy ajcxy ypidïgy, chi yajnicxy ajcxy Jesús ma je gobernador Pilato. ² Chi ajcxy ytigïy xïbi ymïnaangïxy:

—Jada jäy naax cajp yaj'ixpijcp huïdi ca' ytiy'ájtity. Yí' adujctähuam co ca' huaad nmïgüéjtïm César, e ymïna'ñ ci'm co yí' je' je Cristo huïdi rey'ajtpi.

³ Chi Pilato y'amïdooy Jesús:

—¿Nej miich je' judío jäy xyrey'ajtp?

Chi Jesús y'adzooy:

—Miich jadu'n mïnamb.

⁴ Chi Pilato ñïmay je teedy tungmïdipi ajcxy etz je mayjäy:

—Ca' ïich ti pocy nbaadyich ma jada yaabi yëydijc.

⁵ Chi Jesús ymidzip nigí anajty ajcxy ymínan'adítzcixy:
—Jada Jesús naax cajp tzachyajqueec-huäcxtaayb je judíojäy miid yi' y'ayuc. Yajtzondacy Galilea, e jadachambi ya Judea jadu'n idíich.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuiy co yi' jim anajty yajpaady ma Herodes y'ane'my, chi jim quejxy ma Herodes huídi nañ jadu'n anajty yajpatp jim Jerusalén huin'it xii. ⁸ Co Herodes ijxy Jesús, chi oy jotcugíy com tíiyip anajty ooy ja'ixa'ñ, ti anajty may ayuc midoohui, e ahuíxy anajty co mijhuinma'ñ tunípy. ⁹ Janch may ayuc ooy jayaj'amidooy, e Jesús ni tüg'aa ca' y'adzooy. ¹⁰ Jim anajty teedy mijtungmíidpi etz je escribas ajcxy, tzachnigíbéjtcixy mictägy. ¹¹ Chi Herodes miid yjäy ooy níxiicy yajxiicy Jesús, ca' mij'ijxy mijpidacy. Chi xojxy miid oyhuit etz quejxhuimbijty jim ma Pilato. ¹² Huin'it xii Herodes etz Pilato ajcxy ñaymigügpíjci, com naymijotma'típ anajty ajcxy huin'it tiempo.

Jesús yajmoy ysentencia co y'ögípy

¹³ Chi Pilato huomujcy yi' teedy mijtungmíidpi, yi' cajptungmíidpi, etz yi' naax cajp. ¹⁴ Chi ajcxy nimay:

—Ti miich ajcxy xyajnimíngixyich jadayaabi yéydíjc, jadu'n miich ajcxy mánamb co ooy jäy yajqueec-huäcxtay. Ti íich yi' jatíyduñich ma miich ajcxy mhuindu, ca' íich yi' ni ma ypocy ti nbaati, jadu'n nej miich ajcxy mxíigixy. ¹⁵ Nañ ni ca' Herodes ti pocy ti paady ma jada jäy, com ti njaya-jniquexyich, ni ti pocy jada Jesús ca' ti tuñ huídi huaad nyajco'ögíyich. ¹⁶ Miñ n'octzaachytuñich, jaydēbi nnajtzmadzihuibich.

¹⁷ Jadu'n je gobernador anajty costumbre miidíty co najtzmadzíy tüg machyjäy mijxíjoty. ¹⁸ Chi je mayjäy tügmucy ajcxy ymínaandacy:

—¡Yaj'ög jadayaab Jesús! ¡Najtzmadzi' yi' Barrabás!

¹⁹ Je Barrabás anajty pujxtígoty ti ypidägyii co anajty ti nibidígy je go-bierno, nañ ti anajty yjäyyaj'ögy. ²⁰ Chi Pilato nimay ajcxy jadüg'oc co najtzmadzihua'ñ Jesús. ²¹ Chi je mayjäy janch mic ymínañ:

—¡Yajcruudzpet miich yi'! ¡Yajcruudzpet miich yi'!

²² Chi Pilato ymínañ je midugíig'ocpi:

—¿Ti Jesús ti tundígoy? Ca' yi' ma ypocy nbaatich. Miñ n'octzaachytuñich, e najtzmadzihuibich.

²³ Je jäy ajcxy nigí anajty ymínaan'adítzcixy janch mic, co huen yajcru-udzpejty. Chi ajcxy jadu'n mimadacy Jesús co chachne'mgixy je teedy tungmíidpi, etz je cajpjäy ajcxy. ²⁴ Chi jada' Pilato cuyduñ jadu'n nej je jäy ajcxy anajty píjctzoy. ²⁵ Chi Pilato najtzmadzíy je Barrabás huídi anajty pujxtígótyip, co anajty chach jäy yajqueec-huäcxy, etz yjäyyaj'ögy, je' huídi yi' jäy ajcxy ypijctzou. Chi Pilato cíyejcy Jesús ma yi' ajcxy huen tungíxy nej tzojccixy.

Jesús yajcruudzpejti

²⁶ Chi je judíojäy ajcxy yajnícxy Jesús. Jim tü'am ajcxy mánaybaati tüg jäy huídi anajty ti chooñ camjoty, huídi anajty yxii Simón, e ycocájpíty anajty Cirene. Chi adzip ajcxy Simón yajquejycabi y Jesús ycruudz, e yajpanícx y ajcxy Jesús.

²⁷ Jac'axam anajty naax cajp panícxixy, etz nañ may töxyjäydíjc ajcxy chachyaaxcixy miid jotmay miid yi' ycíxpi. ²⁸ Chi Jesús ni'ijxhuimbijty je töxyjäydíjc ajcxy, chi nimay ajcxy:

—Miich Jerusalén töxyjäydijc ajcxy, ca' xyñiyáaxcixich. Nayñiyaaxigix miich ajcxy ci'm etz m'ung ajcxy ycixpi. ²⁹ Chi ypaadipy tiempo co jäy ajcxy ymına'nipy: “Jotcuyc je töxyjäy ajcxy huidi ca' y'ung ixy, huidi ca' ti y'ungtzimigy, etz huidi ca' ti y'ung yajtzitcixy.” ³⁰ Chi je jäy ajcxy nimaydägipy mijtun mijcop: “Nigidagótcich ajcxy”; etz je mutztun mutzcop: “Yajtigooygich ajcxy.” ³¹ Pen jäy ajcxy tzaachypi ayo'n mooyb Dios y'ung, nigí ajcxy jacjiini ytundigoyañ mïd Dios yjäy, tim jadu'n nipaady nej pin puxam tzuxy quipy nañ puxamy quipy titzpi.

³² Nañ jim anajty yajnicxcixy mïd Jesús jametz pocyjäy. Tú'ciy mïd Jesús anajty yaj'ogaangixy. ³³ Co ajcxy oyjäty jim ma tüg it huidi jäy ytiypy ögpi cohujc, chi ajcxy jim Jesús yajcruudzpejty mïd metz pocyjäy: tüg pocyjäy a'oy'amy, jadüg anajty'amy. ³⁴ Chi Jesús ymınañ:

—Dios Teedy, mecxi ajcxy ypocy, com ca' nejhuigixy ti ytungixyp.

Co je soldados anajty ajcxy yajhuäcxaani ac je'y Jesús yhuit, chi ajcxy ijxy suerte pin ocjēdib. ³⁵ Jim je cajpjäy anajty yhuind#cxcixy, yam je tungmïdpi nixigy yajxigy Jesús, ymınañ ajcxy:

—Jada Jesús huingjäy ti yajtzögy, huen cham ci'm nayyajtzögyii, pen yi' je' je Cristo, je huidi Dios ti huin'ixyi.

³⁶ Nañ jadu'n je soldados ajcxy nixiiccixy yajxiiccixy Jesús, nimijhuägy ajcxy möhuaangixy anajty vino ta'mbi. ³⁷ Chi je soldados ajcxy ymınañ:

—Pen miich Rey'ajt ma yi judíojäy ajcxy, nayñihuänii ci'm.

³⁸ Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YĪ JUDIOJÄY AJCXY YREY.

³⁹ Chi tüg pocyjäy huidi anajty cruudzcixy ooy nixiicy yajxiicy Jesús ymınañ:

—Pen miich je' je Cristo, naygohuänii ci'm, e cohuaangich ñch ajcxy nañ jadu'n.

⁴⁰ Chi je jadügpi pocyjäy oy y'adzooy, ogy ymigüg, nimay:

—¿Nej ca' miich Dios mdzigiy. Ca' m'ixy co tú'ciy ti nbócycahuim? ⁴¹ ñch ajt janch paatip jadu'n, co jadu'n jada ngöbójim tzaachypi je tibi ndundigooyim. Jadayaabi Jesús janch ni ti jibicpi jada ti catuñ.

⁴² Chi je pocyjäy nimay Jesús:

—Tun may'ajt xyjäymedzipich co anajty mjäty jiiy ma m'ane'mdac.

⁴³ Chi Jesús oy y'adzooy:

—Janch ñch miich yam nimäy co cham ñch miich mïd'íjtnipy ma je oybi it.

Jesús y'o'cni

⁴⁴ Co cujcxibi paty, chi oy ycoodzäy tüg'óciy naaxhuiñ ixti minacyxiini. ⁴⁵ Chi xi ca' y'oc'ani. Chi je huit oy yciitzhuäcxy huidi anajty adydujcp je Dios y'it jiiy ma Dios ytijc. ⁴⁶ Huin'it Jesús mic ypätcapxy ymınañ:

—Dios Teedy, cham nyajcidiigy ñch n'alma.

Co Jesús jadu'n ymınañ chi y'ögy.

⁴⁷ Co je soldado huindzin ijxy jadu'n nej anajty ti ytunyii ti yjadyii, chi ooy jäymejch yi Dios ymınañ:

—Janch co jadayaabi yëydijc anajty tudägy yjäyity.

⁴⁸ Chi je mayjäy tibi anajty jim yöymújccixy yhuind#cxcixy, co ajcxy ijxy jadu'n nej ytuuni yjati, chi ajcxy huimbijttaayñi cajpjoty yam ycaach tzachcójxcixy mïd jotmay ycixpi. ⁴⁹ Cham tüg'óciy Jesús ymigügtijc ajcxy huidi anajty mïd ñay'ixy'adyii, etz töxyjäydijc ajcxy huidi anajty Jesús ti ypadzonyii jim Galilea, jigügy je' anajty ajcxy yhuind#cxcixy.

Yajnaaxtigüy ajcxy Jesús

⁵⁰ Jim anajty tög yëydijc huidi anajty yxii José, hue' anajty ycogájpity Arimatea ma Judea naaxjot. Je' anajty judío mǎjtungmǎidpi, e je' ooy anajty chach'oyjáyity etz ytudágyjáyity. ⁵¹ Je' nañ yjijp'ijxy anajty co yminípy je Dios y'ané'min, e ca' je' anajty jijptigüy mǎid jacnaagity mǎjtungmǎidpi co ajcxy yaj'ögy Jesús. ⁵² Chi José ñicxy ma Pilato oy pijctzoohei Jesús ñinícx. ⁵³ Chi yajminajcy ma cruudz, e mo'ñ mǎid tög sávana, chi pidacy ma ögpi jut, ma tög tzaahuinguetzmic ma ca'ni anajty ni tög ögpi jiiby yajpidägyp. ⁵⁴ Je' anajty ajcxy ni'ixiiyb a'ixiiyb je pascua xii e je' anajty tim tzoneðgan je pócxin xii.

⁵⁵ Chi je töxyjäydijc huidi anajty ti ypadzoñyii Jesús jim Galilea, panícx ajcxy je José axam. Chi ajcxy nañ jadu'n ijxy je ögpi jut, etz je ninícx jadu'n nej jiiby yajpidacy. ⁵⁶ Chi ajcxy yhuimbijttay cajpjoty. Chi ajcxy yaj'oyiiy ujtz xuucpi, tzooy, etz unguento, chi amay'ajty je pocxinxi, jadu'n nej anajty cötújcín y'ane'my.

24

Co Jesús y'ögy chi yjugypícy

¹ Co je seaman y'ixtigüy janch tim ticxícp je töxyjäydijc ajcxy ymiiñ ma je o'cpi jut, chi mǎimiiñ ajcxy ujtz xuucpi, etz tzooy huídibi anajty ti yaj'oyiiygixy. Nañ jadu'n mǎidjadyii töxyjäydijc miiñ. ² Chi ajcxy paty je tzaa ti anajty yjidiguegyii ma je o'cpi jut'aguu. ³ Co ajcxy ytigüy jutjoty, chi ca' ajcxy paty je Huindzin Jesús ñinícx. ⁴ Chi jadu'n yjajty, jiiby anajty ajcxy jutjoty huinmaaygixy, co ñayguëxigi ma ajcxy ymijc metz yëydijc janch adícxp anajty yhuit. ⁵ Chi ajcxy ooy chigüy, chi ajcxy yhuindactay, chi je metzpi yëydijc yminañ:

—¿Na'amy co m'ixtaaygixy yi jugypi ma yi tiibi y'ögy? ⁶⁻⁷ Ca' je' ya, ti je' yjugypícy. Jäyméjtzcix jadu'n nej mina'ñ jim Galilea, co yminañ:

—Ooy ycopícyty co ñich, je jäy huidi tzooy tzajpjoty, nyajcüyegipy pocyjäy c'íam. Yi' ajcxy xyajcruudzpedípyich, chi njugypigípyich codugüig xii.

⁸ Chi ajcxy oy jäymejtzcooty nej anajty Jesús ti ymina'ñ. ⁹ Chi je töxyjäydijc ajcxy yhuimbijttay ma o'cpi jut. Chi ajcxy yajmǎidmíydactay jadu'n nej anajty ti íjxcixy ti mǎidoogixy mǎid Jesús ydiscípulos ajcxy je nimajmetzpi etz jacjadyii jäy huidi yajpaatp ma je' ajcxy. ¹⁰ Je töxyjäy ajcxy huidi ooy ma Jesús ñaaxtigüy, je' je' anajty ajcxy: María Magdalena, Juana, etz María Jacobo ytaj, e cham jacnaagity ymidöxyjäydijc. ¹¹ Chi Jesús ydiscípulos ca' ajcxy tim mǎipidacy je töxyjäydijc ajcxy ayuc, hue' ajcxy tijy nigo y'occapxcixy y'ocmíydaaccix, paady ca' ajcxy mǎibijcy.

¹² Chi Pedro ypidígy ñicxy poyígyi ma anajty Jesús ti ñaaxtigüy. Chi Pedro yco'ixiiy ma je o'cpi jut, chi ijxy co ca' jiiby ni ti, jëyi Jesús yhuit abícy y'ooxnäy. Chi Pedro yhuimbijty ma ytijc jihuüy ooy jadu'n nej ti ytuñyii yjadyii.

Ma Emaús tü'aa

¹³ Huin'it xii metz Jesús ydiscípulos ajcxy ñicxy ma tög cajp mutzpi hue' anajty yxii je cajp Emaús, hue' yjiguemyty mǎid Jerusalén tugí'px estadios (majmetz kilómetro). ¹⁴ Chi amíydaacíp anajty ajcxy ñicxy. Nigapxcixy nimíydaaccixy nej Jesús ti yjaty ti y'ayoy. ¹⁵ E jadu'n yjaty ma anajty ycapxcixy ymíydaaccixy je nimetzpi, chi Jesús c'i'm nimíjhua'cy je metzpi, chi mǎid ñicxy ajcxy yquipxyi. ¹⁶ Oy anajty ja'íjxcixy, ca' ajcxy tuñcuend pín je' anajty. ¹⁷ Chi Jesús y'amídooy je' ajcxy:

—¿Ti miich ajcxy mǎydacpy ma yam mdüyögyixy? ¿Nej co mdájcxixy mmáygixy?

18 Chi tög huidi anajty yxii Cleofas y'adzooy:

—Janch tög'óciy mayjäy nejhuïydäy je ayo'n ti ytunyii ti yjadyii. ¿E miich naydüg jim jättac Jerusalén, e jadu'n tijy ca' mnejhuïy?

19 Chi Jesús je' ajcxy nimay:

—¿Ti ti ytuñyii ti yjadyii?

Chi je' ajcxy ymínañ:

—Jesús Nazaretpi, huidi Dios y'ayucnajtzcaxiyp, yi' anajty mij jánchíp ma yi' ayuc etz huinma'ñ ma Dios yhuinduu, etz cham ma tög'óciy naax cajp. 20 Chi yi' ajcxy je teedy mïjtungmïdipi etz iich ajt ndungmïdipi Jesús yajcïdigii je gobernador co huen yaj'ögyii. Chi ajcxy yajcruudzpejty. 21 Hue' iich ajcxy anajty ndzach'ahuijxyp co yi' je' huidi Israeljäy ajcxy cohuánaam ma ymidzip. Jadachambi jada' ymidugigxi ma jadu'n ti ytunyii ti yjadyii.

22 Cham iich ajcxy ndöxyjäydijc ajcxy ooy xy'adzigiigyixyich. Ti y'oygixy janch tïcxïcp ma o'cpi jut. 23 E com ca' ajcxy paaty je ñaaxnïcx, chi ajcxy yhuimbijtni ymínaangixy co ti lïxcixy yi' ángeles ajcxy, hue' je ángeles ajcxy ymínañ co Jesús yjuugyity. 24 Huin'it nijëjity nmigügtijcich ooy ma o'cpi jut, paty ajcxy janch jadu'n nej töxyjäydijc anajty ymínaangixy. Ca' je' ajcxy ijxy Jesús.

25 Chi Jesús ymínañ:

—iMiich jäy ajcxy ooy ajcxy m'aajuuñity mjetjuuñity, ca' ajcxy ti md-zojcmïbijccixy co ajcxy mjamïbigá'nip huïdibi y'ayuc najtzcaxiypbi ajcxy ycapxy! 26 ¿Nej ca' anajty ycopicyity co je Cristo ayo'n paadip, e huin'it ytigihuij tzajpjoty ma yi' y'it oybi?

27 Chi Jesús yajnímaay ajcxy Dios ytiy'ajt, chondägy ma Moisés ñecy, etz tög'óciy jacjadyii necy huidi Dios y'ayucnajtzcaxiypbi yjaay, yajxon ajcxy yajni'ixyday jadu'n nej yjaybétyity mïd je Cristo ycipi.

28 Chi ajcxy mihuingoñ je mutz cajp ma anajty ñïxcixy, je Jesús jadu'n ñaybidaaci jadu'n nej jihuij jacjiguem ñïcxy. 29 Huin'it ajcxy nimay adzip:

—Hui'm miich mïd iich ajcxy, nigí jada chuu'iy'adïch.

Chi Jesús ytiigy cajpjoty yhuï'my mïd je' ajcxy. 30 Chi jadu'n yjajty co anajty ti y'ixtaaccixy caaybi, chi Jesús tög tzajcaagy conigy, e yajnajxy Dios cojuyip, huin'it tujc-huäcxy moy ajcxy. 31 Huin'it ajcxy ijxcajpy Jesús. Chi Jesús mïc mïciy yaj'ijxtigoy. 32 Chi ajcxy ñayñímaayi:

—¿Nej ca' yjáncity co iich ajt ooy njihuïyim jotjoty huinma'ñjoty co anajty ajt jim xymïdmïydacim tü'am, etz co ajt xyñajtzcaxiypim je huidi jaybety ma Dios ñecy?

33 E tim huin'ity ajcxy túbijccixy, chi ajcxy nïxcixni jim Jerusalén. Ni'amugi' ajcxy paty je majtügpi Jesús ydiscípulos ajcxy e jacjadyii jäy ajcxy.

34 Chi ajcxy mínaangixy:

—Janch yi' co ti yjugypicy je Huindzin Jesús, com ti oy ñayguëxigyii ma Simón.

35 Chi Cleofas nimïydacy jadu'n nej tü'ay anajty ajcxy ti ñaybaatigixy mïd Jesús, etz jadu'n nej ajcxy Jesús ijxcajpy co tzajcaagy ti tujc-huäcxy.

Jesús ñayguëxici ma je' ydiscípulos ajcxy

36 Jiiby anajty ajcxy tzachnimïydaaccixy co Jesús oy ñayguëxigyii ma je' ajcxy. Chi ytinay'ahuij cujc'amy ma je' ajcxy, chi ymínañ:

—Jotcugi' miich ajcxy.

37 Chi je' ajcxy ooy ñay'adzigiyi ooy huinmaaygixy, hue' ajcxy tijy ijxmañiyb.

38 Chi Jesús nimay je' ajcxy:

—¿Na'amy co mjet mhuinma'ñ ti ytigoydaaygixy? ¿Nej co m'aa'ájtigixy mjet'ájtigixy pin iich? 39 Ijxcix miich ajcxy iich ngi' iich ndecy, iich jëni iich.

Nĩdongich etz íjxcich ajcxy. Tüg espíritu ca' mĩdĩty chũch ni ypajc, jadu'n nej m'íjxcĩxy ñch nmĩdĩty.

⁴⁰ Co Jesús jadu'n ymĩnañ, chi ajcxy yaj'íjxy yci' ytecy. ⁴¹ Per ca'ni ajcxy mĩbijcy mĩd co anajty ajcxy chachjotcújcĩty, chi Jesús ajcxy nĩmaayi:

—¿Mĩd ajcxy ti ii mgayĩpy?

⁴² Chi ajcxy moy Jesús acxtzäy, etz tüg jĩdy serpäg. ⁴³ Chi cöbijcy, chi ycaay y'uucy jĩm ma je' ajcxy yhuĩduu. ⁴⁴ Huĩn'it Jesús ymĩnañ:

—Huĩdi m'íjxyp cham je' je' huĩdi nyajnimay jayhuĩn, co ñch mĩich ajcxy anajty mĩd'íjtcĩxy, co copĩcy nguydundähũibĩch jadu'n nej yjaybétyĩty ma je Moĩsés ñecy je jěcyĩp, etz jacjadyii Dios y'ayucnajtzcaxĩybi ñecy, etz yĩ salmo necy.

⁴⁵ Huĩn'it je' ajcxy yjot yhuĩnma'ñ ymĩñ ymejch, jaydėbi huĩnjihũĩygĩxĩpy huĩdi jaybétyĩp. ⁴⁶ Chi Jesús yjacmĩnañ:

—Jadu'n jaybety y'ĩty ma Dios ñecy co copĩcy co je Cristo paadĩp ayo'n e yjugypĩgĩpy codugĩg xĩ, maabi anajty y'ögy. ⁴⁷ Huen ajcxy yajcax-huäcxy Dios ytĩy'ajt huĩdu'my naaxhuĩñ, chondägĩp Jerusalén, co ooy ycopĩcyĩty huen jäy ajcxy jothuĩmbijtcĩx jaydėbi ajcxy paadĩp pocyhuĩn-meecxin. ⁴⁸ Mĩich ajcxy nidĩy'ajt'adĩpy tüg'ócĩy jadu'n nej cham ti m'íjxcĩxy ti mnejhuĩygĩxy. ⁴⁹ Jadachambi nguexĩpyĩch ma mĩich ajcxy je huĩdi nDeedyĩch ti xyaj'ahuanĩygĩxy. Huĩ'mgĩx ya Jerusalén ixti cooni ajcxy xyñĩdigĩhuĩp xycödigĩhuĩp je Dios yjihũĩ'ñ ymĩc'ajt huĩdi tzonam tzajpjoty.

Jesús ypa'ttigĩyñ tzajpjoty

⁵⁰ Huĩn'it xĩ Jesús mĩd tzoñ je' ydiscĩpulos ajcxy, chi ajcxy ycajppĩdzĩmy, ñĩcxy ajcxy mĩhuĩngon je Betania. Chi Jesús xajhuäcxy yci' mĩbijctzoy Dios mĩd je ymĩgũgtĩc ajcxy ycĩxpi. ⁵¹ Chi jadu'n yjajty ma anajty Dios mĩbijctzoy mĩd yĩ' ajcxy ycĩxpi, chi abĩcy yajhuĩ'mni je' ajcxy e je' ypätigĩyñi jĩby tzajpjoty. ⁵² Chi yĩ' ajcxy jĩm yjac-huäcxĩjpy Dios ojajajtcĩxy. Chi ajcxy yhuĩmbijttaayñi jĩm Jerusalén janch jotcujc. ⁵³ Chi ajcxy jabom jabom anajty ñĩcxcĩxy ma Dios ytĩjc chajpcaxycapxcĩxy, ojajajtcĩxy jäymejtzcĩxy yĩ Dios, Janch jadu'n jada. Amén.

SAN JUAN

Jaayhui'my Jadu'n Nej Jesucristo Ytun Yjajti

Dios y'ung huídibi y'oy ya naaxhuiñ yejci Dios y'ayuc tìy'ajt

¹ Co naaxhuiñybi oga'n chondacy jiiyim anajty Dios y'ung, e yì' yajnejhuiy jây ajcxy Dios y'ayuc ytìy'ajt. Dios y'ung tú'ciy anajty yajpaady ma Dios. ² Je' tím oga'n'aty anajty yajpatp ma Dios. ³ Tüg'óciy huídijaty yaj'ixp yajpatp ya naaxhuiñ, yì' yaj'oyiday yajcojtay. Tüg'óciy huídijaty Dios yajcojy, tú'ciy ytuñ mïid y'ung. ⁴ Dios y'ung yì' jugy'ajtyejctayb ma tüg'óciy naaxhuiñjây. Mïid co jugy'ajtyejctây ma tüg'óciy naaxhuiñjây, je' je' tìy'ajt co Dios y'ung ymïid Dios ymic'ajt. Jadu'n nipaady nej tüg jïn huídibi jây codïcxp. ⁵ Ya naaxhuiñ yajpaady anï. Yì anï jadu'n yì' nej coodzpì. Yì Dios y'ung tì mimiñ ya naaxhuiñ Dios y'ayuc ytìy'ajt. Jadu'n Dios y'ayuc ytìy'ajt ma jây yjot yhuinma'ñ nej tüg jïn ytïcxy agoodztuuyb. Yì anï ca' ñaygodigïyì mïid Dios ytìy'ajt.

⁶ Ma'xung'ajt tüg yëydijc huídibi Dios anajty tì yajnïbicy. Hue' anajty yxï Juan. ⁷ Yì' oga'n tìy'ajt yejco Dios ymic'ajt etz ytìy'ajt yajpaady ma Dios y'ung, jigix tüg'óciy je jây ajcxy camibjctâhuipy je Dios y'ung. Dios y'ung jadu'n nipaady nej tüg jïn huídibi codïcxp ma jây ytüyöy. ⁸ Je Juan ca' je' anajty yjējity je Cristo, je huídibi capxhuäcxp Dios y'ayuc ytìy'ajt. Hue' janchtìy je Juan ñidìy'ajt'ajt je Cristo. ⁹ Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytìy'ajt ymïid, je janchypì, ma jëb tüg'óciy jây ya naaxhuiñ patcixy Dios ytìy'ajt.

¹⁰ Je Dios y'ung ya anajty yhuídity naaxhuiñgïxy. E jada naaxhuiñ yì' yaj'oyiday. E may je naaxhuiñjây ca' ajcxy ixcajpy. ¹¹ Je ymïgügtijc, je judiojây, je' ajcxy nimiini, e may ajcxy je ymïgügtijc ca' ajcxy ycöbïjci. ¹² Tüg'óciy je jây ajcxy pinjaty mijpidac yì' yxï yì' ymic'ajt, yì' ajcxy yajmoy Dios ymic'ajt, e jadu'n nipaty nejjihuïy ajcxy Dios y'ung'adyii. ¹³ Canan hue' je' co naydijïyb Dios y'ung co tì yma'xung'aty jadu'n nej jây ajcxy y'ocma'xung'aty. Nañ ni ca' yjadu'nity nej jây tijy, nej jây jïjp'ixy, ni canan jây jadu'n tì huinmay. Hue' janchtìy Dios jadu'n tì huinmay.

¹⁴ Je Dios y'ung ya naaxhuiñ je' yma'xung'ajty mïid ñinïcx etz chinay mïid naaxhuiñjây. E ñich ajcxy n'ixich yì' y'oy'ajt etz ymic'ajt, jadu'n nej Dios Teedy y'ung tügpaic oy'ajt etz mic'ajt mïidity. ¹⁵ Juan ñidìy'ajt'ajt je Dios y'ung, e chi capxypïdzimy, e jadu'n ymïnañ:

—Jada je' je jây huídibi ñich jadu'n nimïydaacich ma miich ajcxy. Je huídibi miimb jac'axam ma ñich, jac mic'ajt mïid yì' ca'ydi ñich, com jacjayïjp yì' jugy'ajt paty ca'ydi ñich.

¹⁶ Je Dios y'ung oy xychojcm xyjihuiyïm mijcajee, paady je' tuuñ may'ajt oy'ajt mijcajee mïid ñich ajt ycixpi. ¹⁷ Com Dios y'ané'mïn ycötujcin micpi hue' Dios yajniguejx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ mïid je jây ajcxy ycixpi, e nañ je' ytìy'ajt yajniguejx je Jesucristo. ¹⁸ Je Dios ni caminaabi pin ca'ixyñi, je y'ung tügpaic yajpatp ma Dios Teedy ity. Je Dios y'ung tì xyajnejhuiyïm nej Dios yajpaady.

Juan el Bautista je' tìy'ajt yejco Jesús je' anajty Dios y'ung

¹⁹ Jadaabi je' je tìy'ajt huídibi Juan yejco, co judío jây ajcxy quejxy nijējity teedytìj etz tzajptìj tungmïdipi. Jïm ajcxy chooñ Jerusalén nicxy ma anajty Juan yajpaady, chi ajcxy y'amïdooy:

—¿Mbin miich? ¿Nej miich je' je Cristo huídibi Dios yquexamy?

²⁰ Je' ñigapx je t'iy'ajt, ca' ñaygoyützi, chi ymínañ:

—Ca' ñich njéjity je Cristo.

²¹ Chi ajcxy jac'amídooy:

—¿E pin miich mnaydijyí? Pen ca' mjéjity je Cristo. ¿Nej miich je' je Elías?

Chi Juan y'adzooy:

—Ca' je' n'ñichity.

Chi ajcxy jac'amídooy:

—¿Nej miich je' je Dios y'ayuccapxhuäcxpi, je huídibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

²² Chi y'amídooy ajcxy jadüg'oc:

—¿Mbin miich? Jigix ñich ajcxy t'iy'ajt nyajñicxibich ma yi t'ibi ñich ajcxy xyquexyich. ¿Ti miich nayxñigoyäxyí?

²³ Chi Juan ymínañ:

—Ñich je' je jäy huídibi Dios y'ayuccapxhuäcxip ma tüg m'ijtig'íduum, tim jadu'n nej jii by jaybety ymíñ ma Isaías ñecy, nañ tim jadu'n ñich nmína'ñich co copicy nayñi'ixíyigix ma yi mjot yi mhuinma'ñ, jébi naybáatigixy m'íd mHuindzin Dios. Jadu'n nej jäy ixypy tü'aa yaj'oyí co tüg huindzin ymiina'ñ.

²⁴ Je teedyt'ijc etz tzajpt'ijc tungm'ídp'í huídibi oy m'igapxy Juan, hue' anajty ajcxy fariseojäy ti yquexyí. ²⁵ Chi ajcxy jactim'amídooy Juan:

—¿Ti miich co mjäyayñibety? Peni ca' miich mjéjity je Cristo, ni mgajéjity je Elías, ni mgajéjity huídibi Dios y'ayuc najtzcapxíy'ip.

²⁶⁻²⁷ Chi Juan y'adzooy:

—Ñich hue' jäy nyajñibetyich m'íd n'í. Ya naaxhuiñ ji tüg jäy huídibi miich ajcxy ca' m'ixy'adyí. Je' huídibi jac'axam mimb ma ñich, je huídibi ca' m'ihuaadity nicxy yí xytumbi'adyíijich, nicxyich yc'íghuin nguejich.

²⁸ Jadu'n ytuni yajti jim Betábara, jim'amy ahuin ma Jordán mij n'í, jim anajty Juan jäy yajñibety. Juan t'iy'ajt yejc co Jesús je' anajty yjugy'ajt yegam m'íd ñich ajt nbocy ycixpi.

Jesús n'ayyajhuindzig'íhuaanip ma Dios m'íd jäy ajcxy ypocy ycixpi

²⁹ Chi je com jabom co ijxy Jesús anajty ñimiñyí, chi Juan n'ímay je jäy ajcxy:

—Cha je' ymíñ je Dios yjäy huídibi Dios n'ayyajhuindzig'íhuaanip m'íd naaxhuiñyjäy ajcxy ypocy ycixpi. Tim jadu'n nej judíojäy ajcxy Dios huindzig'íy m'íd ypocy ycixpi. ³⁰ Jada je' huídibi ñich nnigapxyp'ich co jac'axam ymiina'ñ ma ñich tüg yéyd'ijc huídibi n'ígí Dios ymic'ajt y'oy'ajt m'ídit'ity ca'ydi ñich. Com jiiy'ím anajty yí yjugy'aty co oga'n naaxhuiñybi chondacy. ³¹ Oy ñich anajty ca' yí n'ixy'adyíijich huingíxy j'ipc'íxy, nyajñibejtich jäy, jigix yí judíojäy nejhuíhuip ajcxy co ji yajpaady je Cristo je huídibi Dios ymic'ajt m'íd.

³² Chi Juan nigodiy'ajt'ajty je Cristo co ymína'ñ:

—Ñich ti n'ixy'ich yí Espíritu Santo jii by choñ tzajpjoty, jadu'n yquexig'y nej tüg muuxy, e chi y'ixtacy ma Jesucristo. ³³ T'iydudägy ca' ñich anajty n'ixy'adyíijich. Je Dios huídibi xyquejx'ich jäy yajñibejt'ip, je' ñich anajty jadu'n ti xyñimäy'ich co je jäy ma anajty n'ixy'ich je Espíritu Santo ñigidägyí anajty etz yhui'my ma je'. Je' je' jadu'n anajty huídibi y'adig'ihuipy yjottig'ihuipy Dios yj'ihuí'ñ ymic'ajt ma je jäy ajcxy. ³⁴ Cham nnigapxpety'ich co ñich ti n'ixy'ich je jäy, e nyejcpy'ich t'iy'ajt co je' je' je Dios y'ung.

Jesús yhuin'íjx nijéjity jäy huídibi anajty ydiscípulo'andaanipy

³⁵ Chi je com jabom jopy jim anajty Juan yajpaady miid metz jäy huidibi ixpjcp ma yi'. ³⁶ Chi anajty ajcxy tzachhuindixy Jesús co anajty jim ñaxy, chi Juan nimay je metzpi jäy:

—Oc'ijxcix ocnejhuigyix, cha je jäy huidibi Dios nayyajhuindzigihuaanip miid naaxhuiñyäjy ypocy ycxpi.

³⁷ E je metzpi jäy huidibi anajty ajcxy ixpjcp ma Juan, co jadu'n ajcxy midoy nej Juan ymïnañ, chi ajcxy Jesús padzooñ. ³⁸ Chi Jesús y'ijxhuimbijty, chi ijxy co anajty ajcxy ypanixyïi, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tïyi ti mja'ttägy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttägyich.

Chi jada' ajcxy panixy, e chi ajcxy ijxy ma anajty ti yja'ttägy. Je huin'it xïmbi chi jim je' miid yhui'miy, com mijminacyxï anajty co ajcxy jim ymejch.

⁴⁰ Andrés, je Simón Pedro ymïguëx, je' anajty tüg tzoonip huidibi nimetz ajcxy midou jadu'n nej Juan ymïnañ, etz je' anajty ajcxy ti padzooñ Jesús.

⁴¹ Chi jada' Andrés oy ixtäy y'uch Simón tim jayijp, chi nimay:

—Ti ïch ajcxy nbaady je Mesías —jadu'n je ayuc Mesías yhuimbizimañ Cristo.

⁴² Chi Andrés miidnixy Simón ma Jesús, e chi Jesús huindixpejty, nimay:

—Miich je' Simón, Jonás miich xy'ung'ajtp. Miich je' mxï'adiyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús choñ ñixy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, nañ je' je' je' cajp ma anajty ajcxy ycogajpity Andrés etz Pedro. ⁴⁵ Chi Felipe minaybaati je jäy huidibiyxï Natanael, chi jadu'n nimay:

—Ti ïch ajcxy je' nbaadyich je jäy huidibi yajnigapxp yajnimydcap ma Moisés ñecy, etz yi Dios y'ayucnajtcapxïybï ñecy. Yi' je' je' Jesús, José y'ung huidibi cogajpïp jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyjäyi? Com ac jadu'n jäy ymïnañ co ac jibicjäydijc jim tzïnaayb.

Chi Felipe ymïnañ:

—Jam ci'm octim'ix.

⁴⁷ Co Jesús ijxy co Natanael ñimiñyïi, chi jadu'n ymïnañ:

—Cha tüg judíojäy huidibi ca' pin huin'ïnipy.

⁴⁸ Chi Natanael ymïnañ:

—¿Nej miich ti xy'ijxcapyich pin jäy ïch?

Chi Jesús nimay Natanael:

—Ca'ni anajty Felipe xyñïmaayñi: “Jam íxim je Jesús” co anajty miich jïiby'emy ma je higeri quipypa't, huin'it ïch miich ti n'ijxcapy.

⁴⁹ Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíojäy ajcxy.

⁵⁰ Chi Jesús y'adzooy:

—Miid co ti nnimäy co jïiby'emy anajty miich ma je higeri quipypa't co ïch miich ti n'ijxcapy. ¿E ti mdïmjanimibicy? Jactïmmijhuinmañ etz jactïmmij'oy'ajt m'ixamyb mbadamyb.

⁵¹ Chi Jesús jadu'n ymínañ:

—Janch tim t̄iy ñich miich ajcxy yam jadu'n nimäy co m'ixipy ajcxy yí tzajp y'ahuäch etz Dios y'ángeles ajcxy chooñ tzajpjoty xyñigidägyich, e ypa'ttigiygixy jadüg'oc tzajpjoty. Choongixy yja'tcixy ma ñich je jāy huídibi tzoon tzajpjoty.

2

Jesús y'oy ma anajty jāy nixiduiñ t̄üg pijc̄in j̄im Caná

¹ Midugiigxiibi anajty maabi ajcxy Jesús minaymigápxigixy, ma je cajp huídibi yxi Caná ma je Galilea naaxjot j̄im anajty huinxidungixy t̄üg jāy huídibi anajty ti ypic̄y. E j̄im anajty nañ jadu'n Jesús ytaj. ² Chi Jesús m̄id je' ydiscípulos ajcxy yajhuooy j̄im ma je xi anajty ytuñyii yjadyii. ³ Ti anajty vino yciyxtaayñi, huin'it Jesús ytaj ñimayñi:

—Ca'p ajcxy m̄idiñ vino.

⁴ Chi Jesús y'adzooy ytaj nimay:

—Ca' ti jotmay nm̄ididyich m̄id miich töxyäy. ñich nhor̄i ca'ni paady mina jāy ajcxy nyajnejhuñhuibich pin ñich.

⁵ Chi je ytaj nimay je tumbidijc ajcxy:

—Mdúngixipy nej anajty ajcxy Jesús xyñimaaygixy.

⁶ J̄im anajty tudujc tzaadu'tz ma anajty n̄i y'ity. Je n̄i anajty ajcxy yajtumȳb co anajty ajcxy yc̄ibujcixy jadu'n nej ypocy ixpujcx̄y, jadu'n anajty ajcxy judío jāy costumbre m̄id̄ity. T̄ügpi tzaadu'tz ym̄id anajty yjot metz majt tuḡig majt n̄i. ⁷ Chi Jesús nimay je tumbidijc ajcxy:

—Yaj'ujtcix yí tzaadu'tz m̄id n̄i.

E chi ajcxy yaj'ujtz̄tay mabaat y'a'ujtznaxy je tzaadu'tz. ⁸ Chi Jesús ymínañ:

—Yajpidz̄ingix cham yí n̄i, e yajnicxcix j̄iiby ma huídibi ane'mb ma yí caydac uuctac.

Chi ajcxy yajnicxy je n̄i. ⁹ Co jada' je ane'mbi j̄ihuymajch je n̄i ti anajty yvinocojy, chi mijhuoy je yēdyjc huídibi anajty ti ypic̄y. Je ane'mbi ca' anajty nejhuñy ma anajty je vino ti choñ. Jēȳi anajty je ytumbidijc ñejhuñȳb co n̄i anajty ajcxy yajpidz̄ingixy ma je tzaadu'tz. ¹⁰ Chi je ane'mbi nimay je huídibi anajty ti ypic̄y:

—T̄üg'óciy jāy ajcxy huídibi x̄idumb, hue' ajcxy yajtumȳb jayj̄p je vino oybi. E co jāy ajcxy ooy yxondaacni, chi oyñihuídibi vino n̄i jacyajtungixy. Miich jancht̄iy, ti m'amay'aty yí vinon̄i oybi ixti chamni myajtuñ.

¹¹ Je' je' je oga'ñibi mijhuinma'ñ huídibi Jesús ytuun j̄im Caná ma Galilea ñaaxjot. Chi yajniguēx̄igy je ymic'ajt etz y'oyj̄äy'ajt. E je huídibi anajty ajcxy yaj'ixpij̄c̄py, chi ajcxy ooy m̄ibijc̄y mijpidacy je Jesús.

¹² Co jadu'n t̄üg'óciy ytuni yjajt̄i, chi Jesús y'idacy j̄im ma je cajp huídi yxi Capernaum m̄id ytaj etz y'uch ajcxy, etz huídibi anajty yaj'ixpij̄c̄py. J̄im ajcxy yhuäcx̄ij̄py t̄üg xi mejt̄z xi.

Jesús yajpidz̄im ajuuybi adoocpi ma Dios yt̄ijc

¹³ Tim huingon anajty je pascua xi huídibi judío ajcxy ytumy j̄im Jerusalén, paady Jesús ñicxy j̄im. ¹⁴ J̄im ma Dios yt̄ijc Jesús paty je' huídibi anajty ajcxy ajuuybi adoocpi, jadu'n nej ma ymiñ huaj, borregi, etz muuxy (huídibi jāy ajcxy Dios yajhuindz̄iḡiyb). Nañ j̄im meeñyhuingogombidijc anajty ajcxy y'ñaaaygixy ma ymesa. ¹⁵ Chi Jesús yaj'oȳiy t̄üg cochac huojp. E chi ixhuoj̄pidz̄imday je ajuuybi adoocpi ajcxy ma Dios yt̄ijc ñihuaj etz ñiborrego. Chi yí meeñyhuingogombidijc ymeñ c̄oxijtnajxtaȳi, e chi ymesa tijhuimbij̄ttaaȳi.

¹⁶ Chi nimay je muuxytoocpidijc ajcxy:

—Yajpidzimgix jada muuxy ya. Ca' ñich nDeedy ytijc yhuaani ajcxy ajuydac adoctac.

¹⁷ Je' ajcxy huidibi anajty Jesús yaj'ixpijcpy chi ajihuiygooti ajcxy je ayuc, jadu'n nej jaybety ymiñ ma Dios ñecy: “Ooy ndzocy njihuiyich Dios ytijc, paady ooy nnijottigoyich Dios ytijc.”

¹⁸ Chi je judío ixpijctijc ajcxy y'amidooy Jesús:

—¿Ti mijhuinma'ñ miich xy'ocyaj'ixambich ajcxy nej tüg ijpexjt, pen janch miiidity cõtujcin co m'ixhuojppidzimdäy yi ajuuybi adoocpi ajcxy?

¹⁹ Chi Jesús y'adzooy:

—Yajhuindigooygix jada Dios ytijc, e codugüg xii ñich yi' jadüg'oc nyajpidigipy.

²⁰ Chi jada' je judío ixpijctijc ajcxy y'adzooy:

—Huixchigüipx tudujc jimijt yhuäcxijpy co jäy cojy jada Dios ytijc. ¿E miich tijy myajpidigamy codugügxiij?

²¹ Per ca' je' anajty nigapxy je Dios ytijc. Hue' je' anajty ci'm ñayñigapxyii co anajty y'öga'ñ, etz co yjugypigipy jadüg'oc codugüg xii. ²² Chi jada' co Jesús yjugypijcy codugüg xii maabi anajty y'ögy, je huidibi anajty ajcxy ti yaj'ixpicy, ajihuiygooti ajcxy huidibi Jesús anajty ti yajnimäyigixy. Chi jada' ajcxy mibijcy ooy jadu'n nej anajty ycojaayity ma Dios ylibro, etz com nañ jadu'n anajty Jesús ti ymina'ñ.

Jesús ñejhuüy nej jäy ajcxy yjot yhuinma'ñ miiidity

²³ Co anajty Jesús yjimity Jerusalén pascua xijoty, mayjäy ooy ymibijci co ajcxy ijxy je mijhuinma'ñ huidibi anajty ytumyb. ²⁴ Jesús ca' anajty yjaty ñaygyegyii ma je mayjäy ajcxy (hue' anajty ajcxy chachyajrey'adamy). ²⁵ Com Jesús ñejhuiydaayb anajty nej jäy ajcxy nidüg nidüg yjot yhuinma'ñ miiidity ca' tzocy pin yajnimähuüyb ti anajty ajcxy ytunamy, com ñejhuiydaayb nej jäy ajcxy yjot yhuinma'ñ miiidity.

3

Nicodemo oy ytij'ajtpicy ma Jesús

¹ Jim anajty tüg yeydijc, fariseojäy y'ixpijcin anajty yajtuunipy. Hue' anajty yxii Nicodemo. Je' anajty ñigohuajc'ajtp ma je judíojäy ajcxy ymiñ. ² Chi jada' Nicodemo ymiñ coodz ma Jesús anajty y'ity, chi nimay:

—Huindzin, nejhuüyb ñich ajcxy co miich tüg huindzin huidibi tzomb ma Dios. Com ca' ni pin jaty nej tunipy je mijhuinma'ñ huidibi miich mdumyb, pen ca' Dios ymic'ajt miiidity.

³ Chi Jesús y'adzooy:

—Janch janch ñich miich yam jadu'n nimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴ Chi Nicodemo yajtiy:

—Per, ¿nej tüg jäy tibi ymij'anäcciyi y'ocnima'xung'ajttigajtpity jadüg'oc? ¿Nej jëbi jadüg'oc ytigiy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch ñich miich yam jadu'n nimäy pen ca' jäy yjothuimbity etz ñibety, pen ca' Dios yjihui'ñ ymic'ajt y'adigiyii yjottigiyii, ca' jëbi ytigiy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymiid ajcxy ñinix yjugy'ajtin. Je jäy ajcxy huidibi Dios yjihui'ñ ymic'ajt adigiyipy jottigiyipy ymiid ajcxy Dios yjugy'ajtin. ⁷ Ca' nej mnayjihuihuüyb co ti nnimäy co copicy mma'xung'adipy huinjemy, co Dios yjihui'ñ ymic'ajt xy'adigihuipy xyjottigihuipy. ⁸ Com je poj miiniyb hueñytimyma'amyity, e nmidoohuim

co y'a'ich, e ca' nnejhuuyim ma choñ e ma ñicxy. Jadu'n nej je poj ypojoy e nganejhuuyim ma choñ, nañ tim jadu'n yjaty mïid je Espíritu Santo, ca' nejhuuyim nej yjaty co adigiy jottigiy jây.

⁹ Chi Nicodemo yajtihuimbijty:

—¿Nej tijy co yjadu'niy? Ca' nhuinjihuuyich.

¹⁰ Chi Jesús y'adzooy:

—Miich huindzin'ajtp ma yi judíoáy, ¿ti co ca' mhuinjihuuy jadayaabi tiy'ajt? ¹¹ Janch janch ich miich yam jadu'n nnimäy co ich etz nDeedich ngapxyp yi huudibi nejhuuyigixypich, e nyejcpyich ajcxy tiy'ajt yi huudijaty ich ti n'ixcixyich. Miich ajcxy judío ixpicytijc ca' ajcxy mgöbijccixy ich ajcxy ndiy'ajt. ¹² Pen ca' miich ajcxy mibijccixy jada tiy'ajt huudibi njanimiydacypich huudibi yajpatp ya naaxhuiñ, ca' ajcxy mmibigipy co njanimiydagibich yi tiy'ajt huudibi tzajpjoty yajpatp.

¹³ Ca' ni pin ti y'oy tzajpjoty, ich je jây tügpajc huudibi ti ndzoñich tzajpjoty, ti ngidägyich ya naaxhuiñ. ¹⁴ Jadu'n nej Moisés yaj'oyiy je pujx tza'ñ, e chi yajcruudzpety jim mijtigiduum jigix chögipy je jây ajcxy ma je ahua'n iyujc chüchyii. Nañ tim jadu'n jây ajcxy xyajcruudzpeda'ñich. ¹⁵ E tüg'óciy jây ajcxy pinjaty xymijpidaacpich, ca' yi' jugy'ajtin ycixy ytigooy ni mina.

Dios ooy mijcajee tzocy jihuuyi naaxhuiñyây

¹⁶ Ooy mijcajee Dios tzocy jihuuyi naaxhuiñyây co yecy y'ung tügpajcpi mïid jây ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tüg jugy'ajtin huudibi ca' ni mina ycixipy ytigoyipy. ¹⁷ Dios ca' quejxy y'ung ya naaxhuiñ co tzaachytunipy yi naaxhuiñyây ajcxy mïid ypocy ycixpi. Paady y'ung quejxy co yajpocyñihuáatzcixipy.

¹⁸ Je jây ajcxy pinjaty mibijcp mijpidacp Dios y'ung, ca' ajcxy Dios chaachytunipy mïid ypocy ycixpi. Je jây ajcxy pinjaty ca' mibicy ca' mijpidägy Dios y'ung, pocycähuipy ajcxy ma Dios, co ca' mijpidaci ajcxy Dios y'ung tügpajcpi. ¹⁹ Paady ycixpi Dios tzaachytuna'ñ mayjây mïid ypocy ycixpi, com co Dios quejxy y'ung mïid ytiy'ajt ya naaxhuiñ, e ca' ajcxy mibijcy Dios y'ung, jadu'n je' anajty nej tüg jin huudi codicxip jây ajcxy ma chinaayin yjugy'ajtin. Per ca'p ajcxy je naaxhuiñyây mijpidacy je jin, jadu'n nej jihuuyi ajcxy anajty yjacjotcujcity co chinaayigixy agoodztuuyb, com je' co nigí tzachnijot'ajtcixy jibic-huinma'ñ. ²⁰ Com je jây ajcxy huudibi jibic-huinma'ñ tzach nijot'ajtcixp, ca' ajcxy tzojci Dios ytiy'ajt, jadu'n nej jihuuyi ca' chinähuaangixy ma jin ytiicxin. Ca' ajcxy y'amidoo'idani Dios y'ayuc, ca'ydi ñiguëxigy je jibicpi huudibi ajcxy ytumyib. ²¹ Je jây ajcxy huudibi cuydumb Dios ytiy'ajt, je' ajcxy ñiminipy Dios y'ung ytiy'ajt, jadu'n nej jihuuyi jin nimiingixy ma ytiicxy, huen jatyimy niguëxigy co oy ytungixy etz co Dios ytiy'ajt ajcxy mïidity ma yjot yhuinma'ñ.

Juan (el Bautista) tiy'ajt yejc ma jây ajcxy mïid Jesús ycixpi

²² Co jadu'n ytuni yjajti, chi Jesús ñicxy jim Judea naaxjot mïid ydiscípulos ajcxy. Chi ajcxy jim yhuäcxijpy. Jim ajcxy jây yajnibejty. ²³ Nañ jadu'n Juan anajty yjâyajñibety jim Enón, com jim anajty ooy comñi, e jim anajty jây ymingixy etz ñibejtcixy. ²⁴ Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵ Ca' ajcxy ñay'ayuc-huinjihuuyi nijëjty huudibi anajty Juan yaj'ixpijcp etz tüg jây nej jëbi huaad ypocy ñayajñihuädzyyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jäy huídibi anajty miich jim mïd jim'amy Jordán mijñnaxy, je huídibi miich anajty mnidiy'ajt'ajtpy co je' je' je Cristo, nañ ooy chachjäyjnibety. E janch mayjäy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt mïdity, pen ca' Dios ni ti mic'ajt ymöyii. ²⁸ Miich ajcxy mnejhuñyb co nmīnaañich co ñch ca' njëjty je Cristo. Hue' janchtiy Dios xyquejxich jayijp co nnidiy'ajt'adipyich je Cristo. ²⁹ Co jäy ypicoy je yëdyjc je' je' mïd'idam je ytöxyjc. E je töxycapxpi huídibi ti yaj'oyiy je pijcin, ca' je' mïd'idañ je töxyjäy, jëyi co yjotcugiy co yöcmidoohui je töxyjäy ñäy co yjädy ma je' ytijc co ypigaani. Cristo jadu'n je' nipaady nej tüg töxyjäy ñäy, e je töxyjäy jadu'n je' nipaady nej Dios yjäy. Je Cristo ymïd'idaanipy Dios yjäy. Jadu'n ñch nipaady nej tüg töxycapxpi, ti Dios yjäy nyajni'ixiych jigix mijpidáaccixipy je Cristo. Jotcujcich cham co je Cristo ti ymiñ, e ñicxy yi jäy ajcxy ma yi'. ³⁰ Ooy ytimycopicyity co Jesús ymij'ajt paatnipy, e ñch ndung ycixnipy ymayñipy.

Dios y'ung tzoon jiiby ma Dios

³¹ Chi Juan yjacmīnañ:

—Je Cristo huídibi jiiby tzoon ma Dios jacmij ixpijcin mïdity ca'ydi naaxhuiñyjäy ajcxy. Je jäy ajcxy huídibi ya naaxhuiñ ijtp, ymīnaaxhuiñyjäy ti yaj'ixpijciixy, e je' ajcxy ñidiy'ajt'ajtpy je naaxhuiñyjäy y'ixpijcin. Je Cristo tzoon jiiby tzajpjoty, jacmijcayee yi' ma y'ayuc ytiy'ajt ca'dyi pin. ³² Je Cristo ñigapxyp huídibi ti ixyc e ti mīdooy, e yi'y'ayuc ytiy'ajt ca' jäy ajcxy cōbigangixy. ³³ Je jäy ajcxy huídibi cōbijcp Dios y'ung y'ayuc ytiy'ajt, je' ajcxy ñigapxpejtpy co Dios ytiy'ajt janch yi'. ³⁴ Je Jesús huídibi Dios yquejx, ca'pxy Dios ytiy'ajt ñigapxpejti, com Dios ti möy yi' y'ung yi' yjihuiñ ymic'ajt mijcayee. ³⁵ Dios Teedy chojcyp yjihuiñyb y'ung, e tüg'óciy ymic'ajt ytiy'ajt yi'ti yajmigo'ixiidyäy. ³⁶ Je jäy ajcxy pinjaty mibijcp Dios y'ung, ymïd'ajtpy ajcxy y'alma je jugy'ajtin huídibi ca' ycixy ytiigooy. Je jäy ajcxy pinjaty ca' capxymidooy Dios y'ung, ca' ajcxy y'alma mïd'adipy je jugy'ajtin huídibi ca' ycixy ytiigooy. Je yi' ypaadipy ajcxy Dios chip y'ejcin.

4

Jesús ñaybaati mïd tüg töxyjäy jim Samaria

¹ Chi je Huindzin Jesús ayuc mīdooy jadu'n nej anajty je fariseojäy ajcxy ycapxcixy ymiydaaccixy co je Jesús jacmayjäy anajty yaj'ixpicoy etz yajñibety ca'ydi Juan. ² Oy Jesús ca' anajty jäy yajñibety ci'm. Hue' janchtiy je' ydiscípulos anajty ajcxy jäy yajñibejtp. ³ E co Jesús jada nejhuñy, chi jim Judea choni, yhuimbijtni jim Galilea.

⁴ Co yhuimbijty, hue' anajty yjatytimyñaxihuañ jim Samaria. ⁵ Chi jada' yja'ty huington ma je mij cajp huídi xijip Samaria, jim ma anajty tüg pi'ccajp huídi xijip Sicar, mihuington je naax huídibi Jacob anajty ti möy y'ung José. ⁶ Jim anajty Jesús yajpaady ma je Jacob ñigondac. Com ti anajty Jesús y'anucxiyñi mïd je tüyöyii, chi y'ijxtacy jim ma je ñigondac anajty. Hue' anajty xii jim cugihuaanip. ⁷ Chi jim yja'ty ñigombi tüg töxyjäy. Chi Jesús ymīnañ:

—Ñch yajñi'uucc. ⁸ Com je' ydiscípulos ajcxy huídibi anajty Jesús yjaymïd'ajtp, ti anajty ñicxcixy cajpjoty juuyb pijcp.

⁹ Chi je töxyjäy y'adzooy huídibi anajty cogajpip Samaria:

—¿Na'amy co ñch ñi xpijctzoohuich? com miich hue' miich judíojäy, e samariajäy ñch.

(Co yi judíojäy etz samariajäy ca' ajcxy ñaygodigiyiigixy.)

¹⁰ Huin'it Jesús y'adzooy:

—Co ixyipy m'ocnejhuïy je oybi huïdibi Dios yejcyp mïd miich ycïxpi, e m'ocnejhuïy ixyipy nañ jadu'n pin xypïjctzoohuïpy yi nïi, janch co miich ixyipy xyñimäyich: “Ëich yajniï'uucc”. E ïch miich ixyipy nmooyb nïi huïdibi jugy'ajt yegïpy huinixïi.

¹¹ Chi je töxyjäy y'adzooy nimay Jesús:

—Huindzin, miich ca' mmïdity ti mïd myajpïdzimïpy yi nïi, e yi nïijut cïcy yi' ooy. ¿Ma tijy m'ocpada'ñ yi nïi huïdibi yajjugy'ajtp? ¹² ¿Nej jacnigi tijy miich mij mnayyajnaxyii, ca'ydi ïch ajt n'ap ndeedy Jacob? Je'je' huïdibi jada nïigop yaj'oyïy. Jacob etz y'ung y'anäg nïi'uuc ma jada nïigop, e nañ jadu'n yajniï'uucy yhuaj y'iyujc ajcxy ya.

¹³ Chi Jesús y'adzooy nimay je töxyjäy:

—Tüg'óciy pinjaty nïi'uucp ma jada nïigop tidzi huïb ajcxy jadüg'oc. ¹⁴ Yi jäy ajcxy pinjaty nïi'uucp huïdibi nmooybich, ca' ni mina ytidzihuïyb, com hue' yi nïi huïdibi nyejcypich, ahuimbidïpy ma je jäy jadu'n nej tüg nïigop huïdibi yegam jugy'ajtin huïdibi ni ca' ycïxy ytïgoy.

¹⁵ Chi je töxyjäy y'adzooy:

—Huindzin, ïch mooyg yi nïi, ca'ydi jabom jabom ndïdzïyïijich, e ca'ydi n'ocjacmïinibich ma jada nïigop nïi yajpïdzimbi.

¹⁶ Chi Jesús y'adzooy:

—Nïcx yajtzon mñäy, e mïd miin.

¹⁷ Chi je töxyjäy y'adzooy:

—Ca' nmïdïdyich nñäyich.

Chi Jesús y'adzooy:

—Janch tiy'ajt jadu'n nej miich mina'ñ, co ca' mmïdity mñäy. ¹⁸ Com ti mïddzinäy migoox yëdyjc, e huïdibi cham mmïd, ca' mñäy'adyii. Janch tiy'ajt jadu'n nej ti m'adzooy.

¹⁹ Chi je töxyjäy ymïnañ:

—Huindzin, cham nhuinjïhuïyich co miich je' tüg huïdibi Dios yhuij'ajt yucujc'ajt mïd. ²⁰ Ëich ajcxy n'ap ndeedyich hue' je' ymïnañ co jëbi ya huaad ïch ajcxy nDios'ojadajtcïxyich ma jada yaabi huingombi copjïp. E miich ajcxy judïojäy ymïnaangïxy co jim Jerusalén je' ma huaad jëbi nDios'ojadajtim, ca' jac ma.

²¹ Chi Jesús y'adzooy nimay je töxyjäy:

—Töxyjäy mijpïdäg ïch n'ayuc. Co ypadamy je xïi je tiempo co ni ya ma miich ajcxy mDios'ojadajttac, e ni jim Jerusalén jäy ca' ojadadïpy ajcxy yi Dios Teedy. ²² Miich ajcxy ca' tiy'ajt mnejhuïygyxy nej jëbi huaad mDios'ojadajtcïxy. Ëich ajcxy judïojäy nejhuïybich ajcxy je tiy'ajt nej jëbi huaad nDios'ojadajtim. Com tüg judïojäy je huïdibi yajnidzooctähuam je jäy ajcxy y'alma ma Dios. ²³ Ypadamy je xïi je tiempo, e jada jëdu'n je tiempo co je huïdibi ajcxy tiydudägy Dios ojadajtp, y'ojadadïpy ajcxy Dios mïd oyjot oyhuinma'ñ etz mïd Dios ytiy'ajt. Com yi Dios Teedy y'ixtaayb yi jadu'mbi jäy huïdibi ojadadïb mïd oyjot oyhuinma'ñ. ²⁴ Dios ca' ñinïcx mïdity, jadu'n je' nej poj ca' yaj'ixy. Je jäy ajcxy pinjaty ojadajtp Dios, copïcy co huen ojadajtcïxy mïd tudägyjot tudägyhuinma'ñ, etz mïd Dios ytiy'ajt.

²⁵ Chi je töxyjäy ymïnañ:

—Ëich nejhuïyb co je Mesías ymïna'ñ huïdibi naydijaanïp Cristo, co je' ymïnïpy, huin'it xyajni'ixïhuaanim tüg'óciy tiy'ajt.

²⁶ Chi Jesús y'adzooy:

—Ëich jëdu'n je Cristo huïdibi miich mïdmïydacyp.

²⁷ Chi jada' yja'ty ajcxy Jesús ydiscípulos ajcxy. Chi ajcxy ooy jihuiy ti anajty co Jesús je töxyjäy müdmüydägy, e ni pin ca' yaj'amidooy ti anajty chojcyp ti anajty yñimüydacyp müd yi töxyjäy. ²⁸ Chi je töxyjäy jim ymajt ixmajch, chi ñicxy cajpjoty oy mayjäy nimay:

²⁹ —Mingix, jam tüg yëdyjc iJimmy. Ti ich yi' xyajnimaydäyich tüg'óciy tijaty ti nduñich. ¿Nej ca' jada' yi' jëjity je Cristo?

³⁰ Chi choñ ooy mayjäy cajpjoty, ninicxy ajcxy Jesús. ³¹ Yam anajty ajcxy Jesús ydiscípulos chachnimäyüi adzip:

—Huindzin, occaay.

³² Chi Jesús y'adzooy:

—Ich nmüdich tüg caayin uucin huídibi miich ajcxy ca' mnejhuüygixy.

³³ Paady je' ydiscípulos ajcxy tzachhuinmay, ac jëyi ajcxy, nayñimayigixy miñ xipy:

—¿Nej ti pinjaty yajcayyüi yaj'ügyüi?

³⁴ Chi Jesús yminañ:

—Jotcujc nayjihuiyüich co ti nguydunich Dios chojcin. Com yi' ti xyquexyich ya naaxhuiñ, e nguydüunibich yi' y'ané'min. ³⁵ Miich ajcxy minaangixp co jactigoy'ijtni jamidaax po' mina cosecha nyajpidicim. Oc-huinmay miich ajcxy, ich nmünañich, jëbi nyajpidicim yi cosecha cham cham. Huindüxcix yi mayjäy huídibi xyñigidaacim choñ cajpjoty. Ni'ixi yi' ajcxy y'ity co amido'idaangixy Dios y'ayuc. Jadu'n ajcxy nipaty nej tügi cosecha huídibi ti ymijaani, jëbi nyajpidicim. ³⁶ E pinjaty cosecha yajpidicp ypaatyp ajcxy ymuju'ñ. Nañ tim jadu'n miich ajcxy huídibi myajmibijcy yi jäy ajcxy co ich je' je Cristo, mbaadipy ajcxy jotcujc'ajtin, etz huídibi ajcxy xymibijcpich xymijpidacpich ypadamy ajcxy y'alma jugy'ajtin huídibi ca' ycixy ytiigooy. Tim jadu'n nej je jäy ajcxy huídibi niip etz huídibi cosecha yajpidicp yjotcugüygixy müd co je cosecha ti y'ity, nañ tim jadu'n je jäy ajcxy huídibi cojaay jecy'ajty jada Dios y'ayuc etz miich ajcxy jotcugüygixy aguipxy co yi jäy ajcxy xymijpidägyich. ³⁷ Paady tiy'ajt je ayuc huídibi minam: “Tüg jäy niip etz jadüg jäy cosecha yajpidicp.” ³⁸ Ich ti nguexyich miich ajcxy myajmibigipy jäy huídibi ti paady Cristo ytiy'ajt ma Dios ñecy. Yi Dios y'ayuc ycojaaybi ti möy je jäy Dios ytiy'ajt, e miich ajcxy je' mbubedipy co myajmibigipy co ich je' je Cristo.

³⁹ Mayjäy huídibi cogajpip jim Samaria ymijpidac ajcxy je Jesús co je' je' je Cristo, müd co je töxyjäy anajty ti yminañ: “Ti yi' xyajnimaydäyich tijaty ich ti nduñich.” ⁴⁰ Co je samariajäy ajcxy yjädy ma Jesús yhuinduu, chi ajcxy cohuanüy huen hui'my. Chi Jesús jim yhui'müy mejtz xii. ⁴¹ Janch mayjäy ooy nigi mibijcy mijpidacy Jesús, co je' je' je Cristo co ajcxy ci'm müdomüydacy je Jesús. ⁴² Chi ajcxy nimay je töxyjäy:

—Canaan jëyi co miich ti xyajnimäy ich ajcxy, paady ycixpi ich ajcxy yam nmübicych. Nañ ti ich ajcxy yam ci'm n'amido'ityich, paady ich ajcxy nejhuüy co janch jada yjëjity je Cristo huídibi yajnüdözogam yi naaxhuiñyjäy ajcxy y'alma ma Dios.

Jesús yajtzooc tüg gobierno müjtungmüdpü ymang

⁴³ Mimejtz xüibi anajty co Jesús choñ jim, nicxy jim Galilea. ⁴⁴ Jesús ci'm anajty ti yminañ:

—Co jäy ajcxy huídibi müd Dios yhuij'ajt ycujc'ajt yajpaady ma yci'mgajp, ca' pin yajmij'adyüi. ⁴⁵ Co Jesús yja'ty jim Galilea naaxjot, huídibi anajty ajcxy jimip agujc jotcujc ajcxy cöbijcy Jesús, com ti anajty ajcxy ixcixy tijaty

mijhuinma'ñ anajty ti tuñ jim Jerusalén xijoty, com nañ ti je' anajty ajcxy jim y'oygixy xijajtpi.

⁴⁶ Chi yhuimbijty Jesús jadüg'oc jim Caná ma Galilea ñaaxjot, ma je ñi yajvinocojy. Jim Capernaum anajty tüg rey mijtungmüdpí huidibi anajty y'ung pijcip. ⁴⁷ Co je' nejhuüy co Jesús anajty ti yhuimbity Galilea co anajty ti y'oy Judea, chi ninicxy, e chi cohuanüy co Jesús huen nicxy y'ung tzoüyüi hidibi anajty ögaanip. ⁴⁸ Huin'it Jesús yminañ:

—Pen ca' ixypy ti m'ixy mijhuinma'ñ etz tijaty ijsxpejt, ca' ixypy mmibicy.

⁴⁹ Chi y'adzoy je rey ymijtungmüdpí:

—Huindzin, tun may'ajt ninicx #ch n'ung ma ca'ni y'o'cyñi.

⁵⁰ Chi Jesús yminañ:

—Huimbit ma mdijc, je m'ung jugy'ajtni je'.

Chi je yëydijc mibijcy Jesús nej anajty ti ñimäyüi, chi ñicxy jadüg'oc ma ytijc.

⁵¹ Nicxnip anajty co ytumbi ajcxy oy yjipcobadiyüi, e chi ñimaayüi co je' y'ung ti anajty y'agidägy.

⁵² Chi yaj'amidooy ajcxy ti hora anajty ti yhuaadjihuüy, chi ajcxy y'adzooy:

—Ixüy cujc yxü naxy je toyü y'ixmajtznü.

⁵³ Paady je ungededy jihui'nybijcy co huin'it je' jada' je tiempo co anajty Jesús ti ñimäyüi: “Je m'ung jugy'ajtni je'.” Chi jada' mibijcy mijpidacy Jesús müd tüg'öciy jäy huidijaty anajty yajpat ma yjin ytijc.

⁵⁴ Je' je' je mimetzpi mijhuinma'ñ mij'oy'ajt hidibi Jesús ytun co choon jim Judea ñicxy jim Galilea ñaaxjot.

5

Jesús yajtzooc tüg jäy hidibi anajty yci' ytecy xuuxy

¹ Co jadu'n ytuni yjati jim Jerusalén anajty ajcxy judíojäy tungixy tüg mijxü. Huin'it Jesús jim ñicxy jim Jerusalén. ² E jim Jerusalén jim anajty ñi abojtzig y'ity, mihuingon je poch aguu huidi xijip puerta de las ovejas. Je it hue' anajty yajtijy hebreo'amy Betesda, e ymüid anajty migoox it yhuinguembetpa't. ³ Ma je huinguembetpa't mayba'mjäy anajty jim chachcöгнаaygixy; je huinzpi, ciducp tecytucpi, cixuxy tecyxuxypi, hidibi anajty ajcxy jim tzach'ahuijxp mina je ñi y'ocpu'xhuimbity. ⁴ Com tüg ángel anajty yhuimbety y'adijy ma je ñi abojtzig y'ity, chi je ñi yajyücxy. E je jäy pinjaty anajty jayijp jii by ñijoty tigüyb co je ñi yücxy, huin'it anajty ajcxy choocixy, oy ixypy ti pa'm ajcxy tim müidity. ⁵ Jim anajty tüg yëydijc hue' anajty ti ypa'mgögnäy iipx majmocx tugüig jimijt. ⁶ Co Jesús ijxy jim ycögnäy, ijsxajpy co anajty je' jecyip chachmijtacni, chi ñimay:

—¿Nej mdzögambi?

⁷ Chi je pa'mjäy y'adzooy:

—Huindzin, ca' nmüidityich tüg yëydijc pin #ch xypidägipy jii by ñijoty co anajty ñi y'ahuidijtcoty. E paady ycixpi co oy #ch jim njamechich ma yi ñi, ti huingbi ñitigüyñi.

⁸ Chi Jesús yminañ:

—Pidig, yajpidig yi mmaabejt, etz tüyöychon.

⁹ Chi mic'amy choocy, chi je' ymaabejt yajpidigy ytigüy yöybi najxpi janch mic oy. Hue' anajty tüg sábado xü co choocy. ¹⁰ Paady je judíojäy ixpicytjic ajcxy ñimay je hidibi anajty ti chögy:

—Hue' yam sábado xü, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹ Chi y'adzooy je':

—Je jäy tiibi ñich xyajtzögy, yi' ñich jadu'n ti xyñimäy: “Yajpidig yi mmaabejt etz tüyöychoon.”

¹² Chi ajcxy y'amidooy:

—¿Pin miich jadu'n ti xyñimäy: “Yajpidi yi mmaabejt etz tüyöychoon?”

¹³ Per je tiibi anajty chögy, ca' anajty je' nejhuiy pin je' anajty. Com ti anajty Jesús niyöydiigooyñi ma je mayjäy huidibi anajty ajcxy jim tzachjajtip ma je it.

¹⁴ Chi jada' jacomjegy minaybaatti Jesús jim ma Dios ytijc, e chi Jesús yminañ: —Cuentipic nej ti mdzögy, ca' ni ti bocy mjactunipy. Co pocy mjactunipy ca' yjegyity co tim nigí jibic nicxy mjaty.

¹⁵ Chi je yëydijc ñicxy oy je' yajnimäy je judío ixpicytijc co hue' je' anajty Jesús, je huidibi anajty ti yajtzögyii. ¹⁶ Paady ycixpi je judío ixpicytijc anajty tzach'ixhuidijtcixy tzachpahuidijtcixy je Jesús, e yaj'ögaangixy müd co anajty jäy ti yajtzögy sábado xii. ¹⁷ Chi Jesús yminañ:

—Ñich nDeedy tumb je' cham, ca' ypoocxy, paady ycixp ñich nañ jadu'n nduñich cham ma miich ajcxy sábado xii.

¹⁸ Co Jesús jadu'n yminañ, paady ycixpi je judío y'ixpicytijc ajcxy nigí yjacjtotma'tcoty, ytimy yaj'ögamy anajty aj y Jesús. Ca' ajcxy jadu'n yjotcujcity co anajty Jesús ca' cuyduñ judíojäy ajcxy ytij'ajt nej ajcxy sábado xii yajmij'ajtcixy, etz co jadu'n yminañ: “Dios yi' nDeedy'ajtypich.” Paady ycixpi ajcxy judío y'ixpicytijc yminañ co Jesús ci'm anajty ytüghua'ñ müd Dios.

Dios ymooy je y'ung ymic'ajt

¹⁹ Chi Jesús yminañ:

—Janch janch ñich miich ajcxy yam jadu'n nimaaygixy co ñich Dios nDeedy'ajtypich. Ca' huaad ti nduñich müd ngi'mjot ngi'mhuinma'ñich. Jëbi janchtiy nduñich huidibi n'ixpxyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich. ²⁰ Com yi' Dios Teedy ooy yi' tzocy jihuñ yci'm'ung, paady xyajni'ixiydaaybich tüg'óciy yi' huidibi ytumyb. E nañ xyajni'ixihuaambich jacmijjatypí mijhuinma'ñ, ca'ydi jadayaabi mijhuinma'ñ nej ajcxy ti m'ijxycixy nej jada pa'mjäy ti chögy, paady ycixpi nigí mhuinmayipy ajcxy. ²¹ Jadu'n nej Dios Teedy yajjugypicy yi' o'cpi, e chi yajtzinäy jadüg'oc. Nañ jadu'n ñich anajty ndimymöhuamayb. ²² Com je Dios Teedy ca' je' ci'm ocyajcüyöyaani ocyajtecyöyaani jäy ajcxy ypocy. Hue' tüg'óciy je ymic'ajt xyajcidiydaayich co ñich ndiydunipyich tüg'óciy naaxhuiñjäy, com Dios nDeedy'ajtypich. ²³ Hue' tüg'óciy je ymic'ajt xyajcidiydaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

²⁴ Janch janch ñich miich ajcxy yam jadu'n nimaaygixy: Co hueñypinjäyity, pinjaty xy'amido'íjtibich n'ayuc, e ymibijcyp ymijpidacyp je tiibi xyquejxyich ya naaxhuiñ, müd je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytuna'ñyii müd ypocy ycixpi. Hue' janchtiy co y'ögipy, chi janchtiy jadügtecy yjugypigipy. ²⁵ Janch janch ñich miich ajcxy jadu'n nimaaygixy co yi' xii tiempo paatnipy, e cham jëdu'n ti paady, co yi' jäy ajcxy tiibi y'o'ccixy ymidohuipy yi' n'ayucich, co anajty ngapxyich, com Dios yi' nDeedy'ajtpyich. Pin jäy anajty midoob n'ayucich jugypigip jadüg'oc ajcxy. ²⁶ Com yi' Dios Teedy mic'ajt müd jëbi yajjugypicy jäy tiibi y'o'ccixy. Nañ Dios ti xymöyich ymic'ajt jëbi huaad nyajjugypicyich jäy tiibi y'o'ccixy, com Dios ñich nDeedy'ajtypich. ²⁷ Ti Dios xymöyich ymic'ajt jëbi ndiyduñich je jäy ajcxy müd ypocy ycixpi, com ñich je' je jäy huidibi tzoon tzajpjoty. ²⁸ Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty

ajcxy yajpatp ma naaxtigiydac, ymidohuipy ajcxy n'ayucich co ñich anajty nmigapxyich ajcxy. ²⁹ Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi müid ypocy ycixpi.

Dios tiy'ajt yejc co Jesús ymüid anajty mic'ajt

³⁰ Ca' ni ti huaad nduñich müid ngi'mmic'ajtich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt müid nyajciyöya'ñich nyajtecyyöya'ñich jäy ajcxy ypocy. Jadu'n tiydudägy nduna'ñich, com ca' ñich nduñich ngi'mdzójcinich. Yi' ñich ndumyb nej Dios Teedy tzocy, yi' huidibi xyquejxich ya naaxhuiñ. ³¹ Co ixyipy ñich ci'm nayñigodiy'ajt'adyiijich, ca' ixyipy miich ajcxy mmijpidägy n'ayuc ndiy'ajtich. ³² Com huingbi yi' huidi xyñigodiy'ajt'ajtpich co ñich Dios ymic'ajt nmüidityich, e nejhuuybich co janch yi' huidibi xyñigodiy'ajt'ajtpich. ³³ Miich ajcxy ti mguexy je migügtijc ajcxy tiy'ajtpicpi ma Juan. E je' yejc tiydudägy ayuc tiy'ajt janchypi pin ñich. ³⁴ Co jadu'n nmüina'ñich co Juan xyajnidiy'ajt'atyich co ñich je' je Cristo, ca' jadu'n nmüina'ñich co ooy ycopicyity co tüg jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nidzoocin paadipy ma Dios. ³⁵ Je Juan mictägy ooy Dios y'ayuc najtzcapxiyi, jadu'n je' anajty nej tüg jün huidibi tucxp jajp, e miich ajcxy tüg jaxigy ti mxondaaccixy müid yi' y'ayuc ytiy'ajt. ³⁶ Nigi ñich Dios y'ayuc ytiy'ajt nmüidityich ca' ydi Juan. Yi' mijhuinma'ñ huidibi ndumybich müid Dios Teedy ymic'ajt. yi' xyajniqüexigibich co ñich ya naaxhuiñ Dios Teedy xyquejxich. ³⁷ Yi' Dios Teedy tibi xyquexyich, yi' ci'm yejc tiy'ajt co ñich je' je Cristo. E ni caminaabi miich ajcxy yi' mgamidoohu ycapxin, nañ ni caminaabi miich ajcxy Dios Teedy yhuiñyijp maga'ixi. ³⁸ Ni ca' miich ajcxy mmüidity yi' y'ayuc ma mjot mhuinma'ñ, müid co miich ajcxy ca' xymijpidägyich co ñich je' je jäy huidibi Dios ti quexy ya naaxhuiñ. ³⁹ Ijxtaaygixy jada tiy'ajt ma Dios ylibro, com jiiy mdijy miich ajcxy mbaadipy tiy'ajt nej jëbi ajcxy mjogy'adipy co anajty ti m'o'ccixy, e yi' Dios ylibro nañ ñich yi' xyñigapxp. ⁴⁰ E ca' miich ajcxy mgöbigaangixy ñich n'ayuc ñich ndiy'ajt, jigix ajcxy jugy'ajti mbaadipy huidibi ca' ycixy ytigooy.

⁴¹ Dios xycömayipyich, ca' ngöbigipyich co naaxhuiñjäy ajcxy xycömayipyich. ⁴² Nnejhuuybich, nej miich ajcxy mjot mhuinma'ñ mmüidity, co ca' ajcxy Dios ytiy'ajt mguyduuni. Ca' ajcxy migüg mdzojccixy mjhuuygixy jadu'n nej Dios tzocy jihuüy jäy ajcxy. ⁴³ ñich ti nmüiñich müid nDeedyich ymic'ajt. Miich ajcxy ni ca' xycöbicyich. Pen ji huingbi jäy ymüiñ müid yci'mmic'ajt, ca' müidity Dios ymic'ajt, je' janchtiy miich ajcxy ooy mijpidägaangixy. ⁴⁴ Ca' mjájtciixy nej ñich miich ajcxy xymijpidägibich, müid co ajcxy ci'm mdzachnaygömayáangixy ac miich ajcxy jëyi. E co ixyipy miich ajcxy xycöbiga'ñich, huin'it ajcxy Dios xycömayipy. ⁴⁵ Ca' ajcxy nmüina'nipy co ñich miich ajcxy nxihuaamy ma Dios Teedy yhuinduu. Je Moisés miich ajcxy yxihuaam ma Dios, je huidi miich ajcxy mdzachmijpidaacip ytiy'ajt. ⁴⁶ Pen mmijpidaacyp ixyipy ajcxy je Moisés y'ayuc ytiy'ajt, nañ jadu'n ixyipy ñich miich ajcxy xymijpidägyich. Com Moisés ñich yi' xychachñimiydaacich ma yi' ñecy. ⁴⁷ Pen ca' mmijpidaaccixy Moisés ñecy, ca' mjájtciixy nej ajcxy mijpidaaccixy ñich n'ayuc.

6

Jesús ymoy jäy jicxy picy migoox mil

¹ Co jadu'n ytuni yjajti, chi Jesús ñicxy jim Galilea mejy nınaxy, huıdibi nañ jadu'n xııjp Tiberias mejy. ² Janch mayjäy anajty Jesús ypanıcxıyii axam co anajty ajcxy ıxy je mıjhuınma'ñ tijaty anajty Jesús ytumyb ma mayba'mjäy. ³ Chi Jesús ypejty ma tög cögop, chi jim y'ıxtacy mıd je' ydiscıpus ajcxy. ⁴ Tim huıgonıp anajty je pascuaxıı huıdibi anajty judıojäy ajcxy ytumyb. ⁵ Chi Jesús ıjxy co janch mayjäy ti ypamiınyii, chi nımay Felipe:

—¿Ma jada' caayın uucın n'ocjuyım, ti nyajcaayım jada mayjäy huıdibi ti xypamiınım?

⁶ Hue' anajty y'oc'ıxmadzamy nej Felipe y'oc'adzooy. Jesús anajty ñejhuııyb yajxon ti anajty ytunamy. ⁷ Chi Felipe y'adzooy:

—Ni ycahuaadıhuıp mejtz mil peso meeñ, co ıxyipy ajt n'ocjuyaanıı caayın uucın, e nmöhuaanıı cıjp tög'aa cıjp mejtz'aa jëyi.

⁸ Tög Jesús ydiscıpuso, hue' anajty yxıı Andrés, Simón Pedro y'uch, je' jadu'n nımay Jesús:

⁹—Cha tög pi'c'anäg huıdibi mıd mıgoox cebada tzajcaagy, e mejtz acx ung. E ni ycatııjıty yi' yi mıgooxpi tzajcaagy, etz mejtz acx ung mıd jada mayjäy.

¹⁰ Chi Jesús nımay je' ydiscıpus ajcxy:

—Yaj'ıxtacta' yi mayjäy.

Mııyjot anajty ooy ma je it.

Chi ajcxy y'ıxtactay. Hue' jada' anajty ajcxy ñaybadyii mıgoox mil ac yëydıjctıj, abıcy yi töxyjäydıj etz y'ung y'anäg ajcxy. ¹¹ Chi Jesús je tzajcaagy conıgy, chi yajnajxy Dioscojuyıp, chi yajnıgidagııyday je jäy ajcxy huıdıjaty anajty jim ıñaayb, mooy jadu'n nej pın tim tzocy je tzajcaagy etz je acx. ¹² Co je mayjäy cayday, chi Jesús nımay je' ydiscıpus ajcxy:

—Yajmujcta' ajcxy yi cayduc, ca'ydi huaad ni ti y'ıyoy.

¹³ Chi ajcxy yajmujctay je cayduc, e yaj'ujch ajcxy majmetz mıjıjaty cach mıd je tııbi anajty yconaxy je mıgooxpi tzajcaagy. Je' anajty jadu'n ti yjacconaxy. ¹⁴ Co ajcxy y'ıjxy je mıjhuınma'ñ huıdibi anajty Jesús ti tuñ, chi je jäy ajcxy ymınañ:

—Janch jëdıı jada je yëydıj huıdibi Dios y'oy'ajt ymıc'ajt mıd, je huıdibi anajty mıınam ya naaxhuıñ.

¹⁵ Co Jesús nejhuıy co ajcxy anajty yajrey'ada'ñyii, chi jada' jadög'oc huınhuıctuttay je mayjäy. Chi ñicxy naydüg ma tög yuugjot.

Jesús yöy nııhuıngıxy

¹⁶ Co oy chu'ııyñı, chi Jesús ydiscıpus ajcxy y'ıdaacni ma mejypa'. ¹⁷ Chi ajcxy ybarcotıgııy, ñicxy ajcxy jim Capernaum jadögpi mejypa'. E ti anajty ycoodııyñı, e ca'ni anajty Jesús ajcxy ñıhuımbıdyııni. ¹⁸ Chi tög mıjpoj ymıñ, chi je mejy ytıgııy oy yücxi. ¹⁹ Ti anajty ajcxy ytüyöy oy mıgoox tudıj kilómetro co ajcxy ıjxy Jesús yhuıngoñ ma je barco, hue' anajty ytüyöy mejyhuıngıxy. Chi ajcxy ooy ñay'adzıgııy. ²⁰ Chi Jesús ymınañ:

—ııch yi', ca' mdzıgııygıxy.

²¹ Chi ajcxy jotcujc Jesús yajbarcotıgııy. Chi tim mıc'amy ajcxy ymejch jim ma mejypa' ma anajty ajcxy ñıcxıxy.

Mayjäy ıxtaay Jesús

²² Je mayjäy huıdibi anajty ajcxy ti yhuı'mıy jim'amy y'ahuin, y'ıjx ajcxy co ac jëyi Jesús ydiscıpus ajcxy ytıgııy ma tög barco, e Jesús ca' anajty ti ytıgıy barcojoty mıd je' ajcxy. Ac jëyi anajty ajcxy ti choongıxy barcojoty. ²³ Je com jabom nıjeyty barco huıdibi anajty jim tzomb Tiberias, ti anajty yjädy mıhuıgon ma je it, ma anajty Jesús ti yajcaaygıxy je mayjäy mıd je Huındzın Dios ymıc'ajt, huın'ıt co Dios mıbıjctzoy. ²⁴ Chi je mayjäy ajcxy

ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigiyday, chi ajcxy oy ixtaaygixy Jesús jim Capernaum.

Jesús ymōhuamy jāy ajcxy jugy'ajtin huidibi ca' ycixipy ytigoyipy

²⁵ Co ajcxy minaybaati Jesús mejy ñinaxy, chi ajcxy nimay:

—Huindzin, ¿mina miich ya ti mmiñ?

²⁶ Chi Jesús y'adzooy nimay je mayjāy ajcxy:

—Janch janch co ñich miich ajcxy yam jadu'n nimaaygixy co miich ajcxy xy'ixtaaybich, canan yí' ycixpi co ajcxy ti m'oc'ixy yí' mijhuinma'ñ huidibi ti nduñich, paady ycixpi miich ajcxy xy'ixtäyich co ajcxy nyajcay cüxyi mid tzajcaagy.

²⁷ Chi Jesús yjacminañ:

—Ca' myajjotmaygojcixy yí' jicxy picy huidibi cijxp tigooyb. Yí' janchtiy mijottigooygixy yí' jicxy picy huidibi xymōhuipy yí' jugy'ajtin huidibi ca' ycixipy ytigoyipy tücci'yí. Hich miich ajcxy je jugy'ajtin nmōhuibich huidibi ca' ycixipy ytigoyipy tücci'yí, com ñich je' je jāy huidibi tsoon tzajpjoty, e Dios Teedy xymic'ajtmooyich, jēbi ñich miich ajcxy nmōy jugy'ajtin huidibi ca' ycixipy ytigoyipy tücci'yí.

²⁸ Chi ajcxy nimay Jesús:

—¿Ti ñich ajcxy jēbi huaad nduñ, nej jēbi ñich ajcxy Dios xymijotcujc'aty?

²⁹ Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuiñ.

³⁰ Chi ajcxy nimay Jesús:

—¿Ti ijxpejt mdunamy mid ñich ajcxy, jēbi ñich ajcxy n'ixipy Dios ymic'ajt etz ñich ajcxy nmibigipy co miich je' je Cristo? ¿Ti mijhuinma'ñ mdunamy?

³¹ Hich ajt nmij'ap nmijteedy ajcxy jecy'ajty yjicxy pijc ajcxy je maná jim ma títznaax'it. Jadu'n ymiñ jaybety ma jadu'n ymina'ñ: “Dios yejcpy jicxy picy huidibi tsoon tzajpjoty.”

³² Chi Jesús y'adzooy:

—Janch janch ñich miich ajcxy yam jadu'n nimaaygixy co canan je' je' je Moisés huidibi miich ajcxy xymooyb je jicxy picy janchypi huidibi tzomb tzajpjoty. ³³ Je jicxy picy huidibi Dios yejcpy huidibi tzomb tzajpjoty, je' je' huidibi jugy'ajtin moy je naaxhuiñy-jāy huidibi ca' ycixipy ytigoyipy tücci'yí.

³⁴ Chi ajcxy nimay Jesús:

—Huindzin, ñich ajcxy mooyg je jicxy picy janchypi jabom jabom huinixii.

³⁵ Chi Jesús yminañ:

—Hich jēdu'n je jicxy picy huidibi miich ajcxy xymōhuip jugy'ajtin huidibi ca' ycixipy ytigoyipy tücci'yí. Co jāy ajcxy xyñimiinich, e xymijpidägyich, huin'it ca' yí' ajcxy yuböccoda'ñyii nimiraxii, e co jāy ajcxy xymibicyich, ca' yí' ajcxy ytidzihua'ñyii nimiraxii. ³⁶ Com ti ñich miich ajcxy nimay, oy ñich miich ajcxy ti xyja'ijxycixy, per ca' mibijccixy. ³⁷ Tüg'óciy pinjaty ñich nDeedy yquexyp ma ñich, xyñimimbich yí' ajcxy. E pinjaty xyñimimbich etz xymijpidaacpich, ca' ñich yí' ajcxy n'ixtijy. ³⁸ Canan paady ycixpi ñich ti ndzooñ tzajpjoty ngidägich ya naaxhuiñ co nduna'ñich ngimhuinma'ñ. Hue' janchtiy yí' ndunaamyich nDeedyich y'ayuc ytiy'ajt, com yí' xyquejxich ya naaxhuiñ. ³⁹ Yí' jadu'n tzojcp ñich nDeedy huidibi xyquejxich ya, co ñich ca' ni pin nyajtigoyipyich, yí' huidijaty xymooybich. Hue' janchtiy yí' ajcxy nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁰ Dios Teedy ti xyquexyich ya naaxhuiñ e yí' jadu'n tzojcp co pin jāy ñich anajty xy'ijxpich, e xymijpidaacpich, ymid'adipy je' ajcxy jugy'ajtin

huidibi ca' tücciy ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñbyi ti yhuaad'ajtni mina anajty ytigadza'ñ.

⁴¹ Chi je judíoJay ajcxy ooy yajtzibiy yajcapxiy co anajty Jesús jadu'n ti ymina'ñ: "Fich je' je jicxy picy huidibi tsoon tzajpjoty." ⁴² Jadu'n anajty ajcxy chachmina'ñ:

—¿Nej ca' je' yjadaajty je Jesús, je José y'ung, je huidibi ajt ytaj yteedy n'ixy'ajtm? ¿Nej co jadu'n ymina'ñ: "Fich ti ndzooñich tzajpjoty"?

⁴³ Chi Jesús y'adzooy:

—Ca' myajtzibiygixy myajcapxiygixy ac miichiy ajcxy. ⁴⁴ Ni pin jäy xycaniminipyich, pen ca' jayip Dios Teedy huinma'ñ ymöyii co xymijpidägibich. E co xymijpidägibich, chi nyajjugypigipyich jadüg'oc co anajty naaxhuiñbyi ti yhuaad'ajtni mina ytigadzipy. ⁴⁵ Com jadu'n ymiñ jaybety ma Dios ñecy huidibi je jäy ajcxy anajty Dios ytiy'ajt miid huidibi jecy'ajty yjaay co Dios yaj'ixpigamy je jäy ajcxy tüg'óciy. Paady ycixpi tüg'óciy jäy huidibi midoob Dios y'ayuc etz y'ixpijyyp Dios ytiy'ajt xymijpidägibich ajcxy.

⁴⁶ Ca' ni tüg jäy ti ixxy yi Dios Teedy. Jeyi je jäy tügpajc huidibi ti choñ ma Dios, yi' je' ti ixxy yi Dios. ⁴⁷ Janch janch ich miich ajcxy yam jadu'n nimaaygixy co pinjaty xymibijpich xymijpidaacpich, ymiid yi' ajcxy yjugy'ajtm huidibi ca' ycixipy ytigoyipy tücciyi. ⁴⁸ Fich jedu'n je jicxy picy huidibi jugy'ajt mooyb je jäy huidibi ca' ycixipy ytigoyipy tücciyi. ⁴⁹ Miich ajcxy mmij'ap mmijteedy yjicxy'ajti ycaagy'ajti ajcxy je maná jim titznaaxtuum'it jecy'ajty. E chi ajcxy y'o'ctay. E ni ca' ajcxy jugy'ajtm paty huinixibi. ⁵⁰ Je jicxy picy huidibi nnigapxypich huidibi tsoon tzajpjoty, co jäy ajcxy jicxipy, ymiid'adipy ajcxy je jugy'ajtm huidibi ca' ycixipy ytigoyipy tücciyi. ⁵¹ Fich jedu'n je jicxy picy huidibi ti choñ tzajpjoty, etz ti ycidägy ya naaxhuiñ huidibi jugy'ajtm yejcp. Co jäy ajcxy jicxyp je jicxy picy, ymiid'adipy ajcxy je jugy'ajtm huidibi ca' ycixipy ytigoyipy tücciyi. Je jicxy picy huidibi nyegaamyich miid naaxhuiñjäy ajcxy ycixpi, je' je' je nninixich.

⁵² Chi je judío y'ixpijyyp ajcxy ooy yaj'ayucyooñ yajcapxyooñ, ac je'yi ajcxy ñayñimáaygixy:

—¿Nej jada yeydijc tijy yi' ñinix njicxy'ajtm?

⁵³ Chi Jesús ymina'ñ:

—Janch janch co ich miich ajcxy yam jadu'n nimaaygixy, pen ca' miich ajcxy mdzüdcixy ich nninix, e pen ca' m'uuccixy ich nni'py, ich je jäy tügpajc huidibi tsoon tzajpjoty, ca' miich ajcxy miid'adipy yi Dios yjugy'ajtm. ⁵⁴ Com pinjaty ich nninix xychu'tzip etz ich nni'py xy'uucibich, ca' je ajcxy yjugy'ajtm ycixipy ytigoyipy tücciyi, oy ajcxy yja'o'ccixy. Nyajjugypigipyich je' ajcxy jadüg'oc co anajty naaxhuiñbyi ti yhuaad'ajtni mina ytigadzipy. ⁵⁵ Fich nninix janchypi jicxy picy yi', etz ich nni'py janchypi ügy yi'. ⁵⁶ Co yi' jäy ajcxy xymibicyich xymijpidägyich jadu'n ni paady nej jihuñy ich nninix xychüdzi, etz ich nni'py xy'uuci. Chi y'idipy ajcxy huinixi ma ich, etz ich n'idipyich huinixi ma je' ajcxy. ⁵⁷ Dios Teedy huidibi xyquejxich ya naaxhuiñ ymiid jugy'ajtm huidibi ca' ycixy ytigooy. Fich ti nbaadyich ma Dios Teedy je jugy'ajt huidibi ca' ycixy ytigooy. Nañ mbadamy miich ajcxy jugy'ajtm huidibi ca' ycixy ytigooy ma ich. Co miich ajcxy xymijpidägibyich, jadu'n anajty nipaady nej jihuñy mjicxy'ajtigixy ich nninix. ⁵⁸ Je jicxy huidibi tsoon tzajpjoty, e ycidacy ya naaxhuiñ co jäy ajcxy jicxy'adyii, yajtzinähuiñb je ajcxy, ca' ajcxy yjugy'ajtm ycixipy ytigoyipy tücciyi. Yi' mmij'ap mmijteedy huidibi jicx'ajtigixy je maná jecy'ajty, o'ctay ajcxy, ca' ajcxy paty je jugy'ajtm huinixibi.

⁵⁹ Jadu'n Jesús ymiydacy jim ma je judíoájy ajcxy ñaymujctac jim Capernaum co anajty jim yaj'ixpicy.

Mayjäy ca' mijotcuje'ajty Jesús y'ayuc

⁶⁰ Co ajcxy Jesús y'ayuc midodaayi, nigujc-huäcxy je huídibi anajty ixpijcp ma Jesús. Chi ajcxy capxpídzimy, e jadu'n ajcxy ymíñañ:

—Ooy chachchipy je Jesús y'ayuc. Ca' huaad ji pin huinjihuiday.

⁶¹ Com Jesús ñejhuíyb nej ajcxy anajty yajtzibiy yajcapxiy, chi ymíñañ:

—¿Nej ca' miich ajcxy mijotcuje'aty je tzip ayuc jadu'n nej cham ajcxy ti nyajnimäy? ⁶² ¿Nej xymijpidägbich ajcxy, pen m'ijxpy ixipy ajcxy co anajty nba'ttigiyich jadüg'oc jiiby tzajpjoty ma ndzooñich? Com ich je' je jäy huídibi tsoon tzajpjoty. ⁶³ Je jäy ajcxy yjihu'ñ, yi' je' ñinícx yajjugy'ajtíp, e je jäy ajcxy ninícx ca' yi' ni ma chobaady, pen ca' m'idity yjihu'ñ. Co miich ajcxy mgöbigipy yi ayuc tiibi ngapxyich, huin'it ajcxy mbaadipy Dios yjihu'ñ (je Espíritu Santo), etz mbaadipy ajcxy jugy'ajtín huídibi ca' tücciyi ycixy ytigooy, oy mja'o'ccixy. ⁶⁴ Per nigujc-huäcxy ma miich ajcxy pinjaty ca' mibicy ich n'ayuc.

Com Jesús ñejhuíyb anajty jayijpni pinjaty ca' ymibigyii y'ayuc, etz pinjaty anajty ceyegaanip ma ymidzip. ⁶⁵ Chi Jesús yjacmíñañ:

—Paady ycixpi jayijp ti nmíñañich, co ca' ni pin jébi ich xymijpidägy, pen ca' Dios Teedy jayijp yhuinma'ñ ymöyí co cöbiga'ñ ymöyí co cöbiga'ñ ich n'ayuc.

⁶⁶ Huin'it mayjäy ajcxy, je huídibi anajty ixpijcp ma Jesús, chi ajcxy huinhuäctut ixmajtzní ajcxy Jesús. Ca' ajcxy y'ocjacpanícxni. ⁶⁷ Chi jada' Jesús nimay je nimajmetz discípulos ajcxy:

—¿Nej nañ xy'ixmadzaambich miich ajcxyi?

⁶⁸ Chi y'adzooy Simón Pedro:

—Huindzin, ca' jac ni pin ich ajcxy jébi huaad nmijpidägyich, com miich tügpajc mid je ayuc huídibi xyajni'ixiyich ajcxy nej jébi huaad ich ajcxy nbaadipy jugy'ajtín huídibi ca' ycixipy ytigoyipy tücciyi. ⁶⁹ Ich ajcxy nmibijcypich e nnejhuíybich co miich je' je jäy huídibi tsoon ma Dios huídibi huädz yhuinma'ñ ymid.

⁷⁰ Chi Jesús ymíñañ:

—Miich ajcxy je' ti nhuin'ixyich nimajmetzpi, e nidügti miich ajcxy mujcu' huinma'ñ mm'idity.

⁷¹ Je Judas Iscariote, Simón ymang, anajty ytijpy. Com je' je' anajty ceyegam Jesús ma ymidzip, oy je' anajty yjajéjity nidüg ma je nimajmetzpi.

7

Jesús y'uch ajcxy nañ ca' anajty jaty mijpidaaci Jesús y'ayuc

¹ Co jadu'n ytundaayi yajtaayi, jim anajty Jesús yhuídity Galilea naaxjot, ca' anajty ñícxan'ñ jim Judea naaxjot, co anajty yi judíoájy ajcxy huídibi midzip'ajtíp yaj'öga'ñyí. ² Tim huigon anajty je judíoájy yxií, hue' anajty ajcxy yxigoyäxy Tabernáculo xií. ³ Chi Jesús ñímaayi y'amigüg y'uch yéydijcpi:

—Tzon miich ya, nícx jim Judea naaxjot nayguëxigí mayjäyjoty. ⁴ Com huenpínity huídibi nayguëxígaanip mayjäyjoty, ca' ajcxy naygoyüchyí. Mdunipy miich mijhuinma'ñ xijoty, jigix je mayjäy xycömayipy.

⁵ Ni Jesús y'amigüg ajcxy ca' anajty yjaty ymijpidägyii y'ayuc. ⁶ Paady Jesús y'adzooy:

—Ich nxií ndiempo ca'ni paty mína ndigíhua'ñich jim Jerusalén jadu'n nej je Mesías. Janch miich ajcxy oytimymíñaajty jébi mnyaguëxícgixy ma je mayjäy ajcxy. ⁷ Ca' huaad jébi miich ajcxy, naaxhuínyjäy ajcxy,

xymidziptzoñ. Janch ñich xymidzip'ajtpich ajcxy yi', je' co ngapxpídzimych yi' yjibic-huinma'ñ huídibi ajcxy ytumyb. ⁸ Nicx miich ajcxy jim ma xii yjadyii. Hich ca' nnicxa'ñich cham, com ca'ni ñich ndiempo yhuaad'aty mina ndigihuibyich jim Jerusalén jadu'n nej je Mesías.

⁹ Jadu'ñydi jeda'ajty yminañ, chi yhu'i'miyy jim Galilea.

Jesús ñicxy jim Jerusalén xijoty

¹⁰ Co Jesús y'amigügtijc ajcxy jayijp ñicxtay xii'ajtpi jim Jerusalén, chi Jesús nicxy nañ jadu'n ayüch ameech ma anajty xii yjadyii. ¹¹ Xijoty je judíoJay ooy ajcxy ja'ixtay Jesús, e chi ajcxy yminañ:

—¿Ma jada' je Jesús?

¹² Ma je mayjäy ajcxy may anajty ajcxy tzachnigapxcixy tzachnimiydaaccixy Jesús. Nijëjity anajty yminaangixy: “Tüg yëydijc oyjäybi yi'”; e nañ nijëjity yminaangixy: “Ca'p yi' y'oyjäyity, nigo jäy tzachhuin'ññ.”

¹³ E ni pin anajty ca' capxpídzimych mayjäyjoty co y'oyjäyity anajty Jesús, miid co anajty ajcxy je judío ixpicytjic ajcxy tzachtzigiiygixy.

¹⁴ E mijxijoty Jesús ñicxy jim ma Dios ytijc, chi jim ytigiiy yaj'ixpijci. ¹⁵ Je judío y'ixpicytjic tzachmaañyhuindicxcixy anajty je Jesús, chachminaangixy anajty:

—¿Nej jada' tijy jada chach'ixpicyty? e ca' ni ma ti y'escuel'aty.

¹⁶ Chi Jesús y'adzooy:

—Jada ixpijcin ca' ñich jada një'adyii. Yi' jada yje' je huídibi xyquejxich ya naaxhuiñ. ¹⁷ E pen ji pinjaty cuydunaaní yi' ytiy'ajt je huídibi xyquejxich, huinjihuipi y' jada ixpijcin, pen janch Dios yi' ytiy'ajt, o pen ñich yi' ngi'm ayuc huídibi ngapxypich. ¹⁸ Je jäy huídibi yci'm'ayuc yci'mdiy'ajt miid yaj'ixpicy, ci'm je' ñaygömaya'ñyii. Janch pinjaty tzojcp co ycömayiyyb je' yhuindzin huídibi ti yquexyii, tiydudägy je', ca' je' y'anijity.

¹⁹ Janch co Moisés miich ajcxy xymoy Dios ytiy'ajt. E ni tüg miich ajcxy mgacuydungixy je tiy'ajt. ¿Ti yci'p co miich ajcxy xyaj'öga'nich?

²⁰ Chi je jäy ajcxy y'adzooy:

—Mujcu' miich miid ma mjot mhuinma'ñ. ¿Pin miich yam xyaj'ögam?

²¹ Chi je' ajcxy nimay:

—Miid tügpajc mijhuinma'ñ tiibi nduñich sábado xii, yi' miich ajcxy mij mdzachjihuuyb mdzachhuinmaayb. ²² Moisés miich ajcxy xyajna-jtz'ane'miyy je cötujcin co ajcxy m'ung mdiy'ajttiiygixy (oy je' ca' yajtzondac, miich janchtiy ajcxy mmij'ap mmijteedy Abraham yajtzondac), e paady yci'p co miich ajcxy m'ung mdiy'ajttiiygixy oy yjapocxxiidumity. ²³ E chi jada' ca'ydi miich ajcxy Moisés ytiy'ajt mnixiici myajxiici, paady ajcxy m'ung mdiy'ajttiiygixy oy sábado xijoty. ¿Ti miich ajcxy co xymijotma'tcixich co tüg jäy ti nyajtzögyich sábado xijoty? ²⁴ Ca' m'ix'ijxcixy mba'ijxcixy mmigüg miid anii. Yajciyöyi yajtecyöyi miich ajcxy jäy ypocy miid tiy'ajt.

Ooy ajcxy tzachhuinmay je jäy, peni Jesús je' je' anajty je Cristo

²⁵ Chi ajcxy nijëjity JerusalénJay yminañ:

—¿Nej ca' jada jada' yjëjity je huídibi ajcxy yjayaj'ögami? ²⁶ Oc'ix ajcxy, ta ycapxy ymiydägy ijxna' que'xna', e ca' ajcxy huam nimäy. ¿Nej ti jada ajcxy ijxcajpcixy yajxon tungmiidpi ajcxy co jada yjëjity je Mesías? ²⁷ Hich ajt nnejhuuyim ma jada yëydijc choñ. Per je Cristo co anajty je' ymiñ, ni pin je' canejhuuyim ma je' anajty choñ ma ycocajpity.

²⁸ Co Jesús jadu'n midooy, co anajty yaj'ixpicy ma Dios ytijc, huin'it Jesús mic yminañ:

—Mnejhuñyb miich ajcxy pin ñich, e ma ndzooñich. Per ca'p ñich ti nmiñich ya naaxhuiñ mñid ñich ngi'mdzojcin. Yi huñdibi ñich ti xyquexyich, tiydudägy yi' ytuñ, e ca' miich ajcxy yi' m'ixy'ájtigixy. ²⁹ ñich janchtiy n'ixy'ajtypich je'. Je' co jim ndzooñich ma je', e je' ñich xyquejxich.

³⁰ Huin'it ajcxy jamadzaañ, per ca' ni pin cñixajiy, com ca'ni anajty paady je xñ je tiempo mina ñaygyegñyb ma ymidzip ajcxy. ³¹ Per mayjáy ooy mibijcy je Jesús y'ayuc, e ymínañ ajcxy:

—Co anajty je Cristo ymiñ, ca' jada' ñigi mijhuinma'ñ tuna'ñ ca'ydi jadayabi yéydijc.

Je teedy mijtungmñdpi yquejx ajcxy soldadotijc huen majtzcixy Jesús

³² Co je fariseojáy ajcxy ayuc midooy co jáy chachmínaangixy jadu'n co je Jesús je' je' je Cristo, chi ajcxy quejxy tungmñdpi huen Jesús yajmach. ³³ Paady Jesús ymínañ:

—Ñich jac-huäcxijpich hueeni ma miich ajcxy, chi nñicxa'ñich jadüg'oc jii by tzajpjoty ma huñdibi xyquejxich. ³⁴ Xy'ixtähuibich miich ajcxy, e ca' ñich miich ajcxy xypaadipy. Ma anajty ñich nñicxyich, miich ajcxy ca' jaydëbi jii by mñicxcixy.

³⁵ Huin'it je judíoJay ixpiçytijc acjeyi ajcxy ñay'amidoohui:

—¿Ma jada jada' y'ocñicxa'ñ, e nixy ñich ajt ngapaatim? ¿Nej nixñib jada' ma je judíoJay ajcxy huñdibi yajpaatcixy yxñ yaa ma yi griegoJay ajcxy, e yaj'ixpigaangixy yi griegos ajcxy? ³⁶ ¿Nej jada' yajhuimbídzimiy? co ymína'ñ: “Xy'ixtähuibich miich ajcxy, e ca' xypaadibich, e ma anajty ñich nyajpaady, ca' miich ajcxy jaydëbi jii by mñicxcixy.”

Je ñi huñdibi jugy'ajt yejcp huñdibi ca' ycixy ytigoy

³⁷ Co je mijxñ ycodñcxni, chi Jesús ytinay'ahuñy, chi mic ymínañ:

—Pen ji pinjaty tiy'ajt nejhuñhua'ñ jadu'n nej ixyipy jáy ytidziyii tzocy yi ñi, huen xyñimiñich, etz nmöhuibich tiy'ajt. ³⁸ Je jáy ajcxy pinjaty xymibijcpich xymijpidaacpich, ytunipy ajcxy jadu'n nej Dios ñecy ymína'ñ ma jadu'n yjaybetyity: “Ycapxypídzimipy je' ajcxy Dios ytiy'ajt, etz mayjáy jotcuyc'ajtin etz jugy'ajtin pada'ñ huñixñ, ytimyñipaatyp jadu'n nej ñi ypidzimiy janch com ma tüg ñigop.”

³⁹ Je' anajty jadu'n Jesús ytiyyp pinjaty je' anajty mibijcip, je' anajty ajcxy adigihuaanip jottigihuaanip je Espíritu Santo. Ca' ni anajty je Espíritu ymini ma je discípulos ajcxy com ca'ni anajty Jesús yhuimbityñi tzajpjoty.

Jáy ajcxy ca' ñay'ayuc-huñjihuiyi mñid Jesús ycixpi

⁴⁰ Je mayjáy ajcxy huñdibi anajty ti midooy nej Jesús anajty ti ymína'ñ, nidüg nimetz ymínañ:

—Jadaabi je' je tiydudägypi jáy huñdibi Dios y'ayuc najtzcaxñiyip.

⁴¹ Jacjadyii ymínañ ajcxy:

—Je' yi' je Mesías.

Per nijëjity ajcxy huñdibi ca' ymibijccixy chachmínaangixy:

—Ca' jim Galilea naaxjot chona'ñ je Mesías. ⁴² Com jadu'n yjaybetyity ma Dios ñecy co je Mesías jim chona'ñ ma David y'ap y'oc, jim ma je cajp huñdixijp Belén ma David ycogajpity.

⁴³ Je mayjáy ca' anajty ajcxy ñay'ayuc-huñjihuiyigixy mñid Jesús ycixpi.

⁴⁴ Nijëjity anajty ajcxy ytimymadzamy Jesús, per ca' ni pin ymajtzi.

Judío ixpiçytijc ca' ajcxy mijpidacy Jesús

⁴⁵ Chi ajcxy policías huñdibi tumb ma tzajptijc nihuimbijty ajcxy je teedy mijtungmñdpi etz je fariseojáy ajcxy, chi ajcxy ñimaayi:

—¿Nej ajcxy co ca' ti mmajtzcixy je Jesús?

⁴⁶ Chi ajcxy je' y'adzooy:

—Nicaminaaxi tüg yëydijc jadu'n ti ymiydägy jadu'n nej yijibi yëydijc.

⁴⁷ Chi je fariseojäy ajcxy ymïnañ:

—¿Nej nañ ti miich ajcxy myajhuin'ñinigixyi? ⁴⁸ Ca' nmïnaanïm ti ajcxy teedy mijtungmïdipi o fariseojäy ajcxy mibijccixy Jesús. ⁴⁹ Je mayjäy huïdibi mijpïdaaci Jesús y'ayuc, ca' ajcxy y'ixpiçyity ma Dios ycötujcin. Dios yi' ajcxy tzaachytunïb.

⁵⁰ Nidügti ajcxy je' anajty je Nicodemo huïdibi oga'n'aty ni'oy Jesús coodz, je' ymigügtijc jadu'n nimay:

⁵¹ —Jadu'n ñich ajt ngötujcin xy'ane'mim co ca' huaad ndzaachytuunim pinjäy, pen ca'p jayijp n'ixyöyïm nbayöyïm ti anajty ti tuñ.

⁵² Chi ajcxy ymigügtijc y'adzohuimbijty oyñinej:

—¿Nej miich nañ jadu'n galileojäyi? Ixta' yajxon ma Dios ñecy, com jibi mnejhuïhuipy co jim Galilea ca' jim chona'ñ pinjäy huïdibi Dios y'ayucnajtzcapxiyip.

⁵³ Chi ajcxy ñicxtay nidüg nidüg ma yjin ydijc.

8

¹ Chi Jesús ypa'ttigïy ma je cögop huïdibi xijip Olivos. ² Com jabom jopyñi Jesús yquidacy jadüg'oc ma Dios ytijc. Chi mayjäy ñimiini. Chi y'ixtacy, e chi ytigïy yaj'ixpiçpi. ³ Je jäy ajcxy huïdibi Dios ycötujcin yaj'ixpiçp etz je fariseojäy ajcxy mïdmïñ tüg töxyjäy ma Jesús huïdibi anajty ti ytundigoooy mïd huingbi yëydijc. Chi ajcxy pidacy cujc'amy ma je mayjäy. ⁴ Chi ajcxy nimay Jesús:

—Huïndzin, jadayaabi töxyjäy huingbi yëydijc mïd ti ytundigoy. ⁵ Moisés ytiy'ajt ñich ajcxy xyñajtz'ane'miy jecy'ajty co yajtzaagögädzipy jada jadu'mbi töxyjäy. ¿Nej miich m'ocmïnambi?

⁶ Jadu'n ajcxy nimay co anajty ajcxy oc-huinma'ñ'ixa'ñ. Hue' anajty ajcxy ixtaayb nej jëbi huaad yajpocycäy Jesús. Chi Jesús yhuïndacy, chi jada' ytigïy jaaybi mïd ycïhuax naaxcíxy. ⁷ Com je' anajty ajcxy chachyaj'amïdooyb, chi Jesús ytinayïgy. Chi ajcxy nimay:

—Pin jäy ji ma miich ajcxy ca' ti pocy mïdity, huen yi' jayijp tzaagäch jada töxyjäy.

⁸ Chi Jesús yhuïndacy jadüg'oc. Chi ytigïy jaaybi jadüg'oc naaxcíxy. ⁹ Co ajcxy jadu'n ayuc yajhuïnji huïydaayi, chi ajcxy ooy chöyduñ, com yjihuïy ajcxy ypocy. Chi ajcxy yjihuäctay. Chi je mijjäydijc ajcxy ñaybattzondayi. Jesús yhuï'mïy nimetz mïd je töxyjäy huïdibi jim anajty tinaayb huingon. ¹⁰ Chi Jesús yhuäccugïy jadüg'oc nimay je töxyjäy jada':

—¿Ma ajcxy je jäy? ¿Ca' ni pin ti xychaachytuñ mïd mbocy ycixpi?

¹¹ Chi je töxyjäy y'adzooy:

—Huïndzin, ca' ni pin.

Chi Jesús ymïnañ:

—Ni ñich miich ngatzaachytunipy mïd mbocy ycixpi. Nicx, e ca' m'ocjacpocytuunip.

Jesús jadu'n nipaady nej tüg jin huïdibi tïcxpi

¹² Chi jadüg'oc Jesús yjactigïy miydacp ymïnañ:

—Ñich je tiy'ajt nmïd ya ma naaxhuïñyjäy, jadu'n ñich nipaady nej tüg jin huïdibi tïcxp ma jäy ajcxy. Pinjäy xymijpïdaacpich ymïd tiy'ajt nej jëbi huaad tudägy chinahuipy, jadu'n nipaady nej jihuïy ytüyöy ma jin ytïcxin.

13 Chi je fariseojäy ajcxy nimay Jesús:

—Miich ci'm nayñidiy'ajtip co miich je' je Cristo, e ca' mdiy'ajt chobaady.

14 Chi Jesús y'adzooy:

—Janch co ich ci'm nayñidiy'ajt'adyiijich co ich je' je Cristo. E ich ndiy'ajt janch yi'. Com nnejhuuybich ma ti ndzooñich, e ma nnicxa'ñich. E miich ajcxy ca' mnejhuuygixy ma ndzooñich, e ma nnicxa'ñich. 15 Miich ajcxy mmigüg mbocy'ijxyp muid mgimhuinma'ñ. Ca' ni pin nbocy'ixyich muid ngimhuinma'ñich. 16 Pen ich anajty nyajciyöybich nyajtecyöybich jäy ypocy, tiydudägy anajty jadu'n nduñich. Com ich ca' nyajpaadyich naydüg. Je' xymuid'ijtpich je Dios Teedy huidibi ti xyquexyich. 17 Com cojaay jadu'n y'ity ma miich ajcxy mgötujcin ñecy: “Pen nimetz jäy nigodiy'ajt'aty huentiijity, tzoobatp ajcxy y'ayuc.” 18 Ich ci'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtpich, co je' ya ti xyquexyich.

19 Chi ajcxy y'amidooy:

—¿Ma miich mdeedy yajpaady?

Chi Jesús y'adzooy:

—Com co ca' ich miich ajcxy xy'ijxcapy co ich je' je Cristo, nañ ca' ajcxy m'ixy'adyii ich nDeedy. Co ixypy ajcxy xy'ijxcapyich, nañ jaydebì ixypy ajcxy nejhuuy pin ich nDeedy'ajtyp.

20 Jim jadu'n Jesús ycapxy ymiydacy ma je meeñ'ijttac, co anajty yjäy yaj'ixpicy ma Dios ytijc. E ca' ni pin ymajtzi. Com ca'ni anajty yxii yhora anajty paadyñi mina ñaygyegiyb ma ymidzip.

Jesús ñimay ymigügtijc co ca' huaad ñicxy ma je' anajty ñicxy

21 Chi Jesús yjacnimaayi ajcxy:

—Ich nnicxaanip ich, miich ajcxy xy'ixtähuibich. Muid ajcxy mbocy ycixpi m'ögaangixy, com ma nnicxa'ñich ca' huaad miich ajcxy jebi nnicxcixy muid mbocy ycixpi.

22 Huin'it je judíojäy ajcxy ac jeyi ñayñimaayi:

—¿Nej nicxy jada' ci'm ñayyaj'öga'ñiyiji? Com jadu'n ymina'ñ co ma yi' ñicxy, ca' huaad ich ajt jebi nnicxim.

23 E Jesús nigi nimay'idich anajty:

—Miich ajcxy ya naaxhuiñ mmuidity mdiy'ajtcop. Ich tzajpjoty nmuididyich ndiy'ajtcopich. Miich ajcxy naaxhuiñjäy ajcxy ytiy'ajt mmijpidaacipy. Ich ca' nmijpidaagyich naaxhuiñjäy ytiy'ajt. 24 Ich miich ajcxy jadu'n nimaayb co m'ögam miich ajcxy, e ca' ajcxy Dios mbocy xyhuinmeecxp. Copicy ajcxy m'ögipy, e ca' Dios mbocy ajcxy xyhuinmeecxp, pen ca' xymibigáangixyich co ich je' je huidibi jebi mbocy ajcxy xyhuinmeecxp.

25 Chi ajcxy nimay Jesús:

—¿E miich, pin miich?

Chi Jesús y'adzooy:

—Ti ajcxy nyajnimaaaygixy pin ich, co oga'n ndigiyich jäy yaj'ixpijcpì. Cham jadüg'oc nyajnimaaaygixy. 26 May ooy tijaty ayuc nyajnimähuaangixy nej ti mdundigooygixy ma Dios ytiy'ajt. Cham ca' ajcxy nyajnimaydähuipy. Je huidibi ti xyquexyich ya naaxhuiñ je' tüg'óciy tiy'ajt muid. E ngapxpizimiyich je ayuc je tiy'ajt jeyi huidibi ti nmidooyich ma je'.

27 Je jäy ca' ajcxy huinjihuuy co Dios Teedy anajty Jesús ñigapxyp. 28 Paady Jesús nimay ajcxy:

—Co anajty miich ajcxy ti xyajcruudzpetyich, ich je jäy huidibi tzoon tzajpjoty, huin'it miich ajcxy mnejhuuhip co ich je' je Cristo. E co ich ca' ngimhuinma'ñ nduñich. Yi' ich ya nmiydacypich huidibi Dios Teedy ti

xyaj'ane'myich. ²⁹ Je Dios Teedy huídibi ti xyquexyich, yi' ñch miid n'ityich. Ca' ñch yi' xy'ixmachich. Com co ñch njatytimyumbich jabom jabom huídibi yi' chojcy.

³⁰ Co Jesús jadu'n ymíañ, chi mayjäy ooy ymibijcy.

Jäy huídibi mibijcp Jesús ycuychinaayipy yi' ytiy'ajt

³¹ Chi Jesús nimay je judíojäy ajcxy huídijaty anajty ti ymibicy:

—Pen mmibijc ajcxy cixyjot huinijot tüg'óciy ñch n'ayuc, e ca' m'ijxmadzipy ajcxy ñch n'ayuc, huin'it ñch miich ajcxy jëbi njäy'adyii. ³² Huin'it jëbi ajcxy mnejhuíhuipy Dios ytiy'ajt. E. Dios ytiy'ajt xyñihuángixip ma je mjibic-huinma'ñ ooy xy'ane'mgixy.

³³ Chi ajcxy y'adzooy:

—Abraham ñch ajcxy nmij'ap nmijteedy'ajtpy. Ca' ñch ajcxy huaad ni pinjäy xyjac'ane'my. ¿Nej co miich jadu'n míañ: “Dios ajcxy xyñihua'nip ma yi' mjibic-huinma'ñ xy'ane'mgixy”?

³⁴ Chi Jesús y'adzooy:

—Janch janch ñch miich ajcxy jadu'n nimaaygixy co tüg'óciy pinjaty pocy ytundib, jibicp yi' ane'mip. Tim jadu'n nipaady nej tüg tumbi huídi codoogí y ijtp, yi' yhuindzin jatytimy'ane'mip. ³⁵ Yi' tumbi huídibi codoogíy ijtp, ca' yhuíma'ñ ma je jäy ytiyc huinixii. Yi' jäy y'ung janchtiy huí'mam huinixii ma yteedy ytiyc. ³⁶ Pen Dios y'ung miich ajcxy xyajpidzimgixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ane'mgixnipy. Tim jadu'n nej Dios y'ung y'ity, ca' ti jibicpi y'ane'myii. ³⁷ Nejhuíybich co miich ajcxy Abraham mmij'ap'adyii nmijteedy'adyii. Per miich ajcxy chachyaj'ögaambich. Je' co ca' mijpidaaccixy ñch n'ayuc huídibi njayajnimaygixyp. ³⁸ ñch miich ajcxy nyajmídmíydaacyp tiibi n'ixyich huídibi ndeedyich ytumyb. E miich ajcxy yi' mdumyb nej m'ap mdeedy ti xyajnimaygixy.

³⁹ Chi ajcxy y'adzooy:

—Hue' ñch ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii nmijteedy'adyii, yi' ixypy ajcxy mdungixyp jadu'n nej Abraham tuñ. ⁴⁰ Janch ñch miich ajcxy xy-chachyaj'ögaangixyich, e ti ajcxy njayajnimäy je huídibi ñch ti nmidooyich ma Dios. Ca' Abraham yaj'ögy je jäy ajcxy huídijaty anajty Dios ytiy'ajt miid, jadu'n nej miich ajcxy m'iditzaangixy. ⁴¹ Miich ajcxy jibic-huinma'ñ mdungixyp, tim jadu'n nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca' ñch ajcxy ndigoy'ungity. Je' tügpajc ñch ajcxy ndeedy'ajtyp Dios Teedy.

⁴² Chi Jesús ymíañ:

—Peni Dios ixypy ajcxy mdeedy'ajtyp, xychojcpich xymijpidaacpich ixypy ajcxy. Com Dios ti xyquexyich ya naaxhuiñ, e jii by ndzooñich ma Dios. Ca' ñch ngímdzojcin ycixpi nmiiñich ya naaxhuiñ. Yi' je' jadu'n tzojcp pin ti xyquexyich. ⁴³ ¿Ti co ca' miich ajcxy mhuinjihuíy ñch n'ayuc? Je' co ca' ajcxy midohuaangixy ñch n'ayuc. ⁴⁴ Je' miich ajcxy mdeedy'ajtyp je mujcu'. Miid mgímdzojcin mguydungixy je mujcu' chójcin. Je mujcu'yaj'öctiíyb yi' jäy maabi naaxhuiñybi chondägy. Je mujcu' ca' je' ixaani Dios ytiy'ajt. Ca' ni ti tiy'ajt yajpaady ma je', com je mujcu' indaacp je', chi c'm ooy nijot y'idích. Je' ooy indacy, e je' oga'n anii yajtzondac. ⁴⁵ Com miich ajcxy mujcu' yhuinma'ñ miid, paady miich ajcxy ca' xymibijci xymijpidaaci n'ayucich co ñch tiy'ajt njamíydägy. ⁴⁶ Ni pin miich ajcxy xycayajpocycáhuipy. Peni tiy'ajt ñch miich ajcxy nyajnimayyb, ¿ti co ca' mmijpidaaccixy ñch n'ayuc? ⁴⁷ Je jäy

ajcxy huídibi yajpatp ma Dios, y'amído'ijtyp ajcxy Dios y'ayuc. Paady miich ajcxy ca' m'amído'ijtcixy Dios y'ayuc, com ca' ajcxy Dios mDeedy'ájtigixy.

Jesús jiiyim anajty yjugy'aty ca'ydí Abraham

⁴⁸ Chi je judío ixpícytjic ajcxy y'adzooy:

—Ti ñich ajcxy yajxon nmína'ñ co miich mgogajpity jim Samaria, e mujcu' miich mñid ma mjot mhuinma'ñ.

⁴⁹ Chi Jesús y'adzooy:

—Ca' ñich mujcu' nmñidty ma njot nhuinma'ñ, com nyajmij'ajtypich nDeedy, e miich ajcxy xy'ixtjipich. ⁵⁰ ñich ca' cí'm naygömayiijich. Dios Teedy ñich xycömaayb, com yi' je' huídibi ixýöyp payöyp jäy ajcxy ypocy. ⁵¹ Janch janch ñich miich ajcxy nimaaygixy co ji nijëjity jäy huídibi ñich n'ayuc cuydumb, e ca' yi' ajcxy yjugy'ajtin ycixipy ytigoyipy tüccí'yi co y'ó'ccixipy.

⁵² Chi je judío ixpícytjic ajcxy y'adzooy:

—Cham ñich ajcxy janchtiy ti nnejhuíyich tiydudägy co miich mujcu' mñidty ma mjot mhuinma'ñ. Abraham o'c je', nañ jadu'n o'c ajcxy je huídibi anajty Dios ytiy'ajt capxhuäcxip, e miich mmína'ñ co pen ji pinjaty miich m'ayuc xymibjicp xymijpidaacp, ca' je' y'ögipy. ⁵³ ¿Nej mjacmñid miich mic'ajt, ca'ydí Abraham, ñich ajt nmij'ap nmijteedy huídibi o'ci? ¿Nej mjacmñid miich mic'ajt, ca'ydí ajcxy huídibi Dios y'ayucnajtzcaxiy, huídibi ajcxy o'ci? ¿Pín miich mdimnaydijyii?

⁵⁴ Chi Jesús y'adzooy:

—Pen ñich nnaygömayibich cí'm, ca' n'ayucich chobaadipy. ñich nDeedy yi' xycömayipich, je huídibi miich ajcxy mdijpy co ajcxy mDios'adyii. ⁵⁵ Per miich ajcxy ca' Dios m'ixy'adyii. ñich janchtiy n'ixy'ajtypich Dios. E co ixipy nmína'ñich co ca' ñich Dios n'ixy'adyii, indaacpich ixipy, jadu'n nej miich ajcxy m'indaaccixy. Janch ñich n'ixyich Dios, e nguydumyibich yi' y'ayuc. ⁵⁶ Je Abraham, miich ajcxy mmij'ap mmijteedy, jotcuyc ooy ñayjihuíy co anajty ixa'ñ ñich nxñ ndiempo ya naaxhuiñ. E co ijxy co ñich nmiiñich, chi ooy yjotcugiy.

⁵⁷ Chi je judío ixpícytjic ajcxy nimay Jesús:

—Ni mgamñidty huixchigui'px majc jimijt, e ¿mmína'ñ co m'ijxy Abraham? (Ca' m'ixy'ajti je Abraham, naxy tüg mil jimijt maabi je' y'o'cni.)

⁵⁸ Chi Jesús y'adzooy:

—Janch janch ñich miich ajcxy jadu'n nimäy co ji anajty ñich co ca'ni anajty Abraham yma'xung'aty.

⁵⁹ Chi ajcxy tzaa conigy tzaagädza'ñ anajty ajcxy. Chi Jesús yhuingoyüch, e ypidzimy ma Dios ytiyc.

9

Jesús yajtzooc tüg huintzpi

¹ Hue' anajty Jesús huídijtp co ijxy tüg huintz, jadu'n anajty huintz ti yma'xung'aty. ² Chi ydiscípulos ajcxy y'amídoohui:

—Huindzin, ¿pín pocy ytuun, jada huintzpi o ytaj yteedy, co huintz yma'xung'aty?

³ Chi Jesús y'adzooy:

—Ca' yi' ypocytuuñ, ni ytaj yteedy, hue' janchtiy paady ycixp jadu'n yjajty, jigix Dios ymic'ajt ñiguëxigity ma yi'. ⁴ Copicy njactúunibich yi' ytung huídibi ti xyquexyich ya naaxhuiñ. Miinip je xñ tiempo ma ca' pín Dios y'ayuc tunaani. Jadu'n nej jihuíy ixipy je xñmbi ti ñaxy etz je coodzpi ti ymiiñ. ⁵ Jadu'n nej

n'ityich ya naaxhuiñ nm̄idich Dios ytiy'ajt, jadu'n ñich nipaady nej tũg j̄in hūidibi cod̄icxp̄ ȳi naaxhuiñȳj̄ȳ.

⁶ Co Jesús jadu'n ym̄inanday, chi nidzuj̄ȳ naax, chi mo'ntz yaj'oȳȳ m̄id chuj̄n̄i, chi jada' yajjaaxi je j̄ȳ yhuin m̄id je mo'ntz. ⁷ Chi ñimay jada':

—Ñicx quejtzpuj ȳi mo'ntz jim ma ȳi Siloé ñi y'abojt̄z̄iḡity —je ayuc Siloé jadu'n yhuimb̄idz̄imy: quexȳȳbi.

Chi je j̄ȳ huintzpi ñicxy jim, chi oy quejtz puji je mo'ntz, chi oy huimbity ti anajty yhuind̄icx̄igy. ⁸ Je ym̄ij̄in ymid̄ijc ajcxy etz tũg'óc̄iy hūidijaty anajty ajcxy ti ixy je huintzpi co jabom jabom ñ̄ay limosna yajmucy, chi ajcxy ñay'am̄idoohui miñ xȳipy:

—¿Nej ca' jada yj̄j̄ity je huintzpi hūidibi anajty jabom jabom limosna yajmujcpi?

⁹ Nij̄j̄ity ajcxy ym̄inañ:

—Je' ȳi'.

E jacjadyii ajcxy ym̄inañ:

—Huingbi ȳi', ñigoob jadu'n yqūex̄igy nej je'.

E je' ym̄inañ ci'm:

—Ñich j̄edu'n hūidibi anajty huintz.

¹⁰ Jadu'n anajty ajcxy tzach'am̄idoy:

—¿Nej ȳi' mhuiin ti ñay'ahūacxyii?

¹¹ E je' anajty y'adzooy:

—Ȳi' ȳȳd̄ijc hūidibi ajcxy ytijyp Jesús, ȳi' mo'ntz yaj'oȳȳ xyajjaaxich nhuiin, e chi xyñ̄imaayich: “Ñicx quejtzpuj ma ȳi' Siloé ñi.” Chi ñnicxyich, e oy nguejtzpujyich, e chi nhuind̄icxi'cyich.

¹² Chi ajcxy je' ñimay:

—¿Ma je' je ȳȳd̄ijc?

Chi je huintzpi y'adzooy:

—Ca' nnejhūȳich.

Fariseoj̄ȳ t̄y'ajt p̄ijcy nej je huintzpi anajty ti ch̄ogy

¹³ Chi ajcxy yajnicxy ma fariseoj̄ȳ ajcxy yhuinduu, je hūidibi anajty huintz yajpatp. ¹⁴ Hue' anajty tũg s̄abado x̄īi (judíōj̄ȳ ajcxy amayx̄īi) co Jesús mo'ntz yaj'oȳȳ, e yajhuind̄icx̄igy je huintzpi. ¹⁵ Chi je fariseoj̄ȳ ajcxy jadũg'oc yaj̄ty nej anajty je j̄ȳ ti yhuind̄icx̄igy. Chi je j̄ȳ y'adzooy:

—Mo'ntz ti p̄id̄agy ma ñich nhuiin, chi ñich ti nguejtzpuji, e cham n'ijxn̄ibich.

¹⁶ Nij̄j̄ity fariseoj̄ȳ ajcxy ym̄inañ:

—Ȳi' ȳȳd̄ijc hūidibi jada jadu'n ti tuñ, ca' ȳi' Dios ytiy'ajt m̄idity, com ca' ȳi' amay'aty s̄abado x̄īi.

Chi ajcxy jacjadyii y'adzooy:

—¿Nej tijy jada m̄ijhuinma'ñ octuñ, pen hue' ȳi' pocyj̄ȳ?

Ca' ajcxy nay'ayuc-huin̄j̄ihūȳȳiḡixy. ¹⁷ Chi ajcxy jadũg'oc ñimay je j̄ȳ hūidibi anajty ti y'ijx̄igy:

—E miich, ¿nej m'ocm̄inambi? ¿P̄in j̄ȳ ȳi' t̄ibi xyajhuind̄icx̄igy?

Chi je j̄ȳ y'adzooy:

—Tũg j̄ȳ hūidibi Dios y'ayuc etz ym̄ic'ajt m̄id.

¹⁸ Chi je judíō ixp̄icyt̄ijc ajcxy ca' anajty tim m̄ibigaanḡixy co je ȳȳd̄ijc anajty huintz yajpaady, e co anajty ti yhuind̄icx̄igy, ixti cooni ajcxy ytajyteedy m̄ijhuoohui. ¹⁹ Chi ajcxy am̄idoohui ytajyteedy:

—¿Nej je' jada miich ajcxy m'ung hūidibi huintz ma'xung'ajti? ¿Nej jada ti yhuind̄icx̄igy?

²⁰ Chi je' ytajyteedy ajcxy y'adzooy:

—Ich ajcxy nnejhuuyb co ich ajcxy yi' n'ung, e co yma'xung'ajty huiintz.
 21 Per jadu'n nej cham ti yhuindicxigy, e pin yi' yhuin ti yajhuacxyii, ca' ich ajcxy yi' nnejhuuygixy. Amidoo miich ajcxy yi' ci'm. Mij'anacñ yi', ñigapxipy yi' ci'm.

22 Jadu'n ajcxy ytaj yteedy y'adzooy, mid co ajcxy tzachtzigiygixy je judío xpiicytije ajcxy. Com je judío xpiicytije ajcxy ti anajty ñaygápxigixy co anajty yajpidzimaangixy ma ajcxy ñaymujctac je jäy ajcxy pinjaty anajty mibijcp co Jesús anajty yjety je Cristo. 23 Paady ajcxy ytaj yteedy yminañ:

—Mij'anacñ yi', amidoogix miich ajcxy yi' ci'm.

24 Chi ajcxy y'amidooy mimejtz'oc je yeydijc huidibi anajty ti y'ixigy, e chi ajcxy nimay:

—Cömay capxpat yi' Dios co ti mdzögy. Ca' mgömay mgapxpaady je Jesús. Com ich ajcxy nejhuuyb co yi' Jesús, tüg yi' pocytumbi. Ca' yi' Dios y'ayuc ytiy'ajt müdity.

25 Chi je jäy y'adzooy:

—Pen tüg pocytumbi yi' Jesús, ca' nejhuuyich. Huidibi janchtiy nnejhuuybich, co anajty ich nhuintzity etz co cham huindicxnibich.

26 Chi ajcxy y'amidooy jadüg'oc:

—¿Nej ti xytuñ? ¿Ti ti tuñ co ti xyaj'ixxi yi' mhuiin?

27 Chi je' y'adzooy:

—Ti ajcxy nyajnimaaaygixy, e ca' ajcxy ti m'amido'idaangixy. ¿Nej nañ xpiigaangixy miich ajcxy ma yi'ji?

28 Chi ajcxy je' ogy, nimay ajcxy jadu'n:

—Miich xpijc ma yi', ich ajcxy n'ixpijcpich ma Moisés ytiy'ajt. 29 Ich ajcxy nejhuuyb co Dios Moisés migapxy. Janch yi' Jesús ca' ich ajcxy nnejhuuygixy ma yi' choñ (ma mic'ajt ti paady).

30 Chi je jäy y'adzooy:

—Ooy yi' y'oychigiyñity y'oyhuinma'ñity co miich ajcxy ca' mnejhuuygixy ma yi' choñ (ma mic'ajt ti paady), e ti ich yi' xyajhuindicxigyich. 31 Yajxon yajnejhuuy co Dios ca' yi' midoohi pocyjäydijc y'ayuc. Pen oy jäy ich ajt, e nguyduunim Dios ytiy'ajt, huin'it ajt Dios n'ayuc xymidoohuim. 32 Ni caminaaxi ycaaymidoy, co pinjäy tüg huintzpi ti yaj'ixigy huidibi jadu'n ti yma'xung'aty huintz. 33 Co ixypy je Jesús ca' jiiy choñ ma Dios, ca' ixypy jaty nej ti tunipy.

34 Huin'it ajcxy y'adzooy:

—Miich jadu'n ti mma'xung'aty pocymid. Ca' miich huaad ti xyaj'ixpijccixyich.

E chi ajcxy yajpidzimy tibäy'tücci'yi (ma ajcxy ñaymujctac etz ma Dios ytiyc).

Je jäy ajcxy huidibi ca' cöbijccixy Dios ytiy'ajt jadu'n nipaady ajcxy nej jihuuy huintzity

35 Chi Jesús nejhuuy jadu'n co anajty ti yajpidzimy tiba'y tücci'yi ma Dios ytiyc. Co minaaybaati chi nimay:

—¿Nej mmibijcyp mijpidaacyp miich je jäy huidibi tsoon tzajpjoty?

36 Chi je' y'adzooy:

—Huindzin, nimaaygich pin je', jigix nmibicyich.

37 Chi Jesús je' y'adzooy:

—M'ixyp yi'du'n yam. Yi' je' je huidibi xymidmiydacp.

38 Chi jada' huingoxtinay'ahuuy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús ymínañ:

—Ích ti nmiñ ya naaxhuiñ co n'ixyöyaanich nbayöyaanich jäy ypocy, jigix nyajpocycähuibich pin ca' ypocymíidity, etz nyajpocyníhuädzibich pin ypocy míid. Jadu'n nej jihuíy nyajhuindziyich je jäy huídibi ijxp, etz jadu'n nej jihuíy nyajhuindicxígyich yi huintzpi.

⁴⁰ Chi nijéjity fariseojäy huídibi anajty jim ma Jesús ymíjc jadu'n midoy nej Jesús ymínañ, chi ajcxy nimay Jesús:

—¿Nej nañ jadu'n miich mdiy ích ajcxy ca' Dios ytiy'ajt nejhuíyich, jadu'n nej jihuíy ích ajcxy nhuintzity?

⁴¹ Chi Jesús y'adzooy:

—Co ixipy miich ajcxy janch janch ca' mnejhuíygyixy Dios ytiy'ajt, ca' ixipy ti pocy ajcxy mmíidity. Per miich ajcxy minam co Dios ytiy'ajt mguyduuníy, e ca' yjanchity. Paady ajcxy mbocymíidity. Nipaatyp jadu'n nej jihuíy miich ajcxy mhuintzity, e mmínaangixy co m'ijxcixy.

10

Jesús yaj'ixpijc jihuimbit ayuc

¹ Chi Jesús jacnimay je judío y'ixpijcytíjc, je fariseojäy ajcxy:

—Janch janch ích miich ajcxy yam jadu'n nimaaygixy co je jäy ajcxy huídibi ca' ytigíhuaangixy ma borregi agaj aguu (ma je cuend'ajtpi ycuend'aty), huídibi huingduum ameech tzach tigíhuaam ma yborregi agaj, je' je' je meetzpi huídibi meedzam je borregi ajcxy ameech. ² Je jäy huídibi tigíhuam ma yborregi agaj aguu, je' je' je borregi cuend'ajtpi. ³ Co je borregi cuend'ajtpi ymiñ ma agaj aguu, chi je agaj aguu cuend'ajtpi yaj'ahuäch je agaj aguu. Chi yborregi ajcxy yöcmídooyii, chi je' migapxy xíbety xíbety, chi yajpidzimy ajcxy. ⁴ Co ajcxy yajpidzimdáy, ac je' yje', chi jayíjp nícxíy, e axam ajcxy ypanícxíyí, com je' co yöcmídooyii. ⁵ Ca' je borregi ajcxy jébi panícxíy tüg huingjäy. Nígi ajcxy cöguëgy, com yöcmídooyb ajcxy co yhuingjäyity.

⁶ Jadu'n Jesús mayjäy yaj'ixpijcy jihuimbit'amy, jaygue' ajcxy ca' huaad huinjihuíy nej anajty Jesús yjamínaña'ñ.

Jesús je oybi cuend'ajtpi

⁷ Chi ajcxy Jesús jadüg'oc nimaayi:

—Janch janch ích miich ajcxy yam jadu'n nimaaygixy, co je Dios nDeedy'ajtypich. Jébi jäy ajcxy paady Dios ytiy'ajt ma ích, e huin'it ytigíygyixipy ma Dios y'it. Jadu'n nipaady nej jihuíy ích je agaj aguu ma borregi ajcxy ytigíygyixy. ⁸ Tüg'óciy je huindzindíjc huídibi ajcxy miin jayíjp ca'ni ích anajty nmiñich, e ymínaangixy anajty co ajcxy míid'ajti Dios ytiy'ajt, jadu'n je' anajty ajcxy nej meetzpi huídibi meedzaanip Dios yjäy. Per je Dios yjäy ca'p je' ajcxy tuuñ cuendi, jadu'n nej je borregi ca' yöcmídoogixy je meetzpi. ⁹ Jadu'n nej je borregi ajcxy ytigíygyixy ma agaj aguu, nañ tim jadu'n jäy ajcxy paady Dios ytiy'ajt ma ích. Je jäy ajcxy huídibi ypaatyp Dios ytiy'ajt ma ích, nañ ypadaamy jugy'ajtin huídibi ca' ycixipy ytigoyipy tücci'yí. E huídibi je' ajcxy yajmayajtyp ma yi chinaayin, nmóhuibyich. Tim jadu'n nej borregi ajcxy jabom jabom ypidzimgixy ma agaj aguu nícxícxíy míy'ojcpi, etz yhuimbijtcixy tzuu tzuu.

¹⁰ Yi meetzpi ajcxy mimb co ymeedzaangixy yaj'ögaangixy yajhuindigoyaangixy. Ích ti nmiñich, jigix miich ajcxy mbáatcixipy jugy'ajtin mijcajee huídibi ca' tücci'yí ycixipy ytigoyipy.

¹¹ Chi Jesús yjacmínañ:

—Hich jadu'n nipaady nej tög borregi cuend'ajtpi oybi. Je oybi borregi cuend'ajtpi yciyejcy y' yjugy'ajt ma yi o'cin miid yborregi ycixpi. ¹² Je borregi cuend'ajtpi huidibi mujuy tumb, huidibi ca' yci'mborregi cuend'aty, ni ycajēity je borregi yhuindzin, co ixy caa ymiñ, chi cöguēgy je borregi, e yajqueec-huäcxtäy. ¹³ Com je' co mujuy ytuñ, paady cöguēgy je borregi ajcxy, ca' tzocy jihuiy borregi.

¹⁴ Tim jadu'n nej je oybi borregi cuend'ajtpi ijxcajptäy je' yborregi, nañ tim jadu'n hich n'ijxcajptäy je njäyich (huidibi xymijpidaacpich), etz je' ajcxy xy'ixy'ajtpich. ¹⁵ Tim jadu'n nej Dios Teedy xy'ixy'adyiijich, nañ tim jadu'n n'ixy'adyiijich Dios Teedy. Tim jadu'n je' nej je oybi borregi cuend'ajtpi yciyegamy yjugy'ajtin miid yborregi ycixpi. Nañ tim jadu'n hich ngi'yegamyich njugy'ajtin miid hich njäy ajcxy ycixpi. ¹⁶ Nmüidich jadügpicy jäy, ca' ajcxy yjudiojäyity, je' ajcxy nañ jadu'n nmüid'idaamyich tügmucy (miid je judío jäy ajcxy huidibi xymijpidaacpich). Tim jadu'n nej je cuend'ajtpi ymiid'ajtyp je' yborregi ajcxy tügmucy. E je' ajcxy y'amidoo'idaamy hich n'ayuc, tim jadu'n nej borregi ajcxy yöcmidoogixy yhuindzin. Ji y'idipy tügmucy jäy (huidibi xymijpidägibich), etz tög cuend'ajtpi (hich jēdu'n).

¹⁷ Chi Jesús yjacmīnañ:

—Paady ycixp Dios Teedy ooy xychocyich xyjihuiyich, co ngi'yegaamyich njugy'ajtin ma yi ó'cin (miid jäy ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, hich yi' ci'm ngi'yegamy. Nmüidich mic'ajt nej ngi'yegipyich njugy'ajtin, etz nañ nmüidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihuiyī je judíojäy ajcxy miid Jesús y'ayuc ycixpi. ²⁰ Mayjäy ymīnañ:

—Ca'oybi yi' ymiid, locjiyb yi', ¿nej co ajt n'amido'ijtim y'ayuc?

²¹ E jacjadyii ajcxy ymīnaangixy:

—Jadayaabi tiy'ajt etz mic'ajt ca' yajpaady ma tög jäy huidibi mujcu' ymiid. Ca' jēbi tög mujcu' jäy huitzpi yaj'ixigy.

May judíojäy ajcxy ca' cöbijcy Jesús

²² Jim Jerusalén anajty xii yjadyii, je' anajty ajcxy ñixidumyib jimijt Dios ytijc. ²³ E hue' anajty tiich tiempo. Chi jim anajty Jesús yhuidity ma Dios ytijc, ma je Salomón ytijc-huinduu. ²⁴ Chi ajcxy je judío y'ixpiyitijc nimujcy ooy Jesús, nimay ajcxy:

—¿Ixti mīnaani miich hich ajcxy tiydudägy xyajhuinjihuñhuángixyich pen miich je' je Cristo? Yajhuinjihuñyigich ajcxy tiydudägy.

²⁵ Chi Jesús y'adzooy:

—Ti ajcxy nyajniimaaygixy, e ca' miich ajcxy ti nmibijccixy. Je mijhuinmañ huidibi ndumyibich nmüidich nDeedy ymic'ajt, yi' je' nidiy'ajt'ajtp co hich je' je Cristo. ²⁶ Paady ycixp miich ajcxy ca' mmibijccixy, com ca' miich ajcxy njäy'adyiijich. ²⁷ Hich njäy ajcxy ymijpidaacyp hich n'ayuc, e n'ijxcajpich ajcxy je', e je' ajcxy xypanixpich. Tim jadu'n nej je borregi ajcxy yöcmidooy je yhuindzin, jadu'n nej je huindzin ijxcapy je' yborregi, e jadu'n nej yi' yborregi ypanixyii. ²⁸ Hich njäy ajcxy nmooybich yi' jugy'ajtin huidibi ca' tücc'iyi ycixañ ytigoyañ. Ca' je' ajcxy yjugy'ajtin ytigoyipy ni camina, e ni pin ca' huaad je' ajcxy xypijcich. Je' ajcxy ci'am nmüididyich. ²⁹ Yi' Dios Teedy huidibi hich njäy ti xymöy, tügpajc yi' ymijity, e ni pin huaad ni ti capijcīy huidibi Dios Teedy ymiid ci'am. ³⁰ Dios Teedy etz hich tú'ciy hich ajcxy.

³¹ Chi je judíoꝝäy ajcxy jadüg'oc tzaa conig cädzaangixy anajty ajcxy. ³² Chi Jesús je' ajcxy nimay:

—Ti ñich ooy mij oybi nduñich ma miich mhuinduu mïid je nDeedyich ymic'ajt ycixpi. ¿Huidi ycixpi miich ajcxy xychaagädzäängixyich?

³³ Chi je judío ixpicytije ajcxy y'adzooy:

—Ca' nmïinaanim paady ñich ajcxy miich ndzaagädzaangixy mïid je oybi tiibi mduñ, hue' janchtiy ycixpi ndzaagädzaangixy mïid co ooy Dios myajjotmädy. Com miich nañ jäy, e mnayyajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi judíoꝝäy ajcxy ytiy'ajtnecy, ma Dios jadu'n ymïna'ñ: “Jadu'n nej dios miich ajcxy.” ³⁵ Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huidibi Dios y'ayuc cöbicip (e ca' huaad pinjäy ymïna'ñ co Dios ñecy ca' yjanchity). ³⁶ Dios ti xyajñibicyich jada tung, e xyquejxyich ya naaxhuiñ. ¿Nej co mmïnaangixy co ñich ngapxtigooyich co nmïna'ñich co Dios xy'ung'adyiijich? ³⁷ Pen ca' nduñich nDeedyich ytung, ca' ñich ajcxy huaad n'ayuc xymibicich. ³⁸ E pen ndumybich nDeedyich ytung, oy ixypy miich ajcxy ca' xymijpidaacich n'ayuc, jëbi ixypy mijpidägy ajcxy je mijhuinma'ñ huidibi ndumybich. E chi mnejhuïhuïpy miich ajcxy, etz mmijpidägipy miich ajcxy co je Dios Teedy yajpaady ma ñich, e ñich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij niñ nïnaxy ma Juan yjäy yajñibejty oga'n'aty, chi jim yhui'mïy. ⁴¹ Mayjäy Jesús ooy ñimujci, e ymïnañ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'ócicy yi tiy'ajt jadu'n nej nimïydactay jada Jesús, janch tiy'ajt je'.

⁴² E janch mayjäy ooy mibicy Jesús jim ma je jimbi it.

11

Co Lázaro y'o'cy

¹ Jim Betania anajty tüg pa'mjäy, hue' anajty yxii Lázaro. Hue' je' anajty chinäy ma María etz Marta ycojajpity. ² María je' anajty huidibi je Huindzin Jesús anajty ti yajjaxy je ujtzipijyñii huidibi ooy oy yxuugy, etz po'ti Jesús ytecy mïid ycöhuay. Hue' je' anajty María etz Marta ymidügquëx Lázaro huidibi anajty pijcip. ³ Chi Lázaro ymidügquëx ajcxy ycapxyquejxy ma je Huindzin Jesús anajty yajpaady, e chi oy yajnimäyii:

—Je mmigüg huidibi ooy mdzocy, pijcip je'.

⁴ Co Jesús jadu'n midooy, chi ymïnañ:

—Je' ypa'm ca' yaj'öga'ñyii tücci'yi. Je' ypa'm hue' yajñiguëxigamy Dios ymic'ajt, jaydeb Dios ycömaybidzimipy, e nañ ñich nyajcömayipyich, ñich je jäy huidibi tzoon tzajpjoty.

⁵ Jesús ooy anajty tzocy jihuïy je Marta, María etz je Lázaro. ⁶ Oy jadu'n Jesús nejhuïy co anajty Lázaro ypigyii, jamejtz xii jim yjacxinajxy ma anajty yajpaady. ⁷ Huin'it Jesús nimay ydiscipulos ajcxy:

—Tzoc jamim jim Judea naaxjot.

⁸ Chi je' ydiscipulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e ¿mnicxaanip jim jadüg'oci?

⁹ Chi Jesús y'adzooy:

—Majmetz hora tüg xiimbi mïidity. Pinjäy mïid Dios ytiy'ajt, ca' ayo'n pada'ñ, tim jadu'n nej jihuïy yhuidity xim, e ca' ycönepy, com co xii codicxy jada naaxhuiñybi. ¹⁰ Pinjäy ca' mïidity Dios ytiy'ajt, ca' je' nejhuïy ti anajty

jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy müid co ca' anajty ixy ma ñicxy.

¹¹ Huin'it Jesús je' ajcxy nimay:

—Hich ajt nmigüg Lázaro maab je', nicxy nyajpidíga'ñich.

¹² Chi je' ydiscípulos ajcxy y'adzooy:

—Huindzin, pen maab, huaadjihuñihuip yi', ci'm yi' ymäyhuijipy.

¹³ Je' Jesús anajty ñimiydaacyp je o'cin, e je' ajcxy tijy Jesús ñimiydaacyp je máhuñ. ¹⁴ Chi Jesús yajmüidmíydacy ajcxy tíydudägy, ymíñañ:

—Lázaro ti je' y'o'cy. ¹⁵ E ooy njotcújcidyich müid müich ajcxy ycixpi co anajty hich ca' njimíty, jigix ajcxy mmibigipy co Dios ymic'ajt nmüidídyich. Tzoc ajt jamim jim Betania.

¹⁶ Tomás huídibi anajty ajcxy yxigoyaaaxyp Dídimó, huídi ayuc-huimbídzim: cuate, nimay jacjadyi Jesús ydiscípulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy müid Jesús.

Jesús yajjugypigipy je jäy ajcxy etz möhuipy ajcxy jugy'ajtin

¹⁷ Co ajcxy jim yja'ty, chi ajcxy paty tíy'ajt co mimídaaxxiibi anajty maabi Lázaro ñaaxtigíy. ¹⁸ Betania ca' anajty ooy yjiguëgyity müid Jerusalén, jëyi jada' anajty müidity tugig kilómetro. ¹⁹ May judíojäy ajcxy anajty ti ymiñgixy ma Marta etz María, yajjotcugíhua'ñ ajcxy müid je' ymiguëx ycixpi co anajty ti y'ögy. ²⁰ Co nejhüy Marta co Jesús anajty jim ymiñ, chi nidzooñ oy jipcobadíy. E María jim yhuí'míy ma ytíjc, tígoty anajty íñäy. ²¹ Chi Marta Jesús nimay:

—Huindzin, co ixypy müich ya anajty myajpaady, ca' ixypy ti y'ögy nmiguëxich. ²² Per nnejhuíybich co müich cham jëbi Dios mmibíjctzoy, e xymöhuip ti mdímdzojcy.

²³ Chi Jesús y'adzooy:

—Je mmiguëx jugypigip jadüg'oc.

²⁴ Chi Marta y'adzooy:

—Nnejhuíybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

²⁵ Per huin'it Jesús y'adzooy:

—Hich je' nyajjugypigipyich je jäy ajcxy, e nmöhuíbyich ajcxy jugy'ajtin. Píñjäy ajcxy xymibíjcpich xymíjpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶ E tüg'óciy píñjaty ajcxy xymibíjcp xymíjpidaacpich juugyñi, ca' y'ögipy ajcxy tüccíyi. ¿Nej mibíjcy müich jadaají?

²⁷ Chi Marta y'adzooy:

—Nmibíjcpich, Huindzin. Nmibíjcpich co müich je' je Cristo, Dios y'ung, huídibi anajty miinam ya naaxhuiñ.

Jesús taj may ooy müid Lázaro ycixpi

²⁸ Co Marta jadu'n ymíñañ, chi jada' oy huoy y'uch María, e yajnimay ameech:

—Je Huindzin chiiby je', e müich jüby xymüidmíydägamb.

²⁹ Co María jadu'n mídooy, chi ypidígy mic'amy, e chi ñicxy ma Jesús.

³⁰ Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yjipcobadíy. ³¹ Co ajcxy ijxy co María ypidígy, e ypidzímmy janch mic'amy, je judíojäy huídibi anajty ajcxy jim ma je tíjc müid je', hue' ajcxy tijy María ñicxy yaaxpi ma anajty ti ñaaxtigíy je Lázaro. Chi ajcxy panícy.

³² Co yjädy María ma je it ma anajty Jesús, co íjxpaty, chi ycojxtínaay'ahuíy ma Jesús yhuínduu, chi nimay:

—Huindzin, co ixypy müich anajty m'ocyaajity, hich n'ay ca' je' ixypy y'ögy.

33 Co Jesús ijxy yäxy je María etz je judíojäy ajcxy huídibi anajty yjajmüid'ajtip, chi ooy jihuüy etz ytaj ymaay. 34 Chi jada' Jesús yajtiy:

—¿Ma ajcxy Lázaro ti myajnaaxtigí?

Chi ajcxy nimay:

—Huindzin, jam ijxim.

35 Chi Jesús yaaxy. 36 Chi judíojäy ajcxy ñayñimaayi miñ xyipy:

—Ooydim anajty tzocy je Lázaro.

37 Per nijëjity ajcxy ymíñañ:

—Jadayaabi jäy huídibi huintzjäy yajhuindicxigy, ¿nej ca' jada' ixipy mic'ajt müidity jëbi ixipy ti yajtzögy je Lázaro, e ca'ydi ixipy ti y'ögy?

Jesús yajjugypijc Lázaro

38 Chi Jesús jadüg'oc yjotmaybaty, chi ymíjhuägy ma je o'cpi jut. Hue' je' anajty tüg ang müd tüg mij tzaa y'agiyducyity je jut aguu. 39 Chi Jesús ymíñañ:

—Jüigi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mímidaaxxiibiñ maabi ñaaxtigíy.

40 Chi Jesús ymíñañ:

—¿Nej cay ti jadu'n nnimäyi? Pen xymibíjicibich yi' n'ayuc, m'ixipy Dios ymic'ajt y'oy'ajt.

41 Chi ajcxy je tzaa jügiy, chi Jesús cix ypa't'ijxy, ymíñañ:

—Dios Teedy, jäygidaacin nyajnajxypich ma müich, co müich xymidoohui n'ayucich 42 Yajxon nnejhuüyich co müich xy'amido'ijtpich jabom jabom, paady ycixp müich jadu'n ti nnimäy müd jadayaabi jäy ajcxy ycixpi ma hch nhuinduu, huen ajcxy mibicy co müich xyquejxich ya naaxhuiñ.

43 Co Jesús jadu'n ymíñañ, chi jada' mic ycapxy:

—Lázaro, pidzim tibäy.

44 Hue' je o'cpi mic'amy ypidzimy ymo'nity yajxon tüg'óciy ñinícx etz huin-goyebíyity müd huit, chi Jesús ymíñañ:

—Huimbidiittuutcixy, e najtzmadzíygix, huen yöychooñ.

Judío ixpicytíjc ymadzamy anajty Jesús

45 May je judíojäy ajcxy ymibíjcy huídibi anajty María yjajmüid'ajtyp, co ajcxy ijxy je huídibi anajty Jesús ti tuñ. 46 Per jadyii judíojäy ajcxy oy ixtäy je fariseojäy ajcxy, chi ajcxy yajmüdmíydacy huídibi anajty Jesús ti tuñ. 47 Je teedy tungmüdpi ajcxy, etz je fariseojäy ajcxy, chi ajcxy ñayhuomujctayi je tungmüdpi ajcxy nidüg'óciy, chi ajcxy ymíñañ:

—¿Nej ajt Jesús n'octuunim? Yijüibi yëydíjc ooy yi' mijhuinmañ tzachtuuni.

48 Pen najtz'ixíyim jadu'ñyi, tüg'óciy jäy mibíjctähua'ñ yi'. Chi ajcxy ymiinipy je Romano tungmüdpi huídibi ajt xy'ané'mim, e chi yajhuindigoyipy hch ajt nDios y'it, e nañ yajhuindigoyipy hch ajt ndzinaayin njugy'ajtin.

49 Nidügti ajcxy je jäy, hue' anajty yxii Caifás, hue' anajty migtungmüid, je' anajty teedy huindzin, je' jadu'n jäy nimayday:

—Müich ajcxy ca' ti mhujnjihuüygixy. 50 Ca' ajcxy mnejhuüy co jac'oy nyaj'o'cim je Jesús tügpajc, huen yi' codinaydähuiip naax cajp, jigix ca'ydi hch ajt nnaax ngajp yhuindiooyim.

51 Canan yci'mhuinmañ jadu'n ycixpi ymíñañ je'. Hue' janchtiy com je' anajty ymigtungmüidity je huin'it jimíjt ma teedy ajcxy ymiñ, paady Dios huinmañ jadu'n yejcy, co jadu'n najtzcaxiy co Jesús anajty y'öga'ñ müd tüg'óciy ajcxy naax cajp ycixpi. 52 E ca' nmínaaním müd jëda'ajty müd je judío ajcxy ñaax ycajp ycixpi, nañ jëgíx co huomujctähua'ñ tüg'óciy Dios y'ung

huidijaty anajty ajcxy yajpatp xii ya. ⁵³ Huin'it oga'n ajcxy je tungmüdpi yajnigodugiiy co yaj'ögaangixy Jesús.

⁵⁴ Jesús ca' anajty ma y'ocyaj'ijxni mayjäyoty ma je judíojäy ajcxy. Chi jada' ñicxy jiguem mihuigon ma je títznaax'it, ma anajty tüg cajp xiiñity Efraín. Chi jim yhuimiy müd ydiscípulos ajcxy.

⁵⁵ Huingoonip anajty je pascua xii huidibi anajty judíojäy ytumyb. Ti anajty may judíojäy ajcxy ñinicxni jim Jerusalén xii'ajtp huidibi anajty jiguégyaty tzomb. Jayijpni ajcxy ñicxy ca' anajty xii paady, co anajty ajcxy ñayajpocyñihuädza'ñyii. ⁵⁶ Ooy anajty jäy ajcxy ijxtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuüy ma Dios ytijc, jadu'n ajcxy ymínañ:

—¿Nej m'ocmínaangixy? ¿Minipy jada' Jesús xii'ijxpi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinity huidibi anajty nejhuüy ma je Jesús, huen nigapxy jigix ajcxy madzipy.

12

María yajjaax aceite Jesús ytecy

¹ Jatudujcxini anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je hudi anajty ti yajjugypicy jadüg'oc. ² Chi ajcxy jim yaj'oyiiy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty müd Jesús iñäy ma je mesi. ³ Chi María conigy tüg libra ujtzipiyñii huidibi anajty ooy oy yxuugy. Tzou je' anajty ooy, je' müd Jesús ytecy yajjaaxtaayi. Chi jada' müd ycöhuay po'ttich. Chi ac ujtzipiyñii yxuugitay tigoty. ⁴ Huin'it je Judas Iscariote je Simón ymang huidibi anajty yhuindzin ciyegam ma ymidzip, je' jadu'n ymínañ:

⁵ —Jac'oy co ixipy ti ndoocim jada ujtzipiyñii oy migo'pxpeexyti jadiib ixipy ajt ayoobitjc nbubejtím.

⁶ Canan paady Judas jadu'n ymínañ co ayoobitjc tzachpa'ayoy. Paady jadu'n ymínañ co ajcxy chachmeedza'ñ. Com je' anajty meeñybijty cuend'ajtp, e chachpuugomyb huidijaty anajty jilby ajcxy yjapidaacyp. ⁷ Chi Jesús nimay je Judas:

—Ixmatz müich yi', hue' yi' yi María ti yujcpicy jada ujtzipiyñii co yajtunañ co anajty naaxtigiyich. ⁸ Com yi' ayoobitjc ajcxy huinixii yi' müich ajcxy müd'idipy. Janch ich ca' ich müich ajcxy müd n'idipy huinixii (ya naaxhuiñ).

Judío ixpicytjic yaj'ögamy anajty Lázaro

⁹ Co ajcxy nejhuüy may judíojäy ajcxy co anajty Jesús yjimity Betania, chi ajcxy nimiñ. E canan müd Jesús ycixpi jeda'ajty, je' anajty ajcxy nañ jadu'n chach'ixaamy je Lázaro huidibi anajty ti jugypicy jadüg'oc. ¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíojäy ajcxy anajty ñayjibijcin, etz tzachmibijccixni Jesús.

Jesús tigiy Jerusalén jadu'n nej tüg rey

¹² Je com jabom je mayjäy huidibi anajty ajcxy ti ymiingixy xii'ajtpi ñejhuüy ajcxy co Jesús anajty ymínañ jim Jerusalén. ¹³ Chi ajcxy cabigy may ytiixy y'aacx, chi ajcxy nidzooñ Jesús, chachmínaangixy:

—¡Dios ajt xyñihuaanim xyajtzoocim! Mimb tüg jäy huidibi Dios ti yconucxyii. Ymüd yi' Dios ymic'ajt, je' je' je judíojäy yrey.

¹⁴ Co Jesús paty tüg burro mang huidibi ca' ni pin yaj'iñaañi, chi yajpejty, chi cuyduuñ jadu'n nej anajty jaybety y'ity ma Dios ñecy co jadu'n ymínañ:

15 —Ca' mdzigi'y miich ajcxy huídibi tziinaayb ma Sión cajp (Jerusalén). Cha je mrey ymiñ y'iñäy ma tüg burro mang.

16 Je huídibi anajty ajcxy Jesús discípulo'ajtyp, ca' anajty ajcxy huinjihuigixy ixti cooni Jesús paty jadüg'oc yí' y'oy'ajtin ymij'ajtin jüby tzajpjoty. Huin'it ajcxy ajihuigooti co jadu'n anajty ycojaayity miid Jesús ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

17 Je jäy ajcxy huídibi anajty ajcxy ymiid Jesús, huin'it co Lázaro ypidzimy ma yajnaaxtigüiyi, e yajjugypijci jadüg'oc, chachyejcy anajty ajcxy tiy'ajt nañ jadu'n huídibi anajty ajcxy ti ijxcixy. 18 Nañ paady ycixpi je mayjäy oy nañ jadu'n yjipcobadíyii, co ajcxy nejhuüy je mijhuinma'ñ huídibi anajty Jesús ytumyb. 19 Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'ócay yí mayjäy axam ajcxy je' panicxcixy.

Nijëjity anajty griegojäy miidmüydägaangixy Jesús

20 Nijëjity griegojäy nañ ti anajty ñicxcixy jim Jerusalén Dios ojadajtpi xijoty. 21 Chi jada' je griegojäy ajcxy nimijhuägy Felipe, huídibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús ich ajcxy nja'ixamy.

22 Chi Felipe oy yajnimay Andrés, chi ajcxy Felipe etz Andrés oy Jesús yajnimay. 23 Chi Jesús ymiñañ:

—Ti je tiempo paady co ich je jäy huídibi tsoon tzajpjoty nyajcömayipyich.

24 Janch janch ich miich ajcxy jadu'n nimaaygixy co jäy nıby tüg mocpajc, e co je mocpajc ymuxy, huin'it yhuindigoy, e chi ytim'ajtni may'amy. Pen ca' ni pin nıby jada mocpajc, ca' ytim'ada'ñ. Jadu'n ich nipaady nej je mocpajc. Copıcy n'ögıbyich, huin'it mayjäy jugy'ajtin paadaangixy huídibi ca' ycixipy ytigoyipy ni mina. 25 Je jäy huídibi ooy nıgi nixondägy yí chinaayın ya naaxhuiñ, yajtigoyamy je' yjugy'ajtin tücci'yı. Per je pin ca'p ooy nijot'aty je chinaayın ya naaxhuiñ, e nixondaaci ooy nıgi Dios y'ayuc, je' y'alma nıdzoocın paadıp ma Dios. 26 Pen ji jäy huídibi naybıdaacıp ma ich, copıcy ajcxy xypanıcxıbyich. Ma ich nyajpaady, nañ jim yí yajpaadıpy nañ jadu'n. Yı jäy pinjaty naybıdaacıp ma ich, Dios Teedy yí cömayıb.

Jesús capxpıdzımy co y'öga'ñ

27 Chi Jesús yjacmiñañ:

—Tájııbyıch mayñıbyıch cham jotjoty huinma'ñyoty. ¿Nej nnımähııbyıch nDeedyıch? ¿Nıhuaangıch ma jada ayo'n tzaachypı huıdıbyı ti yhuaad'ajtnı? Ca' yjadu'nıty. Com paady ycıxpı ti nmııñıch ma jada xıı tiempo, jėbyı ayo'n nyajııbyıch miid jäy ajcxy ypocy ycıxpı. 28 Dios Teedy tun huıdıbyı copıcy, jėbyı jäy ajcxy ijxcıxy miıch mmıc'ajı etz miıch m'oy'ajı.

Huin'it je jäy ajcxy huıdı anajty jim ma Jesús yajpaady mıdooy tüg ayuc choñ tzajpjoty ymiñañ:

—Ti nduñıch mijhuinma'ñ, e ti jäy ıxy ich nmıc'ajı n'oy'ajı. E nañ jadüg'oc ndunıpyıch mijhuinma'ñ, jıgıx jäy ajcxy ijxcıxıpyı jadüg'oc ich nmıc'ajı ich n'oy'ajı (jadu'n Dios y'adzooy y'ung Jesús).

29 Je mayjäy huıdıbyı anajty ajcxy jim, je tııbyı anajty ajcxy mıdoogıxy je ayuc huıdıbyı tsoon tzajpjoty, ymiñañ ajcxy:

—Enee yı' ti yjıdıty.

Jacjadyıı ajcxy ymiñañ:

—Tüg ángel ti ymıgapxyıı.

30 Chi Jesús nimay je mayjäy ajcxy:

—Ca' nmīnaanim mīd ñch ycīxpī jadu'n ti yajmīdoy jadayaabi ayuc huīdibi ti chooñ tzajpjoty. ³¹ Jadachambi jada' Dios yajpocycāhua'ñ naaxhuiñyāy, e nañ ypīgaanīpy je mujcu' ymic'ajt huīdibi ane'mb naaxhuiñyāy ajcxy. ³² Co ñch anajty jāy ti xyajcruudzpetyīch, e co ñch anajty ti njugypīcyīch jadūgtecy, e co ñch anajty ti nhuimbityīch tzajpjoty, huīn'it tūg'ócīy jāy ajcxy huīdibi xymībījcpīch, nyajpa'ttigīhuībīch jīiby tzajpjoty ma nyajpaadyīch.

³³ Paady jadu'n Jesús ymīnañ, jēbi huaad tūg'ócīy jāy ajcxy huīnjīhuīhuīp ti o'cin anajty ypadamy. ³⁴ Chi je mayjāy ajcxy ymīnañ:

—Ma Dios ñecy jīiby jadu'n ymīñ jaybety co je Cristo huīnīxī je' y'ida'ñ. E ¿nej mīich co cham jadu'n mīna'ñ co copīcy co yī jāy huīdibi tzoon tzajpjoty, huīmbīdam jadūgtecy tzajpjoty? ¿Pīn jēdu'n mdījyp huīdibi tzomb tzajpjoty?

³⁵ Chi Jesús nīmay je jāy ajcxy:

—Jahueeni xī tiempo njac'īda'ñīch mīd mīich ajcxy. Jadu'n ñch ndīy'ajt nej tūg jīn huīdibi codīcxp jāy co ytūyōy. Cuychīnāy ñch ndīy'ajt, co tzojc nhuimbīda'ñīch tzajpjoty, e mīich ajcxy mhūī'ma'ñ jadu'n nej jāy huīdibi ca' jīn mīdīty. Je jāy ajcxy huīdibi ca' cuychīnaaygīxy ñch ndīy'ajt, ca' ajcxy nejhuīygyxy ma ñīxcīxy. Jadu'n ajcxy nej jīhuīy yōygyxy coodz, e ca' ijxcīxy ma ñīxcīxy. ³⁶ Com occhaani ñch ma mīich ajcxy, nyaj'īxpījcpīch ñch mīich ajcxy Dios ytīy'ajt. Pen xymībījccīxpīch, m'ījtcīxpī xpīcy ma Dios ytīy'ajtīn.

Co Jesús jadu'n je jāy ajcxy nīmayday, huīn'it Jesús je' ajcxy puhua'ctuutni, chi ñīcxni, e ca' ma y'ocjac'ījxīn.

Je judío jāy ca' mībīga'ñ Jesús

³⁷ Ooy anajty canaag mījhuīnma'ñ Jesús ti jatuuñ ma jāy ajcxy yhuīnduu, e ca' anajty ajcxy ni ti tīm mībījccīxy. ³⁸ Huīdibi Jesús ytun ycapx, jīiby anajty jadu'n ycojayīty ma je Dios y'ayuc necy, je Isaías ñecy, co Isaías jadu'n ymīnañ: Huīndzīn, ca' ni pīn ajt n'ayuc ndīy'ajt ti xymībījccīm. Ca' ni pīn huīdibi huīnjīhuīyīb je Huīndzīn Dios ymic'ajt.

³⁹ Ca' anajty ajcxy huaad ymībījccīxy, com nañ ti anajty jadu'n Isaías jay ma jadu'n ymīnañ:

⁴⁰ Jadu'n yī' ajcxy nej jīhuīy Dios ti yajhuīndzīygyxy, e ti yajjotjunīygyxy, jīgīx ca' y'ījxcīxīpy mīd yhuīn, e mīd yjot yhuīnma'ñ ca' huīnjīhuīyīgyxy, ni ycajothuīmbījtcīxīpy nej jēbi Cristo yajtzóocīgyxy.

⁴¹ Paady jadu'n Isaías ymīnañ je' co anajty ti ijxī Cristo y'oy'ajt, e chi cojay nej anajty ti īxy.

⁴² Ca' nīdūg'ócīy judío xpīcytījc mījotmādy anajty Jesús. Jīm anajty nījēty huīndzīndījc huīdibi mībījcp Jesús. Per mīd je fariseojāy ycīxpī co chachjotma'tcīxy, paady anajty ajcxy ca' capxpīdzīmgyxy co mījpīdaaccīxy Jesús. Je' co chīgīygyxy co jīm yajpīdzīmīyb ajcxy tūccī'yī ma Dios ytījc, etz ma yī judío ñaymujctac. ⁴³ Jacnīgī anajty tzojccīxy co huen jāy cōmāayīgyxy, ca'ydi co ajcxy Dios ycōmayīyb.

Dios yajpocycāhuīp je mayjāy mīd Jesús y'ayuc

⁴⁴ Chi jada' Jesús ymīnañ mīc:

—Je jāy ajcxy huīdibi xymībījcpīch xymījpīdaaccīch, camīnaanim ñch naydūg xymībījcpīch xymījpīdaaccīch, nañ ymībījcpīch ymījpīdacyp ajcxy je tībī ñch ya naaxhuīñ xyquexyīch. ⁴⁵ E je jāy huīdibi xy'ījxpīch, tīm jadu'n nīpaady nej jīhuīy ti īxy je huīdibi ti xyquexyīch. ⁴⁶ ñch ti nmīmīñīch ya naaxhuīñ Dios ytīy'ajt, jadu'n ñch nīpaady nej jīhuīy tūg jīn huīdibi codīcx je jāy ajcxy. Je jāy ajcxy huīdibi xymībījcpīch ca' ajcxy yhuī'mīpy jībīctuuby, jadu'n nej jīhuīy ca' ajcxy chīnaaygyxy agootztuuby. ⁴⁷ Je jāy ajcxy huīdibi mīdoob ñch n'ayuc, e ca' cuydungīxy, ca'p je' ñch je' ypocy

ajcxy n'ixyöyaani nbayöyaani cham. Ca'p ñich ti nmiiñich ya naaxhuiñ mïd co jäy ajcxy ndzaachytunipyich mïd ypcocy ycixpi. Paady ñich ti nmiiñich ya naaxhuiñ co nyajpocynñihuädza'ñich yi jäy ajcxy. ⁴⁸ Je jäy ajcxy huïdibi xycapxhuimbijtibich n'ayuc, e ca' xycöbiga'ñich, ymïd ajcxy huïdibi yajpocycähuïb. Yi ayuc huïdibi ti ngapxyich, yi' yajpocycähuïb ajcxy co anajty naaxhuiñybi ti yhuaad'ajtni co Dios anajty yajtigatzaani. ⁴⁹ Com ñich ca' ngi'm'ayuc ngapxhuäcxyich. Je' je' Dios Teedy y'ayuc, je huïdibi ti xyquexyich, yi' ngapxhuäcxibich y'ayuc. Je huïdibi ti xyquexyich ya naaxhuiñ ti xyñajtzcapxñyich yi' y'ayuc, jada ayuc ngapxhuäcxypich nyajnimaaaygixyp. ⁵⁰ E nejhuñyibich co Dios y'ayuc ytiy'ajt ymimimyb yi' tzinaayin jugy'ajtin huïdibi ca' tücc'yi ycixy ytigoy. Paady ycix je ayuc huïdibi ajcxy nyajmïdmïydacyp, jadu'n nyajmïdmïydaaccixy nej Dios Teedy ti xyajnajtz'ane'mïyich.

13

Jesús ypuji ydiscípulos ajcxy ytecy

¹ Ca'ni anajty xii paady, pascuaxii anajty ajcxy tijy. Chi Jesús ñejhuñyb co anajty yxii ytiempo yhuaad'ajtni mina chonaani ya naaxhuiñ yhuimbidaani ma Dios Teedy. E Jesús ooy anajty tzocy jihuñy ymigügtijc ajcxy huïdibi ya naaxhuiñ anajty ajcxy huï'mañ. Jadu'n tzocy jihuñy huinixii.

² Chi jada' Jesús etz ymigügtijc ytigñy ajcxy adzoo'ajtp (je pascuaxii adzu'ajtin). Ti anajty je mujcu' huinma'ñymöy Judas Iscariote, Simón ymang, co anajty Jesús cïyega'ñ ma ymidzip ajcxy. ³ Ñejhuñyb anajty Jesús co je Dios Teedy ti yajcïdigiyii tüg'óciy ymic'ajt, e Jesús nañ ñejhuñyb anajty co je' ti choon ma Dios y'it, e nañ jiiby anajty jadüg'oc yhuimbida'ñ. ⁴ Chi ypidïgy ma mesi, chi je yoñybi yhuït ñayyajnjenduutti. Chi huijtzïgy tüg huit huïdibi mïd ñaymextitzi nayböttitzi, ñayyajmïjxojtzpejti yhuindïy. ⁵ Co jadu'n ñayñi'ixñy, chi pidacy nii ma tüg cibujï'ñyboc. Chi nihuägñy ydiscípulos ajcxy ytecy. Chi yajtzondacy tecypujï tüg tüg, e mextich pöttich mïd je huit huïdibi anajty ti ñayyajhuindiyïy.

⁶ Co nihuägñy Simón Pedro ytecy, chi Pedro yminañ:

—Huindzin, ca' huaad miich ndecy xypujich.

⁷ Chi Jesús y'adzooy:

—Huïdibi ñich ndumyb ca' yi' miich ajcxy mhuinjihuñygyixy jadachambi, jaccomjey miich ajcxy mhuinjihuñy.

⁸ Chi Pedro y'adzooy:

—Miich ca' huaad ñich ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' ñich miich jëbi njäy'adyii.

⁹ E huin'it Pedro nimay Jesús:

—Huindzin, ca' ñich jëda'ajty ndecy xypujibich, hue' janchtiy tüg'óciy ngñich etz ngohuajcich.

¹⁰ Chi Jesús nimay Pedro:

—Com tiibi mjot mhuinma'ñ yajhuäch, ca' yi' ocjactzojcnï yajhuädziipy mjot mhuinma'ñ jadügtecy. Tim jadu'n nej jihuñy naamni chïy, e cham ca' tzojcnï yajtzihuñyibich jadügtecy. Jëda'ajty mdecy nbujich cham. Miich ajcxy huädz mjot mhuinma'ñ ajcxy mmïdiñ, oy ca' miich ajcxy nidüg'óciy.

¹¹ Com Jesús ñejhuñyb anajty pinjäy cïyegaanip ma ymidzip, e paady jadu'n yminañ:

—Ca' ni tüg'óciy miich ajcxy mjot mhuinma'ñ yhuädziy.

12 Chi jada' co yajtecypujtay, chi jada' yoñyhuit yajtigüy jadüg'oc. Y'ixtacy ma mesi, e chi jada' nimay ajcxy:

—¿Nej mhujnjihuüyb ajcxy ti ñich ti nduñich müd miich ajcxy? 13 Miich ajcxy jadu'n minamb co ñich miich ajcxy myaj'ixpijcy, etz ñich miich xyhuindzin'ajtpich. E tıydudägy miich ajcxy mina'ñ com ñich jedu'n miich ajcxy mHuindzin. 14 Pen ñich miich ajcxy nyaj'ixpijcy etz xyhuindzin'ajtpich, e ti ñich miich ajcxy nyajtecypujy, nañ jadu'n miich ajcxy myajtecypujüyb miñ xyipy. 15 ñich miich ajcxy ti nmöy tög iixpejt, jigix ajcxy jadu'n mdunıpy jadu'n nej ti nduñich, e huin'it ca' amıj agıx nayjihuihuüyb ajcxy. 16 Janch janch ñich miich ajcxy yam jadu'n nnımäy co je huindzin jac mıj je' ca'ydi yi' ytumbı. E nañ je' huidibi yajquejxyöyb jac mıj je' ca'ydi huidibi quejxyöyb. 17 Co ajcxy tıy'ajt mnejhuıhuıpy, chi jotcuyc ajcxy m'idıpy, pen mbadumyb ajcxy jadu'n nej nduñich.

18 Ca' nmina'ñich co nidüg'ócıy miich ajcxy mbocymıdıty. Ti ñich yi' nnejhuıy pın ti nhuin'ixyich. Ti nhuin'ixyich tög huidibi pocymıd, jigix cuyduunıp nej anajty yjaybetyıty ma Dios ñecy ma je Cristo jadu'n ymina'ñ: “Yi' huidibi caymujcp müd ñich, ti ñich yi' xymıbidıgy.” 19 Ti ñich yam miich ajcxy jayıp nyajnimaaıgyıx, jigix co anajty jadu'n ytunyıı yjadyıı, mmıbıgıpy ajcxy co ñich jedu'n je Cristo. 20 Janch janch yam ajcxy jadu'n nnımaaygyıx co je jäy ajcxy huidibi cöbıjcp je huidibi anajty nguejxypıch, tım jadu'n nıpaady jadu'n nej ñich anajty xycöbıjcyıch. E je jäy ajcxy huidibi xycöbıjcpıch, je' ajcxy anajty ycöbıjcyıp je' huidibi xyquejxıch ya naaxhuiñ.

Jesús ñımay ymıgügtıjc co je Judas anajty cıyegaanıp ma ymıdzıp

21 Co jadu'n Jesús ymina'ñ, chi tajnıp mayñıp anajty ooy jotjoty huınma'ñyoty, chi capxypıdzımy:

—Janch janch ñich miich ajcxy yam jadu'n nımäy co nidügtı miich ajcxy xcyıyega'ñich ma nmıdzıpıch.

22 Chi Jesús ydiscıpusos ajcxy ñayhuındıcxpejttaayı nidüg nidüg. Ca' anajty ajcxy nejhuıy pın anajty jedu'n Jesús ytıjyp. 23 Nıdügtı je' ajcxy huidibi anajty Jesús ooy müd ñaychogyıı iñäy anajty ma mesi tım huıngon ma Jesús yhuınduu. 24 Chi Simón Pedro yci' yaj'ıjxy yajhuınjihuiy co huen yaj'amıdooy Jesús pın anajty jadu'n ytıjyp. 25 Chi je discıpusos ajcxy huidibi anajty iñäyb ma Jesús yhuınduu nımay yhuındzin:

—¿Pın jadu'n mdıjyp?

26 Chi Jesús y'adzooy:

—Yi' je' pın anajty ñich nmooybıch yi' tzajcaagy huidibi anajty nyajxoopyıch ma je ügy.

Chi yajxoogy tög pedası tzajcaagy, chi moy je Judas, je Simón Iscariote ymang. 27 Tım huın'ıtıy co Judas je tzajcaagy cöbıjcy, chi je mujcu' ytıgıy ma je' y'ay yjot. Chi Jesús nımay Judas:

—Yı' huidibi mdunamyb, tungo jadu'n mıc'amy.

28 Huidıjaty anajty ajcxy jim caayb, ni pın cahujnjıhuıy je ayuc huidibi Jesús yajnimay Judas, nej je ayuc yhuımbıdzımy. 29 Com je Judas anajty müd je meeñybıjty, paady ajcxy nıjıjıty huınjihuiy co anajty tıjy ñımäyıı:

—Nıcx juy yi' huidibi ajt nyajmayjajtım yi' xııgıxpi.

Jacjadyıı ajcxy anajty tıjy ñımäyıı:

—Mo' tıgatıı ayoobıjıj. 30 Tım huın'ıtıy co je tzajcaagy cayday, chi ypidzımy Judas tıba'y, e ti anajty ycoodzyıñı.

Jesús ñajtz'ane'mıy jemybı cötujcın

31 Co Judas ypidzımy, chi Jesús ymina'ñ:

—Cham je jäy ajcxy ixa'ñ ñich nmic'ajt ñich n'oy'ajt, ñich je jäy huidibi tzoon tzajpjoty. Etz nañ ma ñich je jäy ajcxy ixa'ñ Dios ymic'ajt Dios y'oy'ajt. ³² Jadu'n nej je jäy ajcxy ti ijxcixy Dios ymic'ajt ma ñich, nañ tim jadu'n Dios yajniguëxigipy yi nmic'ajtich n'oy'ajtich tim mic'amy. ³³ Migügtijc huidibi ooy ndzocy njihuïyich, ca' n'ochuäcxibaanich jecy mïd miich ajcxy. Xy'ixtähuibich miich ajcxy. Jadu'n nej ti nnimáaygixyich yi jacjadyii judíojäy ajcxy, nañ jadu'n ñich miich ajcxy yam njacnimaaygixy co ma nñicxa'ñich, ca' huaad miich ajcxy jüby mñicxcixy. ³⁴ Cham ajcxy nmöhua'ñ tüg ané'min huinjemybi. Cham miich ajcxy nyajnajtz'ane'mihuaangixy jadüg'oc jadayaabi t'y'ajt: Naychójcigix nayjihuíyigix ajcxy nidüg nidüg, tim jadu'n nej ñich miich ajcxy ti ndzocy ti njihuïy. Naychójcigix nayjihuíyigix aguipxyi. ³⁵ Mïd jada ycipxi ñejhuïhuipy tüg'ócüy jäy co ñich miich ajcxy ti nyaj'ixpijccixy co ajcxy nidüg nidüg mnaychogüyb mnayjihuíhuïyb.

Jesús ñimay ymigügtijc co je Pedro anajty coyüdzaanip

³⁶ Chi Pedro ñimay:

—Huindzin, ¿ma miich mñicxa'ñ?

Huin'it Jesús y'adzooy:

—Ma ñich mñicxa'ñich miich ca' huaad xypanicxyich. Jac'axam xypanicxibyich.

³⁷ Chi Pedro ymïnañ:

—E ¿nej co ca' huaad jëbi ñich miich nbanicxy? com ñich ngïyegamyich njugy'ajtin ma yi o'cin mïd miich ycipxi.

³⁸ Chi jada' Jesús y'adzooy:

—¿Nej janch co mgïyega'ñ yi mjugy'ajtin ma yi o'cin mïd ñich ycipxi? Janch janch ñich miich ajcxy yam jadu'n ñimäy, co ni ca'ni anajty jabom tugüg'oc tzey yaaxigy, co ñich miich anajty tugüg'oc ti xycoyüchich.

14

Pinjaty mïbijcp Jesús nïcxiip ma Dios Teedy yajpaady

¹ Chi Jesús yjacmïnañ:

—Ca' ajcxy jotmay mjihuïy ma m'aa mjot mïd jada ayuc. Mïbic ajcxy Dios etz ñich nañ jadu'n mïbijccich. ² Jüby ma ñich nDeedy chinäy, jüby mïjtigiydac. Co ixypy ca' yjadu'nity, ca' ixypy ti nnimaaygixy co nñicxyich ma nDeedyich n'ocni'ixiy tzinaaydac mïd miich ajcxy ycipxi. ³ E co ñich anajty ti nba'ttigïyich, e ti ni'ixiyich tzinaaydac jayijp mïd miich ajcxy ycipxi, huin'it ajcxy nihuimbipy, jëbi ñich ajt naydügmujcim, jigix ma anajty n'ityich, nañ jüby miich ajcxy m'idipy. ⁴ Miich ajcxy mnejhuïyb nej jëbi ajcxy mjädip ma nñicxyich oyduuby.

⁵ Chi Tomás ymïnañ:

—Huindzin, ca' ñich ajcxy nejhuïygixy ma miich mñicxa'ñ, e ca' ñich ajcxy nnejhuïygixy nej jëbi njá'tcixibyich jüby.

⁶ Chi Jesús y'adzooy:

—Jadu'n nej ti ndzinäyich jada je' je ijxpejt nej Dios tzocy co miich ajcxy mdzinähuipy. Nyejcpyich je t'y'ajt huidibi jëbi huaad mguychinaaygixy. Co jadu'n mguydundáyigixipy ñich ndiy'ajt, chi mjá'tcixipy ma Dios. Nyejcpyich je jugy'ajtin huidibi ca' tücci'yi ycixy ytigoy. Ca' ni pinjäy yjädiipy ma Dios Teedy, peni ca' cuydundäy ñich ndiy'ajt. ⁷ Jadachambi etz nej xii tiempo yjacnïcxa'ñ miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ich ajcxy yi Dios Teedy yaj'ijxcich cham cham, e mid tim yi'yi jotcuyc'adipyich ajcxy.

⁹ Paady Jesús nimay je Felipe:

—Cham xii jimijt ñicxni maabi ich nja'ityich mid miich ajcxy, e ca'ni miich xytimy'ijxhui'myich Felipe? Yi jäy ajcxy tibi xy'ijxcixyich, nañ y'ijxyp ajcxy yi' Dios Teedy. E chi jada', nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ich n'ity ma Dios Teedy, e Dios Teedy ijtp ma ich? Yi ayuc huidibi ngapxhuäcxypich, ca' yi' ngi'm'ayuc'adyiich ngi'mdiy'ajt'adyiich. Yi mijhuinma'ñ huidibi ajcxy m'ijxyp ndumyibich, yi Dios Teedy huidibi ijt ma ich, yi' jadu'n tumb. ¹¹ Mibijccich ajcxy co ich n'ityich ma Dios Teedy, e Dios Teedy ijtp ma ich. Peni ca' mdimmibigaangixy, mibic ajcxy mid je mijhuinma'ñ ycixpi huidibi ti nduñich. ¹² Janch janch ich miich ajcxy jadu'n nimaaygixy co je jäy ajcxy huidibi xymibijcpich, nañ ytunipy ajcxy nañ jadu'n yi mijhuinma'ñ huidibi ti nduñich. Jac tim nigi tunipy mijhuinma'ñ, com ich nnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy mid ich nxi, ndunipyich yi'. Dios Teedy huidibi nDeedy'ajtypich, je' cömay y'idip mid huidibi miich anajty ajcxy mdumyb mid ich nmic'ajt. ¹⁴ Co myajmibijctzohuipy tijaty, xycapxpáatibich nxi, huin'it nguydunipyich huidibi anajty ti mbijctzoogixy.

Jesús yquexamy Dios yjihu'ñ ymic'ajt

¹⁵ Peni xychojcpich miich ajcxy, cuydúnicich ajcxy tüg'óciy n'ayuc ndiy'ajt, jadu'n nej anajty ti najtz'ane'miyich. ¹⁶ E co ndzóonibyich, chi nbijctzóohuibyich yi Dios Teedy jadüg yjaymid huidibi ajcxy xyjaymid'adib. Dios ajcxy xymöhuipy jadüg jaymid huidibi ajcxy xycapxhuijip, je huidibi ajcxy mjet'amij'adib, e je' xymid'idipy ajcxy huinixi. ¹⁷ Je huidibi xycapxhuijip, je' jada'ajty Dios yjihu'ñ ymic'ajt, je Espiritu Santo. Je' Dios ytiy'ajt ymid. Dios yjihu'ñ ymic'ajt ca' adigihua'ñ yi naaxhuiñjyáy huidibi ca' xymibicyich. Com ca' ajcxy ixy, e nañ ca' ajcxy ixy'adyi je Espiritu Santo. Miich ajcxy m'ixy'ajtyp je Espiritu Santo, com je' tzinaayb ma miich ajcxy, e nañ xy'adigihuipy xyjottigihuipy ajcxy. ¹⁸ Ca' miich ajcxy nyajhui'maangixy naydüg jadu'n nej co'ögy'ung. Nnihuimbipyich miich ajcxy jadügtecy. ¹⁹ Tim huingónip yi xii tiempo mina yi jacjadyi naaxhuiñjyáy ajcxy ca' xy'ocjac'ijxnbich. Com jadu'n nej ich njactzinähua'ñ, ca' ich njugy'ajtin ycixipy ytigoyipy tücci'yi. Nañ jadu'n miich ajcxy mjactzinähua'ñ, ca' mjugy'ajtin ajcxy ycixipy ytigoyipy tücci'yi. ²⁰ Co anajty Dios yjihu'ñ ymic'ajt ajcxy xy'adigiy xyjottigiy, huin'it ajcxy mnejhuipy co nyajpaadyich ma nDeedyich, yi Dios Teedy, e miich ajcxy myajpaady ma ich, e ich nañ jadu'n yajpatpich ma miich ajcxy. ²¹ Je jäy ajcxy huidibi ich n'ayuc ndiy'ajtich xycöbijcip, e cuydungixy, je' je' jadu'n xychojcpich, e tzogib je' ich nDeedy. E ich nañ jadu'n ndzogipy njihu'huibyich je' ajcxy, e nnayajniguëxigibich ma je' ajcxy.

²² Je jadügpí Judas, ca' mninaanim Judas Iscariote, nimay Jesús:

—Huindzin, nej co mnayajniguëxiga'ñyii ma ich ajcxy, e ca' mnayaj-niguëxiga'ñyii ma je jäy ajcxy huidibi ca' xymijpdägy?

²³ Chi Jesús je' y'adzooy:

—Yi jäy ajcxy huidibi xychojcpich xyajmij'ajtpich, xycuyduunibich yi' ajcxy ich n'ayuc ndiy'ajt. E huin'it yi' ajcxy chogiyb ich nDeedy. Je nDeedyich etz ich miinip ich ajcxy ma je jäy ajcxy huidibi xycuyduunip ich ndiy'ajt, e tzinaydacpigipyich ma yi' ajcxy yjot yhuinma'ñ. ²⁴ Je jäy ajcxy pinjaty ca' xychocyich, nañ ca' ajcxy ich n'ayuc xycuyduunich. Paady ca'

nnayyajniguëxiga'ñyijich ma je' ajcxy. Com yi ayuc huídibich miich ajcxy nyaj'amido'ijtyp, ca' yi' ñich ngi'm'ayuc'adyii. Yi' je' Dios Teedy y'ayuc ytiy'ajt, com yi' ñich ya naaxhuiñ xyquejxich.

²⁵ Jadayaabi ayuc ajcxy cham jadu'n njacyajnimaaayb, jadu'n nej njacyaanigyich ya naaxhuiñ miid miich ajcxy, ma ca'ni ndzooñich. ²⁶ Per je Espíritu Santo huídi miinam, je' ajcxy xycapxhuijp. Dios Teedy yquexamy je Espíritu Santo miid ñich nxi. Je Espíritu Santo xyajnejhuiydáhuipy miich ajcxy tüg'óciy tiy'ajt, e nañ xyaj'ajihuihuib tüg'óciy jadu'n nej ñich miich ajcxy nnimaaygixy.

²⁷ ñich miich ajcxy nyajmihui'my jotcuyc'ajtin. Jadu'n nej ñich njotcuyc'atyich, nañ nyajjotcuyc'adipyich miich ajcxy. Yi jotcuyc'ajtin huídibi nyajmihuímaamyich miich ajcxy, ca' yi' yjadu'nity nej je jotcuyc'ajtin huídibi yajpaatp ya naaxhuiñ. Ca' mdajcixy maygixy, nañ ca' mdzigíygyxy. ²⁸ Ti ñich miich ajcxy nnimaaygixy jayjip'aty co ndzonañich ma miich ajcxy, e nhuimbidañich jadüg'oc ma miich ajcxy. Peni xychojcpich miich ajcxy, mxondägipy ajcxy co nñicxa'ñich ma Dios Teedy, com yi Dios Teedy jac mij yi' ca'ydi ñich. ²⁹ Ti ñich jada tiy'ajt jayjip nimiydägyich ma ca'ni ndzooñich, jigix co anajty je tiempo paady mina jadayaabi ytuníyb yjadíyb, huin'it ajcxy mmibigipy ñich n'ayuc.

³⁰ E ca' ñich miich ajcxy mijcajee ooy njacmídmíydägaangixy yam. Com tím huingónip mina je mujcu' huídibi ane'mb ya naaxhuiñ xyñiminañich. Ca' ñich yi' huaad jébi xymímadägyich. ³¹ Per copicy yi' nguydunípyich Dios Teedy y'ayuc nej xyajnajtz'ane'míyich, jigix je naaxhuiñyáy nejhuíhuipy co nyajmij'atyich yi Dios Teedy. Pidíccix, tzoc'ajt huingduum jamim.

15

Je camuuxy'aadz etz y'aacx

¹ Chi Jesús jacnimay ydiscípulos ajcxy:

—Jadu'n ñich nipaady nej camuux'aadz ma tüg muuxy'aadz cam. ñich nDeedy, yi Dios Teedy, jadu'n yi' nipaady nej je muuxy'aadz cam cuend'ajtpi.

² Tüg'óciy jáy jadu'n ajcxy nipaady nej muuxy'aadz y'aacx. Je jáy ajcxy huídibi ca' cuychinäy ñich ndiy'ajt, yi Dios Teedy yajcödígoyíib, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huídibi ca' ytím'aty. Je jáy ajcxy huídibi cuydundaayb ñich ndiy'ajt, Dios yaj'oyíib je' ajcxy yjot yhuinmañ, jébi oybi tuñ, jadu'n nej je muuxy'aadz cam cuend'ajtpi huijtz'oyíy je muuxy'aadz y'aacx, jigix jébi nígi ytím'aty. ³ Yi ayuc huídibi ti nyajnimaaaygixy, yi' ti yajhuäch yi jibicpi ma miich ajcxy mjot mhuinmañ. ⁴ Mibijccich ajcxy, panícxigich ajcxy ndiy'ajt huinixí. Co ajcxy jadu'n mdunípy, ñich miich ajcxy miid'idípy huinixí. Jadu'n nej ixipy camuuxy'aadz y'aacx co ca' ytím'aty co ahuinggujc y'ity, e ca' mic'ajt paady ma ycop. Nañ tím jadu'n miich ajcxy pen ca' mmic'ajt mbaadipy ma ñich, ca' mmímadáaccixipy mguychináaygixipy ñich ndiy'ajt.

⁵ Jadu'n ñich nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jáy ajcxy huídibi yajpatp ma ñich, e ñich nyajpaady ma je' ajcxy, je' ajcxy oyhuinmañ tunam mij cajee, tím jadu'n nej camuuxy'aadz huídibi tím'ajtp may'amy. Co ixipy ñich ca' nyajpaady ma miich ajcxy, ca' miich ajcxy huaad ti mdungixy. ⁶ Co jáy ajcxy ndiy'ajt xy'ixmájtzbich, Dios ajcxy yajcödígoyíib, tím jadu'n nej jáy yajcödígoy miid jín yi muuxy'aadz y'aacx huídibi ymíbuxíyb co ca' ytím'ajtni. Co je y'aacx ytídzity, chi ajcxy yajmucy, e pídaaccixy jínjoty, e jadu'n jiiiby ñídoiyíy jínjoty.

⁷ Co miich ajcxy m'ijtcixy ma ñich, e co ñich n'ayuc nañ jadu'n ijtp ma miich ajcxy mjot mhuinma'ñ, jëbi mbijctzoogixy ti ajcxy mdzojcp ma Dios, e nguydunipyich mïd miich ajcxy ycixpi. ⁸ Chi je jäy ajcxy cömayipy Dios co miich ajcxy mguydunipy ñich ndiy'ajt tiydudägy, tim jadu'n nej camuuxy'aadz y'aacx ytim'aty may'amy. Co je jäy ajcxy ixipy nej tudägy mguydungixy ñich ndiy'ajt, chi je jäy ajcxy tiydudägy nejhuñhuipy co ti nyaj'ixpicyich miich ajcxy. ⁹ Jadu'n nej Dios Teedy xychocyich xyjihuiyich, nañ tim jadu'n ñich miich ajcxy ti ndzocy ti njihuïyich. Ndzogipy njihuïhuïbyich miich ajcxy huinixii co ca' ajcxy xy'ixmájtzybyich ndiy'ajtich. ¹⁰ Co mguydundähuipy ajcxy jadu'n nej nyajnajtz'ane'müygixy, ndzogipyich njihuïhuïbyich miich ajcxy huinixii. Tim jadu'n nej nguyduñich yi huidibi Dios Teedy xyajnajtz'ane'müybich, e yi' xchojcpich xyjihuiybich huinixii.

¹¹ Cham jadayaabi ayuc nyajnajtz'ane'müygixy, jigix jotcuje m'ijtcixipy. Jadu'n nej jotcuje ti n'ityich, e nañ jadu'n miich ajcxy mjotcuje'adipy anaxy. ¹² Jadaabi ayuc ñich miich ajcxy nyajnajtz'ane'müybich co naychójcigix nayjihuiyigix nidüg nidüg, tim jadu'n nej ñich miich ajcxy ndzocy njihuïy. ¹³ Je tiy'ajt jac'oybi co migügtijc ajcxy naychogüyb nayjihuihuïyb, co tüg jäy cïyegipy yjugy'ajtin mïd ymigügtijc ycixpi. ¹⁴ ñich miich ajcxy migüg'ajtyp, pen mguydumyb nej ajcxy nyajnajtz'ane'müygixy. ¹⁵ Jadu'n nej xii tiempo yjacnicxa'ñ, ca' miich ajcxy n'ocnaydijnip ñich ndumbi. Com je tumbi ca' huinjihuïy huidibi yhuindzin ytumyb. Hue' miich ajcxy nyajnaxyich nmigügtijcich, com tüg'óciy tiy'ajt tiibi nmidooyich ma ñich nDeedy, yi Dios Teedy, ti ñich miich ajcxy nnimaaygixy. ¹⁶ Ca' nminaanim ñich miich ajcxy ti xyhuin'ixy. ñich miich janchtiy ajcxy ti nhuin'ixy. E ti ñich miich ajcxy nyajnbicy co nicxy mgapxhuäcxixy ñich n'ayuc. E nañ mayjäy mijpidägipy je ayuc huidibi miich ajcxy mgapxhuäcxipy. E nañ ñich n'ayuc, huidibi miich ajcxy mgapxhuäcxipy, y'idipy ma je jäy ajcxy yjot yhuinma'ñ huinixii. Paady ycix tüg'óciy tijaty miich ajcxy mbijctzooyb ma Dios Teedy mïd ñich nxi, yi' ajcxy xymöhuipy. ¹⁷ Jada ayuc ajcxy yam nyajnajtz'ane'müyb co ajcxy mnaychogüyb mnayjihuihuïyb miñ xyipy.

Je maybi naaxhuiñjyäy ca' ajcxy ixaangixy Jesús etz cham je' yjäy

¹⁸ Co je may naaxhuiñjyäy ca' xy'ixaangixy miich ajcxy, ca' ajcxy ooy mhuinmayipy, com mnejhuïyb ajcxy co ñich nañ jadu'n jac jayijp ca' yi' ajcxy ti xy'ixáangixyich. ¹⁹ Co ixipy ytügiy miich ajcxy m'ayuc mdiy'ajt mïd je jacjadyii naaxhuiñjyäy y'ayuc ytiy'ajt, huin'it ixipy ajcxy xchojccixy xyjihuiyigixy, com tú'ciy miich ajcxy mhuinma'ñ ixipy mïd yi' ajcxy yhuinma'ñ. Janch com co ca' ytügiy miich ajcxy m'ayuc mdiy'ajt mïd je jacjadyii naaxhuiñjyäy y'ayuc ytiy'ajt, paady je jacjadyii naaxhuiñjyäy ca' ajcxy xy'ixa'nip. Com ñich miich ajcxy ti nyajjijphuijztüdy, jadu'n nej yi' jacjadyii naaxhuiñjyäy ajcxy chinaaygixy yjugy'ajtcixy. ²⁰ M'ajihuïhuïb ajcxy jadu'n nej ti nnimaaygixy co ñich miich ajcxy xyhuindzin'ajtpich, paady jac mij ñich ca'ydi miich ajcxy. Jadu'n nej naaxhuiñjyäy ajcxy ti xy'ixhuidityich ti xypahuidityich, nañ jadu'n miich ajcxy yi' xy'ixhuidida'ñ xypahuidida'ñ. Nañ may je jäy huidibi ca' ti xycapxymidooyich, nañ jadu'n may je jäy huidibi miich ajcxy ca' xycapxymidohuaangixy. ²¹ Nijot ajcxy y'iditzaangixy mïd miich ajcxy ycixpi, com ca' ajcxy ix'yadyii Dios Teedy huidibi xyquejxyich ya naaxhuiñ.

²² Co ixipy ca' ti nmiiñich ya naaxhuiñ nyajnimäyich je jäy ajcxy Dios ytiy'ajt, ca' ixipy ajcxy pocy mïdity. Per com ti nmiiñich ya naaxhuiñ, paady cham ypocy ajcxy mïdity co ca' ajcxy xy'ixa'ñich. ²³ Je jäy ajcxy huidibi

ca' xy'ixa'ñich, jadu'n nipaady nej ñich nDeedy ca' ajcxy ixaangixy. ²⁴ Co ixyipy ñich ca' ti nduñich ma yi ajcxy yhuinduu mijhuinma'ñ, huídibi ca' ni pin jäy tuñi, ca' ixyipy ajcxy pocy mñidity. E janch ti ajcxy ooy ja'ijxcixy je mijhuinma'ñ, e ca' ñich yi' ajcxy xy'ixa'ñ, e nañ ca' ixaangixy ñich nDeedy. ²⁵ Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi judíojäy ajcxy ley ñecy, ma jadu'n ymína'ñ: “Ni ti tiy'ajt ycaca'ty, co ñich yi ajcxy ca' xy'ixa'ñich.”

²⁶ E co anajty xyñigidaaccixy yi Espíritu Santo, yi huídibi xycapxhuijip ajcxy, je huídibi miich ajcxy nyajniguexam, chon ma Dios Teedy, je huídibi Dios ytiy'ajt mñid. Yi' xyñidiy'ajt'adaambich co Dios ytiy'ajt nmñididyich. ²⁷ E miich ajcxy nañ jadu'n xyñidiy'ajt'adipich co Dios ytiy'ajt nmñididyich. Com ñich miich ajcxy jayijp nyaj'ixpijctzondac Dios y'ayuc ytiy'ajt.

16

¹ Ti ajcxy yam tiy'ajt njacyajnimaaaygixy, jigix ca' ajcxy m'ixtigihuägipy. ² Com judíojäy ajcxy xy'ixhuidzipy ajcxy ma ajcxy yi' ñaymujctac. Ypadaamy yi xii tiempo co miich ajcxy jäy xyaj'ögipy, hue' ajcxy tijipy co Dios anajty ooy jadu'n jäygidägy tñibi anajty ajcxy tuñ. ³ Paady ajcxy jadu'n xytunipy jibic, je' co ajcxy ca' ixy'adyii yi Dios Teedy, etz nañ jadu'n ca' xy'ixy'adyiijich. ⁴ Paady ñich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuñhuñyb ajcxy co ti anajty jayijp nnimaaygixy co ayo'n tzaachypí mminaxa'ñ myajnaxa'ñ ajcxy.

Dios yjihu'i'ñ ymic'ajt tunam ma jäy yjot yhuinma'ñ

Ca' anajty ajcxy jada ti nyajnimäy mñid jëgix nmñid'ity ajcxy. ⁵ E cham janchtiy nnicxáanibich ma yi huídibi ti xyquexyich ya naaxhuiñ. E ni tüg miich ajcxy xyca'amidooyich: “¿Ma mñicxa'ñ?” ⁶ Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjihuñyigixy. ⁷ Oy ixyipy miich ajcxy cham mjatajy mjamay, tiy'ajt nej nmína'ñich co jac'oy mñid miich ajcxy ycixpi co nhuimbidipyich ma Dios Teedy. Co ixyipy ca' jiiby nnicxa'ñich tzajpjoty, ca' ixyipy xyñiminaangixy Dios yjihu'i'ñ ymic'ajt, je Espíritu Santo, je huídibi ajcxy xycapxhuijip. Per co ñich anajty tzajpjoty ti nhuimbity, huin'it ñich yi' miich ajcxy nyajniguexipy. ⁸ E co anajty je Espíritu Santo miñ ya naaxhuiñ, huin'it yi' yajjihu'i'ñybigipy jäy ajcxy ypocy. E nañ yajni'ixihuipy je jäy ajcxy co Dios tiydunib mñid ypocy ycixpi. ⁹ Yi Espíritu Santo yajjihu'i'ñybigipy jäy ajcxy ypocy, co ñich ca' ajcxy ti xymibicy ca' ajcxy ti xymijpidägyich. ¹⁰ Je Espíritu Santo yajnejhuñhuipy jäy ajcxy nej huaad cuychinaaygixy Dios y'ayuc ytiy'ajt. Com co ñich nba'ttigihua'ñich ma Dios Teedy, e miich ajcxy ca' xy'ocjac'íxnibich. ¹¹ Je Espíritu Santo yajhuinjihuñhuip je jäy ajcxy co Dios tiydunib ajcxy mñid ypocy ycixpi huídibi ajcxy ca' tiydudägy chinaaygixy. Com yi Dios ti yi' mujcu' tiyduñ mñid ypocy ycixpi.

¹² Ooy may ayuc ñich nmñidity huídibi njayajnimähuaamyich ajcxy per ca' miich ajcxy mhujinjihuñhuipy cham. ¹³ Jacjiini mhujinjihuñhuipy ajcxy je ayuc huídibi njayajnimähuaamy ajcxy, co Dios quexipy je Espíritu Santo ya naaxhuiñ huídibi tiy'ajt mñid. Yi' je' miich ajcxy xyajhuinjihuñhuipy tüg'óciy Dios ytiy'ajt. Com yi' ca' yci'mhuinma'ñ tunipy. Yi' janchtiy ñigapxtahuipy tüg'óciy ayuc tiy'ajt huídijaty anajty ymidooyb ma Dios Teedy, e nañ yajniguëxictahuipy tüg'óciy tiy'ajt huídibi mimb cidaacp. ¹⁴ Je Espíritu Santo ñich yi' capxpaady xyaj'idipyich, com yi' ñich ndiy'ajt miich ajcxy xyajhuinjihuñhuaam. ¹⁵ Tüg'óciy huídibi Dios Teedy ymñid, nañ njé'ajtypich

yí', paady jadu'n ti nmína'ñich co je Espíritu Santo xyajhuinjihuíydáaygixipy ajcxy ñich yí n'ayuc yí ndiy'ajtich.

Jesús ñimay ymígügtijc co ajcxy yjotmay ahuimbidipy jotcuyc'ajtin

¹⁶ Tim huaad'ajtp xii tiempo, co ñich miich ajcxy ca' xy'ocjac'ijxip. Chi co xii tiempo yjacnajtzníicxihuip, huin'it ñich miich ajcxy xyjac'ixipy jadüg'oc.

¹⁷ E huin'it ajcxy nijëjty Jesús ydiscípulos ajcxy ñayñimaayi miñ xyipy ac jëyi:

—¿Ti jadu'n ytiyyp? Co jadu'n ymína'ñ, co tim huaad'ajtnip xii tiempo mína ñich miich ajcxy ca' xy'ocjac'ijxnibyich, e co yjacnajtzníicxihuip xii tiempo, huin'it miich ajcxy xyjac'ixipyich jadüg'oc, com nníicxaamich ma Dios Teedy.

¹⁸ Chi ajcxy jadu'n ñayñimaayi miñ xyipy:

—¿Ti jadu'n ytijamy? Co jadu'n ymína'ñ co tim huaad'ajtnip xii tiempo. Ca' ñich ajt nhuinjihuíyim ti jadu'n ytijamy.

¹⁹ Com Jesús ñejhuíyb anajty nej ajcxy yja'amidoohua'ñyii, chi ñimay ajcxy:

—Yí' miich ajcxy ooy mjayajtihua'ñ. ¿Nej co jadu'n ti nmína'ñich? Tim huaad'ajtnip xii tiempo co ñich miich ajcxy ca' xy'ocjac'ijxnipy. E chi yjacnajtzníicxihuip xii tiempo, e chi miich ajcxy xyjac'ixipyich jadüg'oc. ²⁰ Janch janch ñich miich yam nníimaaygixy co mjotmaybaadip ajcxy, e nañ myäxip ajcxy mñid jotmay. Chi je naaxhuiñyäjy ajcxy huidibi ca' xymíjpidägyich, xondägam ajcxy, e miich ajcxy nañ mjotmaybaadip. Per yí mjotmay ajcxy ahuimbidipy tüg xondaacin. ²¹ Jadu'n ajcxy mjada'ñ jadu'n nej tüg töxyjäy tzaachypi jihuíy co y'ung yma'xung'ada'ñ. E co ti yma'xung'aty ypi'c'ung, chi jäydigoy yí tzaachypi mñid xondaacin co tüg jäy ti ymiiñ ya naaxhuiñ.

²² Tim jadu'n nej yjaty mñid je töxyjäy, nañ jadu'n yjada'ñ mñid miich ajcxy. Cham ajcxy jotmay mjihuíy ma m'aa mjot, e chi co xy'ixipyich jadüg'oc miich ajcxy, huin'it ajcxy m'aa mjot yxondäga'ñ. E ni pin huaad mxondaacin ajcxy xycapíjipy.

²³ Je huin'it ximbi (co anajty je Espíritu Santo ti ymiiñ ya naaxhuiñ) ca' ñich miich ajcxy ni ti xyjacyajmbíjctzohuipyich, com janch ñich miich ajcxy yam jadu'n ñimaaygixy co tüg'óciy huidijaty myajmayajtcixyp, chi ajcxy mbíjctzohuipy ma Dios Teedy mñid ñich nxii, e xymóhuipy ajcxy yí'.

²⁴ Chambaadni ca'ni ni ti ajcxy mbíjctzoy ma Dios mñid ñich nxii. Píjctzoogix, e xymóhuipy ajcxy yí', jigix mjotcugíhuip ajcxy anaxy.

Jesucristo ymímadac je jibic-huinma'ñ ya naaxhuiñ

²⁵ Tüg'óciy jada ayuc tíy'ajt ac jihuimbit miich ajcxy ti nyajnimäy. Huin-gomb xii tiempo mína tíydudägy ajcxy nyajmñidmíydactähuipy yí Dios Teedy y'ayuc ytiy'ajt yajxon, e ca' y'ocjihuimbitiñ. ²⁶ Je huin'it xii co anajty ñich ti nhuimbityich ma Dios Teedy, jëbi miich ajcxy mbíjctzoogixy ma Dios Teedy tijaty ajcxy myajmayajtyp. Co ti mbíjctzóogixipy mñid ñich nxii, xymóoygixipy yí Dios Teedy. Ca' ycopicyity co ñich yí' nmíjctzohuipy mñid miich ajcxy ycixpi. ²⁷ Com yí Dios Teedy nañ xychojcp xyjihuíyb yí' miich ajcxy. Com miich ajcxy jayíjp ti xychocyich ti xyjihuíyich, e ti mmíbicy ajcxy co ti ndzooñich ma Dios Teedy, paady Dios miich ajcxy xymóhuipy tijaty anajty myajmbíjctzooyb. ²⁸ Jiiby ñich ndzooñ ma Dios Teedy yajpaady, co nmiiñich ya naaxhuiñ, per jadachambi n'ixmájtznibyich jada naaxhuiñyibi, e nhuimbijtnich ma Dios Teedy.

²⁹ Huin'it je' ydiscípulos ajcxy ymína'ñ:

—Cham janchtiy tudägy míydägy, ca' m'ocyaajtuuni jihuimbit ayuc.

³⁰ Cham ñich ajcxy nnejhuíy co miich mnejhuíyday tüg'óciy tíy'ajt. E ti

xyajnimaydäyich co anajty ca' ti t'iy'ajt ich ajcxy nmibicy co miich mdzooñ ma Dios.

³¹ Chi Jesús y'adzooy:

—¿Nej mmibijcyp cham jada ayuc jadu'n nej ti nnimáaygixyí?
³² Jihui'ñybijccix co huingtonip je xii tiempo, e ti tim paady mina miich ajcxy mgueec-huäcxtáaygixipy nidüg nidüg ma pin timdzocy, e xyajhuí'mgixich naydüg. Per ca'p ich nnyadügity, com yi Dios Teedy yi' ijtp müd ich. ³³ Miich ajcxy yam jada ayuc nyajnamaayb, jigix ajcxy jotcujc'ajtin mbaadip ma ich. Ya naaxhuiñ mbadamy ajcxy ayo'n etz tzaachypi. Jotcugiiygix, ca' mdajcixy maygixy, com ti nmimadägyich yi jibicpi ya naaxhuiñ.

17

Jesús ymibijctzou Dios müd ydiscípulos ajcxy ycixpi

¹ Co Jesús jadu'n ymíañ jayijp, chi ypa't'ijxy tzajpcixy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'ñich jadu'n nej miich jayijp'aty myajnihuinmayiy. Yajniguëxig ich nmic'ajt ich n'oy'ajt, com ich miich nDeedy'ajtypich, jigix ich nañ jadu'n nyajniguëxigibych miich nmic'ajt miich m'oy'ajt ma yi jäy ajcxy. ² Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huidibi ca' ycixipy ytigoyipy. Nmöhuibyich jada jugy'ajtin tüg'óciy jäy ajcxy huidibi miich ti xymöyich. ³ Je jäy ajcxy huidibi ix'y'ajtp je Dios janchypi, je Dios tüg'ajcpi etz y'ixy'ajtp nañ jadu'n Jesucristo huidibi ti mguexy ya naaxhuiñ, ymüd ajcxy jugy'ajtin huidibi ca'ycixipy ytigoyipy nimíanaa.

⁴ Ti ich nyajniguëxigiyich miich ajcxy yi nmic'ajt ya naaxhuiñ, co ich ti nduñ yi mdung huidibi miich xyajnibijcich. ⁵ Jadachambi Dios Teedy yajmijtigiiygich miich, müd je mic'ajtin huidibi anajty nmüdich ma miich mhuiinduu co anajty ca'ni naaxhuiñyibi chondacyñi.

⁶ Ti ich miich ya naaxhuiñ nyajniguëxici yi nmic'ajt ma yi jäy ajcxy huidibi miich xymooyich, huidibi miich mhuiñ'ijx ma naaxhuiñyjäy ajcxy. Miich yi' ajcxy mjäy, e miich ti xymöyich, e ti ajcxy miich m'ayuc cuydungixy. ⁷ Jadachambi ñejhuñyñip yi' ajcxy, co tüg'óciy tijaty t'iy'ajt ich miich yi' xymooyb, jiiby yi' choon tzajpjoty ma miich. ⁸ Com yi ayuc huidibi miich ti xymöyich, ti ich yi' ajcxy nyajnimaydäy, e ti yi' ajcxy cöbijccixy. E nañ ti ajcxy huinjihuñygyixy tydudägy co ich jiiby ndzooñich ma miich, e nañ ti ajcxy mibijccixy co miich ya naaxhuiñ xyquejxyich.

⁹ Müd yi' ycixpi ajcxy miich Dios Teedy nmibijctzooy, ca' nmíanaanim müd jacjadyii naaxhuiñyjäy ajcxy ycixpi nmibijctzoy. Müd yida'ajty ycixpi ajcxy huidibi miich ti xymöyich, com nañ mjë'ajtyp miich yi' ajcxy. ¹⁰ Tüg'óciy tijaty ich një'ajtyp, nañ mjë'ajtyp miich yi', e tijaty miich mjë'ajtyp nañ një'ajtyp ich yi'; e ich nmic'ajt niguëxi'cp yi' ma yi' ajcxy chinaayin yjugy'ajtin.

¹¹ E ca' n'ocjacyajpadaanich ya naaxhuiñ. Ich njäy ajcxy jacyajpadam ya naaxhuiñ. Nnicxnibich jiiby tzajpjoty ma miich. Dios Teedy, cuend'at ich ndiscípulos ajcxy müd miich nmic'ajt huidibi miich ti xymöyich, jigix yi' ajcxy tú'ciy yjot yhuinma'ñ yajpaadipy ma miich, tim jadu'n nej ich ajt tú'ciy njot yhuinma'ñ nyajpaatim. ¹² Co anajty ich njac'yaajty naaxhuiñ müd ich njäy ajcxy, ti ngüend'atyich anajty ajcxy müd je mic'ajt huidibi miich xymooyich. E ni tüg'ajcxy ca' yhuinma'ñyidigooy. Abicy ich n'octimpidägy je huidibi nayyajhuinma'ñyidigooyi (je Judas Iscariote), co yi' anajty jadu'n yajcuydunam jadu'n nej jaybety ymiiñ müd yi' ycixpi etz müd ich ycixpi.

13 Cham ñich miich niba'ttigihuaani jada'. Miich m'ayuc mdiy'ajt nyajnimaybich jada naaxhuiñjáy ajcxy huidibi nyaj'ixpijcyich, jigix agujc jotcuyc yhui'mip ajcxy. 14 Ti ñich ajcxy yi' nyajnimaydáyich miich m'ayuc mdiy'ajt. E ca' ajcxy y'ixa'ñyii yi' naaxhuiñjáy ajcxy huidibi ca' xymijpidägyich. Com je' co ajcxy yjot yhuinma'ñ ti yajtigach, ca' ytügiy mïd yi' jacjadyii naaxhuiñjáy yjot yhuinma'ñ. Jadu'n nej ñich ca' ytügiy njot nhuinma'ñ mïd naaxhuiñjáy ajcxy yjot yhuinma'ñ. 15 Ca' ñich cham miich nmibijctzoy co myajpidzimipy ñich ndiscípulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi' ca'oybi ymiiñ. 16 Yi' ajcxy yjot yhuinma'ñ ca' ytügiy mïd yi' jacjadyii naaxhuiñjáy ajcxy yjot yhuinma'ñ. Tim jadu'n nej ñich ca' ytügiy njot nhuinma'ñ mïd yi' jacjadyii naaxhuiñjáy ajcxy yjot yhuinma'ñ. 17 Yajhuaatzi ajcxy yjot yhuinma'ñ mïd miich m'ayuc, com yi' m'ayuc yi' je' tiy'ajt mïd. 18 Jadu'n nej miich xyquejxyich ya naaxhuiñ, nañ jadu'n ñich yi' ajcxy nguejxhuäcxyich ya naaxhuiñ. 19 Mïd yi' ajcxy ycixpi ti nnyagiyegyiich amuumdügnot ma miich, jigix yi' ajcxy nañ jadu'n ñaygiyegiyb amuumdügnot ma miich, co ajcxy cuydunipy miich m'ayuc mdiy'ajt.

20 E ca' ñich jada'ajty ajcxy nibijctzohuiyich. Hue' ñich janchtiy nibijctzohuiydaaybich tüg'óciy jáy ajcxy huidibi xymibijcibich xymijpidägyibich mïd yi' ayuc huidibi ñich ndiscípulos ajcxy ycapxhuäcxy. 21 Huen ajcxy nidüg'óciy yjot yhuinma'ñ yajtügíy, jadu'n nej miich Dios Teedy mjot nhuinma'ñ yajpaady ma ñich, e ñich njot nhuinma'ñ yajpaady ma miich. Co yi' ajcxy yjot yhuinma'ñ yajtügíhuipy mïd ñich ajt njot nhuinma'ñ, huin'it jacjadyii naaxhuiñjáy ajcxy mibigipy co miich xyquejxyich ya naaxhuiñ. 22 Ti ñich ajcxy nmöyich je' tiy'ajt etz je' oy'ajt huidibi ñich miich ti xymöy, jigix ajcxy yjot yhuinma'ñ jatymy yajtügíhuipy ajcxy, jadu'n nej ñich ajt njot nhuinma'ñ yajpaatim tú'ciy. 23 ñich yajpatpich ma ñich njáy, e miich nañ myajpatp ma ñich, jigix tiydudägy ajcxy tügmucy y'idipy, e nañ jigix naaxhuiñjáy ajcxy jatymy nejhuíhuipy co miich xyquejxyich ya naaxhuiñ, e nañ co yi' ajcxy ti mdzocy ti mjihuíy jadu'n nej ñich miich xychocy xyjihuíyich.

24 Dios Teedy ndzojcpyich co yi' jáy ajcxy huidibi miich ti xymöyich y'idipy ajcxy nañ jadu'n ma anajty n'ityich jiiyby tzajpjoty, jaydëbi ajcxy ixipy ñich nmic'ajt ñich n'oy'ajt huidibi miich ti xymöyich. Com miich ti xychocy ti xyjihuíyich jacjayip ca'ni anajty naaxhuiñybi myajcojyñi. 25 Dios Teedy, miich ooy mmijity mjanchity, e yi' jacjadyii naaxhuiñjáy ca' ajcxy yi' xy'ixy'ajtyp. ñich miich n'ixy'ajtyp. ñich njáy ajcxy ti mibicy ti mijpidägy co miich xyquejxyich ya naaxhuiñ. 26 Ti nyajnimayyich yi' ajcxy pin miich, co miich je' Diosip. E njacyajnimähuaamyich yi' ajcxy tiydudägy, jigix yi' ajcxy nañ jadu'n ñaychogiyb ñayjihuíhuíyib nidüg nidüg, jadu'n nej miich xychocyich xyjihuíyich, e nañ jadu'n jigix ñich ndiy'ajt yajpaadipy ma yi' ajcxy yjot yhuinma'ñ.

18

Ymajtz ajcxy Jesús

1 Co jadu'n Jesús ycapxymiydacy jayijp, chi jada' ñicxy mïd je' jáy ajcxy huidibi anajty ajcxy yaj'ixpijcy. Ñicxy ajcxy jim'amy huoc nñaxy, je huoc hue' anajty xijity Cedrón. Ñicxy ajcxy jim ma anajty tüg aguemy. Chi Jesús ytigiy ma je aguemy mïd ydiscípulos ajcxy. 2 Judas huidibi anajty cýegam Jesús, ñejhuíyib anajty ma je it ma anajty mïd'oy canaag'oc je' ydiscípulos ajcxy. 3 Chi jada' Judas mïddzooñ soldados ajcxy etz jacjadyii tungmïdipi

huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymüid ajcxy linterna, ymüid ajcxy chinjin etz canaagnax tijaty huidibi anajty ajcxy müid chiptuñ. ⁴ E Jesús com ñejhuydaayb anajty tüg'óciy nej anajty yjada'ñ y'ayohua'ñ, chi jipcohuägiy je ymaymidzip ajcxy, e ñimay:

—¿Pín ajcxy m'ijxtaayb?

⁵ Chi je' ymidzip ajcxy y'adzooy:

—Yi' ñich ajcxy n'ixtaayb je Jesús, je Nazaret jäy.

Chi Jesús ymíñañ:

—Ñich jëdu'n.

Je Judas huidibi anajty cïyejcp Jesús, jim anajty ytinäy müid Jesús ymidzip. ⁶ Co Jesús jadu'n ymíñañ: “Ñich jëdu'n.” Chi ajcxy yëphuibijtay jadu'ñiy. ⁷ Chi Jesús jadüg'oc y'amidooy ajcxy:

—¿Pín ajcxy m'ijxtaayb?

Chi ajcxy jadüg'oc y'adzooy:

—Yi Jesús, je Nazaret jäy. ⁸ Chi Jesús ymíñañ:

—Ti ajcxy njanimäy co ñich jëdu'n. Pen janch ñich müich ajcxy xy'ijxtaayb, najtzmaziydäy jadaayaab ñich nmigügtijc ajcxy, huen nicxcixy.

⁹ E jadu'n yajcuyduñ je ayuc co anajty Jesús ci'm ti ymíñañ: “Tüg'óciy jäy huidibi nDeedy ti xymöyich, ca' ni tüg jëbi huaad ytigooy.” ¹⁰ Chi jada' je Simón Pedro huidibi anajty müid tüg espada, juudy je y'espada ma ñidijc, e chi yajtzaachiyi je Teedy mijtungmüidpi ytumbi, tüg yta'tz'ac aa'oy'amybi yajminájiy. Je tumbi hue' anajty xiijity Malco. ¹¹ Chi Jesús ñimay Pedro:

—Pidäg m'espada ma ñidijc. Ca' mnejhuüy co copicy nyajnaixipyich je tzaachypi je ayo'n huidibi Dios Teedy ti xyajnigo'adugiyich. Min n'ocminaxy n'ocyajnaxyich jada tzaachypi jadu'n nej ixypy tüg tasi ta'm'ujtzní ngo'uucnaxyich.

Jesús ma je Teedy mijtungmüidpi yhuinduu

¹² Chi je soldados ajcxy, je soldado yhuindzin etz judíojäy ajcxy ytungmüidpi huingohuägiy ajcxy Jesús. Chi ajcxy majch, e chi ajcxy cíxojch. ¹³ Chi ajcxy jayijp yajnicxy Jesús ma Anás yajpaady, je' anajty Caifás ymid'ajtyp, je huidibi anajty mijtungmüid ma teedytjic ajcxy ymiñ je huin'it jimijt. ¹⁴ Je Caifás je' anajty ti yecy je capxhuijin ma yi judíojäy ajcxy co tügtecy ymíñañ: jac'oy co tüg jäy y'ögipy müid tüg'óciy naax cajp ycixpi.

Pedro ymíñañ co ca' ix'y'adyii Jesús

¹⁵ Simón Pedro müid jadügpí ydiscípulo ypanicx ajcxy Jesús (co je ymidzip yajnicxi mach). E je jadügpí ydiscípulo ix'y'ajtip anajty yajxon je teedy mijtungmüidpi, paady ytigüy axam huin'it co Jesús ymidzip yajtigüy ma je teedy mijtungmüidpi ytijc. ¹⁶ E je Pedro jiiby je' yhui'miy ma tijc aguu. E je jadügpí ydiscípulo co anajty ajcxy ñay'ix'y'adyii müid je teedy mijtungmüidpi, chi ypidzimy migapxy je tijc aguu adinaayb, chi Pedro ajcxy yajtigüy jiiby tigoty. ¹⁷ Chi jada' je töxy'anäg huidibi anajty tijc'aguu adinaayb, ñimay je Pedro:

—¿Nej ca' müich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸ Je tumbidijc ajcxy etz je soldadtijc ajcxy ti anajty ajcxy oy jin yajmijiygixy co anajty chachtichity, e Pedro nañ jim anajty nañ jadu'n müid xamy ajcxy.

Je teedy mijtungmüidpi yajcomidou Jesús ypocy

19 Chi je teedy mijtungm̄idpi y'amidooy Jesús pinjaty anajty ti yaj'ixpicy etz tijaty anajty ti yaj'ixpicy. 20 Chi Jesús y'adzooy:

—Ti ñich oy njacapxy njamiydägy mayjäyjoty. E ti ñich njatyimy nyaj'ixpicyich ma miich ajcxy mnaymujctacín etz ma Dios ytijc, ma yi judíojäy ajcxy nidüg'ócíy ñaymugyii. Ca' ni ti ameech ti nnigapxyich. 21 ¿Na'amy co xyjactim'amidooyich ti anajty ti nyaj'ixpicyich? Yi' ajcxy amidou pinjaty ti xy'amido'ijtich n'ayucich, yi' ajcxy nejhuiyb ti ñich jadu'n ti nyaj'ixpicyich. Yi' ajcxy tüg'ócíy ñejhuídaayb nejjaty ñich ti nmina'ñich.

22 Co jadu'n y'adzooy Jesús, huin'it tüg judío tungm̄idpi huídibi anajty jim huingon tinaayb ma Jesús, chi tüg ci' acojxígy Jesús, chi mīnañ:

—¿Nej co jadu'n jibic m'adzooy yi teedy mijtungm̄idpi?

23 Chi Jesús y'adzooy:

—Pen jibic ñich ti n'adzooy yec tīy'ajt nej co yjibicity. Pen oy ñich ti n'adzooy, ¿nej co xycoxyich?

24 Chi Anás nimay soldadtijc co huen Jesús yajnicxy cīxoch jim ma yi Caifás ytijc, je teedy mijtungm̄idpi.

Chi Pedro jadüg'oc ymīnañ co ca'ixy'adyi Jesús

25 Simón Pedro jimni anajty ytinäy ma jimba' yxamy anajty, chi ajcxy amidoy jadüg'oc:

—¿Nej cay yi' miich xyaj'ixpicp nañ jadu'n?

Chi Pedro jadüg'oc coyüch Jesús ymīnañ:

—Ca' je' n'ñichity.

26 Nidügti ajcxy je teedy mijtungm̄idpi ytumbi, je' anajty y'amigüg yi Malco, huídibi Pedro yta'tz'ac quejtzpujxi, chi jadu'n ymīnañ:

—¿Nej ca' mdiy n'ijxyi jim ma je aguemy m̄id Jesús?

27 Chi Pedro midugüg'oc oy coyüch yhuindzin, e tim huin'itīy tzey oy yaaxígy.

Jesús ma je gobernador yhuinduu

28 Chi ajcxy jim yajtzooñ Jesús ma Caifás ytijc yajnicxy ajcxy ma agujctijc, tim jopyñi anajty. Chi je judíojäy ca' ajcxy ytigüy ma agujctijc, com ca' anajty ytundigoyaangixy m̄id judíojäy ycostumbre. Ca' ajcxy ytigühuañ anajty ma je romanojäy gobernador ytijc amayxijoty, e ca' anajty ajcxy ñayyajjibiccīhuañyii. Com co jadu'n ycanayyajjibiccīy ajcxy, e huin'it ca' ajcxy ycacaay ma je pascua xi adzoo'ajtin. 29 Co ca' ajcxy ytigühuañ anajty ma je agujctijc, chi je gobernador Pilato nibidzimy ajcxy tība'y ma anajty ajcxy m̄idity Jesús cuend'aty. Chi Pilato ymīnañ:

—¿Ti xīhuin ajcxy m̄id, m̄id jadyaabi yēydijc?

30 Chi ajcxy y'adzooy:

—Co ixypy ca' ti jibicpi tuñ, ca' ixypy ñich ajcxy ya yi' nyajmiñ ma miich.

31 Chi Pilato ymīnañ:

—Yajnicxcix miich ajcxy. Nicx tīydingix jadu'n nej miich ajcxy mley y'ané'my.

Chi je judíojäy ajcxy y'adzooy:

—Ñich ajcxy ca' ni ti mic'ajt nm̄idity nicxy ñich ajcxy njäyyaj'ögy.

32 Co jadu'n ajcxy ymīnañ, chi jadu'n ajcxy cuyduñ je Jesús yci'm'ayuc jadu'n nej anajty ti ymīnañ ti o'cín anajty ypadamy. 33 Chi Pilato jadüg'oc ytigüy jīby agujctigoty, chi coyaaxíy Jesús, chi nimay:

—¿Nej miich je' rey'ajtp ma yi judíojäy ajcxy?

34 Chi Jesús y'adzooy:

—¿Nej mgi'mhuinma'ñ mïd xy'amidooyich pen ïch nrey'ajtpich, o huingjäy ti xyajnimäy co nrey'atyich?

³⁵ Chi jada' Pilato y'adzooy:

—¿Nej nañ judiojäy jada' ïchi? Mgi'mnaax mgi'mgajp etz je teedy mijtungmïdpi ti xyciyecy ma ïch. ¿Ti ti mdundigooy?

³⁶ Chi Jesús y'adzooy:

—Ïch ca' n'ane'myich ya naaxhuiñ. Huingduum ïch n'ané'min nmïdidyich. Co ixypy ya naaxhuiñ n'oc'ane'myich, tüg'óciy ïch nmigügtijc ajcxy ti ixypy ajcxy tziptungixy, ti ixypy ajcxy xyñihua'ñich. E ca' ixypy ti naygïyegyiijich ma yi judiojäy tungmïdpi ajcxy. Per janch ïch ca' ïch ya naaxhuiñ n'ane'myich.

³⁷ Chi Pilato y'adzooy:

—¿Nej mrey miichi?

Chi Jesús ymïnañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amido'ïjtibich yi' n'ayucich.

Pilato y'ane'my huen Jesús yaj'ögyii

³⁸ Chi Pilato y'adzooy:

—¿Ti jadu'n mdijy tiy'ajt tiydudägypi?

Jadu'ñyi je' jada'ajty yjacmïnañ, chi pidzïmy jadüg'oc tïba'y ma anajty je judiojäy ajcxy. Chi ajcxy nimay:

—Ca' ïch ni ti bocy nbaadyich ma jada jäy ma yi romanojäy yley. ³⁹ E com miich ajcxy mïd tüg costumbre co tüg nnaajtmadzïyïm machyjäy mïd jada pascua xï yciïpi, ¿nej mdzojcyp ajcxy co nnaajtmadzïhuïbyich jada judiojäy reyï?

⁴⁰ Chi ajcxy nidüg'óciy minanday:

—Jadayaabi jäy ca' mnaajtmadzïhuïpy, yi' janchtiy mnaajtmadzi' yi Barrabás.

Barrabás hue' je' anajty tüg meetzpi.

19

¹ Chi jada' Pilato ané'min pidacy co huen ajcxy Jesús huinhuopy jïpïhuopy.

² Chi jada' je soldados ajcxy yaj'oyïy tüg corona mij'apy pa'apy, chi ajcxy yajcojenïy Jesús. Chi ajcxy yajñïjenïy tüg rey yhuit ucypï ycolor. ³ Chi soldados ajcxy huingohuägïy jadüg'oc capxpooxcixy yajxïgy'amy, nïmaaygixy:

—¡Viva miich judiojäy rey!

Chi ajcxy ooy huingojxy jïpcojxy.

⁴ Chi Pilato jadüg'oc ypidzïmy tïba'y. Chi nimay je mayjäy:

—Cham ajcxy nyajpidzïmy tïba'y jada Jesús, jigix ajcxy mnejhuïhuïp co ca' ni ti pocy ti nbaadyich ma yi'.

⁵ Co Jesús ypidzïmy tïba'y mïd je apy corona ma ycohuajc etz je rey yhuit ucypï ycolor. Huin'it Pilato ymïnañ:

—Ijxcix, cha je yëydijc.

⁶ Co je teedy tungmïdpi etz je judiojäy ajcxy ijxy, chi ajcxy yminanday nidüg'óciy aguipxyjatyï:

—Yajcruudzpet, yajcruudzpet.

Chi Pilato ymïnañ:

—Yajcruudzpejtciïx miich ajcxy, janch ïch ca' ni ti tiy'ajt nbaadyich nej ïch yi' nyajcruudzpedïpy.

⁷ Chi je judiojäy ajcxy y'adzooy:

—Hich ajcxy miid tüg cötujcin, jëbi y'ögy miid hich ajcxy ngötujcin ycixpi, com ti ycapxtigooy co ymina'ñ co yi Dios yteedy'ajtyp.

⁸ Co jada ayuc midooy Pilato, chi nigü chigiygoty. ⁹ Chi ytigüy jadüg'oc ma je cötujctac miid Jesús, chi nimay:

—¿Ma miich tüyü mgogajpity?

E Jesús ca' y'adzooy.

¹⁰ Paady Pilato ymina'ñ:

—¿Hich miich ca' xy'adzohua'ñ? ¿Ca' mnejhuüy co nmüdidyich mic'ajt jëbi nnajtzmazüy etz nañ jëbi nyajcruudzpety?

¹¹ Chi Jesús y'adzooy:

—Ni ti mic'ajt ixypü mgamüdüty ma hich, pen ca' ixypü mic'ajt ti xymöyich yi hüidibi ane'mb jüby tzajpjoty. E paady ycixpi yi tübi hich xycüyecyich nigü yi' pocy müdüty ca'ydi miich.

¹² E huin'it Pilato ooy yjahuinma'ñ ixtay nej huaad ca' jëbi ocnajtzmazüy Jesús. E je judíojäy, je Jesús ymidzip, nigü anajty ajcxy chachxi'düch:

—Pen miich mnajtzmazüyb jada Jesús, huin'it ca' m'ocjacnaymüg'ájtinüpy müd yi mhuindzin je César hüidibi ané'min ti xymöy. Com tüg'ócüy pinjaty naydijip rey, ca' yi' müd nay'ixa'ñyü je César.

¹³ Co Pilato jadu'n ayuc midooy, chi yajpidzümy Jesús tiba'y. Chi Pilato y'ixtacy jim ma je' y'ane'mdac ycötujctac, jim ma je it hüidibi anajty xijip Empedrado, hebreo'amy xijity Gabata. ¹⁴ Hue' tim cujcxü anajty, e chi com jabom anajty je pascuaxü ycodücxni, co Pilato jadu'n nimay judíojäy ajcxy:

—Cha ajcxy jada mrey.

¹⁵ E je' ajcxy y'adzooy:

—Huen ögy, huen ögy. Yajcruudzpet.

Chi Pilato ymina'ñ:

—Miich ajcxy mrey, ¿miñ n'ocyajcruudzpetyichi?

Chi je teedy tungmüdpü ajcxy y'adzooy:

—Hich ajcxy ca' hich ajcxy hüingbi rey nmüdüty, jëyi César hich ajt nrey'ajtim.

¹⁶ Chi Pilato cüyeycy Jesús ma je judíojäy ajcxy, huen ajcxy ci'm yajcruudzpety. Huin'it ajcxy Jesús nihuägüy. Chi ajcxy yajtzoöñ.

Yajcruudzpejty ajcxy Jesús

¹⁷ Chi ajcxy je cruudz Jesús ci'm yajquejycabiüy. Müd nicx ajcxy ma je it xijity o'cpi cohujc, hebreo'amy xijity Gólgota. ¹⁸ Jim ajcxy yajcruudzpejty quipxy müd jametz jäy, tüg anajty'amy, jadüg a'oy'amy etz Jesús cuj'amy.

¹⁹ Chi Pilato ane'my huen cüxjay ayuc ma je cruudz, e jadu'n je ayuc ajcxy jay: “Jesús, Nazaret jäy, je judíojäy ajcxy yrey.” ²⁰ May ajcxy ooy je judíojäy capxy je ayuc hüidibi anajty cüxjay ma je cruudz. Com je it ma anajty ajcxy Jesús ti yajcruudzpejtcüxy mühüingon anajty Jerusalén. Hue' anajty yjayty: hebreo'amy, latin'amy etz griego'amy. ²¹ Chi je teedy müjtungmüdpü ajcxy nimay je Pilato:

—Ca' ixypü jadu'n ti mjay: “Judíojäy yrey”. Hue' ixypü ti mjay: “Yi' jadu'n naydijip hich judíojäy xyrey'ajtpich.”

²² Chi Pilato y'adzooy:

—Yi tübi njaayich, ti hich yi' njaay, ca' nyajtigadza'ñich.

²³ Co soldados ajcxy yajcruudzpejtay je Jesús, huin'it je' yhuit ajcxy hüitzi'ci. Chi ajcxy je huit yajhuäcxy midaxpücy. Chi soldados ajcxy cüptüg cüchypüjcy. Yi' yjocxhuit jadu'n nej anajty ytügjüpxuyüty. ²⁴ Chi ajcxy ñayñimayü ac jëyi soldadtijc:

—Ca' huaad ajt n'agüdzüym jada jocxhuit. Tzoc ajt suerte n'oc'ijxim, jigix ajt nnejhuüym pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n ymïnañ: “Yajhuäcx ajcxy ñch nhuit, e ma ñch njocxnïjen jim ajcxy suerte ijxy.” Je' je' huïdibi soldadtijc ajcxy ycuyduun.

²⁵ Jim ma Jesús ycruudzmijc, jim anajty ajcxy ytinäy: Jesús ytaj, je ytaj chi', je María (Cleofas ytöxyijc), etz María Magdalena. ²⁶ Co Jesús ijxpaty ytaj etz je ydiscípulo huïdibi anajty ooy nigï tzocy ma ytaj ymijc, chi nimay ytaj:

—Nan, ñch nmigüg huïdibi tinaayb ma miich mmijc, yï' xycuend'adip jadu'n nej jihüy miich yï' xytaj'adyii.

²⁷ Chi Jesús nimay je' ydiscípulo:

—Ñich ndaj miich mgüend'adipy, jadu'n nej ixypy mgï'mdaj'adyii.

Jadu'n nej xii tiempo jac nicxni Jesús ytaj tzinaydacpicy ma jada discípulo ytijc.

O'c Jesús

²⁸ Co jadu'n ytundaayi yajtaayi, chi Jesús nejhuüy co ti anajty tüg'óciy ytundäyï yjajtäyï jadu'n nej Dios tzocy. Huin'it jadu'n ymïnañ:

—Tidziyinibich.

Co jadu'n ymïnañ, je' anajty ycuydundaayb nej anajty ycojayity ma Dios ñecy müd yï' ycixpi.

²⁹ Jim anajty tüg pi'c uugi'ñ ymüd anajty vinoxunni. Chi ajcxy je' yajxoogy tüg esponja (jadu'n yï' nej po't) müd vinoxunni, e chi yajjijp'eedziy tüg paxyijp, je' müd yajjädy je vinoxunni ma Jesús y'ahuac. ³⁰ Co jada' Jesús co'uucnajxy je vinoxunni, huin'it jadu'n ymïnañ:

—Ti tüg'óciy nguydundäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyjijp

³¹ Com jabom anajty je pascua mijxii (amayxii ooy), e nañ sábado xii anajty. Paady copicy anajty co ajcxy yajminajcipy ajcxy je jäy ninïcx je tibi anajty yajcruudzpejtcixy. Müd je' ycixpi je judiojäy ajcxy ñicxy ma Pilato pijctzoy may'ajt co huen ane'my yï' soldados ajcxy, co huen nicxy yajtijy je jäy ytecy ajcxy huïdibi ti yajcruudzpety. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jäy ajcxy ytecy tiji huïdibi ajcxy yajcruudzpejt tú'ciy müd Jesús. ³³ Co je soldados ajcxy ymijhuägy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyjijp müd quipy jipxu'ñybi. E huin'it tim mic'amy ni'py etz nii ypidzimy. ³⁵ Tüg jäy jim anajty ixxy nej ytuni yjajti, e nañ yejc tiy'ajt. E je' ytiy'ajt janch je', e je' nejhuüyb co yjanchity. Müd je tiy'ajt ycixpi jëbi miich ajcxy nañ jadu'n mmibijctähuip. ³⁶ Paady je' jadu'n ytuni yjajti, co jadu'n anajty yajcuyduna'ñ jadu'n nej yjaybetyity ma Dios ñecy, co jadu'n ymïnañ: “Ca' huaad ni tüg ypajc yajtijy.” ³⁷ E jadüg'it anajty ycojaayity ma Dios ñecy, ma jadu'n ymïnañ: “Y'ixipy ajcxy je jäy huïdibi ajcxy ycuum.”

Yajnaaxtigiy Jesús

³⁸ Jim anajty José huïdibi anajty cogájpip Arimatea. Yï' je' huïdibi anajty mijpidacp Jesús, oy anajty ca' capxidzimy, müd co anajty chigiy müd je judiojäy ajcxy huïdibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jëbi nicxy yajtzooni Jesús ñaaxnicx ma anajty ti yajcruudzpedyï. Co Pilato a'ixiy, chi José ñicxy jim oy yajminajci je Jesús ñaaxnicx, e chi yajnicxy. ³⁹ Nañ müd ñicxy José je Nicodemo, je huïdibi anajty

jayijp ti ni'oy Jesús coodz. Nicodemo ymínicx oy nimigo'px libra mirra etz áloes tzooy huidibi ooy oy yxuugy. ⁴⁰ Chi ajcxy yajpidíci Jesús ñaaxnícx, chi ajcxy mo'ñ miid poob huit, chi tzooy ajcxy miid mirra etz áloes tzooy, jadu'n nej je judíojäy ajcxy ycostumbre miidíty co o'cpi yajnaaxtigíygyxy. ⁴¹ Huington ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigíy. ⁴² Jim ajcxy Jesús ñaaxnícx yajnaaxtigíy, co anajty jim yjac-huingtoníty, e janch jottigooy ajcxy yajnaaxtigíy, miid co anajty ti chu'íyñi, e je judíojäy ajcxy tzachni'ixíyñi tzach'a'ixíyñi co je amayxí anajty chondágaani com jabom.

20

Jesús jugypíjc jadüg'oc co anajty ti y'oc'o'cni

¹ Tim seman ixtigi', moñyi anajty, ca' anajty oy ximíyñi. Huin'it María Magdalena ñicxy ma Jesús anajty ti ñaaxtigíy. E chi jim ijxy co je tzaa ti anajty jim yajjidigüecy ma je jut aguu. ² Co ajcxy ijxy je jut ahuadz, chi jada' mic'amy poyígyi ninicxy Simón Pedro, etz je jadügpí ydiscípulo huidibi anajty Jesús miid ooy naychogyi, chi nimay:

—Ti yajtzoongíxy ích ajt nHuindzin ñaaxnícx ma ajcxy yajnaaxtigíy, e ca' nejhuíyim ma ajcxy ti pidaaccíxy.

³ Huin'it ajcxy nimetz choon poyígyi Pedro etz je jadügpí discípulo, ñicxy ajcxy ma je o'cpi anajty ñaaxtigíy. ⁴ Poyígyi ajcxy ñicxy nimetz, per je jadügpí discípulo jayijp ñajxy, e jayijp jim oyja'ty ma je naaxtigíydac. ⁵ Chi yco'ixíy jutjoty, huin'it jim oy ixy je mo'nhuít jüby jutjoty y'ooxnäy, per ca' yi' jüby ytigíy jutjoty. ⁶ Simón Pedro co ymiñ jac'axam, tim janitigíy jutjoty, chi ijxy je mo'nhuít y'ooxnäy jüby jutjoty. ⁷ E chi ijxy je cöxotz, je huidibi anajty miid ycohuajc yxochíty, abícy je' anajty, ca' anajty tú'cay y'ooxnäy miid ymo'nhuít. Y'íjx ajcxy je cöxotz yajxon y'anégyity abícy. ⁸ Huin'it ytigíy jutjoty je jadügpí discípulo huidibi jacjayijp ja't. Chi ijxy, e huin'it mibíjcy co Jesús ñaaxnícx ca' anajty jüby. ⁹ Ca'ni anajty ajcxy yajxon huinjihuíy co anajty jadu'n ycojaayíty ma Dios ñecy, co anajty je Cristo yjugypíga'ñ. ¹⁰ Chi je metzpi ajcxy ydiscípulos yhuimbijty ma ytíj.

Jesús nayguéxíci ma María Magdalena

¹¹ E je María jim yhui'míy ma je o'cpi jut ayaaxíp. Chi ayaaxíp yco'ixíy ma je jut. ¹² E chi ijxy metz ángel, poob huit ajcxy ymiid, y'íñaaygíxy jüby ma je Jesús ñaaxnícx anajty yhuijznäy, y'íñaaygíxy tüg cöduy, jadüg tecy íxaay. ¹³ Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnícx yajnicxi, e ca' nnejhuíyich ma ajcxy ti pidägy.

¹⁴ Jadu'n anajty ymína'ñ, co ñayjii'íjxi, chi ijxy Jesús ytinäy ma yjix, e ca' íjxcajpy pen Jesús je' anajty. ¹⁵ Chi Jesús ymínañ:

—Töxyjäy, ¿ti co myäxy? ¿Pin m'ixtaayb?

María hue' anajty tíjy je aguemy cuend'ajtpí migapxíp, paady jadu'n ymínañ:

—Huindzin, pen ti myajnicxy Jesús ñaaxnícx, nigapx ma ti mbidägy, e ích nicxy nyajtzooních.

¹⁶ Chi Jesús ymínañ:

—María.

Chi jada' María yhuäg-huimbijty, chi yajxon huindícxpejty, chi nimay:

—¡Raboni! —jada hebreo ayuc yhuimbídzímy Huindzin.

17 Chi Jesús nimay María Magdalena:

—Ca' xyñidooñich, com ca'ni ñich nba'ttigüy ma Dios Teedy yajpaady. Nícx miich ixta' nmigügtijcich, e nima' co nnicxaamich ma Dios Teedy, ñich nDeedy etz miich ajcxy mDeedy, ñich nDios, etz miich ajcxy mDios nañ jadu'n.

18 Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yí' ti xycapxymöyich co nyajnimähuiyich miich ajcxy.

Jesús nayguëxici ma ydiscípulos ajcxy

19 Co je huin'it xñmbi chuu'ñy seman ixtigi', aducy anajty tijc'aguu y'ity ma anajty je discípulos ajcxy yajpatcixy, mñid co anajty ajcxy tzigüy je judíojäy ajcxy huídibi anajty midzip'ajtp Jesús. Chi Jesús ytigüy cujc'amy ma je' ajcxy, e chi jada' capxpocxy ajcxy, nimay:

—Jotcugí' miich ajcxy.

20 Yam jadu'n anajty ymínañ, chi ajcxy yaj'ijxy je' yci' ma je clavo ytigüy, etz ycaachyjijp ma anajty jäy ti ycumyíi. Chi yjotcugüy ajcxy co ajcxy ijxy je yHuindzin. 21 Chi jada' Jesús jadüg'oc capxpocx, nimay ajcxy:

—Jotcugí' miich ajcxy. Jadu'n nej ñich nDeedy xyquejxyich ya naaxhuiñ, nañ jadu'n ñich miich ajcxy yam nguejxhuäcxy mñid ñich n'ayuc.

22 Co Jesús jadu'n ymínañ, chi jada' ajcxy nñbuxujy cöbuxujy nimay:

—Huen Dios yñhuiñ ymic'ajt xy'adigüy xyjottigüy ajcxy. 23 Huenpinjäyity huídibi miich ajcxy mbocyhuinmeecxyp, nañ ypocyhuinmeecxipy Dios Teedy. Huenpinjäyity huídibi miich ajcxy ca' ypocy mhuinmeecxaani, nañ jadu'n Dios Teedy ca' yí' ypocyhuinmeecxañyíi.

Tomás ymibijc co yHuindzin yjugypijcy

24 Tomás je' huídibi anajty mñid majmetz yca'pxy Jesús ydiscípulos ajcxy, je huídibi anajty yajtijp Dídimó, ca' je' anajty jim choonity co Jesús ymiñ oga'n.

25 Chi je jacjadyíi ajcxy ymígüg ñimaayí:

—Ti ñich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yí' yci' je clavo'au, e pen ca' ngñhuäxich ngodijyíich ma clavo'au, e ngí' nbídägyich ma ycaachyjijp ma anajty ycumyity, ca' nmibigipyich co yjanchity.

26 Chi jacoductujc xñ ajcxy jadüg'oc anajty yajpaady tigoty nidüg'óciy je discípulos ajcxy. Tzooñ anajty Tomás nañ jadu'n. Chi Jesús ymiñ. Agüy anajty tijc co Jesús ytinay'ahuñy cujc'amy ma je' ajcxy. Huin'it ycapxpocxy, chi nimay:

—Jotcugí' miich ajcxy.

27 Chi jada' nimay je Tomás:

—Pidäg ya mgñhuäx ma clavo'au ma ngñijich. Najtzxaji' mgi' etz pidäg ma ñich ngaach ma jäy xycumyich, e mibic yajxon tñydudägy.

28 Chi Tomás y'adzooy:

—Ñich miich nHuindzin'ajtyp etz ñich miich nDios'ajtyp.

29 Chi Jesús Tomás nimay:

—Mñid co miich ti xy'ixyich, paady miich ti mmibicy. Jotcujc yí' ajcxy huídibi ca' xy'ixyich, e ti ymibicy co ti njugypicyich co n'o'gyich.

Jada ayuc ngojaaybich ma jada necy, jigix miich ajcxy mmibigipy co Jesús je' yí' je Cristo, je Dios y'ung

30 Ti anajty Jesús ooy tuñ mñihuinma'ñ ma ydiscípulos ajcxy yhuinduu huídibi ca' ycojaayity ma jadaayaabi necy. 31 Paady ycix jada ngojaayich jigix ajcxy mmibigipy co Jesús je' yí' je Cristo je Dios y'ung. E co miich ajcxy

mmibigipy, huin'it mbaadip jugy'ajtin huidibi ca' tücci'yi ycixipy ytigoyipy müid Jesucristo yxii ycixpi.

21

Jesús ñayguëxigyii ma ydiscípulos ajcxy nihuixtujcpi

¹ Co jadu'n jayijp ytuni yjajti, huin'it jadüg'oc Jesús ñayguëxici ma je' ydiscípulos ajcxy jim ma mejypa', je huidibi anajty xiiip Tiberias mejy. E jadu'n ñayguëxici: ² Jim anajty ajcxy Simón Pedro müid Tomás huidibi jäy ytijyp Dídimó. Nañ jim Natanael huidibi anajty cogajp jim Caná Galilea naaxjot. E nañ jim anajty je Zebedeo ymang ajcxy etz jametz discípulos ajcxy.

³ Chi Simón Pedro ymíñañ:

—Nícxy n'oc'acxmachich.

Chi ymigügtijc ajcxy ymíñañ:

—Tzoc ajt jámim.

Chi ajcxy ytiñiy ma tüg barco. E je huin'it tzuu ca' ni ti ajcxy majch. ⁴ Co yjobiij jim Jesús anajty ytinäy ma mejypa'. Je' ydiscípulos ajcxy ca' anajty ajcxy nejhuüy co Jesús je' anajty.

⁵ Chi Jesús ymíñañ:

—Migügtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ni ti.

⁶ Chi Jesús ymíñañ:

—Pidaaccix ajcxy je huidibi müid m'acxmajtzcixy aa'oy'amy ma yi barco, e huin'it ajcxy mbaadipy acx.

Chi ajcxy pidacy je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytiñiy. ⁷ Je ymigüg huidibi müid Jesús ooy anajty ñaychogyii, chi nimay Pedro:

—Je' yi', ich ajt nHuindzin.

Co jadu'n midooy Simón Pedro co anajty yjējity je Huindzin Jesús, huin'it yhuít yajtiñiy. Com ti anajty yhuít jeñ, com jadu'n anajty jac'oy ytuñ. Chi ytiñiy mejyoty huitmüid. ⁸ Jacjadyii ajcxy ymigügtijc yjady ma mejypa' müid je barco, pahuich pajugucy ajcxy je y'acxmadzi'ñ janch ujtz müid acx. Hue' anajty ca' ooy yjiguemyity ma mejypa', jēyi anajty migo'px metro yjiguemyity.

⁹ E co ajcxy ymejch ma mejypa', chi ajcxy ijxy co jim anajty jimbajc y'ity ni'ixi', e jim anajty acx jimbajc nigix huidibi yajtzaayb, e nañ jim anajty tzajcaagy. ¹⁰ Chi Jesús nimay je' ydiscípulos ajcxy:

—Yajmiingix yi acx tibi ajcxy mmajtzcixy.

¹¹ Chi Simón Pedro ypejty barcojoty, chi yajpidzimy huinditztuum y'acxmadzi'ñ ujtz müid may'acx. Chi ajcxy michoy migo'px jahuixchigi'px majctugig acx mijatypi, e jadu'n ca' je acxmadzi'ñ yciich müid tzachmay'acx.

¹² Chi Jesús nimay ajcxy:

—Min ajop'ajtcix.

E ni tüg ydiscípulos ajcxy ca' y'amidoohui:

—¿Pin müich?

Com ñejhuüy anajty ajcxy co je' anajty Huindzin Jesús. ¹³ Chi Jesús ymijhuägy ma je acx ci' etz tzajcaagy anajty y'ity, e chi yajhuäcxy, chi moyday ymigügtijc ajcxy.

¹⁴ E je' je' anajty je midugig'ocpi co Jesús ñayguëxici ma je' ydiscípulos ajcxy, huin'it co yjugypijcy co y'o'cy.

Jesús yajni'ixiy Simón Pedro ti ytunipy

¹⁵ Co ajcxy y'ajop'ajttay, chi Jesús nimay je Simón Pedro:

—Simón, Jonás y'ung, ¿nej xyjactzojcpich miich, ca'ydi jada jacjadyii ndiscípulo'ichi?

Chi y'adzooy Pedro:

—Huindzin mnejhuuyb miich co ndzojcpich njihuuybich miich.

Chi Jesús nimay:

—Cuend'at ich njäy, jadu'n nej jihuuy borregi cuend'ajtpi yaj'ocy yi' yborregi.

¹⁶ Chi Jesús mimejtz'oc yminañ:

—Simón, Jonás y'ung, ¿nej xychojcpich xyjihuuybich miich?

Chi Simón y'adzooy:

—Huindzin, mnejhuuyb miich co ndzojcpich njihuuybich miich.

Chi Jesús nimay:

—Cuend'ajtigich njäy, jadu'n nej yi borregi cuend'ajtpi cuend'aty yborregi.

¹⁷ Co midugig'ocpi oy y'amidooy:

—Simón, Jonás y'ung, ¿nej xychojcpich xyjihuuybich?

Chi Pedro yjotmaybjcni co midugig'ocpi y'amidoohui: “¿Nej xychojcpich xyjihuuybich?”

Chi Simón yjac'adzooy:

—Huindzin, miich mnejhuuydaayb tüg'óciy, e nañ mnejhuuyb co ich ndzojcp njihuuybich miich.

Chi Jesús jacnimay:

—Cuend'ajtigich njäy, jadu'n nej borregi cuend'ajtpi cuend'aty yborregi.

¹⁸ Janch janch ich miich yam jadu'n nimäy: “Co anajty miich mjac'anägnity, ci'm anajty mhuit nayyajñijenyii, e mnicxp anajty ma mdimdzocy. E co mjacmijjäyihuipy, huiñ'it mgi' mnajtzxajihuipy, e huingbi mhuit xyajñijihuipy, e xyajnicxyipy ma anajty ca' mdzocy.”

¹⁹ Co Jesús jadu'n yminañ, chi Pedro yajhuinjihuuy jadu'n nej anajty jäy ajcxy yaj'öga'ñyii mñid Jesús y'ayuc ytiy'ajt ycixpi, e nañ ma yi y'o'cin tiy'ajt yegipy co ymñid Dios ytiy'ajt.

Je discípulo huídibi anajty Jesús ooy tzocy jihuuy

²⁰ Chi Pedro ñayji'ijxi, chi ijxy co anajty tú'ciy anajty ymiingixy je' ydiscípulo huídibi anajty Jesús ooy tzocy jihuuy je huídibi anajty iñaayb huigon ma Jesús ma je mesa co anajty y'adzuu'ajtcixy. Je huídibi nimay je' yHuindzin:

—Huindzin, ¿pin miich yi' xyciyegam ma yi mmidzip? ²¹ Co Pedro ijxy je jadügp discípulo axam Jesús ypanicxyii, chi yminañ:

—Huindzin, e jada yaabi migüg, ¿ti yi' jadaanip?

²² Chi Jesús y'adzooy:

—Co ixipy ndzocyich co yi' huen jugy'aty ixti mabaad nhuimbityich, ca' miich xypaady mnejhuihuipy ti yi' jadam. Panicxcich miich.

²³ Paady ycixp huinjihuuy je ymigügtijc ajcxy co je ymigüg huídibi Jesús ooy tzocy jihuuy ca' anajty y'öga'ñ. Per Jesús canan je' anajty jadu'n ytiyyp co ca' y'öga'ñ. Hue' anajty ti ymina'ñ janchtiy:

—Pen ndzojcpich ixipy co jada migüg yhui'mipy ixti mabaad nhuimbityich, ca' miich xypaady mnejhuihuipy ti yi' ytunamy.

²⁴ Je' je' je Jesús ydiscípulo huídibi tiy'ajt yejcp jadu'n nej Jesús ytuñ y'ayoy etz yjajty y'ayoy, e nañ yi' je' huídibi cojay nej Jesús ytuñ y'ayoy, yjajty y'ayoy. E ich ajt nejhuuyim co janch yi' je' tiy'ajt huídibi ti yecy.

²⁵ May ooy tijaty mij huinma'ñ Jesús jactuñ. Co ixipy yajcojaydäy tüg'óciy, ca' yi' naaxhuiñybi ixipy yhuaadüy mñid maylibro tzachpidägipy. Jadu'n n'aa'ixiyich.

LOS HECHOS

Jadu'n Nej Jesús Y'ayuccapxhuäcxpi Ytuun Yjajti

¹⁻² Ma je jayjip'atypi necy, migüg Teófilo, ti nyajnijayiy tüg'óciy jadu'n nej Jesús ytuun etz jadu'n nej yaj'ixpijctzondacy oga'n'aty, ixti cooni ypättigiy tzajpjoty. Ca'ni Jesús anajty ypättigiy tzajpjoty co huin'ijxy je' yjáy huídibi yi' y'ayuc ytiy'ajt capxhuäcxib, e chi mïid je Espíritu Santo najztunïy najtz'ane'mïiy nej huaad ajcxy ytunipy. ³ Co anajty Jesús y'ögy, chi ñayguëxici canaag'oc ma je' ydiscípulos ajcxy, e huixchiguïpx xii ñayquëxigo'ci ma je' ajcxy, yajniquëxigy huädz co anajty yjuugyity, etz nañ yajmïdmïydacy je' yjáy je Dios y'ayuc etz Dios y'ané'min.

⁴ Co anajty jim ijtcixy tügmucy mïid Jesús, chi Jesús je' ydiscípulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijxcix tïibi Dios nDeedy ahuanïy ma miich ajcxy, je huídibi miich ajcxy nyajmïdmïydägy. ⁵ Janch Juan je Bautista jäy yajniibejt mïid nïi, tzojc miich ajcxy xy'adigïhuipy xyjottigïhuipy yi Espíritu Santo.

Jesús ypättigiyñi tzajpjoty

⁶ Ni'amugï anajty ajcxy jim mïid Jesús, chi ajcxy yajtiy:

—¿Huindzin, nej myajcödïgoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuïygyxy je xii je tiempo mina anajty ti yhuaad'ajtni, mina Dios Teedy tuna'ñ tijaty, je' tügpajc mïid cötújcïn tijaty ytunamy. ⁸ Co anajty je Espíritu Santo chinaydacpiy ma ajcxy mjot mhuinma'ñ mbaatcixp mic'ajt. E chi mdzoongixp ayuc capxhuäcxpi mïid ïch ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹ Ti jada ajcxy jadu'n yajnimäy, jim anajty ajcxy yhuindïcxcixy, chi Jesús chajppejtni. Chi miñ joc yeeg huídi Jesús yajnidïgoyday, chi ajcxy ca' oc-jac'ijxni. ¹⁰ Jadu'n anajty ajcxy chachpät'ijxcixy tzajpcixy, co Jesús ypättigiy. Huin'it mejtz yëydijc ñayguëxici ma je' ajcxy ymïjc, poob huit mïid, ¹¹ chi ajcxy ñimaayi:

—Galilea jäy ajcxy, ¿nej co mdzachpät'ijxcixy tzajpcixy? Yi Jesús huídibi ti chajppety, ti choon ma miich ajcxy, minaamb jadüg'oc jadu'n nej ti m'ijxcixy co ti ypättigiy.

Matías yajhuin'ijxy co Judas ytung jïjptunïyipy

¹² Huin'it Jesús ydiscípulos ajcxy chooni ma je cögop huídi xïjip Olivos, yhuimbïjtcixni jim Jerusalén, ca' ooy yjïguëgyity, jëbi yajyöy sábado xii, jadu'n nej Moisés ycötújcïn y'ane'my. ¹³ Co ajcxy yja'ty ma je cajp, chi ajcxy ypejty ma je cuarto mimetz nihuijtzpetypi ma ajcxy anajty mïidity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymïguëx. ¹⁴ Tüg'óciy anajty ajcxy y'ijtcixy tügmucy Dios mïbijctzoogixy chajpcapxycapxcixy. Ymïid ajcxy anajty Jesús y'uch etz María Jesús ytaj, etz jacjadyii töxyjäydijc.

¹⁵ Huin'it xii Pedro ytïnayigy agujc'amy ma je ymïgügtijc ajcxy huídibi yajmïj'ajtp Jesús, huídi anajty ajcxy naybaatip mïgo'px ja'ïipxti jäy, chi nimay ajcxy:

¹⁶ —Mïgügtijc, copicy co jada yajcuydünipy nej Dios ymïañ ma ñecy huídi jaybety ijtp, ma David jaay Dios y'ayuc, ma Dios nigapxy Judas. Je'huídi coduu'ajt taabi je judíojäy ajcxy majch Jesús. ¹⁷ Je Judas yaj'amichomujcp

je' anajty m̄id ñich ajt, paatip anajty Dios ytung tú'ciy m̄id ñich ajt. ¹⁸ Chi Judas ñicxy juy t̄ug naax m̄id je muju'ñ huídibi anajty ti paady m̄id yjibic-huinma'ñ. Chi jim mic'amy ycäy tzuxcödeefñ, chi ytopxy ymooxac, e chi ytiinch ypidzimday. ¹⁹ Je jäy ajcxy huídibi anajty tzinaayb jim Jerusalén, co nejhuiy, chi ajcxy yximoy je naax Acéldama, hue' je' yhuimbizimy ma je' ajcxy ayuc, ni'py ñaaxjot. ²⁰ Jada je' je ayuc huídibi David yjaay ma je Salmo necy:

Hui'mip najtz'ixiy yi' chinaaydac. E ca' pin yajtunipy.

Nañ jadu'n ym̄ina'ñ:

Huingbi huen yajnicxyii je' ytung.

²¹⁻²² Copicy co t̄ug yēydijc huídibi m̄id ti yhuidity nHuindzin Jesús quipxyi m̄id ñich ajt, huen tunipy je tung huídibi Judas anajty ytumyb, maab Juan yajniibety ixti taabi xypuyöduutim co pättigiy tzajpjot, t̄ug jēbi testig'aty m̄id ñich ajt co Jesús yjugypijcy.

²³ Chi Jesús ydiscípulos ajcxy huin'ijxy mejtz jäy: t̄ug jäy huídibi anajty yxi José, huídibi yxi anajty yajtijy Barsabás etz nañ jadu'n anajty yajtijy Justo. E huin'ijxy ajcxy nañ jadu'n Matías. ²⁴⁻²⁵ Chi Jesús ydiscípulos ajcxy Dios mibijctzoy, ym̄inañ ajcxy:

—Huindzin Dios, m'ijxyp mnejhuib t̄ug'óciy jäy yjot yhuinma'ñ, yajni'ixiygich jada metzpi jäy huídibi miich nidügti ti nhuin'ixy, je huídibi jēbi jijptigiyi miich mdung tú'ciy m̄id ñich ajcxy, etz huídibi apóstol'adip. Huen jada jäy jijptigiyi je tung huídibi Judas ti yajtigooy, co ytundigooy e ñicxy ma ypaadyii.

²⁶ Chi ajcxy suerte ijxy, e je suerte ñibizimni je Matías. E huin'ítiy je Matías oy ym̄icho'ndigiy ma je nimajtūgpi ajcxy huídibi ycapxhuäcxy Jesús y'ayuc.

2

Co je Espíritu Santo ycidacy choñ tzajpjoty

¹ Co oy je Pentecostés xi paady, jim anajty Jesús ydiscípulos ajcxy ni'amugi' tú'ciy ijtcixy. ² Huin'it janch timitiini yajmidoy t̄ug ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty ñaaygixy. ³ Chi nigidaaci nidüg nidügti toodz jadu'n nej jinye'n. ⁴ Chi je Espíritu Santo nidüg nidügti ajcxy y'adigiyi yjottigiyi. Chi ytigiyixni capxy miydaacp nije' nije' ayuc jadu'n nej je Espíritu ajcxy yajcapxyii.

⁵ Jim Jerusalén anajty je huin'it xi may judíojäy ajcxy huídibi tzoomb canaag agajp. Hue' ajcxy chachcuydumb judíojäy ycostumbre. ⁶ Co je cajpjäy ajcxy midooy je ne'min, chi ajcxy ooy yömujcy. Chi je mayjäy ooy yhuinmay'ahuídijty, co ajcxy midooy chachcapxcixy chachmiydaaccixy ma yci'm'ayuc. ⁷ Je mayjäy ajcxy ooy chigiy jihuñy, chi ajcxy ñayñimaayi miñ xyipy:

—Ix ¿nej cay Galilea jäy jada ajcxy nidüg'óciy huídibi jadu'n tzachcapxcixy tzachmiydaaccixy ñich ajt ngi'm'ayuc? ⁸ ¿Nej ñich ajt co nmido'mbójcim co tzachmiydaaccixy ñich ajt n'ayuc huídibi ti nmibi'c'ájtım? ⁹ Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huídibi tzinaayb ajcxy jim Asia ñaaxjot, ¹⁰ etz huídibi ajcxy tzoomb jim Frigia, etz Panfilia, huídibi tzoomb jim Egipto, etz huídibi tzoomb jim ma yi Africa ñaaxjot Cirene ninaxy. Nañ jadu'n jim romanojäy huídibi ya adzinaayb. May ajcxy jim huídibi judíojäy etz nijējity huídibi ca' yjudíojäyity huídibi judíojäy ycostumbre ajcxy ti yjijptigiyi. ¹¹ Ya nañ jadu'n Creta jäy etz Arabia jäy; e ñich ajt t̄ug'óciy nmidoohuim jada jäy ajcxy nigapxcixy nimiydaaccixy huídibi Dios ti tuñ mijcajee ma ñich ajt ngi'm'ayuc.

12 Nidüg'óciy ajcxy ooy jihuïy, e chi ajcxy ooy yhuinmay'ahuidijty, miñ xyipy ñay'amidóohuigixy:

—¿Nej jada yhuimbidzima'ñ?

13 E nijéjity jáy jëyi nixigy yajxigy, ymínaangixy:

—Muucip jada yi' ajcxy.

Pedro yaj'ixpijcy je mayjäy

14 Huin'it Pedro ytinayigy miid je nimajctügpi apóstoles, e ytigiiy capxpi mic ymínañ:

—Yëydijctijc ajcxy huídibi tzínaayb Judea etz tüg'óciy huídibi tzínaayb ya Jerusalén, nejhuíhuipy miich ajcxy jada e midou ajcxy yajxon huídibi ajcxy nyajnimáhuamyb. 15 Jada jáy ajcxy ca' ajcxy ymügyii jadu'n nej miich ajcxy mínaangixy. Tim petyxiini jada cham. 16 Jada je' huídibi ñigapxy je Joel, Dios y'ayuc najtzcaxiiybi, co jadu'n mínañ:

17 Je huin'it xii mína anajty je naaxhuiñybi cixa'ñ, jadu'n Dios mínañ, nya-jhuäcxtáhuibich je nEspíritu ma tüg'óciy naaxhuiñjáy. Miich mnix etz mmang ajcxy capxhuäcxip ich n'ayuc ndiy'ajt, e je yujcyeecpidijc ajcxy yhuin'ixipy ooy mijhuinma'ñ, e je mijjäydijc cumáhuipy ajcxy.

18 Nyajhuäcxtáhuip ich je nEspíritu huin'it xii ma ich ndumbi yëydijcpi töxyjäybi, e yi' ajcxy capxhuäcxip ich n'ayuc ndiy'ajt.

19 Nyajquëxigibich tzajpcíxy huídijaty oy chigiiyñi, e ya naaxhuiñ nyegipyich tiy'ajt: ni'py, jin etz jinjoc.

20 Yi xii ahuimbidipy coodz, etz je po' ahuimbidipy nej ni'py, ma anajty ca' miñ je xii je tiempo mína anajty mínañ je Huindzin Dios. Mij ayo'n ji tunaanip jadaanip iixna' quëxna'.

21 E tüg'óciy jáy huídi míyaaxp ojadajtp je Huindzin Dios, Dios ajcxy yajnidzögiiib y'alma.

22 Chi Pedro yjacmínañ:

—Amído'ijtcix, miich judíojäy ajcxy, jadu'n nej cham nmína'na'ñich. Je Jesús huídibi tsoon jim Nazaret ti xyaj'ijxcixy Dios ymic'ajt, mijhuinma'ñ, etz ijxpejt, jadu'n nej miich ajcxy ti m'ijxcixy ti mnejhuüygixy. 23 Jada yajcyejic ma miich ajcxy, jadu'n nej anajty Dios ti yajnigödugiy, e ti huinmay. Ajcxy mmajch je Jesús e myaj'ögy ajcxy, chi ajcxy myajcruudzpejty miid jibic jáydijc y'ané'min. 24 Chi Dios yajjugypijcy yajnihuädzictuty ma yi ó'cin, ca' huaad yhui'my ögy huinixii. 25 Je David ñimiydac Jesús chi ymínañ:

Nejhuüybich co je nHuindzin Dios y'ity ma ich nhuinduu. Yi' ijt ma ich n'a'oy, jigix ca'ydi pin xy'adzigi'yich xyajhuinma'ñyidigooyich.

26 Paady ti njotcugiyich, e ti ngapxypidzimyich co ooy njotcujcich. Paady co oy n'ögibich etz ninícx ñaaxtigihuipy, ca' ndajy mayich.

27 Co miich Dios ca' myajhui'ma'ñ ich n'alma ma ñaaxtigiydac. Ni mga'aa'ixihuipy, co miich mdumbi huídibi ooy mdzocy, co nícx yñinícx ñaaxhuindigoydäy.

28 Miich Dios, ti xyajni'ixiyich yi tzínaayin huídibi ymiid jugy'ájtin huinixibi. Xyajjotcugihuibich miid co xymiid'idipyich.

29 Chi Pedro yjacmínañ:

—Migügtijc ajcxy, huädz miich mnejhuüygixy co ich ajt nmij'ap David y'o'cy etz yajnaaxtigiiyi. E ma ñaaxtigiiy nmídni jë'ajt chambaad. 30 Je David hue' je' anajty Dios y'ayuc ñajtzcaxiiybi, e ñejhuüyb anajty co ti Dios yajnimäyii huídibi ca' y'anijity. David ñejhuüyb anajty co ma y'ap y'oc ma'xung'adipy Cristo, jaydëbi ané'mipy ma David y'ane'mdac. 31 Jadu'n co David jecy'ajty huinjihuüy e nejhuüy etz nigapxy jadu'n nej yjugypiga'ñ je

Cristo co anajty ti y'ögy. E ymínañ co ca' yí' y'alma yhuí'mípy jutjoty etz ñinícx ca' ypüdzípy. ³² Dios yajjugypíjcy je Jesús co y'o'cy. Jada tíy'ajt ích ajcxy nidüg'óciy nidíy'ajt'ajtpy. ³³ Jadu'n Dios Jesús mooy míj'ajt jíiby tzajpjoty, chí yajcídigíyí je Espíritu Santo huídibí Dios Teedy y'ahuaníy e tüg'óciy huídibí míich ajcxy tí m'íjxcíxy tí mmídoogíxy jíiby yí' chooñ ma yí'. ³⁴ Com David ca' je' chajppejty, je David cí'm ymínañ:

Je Huindzín Dios nímay ích nHuindzín: “Íña' ma ích a'oy'amy,

³⁵ íxtí cooní nmímadactáhuíbích yí mmídzíp, jadu'n anajty nípaady nej jíhuíy mdecypocxpejt'adyíí.”

³⁶ Chí Pedro yjacmínañ:

—Ñejhuíhuípy nidüg'óciy yí Israel jáy ajcxy co janch janch co je Jesús huídibí míich ajcxy myajcruudzpejt, Dios yajníbíjc co yhuindzín'adípy ma míich ajcxy, etz Cristo huídibí xyñíhua'nípy xyajtzögípy ajcxy.

³⁷ Co je mayjáy ajcxy jadu'n mídoy, chí ajcxy yjotyungíy, e amídoy ajcxy je Pedro etz jacjadyíí jáy huídí Jesús y'ayuc capxhuácxí anajty, chí ajcxy ymínañ:

—Mígügtíjc, ¿tí ích ajcxy jébi huaad nduñ?

³⁸ Huín'ít Pedro y'adzooy:

—Jothuimbíjtcíx e níbejtcíx nidüg nidüg míd Jesucristo yxí, jígíx Dios míich ajcxy mbocy xyhuinmeecxípy. E jadu'n Dios xymóhuípy je Espíritu Santo. ³⁹ Huídibí Dios y'ahuaníy míich yí' ajcxy mje' etz m'ung ajcxy, etz m'ap m'oc ajcxy, etz nañ jadu'n je jáy ajcxy huídí jíguémíp, etz jacjadyíí jáy ajcxy huídí Dios huín'ixamy.

⁴⁰ Míd jadyaab ayuc etz jacjadyíí ayuc Pedro yajnímáy capxhuíjy je mayjáy ymínañ:

—Ca' mmíjpídaaccíx je jáy ajcxy y'ayuc huídibí ca' capxymídoy Dios.

⁴¹ Jadu'n yjajtí, je jáy ajcxy huídíjaty míbíjc Pedro y'ayuc, chí ajcxy ñíbejtay huín'ít xí. Nímáyíy ajcxy huídibí míjpidac Jesús y'ayuc oy nidugíg mildí jáy. ⁴² Tüg'óciy ajcxy anajty paníxcíxy yí íxpíjcín jadu'n nej yí Jesús y'apóstoles ajcxy yaj'íxpíjcy. Chínaaygíxy yquipxyjot yquipxyhuínma'ñ. Etz Dios míbíjctzoogíxy e ñáyöymújcígy co anajty ajcxy chajcaagy tujc-huácxangíxy.

Jadu'n nej je míbíjpidíjc chínaaygíxy jugy'ajtcíxy

⁴³ Nidüg'óciy ajcxy anajty ooy míjcajee jíhuíy. E Jesús y'apóstoles ajcxy íjxpejt etz míjhuínma'ñ ooy anajty tungíxy. ⁴⁴ Nidüg'óciy je jáy ajcxy huídibí anajty tí ymíbíjccíxy íjtp anajty ajcxy tüg mucy, e yajhuácxíxy tíjaty ajcxy anajty ymíd, mooygíxy ymígügtíjc. ⁴⁵ Ytoocpy anajty ajcxy yí' ypidágy huídibí anajty ymíd, e chí anajty yajhuácxíxy yí meñ níje' níje' nej píñ tí yajmayjaty. ⁴⁶ Jabom jabom anajty ajcxy ñáyöymugyíí ma Dios ytíjc, etz nañ ñáyöymugyíí ajcxy ma ytíjc tzajcaagy tujc-huácxíxy etz ycaaygíxy y'uuccíxy ní'amugí' jotcujc míd ajcxy y'oyjot y'oyhuínma'ñ. ⁴⁷ Ní'ígíxy níyaaxcíxy yí Dios, e tüg'óciy jáy nayyajmí'ájtíp anajty ajcxy. Chí je Huindzín Dios yajmayíy jabom jabom yí míbíjcpídj, yí' huídibí anajty patp nídzoocín.

3

Tüg tecyma'tpí chögy

¹ Tüg xí Pedro etz Juan ypättígyíy ajcxy tú'cíy ma Dios ytíjc, míjminacy xí anajty, je' je' anajty je horí mína ajcxy Dios míbíjctzoogíxy. ² Jabom jabom anajty jáy yajnícxíxy ma je Dios ytíjc'aguu tüg tecyma'tpí, jadu'n je' anajty tí yma'xung'aty. Chí ajcxy pídagy je tecyma'tpí ma je Dios ytíjc'aguu huídí anajty yxí la Hermosa, jígíx jíñ píjctzohuípy meñ ma je jáy ajcxy huídibí tígyíy ma

Dios ytijc. ³ Co je jäy tecyma'tpi ijxy Pedro etz Juan ytigihuaangixy anajty ma Dios ytijc, chi pijctzoy meeñ. ⁴ Co Pedro etz Juan ijxy je tecyma'tpi, chi Pedro ymínañ:

—Huindicxpejtcich.

⁵ Chi je jäy huindicxpejty, yijp'ijxpy anajty ti möhuaanip. ⁶ Chi Pedro je tecyma'tpi nimay:

—Ca' nmíididyich plata, oori, huídibi janchtiy nmíidich je' nmöhuip. Míid Jesucristo je Nazaretpi ymic'ajt íich miich nimaayb: Tinaayg etz yöy.

⁷ Huin'it Pedro majch je tecyma'tpi ma a'oygi', e yajtinaygugíy. Huin'ítíy y'oyíy ymicpijcy je ytecy etz ytecyöy. ⁸ Chi je tecyma'tpi ytinaygugíy etz chi ñajztibíy. Chi jada' yöychoñ e ytigíy ma Dios ytijc míid Pedro etz Juan yöyñip ñidijcni yujctijcni, yam Dios ooy jäyech. ⁹ Tüg'óciy je mayjäy ijxy co anajty yöyñip etz jäyech yí Dios. ¹⁰ Je jäy ajcxy y'ijxy'ajtpy anajty ajcxy je tecyma'tpi e ñejhuíyigixyp co je' anajty je' huídibi pijtzohuo'cp pi'c meeñ ma Dios ytijc'aguu huídí anajty yxí la Hermosa. Paady je jäy ajcxy ooy chigíy jihuíy, co ajcxy ijxy nej anajty yam ti ytunyíi ti yjadyíi.

Pedro nimíydacy nej anajty je tecyma't ti chögy

¹¹ Je tecyma'tpi huídibi anajty ti chögy ca' anajty ixmach Pedro etz Juan, e tüg'óciy yí jäy anajty ooy jihuíyigixy huinmaaygixy. Chi mic'amy mayjäy nimujcy Pedro etz Juan jim ma yí Dios ytijc huinduu huídibi jäy ytijpy Salomón. ¹² Pedro co jadu'n ijxy je mayjay, chi ymínañ:

—Judío yéydijctijc, ¿nej co mdzachhuinmaaygixy mijcajee? ¿Nej co íich miich ajcxy xychachhuindicxciy jadu'n nej jihuíy íich ajcxy jada jäy ti nyajtzögyich ti nyajyöychoñich míid ngímmic'ajtich, o míid co íich ajcxy ooy nDios'ojadaty? ¹³ Íich'ajt nDios, je Dios huídí nmíj'ap nmíjteedy, je Abraham, je Isaac, etz je Jacob y'ojadaj, yí' ti yajtzögy jada tecyma'tpi, jigix yajcömayípy yí' y'ung Jesús huídibi miich ajcxy mgíyeyc ma je tungmíidpi. E co je gobernador Pilato je' najtzmadzihua'ñ, miich ajcxy ca' m'aa'axíy. ¹⁴ Ma yjapadyíi ajcxy mgapíjctzoy co huen yajnajtzmazíy, je huídí anajty yajpaatp huadz etz tudägy, chi miich ajcxy mbíjctzoy co huen yajnajtzmazíy tüg jäy huídibi anajty ti yjäyyaj'o'cy. ¹⁵ Jadu'n je jäy ajcxy yaj'o'cy je' huídibi anajty jugy'ajt yejcp. Je huídibi Dios yajjugypíjcy ma anajty ti y'ögy e jada tíy'ajt íich ajcxy nidíy'ajt'ajtpyich. ¹⁶ Míid co ti mibícy Jesús yxí, je míjhuinma'ñ huídibi Jesús ymic'ajt ti tuñ míid jada pa'mjäy huídibi miich ajcxy m'ijxyp mnejhuíy. Com ti mibícy Jesús paady ti chögy janch yajxondícní, jadu'n nej miich ajcxy nidüg'óciy ti m'ijxcíy.

¹⁷ Chi Pedro yjacmínañ:

—Nmígügtíjtcich, nejhuíyibích co miich ajcxy etz mhúindzindíjcy yaj'o'cy Jesús, míid co anajty mganejhuíyigixy ti anajty ajcxy mduungíxy. ¹⁸ Jadu'n cham Dios ti cuyduñ jadu'n nej Dios y'ayucnajtzcapxíybi ymína'ñ co copícy co yí Cristo yajnaxípy ayo'n. ¹⁹ Paady játyim jothuimbíjtcíx miich ajcxy ma Dios, jigix ajcxy mbocy yajjötztáhuípy. Huin'it je Huindzín Dios xyaj-niguexípy ajcxy jotcuyc'ájtín huíníxí, ²⁰ e yí' quexamb je Jesús, je Cristo, je huídibi Dios jayíj'aty yhuín'íjx co quexa'ñ ma miich ajcxy. ²¹ Oy jadachambí Jesucristo y'oc-huí'mípy jíiby tzajpjoty íxtí cooní Dios anajty yaj'oyíydäy tíjaty, co jadu'n yjaay yí' y'ayucnajtzcapxíybi huídibi míid huadz yjot yhuinma'ñ huídibi ajcxy jecy'ajty tzínay. ²² Jadu'n Moisés nimay íich ajt nmíj'ap nmíjteedy jecy'ajty: “Je Huindzín Dios xyaj-niguexaan miich ajcxy tüg yí' y'ayucnajtzcapxíybi, huídibi pídzímamyb ma miich ajcxy mjuugy mmígüg jadu'n nej íich yí' xyguejxy. M'amído'idípy miich ajcxy yí' y'ayuc.

²³ Jadu'n yjadipy co tög'óciy jäy huidibi anajty ca' capxymidooy je Dios y'ayucnajtzcaxiibi, huadz ajcxy ytigoydahuiipy, e tög jibicy ajcxy idipy ma judíojäy ajcxy yajpaady."

²⁴ Chi Pedro yjacmíañ:

—Jadu'n jada tög'óciy Dios y'ayucnajtzcaxiibi, chondacy ma Samuel ixti ma jacjadyiini ajcxy, ñigapxtay ajcxy jadu'n nej cham ytuñyii yjadyii. ²⁵ Yi Dios y'ayucnajtzcaxiibi ajcxy, miich je' anajty ajcxy mmij'ap mmijteedy. E je ayuc huidibi Dios yajnimay Abraham ycuydunaamyb mñid miich ajcxy co jadu'n ymíañ: "Ngonúucxibich tög'óciy naaxhuiñyjäy mñid tög miich m'ap m'oc." ²⁶ Co Dios y'ung y'o'cy, chi Dios yajjugypicy jadüg'oc, e quejxy jayijp ma miich ajcxy, jigix xyconúucxixipy, etz jigix nidüg'óciy miich ajcxy m'ixmadzipy yi mjibichuinma'ñ.

4

Pedro etz Juan ma tungmñdipi yhuinduu

¹ Pedro etz Juan jimni anajty tzachmñdmíydaaccixy je mayjäy ajcxy, co oy miingixy je judío teedy ajcxy, mñid je soldado huindzin, je tzajptijc cuend'ajtpi etz mñid saduceojäy. ² Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nimaaygixy co yi öcpi jugypigipy yi' ajcxy, com co Jesús yjugypicy co y'o'cy. ³ Chi je tungmñdipi ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'ññ. ⁴ Mayjäy ajcxy huidibi anajty ti amido'ijtcixy je Pedro y'ayuc ymibijc ajcxy. E hue' je mibijcpidijc, ac yëydijctijcpi, yajmichomujcy jahueen ycamigoox míity.

⁵ Je com jabom ajcxy ñaymújcci jim Jerusalén judíojäy tungmñdipi, je mijjäydijc etz yi escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tög'óciy teedy mijtungmñdipi yjugymigüg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyii, chi ajcxy y'amidooy:

—¿Pín miich ajcxy ti xymöy cötujcin co jada jadu'n ti mdungixy?

⁸ Huin'it Pedro ymñid anajty Espíritu Santo ma yjot yhuinma'ñ, chi ymíañ:
—Miich ajcxy tungmñdipi etz judíojäy mijjäydijc, ⁹ yi' ñich miich ajcxy cham xyaj'amidoob yi oybi tiibi yajtuñ ma tög pa'mjäy e nejhuñhuaangixy nej ti chögy. ¹⁰ Cham nimíyductäyich ma miich ajcxy mhuinduu, jaydëbi ajcxy nejhuñyadahuiipy tög'óciy judíojäy, co jadayaabi jäy huidibi anajty tecyma'tpi, cham yajpaady ya ma miich ajcxy mhuinduu mic oy, mñid je mic'ajt huidibi Jesucristo je Nazaretpi yejcpy, je jäy huidibi miich ajcxy myajcruudzpejt, huidibi Dios yajjugypijc co y'o'cy. ¹¹ Yi Jesús jadu'n nipaady nej tög tzaa oybi, huidibi ajcxy potzpidijc, ca' yajtúngixy co ytijcojcxixy. Jesús cham ti paady mijtung ma Dios, jadu'n yi' ni paady nej tög mij tzaa huidibi ytungbaatp ma poch ytaatz. ¹² Ca' jac ni pín huidibi jëbi xyajnñdzoocim ajt n'alma. Jesucristo yi' je' tögpaic huidibi Dios yejc ma jäy ya naaxhuiñ huidibi jëbi xyajnñdzoocim ajt n'alma.

¹³ Co je mijtungmñdipi ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuñy co ca' ajcxy y'ixpijcyjäyity, chi ajcxy ooy jihuiy huinmay. Nañ yi' ijxajp ajcxy co je' anajty huidibi ajcxy ti mñid huidity Jesús. ¹⁴ Cha co yjactimjimíty anajty je jäy huidibi anajty ti chögy ytinäy mñid Pedro etz Juan, paady ajcxy ca'ajty nej midziptzoonipy. ¹⁵ Chi je tungmñdipi ni'ane'mdiy huen yajpidzimyii Pedro etz Juan ma je mayjäy anajty ñaymugyii, jigix ac jëyi tungmñdipidijc ñyöyaangixy capxyöyaangixy Pedro etz Juan ypocy.

¹⁶ Chi ajcxy ymíañ:

—¿Ti cham nduunim m̄id yjiibi jāy ajcxy? Com t̄ug'óciy jāy hūidibi tzinaayb ya Jerusalén ñejhūiyb ajcxy co ti t̄ungixy mijhuinma'ñ, e ca' huaad ñich ajt nm̄inaanim co ca' yjanchity. ¹⁷ Tzoc capx'adujcim co ca' huaad ajcxy jacnim̄ydḡipy Jesús jadachambi etz janc̄icxp̄i x̄i tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej ocnim̄ydaac̄n̄p, ni ca' jacyaj'ixpīḡipy m̄id Jesús yx̄i. ¹⁹ Huin'it Pedro etz Juan y'adzooy:

—Huinmaayḡix miich ajcxy ci'm pen t̄iy'ajt jada ma Dios co ñich miich ajcxy ngapxyc̄ob̄iḡipy jayijp, ca'ydi ȳi Dios. ²⁰ Com ñich ajcxy ca' nni'amonaangixy jadu'n nej ñich ajcxy ti n'ixy ti nm̄idoy.

²¹ Huin'it je tungm̄idp̄i ajcxy adziḡi'ñ m̄igapxy Pedro etz Juan, e najtzmaz̄i'y ajcxy. Ca' ajcxy mihuinma'ñybaty nej tzaachytun̄ipy Pedro etz Juan. Com t̄ug'óciy jāy yj̄aymejchpy yc̄omaayb anajty ȳi Dios jadu'n nej anajty ti ytuñȳi ti yjadyi. ²² Je jāy tecyma'tp̄i hūidibi tzooc co Dios mijhuinma'ñ ytuñ, ym̄id anajty yjim̄ijt huixch̄igūipx naxy.

Je m̄ibijcp̄idijc ajcxy pijctzooḡixy ma Dios jotm̄ic'ajt

²³ Chi Pedro etz Juan co yajnajtzmaz̄i'y, chi ajcxy ñicxy ma ym̄iḡügt̄ijc anajty, yajm̄idm̄iydactay t̄ug'óciy jadu'n nej teedy huindzin etz mijj̄aydj̄ic anajty ti ñim̄áayiḡixy. ²⁴ Co jada ayuc ajcxy m̄idoy nid̄üg'óciy ajcxy tú'ciy yjot yhuinma'ñ p̄idacy, chi ajcxy Dios m̄ibijctzoy ym̄inañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je mejy etz t̄ug'óciy tijaty. ²⁵ Miich m̄id mEsp̄iritu je David myajcapxy, e ȳi' jadu'n ym̄inañ:

¿Nej co jada naaxhuiñybi jāy chachhuaangixy chachj̄ihūiyḡixy, e ȳi jāy ajcxy huinmaayḡixy hūidibi ca' ytimȳt̄ij̄ity?

²⁶ Ȳi reydj̄ic ya naaxhuiñybi m̄idziptzoñ ajcxy ȳi Dios. Etz je tungm̄idp̄i cajp cajp ñaymujci ajcxy, m̄idziptzoñ ajcxy Huindzin Dios, etz m̄idziptzoñ ajcxy Cristo.

²⁷ Com janch co je rey Herodes etz ȳi gobernador Poncio Pilato ñaymujci ya ma jada cajp m̄id hūidibi ca' yjudíōj̄aȳity ajcxy etz m̄id judíōj̄aȳ ajcxy, m̄idziptzoñ ajcxy ȳi m'ung Jesús hūidi anajty ti mhuin'ixy. ²⁸ Ȳi' ajcxy ti cuydungixy t̄ug'óciy jadu'n nej miich, Huindzin Dios, ti myajniḡöduḡiy jadu'n nej ytun̄iyb yjad̄iyb. ²⁹ Jadachambi Huindzin Dios, ix jadu'n nej ȳi tungm̄itp̄i xychachm̄ijotm̄á'tc̄ixyich. Mo' ȳi mdumbi ajcxy jotm̄ic'ájt̄in, jiḡix m'ayuc ajcxy capxhūäc̄x̄ipy amic jotm̄ic, ³⁰ e m̄id miich mm̄ic'ájt̄in chöḡipy pa'mj̄aydj̄ic, tun̄ipy ajcxy tijaty ijxpejt etz mijhuinma'ñ m̄id ȳi m'ung Jesús yx̄i, hūidibi m̄id hūadz yjot yhuinma'ñ.

³¹ Co ajcxy m̄ibijctzoday, chi je naax chuyuuy ma anajty ajcxy t̄ugmucy yajpaatc̄ixy, etz nid̄üg'óciy ȳi' ajcxy ym̄ic'ajt mooȳi je Esp̄iritu Santo, e ȳi Dios y'ayuc capxhūäc̄x̄icy anajty amic jotm̄ic.

Je m̄ibijcp̄idijc tú'ciy anajty ajcxy yjot yhuinma'ñ

³² Je mayj̄ay hūidibi anajty ti m̄ibicy, tú'ciy ajcxy yjot yhuinma'ñ. Ni p̄in anajty ycam̄inañ co nayd̄üḡ j̄e'adyi. Hue' anajty ym̄inaangixy co tú'ciy j̄e'ájt̄iḡixy. ³³ Je majmetzpi Jesús y'ayuccapxhūäc̄x̄ipi amic jotm̄ic capxhūäc̄x̄y je t̄iy'ajt jadu'n nej je Huindzin Jesús yjugyp̄ijcy co y'o'cy. E mij ajcxy Dios ypubejti. ³⁴ Ma je' ajcxy ca' ni ti yajmayajtc̄ixy, com t̄ug'óciy tijaty anajty ajcxy ym̄id ñaax o yt̄ijc ytoocpy anajty ajcxy, e yejcc̄ixy anajty meeñ. ³⁵ Chi je meeñ yajc̄idiḡiyḡixy je apóstoles ajcxy e ȳi' ajcxy moy nid̄üḡ nid̄üḡ p̄injaty yajmayajtp. ³⁶ Jim anajty m̄id je' ajcxy t̄uḡ levita jāy hūidi anajty yx̄i José, hūidibi ma'xung'ajt ma ȳi ñaaxjot mejy agujc hūidibi yx̄i Chipre, je hūidibi je

majmetzpi Jesús y'ayuccapxhuäcxpi, yxii moy Bernabé, huídibi huimbídzim je yajjotcujc'ajtpi. ³⁷ Je Bernabé tocy ytundac huídibi anajty ymíid, e chi míimíiñ je meeñ, e yajcídigi'y je apóstoles ajcxy.

5

Je Ananías etz Safira ajcxy Dios midundigoy

¹ Chi jadüg yëydijc, huídi anajty yxii Ananías, míid ytöxyijc, Safira, toogy ajcxy tüg it ytundac. ² Ananías ñayyajnihui'mi jac'anaxy je meeñ, e yajninicxy Jesús y'apóstoles ajcxy je jac-hueenip, jadu'n nej jihuüy yejctay tüg'óciy, etz yí' ytöxyijc ñejhuüyab anajty. ³ Chi Pedro ñimay Ananías:

—Ananías, ¿nej co myajtuñ je mujcu' yhuinma'ñ, e mhuin'ina'ñ je Espíritu Santo, e ti mbugoñ jac'anaxypí meeñ nej ti tzoo'adyii yí pidägy tiibi mdoogy? ⁴ ¿Nej ca' anajty yí' miich mdundac'adyii? E co ti mdoogy, ¿nej ca' anajty je' miich mmeñ'adyii? ¿Nej co jadu'n ti mdundigooy? Dios ti mhuin'ina'ñ, canan jäy.

⁵ Co jadu'n midoy, jíimiyi Ananías yciday, e chi y'o'cy. E tüg'óciy jäy ajcxy huídijaty nejhuüy, ooy ajcxy chigíiy. ⁶ Huin'it ymíiñ jadyii yujcyeecpidijc, chi ajcxy mo'ñ Ananías ñinícx, e oy ajcxy yajnaaxtigíy.

⁷ Codugíg hori naxy, oy ytigíy je Ananías ytöxyijc, e ni ca' nejhuüy anajty ti ti ytuñyíi ti yjadyii je ñäy. ⁸ Pedro y'amídoohui:

—Yajnimaaaygíich, ¿nej janch jadu'n ti mdoocixy yí mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyíich.

⁹ Chi Pedro ymíinañ:

—¿Nej co ti mnaygápaxigixy mhuin'ina'ñ yí Espíritu Santo? Cha ma tijc'aguu je jäy ajcxy ytinäy huídi oy ti yajnaaxtigíy mñäy, e jadachambi miich ajcxy xyajnicxaam nañ jadu'n.

¹⁰ Tim huin'itíy Ananías ytöxijc yciday, e chi y'o'cy. E chi oy ycidägy ma Pedro ytecymijc. Co je yujcyeecpidijc ytigíy, chi ajcxy je' paaty ögy. Chi ajcxy yajpidzimy etz oy yajnaaxtigíy ma ñäy ymijc. ¹¹ Chi tüg'óciy je jäy ajcxy huídibi Jesús míbijcp etz tüg'óciy huídibi midou jada nej ti yjadyii ti ytunyíi, chi ajcxy ooy chigíy.

Canaag mij'ijxpejt etz tíy'ajt

¹² Je majmetzpi Jesús y'ayuccapxhuäcxpi ooy anajty ajcxy Dios ymic'ajt yajnjiguëxíci etz ijxpejt yejccixy ma yí jäy ajcxy. E tüg'óciy jäy ajcxy huídibi Jesús míbijc jabom jabom anajty ñayyöymújcigixy ma Dios ytiyc huinduu huídibi yxii Salomón. ¹³ Ca' jac ni pín anajty míjnicxpeda'ñ míjyöypeda'ñ je' ajcxy. E je jäy ajcxy yjacyajmij'ajtpy huídi Jesús anajty ooy míbijccixyp. ¹⁴ Mayjäy oy míbijcni Jesús y'ayuc, yëydijctijc etz töxyjäydijc. ¹⁵ Etz ixti pa'mjäydijc anajty ajcxy yajnicxy míjtügujc cijx'aam pidaaccixy, jigix co Pedro ñaxipy jim ycadimjeyity co nicxy y'aa'ap yjäty ma je pa'mjäy. ¹⁶ Nañ jadu'n mayjäy chooñ anajty huídijaty huígon ycajp, ymiingixy Jerusalén, míidmiingixy pa'mjäy, etz huídibi ca'oybi míid ma yjot yhuinma'ñ, e tüg'óciy yajtzoocaa'yb anajty ajcxy.

Pedro etz Juan yaj'ixhuídijtcixy yajpahúidijtcixy

¹⁷ Huin'it je teedy míjtungmíidpí etz huídibi saduceo íjxpíjcín ymíjpidacp ooy ajcxy yajca'oy'íjxy, ¹⁸ e co ajcxy majch je apóstoles ajcxy, chi ajcxy pidacy

ma je mijpujxtijc. ¹⁹ Chi Huindzin Dios tüg y'áigel je huin'it coodz yaj'ahuaach je pujxtijc aguu, yajpidzimy ajcxy, chi ajcxy nimay:

²⁰ —Níxcix, tinay'ahuiygix tzajtigoty, yajmídmíydaaccix yi mayjáy ajcxy Jesucristo ytiy'ajt nej jébi jáy ajcxy paadipy jugy'ájtín jemybi.

²¹ Co jadu'n midoy, chi com jabom ytiгий ajcxy jopyñi tzajtigoty. Jiiby je' ajcxy anajty ñiyaj'ixpijcco'ni.

Chi je teedy mijtungmídpi etz jacpinjaty míd, chi ajcxy capxyñiguejxy yi judío jáy ymíjjáydiyc etz ixpijcytíjc co huen junta jadyii. Chi ajcxy capxyñiguejxy huen nícxxy yajpidzimyii jiiby pujxtigoty yi apóstoles ajcxy. ²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni míd tíy'ajt, ²³ chi ajcxy nimay:

—Hue' ích ajcxy ti nbaadcixy yi pujxtijc aducy, etz je soldadtíjc jim tíjc aguuy yjaccuend'ajtcixy. Chi co ích ajcxy nyaj'ahuäch je pujxtijc, ca' ích ajcxy ni pin ti nbaatyich jiiby pujxtigoty.

²⁴ Co jadu'n ajcxy midoy, je teedy mijtungmídpi etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'occogixíhuip. ²⁵ Huin'it tüg jáy miñ huídibi nimaayi ajcxy:

—Je jáy huídibi miich ajcxy mbídac pujxtigoty, chim je' ajcxy tzajtigoty yaj'ixpijccixy yi mayjáy.

²⁶ Chi je soldado huindzin míd soldadtíjc nícxxy ma yi apóstoles ajcxy jáy yaj'ixpijccixy, chi ajcxy yajnícxxy oy'amy, com tzigíyb anajty ajcxy co je mayjáy chaagádzíyb. ²⁷ Co ajcxy yajmíñ, chi ajcxy pidacy ma je maytungmídpi yhuinduu. Chi je teedy mijtungmídpi je apóstoles ajcxy nimay:

²⁸ —Ích ajcxy ti ngapx'aducy co ca' huaad m'ocjacyaj'ixpijccixni ma Jesús yxí. E ¿ti ti mdungixy? Ti myajhuächtaaygixy yi m'ixpijcin ma Jerusaléngajp, e ích ajcxy miich pocy xyjátyim yajmíhuí'mam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copícy ích ajcxy ngapxycöbigípyich yi Dios jayíjp ca'ydi jáy. ³⁰ Je Dios huídibi ích ajt nmíj'ap nmíjteedy y'ojadajt, yi' yajjugypíjc je Jesús huídibi miich ajcxy myaj'óc cruudzcíxy. ³¹ Je Dios Teedy jadachambi hue' Jesús mídity aa'oy'amy jiiby tzajpjoty, e ti pídagy ane'mbi etz yajnídzoocpi jigix yi judío jáy ajcxy yjothuimbídy e yajhuinmeecxípy ajcxy ypocy. ³² Ích ajcxy tíy'ajt nyejcpy míd jada ycípxi, etz nañ jadu'n je Espíritu Santo huídibi Dios ymooyb pinjaty capxymídoohuip.

³³ Co je jáy ajcxy jadu'n midoy, chi ajcxy ooy yjotmátcoty, chi ajcxy jayaj'öga'ñ. ³⁴ Huin'it ytinayígy ma je naymujctac tüg fariseojáy, hue' anajty yxí Gamaliel, hue' je' anajty Moisés yley ñihuindzin'ájtíp. E jáy ajcxy ooy anajty yajmíj'ajtcixy je Gamaliel. Chi je' ni'ane'mdíy co huen yajpidzimyii tzojcyi jiiby tíba'y je apóstoles ajcxy. ³⁵ Chi Gamaliel nimay yi tungmídpi ajcxy:

—Judío yéydíjctíjc ajcxy, íxim ti mdungixy míd jada jáy ajcxy. ³⁶ Jáymetz miich ajcxy co jecy'ajty je Teudas ypidígy ymínañ co je' ymíjty yjanchity, e chi ypanícxí oy nimídaax migo'pxti yéydíjc. Chi ajcxy yaj'o'ci, chi tüg'ócíy huídibi anajty ti ypanícxyii yöyhuáčxtay, e jadu'ñyi je' ajcxy ñitígoyday. ³⁷ Jacnamni je huin'it xí mína cajpjáy anajty ñecypejtcixy, ypidígy Judas huídibi tzon Galilea. Mayjáy ypanícxí; nañ jadu'n ajcxy yaj'o'cy, e tüg'ócíy jáy huídibi panícxxy jadu'ñyi ajcxy yöyhuáčxtay. ³⁸ Paady ích miich ajcxy jadu'n nimaaygixy, ixmajtzcix yi apóstoles ajcxy, e ca' mmíjyöybejtcixy. Peni jáy yi y'ayuc ytiy'ajt huídibi ajcxy ymíd, cíxip tígoyip yi'. ³⁹ Pen Dios y'ayuc ytiy'ajt yi' ajcxy ymíd,

ca' ajcxy mjadipy nej myajcödigóoygixyipy. Jaty nayguend'ájtigixy, ca' jecyity co Dios anajty mïd mdziptungixy.

⁴⁰ Nidüg'óciy ajcxy jäygidacy Gamaliel ycapxhuíjn. Huin'it ajcxy mïjhuoy yi apóstoles ajcxy. Chi ajcxy tzaachytuñ, chi ajcxy cí'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmadzïy. ⁴¹ Je apóstoles ajcxy ypidzimy ajcxy ma tungmïdipi ajcxy yhuinduu ooy yjotcujcity co Dios jadu'n ti aa'ixiy co huen tzaachytuñyï mïd Jesús yxi ycixpi. ⁴² E ooy ajcxy yaj'ixpijccixy etz nimiydaaccixy Jesucristo jabom jabom jadu'n tzajtigoty nañ jadu'n majaty tijc.

6

Chi ajcxy yajniñbejty huixtujc mutztungmïdipi

¹ Je huin'it xii ajcxy huïdibi xpijcp Jesús y'ayuc nigï anajty ñimayiy'adïtzcixy. E huïdibi anajty capxp griego ayuc ytigïy nayñigápxip mïd huïdibi judío y'ayuc capxp. Ymïnaangixy co yi griegojäy co'ögy töxyjädiç, ca' anajty ajcxy paady quipxyjaty mïd je judíojäy co'ögy töxyjädiç caayin uucin jabom jabom. ² Huin'it yi majmetzpi apóstoles ajcxy yajnaymujctaayi je jäy huïdibi Jesús mïbijcp, chi ajcxy ymïnañ:

—Ca' huaad ïch ajcxy Dios y'ayuccapxhuäcxin n'ijxmajch, e nicxyich caayin uucin yajhuäcxixy. ³ Paady miich ajcxy migügtijc nayhuin'ïjxigix huixtujc yëdyjctijc huïdibi oy yajmij'ajtni Dios, huïdibi huadz oy yhuinma'ñ ymïd, huïdibi je Dios yjihui'ñ ymic'ajt mïd, e huen ajcxy tung'adïb jada tung. ⁴ ïch ajcxy njacmïbijctzohuamy Dios, etz ïch ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjäy huin'ijxy Esteban huïdibi ymïd ooy ymïbijcin, etz ymïd Espíritu Santo. Nañ huin'ijxy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty choon jim Antioquía, jécyip anajty jïptigiyïyñi judíojäy ytiy'ajt. ⁶ Chi ajcxy yajnicxy je jäy ma je apóstoles ajcxy. Chi ajcxy je apóstoles Dios mïbijctzoy e cïñixajy ajcxy.

⁷ Je Huindzin Jesús y'ayuc nigï anajty jäy tzachnejhuïyñi. E je mïbijcpidijc nigï anajty ajcxy chachnimayïyñi jim Jerusalén, ixti may judío teedy ajcxy ymïbijcy.

Majch ajcxy Esteban

⁸ Je Esteban ymïd anajty Dios ymic'ajt etz y'oy'ajt e oy mïjhuinma'ñ tuuñ, etz yejcy ijxpejt ma jäy ajcxy. ⁹ Huin'it xii nijëjity ixpicytjç ooy ñay'ijxquípxigixy y'ixpijcin mïd Esteban jim ma judíojäy ajcxy ñaymujctac huïdi anajty yxi Libertados. E jim anajty Cirene jäy, Alejandría jäy, Cilicia jäy, etz huïdibi tzomb jim Asia ñaaxjot. ¹⁰ Ca' ajcxy mïmadacy Esteban com hue' je' anajty ycapxy mïd yhuijy'ajt ycuç'ajt huïdibi je Espíritu Santo anajty mooyip. ¹¹ Chi Esteban ymïdzip ajcxy mujuy jäy huïdibi jëbi nihuambety Esteban, co ti anajty ooy ycapxtigooy etz ni'oïy Moisés etz Dios. ¹² Jadu'n ajcxy yajyuumïgy yaj'oxïgy yi jäy mijjäydiç, etz huïdibi ajcxy yaj'ixpijcp Moisés yley. Chi ajcxy mïmadacy majch ajcxy Esteban, yajnicxy ajcxy ma je judíojäy ymïjtungmïdipi etz ixpicytjç ñaymüjçigixy. ¹³ Chi ajcxy ixtaayi jäy huïdibi nihuambediç, chi ajcxy ymïnañ:

—Jada Esteban jibic nigapxy yi Dios ytijc etz Moisés ytiy'ajt. ¹⁴ Ti ïch ajcxy mïdoy co ymïna'ñ co Jesús je Nazaretpi yjidamy je Dios ytijc, e yajtigadza'ñ Dios ytiy'ajt jadu'n nej Moisés ajt xymooyim.

¹⁵ Huin'it je judíojäy tungmüdpí e tüg'óciy jäy nej anajty ajcxy jim ñaaygixy huindixpejty ajcxy Esteban. E chi ajcxy ijxi yhuiñyjipp jadu'n anajty quëxigy nej y'ángel yhuiñyjipp.

7

Esteban ñaygohuaani ma tungmüdpí yhuinduu

¹ Huin'it je teedy mütungmüdpí yaj'amidooy Esteban:

—¿Nej janch jadaji?

² Chi Esteban y'adzooy:

—Migügtijc ajcxy etz mijjäydijc ocmidoogix. Ich ajt nDios mijpi janchypi nayquëxici ma ich ajt nmij'ap nmijteedy Abraham jecy'ajty co anajty jim ity Mesopotamia ñaaxjot, ca'ni anajty chinaydacpiy jim Harán. ³ Chi Abraham Dios ñimaayi: “Ixmatz mnaax mgajp etz tüg'óciy m'amigügtijc, e nicx ma yi naaxjot huidibi myajniñihuamyb.” ⁴ Chi Abraham choñ ma yi Caldea ñaaxjot, e nicxy tzinaydacpijcpí jim Harán. Co yteedy oy y'o'cni, chi Dios Abraham yajmiiñ ma jada naaxjot ma miich ajcxy cham mdzinäy. ⁵ E ca' Dios moy Abraham jada naaxjot ya, ni ca' ma yhuäcxtägiy. Hue' je' janchtiy yaj'ahuaniiy co möhuaaniiy y'ap y'oc, e co anajty je' ajcxy jediib. Oyñi anajty Abraham ca' y'ung müdity co Dios ymígapxi. ⁶ Nimaayi Dios co y'ap y'oc y'adzínahuiy ajcxy ma huingjäy ñaaxjot, etz chi ajcxy ytumbi'adiyb etz chaachytuniiyb mídaax migo'px jimijt. ⁷ Nañ jadu'n Dios nimay Abraham: “Ndzaachytuniiyich je naax cajp ma yi m'ap m'oc anajty ytumbi'adyii. Chi choonip ajcxy jim, e chi xymiduniiyich ma jadayaabi it.” ⁸ Dios ytuun tüg capxytuunin müd Abraham, co huen ajcxy yajtiy'ajttihuiy. Paady co Abraham y'ung Isaac yma'xung'ajty conductujc xi ajcxy oy tiy'ajttiy. Nañ jadu'n Isaac ymang Jacob, e Jacob yi ymang nimajmetzpi ajcxy, huidibi ajcxy ñi'ap'ajty yi nimajmetzpicypí Israel ycajp.

⁹ Chi Esteban yjacmíñañ:

—Je' ajcxy Jacob ymang, ich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios müd anajty y'ity José, ¹⁰ etz nihuaañ yajtzoocy ma ayo'n jotmay. Chi Dios moy ixpijcin jigix cōmay ypidzimipy ma Faraón, je Egipto jäy yrey. Chi je rey José tung moy huen ane'my je Egipto naaxjot etz ane'mipy je rey ytijc.

¹¹ Huin'it xi ymiiñ mijyuu mij'ayo'n jim Egipto etz jim Canaán ñaaxjot. Je huin'it xi ich ajt nmij'ap nmijteedy ca' anajty ajcxy paady ti ycaipy. ¹² Co Jacob oy nejhuüy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huidibi ich ajt nmij'ap'ajtim nmijteedy'ajtim. Chi ajcxy y'oy tügtecy trigo juuyb. ¹³ Je mímiejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuüy pinjäy je' anajty je José. ¹⁴ Chi José capxyñiguejxy huen cidaaccixy jim Egipto yi' yteedy Jacob müd tüg'óciy yjuugy ymígü. Hue' anajty ajcxy ñaybaattáayigixy nidugi'px majmocx jäy. ¹⁵ E jadu'n yajty co Jacobo oy chinaydacpiy jim Egipto. Jim oy comjegy y'o'cni. Nañ jadu'n jim ajcxy y'o'cy may ich ajt nmij'ap nmijteedy. ¹⁶ E chi Jacob yjuugy ymígü com jecy yajpidzimy Jacob ypajc ma ñaaxtigiy, e chi ajcxy yajnicxy jim Siquem, oy pidaaccixy ma je o'cpi jut huidibi Abraham anajty ti juy meeñyigixy ma Hamor ymang jim Siquem.

¹⁷ Chi Esteban yjacmíñañ:

—Ytimypadaanipy anajty tiempo nej anajty Dios ti yaj'ahuaniiy Abraham. Ti anajty yi judíojäy ooy ymayiiñi jim Egipto. ¹⁸ Chi oy jadüg rey ytigiiy ane'mbi huidibi ca' ix'y'adyii José. ¹⁹ Je rey yhuin'iiñ ich ajt nmij'ap nmijteedy,

e oy ajcxy chaachytuun. E chi ane'my co huen y'ung ajcxy ñigüecytaaгыxy huídibi anajty ajcxy ma'xung'ajtp, jigix y'ó'ccixipy. ²⁰ Huin'it tiempo oy yma'xung'ajty Moisés, je huídibi ooy Dios jäygidacy. Chi Moisés ytaj yteedy tugig po' yajyeeci ma ytijc. ²¹ Co ajcxy yajñigüeci, chi je rey ñix je' agondigüy, e yajyeegy jadu'n nej yci'm'ung. ²² Paady Moisés ixpijcy tüg'óciy jadu'n nej Egipto jäy anajty ajcxy y'ixpijcy, e ooy ymadacy müd y'ayuc etz müd ytung.

²³ Co Moisés anajty müdity huixchiguipx jimijt, chi pidacy yhuinma'ñ co nicxy ixa'ñ je' y'amigügtijc je Israel y'ap y'oc. ²⁴ Chi Moisés ijxy co tüg egipciojäy chaachytuñii tüg je' y'amigüg. Chi Moisés yaj'o'cy je egipciojäy, yaj'ahuimbijty nej anajty y'amigüg yajtzaachytuñ. ²⁵ Hue' Moisés tijy co je' y'amigügtijc ajcxy huen nejhuüy huinjihuüy co Dios nihua'naanip ma ymidzip müd Moisés yciipi. Chi ajcxy ca' huinjihuüy co Moisés nihua'naanip. ²⁶ Com jabom Moisés paty mejtz Israel jäy chachtziptungixy. Chi Moisés jayajxemañ je tzip, chi nimay: “Miich ajcxy nay'amigüg'ajtip, ¿nej co mdziptungixy miich ajcxy miñ xyipy?” ²⁷ Je huídibi anajty ymigüg tzaachytuumb huin'it najtztijüy Moisés, nimay: “¿Pin ti xypidägy huindzin etz tydumbi ma ich ajcxy? ²⁸ ¿Nej xyaj'ogaamich jadu'n nej axiy myaj'o'cy yi egipciojäy?” ²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypijcy. Chi ytöxyjic paty metz ymang.

³⁰ Huixchiguipx jimijt naxy, huin'it jim adügtuum ma je cop huídibi yxi Sinaí, ñayguëxi tüg ángel jinjoty ma tüg quipymang huídibi anajty tzachtooyb. ³¹ Chi Moisés ooy jihuüy huinmaay müd je' yciipi huídibi anajty y'ijxyp. Co oy mihungoñ, chi midoy co je Huindzin Dios ñimäyü: ³² “Ich Dios huídibi mmij'ap mmijteedy ajcxy Abraham, Isaac etz Jacobo Dios'ajtpy.” Chi Moisés chiyuygoty, ca' anajty ocjac-huindixpedaani. ³³ E je Huindzin Dios nimaayi: “Jen mgig, com je it ma miich mdinäy, Dios yi' y'it. ³⁴ Ich ti n'ixyich njäyich nej tzaachypi paatcixy jim Egipto. Ti nmidooyich co y'ajcxy yäxy ytinäy müd je tzaachypi yciipi. Ti ngidägyich co ajcxy ngohuaanip. Ich miich nguexamyb jim Egipto ma yi Israel jäy ajcxy.”

³⁵ Chi Esteban yjacmínañ:

—Co Moisés oga'n ñicxy ma ich ajt nmij'ap nmijteedy ca' ajcxy cöbijcy huen y'ane'müyb, chi ajcxy ymínañ: “¿Pin ti xyñimäy co ich miich ajcxy nhuindzin'adiyb?” Co mimetz'ocpi Moisés ñicxy ma yi Israel jäy, je taabi anajty je ángel ti ymigapxyii jinye'ñ agujc, chi ajcxy cöbijcy. ³⁶ Je Moisés je' yajpidzim ich ajt nmij'ap nmijteedy jecy'ajty jim Egipto. Moisés ytuun oy mijhuinma'ñ etz ixpejt huixchiguipx jimijt jim Egipto, jim ma tzaptz mejy, etz jim ma mijtigíduum. ³⁷ Je Moisés huídibi jecy'ajty nimay je Israel jäy: “Dios y'ijxtihuipy tüg jäy ma miich ajcxy m'ap m'oc huídibi najtzcaxihuipy yi' y'ayuc, jadu'n nej ti xy'ijxtiyich ma miich ajcxy. M'amido'ijtip ajcxy yi' y'ayuc.” ³⁸ Je Moisés jim je' anajty mijtigíduum müd je mayjäy. Chi jim je Dios y'ángel müd mydacy ma je cop huídibi yxi Sinaí, etz Moisés yajnax Dios y'ayuc ma ich ajt nmij'ap nmijteedy. Moisés ycöbijc Dios y'ayuc huídibi jugy'ajtin huinixibi müd, etz jayhui'my müd ich ajt yciipi.

³⁹ Chi ich ajt nmij'ap nmijteedy ajcxy jecy'ajtpy ca' anajty ajcxy capxcöbigaangixy Moisés, ca' anajty cöbijccixy je' y'ané'min, chachuimbidaangixy jim Egipto. ⁴⁰ Chi ajcxy Aarón nimay: “Ndzojcypich ajcxy co miich oydun tüg Dios huídibi ich ajcxy xyhuinhuoohuip, com ca' nnejhuüyim ti jada' ti yjadyii je Moisés huídibi ajt xyajtzoonim Egipto ñaaxjot.” ⁴¹ Chi oyduñ ajcxy tüg huajmang. Chi huindzigüy ajcxy je huajmang huídibi anajty ti yajcojicy, e ooy ajcxy mijotcujc'ajty huídibi ci'm anajty ti yajcojy.

⁴² Huin'it xii ajcxy Dios y'ixmajtzi, huen ajcxy ojadaty yi xii, yi po' etz madza'. Com jadu'n Dios y'ayuc cojaaybi cojaay co Dios jadu'n ymīnañ:

Israel jāy ajcxy canan iich je' huīdibi ti mhuīndzigīygixy jim mījtigīduum huixchigūipx jimijt.

⁴³ Ti mgiynícxcixy Moloc ytijc etz yi Renfán ymadza', tzadzech, quipychech etz oori oyduñ huīdibi miich ajcxy ci'm myajcoj huīdibi anajty ajcxy m'ojadadamy. Paady iich miich ajcxy nyajpidzimaangixy ma yi mnaaxjot, e nguexaangixy jiguem jim Babilonia nīnaxy.

⁴⁴ Chi Esteban yjacmīnañ:

—Jim mījtigīduum iich ajt nmij'ap nmijteedy ymīid anajty cochactijc ma anajty ajcxy Dios huīndzigīy. Jiiby anajty ajcxy yujccīy je tzaa ma Dios ytīy'ajt ycojaayity. Je cochactijc ajcxy ycoj jadu'n nej anajty ti yaj'ane'myīi Moisés, e nej anajty yajni'ixīyīi nej tunipy. ⁴⁵ Iich ajt nmij'ap nmijteedy mīhuī'm je cochactijc, e iich ajt nmij'ap nmijteedy huīdibi mīiñ ma jada naaxjot mīid Josué, chi mīmīiñ ajcxy je cochactijc je taab ajcxy mīmadacy je ymīdzip canaag'agajp. Dios yajpidzim je' ajcxy ymīdzip ma je naaxjot, jigix yajcīdigīhuip iich ajt nmij'ap nmijteedy. Yajtuuñ ajcxy je cochactijc, ixti cooni David ytīgīy ane'mbi. ⁴⁶ Dios yjāygiadaac je rey David, e David yjacoja'ñ anajty tūg tijc oyduñ ma jēbi yaj'ojadaty yajhuīndzigīy Dios, je Dios huīdi Jacob mījpidac jecy'ajty. ⁴⁷ Per Salomón je' oy cojy Dios ytijc. ⁴⁸ Oy yi Dios tzajpjotypī ca' chināy ma yi tijc tīibi jāy cojy. Jadu'n nej je Dios y'ayucnajtzcaxīybi jecy'ajty jaybety co Dios jadu'n ymīnañ:

⁴⁹ Je tzajp hue' je' iich n'ane'mdac, jada naaxhuīñybi iich ndecypocxtac. ¿Ti tijc iich miich ajcxy xycojaanip? ¿Ma je it huīdibi it ma iich jēbi nbocxy?

⁵⁰ ¿Nej cay iich ti n'oyduñy tūg'ócīy?

⁵¹ Miich ajcxy ooy mīotjuuñity, ca' mgapxymīdoy Dios. Jadu'n Esteban yjacmīnañ:

—Jadu'n miich ajcxy mīot mhuīnma'ñ mīidity jadu'n nej jāy ajcxy huīdibi ca' Dios ytīy'ajt nejhuīyī. Miich ajcxy jātyim mīdzip'ajtpy je Espīritu Santo. Mdūgīyb ajcxy mīid mmij'ap mmijteedy. ⁵² Miich ajcxy mmij'ap mmijteedy chaachytuun tūg'ócīy Dios y'ayucnajtzcaxīybi. Yi' ajcxy yaj'o'c Dios y'ayucnajtzcaxīybi huīdibi jayījp'aty najtzcaxīy co ymīnañ tūg jāy huīdibi tudāgyip. E co je tudāgy jāy ymīiñ, chi miich ajcxy agojix myaj'o'cy.

⁵³ Je Dios y'āngel miich ajcxy xymooy je Dios ytīy'ajt, e ca' ajcxy mgōbijcy.

Yajtzaagōgātzcixy Esteban

⁵⁴ Co je mayjāy mīdoy jadu'n nej Esteban ymīnañ, chi ajcxy mījotmātcoty Esteban, chi ytīgīy ajcxy tīitzmucxpi tīitzqueetpi. ⁵⁵ E chi je Esteban jīhuīy je Espīritu Santo ma yjot yhuīnma'ñ, chi chajp'ijxy, e ijxy yi Dios y'oy'ājtin etz ijxy Jesús ytināy a'oy'amy ma Dios Teedy. ⁵⁶ Chi Esteban nīmay je mayjāy:

—Ijxcix! N'ijxypīch yi tzajp ahuādz, e n'ijxypīch je jāy huīdibi tzoon tzajpjoty ytināy a'oy'amy ma Dios Teedy.

⁵⁷ E chi je mayjāy ajcxy ytātz'ac amo'cxy, chi ajcxy ytīgīy huambi jīhuīybi, e chi ajcxy nīmujcy yajmujcy Esteban. ⁵⁸ Chi ajcxy yajpidzīmy Esteban cajppa', je' oy cōgātzcixy. Je tīy'ajt yejcpī huīdibi jadu'n idīitz, chi yjocxhuīt ajcxy yajmīhuīmy tūg yeeg'anāg huīdibi anajty yxī Saulo. ⁵⁹ Jim anajty ajcxy Esteban tzachcātzcixy. Chi Esteban Dios mībijctzoy, ymīnañ:

—Huīndzīn Jesús, cōbījcgīch n'alma.

⁶⁰ Huin'it ycoxtīnay'ahuīy, e chi yaaxqueegy mīc ymīnañ:

—Huīndzīn, ca' mbocytīxīy nej ajcxy xytūñīch.

Co jadu'n Esteban ymīnanday, chi oy y'ōgy.

8

Saulo pahuidijttägy ooy mibijcpidijc

¹ Saulo ytuun quipxycapxy müid huudibi ajcxy yaj'o'c Esteban.

Huin'it xii yaj'ixhuudijjt yajpahuudijjt pinjaty anajty Jesús mibijcp jim Jerusalén. Tüg'óciy je jäy ajcxy huudibi Jesús mibijcp anajty yqueec-huäcxtay, ñicxy ajcxy jim Judea ñaaxjot etz Samaria ñaaxjot. Jëyi je majmetzpi apóstoles ajcxy jac-hui'miyy. ² Nijëjity yëydijc huudibi Dios huindzigiiyb oy yajnaxtigiiy Esteban. E ooy ajcxy jotmay jihuiyy, yaaxy ajcxy müid je' ycixpi. ³ Chi Saulo ooy ixhuudijtcoty pahuudijtcoty huudijaty Jesús mibijcp etz tijc tijc anajty yajpidzimy pahuich pajuguty yëydijctijc etz töxyjäydijc, e pidaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴ Je huudi ajcxy queec-huäcxtay ycapxhuäcxyp anajty ajcxy Jesús y'ayuc huen tim ma'amy huudijtcixy. ⁵ Nidügti huudibi anajty yxii Felipe ñicxy jim Samaria, ytigiiy y'ayuccapxhuäcxpi, yajnimay ajcxy Cristo ytiy'ajt. ⁶ E je jäy ajcxy ñayyöymujci nidüg'óciy ajcxy y'amido'ijtcixy janch amoñyi jadu'n nej Felipe anajty ymiydägy e ijxyp anajty ajcxy je mijhuinma'ñ huudibi Felipe anajty ytumyb. ⁷ Com may anajty jäy jim huudibi müid ca'oybi ma yjot yhuinma'ñ, e tzoocp anajty ajcxy. E co je ca'oybi anajty ypidzimy ma je jäy, chi je jäy ooy yjacyaaxqueecy. Etz nañ mayjäy anajty chögy huudibi ca' yci' ytecy yücxycy etz tecyma'tpi. ⁸ E jadu'n je mayjäy ajcxy anajty jim ooy yjotcuycity.

⁹ Jim anajty tüg yëydijc huudibi anajty yxii Simón huudibi anajty ti ni'ixpigiiy huijyjäy huinma'ñ, e ooy anajty may Samaria jäy huin'ñi, ymina'ñ co je' anajty ymijity yjanchity. ¹⁰ Tüg'óciy jäy anajty oy amido'ijtcixy Simón y'ayuc, pi'ctijc etz mij'anäctijc, e yminaangixy:

—Jadayaabi yëydijc ymiid jada Dios ymic'ajt.

¹¹ Ooy anajty je jäy ajcxy Simón mijnicxpejtcixy, com müid je mañ'ajt anajty jecy ti chachhuin'ñigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñiibejty yëydijctijc etz töxyjäydijc. ¹³ Etz je Simón, je huijyjäy, nañ jadu'n mibijcy e ñiibejty. Chi Simón puyöyiy Felipe, ooy jihuiyy huinmaay jadu'n nej je mijhuinma'ñ huudibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huudi anajty jim Jerusalén, nejhuuiy co je Samaria jäy anajty ti cöbijccixy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan yja'ty jim Samaria, chi ajcxy Dios mibijctzoy müid je mibijcpidijc ycixpi, jigix ajcxy ymöhuiiyb je Espíritu Santo. ¹⁶ Com ca'ni anajty je' ajcxy ñicidägyii, jëyi anajty ti ñiibejtcixy ma Huindzin Jesús yxii. ¹⁷ Huin'it Pedro etz Juan cñixajy ajcxy, e chi je Espíritu Santo y'adigiiy yjottigiiy ajcxy.

¹⁸⁻¹⁹ Co Simón ijxy co je Espíritu Santo y'adigiiy yjottigiiy co yi apóstoles ajcxy ycñixajy, chi Simón yaj'ahuaniiy je' ajcxy meeñ, yminañ:

—Mooygich nañ jadu'n yi mic'ajt jigix co ngñixájibich hueñypinity nañ jadu'n jëbi ajcxy je Espíritu Santo y'adigiiy yjottigiiy.

²⁰ Chi Pedro nimay Simón:

—Mi'ögihuipy miich mmeñ, müid co mhuinma'ñ ti mbidägy co meeñygix mbada'ñ je huudibi Dios ñiyejcp. ²¹ Com miich ca' xypaady jadayaabi tung, com miich mjot mhuinma'ñ ca' ytudägity ma Dios. ²² Jothuimbit e ixmatz yi mjibic-huinma'ñ, e mibijctzou Dios, ca' jëcyity xyhuinmeecxipy jadu'n nej

jibic mjet mhuinma'ñ mmiidity. ²³ Com janch ta'm miich mjet mhuinma'ñ, e yi jibicpi hue' xymidity mach.

²⁴ Chi Simón y'adzooy:

—Mibijctzou je Huindzin Dios müd ich ycixpi, jigix ca' ti xyjadipyich jadu'n nej miich ti xyñimäyich.

²⁵ Co Pedro etz Juan tiy'ajt yejcy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxiy jim Samaria ñaaxjot, e capxhuäcxy Dios y'ayuc nej ajcxy y'alma nidzoocin paadipy.

Felipe müd je Etiopía jäy

²⁶ Huin'it xii Huindzin Dios y'ángel migapxy je Felipe, nimay:

—Tzoon ya, nicx ma madzäcruudz ypidzimy, ma je tü'aa huidi tzomb jim Jerusalén huidibi nicxp jim Gaza.

Je' je' je tü'aa huidibi adügtuum najxp. ²⁷ Felipe tim janitzon e ñicxy, e tü'am naybaatti müd tüg Etiopía jäy. Hue' je' anajty eunuco, mijtungmüd jim Etiopía. Yi' je' tesorero'ajt anajty ma je töxyjäy huidibi anajty yxi Candace huidibi anajty ane'mb jim. Je eunuco jim anajty ti y'oy Jerusalén Dios ojadaajtp. ²⁸ E chi yhuimbijtni anajty ma ycajp, iñaayb anajty carretijoty yam chachnecycapxy. Hue' anajty chachcapxyp je Dios y'ayuc huidibi Isaías ycojaay. ²⁹ Chi je Espiritu ñimay Felipe co huen nicxy najtzpadiy je carreti ma je eunuco anajty y'ñäy.

³⁰ Co Felipe mihuingoñ je carreti, chi midoy co je jäy anajty capxy je necy huidi Isaías yjaay, chi y'amidooy:

—¿Nej mhuinjihuüyb huidibi mgapxyp?

³¹ Chi je jäy y'adzooy:

—¿Nej ich nhuinjihuüpy pen ca' pin xyajnimäyich?

Chi je eunuco nimay je Felipe co huen müd iñäyii carretijoty.

³² Je huidibi anajty je eunuco chachcapxyp jadu'n je' anajty yminañ: Jadu'n ajcxy nicxy yaj'ögy nej jäy borregi nicxy yaj'ögy. Je' amon'ijty jadu'n nej borregi amon'ity co jäy nime'pxy. Ni tüg'aa huam ycaminañ.

³³ Ti jäy yajtzöyduñy, ca' ajcxy a'ixiy co yjanayñigapxtüdaani. Ni y'ap y'oc ycaca'ty pin onigapxtüdüb. Co yaj'öci, chi chooni ya naaxhuñ.

³⁴ Chi je eunuco y'amidooy Felipe:

—Tunmay'ajt yajnimaygich pin jada ayucnajtzcaxiybi ñimiydacy, ¿ci'm ñayñimidyägyii o ji jada huingbi pin nimiydacy?

³⁵ Chi Felipe yajtzondacy je ayuc capxticxin ma jada yaabi Dios y'ayuccojaaybi ñecy. Chi yajmüdmidaaci nej Jesús yajty y'ayoy. ³⁶ Co ajcxy ñajx ma tüg nii, chi je eunuco yminañ:

—Cha nii, ¿nej ca' ich jebi huaad nnibetyi?

³⁷ Chi Felipe y'adzooy:

—Pen mmibijcpy Jesús müd tüg'óciy yi mjet mhuinma'ñ jebi mnibety.

Chi je jäy y'adzooy:

—Nmibijcpyich co Jesucristo Dios yi' y'ung.

³⁸ Chi je eunuco nimay je carreti huindzin co huen yajtinayxipy je' carreti. Chi nimetz ajcxy ñicxy ma nii, e chi Felipe yajñibejty je eunuco. ³⁹ Co ajcxy ñibidzimy, chi je eunuco ixtigoy je Felipe. Jadu'ñyi je Huindzin Dios y'Espiritu yajnicxi. E chi je eunuco ytü yajyöyñi jotcuyc. ⁴⁰ Felipe yajpaty jim Azoto, chi ñajxy cajp cajp capxhuäcxi Jesucristo y'ayuc ixti yja'ty jim Cesarea.

1 Ooy Saulo tzach'ixhuüdiijty pahüdiijty Jesús yjäy, y'ahuändacy ooy, e yaj'öga'ñ anajty ajcxy. Paady oy ixty je teedy mïjtungmïidpi, ² pijctzoy cötújcïn, co anajty ñicxa'ñ jim Damasco ma yi judíojäy ajcxy ñaymujctac, madza'ñ pinjaty Jesús y'ayuc mibíjicp. Saulo yajmiina'ñ anajty ajcxy mach jim Jerusalén huen yëydijctijcity huen töxyjäydijcity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je tücxin huüdi tzomb tza-jpoty, ñigidaaci jühuüdiity je Saulo. ⁴ Huin'it Saulo yciday, e midoy co ñimäyii: —Saulo, Saulo, ¿na'amy co xychachpahüdiijttägyich?

⁵ Chi Saulo yajtiy:

—¿Mbin miich, Huindzin?

Chi midoy co y'adzoyii:

—Ich je' Jesús, je huüdiibi miich mdzachpahüdiijttacpy, ci'm nayyajtzaachytunyii jadu'n nej huajyuub co jipconebe'i'y huüdi mïid ñuumygyumyii.

⁶ Chi Saulo chiyuygoty chachchigiiy, e yminañ:

—Huindzin, ¿ti mdzocpy ndunipyich?

Chi je Huindzin Jesús ñimaayi:

—Pidig etz nicx cajpjoty, e jim nyajnimähuipy ti jëbi mduñ.

⁷ Je yëydijctijc huüdiibi anajty Saulo ymïd ooy ajcxy ñay'adzigiiyi, co midoy je' ajcxy ayuc e ca' ajcxy ni pin ma y'ijxy. ⁸ Chi Saulo ypidigy, e co huüdicxñicni ca' pin ma oc'ijxni. Chi ajcxy majch Saulo ma yci', e chi ajcxy huijtznicxy jim Damasco. ⁹ Tugüg xii Pablo jim y'ijty huiintz, ca' ycaay y'uucy.

¹⁰ Jim Damasco anajty tüg yëydijc chinäy huüdiibi Jesús y'ayuc mibíjicp, huüdi anajty yxii Ananías, cumäyjoty Dios ñimaayi:

—¡Ananías!

E chi je' y'adzooy:

—Cha ich, Huindzin Dios.

¹¹⁻¹² Chi je Huindzin Dios ñimaayi:

—Pidig, nicx ma je tü huüdiibi yxii Derecha, e jim ma Judas ytijc yajtiü tüg Tarso jäy, huüdi yxii Saulo. Dios mibijctzoob je' jim cham, cumäyjoty ti huin'ijxy tüg yëydijc huüdi yxii Ananías, co oy ñimiñyii, e ycinixajiiy jigix y'ijxigip jadüg'oc.

¹³ Chi Ananías y'adzooy:

—Huindzin Jesús, mayjäy ti xyajmïdmïydägyich ajcxy jadu'n nej yi Saulo jibic y'idich jim Jerusalén mïid miich mjäy ajcxy. ¹⁴ Jadachambi ti mimiñ ya je necy, ma teedy mïjtungmïidpi ti ycötujcmöyii, co huen majtztäy je jäy, e yajnicxtähuipy jim Jerusalén, tüg'óciy pinjaty ojadajtp miich mxii.

¹⁵ Chi je Huindzin Jesús nimay Ananías:

—Nicx, com ti ich nhuin'ixy yijiibi yëydijc, jigix ich nxii etz n'ayucich capxhuäcxipy ma tüg'óciy naax cajp huüdi ca' yjudíojäyity, etz ma yi reydiy, etz nañ jadu'n ma yi judíojäy ajcxy. ¹⁶ Ich yi' nyajnimähuipy tüg'óciy, nej ayo'n yajnaxipy mïid ich nxii ycxpi.

¹⁷ Chi Ananías ñicxy ma Saulo anajty ti yjättägy, co ytigiiy tigoty, chi cñixajy Saulo, e chi nimay:

—Migüg Saulo, je Huindzin Jesús huüdiibi nayguëxici jim tü'am ma miich anajty miiñ, yi' ti xyquexyich jigix m'ijxigipy jadüg'oc, etz je Espíritu Santo xyñidigihuip xycödighuip.

¹⁸ Mic'amy ycäy ma Saulo yhuiin jadu'n nej acx ñimeeñ, chi y'ijxigy. Huin'it Saulo ypidigy e chi yajniibejti. ¹⁹ Chi Saulo ycaay y'uucy, e chi ymic'pijcy jadüg'oc. Chi jim mïd'ijty jecy huüdiibi ajcxy ixpijicp Jesús y'ayuc jim Damasco.

Saulo capxhuäcxy Dios y'ayuc jim Damasco

²⁰ Chi janch mic'amy Saulo ytigüy Dios y'ayuccapxhuäcxp ma je judíojäy ajcxy ñaymujctac jim Damasco, yminañ co je Jesús hue' je' Dios y'ung. ²¹ Tüg'óciy pinjaty anajty midoohuip Saulo y'ayuc, ooy ajcxy jihuüy huinmaay, etz ñayñimáayigixy:

—¿Nej ca' jada' yjējity je huídibi tzachyajcōdigoyam yi jāy ajcxy huídibi Jesús yxii miyaax ojadátip jim Jerusalén? ¿Nej ca' jada' yjējity huídibi anajty ti ymiiñ ya jāy ymajtzpi, e nicxy cīyegañ ma teedy mījtungmīdipi?

²² Je Saulo capxhuacxip anajty Jesús y'ayuc huinmic jotmic, e nigapxtāy co Jesús hue' je' je Cristo, chi yi judíojäy ajcxy huídibi anajty jim tzinaayb Damasco cijx ajcxy yhuinmañ tigoýdāy.

Saulo yqueecy ma judíojäy ajcxy

²³ Ti anajty hueeni xii tiempo ñajtzninicxiyñi, chi je judíojäy ajcxy ñaygapxi co yaj'ōgaangixy je Saulo. ²⁴ Saulo ñejhuüy co anajty yaj'ōga'ñyii. Chi jim anajty ajcxy y'ahuixyii xim tzuum ma je poch aguu cajppābi, jim anajty yaj'ōga'ñyii. ²⁵ E je jāy ajcxy huídibi anajty ymījpidacpy Jesús, chi je' ajcxy codiñajxy je Saulo mījcatchoty ma je pochycop huídibi je cajp mīd jūbojtz'ahuídityity, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyöyihuaañ je mībijcpīdijc ajcxy. Nidüg'óciy anajty ajcxy ooy tzigūyigixy anajty com ca' anajty mībijccixy co je Saulo ti anajty yjothuimbity. ²⁷ Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmīdmīydactay nej Saulo anajty ti ixxy je Huindzin Jesús tü'am, e nej anajty Saulo Jesús y'ayuc ti capxhuäcxī huinmic jotmic jim Damasco. ²⁸ Huin'it Saulo yhui'my jim Jerusalén, e mīd huídity anajty ajcxy. ²⁹ Aamic jotmic capxhuäcxxy je Huindzin Jesús y'ayuc, etz mīd mīydaaccixy e ñaymicmīgāpxigixy mīd je judíojäy huídibi griego ayuc caxp. E je' ajcxy nihuinmayiib co yaj'ōgaangixy. ³⁰ Co je mībijcpīdijc nejhuüy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huídijaty mījpidacp Jesús, jotcuic anajty chinaaygixy, e nīgi anajty ixpījc'idīch Dios y'ayuc ytiy'ajt, jadu'n nej yi huídibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmīj'ajtcixy je Huindzin Jesús, e mīd je Espíritu Santo ypubéjtin, nīgi anajty yjacmayiigixy.

Pedro yajtzoocy Eneas

³² Co anajty Pedro yhuídijty cogapxīy cajp cajp je mībijcpīdijc ajcxy, y'oy nañ jadu'n ma je mībijcpīdijc ajcxy huídibi tzinaayb jim Lida. ³³ Jim minaybaatti tūg yēydijc huídibi anajty yxii Eneas, huídibi anajty ti ypa'm'ijtni tuctujc jimījt, hue' je' anajty ycīxuxy ytecyxuxy. ³⁴ Chi Pedro nimay:

—Eneas, Jesucristo xyajtzoocp, pīdīg, etz yajpīdīg yi mmaabejt.

Chi Eneas mic'amy ypidīg. ³⁵ Chi ijxy tūg'óciy jāy huídibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajtztay tūg'óciy yi ñi'ap huinmañ e jījptīgīy yi Huindzin Jesús y'ixpījcīn.

Co Dorcas y'o'cy, chi yjugypījcy jadüg'oc

³⁶ Je huin'it tiempo jim Jope, jim anajty tūg töxyjäy chināy huídibi mībijcp Jesús, hue' anajty yxii Tabita, je' huídibi griegojäy ytijyp Dorcas. E je Dorcas oy xii tiempo anajty yajnaxy m'oyjä'aty yi jāy ajcxy. ³⁷ Jadu'n yajti huin'it tiempo Dorcas ypa'mbejty, e chi ytimy'o'cy. Co ajcxy yajtziiday, chi ajcxy je öcpi yajnicxy ma je tījc mīmejtznihuijtzpetypi. ³⁸ Je Jope cajp

naymihuingon'ájtíp anajty m̄id Lida cajp ma anajty Pedro yajpaady, co m̄ibijcp̄idijc ajcxy anajty nejhūiy co je' anajty yj̄im̄ity, chi ajcxy mejtz ȳeydijc quejxy co huen n̄im̄ayii:

—Min tzojc ya Jope.

³⁹ Huin'it Pedro ñ̄icxy m̄id je' ajcxy. Co jim̄ yja'ty, chi ajcxy yajnicxy ma je t̄ijc m̄imejtzñ̄ihuijtzpetȳpi, e jim̄ anajty ajcxy je co'ögy töxyj̄äydijc ajcxy yt̄inayj̄ühuiditȳi ma je öcpi, chachyaaxc̄ixy. Chi ajcxy Pedro yaj'ijxy je huit n̄ijen hūidibi Dorcas anajty ti yaj'oȳiy co anajty yjugy'atyñ̄i. ⁴⁰ M̄ic'amy je Pedro quejxp̄idz̄im̄day je j̄äy ajcxy. Chi ycoxt̄inay'ahūiy, e Dios m̄ibijctzoy. Chi hūind̄icxpejty je öcpi, n̄im̄ay:

—Tabita, p̄id̄ig.

Huin'it Tabita yhūind̄icx̄igy, e ijxy je Pedro, chi ñ̄ayguḡiy. ⁴¹ Chi Pedro majtz̄i yci', e chi hūijtz̄igy. Chi yaaxi ym̄igügt̄ijc etz co'ögytöxyj̄äydijc ajcxy, chi ajcxy yajc̄id̄iḡiy juugy. ⁴² Tüg'óc̄iy j̄äy ajcxy jim̄ Jope nejhūiyday co Pedro yajjugyp̄ijcy je Dorcas. E mayj̄äy m̄ibijcy je Hūindz̄in Jesús. ⁴³ Jadu'n yajty co Pedro y'ijty jim̄ Jope canaag x̄i ma je coodzpi yt̄ijc hūidi anajty yx̄i Simón.

10

Pedro etz Cornelio

¹ Jim̄ Cesarea anajty t̄üg tungm̄idpi hūidi anajty yx̄i Cornelio, hue' je' anajty capitán'ajtp ma t̄üg batallón soldado ajcxy yx̄ijip, la Italiana. ² Je Cornelio ooy anajty ytud̄ägyity, etz je' m̄id t̄üg'óc̄iy y'ung ytöxyijc ooy anajty yajm̄ij'ajtc̄ixy Dios. Je Cornelio nañ jadu'n ypubety m̄id meeñ je judíōj̄äy ayoobt̄ijc, e je' Dios ojadajt anajty jabom jabom. ³ Tüg x̄i, m̄inacyx̄i anajty, Cornelio hūin'ijxy janch hūadz Dios t̄üg y'ángel ñ̄igidaaci, e ñ̄imaayi:

—¡Cornelio!

⁴ Chi Cornelio hūind̄icxpejty je ángel janch tz̄iḡiyb anajty, e chi yajt̄iy:

—¿Ti Hūindz̄in?

Huin'it je ángel y'adzooy:

—Jadu'n nej m̄Dios'ojadaty etz jadu'n nej mbubety ayoobt̄ijc ti Dios j̄äyḡid̄ägy. ⁵ Quex mj̄äy jim̄ Jope, huen nicxy yajtzoñ Simón, hūidibi nañ jadu'n yajtijp Pedro. ⁶ Jim̄ je' yja'ttacy ma jadüḡpi Simón, je cootzpi hūidi yt̄ijc m̄ihuingon mejypa'. Je Pedro xyajnim̄ahūipy ti mdun̄ipy.

⁷ Co je ángel ñ̄icxni hūidi anajty ti ym̄igapxyii, chi Cornelio yaaxi mejtz ytumbi, etz t̄üg soldado hūidi Dios capxym̄idoob, etz hūidibi je Cornelio ooy ym̄ijn̄icxpedyii. ⁸ Chi yajm̄idm̄ydactay nej je ángel ñ̄imaayi, chi ajcxy quejxy jim̄ Jope.

⁹ Com jabom jim̄ anajty je quejxyöybi ajcxy ñ̄icxy m̄ihuingon Jope, cujc yx̄i anajty, e chi Pedro ypejty ma t̄ijcn̄icx Dios ojadajtp. ¹⁰⁻¹¹ Ooy Pedro anajty yuubögyii, e ooy jacaya'ñ, jim̄ni anajty yj̄icxy yaj'oȳiyii. Chi Pedro hūin'ixy je tzajp ahūadz, e hūin'it ijxy quid̄ägy jadu'n nej poob huit m̄ijpi yx̄och̄ity majaty ytaatz. ¹² Jiiby ma je poob huit, jiiby anajty canaagnax iyujc hūidijaty m̄idaax yci' ytecy etz tza'ñ etz joon. ¹³ Huin'it Pedro m̄idoy co anajty ñ̄im̄ayii:

—Pedro, p̄id̄ig nicxy yaj'ög ȳi iyujc etz tz̄udz.

¹⁴ Chi Pedro y'adzooy:

—Ca', Hūindz̄in, caminaabi ñ̄ch ti njicxy hūidibi j̄ib̄ic̄ip etz hūidibi ca' ñ̄igödúcyity nicxy judíōj̄äy j̄icxc̄ixy.

¹⁵ Huin'it jadüg'oc ayuc m̄idoy ñ̄im̄ayii:

—Hūidibi Dios yajhūäch ca' huaad mdijy co ȳi' yj̄ib̄icity.

¹⁶ Tugüig'oc jadu'n yjajti, chi je poob huit ypättigüyñi tzajpjoty. ¹⁷ Jim anajty Pedro tzachhuinmay nej anajty yhuimbídzimy je tibi ixy co yja'ty ma tijc aguu je Cornelio yquexyöybi huidi ajcxy anajty nidihuip yajtihuip je Simón ytijc. ¹⁸ Chi ajcxy mic ycogapxiy yajtiy pen jim anajty yjättägy Simón huídibi anajty nañ jadu'n yajtijp Pedro. ¹⁹ E je Pedro je' anajty chachhuinmaayb tibi ixy, chi je Espíritu Santo Pedro ñimaayi:

—Tugüig yëydijc ji xy'ixtäy. ²⁰ Pidíg e minac, nicx müd je' ajcxy, e ca' ti mhuinmay, com ich jadu'n ti nimäy co huen xy'ixtäy.

²¹ Huin'it Pedro yminajcy ma je' ajcxy, je Cornelio quexyöybi, nimay ajcxy: —Ich je' huídibi miich ajcxy m'ixtaayb, ¿ti ycxpi co ti mmiingixy?

²² Chi ajcxy y'adzooy:

—Yi' ich ajcxy ti xyquexyich yi Cornelio huídibi capitán'ajtpi, je' tudägy jäy huídibi Dios yajmij'ajtp, je huídibi tüg'óciy judíojäy ooy tzójccixy, etz cömaaygixy. Huindzin Dios tüg y'ángel ñimay Cornelio co miich miñ nya-jhuoy, jigix mnícxip ma yi' ytijc, e y'amido'ida'ñ ajcxy nej miich myaj'ixpiga'ñ.

²³ Chi Pedro yajtijctigüy je' ajcxy. Chi ajcxy jim ymaahu'my. Com jabom Pedro ñicxy müd je' ajcxy, e chi nijëjity ypanicxi huídibi mijpidacp Jesús huidi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tügmucy müd yjugymigüg, etz nijëjity pin ooy müd ñaymigüg'adyi, huídijaty anajty ajcxy jayijp ti nimäy. ²⁵ Co Pedro oyjäty ma je tijc, chi Cornelio ytijcpídzimy oy yijpcobadiy je Pedro, e chi ycoxtinay'ahuixy yajmij'ada'ñ anajty je Pedro.

²⁶ Chi Pedro huijztinayigy je Cornelio, e nimay:

—Tinayig, ca' xyajmij'ida'ñich, nañ jadu'n ich njäyity nej miich.

²⁷ Müd anajty ycapxy ymiydägy co ytijctigiy, jüby anajty mayjäy ni'amugí'ahuixcixy. ²⁸ Chi Pedro nimay ajcxy:

—Miich ajcxy mnejhuixy co yi judíojäy ycostumbre capx'aducy ca' huaad judíojäy yöymucy müd huídibi ca' yjudíojäyity, ca' huaad ytigüygixy ma ajcxy ytijc. Per Dios ti xyajni'ixiyich co ca' huaad nmína'ñich ca' oyjäyity huádzjäyity pinjaty. ²⁹ Paady co oy ti xyajhuoyiijich ti nmiiñich, ni ca' huam ti nmína'ñich. Nnejhuíhuaamyich na'amy co oy ti xyajhuoyiijich.

³⁰ Chi Cornelio y'adzooy:

—Cham ymimidaaxxiijy, jadu'n nej jadachambi hora, ya ich anajty ma ndijcich, jaygay jay'ügy nDios'ojadatyich. Com hue' anajty mijminacy xi mina judíojäy ajcxy ycapxtaaccixy, co tüg ñayguëxíci jadu'n nej jäy müd ypoob huit janch adicxp. ³¹ E je ángel xyñimaayich: “Cornelio, Dios ti xymidoohui m'oración e ti jadu'n jäygidägy jadu'n nej mbubety yi ayoobtijc ajcxy. ³² Quex mdumbi jim Jope, huen nicxy yajtzoñ Simón huidi nañ jadu'n yajtijp Pedro. Jim Pedro yja'ttägy ma je cotzpi ytijc huídibi yxi Simón, huídibi tzinaayb mihuingon mejypa'. Co je' ymiinipy, chi xymidmiydägipy.” ³³ Paady nguejxyich janch mic'amy huen nicxy xy'ijxtäy. E ti may'ajt mduñ co ti mmiñ. Jadachambi cha ich ajcxy nidüg'óciy ma Dios yhuindu. E n'amido'idángixyich tüg'óciy je y'ayuc huídibi je Huindzin Dios ti xyaj'ane'my jëbi xyajnimaygixy.

Pedro Dios ytiy'ajt nigapxy nimiydacy ma Cornelio ytijc

³⁴ Huin'it Pedro ytigüy y'ayuccapxhuäcxpi, nimay ajcxy:

—Jadachambi huinjihuixyich, co yi Dios ca' ni tüg ixy'ixy jäy, y'actzojtaayb hueñypinity. ³⁵ Dios ycöbijcpy hueñypinjäyity huídibi tzinaayb huen huídibi naax huen huídibi cajpity, pen chigüyb ajcxy Dios, pen tumyb oybi. ³⁶ Dios ti quexy yi' ytiy'ajt ma yi Israel jäy ajcxy, yajnimay co ji cham

jotcuje'ájtín m̄id Jesucristo ñich ajt nHuindzín. ³⁷ Miich ajcxy mnejhuñyb yajxon nej ti ytunyii ti yjadyii ma judíoñäy ajcxy ñaax ycajp chondacy jim Galilea, Juan el Bautista ti anajty capxhuäcxí Dios y'ayuc ytiy'ajt etz yjāyayñibety. ³⁸ E mnejhuñyb miich ajcxy co Dios yejc je Jesús je Nazaretpi je Espíritu Santo, e nej Jesús yhuidiyty e tuuñ oy'ájtín, etz mihuinma'ñ, jadu'n nej yajtzocy je jāy ajcxy huidi anajty ane'm'ijtp ma yí mujcu'. Com Dios anajty m̄id y'ity je Jesús. ³⁹ ñich ajcxy je tiy'ajt nm̄idich tūg'óciy jadu'n nej Jesús yjajty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcíxy. ⁴⁰ E Dios yajjugypijcy codugñg xñi, e chi yajnayguëxíci ma ñich ajcxy. ⁴¹ Ca' ti yajnayguëxígyii ma tūg'óciy jāy, jēyí ma ñich ajcxy huidi jayñp Dios yhuin'ijx jigix tiy'ajt nyegipyich. ñich ajcxy caaymujc uucmujc huin'it co yjugypijcy ma y'o'cy. ⁴² Ti xyquexy ñich ajcxy ayuc ngapxhuäcxpi ma mayjāy ajcxy etz nidiy'ajt'adipyich ajcxy co Dios Jesús ti pidāgy mij'ane'mbi ma yí juugypí etz ma yí ögypi. ⁴³ Nañ jadu'n jecy'ajty tūg'óciy Dios y'ayucnajtzcaxñybi ñimiydac ajcxy Jesús, e ymīnañ ajcxy co tūg'óciy je jāy ajcxy pinjaty mibijc je Cristo, Dios huinmecxñib ajcxy ypocy.

Je Espíritu Santo ycidacy ma je ca'pi ajcxy yjudíoñäyity

⁴⁴ Yam anajty Pedro ycapxyñi co je Espíritu Santo ñidigñyí ycödigñyí ajcxy nidūg'óciy huidiyaty y'amido'ijt Pedro y'ayuc. ⁴⁵ E je judío mibijcpidijc ajcxy tñibi anajty mīñ m̄id Pedro, ooy ajcxy jihuiy huinmay co Dios quejx Espíritu Santo ma je jāy ajcxy huidibi ca' yjudíoñäyity, ⁴⁶ co midoy ycapxcíxy m̄id huingbi ayuc, etz cōmaygixy jāymejtzcíxy Dios. ⁴⁷ Chi Pedro ymīnañ:

—¿Nej ca' jada' y'óyity co ññibedipy ajcxy huidibi Dios ti ymóoyigixy je yEspíritu Santo jadu'n nej ñich ajt xymooyim?

⁴⁸ Chi Pedro ni'ane'mdñy huen ññibejtçixy ma Huindzín Jesucristo yxñi. Huin'it ajcxy Pedro cohuanñy huen huim'y tūg xñi mejtz xñi m̄id je' ajcxy.

11

Pedro yajm̄dmīydacy jim Jerusalén nej anajty ti ytuñyí ti yjadyii

¹ Je apóstoles ajcxy etz je mibijcpidijc ajcxy huidi anajty ajcxy jim Judea, midoy ajcxy ayuc co nijējity jāy huidi ca' yjudíoñäyity ti anajty ajcxy cōbījciy Dios y'ayuc. ² E co Pedro yhuimbijty Jerusalén, chi nijējity judíoñäy ajcxy ojy Pedro, je' ajcxy huidibi tzachmijpidaaccixp judíoñäy ycostumbre jadu'n nej ajcxy tiy'ajttiygixy ymang. ³ Je' ajcxy nimay Pedro:

—¿Na'amy co oy ti mgo'ixñy jāy ajcxy huidi ca' yjudíoñäyity, etz ti mgay m'ügy m̄id je' ajcxy?

⁴ Chi Pedro nimīydactay tūg'óciy jadu'n nej anajty ti yjaty, chi ymīnañ:

⁵ —Jim ñich anajty Jope nDios'ojadatyich. Chi nhuin'ijxyich jadu'n nej tūg mij poob huit chooñ tzajpjoty, cidāgy ma ñich nhuinduu, xóchity anajty ma mīdaax ytaatz. ⁶ Co nnimijhuāgyich n'ixa'ñich ti jiiby, chi n'ijxyich may iyujc, jiiby iyujc mīdaaxpi yci' ytecy, jiiby ahua'nbi iyujc, jiiby tza'ñ, etz joon. ⁷ Chi nmidooyich tūg ayuc huidibi xyñimaaybich: “Pedro, pidīg, yaj'ög yí iyujc etz tzüdz.” ⁸ Chi n'adzooyich: “Ca' Huindzín, com camīnaabi ndzūchich iyujc huidibi ca' ñigo'adúcyity judíoñäy ajcxy tzüdzipy.” ⁹ Chi mīmetz'ocpi tūg ayuc tzajpcíxy xyñimāyich: “Huidi Dios ti yajhuäch, ca' huaad mdijy co ca' y'oychú'tznity.” ¹⁰ Tugñg'oc jadu'n yjajti, chi je poob huit ypättigñyñi tzajpjoty. ¹¹ Huin'it xyñimīñich je quexyöybi nidugñg, chooñ ajcxy jim Cesarea. ¹² Chi je Espíritu xyñimaayich, co min n'ocñicxich m̄id je' ajcxy, ca' ma ni ti nhuinmayipyich. M̄id ñicxyich nidugñg nmīgügtijcich. Chi ñich ajcxy ndigñy ma je jāy ytiyc. ¹³ Je codijc xyajm̄dmīydaacich co je' anajty ti

huin'ixy tüg ángel ma ytiyc, ñimäyii: “Quex mdumbi ajcxy jim Jope huen nicxy yajtzoongixy Simón huídibi jäy ytiy Pedro, ¹⁴ e je' xyajnimähuip nej jëbi Dios m'alma xyajnidzoocip, miich etz tüg'óciy mjün mdiyc mjuugy-migüg.” ¹⁵ Co Jesús y'ayuc ngapxhuäcxtzondaacich, chi je Espíritu Santo ñidigiyyi ycödigiyyi je' ajcxy. Tim jadu'n nej xyñidigiyyim xycödigiyyim je jayijp'atypi. ¹⁶ Huin'it njäymejtzcoodyich nej je Huindzin Jesús ymíñañ: “Janch Juan, je Bautista, jäy yajniibejt miid ni, e Dios jäy ajcxy y'adigihuiyb yjottigihuiyb je Espíritu Santo.” ¹⁷ Pen Dios ti ymöyii je jäy ajcxy huídibi ca' yjudíojäyity tú'ciy miid huídibi ich ajt ti xymooyim co nmibijcim Jesucristo. ¿Ocjactim pin ich co Dios nmidzip'adiybich?

¹⁸ Je mibijcpidiyc ajcxy jim Jerusalén, co ajcxy midoy Pedro y'ayuc, chi ajcxy y'amonday. Chi ajcxy Dios jäymejch cömay, chi ajcxy ymínaangixy: “Dios jadu'n ti ymíñañ co je' ajcxy huídibi ca' yjudíojäyity jëbi yjothuimbijtcixy, jigix Dios ymöhuiyb jugy'ájtín huinixibi.”

Antioquía jäy ymidoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuídiycoty pahuídiycoty Jesús yjäy jim Jerusalén. Chi nijëjity ajcxy yqueecy, nicxy ajcxy jim Fenicia ñaaxjot, etz jim Chipre, etz jim Antioquía. E capxhuäcxy ajcxy je oybi ayuc ma jadyii judíojäy, ca' ajcxy jac ni pin yajnimay. ²⁰ E nijëjity mibijcpidiyc huídibi jim anajty ajcxy yconaaxip ycogájpip Chipre etz Cirene, chi ajcxy ñicxy jim Antioquía. Chi yajmídmíydacy ajcxy je Huindzin Jesús y'ayuc miid griegojäy ajcxy. ²¹ E je Huindzin Dios ooy ypubejti je' ajcxy, e ooy mayjäy ixmajch je jibic-huinmañ etz mijpidaaccixy yi Huindzin Jesús ytiy'ajt.

²² Co je mibijcpidiyc ajcxy jim Jerusalén midoogixy jada ayuc, chi ajcxy quejxy Bernabé jim Antioquía. ²³ Co Bernabé jim yja'ty, chi ijxy jadu'n nej Dios anajty oy'ájtín ti tuñ, chi oy yjotcugüy je Bernabé. Chi capxhuiy tüg'óciy co huen ajcxy janch cixyjot huinijot cuyduuni yi Huindzin Jesús y'ayuc ytiy'ajt. ²⁴ Com Bernabé oyjäy je' anajty, e ooy mijpidägy Dios y'ayuc etz ooy miidity je Espíritu Santo jotjoty huinmañjoty. Ymiid je' ycapxhuíjin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi miidmiñ Antioquía. ²⁶ Jadu'n yjajty jim ajcxy y'ijty tüg jimíjt, yaj'ixpijccixy je mayjäy huídibi ajcxy jijptigiyiy je Jesús y'ixpijcin. Jim Antioquía oga'n yximoy cristiano, je jäy ajcxy huídibi mijpidacp Jesús.

²⁷ Huin'it tiempo nijëjity tiy'ajtnajtzcapxhiybi chooñ Jerusalén ñicxy ajcxy jim Antioquía. ²⁸ Tüg huídi anajty yxi Agabo ytinay'ahuuy mayjäyoty, e chi je Espíritu Santo yajcapxi, e ymíñañ co mijyuu anajty ñaxcidägañ huinduñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidiyc ajcxy jim Antioquía pidacy ajcxy yhuinmañ co quexaangixy pubéjtin ma ymigügtijc ajcxy huídi tzinaayb jim Judea, jadu'n nej pubéjtin pin tim yegañ. ³⁰ E jadu'n ajcxy tuuñ. E je meeñ tibi anajty ymucy yajmigüejxy ajcxy je Bernabé etz Saulo ma je mibijcpidiyc tungmídpi jim Judea.

12

Co Jacobo y'o'cy etz co Pedro yajpujxtijctigiyi

¹ Huin'it tiempo je rey Herodes yajmajtzi nijëjity Jesús yjäy, e chi yajtzaachy-tuuni. ² Chi ni'ane'mdiy huen yaj'ögyii miid espada je Jacobo, je Juan y'uch. ³ Co je rey nejhuiy co je judíojäy ajcxy jadu'n ooy jäygidaccixy, chi ymajtzi Pedro nañ jadu'n. Hue' jadu'n yjajti xijoty, je xii mína tzajcaagy caaygixy huídi ca'pi ylevadura miidity. ⁴ Co Pedro yajmajch, chi yajpidacy pujxtigoty. E

chi je rey ane'my co huen mīdaaxpicy soldado ajcxy cuend'adyii, tūgpicyjaty mīdaax soldado ajcxy. Hue' anajty je rey ti huinmay xīnaxy anajty tīyduna'ñ Pedro mayjāy agujc. ⁵ Pedro jīby anajty pujxtīgoty janch oy cuend'aty. E je mībijcpīdījc janch Dios mībijctzodīib anajty ajcxy mīid Pedro ycīxpī.

Dios y'ángel yajpīdzīmy Pedro pujxtīgoty

⁶ Huin'it coodz ma ca'ni anajty yxīmīy, ma je Herodes anajty tīyduna'ñ Pedro mayjāyjoty com jabom, Pedro maab anajty, e soldado agujc ajcxy cīxoch tecyxoch anajty mīid cadena, e jadūgpicy soldado ajcxy pujxtījc'aguy anajty ajcxy ycuend'aty. ⁷ Chi janch tīmetīinī yHuindzīn Dios tūg y'ángel ñayguēxīci ytīnāy ma Pedro yhuinduu, e je pujxtījc yaj'anīyday. E chi je ángel tījyūcxy Pedro ma ycaach, chi yajmāyhūijy, e nīmay:

—Pīdīg mīc'amy.

Chi je cadena ycāday ma Pedro yci'. ⁸ Chi je ángel nīmay Pedro:

—Ñayhuīnī, yajtīgī' mgīg.

Co Pedro yajtīgīyday ycīg, chi je ángel ñīmaayi:

—Yajtīgī' mījocxhuit, e pajamgīch.

⁹ Chi Pedro pujxtījc pīdzīmy axam ma je ángel, ni ca' nejhūīy pen janch anajty huīdībī je ángel tumyby, hue' jīhuīy jadu'n nej ycumāy. ¹⁰ Chi ñajxy ajcxy ma tūgpicy cuend'ajtpī, mīc'amy ajcxy mīmetzpi nīnajxy. Co ajcxy yjāty ma mījpujxtījc aguu, ma mījtūba', chi je' cī'm'ahuaach. Chi ajcxy ypīdzīmy. Tī anajty mījyōygixnī co je ángel ixmajtznī Pedro. ¹¹ Huin'it Pedro yhuinma'ñymejch, chi ymīnañ:

—Jadachambi njīhuīybych co janch jada' co je Huindzīn Dios tī quexy y'ángel, e yī' tī xyñīhua'ñīch ma Herodes, etz jadu'n nej tūg'ócīy judío jāy ajcxy anajty xytuna'ñīch.

¹² Co Pedro yjot yhuinma'ñ ymejch, chi ñīcxy ma María ytījc, je Juan ytaj, je Juan huīdi jāy ytījpy Marcos, ma anajty ajcxy jīm mayjāy tūgmucy y'ljtcīxy Dios mībijctzoogīxy. ¹³ Co Pedro tījc'aguu cojxnōjcy, je tība'y'amybī, chi tūg tōxy'anāg ypīdzīmy huīdi anajty yxī Rode, ixa'ñ pīn je' tījc'aguu cojxnōjcy. ¹⁴ Co oy yōgmīdoy co Pedro je' anajty, chi ca' ytījc'aguu yaj'ahuaach. Jēyī co poyīgī ñīcxy tīgoty co anajty tzachjotcūjcity, nīgapxy co Pedro je' anajty ma tījc'aguu.

¹⁵ Chi je jāy ajcxy nīmay Roda:

—Mloocjīyb jada' mīich.

Chi je tōxy'anāg y'adzooy co janch je' anajty. E je jāy ajcxy ymīnaangīxy co ca' yī' yjējty, hue' jada' Pedro y'ángel.

¹⁶ Yam Pedro anajty tījc'aguu tzachcojxnōcy co ajcxy yaj'ahuaach, chi ajcxy ijxy, chi ajcxy ooy chīgīy yjīhuīy. ¹⁷ Pedro cīmīid ytīy'ajtyejcy co huen amōñ ajcxy. Chi yajmīdmīydacy nej je Huindzīn Dios anajty tī yajpīdzīmyīi pujxtīgoty. E nīmay ajcxy co huen nīcxy yajmīdmīydāgy jada je Jacobo etz jacjadyīi mībijcpīdījc.

Chi Pedro ñīcxy huingbī cajp.

¹⁸ Co yxīmīy, huin'it soldadtījc ajcxy ooy ytīgīy huambi jīhuīyby huīnmay'ahuīdījty, com ca' nejhūīygyxy nej je' anajty tī ytunyīi tī yjadyīi mīid Pedro ycīxpī. ¹⁹ Chi Herodes nī'ane'mdīy huen nīcxy yaj'ixtāy Pedro. E co ca' yajpaty, chi pījctzoy tīy'ajt ma soldado ajcxy huīdi anajty Pedro tī ycuend'adyīi. Chi nī'ane'mdīy huen ajcxy nīcxy yaj'ōgyīi. Chi Herodes choōñ jīm Judea, chi oy chīnāydacpīcy jīm Cesarea.

Herodes y'ōgy

²⁰ Herodes janch ymijotmätpy anajty je jäy huidibi tzinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägihuaangixy je rey. E ymimadac ajcxy co migapxy je Blasto je miltungmüdpí maabi rey Herodes ytijc. E chi ajcxy pijctzoy co huen tzip cixy naxy, com co ajcxy xijc mooc jim anajty yajtzoongixy ma rey ñaaxjot. ²¹ Chi Herodes agapxtujcy tüg xii, chi je reyhuit yajtigiiy, chi ñaydac paty ma ycötujctac, chi migapxy ajcxy je jäy. ²² Chi je mayjäy ajcxy ytigiiy mic capxp miydaacp, chi ajcxy yminaangixy:

—Jada jäy huidibi capxp, ca' jada yjäyity, jadu'n yi' nej tüg dios!

²³ E huin'itiiy Huindzin Dios y'ángel yajpa'mbejty Herodes, com ca' anajty huindzigiiy cömay je Dios. Chi y'o'cy, ting je' tzützaayi.

²⁴ Je Huindzin Dios y'ayuc miibijc'idichpy anajty jäy, e yajcapxhuäcxp anajty hueñytimma'amyity.

²⁵ Co Bernabé etz Saulo ajcxy ytungmay jim Jerusalén, huin'it chooni ajcxy jim ymidnicxy huidibi anajty yxii Marcos.

13

Bernabé etz Saulo yajtzondaaccixy ytung huidibi ajcxy pátip

¹ Ma je' ajcxy huidi mijpidacp Jesús jim Antioquía, jim anajty jadyii huidi Dios y'ayuc yaj'ixpijcp anajty, etz nañ huidibi tiy'ajt najtzcaxxiyb. Jim anajty Bernabé etz Simón, huidi anajty ajcxy ytijpy el Negro, etz Lucio huidi tzoon Cirene ñaaxjot, etz Manaén huidi tüg yeectac müd Herodes, huidibi ane'm jim Galilea, etz Saulo. ² Tüg xii ajcxy ñayyöymújcigixy jaygay jay'ügy Dios ojadajtcixy. E chi je Espíritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytunipy ma je tung tiibi nyajnihuohüich.

³ Chi ajcxy yjacDios'ojadajtty etz yjac'ayuu'ajty, e chi je jäy ajcxy cínixajy Bernabé etz Saulo, e chi ycapxycijxy müd je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espíritu Santo yquejxi Bernabé etz Saulo huen nicxy Seleucia, e jim ajcxy ybarcotigiiy nicxy ajcxy jim Chipre mejy agujcpi. ⁵ Co jim ajcxy yja'ty ma barco yjättac huidi yxii Salamina, chi ytigiiy Jesús y'ayuccapxhuäcxp ma je judíojäy ajcxy naymujctac. Tzooñ je Juan anajty nañ jadu'n je' anajty Bernabé etz Saulo pubéjtíp. ⁶ Huidijttay ajcxy ma je naax mejy'agujcpi, e yja'ty ajcxy ma je cajp huidi yxii Pafos. Jim ajcxy paty tüg judíojäy huidi anajty yxii Barjesús, hue' je' anajty huijyjäy, e ñaydiyii anajty co Dios ytii'ajt najtzcaxxiyi, e ca' anajty yjanchity. ⁷ Je huijyjäy ooy müd ñaymigüg'adyii anajty je huidibi ane'm jim, hue' anajty yxii Sergio Paulo. Je Sergio Paulo ooy anajty ycohuinma'ñity, ooy y'ixpicyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸ Je huijyjäy, huidi nañ jadu'n yajtijp Elimas, midziptzoñ Pablo etz Bernabé, e tücciy capxadugañ ca'ydí je gobernador ymibicy. ⁹⁻¹⁰ Chi Saulo, huidibi nañ jadu'n yajtijpy Pablo, müd je Espíritu Santo huindicxpejty je huijy jäy, e nimay:

—¡Ooy mjibicjäyity miich, ooy m'anijity, mujcu' miich xy'ung'ajtp, ooy mmidzip'aty pinjaty oyjot oyhuinma'ñ müd! ¿Mina m'ixmadzañ nej mdzachyajtigoyañ je Huindzin Dios ytii'ajt? ¹¹ Jadachambi je Huindzin Jesús ychachytunaamb, e mhui'mip huiintz, etz ni ca' je ximbi tzojc m'ixipy.

Chi je huijyjäy mic'amy yhui'my huiintz coodz, chi ixtay pin oc-huijtznicxiib com ca' anajty y'oc'ijxni. ¹² Co je gobernador jadu'n ijxy, chi mijpidacy Jesús

y'ayuc, e chi ooy jihuüy huinmaay nej Pablo nimíydägy je Huindzin Jesús y'ayuc ytiy'ajt.

Pablo etz Bernabé yajpátcixy jim Antioquía etz Pisidia

¹³ Chi Pablo etz ymigügtijc ajcxy mïid ybarcotigüy, chi ajcxy ñicxy Perge ma Panfilia ñaaxjot. Chi Juan puyöyduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytigüy ma je judíojäy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcaxüybi ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtijc, pen mmïid ayuc tiy'ajt mïid jäy ycixpi jëbi cham myajnimäy ajcxy.

¹⁶ Chi Pablo ytinayigy, yci' mïid ytiy'ajt yecy co huen amoongixy, e nimay ajcxy:

—Midoogix, miich Israel jäy ajcxy, etz huídibi Dios yajmij'ajtp. ¹⁷ Je Israel jäy Dios huin'ijxy ñich'ajt nmij'ap nmijteedy jecy'ajty etz yajyujcpejt ajcxy mïcho'n co anajty ajcxy jim yjactzinäy Egipto ñaaxjot. Chi ajcxy yajpidziimni mïid Dios ymic'ajt. ¹⁸ Dios je' ajcxy mihuindinay huixchigüpx jimijt jim migtigüduum. ¹⁹ Je Dios huixtuyc it naax cajp yajtigoy huídi anajty jim tzinaayb Canaán ñaaxjot, etz yajmoy je naax ñich'ajt nmij'ap nmijteedy jecy'ajty jigix ajcxy jim chinähuipy. ²⁰ Midaax migo'px jahuixchigüpx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcaxüybi ytungbijcy. ²¹ Huin'it ajcxy tüg rey pijctzoy huídi ane'müib ajcxy. Chi Dios yajreytigüy Saul huídi tuun huixchigüpx jimijt. Je Saul yteedy hue' je' anajty yxii Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigüy David, chi Dios yminañ: “Ti nbaadyich David, Isaí ymang, tüg yëdyjc huídibi cuyduñahuipy nej ndimdzocyich.” ²³ Ma David y'ap y'oc Dios yajnibijcy Jesús, jigix nihuñahuipy yajnidzögipy je Israel jäy ajcxy, jadu'n nej anajty jécyip Dios yaj'ahuanüy ajcxy. ²⁴ Ca'ni anajty Jesús miiñ co Juan, je Bautista, capxhuäcxy Dios y'ayuc ma je Israel jäy ajcxy, nimaaygixy co copicy huen jothuimbijtcixy ma Dios, e huin'it jëbi ñibéjtcixipy. ²⁵ Co anajty Juan y'o'cin huington, chi yminañ: “Ca' ñich' njéjty je Cristo, jadu'n nej mminaangixy. Jayijp ti nmiiñich, jac'axam miinañ je Cristo; jacmic'ajt mïid je' ca'ydi ñich. Ca' xypaadyich ñicxy yi' ycighuin nguejich.”

²⁶ Chi Pablo yjacminañ:

—Migügtijc, Abraham y'ijx y'oc etz pinjaty yajmij'ajtp Dios, Dios ti xyanigüexy jada ayuc nej ajcxy jëbi m'alma nïdzoocin paady. ²⁷ Je jäy ajcxy huídi anajty ajcxy tzinaayb jim Jerusalén etz tungmïdipi ajcxy, ca' ajcxy nejhuüy pin je' anajty je Jesús, ni ca' anajty huinjihuüygixy y'ayucnajtzcaxüybi ajcxy y'ayuc huídibi anajty yajcapxp ma ajcxy ñaymujctac huindüg sábado. E je' ajcxy ci'm yajpocycäy Jesús, e cuyduñ nej anajty ajcxy yjaybétyity ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohuüy ma Pilato co huen ñicxy yaj'ögyii. ²⁹ Co je jäy ajcxy cuyduñday jadu'n nej anajty yjaybétyity ma Dios y'ayuc mïid je' ycixpi, chi ajcxy yajminajcy cruudzcixy, etz oy yajnaaxtigüygixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxigo'ci ma ymigügtijc huídi anajty ti ymïidhuídidyii co chooñ Galilea ñicxy Jerusalén. Jadachambi yi' je' ajcxy huídi tiy'ajt yejcpy ma je jäy ajcxy.

³² Je oybi ayuc ñich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma ñich'ajt co yajjugypijcy Jesús co y'o'cy. Jadu'n yi' Dios y'ayucjoaybi

jaay jecy'ajty ma je Salmo necy m̄metzpi ma Dios jadu'n ym̄inañ: “N'ungich cham ti nyajjuugypicyich.” ³⁴ M̄id jadayaabi yc̄ixpi co Dios ti yajjugypicy Jesús co y'o'cy, jigix ñin̄icx ca yhuindigoopy jadu'n anajty jaybétyity ma Dios ñecy ma Dios jadu'n ym̄inañ: “Nm̄ohuaamyich miich ajcxy je conúcxin huidibi nyajnim̄aayich je David.” ³⁵ Paady nañ jadu'n Dios y'ayuccojaaybi jaay jadüg'it, ma ym̄inañ: “Ca' Dios a'ix̄iy nicxy y'ung ñin̄icx yhuindigooy, je y'ung huidibi m̄id huädz jot huinma'ñ.” ³⁶ Com janch co je David Dios huin'ijxy, jigix ane'm̄ipy yi' yjuugy ym̄igüg ajcxy. E co ytung yajmay, chi y'o'cy, e je' y'alma ñaybaatti m̄id je y'ap yteedy y'alma, e je' ñin̄icx huindigooy je'. ³⁷ Je Jesús huidibi Dios yajjugypicy ca' je' ñin̄icx yhuindigooy. ³⁸ Migügtijc, jēbi mnejhu'iygixy, co je pocyhuinmeecxin yaj'ihuäcxy yajcapxhuäcxy m̄id Jesús yc̄ixpi. ³⁹ M̄id je' yc̄ixpi pinjaty m̄ibijcp ti ypocyajhuinmeecxixy huidibi Moisés yley anajty ca'p pocyhuinmeecxin yecy. ⁴⁰ Nayguend'ájtigix, ix xyajcidacpejt̄icx je m̄ij ayo'n jadu'n nej Dios y'ayuccojaaybi jaay jecy'ajty co Dios jadu'n ym̄inañ:

⁴¹ M̄idoogix ich n'ayuc, miich ajcxy n̄ixiicpi yajxiicpi, nay'adzigi'iygixy, ix m'alma myajtigooygixy. Com ich Dios ndumybiich tüg m̄ijhuinma'ñ ma miich ajcxy mx̄i mdiempo. May miich ajcxy ca' mm̄ibigipy, oy pin xyjayajm̄idm̄iydáaccixipy.

⁴² Co Pablo ajcxy ypidzimy ma yi judíojäy ñaymujctac, chi je jäy huidibi ca' yjudíojäyity nimay je Pablo co huen nañ jadu'n yajm̄idm̄iydäḡiyb ma je jadügpi sábado. ⁴³ Co ajcxy yöyhuäcxni ma nayoymujctac may judíojäy etz mayjäy huidi ca' yjudíojäyity huidibi jijptigiȳiy je judíojäy y'ixp̄ijcin, panicxy ajcxy je Pablo etz Bernabé. Pablo etz Bernabé capxhuijy ajcxy co huen panicxcixy je tiy'ajt jadu'n nej Dios t̄ibi tuñ may'ajt m̄id jäy yc̄ixpi, e ca' ajcxy ixmadzipy.

⁴⁴ Co sábado yx̄i paty, chi jäy ñayoymujci jahuenjaty cajp jäy ycanicxtay co anajty tzachm̄idoohuaangixy Dios y'ayuc. ⁴⁵ Ca' anajty ajcxy yjotcujcity co je judíojäy ajcxy ijxy je mayjäy. Chi ajcxy ooy yjot'ambijccoty ni'oj̄iygixy etz n̄imaaygixy oy ni nej Pablo. ⁴⁶ Chi Pablo etz Bernabé yti'ḡiy miccapxpi ym̄inañ ajcxy:

—Copicy anajty co ich miich nyajnim̄ahuipy Dios y'ayuc jayijp. Com ca' mgöb̄igaangixy Dios y'ayuc, e co ca' m̄naybidáacigixy tudägy ma jugy'ájt̄in m̄id huinix̄ibi, nicxyich n'ocyajnim̄äy ajcxy Dios y'ayuc huidibi ca' yjudíojäyity. ⁴⁷ Com jadu'n xy'ane'myich ajcxy yi Huindzin Jesús, e xyñimaayich ajcxy:

Ti ich miich nb̄idägy jadu'n nej tüg t̄icxin jajin ma tüg'óciy naaxhuiñybi jäy jigix myajnejhuñhuipy ajcxy je n̄idzoocin jigumbaad huindu'my naaxhuiñ.

⁴⁸ Co ajcxy jadu'n m̄idooy huidibi ca' yjudíojäyity, chi ajcxy ooy niḡi yjotcuḡiy, e chi ajcxy ym̄inandacy co je Huindzin Jesús y'ayuc ooy anajty y'óyity. E may ajcxy m̄ibijcy huidibi anajty Dios ti yajnigödunḡiy co paatip jugy'ájt̄in huinix̄ibi. ⁴⁹ E jadu'n jim yajcapxhuäcxy Jesús y'ayuc ma je jimbi naax cajp. ⁵⁰ E je judíojäy ajcxy minaygapxi nijējity töxyjäydijc ajcxy tudägyp̄i huidibi Dios yajm̄ij'ajtp, etz je mijjäydijc, e je' ajcxy m̄id m̄ibid̄igy Pablo etz Bernabé co pahuojpquēgaangixy ma jejimbi naaxjot. ⁵¹ Chi Pablo etz Bernabé yc̄ig huinhuojpy, je' je' tiy'ajt̄ip co ca' jäygidacy ajcxy nej jäy anajty ytungixy. Chi ajcxy ñicxni jim Iconio. ⁵² E je' ajcxy huidibi mijpidaacp Jesús ooy anajty ajcxy yjotcujcity. E ym̄id anajty ajcxy je Esp̄iritu Santo ma yjot yhuinma'ñ.

14

Pablo miid Bernabé jim Iconio

¹ Jim Iconio Pablo etz Bernabé ytigiiy ajcxy yquipxyi ma je judíojäy ñaymujctac, e oy yajxon ajcxy capxhuäcxy Jesús y'ayuc. E may judío etz griegojäy ajcxy ymibijcy. ² Je judíojäy ajcxy huídibi anajty ca' ymibijccixy nigapxcoty ni'ojiygoty ajcxy huídibi ca' yjudíojäyity huen je cajp jäy ajcxy mijotmädiipy je mibijcpidiyc. ³ Miid jada ycixpi Pablo etz Bernabé yhui'my je' ajcxy jecy etz capxhuäcxcixy ajcxy Dios y'ayuc huinmic jotmic etz je Huindzin mijotcuyc'ajtcixy ooy, e mooyi ajcxy je mic'ajt jëbi ajcxy pa'mjäy yajtzögipy etz mijhuinma'ñ tungixy huídibi ijxpejt'ajtp ma Dios ymic'ajt. ⁴ E je cajpjäy mejtzpicy je' anajty ajcxy, nijëjity ymijpidacpy ajcxy yi judíojäy, etz nijëjity ymijpidacpy ajcxy je Dios y'ayuccapxhuäcxi. ⁵ Chi nijëjity judíojäy etz huídibi ca' yjudíojäyity ñaygapxi miid tungmiidpi co mijotmätcodaangixy etz tim tzaagögädzangixy Pablo etz Bernabé. ⁶ Co Pablo etz Bernabé nejhuiy, chi ajcxy yqueecy ñicxy ajcxy jim Listra etz Derbe jim Licaonia, e majaty naax cajp huídi huinduy'agonbi. ⁷ Jim ajcxy capxhuäcxy Jesucristo ytiy'ajt nej jëbi ajcxy huaad y'alma nidzoocin paatcixy majaty cajp huingtonbi.

Tzaagätzcixy Pablo jim Listra

⁸ Jim Listra anajty tüg yëydijc iñäy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amido'ijtpy anajty Pablo y'ayuc, e Pablo ijxpy anajty co ymiid mibijcin nej jëbi chögy. ¹⁰ Chi Pablo mic nimay:

—Tinaayig.

Chi je tecyma'tpi tüg tipy ytinaygugiiy, e chi ytigiiy yöyb. ¹¹ Co je mayjäy ajcxy ijxy nej Pablo anajty pa'mjäy ti yajtzögy, huin'it ajcxy ytigiiy huambi jihuuyibi miid Licaonia ayuc chachminaangixy:

—iDios ajcxy jadu'n nej jäy ti ycidaaccixy ma ñich ajt!

¹² Yminaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huídibi anajty tumb jim ma je Júpiter chajtpijc cajppäbi, mimiin toro ajcxy etz pijy. E je teedy miid je jäy ajcxy yhuindzigihuaangixy etz ojadadaangixy anajty Pablo etz Bernabé, yaj'ögaangixy je toro ajcxy. ¹⁴ Co Pablo etz Bernabé nejhuiy, ca' ajcxy jäygidacy nej jäy anajty ajcxy y'ididzaangixy, chi ajcxy ci'm yhuit agiidziy, e ytigiiy ajcxy mayjäy'agujc yam chachminaangixy:

¹⁵ —iYëydijctijc ajcxy! ¿Nej co jada jadu'n m'iditczixy? Nañ jadu'n ñich ajcxy jäyity, jadu'n nej miich ajcxy. Paady ñich ajcxy ti nmingixy ma miich ajcxy mgajp jigix ajcxy m'ixmadziipy jada jadu'mbi huinma'ñ huídibi ca' choobaady ma Dios. E mijpidaaccixp je Dios juugypí huídi oyduñ tzajp etz naaxhuiñybi, je mejy etz tüg'óciy tijaty ya n'íxim. ¹⁶ Jecy'ajty Dios ixmajch je jäy ajcxy huen tungixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi miid miich ajcxy ycixpi. Dios yi' yajtuub etz yecy oybi cosecha e xymooyim mijcajee huídi ngaayim n'uucim e xyajjotcugiiyim.

¹⁸ Oy anajty Pablo jadu'n jadim tzachnimaangixy, ca'p ajcxy mimadacy co yi jäy ajcxy ca'p yaj'ó'ccixipy je toro co anajty yhuindzigihuaangixy.

¹⁹ Huin'it xiñ nijëjity judíojäy yja'ty, choon jim Antioquia etz Iconio. Chi ajcxy yajnimay je mayjäy co huen midziptzoongixy Pablo etz Bernabé. Chi mic'amy je mayjäy midziptzoon Pablo etz cögach ajcxy. Hue' ajcxy tijy ti anajty yaj'öccixy. Chi ajcxy oy ixjugucy cajppa'. ²⁰ Chi je apóstoles ajcxy jübigiiy je Pablo, chi je' ypidigy, e ñicxy jadüg'oc cajpjoty. Com jabom Pablo etz Bernabé choon, ñicxy ajcxy jim Derbe.

21 Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjäy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquía. 22 Jim ajcxy jotmicmigapxy je mibijcpidijc ajcxy, e capxhuijy huen tügjijp mibijccixy Dios y'ayuc, nimaaygixy:

—Co ndigihuaanim ma Dios y'ane'my copicy co nyajnáxim may ayo'n.

23 Cajp cajp majaty mibijcpidijc yajpaady jim Pablo etz Bernabé yajñibijcy nijējity yēdjictijc huen nigohuajc'ajtcixy je jäy ajcxy huídibi mijpidacp Jesús. Co anajty ti yajñibicy je' ajcxy huídibi nigohuajc'adipy, chi jaygay ajcxy y'ijty etz Dios mibijctzoy müd je' ajcxy ycixpi.

Pablo müd Bernabé yhuimbijtcixy Antioquía jim Siria naaxjot

24 Pablo etz Bernabé ñajxy ajcxy Pisidia oy ajcxy yja'ty jim Panfilia. 25 Chi Pablo etz Bernabé Jesús y'ayuc capxhuäcxi jim Perge, chi ajcxy ñicxy jim Atalia. 26 Chi ajcxy jim ybarcotigihy ñicxcixy jadügtecy jim Antioquía ma anajty ajcxy ti yajñibigyii Dios chójcin müd je tung huídibi anajty ti yajcixcixy.

27 Co ajcxy yja'ty jim Antioquía, chi ajcxy huoomujcy je jäy ajcxy huídibi anajty mijpidaacp Jesús, e yajmüdmíydactay tüg'óciy nej anajty Dios ti ytuñ müd je' ajcxy ycixpi, nej anajty Dios ti yaj'ahuäch je tü'aa nej huaad mibicy ajcxy je huídibi ca' yjudíojäyity. 28 Pablo etz Bernabé ijt ajcxy ooy jim jecy müd je mibijcpidijc ajcxy.

15

Mibijcpidijc ñayyöymujci ajcxy jim Jerusalén

1 Je huin'it tiempo nijējity jäy huídi tzoón Judea yja'ty ajcxy jim Antioquía, e ytigihy yaj'ixpijcp ma ajcxy je huídibi mijpidaacp Jesús, ymínaangixy: “Pen myajñdzögamy ajcxy yi m'alma, copicy co ajcxy myajtiy'ajttíhuipy jadu'n nej Moisés y'ane'my.” 2 Chi Pablo etz Bernabé ñaymídziptzongooti ajcxy müd huídi anajty ajcxy tzomb jim Judea, e ca' ajcxy ñay'ayuc-huinjihuiyi. Chi jada' yajñibejtí Pablo etz Bernabé etz jacjadyii mibijcpidijc huen nicxy ajcxy Jerusalén yajtiydigihy ma je apóstoles ajcxy etz huídibi ajcxy nigohuajc'ajt je mibijcpidijc jim Jerusalén.

3 Je mibijcpidijc huídibi anajty ajcxy jim Antioquía oy ajcxy tüjijphuohuñy Pablo etz je' ajcxy huídi nicx müd Pablo. Chi Pablo etz müd yjaymüdtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmüdmíydaaccixy je mibijcpidijc cajp cajp jadu'n nej jäy ajcxy huídibi ca' yjudíojäyity ti yjothuimbijtcixy etz yajmij'adaangixy Dios. E tüg'óciy mibijcpidijc ooy ajcxy jäygidacy je Pablo y'ayuc.

4 Co Pablo etz Bernabé ajcxy yja'ty jim Jerusalén, chi je mibijcpidijc ajcxy cöbijci je apóstoles ajcxy, etz je' ajcxy huídi nigohuajc'ajtp anajty je mibijcpidijc. Chi Pablo yajmüdmíydactay nej anajty Dios ti ytuñ müd je' ajcxy.

5 Chi nijējity fariseojäy, tñibi anajty mibijccixy Jesús, ytinayigy ajcxy juntijoty, e ymínañ ajcxy:

—Copicy co huen yajtiy'ajttiy je jäy huídibi mibijcp Jesús huídi ca' yjudíojäyity, e copicy nyaj'ané'mim co huen ajcxy Moisés ycötújcin cuyduuni.

6 Chi ñayyöymujci je apóstoles ajcxy etz huídi ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuí'mip. 7 Ca' ajcxy tzojc ñay'ayuc-huinjihuiyi, chi Pedro ytinayigy ymínañ:

—Migügtijc, mnejhuñyb ajcxy co jayhuin Dios ti xyhuin'ixyich ma miich ajcxy, jigix nyajnimähuibich jäy ajcxy huídibi ca' yjudíojäyity je Jesús ytiy'ajt oybi nej ajcxy y'alma nízoozin paadipy. 8 E Dios huídi nejhuñyb jäy yjot yhuinma'ñ xyaj'ixich je tiy'ajt co yejcy Espíritu Santo ma yi' ajcxy nañ tim

jadu'n nej ytuuñ ma ñich ajt. ⁹ Dios tú'ciy ytuuñ mñid ñich ajt etz mñid yí' ajcxy, mñid co yí' ajcxy mibicy Jesús paady Dios yajhuaatzí ajcxy yjot yhuinma'ñ.

¹⁰ Jadachambi, ¿nej co ca' mhuinjihuñhuaangixy mibigaangixy nej Dios ytuuñ mñid huídibi ca' yjudíoáyity? ¿Nej co adzip myajñihuidzaangixy je costumbre huídidi ni ñich ajt ni n'ap ndeedy ca' ti mímadaägy nicxy cuydundaaygixy?

¹¹ Janch ñich ajt nmibijcim co mñid je may'ajt huídidi Jesús ti tuñ mñid ñich ajt ycixpi ti nbaatim n'alma ññdzoocin. Nañ tim jadu'n je' ajcxy huídidi mibijc Jesús huídidi ca' yjudíoáyity ypaat y'alma ññdzoocin mñid je may'ajt huídidi Jesús ti tuñ.

¹² Huin'it je jäy ajcxy y'amunday, y'amido'ijtcixy nej Bernabé etz Pablo nimiydaaccixy nej anajty Dios ti tuñ mñid yí' ajcxy, jadu'n nej ajcxy ti yajtzögy pa'mjäy mñid Dios ymic'ajt, etz jac tijaty mijhuinma'ñ huídidi ti tuñ ma yí' jäy ajcxy huídidi ca' yjudíoáyity. ¹³ Co Pablo etz Bernabé ajcxy miydactay, chi Jacobo ymíñañ:

—Migügtjc mido'mbójcigich ajcxy ñich n'ayuc. ¹⁴ Simón Pedro ti xyajmñidmiydaacim nej Dios may'ajt ti tuñ oga'n ma huídibi ca' yjudíoáyity, co huin'ijxy huídidi yí' yjäy'adaañip ma yí' ajcxy. ¹⁵ Quipxy jada ñaybadyii mñid huídidi je Dios y'ayucnajtzcaxñybi jecy'ajty ycojay, ¹⁶ co jadu'n ymíñañ:

Co anajty jadu'n ti y'ocjadyii, chi nhuimbidiipyich ya naaxhuññ.

Nyaj'oyíhuñbich jadüg'oc je naax cajp huídidi David anajty y'ane'myb huídidi anajty ti y'octigooybi jadu'n nej tüg tijc huídidi ti yciday. Ma David y'ap y'oc nyaj'a'oyíhuñbich jadüg naax cajp, jadu'n nej jäy ytijc cojy huñjemybi.

¹⁷ Jigix jacjadyii jäy y'ojadadiipy ajcxy yí' Dios. Nañ jadu'n je' ajcxy huídidi ca' yjudíoáyity, huídidi ñich njäy'adaañip.

¹⁸ Jadu'n je Huindzin Dios jécyip jada tiy'ajt jadu'n yejcy.

¹⁹ Chi Jacobo yjacmíñañ:

—Paady ñich jadu'n nmíñaññich co ca' huaad n'amayñiyim ajcxy huídidi ca' yjudíoáyity huídidi ajcxy ti mijpidägy Dios. ²⁰ Hue' janchtiy tzoc nijayñiyim co ajcxy ca' tzüdzipy huídidi jäy yajhuindzigñybi ídolos, etz ni ca' huaad migapxcixy huñgbi töxyjäy, etz ni ca' huaad tzützcixy iyujc huídijaty jäy yöc-huñdypí, etz ni ca' huaad jicxcixy tijaty iyujc ni'py. ²¹ Jecy'ajty ixti chamni tüg tüg cajp, ji pin ññhua'cxp capxhua'cxp Moisés yley majaty nanyöymujctac naag naag pocxinñii.

²² Chi je apóstoles ajcxy etz je huídidi nigohuajc'ajt yí' mibijcpidijc, mñid tüg'ócíy Jesús yjäy pidacy ajcxy yhuinma'ñ co huin'ixaangixy nijējity jäy ma je' ajcxy etz quexaangixy jim Antioquía quipxyi mñid Pablo etz Bernabé. Chi ajcxy yajñibejty Judas, huídidi nañ jadu'n yajtijpy Barsabás, etz mñid Silas, yēydijctijc huídidi ajcxy capxpaadip. ²³ E je' ajcxy yajmiguejxy necy nej anajty ti jaay: “ñich ajcxy apóstoldijc, etz huídidi nigohuajc'ajt yí' mibijcpidijc, etz nidüg'ócíy mibijcpidijc, cham ñich ajcxy nguexy capxpocxin ma ajcxy mibijcpidijc huídidi ca' yjudíoáyity huídidi ajcxy tzinaayb jim Antioquía, etz huídidi ajcxy tzinaayb Siria etz Cilicia ñnaaxjot. ²⁴ Ti ñich ajcxy nejhuñyich co nijējity jäy ti xyñinixcixy, choñ ma ñich ajcxy, ca' ñich ajcxy ngötujcin mooy, e xy'amayñiygixy jim mñid y'ayuc, e xyajhuinma'ñytigoya'ñ ajcxy, co ajcxy xyñimaaygixy co copicy co myajtiy'ajttihuip ajcxy m'ung, etz mbayöyipy ajcxy je Moisés ycötújcín. ²⁵ Paady ñich ajcxy ti nnaygápaxigixy nidüg'ócíy co nyajñibedipyich nijējity jäy huídidi yajpaatp ma ñich ajcxy co huen nicxy xy'ijxcixy niguipxyi mñid nmigügtjcich huídidi ooy ndzocyich, je Bernabé etz je Pablo. ²⁶ Je huídidi ajcxy yjugy'ajt ti yoxy ti toogy mñid ajt nHuindzin Jesucristo ycixpi. ²⁷ E jadu'n yam nguexyich ajcxy Judas etz Silas, e yí' ajcxy c'm xyajmñidmiydägyipy tüg'ócíy ñich ajcxy n'ayuc. ²⁸ Ti je Espíritu Santo huinma'ñ

pidägy ma ñich ajcxy nhuinma'ñ etz ñich ajcxy ti nhuinma'ñ nbidägyich, co ca' nyajñibigipy ajcxy tijaty ayuc tzaachypi, jëyi janchtiy je huidi copícyip. ²⁹ Copícy co ca' ajcxy mdzüzüpy huidi jäy yajhuindzigiiyb ídolos, ca' ajcxy ni'py mjíxcixipy, ni ca' ajcxy mdzüzüpy iyujc huidi yöc-huiity ti y'ögy, e ca' ajcxy mmigapxtigooygixipy huingbi töxyjäy. Pen mguydundaayb ajcxy jada ané'min, oy anajty mdungixy. E Dios ajcxy xypubedipy xypudigihuipy.”

³⁰ Jadu'n je' ajcxy huidi ti yajquexy nicxy ajcxy jim Antioquia. Jim ajcxy huomujcy je mibijcpidijc, e yajcídigi ay ajcxy je necy. ³¹ Co je mibijcpidijc je necy capxy, chi ajcxy ooy yjotcugiiy müid je oybi ayuc tiibi anajty ajcxy yajñiguexy. ³² Com Judas etz Silas hue' je' anajty Dios y'ayucnajtcapxiybi, paady ajcxy yajjotcugiiy jot'amij moy je mibijcpidijc müid je ayuc. ³³ Jecy ajcxy jim yhuäcxipy, chi je mibijcpidijc müid ajcxy ycapxycixy, yajmihuaniiy ajcxy Dios, chi ajcxy yhuimbijtni ma anajty ti choongixy. ³⁴ Chi Silas yhuinma'ñpidacy co anajty yhui'ma'ñ. ³⁵ Nañ jadu'n Pablo etz Bernabé ijt ajcxy jim Antioquia, etz müid jac nijëjity ymügütijc yaj'ixpijciditcixy etz capxhuäcx'iditcixy je Huindzin Jesús y'ayuc ytiy'ajt.

Pablo mimetz viaje

³⁶ Ti xii tiempo anajty ñajtninixiiyñi co Pablo nimay Bernabé:

—Jam'ajt nmügütijc co'ixiiyim cajp cajp majaty ti ngapxhuäcxim Huindzin Jesús y'ayuc. Ooy njanejhuihua'ñich nej ajcxy yajpaady. ³⁷ Bernabé ymüid nicxaamy anajty je Juan huidi yajtijp Marcos. ³⁸ E je Pablo ca' a'ixiy co müid nicxip Juan, com ti anajty y'ocpuyöydúutibi jim Panflia, e ca' anajty ti yjacmüidyajtüyöyii je tung. ³⁹ E ca' ajcxy ñay'ayuc-huinjihuiiyi miñ xyipy. Chi Bernabé müidnicxy Marcos e ybarcotigiiy ajcxy, chi ajcxy ñicxy jim Chipre. ⁴⁰ E je Pablo abicy huin'ijxy Silas huidi anajty müid ñicxa'ñ. Chi je mibijcpidijc müid ycapxycixy, chi chooni ti anajty je mibijcpidijc yajmihuaniiy Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mibijcpidijc.

16

Timoteo mijhuäcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tüg jäy huidi anajty yxii Timoteo huidi anajty mijpidaacp Jesús. Judíojäy anajty ytaj'ajtpy, e griegojäy anajty yteedy'ajtpy. Je' ytaj nañ ymibijcpy anajty Jesús. ² Je jäy ajcxy huidi yajmij'ajtp Jesús jim Listra etz jim Iconio ooy anajty oy nimiydaaccixy Timoteo. ³ Pablo ooy jatzojcy co Timoteo ycajäymüid'ajti. Chi Pablo yajtiy'ajttiiy Timoteo, jigix ca' ymijotmädiyb je judíojäy huidi anajty ajcxy jim tzinaayb, com tüg'óciy ajcxy nejhuüy co griegojäy teedy'adyii. ⁴ Cajp cajp ma anajty ajcxy ñaxy yajmüidmiydaaccixy ajcxy je mibijcpidijc je cötujcin huidi je apóstoles ajcxy, etz huidi nigohuajc'ajt je mibijcpidijc jim Jerusalén. ⁵ Je' ajcxy huidi yajmij'ajtp Jesús cajp cajp ñigi anajty yjotmicpijccixy, etz mijpidaaccixy Dios y'ayuc, etz ñimayiy'iditcixy jabom jabom.

Pablo yhuin'ijx tüg Macedonia jäy

⁶ Je Espíritu Santo ca' a'ixiy nicx capxhuäcxixy Dios y'ayuc jim Asia ñaaxjot. Paady ajcxy huingduum ñicxy yajyöyñajxy ajcxy Frigia ñaaxjot etz Galacia ñaaxjot. ⁷ Chi ajcxy jim yja'ty ma Misia ñaaxtzi'ba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejhuüy ajcxy co ca' yi' tzocy co jim níxcixipy. ⁸ Chi ajcxy jüyöyñajxy Misia ñaaxjot, chi ajcxy y'idacy jim Troas. ⁹ Chi Pablo cumäyjoty huin'ijxy tüg yëydijc, huidibi yconaaxity anajty Macedonia, ytinay'ahuüy ma Pablo yhuinduu, e ycohuaniiy, ñimäyii: “Tun

may'ajt nicx jim Macedonia, e jim xypubedipy ich ajcxy.” ¹⁰ Co Pablo jadu'n huin'ijxy cumäyjoty, chi ich ajcxy n'ixtay barco huidi nicxamb jim Macedonia. Nhuinjihuñy ich ajcxy co jim Dios xyquéjxcixyich jigix jim ngapx-huäcxibich Jesucristo ytiy'ajt je oybi nej jëbi ajcxy alma nidzoocin paadipy.

Pablo etz Silas jim Filipos

¹¹ Chi ich ajcxy nbarcotigñy jim Troas nicxy ich ajcxy tiyí ma naax mejy'agujcpi huidibi anajty yxñi Samotracia. Chi com jabom ajcxy nja'tyich jim Neápolis. ¹² Co ich ajcxy jim ndzooñ, chi ich ajcxy nicxy jim Filipos. Filipos hue' je' romanojäy ycajp. Je' je cajn jac mijpi ma je Macedonia ñaaxpa'. Jim ich ajcxy nhuäcxijpy jecy. ¹³ Tüg sábado nicxy ich ajcxy cajppa', miñhuingon tüg mijñi, ma anajty judíojäy ajcxy mñidity Dios ojadajttac. Chi ich ajcxy n'ixtacy jim, e ngapxhuäcxich ajcxy Jesús y'ayuc ma je töxyjäydijc ajcxy huidi jim anajty ajcxy ti yöymujccixy. ¹⁴ Je Lidia anajty y'amido'ijtp. Hue' je' anajty Lidia ycogajpity jim Tiatira, e ytocpy anajty ucy huit oy jatypi. Lidia yajmij'ajtpy anajty Dios, e je Huindzin Dios yajyungñy yjot yhuinma'ñ, jigix amido'idipy nej Pablo Dios y'ayuc capxhuäcxi. ¹⁵ Je Lidia niñbejt mñid tüg'óciy yjuugy ymígüg, chi ich ajcxy xycohuanñy, e xyñimáaygixich:

—Pen minamb ajcxy co nmibicyich je Huindzin Jesús, miin jättaaccix ma ich ndijc.

Chi ooy xycohuanñy ich ajcxy, ixti cooni jim xyajhu'i'myich ajcxy.

¹⁶ Jadu'n yjajti tüg tecy co ich ajcxy anajty ñicxy ma Dios ojadajttac, chi ich ajcxy nbaty tüg tumbi töxy'anäg mañ'ajt mñidpi huidi ooy ytiygapxy. Ymñid anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷ Je töxy'anäg ypanicxy chach yam Pablo etz ich ajcxy ymñinañ:

—Jada yëydijc Dios tzajpjtopy ajcxy ymidumyb. Capxhuäcxi ajcxy Dios y'ayuc jadu'n nej jëbi ich ajt n'alma nidzoocin paady.

¹⁸ Canaag xñi jadu'n ich ajcxy xychach'amayñy. Co Pablo chijpin, chi yhuäc-huimbijty nñmay je mañ'ajtmñidpi:

—Mñid Jesucristo yxñi n'ane'myich, pidzim ma jada töxy'anäg.

Tim huin'ítty je ca'oybi yajyöyduuty je töxy'anäg.

¹⁹ Co je töxy'anäg yhuindzin jadu'n ijxy co ca' y'ocmeeñybadaani, chi mñid je' yciñpi ajcxy majch Pablo etz Silas, e yajnicxy ajcxy ma je tungmñidpi ma je' ajcxy y'agujctijc. ²⁰ Co ajcxy jiihy mñidja'ty ma je tungmñidpi, chi ymñinañ:

—Jada yëydijc ajcxy judíojäy jada, nigoo ajcxy ñaax yajmäty ycajp yajmäty, ²¹ etz yaj'ixpicy ajcxy costumbre huidi ca' huaad ich ajt ngöbajcim, e nihuaad ngatuunim, com hue' ich ajt romanojäy.

²² Chi je mayjäy ajcxy mñiddziptzoon Pablo etz Silas, e je tungmñidpi ni'ane'mdiy co huen ajcxy yajñieñ yaj'ixjeñ huen yajhuojpcixy mñid matz.

²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴ Co je pujxtijc huindzin ypaati je cötujcin, chi pidacy Pablo etz Silas jac jiihy öc'am, e chi ajcxy ixmajch co'adzity ytecy ma je quipy huidi yxñi cepo.

²⁵ Chi jadu'n yjajty mijcuctz anajty, co Pablo etz Silas chach Dios ojadajtcixy chach huin'igixy yí Dios, e jacjadyi machyjäy chach amido'o'ijtcixy. ²⁶ Chi timitiini uñ huinxijty pujxtijc poch. Chi y'ahuaatztay je pujxtijc agi', e y'adzittuttay je cadena ma tüg'óciy machyjäy. ²⁷ Chi oy ymähuiy je pujxtijc huindzin. Co jadu'n ijxy ac'ahuadz pujxtijc aguu, chi yajpidzñmy y'espada ñayyaj'öga'ñyii anajty. Com hue' anajty tijy ti je machyjäy yqueectäy. ²⁸ Huin'it Pablo mic'amy migapxy je pujxtijc huindzin nñmay:

—Ix nej mnayduuni, cheeby ajcxy nidüg'óciy.

29 Chi je pujxtijc huindzin pijctzoy jin, e ytiigiy poyigy pujxtigoty, janch tziyuuyb mid tzigin. Chi ycoxtinay'ahuuy ma Pablo etz Silas ajcxy yhuinduu.

30 Chi yajpidzimy Pablo etz Silas, e yaj'amidooy:

—Huindzin, ziti ich jebi nduñ jigix nidzoocin nbáadibich?

31 Chi je' ajcxy minañ:

—Mibic Huindzin Jesús etz mbaadipy nidzoocin, miich etz m'ungdöxyijc.

32 Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytiyc. 33 Mijcuctz je pujxtijc huindzin puji je Pablo ajcxy chaachi'au, e chi je pujxtijc huindzin ñibejtay ajcxy mid y'ung ytöxyijc.

34 Chi je pujxtijc huindzin yajnicxy Pablo etz Silas ma ytiyc, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

35 Com jabom je mijtungmidpi quejxy mutztungmidpi jim ma pujxtijc huindzin mid cötujcin huen najtzmazhigixy Pablo etz Silas. 36 Chi je pujxtijc huindzin nimay Pablo:

—Ti je tungmidpi quexy cötujcin co jebi nnajtzmazhigixich miich ajcxy. Nicxcix jotcujc.

37 Chi Pablo migapxy je mutztungmidpi, e chi nimay:

—Romanojäy ich ajcxy. Yi cajptungmidpi ti xyhuopyich mid matz mayjäy agujc, ni ca' jayijp ti xtyiduñich, e ti xypidägyich pujxtigoty. ¿Nej co jadachambi xñajtzmazhigixich ameechi? Ca' jadu'n y'óyity. Huen mijtungmidpi ci'm miñ xyajpidzimgixich ich ajcxy.

38 Chi je mutztungmidpi cijx nimydactäy ma mijtungmidpi tüg'óciy Pablo y'ayuc. Chi ajcxy ñay'adzigiyyi co nejhuuy co Pablo etz Silas hue' je' anajty ajcxy romanojäy. 39 Chi je mijtungmidpi ñicxy ci'm oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum nicxcixni. 40 Co Pablo etz Silas ypujxtijcpidzimy, chi ajcxy ñicxy ma Lidia ytiyc. Jim ajcxy jadu'n ijxy mibijcpidijc, e jot'amijmoy ajcxy. Chi nicxcixni.

17

Jim Tesalónica yajti ooy capxy ayuc, ca' nay'ayuc-huinjhuihu

1 Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíojäy ajcxy tüg'ñaymujctac. 2 Com jadu'n anajty costumbre midity, Pablo nicxp anajty ma judíojäy ajcxy ñaymujctac sábado xii. E tugig sábado xii jim capxy miydacy mid je' jim Tesalónica. 3 Hue' anajty mid miydaaccixy jadu'n nej jaybecyity ma Dios ñecy co Cristo copicy ayo'n yajnextahuip, e chi y'ögipy, huin'it yjugypigipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

4 Nijëjity judíojäy ymibijc ajcxy e mijyöybejty ajcxy Pablo etz Silas. Nañ jadu'n may griegojäy huidi anajty Dios yajmij'ajtp, etz maytöxyjäydijc huidijaty oy ymijpidacni ymijnicxpejt etz mibijc ajcxy Pablo etz Silas y'ayuc.

5 Je judíojäy huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytiyc'aguu tzach'ixtaaygixy Pablo etz Silas. 6 E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungmidpi. Yam chachminaangixy mic:

—Jada jäy ajcxy je' huidi tzachyajhuinmañyidigooyb tüg'óciy naax cajp, nañ iyabaad ajcxy ti ymiingixy. 7 Jada Jasón ti Pablo etz Silas jim yajjättägy ma ytiyc, tüg'óciy ajcxy midzip'adyii je César huidi ane'mb, yminaangixy co ji jadüg rey, je' je' je Jesús.

8 Co jadu'n midoy, chi ajcxy ooy yajyumigy yaj'oxigy cajpjäy etz je tungmüdpí ajcxy. 9 Chi Jason etz ymígügtjic yajmeeñyejcy, chi najtzmadzüy ajcxy.

Pablo etz Silas jim Berea

10 Co oy ycodzïy mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíojäy ñaymujctac. 11 Jim Berea judíojäy ajcxy yjacmüd oyjot oyhuinma'ñ, ca'ydi judíojäy ajcxy jim Tesalónica. Je Berea jäy ajcxy ycóbijc ajcxy Jesús y'ayuc ymüid oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicy. 12 May judíojäy ymibijcy etz may griegojäy huidibi ooy ymijpidaacni nañ jadu'n ymibijcy, töxyjäydijc etz yëydijctjic. 13 Co yi judíojäy jim Tesalónica nejhuüy co Pablo nañ jadu'n Dios y'ayuc capxhuäcxi jim Berea, chi ajcxy jim ñicxy, etz yajyumigy yaj'oxigy je cajp jäy ajcxy. 14 Mic'amy ajcxy, je mijpidaacpi Jesús, yquejx Pablo mic'amy, huen nicxy jim ma mejypa'. Chi Timoteo etz Silas yjac-hui'my ajcxy jim Berea. 15 Je huidibi ajcxy Pablo jaymüid'ajt ymüidnicxy, müid ñicxy ajcxy ixti cooni yja'ty jim Atenas. Huin'it ajcxy yhuimbijty müid tüg ayuc co huen Timoteo etz Silas nicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

16 Co anajty Pablo ahuijxy je Silas etz Timoteo jim Atenas, ooy anajty ytajy ymay co ijxy nejhuüy co je cajp müid ooy may quipychech, tzaadzech, etz oori oyduñ huidi ajcxy dios'ajtpy. 17 Paady Pablo nimiydacy Jesús ma yi judíojäy ñaymujctac müid je judíojäy etz jacjadyii jäy huidi Dios miyaaxp ojadajtp. E jabom jabom müid miydaaccixy pinjaty y'oymujcp cajp cujc. 18 Nijëjity ixpicytjic ñay'ixquixigixy y'ixpjcín müid Pablo. Jim huidibi ni'ixpigüyb epicúreo ixpjcín, etz cham huidi ni'ixpigüyb estoico ixpjcín. Chi ajcxy nijëjity yminaangixy:

—¿Ti jada jada' ajt xyajñimaayim jada yëydijc capxymaaybi?

Chi jadyii yminaangixy:

—Hue' jada ycapxhuäcxyp huingbi dios y'ayuc.

Jadu'n ajcxy yminañ co Pablo nimiydacy Jesús etz jadu'n nej jäy yjugypicy huidijaty ti y'öccixyp. 19 Chi ajcxy müidnicxy Pablo ma je it ma je ixpicytjic ñaymugyüi huidi anajty yxi Areópago, chi ajcxy Pablo nimay:

—¿Nej jëbi njájtciäch jada jemybi ixpjcín huidi müich mmimimb? 20 Com ti müich müich xyajñimaaygich ayuc ca'pi yhuinjihuüyñity, e nejhuühuaamyich ajcxy nej yhuimbizimy tüg'óciy jada ayuc.

21 Tüg'óciy Atenas jäy etz nañ jadu'n huidi ajcxy jim adzinaayb, ca' anajty ni ti tungixy, jëyi nigoobi amido'ijtcixy etz miydaaccixy jemybi ayuc tiy'ajt.

22 Huin'it Pablo ytinaaygy mayjäy agujc jim Areópago, e yminañ:

—Atenas jäy, n'ixypich co müich ajcxy ooy myajmij'ajtcixy canaagnax huidibi müich ajcxy mdios'ajtpy. 23 Com ti xi ya n'ixyich canaagnax huidi ajcxy m'ojadajtpy, chi ti nbaatyich tüg altar ma jadu'n yjaayity: “Je Dios huidi ca' pin icy'adyii.” Je Dios huidi müich ajcxy m'ojadajtyp, e ca' ajcxy m'ixy'adyii, jada je' huidi nyajñimaayb ajcxy.

24 Je Dios huidi oyduñ naaxhuiñybi etz tzajp etz jac tijaty, yi' je' ni-huindzin'ajttayb tüg'óciy. Je Dios ca' chinäy ma tzajptjic huidi jäy ajcxy cojpy.

25 Dios ca' ni ti yajtigoy'ity huidi naaxhuiñyjäy jamöhuaanip. Dios yi' yejcp jugy'ajtin etz huidibi nxejim, etz tüg'óciy tijaty.

26 E tügpi ni'py tügpi jot ti yaj'oyiy tüg'óciy yi jäy, jigix huen tzinaaygixy huindu'my naaxhuiñ. Dios tiy'ajt yejcp nej xi tiempo yöyipy, e ma jäy jëbi

huaad chinaaygixy, ²⁷ jigixixtáaygixipy Dios, jadu'n nej jihuüyixtaaygixy tondäy xajtäy, com ca' je' jiguemity ma ich ajt nidüg nidüg. ²⁸ Dios ycipxi ich ajt ndzinaayim nyücxim etz nji'ajtim, com jadu'n minañ miich ajcxy mboeta, huidibi iy yajcojp: “Dios ich ajt xy'ung'ajtim xy'anäg'ajtim.” ²⁹ Pen Dios ich ajt xy'ap'ajt xy'oc'ajtim ca' huaad nhuinma'n nbidaacim co Dios yjadu'ñity nej oori oyduñ, plata oyduñ, etz tzaadzech quipychech huidi jäy ti yaj'oyiy mid yci'mhuinma'n. ³⁰ Dios ca' midity jotcöduuyb je jäy chuuhuinma'n tibi ñajxni. Jadachambi ane'mb Dios hueñytimma'amyity huen jäy ajcxy jothuimbijtcixy. ³¹ Com ti Dios yajnihuinmayiy tüg xii mina tyduna'n yi naaxhuiñybi jäy mid je yëdyjc huidibi ti huin'ixy, jada ty'ajt Dios ti yaj'ixy yajnejhuüy tüg'óciy jäy co ti yajjugypicy Jesús co y'o'cy.

³² Co ajcxy jadu'n midoy co yi öcpi yjugypigipy, chi nijëjity ytigiy nixiicpi yajxiicpi. Chi jacjadyii yminaangixy:

—Huaad ich ajcxy n'amido'idipyich miich m'ayuc mina anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjity jäy ypadzooni huidi anajty ti mibicy Pablo y'ayuc. Ma je' ajcxy jim anajty tüg jäy huidibi anajty yxii Dionisio, yi' je' anajty tungmid jim Areópago. Nañ jadu'n tüg töxyjäy huidi anajty yxii Dámaris ypadzooni, etz jacjadyii jäy.

18

Chi Pablo ñicxy jim Corinto

¹ Co jada jadu'n ytuni yjajti, chi Pablo chooni jim Atenas, ñicxi jim Corinto. ² Jim minaybaati tüg judíojäy huidi anajty yxii Aquila, Ponto anajty ycocajpity, namja'tni anajty mid ytöxyjc Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judíojäy pidzimdaaygixy jim Roma. Chi Pablo oy cogapxiy Aquila. ³ Aquila etz Priscila ytung'ajtpy anajty cochactijcxuyii, com nañ cochactijcxuuyb anajty Pablo, paady Pablo jim yhui'my mid je' ajcxy. Chi ajcxy tú'ciy ytuuñ. ⁴ Tüg tüg sábado xii Pablo ñicxy ma je judíojäy ajcxy ñaymujctac yajmidmydaaccixy Jesús y'ayuc yty'ajt etz capxjotcidaaccixy judíojäy etz nañ huidi ca' yjudíojäyity.

⁵ Co ajcxy Silas etz Timoteo yja'ty jim Corinto, choñ ajcxy Macedonia, chi Pablo adügijp ytigiy ayuccapxhuäcxpi ma judíojäy ajcxy co Jesús je' je' je Cristo huidi je' ajcxy chach'ahuijxyp. ⁶ E je judíojäy ajcxy ytigiy jotma'tpi, tzipcapxi ahua'ngapxi. Chi Pablo yhuit huinxijty, je' je' je ty'ajt co puyöydüdaani ajcxy, e chi Pablo yminañ:

—Miich ajcxy mid mgi'mbocy ajcxy myajtigoya'n yi m'alma. Ich ca' ti pocy nmíddyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíojäyity ajcxy.

⁷ Chi Pablo yöybojtni ma judíojäy naymujctac, chi ñicxy ma Justo ytijc. Justo ooy anajty Dios miyäxy ojadaty, e ymid anajty ytijc mihuingon je judíojäy ñaymujctac. ⁸ E Crispo, je judíojäy ñaymujctac huindzin, ymibijc je' je Huindzin Jesús y'ayuc yty'ajt, mid tüg'óciy y'ung y'anäg, yjuugy ymigüg. Nañ jadu'n nijëjity Corinto jäy co midoy Jesús y'ayuc, chi mibijcy e ñibejty ajcxy. ⁹ Chi je Huindzin Dios nimay Pablo cumäyjoty:

—Ca' mdzigi, capxhuäcx'aditz n'ayucich, e ca' mni'amoñ. ¹⁰ Com ich miich nbubedipy, ca' pin jot mid'adipy nicxy nejaty xytuñy. Ich may ich ya nmíddyity jäy ma jada cajp.

¹¹ Chi Pablo yhui'my jim Corinto tüg jimijt jacup, yaj'ixpijcy jäy je Huindzin Dios y'ayuc yty'ajt.

¹² Huin'it tiempo co Galión ygobernador'ajty jim Acaya ñaaxjot, chi judíojäy ajcxy midziptzoñ je Pablo, yajnicxy ajcxy ma cõtujctac. ¹³ Chi ajcxy nimay je gobernador:

—Jada yëydijc tzach jäy yaj'ixpijcp co ca' ycopicyity yajcuydunipy Moisés ycõtujcin huidi jaybety ijtp.

¹⁴ Pablo capxamb anajty co oy yi Galión nimäy ajcxy je judíojäy:

—Pen yi Pablo ti ytundigooy o mijpocy ti tuñ, huin'it nmijpidägibich miich ajcxy m'ayuc, miich ajcxy judíojäy. ¹⁵ Pen je Cristo y'ayuc etz miich ajcxy mgötujcin myajtzibiyb myajcapxyiyb, ca' ñich huaad nyajtigiyiyich yijiibi huinmañ.

¹⁶ Chi je gobernador y'ané'min pidacy co huen judíojäy ajcxy yajpidzimdayii ma je cõtujctac. ¹⁷ Huin'it tüg'óciy griegojäy ma je cõtujctac huijtzpidzimyb je Sóstenes, yi judíojäy naymujctac huindzin, e chi ajcxy cujy jibijpy huingojxy jijpcojxy ma gobernador yhuinduu, e Galión ca' tuñycuenti.

Pablo yhuimbijtni Antioquía, e yajtzondacy midugigpi viaje

¹⁸ Jac-huäcxijp Pablo jecy jim Corinto. Chi yhuinmañypidacy co chonaani. Chi ycapxycijxni müid je mibijcpidijc, e chi ybarcotigiyñi ñicxni jim Siria ñaaxjot. Ñicxni quipxyi müid Priscila etz Aquila. Jim Cencrea, ca'ni anajty ybarcotigiyi, Pablo yajcöme'px cödza'm co anajty cuyduñ yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy müid Priscila etz Aquila, e ñicxy ma je judíojäy ajcxy ñaymujctac. Chi müidmiydacy je judíojäy ajcxy huidi jim anajty ti ñayyöymújcigixy. ²⁰ Chi je judíojäy ajcxy jim Efeso cohuanüy co huen jac-huim'y, e Pablo ca' a'ixiy co yhuim'ipy. ²¹ Chi Pablo ycapxycijxni müid je Efeso jäy, chi yminañ:

—Copicy co jim xii nyajnaxa'ñyich Jerusalén, e nhuimbidityich jadüg'oc ma miich ajcxy, pen Dios jadu'n tzojcp.

Chi Pablo ybarcotigiy chooni jim Efeso. ²² Co anajty ti ypättigiy jim Cesarea, Pablo nicxy Jerusalén co anajty capxpoxaangixy je mibijcpidijc, chi mic'amy idaacni jim Antioquía. ²³ Jim hueeni yhuäcxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuäcxi jim Efeso

²⁴ Huin'it tiempo yja'ty jim Efeso tüg jäy huidi anajty yxii Apolos, hue' anajty ycogájpity Alejandría. Ooy anajty oy ayuc capxhuäcxy. E yajxon nejhuidyäy Dios y'ayuc huidi jaybety ijtp. ²⁵ Apolos ooy anajty ixpicyity ma Huindzin Jesús y'ayuc e ooy yjotmiccapxy, oy anajty yaj'ixpicy nej je Huindzin Jesús yajty y'ayoy. Oy jëda'ajty anajty janejhuüy nej Juan, je Bautista, jäy ajcxy yajniibejty. ²⁶ Chi Apolos ytigiy capxpi miydaacpi ma je judíojäy ajcxy ñaymujctac janch ni ca' chigiy chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuingujc, chi ajcxy oy yajmüidmiydägy jac-huädz Dios y'ayuc ytiy'ajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayiy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpidzimy mayjäy agujc co ca' yjanchity nej anajty ajcxy judíojäy yhuinmañ müidity, co Jesús ca' je' yjéjity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuijxyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigiñy xyjottigiñy je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi ñch ajcxy pen ji Espíritu Santo.

³ Chi Pablo y'amidooy ajcxy:

—¿Ti ñibejtin miich ajcxy mbaad?

Chi je' ajcxy y'adzooy:

—Je Juan, je Bautista, ñibejtin.

⁴ Chi Pablo yminañ:

—Juan jäy yajñibejt je', je' je' je tiy'ajt co huen jothuimbijtcixy. E nimaaygixy anajty co huen ajcxy mibigipy je Cristo huidi jacmiinamni. Je' je' je Jesús, je Cristo.

⁵ Co jada ajcxy jadu'n midoy, chi ajcxy oy ñibety miid je Huindzin Jesús yxi.

⁶ E co Pablo cñixajy ajcxy, huin'it je Espíritu Santo y'adigiñy yjottigiñy ajcxy. Chi ajcxy ytigñy capxpi miydaacpi tigachyjaty ayuc, e capxhuäcxy anajty ajcxy Dios y'ayuc. ⁷ Jeyi anajty nimajmetz yëydijctijc huidibi ajcxy ñibejt.

⁸ Tugñig po' Pablo jim yhuäcxijpy, e yöydiñb anajty ma judíoñy ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy miid Dios ytiy'ajt. ⁹ Nijëjity jotjuuñydijc ca' ajcxy ymibijcy, jeyi ajcxy jibic tzachnigapxy Jesús ytiy'ajt ma jäy ajcxy yhuinduu. Chi Pablo puyöydúutcxni. Chi abicy yajnicxy je mibijcpidijc ma tüg escueltijc. Hue' je' je escuela huindzin anajty yxi Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimijt jadu'n jim chachyaj'ixpijcy, e tüg'óciy jäy ma je Asia ñaaxjot ymidoday ajcxy je Huindzin Jesús y'ayuc, je judíoñy etz huidi ca' yjudíoñyity. ¹¹ E Pablo mayba'mjäy yajtzoocy miid Dios ymic'ajt etz ooy mijhuinmañ ytuñ. ¹² Ixti yajnicxy anajty ajcxy yhuit etz ypaayi huidi Pablo ñinix anajty ti ypadyi, e yajpaatcixy anajty pa'mjäy, e je' anajty miid choocxixy, e nañ je' anajty miid ca'oybi ypidzimy ma jäy ajcxy y'ay yjot.

¹³ Chi nijëjity judíoñy huidi anajty huidijtp tzoymdubi, huidibi anajty yajpidzimigixyp ajcxy ca'oybi, jayajtzögaañ tüg pa'mjäy miid je Huindzin Jesús yxi co huen yajyöydüdyi je ca'oybi. Chi ajcxy nimaaygixy je ca'oybi:

—Ñich miich yam nimaayb miid Jesús yxi, je huidi Pablo ycapxhuäcxp, yajyöydüt jada jäy.

¹⁴ Jadu'n anajty y'iditcixy je Esceva ymang ajcxy, je nihuixtujcpi ajcxy. Je Esceva hue' je' anajty judíoñy etz nihuindzin'aty teedy'adi. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuñybich pin je' Pablo, e miich ajcxy, ¿mbin miich ajcxy?

¹⁶ Chi je yëydijc huidi ca'oybi anajty miid, ytiycpiñy tüg ma je' ajcxy, ymimadactay je nihuixtujcpi, e yqueectay ajcxy ma je tijc nihuädz ixhuädz etz tzaachi. ¹⁷ Tüg'óciy jäy ajcxy huidi anajty tzinaayb jim Efeso, judíoñy etz huidi ca' yjudíoñyity nejhuiyday ajcxy, chi ooy ajcxy chigiy e nimaaydaaccixy e cömaaygixy je Huindzin Jesús yxi.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiñbi anajty capxy je mañ'ajt necy yajminday tüg'óciy e no'ctay je necy ma jäy ajcxy yhuinduu. E co ajcxy maymujcy je libro tzou, chi naybaati jada' huixchiguipx majc mil

plata meeñ (moneda mexicana naybaati jacnaxy jahueenjaty ycatüg migo'px jamajcmocx tüg mil). ²⁰ E je Huindz'in Jesús y'ayuc nigi anajty yhuäcx'idich, nigi ymijtiy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñypidacy co nicxy cogapxihua'ñ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügtecy e ñicxa'ñ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hui'my jecy jim Asia.

Canay'ayuc-huinjihuñhuñ jim Efeso mñid Dios y'ayuc ycixpi

²³ Huin'it tiempo tzip oy pidicni jäy y'ocyumigni y'oc'oxigni mñid Huindz'in Jesús y'ayuc ycixpi. ²⁴ Co je', je plateri huñdi anajty yxñ Demetrio, yaj'oyiy anajty ac plata Diana chajptijc'ung, e jadu'n anajty Demetrio etz jacjadyii jäy oy ymeeñybaatcixy mñid je ytung. ²⁵ Chi Demetrio huomujcy ymügügtijc je huñdi jadu'mbi tung tumb, nimay ajcxy:

—Mügügtijc, mnejhuñyb ajcxy co mñid jadyaabi tung huñdi ñch ajt nduunim, jada mñid jotcuyc ndzinaayim njugy'ajtim. ²⁶ E miich ajcxy m'ijxpy mnejhuñyb co je Pablo chach yaj'ixpijcy co ca' yi' diosity huñdi jäy ajcxy yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma ñch ajt n'adogñ e nañ jadu'n je mijpi dios, je Diana, ytigoyipy, ca' ni pin occapxpaatnipy, je huñdi cham mayjäy y'ojadajtpy tüg'óciy ya Asia ñaaxjot etz huindu'my naaxhuiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytigñy ajcxy huambi jihuiñyb, chachmñangixy:

—iCömay jada Diana, yi efesiojäy ydiosa!

²⁹ Chi ajcxy yajhuinmñydygoyday je cajp jäy e majch ajcxy je Gayo etz Aristarco, huñdi tzoon Macedonia, metz yëydijc, huñdi Pablo anajty ajcxy ymñd huñdijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujctijc huinduu ma jäy ñaymugyii. ³⁰ Chi Pablo yjatigihuaañ jäy agujc, mñidcapxa'ñ mñidmñydäga'ñ anajty je mayjäy. E je mibijcpidijc ca' ajcxy a'ixñy nicxy jiihy ytigiy. ³¹ Nañ jadu'n nijëjity Asia mñitungmñdpi huñdi anajty Pablo mñid ñaymüg'adyii, yajnigujxy ayuc, co ca' huaad ñicxy ma jäy ñaymújcigixy. ³² Je mayjäy tügmucy anajty ijtcixy, ooy anajty yhuaangixy yjihuiñygixy, ca' anajty ajcxy ñay'ayuc-huinjihuiñygixy. E je jacmaaybi ni ca' anajty nejhuñygixy ti co chachnaymújcigixy. ³³ Nijëjity jäy huñdibi anajty ajcxy mayjäy agujc, je ajcxy yajmñidmñydactay je Alejandro ti anajty tuunip jajtip. Chi je judío jäy ajcxy tijpidzimy je Alejandro ma mayjäy agujc. Chi Alejandro cñmñd tiy'ajt yecy co huen amongixy. Je' anajty ññgapxtüdamy judíojäy ajcxy. ³⁴ Co je mayjäy nejhuñy co je' je' yjudíojäyity, chi ajcxy ytigñy huaambi jihuiñybi jahueenjaty ycamejtzhority, ymñangixy:

—iCömay ooy yi Diana, yi Efeso jäy ydiosa!

³⁵ Chi je cajp jaaybi co anajty je jäy ti yaj'amoongixy hueeni, chi ajcxy nimay:

—Efeso jäy, tüg'óciy yi naaxhuiñyjäy nejhuñy co jada Efeso cajp yi' cuend'ajtp yi Diana chajptijc, je' Diana huñdi ooy ti yajcömay, etz yi Diana ññicx huñdi cä'u tzajpcíxy. ³⁶ Ca' huaad ni pin ymina'ñ co ca' yjanchity. Amongix, ca' ti mdúngixipy pen ca' jayijp yajxon mhuinmaaygixy. ³⁷ Com jada yëydijc ajcxy tiñbi myajmiingixy, ca' ma ytundigooygixy, ca' yi' ma ajcxy jibic capxcixy ma miich ajcxy mdiosa Diana. ³⁸ Pen Demetrio etz huñdijaty mñd ytuñ pen ymñd xñhuñ mñd pinjaty, paady tungmñdpi etz tiydundac jiijity. Jëbi nigapxy ma tungmñdpi, jëbi miñ xyipy ñayññgapxtúutigixy. ³⁹ E pen huingbi

ayuc huïdi miich ajcxy mbijctzooyb, copity jada y'oyïhuipy ma jäy naymugyïi. ⁴⁰ Ymïd jada ayo'n co nicxy nayyajxïhuim co jäy cham ñaymïhuïdidyïi mïd jada ycixpi nej yam ytunyïi yjadyïi e ni ti tïy'ajt ïch ajt nganejhuïyïm nej nmïnaanïm pen ji anajty xyaj'amïdoohuim mïd co jäy cham chachhuaangixy chachjïhuïygyxy.

⁴¹ Co jadu'n miydactay, chi ycapxycijxy mïd je naymujcpïdijc.

20

Pablo ñicxy jim Macedonia etz Grecia

¹ Co je cajp jäy ycapxy'ayuc xeemy, chi Pablo huoomujcy je mïbijcpïdijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mïbijcpïdijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuäcxijpy jim tugig po'. Jim Grecia Pablo anajty ybarcotigïhua'ñ ñicxa'ñ Siria. Co Pablo oy nejhuïy co judïojäy ajcxy ti yajnihuinmayïyïi yaj'oga'ñyïi barcojoty, chi yhuinma'ñybaty co huimbida'ñ tegyï'm, ñaxa'ñ jadüg'oc Macedonia. ⁴ Pablo mayjäy mïd ñicxy, mïdnicxy je Sópater huïdi anajty cogajp Berea, etz Aristarco, etz Segundo huïdi anajty cogajp Tesalónica, etz Gayo huïdi anajty cogajp Derbe, etz Timoteo, etz nañ jadu'n Tíquico, etz Trófimo huïdi tzoon jim Asia ñaaxjot. ⁵ Co jada mïbijcpïdijc ajcxy ñicxy jayijp, chi ajcxy xy'ahuijxyïch jim ma je cajp huïdi xïi Troas. ⁶ Co xïi ñajxtay mina yajcaay je tzajcaagy je huïdi ca' mïdity levadura, chi ïch ajcxy ndzooni jim Filipos barcojoty. Co migoox xïini, oy ïch ajcxy naybáatigixy jim Troas. Jim ïch ajcxy yhuäcxijpy huixtujc xïi.

Pablo co'ixiy je mïbijcpïdijc jim Troas

⁷ Domingo xïi ajcxy ñayyöymujci je mïbijcpïdijc chajcaagy ytujc-huäcxaangixy, e Pablo anajty ymïgügtijc yjacyaj'ixpijcpy. Je' co anajty com jabom chonaani, paady oy ayuc jacyajyoñ ixti ycujc-hua'cxchumïy. ⁸ Jiiby anajty canaag lámpara ytïcxy ma ajcxy anajty ti yöymujccixy ma tüg cuarto huïdi anajty oy ycixity. ⁹ E tüg yeeg'anäg huïdi anajty yxïi Eutico, ma ventana aguu anajty y'ïñäy. Com Pablo jecy oy yaj'ixpijcy, chi je yeeg'anäg ymäymajtzi, e tugig nihuijtzpety anajty ycixity je tijc ma ycäy. Chi ajcxy yajpïdïgy ögy. ¹⁰ Co Pablo yminajcy, chi ñaygïxnajaji amïneenmujcy je yeeg'anäg huïdi anajty ti ycäy. Chi Pablo nimay ymïgügtijc:

—Ca' mdzigïygyxy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tujc-huäcxy e yajcaay ajcxy, e jadu'n Pablo yjacmiydacy co oy xïimïyñ. Chi ycapxycijxni mïd je' ajcxy, chi ñicxni. ¹² E je yeeg'anäg huïdi anajty ti ycäy, chi ajcxy yajnicxy juugy, e ooy ajcxy yjotcugiy nidüg'óciy.

Choñ ajcxy Troas ñicxcixy Mileto

¹³ Chi ïch ajcxy jayijp nicxïgy barcojoty jim Asón co anajty jim nyajt-zonángixich Pablo, com ti anajty jadu'n mïdnayñimáayigixich co je' tegyï'm anajty ñicxa'ñ. ¹⁴ Co ïch ajcxy naybaatti jim Asón, chi Pablo ybarcotigïy mïd ïch ajcxy. Chi ïch ajcxy ñicxy jim Mitilene. ¹⁵ Chi ïch ajcxy jim ndzoñ, chi com jabom ïch ajcxy najxy mïhuingon Quío, comaax ïch ajcxy nja'ty jim ma barco jättac huïdi anajty yxïi Samos. Jim Trogilio ïch ajcxy nbocxy, com jabom ïch ajcxy nja'ty jim Mileto. ¹⁶ Chi Pablo ca' ñicxa'ñ jim Efeso co ca' yhuäcxiba'ñ jim Asia ñaaxjot, com tzojc anajty yjada'ñ Jerusalén, com jim anajty yajnaxa'ñ Pentecostés xïi.

Pablo yajmïdmïydacy je huïdibi ajcxy ane'mb je mïbijcpïdijc

¹⁷ Jim Mileto anajty Pablo, chi capxyñiguejxy huïdi ajcxy nigohuajc'ajtp je mibijcpidijc huïdi ajcxy jim Efeso. ¹⁸ E co ajcxy miiñ, chi Pablo yminañ:

—Miich ajcxy mnejhuïyb jadu'n nej ñich ti njäy'atyich ma miich ajcxy tüg'óciy je xii je tiempo nej oga'n nja'tyich ya Asia. ¹⁹ Jecy ñich ooy ti n'ityich müd miich ajcxy, nduñich ma nHuindzin Jesús ytung müd yung naxy njot nhuinma'ñich, etz müd huinnii jotmay, etz ti may ayo'n nyajnaxyich ma yi judíojäy ajcxy. ²⁰ Ca' ti n'ixmachich je ngapx'ayuc huïdi oyip müd miich ajcxy ycixpi. Ti nyaj'ixpicyich mayjäy'agujc etz tijc tijc. ²¹ Ti ndiy'ajt yecyich ma judíojäy etz cham ma huïdi ca' yjudíojäyity. Nnimaydaayich co huen jothuimbijtcixy ma Dios, etz huen mibijccixy ñich ajt nHuindzin Jesucristo. ²² Jadachambi nicxpich jim Jerusalén; adzip je Espíritu Santo xyquexyich e ni nganejhuïyich ti ñich jim xyjadamy. ²³ Co ñich cajp cajp ma nnicxyich, je Espíritu Santo xyajnejhuïybich co jim Jerusalén jäy ajcxy xypidäga'ñich pujtigoty etz jim ajcxy xychaachytuna'ñich. ²⁴ Yi jadu'mbi ayuc ca' ñich nduñich cuendi, jada njugy'ajtich ca' ti tzoohuity. Jëyi janchtiy co nyajcixipyich jada tung jotcuyc, e nguydunipyich je Huindzin Jesús y'ayuc, je tiibi xyajniibicyich jada tung. Ngapxhuäcxibich yi oybi Jesucristo y'ayuc ytiy'ajt jadu'n nej Dios may'ajt ti tuñ müd jäy ajcxy ycixpi.

²⁵ E jadachambi nnejhuïybich co miich ajcxy ma ti ngapxhuäcxych Dios y'ayuc, ca' miich ajcxy xy'ocjac'ijxcixni jadügtecy. ²⁶ Paady cham nnimäyich miich ajcxy, ca' ni ti ngo'adzohuipyich müd miich ajcxy ycixpi. ²⁷ Com ti ngapxhuäcxych ma miich ajcxy tüg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma miich ajcxy. ²⁸ Naycuend'ájtigixy ci'm etz cuend'ajtcixy tüg'óciy jäy ajcxy huïdi yajmij'ajtp je Huindzin Jesús, jadu'n ajcxy nipaady nej tügpicy cöbixy, etz miich ajcxy huïdi nigohuajc'ajtp je mibijcpidijc jadu'n miich ajcxy nipaady nej cöbixy cuend'ajtpi. Je Espíritu Santo ti xyajniibijccixy co mgüend'adipy ajcxy yi Jesús yjäy, huïdi ti cojuuy ajcxy ypocy müd yci'mni'py co y'o'cy.

²⁹ Chi Pablo yjacminañ:

—Nejhüïybich co ya ndzóonibich miinip huingbi jäy huïdi yajhuinma'ñydigoyam mibijcpidijc, jadu'n nej ahua'n iyujc huïdi cöbixy tzüdzip. ³⁰ Ji ma miich ajcxy ji jäy yaj'ixpigam anii ma yjapadyii yaj'ixpigipy tiy'ajt oybi jigix yi mibijcpidijc ypanicxiyb. ³¹ Naygüend'ájtigix, mjäymedziyb ajcxy jadu'n nej ñich tugüig jimijt ti nyaj'ixpicyich xim tzuum jabom jabom, müd huinnii jotmay ti nyaj'ixpijccixy miich ajcxy nidüg nidüg.

³² Jadachambi ñich, nmigügtijcich ajcxy, Dios miich ajcxy nyajpuhuanïyb, nyajmihui'maamyich miich ajcxy Dios y'ayuc jadu'n nej Dios ajt xychojcin xyjihuiyim. Ma Dios y'ayuc miich ajcxy mbaadipy mic'ajt ma yi mibijcin, e mbaadipy ajcxy it lugar ma Dios quipxyi müd ajcxy nidüg'óciy tiibi yajhuäch yjot yhuinma'ñ. ³³ Ni ti ñich ti nga'adzocy, ni pin yhuit ymeeñ huïdibi n'ocjedïybich. ³⁴ Miich ajcxy mnejhuïyb co ti nduñich, müd ngi'mgijich ci'm ti nnaymöyijich huïdi nyajmayjajtpyich etz nañ jadu'n ti nbubetyich nmigügtijcich huïdi ñich anajty nmüid. ³⁵ ñich miich ajcxy ti nyajni'ixiygixy nej jëbi mdungixy, nej jëbi mbubéjtcixy migügtijc huïdi pa'm'ijtp, etz huïdi tijaty yajmayjajtp. Jäymedzi ajcxy je Huindzin Dios y'ayuc co yminañ: “Jacjotcuyc je' huïdi yejcp, ca'ydi huïdibi yajmooyb.”

³⁶ Co jadu'n ycapxtay, chi Pablo ycoxtinay'ahuïy müd je' ajcxy, e mibijctzoy ajcxy Dios. ³⁷ Ytigüy ajcxy yaaxpi nidüg'óciy, e mineeñ ajcxy Pablo etz tzüxcy. ³⁸ Ooy ajcxy jihuiy nej anajty ti ñimäyigixy ajcxy co ca' yjac'ixiyb ajcxy jadügtecy. Chi ajcxy oy najtzhuohuiy jim ma barco.

21

Pablo ñicxy jim Jerusalén

¹ Co ñich ajcxy ngapxycíjxy mïid je mibijcpidijc, chi ñich ajcxy nbarcotigíy, tiiyi nicxy ñich ajcxy jim Cos. Com jabom ndzooñich Cos nicxy ñich ajcxy jim Rodas. Chi ñich ajcxy ndzooñ Rodas nicx ñich ajcxy jim Pátara. ² Jim Pátara ñich ajcxy nbaaty tüg barco huïdi anajty najxp Fenicia ñaaxjot. Jim ñich ajcxy nbarcotigíy jadüg'oc, chi ñich ajcxy nnicxni. ³ Chi ñich ajcxy mmij'ijxy Chipre je naax mejy'agujcpi, anajty'amy je' yhui'my. Jacnicxy ñich ajcxy Siria ñaaxjot, chi je barco ytigíy ma yjättac jim Tiro co jim anajty chimydajc yajhuïma'ñ. ⁴ Jim ñich ajcxy nbaty jäy huïdi anajty yajmij'ajtp Jesús, chi nmïdhuäcxijpich ajcxy huixtujc xii. Je' ajcxy je Espíritu Santo yajnejhuïy co Pablo ayo'n pada'ñ Jerusalén, paady ajcxy nimay Pablo co ca' huaad jim ñicxy. ⁵ Co huixtujc xii bi yca'pxy, chi ñich ajcxy ndzooni. E tüg'ócíy mibijcpidijc mïid y'ung ytöxyjic oy xytüjijphuohuïyigixyich cajppa'. Jim ma mejypa' ngoxtinay'ahuïy ñich ajcxy, chi ñich ajcxy nmibijctzoy Dios. ⁶ Huin'it ñich ajcxy ngapxycijxni, chi nbarcotigíyñi ñich ajcxy e je mibijcpidijc yhuimbijtni ajcxy ma ytijc.

⁷ Co ñich ajcxy ndzooñ Tiro, chi nicxy ñich ajcxy Tolemaida. Jim ñich ajcxy ngapxpcxich je huïdi anajty ajcxy mijpidaacp Jesús, e nmïdhuï'my ñich ajcxy jim tüg xii. ⁸ Com jabom ñich ajcxy ndzooñ Tolemaida mïid Pablo etz pinjaty ñich ajcxy anajty nmïd. Chi ñich ajcxy nja'ty jim Cesarea. E chi ñich ajcxy nicx ma Felipe ytijc, je huïdibi anajty capxhuäcxy Jesucristo ytíy'ajt je oybi. Je' je' huïdi tuun je nihuixtujcpi taabi ajcxy caayin uucín yajhuäcxy jim Jerusalén oga'n. Chi ñich ajcxy nhui'my mïid je'. ⁹ Felipe mïdaax anajty ñix mïdity, ca'ni anajty ajcxy ypijccixy. E je' ñix ajcxy anajty Dios y'ayucnajtzcaxíyipy. ¹⁰ Ti anajty ñich ajcxy jim nhuäcxipy canaag xii co oy yjäty tüg ayucnajtzcaxíyibi huïdi anajty yxii Agabo, jim anajty ti chooñ Judea. ¹¹ Chi Agabo y'oy xycogapxíyigixy ma ñich ajcxy njättac. Chi Agabo Pablo yhuïn huijtzäcxi, e je' mïid ñaygíxojtz ñaydecyxojtzi, chi ymïnañ:

—Je Espíritu Santo jadu'n mïnamb co jim Jerusalén jadu'n judíojäy ajcxy cïxodza'ñ tecyodza'ñ jada huïn yhuindzin, e nañ cïyega'ñ ajcxy ma huïdi ca' yjudíojäyity.

¹² Co jadu'n yajmïdoy, ñich ajcxy etz je Cesarea jäy ngohuaníy ñich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy mïid ñich ycixpi? ¿Nej ñich miich ajcxy co njot nhuinma'ñ xyaj'amutzcïyi? ñich nayyéjibich mïid naygíxodzii naydecy-xodzii, nañ jëbi n'ögibich jim Jerusalén mïid je Huindzin Jesús ycixpi.

¹⁴ Co ca' ñich ajcxy mimadacy nicxy nyajhuí'mgixyich Pablo, chi ñich ajcxy n'amooni, chi ñich ajcxy ñayñimaayi:

—Huen cuyduñ je Huindzin Jesús chojcín.

¹⁵ Co jadu'n yjajti, chi ñich ajcxy ndzonii ni'ixíy e chi ñich ajcxy nicxy jim Jerusalén. ¹⁶ Mïid nicxy ñich ajcxy nijëjity mibijcpidijc huïdi tzoon Cesarea, e nañ tzoon anajty tüg Chipre jäy huïdi anajty yxii Mnasón, jecyip anajty jijptigíyñi jada mibijcín e je' ñich ajcxy nicxy xyajjättägaangixy.

Pablo oy cogapxíy Jacobo

¹⁷ Co ñich ajcxy nja'ty jim Jerusalén, chi je mibijcpidijc ñich ajcxy xycöbijc janch jotcujc. ¹⁸ Com jabom ñich ajcxy nicxy mïid Pablo, y'oy ñich ajcxy ngogapxíy Jacobo, e jim anajty tüg'ócíy huïdi nigohuajc'ajtp je mibijcpidijc. ¹⁹ Chi Pablo ymïgügtijc capxpcxxy, e yajmïdmïydacy ti anajty Dios ti tuñ mïid yí' ma yí jäy ajcxy huïdi ca' yjudíojäyity. ²⁰ Co ajcxy jadu'n mïdooy, chi ajcxy huin'íy jäymejch yí Dios, chi ajcxy Pablo nimay:

—Migüg Pablo, miich mnejhuuyb co ya canaag mil jäy ti mibicy Jesús, e yjactimmina'n ajcxy co copicy nguyduunim Moisés ycötujcin je jecyip. ²¹ Ti ajcxy yajmüdmüydägyii co miich mdzachjäyyaj'ixpicy ma tüg'óciy judíojäy huidi ajcxy jiguégy adzinaayb co ca' huaad tuñycuenti Moisés ycötújcin je jecyip, etz ca' ycopicyity co tiy'ajttüygixipy y'ung, etz ni ca' ycopicyity payöyipy ich ajt ngostumbre. ²² ¿Ti huaad nduunim? Jotmädam ajcxy co nejhuihuipy co ya miich ti mjäty. ²³ Hue' janchtiy jadu'n miich mdunipy: cha midaax yëydijc huidi cuydunamy tüg huandaacin. ²⁴ Müdnicy je' ajcxy, nicx nayyajpocyñihuaatzi müd yi' ajcxy, e miich mgojuydayipy nej anajty ajcxy ypanyi je meeñyduni. E chi ajcxy myajcöme'pxipy cödza'm, e jadu'n je jäy ajcxy huinjihuüydähuipy co ca' yjanchtiy jadu'n nej xyñimiydaaccixy, jëyi co miich nañ jadu'n mguydun je Moisés ycötujcin je jecyip. ²⁵ Huidibi janchtiy jadu'n nej yi' huidibi ajcxy ca' yjudíojäyity, e ti müpidaaccixy Jesús, ti ich yi' ajcxy nijayiygixich co ca' tüngixipy cuenti jada jadu'mbi judíojäy ycostumbre. Je' janchtiy co ca' huaad tzützcixipy je tübi jäy yajhuindzigiy ídolos, ni ca' huaad jicxcixipy ni'py, etz ni ca' ajcxy tzüdzipy huidi yo'c-huüdy ti y'ögy, etz ca' ajcxy huingbi töxyjäy migapxtigóoygixipy.

Chi ajcxy majch je Pablo ma Dios ytijc

²⁶ Chi Pablo müd nicxy je nimidaaxpi yëydijc, com jabom ajcxy nayyajpocyñihuaatzi ajcxy, chi ajcxy ytigiy ma Dios ytijc, e chi ajcxy ytiy'ajt yejcy ma judío teedy ti xü ycixa'n je nayyajpocyñihuaadzi, etz ti xü huindzig'iñ iyujc cïyegaangixy nidüg nidüg.

²⁷ Ma anajty yca'pxaani je mühuixtujcxübi nijëjty judíojäy, chooñ jim Asia, chi ajcxy ijxy Pablo ma Dios ytijc. Huin'it ajcxy je mayjäy majch Pablo, yajhuangoty yajjihuygoty, ²⁸ chi ajcxy yam chachminaangixy:

—¡Israel jäy ajcxy, pubejtich ich ajcxy! Jada je' je yëydijc huidi xi ya tzach nigapxp ni'ojüyb judíojäy ycostumbre, Moisés ycötújcin, etz nDios ytijc. E jadüg nax ti yajtiygixy griegojäy ma Dios ytijc, yajjibicüygixy jada it lugar huätzpi. (Com ca' ñigödúcyity nicxy griegojäy ytigiy ma Dios ytijc.)

²⁹ Paady anajty jadu'n yminaangixy je huidi ajcxy majtz je Pablo, com co ijxy ajcxy Pablo müdhuidity cajpjoty je Tróximo, huidi anajty cogajp Efeso. Hue' anajty tijcixy co Pablo ti müdtigiy Tróximo tzajtigoty.

³⁰ Tüg'óciy je cajpjäy yjotmätcottay, müñ ajcxy poyigy majch ajcxy je Pablo yajpidzimy tzajtigoty pahuijch pajugujcy. Chi ajcxy müc'amy agüy Dios ytijc.

³¹ Yaj'ögamyb anajty ajcxy Pablo. Chi je soldado huindzin ayuc midoy co tüg'óciy je cajp jäy ajcxy ti chachhuaangixy chachjihuygixy. ³² Je soldado huindzin huodzunday ysoldado ajcxy, e chi ajcxy ñicxy poyigy ma je mayjäy yhuaangixy yjihuygixy. Co je mayjäy ajcxy ijxy müñ soldado ajcxy müd yhuindzin, chi ajcxy ixmajch Pablo ca' ocjaccójxcixni. ³³ Co je soldado huindzin jim ja'ty, chi yajmajtzi je Pablo, ni'anëmdiy co huen cïxochyii müd mejtz cadena. Chi yajtiy pin je' anajty, e ti ti tuñ. ³⁴ Chi je mayjäy ajcxy ytigiy huaambi jihuüybi, e jadu'n je soldado huindzin ca' ni nej huinjihuüy müd je ne'mbi. Chi ni'ane'mdiy co huen Pablo yajnicxyii ma cuartel. ³⁵ Co jim yja'ty ma cuartel pedydac, chi je soldado ajcxy cïyigy Pablo, co anajty je mayjäy chachjottigoyñájxcixy tzachyaj'ögaangixy anajty Pablo. ³⁶ Tüg'óciy je mayjäy pamiingixy axam je soldado ajcxy, yam chachminaangixy:

—¡Huen ögy!

Pablo ñaygohuaani ma je mayjäy

³⁷ Co anajty yajtigihuañyii cuartel tigoty, chi Pablo migapxy je soldado huindzin miid griego ayuc, yminañ:

—¿Nej jëbi ii nmiidmiydägy tüg'aa metz'aaji?

Chi je soldado huindzin y'adzooy:

—¿Nej mjaity miich griego y'ayuc? ³⁸ ¿Nej ca' jada' miich jëjity je egipcio jäy huidi namni tzip yajpidicp, e huobidzimy midaax mil jäy yaj'öcpi, miid nicxy ajcxy jim migtigiduum?

³⁹ Chi Pablo nimay je soldado huindzin:

—Ich judiojäy ich, jim ngogápidyich Tarso, tüg mijcajp huidi yajpatpi jim Cilicia ñaaxjot. Tun may'ajt miñ mayjäy n'ocmigapxich.

⁴⁰ Co je soldado huindzin a'ixiy, chi Pablo ytinay'ahuüy ma je cuartel pedydac, e cimiid ytiy'ajt yejcy co huen amoongixy. Co je mayjäy ajcxy y'amonday, chi migapxcoty miid hebreo ayuc yminañ:

22

¹ —Migügtijc etz mij'anäctijc, midoogixy jadu'n nej ich yam nnayñigapxtüdyii.

² Co je mayjäy ajcxy midoy co ymigápxigixy miid hebreo y'ayuc, chi ajcxy y'amonday, chi Pablo yminañ:

³ —Judiojäy ich. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpjicich ya ma Gamaliel, etz yajxon Gamaliel ti xyaj'ixpicyich ajt nmij'ap nmijteedy ytiy'ajt etz ycötújcín. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham. ⁴ Jecy ti n'ixhuidity ti nbahuidityich je jäy ajcxy huidi anajty mijpidaacp Jesús y'ayuc, nyaj'öctähuaamyich anajty, e nyajnicxpyich anajty mach yëydijctijc etz töxyjäydijc, nbidägyich anajty ajcxy pujxtigoty. ⁵ Je teedy migtungmüdpí etz tüg'óciy mij'anäctijc ymiid tiy'ajt, co ich ajcxy xymooyich cötujcín, e nnicxyich anajty jim Damasco ma nmigügtijcich yi judío jäy ajcxy. N'ixtäyich anajty je jäy ajcxy huidi Jesús y'ayuc mijpidaacp, madza'ñich anajty ajcxy, e nyajmiinañich anajty ajcxy ya Jerusalén huen yajtzaachytunggixy.

Pablo nimydacy nej yjothuimbijty

⁶ Co ich anajty ndüyöyich mihuingon Damasco, cujc yxii anajty, chi janch timitiini ytixigü jühuidity jadu'n nej jin ma ich, hue' anajty choon tzajpjoty.

⁷ Chi jim ngidaayich, huin'it nmidooyich tüg ayuc xyñimäyich: “Saulo, Saulo, ¿ti co xypahuidijttägyich?” ⁸ Huin'it n'amidooyich: “¿Mbin miich, Huindzin?”

Chi xy'adzooyich: “Ich je' je Jesús je huidi cogajp jim Nazaret, je huidi miich mdzachpahuidijttacpy.” ⁹ Pinjaty ich anajty nmüid y'ijx je' ajcxy je tixcín, chi ajcxy ooy chigüy, e ca' ajcxy huinjihuüy je ayuc huidi anajty nmigapxyijich.

¹⁰ Huin'it nnimaayich: “¿Ti jëbi nduñich, Huindzin?” Chi je Huindzin Jesús xy'adzooyich: “Pidig e yajyöy mdu', nicxy jim Damasco, jim myajnimähuüy tüg'óciy ti jëbi mduñ.” ¹¹ Je tixcín hue' je' xy'ixmajchich huintz. E chi je nmigügtijcich xyhujtzoönich ajcxy cigixy, xyajja'tyich ajcxy jim Damasco.

¹² Jim Damasco anajty chinäy tüg yëydijc huidi anajty yxii Ananías, je huidi anajty ooy cuyduñ Moisés ycötújcín je jécyip. E judiojäy ajcxy huidi jim tzinaayb ooy cōmaaygixy co ooy y'oyjäyity. ¹³ Chi Ananías ymiñ ma njättaacich, e ytinay'ihuüy ma ich nmijc, chi xyñimaayich: “Migüg Saulo, ijxigich jadüg'oc huinjemy.” Tim huin'ity n'ijxigüyich. ¹⁴ Chi Ananías xyñimaayich: “Je Dios huidi ajt nmij'ap nmijteedy ojadajt, je' ti xyhuin'ixy jigix mnejhuüipy Dios yhuinma'ñ, etz m'ixipy je tudäcypí jäy, e mmidohuüpy yci'm ayuc huidi ycapxy. ¹⁵ Dios ti xyhuin'ixy jigix nicxy mdiy'ajt

yecy ma tüg'óciy naaxhuiñyjäy, etz mnimiydägipy nej ti m'ixy ti mmidooy.
¹⁶ Jadachambi, ¿nej co mhuäcxipy? Pidig etz nñbet. Mibijctzou Dios jigix mbocy ñihuädzipy.”

Pablo nimiydacy nej oy yajquexy ma je huídibi anajty ajcxy ca'p yjudíojäyity

¹⁷ Co nicxnich jadüg'oc Jerusalén, chi nnicxich ma Dios ytijc, oy Dios nmibijctzooyich. Chi ñich jüby tzajtigoty n'ixmañyñyich. ¹⁸ N'ijxyich je Huindzin Jesús e xyñimaayich: “Pidzim ya Jerusalén mic'amy, ca' je Jerusalén jäy ajcxy cöbigipy miich m'ayuc jadu'n nej xyñigapxa'ñich.” ¹⁹ Huin'it n'adzooyich: “Huindzin Jesús, yi jäy ajcxy ñejhuiyb co ñich anajty nnicxich huen huídi judíojäy naymujctac n'ixtäyich yi jäy ajcxy huídi miich m'ayuc xymibijcip, ti nbidägyich anajty ajcxy pujxtigoty, ooy ñich ajcxy yi' ti ndzaachytuñ ti nga'oyduuñich. ²⁰ Co ajcxy yaj'ögy je Esteban, miich mdumbi, huídi miich m'ayuc xycapxhuäcxip, jim ñich anajty nañ jadu'n yajpaady. E ooy njäygidacyich co ajcxy yaj'o'cy, ixti ngüend'ajtich je' ajcxy yjocxhuit huídi Esteban yaj'o'c.” ²¹ Chi ñich nHuindzin Jesús xyñimay: “Cham ñich miich nguexy jigüegy it ma yi jäy ajcxy huídi ca' yjudíojäyity.”

Pablo, ma je comandante yci'am

²² E yabaad je mayjäy y'amido'ijty Pablo y'ayuc, chi ytigñy ajcxy huambi jihuiybi chachmínaangixy:

—¡Huen öc yijiibi yëydijc! ¡Ca' huaad yjactzinäy!

²³ Yam yhuaangixy yjihuiygyixy, yam yjocxhuit tzachjengixy, etz naaxhuaay tzachyujc-huijciy. ²⁴ Chi je soldado huindzin ni'ane'mdñy co huen Pablo yajnicxyii cuartel tigoty, e ni'ane'mdñy co huen ci'adyii jigix nigapxip ti ti tuñ co je jäy ti ymibidigyii. ²⁵ Ti anajty ajcxy cíxojtcixy, e chi anajty ajcxy tzaachytunaangixy co Pablo ñimay je capitán huídi anajty huindy:

—¿Ti cötújcín miich ajcxy mñd co mdzaachytuna'ñ tüg romanojäy, ni ca' ajcxy jayijp mdiyduñ?

²⁶ Co jadu'n midooy je capitán, chi ñicxy oy yajnimäy je comandante:

—Ixcim nej mduñ yi jäy, com hue' yi' romanojäy.

²⁷ Huin'it je comandante ymijhuägy ma je Pablo, chi y'amidooy:

—¿Nej janch co miich mromanojäyity?

Chi Pablo y'adzooy:

—Janch.

²⁸ Huin'it je comandante ñimay Pablo:

—Meeñgyíxy ñich jada nbaaty co naydijyijich romanojäy.

E chi Pablo y'adzooy:

—Ñich ti nmñibi'c'ajtich yi'.

²⁹ Mñd jëyi, je huídibi anajty ajcxy cí'adam je Pablo, chi puyöydúutcixni. Nañ jadu'n je comandante ooy ñay'adzigiñy, mñd co cíxojch Pablo mñd cadena.

Pablo ma je judíojäy ajcxy yjuntitungixy

³⁰ Com jabom je comandante co anajty nejhuihua'ñ ti ycixpi co ti yxiyii je Pablo yi judíojäy, huen yajminagyii cadena ma Pablo yci'. Chi ane'my co yajhuomujci je teedy tungmñdipi etz je judío mij'anäctijc. Huin'it je comandante yajnicxy Pablo ma je huindzindijc etz ixpicytijc anajty ti ñaymújcigixy.

23

¹ Huin'it Pablo yaj'ijxpejty je mayjäy huídi anajty ti nayyöymújcigixy, e chi ajcxy ñimay:

—Migügtijc, Dios y'ijxpy ñejhuiyb nej ñich ti nduñ maabi nyeecpidzimyich, tudägy n'ityich ixti chambaadni.

2 Huin'it je Ananías, je teedy mǎitungmǎidpi, ni'ane'mdiy Pablo co huen yaj'accoxǎgy. 3 Chi Pablo ymǎnañ:

—¡Dios xychaachytunipy miich huǎdibi mnaybidaacip nej jǎhuiy ooy mdudǎgyǎyity, e ca' yjanchity! Paady miich m'ǎñǎy ma cǎtujctac jǎgix nyajtydunipyich nej je ley y'ane'my. Chi mmǎidundǎgooy je ley co ti xyajcojxyiǎjch.

4 Je jǎy ajcxy huǎdi anajty jim mǎnañ:

—¿Jadu'n miich mmǎgapxtǎgoy yi Dios ymǎitungmǎidpi?

5 Chi Pablo ymǎnañ:

—Mǎgǔgtǎjic, ǎich ca' anajty nejhuǎyich, pen yi' je' Dios ymǎitungmǎidpi. Com jaybety jadu'n ma Dios ñecy: “Ca' huaad jǎbic mnǎgapxipy huǎdi tungmǎid iǎtp ma miich mǎjǎy.”

6 Huin'it Pablo ijxy nejhuǎy co jim juntǎjoty meǎtzcipy ixpicytǎjic anajty jim, jim huǎdi saduceo y'ixpǎjcin ymǎjpidacp etz nañ jadu'n jim huǎdi fariseo y'ixpǎjcin ymǎjpidacp, chi Pablo ymǎnañ mǎic:

—Mǎgǔgtǎjicich, fariseojǎy ǎich, nañ jadu'n ndeedyich fariseojǎy je'. Cham nyajtyduñich mǎid jǎgixpi co nmǎibicyich co Dios yajjugypǎgipy jǎy tiǎbi y'ǎccixy.

7 Co Pablo jadu'n ymǎnanday, chi fariseojǎy etz saduceojǎy miñ xyipy ajcxy ca' ñay'ayuc-huinjǎhuiyi. Chi je naymujcpǎdǎjic ajcxy ñaybǎjic-huǎcxi. 8 Je' co je saduceojǎy ymǎnaangixy co o'cpi ca' yjugypǎgipy, ni ca' ji ángel ajcxy, nañ ca' jǎy y'alma, nañ ca' ji je Espǎritu Santo, etz ni ca' ji mujcu' ajcxy. Je fariseojǎy ymǎbǎjcpy je' ajcxy co yǎiǎjity ángel ajcxy, co ǎcpi jugypǎgaangixy, co je Espǎritu Santo yǎiǎjity, co jǎy ajcxy mǎidty y'alma, etz co mujcu' ajcxy yǎiǎjity. 9 Tǔg'ǎciy jǎy ajcxy ma je naymujctac ytǎgǎy huambi jǎhuiybi. Chi niǎjǎjity fariseojǎy huǎdi nihuǎdzǎn'ajtpy je Moisés ycǎtǔjcin nǎgapxtuty Pablo ymǎnañ:

—Jadayaabi jǎy ca' ti pocy ti tuñ. Ca' yjecyity ti jada' ymǎgapxyii tǔg espǎritu o tǔg ángel.

10 Chi je mayjǎy anajty ooy mǎic ti ñayajjot'ambǎjicǎgixy. Je soldado huǎdzǎn tǎgǎyib anajty co Pablo y'ahuonnǎhuiyib y'agǎdzǎhuiyib, paady ni'ane'mdiy huen yi soldado ajcxy yajpǎdzǎmgixy juntǎjoty e yajnǎcxcǎipy yi Pablo jadǔg'oc ma cuartel.

11 Huin'it coodz ñayguǎxǎci je Huǎdzǎn Jesús ma Pablo ymǎjic, nǎmaayi:

—Jotmǎcpc Pablo, com jadu'n nej ya Jerusalén ti xyñǎgodiy'ajt'átyich, nañ jadu'n xyñǎgodiy'ajt'adǎpyich jim Roma.

Ixtaagyixy huinmañ nej huaad Pablo yaj'ǎccixy

12 Com jabom niǎjǎjity judǎojǎy ñaygapxi co yaj'ǎgaangixy Pablo. E chi ajcxy capxycǎdujcy ñay'ǎbojci ñaygapxpojci co ca' ycayaangixy y'ǎgaangixy ixti cooni ajcxy yaj'ǎccǎipy Pablo. 13 Nihuixchiguǎpx naxy anajty yǎdyǎjctǎjic huǎdi ajcxy jadu'n naygapxi. 14 Chi ajcxy ninǎcxy je teedy ajcxy huǎdibi mǎitungmǎid etz judǎo mǎj'anǎctǎjic, nǎmay ajcxy:

—ǎich ajcxy ti ngapxycǎdujccixy co ca' ngayǎangixyich n'ǎgǎangixyich ixti cooni ǎich ajcxy nyaj'ǎcip Pablo. 15 Jadachambi miich ajcxy, etz jacjadyii ixpicytǎjic mǎj'anǎctǎjic nidungǎygixy ma je soldado huǎdzǎn, co huen jabom yajminyii Pablo jadǔgtecy ma miich ajcxy. E aanǎdaaccixy co jacyajxon yajtydunañ, e ni'ixǎ ǎich ajcxy anajty n'ǎjtcixy co Pablo nyaj'ǎgǎbich ca'ni anajty yǎty ma naymujctac.

16 Pablo chi' ymang nejhuǎy nej je' anajty ti ñaygǎpxǎgixy, chi ñǎcxy ma cuartel oy Pablo yajnimǎy. 17 Huin'it Pablo yaaxi tǔg soldado huǎdzǎn, e chi nǎmay:

—Yajnicx jada yeeg'anäg ma je comandante, ymïd yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmïdminipyich jada yeeg'anäg, ymïd yi' ayuc huïdi ñigapxaamy ma miich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíojäy ajcxy ti ñaygápxigixy co xyñimähuaangixy co jabom Pablo myajnicxipy jim ma ñayyöymugáanigixy, y'aanïdägaangixy co jacyajxon tïydunaangixy. ²¹ Ca' miich yi' mmibigipy; com nihuixchiguïpx naxy yëdijctijc jim yi' ajcxy ahuixy yüch. Ti capxycödujccixy co ca' ajcxy ycaya'ñ y'üga'ñ ixti cooni ajcxy yaj'ögipy je Pablo. Jadachambi ni'ixi jim y'ijtcixy, jëyi miich m'ayuc ajcxy xyjamidohuaani, pen mni'adzooyb.

²² Chi je comandante ycapxycijxy mïd je yeeg'anäg. Chi nimay co ca' huaad ymïydägy mïd jacpinjaty jadu'n nej anajty ti ymïydaaccixy.

Yajnicxy ajcxy Pablo ma je gobernador Félix

²³ Chi je comandante yaaxi metz capitán moy cötújcïn huen nayñi'ixiigixy nimejtzmigo'px soldado huïdi nicxip tegyi'm, etz tugi'pxmajc huïdi nicxip cohuaaygixy, etz mejtz migo'px quipyjijpxu'ñmïdpi, huen nicxcixy jim Cesarea mijcoodz. ²⁴ Nañ ni'ane'mdïy co huen cohuaay ni'ixi pidägyii huïdi Pablo yaj'ïñahuipy, e moy cötújcïn co huen oy yajxon ajcxy Pablo yajjadipy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ “Hich comandante, Claudio Lisias, cham nguejxyich jada necy ma miich, mijpi gobernador Félix, e nguejxyich capxpoocxin. ²⁷ Je judíojäy ajcxy ti anajty majtcixy jadayaabi yëdijc, yaj'ögamy anajty ajcxy co ñich oy nejhuïy co je' yromanojäyity, chi nninicxich mïd soldadtijc etz nnihuaañich. ²⁸ Co ñich ooy anajty nejhuïhua'ñich ti anajty co ti xigixy, chi nyajnicxich ma anajty ajcxy tungmïdpi etz mij'anäctijc ti ñayyöymüjicigixy. ²⁹ Hue' anajty yi' ycixpi ti yajxiy co anajty ti ytundigooy ma yi' ajcxy ycötújcïn. Ca' anajty ytiy'ájtity co yaj'öccixipy, e ni ca' huaad ymach'ïñäy. ³⁰ Co ñich oy nejhuïy co yi' judíojäy anajty ti nihuinmayiygixy co yaj'ögaangixy, cham ñich miich yi' nyajnigüexy. E ti ñich nañ jadu'n nimay huïdi ti yxiyii huen nicxcixy ma miich, e jëbi ajcxy jim nigapxy ti ycixpi co midzip'ajtcixy. Ji naybaatim.”

³¹ Je soldadtijc nej anajty ti ycötújcïn möyii tim huin'ítity mïd tzooñ je Pablo mijcoodz ixti yajja'ty ajcxy Antípatris. ³² Je soldadtijc huïdi ajcxy tegyi'm nicxp, com jabom huimbíjtcixni, chi yjá'tcixni ma cuartel. E je soldadtijc cohuaaygixpi jacnicxy je' ajcxy mïd Pablo. ³³ Co je' ajcxy yja'ty jim Cesarea, chi ajcxy je gobernador necy yajcïdigïy, chi ajcxy nañ jadu'n yajquëxigy je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhuïy co yCiliciajäyity, ³⁵ chi nimay:

—Jiini nejhuïhuibich je tïy'ajt co anajty miingixy huïdi ti xyxigixy.

Huin'it ni'ane'mdïy co huen cuend'adyii ma je Herodes ymïjtijc.

24

Pablo ñaygohua'ñyii ma je gobernador Félix yhuinduu

¹ Co migoox xii Ananías je teedy ajcxy ymïjtungmïdpi yja'ty jim Cesarea mïd judío mij'anäctijc ajcxy etz mïd tüg huingapxpi huïdi anajty yxii Tértulo,

chi ajcxy ñayguëxíci ma gobernador co xihuaangixy Pablo. ² Co ajcxy Pablo yajmiñ, chi Tértulo ytigüy xibi, nimay Félix:

—Miid miich ycixpi jotcuje je naaxcayp y'ijty, ca' ma tzip, je' co yaxon m'ane'mdäy miid oyhuinma'ñ. ³ Tüg'óciy ñch ajcxy njäygidacpyich hueñyma'ámyity, miich migtungmüdpí Félix. ⁴ Ca'ydi mdiempo nyajtigooyi mij, tun may'ajt amido'íjtigich n'ayuc tüg jaxígyi. ⁵ Com ti nnejhuüygixich co jada Pablo, ooy ayo'n yecy hueñytimma'ámyity. Xi ya judíojäy tzach pijc-huäcxy miid y'ayuc huidi ymiid. Yi' je' nigohuajc'ajtp tüg pícy jäy huidi jäy ytipty Nazaret jäy. ⁶ Com tundigoy ma ñch ajcxy nDios ytijc nej ca' ypadyii, chi ñch ajcxy nmajch, e chi ñch ajcxy njatydunaañich jadu'n nej ñch ajcxy ngötújcín y'ane'my. ⁷ Per je comandante Lisias je' yajtigüy mictägy, chi ñch ajcxy xypijci jada Pablo. ⁸ E Lisias ymínañ co pinjaty anajty ti yxíyii huen miñ ma miich. Miich ci'm jébi myajtiy, e mnejhuühuip tüg'óciy je tiy'ajt jadu'n nej ñch ajcxy yi' ti nxíy.

⁹ E je judíojäy ajcxy huidi anajty jim gobernador yhuinduu, ac jadu'n ajcxy ymínaangixy co yjanchity jadu'n nej Tértulo ymína'ñ. ¹⁰ Huin'it je gobernador tiy'ajt moy Pablo cimiid co huen capxy, chi Pablo ymínañ:

—Janch jotcuje jébi nayñigapxtüdyiijich ma miich Félix, com nejhuüybich co miich migtungmüdpí ma jada naaxcayp cham xii jimijt ñicxni. ¹¹ Miich ci'm jéb mnejhuüy je tiy'ajt, jéyi anajty ñimajcmetzxiiy maabi anajty nbättigüyich jim Jerusalén Dios ojadajtpi. ¹² Ca' ñch yi' ajcxy xypaty ndzipcapxy n'ahua'ngapxyich miid pinjaty. E ni ñch ngajäy'axiigüy ngajäy'agapxiy ma Dios ytijc, etz ni ma naymujctac etz ni ma Jerusalén cayp. ¹³ Jada jäy ajcxy ca' ajcxy miidity pinjaty tiy'ajt yegipy nej ñch yi' ajcxy yxíy. ¹⁴ Huidi janch ngapxypidzi-mybich ma miich jadu'n nej je tzinaayin, je jemybi ixpijcin huidibi yi' ajcxy ytipty ca' y'óyity, je' je' je' ixpijcin huidi ñch miid n'ojadajtpich Dios, je Dios huidi ñch ajcxy nmij'ap nmijteedy y'ojadajt. Nmibijcpiyich tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxiiybi ñecy. ¹⁵ Nañ nmibijcpich co Dios yajjugypigipy pinjaty ti y'ögy, tiibi oybi tuñ etz tiibi jibicpi tuñ. ¹⁶ Paady ycixpi naymijottigoyiijich co njothuinma'ñich huädz ooy nmüd'idipyich ma Dios etz ma jäy.

¹⁷ Canaag jimijt ñch anajty ti nhuidityich huingduum, chi nhuimbijtyich ma ñch ngajp limosna cuejtp etz nhuindzigihua'ñich anajty Dios. ¹⁸ Jadu'n ñch anajty nduñ co nijéjty judíojäy xypatyich ma Dios ytijc huidi anajty tzoomb Asia ñaaxjot. Ti anajty naybocyñihuächyijich, ti anajty nguyduñich costum-bre, ca' anajty mayjäy pin yhua'ñ yjihuüy. ¹⁹ Je jäy ajcxy huidi xy'ixxyich ma Dios ytijc, je' ajcxy ixypy ti ymiingixy ya tiy'ajt yejcp. ²⁰ Co ca' ajcxy ti miñ, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xtyiduñich ma judío jäy tungmüdpí etz huinmij'anäctijc ajcxy ñaymujci. ²¹ Jéyi co ñch mic ngapxyich juntijoty, chi nmínaañich: “Xtyidumbich miich ajcxy cham miid co nmibicyich co Dios yajjugypigipy pinjaty ti y'o'cy.”

²² Co Félix jadu'n midodaay, com ñejhuüydaayb anajty nej tüyöy je mibijcpidijc y'ayuc yhuinma'ñ, chi capxhu'my je ayuc, nimay ajcxy:

—Co anajty miñ je comandante Lisias, huin'it njacnejhuüydähuibich nyajtydigihuibich miich ajcxy m'ayuc.

²³ Huin'it Félix ane'mdüy je capitán co huen yajcuend'aty yi Pablo, e huen a'ixihuip co pidzim tibiñ tibäy e pen ji ymigügtijc miñ co'ixihuañyii, huen möyii huidi yajmayjajtpy.

²⁴ Ti anajty xii ñajtninixiiyñi co Félix jadüg'oc miñ miid ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miñ

müdmüydägyii nej jäy mibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jiini jäy tiyduna'ñ tüg'óciy, chi Félix ñay'adzigiyyi, yminañ:

—Nícx miich jadachambi, co ñich anajty xyñibadíyigixy huin'it nícxny nya-jhuooyii.

²⁶ Nañ jadu'n Félix y'ahuijxpy anajty mina Pablo y'ocmeeñmöyüii, e huin'it anajty najtzmazihua'ñ. Paady anajty janam jadojcx nícxny yajhuooyii, e müd müydägy anajty. ²⁷ Mejtz jimijt jadu'n yajty, huin'it Félix ygobernadorbidziny. Chi Porcio Festo ygobernadortigüy ma Félix anajty ytuñ. Co Félix anajty nayyajhui'mañyüü ooy müd je judíojäy ajcxy, paady ixmajch Pablo mach.

25

Pablo ma Festo yhuinduu

¹ Jadu'n yajty co Festo anajty ti ygobernador tigüy, chi codugüig xii choñ Cesarea, ypättigüy Jerusalén. ² E jim Jerusalén je teedy müjtungmüdpü etz nijëjity huinmij'anäctijc jactimxüy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nícxañ janch tim tzojcx jim. ⁵ Chi ajcxy nimay:

—Jëbi nijëjity miich ajcxy mdungmüdpüdjc etz huinmij'anäctijc quipxy nícxibich müd ñich. Pen ti je Pablo ytundügooy jëbi miich ajcxy mxüy jim Cesarea.

⁶ Festo jëyi jim y'ijty tuctujc xii taxtujc xii Jerusalén, chi yhuimbijtni Cesarea. Com jabom nícxny ma tiydundac, huin'it capxyñiguejxy Pablo co huen yajminyü. ⁷ Co Pablo ytigüy ma tiydundac, chi mic'amy je judíojäy ajcxy yjübigüydäy huüdi anajty ti choongixy jim Jerusalén. Chi ajcxy oyxüy Pablo co mij anajty ti ytundügooy. E ca' ni ti tiy'ajt ajcxy müguëxügy. ⁸ Chi Pablo ñaygogapxi yminañ:

—Ñich ca' ni ti ndundügooyich, ni ngamidundügooyich yí judío jäy ycötüjcin, etz ni ngamidundügooyich Dios ytijc, etz ni ngamidundügooyich je mij'ane'mbi jim Roma.

⁹ Co Festo anajty jatytimayajcömaya'ñ ma judíojäy ajcxy, chi y'amüdooy Pablo:

—¿Nej mnícxam jim Jerusalén, jigix jim ndüydunüpiy?

¹⁰ Chi Pablo y'adzooy:

—Cha ñich cham ma je cötujctac huüdi je romano codung y'ane'myb e ma jëbi yajtyduñich. Yajxon miich mnejhuüy co ca' ti ti ndundügooyich ma yí judíojäy ajcxy. ¹¹ Pen ti ndundügooyich huüdi jëbi co'ögüyich, ca' nminá'nibich co ñich ca' n'öga'ñ. Pen ca' ji ni ti tiy'ajt jadu'n nej yí' ajcxy ti xyxüyich, ni pin cötüjcin camüdüty nícxny xycüyecyich ma yí' ajcxy. Ñich nbijctzoy co nyajtyduñich ma César, je emperador, jim Roma.

¹² Co Festo capxyöyday müd ymidungmüdpü, chi nimay Pablo:

—Pen miich jadu'n minamb co jim nícxny myajtyduna'ñ ma je César ycötujctac, nguexüpyich miich jim. Miich ti mbijctzoy co je emperador xtyyduna'ñ. Pis jim mnícxüpy miich.

Pablo ma je rey Agripa yhuinduu

¹³ Chi yí xii tiempo ñajtnüñicxüyñi co je rey Agripa etz Berenice ycidacy Cesarea, cogapxihua'ñ anajty Festo. ¹⁴ Co ajcxy jim yhuäcxijpy canaag xii, chi Festo yajmüdmüydacy je rey Agripa je Pablo ayo'n, e nimay:

—Ji tög yëydijc huïdi Félix y'ixmajtz mach. ¹⁵ Co n'oyich jim Jerusalén, chi je teedy mijtungmüdpï etz judío mij'anäctijc xymixiyich, nibijctzohuïy co Pablo nyaj'ögibich. ¹⁶ Chi n'adzooyich co romanojây ca' cötújcïn jadu'n müdity nicxy yaj'ögy yi machyjây ma ca'ni ñayhuindináayigixy müd je huïdi müd ñayxiyii, jigix ñaygogapxiyb nej anajty ti yxiyii. ¹⁷ Paady co je judíojäy ajcxy y'oy ya ca' nigoob tiempo nyajtigooyich com jabom nnicxich ma ngötujctaacich, e nni'ane'mdüyich co huen yajmiñyii je Pablo. ¹⁸ Co ajcxy ñayguëxi'ci, je huïdi anajty ti xiy, ca' jac ni ti ayuc anajty ajcxy müdity jadu'n nej ich anajty ti ndijyich. ¹⁹ Jëyi janchtiy co jadu'n anajty ymïnaangixy co Pablo ti ytundigooy ma yi' ajcxy ycostumbre huinma'ñ, etz Pablo capxhuäcxy co je Jesús huïdi o'c, juugyñi je'. ²⁰ Com ich ca' nnejhuïy nej ndunipich müd jada jadu'mbi huinma'ñ, chi n'amidooyich Pablo, pen nicxam anajty Jerusalén, jigix jim ngatidyduñich müd jada yaabi ycixpi. ²¹ Pablo ci'm mïnañ co nigi oy yajtydunipy jim ma je emperador huïdi ane'm jim Roma. Chi nni'ane'mdüyich co huen jacmach'iñây, ixti cooni nguexipyich jim Roma ma César.

²² Chi je rey Agripa ymïnañ:

—Nañ ooy ich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³ Com jabom miiñ Agripa etz Berenice müd mayjäy etz xuuxpidijc, chi ytiy ayjcxxy ma tydudac müd je soldado huindzin ajcxy, etz huinmij'anäctijc. Chi Festo capxyñiguejxy co huen Pablo nicxy yajtzonyii.

²⁴ Chi Festo ymïnañ:

—Rey Agripa, etz tög'óciy mij'anäctijc huindzindijc huïdi ya ti mnayyöymújcigixy müd ich ajcxy, cha je' je yëydijc huïdi oy yi judíojäy ti yxiyii ma ich. Xymixiyich jim Jerusalén, e nañ ya Cesarea, e jatyimymïnaangixy co jëbi y'ögy. ²⁵ Ca' ti ti tundigooy, paady ca' huaad nyaj'ögyich. Com ti ci'm ñayñibijctzohuïyii co jim yajtyduna'ñ ma je emperador jim Roma, paady ti n'a'ixiyich co nguexañich. ²⁶ E com ca' ni ti ty'ajt nej nijayihuibich nhuindzinich, je emperador César, müd yi' ycixpi, paady nyajmiiñich ma miich ajcxy, etz tim jayijp ma miich mhuinduu, rey Agripa, jigix jëbi m'amidohuipy e nmüd'idipyich ti ii njáayibich. ²⁷ Ca' jadu'n y'óyity nicxy nguexyich tög machyjây jim ma je mij'ane'mbi e ca' ni ti ty'ajt müdity nej ti yxiyii.

26

Pablo nimiydägy nej anajty yjatyin ma je rey Agripa

¹ Chi je rey Agripa nimay Pablo:

—Jëbi ci'm mnayñimiydägyii.

Chi Pablo yujcxajy yci' e ytiy nayñigapxtuutip, ymïnañ:

² —Jotcujc nayjihuiyijich, co jëbi nmiydägyich ma miich, rey Agripa, jigix nayñigapxtüdüybich tög'óciy jadu'n nej judío jäy ti yxiyich. ³ Com miich mnejhuïyb yajxon nej judíojäy ajcxy yhuinma'ñ müdity, etz tijaty tzip yi' ajcxy ymüd, etz jadu'n nej yi' ajcxy y'ixpijcïn oy ñay'ijxquülpigixy.

Pablo nigapxy nej anajty chinäy ma anajty ca'ni yjothuimbity

⁴ Tög'óciy judíojäy ñejhuïyb nej ti ndzinäyich ma yi' ajcxy jim ma nnaaxjotich etz jim Jerusalén maabi nyeecpidzimyich. ⁵ E yi' ajcxy ñejhuïyb

nañ jadu'n, e jëbi nigapxcixy jadu'n nej ti nyujcyeecpi'atyich. Hue' naydi-jyijich anajty fariseojäy, je tügpicyi jäy huidi mictägy je judío jäy ycostumbre etz ycötújcín payöyip. ⁶ E jadachambi xtyiyduñich mïd co njjip'ixyich co Dios yajjugypiga'ñ yi jäy ajcxy tiibi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpicypí Israel ymang y'ap y'oc y'ahuijxpy mïna Dios cuyduna'ñ nej anajty ti yajnimäyii je' ajcxy ymij'ap ymijteedy. Paady ajcxy Dios ojadaty huindzigiy xim tzuum. Miich, rey Agripa, nmibicyich co Dios yajjugypigipy je jäy tiibi y'öccixy, paady ycixpi yi judíojäy yxiyich. ⁸ ¿Na'amy co ca' miich ajcxy mibiga'ñ co jëbi Dios yajjugypicy je tiibi ajcxy y'ögy?

Nej anajty Pablo jayjip'aty mibijcpidijc ixhuidity pahuidity

⁹ Jecyip ich hue' ndijyich oy nduñich co anajty ndzachmidzip'adyiijich je Jesús je Nazaretpi. ¹⁰ E jadu'n nduñich jim Jerusalén. Mïd je teedy mïtungmïdipi ycötújcín nbidaacich Jesús yjäy may pujxtigoty. E co ajcxy yaj'o'cy, nañ nigapxpejt ich co huen yaj'öccixy. ¹¹ E nnicxyich anajty majaty judío ñaymujctac jim ndzaachytuñich huidi ajcxy mïpidacp anajty Jesús, jigix ajcxy y'ixmadzipy je' ymibijcín co Jesús je' je' je Cristo. Nigi anajty nmijotmätcootyich ixti nbahuidijttacyich huingnaax huinggajp.

Pablo nimiydägy jadüg'oc nej yjothuimbijty

¹² Mïd yi jadu'mbi huinma'ñ nnicxyich anajty jim Damasco. Je teedy mïtungmïdipi anajty xyquejxpiich, e xymöyich anajty cötújcín. ¹³ E tü'am, señor rey, ich anajty nicxy, cujc xii anajty co n'ijxyich tügi tiicxin jacmic ca'ydi xii yticxin choon tzajpjoty, xyñigidacyich etz nañ jadu'n huidi anajty ajcxy xymïdnicxich. ¹⁴ Huin'it nidüg'óciy ich ajcxy ngidaday, e nmidooyich tüg ayuc xymigapxich mïd hebreo y'ayuc, xyñimäyich: “Saulo, Saulo, ¿nej co chach xypahuidijttägyich? Ci'm naysajtzaachiyii jadu'n nej huaj yuub co jipconeby huidi mïd ñumygyumyii.” ¹⁵ Huin'it n'adzooyich, nnimaayich: “¿Mbin miich Huindzin?” E je Huindzin xyñimaayich: “Ich je' Jesús je huidi miich mdzachpahuidijttacpy. ¹⁶ Pidig e tinaaygugi', com ti nnayguëxigiyiich ma miich jigix xymidunipyich etz mgodiy'ajt'adipy jadu'n nej cham ti nyajnimäy ti nyajnejhuüy, etz jadu'n nej jüni njacyaj'ixa'ñ njacyajnejhuühua'ñ. ¹⁷ Ich miich nnihuänip nyajtzögip ma yi judíojäy, etz nañ ma huidi ca' yjudíojäyity. Ich miich jim nguejxpy ma huidi ca' yjudíojäyity. ¹⁸ Nicx jim myajhuinjhuüygixy ich ndiy'ajt, huen ixmach ajcxy yi jibic-huinma'ñ e jadu'n ypidzimipy ajcxy ma je mujcu' y'ané'migixy, etz mïjnicxpedipy ajcxy Dios ytiy'ajt. Co ajcxy mibigipy mïpidägipy ich ndiy'ajt huin'it nmöhuibich tigiydac tzajpjoty ma yi oyjäydijc ity tiibi Dios yajpocyñihuächyii.”

Pablo cuyduñ nej anajty ti y'ijxmañiyin

¹⁹ Rey Agripa, jadu'n ti ngapxymidooyich huidi n'ijxich nmidoohuich tzoön tzajpjoty. ²⁰ Jayjip ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huidi ca' yjudíojäyity. Nyajnimäyigixyich huen jothuimbijtcixy, huen mibijccixy Dios y'ayuc ytiy'ajt, etz huen yajtungixy oyjot oyhuinma'ñ jigix ñiguëxigipy co ti yjothuimbijtcixy. ²¹ Mïd jada ycixpi xymajchich ajcxy je judíojäy ajcxy ma Dios ytiyc, e xyaj'ögängixyich anajty. ²² Mïd co Dios ti xypubety ti xypudigiyich cha nyajpaadyich juugy. Ngapxhuäcxych Dios y'ayuc ytiy'ajt ma tüg'óciy ayoobtjic etz ixpicytjic. Tüg'óciy huidi ngapxpyich je Dios y'ayucnajtzcapxiiybi jaay jecy'ajty, etz je Moisés nañ jadu'n jaay jecy'ajty co jadu'n ytuna'nyii yjada'nyii. ²³ Hue' yajmïna'ñ co je

Cristo copicy ayo'n tzaachypi yajnaxipy, e y'ögipy e huin'it jugypigipy, e je' je' je jayijp jäy huidi jugypigip co anajty ti y'ögy. E yajcapxhuäcxip je ayuc ytiy'ajt ma ñch ajcxy judíojäy, etz ma huidi ca' yjudíojäyity.

Pablo jahueeni cayajothuimbijty Agripa

²⁴ Co Pablo jadu'n ymínañ ma anajty ñayñügapxtüdyii, chi Festo mic mínañ:

—¡Mlocjñyb miich Pablo! Míid je ixpíjcín nīgi m'ahuimbity loci.

²⁵ Chi Pablo y'adzooy:

—Ca' ñch nlocijñy, miich mįjtungmįdipi Festo. Yi huidi ñch ngapxpyich je' je' tiy'ajtíp etz janchip. ²⁶ Yi rey Agripa ñejhuídaayb yi' tüg'óciy jada, paady nmįydägich aamic jotmic ma yi' yhuinduu; com nnejhuñybich co yi' ñejhuídaayb jada tüg'óciy, com canan hue' jada yajtuuñ yajmįydacy ayüchytuum. ²⁷ ¿Nej mmíbicipy, miich rey Agripa, jadu'n nej ajcxy ymínañ yi Dios y'ayuccojaaybi? Nnejhuñybich co miich mmíbicy.

²⁸ Chi je rey Agripa y'adzooy, ymínañ:

—Janch tím jayinjaty jahuenjaty miich xycayajmíbicyich Jesucristo.

²⁹ Chi Pablo ymínañ:

—Oy yjayinjaty yjahuenjatyity ooy mijcajee mgamíbicy, chojcpy Dios co miich mmíbicipy Jesucristo etz nañ jadu'n tüg'óciy jäy huidi cham xy'amídoo'ítíp ñch n'ayuc. Dios chojcpy co mmíbicipy Jesucristo jadu'n nej ñch nmíbicyich, jeyi janchtiy co ca' mmach'idipy jadu'n nej ñch nmach'ityich.

³⁰ Co je Pablo ymįydactay, chi je rey etz gobernador ytinayigy quipxyi mįid Berenice etz jacjadyii huidi anajty ajcxy jím. ³¹ Chi ajcxy ahuingujc oy capxyögyixy Pablo ypocy, ñayñímáayigixy miñ xyipy:

—Jada yéydijc ca' jada ti tundigoy, ca' ypadyii nicxy y'ögy, ni ca' ypadyii nicxy ymach'íñäy pujxtigoty.

³² Chi Agripa nimay Festo:

—Jëbi ixypy nnajtmadzñyim Pablo co ca' ci'm ycanayñibijctzohuiiyi co huen tiydunyii je emperador César jím Roma.

27

Pablo yajnicxi jím Roma

¹ Co ajcxy yajnihuinmayiyy co xyquexáangixyich jím Italia, chi Pablo yajciyejc mįid jacjadyii machyjäy ma tüg capitán huidi anajty yxñ Julio, je' huidi nihuindzin'ajtp tügpiy soldadtijc huidi anajty yxñ batallón Augusto.

² Chi ñch ajcxy ndigiy ma tüg barco huidi yhuindzin cogajpip jím Adramitio. Je barco hue' anajty ñicxañ ma nijëjity barco jättac jím Asia ñaaxjot. Chi ñch ajcxy ndzooni. Míid ñch anajty ajcxy Aristarco huidi anajty cogajpip Tesalónica jím Macedonia. ³ Com jabom ñch ajcxy nja'ty ma barco jättac jím Sidón. Jím je Julio pa'ayoy Pablo, e ahuaatzí ytu' co huen nicxy co'ixiy ymįgügtijc, etz huen je' ajcxy yajcayyii yaj'ügyii. ⁴ Co ñch ajcxy ndzooñ jím Sidón, chi je naax mejy'agujcpi yhuimni anajty'amy huidi yxñ Chipre, mįid co je poj anajty jįpcobojñy je barco. ⁵ Chi je barco huinyöyñajxy je Cilicia ñaaxjot etz Panfilia ñaaxjot, oy njädyich ajcxy jím Mira, tüg cajp jím Licia ñaaxjot.

⁶ Jím je capitán paty tüg Alejandría ybarco hue' anajty ñicxy jím Italia. Chi je capitán ñch ajcxy xyajbarcotigiiy. ⁷ Canaag xñ ñch nyöy janch oñdägy, adzaach ñch ajcxy nja'ty mihuingon je Gnido co anajty je poj tzach jįpcobojñy je barco. Najx ñch ajcxy mihuingon Salmón, etz njüyöy'ahuidijtyich ajcxy Creta je mejy'agujcpi naax. ⁸ Adzaach ñch ajcxy nja'ty ma barco jättac huidi anajty yxñ Buenos Puertos, mihuingon Lasea.

⁹ Ti ñich ajcxy ooy anajty nxñdigoy, e ooy anajty ycodzigijity je barco yajyöyñ. Ti anajty je ayuuxñ ñajxni, e ti mihuingon anajty je poj tuu tiempo huidi jäy ytijpy invierno. Paady Pablo je soldado huindzin jaccapxhuijy, ¹⁰ chi Pablo yminañ:

—Huindzindijc, jadu'n nej yam codzigi' jada ooy co njacnicxim barcojoty, ca' yjeyity co nicxy ndigooyim mñid barco etz mñid ñidzimy etz n'o'ctaayim.

¹¹ E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'öyity, nicxy jim yajnajxcixy je poj tuu tiempo, chi je jacmaybi ajcxy yhuinma'ñypidacy, co jëbi barco yjacyöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huidi y'aguu najtz'ixñyb ma xñ pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejy

¹³ Jadu'n yajty co je jinboj hueeni ypidzimy, huin'it huinmay ajcxy co jëbi yjactüyöy je barco. Chi ajcxy yajpidigy je mij pujx huidi barco yajtinayxijp, e yajyöychooñ je barco. Chi ñicxy je barco mejypa' mejypa' ma Creta ñaaxjot.

¹⁴ Huin'it hueeni tiempo ñajx, chi je micpoj miiñ ma tñchpoj pidzimy, huidi jäy ytijpy Euroclidón, jadu'n yhuimbizim, Noreste. ¹⁵ Chi je mic poj yajtütigajch je barco, e com ca' anajty ndimdüyögixni mñid je poj ycixpi, chi je mic poj ñich ajcxy xyajnicxy adzip ma anajty tzocy. ¹⁶ Najx ñich ajcxy mihuingon tüg naax mutzpi mejy agujcpi huidi yxñ Claudia, e adzaach ñich ajcxy nyujcjugujcy je mutz barco huidi anajty miimb ixrodzñy ma je mijpi. ¹⁷ Co ajcxy jugujcpi dzimy je mutz barco, chi ajcxy yajtuuñ maychaay e xojtzmuicy je barco aguu. Chi ajcxy yajminajcy je huit huidi anajty poj mic tzach ymajchyp. Je' co chigñygixy co chimnicñiyb je barco jim ma mejy huidi ca' y'agomity, ma pñjot huidi yxñ Sirte. Chi ajcxy ñayyejci huen poj yajnicxigixy. ¹⁸ Com jabom, com ooy mic anajty je poj, chi ajcxy je chimy mejy cöjibijptaayi. ¹⁹ Je midugñg xñibi, chi ñich ajcxy nmejycöjibijptay je tungbejt huidi yajtumyb ma je barco. ²⁰ Ti anajty canaagxñ ñajxni e ñich ajcxy ca' ma xñ madza' n'oc'ijxcixni, mñid je mij poj ycixpi huidi anajty ñich ajcxy xychachyajtüyöyp. Hue' ñich ajcxy ndijcixy co ti ndigóoygixyich, ca' ndijy ñich ajcxy ndzögipy.

²¹ Ti anajty xñ tiempo ñich ajcxy nyajnajxcixy jaygay, chi Pablo ytinayñgy, nimay je jäy ajcxy:

—Yëydijctijc, co ñich miich ajcxy xycacapxymidooy ca' ngatzoönim jim Creta ñaaxjot, e ca' ixypy jada ayo'n yam jadu'n nbaatim. ²² Jadachambi ca' mdajcixy mmaygixy, ca' ni pin ytigoya'ñ, oy je barco yjatigoy. ²³ Amygoodz je nHuindzin Dios tüg y'ángel ti ñayguëxigiyi ma ñich, je Dios huidi ñich ngapxymidooybich, yi' ti quexy. ²⁴ Je ángel ti xyñimäyich: “Ca' mdzigñy, Pablo, copicy co mjatyjädipy ma je mij'ane'mbi, je César yhuinduu. Mñid miich ycixpi, Dios ñihuänamy yajtzögamy tüg'óciy huidi ji barcojoty, ca' ni tüg y'ögipy.”

²⁵ Paady nayjot'amijmóoyigix, yëydijctijc, nmibijcpiych Dios co jadu'n yjada'ñ jadu'n nej yi' y'ángel ti xyñimäyich. ²⁶ Ooy ycopicyity nicxy nmijpojpejtñ ma tüg naax mejy agujcpi.

²⁷ Majmactz xñ je mic poj anajty yajyöyii je barco oyñinej jim ma je mejy huidi yxñ Adria, chi mijcutz je barco yajyöybi jihui'ñybicy co anajty ti mihuingoñ naax. ²⁸ Chi ajcxy quipxy je ññ jadu'ñi anajty ycicyity, e hue' ajcxy quipxy iipx xap ycicyity. Jahuengi huin'it jadüg'oc ajcxy quipxy je ññ, e hue' oy quipxcixy majmocx xap ycicyity. ²⁹ E co anajty chigñygixy co tijy je barco jipcobonñhuipy ma tzaagop, chi ajcxy pidacy ñijoty mñdaax pujx ma barco y'ijx, je huidi yxñijp anclas, janch tzigñyb anajty ajcxy y'ahuijxcixy

cooní ximihuiipy. ³⁰ Chi je' ajcxy huídi anajty barco yajyöyp yhuinma'ñybaty co yquëga'ñ ameech. Chi ajcxy pidacy nihuingíxy je mutz barco. Chi ajcxy ñaybidaaci jadu'n nej jihuíy je ancla jac yajminagaangíxy jim ma barco yhuinduu. ³¹ Huin'it Pablo ñimay je soldado huindzin etz je soldadtijc:

—Pen ca' jada hui'mgíxy ma barco, ca' miich ajcxy mejy ypidzimípy.

³² Huin'it ajcxy tzujctujcy je tzaay huídi je mutz barco anajty miid ycoxochity, chi ajcxy yajcäy je mutz barco niijoty, e chi je mejy yajnicxyi.

³³ Moñyi Pablo migapxy je jäy ajcxy, chi ajcxy ñimay co huen huin-gayñajxcíxy, chi Pablo ymínañ:

—Cham majmactz xii ma miich ajcxy ca' mmaagíxy, e ni ca' mgaaygíxy m'uuccíxy. ³⁴ Tun may'ajt caaygíxy oy jadu'ñyi, copicy jada co njatyñidzooctähuaanim, ni tüg ngöhuay ca' ytigoyaanim.

³⁵ Co Pablo jadu'n yminanday, chi tüg tzajcaagy conígy, chi jayijp Dioscojuyip yajnaxxy mayjäy agujc, chi tujc-huäcxy etz ytigíy ajcxy caaybi.

³⁶ Mic'amy je jäy ajcxy yjotmigíyday nidüg'óciy, e chi ajcxy ytigíy caaybi.

³⁷ Hue' anajty ñaybaatigíxy barcojoty mejtz migo'px jatugi'px majmocxtüg jäy.

³⁸ Co ajcxy ycayday, chi jacnigöjibijpy je trigo, jigix huen cöminacy je barco chimy.

Chi barco tüg yquiñ

³⁹ Co yximíy, chi je barco yajyöybi ca' ijxcapy je naax, e y'ijxpaty tüg it ma mejy huen ycoguegíy, e jim anajty püjot. Chi ajcxy yhuinma'ñybaty co'ixaangíxy pen jébi jim yjäty je barco. ⁴⁰ Chi ajcxy tzujctujcy je tzaay huídi anajty miid yxochity je anclas, e chi anclas yhuimni niijoty, huin'it ajcxy miguejy je ñigaap huídi tumb co tümöy je barco. Chi huit jadüg'oc ajcxy pidacy huídibi pojmajtzp. Chi je barco ytigíy yöyb, tñy ajcxy yajnicxy ma püjot. ⁴¹ E chi oy minaybadyii ma anajty je mejy mejtz it oy mic ycujiñ, chi oy yjépxy püjoty. Je barco jijp oy ytigíy tätzpcy ca' huaad y'ocyücxni, e je barco ijx oy ytigíyñ aguejthuäcxpi ymiid je mejy püjoty ymijaa. ⁴² Chi je soldado yjayaj'ögaañ je machyjäy ca'ydi yqueeccíxy ayaahuip. ⁴³ Je soldado huindzin ca' a'ixíy nicxy yaj'ögyii Pablo, chi ñimay soldado ajcxy co huen ixmajtzcíxy yi machyjäy. Chi je soldado huindzin ñimay je jäy ajcxy co huen niidigíygyxy pinjaty jajtp yau. ⁴⁴ E huídi ca' jajtcíxy yau jaydëbi niidigíygyxy miid pu'y etz miid barco pedasi. Jadu'n ajcxy nidüg'óciy ymejy ypidzimday.

28

Pablo yjädy ma tüg naax mejy'agujcpi huídibi yxii Malta

¹ Co ñch ajcxy niibidzimday, chi ñch ajcxy nejhuíy co je naax mejy agujcpi hue' anajty yxii Malta. ² Je conaax ajcxy ooy oyjäy'ajtin tuuñ miid ñch ajcxy, chi ajcxy yajmijy jñn mij, miid co anajty ooy ytichity, etz co anajty ooy ytuubojy. Chi xyñimay ñch ajcxy co miñ n'ocxáamgíxyich. ³ Chi Pablo ytigíy jäxycajpmujcpi, e chi pidacy jñnjoty. Chi tüg ahua'n iyujc pidzimy, yquëgy anajty miid je anbi, chi Pablo ymajtzi ma yci'. ⁴ Co je cogajp ajcxy ijxy je ahua'n iyujc ytñyñäy ma Pablo yci', chi ajcxy ñayñimaayi miñ xyipy:

—Jadayaabi yëydijc, jäy yaj'öcpí jada. Oy ca' ti y'ögy mejyjoty, je tiydumbi tzajpjoty ca' a'ixíy nicxy yjactzinäy.

⁵ Chi Pablo yci' huinxidicxy, e jñnjoty oy ycäy je ahua'n iyujc, e ca' Pablo ni nej yjajty. ⁶ E tüg'óciy je jäy tzach'ahuixcíxy mina anajty y'ocquixígy, o mina anajty y'oc'ögy. Ti anajty ooy y'ahuixcíxy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Ymínañ ajcxy co Pablo hue' jada' yi tüg dios.

⁷ E mihuingon anajty je Publio ytijc, je huidi nigohuajc'ajty je jimbi naax mejy'agujcpi. Je Publio xyajjättacich ajcxy, e xyajcaay xyaj'uucich ich ajcxy yajxon tugüg xii. ⁸ Jadu'n yjajti co je Publio anajty yteedy ypiigyii miid tooy gohuajc etz miidity anajty ni'pypa'm. Chi Pablo oy icy je pa'mjäy. Chi Pablo Dios mibijctzoy, e chi cinixajy, e yajtzoocy. ⁹ Miid jadaay miñ ajcxy nijëjity pa'mjäy huidi anajty ajcxy tzinaayb ma je naax mejy'agujcpi e chi ajcxy chooctäy. ¹⁰ Miid jada ycipi nyajcömay ich ajcxy, e nyajmooyich ich ajcxy tijaty huidi ich ajcxy nidüyöyipy barcojoty.

Chi Pablo oy yjädy jim Roma

¹¹ Tugüg po' ich ajcxy anajty ti n'ijtni jim. Chi ich ajcxy nbarcotigiiy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymiid anajty ahuinax huidi anajty yxii Cástor etz Pólux huidi ajcxy dios'ajtpy. ¹² Chi ich ajcxy oy njäty ma je barco jättac huidi anajty yxii Siracusa. E jim ich ajcxy nhui'miiy tugüg xii. ¹³ Ndzoñich ajcxy Siracusa barcojoty, nicxy ich ajcxy mejypa' mejypa', ixti nja'tyich ajcxy jim Regio. Com jabom oy ypidzimy jinboj, chi co maax oy nja'ty ich ajcxy Puteoli. ¹⁴ E jim ich ajcxy nbaaty nijëjity jäy huidi anajty mijpidaacp Jesús. Je' ajcxy xycohuaniiyich co ich ajcxy jim huimipy tüg semaan. Chi ich ajcxy jadüg'oc ndzoñ, nnicxyich ajcxy jim Roma. ¹⁵ Je mibijcpidijc ajcxy huidi anajty jim Roma ymidou ajcxy ayuc co ich anajty ajcxy jim nicxy, chi ajcxy chooñ nijëjity oy xyjijpcobadiyigixyich ma je cajp mercado miid huidi anajty yxii Foro de Apio. Jacjadyii mibijcpidijc oy xyjijpcobadiyich ma tüg jättac huidi anajty yxii, Tres Tabernas. Co Pablo jijpc'oixiiy je mibijcpidijc ajcxy, chi Dioscojuyip yajnaxy etz ñayjihuiy janch jotcujc. ¹⁶ Co ich ajcxy nja'ty jim Roma, chi je soldado huindzin cäyeycy je machyjäy ma je comandante, per a'ixiiy co Pablo tzinäy ahuingujc ma tüg pijctzoydijc, jëyi anajty tüg soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugüg xii maabi Pablo anajty yjäty jim Roma co capxyñiguejxy je judío huinmij'anäctijc huidi anajty ajcxy tzinaayb jim Roma. E co ajcxy ñaymujci, chi Pablo ymiñañ:

—Migügtijc ajcxy, oy ich ca' ti ndundigooyich miidi judío jäy ajcxy etz miid ajt nmij'ap nmijteedy ycötújcin, chi je judíojäy ajcxy xymajchich etz xyciyejcich ma romano tungmüdpí jim Jerusalén. ¹⁸ Co je romano tungmüdpí ajcxy xy'amidooyich, huin'it ajcxy xyjanajtzmadzihuaañich, ca' ti ajcxy paaty ma ich huidi ajcxy xyajco'ögihuibich. ¹⁹ Co je judíojäy yjotmätcoty ajcxy, ca' ajcxy a'ixiy co nyajnajtzmadzihuibich, chi nayñibijctzohuiyich co nyajtiydunipyich ma je mij'ane'mbi ya Roma, oy ich ca' ti xihuin nmidity miid ich nmigonaax nmigogajpich. ²⁰ Paady ti ngapxyñiguejxcixy co nyajmüdmüydäga'ñ ajcxy tigix co nmach'ityich. Miid co ich ajt n'ahuijxim co Dios nihuäna'ñ yajnüzöga'ñ yi Israel jäy etz yajjugypiga'ñ je jäy tiibi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ich ajcxy ni ti necy xyñijäty huidi tzoomb jim Judea miid miich ycipi. E ni tüg ajt nmigügtijc ca' jibic xyñimüydägy. ²² Nja'amido'idaamyich jadu'n nej miich mmiydägy, com nnejhuiybich co huen yma'amyity jäy ymidzip'ajty je jemybi y'ijxpjcin.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac miidity. Jopy ajcxy yajtzondacy capxi müydägi ixti ycootztzuu'iiy, jadu'n Pablo tzachyajnimaaygixy je Dios

y'ayuc nej Dios yhuinma'ñ miidity. E yajjothuimbidaangixy anajty ma je Jesús miid co capxticxy je Moisés ycötujcïn nej anajty yjaybetyity, etz jacjadyii ayuc cojaaybi ñecy. ²⁴ Nijëjity cöbije ajcxy nej Pablo anajty ymina'ñ, etz nijëjity ca' ajcxy mibijcy. ²⁵ Co ca' anajty ajcxy miñ xyipy yajtügüy yhuinma'ñ, chi ajcxy icy ca'ixy yöychóngixni. Chi Pablo ymina'ñ:

—Tiytudägy je Espíritu Santo nimay je nmij'ap nmijteedy ajt co yajcapxy je profeta Isaías co ymina'ñ:

²⁶ Nicx nima' je jäy ajcxy: Miich ajcxy oy mjamidohuipy n'ayucich, per ca' ajcxy mhujñihuip; oy mjahuindüxcixipy, e ca' ajcxy mhujñihuipy.

²⁷ Com jada jäy ajcxy hue' yjot'ahuimbijtcixy janch juuñ, e ymidoogixy oyñinej, jadu'n nej juhuy yhuimbiz'ijtcixy, e ni ca' y'oc'ijxcixy miid yhuin e ni ca' ocmidoogixy miid yta'tz'ac, ni ca' huinjihuüygixy miid yjot yhuinma'ñ, ni ca' minipy ajcxy ma ich jigix myajtzögibich.

²⁸ Nejhuüygixy miich ajcxy co jadachambi etz jacnicxpi xii tiempo Dios y'ahuanüyb y'ayuc ytiy'ajt nej jëbi jäy y'alma ajcxy yajnizögipy ma je jäy ajcxy huidi ca' yjudiojäyity, e je' ajcxy y'amido'idipy.

²⁹ Co Pablo jadu'n nimay ajcxy, chi ajcxy ñicxtáaygixni chach ñayhuin'ibéjtigixy ñayhuingapxpéjtigixy miñ xyipy.

³⁰ Pablo mejtz jimijt jim chinay ma je pijctzoydijc jim Roma, e yajxon xiic'adzoy capx'adzoy pin miñ ycogapxiyü. ³¹ Janch agujc jotcuje anajty capxhuäcxy je Dios y'ané'min, e yaj'ixpicy je Huindzin Jesús ytiy'ajt, e ni pin ma ycapx'adugyü.

ROMANOS

Yi Necy Huidi San Pablo Yajniejx Je Mibijcpidijc Jim Roma

¹ Hich Pablo tumbich ma Jesucristo ytung. Jesucristo ti xyajñibicyich co nduna'ñich ma yi' ytung quipxy müd yi' y'apóstol ajcxy. Ti xypidägyich ma jada tung tügijp co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucnajtzcapxhiybi ñecy co quexa'ñ anajty je Cristo ya naaxhuiñ. ³ Ngapxhuäcxich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinicx paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yihui'ñ ymic'ajt. Co Dios yajjugypijcy y'ung ma anajty ti y'ögy müd yihui'ñ ymic'ajt, chi ti yajnejhuüy anajty je naaxhuiñyäj co Jesucristo hue' je' Dios y'ung, huidibi müd huädz yjot huädz yhuinma'ñ, etz nañ ymüd Dios yihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ müd ñch ajt ycixpi. E nañ müd Jesucristo ycixpi Dios ti xyajñibicyich co ngapxhuäcxibich yi' y'ayuc ytiy'ajt ma yi' mayjäy ajcxy ma tüg'öciy naax cajp, jigix jëbi mayjäy mibijccixy e nañ capxymidoogixy Jesucristo. ⁶ E müch ajcxy huidibi tzinaayb jim ma yi' cajp huidibi xijip Roma, nañ jadu'n Dios müch ajcxy ti xyhuin'ijxcixy jëbi ajcxy Jesucristo xyjäy'adyii.

⁷ Jada necy nguejxypich ma müch ajcxy nidüg'öciy huidibi jim yajpatcixp ma yi' cajp huidibi xijip Roma. Dios müch xychojccixp xyjihuiyigixp, e nañ Dios ti xyhuin'ijxcixy jaydëbi yi' xyjäy'adyii, etz nañ jaydëbi mdzinaaygixy müd huädz mjot huädz mhuinma'ñ. Huen ñch ajt nDios Teedy etz ajt nHuindzin Jesucristo may'ajt oy'ajt tunipy müd müch ajcxy etz nañ xyajjotcugihuiip ajcxy.

Pablo nicxy mibijcpidijc cogapxihua'ñ jim Roma

⁸ Tim jayijp nyajnajxpich jäydaacin ma Dios, müd Jesucristo yxi, co müch ajcxy ti mmibijccixy Jesucristo. Mayjäy ma nidüg'öciy naax cajp ti nejhuüyigixy jadu'n nej müch ajcxy ti mmijpidaaccixy Jesucristo. ⁹ Hich tumbich cixyjot huinijot ma Dios ytung, co ngapxhuäcxich Dios y'ayuc ytiy'ajt müd Jesucristo ycixpi. Dios yi' tiy'ajt yegip jadu'n nej jabom jabom Dios nmibijctzooyich müd müch ajcxy ycixpi. ¹⁰ Dios nmibijctzooyibich pen yi' jadu'n tzojcp co jëbi ñicxyich cham tiempo jim ma müch ajcxy myajpaady. Canaag'oc ñch müch ajcxy nicxy nja'ixaangixy, e ca' y'oyiy nej ñicxibich. ¹¹ Ooy njanijot'atyich co ñch müch ajcxy nicxy n'ixaangixy, jaydëbi ngapxhuäcxibich Dios y'ayuc ma müch ajcxy müd Dios yihui'ñ ymic'ajt, e nañ ngapxhuäcxibich Dios y'ayuc ma müch ajcxy jaydëbi tiydudägy mmibigipy ajcxy Jesucristo. ¹² Pen oyhiyb nej ñicxibich ma müch ajcxy myajpaady, chi jëbi njotcugihuiyich co anajty n'ixyich nej müch ajcxy mibijccixy Jesucristo, e nañ jaydëbi njotcugihuiipy müch ajcxy co anajty m'ijxcixy nej ñch nmibicyich Jesucristo, e jadu'n naysajjotcugihuyim miñ xyipy.

¹³ Ndzojcpich co müch ajcxy mnejhuihuiipy co canaag'oc ti njapidägyich nhuinma'ñich co anajty ñicxa'ñich ma müch ajcxy myajpaady, e ca' y'oyiy nej ñicxibich. Njijp'ijxypich co oyihuiip jadachambi tiempo jadu'n nej jëbi ñicxibich jim ma müch ajcxy. Com njacyaj'ixpigaamybich müch ajcxy, e nañ njacyajmibigaamybich ajcxy Dios y'ayuc. Tim jadu'n nej nduñich canaag agajp ma chinaaygixy yi' jacjadyii jäy huidibi ajcxy ca' yjudíojäyity. ¹⁴ Dios

jadu'n xyajñibijcìch jada tung, paady copicy co ngapxhuäcxibìch yì' y'ayuc ma tüg'óciy jäy, etz majaty naax cajp. Ngapxhuäcxamybìch Dios y'ayuc ma yì jäy ajcxy huìdibì griego ayuc cápxcìxp, etz ñan ma yì jäy ajcxy huìdibì ca' griego y'ayuc capxcìxy. Ngapxhuäcxamybìch Dios y'ayuc ma yì ixpìcy jäy ajcxy, etz nañ ma yì jäy ajcxy huìdibì ca' y'ixpìcyìty. ¹⁵ Paady ycìxpi ooy ndzachcapxhuäcxa'ñìch Dios y'ayuc ma miich ajcxy huìdibì yajpatp jim Roma nañ jadu'n.

Je ayuc tìy'ajt oybi

¹⁶ Ca' nmìdzo'yduñyijcìch Cristo y'ayuc ytiy'ajt. Com je' jada je oybi ayuc huìdibì tzoon ma Dios, ymìd yì' Dios ymic'ajt jigìx jèbì tüg'óciy jäy ajcxy paadìpy pocy huinmèecxìn, pìnjaty còbigaamb Cristo y'ayuc. Tìm jayìjp tì ngapxhuäcxy Jesucristo y'ayuc ytiy'ajt ma yì judíojäy ajcxy, e jac'axam ma yì huìdibì ajcxy ca' yjudíojäyìty. ¹⁷ Jesucristo ytiy'ajt xyajnejhuìyìim co nmìbijcìm co Cristo tì jòch ajt nbocy etz nxìhuìn, chì Dios xycòbigaanìm jadu'n nejjihuìy tudägyjäy. Ca' jì jadüg huinma'ñ nej Dios jèbì xycòbìjìcìm jadu'n nej jihuìy tudägyjäy. Com jadu'n jaybety y'ity ma Dios ñecy ma jadu'n ymìnañ: “Pìnjaty tudägy'ajtìn tì paady mìd co tì mìjpidägy Dios y'ayuc, hue' je' tzinähuip, ca' yjugy'ajtìn ycìxìpy ytigoyìpy.”

Je naaxhuiñyjäy ajcxy ypocy

¹⁸ Copìcy nbaatìm tudägy'ajtìn ma Dios, com je Dios huìdibì tzìnaayb tzajpjoty tì xyajnejhuìyìim co yì' tzaachytuna'ñ mìctägy tüg'óciy jäy ajcxy huìdibì mìdundìgooyb yì' ytiy'ajt, tüg'óciy huìdijaty jìbìc huinma'ñ ymìd, tüg'óciy yì' ajcxy huìdibì yajtìgooyb Dios ytiy'ajt mìd je jìbìcpi huìdibì ajcxy ytumyb. ¹⁹ Com yì jäy ajcxy huìdibì jìbìcìjot jìbìc-huinma'ñ mìd, y'ìjxpy ñejhuìyìyb ajcxy Dios ytiy'ajt, com Dios tì pidägy yì' ytiy'ajt ma yì' ajcxy yjot yhuinma'ñ. ²⁰ Ñejhuìyìyb jäy ajcxy Dios ytiy'ajt, com mabaad oga'n Dios yajcojy naaxhuiñybi ixtì chambaad, quèxìcp ya naaxhuiñ Dios ymic'ajt y'ìjxpejt, oy ca' pìn Dios ixy, huìdibì Dios tì cojy tì macxy yejcpy i'jxpejt co Dios yjìjìty, etz Dios ymic'ajt huinìxì huinìtiempo ijtp yì', ca' ycìxìpy ytigoyìpy nìmina. Co anajty Dios tzaachytuna'ñ yì' pocyjäy ajcxy, ca' ajcxy nì tì ayuc mìd huaad adzohuimbidìp Dios mìd ajcxy ypocy ycìxpi. ²¹ Com ñejhuìyìyb ajcxy co jì Dios yajpaady, e ca' ajcxy ojadajtcìxy ca' ajcxy huindzìgìyìgìxy Dios. E nañ nì ca' ajcxy yajnaxy Dioscojuyìp ma Dios. E nañ jadu'n ajcxy ñaybidáacìgìxy amìj agìx, yhuinma'ñ ixtaaygìxy huìdibì ca' ytiy'ajtìty. Yajtìgooyì ajcxy Dios ytiy'ajt ma ajcxy yjot yhuinma'ñ, e nañ mìd'ajtcìxy tzuuhuinma'ñ. ²² Yì jadu'mbì jäy ajcxy hue' yhuinma'ñ pìdaaccìxy co ajcxy ooy ycohuinma'ñìty, co ajcxy ooy y'ixpìcyìty, e ca' yjanchìty, tzuu huinma'ñ ajcxy ymìd. ²³ Ma yjapadyìi ojadajtcìxìpy huindzìgìyìgìxìpy Dios huìdibì ymic'ajtìn y'oy'ajtìn ca' ycìxìpy ytigoyìpy nìmina. Chì ajcxy yajtìgach yjot yhuinma'ñ, e huindzìgìyìgìxy jäy y'ahuìnax e jäy ajcxy yjugy'ajtìn etz y'oy'ajtìn cìxaamb tìgoyaamb. Ixtì mìjpidaccìxy nañ jadu'n joon y'ahuìnax, iyujc y'ahuìnax etz tza'ñ y'ahuìnax.

²⁴ Co jäy ajcxy jadu'n ytundìgoy, paady Dios ñajtz'ixìyìn ajcxy, huen tundìgooygìxy nej anajty cì'm jìbìchuinma'ñ nìjot'ajtcìxy. Ñaymìdundìgòoyìgìxy ñinìcx miñ xyìpy huìdibì janch oy mìdzo'yduunì. ²⁵ Ma yjapadyìi ixìpy mìjpidaccìxy je tìy'ajt tìydudägyì nej Dios tì yecy, huin'it ajcxy mìjpidaccìxy anì huìdijaty jäy tì cojy tì macxy. Ma yjapadyìi ixìpy huindzìgìyìgìxy Dios, huìdibì cì'm tì yajcojtäy tüg'óciy tìjaty jì yajpaatp, huin'it ajcxy huindzìgìyìgìxy jäy y'ahuìnax joon y'ahuìnax, etz iyujc y'ahuìnax huìdijaty ca' tì mìc'ajt mìdìty. Copìcy n'ojadajtìm ngömaayìm Dios huinìxì huinìtiempo. Amén.

²⁶ M̄id co jāy ajcxy tzachhuindziḡiiḡixy jāy y'ahuinax etz jactijaty ahuinax, paady ycixpi Dios ajcxy ñajtz'ixiyii, chi ajcxy tungixy yi jibic-huinma'ñ huidibi ci'm ñijot'ajtcixyp huidibi oy ymidzo'yduuni. Töxyjäy ajcxy ma yjapadyii chináaygixipy tudägy m̄id ñäy, chi ajcxy ñaym̄idtzináayigixy e ñaym̄idtungiḡooyigixy actöxyjäydijc. ²⁷ Yëydijctijc ajcxy nañ jadu'n ñaym̄idtungiḡooyigixy miñ xyipy. Ñaym̄iddzináayigixy ma yjapadyii iyxipy chinaaygixy m̄id töxyjäy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibic-huinma'ñ huidibi oymidzo'yduuni, ypátcixipy ma ajcxy ñin̄icx je tzaachypi huidibi Dios ypidacpy m̄id yi' ajcxy ypocy ycixpi.

²⁸ Co yi jāy ajcxy jadu'n ci'm yhuinma'ñ ti pidaaccixy co ca' yajmij'ada'ñ Dios, paady ycixpi Dios ñajtz'ixiyii ajcxy. Huen tim tungixy huidibi ajcxy ci'm ñijot'ajtpy, huidibi Dios ca' jäygidägy. ²⁹ Jāy ajcxy ooy mij jibic-huinma'ñ canaagnax nijot'ajtcixy; yëydijctijc ooy ajcxy jibic-huinma'ñ tungixy; ooy ajcxy migapxtigoy töxyjäy ajcxy; ooy ajcxy adzojccixy comeeñ'ajtin; ooy mi'ljxtinaaygixy ymigügtijc; ca' ajcxy ymigüg ixaangixy; ooy ajcxy yjäyyaj'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymigüg huin'ingixy; ooy ajcxy ypiitzcapxcixy; ca'p ajcxy ymigüg ixaangixy. ³⁰ Jāy ajcxy ooy nigapxy ni'o'jy ymigügtijc; ca' ajcxy ixaangixy Dios; ca' ti jäygidaaccixy; ooy ajcxy amij agix ñayjihuiiyigixy; ooy ajcxy ci'm ñaygömáayigixy; ooy ajcxy cojy macxy jibic-huinma'ñ, ca' ajcxy capxymidoogixy ytaj yteedy. ³¹ Jāy ajcxy ca' y'ayuc-huinjihuiiyigixy; ca' ajcxy cuydungixy yci'm'ayuc; ca' ajcxy ni pin tzojccixy jihuiiyigixy; ca' ajcxy ni pin pa'ayoogixy. ³² Jadayaabi jāy ajcxy ñejhuiyb co Dios ti cojy ti macxy ycötujcin co pinjaty tundigooyb jadu'n m̄id Dios ytiy'ajt, tigooyip ajcxy yjugy'ajtin. Oy iyxipy yi jāy ajcxy janejihuiiyigixy co padaangixy y'o'cin, huin'it ajcxy jactimtungixy jibic-huinma'ñ, e nañ jadu'n jotcuyc ajcxy co jac pinjaty jibic-huinma'ñ tungixy.

2

Dios tiydumb jadu'n nejyi' tzocy

¹ Paady co miich migüg m'ix'ixy mba'ixy ti ytumyb, ti migüg ycapxyp ti anajty pocy mnaymöyii, oy iyxipy ypinjäy ñejpyjäyity. Miich ooy ti pocy m'ixy ma huing jāy, e nañ jadu'n miich ooy mij mdundigoy, tim jadu'n nej yi' ajcxy ytundigooygixy. ² Nejhuiyim co Dios tudägy ytuñ co tzaachytuñ tüg'óciy pinjaty tundigooyb. ³ E miich co migüg m'ix'ixy mba'ixy ti ytumyb ti migüg ycapxyp, nañ jadu'n miich Dios xychaachtuna'ñ. ¿Nej mdijy mdzögip co anajty Dios xytiyduna'ñ? ⁴ ¿Nej ca' mjäygidägy nej Dios mij ooy may'ajt oy'ajt ti tuñ m̄id miich, nej ooy mij ti xypa'ayoy, mij ti xymimecxtucy? ¿Nej ca' mnejhuiy co Dios mij ooy xypa'ayoy xymimecxtucy, jigix mjothuimbidity nej mdundigoy ma Dios ytiy'ajt? ⁵ M̄id co ooy mjetjuuñity mgöjuuñity, ca' ajcxy mjothuimbida'ñ, ca' ajcxy m'ixmadza'ñ nej ajcxy mdundigooygixy. Paady ycixpi Dios huidibi tudägy tumb niḡi miich yi' ooy mij xychaachtuna'ñ co anajty xii tiempo ycixy ytigoy, e Dios chaachytunamyb jāy ajcxy m̄id ypocy ycixpi. ⁶ Co anajty Dios tiyduñ yi naaxhuiñ jāy, chi yajnidagihua'ñ nidüg nidüg nej anajty ti chinäy. ⁷ Nijëjity jāy ajcxy oyjot oyhuinma'ñ tungixy jabom jabom, yjijp'ijxpy ajcxy co Dios oybi ymöhuaangixy, nañ yjijp'ijxpy ajcxy co Dios ycömayiyb, yjijp'ijxyp ajcxy yjugy'ajtin huidibi ca' ycixipy ytigoyipy nimina. Yi jadu'mbi jāy Dios ymöhuaamyb jugy'ajtin huidibi ca' ycixipy ytigoyipy nimina. ⁸ Per Dios chaachytunamyb mijcajee yi jāy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy

tumb jibic-huinma'ñ. ⁹ Ayo'n tzaachypi ypadamyb tüg'óciy jäy ajcxy huídibi jibic-huinma'ñ ti tuñ. Nañ jadu'n miich judíojoyäy ajcxy tim jayijp mbadaangixy tzaachypi, pen mdundigooygixp, e chiini yi jacjadyii jäy padaangixy tzaachypi, pen tundigooygixp. ¹⁰ Tüg'óciy pinjaty oyjot oyhuinma'ñ tungixp, Dios ymóhuamyb yi' ajcxy oy'ajtín, nañ cómayaanip yi' ajcxy Dios, etz nañ yajjotcugihuüb ajcxy. Tim jayijp yi judíojoyäy pada'ñ ajcxy oybi, etz jac'axam yi jacjadyii jäy ajcxy.

¹¹ Dios ca' tiyduna'ñ jäy ajcxy huin'ijxpety, quipxyjaty tiyduna'ñ nidüg'óciy jäy ajcxy. ¹² Nidüg'óciy jäy ajcxy huídibi tundigooygixp, Dios yajtigoyaanip ajcxy yjugy'ajtín. Yi jäy ajcxy huídibi ca' müdity Dios ycötujcín huídibi cojaayip, Dios yajpocycähuaanip ajcxy, com ymüid ajcxy Dios ytiy'ajt ma yjot yhuinma'ñ. Yi jäy ajcxy huídibi müid Dios ycötujcín cojay, Dios yajpocycähuaanip ajcxy müid yi' ycötujcín huídibi cojaayip. ¹³ Yi jäy ajcxy huídibi nigoob amido'ijtp co yajcapxy Dios ycötujcín, e ca' ycapxymidoogixy, ca' ycöbígá'ñyii Dios jadu'n nej jihuüy ytudägyjäyity. Yi jäy ajcxy huídibi capxymidoob Dios ycötujcín, Dios cöbígaaanip co ajcxy ytudägyjäyity. ¹⁴ Yi jäy ajcxy huídibi ca' müdity Dios ycötujcín huídibi cojayip, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuüy ajcxy müdity Dios ycötujcín. ¹⁵ Co je jäy ajcxy oyjot oyhuinma'ñ tungixy, huin'it yajniguëxícixy co ajcxy ymüid Dios ycötujcín ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihuiyigixy. E co patcixy oyjot oyhuinma'ñ, huin'it ooy oy ñayjihuiyigixy. ¹⁶ Jada je'du'n je jemybi oybi ayuc huídibi ngapxhuäcxypich co miinip je xii je tiempo co Jesucristo, müid Dios ycötujcín, tiydunip tüg'óciy jäy ajcxy nej anajty yjot yhuinma'ñ ajcxy müdity, tüg'óciy pinjaty ti tuñ ayüch ameech tijaty.

Je Dios ycötujcín huídibi Moisés yjay jecy'ajty

¹⁷ Miich ajcxy huídibi minamb co mjudíojoyäyity, miich ajcxy mmijpidaaccixyp Dios ycötujcín, je jecyip huídibi jaybetyip. Miich ajcxy mnaygömáayigixy co miich ajcxy Dios xyjäy'adyii. ¹⁸ Miich ajcxy mnejhuiyib nej Dios tzocy nej huaad mjäy'ajtcixy. E nañ ti m'ixpicy Dios ycötujcín huídibi ti xyajnejhuiyigixy huídibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huídibi ca' Dios ytiy'ajt müdity, jadu'n nipaady nej jihuüy tüg huintzpi mhuijtzöy, e nañ jadu'n nipaady nej jihuüy mgodícxy je jäy ajcxy huídibi agootztuum tzinaayb. ²⁰ Miich ajcxy judíojoyäy myaj'ixpijcpy yi jäy ajcxy huídibi ayoob, huídibi ca' ti tiy'ajt nejhuiyigixy, e mgapxhuijy yi jäy ajcxy huídibi ca' yhuinma'ñymejtzcixy. Miich ajcxy minamb co m'ayuc etz mdiy'ajt mbaatcixy ma Dios ycötujcín huídibi jaybetyip. ²¹ Miich ajcxy myaj'ixpijcpy jacjadyii jäy ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcpy ajcxy jacjadyii jäy co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcpy jacjadyii jäy co ca' huaad migapxtigoy töxyjäy ajcxy, e ¿miich ajcxy nej co mmigapxtigooygixy töxyjäy ajcxy? Miich ajcxy ci'm minamb co ca' huaad yajhuindzigiy tzaaboch quipychech, e miich ajcxy ci'm mdzachmeech je meeñ ma je tzajptijc ma je quipychech y'ity. ²³ Miich ajcxy mdzachnaygömáayigixy co mguydungixy Dios ycötujcín. Miich ajcxy m'ixtijy Dios müid co ca' ajcxy mguyduni yi' ytiy'ajt. ²⁴ Paady jadu'n jaybety miiñ ma Dios ñecy, ma jadu'n ymina'ñ: “Com co miich ajcxy mdundigooygixy, paady ycixpi yi jacjadyii jäy ajcxy nigapxy ni'ojiy Dios yxii.”

²⁵ Co ajcxy mguyduunip Dios ycötujcin, huin'it Dios xytunipcuendi co miich ajcxy mïidity je tïy'ajt ma mninïcx co Dios xyjäy'adyii. Co ca' ajcxy mguyduunip Dios ycötujcin, huin'it Dios ca' xytunipcuendi co miich mïidity je tïy'ajt ma mninïcx co Dios xyjäy'adyii. Jadu'n nipaady nej jihuïy ca' mdiy'ajttïyity. ²⁶ Co yi jacjadyii jäy ajcxy huïdibi ca' mïidity tïy'ajt ma ñinïcx, e cuyduni ajcxy Dios ytïy'ajt, jadu'n nej ajcxy ytïy'ajttïyity. ²⁷ Yi jacjadyii jäy co ajcxy cuyduñ Dios ytïy'ajt, yi' ajcxy capxpaady'idïpy ma Dios. E miich ajcxy judíojäy mbocycähuip miich ajcxy, oy miich ajcxy mjamïidity ixypy Dios ycötújcin huïdi cojaayip, pen ca' mguydungïxy. ²⁸ Je iixpejt janchypï co pinjaty Dios yjäy'ajtyp, canan je' je iixpejt huïdibi ymïid ma ninïcx. E nañ jadu'n canan je' je tïy'ajttïhuï cötujcin huïdibi jäy cuydun jecy'ajty. ²⁹ Je iixpejt janchypï co pinjaty Dios yjäy'ajtyp, je' je' je iixpejt huïdibi ymïid ma yjot yhuinma'ñ, je oyjot oyhuinma'ñ huïdibi ymïid, je iixpejt co je Espiritu Santo ti yajhuächyï yjot yhuinma'ñ, canan je' je tïy'ajt co ti cuyduñ je jecyïp cötujcin huïdibi cojay ijtp. Yi jadu'mbï jäy ajcxy cömay'idïpy ma Dios, e ca' ycömay'ida'ñ ma jäy ajcxy.

3

¹ Pen tïy'ajt jadu'n nej nmïna'ñich, ¿ti jäygidaacin yi judíojäy ajcxy ymïid ma Dios huïdibi yi jacjadyii jäy ajcxy ca' mïidity? ¿Ti jäygidaacin ajcxy ypatpy co ajcxy mïidity tïy'ajt ma ñinïcx co Dios yjäy'adyii? ² Yi judíojäy ooy canagnax oy'ajtin jamïidity. Tim jayïjp Dios yajnïbijci ajcxy yi' ycötujcin yi' y'ayuc huïdibi cojaayip. ³ ¿Nej mdiy co Dios ca' cuyduna'ñ yi' y'ayuc mïid yi judíojäy ajcxy mïid co nijëjity judíojäy ca' cuyduñ yi' ycötujcin? ⁴ Dios ca' jadu'n huinma'ñ mïidity nej jäy ajcxy huinma'ñ mïidity. Oy ixypy nidüg'óciy jäy y'anïdaaccïxy, Dios ca' y'anïdäga'ñ nimïna. Paady jadu'n jaybety miiñ ma Dios y'ayuc co David jadu'n ymïnañ:

Ñejhuïhuïpy jäy ajcxy co miich, Huindzin Dios, tudägy mguyduñ yi' m'ayuc. Ca' huaad pinjaty ymïna'nïp co ca' miich mguyduñ yi' m'ayuc.

⁵ Pen Dios cömaybidzimïpy mïid ajt nbocy ycïxpi, ¿nej tïy'ajt jadu'n nej jäy ymïnaangïxy co Dios ca' oy ytuñ, co xychaachytuunim mïid ajt nbocy ycïxpi? ⁶ Ca' yjadu'nity. Co ixypy yjadu'nity, Dios ca' yi' tïydunïpy naaxhuiñjäy mïid ajcxy ypocy ycïxpi.

⁷ Co ixypy ytïy'ajttïy jadu'n nej jäy ymïnaangïxy co Dios ooy yjotcujcity co ca' xychaachtunïpyich mïid nbocyich ycïxpi, jac'oy co ixypy ndundigooyich, jigix Dios janch ycömaybidzimïpy. ⁸ Jac'oy ixypy nmïnaanïm: "Tzoc tundigooyim jigix jëbi Dios cömay ypidzimïpy." Ixti nijëjity jäy ti xyñïhuambetyich co ñich jadu'n ti nmïna'ñich. Ca' jadu'n nmïna'ñich co Dios jäy tzaachtunïpy ninigoob. Dios chaachtunïpy pocyjäy ajcxy, com paatïp ajcxy jadu'n yi' tzaachypï.

Nidüg'óciy ñich ajt nbocymïidity

⁹ ¿Nej janch jadu'n co ñich ajcxy huïdibi judíojäy, jac'oyjäy ñich ajcxy ca'ydi yi jacjadyii jäy ajcxy? Ca' yjadu'nity, ca' ñich ajcxy njac'oyjäyity. Com ti jayïjp nyaj'ixpicyich co tüg'óciy jäy ajcxy yajpaady pocymïid, yi judíojäy, etz nañ jadu'n jacjadyii jäy ajcxy. ¹⁰ Com jadu'n jaybety miiñ ma Dios ñecy ma jadu'n ymïna'ñ:

Ca' ji ni tüg jäy tudäcpy, ni tüg.

¹¹ Ca' ji ni pin huïdibi huinjihuiyb Dios ytïy'ajt. Ni pin huïdibi ixtaayb Dios ytïy'ajt.

¹² Nidüg'óciy jäy ti ixmajtzcïxy Dios ytïy'ajt. Quipxy ycapxy ajcxy ytumyb co ytundigooygïxy. Ca' ji ni pin, pin huädz oy yjot oy yhuinma'ñ tumb, ca' ji ni tüg.

13 Yi jäy ajcxy ooy ycapxtigooygixy, oy ajcxy yhuin'ññ mïid y'ayuc. Jadu'n ajcxy yöcpajc nipaady nej tüg öcpi jut huïdibi ahuädz. Ooy ajcxy yajtzachïy mïid y'ayuc jadu'n nej jihuïy tza'ñ chüch.

14 Ooy ajcxy ycapxtigooygixy. Ooy ajcxy jibic ayuc capxcixy.

15 Mïid yinjaty huenjatypi ayuc, mic'amy ymigüg yaj'o'ccixy.

16 Ma ajcxy yhuïdity ooy midundigooygixy ymigüg, e nañ yecy ajcxy tajin mayin.

17 Ca' ajcxy nejhuïygixy nej huaad chinaaygixy jotcujc, ca' ma ti tzip ti capxy.

18 Ni cahuinmaaygixy nej Dios tzigïygixipy.

19 Tüg'óciy ayuc ycojaayity ma Dios ycötujcin necy, mic'ajt mïidpi mïid yi jäy ajcxy huïdibi yajmij'ajtp je cötujcin. Dios ti pidägy yi' ycötujcin, jaydëbi pinjaty tundigooyb, huaad ca' ti anii tuñ ma Dios. Dios ytiydunipy tüg'óciy jäy ajcxy mïid yi' ycötujcin. 20 Dios ca' capxpada'ñ co ytudägyity, mïid co ti cuydunyii ycötujcin. Dios ti pidägy ycötujcin jaydëbi nejhuïyim co ajt nbocymïidity.

Yi alma nidzoocin, hue' yajpaady mïid mibijcin

21 Jadachambi Dios xyajnejhuïyim jemybi tiy'ajt jadu'n nej tudägy'ajtin jëb nbaatim ma yi', e jada jemybi tudägy'ajtin tiy'ajt, ca' yi' yjadu'nity nej yi' tiy'ajt huïdibi yajpatp ma Dios ycötujcin jecy'ajtpyi. Per yi Dios y'ayucnajtzcapxïybi ñecy etz Dios ycötujcin necy yejc tiy'ajt jecy'ajty co Dios xymöhuaanim tudägy'ajtin. 22 Jadu'n Dios yaj'ahuimbidaangixy tudägy tüg'óciy jäy huïdibi mibijcp Jesucristo, ca' ñejity pinjäy ajcxy, pen judíojäy o pen ca' judíojäy ajcxy.

23 Com nidüg'óciy naaxhuiñjäy ti ytundigooygixy. Ni tüg jäy yhuädz'ajtin ycanaybadyii mïid Dios yhuädz'ajtin y'oy'ajtin. 24 (Mïid co nidüg'óciy jäy ytundigooygixy), paady ycixpi Dios mijmay'ajt mij'oy'ajt tuñ ninigoob mïid tüg'óciy jäy ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jäy ajcxy huïdijaty mibijccixp Jesucristo.

25 Dios yquejx y'ung ya naaxhuiñ, jaydëbi huinmeecxip jäy ajcxy ypocy, mïid co Jesucristo ti y'ögy mïid ajcxy ypocy ycixpi. Dios yhuinmeecxip jäy ajcxy ypocy co ajcxy mibigipy Jesucristo. Jayijp ca'ni anajty Jesucristo miiñ ya naaxhuiñ, Dios ooy mïimecxtujcy jäy ajcxy, ca' anajty mïidity jotcöduuyb jäy ajcxy ypocy. 26 Jadachambi xii tiempo Dios ti yaj'oyïy jadu'n nej jëb huinmeecxipy jäy ajcxy ypocy, e jadu'n yaj'ahuimbidity ajcxy tudägy ma yi' yhuinduu.

Jadu'n Dios tuñ jigix ñiguëxigipy co Dios tudägy yi', e tudägy'adaamni yi', co cöbicy jäy, yi' pinjaty mibijcp Jesucristo.

27 ¿Ti huaad jäy ajcxy tungixy huïdibi jëbi mïid ñaygömayïyb ma Dios? Ca' ni ti. ¿Na'amy co yjadu'nity? ¿Nej jëbi ajcxy ñaygömayïyb mïid co yajmij'ajtcixy Dios ycötujcin? Ca' yjadu'nity. Ca' huaad ñaygömáygixy ci'm, com Dios ti yaj'ahuimbity jäy ajcxy tudägy huïdibi mijpidacp Jesús. 28 Paady nmïina'ñich co jäy ajcxy y'ahuimbity tudägy co ajcxy mibicy Jesucristo, e canan co janch ypaad jacuydungixy canaag cötujcin.

29 ¿Nej miich ajcxy mdijcixy Dios ytuñ mïid ac yi'yi judíojäy ajcxy, e ca' jacmïid pinjaty? Ca' yjadu'nity. Dios tuumb mïid janch nidüg'óciy jäy ajcxy.

30 Ji tügpajc Dios, e yi' tú'ciy ytuñ mïid judíojäy, etz nañ jadu'n jacjadyii jäy ajcxy. Dios yaj'ahuimbijtaayb tudägy nidüg'óciy jäy ajcxy co ajcxy mibijccixy Jesucristo. 31 Co jadu'n nbaatim ndudägy'ajtin mïid co nmibijcim Jesucristo, ca' nmïinaanim Dios anajty yi' ycötujcin je jecyip nyajcödigooym. Hue' janchtiy nigï anajty nmic'ajtmooyim Dios ycötujcin.

4

Je ijxpejt huïdi Abraham yejc

¹ ¿Nej n'ocmīnaanīm? ¿Ti oybi ti paady ma Dios je Abraham ñich ajt nmij'ap nmijteedy? ² Co ixyipy Dios Abraham tudägy ti ixy, mīd co oybi ti tuñ, jēbi Abraham ixyipy ñaygōmayii. Per ca' huaad cí'm ñaygōmayii ma Dios. ³ Jadu'n jaybety ymiñ ma Dios ñecy ma jadu'n ymīna'ñ: “Abraham ymijpīdaaci Dios, e paady Dios jadu'n cōbijcy Abraham jadu'n nej tūg tudägyjäy.” ⁴ Je jāy huīdibi ymuju'ñ patp mīd ytung ycīxpi, jada meeñ huīdibi ymuju'ñ'ajtpy ca' nīgoo ñīmōyīi, hue' tīm paatp jadu'n mīd ytung ycīxpi. ⁵ Yi jāy huīdibi ca' jījp'ixy co tudägy'ajtin pada'ñ ma Dios mīd oy'ajtin ycīxpi huīdibi ytumyb, jēyi ymībījcpy ymijpīdacpy co Dios yaj'ahuimbīda'ñyīi tudägy. Yi jadu'mbī jāy tudägy'ajtin ypadamy mīd ymībījcin ycīxpi. ⁶ Jaybety ymiñ ma Dios ñecy co je David jecy'ajty nīmīydacy tūg jāy huīdibi ooy anajty jotcuyc ñayjihūyīi mīd co Dios ti y'ixyīi jadu'n nej jihūyī ytudägyjāyīty mīd ymībījcin ycīxpi, e ca' nīmīnaanīm mīd oyjāy'ajtin ycīxpi huīdibi ytumyb. ⁷ David jadu'n ymīna'ñ:

Jotcuyc je jāy ajcxy huīdibi ypocy ti yhuīnmeccxyīi, huīdibi ypocy ti yajtigoyīi.

⁸ Jotcuyc je jāy huīdibi Dios cōbijcip jadu'n nej jihūyī ca' ypocy ymīdīty.

⁹ ¿Nej janch tīy'ajt jadu'n co jada jotcuyc'ajtin huīdibi David ñīmīydac jecy'ajty, co ac yi judío jāy yī' ajcxy padaamb huīdījaty mīd tīy'ajt ma ñīnīcx co Dios yjāy'adyīi? Ca' yjadu'nīty, yi jacjadyīi jāy nañ jadu'n yī' ajcxy pada'ñ jotcuyc'ajtin. Ti nīmīnāangīxyīch co Abraham ymībījci Dios, e Dios ycōbijci jadu'n nej jihūyī ytudägyīty. ¹⁰ ¿Nej mdījy Dios ycōbijci Abraham jāyījp ca' anajty yajtīy'ajttīy'ñī? o ¿ti anajty yajtīy'ajttīy? Dios ycōbijc Abraham jadu'n nej jihūyī ytudägyjāyīty ca'ni anajty pīdacpy tīy'ajt ma ñīnīcx co Dios yjāy'adyīi.

¹¹ Jāyījp anajty Abraham ti mībīcy Dios, e ti anajty Dios ycōbīgyīi. Jac'axam Dios Abraham je cōtūjcin mooy co huen tīy'ajttīhuīpy y'ung etz y'ap y'oc. Je' je' iixpejt'ajtp co Dios anajty jāyījp ti ycōbīgyīi jadu'n nej jihūyī ytudägyjāyīty, ca'ni anajty ymōyīi cōtūjcin. Co Dios jadu'n ytuñ mīd Abraham jadu'n nīpaady nej jihūyī Abraham nmijteedy'ajtim ñich ajt nīdūg'ócy huīdibi cham mībījcp Jesús. ¹² Abraham nañ jadu'n ñīmijteedy'ajtyp yi judío jāy huīdibi mībījcp mījpīdacp Dios tīm jadu'n nej yī' mībīcy anajty Dios, jāyījp ca'ni anajty mīdīty tīy'ajt ma ñīnīcx co Dios yjāy'adyīi. Jadu'n nīpaady nej jihūyī Abraham ca' nīmijteedy'aty yi judío jāy huīdibi ca' mībīcy Dios.

Je huīdibi Dios ti xyaj'ahuanīyīm ti ycīxy yca'px mīd je mībījcin

¹³ Mīd co Abraham etz y'ap y'oc ymībījcpy ymijpīdacpy anajty ajcxy Dios, e paady anajty Dios yaj'ahuimbīda'anīgīxy tudägy, e paady Dios nīmāy Abraham co yi naaxhūīnybi yī' ajcxy je' adaanīp. Canan jadu'n ajcxy Dios ñīmāyī co ymōhuānīgīxy je naaxhūīnybi mīd co anajty nīdūg'ócy ajcxy ti cuydungīxy Dios ycōtūjcin. ¹⁴ Co Abraham etz y'ap y'oc padaangīxy je naaxhūīnybi huīdibi yaj'ahuanīyī, mīd co ajcxy ti cuydundaayī Dios ycōtūjcin, paady naadīgī'ajtp ixyipy co nmībījcin co Dios xyaj'ahuimbīdaanīm tudägy. E nañ naadīgī'ajtp ixyipy co Dios je Abraham nīmāy: “Je naaxhūīnybi mīch je' mje'adaanīp, com ti xymībīcyīch.” ¹⁵ Je pīnjaty mījpīdaacp Dios ycōtūjcin je jecyīp, Dios yī' tzaachytunaanīp, com ca' cuydundaaygīxy. Pīnjaty ca' mīdīty Dios ycōtūjcin huīdibi jāybetyīp, ca' yī' mīdūndīgooygīxy jadayaabi cōtūjcin.

¹⁶ Mīd co Abraham anajty Dios ti mībīcy, paady ycīxpi Dios ñīmāyī co je naaxhūīnybi yī' je'adaanīp. Jadu'n Dios may'ajt tuñ mīd Abraham, jāydēbi tūg'ócy pīnjaty mībījcp Dios, tīm jadu'n nej Abraham mībījcy Dios, jēbi ajcxy paatcīxy yi oy'ajtin huīdibi Dios yajnimāy Abraham co mōhua'ñ je oy'ajtin huīdibi yegamyb nīnīgoobi. Dios ycuydunamyb yī' y'ayuc mīd tūg'ócy jāy huīdibi mībījcp Dios, tīm jadu'n nej Abraham anajty mībīcy Dios, canan yī'yī judío jāy ajcxy padam oy'ajtin, com Abraham iixpejt yejc ma tūg'ócy

jäy ajcxy. ¹⁷ Ma Dios yhuinduu jadu'n nipaady nej jihuüy Abraham ich ajt nmij'ap'ajtm nmijteedy'ajtm nidüg'óciy huídibi mibijcp Dios, com Abraham nañ jadu'n ymibijcyp anajty Dios. Com jadu'n jaybety ymiñ ma Dios ñecy co Dios jecy'ajty jadu'n nimay Abraham: “ñich miich nyajñibijcyp co miich mnmij'ap'adamyb mnmijteedy'adamyb tüg'óciy je mayjäy huindu'mybi naax huindu'mybi cajp.” E Dios ycuydunipy yi' y'ayuc com mic'ajt müd, ixti jaydëbi yajjugypigipy jadüg'oc jäy tübi y'ó'ccixy. E nañ mic'ajt müd jaydëbi ane'min pidägy co huen yji'adipy huídijaty ca' ca'tni.

¹⁸ Müd co Dios anajty ti ñimäyii co ymüd'adamyb may y'ap y'oc, paady ycixpi Abraham ti jipp'ixy anajty co Sara anajty y'ung'ixa'ñ. Canaag jimijt anajty jajipp'ixy co huen y'ung paadip. Ti anajty tiempo ñajxni mina y'ung'ixipy. Hue' Abraham ymibijc huídibi anajty Dios ti yajñimäyii co yi' müd'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc.

¹⁹ Abraham ti anajty ymic'ajt ycixni com ti anajty ymijäyñi. Ymüd anajty migo'px jimijt, e nañ yi' ytöxyjc Sara ni tüg anajty ti yca'ung'ixy, per Abraham yjacmibijcyp anajty co Dios cuyduna'ñ y'ayuc müd yi'. ²⁰ Abraham ca' anajty ixmach yi' ymibijcin jadu'n nej anajty Dios ymüdity ymic'ajt jaydëbi cuydunip yi'y'ayuc. Chi Abraham ibaty capxpaty Dios. ²¹ Com Abraham ti anajty huinma'ñ ypidägy ma Dios co yi' ymüd ymic'ajt jaydëbi ycuyduniyb yi' y'ayuc huídibi yaj'ahuaniy. ²² Com Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuüy ytudägyjäyity.

²³ Dios ymoy Abraham jada y'ayuc huídibi jaybety, canan jëda'ajty Abraham yajmoy, nañ yajmoyday mayjäy. ²⁴ Nañ jadu'n jaybety miñ jada ayuc müd ich ajt ycixpi. Dios nañ xycöbigaanim jadu'n nej jihuüy ajt ndudägyjäyity müd co nmibijcim Dios huídibi ti yajjugypicyp anajty jadüg'oc ajt nHuindzin Jesucristo. ²⁵ Dios ycïeyc Jesús huen yaj'ögyii müd ajt nbocy ycixpi. E nañ Dios yajjugypicyp Jesús jadüg'oc jaydëbi xyaj'ahuimbijtm tudägy ma Dios.

Je nej yhuimbizimni co Dios xycöbijcim tudägyjäy

5

¹ Müd co nmibijcim nmijpidaacim ajt nHuindzin Jesucristo, paady Dios ti xyaj'ahuimbijtm tudägy. E müd co Dios ti xyaj'ahuimbijtm tudägy, paady jotcuje n'ijtm müd Dios. ² Co nmibijcim nmijpidaacim Cristo, chi nbaatim je may'ajt je oy'ajt huídibi Dios ytumyb müd ich ajt, e jadu'n oy n'ijtm müd Dios, ca' ma ti tzip. Nañ ooy njotcugiyim, müd co njipp'ijxim co nbadaanim Dios y'oy'ajtm. ³ Canan jëda'ajty nmijotcuje'ajtm co nbadaanim Dios y'oy'ajtm, nañ jadu'n tzoc mijotcuje'ajtm ayo'n tzaachypi. Com nejhuiyim co nminajxim nyajnajxim tzaachypi, huin'it jëbi nyajtunim mecxtujcin. ⁴ E co nyajtunim mecxtujcin, cömay najxim ma Dios, e co anajty cömay ti nnajxim, chi njipp'ijxim co nbadaanim oy'ajtm ma Dios. ⁵ Com njipp'ijxim co nbadaanim Dios y'oy'ajtm, chi ca' ndajim nmayim com Dios ti yi' yEspíritu Santo xy'adigiyim xyjottigiyim huídibi xyajnejhuuyim jadu'n nej Dios xychojcim xyjihuiyim.

⁶ Jecy'ajty co anajty ca'ni Jesucristo ymiñ, je naaxhuiñyäjy ca' anajty mic'ajt müdity nej ci'm y'ahuimbijtcixipy tudägy. Co yhuaad'ajtni je xi je tiempo huídibi Dios ti yaj'ixtägy, huin'it Cristo y'o'cy müd ich ajt nbocy ycixpi müd co ndigooyim müd Dios ytiy'ajt. ⁷ Co ixypy n'ijxtaayim pinjaty codinähuij tüg jäy tudägyipi ma yi' o'cin, ca' ni pin nbaatim. Co ixypy n'ijxtaayim pinjaty codinähuaamyb tüg jäy huídibi ooy ycömayity ma yi' o'cin, ca' yjecyity co nbaatim tüg metz. ⁸ Per Dios yajniquëxicy jadu'n nej xychojcim xyjihuiyim

mijcajee co quejxy Cristo huen o'cy mïid ajt nbocy ycixpi, oy anajty ïch ajt ooy njacpocytuunim. ⁹ Cristo ti xyaj'ahuimbijtim tudägy co ñi'py ti temy ti yocy mïid ajt nbocy ycixpi, e nañ Cristo ñigi may'ajt tunañ mïid ïch ajt ycixpi co anajty xyajnidzögaanim ajt n'alma, jadu'n nej Dios tzaachytunañ naaxhuiñjây mïid ajcxy ypocy ycixpi. ¹⁰ Co anajty ca' Cristo ymiiñi ya naaxhuiñ, huin'it anajty nmïidzip'ajtim Dios. Je tzip capxy ti Dios yaj'oyïy co quejxy y'ung ya naaxhuiñ, e y'o'cy mïid ajt nbocy ycixpi. Mïid co Cristo xycodinaayim ma yi o'cin, paady ñigi xypubejtim xypudigïyïm cham co yajpaady juugy. ¹¹ Canan jada'ajty co Jesucristo xyajnidzögaanim ajt n'alma, nañ jadu'n tzoc xondaacim mïid co n'ijtim mïid Dios, mïid je may'ajt huïdibi ajt nHuïndzin Jesucristo ti tuñ mïid ïch ajt ycixpi co yaj'oyïy je tzip nej anajty Dios nmïidzip'ajtim, jëbi jotcuje n'ijtim mïid Dios.

Adán etz Cristo

¹² Mïid jada ycixpi co yi pocytunï chondacy jecy'ajty ya naaxhuiñ mïid tügpi jây. E co jây ytundigoy oga'n mïid Dios, paady ycixpi je o'cin ytigïy ya naaxhuiñ. Mïid co tüg'óciy jây midundigoogyixy Dios, paady tüg'óciy jây patcixy yi o'cin. ¹³ Janch tiy'ajt jadu'n co jây ajcxy ytundigooy jecy'ajty jayïp ca'ni anajty Dios yecy yi' ycötujcin cojaaybi, e co ca' jây anajty ajcxy cötujcin mïidity jecy'ajty, paady ca'pin tiyduñ ajcxy nej ajcxy ytundigooy. ¹⁴ Ca' ñejity, oy ajcxy anajty ca' mïidity Dios ycötujcin, nañ jadu'n y'o'ctay ajcxy, chondacy mïid Adán, ixti yja'ty ma Moisés yxï ytiempo. Nañ o'ctay jây ajcxy huïdibi tigachjaty tundigooy, ca' yjadu'nity nej Adán oga'n ytundigooy. ïch ajt nninïcx ymïid je jibicpi huïdibi nbaatim ma Adán. Per ajt njemyjot njemyhuinmañ nbaatim ma Cristo.

¹⁵ Je pocytunï huïdibi Adán yajtzondac, ca' naybadyii mïid je tudägy'ajtin huïdibi Dios ti xyñimooyim. Mïid je pocytunï ycixpi huïdibi tüg jây ti yajtzondägy, tüg'óciy jây öcin ti paady. Dios mïid tüg yëydijc, je Jesucristo, mijmay'ajt tuñ mïid jây ajcxy ycixpi co yaj'ahuimbijtcixy tudägy, chi mayjây tudägy'ajtin ti paady. ¹⁶ Per je tudägy'ajtin huïdibi Dios xyñimooyim, ca' jadu'n naybadyii mïid huïdibi Adán ytuun. Mïid co Adán ytundigoy tügtecy mïid Dios, paady ycixpi mayjây o'cin ti paady mïid tüg pocy ycixpi. Mïid co Dios ti xyñimooyim tudägy'ajtin mïid Jesucristo, paady mayjây tudägy'ajtin y'oy'ajtin ti patcixy huïdibi mibijcp Cristo. ¹⁷ Mïid co tüg jây capxycömidodacy Dios, paady tüg'óciy jây ti patcixy yi o'cin. Mïid co tüg jây, je Jesucristo, may'ajt oy'ajt tuñ co xyaj'ahuimbijtim tudägy, paady tüg'óciy jây ajcxy huïdibi mibijcp Jesucristo ypadaangixyp jotcuje'ajtin etz nañ chinähuaangixy jilby tzajpjoty ma Jesús y'ane'my.

¹⁸ Mïid co tüg jây ytundigoy oga'n, paady nidüg'óciy je mayjây ypocycäy ajcxy, e patcixy yi o'cin. Nañ tim jadu'n mïid tüg jây huïdibi ti chinäy tudägy, Dios mayjây yaj'ahuimbijty ajcxy tudägy, e ti patcixy yjugy'ajtin huïdibi ca' ycixipy ytigoyipy nimina xii. ¹⁹ Mïid co tüg jây capxycömidodacy Dios, paady tüg'óciy jây ti patcixy je pocy. Nañ mïid co tügpi jây capxymïdoy Dios, paady je mayjây tudägy'ajtin ti patcixy huïdibi mibijcp Jesucristo.

²⁰ Co Dios moy jây ajcxy yi' ycötujcin huïdibi cojaayip, chi ñigi jây ajcxy nejhuïygyixy co ypocytungixy. Je may'ajt oy'ajt huïdibi Dios ytumyib, ñigi yi' y'oyity, ca'ydi je mijpocy huïdibi jây ajcxy ytungixyp. ²¹ Tim jadu'n nej co jây ypocytungixy, huin'it ajcxy pocymïid chinaaygyixy, ixti mabaad anajty y'öccixy mïid ypocy ycixpi. Nañ tim jadu'n co Dios may'ajt tuñ co yaj'ahuimbity jây ajcxy tudägy, huin'it Dios ane'my yi' ajcxy chinaayin mïid tudägy huinmañ, etz nañ xymöhuaanim jugy'ajtin huïdibi ca' ycixipy ytigoyipy nimina, co

nmijpidaacim ajt nHuindzin Jesucristo huidibi yjugy'ajtin yejc mïd ajt nbocy ycixpi.

O'cy mïd yi pocy ycixpi, jugy'aty mïd Cristo ycixpi

6

¹ ¿Nej n'ocminaanim? ¿Tzoc ooy ñigi tundigooyim jigix Dios ñigi may'ajt tunipy mïd ñich ajt? ² Ca' jadu'n ytiy'ajtity, ca' huaad njacpocytuunim. Co nmibijcim Jesucristo, chi jadu'n nipaady nejihuïy ti n'o'cim, e cham ca' n'ijtim pocymïd. ³ ¿Nej ca' mnejhuïyigixy jada tiy'ajt? Co nnibejtim mïd Jesucristo yxï, chi n'ijtim mïd Jesucristo. Jadu'n nipaady nej jihuïy ti n'o'cim quipxy mïd Cristo co yi' y'o'cy mïd ajt nbocy ycixpi. ⁴ Co ñich ajt nnibejtim jadu'n nipaady nej jihuïy ti n'o'cim, e ti nnaaxtigïyim quipxy mïd Jesucristo. Dios Teedy mïd ymic'ajtin oybi yajjugypijcy Cristo co anajty ti y'ögy, chi Cristo paty jemybi jugy'ajtin, nañ jadu'n ñich ajt ti nbaatim jemybi jugy'ajtin quipxy mïd yi', paady copicy ndzinaayim mïd jemybi jot jemybi huinma'ñ.

⁵ Co nmibijcim Jesucristo, chi n'ijtim mïd yi', co yi' ti y'ögy, jadu'n nipaady nej jihuïy ti n'o'cim quipxy mïd yi'. Co Jesucristo yjugypijcy mïd jemybi yjugy'ajtin, nañ jadu'n ñich ajt nbaatim jemybi jugy'ajtin quipxy mïd yi'. ⁶ Nejhuïyim ñich ajt nej anajty jibic-jot jibic-huinma'ñ nmïd'ajtim jayijp'aty ca'ni anajty nmibijcim. Jadu'n nipaady nej jihuïy ajt njibicjot njibic-huinma'ñ ti y'ögy quipxy mïd Cristo co yi' y'o'cy cruudzcïxy. Cristo ti y'ögy mïd ajt nbocy ycixpi, jigix jëbi n'ijxmajtzim pocytunï huinma'ñ, etz jigix jëbi je pocytunï ca' xyjac'ane'mim ajt njot nhuinma'ñ. ⁷ Com pinjaty ti y'ögy, yi' ypocytunï ca' ti mic'ajt jacmïdity ma yjot yhuinma'ñ. ⁸ Pen jadu'n nipaady nej jihuïy ti n'o'cim quipxy mïd Cristo, paady ndzinähuaanim njugy'adaanim quipxy mïd yi'. ⁹ Nejhuïyim co Cristo ti yjugypijcy co y'o'cy, e ca' yi' y'öga'ñ jadüg'oc. Yi' o'cin ca' ti mic'ajt jacmïdity ma Jesucristo. ¹⁰ Co Cristo ti y'o'cy mïd jäy ypocy ycixpi, chi y'ögy tüg tecypajc mïd nidüg'óciy jäy ajcxy ycixpi. Co Jesucristo yjugypijcy, chi tüg'óciy huidibi yi' ytumyb ma yi' chinaydac yjugy'ajttac, yi' ytumyb mïd Dios ycixpi. ¹¹ Nañ jadu'n miich ajcxy mhuinma'ñypidaaccix jadu'n nej jihuïy ti m'öccïxy, e yi' ypocytunï ca' ti mic'ajt jacmïdity ma miich ajcxy mdzinaayin. E jadachambi xï tiempo tzinaaygix mïd Dios ycixpi quipxy mïd Jesucristo ñich ajt nHuindzin.

¹² Paady ycixpi ca' huaad xy'ane'mgixy je jibic-huinma'ñ huidibi ajcxy mninïcx yjanijot'ajtpy. ¹³ Ca' huaad mgïyejccïxy yi' mninïcx ma pocytunï. Naygïyëjcgix ma Dios, ixmajtzcix yi' pocytunï. Jadu'n nipaady nej jihuïy ti m'öccïxy, e ti mjugypijccïxy jadüg'oc. Hue' janchtiy cïyejccix yi' mninïcx ma Dios, jaydëbi mdzinaaygixipy mïd ajcxy tudägy mjot mhuinma'ñ, e cuydungix Dios chojcin. ¹⁴ Jadachambi xï tiempo ca' miich ajcxy mdzinaaygixy pocymïd, jadu'n nej jecy'ajty ajcxy mdzinaaygixy co anajty ajcxy mguydungixy Dios ycötujcin je jecyïp. Hue' janchtiy tzinaaygix mïd Dios ycixpi, com Dios mij may'ajt ti tuñ mïd miich ajcxy.

Tüg ijxpejt huidibi yajpatp ma n'ijtim yajtuñ

¹⁵ ¿Ti huaad nduunim? ¿Nej jëbi huaad njacpocytuunim? Com Dios mijmay'ajt ti tuñ co ti jöch ajt nbocy etz nxïhuin, e Dios ycötujcin, je jecyïp, ca' xyjacyajpocycähuim. Ca' huaad njacpocytuunim. ¹⁶ ¿Mnejhuïyb miich ajcxy jada tiy'ajt? Co ixypy pinjaty ñaygïyeyii co ytuna'ñ mïd tüg huindzin huidibi mic' yajtumb, copicy co je tumbi capxymïdohuipy je yhuindzin. Nañ tim jadu'n nipaady mïd pocytunï. Pen mnaygïyëjcp mïd pocytunï, huin'it anajty pocy xy'ane'my ma mdzinaayin, ixti mabaad

anajty m'ögy m'iid mbocy ycixpi. Co mnayg'iyéjciçixipy ma Dios, huin'it ajcxy mgapxym'idohipy Dios, e mdzin'ähuiç ajcxy tudägy. ¹⁷ Jecy'ajty miich ajcxy anajty pocy xy'ane'mgixy, co jibic-huinma'ñ mdungixy. Nyajnajxpyich jäygidaacin ma Dios co jadachambi tiempo ti mgöbijccixy cixyot huinjot Dios ytiy'ajt hu'idibi xyaj'ixpijccixp, e mgapxym'idoogixy Dios. ¹⁸ Cristo ti xyaj'a'oyiç ajcxy mjot mhuinma'ñ, ca'ydí mjactzinaaygixy pocym'iid. Ti mhuinma'ñ mbidaaccixy co mgapxym'idohuaangixy Dios e mdzin'ähuaangixy tudägy. ¹⁹ (Ngapxhuijpyich miich ajcxy cham m'iid naaxhuiñjy y'ayuc ytiy'ajt, com ca' yajxon mhuinjihu'iygixy Dios y'ayuc ytiy'ajt.) Jadu'n nej jecy'ajty co ca' anajty mmibijccixy Cristo, ooy anajty mnayg'iyéjciçixy xii ya ma jibic-huinma'ñ, e mdundigooygixy xii ya m'iid mnin'icx. Ooy miich anajty ajcxy m'iidity jibicpi ma mjot mhuinma'ñ, ooy anajty mdundigooygixy. Jadachambi xii tiempo nayg'iyéjciçix ma Jesucristo, jigix jëbi huaad mdungixy m'iid tudägy jot tudägy huinma'ñ, etz jigix jëbi huaad mdzinaaygixy m'iid huädz jot huädz huinma'ñ.

²⁰ Co anajty yi jibic jot jibic-huinma'ñ xy'ane'mgixy, chi ca' je oyot oyhuinma'ñ anajty xy'oc'ané'mgixni. ²¹ ¿Ti jotcuç'ajtin miich ajcxy ti mbaatcixy co jibic jot jibic-huinma'ñ mdungixy hu'idibi jadachambi tiempo mdzöydu'n'ajtip ajcxy? Yi jibic jot jibic-huinma'ñ xyyajnicxp ajcxy ma yi o'cin. ²² Jadachambi xii tiempo Dios ti yaj'oyiç nej jëbi m'ixmajtzciçixipy yi pocytunii, ca' huaad mjactzinaaygixy pocym'iid. Ti m'ahuimbijtcixy Dios ytumbi, jadayaabi tzinaayin xymöhuip ajcxy mjotcuç'ajtin. Tiydudägy cham tzinaaygix m'iid Dios ycixpi, e mbaadip ajcxy jugy'ajtin hu'idibi ca' ycixipy ytiçoyipy nimina. ²³ Yi pocytunii ycoju'ñ yi' je' yi o'cin. Per je hu'idibi Dios xyñimooyim, hue' je' je jugy'ajtin hu'idibi ni caminaxii ycixipy ytiçoyipy co n'ijtim m'iid ajt nHuindzin Jesucristo.

7

Tüg iixpejt hu'idibi yajpatp ma picychinaayin

¹ Miich ajcxy migügtijc hu'idibi ti m'ixpicy Dios ycötujcin hu'idibi Moisés yjaay, mnejhu'iyb miich ajcxy co yi naaxhuiñjy ycötujcin ym'iid mic'ajt ma ajt ndzinaayin, ixti mabaad anajty n'o'cin. ² Paady co tüg töxyjy ycivilbicy m'iid tüg yëydijc, ca' huaad ixmach ñäy mabaad china'y yjugy'aty. Co janchtiy anajty je töxyjy ñiyëydijc ti y'öcni, huin'it anajty ca' ocm'idiñ ñäy y'ane'min. ³ Ooy anajty mij ytundigoy je töxyjy co ypiçipy m'iid huingbi yëydijc pen jugy'ajtni je ñäy. Cooni janchtiy anajty ñiyëydijc ti y'ögy, huin'itni janchtiy jëbi ypiçy m'iid huingbi yëydijc, e ca'p je' anajty ytundigoy.

⁴ Miich ajcxy nmigügtijcich, judíoçy hu'idibi mibijcp Cristo, jayijp co anajty ca'ni mmibijccixy Dios, je Dios ycötujcin hu'idibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cötujcin ca' yi xyjac'ané'mgixni. Jadachambi Cristo ytiy'ajt xy'ane'mgixp, je Cristo hu'idibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjy hu'idibi ñiyëydijc ti y'ögy, e ti ypiçtigach. Cristo miich ajcxy xyñigohuajc'ajtp, jigix jëbi mdzinaaygixy m'iid Dios ycixpi. ⁵ Jayijp ca'ni anajty nmibijcim Jesucristo ooy anajty nguyduunim hu'idibi ajt nnin'icx ñijot'ajt. Je huin'it tiempo anajty je jibic-huinma'ñ xy'ane'mim ma ajt ndzinaayin. Je' je' je jibic-huinma'ñ hu'idibi Dios xycapx'adujcim m'iid ycötujcin. M'iid co jibic-huinma'ñ xy'ane'mim anajty ajt ma ndzinaayin etz xyajnicxanim anajty ma yi o'cin. ⁶ Jadachambi xii tiempo Dios ycötujcin hu'idibi Moisés xymooyim, ca' ti mic'ajt m'iidity ma iich ajt, ti n'ixmajtzim. Jadu'n nipaady nejhu'iy ti n'o'cin, e

njugypijcim jadüg'oc. Paady nguyduunim je jemybi tÿy'ajt huidibi je Espíritu Santo xyajnejhuüyim. Canan je' anajty nguyduunim je jecy'ajtpy cötujcin.

Je pocy huidibi ijtp ma ñch

⁷ ¿Nej n'ocminaanim? ¿Nej janch co je cötujcin huidibi Moisés xymooyim xyajpocytuunim anajty? Ca' yjadu'nity. Co ixypy ca' anajty nmídidyich Moisés ycötujcin, ca' ixypy ñch ti nnejhuüyich co ti ndundigooyich ma Dios ytÿy'ajt. Co ixypy anajty ca' n'ocnejhuüyich Moisés ycötujcin ma jadu'n ymíñañ: “Ca' mmígüg ni ti m'adzojcpy.” Ti ixypy ndundigooyich, e ca' ixypy nejhuüyich ma ti ndundigooyich. ⁸ Míid co ñch jecy'ajty ooy anajty nnijot'atyich pocytuní, paady ycixpi ñch anajty ooy ndundigooyich. E jadu'n anajty nígi ooy n'adzocyich, e jaminam anajty Dios ycötujcin co ca' migüg ni ti m'adzojcpy. Co ixypy Dios ca' jadu'n cötujcin ti pídagy, ni ca' ixypy njihuíñybicyich co ndundigooyich. ⁹ Jayijp co ca'ni anajty nhuinjihuüyich Dios ycötujcin, huin'it tiempo ca' anajty njihuíñybicyich nbocy. E co nbatyich Dios ycötujcin, chi njihuínybijcyich nbocy, e nañ ti nejhuüyich co tigoyaamich njugy'ajtin. ¹⁰ Dios ypidac ycötujcin jaydebi nbáadibich jugy'ajtin huidibi ca' ycixpy ytigoyipy. Per ca' jadu'n ti oyÿy míid ñch. Yi cötujcin ti xyajpocycäyich anajty, e jadu'n tigoyaambich anajty njugy'ajtin. ¹¹ Jadu'n anajty huinma'ñ nmídidyich co nguydundähuaamybich Dios ycötujcin huidibi Moisés yjayhuim. Pero com ca' njatyich nej nguydundähuiyich, chi nbocycäyich ma Dios. Je pocytuní ti xyhuin'íñich, e míid je' ycixpi nbadaamybich anajty yi o'cin.

¹² Tüg'óciy Dios yley etz Dios ycötujcin huidibi cojay ijtp, huädz yi', tudägy yi', ooy yi'. ¹³ ¿Nej tigoyaambich anajty njugy'ajtin míid co anajty nmíityich Dios oybi cötujcin? Ca' yjadu'nity. ¿Nej je Dios ycötujcin je oybi ti huimbídzimy jibic míid ñch co xyajtigoyaamich anajty njugy'ajtin? Ca' yjadu'nity. Nicxpich anajty ma yi o'cin míid nbocyich ycixpi. Je Dios ycötujcin xyajnejhuüyich co o'cin nbadaamybich míid nbocyich ycixpi. Jadu'n Dios pídac y cötujcin ya naaxhuíñ, jigix jébi jáy ajcxy nejhuíhuipy co mij ajcxy ooy ytundigooy míid Dios.

¹⁴ Nejhuüyim co yi Dios ycötujcin huidibi Moisés xymooyim, jüby yi' chooñ ma Dios, paady yi' ooy y'oyity. Hch nninícx yi' je' huidibi nijot'ajtp yi' pocytuní, paady ndzinäyich pocymíid. ¹⁵ Ca' nhuinjihuüyich huidibi ndumyich. Yi oybi huidibi njatunaamybich, ca' njatyich nej ndunipyich. Yi jibicpi huidibi ca' y'oychojcnity, yi' ndumyich. ¹⁶ Co nduñich huidibi ca' ndzocyich, jadu'n níquëxígy co Dios ycötujcin ooy oy yi', tudägy yi'. ¹⁷ Canan jotcujc ñch jadu'n co nbocytuñich. Yi pocy'adzojcin huidibi nmíidich ma njot nhuinma'ñ, yi' yi' xyajtundigooybich. ¹⁸ Nejhuüyibich co ca' ti oybi yajpaady ma ñch nninícx. Ooy njatzocyich co oybi njatuna'ñich, per ca' njatyich nej oybi ndunipyich. ¹⁹ Je oybi huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumyich. ²⁰ Co yi' nduñich huidibi ca' ndzocyich, yi' je' je pocytuní huidijaty njot'ájtibich nhuinma'ñ'ájtibich, yi' xyajtundigooybich.

²¹ Nbaatpich tüg tÿy'ajt, co njatunaamybich oyhuinma'ñ, jüpy jibicpi nbaadyich ma njot nhuinma'ñich. ²² Jotjoty huinma'ñjoty ooy nmíxondägyich Dios ycötujcin. ²³ E nañ míidich jotjoty huinma'ñjoty yi' jibicpi huidibi mí'ijxtinaayb je oybi. Yi tundigoyí yajpatp ma ñch nninícx. Yi nninícxich yajpatp pocymíid.

²⁴ Paady ca' njotcújcyich. ¿Pín jébi xyñihua'ñich xyajnídözögibich ma jadayaab nninícxich huidibi xyajnicxpich ma yi o'cin? ²⁵ Dioscojuyip nyajnajxypich ma Dios co Dios, míid ajt nHuindzin Jesucristo, xyñihuaanim ma

jada jibicpi huidibi ajt nninix xyñi'jot'ajtim. Paady miid n'oyjot n'oyhuinma'ñ nguyduñich Dios ycötujcin. Miid nninixich nijot'atyich pocytuni.

8

Je jugy'ajt miid je Dios yjihui'ñ ymic'ajt ycixpi

¹ Jadachambi tiempo janchtiy Dios ca' tzaachytuna'ñ yi jäy ajcxy huidijaty tú'ciy ijtp miid Cristo Jesús, huidibi ajcxy cuydumb Espíritu Santo chojcin, e ca' ajcxy tungixy nej je ninix nijot'ajtcixy. ² Je Espíritu Santo ti xyyajpidzimim ma yi pocytuni etz ma yi o'cin huidibi yi jecy'ajty cötujcin ti xymooyim. Je Espíritu Santo xyajtzinaayim huinixi, ich ajt huidibi ijtp tú'ciy miid Jesucristo. ³ Miid co ich ajt ooy ninix ñijot'aty jibicpi, paady Dios xymooyim ycötujcin jecy'ajty jaybety. Per je naaxhuiñjäy yajtigoy ajcxy je cötujcin ymajaa, e ca' ymadacy nicxy xyajtzinaayim miid tudägy jot huinma'ñ. Paady Dios yquejxy yci'm'ung huidi ti chinäy ya naaxhuiñ miid ñinix jadu'n nej ich ajt nmidity ninix, jigix jëbi ndzinaayim miid huadz jot huinma'ñ. Jadu'n Dios y'ung chinay miid ñinix, per ca' ni ti bocy anajty midity. E yi' ti y'ögy miid ajt nbocy ycixpi, e jadu'n yajtigoy je pocy huidibi ajt nigix'ajtim. ⁴ Jadu'n Dios ytuuñ jigix jëbi xyajtzinaayim miid tudägyjot tudägyhuinma'ñ jadu'n nej yi' ycötujcin y'ane'my. Miid co nmid'ajtim Dios yjihui'ñ ymic'ajt ma ajt njot nhuinma'ñ, paady jëbi huaad ndzinaayim miid tudägy-jot tudägy-huinma'ñ.

⁵ Yi jäy ajcxy huidibi ca' midity Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je jibicpi huidibi ajcxy ñinix ñijot'ajtpy. Yi jäy ajcxy huidibi tzinaayb miid Dios yjihui'n ymic'ajt ma yjot yhuinma'ñ, hue' ajcxy ycapxymidooyb je Espíritu Santo. ⁶ Yi jäy ajcxy huidibi capxymidoob je jibicpi huidibi ajcxy ñinix ñijot'ajtpy, hue' ajcxy ypadaangixyp o'cin. Yi jäy ajcxy huidibi capxymidoob je Espíritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcuje'ajtin. ⁷ Yi jäy ajcxy huidibi capxymidoob je jibicpi huidibi ajcxy ñinix ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios ycötujcin. Ni ca' jajtcixy nej ajcxy capxymidogixipy Dios ycötujcin. ⁸ Ca' Dios jäygidägy yi' ajcxy chinaayin huidibi ajcxy capxymidoob je jibicpi huidibi ajcxy ñinix ñijot'ajtpy.

⁹ Per miich ajcxy ca' mgapxymidoogixy je jibicpi huidibi mninix nijot'ajtpy. Com miich ajcxy mmid Dios yjihui'ñ ymic'ajt ma mjot mhuinma'ñ, e mguydungixpy je Espíritu Santo chojcin. Huenpinity huidibi ca' midity Cristo yjihui'ñ ymic'ajt ma yjot yhuinma'ñ, ca' yi' y'ity miid Cristo. ¹⁰ Pen miich ajcxy ijtp miid Cristo, yi mjogy'ajtin ajcxy ca' ycixipy ytigoyipy nimina, miid co Cristo ti xyaj'ahuimbijtcixy tudägy ma Dios yhuinduu. Yi mnaaxnicx cixamb tigoyamb yi'. ¹¹ Pen ijtp ma miich ajcxy mjot mhuinma'ñ je' yjihui'ñ ymic'ajt je huidibi yajjugypijc jadüg'oc je Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, miid yi' yjihui'ñ ymic'ajt huidi yajpaatp ma miich ajcxy mjot mhuinma'ñ.

¹² Miid co nmid'ajtim Dios yjihui'ñ ymic'ajt paady ycixpi, miich ajcxy migügtijc, copicy ngapxymidoohuim je Espíritu Santo, e ca' huaad ngapxymidoohuim je jibicpi huidibi ajt nninix ñijot'ajtpy. ¹³ Pen ooy ajcxy xytimy'ane'ngixy je jibicpi huidibi ajcxy mninix ñijot'ajtpy, co m'öccixipy, yi mjogy'ajtin cixip tigoyip yi'. Per pen miid Dios yjihui'ñ ymic'ajt miich ajcxy myajtigoy je jibicpi huidibi mninix ñijot'ajtpy, co m'öccixipy, yi mjogy'ajtin ajcxy ca' yi' ycixipy ytigoyipy.

¹⁴ Tüg'óciy pinjaty ajcxy capxymidoob je Espíritu Santo, Dios yi' ung'ajtip ajcxy. ¹⁵ Je Espíritu Santo huidibi miich ajcxy xy'adigiygixp xyjottigiygixp, ca' xychaachytungixy e nañ ni ca' mdzinähuaangixy miid tzigi'ñ jihui'ñ. Ca' miich

ajcxy jadu'n paady nej tumbidijc huidibi ooy tziguygixy yhuindzin. Co je Espiritu Santo yajpaady ma ajcxy mjot mhuinma'n, jadu'n nipaady nejhuuy miich ajcxy Dios xy'ung'adyii. E com nmuid'ajtim Dios yjihui'n ymic'ajt, je' jadu'n xyajminaanim: "iDios Teedy!" ¹⁶ Je Espiritu Santo tiy'ajt yejcp ma ajt njot nhuinma'n, je' jadu'n xyajminaanim co Dios xy'ung'ajtim. ¹⁷ Pen ich ajt Dios xy'ung'ajtim, chi nbadaanim it lugar quipxyi mid Cristo jiby tzajpjoty ma Dios yajpaady. Pen nminajxim nyajnajxim tzaachypi jadu'n nej Cristo minajxy yajnajxy tzaachypi, chi nbadaanim Dios y'oy'ajtin quipxyi mid Cristo.

¹⁸ N'aixiibich co yi tzaachypi yi ayo'n huidibi nminajxim nyajnajxim ya naaxhuiñ, ca' yi' ytim ytiiyty, ca' ninej yquipxyjatyty je oy'ajtin etz mijjotcujc'ajtin huidibi Dios xyaj'ixaanim je huin'it xi co Cristo anajty ymiñ jadug'oc. ¹⁹ Tug'ociy tijaty ya naaxhuiñ huidibi Dios ti yajcojy yaj'oyiy, y'aa'ijxpy yjip'ijxpy ajcxy mina Dios ymohuanigixy y'oy'ajtin ymij'ajtin yi jay ajcxy huidibi ajcxy Dios ung'ajtip. ²⁰ Tug'ociy tijaty Dios ti yajcojy yaj'oyiy ya naaxhuiñ, hue' je' yjugy'ajtin cixamb tigoyamb, ogam tidzam. E canan ci'm jadu'n tzocy, hue' je' Dios jadu'n ti yajnigodugiy. Per ca' yjugy'ajtin ycixipy ytigoyipy tu'ciyi hue' ajcxy y'aa'ijxpy yjip'ijxpy co padaangixy oy'ajtin jadug'oc. ²¹ Co anajty Dios yaj'oyiy nej jebi ajcxy chinaaygixy, e ca' y'ocixipy, ca' ytiizcixipy, etz ca' ypugixipy, chi ajcxy padaangixy oy'ajtin etz jotcujc'ajtin quipxyi mid je jay ajcxy huidibi Dios ung'ajtip. ²² Com nejhuuyim co ixti chambaad tug'ociy huidijaty Dios yajcojy yaj'oyiy ya naaxhuiñ yjihuiyb tzaachypi, e ca' yjotcujc'ajtcixy. Tim jadu'n nipaady nej tug'ociy paady tzaachypi co yhuaad'ajtni mina y'ung yajma'xung'ada'n. ²³ Canan yi naaxhuiñyi hui di Dios yaj'oyiy yi'yi tzaachypi jihuiyb, nañ jadu'n ich ajt huidijaty mid'ajtp Dios yjihui'n ymic'ajt, huidibi Dios xymooyim jayijp'aty ca'ni anajty nyajtigajtzim nninix. Nañ ich ajt tajim mayim njiyim nyaaxim ixti cooni anajty Dios xyajtigadzaanim ajt nninix etz xycobigaanim ma yi' y'it jiby tzajpjoty, e xymid'idaanim ajt jadu'n nej yci'm'ung. ²⁴ Mid co n'aa'ijxim njip'ijxim co Dios xyajnidzogaanim ajt n'alma, paady ti nbaatim jugy'ajtin huidibi ca' ycixipy ytigoyipy. Co ixipy ti nbaatim huidibi anajty njip'ijxim, ca' ixipy njacjip'ijxim co nbadaanimni. Com ca' pin jacjip'ijxni co padaanip je huidibi ti ocpatpi. ²⁵ Per co njip'ijxim co nbadaanim huidibi ca' nmuid'ajtim, huin'it n'ahuijxim mid mecxtujcin cooni nbaatim.

²⁶ Tim jadu'n nej jotcujc'ajtin nbadaanim co njip'ijxim huidibi Dios xymohuaanim, nañ tim jadu'n je Espiritu Santo xypubejtim xypudigiyim co njotmetzcuyim, com ca' najtim nej jebi huaad Dios mibijctzoohuim nej ypadyii. Paady je Espiritu Santo xycodinaayim ma Dios, ymibijctzooyb je Dios mictagy mid ich ajt ycixpi mid jiyin yaaxin, hui di ca' huaad yajcapxpizimy mid miydacin. ²⁷ Dios nejhuuyb ti jot ti huinma'n jay ajcxy ymid. E Dios nañ huinjhuuyb tug'ociy ayuc huidibi je Espiritu Santo yajnajxyp ma yi'. Je Espiritu Santo ypijctzooyb may'ajt jabom jabom ma Dios mid tug'ociy je mibijcpidijc ycixpi. Nañ jadu'n pijctzoy jadu'n nej Dios tzocy jaygidagy.

Mij madaacin ma mibijcin

²⁸ Yi jay ajcxy huidibi mijpidacp Dios, huidibi ajcxy Dios ti huin'ixy, jebi chinaaygixy jadu'n nej Dios jaygidagy ajcxy chinaayin. Nejhuuyim co huentimtiityt hudibi yi' ajcxy yminajxpy yajnajxpy, pen jibicpi o pen oybi, Dios jadu'n ti a'ixiy co huen minajxcixy yajnajxcixy mid yi' ajcxy y'oy'ajtin ycixpi. ²⁹ Je' yi' ajcxy huidibi Dios ti yhuin'ixy, je' yi' ajcxy huidibi Dios nejhuuy jayijpni co ymibiga'nyii y'ayuc. Dios jadu'n tumb ma yi' ajcxy yjot

yhuinma'ñ jaydëbi yquipxyjatytyj ajcxy yjot yhuinma'ñ mïd Dios y'ung, jadu'n nej yï' yjot yhuinma'ñ mïdity. ³⁰ Yi mayjây huidibi Dios yajniçöduçy ca'ni anajty naaxhuiñybi chondacy co ytuna'ñ mïd yï', yï' ajcxy Dios huin'ixi. Yi mayjây huidibi Dios ti yhuin'ixigixy, nañ Dios yï' ajcxy yaj'ahuimbijtip tudägy. E yi mayjây huidibi Dios ti yaj'ahuimbity tudägy, nañ Dios yï' yajquipxyjatytihuaanip ajcxy y'oy'ajtin mïd yï' y'ung y'oy'ajtin.

³¹ ¿Ti jada' njacjijp'ixim ti jada' njactzojçim? Ca' ni ti. Pen Dios ñch ajt xypubejtım xypudigıym, çpin ñch ajt jëbi xymimadaacım? Janch ni ca pin.

³² Dios ixti yci'm'ung ti yecy mïd ñch ajt ycixpi, co oy y'o'cy mïd ñch ajt ycixpi, co oy y'o'cy ma yi cruudz mïd nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty mïd yï' y'ung, Jesucristo.

³³ ¿Pin jada' jëbi ocxıy je jây ajcxy huidibi Dios ti huin'ixy? Ca' ni pin. Com Dios ci'm yï' ti yaj'ahuimbijttây tudägy. ³⁴ ¿Pin yï' ajcxy jëbi ocyajpocycäy? Ca' ni pin. Com Cristo o'c je' mïd ajt nbocy ycixpi, etz yjugypıçy jadüg'oc, e jadachambi xı tiempo yajpaady a'oy'amy ma Dios ymıç, e yï' ane'mdaayb tüg'óciy. E Cristo ñch ajt xyñibijetzohıym, ypıçtzooyb may'ajt ma Dios mïd ñch ajt ycixpi. ³⁵ Com Cristo ooy xychojçim xyjihıym, paady ni nej ca' xy'ixmadzaanim. Huen ti ndımpaatım ca' xy'ixmadzaanim. Oy ixıpy tzaachypı ayo'n nminajxim nyajnajxim, oy ixıpy tajın mayın nbaatım; oy ixıpy jây xy'ixhuidıjtım xypahuidıjtım; oy ixıpy yuu ayo'n nbaatım; oy ixıpy huit tucxy nyajmayajtım; oy ixıpy tziçıñ nyajnajxim; oy ixıpy jây xytımyaj'o'çim. Oy ti ayo'n ndımbaatım, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n ymiñ:

Mïd miich, Huindzin Dios ycixpi, je nmıdzipıç xyjatytiyyaj'ögaambıç xım tzuum. Jadu'n ñch ajcxy nej cöbıxy huidibi yajniçıç ma yaj'öçac co yaj'öga'ñyı.

³⁷ Ca' ti ayo'n nbadaanım. Nmımadactähuaanim tüg'óciy ayo'n, mïd co Cristo xychojçim xyjihıym. ³⁸⁻³⁹ Janch nejhıybıç tıydudägy co Dios xychojçim xyjihıym. Ca' ji ni pin jëbi huaad xypıç-huäçım ma Dios çóçın, oy ixıpy nja'o'çim; oy ixıpy njajugy'ajım; oy ixıpy xymıdzip'ajım ángel ajcxy etz jacjadyıı huidibi miç'ajt mïd jııby tzajpjoty. Ca' ajcxy jëbi huaad xypıç-huäçım ma Dios, ni ti huidibi ji ijtp cham, ni je huidibi mimb cidacp, ni yï' jëbi xycapıç-huäçım ma Dios çojçın. Ajt nHuindzin Jesucristo ti xyajnejhıym jadu'n nej Dios xchojçim xyjihıym co y'o'cy ma yi cruudz mïd ajt nbocy ycixpi.

9

Dios ti huin'ixy yi Israel jäy ajcxy

¹⁻² Nmıdich je Cristo ytiy'ajt, nyajnijayıybıç miich ajcxy yï' ytiy'ajt, ca' n'ındägyıç, co ooy ndajy nmayıç mïd n'amıgüçtıçıç ycixpi je Israel jäy co ajcxy ca' cöbiga'ñ je Cristo. Nañ Dios yjihui'ñ, je Espíritu Santo, tiy'ajt yejçp ma ñch njot nhuinma'ñ co jadu'n tajın mayın njihıyıç mïd yï' ajcxy ycixpi.

³ Com tajy may nayjihıyııç mïd ñch n'amıgüçtıç, ñch nmıgogajp, ixti njaccodinähuaamybıç ajcxy ma Dios mïd ypocy ycixpi, ixti jëbi ixıpy Cristo nja'ixmachıç mïd yï' ajcxy ycixpi, ixti jëbi ixıpy Dios xychaachytuñıç mïd yï' ajcxy ypocy ycixpi, co ixıpy jëbi Dios pocyhınmecxy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbigyıı jadu'n nej jihıy yci'm'ung, Dios anajty ajcxy ti ñi'ixcidägyıı, y'ix ajcxy Dios y'oy'ajtin. Dios nımay ajcxy co ycuend'adip. Dios ajcxy jadu'n yajni'ixıyıı nidüg'óciy tiy'ajt nej ajcxy jëbi huaad Dios huindziçıy, e Dios yajhuinhuanıy Israel jäy ajcxy je Cristo. ⁵ Nañ hue' ajcxy ymıç'ap'ajtip

ymijteedy'ajtip #ch ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jüby tzajpjoty etz ya naaxhuiñ. Je Cristo capxpaady y'idipy huinixi.

⁶ Co jadu'n mina'ñich co may ajcxy Israel jäy ca' ajcxy Dios yjäy'adyii tïydudägyi, ca' jadu'n mina'na'ñich co Dios ca' cuyduñ yi' y'ayuc huidibi yajhuinhuanïy Abraham etz Moisés. ⁷ Canan nidüg'óciy Abraham y'ap y'oc pada'ñ je oy'ajt huidibi yajhuinhuanïy Abraham, com jadu'n yjaybetyity ma Dios ñecy. Dios jadu'n nimay Abraham: “Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuanïy.” ⁸ Co Dios jadu'n nimay Abraham, paady ycixpi nejhuïyim co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuanïy co may'ajt tuna'ñ müd yi' ajcxy. ⁹ Com jadu'n yjaybetyity ma Dios ñecy co Dios nimay Abraham: “Nihuimbidaamybich ma je tiempo huidibi ti n'agapxtucyich, e huin'it mdöxyijc Sara y'ungbaadip.”

¹⁰ Ji jadüg tïy'ajt. #ch ajt nmij'ap Isaac ytöxyijc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxigy ti huinma'ñ ymüd, oyhuinma'ñ o jibic-huinma'ñ. Dios ninigoob anajty jayjpnï ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n minañ: “Jac ñigi ti ndzocyich Jacob, ca'ydi Esaú.”

¹⁴ ¿Nej n'ocmïnaanïm? ¿Dios ca' tïybi tuñyi? Ca' yjadu'nity. Dios tïydudägy ytuñ. ¹⁵ Com jadu'n Dios nimay Moisés: “Nba'ayohuïpyich ninigoobi pinjaty ndzojcpyich.” ¹⁶ Co Dios jadu'n nimay Moisés paady nejhuïyim co canan paady ycixpi Dios pa'ayohua'ñ jay müd co ajcxy chachñaymija'ljixigixy co tunaangixy oyhuinma'ñ. Hue' je' Dios pa'ayo'n tuñ müd jäy ajcxy ninigoob co jadu'n tzocy. ¹⁷ Com jadu'n jaybety ymiñ ma Dios ñecy co Dios jadu'n nimay je Egipto rey:

#ch müch ti nmöy m'ane'mïn, jigix jëbi jäy ajcxy ixipy je mij ayo'n huidibi ndunaamybich ma müch mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmïdzojcpy.

¹⁹ Huin'it müch ajcxy xyñimähuibich: “Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbidip nej yi' tzocyi?”

²⁰ Müch jäy, ¿mbïn müch co ti myajcapxycoja'ñ myaj'ayuccoja'ñ müd Dios? ¿Nej jëbi pochytüdztïmïy je pin anajty ti yajcojyii? “¿Nej co jadu'n ti xyajcojyich?” ²¹ Tüdzyajcojpi yi' yaj'oyïyb je mo'ntz nej tim tzocy. Pen yajcojamyb tüz oybi tzooyatypi, yajcojpy je'. Peni yajcojamyb tüz huidibi ca' oyjatyity, yajcojpy je'.

²²⁻²⁴ Tim jadu'n nej je tüzzyajcojpi yaj'oyïyb mo'ntz nej tzocy, nañ jadu'n Dios tuñ müd jäy nej tzocy. Dios ti yajcojy jäy, e müd ymic'ajt jëb tzaachytuñ müd ypocy ycixpi. E co jadu'n tzaachytunïpy, chi ñiguëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytunïyb ajcxy. Com Dios ti yajcojy jäy paady jëb nañ jadu'n pa'ayoohuïpy etz may'ajt tunïpy müd yi' ajcxy, jëbi ajcxy paadip yi' y'oy'ajtin. Dios #ch ajt ti xyhuin'ijxim nijëjity judíojäy, etz nijëjity huidibi ca' yjudíojäyity, jëbi ajt n'alma nidzoocïn paady. ²⁵ Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi #ch ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogäänibich cham.

26 E nañ jadu'n jadüg'it Oseas cojay: “E je jäy ajcxy huídibi anajty tzinaayb ma canaag naax cajp huídibi anajty ca' Dios yjäy'adyii, jëb ñaydiyii Dios yjäy, je Dios huídibi huinixii tzinaayb.”

27 Nañ jotmay müd co Isaías jada tñy'ajt ycojay ma ñecy ma jadu'n ymina'ñ: “Oy ixypy ajcxy ti yjamayy jadu'n nej tzaa'ung yajpaady ma mejy ypa', nihueñ ajcxy y'alma ñidzoocin pada'ñ. 28 Com Dios mic ooy cõtujcin müdity, e ca' mimecxtugipy jäy ajcxy ypocytunii huinixii. E mic'amy tzaachypí möhua'ñ naaxhuinyjäy müd ypocy ycixpi co anajty xii tiempo paatni mabaad agapxtujcy.” 29 Isaías ñajtzcapxiiy jadu'n jecy'ajty:

Pen ca' ixypy je Huindzin Dios huídibi ane'mdaayb jii by tzajpjoty etz ya naaxhuiñ, capubejty yi Israel jäy, co ca' ycajacyajtzooci nijejity ajcxy, ycacödigoyday yi' ajcxy, tim jadu'n nej je jäy ajcxy yjajty jim ma Sodomo cajp etz Gomorra cajp, cödigoyday ajcxy.

Yi judíojäy ajcxy etz Jesucristo y'ayuc ytiy'ajt

30 Jadu'n jëbi mhujihuiygyxy huídibi ti nyajnijayygyxy jadu'n nej Dios ytun müd jäy ajcxy. Yi jäy ajcxy huídibi ca' yjudíojäyity, huídibi ca' cuyduñ Dios ycõtujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. 31 Per yi judíojäy ajcxy huídibi jip'ixp co tudägy'ajtin padaangixy müd co tzachcuydungixy Dios ycõtujcin je jecyip, ni ca' ajcxy mimadägy cuydundähuipy, e ca' ajcxy tudägy'ajtin paady ma Dios. 32 ¿Na'amy co ca' ajcxy mimadägy cuydundäy Dios cõtujcin? Je' co ajcxy ca' mijpidägy huídibi Dios ti tuñ müd yi' ajcxy ycixpi. Hue' ajcxy tijy co tudägy'ajtin padaangixy ma Dios müd co tzachcuydungixy Dios ycõtujcin je jecyip. Hue' ajcxy ayo'n ypadamyb co ca' Cristo cöbijccixy, tim jadu'n nej jäy ayo'n paady co ycöney ma tüg tzaa. 33 Com jadu'n jaybety ymiñ ma Dios ñecy, ma Dios jadu'n ymina'ñ:

Nguexaamybich jim Jerusalén tüg jäy. Mayjäy ca' mijpidäga'ñ je jäy, e ayo'n ajcxy ypadamyb ma ich. Tim jadu'n nej ixypy ti nbidägyich tüg tzaa ma jäy ajcxy huaad ycönejpcixy, e chi yciday ajcxy. Tüg'óciy jäy pinjaty mijpidaacp je jäy huídibi nbidägaamybich jim Jerusalén, hue' ajcxy yi' ca' ayo'n pada'ñ ma ich, nbocyhuinmecxaamybich yi' ajcxy.

10

1 Miich ajcxy nmigügtjicich, ooy ndzocyich cixyjot huinjot co yi Israel jäy nidüg'óciy pada'ñ y'alma ñidzoocin. Ooy ich ñigi Dios nmibijctzoy müd yi' ajcxy ycixpi. 2 Jëbi ndiy'ajt yecyich co yi Israel jäy ooy ajcxy Dios jayajmij'ajtcixy. Hue' janchtiy ca' ajcxy huinjihuiyi Dios ytiy'ajt. 3 Com nejhuiyb ajcxy co Dios yajpocyñihuädzamyb jäy ajcxy, hue' ajcxy ca' huinjihuiy nej Dios yhuinma'ñ müdity. Ci'm anajty chachhuinma'ñ ixtaaygixy nej ajcxy jëbi ñayajpocyñihuädzigixipy. Ca' anajty ajcxy cöbicy Dios ytiy'ajt nej jëbi huaad ñayajpocyñihuädziyb.

4-5 Yi judíojäy ajcxy ca' huinjihuiygyxy co je Cristo y'oy ya naaxhuiñ, e chi yajtigooyi Dios ycõtujcin ymic'ajt huídibi Moisés yjay, jigix jëbi tüg'óciy jäy pinjaty mijpidaacp Cristo ytiy'ajt, huin'it ajcxy paadip tudägy'ajtin. Moisés yjayhuim ma jadu'n ymina'ñ: “Je pinjaty cuydumb je Dios ytiy'ajt, jim mic'ajt paadipy müd chinaayin ycixpi.” 6-7 Per yi jäy ajcxy huídibi mijpidaacp Cristo etz cuyduni yi' ytiy'ajt, yi' ajcxy ymina'ñ: “Ca' huaad judíojäy ajcxy yminaangixy jotjoty huinma'ñyjoty: ¿Pin ocpättigihuij tzajpjoty nicx je Cristo yajtzoñ? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?” 8 ¿Nej Dios y'ayuc ymina'ñ? Jadu'n Dios y'ayuc ymina'ñ: “Ti mmidoy miich ajcxy Dios y'ayuc ytiy'ajt ma mgi'm'ayuc, ti jäy ajcxy

capxhuäcxy ma miich, ti mmido'mbijccixy.” Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt ñch ajcxy ngapxhuäcxp. ⁹ Pen miich mgapxypidzimyb mayjäy agujc co miich ajcxy Jesús mHuindzin'adyii, etz mmibijcxy ajcxy ma mjet mhuinma'ñ co Dios ti yajjugypijcxy Jesús co y'o'cy, huin'it m'alma paadip ñidzoocin ma Dios. ¹⁰ Co mmijpidägipy Jesús cixyjet huinjot huin'it Dios xyajpocyñihuaadzipy. Co mgapxypidzimipy mayjäy agujc co miich mijpidägy Cristo Jesús, huin'it yi m'alma ñidzoocin pada'ñ.

¹¹ Com jaybety jadu'n miiñ ma Dios ñecy, ma jadu'n ymïnañ: “Nidüg'ociy jäy huidijaty mijpidacp je Cristo, ca' ajcxy ayo'n pada'ñ ma Dios.” ¹² Jëbi nidüg'ociy jäy mijpidägy je Cristo Jesús com Dios tú'ciy yajhuinhuanïy pocyñihuaatzin ma yi judíojäy etz ma huidi ca' yjudíojäyity. Ji tüg Huindzin je Jesucristo huidibi niHuindzin'ajttaayb. Jesucristo may'ajt oy'ajt tunam mijcajee müd huentimpinjäyity pinjaty pijczoob pubejtin ma Dios müd yi' yxi.

¹³ Com jadu'n jaybety ymiiñ ma Dios ñecy, ma jadu'n ymïnañ: “Nidüg'ociy jäy pinjaty Dios mibijctzoob müd Huindzin Jesucristo yxi, yi' ajcxy y'alma paadip ñidzoocin.” ¹⁴ ¿Nej jëbi jäy ajcxy occohuanïy Jesucristo co huen y'alma ñidzögy, pen ca' anajty ti mibijci je ytiy'ajt? Pues ca' yjadu'nity. ¿Nej jëbi jäy mibicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcxi? Com jaybety jadu'n ymiiñ ma Dios ñecy, ma jadu'n ymïnañ: “Ooy oy jäy ñayjihüyïi co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy.”

¹⁶ Per ca' nidüg'ociy jäy mibicy je oybi tiy'ajt, com Isaías jadu'n cojay ma ñecy ma jadu'n ymïnañ: “Huindzin Dios, ¿pin ti mijpidägy ñch ajcxy n'ayuc?”

¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich miich ajcxy: ¿Nej ca' jada' yi judíojäy ajcxy midoy Dios ytiy'ajt? Janch jadu'n ti ajcxy jamidoy, com jaybety jadu'n ymïñ ma Dios ñecy ma jadu'n ymïnañ:

Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuïy Dios ytiy'ajt? Ñejhuïyb ajcxy. Com jecy'ajty Moisés ycojay ma ñecy ma Dios jadu'n ymïnañ: Nyajpocyñihuaatztähuïbyich yi jäy ajcxy huidibi ca' ñch njäy'adyii, e huin'it miich ajcxy cohuindoyi mjihuïhuipy müd yi' ajcxy yci xpi. Ndunipyich may'ajt müd yi' ajcxy, e huin'it miich yi' ajcxy mmijotmädip.

²⁰ Jadu'n jadüg'it Isaías cojay ma yi' ñecy, ma Dios jadu'n ymïnañ:

Yi jäy ajcxy huidibi ca' xy'ixtäyich, ti xypaadyich ajcxy. Ti nyajniguëxigych ndiy'ajt ma yi' jäy huidibi ca' xyñidiy xyajtïyich.

²¹ Com jadu'n jaybety ymïñ ma Dios ñecy, ma Dios jadu'n nigapxy yi Israel jäy co jadu'n ymïnañ:

Jabom jabom ti njamimecxtucyich yi Israel jäy ajcxy. Ti njayajnimäyich ñch ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yi Israel jäy ajcxy huidibi ti ypocynihuaatzcixy

¹ Paady n'amidoogixy: ¿Nej ti jada' Dios ix'ijxni ixtijni yi Israel jäy ajcxy? Pues ca' yjadu'nity, Dios ca' yi' ixmachni Israel jäy ajcxy. Com nañ Israel jäy ñch. Abraham nmij'ap'ajtibich nmijteedy'ajtibich e nañ jim ngogájpidyich

ma anajty Benjamín ycogajpity. ²⁻³ Dios ca' ixmach yí yjáy huídibi yhuin'ijx jecy'ajty co jáy'ada'ñyí jígix jébi may'ajt oy'ajt tunipy mñd yí ajcxy. ¿Nej ca' ajcxy mnejhuíy nej jaybety ymiiñ ma Dios ñecy jadu'n nej Elías nigapxy yí Israel jáy ma Dios? Jadu'n ymíñañ:

Huindzin Dios, ti yí Israel jáy ajcxy yaj'öctáy huídibi anajty miich m'ayuc xycapxhuäcxip. Ti ajcxy yajhuindigoydäy je tzaa macxy ma anajty jáy xyhuindzigíy. Naydügpajc ñch ti njachui'myich njaccapxhuäcxyich miich m'ayuc, e nañ xyaj'ögaamich jáy ajcxy.

⁴ E chi Dios y'adzooy nimay Elías:

Ca' mim naydügity, ji ñch ahuing nmídidyich yujcpicy jahuixtujc mil yédyjc huídí xy'ojadajtpich xyhuindzigíyibich chambaad, huídibi ca'ni huin-goxtinäy yí Baal, yí dios falso, ca'pi ti mic'ajt mñdity ni ti tzöc'ajt ca mñdity.

⁵ Tim jadu'n nej Dios mñdity anajty huixtujc mil yédyjctijc jecy'ajty co anajty Elías yjugy'aty, nañ tim jadu'n cham ma ñch ajt nxí ndiempo Dios ymñd nijéjity judíojäy huídibi ti pa'ayoy, e paady ycixpi ti yhuin'ixyí jébi yí jáy'adyíi.

⁶ Com co ixypy ajcxy yajxon cuyduni Dios ycötujcin, ca'p ni ti pa'ayo'n Dios jactunaaní mñd yí ajcxy, com co ti anajty jim Dios y'ayuc ycuycundäyíi.

⁷ ¿Ti ti ytunyí ti yjadyí mñd yí Israel jáy ajcxy? May ajcxy ca' may'ajtin oy'ajtin paady ma Dios jadu'n nej ajcxy jipp'ijxcixy. Jéyi ajcxy huídí Dios huin'ijxi ti ajcxy paatcixy oy'ajt ma Dios. Yí jacjadyíi Israel jáy ajcxy Dios nig ooy yajjotmíj'öccixy. ⁸ Com jadu'n jaybety ymiiñ ma Dios ñecy jadu'n nej Dios yajjotmíj'ögy yí Israel jáy, ma jadu'n ymíñañ:

Tim jadu'n ajcxy nipaady nej jáy ajcxy huídibi ti ymí'öctigooyñí, jadu'n nipaady nej jáy huídibi huiintzip, jadu'n nipaady nej huídibi cönatip.

⁹ David nañ jadu'n ycojay jecy'ajty ma ñecy, ma jadu'n ymíñañ:

Huindzin Dios, cham je jáy tzachnixondägy yí tzinaayin yí jugy'ajtin, ca' ajcxy xyjäymech. Timítiini ajcxy ayo'n möhuipy; tim jadu'n nej iyujc ayo'n paady co yajtüxuuch o co yjut cögäy.

¹⁰ Yajma'ti ajcxy yjot yhuinma'ñ, huen ahuimbijtcixy jadu'n nej jáy huintzpi. Mö ajcxy tzaachypi huinixí huinítiempo, tim jadu'n nej jáy ajcxy tzaachypi jihuíy huídibi jemxypi tzimíccixp.

Yí ypocyhuinmeecxin huídibi ajcxy ca'p yjudíojäyity

¹¹ Co jadu'n yí maybi Israel jáy ca' cöbijccixy Dios ytiy'ajt, ¿nej mdijy, ti Dios y'ixmachyí ajcxy tücci'yí, e yajtigoya'ñ ajcxy? Pues ca' yjadu'nity, ca' Dios ixmach yí Israel jáy ajcxy tücci'yí. Co yí Israel jáy ca' cöbijccixy Dios ytiy'ajt nej Cristo y'o'cy mñd yí ajcxy ypocy ycixpi, paady cöbicy yí huídibi ca' yjudíojäyity, jébi ajcxy y'alma nízoozin paady. Jadu'n Dios ytuñ jígix jébi yí judíojäy ajcxy cohuindoyí jihuíhuipy, e chi nañ jadu'n mippidägipy ajcxy Jesucristo. ¹² Pen yí mayjäy ajcxy huídijaty ca' y'israeljäyity mñj'oy'ajtin mjjotcujc'ajtin ti paady, mñd co yí jacmaybi Israel jáy ca' cöbijccixy Jesucristo, chi nigí oy'ajtin jotcujc'ajtin pada'ñ yí naaxhuiñyáy ajcxy co anajty nidüg'óciy Israel jáy yjothuimbijttaaygixy etz cöbijctaaygixy je Cristo.

¹³ Cham nijayyigixy miich ajcxy huídí ca' yjudíojäyity, com Dios ti xyquexyich ngapxhuäcxich yí y'ayuc ma yí jáy ajcxy huídibi ca' yjudíojäyity. Ooy nyajcopicyich jada ndungich, jígix jébi judíojäy oy'ajtin paady nañ jadu'n. ¹⁴ Ca' jecyity co ñch n'amigügtijc, yí judíojäy ajcxy, cohuindoyí ajcxy jihuíhuipy, co anajty mayjäy huídí ca' yjudíojäyity mippidägy ñch n'ayuc. Co jadu'n ajcxy cohuindoyí jihuíhuipy, chi ajcxy nañ jadu'ñ mippidägipy Jesucristo. ¹⁵ Com pen je naaxhuiñyáy huídibi ca' yjudíojäyity, huídibi Dios

jecy'ajty ca' jäygidaci ajcxy chinaayin, pen ti ajcxy cöbicy Dios ytiy'ajt, pen ti ajcxy oy'ajtin paady ma Dios, müd co Dios ti ixmach yi Israel jäy huidibi ca' cöbicy yi' ytiy'ajt, chi yi Israel jäy co ajcxy jadüg'oc yjothuimbidity etz cöbigipy Dios ytiy'ajt, nañ jadu'n ooy yjotcugihuipy ajcxy, jadu'n nejjihuüy ti ajcxy y'ögy etz nej jihuiy ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajtip, paady nañ jadu'n tüg'öciy Israel jäy Dios jäy'adyii, müd co Israel y'ap'ajtip y'oc'ajtip ajcxy. Tim jadu'n nejjihuüy judíojäy ajcxy tzajcaagy puuducy möy Dios, nañ jadu'n je ytujtuc huidibi jac-hui'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'öciyi je' Dios je'ajtäyii quipy y'aacxy.

¹⁷ Hue' je' nijëjity Israel jäy ca' mijpidägy Dios ytiy'ajt, paady ñajtz'ixiyyi, e may'ajt oy'ajt tuñ müd huingbi jäy huidi ca' israeljäyity. Tim jadu'n nej jihuiy tüg oyguipy huidi tim'ajtp yajpubuxy y'aacx, e je ma ti yajjijppujxtüty, je' yjijp yajpidägy ma huingbi quipy y'aacx. Miich ajcxy huidi ca' yjudíojäyity huidibi ti mibicy je Cristo, ti mbaady Dios y'oy'ajt tim jadu'n nej judíojäy ajcxy jecy'ajty müdity Dios y'oy'ajt. ¹⁸ Ca' huaad amij agix mnayjihuiygyxy, e ni ca' huaad m'ixtiycxy yi judíojäy huidibi ca' mijpidaaccxy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹ Ca' yjecyity co miich ajcxy mina'naangxy co Dios najtz'ixiyy yi judíojäy huidibi ca' mibicy Cristo, jaydëbi miich ajcxy mnaydiyüi co Dios xyjäy'adyii. ²⁰ Tiy'ajt jadu'n nej miich mina'ñ. Dios ñajtz'ixiyy yi maybi judíojäy müd co ajcxy ca' mibicy Jesucristo. E Dios miich ti xycöbicy müd co ti mmibicy Jesucristo. Per ca' huaad miich amij agix mnayjihuiyüi müd co Dios ti xycöbicy. Naygüend'adii yajxon ma Dios ytiy'ajt, tzig' Dios. ²¹ Com Dios ñajtz'ixiyy yi judíojäy ajcxy müd co ca' ymijpidägyii yi' ytiy'ajt. Nañ jadu'n miich ajcxy yi' xyñajtz'ixihua'ñ, pen ca' mmijpidaaccxy yajxon yi' ytiy'ajt. ²² Cuentipic jadu'n nej Dios may'ajt oy'ajt tuñ müd nijëjity jäy, etz mic tzaachytuñ nijëjity jäy. Dios mic tzaachytuñ je judíojäy huidibi ca' ycapxymidooy, etz may'ajt oy'ajt tuñ müd miich ajcxy huidi capxymidoob. Jaccuydun yajxon Dios ytiy'ajt, e nig' Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixihuipy. ²³ E nañ jadu'n yi judíojäy ajcxy huidi ca' mibijccxy Jesús, co ajcxy yhuinma'ñ yajtigadzipy, e mijpidägyipy Jesús, huin'it Dios ycöbigiyyb jadüg'oc, etz Dios müd ymic'ajt jëbi may'ajt oy'ajt tunipy müd yi' ajcxy. ²⁴ Com pen miich ajcxy huidi ca' yjudíojäyity huidibi jecy'ajty anajty ca' Dios jäy'adyii, pen miich ajcxy Dios mic'amy ti xycöbicy, nañ jadu'n jactzojc cöbiga'ñ huidibi ajcxy judíojäyip, pen ycöbijcy ajcxy.

Jadu'n nej Dios yajnidzoocogixihua'ñ Israel jäy ajcxy

²⁵ Miich ajcxy nmigügtijcich, nyajnijayiyb ajcxy jadu'n nej Dios tuna'ñ müd yi Israel jäy, jaydëbi ca' miich ajcxy amij agix mnayjihuihuuyb, etz jaydëbi mnejhuihuipy jada tiy'ajt huidibi ca' pin nejhuiy, co yi Israel jäy ajcxy ooy ajcxy y'aamijity yjotmijity, ca' ajcxy capxymidooy Dios. E jadu'n ajcxy y'ida'ñ mabaad anajty yca'pxy je mayjäy, ca'pi y'israeljäyity je huidibi mijpidägam Jesucristo ytiy'ajt. ²⁶ Nejhuuyim co Dios may'ajt oy'ajt tunamb jadüg'oc müd tüg'öciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymina'ñ:

Jacjiini tüg Israel jäy ymina'ñ huidibi yajnidzögamb ajcxy ma yi' ypocy. Yi' yajtigoyaani Israel jäy ypocy.

²⁷ Jadüg'it jaybety ymiñ ma Dios jadu'n ymina'ñ: Jadu'n nyajhuinhuanuyich yi Israel jäy co yi' ajcxy ypocy nyajtigooybich.

²⁸ Co yí Israel jáy ca' mijpidaaccixy Jesucristo ytiy'ajt, chi Dios ajcxy ñajtz'ixiyyi. E co ñajtz'ixiyyi ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay yí Israel jáy miiid co Dios huin'ijxy yí Abraham, Isaac etz Jacob jecy'ajty jëbi yí yjäy'adyii. ²⁹ Dios ti huin'ixy yí Israel jáy ajcxy jëbi yí yjäy'adyii, etz tüg'óciy huidi yajhuinhuaniiy co möhua'ñ, co may'ajt tuna'ñ miiid yí ajcxy ycixpi. Ymöhuiipy yí, ytunipy yí. Dios ca' y'ayuc yajxigy. ³⁰ Miich ajcxy huidi ca' yjudíojäyity jecy'ajty ca' anajty mmijpidaaccixy Dios. Jadachambi xii tiempo Dios miich ajcxy ti xypa'ayoy, miiid co yí Israel jáy ca' mijpidägy Cristo ytiy'ajt. ³¹ Yí judíojäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjiini Dios pa'ayoohuin tuna'ñ jadüg'oc miiid yí judíojäy ajcxy tim jadu'n nej ytuñ miiid miich ajcxy jadachambi xii tiempo. ³² Com Dios anajty ti yajpocycädäy tüg'óciy jáy co ajcxy ycapxycömidodacy, yí judíojäy etz nañ huidi ca' yjudíojäyity, paady ycixpi Dios pa'ayo'n tuñ miiid nidüg'óciy jáy, judíojäy etz nañ huidi ca' yjudíojäyity, tüg'óciy pin mijpidacp yí ytiy'ajt.

³³ ¡Ooy ycodzigijity Dios! Dios ooy mijcajee may'ajt oy'ajt tuñ miiid jáy ajcxy ycixpi. Dios ooy mijcajee mijhuinma'ñ ti tuñ miiid jáy ajcxy ycixpi. Dios ooy mijcajee ycohuinma'ñity. Ca' ni pin jëbi huinjihuiydäy je ayuc huinma'ñ huidi Dios ymiiid. Etz nañ ca' ni pin jëbi huinjihuiydäy huidibi Dios ytumy. ³⁴ Com jaybety jadu'n miiñ ma Dios ñecy ma jadu'n ymiiina'ñ: Ca' ni pin jëbi huinjihuiydäy nej Dios yhuinma'ñ miiidity. Ca' ji ni pinjäy huidi ti capxhuijy Dios.

³⁵ Ca' ji ni pinjäy huidi tijaty ti ocmooybi Dios. Dios ca' ni ti nuucxy miiidity miiid ni pinjäy.

³⁶ Tüg'óciy huidijaty ñich ajt ya nbaatim, ac jiiby choondäy ma Dios. Yí tüg'óciy ti yaj'oyiydäy, e yí je'ajttaayip tüg'óciy. ¡Tzoc Dios capxpaatim ojadajtim huinixii huinítiempo! Jadu'n jadu'n. Amén.

12

Je jugy'ajtin cixyjot ma Dios

¹ E jadu'n nmigügtijcich, cham ñich miich ajcxy nimaaygixy mictägy, com co Dios ti xypa'ayoogixy, paady ycixpi nay'ayéjicigix naygiyéjicigix amuumdügjot ma Dios. Cuychinayí yí ytiy'ajt yajxon jabom jabom. Tzinaaygix miiid huadz mjot mhuinma'ñ, jadu'n nej Dios jëbi jäygidägy yí mdzinaayin. Jada je tiy'ajt nej jëbi Dios m'ojadajtcixy tiydudägy. ² Ca' ajcxy mguydungixy mguychinaaygixy yí naaxhuiñyjäy ajcxy yjibicjot yjibic-huinma'ñ huidibi tzinaaygixp jadachambi xii jadachambi tiempo. Com Dios ti xymooygixy jemybi mjot jemybi mhuinma'ñ, paady mguydunipy ajcxy yí ytiy'ajt. Ixpijccix Dios ytiy'ajt, jigix ajcxy mnejhuñhuiipy huidibi tiy'ajt Dios chojcyp mguydunipy, etz jigix mhuinjihuiipy je oyhuinma'ñ, je tudägyipi huinma'ñ huidibi Dios yjäygidacpy, je huinma'ñ huidi huadzip ca'pxyip.

³ Com Dios may'ajt oy'ajt ti tuñ miiid ñich etz ti xymöyich jada tung co ngapxhuäcxich yí y'ayuc, paady ñich miich ajcxy nimäy nidüg'óciy co ca' huaad amij agix mnayjihuiiyigixy, ca' huaad nigi anaxy mnaygömáayigixy ci'm. Nidüg nidüg ci'm huinmaaygixy yajxon huidi tung jëbi myajnicxcixy, jadu'n nej Dios huijy'ajt cujc'ajt ti xymooygixy. ⁴ Jadu'n nej ñich ajt nninïcx ymiiid yhuin y'ahuac etz yci' ytecy, je ninïcx abicy ytung miiidity, je huin abicy ytung miiidity, je y'ahuac abicy ytung miiidity, etz je ci' tecy abicy ytung miiidity.

⁵ Nañ tim jadu'n ñich ajt huidi mijpidacp Cristo, e ni may ñich ajt, e tügpicy jáy

ñich ajt com tú'ciy nmibijcim. E nije' nije' Dios huijy'ajt cujc'ajt ti xymooyim abicyjaty, nej jëbi nije' nije' Dios ytung nyajnicxim.

⁶ Com abicyjaty Dios ti xymooyim huijy'ajt cujc'ajt, paady copicy nyajtuunim nije' nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt cujc'ajt jëbi ngapxhuäcxim yi' y'ayuc, copicy ngapxhuäcxim mibaad ixpijcin nmüd'ajtim. ⁷ Pen Dios huijy'ajt cujc'ajt ti xymooyim co jëbi nbubejtim nmigügtijc, copicy nmigügtijc nbubejtim. Pen Dios huijy'ajt cujc'ajt ti xymooyim jëbi nyaj'ixpijcin nmigügtijc, copicy ndung'ajtim yaj'ixpigii. ⁸ Pen Dios huijy'ajt cujc'ajt ti xymooyim co jëbi ngapxhuijim nmigügtijc, co jëbi njot'amijmooyim nmigügtijc, copicy ngapxhuijim nmigügtijc, etz njot'amijmooyim nmigügtijc agujc jotcujc. Pen nyejcin tijaty ma nmigügtijc, copicy agujc jotcujc nyejcin. Je huidi ajcxy nigohuajc'ajtp mibijcpidijc copicy yajxon y'ané'mgixipy. Pen Dios huijy'ajt cujc'ajt ti xymooyim co jëbi nbubejtim jäy ajcxy huidibi ayo'n müd jotmay müd, copicy agujc jotcujc nbubejtim pinjaty ayo'n müd jotmay müd.

Nej mibijcpidijc huaad jugy'ajtcixy chinaygixy

⁹ Naychójcigixy nayjihuiyigixy miñ xyipy amuumdügjot, ca' y'ametz yjotmetzity. Ca' mnijot'ajtcixy jibic jot jibic-huinma'ñ. Nijot'ajtcix nigi oyjot oyhuinma'ñ. ¹⁰ Naychójcigix nayjihuiyigix amuumdügjot, jadu'n nej ypadyii mnaymigüg'ajtigixipy ma Jesucristo. Nayyajmij'ajtigix nigi nidüg nidüg miich ajcxy.

¹¹ Naymic'ijxigix cixyjot huinijot, ca' mnuux'ajtcix. Tungix amuumdügjot müd mHuindzin Jesucristo ycixpi.

¹² Tzinaaygix agujc jotcujc, com mnejhuuyb ajcxy co mbada'ñ oy'ajtin ma Dios. Mecxtujccix yi' tzaachypí ayo'n huidibi mmínajxyp myajnajxyp. Mibijctzoogix Dios jabom jabom.

¹³ Naybubéjtigix miñ xyipy, pen yajmayajtpy migüg tijaty. Nayyajättácigix miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmidzip huen Dios may'ajt oy'ajt tuñ müd yi' ycixpi. E ca' mnibijctzohuiy co huen ayo'n paadipy.

¹⁵ Tzoc jotcujc nayjihuiyim co ajt nmigügtijc jotcujc ñayjihuiyi. Tzoc müdtajim müdmayim nmigügtijc pen tajp mayb.

¹⁶ Ooy yajxon nayyaj'igtigix naygodigiiyigix. Ca' amij agix mnayjihuiyigixy. Migüg'aduyb yi' mmigüg huidi ayoob. Yung naxy müd'at mjot mhuinma'ñ, ca' mnaygömáayigixy.

¹⁷ Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jëbi jäygidägy. ¹⁸ Oy nayyaj'igtigix müd nidüg'óciy jäy mabaad mmadägy. ¹⁹ Miich ajcxy migügtijc, co jäy jibic xymidundigóoygixipy, ca' nañ jadu'n ajcxy myaj'ahuimbidipy, mimecxtugipy ajcxy, com Dios yi' tzaachytunip yi' jäy ajcxy huidi anajty xymidundigóoygixp. Com jaybety jadu'n ymiñ ma Dios ñecy jadu'n yminañ: “ñich nyaj'ahuimbidipyich nej anajty jäy xymidundigóoygixy.” ²⁰ Co jäy xymidundigóoygixipy myaj'ahuimbidipy ajcxy oybi, com jaybety jadu'n ymiñ ma Dios ñecy, ma jadu'n yminañ:

Pen yi' mmidzip yubo'cip, myajcayipy myaj'ügipy, pen yi' mmidzip tidziyip, myajni'ügipy. Co jadu'n mdunipy müd mmidzip huin'it tzöydu'n jihuihuipy.

21 Pen myaj'ahuimbijtpy jibic co jäy xymidundigoy, ti anajty jibic-huinma'ñ xymimadägy. Hue' janchtiy yajtun mecxtujcin etz oyhuinma'ñ, e jadu'n jibicpi mimadägipy müd oybi.

13

1 Copicy co nidüg'óciy jäy capxymidóogixipy yi cajp tungmüdpi etz yi gobierno tungmüdpi. Ca' ji ni tüg tungmüdpi huidibi jëbi y'ane'my pen Dios ca' a'ixiy. Com Dios jadu'n cötujcin ti yajhui'my co huen jii'aty tungmüdpidijc, paady ycixpi tungmüdpidijc nidüg'óciy jim mic'ajt paady ma Dios. 2 Paady jäy ajcxy pinjaty ca' ycapxymidoy ma tungmüdpidijc, hue' tundigooyb ma Dios e tzaachypi ajcxy ypadaamyb. 3 Yi mijtungmüdpi ca' yi' ajcxy adzigiy yi jäy huidijaty oyhuinma'ñ müd. Hue' janchtiy yi' ajcxy chaachytunipy yi jäy huidi jibic-huinma'ñ müd. Pen mdzojcp co ca' tzaachypi mbaadipy ma yi tungmüdpi, hue' janchtiy oybi mdunipy, e huin'it m'idipy jotcuyc. 4 Com Dios ti pidägy jada tungmüdpi müd miich ajcxy ycixpi, jigix jëbi jotcuyc ajcxy mdzinaaygixy. Pen mdundigooyb huin'it je tungmüdpi mdzighuipy, com yi' ymüid mic'ajt jëbi tzaachytuñ jäy ajcxy huidibi tundigooyb. Com Dios ytung ytuunipy etz ycuymunipy Dios ycötujcin jadu'n nej Dios xyñajtz'ane'miym, copicy co tzaachytuñ je jäy ajcxy huidibi tundigooyb. 5 Paady ycixp copicy mgapxymidohuipy tungmüdpidijc, jigix ca' miich ajcxy Dios xychaachytunipy e nañ jotcuyc mnayjihuihuib co ca' anajty ti ti mdundigoy. 6 Yi tungmüdpidijc Dios ycixpi ajcxy ytuñ, e ymüid ajcxy ycötujcin, paady ycixpi copicy mmigüedipy ajcxy.

7 Mgüedipy ma yi tungmüdpidijc huidibi xypaatp. Co ajcxy cajp meeñ yajmucy, migüedipy. Co je gobierno tungmüdpi pidägy impuestos, migüedipy. Jäy ajcxy huidijaty tungmüid myajmij'adipy, etz huidi mijtungmüid mgömayipy. 8 Ca' pin minuucxy'adib. Tzoc jihu' mmigügtijc, e mgüedipy oy'amy huidibi mnuucxyp. Co yi mmigügtijc mdzogipy mjihuipy ti anajty mguydundäy Dios ycötujcin. 9 Jadu'n Dios ycötujcin jaybety ymiiñ, ma jadu'n ymina'ñ: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäy'ogipy. Ca' mmigüg m'adzojipy ti ymüid." Pen mdzojcpy mjihuib migüg nej miich ci'm mnaychogyii ti anajty mguydundaayi Dios y'ane'min ycötujcin. 10 Je naychojcin je nayjihuiyin ca'p je' ti jibicpi ti tzaachypi tuñ ma je migüg, co jadu'n jada mguydundaahuipy ti anajty Dios ycötujcin mguydundaayi.

11 Com miich ajcxy mnejhuib co huingon je xii je tiempo mina Jesucristo mina'ñ jadüg'oc ya naaxhuiñ, paady ycixpi jipp'ijxcix ajt nHuindzin Jesucristo co tzojc ymünipy. E jadachambi ti yjac-huingoni mina miina'ñ iich ajt nHuindzin Jesucristo, ca'yd co oga'n nmibijcim. 12 Canaag jimijt jäy ajcxy ahuijxy jipp'ijxpy co Dios yajnödöga'ñyii ajcxy y'alma, jadachambi ti yhuingoni je xii je tiempo mina n'alma ajt nüdzoocin padaanim. Paady ycixp tzoc ixmajtzim yi jibic-huinma'ñ yi huidibi jäy ycuymunyb huidibi ca' Dios ytiy'ajt nejhuib. Tzoc cuychinaayim cuyjy'ajtim Dios ytiy'ajt. 13 Tzoc tzinaayim juy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijtim xiicyaax xiictinaayim. Ca' huaad ndundigooyim müd huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmi'ijxtinaayim. 14 Tzoc cuychinaayim cuyjy'ajtim Jesucristo ytiy'ajt. Tzoc tzinaayim tydudägy jadu'n nej Jesucristo tydudägy ti chinäy ya naaxhuiñ. Ca' nguyduunim ti jibicpi ajt n'aa njot yja'adzojcpy.

14

Ca' migüg mbocy'ixy

¹ Miich ajcxy nmigügtijcich, copicy mgöbigipy agujc jotcuje ma miich mnayyöymújcigixy ajcxy yi migügtijc huidibi mibijcp je Cristo, per ca' tıydudägy huinjihuıy je Cristo ytiy'ajt. Mgöbigipy per ca' mhuingapxpedıpy, ca' ti myaj'ayucyoonıpy mıid yi' ajcxy. ² Ti migügtijc huidibi minamb co Dios ca' ti jıicxy capx'aducy, etz jėbi ajcxy jıicxy huenytım ti jıicxyıty. Etz nañ ji migügtijc huidibi minam co Dios ti capx'aducy tzüch, paady ajcxy jıicxy'adyii je'jada'ajty aay ujtz. ³ Yi migüg huidibi tzüch tzützp ca' huaad ıxtıy je ymigüg huidibi yjıicxpy je'jada'ajty aay ujtz. E nañ ni yi migüg huidibi jıicxp aay ujtz ca' huaad ıxtıy yi migüg huidibi tzüch tzu'tzp, com Dios ycöbijctaayb je jäy ajcxy huidibi ti mibicy Jesucristo. ⁴ Ca' huaad miich ajcxy mnımähuıpy yi mmigüg co ca' oytuñ, tim jadu'n nipaady nej co tög jäy nımähuıpy huingbi jäy ytumbi co ca' oy ytuñ. Dios ci'm nımähuıp huıdi ajcxy mibijcp Jesucristo, pen oytuñ o ca' oytuñ. Dios ypubejtyp pinjaty mibijcp, paady madaacp ajcxy ma chinaayın.

⁵ Nijėjıty ajt nmigügtijc ymına'ñ co ooy ycopıcyıty n'amay'ajtim nijėjıty xıı, jacjadyii jäy ymına'ñ co ca' ycopıcyıty n'amay'ajtim jada xıı. Huen nidüg nidüg yci'mhuınma'ñ yajtuñ pen y'amay'adamyb, o pen ca' amay'ada'ñ nije' nije' xıı.

⁶ İch ajt nmigügtijc huıdi amay'ajtp nijėjıty xıı, hue' ajcxy tijy co Dios jadu'n tzojcp. E nañ İch ajt nmigügtijc huıdi tzüch tzu'tzp, hue' ajcxy tijy co Dios jadu'n tzojcp, etz nañ yajnaxyp Dioscojuyip ma Dios mıid yjıicxy ypıcy ycıxpi. Nañ tim jadu'n ajt nmigügtijc huıdi ca' tzüch tzüdz'a'ñ, hue' tijy co Dios jadu'n tzojcp, etz nañ yajnaxyp Dioscojuyip mıid yjıicxy ypıcy ycıxpi.

⁷ Ca' İch ajt nayyajtızınaayım amidzooci'm, nañ jadu'n ca' İch ajt ci'm ndzojcin co n'o'cim. ⁸ Pen njactızınaayım hue' anajty nguyduunım ajt nHuındzin Jesucristo chojcin. Pen n'o'cim yi' anajty jadu'n ti yajcöducy. Pen njactızınaayım, o pen n'o'cim, tú'ciy nipaady, com Jesucristo nHuındzin'ajtim ma yi tızınaayın etz ma yi o'cin. ⁹ Paady ycıxp Cristo y'o'cy etz yjugypıjcy jadüg'oc jıgıx jėb nihuındzin'ajttäy yi' yjäy huıdibi jactızınaayb jacjugy'ajtp, etz jıgıx jėb nihuındzin'aty yi' tııbi y'ögy.

¹⁰ ¿Na'amy co mmigüg mdzachpocy'ixy? o ¿Nej co mmigüg mdzach'ıxtıy? Ca' jadu'n y'oyıty co ajcxy jadu'n m'ıdİch. Com nidüg'öciy ajt njădaanıı ma Dios ytiydundac. ¹¹ Com jadu'n jaybety ymiñ ma Dios ñecy, ma jadu'n ymına'ñ:

Janch janch co İch, je tögpaıjcpı Dios, jadu'n nmına'ñıch co tög'öciy naaxhuıñjıy xyhuıngoxtıñähuıbıch xyhuındzigıhuıbıch, etz nañ tög'öciy naaxhuıñjıy xycapxpaadıbıch co İch je' tögpaıjcpı je Dios.

¹² Com Dios nhuındzin'ajtim, paady ycıxp nidüg'öciy İch ajt nayguëxıctăhuaanıı ma Dios yhuınduu, chi Dios xy'amıdohuaanıı nej ti ndızınaayım ti njugy'ajtim nidüg nidüg.

Ca' migüg myajhuınma'ñyđıgooygıxy

¹³ Paady ycıxpi ca' huaad naynixiic naynıgapxım miñ xyıpy. Hue' janchtıy miich pıdaaccıx mhuınma'ñ co ca' ti mdúngıxıpy huıdi mmigügtijc ca' jäygidägy, huıdi mmigüg yajpocycăhuıb. ¹⁴ Nnejhuııybıch tıydudägy co ajt nHuındzin Jesucristo ytiy'ajt xyajnejhuııyım co jėbi njıicxım huen tim huıdi jıicxy tim huıdi pıcy. Je jıicxy je pıcy ca' ma ycobocy. Per pen tög migüg yhuınma'ñ pıdacp co Dios ca' jäygidägy co yi' yjıicxpy nijėjıty jıicxy pıcy, pues ca' yhuaadıty co yi' jadu'mbi jäy jıicxy huıdi yi' ytıjpy co ca' huaad njıicxım.

¹⁵ Pen ca' m'oy'ıty mıid tög migüg co ti mjıicxy je jıicx pıcy huıdibi yi' ytıjpy co Dios ca' jadu'n yaj'cöducy, chi ca' anajty mdzocy mjıihuıy yi' mmigüg nej

ypadyii. Com nañ Cristo ti y'ögy mïid yi mmigüg ypocy ycixpi, paady ca' huaad myajtigoy yi mmigüg, mïid co mjicxy huidi yi' ca' jäygidägy. ¹⁶ Ca' ajcxy m'a'ixi'ygixipy co jibic yajni gapx yajnimiydägipy huidibi miich ajcxy myajnajxp co y'oyity. Oy miich mjahuinjihuïy Dios ytiy'ajt, per ca' huaad mdunipy huidi yi mmigüg ca' jäygidägy, e huin'it xyñigapxipy jibic. ¹⁷ Canan Dios jadu'n ytiy'ajt xyñajtz'ane'miïyim huidijaty huaad njicxim n'uucim, o huidi ca' huaad njicxim n'uucim. Hue' janchtiy ti xyñajtz'ane'miïyim nej jëbi tiydudägyi ndzinaayim njugy'ajtim. Nej jëbi jotcuje n'ijtim mïid ajt nmigügtijc. Nej jëbi jotcuje nayjihuiïyim mïid Dios ymïc'ajt ma njot nhuinma'ñ. ¹⁸ Co jadu'n nguyduunim nej Cristo ytiy'ajt ti xyñajtz'ane'miïyim, huin'it jäygidägipy Dios etz nañ jadu'n jäygidägipy jäy ajcxy nej anajty nduunim.

¹⁹ Tzoc panicxim je huinma'ñ jadu'n nej jëbi ndzinaayim agujc jotcuje mïid ajt nmigügtijc, ca' ma ti tzip ti capxy nmïid'ajtim. Tzoc yajtuunim je huinma'ñ jadu'n nej jëbi huaad naybubejtim nidüg nidüg nej jëbi huaad nguychïnaayim Dios ytiy'ajt. ²⁰ Ca' huaad nyajtigooyim Dios ytung mïid tzip capxy jadu'n nej huidi jëbi huaad ndzüdzm, etz huidibi ca' huaad ndzüdzm. Janch tiy'ajt co Dios ca' ti jicxy ti picy capx'aducy, per pen njicxim huidijaty nijëjity ajt nmigügtijc yajcoboicy, e jadu'n nyajhuinma'ñyidigooyim ajt nmigüg, chi nmïidundigooyim Dios ytiy'ajt. ²¹ Tiy'ajt jadu'n co ca' huaad tzüch ndzüdzm etz ca' huaad vino n'uucim, o jactijaty huidibi ajt nmigüg yajcoboicy. Com co jadu'n ajt n'idïdzim, hue' anajty ajt nmigüg nyajhuinma'ñyidigoyaanim ma ymïbijcin. ²² Miich ajcxy huidibi huinjihuïyb Dios ytiy'ajt co Dios ca' capx'aducy ti jicxin ti pijcin, ca' mnimiydacconaxipy mïid jäy ajcxy. Dios ñejhuïyb co miich mhuinjihuïy yi' ytiy'ajt. Jëbi jotcuje mdzinähuipy pen nguychïnaayb je huinma'ñ huidibi miich mnejhuïygixyp co ytudägyity, e huin'it ca' jibic mnayjihuihuïyb ajcxy. ²³ Tundigooyb yi migügtijc huidibi jotmetz jicxp nijëjity jicxy picy, mïid co tzigïyb yi' co Dios ymïjotmädiyb co ti jicxy huidi ytijpy co ycobocy. Tundigooyb jadu'n com ca' ti cuyduni Dios ytiy'ajt nej ci'm ti yajni guejy. Pen ca' nguyduunim jadu'n nej nhuinjihuïyim Dios ytiy'ajt, tundigooyim anajty.

15

Tzojicx migügtijc, ca' ñaydüg mnaychogyii

¹ Hich ajt huidibi tiydudägy nmïbijcim etz nhuinjihuïyim Dios ytiy'ajt, copicy nmïmecxtujcim ajt nmigügtijc huidibi ca'ni huinjihuïy yajxon Dios ytiy'ajt. Ca' huaad ti nduunim mïid ngi'm jäygidacïn ycixpi. ² Copicy nyajtuunim oyhuinma'ñ mïid ajt nmigügtijc, jadu'n nej jëbi ajt nmigüg jäygidägy, etz jadu'n nej jëbi nbubejtim ajt nmigüg mïid ymïbijcin. ³ Com nañ Cristo ca' ti ytuñ mïid yci'm jäygidacïn ycixpi, com jaybety jadu'n miñ ma Dios ñecy, ma je Cristo nimay Dios Teedy: “Miich mmïdzip ajcxy huidibi xyñigapxp xyñi'ojïyb, xyñigapxpich xyñi'ojïybich ajcxy nañ jadu'n.” ⁴ Com tüg'óciy Dios y'ayuc huidibi ycojay jecy'ajty, hue' cojay mïid ñch ajt ycixpi, jigix jëbi Dios ytiy'ajt nbaatim. Dios ytiy'ajt xyajnejhuïyim co Dios jadu'n tzocy co nmïmecxtujcim ajt nmigügtijc. Nañ Dios y'ayuc xyjot'amijmooyim, e nañ xyajnejhuïyim jadu'n jëbi njijp'ijxim pubejtin ma Dios. ⁵ Com Dios, yi' je' huidi xypubejtim mïid mecxtujcin, e nañ xyjot'amijmooyim, paady huen Dios may'ajt tunipy ma miich ajcxy mjot mhuinma'ñ, jigix jëbi mmïid'idipy tú'ciy mjot mhuinma'ñ nej Jesucristo yjot yhuinma'ñ mïidity, e jadu'n jëbi mnayyaj'oy'ijtigixy jotcuje ca' ma tzip capxy. ⁶ Dios miich ajcxy xypubedipy xypudigïhuipy, jigix jëbi myajtügïygixy mjot mhuinma'ñ, etz tú'ciy

m'ojadájtcixipy mhuindzigíygyixipy Dios Teedy etz ñich ajt nHuindzin Jesu-
cristo.

Jesucristo y'ayuc yajcapxhuäcxy ma huídibi ca' yjudíojäyity

⁷ Naygöbícigix nidüg nidüg agujc jotcuyc, tim jadu'n nej Cristo xycöbijccixy agujc jotcuyc. Co mnaygöbícigixipy nidüg nidüg agujc jotcuyc, huin'it Dios capxpaady y'idipy. ⁸ Janch tiy'ajt co Cristo y'oy ya naaxhuiñ, oy pubety judíojäy ajcxy, e jadu'n cuyduñ Dios ytiy'ajt huídi yajhuinhuaníy Abraham, Isaac etz Jacob jecy'ajty co jadu'n tuna'ñ mñid yí' ajcxy ycixpi. ⁹ Nañ jadu'n Cristo ooy pubejty yí huídibi ca' yjudíojäyity, jaydëbi ajcxy capxpaadipy Dios, mñid co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David ymínañ:

Com miich Huindzin Dios ti xycohua'ñich paady miich ngapxpaady ma yí jäy
ajcxy huídibi ca' yjudíojäyity. ñich miich nhuin'ñhuipy mñid himnos.

¹⁰ E nañ jaybety jadu'n ymiñ ma Dios yñecy:

Jotcuyc'ajtcixy quipxy mñid Dios yjäy miich ajcxy huídi ca' yjudíojäyity.

¹¹ E nañ jaybety jadu'n ymiñ ma Dios ñecy, ma jadu'n ymína'ñ:

Capxpaatcix yí Huindzin Dios miich ajcxy huídi ca' yjudíojäyity. Capxpaatcix
yí Huindzin Dios miich ajcxy nidüg'óciy naaxhuiñyjäy.

¹² E Isaías ycojay nañ jadu'n ma yí' ñecy, ma jadu'n ymína'ñ:

Ma'xung'adamb tüg Isaí y'ap y'oc, e yí' ane'mamb yí jäy huídibi ca'
yjudíojäyity. Co yí jäy ajcxy huídibi ca' yjudíojäyity mijpidägipy je
mij'ane'mbi, hue' ajcxy yjijp'ijxpy co möhuaanip oy'ajt.

¹³ Nmíbijctzooybich Dios mñid miich ajcxy ycixpi huídijaty mibijcp Je-
sucristo, com njijp'ixxim co Dios xymöhuaanim oy'ajtin. Nmíbijctzooybich
Dios mñid miich ajcxy ycixpi co huen xyajjotcugíhuip ajcxy, e nañ co huen
xyajpooxipy mjot mhuinma'ñ. Nmíbijctzooybich Dios co huen xypubejtcixy
xypudigíygyixy mñid yí' yjihui'ñ ymic'ajt, jaydëbi mijjp'ixipy ajcxy co mbaadip
oy'ajtin mijcajee ma Dios.

¹⁴ Miich ajcxy migügtijc, jotcuyc nayjihuíyijich mñid miich ajcxy ycixpi, com
nejhuíyibich co miich ajcxy mñidity oyjot oyhuinma'ñ, e nañ mhuinjihuíyb
ajcxy tüg'óciy Dios ytiy'ajt, paady jëbi mnayyaj'ixpícgixy nidüg nidüg.
¹⁵⁻¹⁶ Jotmic'amy ti nyajjäymejtzcodyich miich ajcxy nijëjity Dios ytiy'ajt ma
jada necy huídi nyajnijayíyb ajcxy cham, com Dios may'ajt oy'ajt ti tuñ
mñid ñich, e ti xyhuin'ixyich jaydëbi nduñich Jesucristo ytung ma yí jäy ajcxy
huídi ca' yjudíojäyity. Jadu'n nduñich mñid Dios ycixpi, co ngapxhuäcxyich
je oybi tiy'ajt jadu'n nej Jesucristo y'o'cy mñid jäy ajcxy ypocy ycixpi. Jadu'n
Jesucristo ytuñ jigix jëbi Dios cöbigipy yí mayjäy ca'pi yjudíojäyity huídi ti
míbicy Jesucristo etz huídibi yí Espíritu Santo ti yajhuäch je jibicp ma ajcxy
yjot yhuinma'ñ.

¹⁷ Com Jesucristo ytiy'ajt yajpaatp ma ñich njot nhuinma'ñ, paady ycixp
ooy jotcuyc nayjihuíyijich co nduñich mñid Dios ycixpi. ¹⁸ Jada janchtiy ñich
nyajmñidmíydacy miich ajcxy je may'ajt huídi Cristo ti tuñ co ngapxhuäcxyich
yí' y'ayuc. Ca' nyajmñidmíydaaccixy huídi Cristo ytumyib mñid jacpinjaty. Mñid
co ngapxhuäcxyich Cristo y'ayuc, e nañ mijhuinma'ñ ndumyibich mñid Cristo
ymic'ajt, paady mayjäy ycapxymidooyb Dios huídi ca'p ajcxy yjudíojäyity.

¹⁹ Ti ngapxhuäcxyich tüg'óciy Cristo ytiy'ajt nej jëbi ajcxy y'alma ñidzoocin
paadip. Jim nyajtzondacyich Jerusalén, e ti nhuidijttäyich canaag agajp
mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich
xypudigíyich co ñich mijhuinma'ñ nduñich, etz Dios ytiy'ajt nyéjicibich. ²⁰ Ooy
nijot'atyich co ngapxhuäcxyibich Jesucristo ytiy'ajt ma anajty ca' pin jayijp

capxhuäcxyñi. Iich oga'n Jesucristo y'ayuc jim nminicxi ma yi jäy ajcxy huïdi ca' anajty midoy Jesucristo ytiy'ajt. Jadu'n nduuñich, jigix ca'ydi njijptigiyyich ma huingbi anajty jayijp ti capxhuäcxi Jesucristo ytiy'ajt.

²¹ Com jaybety jadu'n ymiñ ma Dios ñecy, ma Dios jadu'n ymina'ñ:

Yi jäy ajcxy ymidohuaanip Cristo y'ayuc huïdibi ca'ni anajty midoogixy. Yi jäy ajcxy yhuinjihuïhuaamyb je Cristo ytiy'ajt huïdibi ca'ni anajty nejhuïygyxy co yjiiyty je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxich Cristo ytiy'ajt canaag agajp, paady ca' nya-njibadiyich nicxibyich ma miich ajcxy. ²³ Canaag jimijt ndzachnijot'atyich anajty nicxa'ñich ma miich ajcxy. Ixti chamni ti nhuïdijttäyich majaty anajty nhuïdida'ñich. ²⁴ Paady njijp'ijxypich co jëbi nnaxïhuïbich ma miich ajcxy co anajty nicxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmiydaacim. Nañ hue' njijp'ijxypich co xypubedaambich miich ajcxy miid ndu'amgixpich. ²⁵ Jayijp nnicxa'ñich jim Jerusalén, chiini nnicxa'ñich ma miich ajcxy. Nminicxaamybich jim Jerusalén hueeni meeñ huïdibi nyegaamybich ma yi mibijcpidijc jim Jerusalén miid ayoobtjic ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtjic jim Jerusalén huïdibi mijpidacp Jesucristo. ²⁷ Ooy ajcxy jotcuyc ñayjihuiyii co ymigügtjic pubeda'ñ jim Jerusalén. Paatip co pubedipy ajcxy, com ma yi judíojäy ajcxy, jim ajcxy ti paady Dios ytiy'ajt, paady paatip ajcxy huïdi ca' yjudíojäyity co pubedipy yi judíojäy ajcxy. ²⁸ Co anajty ti nyajc'idigiydaaygyxy je meeñ huïdibi yi migügtjic ya Macedonia etz Acaya ti yajmujccixy miid je mibijcpidijc ycixpi huïdibi yajpatp jim Jerusalén, huin'it nnicxa'ñich jim España ñaaxjot. Nnaxïhuaambich ma miich ajcxy co anajty jim nnicxich. ²⁹ Nejhuïybich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijxpejt etz nyaj'ixpigipyich miich ajcxy je Cristo ytiy'ajt.

³⁰ Miich ajcxy nmigügtjicich, com miich ajcxy mijpidaaccixyp ïch ajt nHuindzin Jesucristo, e com miich ajcxy miid Dios yjihui'ñ ymic'ajt ma m'aa mjot, e nañ xychojcpich xyjihuiybich, paady ycixp nbijctzooyich may'ajt, yajtüggygyxy m'ayuc mhuinma'ñ miid ïch, jëbi tú'ciy Dios nmibijctzoohuim mictägy miid ïch ycixpi. ³¹ Mibijctzoogix Dios co huen xyñihua'ñich xycohua'ñich ma yi judíojäy ajcxy jim Judea naaxjot, huïdibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huïdibi ïch jim ngïyegaamy. ³² Mibijctzoogix Dios co huen xypubedipy xypudigïhuïbich, jëbi nicxibich ma miich ajcxy agujc jotcuyc, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcuyc, e jim ïch nhuinma'ñ nyajpocxip. ³³ Mibijctzooybich Dios miid miich ajcxy ycixpi, je Dios huïdibi jotcuyc'ajtin yejcp, co huen miich ajcxy xypubedipy xypudigïhuïpy. Jadu'n jadu'n. Amén.

16

Capxpocxin nidüg nidüg ma pinjaty y'ixy'ajtyp

¹ Cham ïch miich ajcxy nyajnibijccixy, cöbijccixy je ajt nmigüg töxyjäy je Febe co anajty ñicxy ma miich ajcxy. Yi' je' nidügti huïdibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe miid ajt nHuindzin Jesús ycixpi. Com jadu'n ycopicyity co jäy huïdibi mibijcp

Jesucristo huen naymigüg'ájtigixy. Mbubedip mbudigihuijpu jadu'n nej yi' jotmay müidity. Yi Febe ti ooy mayjäy pubety, e nañ ti xypubetyich.

³ Nguejxypyich capxpooxín ma jada necy müid yi Priscila etz Aquila huidibi ich anajty müid ooy oy nduñ co ngapxhuäcxyich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin müid ich ycixpi, ca'ydi n'ögyich. Nyajnajxypich jäygidaacín ma Dios müid yi' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huidibi ca'pi yjudíojäyity yajnajxcixy jäygidaacín ma Dios müid yi' ajcxy ycixpi. ⁵ Nguejxypich capxpooxín nañ jadu'n ma jada necy müid yi mibijcpidijc ajcxy huidijaty naymujccip ma Priscila etz Aquila ajcxy ytijc. Etz nañ nguejxypyich capxpooxín ma yi Epeneto huidibi ooy ndzocyich. Yi' je' tim jayijp huidibi mijpidaac Cristo jim Acaya ñaaxjot. ⁶ Etz nañ nguejxypich capxpooxín ma María, yi' ooy ti ytuñ müid miich ajcxy müid Cristo ycixpi. ⁷ Etz nañ nguejxypyich capxpooxín ma yi Andrónico etz Junias. Ich n'amigüg ajcxy huidibi ti ypujxtijc inäy quipxy müid ich. Capxpaady ajcxy y'ity müid yi apóstoltijc. Jacjayijp ajcxy mijpidacy Jesucristo ca'ydi ich.

⁸ Etz nañ nguejxypich capxpooxín ma yi Amplias, huidibi ooy yajxon mijpidägy ajt nHuindzin Jesucristo. ⁹ Nañ nguejxypich capxpooxín ma yi Urbano huidibi xymüidtuñich co ich anajty ngapxhuäcxyich Jesucristo ytiy'ajt. Nañ jadu'n nguejxypich capxpooxín ma yi Estaquis huidibi oy ndzocy njihuüyich. ¹⁰ Nañ nguejxypyich capxpooxín ma yi Apeles, huidibi ooy tiy'ajt ti yecy co yi' ymibijcpy Cristo tiydudägy. Nañ nguejxypich capxpooxín ma yi Aristóbulo etz jac pinjaty huidibi yajpatp ma yi' ytijc. ¹¹ Nañ nguejxypich capxpooxín ma ich n'amigüg yi Herodión. Etz nañ nguejxypich capxpooxín ma yi Narciso yjuugy ymigüg huidibi mijpidacp ich ajt nHuindzin Jesucristo. ¹² Nañ nguejxypich capxpooxín ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooxín ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxypich capxpooxín ma yi Rufo, je huidibi yi mibijcpidijc ycömaayb. Nañ nguejxypich capxpooxín ma yi' ytaj, com jadu'n njihuüyich jadu'n nej jihuüy yi' ndaj'adyijich. ¹⁴ Nañ nguejxypyich capxpooxín ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yi' ajcxy. ¹⁵ Nañ nguejxypyich capxpooxín ma yi Filólogo, yi Julia, yi Nereo etz yi' y'uch töxyjäybi, yi Olimpás, etz nañ tüg'óciy yi mibijcpidijc huidibi yajpaatp jim ma yi' ajcxy.

¹⁶ Naygapxpóocxigix xic xon nidüg nidüg. Naygímájtzigix miñ yxipy agujc jotcuje. Tüg'óciy huidibi mibijcp Jesucristo ma yi jacjaydyii cajp, yquejxyp ajcxy capxpooxín ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajtity, huidibi nigoob yjäyyajtziptuna'ñ yjäybijc-huäcxa'ñ, huidibi ca' ixa'ñ yi Dios ytiy'ajt huidibi ti m'ixpijccixy. Puuhuäctüd miich yi' ajcxy. ¹⁸ Com yi jäy ajcxy huidibi ymigügtijc yajhuinma'ñydigooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcín. Je' ajcxy huin'inigixp je jäy ajcxy huidibi ca' mijcajee y'ixpiyity. Yi ayuc huidibi ymihuidijtyp, jadu'n yajmidooy nej jihuüy oy ytiyity yjanchity, per ca' yi' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidooy Jesucristo, paady jotcuje nayjihuiyijich müid miich ajcxy ycixpi. Ndzojcypich co miich ajcxy mnejhuihuijpy huidibi oyhuinma'ñ jaydebi mdúngixipy ajcxy etz ca' jibic-huinma'ñ mdúngixipy. ²⁰ Dios oyhuinma'ñ etz mic'ajt ti xymooyim jebi ndzinaayim müid ajt nmigügtijc agujc jotcuje, ca' ma tzip capxy. Tim huington

je xii je tiempo mina Dios yajcödigoya'ñ yi mujcu' ymic'ajt, e yi' xypubedip xypudigihuiy jëbi mmimadägipy yi ca'oybi. Nmibijctzooybich Dios müd müch ajcxy ycixpi co ich ajt nHuindzin Jesucristo huen may'ajt oy'ajt tuñ müd müch ajcxy jabom jabom.

²¹ Je Timoteo huidibi tumb müd ich co ngapxhuäcxich Jesucristo ytiy'ajt xyajniguejxp ajcxy capxpooxïn. Nañ jadu'n Lucio, Jasón etz Sosípater ich n'amigüg ajcxy, xyajniguejxp capxpooxïn.

²² Ich Tercio huidibi cojaayb Pablo y'ayuc ma jada necy, nañ nguejxypich capxpooxïn ma müch ajcxy, com ich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpooxïn, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytijc yquejxyp ajcxy capxpooxïn ma müch ajcxy. Erasto je cajp ytesorero etz ajt nmigüg huidibi yxi Cuarto, nañ xyajniguejxp ajcxy capxpooxïn.

²⁴ Nmibijctzooybich Dios müd müch ajcxy ycixpi jabom jabom co ich ajt nHuindzin Jesucristo huen may'ajt oy'ajt tuñ ma müch ajcxy. Amén.

Je capxpooxïn ma yaj'ibbaady yajcapxpaady Dios

²⁵ Tzoc cömayim Dios, tzoc ojadajtim, tzoc huin'ihuim müd himnos. Dios müd ymic'ajt jëbi xypubedipy xypudigihuiy ajcxy, jaydëbi ajcxy tiydudägy mmibigipy Jesucristo, ca'ydi mjotmetzciiygixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyii jäy ycapxhuäcxixyp. Jada je tiy'ajt huidibi jecy'ajty ca' pin huinjihuiy huidibi Dios ti xyajnejhuuyim. ²⁶ Dios ti xyajhuinjihuiyim nej yhuimbizimy je ayuc huidibi je profetas ajcxy ycojay jecy'ajty. Dios huidibi tzinaayb huinixii huinitiendo, ane'mb co huen yajcapxhuäcxxy jada tiy'ajt oybi ma tüg'óciy naaxhuiñjäy, jigix jëbi mayjäy mijpidägip etz capxymidoohuiy Dios.

²⁷ Müd co Jesucristo ooy mijhuinma'ñ tuñ müd ich ajt ycixpi, paady tzoc cömayim, tzoc ojadajtim etz tzoc huin'ihuim müd himnos huinixii huinitiendo yi tügpajcpi Dios huidibi ñejhuiydaayb tüg'óciy. Jadu'n ngapxcixyich. Amén.

1 CORINTIOS

Yi Midügpí Necy Huidibi San Pablo Yajniejx Je Mibijcpidijc Jim Corinto

1-2 Hich Pablo, Dios jadu'n tzojcp co Jesucristo xyajniejx co ngapxhuäcxibyich yí' y'ayuc. Hich etz ajt nmigüg Sóstenes nijayñybich miich ajcxy tüg'óciy huidibi jim Corinto huidibi mijpidacp Dios etz ñayyöymújcigixy jim miid Dios ycixpi. Nijayñybich miich ajcxy huidibi Dios ti yaj'ahuimbijttäy tudägy miid Jesucristo co y'o'cy miid ajcxy mbocy ycixpi. Nijayñybich miich ajcxy huidibi Dios ti huin'ixy, jaydëbi mmid'idipy huädz jot huädz huinma'ñ. Nañ jadu'n nijayñybich tüg'óciy je jäy huenyma'amyity huidibi Dios mibijctzooob ojadajtp miid ñch ajt nHuindzin Jesucristo yxii. ³ Ndzoycypich co ñch ajt nDios Teedy etz ajt nHuindzin Jesucristo oy'ajt may'ajt tunipy miid miich ajcxy, etz xyajjotcugihuipy ajcxy.

Oy'ajt miid Cristo ycixpi

⁴ Nyajnajxypich Dioscojuyip ma Dios jabom jabom miid miich ajcxy ycixpi, miid co Dios may'ajt oy'ajt ti tuñ miid miich ajcxy ycixpi ma Jesucristo. ⁵ Co ti mmijpidaaccixy Jesucristo, oybi ti mbaatcixy ma tüg'óciy mdzinaayin mjogy'ajtin. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. ⁶ Ma miich ajcxy mdzinaayin mjogy'ajtin etz mgapxy m'ayuc ñiguëxigipy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtigoy'ijtcixy ma mdzinaayin mjogy'ajtin huidibi Dios ñiyecpy, ma je' m'ahuijxcixy co Dios yajnieguëxiga'ñ jadüg'oc ya naaxhuiñ ajt nHuindzin Jesucristo. ⁸ Jesucristo miich ajcxy xyhuijtz'ijtp tudägy, ixti cooni ycixipy tigoyipy je naaxhuiñybi, e co anajty yí' tiyduñ naaxhuiñjäy ajcxy miid ypocy ycixpi, ca' miich ajcxy mbocycähuipy. ⁹ Dios yjatytimycuydunipy yí' y'ayuc miid miich ajcxy, ca' xyixmadzaangixy ni mina xii, com yí' ti xyhuin'ijxcixy co miid mnaymigüg'ájtigixy yí' y'ung, ñch ajt nHuindzin Jesucristo.

Naybijc-huäcxii ma je mibijcpidijc

¹⁰ Migügtijc, ñch miich ajcxy nmínucxtacyp miid Jesucristo yxii co tungixy may'ajt nay'ayuc-huinjihuiñyigix, e ca' mnaybijc-huäcxigixy. Tzinaaygix xic xon miid tú'ciy mjot mhuinma'ñ. ¹¹ Miich ajcxy migügtijc, ti je Cloé y'amigügtijc xyajnimäyich co ooy miich ajcxy mnaychip'ijxigixy, e ca' mnay'ayuc-huinjihuiñyigixy. ¹² Miid jada ycixpi nmína'ñich co nijëjity miich ajcxy jadu'n mínaangixy: "Hich Pablo nmijnicxpejtpyich." E nijëjity ymínaangixy: "Hich Apolos nmijnicxpejtpyich." E nijëjity ymínaangixy: "Hich Pedro nmijnicxpejtpyich." E nijëjity ymínaangixy: "Hich Cristo nmijnicxpejtpyich." ¹³ ¿Nej Cristo ti ñaybijc-huäcxyii? Ca'. ¿Nej Pablo yajcruudzpejti miid miich ajcxy ycixpi? Ca'. ¿Nej ti miich ajcxy mnibejtcixy miid Pablo yxii? Ca' yjadu'nity. ¹⁴ Nyajnajxypich Dioscojuyip ma Dios co ca' jac ni pin ñch ti ngayajniebety. Jëda'ajty ti nyajniebetyich Crispo etz Gayo. ¹⁵ Jadu'n ti nduñich je'gixpi co ca' huaad jäy ajcxy ymínaangixy co ti ajcxy ñibety miid Pablo yxii. ¹⁶ Nañ jadu'n ti nyajniebetyich yí' Estéfano miid yí' yjuugy ymigüg ajcxy. Jac ni je' ca' njäymechich pen ti nyajniebetyich. ¹⁷ Com Cristo ca' xyquejxyich jäy yajniebejtpi. Hue' janchtiy ti xyquexyich co ngapxhuäcxibich yí' y'ayuc ytiy'ajt oybi. Ca' nyajtuñich xpicytijc y'ayuc yhuinma'ñ. Co ixypy

nyajtuñich ixpicytije y'ayuc yhuinma'ñ, naadigi'ajt ixypy co Cristo y'o'cy ma yi cruudz miid ajt nbocy ycixpi.

Cristo ymiid Dios ymic'ajt etz yi' y'ixpijcin etz ytiy'ajt

¹⁸ Yi jäy ajcxy huidibi y'alma tigoyam, loci huinma'ñ yi' tijcixy co Cristo y'o'cy ma yi cruudz miid ajcxy ypocy ycixpi. Per ich ajt pinjaty y'alma nīdzögam, hue' minaanim co jada ayuc tiy'ajt miid Cristo ycixpi, ymiid yi' Dios ymic'ajt. ¹⁹ Com jaybety jadu'n ma Dios ñecy, ma Dios jadu'n ymina'ñ:

Nyajtigoyaamybich yi ixpicytije y'ayuc yhuinma'ñ.

Njibijcibich yi cohuinma'ñjädijc ajcxy yhuinma'ñ.

²⁰ ¿Ti mic'ajt ymiid yi cohuinma'ñjädijc ajcxy? ¿Ti mic'ajt ymiid yi ixpicytije? ¿Ti mic'ajt ymiid yi huidibi ajcxy nay'ixquixip miid ixpijcin? Ca' ti mic'ajt miidity yi' ajcxy, com Dios ti yaj'ahuimbity yi naaxhuiñ y'ixpijcin tzuu huinma'ñ loci huinma'ñ. ²¹ Com Dios jadu'n ti tzocy co jäy ajcxy ca' padaangixy Dios ytiy'ajt ma yi naaxhuiñjät ajcxy y'ixpijcin. Dios yjäygidacpy co jēbi jäy ajcxy y'alma nīdzögipy co ajcxy mibigipy je Dios y'ayuc huidibi ngapxhuäcxypich. Je Dios y'ayuc ytiy'ajt huidibi ich ajcxy ngapxhuäcxpy, yi' yi' naaxhuiñjät ajcxy huinjihuigixyp nej tzuu huinma'ñ loci huinma'ñ.

²² Yi judíojäy ajcxy ooy tzachtzojccixy co Dios tunipy iixpejt mijhuinma'ñybi. Yi griego jäy y'ixtaaygixyp ayuc huinma'ñ etz huenhuidibity ixpijcin. ²³ Ich ajcxy ngapxhuäcxich co Cristo y'o'cy ma yi cruudz miid jäy ajcxy ypocy ycixpi. Yi maybi judíojäy ajcxy ca' mijpidägaangixy ca' cōbigaangixy ich ajcxy n'ayuc. Etz yi maybi jäy ajcxy huidibi ca'p yjudíojäyity, hue' tijcixy co tzuu huinma'ñ loci huinma'ñ ich ajcxy n'ayuc. ²⁴ Per yi jäy ajcxy huidibi Dios ti yhuin'ixigixy, huen yjudíojäyity, o huen ycajudíojäyity, hue' ajcxy tijcixy co je Cristo ymiid anajty Dios ymic'ajt etz ymiid anajty Dios y'ayuc ytiy'ajt. ²⁵ Co ixpicytije tijcixy co Dios ytung, tzuu huinma'ñ loci huinma'ñ je', nigi jac'oyhuinma'ñ yi' huidibi Dios tumyb, ca'ydi huidibi jäy ajcxy ytumyb. Co ixpicytije yminaangixy co Dios ca' ymic'ajt miidity, nigi jacmic'ajt miid yi', ca'ydi huidi jäy ajcxy ymiid.

²⁶ Migügtije ajcxy, huinmay miich ajcxy jadu'n nej Dios ti xyhuin'ixcixy. Ni may miich ajcxy huidibi ca' y'ixpicyity, tim nihueeni huidibi ixpicyip ma miich ajcxy. Ni may miich ajcxy huidibi ca' ti mic'ajt, ca' ti ane'min miidity. Ni hueñ miich ajcxy huidibi mic'ajt miid etz ane'min miid. Ni may miich ajcxy huidibi oyñipinjäyity. Ni hueeni miich ajcxy huidibi y'ap yteedy rey'ajtp. ²⁷ Per Dios ti huin'ixy yi' jäy ajcxy huidibi ca' y'ixpicyity co jadu'n yajtzo'yduna'ñ yi' ixpicyjäy yi' cohuinma'ñjät. Dios ti huin'ixy yi' jäy ajcxy huidibi ca' ti mic'ajt miidity, miid co jadu'n yajtzo'yduna'ñ yi' jäy ajcxy huidibi mic'ajt miid, ane'min miid. ²⁸ Dios ti huin'ixy huidibi jäy ajcxy ca' mij'ixx mijpidaaccixy, huidibi jäy ajcxy ytiypy co ca' y'oyity. Dios jadu'n tuuñ co yajcōdigoya'ñ yi' huidibi jäy ajcxy mij'ixxp mijpidacp, je huidibi jäy ajcxy ytiypy co y'oyity. ²⁹ Jadu'n Dios ytuñ co ca' tzocy co ni pinjäy ca' ñaygōmayiyb ci'm ma yi' yhuinduu. ³⁰ Per Dios ci'm yaj'oyiy nej jēbi miich ajcxy myajpatcixy miid Cristo Jesús. Dios ci'm yaj'oyiy nej jēbi ajt nbaatim ixpijcin ma Cristo. Nañ jadu'n yaj'oyiy nej jēbi Cristo xyaj'ahuimbijtim tudägy, jaydēbi Dios xycōbijcim nej tudägy jäy. Nañ jadu'n Dios yaj'oyiy nej jēbi huaad nbaatim ajt nhuädzjot nhuädzhuinma'ñ ma Cristo. Nañ jadu'n Dios yaj'oyiy nej jēbi Cristo xyñihuaniim ajt n'alma etz njugy'ajtin. ³¹ Paady ycixpi jaybety ymiñ ma Dios ñecy, ma jadu'n ymina'ñ: "Pinjaty naygōmayaanip ci'm, huen naygōmayii miid co mibicy ajt nHuindzin Dios."

2

Je y'ayuc ytiy'ajt, je Cristo huidibi cruudzpejt

1 Per co n'oyich ma miich ajcxy jayhuin, ngapxhuäcxyich anajty Dios y'ayuc ytiy'ajt, oy'amy nyaj'ixpijcyich, ca' nyajtuñich ixpijcyäy ajcxy y'ayuc, etz nañ jadu'n ca' nyajtuñich tzipjatypi ayuc. 2 Co jim n'ijtyich ma miich ajcxy jayhuin, chi nhuinma'ñybidacyich co ca' jac ti ayuc ti huinma'ñ nyajmüdmüydägaangixy, jë'yì janchtiy nyajmüdmüydägaangixy Jesucristo etz jadu'n nej je' yajcruudzpejti müd jäy ajcxy yocy ycixpi. 3 Co jim üch anajty nyajpaadyich ma miich ajcxy, chi ooy yung naxy naybidaacich, ooy ndzigüy njihuüyich. 4 E co nmüdmüydaacyich miich ajcxy, co ngapxhuäcxyich Dios ytiy'ajt ma miich ajcxy, ca'pi üch miich ajcxy nyajmübcy müd ixpijcytjyc y'ayuc müd tzipjatypi ayuc. Je Espíritu Santo xypubejtpich anajty co ajcxy nyaj'ijxy Dios ymic'ajt, e paady ycixpi ti ajcxy mmübjccixy Dios y'ayuc. 5 Jadu'n je Espíritu Santo xypubetyich anajty, jigix miich ajcxy müjpidägipy Dios, ca' nmünaanim müd co ti müdoogixy oyjatypi ayuc hüidibi jäy ajcxy ti cojy ti macxy. Ti müjpidaacixy Dios com ti m'ijxcixy ti mjihuüygixy Dios ymic'ajt.

Dios xyajnejhuüyim yì ytiy'ajt müd y'Espíritu Santo

6 Oy co ti nyajmübcyich miich ajcxy müd ayuc hüidibi ca' chipjatyty, per nañ jadu'n nyaj'ixpijcyich oyjatypi ayuc tzipjatypi ayuc yì mübjcpidjic ajcxy tübi yhuinma'ñ ymiinni ymejchni. Tigachjaty üch n'ayuc ndiy'ajt e ca' ñaybadyii müd naaxhuüñyjäy ajcxy y'ayuc ytiy'ajt hüidibi ca' mübjccixy hüidibi tzinaayb jugy'ajtp jadachambi xii jadachambi tiempo. Üch n'ayuc ndiy'ajt ca' ñaybadyii müd je jäy ajcxy y'ayuc ytiy'ajt hüidibi ane'mb ya naaxhuüñ, yì jadu'mbi jäy yì ajcxy yjugy'ajtin cixamb tigoyamb tücc'iyi. 7 Üch ajcxy nyaj'ixpijcpy Dios y'ayuc ytiy'ajt hüidibi ca' ni pin jecy'ajty nejhuüy huinjhuüy, je ayuc tiy'ajt hüidibi Dios ymüd coyüch, je ayuc tiy'ajt hüidibi Dios ti cojy ti macxy jecy'ajty ca'ni anajty naaxhuüñybi chondacy. Dios ycoj ymacx jada ayuc, jaydëbi ajt n'alma ñüdzoozim huinixii huinitiempe. 8 Ni tüg müj'ane'mbi hüidibi tzinaayb jadachambi xii jadachambi tiempo, ca' huinjhuüy jada ayuc. Co ixypy ajcxy huinjhuüy, ca' ajcxy cayajcruudzpejty je Huindzin Dios y'ung, je hüidibi müd Dios y'oy'ajtin ymüj'ajtin. 9 Com ca' ajcxy huinjhuüy Dios y'ayuc, paady ycixpi jaybety ymiñ ma Dios ñecy, ma jadu'n ymina'ñ:

Ni tüg jäy ca' ixy, ni tüg jäy ca' müdoy, ni tüg jäy ca' yhuinma'ñybaady jadu'n nej Dios ni'ixü müdüty müd je jäy ajcxy ycixpi hüidibi yì müjpidaacip yajmüj'ajtp.

10 Müd co müjpidaacim Dios, paady ycixpi Dios yaj'oyüy nej jëbi je Espíritu Santo xyajnejhuüyim yì ytiy'ajt. E je Espíritu Santo yhuinjhuüydaayb ñejjuüydaayb tüg'óciy, ixti yhuinjhuüydaayb nej Dios yhuinma'ñ ti pidägy co tuna'ñ, je hüidibi ca' pin nejhuüy.

11 Ca' pinjäy jëbi huinjhuüy nej jadügpì jäy yjot yhuinma'ñ müdüty. Je jäy yci'mhuinma'ñ jëbi huinjhuüy nej je' yci'mjot yci'mhuinma'ñ müdüty, ca' jac pin. Nañ jadu'n ca' jac pin jëbi huinjhuüy nej Dios yjot yhuinma'ñ müdüty. Dios yci'mjhuüñ huinjhuüyb nej Dios yjot yhuinma'ñ müdüty. 12 Dios ca' xyaj'adigüyim xyajjottigüyim huingjäy yjihuüñ ymic'ajt. Hue' Dios xyaj'adigüyim xyajjottigüyim yì yci'mjhuüñ yci'mmic'ajt, paady ycixp jëbi nhuinjuüyim tüg'óciy hüidibi ti xymooyim. 13 Üch ajcxy nyajmüdmüydacpy miich ajcxy je ayuc tiy'ajt hüidibi je Espíritu Santo xyaj'ixpijccixyich. E ca' nyajmüdmüydaaccixy je tiy'ajt hüidibi ti n'ixpijcyich ya naaxhuüñ hüidibi jäy ajcxy ti cojy ti macxy. Nyaj'ixpijccixy Dios y'ayuc ytiy'ajt hüidibi je Espíritu Santo xyajnejhuüyich. Üch ti nyaj'ixpijcyich yì ajcxy hüidibi müd Dios yjihuüñ ymic'ajt ma y'aa yjot.

¹⁴ Pınjaty ca' mıdıty Dios yjihuı'ñ ymic'ajt, ca' yı' cöbiga'ñ je tıy'ajt huıdibi je Espıritu Santo xyajnejhuıym. Com yı' ajcxy ytıjp co jada tıy'ajt tzuu huınma'ñ locı huınma'ñ yı'. Nañ ni ca' ajcxy Dios ytıy'ajt huınjihuiıyı, com ca' ajcxy mıdıty Dios yjihuı'ñ ymic'ajt huıdibi yajnejhuıyb Dios ytıy'ajt. ¹⁵ Je jäy huıdibi ymıd'ajtıpy Dios yjihuı'ñ ymic'ajt, yı' jäbi yajcıyöy yajtecyöy tüg'öcıy pınjaty yjot yhuınma'ñ. Per ca' yı' huaad pınjaty yajcıyöy yajtecyöy yjot yhuınma'ñ. ¹⁶ Com jadu'n Dios ymına'ñ ma ñecy: “¿Pın jäy huınjihuiıyb nej Dios yhuınma'ñymıdıty? Ca' ni pın. ¿Pın jäy huaad Dios yaj'ıxpıcy? Ca' ni pın.” Oy ca' pın huınjihuiıy jecy'ajty nej Dios yhuınma'ñymıdıty, jadachambi ĩch ajt nhuınjihuiıym nej Cristo yhuınma'ñymıdıty.

3

Je huıdibi ajcxy mıbıjcp ytungıxy ma Dios

¹ Mıgügtıjc ajcxy, co tı n'oyıch ma mııch ajcxy, chi nmıdmiydaaccıxy jadu'n nej jihuiıy mııch ajcxy mhuınma'ñymıdıty nej naaxhuiınyjäy ajcxy yhuınma'ñymıdıty huıdibi ca' ymıbıjccıxy. E ca' anajty mııch ajcxy mıdıty je mhuınma'ñ huıdibi je Espıritu Santo yejcpy. Mııch ajcxy mmıbıjcin ma Cristo jadu'n yı' nipaady nej ma'xungdıjc ymıbıjcin. ² Tı nyaj'ıxpıjccıxy Dios y'ayuc huıdibi ca' jäbi tzip mhuınjihuiıygıxy. Jadu'n nipaady nej jäy ajcxy yaj'ügy leche yı ma'xungdıjc, mııd co cacöbiga'ñ caayın uucın huıdibi jemxy cidacp ma yjot. Ca' mııch ajcxy anajty tı mnayñı'ıxııyıgıxy ma mjot mhuınma'ñ nej jäbi mhuınjihuiıygıxy Dios y'ayuc yı tzipjatypı. Chambaadni ca' mnayñı'ıxııyını ajcxy ma mjot mhuınma'ñ nej jäbi mhuınjihuiıygıxy yı tzipjatypı ayuc. ³ Chambaadni mııch ajcxy myajtuñ mjot mhuınma'ñ jadu'n nej naaxhuiınyjäy ajcxy mıdıty huınma'ñ ca'pı ymıbıjccıxy, chambaad mmi'ıjxtınaaygıx yı mıgügtıjc, chambaad mnaychıp'ıjxıgıx naybıjc-huäcxıgıx. Jadu'n mıdıtzcıxy nej jacjadyıı jäy ajcxy y'ıdıtzcıxy huıdibi ca' ymıbıjccıxy. ⁴ Com nijjëjıty mııch ajcxy mınaangıxy: “İch naygomajtzip ma Pablo.” Etz nijjëjıty mınaangıxy: “İch naygomajtzip ma Apolos.” Jada je tıy'ajt co ca' mnay'ayuc-huınjihuiıygıxy tim jadu'n nej jäy ajcxy ca' nay'ayuc-huınjihuiıygıxy huıdibi ca' mıdıty Dios yjihuı'ñ ymic'ajt.

⁵ ¿Pın je' je Apolos? ¿Pın je' je Pablo? İch Pablo etz Apolos nimetz ajcxy nduñ ma Dios ytung, e ĩch mııch ajcxy nyajmıbıjccıxy Cristo. İch ajcxy nduñ nidüg nidüg je tung huıdibi Dios xymooyıch. ⁶ İch jayıjp'aty mııch ajcxy tı nyaj'ıxpıcyıch, e Apolos jac'axam. Jadu'n mııch ajcxy nipaady nej tüg moc cam huıdibi ĩch tı nnıpy, e Apolos jac'axam tı pıdıgy nıı. Per Dios tı yajyeegy je moc. ⁷ Ca' ytımyñejıty pın tı yñıpy, e pın tı pıdıgy je nıı. Dios yı' tügpajc copıcyıp. Com yı' yajyeecp je moc. ⁸ Yı' huıdibi niip etz yı' huıdibi nıı pıdacp, quıpxyaty ajcxy. Dios yegamb je oy'ajt ma nidüg nidüg jadu'n nej anajty tı ytungıxy. ⁹ Com ĩch etz Apolos naymıgög'ajtıbıch ajcxy ma Dios ytung. Jadu'n mııch ajcxy nipaady nej Dios ycam huıdibi Apolos tı tuñ etz huıdibi ĩch tı nduñ.

Nañ jadu'n mııch ajcxy nipaady nej tüg tıjc huıdibi Dios ycojpy. ¹⁰ Dios tı xyajñıbıcyıch yı' ytung ndunıpyıch. Tı nyaj'ıxpıcyıch mııch ajcxy Dios y'ayuc ytıy'ajt. Jadu'n ĩch nipaady nej tüg pojtzpı oybı huıdibi tı yajtzondägy je tzaadıjc poch. Chi huıngjäy xyjacyaj'ıxpıjccıxy. Jadu'n yı' nipaady nej huıngbı pojtzpı huıdibi je tzaadıjc poch jacıjppodzıyb. Copıcy co nidüg nidüg huıdibi yaj'ıxpıjcp Dios ytıy'ajt yajxon yaj'ıxpıjccıxyıpy. ¹¹ Dios tı pıdıgy Jesucristo tügpajc huıdibi huaad nmıbıjcm, e ca' huaad pıdacy huıngbı. Jadu'n Jesucristo nipaady nej tüg tıjc poch chondägy. ¹² Co pınjaty yaj'ıxpıcy Dios y'ayuc ytıy'ajt tıydudägy, chi jadu'n nipaady nej jihuiıy pınjaty tıjc pojtzpı

müid ori, müid plata etz müid tzaa oyjatypi. Pinjaty ca' yaj'ixpicy yajxon Dios ytiy'ajt, jadu'n nipaady nej jihuüy pinjaty tijcpojtzp müid quipy, müid miy, etz müid moc'aay. ¹³ Jiini co anajty xii tiempo paady mina Cristo tiyduna'n yi' yjáy huin'it ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jün pidägy ma je tijc, e je quipy, je miy, etz je moc'aay tigoydähuipy ma je jün. Etz je ori, plata etz tzaa oyjatypi ca' ytigoydähuipy müid je jün. ¹⁴ Peni oy yajxon pinjaty ti yaj'ixpicy Dios ytiy'ajt, chi Cristo premio möhua'nñ jada jäy co ooy yajxon ti yaj'ixpicy. E jadu'n yi' ytung nipaadip nej je ori, plata, etz tzaa'oyjatypi huidibi ca' ytiigooy ma je jün. ¹⁵ Pen je Dios ytumbi ca' oy yajxon ti yaj'ixpicy Dios y'ayuc ytiy'ajt, chi ca' premio pada'nñ. Jadu'n yi' ytung nipaadip nej je quipy, je miy, etz je moc'aay huidibi ti ytigoy ma je jün. Jadu'n nipaadip müid jada jäy nej jihuüy ti ñaxy jünjoty, e ti ytigoydäy ma je jün tijaty ymüid, je'yi yjugy'ajtin ti yajtzögy.

¹⁶ ¿Nej ca' mnejhuüygyixy? Pen Dios yjihui'nñ ymic'ajt yajpat ma miich ajcxy, jadu'n nipaady nej jihuüy Dios ci'm ti chinaydacpicy ma miich ajcxy, nej jihuüy miich ajcxy Dios xytijc'adyii. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoya'nñ jada jäy. Yi Dios chinaydac huadz'it amay'it yi', com Dios ti chinaydacpicy ma miich ajcxy huidibi mibijccixp.

¹⁸ Ix mnayhuin'ünigix ci'm. Pen nidügti miich ajcxy mnaydiyii co oy ixpicyity ma naaxhuiñjyá y'ixpijcin, copicy jäydigoyipy yi' y'ixpijcin, jigix ixpigipy Dios ytiy'ajt. ¹⁹ Yi naaxhuiñjyá y'ixpijcin jadu'n nipaady müid Dios nej tzuu huinma'nñ loci huinma'nñ. Paady jadu'n yjaybetyity ma Dios ñecy ma jadu'n ymina'nñ: “Dios yajpocycähuip yi' ixpicytijc müid yci'm'ayuc müid co chachnaygömayii.” ²⁰ E jadu'n yjaybetyity jadüg'it ma Dios ñecy ma jadu'n ymina'nñ: “Je Huindzin Dios ñejhuüy co yi' ixpicytijc y'ayuc yhuinma'nñ ca' choobaady.” ²¹ Ni pin ca' huaad amij agix ñayjihuiyii, müid co mijnicxpety oyñipin y'ayuc. Miich ajcxy müid'ajttaayb tüg'óciy tijaty. ²² Miich ajcxy müid'ajtpy Pablo, Apolos etz Pedro. Nañ jadu'n miich ajcxy müid'ajtpy je naaxhuiñybi, je tzajp, je jugy'ajtin, je o'cin, je xii je tiempo huidibi ji yajpatp, etz huidibi mim cidaacp. ²³ Je Cristo müid'ajtpy miich je' ajcxy ci'am etz Dios ymüid'ajtpy Cristo ci'am.

4

Je apóstoles ajcxy ytung

¹ Jëbi jadu'n co ich etz Apolos, ich miich ajcxy xytijcixy Cristo ytumbi huidibi Dios ti xyajnibijccixyich, nyaj'ixpijccixyich etz nguend'ajtcixyich yi' y'ayuc ytiy'ajt huidibi jecy'ajty ca' pin nejhuüy huinjihuüy. ² Pinjaty cuend'ajtp huinjyá yje', copicy tiydudägy ytunipy, jaydëbi yi' yhuindzin yjäygidägyyb yi' ytung. ³ Per ca' ooy nduñich cuendi co miich ajcxy xyajcüyöy xyajtecyyöyich ich nbocy. Nañ jadu'n ca' ooy nduñich cuendi co ixypy tüg juez yajcüyöy yajtecyyöyich ich nbocy. Nañ jadu'n ca' nyajcüyöyich nyajtecyyöyich ngi'mbocyich. ⁴ Ca' nayjihuiyijich co nmidundigooyich miich ajcxy. Ca' jadu'n nmina'nñich co ca' ma ndundigooyich. Hue' ajt nHuindzin Jesucristo yi' je' xyajcüyöyip xyajtecyyöyip ich nbocy, ca' jac pinjaty. ⁵ Paady yixpi ixmajtzcix jadu'n nej miich ajcxy xypocy'ijxcixy jayijpni ma ca'ni Jesucristo ymiñ jadüg'oc ya naaxhuiñ. Ahuixcix co Jesucristo yajniguëxigaani je jäy ajcxy ypocy huidibi cham ca' ñiguëxigy, huidibi jadu'n nipaady nej jihuüy yuch y'ity agootztuuby. Jesucristo co anajty ymiñ jadüg'oc, chi yajniguëxigipy nej

jäy ajcxy yjot yhuinma'ñ miiidity. E Dios nidüg nidüg jäy cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Migügtijc ajcxy, ci'm ti naybidägyiijich miiid Apolos jadu'n nej tüg ijxpejt ma jada tiy'ajt huidibi cham ti nyajnijayiygixp. Jadu'n ti nduñich miiid miich ajcxy m'oy'ajtin ycixpi, jigix jëbi miich ajcxy m'ixpijccixy jadu'n nej jëbi mguydundaygixy Dios ytiy'ajt, e ca' mjactungixy huidibi Dios ycapxcödujc ma ñecy. Nañ jadu'n ñich ti nduñich miiid Apolos nej tüg ijxpejt, jigix miich ajcxy ca' mnaygömayiyb ci'm, e ca' mminaangixy co mnaygomájtzigixy ma tüg Dios ytumbi, e jadüg m'ixtijcixy. ⁷ ¿Pïn ti xyajnajxcixy jadu'n nej jihuüy ajcxy ooy mgömayity? Ca' ni pïn. ¿Ti miich ajcxy miiidity, huidibi Dios ca' ti xymoogyixy? Ca' ni ti. E pen Dios ti xymoogyixy tijaty ajcxy mmiiidity, ¿na'amy co mnaygömáygixy ci'm, jadu'n nej jihuüy ci'm ti mganar'ajtcixy tijaty ajcxy mmiiidity?

⁸ Jadu'n miich ajcxy mnaybidáacigixy nej jihuüy ti mgüxigixy, nej jihuüy ti mgomeeñygojixy, nej jihuüy mrey'ajtcixy, e ca' mdzojccixy co nyaj'ixpigipyich. ⁹ Miich xytijcixyich nej jihuüy ñich ajcxy apóstoltijc Dios ti xypidaaccixich nej huidibi ca' ytimcapxpaadyity, nej huidibi ypocy co'ögiiyb, co ángeles ajcxy etz jäy ajcxy xyñixíccixyich xyñiyáaxcixyich. ¹⁰ Miich ajcxy xytijcixyich co ñich ajcxy apóstoltijc jadu'n nej jäy tzuu locip co ndúngixyich miiid Cristo ycixpi. E miich mnaybidáacigixy co'ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy miiidityich, e miich ajcxy mnaybidaacip nej jihuüy ooy ti mmicpijccixy, nej jihuüy ooy mgömayity, e ñich ajcxy ca' nyaj'ixaangixyich. ¹¹ Chambaad ñich ajcxy nyuubögyiijich etz ndidziyijich. Minaajity n'íjtcixyich ca' ñich ajcxy nhuit. Jäy ajcxy xyñi'ojiiygixyich etz xyhuingoixy xyjijpcójxcixyich, ni ndijc ñich ajcxy ycaca'tcixy. ¹² Ndúngixyich xuuyii miiid ngi'm ngijich. Co pinjaty xyñi'ojiiygixyich, chi n'adzóogixyich miiid oy ayuc. Co ñich ajcxy xy'ixhuidityich xypahuidityich, ooy nmecxtújccixyich yi tzaachypi. ¹³ Co pinjaty jibic xyñigápccixyich, chi huinma'ñ ixtáaygixyich oy'amy miiid mecxtujcin n'ihuújcixyich ngapxhuújcixyich nej jëbi y'ayuc-huinjihuüyigixy. Ca' naaxhuiñyäjy ajcxy xychójccixyich. Ixti chambaad jadu'n ajcxy xy'íjxcixyich nej püx, jadu'n ñich ajcxy nipaady nej jibicpi huidibi ca' jäy ajcxy tzocy.

¹⁴ Ca' ñich miich ajcxy nyajnijayiy jada ayuc co nyajtzöydunaangixy. Hue' janchtiy jada ayuc nyajnijayiyb ajcxy co ngapxhuijáangixy. Jadu'n ndzojccixy njihuüyigixy nej ndzocyich njihuüyich ngi'm'ung. ¹⁵ Oy ixypy yjanchity co miich ajcxy miiid majc mil huindzindijc huidibi xyaj'ixpijccixy Cristo ytiy'ajt. Per tügpaajcpi je mhuindzin huidibi oga'n xyajmibijcy ajcxy Cristo, ca' nan canaag. ñich jadu'n oga'n ti nyaj'ixpicixyich miich ajcxy Jesucristo ytiy'ajt nej jëbi ajcxy m'alma ñidzögipy. Paady ycixpi jadu'n ñich nipaady nej miich ajcxy mdeedy ma mmibijcin. ¹⁶ ñich miich ajcxy nimaayb mictägy, com ti nyajmibijccixy Cristo oga'n, paady cuydungix ajcxy Dios ytiy'ajt, jadu'n nej ñich nguyduñich.

¹⁷ Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuüyich. Ti ñich Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjäymedzip miich ajcxy je ayuc je tiy'ajt jadu'n nej nyaj'ixpicixyich ma tüg'óciy cajp ma yi jäy ñaymújcigixy huidibi miiidaccixp Jesucristo. ¹⁸ Cham nije' nije' miich ajcxy amij agix mnayjihuüyii co jadu'n mminaangixy co ca' nicxy n'ixa'ñich miich ajcxy jadüg'oc. ¹⁹ Per ca' jadu'n mminaangixy co

ca' nnícxá'ñich ma miich ajcxy. Tzoc nícxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amído'o'ida'ñich yí' ajcxy y'ayuc huídibi amij agix najjihuúyip. Hue' janchtiy nejhuíhua'ñich pen ymíid yí' ajcxy Dios ymic'ajt chög'ajt. ²⁰ Pinjaty míid Dios ymic'ajt Dios chög'ajt, je' yajniguëxícp Dios y'ane'mín. Pinjaty míid oyñiti ayuc, ca' je' yajniguëxígip Dios y'ane'mín. ²¹ Co nnícxibich jim ma miich ajcxy, ¿ti ajcxy mdzojccixyp ndunipyich? ¿Nej oy nminícxibich ma miich ajcxy tüg matz jigix ajcxy nhuójpccixipy? o ¿Mdzojccixyp co nnícxibyich ma miich ajcxy míid yungnaxy njot nhuinma'ñich, etz oy'amy ajcxy nmigapxipy, jadu'n nej jihuúy ooy ndzojccixy njihuúyigixy?

5

Moy ajcxy castigo tüg jáy huídibi anajty tí ytundigooy

¹ Mayjáy nejhuúy co ma miich ajcxy jim tüg yéydíjc huídibi tundigooyb míid tüg töxyjáy. Nígi yí' ytundigooy ca'ydi huídi ajcxy ca' Dios y'ayuc mijpidaci. Ti nnejhuúyich co jim tüg yéydíjc huídibi míiddzinaayb ycoo'uu. ² Jim miich ajcxy míidty je mijpocytumbi, e miich ajcxy amij agixy mnayjihuúyigixy co ajcxy mdzach'ixpicity ma Dios ytiy'ajt. Jac'oy co ixipy mdajcixy mmaygixy. Yajpidzimgix ma miich ajcxy yí jáy huídibi jadu'n tundigooyb. ³ Ca' ytimyñejity co ca' nyajpaadyich jim ma miich ajcxy. Jadu'n nipaady nej jihuúy ích njimty, míid co ooy njihuúyich nej miich ajcxy mjaajtcixy m'ayoogixy. Paady ycixpi tí nyajpocycáyich míid Jesucristo y'ane'mín yí jáy huídibi jim ooy mij ytundigooy, tim jadu'n nej ixipy jim nyajpaadyich ma miich ajcxy. ⁴ Huomujctaaygix yí mibíjcpíidíjc, e jadu'n nipaadipy nej jihuúy ích njimty quipxyi míid miich ajcxy. Huin'it miich ajcxy míid'ájtccixipy ajcxy ajt nHuindzin Jesucristo y'ane'mín ymic'ajt. ⁵ Míid je ane'mín mic'ajt huídibi Jesucristo tí xymöyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuúy myajcídígíygixy je mujcu', jaydëbi yí' ñinícx ytigoyipy, per je' y'alma nídzögíp mína anajty ích ajt nHuindzin Jesús yhuimbity ya naaxhuiñ jaydëbi tíydunipy jáy ajcxy míid ypocy ycixpi.

⁶ Ca' mnaygömáayigixy cí'm míid huídibi mdungixyp. ¿Nej ca' mnejhuúyigixy nej jáy mína'ñ co levadura huídibi ca' y'oyity yajhuindigooyb tüg'ócíy yí harina jích? ⁷ Jadu'n je pocytuní nipaady nej levadura huídibi ca' y'óyity, paady ycixpi yajtígooygix je pocytuní nej anajty mdundígóoygixy taabi anajty ajcxy ca'ni mmibíjccixy. Jadu'n mdúngixipy, jigix jëbi m'íjtcixyp huädz ca' ma pocy. Co jadu'n mdúngixipy, jadu'n nipaadip miich ajcxy nej tzajcaagy oyjatypí. Nejhuúybich co miich ajcxy tí mbocyñíhuaatzcixy, com Cristo nayyejci huen yaj'ögyi míid ajt nbocy ycixpi. Jesucristo jadu'n nipaady nej ajt ngöbixy mang huídibi míid nhuindzígíyím Dios míid ajt nbocy ycixpi. ⁸ Tzoc tzinaayím míid huädz njot huädz nhuinma'ñ, jadu'n nipaady nej judíojáy co ajcxy amay'ajtcixy yí pascua xí. Tzoc yajtígooyím ma ajt ndzinaayín njugy'ajtín yí jíbic jot jíbic huinma'ñ. Tzoc cuyduním Dios ytiy'ajt.

⁹ Tí nnijayíygixy jayhuin co ca' huaad migüg'ájtigixy pinjaty huídibi tundigooyb míid töxyjáy ajcxy. ¹⁰ Ca' nan jadu'n nmína'ñich co túccí'yí mbuhuäctútcixipy yí naaxhuiñjáy ajcxy huídibi ca' ymibíjccixy, huídibi tundigooygixp míid töxyjáydíjc, huídibi ooy y'adzojccixy, huídibi ajcxy meetzp, huídibi ajcxy tzaadzech quipychech ojadaajtcixp. Co ixipy túccí'yí mbuhuäctútcixipy yí naaxhuiñjáy ajcxy, copicy co ixipy miich ajcxy mbídzimgix ya naaxhuiñ. ¹¹ Jayhuin tí nijayíygixy co ca' huaad mnaymigüg'ájtigixy míid yí jáy ajcxy huídibi naydíjcgixp co ymibíjccixy, je

huidibi tundigooygixp mïd töxyjäydijc, huidibi ajcxy ooy adzojccixy, huidibi ajcxy ojadajtp tzaadzech quipychech, huidibi ooy ycapxtigooygixy, huidibi ajcxy amügy jäy, etz huidibi ajcxy meetzp. Nañ ni ca' huaad mgaymujccixy m'uucmujccixy mïd yi' ajcxy. ¹²⁻¹³ Com ca' yhuaadity co ïich nyajcïyöyipy nyajtecyöyipy yi jäy ajcxy ypocy huidibi ca' mijpïdaaccixy Jesucristo. Dios ci'm yajcïyöyam yajtecyöyam yi' ajcxy ypocy. Hue' janchtiy copicy co miich ajcxy myajcïyöyip myajtecyöyip yi mibijcpïdijc ajcxy ypocy. Yajpïdzimgixp yi pocytumbi ma miich ajcxy.

6

Tzip capxy ma je juez ajcxy huidibi ca' ymibijccixy

¹ Pen xymïdundigooyb tüg mibijcpi, ¿nej oy mnayjihuiyïi co nicxy mxïy yi mmigüg ma yi tungmïdipi huidibi ca' mibijccixy Dios y'ayuc? ¿Cay jac'oy co myaj'abigipy je mibijcpïdijc ajcxy, e jim y'oyïhuipy je ayuc nej anajty ti xymïdundigoy? ² ¿Nej ca' mnejhuïygixy co yi jäy ajcxy huidibi Dios ti ypocyhuinmëecxigixy, yi' ajcxy yajcïyöyamyb yajtecyöyamyb yi naaxhuiñjây ajcxy ypocy huidibi ca' mijpïdaaccixy Dios? Pen miich ajcxy myajcïyöyip myajtecyöyip yi naaxhuiñjây ajcxy ymïpocy, ¿nej co ca' mjaïtcixy nej ajcxy myajcïyöipy myajtecyöipy yi mibijcpïdijc ajcxy ypocy huidibi ca' ytimymij ytimycajeejity? ³ ¿Nej ca' mnejhuïygixy co miich ajcxy myajcïyöyamyb myajtecyöyamyb ixti yi ángeles ajcxy ypocy? Pen miich ajcxy myajcïyöyamyb myajtecyöyamyb yi ángeles ajcxy ypocy, ñigi ca' chipity co ajcxy myajcïyöipy myajtecyöipy yi mibijcpïdijc ajcxy ypocy huidibi tzinaayb jugy'ajtp ma jadachambi xï tiempo. ⁴ Pen miich ajcxy mnaymïdundigóoyigixp, ¿nej co nicxy mbïdaaccixy yi mxïhuin ma yi jäy ajcxy huidibi ca' yajpaady ma miich ajcxy myöymujccixy? ⁵ Jadu'n nnimáaygixyich miich ajcxy, jaydëbi mdzöydu'njihuiygixy mïd jada ycixpi. ¿Nej ca' yajpaady ma miich ajcxy ni tüg yëydijc huijy ycuipi huidibi jëbi yaj'oyïy je capxy je ayuc ma je mibijcpïdijc ajcxy? ⁶ ¿Nej ooy jada ytimycopicyity co yi mibijcpïdijc ajcxy ñayxïhuigixipy ma je tungmïdipi huidibi ca' mijpïdaaccixy Dios?

⁷ Co miich ajcxy mnayxïhuigixy ma cajp tungmïdipi, je' je tiy'ajt co ca' ajcxy mguydúngixy Cristo y'ayuc ytiy'ajt. ¿Nej cay jac'oy co mnaymïmecxtújcigixipy, ca'ydi co mnayxïhuigixy? ¿Nej cay jac'oy co xytigóoyigixipy tijaty, ca'ydi co mnayxïhuigixy? ⁸ Ma yjapadyïi ixipy mnaymïmecxtújcigixy, chi miich ajcxy ac mibijcpïdijc naymïdundigóoyigixp, e nañ jadu'n mjanaymëetzigixy ti ajcxy ymïd.

⁹ ¿Nej ca' mnejhuïygixy co yi jäy ajcxy huidibi tundigooyb, ca' ajcxy it lugar pada'ñ ma Dios y'ane'my? Ca' mnayhuin'ingixy, ca' ajcxy it lugar pada'ñ ma Dios y'ane'my yi jäy ajcxy huidibi migapxtigooyb töxyjäydijc, huidibi ajcxy ojadajtp tzaadzech quipychech, huidibi ajcxy migapxtigooyb ymigüg ytöxyijc, huidibi ajcxy adöxyñi'aa. ¹⁰ Ca' ajcxy it lugar pada'ñ ma Dios y'ane'my huidibi ajcxy meetzp, huidibi ajcxy tijaty adzojcp, huidibi ajcxy amügyjäy'ajtp, huidibi ajcxy capxtigooyb, etz huidibi ajcxy ayucmïhuïdijtp capxmïhuïdijtp. Nidüg'óciy yi jäy ajcxy huidibi jadu'n tundigooyb, ca' ajcxy it lugar pada'ñ ma Dios y'ane'my. ¹¹ Jadu'n anajty nijëjity miich ajcxy mdundigooygixy jecy'ajty, per co ti mmibijccixy Cristo, chi Dios ti xyhuinmecxy ajcxy mbocy, e ti yajhuäch je jibicpi ma ajcxy mjot mhuinma'ñ, etz mnayyéjcigixy amumdügjot ma Dios. Co miich ajcxy mmijpïdaaccixy je nHuïndzin Jesús yxï e xy'adigïygixy xyjottigïygixy Dios yjihui'ñ ymic'ajt, paady ajcxy ti m' ahuimbijtcixy tudägy ma Dios yhuïnduu.

Je tudägy'ajt'n hu'idibi ijtp ma ajt ndzinaacy'n

¹² Janch t'iy'ajt nej jäy ym'inaangixy co jëbi huaad tungixy hueñytiijity hu'idibi ñijot'ajtcixyp. Per ca' t'üg'óciy hu'idibi jäy ajcxy tuñ y'oyjäygidaacnity. Janch jadu'n jëbi p'injaty tunipy hueñytiijity, per ca' huaad ym'imadägyii je hu'idibi ajcxy ytumyb. ¹³ Janch t'iy'ajt nej jäy ym'inaangixy co je jicxy p'icy ytungbaady ma je jäy y'aa ym'öx, e je aa möx ytungbaady m'iid je jicxy p'icy ycixpi. Per Dios yajcöd'igoyamyb je jicxy p'icy, e nañ jadu'n yajcöd'igoya'ñ je jäy y'aa ym'öx. Per nañ t'iy'ajt co Dios ca' ti yaj'oyiy je yëydijc ñin'icx, co m'idund'igooyipy töxyjäydijc. ¹⁴ Dios ti yajjugyp'icy jadüg'oc ñich ajt nHuindz'n Jesucristo co y'o'cy. Nañ jadu'n Dios m'iid ym'ic'ajt co xyajjugyp'igaanim jadüg'oc co anajty ti n'o'cim.

¹⁵ ¿Nej ca' mnejhu'iy miich ajcxy co yi mnin'icx ajcxy Cristo yi' yje'? ¿Nej cay Cristo anajty m'idund'igooyibich co nn'icxy m'idm'äyich yi töxyjäy hu'idibi jib'ic-huinma'ñ m'iid? ¿Ca' jadu'n y'óyity nim'ina! ¹⁶ ¿Nej ca' mnejhu'iygixy co t'üg yëydijc puhuäg'iy t'üg töxyjäy hu'idibi jib'ic-huinma'ñ tumb, t'ügity ajcxy y'ijtcixy? Com jadu'n yjaybetyity ma Dios ñecy, ma Dios jadu'n ym'ina'ñ: "Nimetz y'idaangixy jadu'n nej t'ügpi nin'icx." ¹⁷ Co t'üg jäy m'iid y'ity yi Huindz'n Jesucristo, huin'it je jäy y'ihu'ñ ym'ic'ajt etz Dios y'ihu'ñ ym'ic'ajt y'ijtcixy t'ú'ciy.

¹⁸ Ixmajtcix je jib'ic-huinma'ñydun'i, ca' m'idund'igooygixy m'iid töxyjäy ajcxy jib'ic-huinma'ñydumbi. Yi jacjadyii pocy hu'idi jäy ajcxy ytumyb, ca' yi' ajcxy m'idund'igoy nin'icx. Per co ytund'igooygixy m'iid töxyjäy ajcxy, huin'it janchtiy yci'mnin'icx anajty ym'idund'igooygixyp. ¹⁹ ¿Nej ca' mnejhu'iygixy co je Esp'iritu Santo hu'idibi Dios xymooyim, ti chinaydacp'icy ma miich ajcxy m'jot mhuinma'ñ? Paady ycixpi miich ajcxy ca' ci'm nay'ané'migixy. ²⁰ Tzohui Cristo ti cojuy miich ajcxy mbocy, paady ycixpi ooy ycop'icyity co oybi md'ungixip m'iid mnin'icx, jigix Dios cömay y'idipy m'iid co oy anajty ti mdungixy.

7

Capxhuijin ma je pijcin

¹ Cham n'adzohua'ñich je hu'idibi miich ajcxy ti xyaj'am'idoob'ich ma je necy hu'idibi ti xyajniguéjxcixyich. Oy jadu'n co t'üg yëydijc ca' ypigipy. ² Per com may yëydijc hu'idibi ooy ytund'igoya'ñ m'iid töxyjäydijc, paady ycixp jac'oy co nidüg nidüg yëydijc p'igipy e m'iid'idipy yci'md'öxyijc. E nañ jadu'n jac'oy co nidüg nidüg töxyjäy ypigipy, e m'iid idipy yci'm ñäy. ³ Cop'icy je yëydijc chin'ahuipy m'iid ytöxyijc nej ypanyii, nan tim jadu'n je töxyjäy chin'ahuipy m'iid ñäy nej ypanyii. ⁴ Com je töxyjäy ca' ane'my yci'mnin'icx, hue' ñay'ané'migixy miñ xyipy. Nañ jadu'n je yëydijc ca' ane'my yci'mnin'icx, hue' ñay'ané'migixy ymiñ xyipy. ⁵ Ca' huaad je yëydijc nimay je töxyjäy co ca' m'iid m'ähua'ñ m'iid p'ocxa'ñ. Nañ jadu'n je töxyjäy ca' huaad nimay je ñäy co ca' m'iid m'ähua'ñ m'iid p'ocxa'ñ. Jëbi janchtiy m'inaajity ñay'ayuc-huin'ihu'iygixy co amay'adaangixy co Dios m'ibijctzohuaangixy ycapxtägaangixy. Co Dios m'ibijctzohuin myajm'äygixipy, huin'it jëbi m'áagixni p'ócxcixni agujc jotcujc, ca'ydi je mujcu' m'imadägyii ajcxy.

⁶ Jada je' t'iy'ajt nej jëbi yëydijc m'iidzinäy ytöxyijc, hue' jada capxhuijin, ca' jada y'ané'minity. ⁷ Jadu'n njadzocyich co miich ajcxy ixipy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mm'ic'ajt. Paady ji canaagnax jäy yhuinma'ñ, e nidüg nidüg m'iid yci'mhuinma'ñ nej ytunaangixy, pen p'igaangixp o ca' yp'igaangixy.

⁸ Jada ayuc nyajniimaaybich yi adügtijc etz yi co'ögytjic ajcxy. Jac'oy co ajcxy huen tzinaaygixy adüg, jadu'n nej ñich ndzinäyich. ⁹ Pen ca' ajcxy mimadäga'ñ yi chinaayin adüg, etz nijot'ajtcixy co ypigaangixy, jac'oy co ypijcxixy. Com jac'oy co ypijcxixy ca'ydi co cuydúngixipy ninicx chojcin.

¹⁰ Jada ayuc nyajniimaaybich huídibi ajcxy ti ypijccixy. Ca' y'oyity co töxyjäy tüg ixmach yi' ñäy. Nañ jadu'n ajt nHuindzin Jesús xymooyim jada ane'min. ¹¹ Co tüg töxyjäy ixmach ñäy, copicy co huen tzinäy adüg, e ca' huaad ypicy müd huingbi yëydijc. Jëbi janchtiy jadüg'oc pudigiy ñäy. Nañ jadu'n ni ca' y'oyity co tüg yëydijc ixmadzip ytöxyijc.

¹² Ñich jada ngi'm'ayuc jada huídibi nyajniimaaybich je jacjadyii mibijcpidijc. Yi Huindzin Jesús ca' ti ane'min yecy müd jadayaabi ycixpi. Pen tüg yëydijc mibijcp tzinay müd tüg töxyjäy huídibi ca' mijpidägy Cristo, jac'oy co ca' ñay'ixmájtzigixipy, pen je töxyjäy jadu'n jotcuje jacmüddzinähua'ñ je yëydijc. ¹³ Nañ tim jadu'n co tüg töxyjäy huídibi mibijcp tzinay müd tüg yëydijc huídibi ca' mijpidägy Cristo, jac'oy co ca' ñay'ixmájtzigixipy pen je yëydijc jotcuje jacmüddzinähua'ñ je töxyjäy. ¹⁴ Je töxyjäy ñäy huídibi ca' mijpidägy Cristo, jadu'n yi' nipaady nej jäy huídibi ypocy ti yajnihuäch müd co ytöxyijc ti mijpidägy Cristo. Nañ jadu'n je töxyjäy huídibi ca' mijpidägy Cristo, jadu'n yi' nipaady nej jäy huídibi ypocy ti yajnihuäch müd co ñäy ti mijpidägy Cristo. Pen ca' ixypy yjadu'nity, yi' ajcxy y'ung y'anäg, hue' ixypy nipaady nej jäy ajcxy y'ung huídibi ca' mibicy. Per com ti je yëydijc etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵ Per pen je yëydijc huídibi ca' mibicy Cristo ca' müddzinähua'ñ ni jadu'ñyi yi' ytöxyijc huídibi ti mibicy Cristo, huin'it jëbi ñay'ixmájtzigixy. Nañ jadu'n co je töxyjäy huídibi ca' mibicy Cristo, e ca' müddzinähua'ñ ni jadu'ñyi yi' ñäy huídibi ti mibicy Cristo, huin'it jëbi ñay'ixmajtzigixy. Com Dios jadu'n tzocy co jotcuje ñaymüddzináayigixipy. ¹⁶ Jëbi ñay'ixmájtzigixy com je töxyjäy ca' tiydudägy ñejhuüy pen mimadacy yñäy yajmibigipy Cristo. Nañ jadu'n je yëydijc ca' tiydudägy ñejhuüy pen jëbi ytöxyijc yajmibigipy Cristo.

¹⁷ Oy ixypy ñejity jada tiy'ajt cuydúngixy. Copicy co nidüg nidüg miich ajcxy mdzinähuiipy mjugy'adipy jadu'n nej Dios ti xyajni'ixiygixy mdzinaayin mjugy'ajtin, e jadu'n nej anajty myajpatcixy co Dios xyhuin'ixy jëbi mmibigipy Cristo. Yi jadu'mbi ane'min nyaj'ixpijcpyich yi mibijcpidijc ma tüg tüg cajp. ¹⁸ Yi jäy huídibi ti yajtiy'ajttiy jayijp, e Dios yhuin'ixyii jac'axam, huen jadu'nity, ca' huaad yajtigoy je iixpejt nej ti yajtiy'ajttiy. E yi jäy huídibi ca'ni yajtiy'ajttiy e ti yhuin'ixyii Dios, huen jadu'n y'ity, ca' ycopicyity yajtiy'ajttihuipy. ¹⁹ Ca' ytimyñejity pen miich ajcxy ti myajtiy'ajttiy, o pen ca'ni myajtiy'ajttiygixy. Huídibi copicyip, mguyduunip ajcxy Dios y'ane'min ycotujcin. ²⁰ Nidüg nidüg mibijcpi huen ijtcixy nej anajty yajpatcixy co Dios ajcxy yhuin'ixy. ²¹ Pen miich anajty codoogiy tumb ma tüg jäy co Dios ti xyhuin'ixy, ca' mdajy may müd yi' ycixpi, hui'm müd mhuindzin. E pen mhuindzin a'ixiyb co mbidzima'ñ ahuätztuum, jëbi mbidzimy ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajnihuädziäctüdyii ma yi pocy y'ane'myii. Pinjaty tungixp yci'ndung, co mibicy ñich ajt nHuindzin Jesucristo, chi jadu'n nipaady nej jihuüy codoogiy y'ity ma Cristo. ²³ Tzohui ooy Jesucristo xycojuuyi miich ajcxy mbocy, paady ycixpi cuydúngix ajt nHuindzin Jesucristo y'ayuc ytiy'ajt. E ca' mguydúngixy naaxhuiñyjäy ajcxy y'ayuc ytiy'ajt huídibi ajcxy xpidägip ma pocy xy'ane'mgixy. ²⁴ Migügtijc ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ixy ajcxy.

²⁵ Jada ayuc nyajniimaaybich yi mibijcpidijc huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich mïid miich ajcxy ycixpi. Hue' ajcxy nyajniimaayb ahuing je huinma'nñ huidibi nmïidich. Com Dios ti xypa'ayooyich, paady ycixpi jëbi mgöbigipy ajcxy ïch n'ayuc ïch ngapxhuijin. ²⁶ Jadu'n huinma'nñ nmïididyich co jac'oy co nidüg nidüg mij'anäg huen jac'ijtcixy nej yajpatcixy. Mïid co tzaachypï ayo'n nminajxim nyajnajxim jadachambi xï tiempo, paady ycixpi ngapxhuijyich jadu'n. ²⁷ Pen mbijcyp tüg töxyjäy, mïiddzina'. Pen ca' ti pïcy tüg töxyjäy, jac'oy co ca' mbigipy. ²⁸ Pen ti mhuinma'nñ mbidägy co mbiga'nñ, jëbi mbicy, ca' anajty mdundigoy co mbigipy. Nañ jadu'n tüg töxyjay mutz'anägnip ca' anajty ytundigoy co ypigipy. Janch tiy'ajt jada co yi' ajcxy huidibi pijccixp ypadamyb ajcxy jotmay ma chinaayin. Paady ycixp ti nnimaaygixy co jac'oy co ca' mbijccixipy, e ca'ydi ti jotmay mbáatcixipy.

²⁹ Migügtijc ajcxy, jada njacyajniimaaygixpy. Hueeni xï tiempo njactzinähuaanim ya naaxhuiñ. Jadu'n nej je xï je tiempo yjacnicxni miich ajcxy pinjaty ti ypicy, tzinaaygix jadu'n nej ixypy ca' mdöxijc ajcxy mïidity. ³⁰ Miich ajcxy huidibi yaaxp etz ayo'n jihuïyb, tzinaaygix jadu'n nej ixypy ca' ti ayo'n mïidity. Miich ajcxy huidibi xondacp, tzinaaygix jadu'n nej ixypy ca' mxondaaccixy. Miich ajcxy huidibi ajuuyb adoocp tzinaaygix jadu'n nej ixypy ca' ti ajcxy mïidity. ³¹ Miich ajcxy huidibi mic'ajt comeen'ajtp, tzinaaygix jadu'n nej ixypy ajcxy ca' ti mgomeen'ity.

³² Hue' ndzocyich co ca' ti jotmay miich ajcxy mmïid'adipy ma yi mdzinaayin mjogy'ajtin. Yi jäy ajcxy adügpi ymijottigooyb ajcxy je Huindzin Dios ytung, yajjäygidäga'nñ ajcxy je Huindzin Dios. ³³ Je tiibi ajcxy ypijccixy, chi ymijottigooyb ajcxy yi' ytung ya naaxhuiñ, jadu'n nej jëbi yajjotcujc'ajtcixy ytöxyijc. ³⁴ Nañ tim jadu'n tigachjaty yhuinma'nñ mïidity je töxy'anäg huidibi ti ypicy. Je töxy'anäg adügpi ymijottigooyb Dios ytung, etz yecy ñinicx etz yjihui'nñ ymic'ajt cixyot huinijot ma ajt nHuindzin Jesucristo. Per je töxy'anäg huidibi ti ypicy, hue' je' ymijottigooyb ti ga ti ya naaxhuiñ, jadu'n nej huaad jäygidägyii ñäy.

³⁵ Jada jadu'n ti nyajniimaaygixy mïid miich ajcxy m'oy'ajtin ycixpi. Ca' nan tzipjaty ane'min ti nmooygixy. Jadu'n ti ngapxhuijcixy jaydëbi jotcujc mdzinaaygixy mjogy'ajtcixy, etz jaydëbi ajcxy amumdügjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶ Pen ji pin jotmay mïidity mïid ñïx ycixpi, mïid co yxï yjimijt ti yujc-huäcni, jada je' ooy ytimycapxpaadyity, jëbi tuñ huidibi y'a'ixiïyb jac'oyip, jëbi ypicy, ca' yi' ypocyity. ³⁷ Pen ji pinjaty ñïx yhui'ma'nñ jaybicy, e ca' pin ycohuanïyïi, nañ ni pin yca'adugyïi co tuñ nej tzocyin, e ñijot'ajtyp tudägy'ajt janch cixyot huinijot co yñïx yhui'ma'nñ jaybicy, oybi anajty ytumyb. ³⁸ Je jäy huidibi yñïx yajpijcp, oybi anajty ytumyb, e pinjäy yñïx cayajpijcp, nigi anajty oybi tuñ ca'ydi co ypigipy.

³⁹ Copicy co je töxyjäy mïiddzinähuiipy yi' ñäy mabaad yñäy yjogy'aty. Co janch anajty yñäy y'ögy, huin'it jëbi ypigipy mïid huingbi, pen jadu'n anajty najtztzogïy. Hue' janchtiy copicy co pigipy je pin mibijcp je Huindzin Jesucristo. ⁴⁰ Ooy nigi je töxyjäy co'ögyipi agujc jotcujc chinähuiipy yjogy'adipy pen ca' ypijctigach, jadu'n nmïididyich nhuinma'nñ, e nminambich co naybaatip ïch nhuinma'nñ mïid je tiy'ajt huidibi je Espíritu Santo yejcp.

8

Je tzüch huidibi ajcxy yajhuindzigïyb quipychech

¹ Jadüg nax, jada ayuc ajcxy nyajnijay#yb ma yi tzüch ymiñ huidibi jäy ajcxy yajhuindzig#yb tzaadzech quipychech. Janch tiy'ajt co nidüg'óciy #ch ajt nmüd'ajtim ixpijcin. Per pen ooy mij nayjihuiyim ajt n'ixpiyity, chi amij agix nayjihuiyim. Per pen naychojcin nayjihuiyim nidüg nidüg, huin'it nyajeecim nmibijcin. ² Pen ji nidüg ma miich ajcxy ñaydiyii co y'ixpiyity, ca'ni yi' jajtäy ixpijcin huidibi jaccopicy yjadipy. ³ Co tüg jäy yajmij'aty Dios, Dios ñejhuiyb nej jada jäy yjot yhuinma'ñ müdity.

⁴ Jadu'n jada je tiy'ajt maabi je tzüch huidibi jäy ajcxy ti yajhuindzig#ygixy tzaadzech quipychech ajcxy. Nejhuiyim co yi tzaadzech yi quipychech ca' ti jugy'ajtin müdity. Ji tügpajc Dios huidibi tzinaayb jugy'ajtp. ⁵ Janch tiy'ajt co yi naaxhuiñjäy ajcxy Dios'ájtigixy canaagnax huidibi yajpatp tzajpcix etz ya naaxhuiñ huidibi ca' Diosity. Etz nañ tiy'ajt co may yhuindzin'ajtcixy huidibi ca' yhuindzinity. ⁶ Per #ch ajt n'ojadajtim tügpajcpi Dios, je Dios Teedy. Je Dios Teedy coj macx tüg'óciy huidibi ji'ajtp. Müd yi' ycixpi #ch ajt ndzinaayim njugy'ajtim. Nañ tim jadu'n nmüd'ajtim tügpajcpi ajt nHuindzin Jesucristo, e yi' huijtz'ijtaayb tüg'óciy tijaty huidibi ji'ajtp, e nañ yi' ajt xyhuijtz'ijtim.

⁷ Janch tiy'ajt co yi tzaadzech quipychech ca' ti mic'ajt müdity, per nije'jity mibijcpidijc ca' huinjihuüy jada tiy'ajt. Nijejity ajcxy jecy'ajty ooy huindzig#ygixy tzaadzech, ixti chambaadni tijcixy co yi tzüch huidibi jäy müd huindzig#y tzaadzech, tzaadzech yi' yje'. Co ajcxy tzüdzixy yi' jadu'mbi tzüch, jibic nayjihuiygixy, nayjihuiygixy nejjihuiy ti ytundigooygixy. Ca' tiydudägy y'ijtcixy ma ymibijcin. ⁸ Ca' Dios xycöbiganim müd je' ycixpi co ti njicxim ti ndzüdzm tijaty tzüch, o müd co ca' ti njicxim ca' ti ndzüdzm tijaty tzüch. Nañ tim jadu'n Dios ca' oybi xymöhuaanim müd je' ycixpi co ti njicxim ti ndzüdzm ti tzüch, o müd co ca' ti njicxim ca' ti ndzüdzm tijaty tzüch. ⁹ Oy Dios a'ixiy co jëbi ndzüdzm huenhuidibi tzüchity. Per müd je migügtjc ycixpi huidibi ca' tiydudägy müdity ymibijcin, tzoc naygüend'ajtim ca'ydí je' jibic yñayjihuiyii müd huidibi #ch ajt ndunim. ¹⁰⁻¹¹ Tzoc ocpidaacim co miich ajcxy mnejhuüy je tiy'ajt, e xy'ixipy tüg migüg co mgay m'uucy ma tüg mesa jüby tigoty me je tzaadzech y'ity. Ca' jecyity co jada jäy huidibi ca' tiydudägy müdity ymibijcin, etz co xy'ixpaadipy jüby, huin'it je' cöbiganñ je tzüch huidibi huindzig#ñ'ajtp. E jadu'n yhuimbizimy co miich jibic ijxpejt ti myecy müd yi' m'ixpijcin ycixpi, com yi' mmigüg ti ytundigoy müd huidibi miich ti mduñ. E Cristo ti y'ögy müd yi' ypocy ycixpi nañ jadu'n. ¹² Co tüg mibijcpi jibic nayjihuiyii müd co ti xy'ixy ma je caydac mdzüch je tzüch huidibi jäy ajcxy yajhuindzig#yb tzaadzech, miich anajty tundigooyb müd Cristo ytiy'ajt, müd co yi' mibijcpi jibic ñayjihuiyii. ¹³ Paady ycixp ca' ndzüdza'ñich ni mina tzüch huidibi tzaadzech yhuindzig#ñ'ajtp. Pen jadu'n nduñich, jibic ijxpejt anajty nyejcpyich ma nijejity migügtjc, e chi yi' ajcxy yhuinma'ñyigoya'ñ.

9

Je tung huidibi Pablo paatip

¹ Janch janch co jëbi nduñich huentijity huidibi ndzojcpich. Nañ jadu'n janch co Jesucristo ti xyajni#icyich jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co miich ajcxy ijxpejt'ajtp ma #ch ndung, com ti ajcxy mmijpidaaccixy je nHuindzin'ajtim Jesús y'ayuc huidibi ti ngapxhuäcyich ma miich ajcxy. ² Ca' jecyity co jacjadyii jäy ajcxy ca' xycöbiganñich jadu'n nej Jesús xy'apóstol'adyijich. Per com miich ajcxy ti mmijpidaaccixy ajt nHuindzin Jesucristo, etz miich ajcxy mmibijcin

nidiy'ajtp co Jesús ti xyyajñibicyich jada tung, paady ycixpi copicy co ñich miich ajcxy xycöbigipyich jadu'n nej Jesús y'apóstol.

³ Jadu'n n'adzohuimbityich yí' ajcxy huidibi jibic xyñigapxip ñich ndung.
⁴ Com Jesucristo xyajñibicyich jada tung co ngapxhuäcxyich yí' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. ⁵ Nañ jadu'n xypaatpich co nmü'dadipyich tüg ndöxyijcich huidibi mibijcp, etz huidibi nmü'dhuididipyich tim jadu'n nej yí' jacjadyii apóstol ajcxy mü'dity, etz je Huindzin Jesús y'uch ajcxy mü'dity, etz Pedro. ⁶ ¿Nej miich ajcxy mminaangixy co ñich etz Bernabé nimejtzpajc ca' ñich ajcxy huaad ixmajtzcixy yí' ndungich co ngapxhuäcxyich Cristo y'ayuc ytiy'ajt? ⁷ ¿Huidibi soldado yí' ma je ejercito ci'm ygasto cojuy? ¿Pin ji cam nidungñyb, e ca' jicxipy je huidibi ti yaj'ity? Pin ychibo cuend'ajtp, ¿e ca' ügipy je chibo yleche? ⁸ Ca' miich ajcxy mina'nipy co jäy y'ayuc jada. Nañ jadu'n jaybety y'ity ma Dios ñecy tim jadu'n nej mmina'ñich. ⁹ Com jaybety jadu'n ymiñ ma Moisés ñecy, ma Moisés jadu'n ymina'ñ: "Ca' huaad huajyuub y'ajen mbidaaci ma yam ten moody yí' trigo co yajpajc'aty." ¿Nej jëyi mü'd huajyuub ycixpi Dios jadu'n ymina'ñ? ¹⁰ Canan jëyi mü'd huaj yuub ycixpi Dios jadu'n ymina'ñ. Nañ jadu'n Moisés jaybejty jada tiy'ajt mü'd ñich ajt ycixpi. Com yí' jäy ajcxy huidibi naaxjidziztp, etz yí' ajcxy huidibi trigo yajpajc'ajtp, hue' ajcxy yijp'ijxyp co padaangixy je moc tim huidibi ajcxy ti nidungiy. ¹¹ Nañ jadu'n ñich ajcxy huidibi Jesús ytung tuunip, ti ngapxhuäcxyich Dios y'ayuc ma miich ajcxy, e miich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meñ etz jicxy picy mü'd ndungich ycixpi? ¹² Pen jacjadyii Dios y'ayuccapxhuäcxi ti paatcixy meñ etz jicxy picy ma miich ajcxy mü'd ytung ycixpi, ¿nej ca' jëbi ñigi ñich nbaadyich meñ etz jicxy picy mü'dich ndung ycixpi? Oy njamü'didyich je mic'ajt nej nja'ane'mgixy co xymöhuibyich ajcxy meñ etz jicxy picy mü'd ñich ndung ycixpi, per ca' jadu'n ti n'ane'mgixy. Jadu'n ñich tzaachypí nyajnajxich jim ma miich ajcxy, jaydëbi jäy ajcxy cöbijccixy Cristo agujc jotcujc ca' ti adzippin. ¹³ Mnejhuñyb miich ajcxy co yí' huidibi ajcxy tumb ma Dios ytijc, paatcixy ninigoobi caayin uucin. Nañ jadu'n yí' pin ajcxy huidibi iyujc yajhuindzigñyb Dios, paatip ajcxy je huindzig'ñ tzüch. ¹⁴ Nañ jadu'n je Huindzin Jesucristo ane'my co huen yajcaaygixy yaj'uuccixy etz mooygixy yhuit ytucx yí' ajcxy huidibi capxhuäcxixp yí' y'ayuc ytiy'ajt. ¹⁵ ñich ca' ti nyajtuñich jada mic'ajt jada ane'min huidi nmü'dich. Nañ jadu'n ca' jada ayuc nyajnijayñygixy, mü'd co ndzocy co pada'ñich tijaty ma miich ajcxy. Jacjotcujc co n'ögibich mü'd yuu, ca'ydi co n'ané'mibich caayin uucin ma miich ajcxy, e jadu'n tzöydu'n nbáadibyich jadu'n nej cham naygömayiijich, mü'd co ci'm nnayyajcayijich mü'd ndungich.

¹⁶ Com ca' huaad naygömayiijich co ngapxhuäcxyich Cristo y'ayuc. Mü'd co Cristo xyyajñibicyich jada tung, paady ycixpi copicy ngapxhuäcxyich Cristo y'ayuc. Ayo'n nbadaamybich, pen ca' ngapxhuäcxich Cristo y'ayuc. ¹⁷ Pen ngi'mdzójcinich ycixpi ngapxhuäcxich Cristo y'ayuc, njijp'ijxypich ixypy co jäy ajcxy xymijuyipyich. Per ca' yjadu'nity. Hue' janchtiy je Huindzin Jesucristo xyajñibicyich jada tung, e paady nduñich yí' ytung. ¹⁸ ¿Ti muju'ñ nbáadibich mü'd ndungich ycixpi? Nbáadibich jotcujc'ajtin co ngapxhuäcxibich Cristo y'ayuc jadu'ñyi, ca' ymeñygixyity. Ca' nyajtuñich je ane'min huidibi Cristo xymóyich mü'd caayin uucin ycixpi.

¹⁹ Ca' ji ni pin jäy mic'ajt mü'dity jaydëbi xy'ane'myijich. Oy ixypy ytimyñejty ti nnaybidägyijich mü'd ñich njot nhuinma'ñ jadu'n nej jihuñy tüg'óciy jäy ajcxy xy'ane'myich. Jadu'n nduñich jaydëbi jac mayjäy ajcxy nyajmibigipyich Cristo. ²⁰ Co ngapxhuäcxyich Cristo y'ayuc ma yí' judíojäy,

hue' naybidägyiijich judíojäy, jaydëbi nyajmibicyich ajcxy Cristo. Co ngapxhuäcxyich Cristo ma yi judíojäy ajcxy huídibi cuydumyb yi' ajcxy ycötujcin etz ycostumbre, nañ jadu'n ñich nguyduñich yi' ajcxy ycötujcin, jaydëbi nyajmibicyich ajcxy Cristo. Ooy yjanchity co ca' yi judío ycötujcin etz ycostumbre xy'ane'myich. ²¹ Co ngapxhuäcxyich Cristo y'ayuc ma yi' ajcxy huídibi ca' yjudíojäyity, chi naybidägyiijich jadu'n nej yi' ajcxy. Ca' nan nmınaambich co ca' nguyduñich Dios ytiy'ajt. Hue' njatytimycuydumybich Cristo ycötujcin, jaydëbi nyajmibicyich ajcxy Cristo. ²² Co ngapxhuäcxyich Cristo y'ayuc ma yi' ajcxy huídibi ca' tiydudägy ymibijccixy, chi naybidägyiijich jadu'n nej yi' ajcxy, jaydëbi nyajmibicyich ajcxy Cristo. Ma nidüg'óciy jäy ajcxy ma ngapxhuäcxyich Cristo y'ayuc, chi nbidägyich njot nhuinma'ñ nej yi' ajcxy yjot yhuinma'ñ mïdity, jaydëbi nijëjity ajcxy nyajmibicyich Cristo y'ayuc ytiy'ajt. ²³ Jadu'n nduñich tüg'óciy mïd Cristo y'ayuc ycixpi, je ayuc nej jëbi jäy ajcxy y'alma ñidzooccixy. Jadu'n nduñich, jaydëbi nbaadyich je jotcujc'ajtin etz oy'ajtin huídibi nbaatim nidüg'óciy co nmijpidaacim Cristo.

²⁴ Mnejhuügyixy co jäy ajcxy ñayboyicquípxigixy co premio padaangixy, huin'it nidüg'óciy ajcxy ñaymic'íjxigixy, per tüg'pajc huídi je premio patp. Nañ jadu'n miich ajcxy mijottigooygix cuydungix Dios y'ayuc ytiy'ajt, jaydëbi Dios xymóoygixipy ajcxy tüg' premio. ²⁵ Tüg'óciy pinjaty nayñi'ixiiyip co ñay'ixquipxáanigixy ma iyihuijin, ooy ñayguend'ájtigixy mic, jigix jëbi ymadaaccixy co ganar'adaangixy premio huídibi ca' huinixi ajcxy mi'ijtcixy. Pero ñich ajcxy Dios y'ayuc capxhuäcxy, yi' ñich ajcxy mijottigooygixy nganar'adáangixyich huídibi ca' nimına ycixipy ytigoyipy. ²⁶ E jadu'n ñich ndung mijottigooyich, ca' yhuimbídzity agoodzity, jadu'n nejihuüy ngoxich e nipin ca ypegyii. ²⁷ Nnaychaachytumybich ngi'mninicxich, jaydëbi ngi'mninicxycapxymidooyich. Jadu'n nduñich co ti ngapxhuäcxyich Cristo ma je mayjäy ajcxy, ca'ydi nyajtigoyipyich nbremio huídibi Dios xymöhuambich.

10

Capxhuijin ma yi pin ajcxy jac-huindzigüyb quipychech

¹ Com ndzojcpich co miich ajcxy migügtijc mnejhuügyixipy co ajt nmij'ap nmijteedy mïd yhuídijty Moisés co Dios nidüg'óciy ajcxy cuend'ajttay, huinhuoy jecy'ajty mïd tüg' joc. E nañ jadu'n Dios yajnihuañ yajtzoocy nidüg'óciy ajcxy ma ymídzip co ajcxy yajnaxxy je tzaptz mejy cujc'amy. ² Co nidüg'óciy ajcxy panicxy je joc, e co ñidzoocstay ajcxy nidüg'óciy ma je mejy, hue' nidüg'óciy ajcxy cöbijcy Moisés y'ane'min, e jadu'n nipaady nej jihüüy ni'amugí ajcxy yñiibejty mïd Moisés yxi. ³ Nañ jadu'n nidüg'óciy ajcxy caay jicxy je maná huídibi Dios anajty yejcpy, choñ je' anajty tzajpjoty. ⁴ Etz nañ jadu'n y'uuc ajcxy nidüg'óciy je ñi huídibi Dios anajty yejcpy, com y'uuc ajcxy je ñi huídibi yajpidzim ma je tzaa. E je tzaa hue' je' anajty Cristo, e paady Cristo ymïd'ijtpy etz ypubejtpy ajcxy anajty nidüg'óciy. ⁵ Oy ajcxy Dios ooy yjapubejti, e ni may ajcxy ooy Dios yajjotma'ty, etz jahueen ajcxy yca'öctay jim mijtigíduum jecy'ajty, com ca' Dios jäygidacy je' ajcxy yhuinma'ñ.

⁶ Jadu'n nej je ayo'n yjajti mïd ajt nmij'ap nmijteedy jecy'ajty, je' ijxpejtíp ma ñich ajt, ca'ydi n'adzojcm tijaty jibicpi, jadu'n nej je' anajty ajcxy adzojccix jibicpi. ⁷ Nañ jadu'n ca' yhuaadity ca' y'oyity co miich ajcxy m'ojadajtcixy tzaadzech quipychech jadu'n nej nijëjity ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymına'ñ: "Ixtactay je jäy ajcxy caaybi uucpi, e huin'it ajcxy ypidigý etz ytigüygixy iyüybi ejtzpi." ⁸ Nañ jadu'n ca' y'oyity co ndundigooyim mïd töxyjäy ajcxy jadu'n nej nijëjity nmij'ap

nmijteedy tuñ jecy'ajty, e iipx tugüig mil ajcxy y'o'cy tüg xüibi. ⁹ Nañ ni ca' y'oyity co njot'ijxim nhuinma'ñ'ijxim ich ajt nHuindzin Jesucristo, jadu'n nej ajt nmij'ap nmijteedy ajcxy idich jecy'ajty, e may ajcxy tza'ñchüdzi, e ytigooy ajcxy yjugy'ajtin. ¹⁰ Nañ ni ca' y'oyity co nnigapxim ni'ojüym Dios, jadu'n nej nijëjity ajcxy idich jecy'ajty, e müd je' ycixpi Dios y'ángel yaj'o'cy mayjäy ma yi' ajcxy.

¹¹ Tüg'óciy yi jadu'mbi ayo'n yajti müd ajt nmij'ap nmijteedy, e jay-bety yhuim'y ma Dios ñecy, jigix n'ijxpejt'ajtim, e jadu'n t'y'ajt nbaatim, ca'ydí ndundigooyim müd Dios, ich ajt pinjaty tzinaayb ma jadachambi xü jadachambi tiempo huidibi janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmüd'ajtim je t'y'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt müdity ma ymibjcin, huen naygüend'adyii, ca'ydí ytundigoy etz ypocycähuiy ma Dios. ¹³ Tüg'óciy tzaachypi ayo'n, jot'ijxin huinma'ñ'ijxin huidibi mi-ich ajcxy mminajxyp myajnaxyp, nañ jadu'n jacjadyii mibijcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihuiy co mjacminájxcixipy mjacyajnájxcixipy tzaachypi ayo'n anaxy huidibi ca' ajcxy mmimadäga'ñ. Co anajty tzaachypi ayo'n mminajxcixy myajnajxcixy mictägy, huin'it Dios xymöhuiy ajcxy huinma'ñ jadu'n nej jëbi mminaxtaygixy myajnaxtaygixy yi tzaachypi ayo'n.

¹⁴ Paady miich ajcxy migügtijc, huidibi ooy ndzocy njihuiyich, ixmajtzcixy ca' m'ojadajtcixy tzaadzech quipychech. ¹⁵ Nyajmüdcapxy nyajmüdmidyapxy ajcxy jadayaabi ayuc, com nejhuüybich co miich ajcxy ooy oy huinma'ñ mmüdity. E jëbi ci'm mhuinmaaygixy pen t'y'ajt jada ich n'ayuc, o pen ca'. ¹⁶ Ma je “Santa Cena” co nyajnaxxim Dioscojuyip ma Dios müd je ügy, e n'uucim. Je' je' ñidiy'ajt'ajtpy co Cristo ti xyajtügmüjcm ajt njot nhuinma'ñ co yajcruudzpejti etz ñi'py yteemy yojcy müd ajt nbocy ycixpi. Nañ jadu'n ma je “Santa Cena” co ndujchuäcxim, e ngaayim je tzajcaagy, je' je' ñidiy'ajt'ajtpy co Cristo xyajtügmüjcm ajt njot nhuinma'ñ müd ñinix co ñaygïejci ma ymidzip huen yajcruudzpedyii. ¹⁷ Oy ajt ooy njanimaayity, per nidüg'óciy ich ajt ngaayim je tügpi “Santa Cena” tzajcaagy. Jada tzajcaagy tüg yi', paady ycixpi tügpicy jäy ich ajt, e jadu'n ich ajt nipaady nej tügpi ninix.

¹⁸ Oc-huinmaaygixy miich ajcxy yi Israel jäy ajcxy, co ajcxy tzützcixy je huidibi ajcxy yajhuindzigüyb Dios, chi ajcxy naydücmüjcgixy müd Dios ycixpi ma je Dios ojadajttac. ¹⁹ Ich nmïna'ñich co yi tzaadzech ca' ti mic'ajt müdity, e nañ jadu'n yi tzüch huidibi yajhuindzigüyb tzaadzech ca' jac nigí oy'ajtin müdity, ca'ydí jac huidibi tzüch. ²⁰ Jadu'n nmïna'ñich, co yi jäy ajcxy huidibi ca' mijpidaaccixy Dios, co ajcxy yejccixy yhuindzigí'ñ, hue' ajcxy yajhuindzigüyb ca'oybi, e ca' Dios ajcxy yajhuindzigïy. E ca' ndzocyich co miich ajcxy migügpigipy je ca'oybi. ²¹ Co miich ajcxy m'uuccixy je ügy ma je “Santa Cena”, ca' huaad m'uuccixy je ügy huidibi ca'oybi ajcxy yhuindzigí'ñ'ajtpy. Etz co mgaaygixy je tzajcaagy ma je “Santa Cena”, ca' huaad mgaaygixy je tzajcaagy huidibi ca'oybi yhuindzigí'ñ'ajtip. ²² ¿Nej tzoc yajjotma'tim yi Jesucristo? ¿Nej jacmic'ajt müd jada' ich ajt, ca'ydí yi'?

Je tzojcin huidibi tüg mibijcpi huaad tuñ müd ymigüg

²³ Janch t'y'ajt nej jay ymïnaangixy co jëbi huaad nduñich huentijity huidibi nijot'ajtpyich, per ca' tüg'óciy nmigügtijcich jäygidaaccixy hudi ndumybich. Janch jadu'n jëbi huaad nduñich huentijity huidibi nijot'ajtpyich, per huidibi ndumybich ca' tüg'óciy xypubetyich ma ich nmibjcin. ²⁴ Ca' y'oyity nnijot'ajtim ngi'm'oy'ajtin. Oy co nbubejtim nbudigüym nmigügtijc.

²⁵ Jëbi ajcxy mdzüch huen ti tzüch huidibi yajtoocp ma je mercado. Ca' ajcxy myajtiihuipy ma je tzüch chooñ, ca'ydi jibic mnayjihuiyigixy. ²⁶ Com Dios y'ayuc jadu'n ymïna'ñ: "Je Huindzin Dios yi' nihuindzin'ajtp je naaxhuiñybi, etz ñihuindzin'ajttaayb tüg'óciy huidibi ji yajpatp."

²⁷ Pen jim pinjaty huidibi ca' ymïbicy, xyajnihuohuïy tüg caayin uucin ma yi' ytijc, e pen ti mhuinma'ñ mbidägy co nicxy mgaya'ñ ma yi' ytijc, oy co mgaayipy mdzüzzip huentiijity huidibi ajcxy xymooyb. E ca' mnidihuipy myajtiihuipy ma je tzüch chooñ, ca'ydi jac pinjaty jibic ñayjihuiyii müd huidibi ti mduñ. ²⁸ Per pen je jäy xyñimaayb: "Jada tzüch ti jäy yajhuindzigiy tzaadzech." Pues ca' mdzüzzip je tzüch, jigix ca' jibic ñayjihuihuïyb je migüg huidibi ti xyñimäy co je tzüch ti yajhuindzigiy tzaadzech. ²⁹ Hue' nimiydacypich je mmigüg huidibi jibic nayjihuihuïyb pen miich mdzu'chpyi tzüch huidibi tzaadzech yhuindzigï'ñ'ajtp. Ca' nnimiydägyich nej miich ci'm mnayjihuiyii. Ca' yjeyity co nijëjity jäy xyñimähuïbich: "¿Na'amy co xycapx'adujcich tijaty nigoob müd co huingbi jäy jibic ñayjihuiyii müd jëgixpi?" ³⁰ Pen nyajnajxypich Dioscojuyip müd tijaty ycixpi huidibi ngaaybich n'uucypich, ¿na'amy co xyñigapxa'ñich xyñi'ojihua'ñich co ti ngay ti n'ügyich tijaty?" ³¹ Paady ycixp huentiijity huidibi mdungixyp, pen mgaaygixyp m'uuccixyp, o jac ti ga ti mdungixy, tungix tüg'óciy müd Dios y'oy'ajtin ymij'ajtin ycixpi. ³² Ca' mdúngixipy tijaty huidibi yi' judíojäy ajcxy müd huing ñayjihuiyii. Ca' mdúngixipy tijaty huidibi yi' griegojäy ajcxy müd huing nayjihuiyii. Etz ca' mdúngixipy tijaty huidibi yi' mibijcpidijc ajcxy müd huing ñayjihuiyii. ³³ Tüg'óciy huidibi ndúmybich, hue' nduñich jigix tüg'óciy jäy jäygidägyipy huidibi ndumybach. Ca' ni ti nduñich nej jëbi ñich ci'm nayjäygidägyiijich. Hue' nduñich müd jacjadyii jäy ajcxy y'oy'ajtin ycixpi, jaydëbi ajcxy y'alma ñidzögipy.

11

¹ Jadu'n ndzocyich co miich ajcxy mdunipy jadu'n nej nduñich. E ñich tumbich jadu'n nej Cristo ytuuñ.

Nej huaad töxyjäydijc ajcxy yjäy'ajtcixy co migügtijc naymújigixy

² Miich ajcxy migügtijc, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je tïy'ajt huidibi ñich miich ajcxy ti nyaj'ixpijccixy. ³ Per ndzojcypich co mhuinjihuïyigixipy je tïy'ajt co Cristo nigohuajc'ajtpy nidüg nidüg yi' mibijcpi yëydijcpi. E nañ nidüg nidüg yëydijc nigohuajc'ajty ajcxy ytöxyjic. E Dios nañ nigohuajc'ajtpy je Cristo. ⁴ Co tüg yëydijc cöjuuxy cöbe'ñ ñihuäcxy capxhuäcxy je tïy'ajt huidibi Dios ti ymöyii, tüg je' tzo'ydu'ñ anajty naymöyii. ⁵ E co tüg töxyjäy cöjuxtüdy cöbe'ndüdy ñihuäcxy capxhuäcxy je tïy'ajt huidibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuiy je' ycöme'pxity cödza'm. ⁶ Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuihuamyb co ycöhuay yme'pxity, o co ycöme'pxity cödza'm, jac ñigi oy co ñaygöbe'niyby. ⁷ Je yëydijctijc ca' y'oyity co ajcxy ycohuajc cöjuuxy cöbe'ñ m'idipy ma ajcxy Dios mibijtzoogixy o yaj'ixpijccixy Dios y'ayuc. Com je yëydijc jadu'n yi' nipaady nej Dios, e Dios yajcoj je yëydijc müd yi' y'oy'ajtin ycixpi. Per Dios yajcoj je töxyjäy müd je yëydijc y'oy'ajtin ycixpi. ⁸ Co Dios yajcoj je yajijpi yëydijc, ca' yajtuuñ je töxyjäy ycaachypajc. Hue' janchtiy co Dios yajcoj je yajijpi töxyjäy, je' yajtuuni je ñiyëydijc tüg ycaachypajc. ⁹ Dios yajcoj je töxyjäy müd je yëydijc ycixpi. E ca' nan yajcoj je yëydijc müd je töxyjäy ycixpi. ¹⁰ Paady ycixp copicy co je töxyjäy ajcxy

y'ijtcixy cöbe'ñ co Dios mibijctzoogixy o najtzcapxiygixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yi ángeles ajcxy yajpaatcixy ane'my. ¹¹ Per ca' ñejity, ñich ajt huídibi nmibijcim Cristo, ma ajt ndzinaayin je yëydijc ca' je' yajpaady naydüg, etz ni ca' je töxyjäy yajpaady naydüg, hue' ajcxy naymüddzináayigixyp. ¹² Com tiy'ajt jadu'n co Dios yajcojy je jayijpi töxyjäy müd je ñiyëydijc ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydijc ajcxy. Per Dios ti yaj'oyiydäy, e tüg'óciy jüby chondäy ma Dios.

¹³ Miich ajcxy ci'm ocmínaangix oc-huinmaangix, pen oy jadu'n o pen ca' y'oyity jadu'n co tüg töxyjäy Dios mibijctzoy jaygöbe'ñ. ¹⁴ Jëbi tiy'ajt nbaatim huenma'ámyity ya naaxhuiñ co je yëydijc huídibi ymüd ycöhuay yoñ ooy cho'ydu'n yecy. ¹⁵ E je töxyjäydijc ajcxy ooy ycömaypidzimigixy co ajcxy müdity ycöhuay yoñ. Com yi' je' huídí ycöbe'n'ajtip. ¹⁶ Pen jim pinjaty ca' mijotcujc'aty ñich n'ayuc, copicy nejhuihuipy co ñich ajcxy etz nañ jadu'n tüg'óciy jäy huídibi ajcxy mijpidaaccixyp Dios ma tüg'óciy cajp, cuydungixy nej ti nyaj'ixpicyich miich ajcxy, ca' pin jac huingbi costumbre müdity.

Pin tundigooyb “Santa Cenajoty”

¹⁷ Jada ayuc nyajnimähuaangixyp jadu'n nej mdungixy ma mnayyöymújcigixy co Dios m'ojadajtcixy. Ca' ngapxpaadyich miich ajcxy, com jibic yhuimbizimy jadu'n nej mdungixy. ¹⁸ Jayijp nimähuaangixy co nijëjity migügtijc ti xyñimäyich co miich ajcxy mnaybijc-huäcxigixy co mnayyöymújcigixy ma je nayyöymujctac. E ñich nmibijcpiyich ma ga ma co yjanchity nej je migügtijc ajcxy ymína'ñ. ¹⁹ Ca' yjecyity paady miich ajcxy mnaybijc-huäcxí müd ajcxy mjibic-huinma'ñ ycixpi, jaydëbi ñiguëxigy pin je' janch tiydudägy cuydumb Dios ytiy'ajt. ²⁰ Co miich ajcxy mnayyöymújcigixy ma je nayyöymujctac, jadu'n yhuimbizimy co ca' mguydungixy nej ypadyii ñich ajt nHuindzin Jesucristo ytiy'ajt co mjatungixy je “Huindzin je' ySanta Cena”. ²¹ Com co je hora paady ma yam mdungixy je “Huindzin je' ySanta Cena” nidüg nidüg miich ajcxy mgaangixy abicyjaty, e ca' mdungix cuendi yi jacjadyii migügtijc, paady nijëjity migügtijc ayuu y'ijtcixy, e nijëjity anaxy ycaangixy y'uuccixy, ixti ymuucigixy nijëjity. ²² ¿Nej ca' miich ajcxy müdity mjün mdijc ma jëbi mgaangixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jäy ajcxy nidüg'óciy huídibi mijpidacp Dios. E nañ jadu'n myajtzo'ydungixy yi ayoobi jäy huídibi ajcxy ca' ti müdity. ¿Huam ñich miich ajcxy nimähuiipy? ¿Nej jëbi ngömaangixy miich ajcxy jadu'n nej mdungixy? Ca' huaad ngömaangixy miich ajcxy co jadu'n m'iditczixy.

Jadu'n nej njäymejtzim ajt nHuindzin Jesús ma yi “Santa Cena”

²³⁻²⁴ Com ñich ajt nHuindzin Jesucristo ci'm xyaj'ixpicyich je tiy'ajt huídibi ti nyaj'ixpicyich miich ajcxy, co je huin'it coodz co agojñix ajcxy cäyeycy je nHuindzin Jesús, huin'it je' conigy je tzajcaagy, e co jayijp yajnaxxy Dioscojuyip ma Dios, chi tujc-huäcxí je tzajcaagy, e moy nidüg nidüg ydiscípulos ajcxy. E co ajcxy moyday, chi nimay ajcxy: “Caangix jada tzajcaagy. Jadu'n ñich jada nninícx huídibi ngiyegaamybich ma yi o'cin müd miich ajcxy ycixpi. Jadu'n ñich ti nduñich, jadu'n jada miich ajcxy mdunipy jäymejtziig müd ñich ycixpi.” ²⁵ Co ajcxy ycayday, chi Jesús nañ jadu'n conigy je ügy copí'am, e ymínañ: “Jada ügy je' jada je Dios y'ayuc jemybi huídibi Dios yajhui'my müd jäy ajcxy ycixpi, je huídibi ñich nni'py ñidiy'ajt'ajtpy. Naag'oc naag'oc m'uuccixy jada ügy tungixy jäymejtziig müd ñich ycixpi.” ²⁶ Paady naag'oc naag'oc miich ajcxy mgaangixy jada tzajcaagy, etz m'uuccixy jada ügy,

myegipy ajcxy tiy'ajt jadu'n nej Cristo y'o'cy mïid ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je “Santa Cena”

²⁷ Paady ycixp pinjaty mïid ca'oyjot ca'oyhuinma'ñ caaygixy je tzajcaagy etz uuccixy je vino'ügy, huidibi ajt nHuindzin Jesús ñinïcx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxnïcx etz yi' yñi'py.

²⁸ Paady ycixpi copicy nidüg nidüg mibijcpidijc jayijp yaj'oyihuipy yci'mjot yci'mhuinma'ñ, e huin'it jëbi cayipy je tzajcaagy etz ügipy je vino ma je “Santa Cena”. ²⁹ Com pinjaty caayb je tzajcaagy etz ügy je vino ma je “Santa Cena”, e ca' tuñ cuendi co je' je' ñch ajt nHuindzin Jesús ñinïcx etz ñi'py, hue' je' ci'm ñaymidundigoyii, e Dios tzaachytunïb mïid ypocy ycixpi. ³⁰ Paady ycixp may miich ajcxy myuumïidity mba'mmïidity, pumäy mnayjihuiyigixy. May miich ajcxy yuu ba'm xyaj'ayoogixy etz may ma miich ajcxy ti m'öccixy. ³¹ Co tiydudägy njot nhuinma'ñ nyaj'oyiyim ci'm, ca' ajt nHuindzin Jesucristo xychaachytuunim. ³² Co ajt nHuindzin Jesucristo xychaachytuunim mïid yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjugy'ajtin quipxyi mïid je naaxhuiñjây ajcxy huidibi ca' ajcxy Dios tzigiygixy.

³³ Paady ycixpi miich ajcxy migügtijc co ajcxy mgaya'nip m'üga'nip je “Santa Cena” nay'ahuixigixy miñ xyipy, e jadu'n mgáaygixipy amugi'. ³⁴ Pen jim pinjaty ma miich ajcxy ooy yuubögyii, jac'oy co ycaayipy y'ügipy ma yci'mdijc jacjayijp ma ca'ni ymiñ ma je nayoymujctac. Jadu'n mdúngixipy, ca'ydi Dios xychaachytuungixy mïid co ca' oy mduungixy je “Santa Cena”. Yi jacjadyii ayuc huinma'ñ jim nyaj'oyihuibich co anajty nicxy ci'm n'ïjxcixyich miich ajcxy.

12

Je mic'ajt huidibi Espíritu Santo yejcy ma nidüg nidüg mibijcpidijc

¹ Migügtijc ajcxy, ndzojcpich co miich ajcxy mnejhuihuipy jadu'n nej je Espíritu Santo xymooyim mic'ajt. ² Miich ajcxy mnejhuib co jayijp'ajty co ca'ni anajty mmibijccixy Cristo, ooy anajty je ca'oybi xyajnidigooygixy xyajtüdigoooygixy, co m'ojadajtcixy tzaadzech quipychech huidibi ca' ymidoy ca' ycapxy. ³ Paady ycixpi ndzojcpich co miich ajcxy mnejhuihuipy co pinjaty ymina'nipy: “¡Ca' oy jây yi Jesús!” je jây huidibi jadu'n minamb, ca' je' anajty yajcapxyii je Dios y'Espíritu. E pinjaty minamb: “¡Jesús ñch ajt nHuindzin!” je' anajty yajcapxip je Espíritu Santo.

⁴ Dios yjihui'ñ ymic'ajt yejcpy ymic'ajt canaag nax, per tügpajc jëyi je Dios yjihui'ñ huidibi mic'ajt yejcp. ⁵ Ji yajpaady canaagnax Dios ytung, per tügpajc ajt nHuindzin Jesús huidibi xyajniñijcïn nije' nije' tung. ⁶ Ji yajpaady canaagnax huinma'ñ nej jëbi ndunim Dios ytung. Per tügpajc Dios huidibi xymooyim nidüg nidüg je nhuinma'ñ nej huaad ndunim Dios ytung. ⁷ Dios yajniguëxigyp ma nidüg nidüg mibijcpidijc je tiy'ajt co ajcxy mïidity yi' yjihui'ñ ymic'ajt ma ajcxy yjot yhuinma'ñ. Jadu'n Dios ytuñ mïid tüg'óciy ymibijcpidijc y'oy'ajtin ycixpi. ⁸ Dios mïid yjihui'ñ ymic'ajt ymooyb nijëjity mibijcpidijc ayuc huinma'ñ nej jëbi ajcxy yaj'ixpicy Dios y'ayuc. E nañ jadu'n Dios mïid yjihui'ñ ymic'ajt möy nijëjity mibijcpidijc xpijcin ma yi' ytiy'ajt, per tügpajc je Espíritu Santo huidibi mic'ajt yejcp. ⁹ E nañ jadu'n Dios mïid yjihui'ñ ymic'ajt möy nijëjity jây mibijcin, per tügpajc je Espíritu Santo huidibi mic'ajt yejcpy. E nañ jadu'n jacnaagity möy mic'ajt jaydëbi yajtzögy pa'mjäy. ¹⁰ E nañ jadu'n Dios mïid yjihui'ñ ymic'ajt ymooyb nijëjity mibijcpidijc mic'ajt,

jaydēbi mijhuinma'ñytúngixy milagro tungixy. E jac nijējity ymooyb mic'ajt, jaydēbi najtzcapxiiygixy Dios ytiy'ajt. E jac nijējity Dios ymooyb ixpijcin etz huijy'ajtin, jaydēbi ijxajpcixy je espíritu huídibi ca' tiy'ajt mūdity, etz nañ jadu'n ijxajpcixy je espíritu huídibi tiy'ajt mūdip. E jac nijējity Dios ymooyb je mic'ajt, jaydēbi capxcixy huingbi ayuc, etz nañ jadu'n jac nijējity ymooyb je ixpijcin jaydēbi yajniguejicixy je huingbi ayuc. ¹¹ Per tūgpajc je Espíritu Santo huídibi ymooyb nije' nije' mibijcpidijc mic'ajt etz huinma'ñ. Ymooyb nidüg nidüg nej yi' tzocy.

Nidüg'óciy ajt nyajpaatim ma Cristo

¹² Cristo jadu'n yi' nej tūg ninīcx, je ninīcx ymūd canaag nax huídibi yu'cxp. Oy canaag jamūdity huídibi yu'cxp, per tūgpajc ñinīcx'aty. ¹³ Co nidüg nidüg iich ajt nnibejtim, chi iich ajt nyajpaatim nej tūgpicy jāy. Com Dios yjihui'ñ ymic'ajt tūgpajc yajpaady ma nidüg'óciyi iich ajt njot nhuinma'ñ, ca' ñejity pen judío jāy ajt, o pen ca' ajt njudío jāyity; pen jāy xytumbi'ajtim o pen ndunim ngi'ndung; hue' n'ijtim nej tūgpicy jāy. Dios xy'adigiim xyjottigiim yi' yjihui'ñ ymic'ajt nidüg'óciy iich ajt, paady ycixpi tú'ciy nyajpaatim, com tú'ciy nmi'ijtim Dios yjihui'ñ ymic'ajt.

¹⁴ Tūgpi jāy ñinīcx mūd canaagnax huídibi yu'cxp, huídibi mīdoob, huídibi ijxp. ¹⁵ Co ixypy je teczy jadu'n ymīna'ñ: “Ca'p iich ngijity, paady ca' nyajpaadyich ma je ninīcx.” ¿Nej paady ycixpi ca' yajpaady ma ninīcxin? ¹⁶ O co ixypy je tādzac ymīna'ñ: “Ca'p nhuinity, paady ca' nyajpaadyich ma je ninīcx.” ¿Nej paady ycixpi ca' yajpaady ma ninīcxin? ¹⁷ Co ixypy tūg'óciy je jāy ñinīcx y'oc-huin'aty, ¿ma ixypy mūdity huídibi mīdooyb? O co ixypy tūg'óciy je jāy ñinīcx ytādzac'aty, ¿ma ixypy mūdity huídibi jēbi mūd tijaty xuugyii? ¹⁸ Dios ti pidaci jāy ytecy yhuin y'ahuac etz jac tijaty ma tūgpi ninīcx jadu'n nej yi' tzojcy. ¹⁹ Pen huind'ajty ixypy ninīcx'ajtp, ¿ti ninīcx ixypy jada? ²⁰ Dios ti möy nidüg nidüg jāy yci' ytecy, yhuin y'ahuac, yjijpput etz ytādzac, per tūgpajc ñinīcx'aty.

²¹ Ca' huaad je huin ixypy nimāy je ci': “Ca' iich miich nyajmayjaty.” Nañ jadu'n ca' huaad ixypy je cohuaajc nimāy je teczy: “Ca' iich miich nyajmayjaty.” ²² Tūgpi ninīcx copicy ca'pxy tijaty mūd. Huídijaty je ninīcx ymūd oy yjaquēxigy nej jihuiy ca' y'oy'ojadajtnity, per copicy yi'. ²³ Jadu'n iich ajt njāy'ajtim. Muum ma ajt nninīcx ca' oy n'ijxim, paady nayxoixim, jigix jac'oy quēxigip. Nañ jadu'n muum ma ajt nninīcx huídibi y'oymidzo'yduni, paady nyūdzim mūd huit, jaydēbi oy quēxigity. ²⁴ Muum ma ajt nninīcx oy n'ijxim paady ca' nyūdzim mūd huit. Jadu'n Dios yaj'oyiy ajt nninīcx, jigix ma ca' oy y'ijxity, nxoixim mūd huit, jigix jēbi oy quēxigy. ²⁵ Jadu'n Dios yajcojy yaj'oyiy ajt nninīcx tú'ciy, jigix ca'ydi ñaychiptúnigixy nije' nije' huídibi yūcx ma ajt nninīcx. Tūg'óciy huídibi nmūd'ajtim ma ajt nninīcx naybubéjtigixp miñ xyipy. ²⁶ Pen pijcp muum ma je ninīcx, tūg'óciy je ninīcx jihuiy je pijcin. Pen muum ma ajt nninīcx ooy capxpaady y'ity, chi tūg'óciy je ninīcx jotcuyc ñayjihuiy.

²⁷ Miich ajcxy nidüg'óciy Cristo xyñinīcx'ajtcixyp, e nidüg nidüg miich ajcxy myajpatcixy ma Cristo ñinīcx. Jadu'n nidüg nidüg iich ajt nipaady nej huídibi yūcxp ma tūg ninīcx. ²⁸ Dios yajnībicy nije' nije' mibijcpidijc, jigix ajcxy yajnīcxip nidüg nidüg yi' ytung. Tim jayijp yajnībicy je apóstol ajcxy huídibi je mījtung yajnīcxip. E mimetz Dios yajnībicy nijējity mibijcpidijc huídibi najtzcapxiiyb yi' y'ayuc, je mīdugigpi Dios yajnībicy nije' nije' je mibijcpidijc huídibi yaj'ixpijcp yi' ytiy'ajt. Dios yajnībicy mibijcpidijc nijējity huídibi mij huinma'ñ tumb. E Dios yajnībicy mibijcpidijc nijējity huídibi yajtzoocp

pa'mjäy. E Dios yhuin'ijx huídibi pubejtp ymigügtijc. E Dios yhuin'ijx je mibijcpídiyc huídibi ane'míp je ymigügtijc. E Dios yhuin'ijx je mibijcpídiyc huídibi jadíp nej capxíp huingbí ayuc. ²⁹ Ca' nan nidüg'óciy mibijcpídiyc huídibi Dios huin'ijxyp y'apóstol'ajtcixy. Nañ ni ca' nan nidüg'óciy ajcxy najtzcapxiygixy Dios y'ayuc. E nañ ni ca' nidüg'óciy yi' ajcxy mijhuinma'ñytungixy. ³⁰ Ca' nan nidüg'óciy mibijcpídiyc huídibi Dios huin'ijxíp ymíid ajcxy mic'ajt cötujc yajtzögípy pa'mjäy. Nañ jadu'n ni ca' ajcxy nidüg'óciy jajtcixy nej yajniguéjciixy huingbí ayuc. ³¹ Píjctzoogix cixyjot huinjot ma Dios je mic'ajt etz je huinma'ñ oybi. ñich miich ajcxy nyajniñihuipy tüg ni'aa tü'aa jac'oybi.

13

Je tzojcin je oyyäy'ajtin

¹ Co ixypy ngapxyich tüg'óciy jäy ajcxy y'ayuc, etz nañ jadu'n ngapxyich ángeles ajcxy y'ayuc, e ca' ndzocyich ca' njihuüyich nmigügtijcich, jadu'n yhuimbídzimy ñich n'ayuc jadu'n nej tüg tambor o tüg platillo huídibi nigoob ooy ñe'my. ² E co ixypy najtzcapxyich Dios y'ayuc, etz co ixypy njatyich tüg'óciy ixpijcin huídibi pinjaty nejhuüy etz huídibi pinjaty ca' nejhuüy, etz co ixypy nmijpídägyich Dios ymic'ajt, ixti jëbi nyajpídägyich tüg cop, pen ca' ndzocyich njihuüyich nmigügtijcich, ca' ñich ti ndzoohuity. ³ E co ixypy nmoydayich ayoobitijc tüg'óciy tijaty nmíidich, e nañ co ixypy ngiyecyich nninícx ma jäy ajcxy co huen nöctigoydäy, e ca' ndzocyich njihuüyich nmigügtijcich, ni ti oybi ca' nbada'ñich.

⁴ Yi jäy ajcxy huídibi ooy tzocy ooy jihuüy ymigügtijc, hue' ajcxy ooy mecxtujcin míidity, nañ ooy ajcxy yung naxy yjot yhuinma'ñ. Nañ ca' ajcxy ymigüg ti yajcohuindoyii, e nañ ca' ajcxy ñaygömayii ci'm. ⁵ Yi mibijcpídiyc huídibi ajcxy tzojcp jihuüyb ymigügtijc, ca' ajcxy oyñinej ycapxcixy, ca' ajcxy yci'm tzojcin adzip tungixy, nañ ni ca' ajcxy yhuindzipity, nañ ni ca' ajcxy ymigüg mijotma'tcixy. ⁶ Yi mibijcpídiyc huídibi ajcxy tzojcp jihuüyb ymigügtijc ca' ajcxy yjotcujcity co pinjaty ytundigooy. Jotcujc ajcxy co pinjaty tudägy yjäy'ájtciixip. ⁷ Co naychojcin nayjihuiyim, huin'it yajtunim mecxtujcin, huin'it nmibijctayim huídijaty tiy'ajtip, huin'it nmibijctaayim co tüg'óciy tijaty oy yhuimbídzimipy, huin'it nmecxtujctayim tüg'óciy tzaachypi ayo'n.

⁸ Yi naychojcin nayjihuiyim ca' yi' ycixipy ytigoyipy ni mina. Minip je xii tiempo ma ca' y'ocyaj'ijxnipy y'ocyajmídoonipy Dios ycapxy y'ayuc huídibi jäy ajcxy ñajtzcapxiygixyp, nañ ni ycayajmídoohuipy pin huingbí ayuc capxp, ni ycayajtzocy anajty ti diy'ajt. ⁹ Com ca' yca'pxity je ixpijcin huídibi ñich ajt nmíid'ajtim. Nañ jadu'n ca' yca'pxity je Dios y'ayuc huídibi ñich ajt nnajtzcapxiyim.

¹⁰⁻¹¹ Per co anajty nmíid'ajtim ca'pxy Dios y'ayuc ytiy'ajt, chi ycixipy ytigoyipy je ayuc huídibi nmíid'ajtim cham huídibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmíydägyich n'iyíyich nejtyin pi'c'anäcin. Per co oy nmíj'anäciyñich, chi n'ixmajznich je pi'c'anäg'atypi huinma'ñ. ¹² Nañ tim jadu'n nyajnajxim jadachambi xii tiempo ca' n'ixpijctaayim, ca' nhuinjihuüydaayim Dios y'ayuc ytiy'ajt. Jadu'n nipaady nej jihuüy nay'a'ixnajxim ma tüg iix, huídibi ti chixni ti yjibiciyñi. Co anajty Jesús yhuimbity jadüg'oc, huin'it huädz nhuinjihuüydaayim Dios y'ayuc ytiy'ajt, com naybadaanim míid Jesús ahuin ajijp. Jadachambi magama nhuinjihuüyich. Per co nnaybadíyibich míid Jesús, huin'it nhuinjihuüydaayim nej Dios y'ixpijcin míidity, tim jadu'n nej Dios nejhuüyday nej ñich n'ixpijcin nmíidity. ¹³ Nmibigaanim Cristo huinixii

huinitempo, ca' n'ixmadzaanim nmibijcin ni mina. Nañ njjpp'ijxim co oybi nbadaanim ma Dios huinixi huinitempo. Nañ jadu'n ndzojcin njihuuyim migügtjc huinixi huinitempo. Hue' jac nigü copicyip co naychojcin nayjihuuyim ca'ydi jac ti.

14

Co huingbi ayuc yajcapxy

¹ Naychöjcgixy nayjihuuyigixy miñ xyipy. Mijottigooygixy nej mbaatcixy Dios yjihu'iñ ymic'ajt canaagnax. Yi Dios yjihu'iñ ymic'ajt huidibi jac'oybi, yi' je' yejcpy mic'ajt jaydëbi mnajtzcapxyygixy Dios y'ayuc ytiy'ajt. ² Yi jäy ajcxy huidibi Dios ymic'ajt müd jaydëbi capxy huing ayuc, hue' ajcxy ymigapxyp Dios, e ca' nan jäy, com yi jäy ajcxy ca' huinjihuuyigixy je' ajcxy y'ayuc huidibi capxp. Je Espíritu Santo yejcp je ayuc ma je huidibi capxp. Jadu'n nipaady nej jihuiy ameech je' ycapxy. ³ Pinjaty najtzcapxyb Dios ytiy'ajt, yi' ycapxhuäcxyp Dios y'ayuc ma yi jäy ajcxy, jaydëbi yujcpedipy ajcxy y'ixpijcin ma Dios y'ayuc, nañ jadu'n jaydëbi ajcxy yjotmicpigipy etz yjotcugüygixipy. ⁴ Pinjaty capxp huing ayuc, hue' ci'm naybubedyi. Pinjaty najtzcapxyb Dios y'ayuc ma yci'm ayuc, hue' ypubejtyp tüg'óciy yi mibijcpidijc.

⁵ Huaad co ixipy nidüg'óciy miich ajcxy mgapxcixy huingbi ayuc. Per jac nigü oy co miich ajcxy mnajtzcapxyygixy Dios ytiy'ajt, ca'ydi co mgapxcixy huingbi ayuc. Pinjaty huidibi najtzcapxyb Dios y'ayuc, jac nigü oy tuñ, ca'ydi jac pinjaty huidibi capxy huingbi ayuc, pen ca' pinjaty capxticxipy je huingbi y'ayuc, jigix je mibijcpidijc jotcuje'ajtin pátcixip. ⁶ Migügtjc ajcxy, co ixipy nnicxyich ma miich ajcxy, e ngapxyich ixipy huingbi ayuc, ¿ti oybi miich ajcxy mbadamyb ma ich? Pen ca' anajty ti pubejtin nduñich ma miich ajcxy, pen ca' nyajnejhuuyigixy Dios ytiy'ajt jemybi, pen ca' nyaj'ixpijccixy Dios ytiy'ajt o pen ca' nnajtzcapxyich Dios y'ayuc, o pen ca' nyecyich xpijcin.

⁷ Tzoc ocpidaacim tüg'ijxpejt ma je xüxy, jadu'n nej je flauti o je arpa. Pen ca' nmido'mbijcim je nota je tono nidüg nidüg, ca' nmido'mbijcim ti pieza ti xüxy yajxuxp o yajcoob. ⁸ Nañ jadu'n co soldados ajcxy chiptunaangixy, pen je trompeta ca' huadz yxüxy, ca' ni tüg soldado ñayñ'i'ixihuañyii ma je tzip ytuna'ñyii yjada'ñyii. ⁹ Nañ tim jadu'n müd miich ajcxy, pen mgapxcixyp huingbi ayuc huidibi ca' pin huinjihuuyi, ¿nej yajnejhuuihuipy ti miich anajty mgapxyp? Jadu'n je' anajty yhuimbizimni nej nigoob mdim'ixmiydaaccixy. ¹⁰ Janch co ji yajpaady canaagnax ayuc ya naaxhuiñ ac tigachjaty. Etz janch co nidüg nidüg jäy ayuc müdity e ci'm je' ajcxy huinjihuuyigixy. ¹¹ Per pen ca' nhuinjihuuyich je ayuc huidibi jäy xyajmigapxpich jadu'n ich yi' nyajnaxyich nej agatz. O pen ca', yi' xyajnaxpich nej agatz. ¹² Paady miich ajcxy co ooy mnijot'ajtcixy Dios yjihu'iñ ymic'ajt canaagnax, yajtungix je mic'ajt huidibi pubedam yi mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³ Paady pinjaty jajtp nej capxip huingbi ayuc, copicy co Dios mibijctzohuipy co mic'ajt ymöhuiñb, jaydëbi yajñiguejy je ayuc huidibi ycapxamyb. ¹⁴ Pen nmibijctzooybich Dios müd huingbi ayuc, nmibijctzooybich müd ich n'espíritu, per ich nhuinma'ñ ca' ti jäygidaacin paady. ¹⁵ ¿Ti huaad ndunipyich? Pues copicy nmibijctzooyich n'ojadatyich Dios müd ich njihu'iñich, e nañ jadu'n nmibijctzooyich müd ich nhuinma'ñich. N'ibadaamyich ngapxpadaamyich Dios müd ich njihu'iñich etz müd ich nhuinma'ñich. ¹⁶ Com pen miich mhuiñgixyp mhuingapxtaaccixyp Dios müd yi mjihu'iñ, je migüg huidibi amidoo'ijtp

ca' je' huinjihuïy je huing ayuc huïdibi mgapxyp, e ca' jëbi ymina'nip "jadu'n jada, Amén." Com ca' yi' huinjihuïy ti yi' mgapxyp. ¹⁷ Ca' yjeyity co oyjaty ayuc ti myajtuñ co ti myajnaxy Dioscojuyip ma Dios, per yi mmigüg huïdibi ca' huinjihuïy miich m'ayuc ca' yi' ti jäygidaacin paady. ¹⁸ Nyajnajxypich Dioscojuyip ma Dios co nïgi njatyich nej ngäpxibyich huingbi ayuc, ca'ydi miich ajcxy nidüg'óciy. ¹⁹ Per co nyajpaadyich ma je mibijcpidijc ti ñayyöymújcigixy, jac'oy co ngapxyich migoox ayuc huïdibi mibijcpidijc yhuinjihuïygixyp, ca'ydi co ngäpxibich majc mil huingbi ayuc huïdibi ca' pin huinjihuïy.

²⁰ Migügtijc ajcxy, ca' ajcxy mmïd'adipy mhuinma'ñ, jadu'n nej pi'ctijc yhuinma'ñ mïdity. Ma yi jibicpi huinma'ñ ymiñ naybidägi jadu'n nej ma'xungdijc huïdibi ca' ti jibic huinma'ñ huinjihuïygixy. Mïd'adip miich ajcxy oyjot oyhuinma'ñ jadu'n nej mi'janäctijc huïdibi yhuinma'ñ ti ymejtznï ti yca'pxni. ²¹ Jaybety y'ity ma Dios ycötujcin necy ma Dios jadu'n ymina'ñ: "Nmigapxaamybich je may Israel jäy mïd huingbi ayuc, e huingbi jäy najtzcaxihuamb ich n'ayuc ma yi' ajcxy, per ni jadu'n ajcxy xycatuna'ñich cuendi." Jadu'n je Huindzin Dios ymina'ñ. ²² Paady je' je Dios ymic'ajt huïdibi yajcapxp huingbi ayuc, yejcp Dios ymic'ajt ijxpejt ma yi jäy ajcxy huïdibi ca' mibijccixy Dios. Per je Dios ymic'ajt huïdibi jäy ymïd co najtzcaxiy Dios ytiy'ajt, yejcp ijxpejt ma yi mibijcpidijc, ca' yecy ijxpejt ma yi' ajcxy huïdibi ca' ymibijccixy. ²³ Ca' yjeyity jadu'n yjadip, co anajty ti ñayyöymújcigixy je mibijcpidijc, e nidüg'óciy anajty ajcxy ytigiygixy capxpi mïd huingbi ayuc huïdibi ca' pin huinjihuïy, chi ytigihuip ma ajcxy ñayyöymugyïi nijëjity huïdibi ca' ymibijccixy. ¿Ca' yi' ajcxy yminángixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidüg'óciy je mibijcpidijc ma je nayyöymujctac najtzcaxiygixy Dios ytiy'ajt mïd yci'm ayuc, e co ytigihuipy pinjaty huïdibi ca' ymibicy, e co yi' midohuipy Dios y'ayuc yjihuïhuamyb ypocy. E ci'm huinmayip nej anajty ti ytundigooy mïd Dios co midohuipy co nidüg'óciy mibijcpidijc anajty najtzcaxiygixy Dios y'ayuc. ²⁵ E Dios y'ayuc yajnejhuïhuïb nej anajty ameech ti ytundigooy jotjoty huinma'ñjoty. E chi jada' ycojxtinay'ihuïhuipy, e ojadadipy Dios, e nañ jadu'n ymina'nip co janch Dios miich ajcxy xymïd'ijtp.

Tungixy tüg'óciy mïd tudägy'ajt etz yajxon

²⁶ Migügtijc ajcxy, ¿ti huaad mdúngixipy? Co mnayyöymújcigixipy, nijëjity miich ajcxy mhuin'ixipy tüg salmo, tüg ayuc huïdibi yaj'ixpigamyb, tüg tiy'ajt huïdibi Dios ti xyajnejhuïygixy, etz capxip huingbi ayuc, etz capxticxipy nej yhuimbidzimyb je huingbi ayuc. Tüg'óciy jadu'n tungix, jaydëbi ajcxy jäygidägiy etz yujcpedipy ajcxy ymibijcin huïdibi ti ñayyöymújcigixy. ²⁷ Pinjaty capxamb ma je naymujctac mïd huingbi ayuc, huen capxy metz o tugüg jäy je'yi, e huindüg padüg huen capxcixy, ca' y'animayity. E pinjaty capxticxamb je' je' yajnigüejip nej yhuimbidzimyb je ayuc tiibi capxcixy. ²⁸ Pen ca' yajpaady ma je nayyöymujctac tüg jäy huïdibi capxticxip je huingbi ayuc, jac'oy co ca' ni ti yajcapxipy mïd huingbi ayuc, jac'oy co migapxip Dios jotjoty huinma'ñjoty, e ca' capxip mayjäyjoty. ²⁹ Nañ jadu'n mayjäyjoty jëbi metz o tugüg jäy najtzcaxihuip Dios ytiy'ajt, e yi jacjadyïi mibijcpidijc huïdibi amido'ijtp, jëbi ajcxy huinmay pen janch Dios je' ytiy'ajt huïdibi ajcxy ti najtzcaxiy, o pen ca' je' Dios tiy'ajt'adyïi. ³⁰ Pen jim mayjäyjoty jadüg jäy Dios yajnejhuïyïi nej ycapxip, nej tiy'ajt najtzcaxihuipy, huen je jäy y'amonipy huïdibi anajty jayijp ti ytigiy najtzcaxiyïi Dios y'ayuc ytiy'ajt. ³¹ Jëbi miich ajcxy nidüg'óciy mnajtzcaxiygixy Dios ytiy'ajt huindüg padüg, jaydëbi

tüg'óciy je mibijcpidijc ixpijccixy Dios ytiy'ajt, e nañ jadu'n jëbi nidüg'óciy yjotmicpíjccixipy. ³² Copicy co yi' ajcxy huidibi najtzcaxhuyb Dios ytiy'ajt, huen ajcxy nay'ané'migix ci'm, e huen capxcixy mina y'ahuaatzciy. ³³ Dios ca' xyajmidzojcm nicx nhuinma'ñyidigooyim, Dios chojcpy co servicio ndunim agujc jotcuyc.

³⁴ Jadu'n nidüg'óciy mibijcpidijc ma canaag cajp yminaangixy co ca' huaad töxyjäydijc ycapxcixy serviciojoty, com Dios ti capx'aducy co ajcxy ca' ycapxipy serviciojoty. Copicy co je yëydijc ajcxy ane'mip je servicio, e ca' töxyjäydijc ajcxy huaad ane'mgixy je servicio, com jadu'n Dios ycötujcin ymina'ñ. ³⁵ Pen ñejhuñhuamyb ajcxy töxyjäydijc ti ayuc ti tiy'ajt, jëbi ajcxy ñiyëydijc amidoogixy co anajty ajcxy yhuimbijtcixni ma ytijc, com tzo'ydu'n yejcp töxyjäydijc ajcxy co ycapxcixy serviciojoty.

³⁶ Miich ajcxy hue' mdzachnaybidáacigixy nej jihuñy miich ajcxy jayijp tim nejhuñygixy Dios y'ayuc, ca'ydi jac pin. Miich ajcxy mnaybidáacigixy jadu'n nej jihuñy jimyi jadu'n yajcapxhuäcxy Dios y'ayuc, ca' yjacmaajity. ³⁷ Pen jim pinjaty ma miich ajcxy huidibi naybidaacip nej jihuñy Dios ti ymöyii mic'ajt nej jëbi najtzcaxihuipy Dios ytiy'ajt, o ti yhuinma'ñymöyii je Espíritu Santo tijaty tiy'ajt, hue' copicy nañ jadu'n yñejhuñhuipy co je ayuc huidibi ñch miich ajcxy nyajnijayuyb, Dios jada y'ane'min ycötujcin. ³⁸ Pinjaty jim ma miich ajcxy huidibi ca' mijpidäga'ñ etz ni ca' cöbiga'ñ je ayuc tiy'ajt huidibi Dios ti xyaj'ane'myich, Dios ca' cöbiga'ñ yijadu'mbi jäy.

³⁹ Com ñch jada ayuc nyaj'ixpijcpich, paady cham nimaaybich nmigügtijcich, co huen najtzogiygixy nej mnajtzcaxhuygixy Dios ytiy'ajt, e nañ jadu'n ca' mgapx'adújccixipy yi' ajcxy huidibi capxamb huingbi ayuc. ⁴⁰ Hue' janchtiy tüg'óciy tungixy yajxon, etz mid tudägy'ajt, ca' oyñinej mdúngixipy.

15

Co Cristo yjugypijcy jadüg'oc co y'o'cy

¹ Jadügnax, migügtijc ajcxy, ndzojcpich co miich ajcxy mjäyméjtzcxixipy je Jesucristo y'ayuc ytiy'ajt huidibi ti ngapxhuäcxyich ma miich ajcxy. Je' je' je ayuc tiy'ajt huidibi miich ajcxy ti mgöbijccixy etz huidi ajcxy tudägy mibijccixyp. ² Jëbi ajcxy m'alma ñdzögipy, pen mguydumyib ajcxy ñch n'ayuc huidibi ngapxhuäcxypich, e pen ca' anajty ti mmibijccixy.

³ Ti ngapxnaxyich ma miich ajcxy je ayuc huidibi Dios jayijp ti xymöyich, etz ti nyajnimaaygixy huidibi jaccopicyip co Cristo y'o'cy mid ajt nbocy ycixpi, jadu'n nej Dios y'ayuc ymina'ñ huidibi jaybety ijtp ma yi' ñecy. ⁴ Chi ajcxy yajnaxtiguy Jesús, e codugüg xii yi' yjugypijcy jadüg'oc jadu'n nej Dios y'ayuc ymina'ñ huidibi jaybety ijtp. ⁵ E co je Cristo yjugypijcy, chi ñayguëxici jayijp ma Pedro, e jac'axam ñayguëxici ma yi' jacjadyii ni majmetzpi apóstol ajcxy. ⁶ Jahueeni xii tiempo yjacnicxy co je Cristo oy ñayguëxigyii nañ jadu'n ma migox nimigo'pxnaxy mibijcpidijc tügpi tiempo. E may yijadu'mbi mibijcpidijc jacjugy'ajtni chambaad, etz naagity ajcxy ti y'óccixni. ⁷ Jahueeni xii tiempo yjacnicxy co Cristo ñayguëxici ma Jacobo, etz nañ jadu'n ma nidüg'óciy yi' y'apóstol ajcxy.

⁸ Jac tim axam ñayguëxici je Cristo nañ jadu'n ma ñch. Jacjayijp Jesús huin'ijxy yi' jacjadyii apóstol ajcxy, etz jac'axam ñch xyhuin'ijxyich. Jadu'n ñch nipaady nej tüg jäy huidibi ooy ti ñinajxni je tiempo co ti yma'xung'aty. ⁹ Jaccapxpaady yi' jacjadyii Jesús y'apóstol ajcxy ca'ydi ñch. Nañ jadu'n ni ca' ñch xypaady co jäy ajcxy xytíjibich Jesús y'apóstol, mid co ooy ti n'ixhuidityich

ti nbahuidityich Dios yjāy ajcxy. ¹⁰ Ich nje'ajtpich nej nje'atyich mīd co Dios may'ajt mīd ich tuñ. Je mijmay'ajt je mij'oy'ajt huidibi Dios ti tuñ mīd ich, ca' ñaadig'aty, ti y'oybidzimyb. Nigi mictāgy ti nduñich ma Dios ytung, ca'ydi jacpinjaty. Ca' nan co ich ndzachmadāgyich ma Dios ytung. Hue' Dios oy xymīd'ityich, etz ooy may'ajt tuñ mīd ich. ¹¹ Paady pen ti miich ajcxy mbaady Dios ytiy'ajt ma ich, o ma yi jacjadyii apóstol ajcxy, ca' ñejity. Je' je' je Cristo y'ayuc huidibi ich ajcxy ngapxhuācxypich, e nañ Cristo yi' y'ayuc tiibi mmibijccixy.

Co öcpi ajcxy yjugypigipy ajcxy jadüg'oc

¹² Per pen ich ajcxy ayuc ngapxhuācxpich co je Cristo yjugypijcy jadüg'oc co y'o'cy, ¿na'amy co nijējity miich ajcxy mīnaangixy co yi jāy ajcxy tiibi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tiibi y'o'cy, nañ jadu'n ni Cristo ca' ycajugypijcy jadüg'oc. ¹⁴ Co ixypiy janchity co Cristo ca' yjugypijcy, nañ tim jadu'n je ayuc huidibi ngapxhuācxypich ca' ti mic'ajt ixypiy mīdity. E nañ jadu'n miich ajcxy mmibijcin ca' ixypiy chobaady. ¹⁵ Pen tiy'ajt ixypiy co je öcpi ca' yjugypigaangixy, huin'it je Dios y'ayuc huidibi ngapxhuācxpich ixypiy yhuimbīdzimyb anii. Com ngapxhuācxpich co Dios yajjugypijcy Cristo co y'o'cy, paady pen tiy'ajt ixypiy co pinjaty tiibi y'o'ccixy ca' yjugypijcy. Nañ jadu'n ixypiy ca' ytiy'ajtity co Dios yjugypijcy Cristo. ¹⁶ Pen je öcpidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajugypijcy jadüg'oc co y'o'cy. ¹⁷ Co je Cristo ca' ycajugypijcy jadüg'oc co y'o'cy, chi miich ajcxy mmibijcin ixypiy ca' choobaady. E ca' miich ixypiy ajcxy Dios mbocy xyhuinmecxi. ¹⁸ E pen janch tiy'ajt ixypiy co je Cristo ca' ycajugypijcy, huin'it je mibijcpidijc tiibi y'o'ccixy tigoyaangixy y'alma. ¹⁹ Pen janch tiy'ajt ixypiy co nmibijcin Cristo jēyi ma jadachambi tzinaayin ya naaxhuiñ, ca' jac ni ti ixypiy njijp'ijxim co n'o'cim. Jadu'n ich ajt nipaady nej locijāy, e jāy ajcxy nigi xyñixiicim xyajxiicim, ca'ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yi' je' je jayijp jāy huidibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n mīd yi' ycixpi mayjāy yjugypiga'ñ ajcxy co anajty ti y'öccixy, e yñicxaangixy ma Dios yajpaady. ²¹ Com mīd tūg jāy, je Adán, chondacy yi' o'cin ya naaxhuiñ. Nañ tim jadu'n mīd tūg jāy, je Cristo, chondacy je jugypijcin co jāy y'o'ccixy. ²² Mīd jada ycixpi co Adán ytundigooy oga'n, paady nidüg'óciy jāy patcixy yi' o'cin. Mīd jada ycixpi co Cristo yjugypijcy jadüg'oc co y'o'cy, paady nidüg'óciy jāy ajcxy yjugypigaangixy jadüg'oc co anajty ti y'öccixy. ²³ Nidüg nidüg jāy yjugypiga'ñ jadüg'oc jadu'n nej anajty ñigueeg'iyii. Cristo ti yjayijp'aty co yjugypijcy. Tüg'óciy yi' jacjadyii jāy ajcxy huidibi mijnicxpejtcixp Cristo, yi' ajcxy jugypigamb jadüg'oc co anajty Cristo yhuimbity ya naaxhuiñ. ²⁴ Co anajty je Cristo yhuimbity ya naaxhuiñ, chi ycixipy ytigoyipy je naaxhuiñybi. Cristo yajtigoyamyb tüg'óciy naaxhuiñyāy y'ane'min, tüg'óciy naaxhuiñyāy ycötujcin, etz tüg'óciy naaxhuiñyāy ymic'ajt. Jesucristo ypictāhuaanip tüg'óciy naaxhuiñyāy ajcxy y'ane'min, e pidactāhuipy ma Dios y'ane'min, e Dios Teedy je' je'ajttāhuib. ²⁵ E tim copicy co je Cristo y'ane'mdāhuamyb tüg'óciy, ixti cooni Dios anajty ti mīmadactāy tüg'óciy Cristo ymīdzip, e ti pidactāy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcnipy. ²⁷ Com Dios ymīmadactāhuip tüg'óciy je Cristo ymīdzip, e pidactāhuip ma je Cristo y'ane'min. Per co Dios y'ayuc huidibi jaybety ijtp ymīna'ñ co je Cristo ti mīmadactāy tüg'óciy, ca' nan hue' je' yajhuinjihuíy co Cristo ti mīmadāgy Dios. Com Dios yi' je' huidibi ti mīmadactāy, e ti pidactāy ma Cristo y'ane'min.

28 Co anajty Dios mĩmadactay tũg'ócĩy pĩnjaty etz tijaty huĩdĩbĩ mĩc'ajt mĩĩd, e co anajty pĩdactay ma je Cristo y'ane'mĩn, chi je Dios y'ung ypidactãhuĩpy yĩ y'ane'mĩn ma Dios Teedy, etz ane'my yhuĩ'mã'ñ ma Dios Teedy, je huĩdĩbĩ anajty tĩ mĩmadactay. Jadu'n Jesucristo tuna'ñ, jĩgĩx jėbĩ Dios mĩĩd'ajttãy tũg'ócĩy mĩc'ajt etz ane'm'ajt.

29 Pen ca' yjadu'nĩty, ¿na'amy co mdzachnĩbejtcĩxy co ócpi tzach-codinaaygĩxy? Co ixĩpy ca' pĩn yjugypĩga'ñ jadũg'oc co anajty tĩ y'o'cy, ¿na'amy co jã y'ñbejtcĩxy mĩĩd ócpi ycxĩpi?

30 ¿E tĩ ycxĩpi co ĩch ajcxy nyajpatcĩxy ayo'nduum jabom jabom? 31 Mĩgũgtĩc ajcxy, janch janch ĩch mĩĩch ajcxy nĩmaaygĩxy co ooy njãygĩdãgyĩch mĩĩch ajcxy. Mĩĩd co mmĩbĩjccĩxy je nHuĩndzĩn Jesucristo, paady ycxĩpi ĩch mĩĩch ajcxy nĩmaaygĩxy co jabom jabom nyajpaadyĩch ócĩjĩp'am. 32 Mĩnaambĩch jadu'n co ooy nhuĩndĩnã y njĩjptĩnã yĩch nmĩdzĩp ya Efeso. Tĩm jadu'n nĩpaady nej jĩbĩc ĩyujc ahua'n ĩyujc nhuĩndĩnã y njĩjptĩnã yĩch. Pen ca' yjanchĩty co yĩ ócpi ajcxy yjugypĩgĩpy jadũg'oc, naadĩgĩ'ajtp ixĩpy co ĩch ayo'n jabom jabom nhuĩndĩnã y njĩjptĩnã yĩch. Nĩg oy co ixĩpy nyajtũyõyĩm jadu'n nej ayuc y'ityĩn: "Tzoc caayĩm uucĩm, agujc'ajtm jotcujc'ajtm, com jabom huĩxtĩc njugy'ajtm ycxĩaanĩm mĩĩd yĩ o'cĩn."

33 Ca' mnayyėcĩgĩxy co pĩnjaty xyhuĩn'ĩngĩxĩpy. Jadu'n yjadĩpy nej y'ayuc y'ityĩn: "Yĩ mĩgũgtĩc ajcxy huĩdĩbĩ jĩbĩc jot jĩbĩc-huĩnma'ñ mĩĩd, yajtĩgooyb ajcxy je oyjot oyhuĩnma'ñ." 34 Ixmajtcĩx jĩbĩc jot jĩbĩc-huĩnma'ñ etz tzĩnaaygĩx tudãgy ca' mbocytungĩxy. Nĩjėjĩty mĩĩch ajcxy ca' mnejhuĩygĩxy Dios yty'ajt. Jadu'n nmĩna'ñĩch, jĩgĩx ajcxy mdzo'ydu'n mĩjhuĩygĩxĩpy.

Nej ajcxy yĩ õgypĩ yjugypĩgĩpy ajcxy jadũg'oc

35 Ycadĩmjecyĩty co nĩjėjĩty mĩĩch ajcxy xy'amĩdohuĩpyĩch: "¿Ma mĩc'ajt pãtcĩxĩpy je o'cpi ajcxy co jėbĩ yjugypĩjccĩxy jadũg'oc? ¿Huĩdĩbĩ nĩnĩcx ajcxy ym'ĩdamyb?" 36 Ca' mĩĩch ajcxy tĩ mhũĩnjĩhuĩygĩxy. Ca' mnejhuĩygĩxy co je moc tĩm huĩdĩbĩ mĩĩpcĩxyp ca' ymũxa'ñ ixtĩ coonĩ anajty jayĩjĩp tĩ ypũch. 37 Ca' mĩĩch ajcxy mĩĩpcĩxy je mocquĩpy. Hue' mĩĩch ajcxy mĩĩpcĩxyp je tĩmmoc o jacjadyĩ huĩngbĩ tĩm. 38 E co je tĩm ymũxy, chi Dios mõy je nĩnĩcx, tĩm jadu'n nej Dios jayĩjĩp tĩ huĩnmay tĩ tzocy. E Dios nĩje' nĩje' je tĩm mõy je nĩnĩcx tĩgachjaty. 39 Canaagnax nĩnĩcx yajpaady ya naaxhuĩñ, ca' ajcxy ytũgnaxĩty. Tĩgach yĩ jã y ajcxy mĩĩdĩty nĩnĩcx, tĩgachjaty ĩyujc ajcxy mĩĩdĩty nĩnĩcx, nañ tĩgachjaty joon ajcxy mĩĩdĩty nĩnĩcx, e nañ jadu'n tĩgachjaty acx ajcxy mĩĩdĩty nĩnĩcx. 40 Yĩ tzajpjoty tzĩnaayb ajcxy tĩgachjaty mĩĩdĩty nĩnĩcx, nañ jadu'n huĩdĩbĩ ajcxy tzĩnaayb naaxhuĩñ tĩgachjaty mĩĩdĩty nĩnĩcx. Yĩ tzajpjoty tzĩnaayb ajcxy nĩnĩcx mĩĩd tĩgachjaty y'oy'ajtm, ca'ydi jadu'n nej yĩ naaxhuĩñ tzĩnaayb ajcxy y'oy'ajtm. 41 Yĩ xĩ ytĩcxĩn yjajĩn ca' ñaybadyĩ mĩĩd po' ytĩcxĩn yjajĩn, nañ tĩm jadu'n je po' ytĩcxĩn yjajĩn ca' ñaybadyĩ mĩĩd madza' ytĩcxĩn yjajĩn. Etz nĩje' nĩje' madza' mĩĩdĩty ytĩcxĩn ca' ñaybadyĩ mĩĩd jacjadyĩ madza' ytĩcxĩn yjajĩn. 42 Nañ tĩm jadu'n yjada'ñ mĩĩd yĩ jã y ajcxy tĩbĩ y'o'ccĩxy co ajcxy yjugypĩjccĩxy jadũg'oc. Jã y ajcxy yajnaxtĩgĩy je ócpi naaxnĩcx huĩdĩbĩ yhuĩndĩgooyĩpy, e yjugypĩgĩpy jadũg'oc mĩĩd tũg nĩnĩcx jemybĩ huĩdĩbĩ ca' yhuĩndĩgoya'ñ nĩmĩna. 43 Je ócpi ñaaxnĩcx co ñaaxtĩgĩy, ca' tĩ oy'ajtm mĩĩdĩty, e co yjugypĩjcnĩ jadũg'oc ymĩĩd y'oy'ajtm. Je ócpi ñaaxnĩcx co ñaxtĩgĩy, ca' tĩ mĩc'ajt mĩĩdĩty e chi yjugypĩjcnĩp mĩc'ajt mĩĩd. 44 Co je ócpi ñaaxtĩgĩy, hue' yjugypĩjcnĩ, mĩĩd jemybĩ nĩnĩcx ca'p yaj'ixy. Pen jĩ yajpaady nĩnĩcx huĩdĩbĩ Dios tĩ yajcojy mĩĩd naax, nañ tĩm jadu'n jĩ yajpaady nĩnĩcx huĩdĩbĩ Dios yajcojpy mĩĩd yjĩhuĩ'ñ ymĩc'ajt ca'p yaj'ixy.

⁴⁵ Jadu'n jaybety y'ity ma Dios ñecy ma jadu'n ymına'ñ: "Je jayijp Adán ymüd anajty jugy'ajtın." Je axambi Adán (je' je' je Cristo) je' tüg espíritu huidibi jugy'ajt yejcp. ⁴⁶ Je huidibi Dios yjihui'ñ ymic'ajt müd ca' je' yjayijp'ajty, je' jayijp'ajt huidi Dios yajcoj müd naax; jac'axam je' huidibi Dios yjihui'ñ ymic'ajt müd, je' je' je Cristo. ⁴⁷ Je jayijpi jäy huidibi Dios yaj'oyiy, hue' je' yaj'oyiy müd naax (e yajpaady ya naaxhuiñ). Je mimetzpi jäy huidibi Dios yaj'oyiy, ich ajt nHuindzin Jesucristo, hue' je' chooñ tzajpjoty. ⁴⁸ Je jäy ajcxy huidibi tzinaayb ya naaxhuiñ, yi' ajcxy ñinıcx tú'ciy ñaybadyii müd Adán ñinıcx huidibi Dios yaj'oyiy müd naax. Yi jäy ajcxy huidibi tzinähuamb tzajpjoty, hue' ajcxy ñinıcx tú'ciy ñaybada'ñyii müd je Cristo ñinıcx huidibi tzinaayb tzajpjoty. ⁴⁹ Jadu'n nej ich ajt, tügnax nguëxıcim müd Adán huidibi Dios yaj'oyiy müd naax. Nañ tim jadu'n tügnax nguëxıgaanim müd je Cristo huidibi tzinaayb tzajpjoty.

⁵⁰ Migügtijc ajcxy, hue' nnimähuaangıxy co je ninıcx huidibi müd yxixy etz yñi'py ca' yi' y'ida'ñ ma Dios y'ane'my. Je ninıcx huidibi cıxamb tıgoyamb ca' pada'ñ it lugar ma yi' ñinıcx ajcxy ity huidibi ca' ycıxa'ñ ytıgoya'ñ. ⁵¹ Tungıx cuendi jada ayuc, nyaj'ixpiğaamybıch miıch ajcxy tüg tıy'ajt huidibi ca' pin huinjıhuıy. Ca' nan nidüg'óciy ich ajt n'ögaanim, per nidüg'óciy ich ajt Dios nninıcx xyajtıgadzaanim. ⁵² Co anajty Dios yajxüxy yi' ytrompeta, je huidibi anajty cogıxyıyñıp, chi cıxıpy je naaxhuiñybi. Chi Dios xyajtıgadzaanim ajt nninıcx tim tzojcyı, tim tüg jaxıgy tüg huinmıpxy. Dios yajxüxamyb yi' ytrompeta, e je jäy tııbi ajcxy y'öccıxy jugypıgıp ajcxy jadüg'oc, e ni ca' mina ajcxy y'öccıxıpy. E ich ajt huidibi jacjugy'ajtnı Dios ich ajt xyajtıgadzaanim nninıcx. ⁵³ Com ich ajt nninıcx huidibi ögam, huidibi huen tıgoyamb, copıcy ytıgadzip, e nmüd'adaanim ninıcx huidibi ca' öga'ñ ca' yhuındıgoya'ñ. ⁵⁴ Co anajty ytıgajtzım ajt nninıcx huidibi cıxamb huındıgoyamb, nmüd'ajtim anajty jemybi ninıcx huidibi ca' ycıxa'ñ yhuındıgoya'ñ nimına. Co anajty ytıgajtzım ajt nninıcx huidibi ögam, e nmüd'ajtim jemybi ninıcx huidibi ca' y'öga'ñ, huin'it cuydunıpy Dios y'ayuc huidibi jaybety ijtp huidibi jadu'n ymınamb: "Co anajty ajt nHuindzin Dios mimadägy yi' o'cin, huin'it cödıgooyıñıp je o'cin (ca' jacpin y'oc'o'cnıp). ⁵⁵ ¿Ma yi' o'cin ocjacpada'ñ mic'ajt co tıjy xy'ocıactzaachytunaanim? ¿Ma yi' o'cin ocjacpada'ñ mic'ajt co tıjy xy'ocmımadägaanim?" ⁵⁶ Müd co ti ndundıgooyım, paady ycıxp o'cin nbaatım. Müd co ca' ti nguıydundaayım Dios ycötujcın, paady ycıxp o'cin nbaatım. ⁵⁷ Per nyajnajxım Dioscojuyıp ma Dios co mıjmay'ajt ti tuuñ müd ich ajt ycıxpi, e ti nmımadaacım yi' o'cin co ajt nHuindzin Jesucristo y'o'cy müd ajt nbocy ycıxpi.

⁵⁸ Paady ycıxp, miıch ajcxy migügtijc huidibi ooy ndzocy njıhuıyıch tıydudägy mmıbijccıx, ca' m'ixtıgıhuäccıxy ma mmıbijcın, ca' m'ixmajtzcıxy yi' mmıbijcın, ca' ajcxy mjotmetzcıygyxy. Tungıx jabom jabom ma Dios ytung aguıc jotcuıc, com mnejhuıygyxy co ca' ñaadıgı'aty ajcxy mdung ma ajt nHuindzin Jesucristo ytung.

16

Je cuejtın müd je hermano ajcxy ycıxpi

¹ Jadu'n nej ymiñ yi' meeñ huidibi miıch ajcxy myajmıjccıxy müd je mıbijcpıdıjc ycıxpi huidibi jim Jerusalén. Cuydungıx je tıy'ajt huidibi ti nyaj'ané'mgıxyıch yi' mıbijcpıdıjc huidibi canaagpıcy yajpatp jim Galacia. ² Naag naag domingo, je jayijpi xıı ma je semana y'ixtıgıy nidüg nidüg miıch ajcxy mbıdägıp abıcy hueeni pi'cmeeñ, jadu'n nej anajty ii ti mbaatcıxy. Je pi'cmeeñ huidibi anajty ti myajmıjccıxy mgüend'ajtcıxıpy ooy, jıgıx co ich jim

njadip ma miich ajcxy, ca' ycopicyity meeñ myajmújcixipy. ³ E co anajty jim nmechich ma miich ajcxy, miich ajcxy myajnibigipy nijéjty migügtijc huidibi nicxip jim Jerusalén. E ñch nguexipyich jada migügtijc jim Jerusalén mïd tüg necy etz mïd je meeñ huidibi anajty miich ajcxy ti myajmujccixy, jaydëbi yajcïdigihuij je mibijcpïdijc jim Jerusalén. ⁴ E pen ooy ytimycopicyity co ñch nañ jadu'n nnïcxiibich jim Jerusalén, jëbi ajcxy ñicxy mïd ñch.

Pablo huinmay co nicxa'ñ Macedonia

⁵ Co anajty ndübicyich nnïcxaambich ma miich ajcxy, jayijp naxihua'ñich Macedonia naaxjot, com copicy jim Macedonia naxihua'ñich. ⁶ Ca' jecyity co nicxy nhui'myich ma miich ajcxy jecy jecy. Ca' yjecyity co nyajnaxipyich tüg'óciy je tichypo j tiempo mïd miich ajcxy. Co anajty ndzooñich jadüg'oc ma miich ajcxy, nnïcxyich anajty muumjaty, miich ajcxy xytüjijphuohuïhuïbich ma ñch anajty nnïcxa'ñich. ⁷ Ca' nan tzojccïxy n'ida'ñich mïd miich ajcxy, hue' jatytimy huäcxibaambich ma miich ajcxy jecy jecy, pen ñch ajt nHuindzin Jesús jadu'n tzojcp. ⁸ Per njac-huäcxibaambich ya Efeso ixti cooni Pentecostés xii anajty ti ñajxtäy. ⁹ Com nmïdich it lugar ya ma jëbi ngapxhuäcxyich Cristo y'ayuc, e mayjäy huidibi mijpidacp ñch n'ayuc, nañ jadu'n mayjäy ya ooy midzip'aty Jesucristo y'ayuc ytiy'ajt.

¹⁰ Co Timoteo anajty yjädy ma miich ajcxy, tungixy may'ajt mgöbïjccixipy agujc jotcujc ca' ti mhuinmaaygixy, com Timoteo tumb ma ajt nHuindzin Jesucristo ytung tim jadu'n nej ñch nduñich. ¹¹ Paady ycixp ca' huaad miich ajcxy Timoteo mga'oy'ixipy etz mdüjijphuohuïhuïpy, jaydëbi ca' ti jotmay mïd'adipy etz yjactüyöyïp agujc jotcujc, e ymedzipy ya Efeso ma nya-jpaadyich. Com nijjp'ijxypich co Timoteo xyñijädibich quipxyi mïd jacjadyii mibijcpïdijc.

¹² Jadu'n nej yjajti mïd ajt nmigüg Apolos. May'ajt nbijctzoohuïch ma Apolos co yi' mïdnicxip nijéjty jacjadyii migügtijc huidibi nicxamb ma miich ajcxy. Per ca' yi' yjotcujcity co ñicxip jadachambi tiempo. Hue' janchtiy jacjiini yñicxipy, pen yaj'ahuätzcïyb anajty.

Capxpoocxin huidibi cijxnip je necy

¹³ Ni'ixï m'idipy ajcxy ma mmibijcin. Naygüend'ájtigix ma mmibijcin. Tiydudägy ajcxy mmibigipy, ca' m'ixtigihuäccixy ma mmibijcin. Naybidáacigix huinmic jotmic ma mhuinma'ñ. Mic m'idipy ajcxy ma mmibijcin. ¹⁴ Tüg'óciy tijaty ajcxy mdungixy, tungixp mïd tzojcin jihuïyin etz oyjäy'ajtin.

¹⁵ Migügtijc ajcxy, mnejhuïyb jadu'n nej Estéfanos mïd yjugymigüg ti mibijccixy Jesucristo y'ayuc. Yi' je' jayijp ajcxy mibijcp jim Acaya, e ti yhuinma'ñypidaaccixy co ypubedamyb ajcxy yi' mibijcpïdijc. ¹⁶ May'ajt nbijctzooybich ma miich ajcxy co myajmij'ájtixipy Estéfanos, etz jac pinjaty huidibi pubejtp je mibijcpïdijc etz huidibi ajcxy tumb Dios ytung. ¹⁷ Ooy njotcújdidyich co Estéfanos, Fortunato, etz Acaico ti ymiñ ma ñch ajcxy ya Efeso. Yi' ajcxy xymïd'ijtpich, com ca' anajty y'oyïy nej nmïd'idipyich miich ajcxy. ¹⁸ E yi' ajcxy ti ooy xyajjotcugïyich, e nañ jadu'n miich ajcxy ti mjotcugïyigixy co yi' ajcxy ymiñ ma ñch. Paady ycixp copicy co miich ajcxy myajmij'adip yi' ajcxy etz jacjadyii tim jadu'n nej yi' ajcxy.

¹⁹ Yi' mibijcpïdijc huidibi canaagpicy ya Asia naaxjot yquejxyp ajcxy capxpoocxin ma miich ajcxy. Aquila etz Priscila etz yi' mibijcpïdijc huidibi ajcxy yöymujcip ma Aquila ytiy yquejxp ajcxy capxpoocxin ma miich ajcxy ma ajt

nHuindzin Jesucristo yxii. ²⁰ Tüg'óciy je mibijcpidijc huidibi ya Efeso yquejxp ajcxy capxpooxín ma miich ajcxy. Naygapxpóocxigixy miich ajcxy xíc xon.

²¹ Hich, Pablo, njaaybich miiid ngi'mgi' ngi'mletra jada capxpooxín huidibi nguejxypich ma miich ajcxy. ²² Pen jim pinjaty ca' mijpidägy ich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminipy ajt nHuindzin Jesucristo.

²³ Huen ajt nHuindzin Jesucristo oy'ajt may'ajt tunipy miiid miich ajcxy etz xyconuucxip ajcxy. ²⁴ Ndzojcypich njihuuybich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Necy Huidibi San Pablo Yajnigujx Je Mibijcpidijc Jim Corinto

¹ Hich Pablo, Dios jadu'n ti tzocy, paady ycixpi Jesucristo ti xyajñibicyich co ngapxhuäcxibich yi' y'ayuc. Hich müd ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot. ² Huen Dios Teedy etz ich ajt nHuindzin Jesucristo may'ajt oy'ajt tunipy müd miich ajcxy etz xyajjotcugiiygixip.

Nej Pablo yajty y'ayoy

³ Tzoc yajnaxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcuje'ajtin. ⁴ Dios xyajjotcugiiyim co nminaxim nyajnaxim tzaachypi ayo'n jigix jébi nyajjotcugiiyim jacpinjaty huidibi minajxp yajnaxp tzaachypi ayo'n. Tim jadu'n nej ich ajcxy ti nbaady jotcuje'ajtin ma Dios, nañ tim jadu'n yi' ajcxy padañ jotcuje'ajtin ma Dios huidibi minajxp yajnaxp tzaachypi ayo'n. ⁵ Com tim jadu'n nej ich ajt nminaxim nyajnaxim tzaachypi ayo'n müd Cristo ycixpi, nañ tim jadu'n müd Cristo ycixpi nbaatim jotcuje'ajtin. ⁶ Paady ycixpi ich ajcxy nminaxcixy nyajnaxcixy tzaachypi ayo'n, jaydëbi miich ajcxy mbaadip jotcuje'ajtin etz nañ jadu'n ypaadip ajcxy m'alma ñidzoocin. Dios yejcpy jotcuje'ajtin ma miich ajcxy, jaydëbi miich ajcxy mbaadip jotcuje'ajtin etz nañ jadu'n ñidzögip ajcxy yi' m'alma. E co ajcxy mbaadip jotcuje'ajtin etz ajcxy m'alma ñidzoocin, chi jébi miich ajcxy mmimadägip etz nmecxtugip tzaachypi ayo'n, tim jadu'n nej ich ajcxy nmimadägy etz nmecxtújcixich tzaachypi ayo'n. ⁷ Jotcuje nayjihuijich müd miich ajcxy ycixpi, com njijp'ijxpich co mmadägipy ajcxy ma mmibijcin. Com nejhuiybich co miich ajcxy nminajxyp myajnaxyp tzaachypi, tim jadu'n nej ich ajcxy nminajxcixy nyajnaxcixy tzaachypi. E nañ jadu'n Dios yejcpy jotcuje'ajtin ma miich ajcxy, tim jadu'n nej yecy jotcuje'ajtin ma ich ajcxy.

⁸ Migügtijc ajcxy, ich ajcxy ndzojcpich co miich ajcxy mnejhuihuip jadu'n nej canaagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njijp'ixyich co nbidzimipyich juugy ma je jimbi it lugar. ⁹ Jadu'n ich ajcxy nnayjihuiyii nej jäy ajcxy huidibi yajpatcixp o'cjijp'am. Jadu'n ti njatyich, jigix jébi n'ixpicyich nej ich huaad nigü Dios nyajmij'atyich, je Dios huidibi yajjugypigip yi' jäy ajcxy tibi y'öccixy. E ca' nan ngi'm mic'ajt nmijpidaacpyich. ¹⁰⁻¹¹ Ti ich ajcxy Dios xyñihua'ñ xycohua'ñ, e xyjacnihua'naamb xyjaccohua'naambich ajcxy ma yi' jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios müd ich ycixpi. Njijp'ijxpich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy müd ich ycixpi, nañ jadu'n yajnaxcixyipy ajcxy jäygidaacin ma Dios müd je may'ajt oy'ajt ycixpi huidibi Dios ytumyb müd ich ajcxy.

Ti Pablo co yhuäcxijpy, ca' chojc nicxy jim Corinto

¹² Jotcuje nayjihuijich müd jada ycixpi com nejhuiybich co ti ndzinäyich müd tudägy'ajtin etz müd oyjot oyhuinma'ñ müd yi' mayjäy ajcxy canaag agajp etz jacnigi ma miich ajcxy. Dios müd may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma

ndzináayinich. ¹³ Hich miich ajcxy nyajnijayiyb je ayuc tñy'ajt huídibi miich ajcxy jébi mgapxcixy etz mhujnhuuygixy. E nañ jadu'n njijp'ijxypich co miich ajcxy mhujnhuuygixy hich n'ayuc tüg'ócay. ¹⁴ Jadu'n nej miich ajcxy cham cujc-huäcxy mhujnhuuygixy hich n'ayuc ndiy'ajt. Jacjiini co anajty je xñi je tiempo ymiñ co ajt nHuindzin Jesús y'ane'mañ ya naaxhuiñ, chi miich ajcxy jotcuje mnayjihuihuuyb mñid hich ycixpi. E nañ tim jadu'n nej hich ajcxy jotcuje nayjihuihuuyb mñid miich ajcxy ycixpi.

¹⁵ Com nejhuuybich co miich ajcxy xychojcpich xyjihuihuuybich, paady ycixpi nhuinma'ñ nñidägyich co nicxy n'ixaangixy miich ajcxy jadüg'oc, e jadu'n nyajjotcugihuaangixich miich ajcxy mejtz'oc. ¹⁶ Jadu'n nhuinma'ñ ti nñidägyich co nñicxa'ñich Macedonia. Per jayijp nñaxa'ñich ma miich ajcxy mgajp. E co anajty ndzooñich Macedonia, jadüg'oc nñicxa'ñich ma miich ajcxy. E jadu'n jébi miich ajcxy xytüjijphuohuuihuibich co anajty nñicxyich jim Judea. ¹⁷ ¿Nej mdijy, co hich aametz jotmetz nduñich co ca' ti nñicxyich ma miich ajcxy nej anajty ti nñina'ñich? ¿Nej mdijy, nhuinma'ñ mñididyich jadu'n nej naaxhuiñjyay huídibi minamb co ñicxa'ñ, e chi ca' ñicxni? ¹⁸ Per Dios jébi tñy'ajt yegipy co je ayuc tiibi nyajnimaaaygixy, nguydunipyich yi'. Hich n'ayuc janch yi'. ¹⁹ Hich mñid Silvano etz Timoteo ngapxhuäcxcixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumyb je' y'ayuc, tudägy je' ycapxy. ²⁰ Tüg'ócay je ayuc huídibi Dios yejc jecy'ajty mñid hich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nñinaanim. “Amén, jadu'n jada,” com Cristo Jesús ti cuydudäy Dios y'ayuc. ²¹ Com je' je' Dios huídibi xyajmibijcim Cristo, e Dios huídibi xyajmñid'ijtim Cristo. Jadu'n Dios ytuñ mñid hich ajcxy etz nañ jadu'n mñid miich ajcxy. Je' je' Dios huídibi xyajmibijcim etz xypidaacim tügjijp ma yi' ytung. ²² Dios ti pidägy ma ajt njot nhuinma'ñ je tñy'ajt co nyajpaatim ma Cristo Jesús. Co Dios xy'adigiyim xyjottigiyim yi' yjihuiñ ymic'ajt, chi tñy'ajt yecy co nyajpaatim ma Cristo Jesús.

²³ Dios jébi tñy'ajt yegipy co mñid tudägy njot nhuinma'ñ nñidyacyich co ca' jadüg'oc nñicxyñich ma miich ajcxy mic'amy, jadu'n nej anajty nhuinma'ñ ti nñidägyich, mñid co ca' ndzocyich nicxy n'ojcixy huin jijp. ²⁴ Ca' nñicxa'ñich mic'amy ma miich ajcxy, com ca' adzip nyajmibigaangixy miich ajcxy huídibi copicy ajcxy mmibigipy. Miich ajcxy tiydudägy ti mmibijccixy. Jéyi co nbubedaangixy jaydëbi ajcxy nigí jotcuje'ajt mñid'adipy ma ajcxy mdzinaayin mjogy'ajtin.

2

¹ Paady ycixpi jadu'n nhuinma'ñ ti nñidägyich co ca' nñicxa'ñich mic'amy jadüg'oc ma miich ajcxy, mñid co miich ajcxy nyajtajipy nyajmayipy co ngapxhuijyich mñid ajcxy mbocy ycixpi. ² Com pen hich miich anajty ajcxy nyajtajpy nyajmaayb, ¿pin jada' hich xyajjotcugihuibich? Pues miich ajcxy huídibi tajp mayb, miich ajcxy xyajjotcugihuibich. ³ Paady ycixpi ti nñijayiygixy jadu'n co ca' nñicxa'ñich mic'amy ma miich ajcxy, com ca' jadu'n ndzocyich co hich miich ajcxy nyajtajipy nyajmayipy. Jac'oy co hich miich ajcxy nyajjotcugihuiipy. Com nejhuuybich co hich jotcuje nayjihuiyijich mñid miich ajcxy ycixpi. Nañ jadu'n miich ajcxy jotcuje mnayjihuihuuyb co mnejhuuihuipy co ti njotcugihuibich mñid miich ajcxy ycixpi. ⁴ Co ti njayich je necy huídibi ti nguexyich ma miich ajcxy, ooy mij jotmay ti njihuiyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtñy ti njaayich je necy jaydëbi mnejhuuygixy co mijcajee ndzojccixy njihuiyigixy.

Meecxin ma je pin anajty jibicpi ti tuñ

⁵ Per pen jim ma miich ajcxy pinjaty ti yecy tajin mayim co ti ytundigooy, pues ca' nan ich tügpajc tajin mayim jihuuybich. Nañ jadu'n miich ajcxy nidüg'óciy mjihuuygixyp tajin mayin. Jadu'n nmına'ñich co huenjaty tajin mayin miich ajcxy mjihuuygixy, jigix ca' anaxy ajcxy nyajtajip nyajmayip. ⁶ Yajhuäcxijp je tzaachypí huidibi miich ajcxy mooyb je migüg huidibi ti ytundigooy. Ti müid jadu'ñi. ⁷ Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuipy. Ca' yjecyity co je migüg anaxy oy jihuuihuip tajin mayin. ⁸ Paady ycixp may'ajt nbijctzooyich ma miich ajcxy co myajniguëxigipy ajcxy co mdzocy mjihuuy ajcxy je migüg huidibi ti ytundigooy. ⁹ Ich miich ajcxy ti nijayiy jayhuin müid je migüg ycixpi huidibi ti ytundigooy, jigix jëbi nnejhuuyich, pen mguydumyb miich ajcxy ich n'ayuc, o pen ca' mguydungixy. ¹⁰ Jadachambi co pinjaty ti ytundigooy ma miich ajcxy, e miich ajcxy mhuinmeexi yi' ypocy, nañ jadu'n nhuinmeexip ich yi' nej ytundigooy. Com ich co nhuinmeexyich tüg nmigügich nej ti ytundigooy, jadu'n nduñich müid miich ajcxy ycixpi, com Cristo y'ijxyp ñejhuuyb tüg'óciy tijaty nduunim. ¹¹ Jadu'n nhuinmeexim nmigüg ypocy, jigix Satanás, je mujcu', ca' xymimadaacim. Nejhuuyim yajxon nej Satanás mañ'ajt müidity.

Pablo ca'p anajty yjotcujc'aty jim Troas

¹² Co nja'tyich ma je cajp huidibi xiijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nбатыich, nej jëbi nduñich ma ajt nHuindzin Jesucristo ytung. ¹³ Per ca' anajty jotcujc nayjihuuyiijich. Com ca' nmınaybatich je ich ajt nmigüg Tito jim Troas. Paady ycixp ngapxycijxyich müid je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnaxypich jäygidaacin ma Dios co müid Jesucristo ymic'ajt jatytimy nmimadacypich jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjäy ma canaag cajp ooy jäygidaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojiy xi ya. ¹⁵ Co ngapxhuäcxych Cristo y'ayuc ma yi mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxych Cristo y'ayuc ma yi jäy ajcxy huidibi ajcxy y'alma tigoyaamb. Jadu'n ich ajcxy ndung nipaady nej jihuuy nboomjócxich jabom jabom ma Dios yhuinduu müid Cristo ycixpi. ¹⁶ Pinjaty mijpidacp Cristo y'ayuc huidibi ngapxhuäcxypich, hue' je' y'alma nidzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity ich ajcxy ndung. ¹⁷ Ca' ich ajcxy nduñ jadu'n nej jacnaagity ajcxy huidibi Dios y'ayuc mihuidijtip meeñgixy. Cixyjot huinijot ich jäy nyaj'ixpijccixy Dios y'ayuc ytiy'ajt. Com Dios ti xyajñibicyich co yi' y'ayuc ngapxhuäcxich. Müid co nyajpaatim ma Cristo, paady ycixp nduunim jadu'n nej jihuuy nyajpaatim jabom jabom ma Dios yhuinduu.

3

Je jemybi ayuc tiy'ajt huidibi Dios xymooyim

¹ Co jadu'n nmına'ñich ¿nej m'ijxcixy nej jihuuy huinjemy nyajtzondäga'ñich ayuc co ndzachnaymayáanigixyich ci'm? ¿Nej mdzojccix co ajcxy nyaj'ixipy tüg tiy'ajt necy co nduñich ma Dios ytung? o ¿Nbijctzohuipich tüg tiy'ajt necy

ma miich ajcxy, jadu'n nej nijëjity jäy ytungixy? ² Ca' ñch ajcxy ndiy'ajt necy ycopicyity. Com jëbi yi mayjäy ajcxy tïy'ajt pigipy ma miich ajcxy mdzinaayin mjogy'ajtin co tudägy ti nyaj'ixpicyich miich ajcxy Dios ytiy'ajt. Jadu'n miich ajcxy nipaady nej ñch ajcxy ndiy'ajt necy yjaayity ma ñch ajcxy njot nhuinma'ñ. E jadu'n jäy ajcxy ijxcabipy etz huinjihuipy. ³ Cristo ci'm ti pidägy yi' ytiy'ajt ma miich ajcxy mjot mhuinma'ñ mïid je ayuc huïdibi ti ngapxhuäcxyich ma miich ajcxy. Jadu'n miich ajcxy nipaady nej tüg tïy'ajt necy huïdibi Cristo ti jaay. E huïdibi ñch miich ajcxy ti nyaj'ixcixy ti nyajñimaaygixy. Miich ajcxy ca' jadu'n ocpaati nej tüg tïy'ajt necy huïdibi jäy ti jay mïid tinta. Nañ jadu'n ni ca' yjëjity je tïy'ajt huïdibi cojayip ma tüg tzaadzech. Hue' miich ajcxy janch nipaady nej tïy'ajt necy huïdibi je Dios jugyipi yjihuï'ñ ymic'ajt ti jaay ma jäy ajcxy yjot yhuinma'ñ.

⁴ Nejhuïybich tïydudägy co janch tïy'ajt nej nmïna'ñich co Cristo ti xya-jnïbicyich jada tung mïid Dios ycixpi. ⁵ Ca'p ñch ajcxy jëbi ci'm madägy ma Dios ytung. Tüg'öciy mic'ajt etz tïy'ajt jiiby nbáatcixyich ma Dios, huïdibi mïid jëbi ndüungixich yi' ytung. ⁶ Dios ti xymóoygixyich mic'ajt co ndunipyich ajcxy ma yi' ytung. Dios ti pidägy ma ñch ajt jemybi ayuc tïy'ajt, huïdibi mïid xy'ane'mim. Jada jemybi ayuc tïy'ajt je Espiritu Santo pidaacp ma ajt njot nhuinma'ñ. E ca' je' yjadu'nity nej je ayuc tïy'ajt huïdibi Moisés yjayhuim jecy'ajty. Mïid je Moisés y'ayuc huïdibi jaybety ijtp, Dios xymooyim je o'cin. Mïid je jemybi ayuc tïy'ajt huïdibi je Espiritu Santo yejcpy, Dios xymooyim jugy'ajtin huïdibi ca' ycixipy ytigoyipy ni mïna.

⁷⁻⁸ Je Dios ycötujcin huïdibi Moisés yjayhuim hue' jaybejty oga'n ma tüg tzaa. E je huin'it tiempo ooy Moisés anajty yhuïnyjïp mic' y'adäcxy mïid Dios y'oy'ajtin. E je Israel jäy ajcxy ni ca'p je' anajty huaad y'ijxcixy Moisés yhuïnyjïp, co anajty ooy mic' chach'adäcxy. E jada Dios y'oy'ajtin huïdibi Moisés ymïid, ca' jecy y'ijty. Hue' je' tigooyñip anajty oñydägy'amy. Per pen Dios yaj'ixip anajty yi' y'oy'ajtin co Moisés moy je jäy ajcxy je Dios ycötujcin huïdibi ane'm yi' o'cin, nïgi mi'idipy Dios y'oy'ajtin je jemybi ayuc tïy'ajt huïdibi je Espiritu Santo xymooyim. ⁹ Pen mij anajty oy'ajtin mïidity je cötujcin huïdibi tuuñ co y'ane'my ma ñch ajt nbocy n'o'cin. Nïgi mij'oy'ajtin mïidity Dios y'ayuc ytiy'ajt je jemybi huïdibi mïnaamb co Dios jëbi xyaj'ahuimbijtim tudägy. ¹⁰ Jëbi nmïnaanïm co je jëcyip cötujcin y'oy'ajtin ca' yi' ytimytiijity co nyajquixyihuaanïm mïid je jac'oybi oy'ajtin huïdibi Dios y'ayuc ytiy'ajt jemybi ymïid. ¹¹ Com pen ymïid oy'ajtin je cötujcin huïdibi ymic'ajt ca' y'ida'ñ huinixi huinitïempo, nïgi oy'ajtin mïidity Dios y'ayuc ytiy'ajt jemybi huïdibi ca' ycixipy ytigoyipy nimïna.

¹² Mïid co njïp'ijxim je oy'ajtin huïdibi Dios xymöhuaanïm mïid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³ Ca' jadu'n nduunim nej Moisés idich jecy'ajty co anajty mïidity yhuïnyjïp huingobe'nïy, jigix ca'ydi Israel jäy ajcxy ixxy nej je' anajty ytigoy je Dios y'oy'ajtin huïdibi anajty quëxïcp ma je' yhuïnyjïpin. ¹⁴ Per yi' Israel jäy jecy'ajty ca' ajcxy yajxon huinjihuïy ti anajty Dios ytumyb mïid Moisés, ixti chambaadni yi' Israel jäy ajcxy ca' yajxon huinjihuïygixy co ajcxy capxcixy je ayuc huïdibi Moisés yjayhuim. Jadu'n nipaady nejjuïy Moisés chambaadni y'ityñi huingobe'nïy. Co ajcxy mibigipy je Cristo, huin'it ajcxy huinjihuïpy, e jadu'n je' paadipy nej juïy Moisés ti ñayhuingobe'ndüdyi. Co yi' Israel jäy ajcxy mibijccixipy Cristo, e ijxip ajcxy Dios y'oy'ajtin, huin'itni ajcxy huinjihuïpy Dios y'ayuc ytiy'ajt je jëcyip. ¹⁵ Ixti chambaadni co yi' Israel jäy ajcxy capxcixy je migooxpi libro huïdibi Moisés yjayhuim, ca' ajcxy huinjihuïy yajxon Dios y'ayuc, jadu'n nipaady nej ajcxy yhuinma'ñ ymädity. ¹⁶ Pinjaty

jothuimbijtp, e mibicy ñich ajt nHuindzin Jesucristo, oyñip yí' yhuinma'ñ, e yhuinjihuipy Dios ytiy'ajt. ¹⁷ Je Huindzin Jesucristo, yí' je' Dios yjihuí'ñ ymic'ajt ymíd. E ma Dios yjihuí'ñ ymic'ajt yajpaady, Dios yí' yí' jadu'mbi jáy ajcxy yajnihuätzictutp ma yí' Dios ycötujcin je jécyip. ¹⁸ Paady ycixp tüg'óciy ñich ajt jadu'n nipaady nej tüg iix ma nni'ixim ajt nHuindzin Jesucristo y'oy'ajtin. Com ca' jadu'n patni nej jihuíy n'ijtim huingobe'niy. E nañ jadu'n ñich ajt njacyujcpejtim n'oy'ajtin, jaydëbi nguipxyjatytim míd Cristo. Com jabom jabom ñich ajt ñigi nbaatim n'oy'ajtin ma Cristo. Jada je' huídibi je Dios yjihuí'ñ ymic'ajt ytumyb ma ajt njot nhuinma'ñ. E ñich ajt nHuindzin Jesucristo ti pidägy Dios yjihuí'ñ ymic'ajt ma ajt njot nhuinma'ñ.

4

¹ Com Dios ti xypa'ayooyich, e ti xyajñibicyich co ngapxhuäcxibich yí' y'ayuc ytiy'ajt jemybi, paady ycixp ca' njotmetzcíyich. ² Per ooy ti njijpcodijiygixyich ti njijpcogapxíygixyich yí' jáy ajcxy y'ayuc huídibi ajcxy ytungixyp etz ycapxcixpy ayüch ameech, etz huídibi oymídzöyduuni. Ca' ñich ajcxy ti nduñich míd jibic-huinma'ñ. Nañ jadu'n ni ca' nyajtigájtzcixich Dios y'ayuc. Hue' janchtiy ngapxpich ajcxy huídibi janchip. Jadu'n nyaj'ixpíjccixyich yí' jáy ajcxy, jaydëbi ajcxy jotcuje ñayjihuíyigixy ma Dios yhuinduu. ³ Yí' jáy ajcxy huídibi nicxy y'alma ytigoyaangixy ca'oydactuuby, ca' ajcxy huinjihuíy Dios y'ayuc oybi nej jëbi ajcxy y'alma nídžögipy. Jada je' je ayuc huídibi ngapxhuäcxipich. Pinjaty ajcxy y'alma nídžögip yhuinjihuíyb ajcxy jada ayuc. ⁴ Yí' ajcxy huídibi y'alma tigoyaani ca' mibijccixy Dios y'ayuc, com Satanás huídibi ane'mb ya naaxhuiñ ti yajmädyii ajcxy yhuinma'ñ. Ca' je' ajcxy huinjihuíy Cristo y'ayuc oybi. Cristo tú'ciy yaj'ixy, tú'ciy mic'ajt mídity, nej Dios yaj'ixy nej Dios mic'ajt mídity. E Cristo y'ayuc jadu'n nipaady nej tüg mjtixin huídibi Satanás ti ahuijztucy ca'ydi ytixy ma je' ajcxy. ⁵ Co ñich ajcxy ayuc ngapxhuäcxych, ca' ñich ajcxy ngapxhuäcxy ngi'm'ayuc ngi'mdiy'ajt. Hue' ñich ajcxy ngapxhuäcxyp Jesucristo y'ayuc ytiy'ajt. Ngapxhuäcxych ajcxy co Jesucristo ñihuindzin'ajtaayb tüg'óciy. E nañ jadu'n ngapxhuäcxych ajcxy je tiy'ajt co ñich ajcxy jadu'n naydijiygixyich nej jihuíy miich ajcxy xytumbi'adyii míd Cristo ycixpi. ⁶ Je Dios huídibi jecy'ajty ane'm co huen tixxin ji'aty huídibi codicxip ma ycoodzity, yí' ti xymooyim y'ayuc ytiy'ajt. Yí' y'ayuc tim jadu'n nipaady nej tüg tixxin nmíd'ajtim ma ajt njot nhuinma'ñ, jigix jëbi n'ixim je Dios y'oy'ajtin huídibi quëxícp ma Jesucristo yhuíñyijp.

Je jugy'ajtin co nmibijcim

⁷ Je Dios y'oy'ajtin oybi nmíd'ajtim ma ajt njot nhuinma'ñ, ñich ajt ca' ni ti mic'ajt nmíd'ajtim ma ajt ngi'mjot ngi'mhuinma'ñ. Jadu'n Dios pidägyñi yí' y'oy'ajtin ma ñich ajt, tim jadu'n nej jáy ajcxy pidaaccixy pi'cmeen ma pi'c'idzimboch. ⁸ Oy ñich ajcxy nminaxyich nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuídijtcixyich míd je tzaachypi ayo'n ycixpi, per ca' nhuinma'ñyidigóoygixyich. ⁹ Oy ñich ooy nmídzip xy'ixhuídityich xypahuídityich, per Dios ca' xy'ixmachich. Canaag'oc ñich nmídzip ti xycujy ti xyjibipyich. Per ca' ñich njugy'ajtin ti ytigooy. ¹⁰ Hueñyama'amyity nhuidityich ajcxy nmídich je tzaachi'au ma nninícxich, ma jáy ajcxy ti xychaachytúungixich. Je' je' je iixpejt co nhuidityich o'cin jip'am, tim jadu'n nej Jesús anajty huídity o'cin jip'am. Ngöbicycpich jada tzaachypi, jigix tüg'óciy jáy ajcxy nejhuíhuip co Jesús xypubejtpich xypudigíybich. ¹¹ Nami jacjugy'ajtnich ajcxy, o'cijp'am ñich ajcxy nhuidijtcixy

jabom jabom m̄id Jesús ycixpi, jigix jēbi tūg'óciy jāy ajcxy nejhuñhuipy co Jesús xypubejtcixyp xypudiḡiygixyp. ¹² Jadu'n ndzināyich o'cjipp'am, jigix miich ajcxy m̄id'adip jugy'ajtin huídibi ca' ycixipy ytigoyipy.

¹³ Jaybety ymiñ ma Dios ñecy ma jadu'n ymina'ñ: “T̄i nmibicyich, e paady ycixpi ti ngapxp̄idzimybiich nej ti nmibicyich.” T̄im jadu'n nej Dios ñecy ymina'ñ, nañ t̄im jadu'n ìch ajcxy yminaangixy co nmib̄ijccixyich Dios, e paady ngapxp̄idzimgixyich nej nmib̄ijccixyich. ¹⁴ Com nejhuñyim jadu'n nej Dios yajjugyp̄icy Jesús co y'o'cy. Nañ t̄im jadu'n Jesús xyajjugyp̄igaanim jadūg'oc m̄id Dios ymic'ajt co anajty n'o'cim. E quipxyi m̄id miich ajcxy xyajñcximip ma Dios yhuinduu. ¹⁵ Tūg'óciy tzaachyp̄i huídibi nminajxyp̄ich nyajnajxyp̄ich, hue' nminaxyich nyajnaxyich m̄id miich ajcxy m'oy'ajtin ycixpi. E co anajty Dios jactuñ may'ajtin m̄id jacjadyi mayjāy ajcxy, nañ jadu'n mayjāy yajnāxcixipy jāygidac̄in ma Dios, jigix jēbi mayjāy ìb̄aatcixipy capxp̄aatcixipy Dios.

¹⁶ Paady ycixpi ni mina x̄i, ìch ajcxy ngajotmetzc̄ihuaangixy. Oy ìch ajcxy nnin̄icx yjacc̄ominajc'id̄ich jabom jabom, per ìch ajcxy njot nhuinma'ñ n̄igi mic'ajt paady jabom jabom. ¹⁷ Je tzaachyp̄i je ayo'n huídibi nminajxim nyajnajxim ya naaxhuiñ, ca' y'i ytimyt̄ij̄ity. Cixip naxip y'i. E m̄id co nminajxim nyajnajxim tzaachyp̄i ayo'n, huin'it nbaatim oy'ajtin n̄igi ym̄ij̄ity y'oȳity huídibi ca' ycixipy ñaxipy ni mina. ¹⁸ Ca' huaad ìch ajt nhuinma'ñ nbidaac̄im ma huídijaty cixamb t̄igoyamb. Tūg'óciy tijaty yaj'ijxp̄ yajhuind̄icxp̄ ya naaxhuiñ, cixip t̄igoyip̄ y'i. Per huídijaty ca' yaj'ixy yajhuind̄icxy, id̄ip y'i, ca' ycixipy ytigoyipy nimina.

5

¹ Com nnejhuñyim co n'o'cim, naaxn̄icx ajt huídibi nm̄id'ajtim ya naaxhuiñ cixamb t̄igoyamb y'i. Dios ym̄id ni'ix̄i j̄iiby tzajpjoty huingbi nin̄icx huídibi y'i t̄i cojy huídibi xym̄ohuaanim. Je nin̄icx huídibi xym̄ohuaanim jadu'n nipaady ma ajt n'alma nej tūg' t̄ijc huídibi t̄inaayb huin̄ix̄i huin̄itiempo. Tūg' t̄ijc huídibi Dios t̄i cojy, ca' nan huídibi jāy ajcxy t̄i cojcixy. ² Janch t̄iy'ajt co ca' ooy jotcuje ndzinaayim ya naaxhuiñ m̄id ajt nnin̄icx. Ooy nj̄ipp'ijxim mina nbadaanim ajt je nnin̄icx huídibi nm̄id'adaanim j̄iiby tzajpjoty. ³ Je' nnin̄icx xyūd̄zim t̄im jadu'n nej co tūg' jemyhuit nyajtiḡiyim, ca'ydi n'ij̄tim n̄ihuād̄z. ⁴ Nami njactzinaayim ya naaxhuiñ m̄id ajt nnin̄icx, ca' ooy jotcuje nayjihuñyim. Ooy xyajtajim xyajmayim je tzaachyp̄i ayo'n huídibi nminajxim nyajnajxim. Ca' nan co ca' ndzojc̄im ajt nnin̄icx, o co nyajtiḡooyanim ajt nnin̄icx. Hue' ndzojc̄im co nm̄id'ajtim jemybi jugy'ajtin jemybi nin̄icx jigix co ajt njugy'ajtin huídibi cixamb t̄igoyamb, ahuimb̄id̄ip y'i jemybi jugy'ajtin huídibi ca' ycixipy ytigoyipy. ⁵ Dios y'i t̄i yaj'oȳiy je jugy'ajtin huídibi nm̄id'ajtim cham, jigix jēbi nm̄id'ajtim huingbi jugy'ajtin huídibi ca' ycixipy ytigoyipy ni mina. Dios t̄i xymoyim je Esp̄iritu Santo je' je' t̄iy'ajt ma ìch ajtin co nbadaanim jemybi jugy'ajt jembyi nin̄icx.

⁶ Jabom jabom ìch ajt jotcuje naybidaac̄im. Nejhuñyim co nami n'jactzinaayim m̄id ajt nnin̄icx, ca' nm̄id'ajtim jemybi nin̄icx, ca' nyajpaatim ma ajt nHuindzin Jesús chināy. ⁷ Je' nnin̄icx xyūd̄zim t̄im jadu'n nej co tug' jemyhuit nyajtiḡiyim, ca'ydi n'ij̄tim n̄ihuād̄z. ⁸ Jotcuje etz jotmic nayjihuñyim. N̄igi jotcuje ixyp̄y nayjihuñyim, e ooy njatzojc̄im co mic'amy ixyp̄y n'ij̄xmajt̄zim jada nin̄icx, jigix nicxy ndzinaydac̄ip̄ic̄im ma ajt nHuindzin Jesús chināy. ⁹ Paady ycixp̄ jadu'n njacjugy'ajtim njactzinaayim jigix jēbi ajt nHuindzin Jesús jāygid̄aḡipy ajt ndzinaayin. Ca' ñej̄ity pen

njactzinaayim ixyipy miid ajt nninix, o pen tzojc n'ijxmajtzim ajt nninix ixyipy, e nicxim ma Jesús yajpaady. ¹⁰ Nidüg'óciy ich ajt nayguëxigaanim ma Cristo ytydudac, e jiiby nidüg nidüg paadip huidi anajty nipidz'imip jadu'n nej anajty ti chinäy, pen oy, o ca' y'oyity.

Je ayuc t'y'ajt huidibi nicy'ajt cidägy'ajt miid

¹¹ Com nejhuuyim co copicy nhuindziguyim ajt nHuindzin Jesucristo, paady ycixpi mictägy nyajmibicyich yi mayjäy ajcxy Cristo ytiy'ajt. Dios ñejhuuyb co tudägy ich njot nhuinma'ñich. E nañ jadu'n ndzocyich co miich ajcxy mnejhuuygixipy co tudägy ich njot nhuinma'ñich. ¹² Ca'p ich ajcxy yam naygapxpáatigixy jadüg'oc co ich ajcxy ooy n'oyjäyity, o co ich ajcxy ooy oy ndúngixyich. Hue' janchtiy lugar nyejcpyich, jaydëbi miich ajcxy xycapxpadipyich etz jotcuje mnayjihuuyigixipy miid ich ajcxy ycixpi. Jigix jëbi miich ajcxy m'adzohuip yi jäy ajcxy huidibi capxpatp pinjaty yhuinyjip ooy oy yquëxigy, e ca' ajcxy tuñ cuendi pen je' miid oyjot oyhuinma'ñ, o pen ca'. ¹³ Pen minamb jäy ajcxy co ich nlocity, huen xyajnájxcixyich loci miid Dios ycixpi. Pen jäy minaangixp co oy huinma'ñ nmüdidyich, jëbi jadu'n ajcxy xyajnájxcixyich jadu'n nej oy huinma'ñ nmüdidyich miid miich ajcxy m'oy'ajtin ycixpi. ¹⁴ Com Cristo ooy xychojcm xyjihuuyim, paady ycixp njatytimycapxymidoohuim Cristo. Com nnejhuuyim ajt nidüg'óciy tydudägy co Cristo y'o'cy miid ajt nbocy ycixpi, e paady ycixpi jadu'n nipaady nej jihuuy nidüg'óciy ich ajt ti n'o'cim quipxyi miid Cristo. ¹⁵ Cristo o'c miid tüg'óciy jäy ajcxy ycixpi, jigix co tüg'óciy jäy ajcxy huidibi jactzinaayb jacjugy'ajtp, ca' ajcxy yajtúngixipy yci'mjot yci'mhuinma'ñ ma ajcxy chinaayin. Huen ajcxy tzinaaygixy miid Cristo ycixpi huidibi o'c miid yi' ajcxy ypocy ycixpi, etz yjugypjcy jadüg'oc miid yi' ajcxy ycixpi. ¹⁶ Miid co ndzinaayim miid Cristo ycixpi, paady ycixp ca' ndunim cuendi naaxhuinyjäy ajcxy nej ñayñigápxigixy nayñimiydáacigixy. Jayjip ca'ni anajty nmibijcm, ooy anajty ndunim cuendi nej jäy ajcxy ñayñigápxigixy nayñimiydáacigixy. Jadachambi etz yjacnicxni xi tiempo, ca' ndunim cuendi nej naaxhuinyjäy ajcxy capxcixy miydaaccixy. ¹⁷ Com tigachjaty cham nhuinjihuuyich Cristo, paady ycixp pinjaty yajpatp ma Cristo, jemyjot jemyhuinma'ñ je' ymüd'ajtnip, jadu'n nipaady nej jihuuy ti ma'xung'aty huinjemy. Je jot je huinma'ñ huidibi anajty ymüd co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'ñ ti y'ahuimbijttäy.

¹⁸ Tüg'óciy tijaty huidibi ya yajpatp, jiiby chooñ ma Dios, Dios yaj'oyiday. Miid huidijaty Cristo ytuun miid ich ajt ycixpi, jotcuje n'ijtim miid Dios. E Dios xyajnibicyich co ngapxhuäcxyich Dios y'ayuc jadu'n nej jäy ajcxy jëbi ajcxy jotcuje y'ijtcixy miid Dios. ¹⁹ Jadu'n nminaanim co Dios ymüd'ijtpy Cristo. E Dios tuun quipxyi miid Cristo co yi' yaj'oyiy je tzip nej naaxhuinyjäy ajcxy midzip'aty Dios. Dios ca' yajcomidohua'ñ jäy ajcxy ypocy huidibi mibijccixp Cristo, miid co Cristo ti yajpocyñihuächyii. E Dios ti xyajnibicyich co ngapxhuäcxyich yi' y'ayuc nej jäy ajcxy jëbi paadip pocyhuinmeecxin, etz nañ jadu'n paadip jotcuje'ajtin ma Dios. ²⁰ Paady huidityich miid Cristo ycixpi ngapxhuäcxyich Cristo y'ayuc. Jadu'n huimbizimyb nej jihuuy miich ajcxy Dios xymínucxtaaccixy miid ich n'ayuc jigix mmibijccixipy Cristo y'ayuc. Paady ngodinäyich Cristo co mínucxtacypich miich ajcxy. Jothuimbijtcix nej mdundigooygixy miid Dios ycotujcin e Dios xyhuinmeecxip ajcxy mbocy, jigix jotcuje m'idipy ajcxy ma Dios. ²¹ Cristo ca' ma ytundigooy, per miid ajt nbocy ycixpi Dios yajnax je Cristo jadu'n nej tüg pocyjäy. Jadu'n Dios ytuñ

müid je Cristo, jigix co ich ajt n'ijtim ma Cristo, nbaatim je tudägy'ajtin huidibi Dios chojcpy nmüid'ajtim.

6

¹ Ich ajcxy etz müich ajcxy quipxyi nduunim ma Dios ytung. Nminucxtacpyich müich ajcxy co mgöbigipy ajcxy je may'ajt je oy'ajt huidibi Dios ti tuñ müid müich ajcxy ycixpi, ca'ydi ñaadigi'aty Dios ytung. ² Com jadu'n jaybety y'ity ma Dios ñecy ma Dios jadu'n ymina'ñ:

Co je xii tiempo ti patni, ti ich müich m'ayuc midoohui. Ti nbubety nbudigiyich je huin'it xii je huin'it tiempo co ti yhuaad'aty mina jäy ajcxy y'alma ñidzögipy. Jadachambi xii tiempo ti yhuaad'ajtni mina jäbi Dios xyñidzoocim ajt n'alma.

³ Ca' pin n'adziptyich co nduñich ma Dios ytung, jigix ca'ydi pinjaty ymina'ñ co ca' oy nduñich. ⁴ Nañ jadu'n ca' n'adziba'ñich müich ajcxy. Nigi ndzocyich co ñiguëxigip tüg'ociy ich ndung co nduñich müid Dios ycixpi. Ooy nyajtuñich mecxtujcin. Ooy nmechtucyich ayo'n etz tzaachypi. Ooy nyajmayjatyich nhuit nducxy ngaayin n'uucin. Ooy ich ndzinaayin chipity. ⁵ Ti ajcxy xyci'atyich, ti ajcxy xypidäacixyich pujxtigoty. Ti jäy ajcxy xymibidigyich, e ooy ajcxy yhuaangixy yjihuygixy. Ti tzaachypi nminaxy nyajnaxyich ma ndungich. Minaajity canaag xii ca' nmäyich, e minaajity ayuu n'ityich. ⁶ Nyajniguëxipy ich ajcxy co ich ndungixyich müid Dios ycixpi, müid co huadz jot huinma'ñ nmüididyich ajcxy. Ca' ma jibicpi nmüididyich ajcxy, müid co n'ixpijccixyich ma Dios ytiy'ajt. Ooy mecxtujcin nmüididyich ajcxy. Ooy ich ajcxy nba'ayooyich nmigügtijcich. Dios yjihui'ñ ymic'ajt yajpatp ma ich ajcxy njot nhuinma'ñ. Ooy ich müich ajcxy ndzojccixy njihuygixy cixyot huinijot. ⁷ Nyajniguëxipy ich ajcxy co ndungixyich müid Dios ycixpi, müid co ngapxhuäccixyich Cristo y'ayuc ytiy'ajt tudägyi, e nañ müid co nmüididyich ajcxy Dios yjihui'ñ ymic'ajt, etz müid co nmüididyich ajcxy ca'pxy Dios ytiy'ajt tudägyi. Müid yi' ytiy'ajt tudägy nyajmibicyich jäy ajcxy, etz müid yi' ytiy'ajt naygohua'ñyijich ma nmüidizipich. ⁸ Minaajity jay xycapxpäadygixyich; minaajity jäy ajcxy xyñigapxy xyñi'ojijygixyich; minaajity jäy yminaangixy co oy nduñich; minaajity jäy yminaangixy co jibic nduñich; mina ngamina jäy xytijcixyich co n'indäaccixyich; e minaajity jäy yminaangixy co tiy'ajt ngapxpich. ⁹ Minaajity jäy yminaangixy co ajcxy ca' xy'ixy'ajtigixyich; e minaajity jäy yminaangixy co ooy oy xy'ixy'ajtigixyich; e minaajity ayo'n jipp'am o'cin jipp'am nhuidijtcixyich. Per jactzinaaybich ajcxy jadu'n. Ti je tungmüidpi xychaachtungixyich, per ca' ich ajcxy xyaj'o'cyi. ¹⁰ Ooy ich ajcxy njatajcxixy njamaaygixy, per jabom jabom jotcuje nayjihuygixyich. Ayoobi ich ajcxy ca' ti meen etz ca' ti pidägy nmüid'ajtcixyich. Per nañ jadu'n mayjäy oy'ajtin pada'ñ ma Dios müid ich ajcxy ndung ycixpi, jadu'n jada oy'ajtin nipaady nej meen etz nej pidägy. Oy ca' meen etz ca' pidägy nmüididyich ajcxy, per nmüidich ajcxy tüg'ociy huidibi nimina ca' ycixy ytigooy.

¹¹ Migügtijc ajcxy, huidibi yajpatp jim Corinto, ti nmüidcapxcixy ti nmüidmiydaaccixy ma jada necy müid tüg'ociy tudägy'ajt. Ti ngapxyich nmüidägyich nej njot nhuinma'ñ nmüididyich. ¹² Ca' ich n'ixmach nej ich müich ajcxy ndzojccixy njihuygixy cixyot huinijot. ¹³ May'ajt nbijctzooybich ma müich ajcxy co xyajnimähuibich nej müich ajcxy mjot mhuinma'ñ müidity tim jadu'n nej ti nduñich müid müich ajcxy. Jadu'n may'ajt nbijctzooyich ma müich ajcxy nej ungededytjic ajcxy oy'amy y'ung ajcxy ihuijcxixy capxhujcixy.

Ich ajt je' ma Dios jugypí chinaayín

¹⁴ Miich ajcxy, ca' mdungmujccixy m'ayoomujccixy mïid jäy ajcxy huïdibi ca' mïbijccixy Cristo. Com ca' huaad tudägyjäy ajcxy mïddzinaaygixy jäy ajcxy huïdibi ca' tudägy huinma'ñ mïdity. ¿Nej jëbi je huïdibi tiy'ajtip ytügïy mïid huïdibi ca' ytiy'ajtity? ¿Nej jëbi pinjaty tiy'ajt mïid mïd'idipy pinjaty huïdibi ca' tiy'ajt mïdity? Je huïdibi tiy'ajt mïid jadu'n nipaady nej chinäy ma jïin ytïcxin. E je huïdibi ca' tiy'ajt mïdity ñipatp nej jihuïy chinäy agootztuuby.

¹⁵ ¿Nej jëbi Cristo etz Satanás ñay'ayuc-huinjihuïyigixy? ¿Nej jëbi tüg mïbijcpi yajtügïy yhuinma'ñ mïid tüg huïdibi ca' ymïbicy? ¹⁶ Ca' ni nej jëbi tzaadzech quipychech y'idipy ma Dios ytïjc. Com yi' ajcxy huïdibi tzaadzech ojadajtp ca' ajcxy yhuinma'ñ ytügïy mïid Dios ytiy'ajt. Je Dios juugypí ymïd chinaydac ma ich ajt njot nhuinma'ñ, paady ycïxp jadu'n ich ajt nipaady nej Dios ytïjc. Com jaybety y'ity ma Dios jadu'n ymïna'ñ:

Ndzinaydac nbïdägaamybich ma yi' ajcxy. Huïdidaamybich ma yi' ajcxy yajpaady. Yi' ajcxy ich xyDios'adaanip. E ich ajcxy yi' njäy'adaanip.

¹⁷ Paady nañ jadu'n ajt nHuindzin Dios ymïnañ:

Copicy co miich ajcxy m'ixmadzipy yi' jacjadyii jäy ajcxy, e tzinaaygix abicy. Ca' ajcxy mnijot'adipy je jïbicpi, huin'it ich miich ajcxy ngöbïgipyich.

¹⁸ Ich miich ajcxy xymïd'adipyich jadu'n nej jihuïy ich miich ajcxy xy-Teedy'adyii. E jadu'n miich ajcxy m'idipy nej ich nmang n'anäg.

Jadu'n je mijpi Dios ymïna'ñ.

7

¹ Miich ajcxy huïdibi ooy ndzocy njihuïyich, com Dios jadu'n ymïna'ñ co tzinaydac pidäga'ñ ma ajt njot nhuinma'ñ, paady ycïxp tzoc yajhuaatzim ajt njot nhuinma'ñ, etz ma ajt n'espïritu, e jadu'n Dios nhuindzigïyim etz nyajmïj'ajtim cïxyjot huinïjot.

Co ajcxy jothuimbijit ma Dios huïdibi ajcxy jim Corinto

² Tungix may'ajt xycöbïgipich miich ajcxy cïxyjot huinïjot. Ca' ich ajcxy ni pin ti nmïdundigöoygixyich, nañ jadu'n ca' ni pin ich ajcxy ti nyaj'ixpïjccixyich jïbic-huinma'ñ. Nañ jadu'n ni ca' ich ajcxy pin ti nhuin'ïñich. ³ Ca' jadu'n nmïna'ñich mïid co nyajpocycähua'ñich miich ajcxy. Com jadu'n jacjayïjp ti mïna'ñich co ooy ndzocy njihuïyich miich ajcxy, tú'cïy ajcxy ndzinaayim, e tú'cïy ajcxy n'ó'cimipy. ⁴ Ooy ich miich ajcxy njot'amïj'adyiïjich. Ooy ich miich ajcxy ngömaaygixy. Ooy jotcujc nayjihuïyïjich mïid miich ajcxy ycïxpi. Oy njayajpaadyich tzip agujc ayo'n agujc, per co njäyechich miich ajcxy, jotcujc nayjihuïyïjich.

⁵ Nej ich ajcxy nja'ty ya Macedonia, ca' njotcujc'ajtcixyich. Hue' nyajpaadyich ajcxy tzip agujc capxy agujc huen ma'ámyity. Jäy ajcxy xymïdzip'ajtpich, etz nañ jadu'n tzigïybich jotjoty huinma'ñyoty. ⁶ Per Dios je huïdibi yajjotcugïyb yajjotmïcpijcp pinjaty tajp mayb, yi' ti xyajjotcugïyich co Tito yja'ty ya ma ich nyajpaady co jim choñ ma miich ajcxy. ⁷ Ca' nan ti njotcugïyich mïid tim jëyi co Tito ti xyñijädyich. Hue' ti njotcugïyich co yi' ti xyñimäyich jadu'n nej yi' jotcujc'ajtin ti paady ma miich ajcxy. Yi' ti xyajmïdmiydägyich jadu'n nej miich ajcxy tajin mayin mjihuïygixy mïid mbocy ycïxpi. E nañ jadu'n nej mhuinmaaygixy nej nyajpaadyich. E mïid jada ayuc ñgi ti njotcugïyich.

⁸ Ich ca' ndajy nmayich mïid co ich miich ajcxy ti nyajtajcixy ti nyajmaygixy mïid je necy huïdibi ajcxy nyajniguejx. Oy anajty ti njajihuïyich jotmay co nnejhuïyich co miich ajcxy ooy mdajy may tüg xii mejtz xii mïid

ich nnecy ycixpi. ⁹ Jadachambi ooy jotcuyc nayjihuiyijich. Ca' nminaanim miiid je tajin je mayin ycixpi huudibi miich ajcxy anajty miiid jotcuyc'ajtpich, com co je tajin je mayin ajcxy ti xyajjothuimbijtcixy, Dios ti jaygidägy jadu'n nej miich ajcxy ti mmimadaaccixy je tajin mayin. E ca' ich ti ndundigooyich ma miich ajcxy co ajcxy njotmaymoy. ¹⁰ Com Dios yjaygidacpyi co jäy njothuimbijtcixy, miiid co taj may ñayjihuiyigixy miiid ypocy ycixpi. E co ajcxy yjothuimbijtcixy, huin'it ajcxy je y'alma nidzoocin paadipy. E ca' je' huaad nidajim nimaayim co ajcxy y'alma ñidzögy. Co jäy ajcxy nidajcixy nimaaygixy huidi yajpat ya naaxhuiñ, e ca' yjothuimbijtcixy, jadu'ni nicxy je o'cin nipatcixy. ¹¹ Miiid je tügpi jäy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jaygidägy. Tungix cuendi jada' cham nej ti yhuimbizimy. Tiydudägy janch cham ti mdiydungixy miiid je pocy ycixpi. Ti xyajjotma'tcixy, e ti xy'adzigiygixy, e ni'ixiy miich anajty m'ijtcixy co mdzaachytunaangixy je huidi ti ytundigooy. E miiid jada ycixpi ti miich ajcxy myajniguëccixy, co ca' miich ajcxy ti pocy mmiiidty ma jadayaabi huinma'ñ. ¹² Co ich miich ajcxy jayhuin nijayiy, ca' nminaanim miiid je' ycixpi huudibi anajty ti ytundigooy. Nañ ca' nminaanim miiid je huudibi anajty ti yajmidundigooy. Nijayiyich miich ajcxy, jigix jëbi mnejhuuygixy je tiy'ajt nej Dios tzocy co nduunich miiid miich ajcxy m'oy'ajtin ycixpi. ¹³ Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcuyc'ajt, e nañ jadu'n ich ajcxy ti nbaatcixyich jotcuyc'ajt miiid miich ajcxy ycixpi. Nañ jadu'n ooy ti njotcugiyich ajcxy miiid co Tito ooy chachjotcuycity. Oy'amy miich ajcxy ti mgöbijccixy Tito, paady yi' ooy ti yjotcugiy miiid miich ajcxy ycixpi.

¹⁴ Co ti nnimäyich Tito co njot'amij'adyijich miich ajcxy, ca' ti tzo'ydu'n ti nbaadyich, co yi' oy ti xyco'ixiygixy. Nigi oy ti yhuimbizimy miiid co tüg'óciy ayuc huudibi ich miich ajcxy ti nyajnimäy ti yhuimbizimy co yjanchity. Nañ jadu'n ti yhuimbizimy co yjanchity jadu'n nej ti nnimiydacyich miich ajcxy miiid Tito co njot'amij'adyijich miich ajcxy. ¹⁵ Jadu'n nej co Tito oy miich ajcxy xycogapxiy, yi' ooy nigi xychojccixy xyjihuiygixy co yi' nejhuüy jadu'n nej miich ajcxy mmijottigooygixy ich n'ayuc, jadu'n nej mgapxymidoohuaangixy. E nañ jadu'n co yi' ijxy nej miich ajcxy yi' mgöbijcy miiid tzi'ñ jihu'ñ. ¹⁶ Ooy jotcuyc nayjihuiyijich, ooy njot'amij'adyijich miich ajcxy.

8

Ycüejticy miiid oyjot oyhuinma'ñ

¹ Jadügnax, miich ajcxy migügtijc, nyajnejhuühuaamybich nyajmiiidmiydägaamybich miich ajcxy, jadu'n nej Dios may'ajt oy'ajt tuñ miiid je mibijcpidijc ajcxy huudibi xii ya yajpatp Macedonia. ² Je mibijcpidijc huudibi ya yajpatp ti ooy ajcxy minaxy yajnaxy tzaachypi etz ayo'n. Per ca' ñejity, ooy ajcxy jotcuyc yajpatcixy. Nañ ayoobi ajcxy, per ti ajcxy may meeñ yajmujccixy, jadu'n nej jihuiy ajcxy ycomeeñity. ³ Ich testigo co je migügtijc miiid yci'm tzojcin meeñ yejccixy, nej jëbi ajcxy ymadaaccixy miiid meeñ, ixti anaxy ajcxy yejccixy. ⁴ Ooy xymnucxtägyich ajcxy co n'a'ixihuibich ajcxy co jëbi ajcxy meeñ yajmujccixy huudibi miiid pubedaangixy jacjadyii je mibijcpidijc. ⁵ Nigi anaxy ajcxy ooy meeñ yajmujcy ca'ydi jadu'n nej anajty njijp'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyéjigixy ma ich ajcxy jadu'n nej Dios tzocy. ⁶ E chi jada' ich ajcxy ooy mninucxtacy Tito co huen nicxy jadüg'oc ma miich ajcxy. Huen nicxy

yajcixy yajmay huídibi ti yajtzondägy ma miich ajcxy. Co huen je meeñ yajmujctäy huídibi cixyot huinijot miid mbubedaangixy je mibijcpidijc ajcxy huídibi yajpatp jim Jerusalén. ⁷ Miich ajcxy nigí ooy mmadaaccixy, ca'ydi jacpinjaty ma tüg'ocíy Dios ytung. Ooy mij mibijcin miich ajcxy miidity. Ooy myaj'ixpijccixy Dios ytiy'ajt. Ooy mmijottigooygixy mguydunaangixy ich n'ayuc. E nañ jadu'n ooy miich ajcxy xychojccixy xyjihuiygixyich. Nañ ooy ndzocyich co miich ajcxy nigí pubejtin myegipy ma je mibijcpidijc huídibi jim Jerusalén.

⁸ Ca' jadu'n n'ane'myich co mbubéjtcixipy je migügtijc huídi jim Jerusalén. Hue' ndzocyich co miich ajcxy mnejhuíhuipy jadu'n nej yi jacjadyii mibijcpidijc yhuinma'ñ bidaaccixyp ci'm co pubedaangixy je ymigügtijc jim Jerusalén. Jadu'n mdunipy ajcxy jigix jébi nnejhuíhuibich pen janch tiy'ajt jadu'n co mdzojccixy mjihuuygixy yi jacjadyii mibijcpidijc. ⁹ Com miich ajcxy mnejhuuygixyp jadu'n nej ajt nHuindzin Jesucristo mijmay'ajt mij'oy'ajt tuñ miid ich ajt ycixpi, jadu'n Jesús nipaady nej tüg mijcomeeñybi jii by tzajpjoty, miid co yi' xychojccim xyjihuiyim mijcajee, chi yi' ixmajztay yi' y'oy'ajtin jii by tzajpjoty co ycidacy ya naaxhuiñ etz y'ayooy ya. Miich ajcxy ca' anajty ti miidity jii by tzajpjoty, per jadachambi mbadaangixyp mij'oy'ajtin jii by tzajpjoty.

¹⁰ Miid miich ajcxy m'oy'ajtin ycixpi, ma jada necy nmooybich miich ajcxy ngapxhuijn jadu'n nej jébi huaad mdungixy ooyäy'ajtin. Jac'oy co miich ajcxy myajcixipy je huídibi ajcxy myajtzondac jadójimijt. Miich ajcxy jacjayip ca'ydi jac ni pinjaty ti myajtzondaaccixy meeñ yajmugii huídi miid mbubedaangixy je mibijcpidijc huídibi yajpatp jim Jerusalén. Nañ jadu'n miich ajcxy jacjayip ca'ydi jacpinjaty mijottigooygixy co mbubedaangixy jacjadyii mibijcpidijc. ¹¹ Jadachambi tiempo jactungix pubejtin, meeñ yajmujccix cixyot huinijot jadu'n nej ti myajtzondaaccixy ixti mabaad myajmaygixy je meeñ yajmugii. Nidüg nidüg yejccix nej ajcxy ii miidity. ¹² Pinjaty y'ofrenda yejcp janch cixyot huinijot Dios ycöbicip yi' je' y'ofrenda, jadu'n nej ii miidity. Dios ca' yi' pijctzoy huídibi ajt ca' nmiiidity.

¹³ Ca' nmína'ñich co oy jadu'n co mbubéjtcixip jacjadyii mibijcpidijc ixti mabaad mnayyajhuí'migixy ayo'ndumb. ¹⁴ Hue' yajmína'ñ co quipxyjaty mdzinaaygixy, ni pin cayajconaxipy e ni pin cayajmayjadipy. Jadachambi tiempo miich ajcxy nmiiidity ca'pxy je huídibi mnidzinaáygixip, ixti miich ajcxy conajxpi, paady ycixp jébi mbubéjtcixipy migügtijc huídibi yajmay-jajtp. Jadüg tiempo miich ajcxy myajmayjadipy, e jacjadyii migügtijc jébi xypubéjtcixipy, e jadu'n yhuimbídzimipy co mnaybubéjtigixy quipxyjaty miñ xyipy. ¹⁵ Com jadu'n jaybety y'ity ma Dios ñecy ma jadu'n ymína'ñ: "Pinjaty anajty may'amy miid, ca' yajconajxy. E pinjaty anajty hueeni miid, ca' yajmayjaty."

Tito miid ymigügtijc ajcxy

¹⁶ Per nyajnajxypich jäygidacin ma Dios, com Dios ti pidägy ma Tito yjot yhuinma'ñ co mijottigooy miich ajcxy m'oy'ajtin, tim jadu'n nej ich nmijottigooyich miich ajcxy m'oy'ajtin. ¹⁷ Co may'ajt nbijctzooyich ma Tito co nicxipy jadüg'oc ma miich ajcxy, agujc jotcujc cöbicy, com ti anajty jayip yhuinma'ñ pidägy ci'm co ñicxa'ñ jadüg'oc ma miich ajcxy. Jadachambi Tito nicxip ma miich ajcxy miid ci'mdzojcin.

¹⁸ Quipxyi miid Tito nguexy ich ajcxy yam tüg nmigüg huídibi ooy chachcapxpaadyity majaty mibijcpidijc, co ooy oy ytuñ capxhuäcxí Jesús y'ayuc ytiy'ajt nej huaad jäy ajcxy y'alma nízoozin paady. ¹⁹ Ca' nan jéyi co je

mibijcpidijc yi' ycapxpadyii. Nañ jadu'n ti yhuin'ixyii mibijcpidijc ajcxy co jëbi yhuidity mïid ïch ajcxy, e tunipy pubejtin mïid je may'ajtin oy'ajtin huidibi ïch ajcxy ndumybich mïid je migügtijc ycixpi jim Jerusalén. Jadu'n nduuñich jaydëbi jäy ajcxy capxpaadip ajt nHuindzin Jesucristo. Etz nañ jadu'n jaydëbi ñiguëxigy co ïch ajcxy nbubeda'ñich ajt nmigügtijc cixyjot huinijot. ²⁰ Ooy ngüend'atyich je meeñ huidibi je mibijcpidijc ti yajmujccixy, jigix ca'ydi pin huaad xyñigapxy xyñi'ojyich, jadu'n nej ïch ajcxy meeñ nyajmújccixyich. ²¹ Jadu'n ïch ajcxy nhuinma'ñ nbidägy co tudägy ndunáangixyich ca' nan jëyi ma ajt nHuindzin Jesús yhuinduu, nañ jadu'n ma je mayjäy ajcxy yhuinduu.

²² Nañ jadu'n nguejxypich mïid yi' ajcxy jadüg ajt nmigüg, je huidibi oy ti ytuuñ ma Dios ytung quipxyi mïid ïch ajcxy e nejhuïybich co tudägy ytuñ cixyjot huinijot. E yi' miich ajcxy ooy xyjot'amij'adyii, e oy ytuna'ñ mïid miich ajcxy ma Dios ytung. ²³ Pen jim pinjaty nidiy yajty je Tito, nimaaygix co ïch yi' nmigüg, e yi' mïid nduuñich ma Dios ytung ma miich ajcxy. E nañ jadu'n pen jim pinjaty nejhuïhua'ñ pinjäy ajcxy yi', yi' jacjadyibi huidibi ajcxy nicxp mïid Tito. Nimaaygix co je mibijcpidijc ajcxy ya Macedonia ti quexy ajcxy, ytungixy mïid Cristo ymij'ajtin ycixpi. ²⁴ Paady ycixp miich ajcxy yi' mdzójccixipy mjihuïygixyipy je migügtijc ajcxy huidibi mimb mïid Tito, jigix jëbi je mibijcpidijc ma nidüg nidüg cajp ya Macedonia nejhuïhuipy co miich ajcxy yi' mdzojccixy mjihuïygixy je mibijcpidijc tiydudägy. E paady ycixp jëbi ïch jotcuje nayjihuiyijich mïid miich ajcxy ycixpi.

9

Je cüejtin mïid je mibijcpidijc ajcxy ycixpi

¹ Nañ ca' yjaty ycopicyity co ïch miich ajcxy njacnijayiygixipy co je mibijcpidijc huidibi xï ya pubejtin tunaangixyp ma Dios yjäy huidibi ajcxy jim Judea. ² Com nejhuïybich co miich ajcxy nañ jadu'n mbubedaangixy cixyjot huinijot Dios yjäy huidibi ajcxy jim Judea. Paady ycixp jotcuje ïch jadu'n nnimäyich je mibijcpidijc ya Macedonia jadu'n nej miich ajcxy jim Acaya mhuinma'ñ pidacy jidöjimijt co mbubedaangixy je mibijcpidijc huidibi jim Judea. E mïid co miich ajcxy jayijp mhuinma'ñ ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'ñ pidaaccixy co ypubedaangixy nañ jadu'n. ³ Paady nguejxypich Tito mïid jacjadyii migügtijc ma miich ajcxy, jaydëbi xypubéjtcixipy ma je meeñ yajmugii, jadu'n nej ti mbidaaccixy huinma'ñ. E ïch ca' ti tzo'ydu'n nbáadibich mïid miich ajcxy ycixpi ma jada pubejtin huidibi ajcxy mguexamyb jim Judea. Com ïch ti nnimäyich mayjäy co miich ajcxy ni'ixi' m'ijtcixy mïid mbubejtin. ⁴ Ca' yjegyity co nijëjity mibijcpidijc huidibi tzinaayb ya Macedonia ñicxa'nip ajcxy mïid ïch co anajty nnicxyich jim ma miich ajcxy. E co anajty ïch ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuïhuibich, com ti anajty ooy njot'amij'ájtigixy. Nañ jadu'n miich ajcxy tzo'ydu'n mjihuïhuip. ⁵ Paady ycixp huinma'ñ nbidägyich co oy jadu'n co nijëjity migügtijc nicxy jayijp xycogapxiygixy, e huen xypubejtcixy ma yi meeñ yajmugii jadu'n nej jidöjimijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy mïidity yi m'ofrenda, e jëbi jäy ajcxy nejhuïhuip co yi m'ofrenda ti myejccixy cixyjot huinijot, ca'ydi jäy ymínaangixy co ïch miich adzip ajcxy ti n'ane'mgixy co m'ofrenda nya-jmújccixipy.

⁶ Jäymetz miich ajcxy jadu'n nej ayuc y'oc'ity: Pınjaty hueni niip, nañ jadu'n hueeni ycosecha yajpidıgy. E pınjaty mij niip, nañ jadu'n mij ycosecha yajpidıgy. ⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'ñ ti pidägy co yega'ñ. E ca' yegipy ametz jotmetz. E nañ jadu'n ni yca'adzip yca'a'écıty. Com Dios chojcpy yjihuıyb pınjaty cıxyjot huinijot y'ofrenda yejcp. ⁸ Dios jëbi may'ajt oy'ajt tunıpy mıid miich ajcxy mijcajee, e miich ajcxy mbáatcixıpy tüg'ócıy tijaty conuucxin, e ixti mmıid'adıpy tüg'ócıy huıdibi myajmayjajtcıxy, e nañ jadu'n conaxpi naadigıbi nej huaad jacjadyii mibijcpıdıjc mbubejtcıxy, e mdungıxıpy canaagnax oyjäy'ajtin. ⁹ Jadu'n jaybety ymiñ ma Dios ñecy, ma jadu'n ymına'ñ:

Yi oyjäydıjc ajcxy, yi' ajcxy nimooyb ayoobıtıjc huıdibi ajcxy yajmayjajtpy.
Yi oyjäydıjc ajcxy co oyjäy'ajtin tungıxy, yejccıxyp iıxpejt oybi huıdibi y'idıpy huınıxı.

¹⁰ Dios yejcpy je tım huıdibi jäy ajcxy ñııpy, nañ jadu'n Dios yejcpy je jıccxy pıcy huıdibi nidzınaayım nijugy'ajtim. E jadu'n co miich ajcxy oyjäy'ajtin mdungıx mijcajee, je m'oyjäy'ajtin ajcxy ñıpaadıp nej jıhuıy mgosecha myajpidıccıxy may'amy. ¹¹ E jadu'n miich ajcxy mıid'adıpy tüg'ócıy jugy'ajtin comeeñ'ajtin, jaydëbi m'ofrenda myejccıxy mij'amy. E mayjäy ajcxy Dioscojuyıp yajnaxıpy ma Dios mıid je m'ofrenda ycıxpi, co anajty nyecyich miich ajcxy m'ofrenda ma yi' ajcxy huıdibi yajmayjajtp. ¹² Co ıch ajt pubejtin nyejım ma jacjadyii mıgügtıjc, canan jëyi co nbubejtim mıid tijaty yajmayjajtcıxyp. Nañ jadu'n yi' ajcxy jëbi yajnaxcıxy Dioscojuyıp canaag'oc. ¹³ Yi' ajcxy capxpadamb Dios mıid co je m'ofrenda huıdibi ajcxy ti myejccıxy, yi' je' tıy'ajtıp co miich ajcxy mgapxymıdoogıxy Cristo y'ayuc ytıy'ajt. Paady ycıxp may mibijcpıdıjc ajcxy Dios ojadajtcıxıpy e nañ jadu'n Dios ıbáatcixıpy capxpáatcixıpy mıid je pubejtin huıdibi miich ajcxy anajty myejcpy mıid yi' ajcxy ycıxpi, etz nañ jadu'n mıid jacjadyii mibijcpıdıjc ycıxpi. ¹⁴ E ci'm yi' ajcxy Dios ojadadıpy mibijctzohıpy mıid miich ajcxy ycıxpi, etz xychóccıxıp xyjıhuıygyıxıp ooy mıid co Dios je mıjpi conuucxin ti yecy ma miich ajcxy. ¹⁵ Dioscojuyıp yi' Huındzin'ajtim Dios mıid yi' ymıjconuucxin huıdibi ti yecy ma ıch ajtin, ni pın canejhuıy nej jëbi yajnajtzcaxıy.

10

Pablo mııdıty cötujcin co y'apóstol'adyii

¹ ıch Pablo nmıgapxypıch miich ajcxy mıid yungnaxy njot nhuinma'ñ, jadu'n nej jıhuıy Cristo miich ajcxy xymııdmıydaaccıxy. Com Cristo yungnaxy jot huınma'ñ mııdıty. Nıjëjıty miich ajcxy ymınaangıx co ooy yungnaxy naybıdägyııjıch co n'ıtyıch mıid miich ajcxy, e jadachambi co jıguëgy nya-jpaadyıch, hue' n'ahuımbıtyıch ahua'ñ, ndunaamybıch ti ndunaamybıch. ² May'ajt nbıjctzooybıch co anajty ıch miich ajcxy nıcxıy n'ıjxcıxy, ca' jadu'n ndzocyıch co copıcy n'ahua'ndägıbıch mıid nıjëjıty miich ajcxy huıdibi xyñıhuambejtpıch, co nduñıch etz ngapxyıch ngımtzojcin tım jadu'n nej huenpın naaxhuiñjäy ytungıxy etz ycapxcıxy mıid ycımtzojcin. Janch nı'ıxı' n'ıtyıch, co anajty jım nmechıch, chi mıid nnayhuındınähuıybıch yi' ajcxy huıdibi jadu'n xyñıhuambejtpıch. ³ Janch tıy'ajt co ndzınaayıch jadu'n nej naaxhuiñjäy chinaaygıxy. Per ca' ndzıptuñıch nej jäy ajcxy chip-tungıxy. ⁴ Ca' ıch ajt nyajtunım naaxhuiñjäy ymıc'ajt co nnaygohuaanıım ma je jıbıcpı huıdibi xymıdzip'ajtim. Hue' nyajtunım Dios ymıc'ajt, huıdibi jëbi mıid nmımadaacım tüg'ócıy huıdibi ca'oybi mıid. ⁵ Jadu'n ıch ajcxy ca' nyajtzobadáangıxyıch je ayuc tıy'ajt huıdibi ca' yjanchıty, etz je' ayuc

pín amij agix naybídaacip co Dios y'ayuc ytiy'ajt adujci. Tüg'óciy naax-huiñyäjy y'ayuc ytiy'ajt nbídáaccixyich ma Cristo, jigix tüg'óciy jäy ajcxy capxymídohuip Cristo. ⁶ Co anajty miich ajcxy mhuinma'ñybídaaccixy co huädz mgapxymídohuaangixy tüg'óciy Cristo y'ayuc ytiy'ajt, pínjaty cacapxymídooy, hue' ni'ixi' n'ijtcixich co yajmöhua'ñ castigo pínjaty cacapxymídooy.

⁷ Miich ajcxy yi' mdzachuenditungixy jäy ajcxy nej yjäy'ajtcixy. Pen jim pínjaty ñayjihuiyii janch agujc jotcujc co Cristo yhuin'ixyii müd ytung ycixpi, huen huinjihuiyigixy jotjoty co Cristo ti xyhuin'ijxcixyich nañ jadu'n müd yi' ytung ycixpi. ⁸ Ich ca' ti tzo'ydu'n jihuiyich müd co ci'm nnaygömayiijich hueeni müd co Jesucristo xymooygixyich ane'min cötujcin. Com ich ajt nHuindzin Jesucristo ti xymóoygixyich jada cötujcin, jigix ich miich ajcxy nyajyeecip mmibijcin, canan nyajtigoyip ajcxy mmibijcin. ⁹ Ca' jadu'n ndzocyich co yquëxigipy jadu'n nej jihuiy n'adzighuaangixy müd je necy huidibi nyajnigüeyxypich miich ajcxy. ¹⁰ Yminaangixy co ich nnecy ooy tzaachyaty chach chaach. E yminaangixy co ma jäy ajcxy yhuinduu yung naxy njäy'aty, e ngapxin nmiydáacinich ca' pín jäygidägy. ¹¹ Per yi' jäy ajcxy huidibi jadu'n minaangixp, copicy ajcxy nejhuihuipy co jadu'n nej ich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹² Ca' huaad n'ocnay'ijxquipxim o nyajtügüyim müd yi' ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixyp, co pín jadu'n nay'ixquipxip naymídoguipxip müd yci'm'ayuc yci'mhuinma'ñ huidi ii yjajtpy ñejhuüyb. ¹³ Ca' ich ci'm naygömayiyb ma ycapadyii, huidibi ich ajcxy ca' xypátcixyich. Dios ich ajcxy xyajnejhuüybich nije' nije' it lugar ma yi' tzocy ndúngixibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴ Paady ycixpi ndúngixyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ich jayijp ti n'ityich ma miich ajcxy. Pues ich tim jayijp ngapxhuäcx Dios y'ayuc ma miich ajcxy, e ca' jac ni pín. ¹⁵ Pen huingbi jäy je Dios ytung yajtzondaacip ma tüg cajp, pues ca' ich huaad jim nduüñich, jadu'n nej jihuiy ich ti nyajtzondägyich je tung. Ca' jadu'n nduüñich, hue' njijp'ixypich co miich ajcxy myajyeegip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huin'it xi' ya n'ihuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypi ma miich ajcxy. Per ca' nduna'ñich ma huingbi ti yajtzondägy je tung.

¹⁷ Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸ Com Dios ca' jäygidägy pínjaty ci'm naygömayip. Hue' Dios yjäygidacypí pínjaty ajt nHuindzin Jesucristo capxpatp.

11

Pablo etz je' ajcxy huidibi y'ayuccapxhuäcxp müd aní

¹ Huaad co miich ajcxy ixypy xy'ocmímecxtujcich hueeni ich nloci huinma'ñ huidibi ngapxaamybich. Oy ixypy ñejity mímecxtuccich. ² Ooy ndzocy ooy njihuiyich miich ajcxy. Dios ti xymöyich je tzojcin jihuiyín huidibi nmídic müd miich ajcxy ycixpi. Ndzojcypich co cixyjot huinjot miich ajcxy mmijpídaaccixy Cristo. Co miich ajcxy yajmij'adip Cristo cixyjot huinjot, huin'it jadu'n miich ajcxy nipaadipy nej tüg töxy'anäg pi'cnip huidibi pijcp müd tüg yëydijc. ³ Ndzighiybich co huingbi jäy xyajhuinma'ñyidigoyaangixy müd ixpicytjic y'ayuc huidibi ca' ytiy'ajtity. E miich ajcxy m'ixmadzaangixy

jadu'n nej cixyot huinjot ti mmijpidaaccixy Cristo. Tim jadu'n nipada'n mi-ich ajcxy mjadaangixy nej yjajty jecy'ajty je Eva co tza'n yhuin'ini. ⁴ Com mi-ich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej ich ajcxy nyaj'ixpiyich. Etz nañ jadu'n miich ajcxy jotcuje mgöbijccixy huingbi espíritu, ca' yjējity je Espíritu Santo huidibi ti mgöbijccixy jayip'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjēiñ huidibi ajcxy m'alma xyajnidoocip. Ca' y'ocjēiñ huidibi ti mmidoogixy ma ich ajcxy. Mic'amy mdzachmijpidaaccixy huingjäy y'ayuc. ⁵ Ca' jadu'n ytiy'ajty co yi huindzindijc ajcxy huidibi naydijigixp Jesús y'apóstol hudi jim ma miich ajcxy, co jac mic'ajt mūd ajcxy etz yjacmūd ajcxy ixpijcin ma Dios ytiy'ajt, ca'ydi ich. ⁶ Oy ich jada' ca' njatyich nej yajxon ngápxibich, ca' ooy ngo'ayúciyich. Per ca' ñejity com yajxon njatyich nnejhuüyich Dios ytiy'ajt. E ti nyaj'ijxcixy nyajnejhuüyigixy co n'ixpicyciyich ma Dios ytiy'ajt mūd je ayuc huidibi ngapxhuäcxich ma miich ajcxy etz je mijhuinma'n hudi nduunich co jim n'ijtyich ma miich ajcxy.

⁷ ¿Nej tundigoyich jada' co ngapxhuäcyich Jesucristo y'ayuc ma miich ajcxy e ca' nbijctzooyich meñ mūd ndungich ycixpi? Jadu'n nnyajnajxich anajty nej tüg midumbi jigix miich ajcxy jac'oy jacjotcuje mdzinahuip. ⁸ Ti ngöbicyich meñ huidibi jacjadyii mibijcpidijc ti xymöyich huidibi tzinaayb ma huingbi cajp. Yi' ajcxy ymeeñ nyajtuunich co nyaj'ixpijcyich miich ajcxy. ⁹ Co n'ijtyich mūd miich ajcxy jadöjimijt jadöhuix'am ca' nbijctzooyich ma miich ajcxy huidibi nyajmayjajtpyich anajty. Ca' n'adzijpyich ni pin. Yi migügtijc huidibi ajcxy tsoon Macedonia, yi' ajcxy xymooyich huidibi anajty nyajmayjajtpyich, paady ycixp ca' anajty meñ nbijctzooyich ma miich ajcxy, ca' n'adzijpich miich ajcxy. E jadu'n njactuna'ñich jadu'n nej nduunich mūd miich ajcxy co n'ijtyich jim jadöjimijt. ¹⁰ Nejhuüyibich co yjanchity co nmūdidyich Cristo ytiy'ajt, nañ tim jadu'n nnejhuüyich co ci'm nbaadyich huidibi mūdny'ixyijich. E ca' pin ma tüg'óciy je Acaya naaxjot xycapijcibich jada jotcuje'ajtin. ¹¹ ¿Na'amy co jadu'n nmīna'ñich? ¿Je' co ich miich ajcxy ca' ndzojccixy? Ca' yjadu'nity. Dios ñejhuüyib co ndzocy njihuüyich miich ajcxy.

¹² Per njacyajtüyöyaamybich je ndungich huidibi ndumyibich, e ca' meñ nbijctzohua'ñich mūd ich ndung ycixpi jigix co yi jacjadyii huindzindijc huidibi yaj'ixpijccixp ma miich ajcxy, ca' jēbi y'indaaccixy co yi' ajcxy tú'ciy ytungixy jadu'n nej ich nduunich. ¹³ Yi' ajcxy ymīnaangixy co Cristo ti yaj'nibijcigixy co ajcxy yi' y'apóstol'adyii, e ca' yjanchity, nigoob ajcxy huin'ingixy yi mibijcpidijc. Ñayajnajxigixy ci'm nej jihuüy Cristo y'apóstol'ajtigixy, e ca' yjanchity. ¹⁴ Nañ ni ca' oy nhuinmaayich co jadu'n iditczixy, com nañ jadu'n je Satanás ñayajtigachyii ñayajnaxyii nej Dios y'ángel huidibi tiy'ajt mūd, e ca' yjanchity. ¹⁵ Paady ycixp nmibijcpich co yi jäy ajcxy huidibi tumb mūd je mujcu' nañ jadu'n nayajnaxyii jadu'n nej jäy tudägypí, e ca' yjanchity. Per Dios chaachytunamyb ajcxy jadu'n nej ypadyii mūd je jibicpi ycixpi huidibi ajcxy ytumyib.

Je tzaachypí je ayo'n huidibi Pablo yjajtyp co y'ayuccapxhuäcy

¹⁶ Jadüg'oc ich miich ajcxy nnimaaygixy: Ni pin ycamīna'nipy co ich locijity. Per pen nijējity jadu'n ymīnaangixy, ca' ñejity. Miich ajcxy amidoo'ijtcix ich n'ayuc, jigix jēbi naygōmayijich ci'm. ¹⁷ Ca' ich ajt nHuindzin Jesucristo xycōtujcmöyich, co jadu'n jēbi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jäy co naygōmaya'ñyijich ci'm. ¹⁸ Mayjäy ajcxy ooy ci'm chachnaygōmayáanigixyp mūd huidibi ti tungixy mūd yci'm mic'ajt ya naaxhuiñ. Nañ jadu'n ich

nnaygömaya'ñyijich ci'm. ¹⁹ Miich ajcxy mdzachcöbijccixyp loci jäy ajcxy y'ayuc, je' co mdzachnayajanaxáanigixy jadu'n nej jihuüy ajcxy ooy mdzach-cohuinma'ñity. ²⁰ Mgöbijcxy miich ajcxy co jäy ajcxy xytumbi'adiiyb nej tim tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycojxcixy ma ajcxy mhuiñyijp. ²¹ Oy njatzo'ydu'njihuiyich co nmina'ñich co ca' jadu'n nmíididyich je jotmic'ajtin, jigix jëbi ñich miich ajcxy nduuñich jibic, jadu'n nej yi' jadu'mbi huindzindijc ti xytungixy.

Per jadu'n nej yi' ajcxy ñaygapxpadyii ci'm, nañ jadu'n naygapxpada'ñyijich ci'm. Ca' ñejity pen capxpich jadu'n nej tüg loci jäy. ²² Pen hebreojäy yi' ajcxy, hebreojäy ñich nañ jadu'n. ¿Conaax cogajp ajcxy Israel? ñich nañ jadu'n. ¿Abraham ajcxy ymij'ap'ajtpy ymijteedy'ajtpy? ñich nañ jadu'n. ²³ ¿Nej tumb ajcxy míid Cristo? Nígi nduñyich míid Cristo, ca'ydi yi' ajcxy. Ca' ñejity oy ngapxyich jadu'n nej tüg loci jäy. Jac mic ti nduuñich míid Cristo ca'ydi yi' ajcxy. Canaag'oc codungdijc xychaachytuñich. Ti nyajc'atyich míid matz etz míid coochac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jijp'am ti nyajpaadyich, e yi' ajcxy ca'. ²⁴ Migoox'oc judíojäy ajcxy ytungmíidpi xyci'ajtyich míid cochac iipx majmox midaax ci'. ²⁵ Tugüig'oc xychaachytuñich míid matz. Tügtecy ajcxy xychaagächich. Tugüig'oc je barco yquín mejy'agujc je huidibi ñich anajty nyajnicxiyb. Co je barco yquín tügtecy, chi tüg tzuum etz tüg xi' n'ijtyich ma je mejy anajty ooy ypidigy. ²⁶ Ooy viaje nduuñich canaag'oc, e o'cjijp'am n'ijtyich ma mijnügom yjadyii, e nañ jadu'n ooy anajty may meetzpi yajpaady ma anajty nhuidityich. Nmígogajpich, yi' judíojäy, xyjayaj'ogaanich ajcxy. Ti ayo'n nbaadyich ciudadjoty etz ma yuugjot etz mejyjoty. E nañ ti ayo'n nbaadyich míid jäy ajcxy huidibi naybidaacip ajcxy nej ñich ajt nmígüg, e ca' anajty yjanchity. ²⁷ Minaajity ooy mic njihuüyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxinaxyich míid yuu tidzibi. Janam jatzojc n'ayu'atyich. Minaajity ooy njihuüyich je tüchypi, etz nyajmayjatyich nhuit nducxyich.

²⁸ Míid jada ycixpi etz míid jac-huidijaty, nañ jadu'n jabom jabom ooy mic njihuüyich jadu'n nej yajpaady je mibijcpidijc nidüg'óciy canaag picy xi ya. ²⁹ Pen nijejity mibijcpidijc yajpaady amutz ma ajcxy ymibicín, nañ jadu'n ñich nayjihuiyijich amutz. Pen nijejity mibijcpidijc ypocytungixy, ñich ndzo'ydu'n njihuüyich etz jibic nayjihuiyijich míid yi' ajcxy ypocy ycixpi. ³⁰ Pen naygömayaanibich ci'm, naygömayaanibich co amutz njihuüyijich. ³¹ Je Dios ñich ajt nHuindzin Jesucristo yTeedy, je huidibi huaad n'ojadajtim n'íibaatim ngapxpaatim huinixi huinítiempo, yi' ñejhuüy co tiy'ajt jadu'n nej ngapxyich. ³² Jecy'ajty co n'ijtyich jim Damasco, je gobernador huidibi anajty tumb míid je rey huidibi yxi' Aretas, ypidac soldados ajcxy ma jadyii mijtu' ycajptigiy, jigix jëbi xyajnicxyich mach. ³³ Per je mibijcpidijc ajcxy xycodiyñajxich naaxcixy mijcachjoty ma tüg ventana aguu ma je mijpoch huidibi je cajp míid yjübojtz'ahuidityity. E jadu'n ndzoocyich ma je gobernador yci'am.

12

Huidibi Pablo yhuin'ijx etz nejhuüy

¹ Ni ti ycayajpaady ycayajganar'aty co ci'm ndzachnaygömaayim ndzach-nayñigaxim ndzachnayñimiydaacim. Per ca' y'ocnejity nimiydágaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxpih

xyajni'ixi'ybich. ² N'ixy'ajtypich tög yëdyjc huídibi mibijcp Cristo. Cham majmactz jimijt ma Dios yajpättigiyi tzajpjoty ma je midugigpi tzajp. E ca' nejhuüyich pen hue' yajpättigiyi müd ñinícx o pen ca'. Dios tügpajc nejhuüyb. ³⁻⁴ Jadüg'oc nmina'ñich co Dios ti yajpättigiy je yëdyjc ma je oybi it. E ca' nnejhuüyich pen janch ti ypättigiy müd ñinícx o pen ca'. Dios tügpajc nejhuüyb. E jüby ma je oybi it midoy capxy ayuc huídibi ca' huaad ni pin jäy capxy miydägy nimina. ⁵ Ooy ich amij agix nayjihuihua'ñyijich müd je jadu'mbi yëdyjc jadu'n nej jëjin huídibi Dios yajpättigiy tzajpjoty. Per ca' ich ci'm nayñimiydäga'ñyijich naygömaya'ñyijich. Hue' janchtiy nayñimiydägaanibich ci'm nej nduñ n'ayooyich ma ich ndzinaayin. ⁶ Oy ixyipy ich ci'm njanayñimiydäga'ñyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypi. Per ca' jadu'n naygömaya'ñyijich, com ca' ndzocyich co jäy ajcxy nicxy xycömaayich ñigi anaxy. Huaad jadu'n co ajcxy müd miydacy je migügtijc huídibi ajcxy ijxcixp huídibi ndumybich o huídibi ayuc ajcxy ymidoogixp huídibi ngapxpich.

⁷ Je capxy ayuc huídibi Dios xyajnejhuüyich jüby tzajpjoty, ooy anajty chach y'oyity. Paady ycixpi Dios pidacy jadu'n nej jihuiy tög apy ma ich nninícx, jigix ca'ydi amij agix nayjihuiyijich. E je apy jadu'n nipaady nej mujcu' xyajtzaachiyich. ⁸ Tugig'oc Dios ti nmibijctzooyich co huen xyajpidzimich je huídibi xyajtzaachiybich. ⁹ Per je Huindzin Jesús xyñimaayich: “Jëbi jadu'n co may'ajt ndunipich müd miich ycixpi. Co pinjaty pumäy ñayjihuiyii, huiñit ñigi ñiguëxigy ich nmic'ajt.” Paady ycixpi njotcugiyich co pumäy nayjihuiyijich, jigix ñiguëxigipy Cristo ymic'ajt ma ich ndzinaayin. ¹⁰ Paady ycixpi ooy njotcújidyich co pumäy nayjihuiyijich, co jäy xyñigapxy xyñi'ojiyich, co ti nyajmayjatyich, co jäy xy'ixhuidityich xypahuidityich, co tzaachypi nyajnaxyich müd Cristo ycixpi. Co nayjihuiyijich pumäy, chi ñigi mic nayjihuiyijich müd Cristo ymic'ajt ycixpi.

Pablo ca' yjotcuyc'aty nej je mibijcpidijc ajcxy jim Corinto ytungixy

¹¹ Co ich jadu'n ci'm naygapxpadyijich, tim jadu'n nipaady nej jihuiy ich tög loci jäy. Adzip miich ajcxy jadu'n xytuuñich co copicy naygapxpadyijich ci'm. Hue' yjapaadyii miich ixyipy ajcxy xycömaaybich xycapxpatpich. Ich ca'p ich ti ndzohuity. Oy ixyipy ich ca' ti mic'ajt nmüdidyich, per jatytimy ñigi mic'ajt nmüdidyich, ca'ydi yi huindzindijc huídibi ma miich ajcxy, huídibi ajcxy naydijip apóstol, e ca' yjanchity. ¹² Ma je tung huídibi nduuñich müd mecxtujcin ma miich ajcxy, ti ooy ñiguëxigy müd canaag ijxpejt, mijhuinma'ñ etz milagros, co ich janch Cristo xy'apóstol'adyijich. ¹³ Ca' jadu'n ytiy'ajtity co mminaangixy co ñigi oy ti nduuñich ma yi jacjadyii mibijcpidijc ma jacjadyii cajp, ca'ydi jadu'n nej ti nduuñich ma miich ajcxy. Pen ti ndundigooyich co ca' ti nbijctzooyich meeñ müd ich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meecxcich ajcxy.

¹⁴ Jadachambi ni'ixi' n'ityich co nñicxa'ñich midugig'ocpi jim ma miich ajcxy. Ca' ti pubejtin nbijctzohua'ñich ma miich ajcxy müd ndungich ycixpi. Ca' ndzocyich miich ajcxy mmeñ. Hue' ndzocyich co miich ajcxy xymijnicxpedipyich. Jac'oy co ich miich ajcxy nbubedipy, ca'ydi co miich ajcxy xypubedipyich. Jadu'n ich nipaady müd miich ajcxy nej tög ungedeedy. Je ungedeedy ypubejtpy y'ung, e ca' nan je ung pubejtyp yteedy. ¹⁵ Ich jotcuyc nyajtundähuibich ma miich ajcxy tög'óciy tijaty nmüdidich, ixti ngi'mmic'ajtich tög'óciy nyajtunaamybich müd miich ajcxy ycixpi, jigix jëbi nbubedipyich miich ajcxy. Oy janiguëxigy co ich miich ajcxy njadzojccixy njajihuiyigy, e miich ajcxy ca' xychójjcixyich xyjihuiyigyich.

16 Nijëjity miich ajcxy mmînaangixy co janch tîy'ajt co ca' ti pubejtin ti nbijctzooyich ma miich ajcxy, nijëjity ymînaangixy co janch nihuinma'ñ ti nyajcägixyich ma tüg trampî mîd anî. 17 ¿Nej ti ñich miich ajcxy nhuin'ñngix mîd je migügtijc huidibi ajcxy nyajniguejx? 18 Nbijctzoohuich may'ajt ma Tito co huen nicxy xycogapxiygixy jadüg'oc. E nyajpuguexiyyich jadüg ajt nmigüg huidibi mîd ñicxy quipxyi. ¿Nej ti miich ajcxy Tito xyhuin'ñngixy? ¿Nej ca' yjanchity co ñich etz Tito quipxyjaty ñich ajcxy nhuinma'ñ nmîdity, e tú'ciy ndúngixyich?

19 Ca' yjegyity co miich ajcxy mhuinma'ñybidáaccixy co ñich ajcxy ndzachnayñigapxtúutigixy ma miich ajcxy. Ca' yjadu'nity. Ngápxcixpich nmîydáaccixpich ma Dios yhuinduu je ayuc tîy'ajt huidibi Cristo xymóoygixich. E tüg'ócîy huidibi ndúngixpich, hue' ndúngixich jigix yeegip miich ajcxy mmîbijcîn. 20 Com tzigîybich co anajty nicxy n'îjxcixyich miich ajcxy, ca' jegyity co nbadaamybich je tîy'ajt co miich ajcxy ca' mhuinma'ñymîdity jadu'n nej jëbi njäygidägyich yî mhuinma'ñ ajcxy. E miich ajcxy nañ jadu'n ca' mjäygidáaccixipy nej ñich nhuinma'ñ mîdîdyich. Tzigîybich co miich jada' ajcxy mnaychiptúnigixy, ca' mnay'ixáanigixy nidüg nidüg, mnaymîjotmá'tigixy; mnayñi'ojîiyigixy, e mbiitzcapxcixy; co ooy amîj agix mnayjihuíiyigixy, e ca' mnay'ayuc-huinjihuíiyigixy, ca' oy m'ijtcixy. 21 Tzigîybich co jadüg'oc nicxy n'ixyich miich ajcxy, chi ajt nDios xyajjihuíhuibich tzo'ydu'n mîd miich ajcxy ycixpi, etz njihuíhuibich tajin mayin mîd miich ajcxy mbocy ycixpi, e com ca'ni mjothuimbijtcixy mjäydigooygixy je mjibic-huinma'ñ jadu'n nej mmîgapxtigooygixy e mmîdundigooygixy huingbi töxyjädyjc, etz jadu'n nej mmîdundigooygixy migüg ytöxyijc, etz jadu'n nej jibic-huinma'ñ miich ajcxy mmîdity.

13

Ane'mîn capxhuijîn etz capxpooxîn huidibi cijxnîp je necy

1 Jada je' ymîdugîg'oc co ñich miich ajcxy nicxy ngo'ixîhuaangixyp. Pen miich ajcxy mxîhuaangixyp tüg migüg ma ñich co ti ytundigooy mîd Dios ytîy'ajt, hue' tzocy mîd metz o tugîg testigos. 2 Co je mîmejtz'ocpi ñich miich ajcxy oy ngo'ixîy, chi nnîmaayich yî ajcxy huidibi ti ytundigooygixy anajty, e nañ jadu'n nnîmaayich je huidibi jacpocytungixp co ñich anajty jadüg'oc nicxy miich ajcxy n'îjxcixy, ca' nyajtuna'ñich mecxtujcîn ma yî huidibi ajcxy pocytungixp. E cham co nyajpaadyich jigüëgy ma miich ajcxy, nnîgapxpejtpyich ma jada necy co jadüg'oc nicxy n'ixa'ñich miich ajcxy, ca' nmîmecxtuga'ñich yî ajcxy huidibi pocytungixp. 3 E jadu'n miich ajcxy mmîd'adîpy tîy'ajt co ngapxnajxich Cristo y'ayuc. E Cristo ca' je' yjadu'nity nej tüg jäy huidibi ca' mîc'ajt mîdity. Hue' je' yajnigüëxîgyp ymîc'ajt ma miich ajcxy. 4 Janch tîy'ajt co jadu'n ajcxy yajcruudzpejty Jesucristo nej jihuïy ca' anajty mîc'ajt mîdity. Per jadachambi Jesucristo jugy'ajtp mîd Dios ymîc'ajt. Nañ tim jadu'n co n'ijtm mîd Jesús, jadu'n yquëxîgy nej jihuïy ca' mîc'ajt nmîd'ajtm. Per co n'ida'ñich mîd miich ajcxy, nmîd'adaanibich Dios ymîc'ajt mîd co nyajpaadyich ma Cristo.

5 Ci'm naydiy'ajtpîjcîgîx nidüg nidüg, pen janch tîydudägy mmîbijccixy Cristo. Ci'm huinmaaygîx ma ajcxy mgî'mdzînaayîn, pen janch mmîbijccixy. ¿Nej ca' mîdmîjihuí'mybîjccixy, pen mîd ajcxy Cristo ma mjot mhuinma'ñ? Pen ca' yjadu'nity hue' anajty Cristo mmîbijccixy nîgîxy cohujc. 6 Per njîp'ijxypich co miich ajcxy mnejhuïhuïpy co yjanchity co Cristo ti xya-jnîbicyich yî ytung, e ca' n'îndägyich. 7 Dios nmîbijctzooybich mîd miich

ajcxy ycixpi, jigix ca' ti jibic-huinma'ñ mdúngixipy. Canan co ich ajcxy ndzachcömaybidzimmáangixyich, o co ich ajcxy nigi nmidity Dios ytiy'ajt ca'ydi jac ni pinjaty. Jadu'n ndúngixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuïy ich ajcxy ca' oy mij n'ixpícycigich. ⁸ Com ca' huaad ni ti nej ndunim huidibi ca' yjanchity huidibi ca' ytiy'ajity. Hue' tzocy co tüg'óciy huidibi ndunim, naybadib mid Dios ytiy'ajt. ⁹ Paady jotcuje ich ajcxy co nyajpáatcixyich nej jihuïy ca' ich ajcxy mic'ajt nmidity, jigix miich ajcxy mic'ajt mmid'adipy ma mmibijcin. Nmibijctzoohuaamybich ajcxy Dios mid miich ajcxy ycixpi, jigix ajcxy mmibijcin mi'íjtcixipy ca'pxy. ¹⁰ Jada necy ich jayijp nguexamyb ma miich ajcxy, ma yam ca'ni nicxy n'íjxcixyich miich ajcxy jadüg'oc, jigix ca'ydi adzip ahua'n anajty nyajtuuñ ich n'ane'min ma miich ajcxy. Ich ajt nHuindzin Jesucristo ti xymöyich mic'ajt, jigix jebi ich miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹ Migügtijc ajcxy, capxcijxpich mid miich ajcxy, huen Dios xypubéjtcixipy xypudigüygixyipy. Mijottigooygix cuydunaangix tüg'óciy Dios ytiy'ajt ma mdzinaayin. Jotcuje'ajtcix. Chinaaygix mid tú'ciy mjot mhuinma'ñ. Naymid'íjtgixy agujc jotcuje. Huen ajcxy Dios xymid'íjtcixy. Je Dios huidibi jotcuje'ajtin yejcp, e nañ jadu'n Dios xychojctáaygixipy xyjihuiydáaygixipy. ¹² Naygapxpóocxigix xic xon. ¹³ Tüg'óciy Dios yjáy huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy mid miich ajcxy ycixpi. Huen Dios xychojccixy xyjihuïygyxy. Huen Dios yjihuiñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxycixyich. Amén.

GÁLATAS

Yi Necy Huidibi Pablo Yajniejx Je Mibijcpidijc Jim Gálatas

¹ Hich Pablo, Jesucristo xyquejxich co ngapxhuäcxibyich yi' y'ayuc. Ca' nmīnaanīm jāy ajcxy xyajñibijcīch jada tung. Jesucristo etz Dios Teedy ajcxy ti xyajñibicyīch jada tung. Je' je' je Dios huidibi yajjugypijc Jesucristo co y'o'cy. ² Hich etz tūg'ócīy migūgtijc ajcxy huidibi ya yajpatp ma hich nyajniejxpīch jada necy ma nidūg'ócīy pīnjaty mījpidacp Jesucristo, huidijaty naymujcip ma nidūg nidūg cajp jim Gálatas naaxjot. ³ Nmībijctzooybīch Dios Teedy etz hich ajt nHuīndzīn Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugīhuip ajcxy. ⁴ Hich ajt nHuīndzīn Jesucristo ti nayyoxyī ti naydogyī cī'm anajty ma yi o'cīn mīid hich ajt nbocy ycīxpi. E jadu'n ti xyñihuaanīm ma je jāy ajcxy huidibi jībīc huīnma'ñ ymīid huidibi tzīnaayb ajcxy ma jadachambī xī tiempo. Jadu'n Jesucristo tuñ mīid hich ajt ycīxpi, com hich ajt nDios Teedy jadu'n tzojcp. ⁵ ¡Ooy y'oyīty co Dios Teedy huen mīj etz cōmay y'idīpy huīnīxī huīnītiempo! Jadu'n jada. Amén.

Ca'p ji huingbi tīy'ajt huidibi jāy y'alma yajñidzocp

⁶ Ooy ndzachhuīnmaayīch jadu'n nej tīm tzojcy ti mījīpyōyduťcīxy je Huīndzīn Dios ytīy'ajt. Dios xyhuīn'ījxcīxy jīgīx jēbī mmībijccīxy je oy'ajt je may'ajt huidibi Jesucristo ytuun mīid miich ajcxy ycīxpi. E miich ajcxy ti mhuīnma'ñ myajtigajtcīxy, e ti mmībijccīxy huingbī jāy ajcxy y'ayuc, jadu'n nej ca' jēbī m'alma nīdzocīn padaangīxy. ⁷ Ca' nmīnaanīm co ji jadūgnax Dios ytīy'ajt. Hue' je'nījējīty jāy ajcxy ti xyajhuīnma'ñyīdīgōoygīxy, ooy ajcxy yajtigadzaangīxy je Dios y'ayuc ytīy'ajt nej Jesucristo xyajñidzōgaanī ajcxy m'alma. ⁸ Co īxyīpy hich, o co īxyīpy nidūg hich ndiscīpulo, o co īxyīpy tūg āngel huidibi tzajpjoty tzomb capxhuäcx īxyīpy ma miich ajcxy ayuc tīy'ajt tīgachjaty huidibi ca' ñaybadyī mīid je tīy'ajt huidibi nyaj'īxpīj c ajcxy oga'n'aty, ca' mgōbījccīxīpy yījadu'mbī ayuc huidibi ajcxy xyajñīdīgōyaangīxy xyajtūdīgōyaangīxy, Dios tzaachytunīb yī' ajcxy y'alma. ⁹ Tī jayīp nyajñīmay, e cham jadūg'oc nīgāxpetyīch, pen jī pīnjaty capxhuäcxī ma miich ajcxy tīy'ajt tīgachyjatypī, huidibi ca' ñaybadyī mīid je tīy'ajt je tībī miich ajcxy m'īxpījccīxy, copīcy Dios chaachytunīpy jada jāy mīid ypocy ycīxpi huidibi xychachyājñīdīgōoygīxp xychachyajtūdīgōoygīxp.

¹⁰ Co jadu'n nmīna'ñīch, ¿nej mdījy co ndzocyīch co jāy ajcxy xyjāygidāgīpy o co Dios xyjāygidāgīpy? ¿Nej ndzachyājot'adaanīch jāy ajcxy? Ca' huaad nduūñīch huidibi jāy ajcxy chojcpy, yī' janchtīy ndumybīch huidibi Dios chojcpy. Co īxyīpy nduūñīch huidibi jāy ajcxy yjāygidacpy, ca' īxyīpy nguūdūñīch Cristo ytīy'ajt.

Nej Pablo oy paady je apóstol'at

¹¹ Paady ndzocyīch migūgtijc co mnejhuīhuip ajcxy jada co je Dios y'ayuc ytīy'ajt huidibi ngapxyhuäcxpīch anajty ma miich ajcxy jadu'n nej jēbī ajcxy m'alma nīdzōgīpy, ca' yī' ayuc'adyī tīy'ajt'adyī huidibi jāy cī'm ti cojcxīy ti maacxcīxy. ¹² Com je Dios y'ayuc ytīy'ajt huidibi nmīdīch, ca' ti nbaadyīch ma jāy ajcxy, nañ ca' nmīnaanīm jāy ajcxy ti xyaj'īxpīcyīch. Jesucristo cī'm ti xyajhuīnjīhuīyīch jada tīy'ajt.

¹³ Com miich ajcxy mnejhuīyīgīxp jadu'n nej jecy'ajty hich ti ndzīnāyīch, co hich anajty nmījpidāgyīch yī judío jāy ajcxy ycostumbre. E mnejhuīyīgīxp

jadu'n nej jecy'ajty n'ixhuidijtyich nbahuidijtyich mictägy je jäy ajcxy nidüg'óciy huidijaty anajty mijpidaaccixp Dios ytiy'ajt. ¹⁴ Nigi ñch anajty n'ixpicyidyich ma yi judíojäy ajcxy y'ixpijcin ca'ydi jac pinjaty judíojäy, ca'ydi jac pinjaty nmigügtijcich huidibi tügnax yjimijt müd ñch. Com ooy anajty nigi ndzachmijpidägyich n'ap ndeedyich y'ayuc. ¹⁵ E Dios xyhuin'ijxich jayijpni ca'ni anajty ma'xung'atyñich co ndúnibich yi' ytung. Müd co Dios ooy ti xychocyich ti xyjihuiyich, paady xyhuooyich müd ytung ycixpi. ¹⁶ Dios xyajnejhuiyich yi y'ung y'ayuc ytiy'ajt, jigix ngapxhuäcxibich yi' y'ayuc ma yi jäy ajcxy ca'pi yjudíojäyity ajcxy. Ca' pinjaty n'ixtaayich huidibi jëbi xyaj'ixpicyich Dios ytiy'ajt, hue' Dios ci'm xyaj'ixpijcyich yi' ytiy'ajt. ¹⁷ Nañ jadu'n ni ca' nbättigiyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tüyi nnicxyich jim Arabia ñaaxjot. Co ñch jim hueeni n'ijtyich, chi nhuimbijtyich jim Damasco.

¹⁸ Cooni tugig jimijt nhuäcxijpyich huin'itni nbättigiyich jim Jerusalén. Chi n'oyich ma Pedro anajty yajpaady, e chi jim nmüd'ijtyich jëyi majmocx xi. ¹⁹ E ca' nminaybaattich yi jacjadyii apóstoles. Jëyi ñch müd naybaati je Jacobo, je Huindzin Jesús y'uch. ²⁰ Je huidibi cham ñch müch ajcxy niyajjayiygixyp, tiy'ajt yi'. Y'ijxyp ñejhuib Dios co ca' n'indägyich.

²¹ Co ndzooñich Jerusalén, chi nnicxyich Siria naaxjot etz jim Cilicia naaxjot. ²² Je huin'it tiempo yi Cristo yjäy ajcxy huidibi nayoymujcip cajp cajp jim Judea naaxjot, ca' ajcxy anajty xy'ix'adyiijich huingixy jipcixy. ²³ Jëyi ajcxy nejhuiy anajty co jäy chachminaangixy: “Yi jäy huidibi anajty xychach'ixhuidijtim xychachpahuidijtim, cham yi' tzachcapxhuäcxy je Cristo ytiy'ajt, je tiy'ajt huidibi anajty ytimyyajcödigoymyb.” ²⁴ Co je mibijcpidijc oy jadu'n tiy'ajt nejhuigyixy, chi ajcxy yajnaxxy Dioscojuyip ma Dios müd ñch ycixpi.

2

Jacjadyii Jesús y'apóstoles ajcxy cöbijccixy yi Pablo

¹ Co majmactz jimijt, chi jadüg'oc nnicxyich jim Jerusalén quipxyi müd Bernabé. Nañ jadu'n Tito xypanicxyich. ² Dios jadu'n ti xyajnejhuiyich co copicy nixibich jadüg'oc jim Jerusalén. Chi jim nyajmüdmaydacyich nijëjity jäy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuinguje ñch ajcxy nxiicmujcy ngapxmujcy, ca'ydi ymayjäy'agujcity.) Nyajmüdmaydactaayich je Dios y'ayuc ytiy'ajt huidibi ngapxhuäcxypich ma yi jäy ajcxy ca'p yjudíojäyity. Jadu'n ngapxticxyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'ñyi ñaadig'aty ñch ndung huidibi jayijp ti nduuñich etz huidibi njactunaamybich anajty. ³ Je jäy ajcxy huidibi nigohuajc'ajtp anajty je mibijcpidijc jim Jerusalén yjäygidac ajcxy ñch n'ayuc jadu'n nej ngapxticxyich, e nañ ni ca' ajcxy yminañ adzip co copicy yajtiy'ajttihuiy je Tito huidibi xypa'oyich jim, com griegojäy je' anajty, paady ca' yajtiy'ajttiy anajty. ⁴ Ca' ixypy pin huaam ycaminañ jim Jerusalén co Tito ca' yajtiy'ajttiy, co ca' nijëjity mibijcpidijc ycatigiy ayüch ameech huidibi ca' ymibijccixy cixyjot huinijot Cristo ytiy'ajt. Hue' ajcxy amido'ijtcixy n'ayucich nej huaad xyijpcogapxygyixyich. Ca' ajcxy yjotcujcity co ngapxhuäcxyich co nmibijcim Jesucristo, e ca' copicy nguy-dunim judíojäy ycostumbre. Yi' ajcxy adzip xyajnihuidzaambich yi judíojäy ycostumbre, jadu'n nej jäy codoogyi ajcxy adzip ytuungixy ma yhuindzin ytung. ⁵ Ni catügjaxigy ajcxy xycamimadacyich, e ni xycayaj'amoñ ñch ajcxy,

com hue' ndzocyich co huen Dios y'ayuc ytiy'ajt oybi ity huädz ma miich ajcxy ca' ma anii.

⁶ Yi apóstoles ajcxy huídibi Jesús ti yhuin'íjxigixy huídibi ajcxy nigo-huajc'ajtp yi mibijcpidijc, ca' ajcxy ni ti tiy'ajt xyjacmöyich jemybi huídibi ca' jayijp nnejhuíyich. (Peni capxpaady ajcxy o peni ca' ycapxpaadyity, ca' nduunich cuendi. Com Dios ca' huin'ixpety jáy ajcxy tiyduñ.) ⁷ Co oy ajcxy nejhuíy co Dios ti xyquexyich ngapxhuäcxyich yi' y'ayuc ytiy'ajt ma yi jáy ajcxy huídijaty ca' yjudíojäyity, tim jadu'n nej ti quexy Pedro co capxhuäcxi yi' y'ayuc ma yi judíojäy ajcxy, ca' ich yi' ajcxy anajty n'ayucich xyjijpcogapxiyich, ooy ajcxy jáygidacy yi' n'ayucich ndiy'ajtich. ⁸ Yi Dios huídibi Pedro quejx huen yi' y'ayuc capxhuäcxy ma yi judíojäy ajcxy, nañ jadu'n ich xyquejxich co yi' y'ayuc ngapxhuäcxiyich ma yi jáy ajcxy ca'p yjudíojäyity.

⁹ Je Jacobo, je Pedro etz Juan ajcxy, je huídi nigohuajc'ajtcixp yi mibijcpidijc, co ajcxy nejhuíy jadu'n nej anajty Dios may'ajt oy'ajt ti tuun müd ich, chi ajcxy xycöbijcyich agujc jotcujc Bernabé etz ich. E chi ich ajcxy müd nay'ayuc-huinjihuiy co jébi ich etz Bernabé nícxibich ma yi ca'p yjudíojäyity ajcxy, etz jébi yi' Jacobo, Pedro etz Juan ajcxy ñicxcixy ma yi judíojäy ajcxy. ¹⁰ Jéyi ajcxy may'ajt pijctzoy ma ich etz Bernabé co jadu'n pa'ayo'n ndunipyich ma yi judíojäy ayoobitijc. E chi ich ngo'adzoy co ndunamybich jadu'n agujc jotcujc.

Pablo ogy yi Pedro jim Antioquía

¹¹ E jadu'n anajty müd ti n'ocnay'ayuc-huinjihuiyibich ixti coon Pedro ycidacy jim Antioquía. Chi jim nnimaayich huinjijp co ti anajty jim Dios ytiy'ajt midundigooyi co puhuäctuatni je huídibi ca' yjudíojäyity, ca' y'ocmüdcaymujcni. ¹² Com co ca'ni anajty ymiñ jim Antioquía je judíojäy ajcxy huídibi anajty tzomb ma Jacobo jim Jerusalén, chi Pedro müdcaymujcni je jáy ajcxy ca'p judíojäyity. Co ajcxy ymiñ choon Jerusalén, chi Pedro oy puhuäctuatni je huídibi ca'p yjudíojäyity, ca' y'ocmüdcaymugaani anajty. Com Pedro tzigiyb anajty co ñi'ojihuiyb je judíojäy huídibi minamb co ooy ycopicyity yajtiy'ajttihuiy tüg'ócxy jáy ajcxy huídibi mibijccixp Jesucristo. ¹³ Co Pedro jadu'n oy y'idich, chi je jacjadyii judíojäy ajcxy huídi anajty jimip nañ tim jadu'n oy y'iditczixy. Oy ajcxy janejhuíy tiy'ajt, e huädz cuydungixy. Ixti Bernabé nañ jadu'n y'idich nej Pedro, com ca' anajty yjotmicity. ¹⁴ E co ich jadu'n oy n'ixyich co ca' ajcxy cuydungixy yajxon Jesucristo ytiy'ajt, chi ich nnimaayich Pedro mayjáy'agujc: “Peni miich judíojäy, e ti m'ixmajtzní judíojäy ycostumbre co ti mibicy Jesucristo, e ti m'occuydumyib je huinmañ huídibi judíojäy ca' cuydungixy, ¿nej tijy cham co adzip mdzachmínaandägy co yi' ajcxy huídibi ca'p yjudíojäyity, copicy cuydúngxixipy judíojäy ycostumbre, huídijaty müch ti m'ixmajtzní?”

Yi judíojäy ajcxy quipxyjaty müd jacpinjaty

¹⁵ Jadu'n njacnimaayich Pedro: “Ich etz müch judíojäy ich ajt, huídibi ndaj'ajtim ndeedy'ajtim nañ judíojäy. E ca' ich ajt njadu'nity nej jáy ajcxy ca'pi yjudíojäyity, huídibi ca' cuydungixy Dios ycotujcin je jecyip huídibi Moisés yjayhui'm. ¹⁶ Müch Pedro ich ajt nnejhuíyim co jáy ajcxy ca' jébi Dios yajpocyñihuächyii müd tim jéyi co ajcxy cuydungixy Dios ycotujcin je jecyip huídibi Moisés yjayhui'm. Co yi jáy ajcxy mibijccixy Jesucristo, huin'it janchtiy Dios yajpocyñihuaätzib ajcxy. Nañ tim jadu'n ich ajt, ti nmibijcim je Cristo jigix jébi Dios xyajpocyñihuaatzim. E ca' jébi huaad Dios xyajpocyñihuaatzim ajt müd tim jéyi co ti nguyduunim Dios ycotujcin je jecyip.

Ca' ni tög jäy huídijaty jëbi Dios yajpocynñhuaächyí, mïid tím jëyi co cuyduuni Dios ycötujcín je jécyíp.”

17 Co ajt nhuinmañ nbidaacím co nmibijcím Cristo jigix Dios jëbi xya-jpocyññhuaatzím, huin'it je judíojäy ymínaangixy co jibic-huinmañ nyaj-tuuním co ca' njaccuyduuním yi' ajcxy ycostumbre. ¿Nej mdiy je Cristo xya-jtundigooyím jadu'n nej judíojäy ymínaangixy? Ca' yjadu'nity. Ca' jëbi huaad je Cristo xyajtundigooyím. 18 Co ixypy nmijpidaacím jadüg'oc Dios ycötujcín je jecyíp, je huídibi ti n'ixmajtzím, jada ixypy ijxpejt'ajtp co ndundigooyím ma Cristo ytiy'ajt. 19 Jecy'ajty co nguyduunich anajty Dios ycötujcín je jecyíp, huin'it ca' anajty nbaadyich tiy'ajt nej jëbi huaad Dios xyajpocyññhuaachich, e jadu'n nipaady nej jihuíy ti n'ögyich. Paady ycixpi ti n'ixmachich je jécyíp cötujcín, e ti nmijpidägyich Jesucristo ytiy'ajt jigix jëbi njactzinäyich mïid Dios ycixpi. 20 Jadu'n nayjihuíyijich jadu'n nej jihuíy ti n'oc'ocpich, jadu'n nej jihuíy ti ngruudzpetyich quipxyi mïid Cristo. Jadachambi ca' n'octzinaayñich mïid ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma ñch njugy'ajtin. E jadu'n nej cham njactzinäyich mïid ñch nninïcx, jactzinaaybich mïid Dios y'ung ycixpi, nmijpidacypich Dios y'ung. Dios y'ung ti xychocyich ti xyjihuíyich, e ti nayyoxyii naydogyíi ma yi' o'cín mïid ñch nbocy ycixpi. 21 Ca' nniyajtígoya'ñich je may'ajtin je oy'ajtin huídibi Dios ti tuuñ mïid ñch ycixpi. Co ixypy jëbi Dios xyajpocyññhuaatzím mïid co ajt nguyduním Dios ycötujcín jëyi, huin'it ixypy ti ñaadig'aty je Cristo co y'o'cy mïid ajt nbocy ycixpi.

3

Je ycötujcín huídibi Moisés yejc o je mibijcín

1 Janch loci miich ajcxy migügtijc huídibi tzinaayb jim Gálatas naaxjot. Ti jäy ajcxy xyajhuinmañyidigooygixy mïid jibic-huinmañ. Paady ycixp mdzach'ixmadzaangixy je Dios ytiy'ajt. ñch oy njacapxhuächxyich ma miich ajcxy mhuinduu je tiy'ajt jadu'n nej Cristo yajcruudzpejtí mïid ñch ajt nbocy ycixpi. 2 Yi' nyaj'amidooyb: ¿Nej ti mbaatcixy Dios yjihuíñ ymic'ajt mïid co mdzachcuyduuni Dios ycötujcín je jecyíp? o ¿Nej ti mbaatcixy Dios yjihuíñ ymic'ajt mïid co ti mmidoogixy Jesucristo y'ayuc e ti mmibijccixy? Hue' janchtiy ti mbaatcixy Dios yjihuíñ ymic'ajt co ti mmibijccixy Jesucristo, ca' nmínaanim co ti mguydungixy Dios ycötujcín je jecyíp. 3 Co Dios oga'n yjihuíñ xy'adigíygixy xyjottigíygixy, chi mguychínaaygixy Jesucristo ytiy'ajt nej Dios yjihuíñ xyhuinmañmooygixy. ¿Nej co cham miich ajcxy mloci huinmañ mdzachtungixy? Jadachambi jadüg'oc mdzachtunaangixy mgi'mhuinmañ. 4 ¿Nej naadigíixpi miich ajcxy tzaachypi ti mmínajxcixy ti myajnajxcixy mïid Cristo ytiy'ajt ycixpi? Janch naadigí' jadu'n tzaachypi ti mmínajxcixy ti myajnajxcixy, pen janch tüccíyi ti m'ixmájtzcixni Cristo ytiy'ajt. 5 Jada nyaj'amidoogixyp: ¿Nej ti Dios yjihuíñ ymic'ajt xy'adigíygixy xyjottigíygixy etz tuñ mijhuinmañ ma miich ajcxy mïid co ti mguydungixy Dios ycötujcín je jecyíp? Ca' yjadu'nity. Hue' Dios xy'adigíygixy xyjottigíygixy etz tuñ mijhuinmañ mïid miich ajcxy mïid co ti mmidoogixy Jesucristo ytiy'ajt etz ti mmibijccixy.

6 Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihuíy Dios yhuinmecxi ypocy, jigix jëbi y'ity tudägy ma Dios yhuinduu. 7 Jadu'n yjajty mïid Abraham. Je' ymibijc Dios, e yajpocyññhuaatzi Dios, jëbi ñaydiyíi tudägy jäy ma Dios yhuinduu. 8 Dios jecy'ajty yajnihuinmayíy co yajpocyññhuaadza'ñ je jäy ajcxy huídibi ca' yjudíojäyity, jëbi ajcxy ñaydiyíi tudägy jäy ma Dios yhuinduu, mïid co ajcxy

mijpidägy je may'ajt huidibi Dios ytunamyb müid yi' ajcxy ycixpi. Paady ycixpi jaaybety ymiñ ma Dios ñecy co jadu'n Dios müidmiydac Abraham jecy'ajty co yi huidibi ca' yjudíojäyity ypaadipy ajcxy y'alma nüdzoocin, com jadu'n Dios yminañ: "Müid müich tüg m'ap m'oc may'ajt oy'ajt nduna'ñich müid naaxhuiñjyä ajcxy ycixpi." ⁹ Paady ycixpi jadu'n nej jäy ajcxy tüg'óciy pinjaty mibijcp Dios, Dios may'ajt tunamb müid yi' ajcxy ycixpi co mibijccixy, tim jadu'n nej may'ajt tuun müid Abraham.

¹⁰ Dios chaachytunamy jäy ajcxy müid ypocy ycixpi, pinjaty huinmañ tzachpidacp co y'alma nüdzoocin padaangixy müid co cuydungixy Dios ycötujcin je jecyip. Com jadu'n jaybety ymiñ ma Dios ñecy: "Dios chaachytunamyb jäy ajcxy müid ypocy ycixpi, pinjaty ca' mijpidägy tüg'óciy Dios ycötujcin, etz nañ jadu'n pinjaty ca' cuydundäy jada cötujcin." ¹¹ Jadachambi müid je ayuc huidibi ti nyajnijayiygixy ma jada necy, jëbi müich ajcxy mnejhuñhuip co ca' ni pin jäy jëbi Dios yajpocyñihuächyü müid huidijaty ti tungixy co cuydungixy Dios ycötujcin je jecyip. Com jadu'n ymiñ jaybety ma Dios ñecy ma Dios jadu'n yminañ: "Yi jäy ajcxy pinjaty mibigip ich n'ayuc, yi' ajcxy nyajpocyñihuádzaamybich jëbi ajcxy y'alma paadip nüdzoocin." ¹² Dios ca' jadu'n yminañ ma yi' ycötujcin huidibi Moisés yjayhui'm co jëbi nmijpidaacim, e huin'it Dios xyajpocyñihuaatzim. Hue' je' yminañ ma ycötujcin co jëbi xychaachytuunim müid ajt nbocy ycixpi. Com jadu'n ymiñ jaybety ma Dios ñecy: "Yi jäy ajcxy pinjaty cuydumb Dios ycötujcin huidibi Moisés ycojay, copicy cuydundähuip, ni ma ycatundigoyipy."

¹³ Cristo xyñihuaanim xyyajtzoocim ma anajty Dios xychaachytunaanim müid co ca' nguydundaayim Dios ycötujcin je jecyip. Cristo ci'm ti yajnicxy je tzaachypi huidibi Dios ajt xymöhuaanim anajty. Com jadu'n jaybety ymiñ ma Dios ñecy: "Pinjaty anajty yajmijxotzpejtp ma tüg cruudz, hue' anajty je' yco'ayooyb ypocy tiibi tuñ." ¹⁴ Cristo o'c je' müid ich ajt nbocy ycixpi, jigix Dios jëbi cuyduñ yi' y'ayuc jadu'n nej yaj'ahuanüy Abraham jecy'ajty, co may'ajt tuna'ñ müid yi' jäy ajcxy ycixpi huidibi ca'p yjudíojäyity, etz nañ jadu'n may'ajt tuna'ñ müid ich ajt ycixpi, jigix jëbi ich ajt nbaatim je Dios yjihui'ñ co nmibijcim je Cristo.

Je cötujcin huidibi Moisés yejc etz huidibi Dios y'ahuanüy

¹⁵ Migügtijc ajcxy, ngapxticxaamybich jadu'n nej Dios ti tuñ müid tüg iixpejt nej jäy ajcxy ytuñ. Co ixypy tüg jäy necy yajcojy ma nigapxy jadu'n nej ypidägy yajhui'mañ, e co yajcojtäy je necy, e chi firmijiy, e nañ jadu'n je testigo ajcxy yfirmijiy, huin'it ca' huaad pinjaty nixigy yajxigy jada tiy'ajt, e nañ jadu'n ni ca' huaad yaj'ungiy. ¹⁶ Cuenditungixy Dios y'ayuc ytiy'ajt, Dios ma yi' y'ayuc yaj'ahuanüy Abraham etz tüg yi' y'ap y'oc co may'ajt tuna'ñ müid yi' ajcxy jëyi. Ca' nminaanim Dios y'ayuc yminañ co Dios yaj'ahuanüy Abraham co may'ajt tuna'ñ müid tüg'óciy yi' y'ap y'oc. Hue' je'Dios y'ayuc yminañ co may'ajt tuna'ñ müid tüg'pajc yi' y'ap y'oc, je' je' je Cristo. ¹⁷ Dios ca' yi' nixigy yajxigy ytiy'ajt huidibi jayijp ymoy Abraham co yajniguejxy ycötujcin yi' Moisés. Co Abraham y'o'cy, ti anajty ñajtninicxyñi midaax migo'px ja'üpxmajc jimijt, chiini oy Dios möy Moisés yi' ycötujcin. Tim jadu'n nej ca' huaad yajtigach je jäy ñecy ma nigapxy jadu'n nej ypidägy yajhui'mañ, nañ tim jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'ñ müid naaxhuiñjyä ajcxy ycixpi. ¹⁸ Dios y'ahuanüy yi' ytiy'ajt ma Abraham jecy'ajty co may'ajt tuna'ñ müid yi' y'ap y'oc ycixpi etz müid tüg'óciy naaxhuiñjyä ajcxy ycixpi. Co ixypy jëbi jäy padaangixy y'alma nüdzoocin müid huidibi ajcxy ytumyb co ajcxy cuyduuni Dios ycötujcin

je jecyip, ca' ixypy may'ajt ti tuñ co ti quexy je Cristo ya naaxhuiñ co jäy yajñihuádzip.

¹⁹ ¿Ti ycxipi Dios co moy Moisés je cötujcin huidibi ycojaj? Hue' je' Dios moy jada cötujcin jigix jëbi niguëxigy co jäy ajcxy ca' ycapxymidoogixy. Tunamb anajty Dios ycötujcin huidibi Moisés ycojaj mabaad ti quexy ya naaxhuiñ yi' y'ung, je' je' je Cristo, je Abraham y'ap y'oc huidibi yajpocyñihuätzp jäy ajcxy. Dios ycötujcin hue je' yajnigüeix Moisés miid ángeles ajcxy. E chi Moisés capxnajxy ma ymígügtijc ajcxy. ²⁰ Co Dios ti quexy yi' oybi y'ayuc ya naaxhuiñ miid y'ung, paady ycxipi Dios ca' tzocy co huíngbi capxnaxipy yi' y'ayuc. Dios etz Dios y'ung tú'ciy yi'.

Tigixpi Dios je Moisés cötujcin yejc

²¹ ¿Nej mdijy ca' ñaybadyii yi' Dios ycötujcin huidibi Moisés ycojaj, miid je ayuc huidibi Dios yajnimay Abraham? Naybaatip ajcxy y'ayuc. Co ixypy cayejcy Dios cötujcin ma jëbi jäy ajcxy y'alma ñidzoocin padaangixy, huin'it ixypy jëbi nbocyñihuaatzim co ixypy nguyduunim yajxon jada cötujcin. ²² Ca' yjanchity co jëbi Dios xyajpocyñihuaatzim miid co tijaty nduunim. Com ma Dios y'ayuc ymiñ cojay co nidüg'óciy jäy ajcxy ti ytundigooy, ac pocy ymiid ajcxy. Jadu'n Dios y'ayuc yminañ, jigix jëbi Dios yajpocyñihuäch tüg'óciy pinjaty mijpidacp Jesucristo, jadu'n nej yajnimay Abraham jecy'ajty co jadu'n tunañ.

²³ Ca'ni anajty Cristo ymiñ ya naaxhuiñ, huin'it anajty Dios ycötujcin ytuñ, yajpocycäy jäy ajcxy, e ca' Dios yajcomidooy jäy ajcxy ypocy. Jadu'n nej jihuüy jäy ixypy ypujxtijc'iñaaygixy e ahuijxcixy mina je juez ytiydunáanigixy. Jadu'n anajty n'ijtim jadu'n nej jihuüy nbujxtijc'iñaayim, ixti cooni Jesucristo ymiñ ya naaxhuiñ yajpocyñihuaatzp. ²⁴ Jadu'n anajty Dios cuend'aty yi' judíojäy anajty miid ycötujcin huidibi Moisés ycojaj. Tim jadu'n nej jäy cuend'aty huíngjäy y'ung. Jadu'n anajty Dios cuend'aty judío jäy ajcxy ixti cooni Jesucristo ymiñ ya naaxhuiñ jëbi yajpocyñihuäch jäy ajcxy. ²⁵ Jadachambi co Jesucristo ti y'oy ya naaxhuiñ, e ti nmibijcim (tzojcingix) yi' ytiy'ajt, paady ycxipi cham ca' n'oc'ijtim cuend'aty miid Dios ycötujcin huidibi Moisés ycojaj.

²⁶ Com miich ajcxy ti mmijpidaaccixy Jesucristo ytiy'ajt, paady ycxip jëbi nidüg'óciy miich ajcxy naydíjigixy Dios y'ung. ²⁷ Tüg'óciy miich ajcxy huidijaty ti mnibejtcixy, ti mnibejtcixy jigix jëbi mdügmujccixy miid Cristo, jadachambi niducy m'ijtcixy miid Cristo. ²⁸ Nidüg'óciy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíojäy etz nañ jadu'n ca'pi yjudíojäyity, nañ jadu'n miich ajcxy midumbidijc etz miich ajcxy huidibi ci'm nay'ane'mip, miich ajcxy yëydijctijc etz miich ajcxy töxyjäydijc; tú'ciy miich ajcxy myajpattaaygixy ma mHuindzin Jesucristo. ²⁹ Huenpinity miich ajcxy co mmijpidaaccixy Jesucristo, huin'it jëbi ajcxy mnaydijiyb Abraham y'ap y'oc, e huin'it jëbi mbáatcixipy tzinaydac jiiyby tzajpjoty, je huidibi Dios yaj'ahuanüy Abraham, Abraham y'ung y'anäg etz Abraham y'ap y'oc.

4

¹⁻² Cha jadüg iixpejt nyajnimäyich miich ajcxy huidibi capxticxp Dios ytiy'ajt. Tüg comeeñjyäy ymang hue' anajty mutzni pi'cni je' anajty jëdaanip yteedy ypidägy. E chi yteedy tüg jäy yajñibicy huidibi jëbi cuend'aty je pidägy etz je pi'c'anäg mabaad paady je tiempo mina ycidigihuiigy je pidägy. Je comeeñjyäy y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jäy huidibi midumb. ³ Tim jadu'n nej je comeeñjyäy

y'ung anajty y'ity ane'my, nañ tim jadu'n ñich yi judíoñäy ajcxy ane'my anajty n'íjtcixyich co anajty ca' tiydudägy naydijñygixyich Dios y'ung. ⁴⁻⁵ Co oy Dios yajhuaad'ajtni, chi oy quejxni y'ung ya naaxhuiñ. Yi' y'ung ma'xung'ajt judíoñäy, jigix jëbi codinäy jäy ajcxy ma Dios ycötujctac. Nañ jadu'n yi' ma'xung'ajt judíoñäy jigix jëbi yajpocyñihuäch yi jäy ajcxy huidibi ti yajpocycähuiçixy Dios ycötujcin huidibi Moisés ycojaj. Dios ti quexy y'ung jigix jëbi xycodinaayim mïd ajt nbocy ycixpi, e jadu'n Dios jëbi xycöbïjci jadu'n nej jihuiy xyci'm'ung'ajtim.

⁶ Jadachambi mïd co naydijim Dios y'ung, paady ycixp Dios ti xy'adigñyim ti xyjottigñyim yi' yjihuiñ ymic'ajt, paady ycixp ajt mïnaanim co Dios ajt nDeedy'ajtim etz nminaanim: “¡Padre Nuestro!” ⁷ Mïd co miich ajcxy ti mmibïjccixy Jesucristo, jadachambi ca' ane'my m'oc'íjtcixyñi ma Dios ycötujcin je jecyip, jadu'n nej je jäy ytumbidiç mïdity ane'my. Paady ycixp jëbi Dios xymóoygixipy jugy'ajtin huidibi ca' ycixipy ytigoyipy, jadu'n nej Dios mïdity jugy'ajtin. Jadachambi miich ajcxy Dios xy'ung'ajt, etz jëbi mbáatcixipy pidägy ma Dios.

Pablo yjotmaybaady mïd je mibïjcpidïç ycixpi

⁸ Jecy'ajty ca' anajty mnejhuñygixy Dios ytiy'ajt tiydudägy, ooy anajty m'ojadajtcixy oyñiti huidibi ca' ymic'ajt mïdity. E ca' anajty m'ojadajtcixy je Dios tzajpjotyp huidibi mic'ajt mïdity. ⁹ Jadachambi ti mnejhuñygixy Dios ytiy'ajt etz Dios ti xycöbïjccixy. ¿Nej co jadüg'oc mdzachnihuimbidaangixy yi judíoñäy ycötujcin, ca'p ti mic'ajt mïdity, huidibi ti m'ijxmajtzcixy? E jadüg'oc xy'ane'myçixy je judíoñäy ycötujcin. ¹⁰ Jadachambi mdzachcuydunaangixy judíoñäy ycostumbre, jadu'n nej ajcxy myajmïj'ajtcixy xïbo' xïjimïjt. ¹¹ Huinmaaybich ooy mïd miich ajcxy ycixpi co naadigï ti nyaj'ixpicyich miich ajcxy. Ninigoob ayoohuañ ñich ndung ma miich ajcxy.

¹² Migügtïç ajcxy, cham may'ajt nbïjctzooyich ma miich ajcxy. Yajtügñygix yi mhuinmañ jadu'n nej ñich nhuinmañ. ñich ti nyajtügñyich nhuinmañ mïd miich ajcxy mhuinmañ co ti n'ixmachich yi judíoñäy ycostumbre. Je taab anajty n'ityich mïd miich ajcxy, ca' miich anajty ajcxy ñich n'ayuc xyjïpcogapxñy. ¹³ Miich ajcxy mnejhuñyb co anajty n'ityich ma miich ajcxy, pumäy ñich anajty nyajpaady mïd yuu pa'm ycixpi, paady ycixp ñich jim jecy nhuächïjpyich, ngapxhuächyich Jesucristo ytiy'ajt je jayïjp'aty. ¹⁴ Mïd ñich nba'm ycixpi ooy n'adzïjpy miich ajcxy ma mjïn mdïç, e miich ajcxy ca' ti xy'ixtijy e ni ca' miich ajcxy xymïdzïjpic. Jadu'n ñich miich ajcxy xycöbïjcy agujc jotcujc, tim jadu'n nej ixypy ti mgöbïjccixy Jesucristo ci'm. ¹⁵ Jadachambi çti ti ytunyii ti yjadyii co ca' mmïjotcujc'ajtcixy ñich n'ayuc? Com nyejçich tiy'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgï'm huin anajty ajcxy mjayajpidzïmaangixyp etz xymöhuaangixyich anajty co ñich ngaa'a'ixiy. ¹⁶ ¿Nej ñich ti n'ahuimbityich miich ajcxy mmïdzïp mïd co ti nyajni maaygixy huidibi janchip?

¹⁷ Yi huindzïndïç jim ma miich ajcxy huidibi xychachyaj'ixpïjccixp huidibi ca' ytiy'ajtity, ca' ajcxy oyhuinmañ mïdity. Hue' ajcxy tzachtzocy co miich ajcxy m'ixmájtzcixip ñich n'ayuc ndiy'ajt. Hue' ajcxy tzachtzocy co miich ajcxy yi' mgömayipy. ¹⁸ ñich njajotcujcïch jadu'n co huingbi huindzin ajcxy jëbi xyaj'ixpïjccixy. Niçooobi co ixypy jëbi ajcxy m'oy'ajtin mbaatcixy. Ca' oy copicyity co ñich ci'm miich ajcxy nmïd'ijttïhuipy. ¹⁹ Migügtïç huidibi ooy ndzocy njihuiyich jadu'n nej jihuiy ngi'm'ung'ájtigixy, ooy tzaachypï ndzachjihuiyich mïd miich ajcxy ycixpi jadüg'oc. Jadu'n

tzaachypí njihuíyich jadu'n nej ungda j tzaachypí jihuíy co y'ung ya-jma'xung'ada'ñ. Njihuíhuaamybich tzaachypí ixti cooni miich ajcxy anajty Cristo mhuinma'ñ xyaj'oyíyí. ²⁰ Ooy íich njanay'ijxpada'ñyí ma miich ajcxy cham cham. Njamíidcapxaangíxy njamíidmíydāgaangíxy, chí íxyipy tíy'ajt njacyajnímaaygíxy jac huädz. Ooy íich ndajy nmayích míid miich ajcxy ycíxpi, nej n'ocjacnímaaygíxyípy.

Je Agar etz Sara y'ijxpejt

²¹ Miich ajcxy huídibí mdzachcuydunamyb Dios ycötujcín je jecyí. Nmímaaygíxy ajcxy, ¿nej ca'ni ajcxy mídoogíxy huídibí Dios ycötujcín nigapxypí? ²² Com Dios y'ayuc huídibí jaybetyí jadu'n ymína'ñ co Abraham ymíid anajty metz ymang. Tüg je'anajty ytaj'ajtí huídibí ypödumb'ajtpy. Je jadügpi ymang anajty ytaj'ajtí huídibí ytimytöxíjc'ajtpy. ²³ Je huídibí je pödumbí y'ung'ajti, hue' je' ypi'c'ajty jadu'n nej pi'ctíjc jadyí yma'xung'ajtcíxy. Je huídibí Abraham ytöxyíjc y'ung'ajti Dios je' míid ymic'ajt ypi'c'ajty, Dios ycuyduun y'ayuc huídibí yajhuinhuaníy Abraham. ²⁴ Jada jihuimbit ayuc jadu'n yhuimbidzímby: jada Abraham ytöxyjāy ajcxy metz íjxpejt'ajtp jadu'n nej Dios tí ytuñ míid yí' yjāy. Je ypödumbí huídí anajty yxíí Agar, yí' míid yquipxíy yí Dios ycötujcín huídibí Dios ymoy Moisés ma je cop huídí yxíí Sinaí. E tüg'óciy jāy ajcxy huídibí cuyduungíxp Dios ycötujcín huídibí Moisés ycojay, ane'my ajcxy je' yaj'idyí, tím jadu'n nej tüg comeeñjāy ane'my yaj'ity yí' ytumbí ajcxy. ²⁵ Agar yí' nīgíx'ajtp je cop Sinaí jím Arabia ñaaxjot ma Dios moy Moisés je cötujcín. Agar je töxyjāy huídibí anajty pödumb, je' míid yquipxíy yí judíojāy huídibí tzachcuyduungíxp Moisés ycötujcín, etz nañ yquipxíy míid Dios y'ít ya naaxhuiñ jím Jerusalén. Yí judíojāy etz y'ung y'anāg ajcxy huídibí tzach cuyduungíxy Moisés ycötujcín je jecyí, ane'my ajcxy y'ity ma jada cötujcín, tím jadu'n nej jāy ajcxy huídibí tumb ma comeeñjāy, e y'ane'my ajcxy y'íjtcíxy. ²⁶ Je Sara huídibí Abraham ytöxyíjc'ajtpy, yí' míid yquipxíy íich ajt huídibí cuydumb je Cristo ytíy'ajt, e je Cristo yí' yajpatp tzajpjoty. ²⁷ Com jaybetyíty ymíñ ma Dios ñecy co mayjāy paada'ñ oybí ma Dios, com Dios jadu'n ymína'ñ:

Jotcugí' jadüg'oc miich Sara huídibí ca' y'ungbaady. Xíc yāx miich míid jotcujc'ajtín, miich huídibí ca' ungmoy. Nīgí ymayíhua'ñ miich m'ap m'oc ca'ydi Hagar y'ap y'oc.

²⁸ Íich ajt huídibí nmíjpidaacím Jesucristo tügíyím míid Abraham ymang Isaac. Com jadu'n nej Dios cuyduuñ y'ayuc huídibí yajhuinhuaníy Abraham co Isaac yma'xung'ajty, nañ tím jadu'n Dios cuyduuñ yí' y'ayuc míid íich ajt co je Cristo y'oy ya naaxhuiñ. ²⁹ Tím jadu'n nej Abraham ymang Ismael jecy'ajty mízip'ajty Abraham ymang huídibí Dios yajhuinhuaníyí Abraham; nañ tím jadu'n yí jāy ajcxy huídibí tzachcuydungíxp Dios ycötujcín je jecyí, ooy ajcxy tzach mízip'adyí yí jāy ajcxy huídibí míbíjcp Jesucristo. ³⁰ Oc-huinmay miich ajcxy nej jaybetyíty ymíñ ma Dios ñecy co jadu'n Dios nímay Abraham: Yajpidzím ma mdíjc je mbödumbí míid ymang. Com ca' jadu'n ytíy'ajtíty co je pödumbí ymang paadípy miich mbídāgy. Yí' je' padamb je mbídāgy huídibí miich mdöxyíjc ymang'ajtpy.

³¹ Mígügtíjc ajcxy, ca' íich ajt n'ocjadu'niñ nej je pödumbí y'ung y'anāg ajcxy huídí ane'my íjtp. Jadu'n íich ajt nipaady nej Abraham ytöxyíjc y'ung y'anāg huídibí ca' y'ane'my y'ity.

5

Cristo tí xyajníhuaatzím ma je cötujcín huídibí Moisés yejc

1 Je Cristo ti xyajpidzimim ma Dios ycötujcin je jecyip ma anajty n'ijtm y'ane'my, jigix jëbi tzojcingix nguyduunim yi' ytiy'ajt. Mibijccixy tiydudägy Cristo ytiy'ajt, ca' m'ixmajtcixy. Ca' mni'ahuimbijtcixipy jadüg'oc Dios ycötujcin je jecyip ma anajty m'ijtcixy tim jadu'n nej comeeñjyay ytumbi ajcxy y'ijtcixy ane'my.

2-3 Amidoo'ijtcix ich n'ayuc. Jadachambi ich Pablo minaambich pen miich ajcxy mgöbigamyb jada ayuc co copicy myajtiy'ajtihiipy, huiñ'it ñaadig'i'adañ co mmibijccixy Jesucristo ytiy'ajt. Ca' Jesucristo may'ajt tunañ miid miich ajcxy pen jadu'n m'ididza'ñ. Jadüg'oc nmina'ñich co pinjaty jadu'n ycuydunamyb tüg Dios ycötujcin, copicy ycuydundähiipy tüg'óciy. 4 Pen mjipp'ijxyp ajcxy co Dios xyajpocyñihuátzaangixy miid co mguyduungixy tüg Dios ycötujcin, jadu'n nipaady nej jihuüy ti m'ixmájtzcixni Cristo y'ayuc ytiy'ajt. Pen ca' mmijpidaaccixy je may'ajt oy'ajt huiñibi Cristo ti tuñ ninigoob miid miich ajcxy ycixpi, huiñ'it ca' Dios xyajpocyñihuátzcixipy. 5 Njipp'ijxim co Dios xyajpocyñihuádzaanim jigix jëbi naydijim tudägy ma Dios yhuinduu miid co nmibijcim Cristo etz miid co je Espíritu Santo xypubejtim. 6 Co nmibijcim ajt Jesucristo, Jesucristo ca' cuendituñ pen ti nyajtiy'ajttiyim o pen ca'. Jëyi yi' tzocy co naychojcin nayjihuiyim nidüg nidüg, e jada je' je ijxpejt co nmibijcim yi' ytiy'ajt.

7 Jayjip'aty oy yajxon anajty m'occuydungixp Jesucristo ytiy'ajt. ¿Pin ti xy'agapxiygixy co ca' mgapxymidohuaangixy tiy'ajt? 8 Yi jäy ajcxy huiñibi ti xy'agapxiygixy ca' ajcxy tiy'ajt patcixy ma je Dios huiñibi ti xyhuin'ijxim jigix jëbi nmibijcim Cristo. 9 Miich ajcxy mnejhuuyb co jäy pidaaccixy levadura ma harina jich je levadura yajtiyiydaayb je jich. Nañ tim jadu'n jada anii huiñibi jäy ajcxy ti pidaaccixy ma miich ajcxy yajtiyidähuamyb miich ajcxy mjot mhuinma'ñ. 10 Com ich nmibijcpich co ajt je nHuindzin Jesucristo oyhuinma'ñ xymöhiipy ajcxy, paady ycixp njipp'ijxypich co miich ajcxy mmibigaamyb ich ngapxy ich n'ayuc. Dios chaachytunipy je jäy ajcxy huiñibi ti xyajhuinma'ñyidigooygixy. Oy ooy yjamij yjajanchity ajcxy, ca' ytimyñejity, Dios yi' ajcxy tzaachytunib.

11 Migügtjic ajcxy, co ixypy yjanchity co ich ngapxhuäcxyich co copicy nidüg'óciy jäy yajtiy'ajtihiipy, ¿nej co je'ni chambaad judiojäy xychach'ixhuidityich xychachpahuidityich? Pen ca' ixypy xy'ixhuidityich xypahuidityich jadu'n nipaady nej jihuüy nyaj'ixpicyich co je Cristo ca' y'o'cy miid ich ajt nbocy ycixpi. 12 Yi' huiñi ajcxy xyajhuinma'ñyidigooygixyp, ooy ixypy y'oyity co ixypy ajcxy xypuhuäctuatni tücciyi.

13 Dios miich ajcxy ti xymijhuoogixy ma yi' ytiy'ajt jemybi jigix jëbi m'ixmájtzcixni je Dios ycötujcin je jecyip, etz tzojcingix mijpidägy Cristo ytiy'ajt. Dios ti ajcxy mdü'aa xy'ahuaatzi, per ca' huaad mduungixy je jibicpi huiñibi mjot mhuinma'ñ chachñijot'ajtcixpy. Hue' a'oy naymi'oyjäy'ajtigix nidüg nidüg, naybubéjtigix miñ xyipy. 14 Dios y'ayuc ymína'ñ: "Mi'oyjäy'adipy mmijin mmidijc, tim jadu'n nej miich ajcxy mdzocy co mmijin mmidijc xymi'oyjäy'adipy." Co jadu'n ajcxy mnaymi'oyjäy'adiyb miñ yxipy, ytimyñipaty jadu'n nej jihuüy ti mguydundäy tüg'óciy je Dios ycötujcin. 15 Pen miich ajcxy mnaymidundigooyip etz mnaymijotma'tip miñ xyipy, ca' yjetyity co ci'm anajty jadu'n mdzachnayyajhuinma'ñyidigooyigixy miñ xyipy.

Je jugy'ajt huiñibi yi' Espíritu Santo yejcpy

¹⁶ Jada capxhuijin ñich miich ajcxy nyajnijayñyb. Cuychinaaygix je Dios ytiy'ajt jadu'n nej je Espíritu Santo xyhuinma'ñymooygixy ajcxy. Ca' mguyduungixy je jibic-huinma'ñ huidibi mdzachnijot'ajtcixyp ci'm. ¹⁷ Je jibic-huinma'ñ huidibi mdzachnijot'ajtcixyp, hue'ymidzip'ajtpy je oybi huinma'ñ huidibi je Espíritu Santo xymooygixp. Dios y'ayuc obyí ca' ñaygodigiyii miid miich ajcxy mjibic-huinma'ñ. Paady ycixp miich ajcxy ooy mjacuydunaangixy Dios y'ayuc, e ca' ajcxy mmimadäga'ñ ñicxy mguydundaaygixy. ¹⁸ Pen tzojcingix mguyduungixy je Cristo ytiy'ajt huidibi Dios yjihui'ñ xymooyb ajcxy, huin'it ca' copicy mguydúngxixy Dios ycötujcin je jecyip.

¹⁹ Com nnejhuñydaayim jadu'n nej jäy ajcxy yjot yhuinma'ñ tzachnijot'ajtcixy jibicpi. Jadu'n nej yeydijctijc tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yeydijctijc tzachmiid'ügangixy etz miid'edzaangixy etz ma yjiibi ji ajcxy yhuinma'ñyigooygixy. ²⁰ E nañ nnejhuñyim jadu'n nej jäy ajcxy tzach'ojadajtcixy tzachhuingoxtinaaygixy je huidibi jäy ajcxy ci'm ti yajcojy, etz nej jäy ajcxy tzach'ojadajtcixy tzachyajtunaangixy caxpojcpidijc, nej jäy ajcxy ymigüg tzachmijotma'tcixy; nej jäy ajcxy ca' tzip yjot'ambijccixy miid yinjaty huenjaty ayuc; nej jäy ajcxy tzachmidzip'ajtcixy ymigügtijc; nej jäy ajcxy tzachyajca'oy'ijxcixy ymigüg co tijaty miidity; nej jäy ajcxy chachnaybijc-huäcxáanigixy, huidibi abicy tzachmiid'adamb yjäy. ²¹ E nañ nnejhuñyim jadu'n nej jäy ajcxy abijctigihuaangixy tijaty ymigüg ymiid; nej jäy ajcxy ymigüg yaj'o'ccixy; nej jäy ajcxy nijot'ajtcixy ügñ etz adzuuhuididñ agoodzhuididñ, etz yi jäy ajcxy huidibi tzachnijot'ajtcixp yi jadu'mbi huinma'ñ. ñich miich ajcxy cham njacyajniimaaygixy jadu'n nej ñich jayijp'aty ti n'ocnigapxpich, co yi jäy ajcxy huidibi yi jadu'mbi jibic-huinma'ñ chachnijot'ajtcixp jadu'n nej cham ti nijayñygixy, ca' ajcxy tzinaaydac paadaangixy ma Dios y'ane'my.

²² Hue' ajt jadachambi nejhuñydaayim je oybi huinma'ñ huidibi Espíritu Santo yejcy. Co yi jäy ajcxy huidibi ymiid Dios yjihui'ñ ymic'ajt ma yjot yhuinma'ñ, hue' ytungixyp ajcxy yi oyjäy'ajtin miid ymigügtijc; miid ajcxy xondaacin etz miid ajcxy jotcuyc'ajtin; etz ymimexctujcixyp ymigügtijc; etz chojccixyp yjihuiñygixyp ymigügtijc; etz ytungixp oybi; etz tudägy yjäy'ajtcixyp, ²³ nicy xeemy yjäy'ajtcixy ma ymigügtijc; etz ci'm yajxon ñay'ané'migixy ma yi oybi. Ca' ji huingbi cötujcin huidibi jada oybi huinma'ñ jipcogapxñhuipy. ²⁴ Tüg'óciy jäy ajcxy pinjaty Jesucristo Huindzin'ajtp, mímadacpy ajcxy yi jibic-huinma'ñ huidibi ci'm nijot'ajtcixyp miid Cristo ymic'ajt. ²⁵ Miid co nmíid'ajtim je Espíritu Santo ymic'ajt ma ajt ndzinaayin njugy'ajtin, paady ycixp tzoc tzinaayim jadu'n nej xy'ane'mim xyhuinma'ñymooyim je Espíritu Santo.

²⁶ Ca' huaad amij agix ndzachnayjihuiñyim, etz nañ jadu'n ca' huaad nmigügtijc nyajjotma'tim; etz ca' huaad ni ti nyajca'oy'ijxim.

6

Naybubéjtigixy miñ xyipy

¹ Migügtijc ajcxy, pen mbatpy tüg migüg huidibi jibic-huinma'ñ ti ymimadägyii, miich ajcxy huidibi mímadacyp yi jibic-huinma'ñ miid Dios ymic'ajt mbubéjtcixipy jada migüg, e co mbubéjtcixipy jada migüg, ñigi jotmic mmigapx miid oy gapxy oy ayuc. Naygüend'adiñ ajcxy ci'm, ca'ydi jibic-huinma'ñ xymimadaaccixy. ² Naybubéjtigix nidüg nidüg pinjaty ayo'n jotmay miid. Co jadu'n mdúngxixy, hue' anajty ajcxy mguydungixyp Cristo ycötujcin huidibi ti xymooyim ajt.

³ Pen ji pín ñayjihuiyíi amij agix etz chach naygömaya'ñyíi cí'm co chach y'oyjäyity, ca' je' choobaady ma Dios yhuinduu. ⁴ Jëbi nidüg nidüg jäy ñayjihui'ñybigyíi nej chinäy yjugy'aty, pen oy o peni ca'yoyity. Peni ycuychinaayb yajxon Dios ytiy'ajt oybi, jotcuje ñayjihuihuíyb je' cí'm e ca' huaad yajquipxíy chinaayín mïid huingbi. ⁵ Nidüg nidüg jäy cí'm chinaayín jëbi yajnicxy nej Dios jäygidägy. Ca' huaad ni'ijxtüdy nej ymígüg jibic-huinma'ñ mïidity.

⁶ Yi jäy ajcxy pínjaty ti ixpicy Dios y'ayuc ytiy'ajt, copicy co möhuipy tijaty yajmayjajtpy je huindzín tiibi yaj'ixpigyíi.

⁷ Ix ajcxy cí'm mnayhuin'ñngix com Dios ca' yí' ni pín huaad nixígy yajxígy. Com pen miich ajcxy jibic-huinma'ñ mdumyb, Dios xychaachytunip ajcxy. Pínjaty oybi tuumb, nañ ypaadipy oybi, e pínjaty jibicpi tumb, nañ jibicpi ypaadipy. ⁸ Pínjaty jibic huinma'ñ tum jadu'n nej jibicpi tzachnijot'aty, co y'ögipy yí' y'alma ñicxip ayoodactuuby. Pínjaty cuydumb Dios ytiy'ajt jadu'n nej je Espíritu Santo huinma'ñ ymöyíi, co y'ögipy yí' y'alma huingbi jugy'ajtin ypaadamyb huídibi nimína ycaacixy ycaatigooy huídibi je Espíritu Santo möhuíib. ⁹ Peni nduunim jabom jabom oy huinma'ñ ca' huaad ndzippim, jëbi nmecxtujcim ixti cooni anajty nbaatim oybi ma Dios. E ca' huaad njotmetzcíyím. ¹⁰ Tzoc oyjäy'ajtin tuunim ma nidüg'óciy jäy ajcxy, jadu'n nej Dios xyhuinma'ñymooyím. Nígí tzoc pubejtím nmígügtíjc huídibi mibijcp mïjpidacp Cristo.

Ane'mín, capxhuijin etz capxpooocxín huídibi cijxnip je necy

¹¹ Ijxcix huindicxcix jada letra mïjajtypi huídibi ñch cí'm njaayb, com ndzocpyich co mnejhuíyigixipy nej yam nijayíyigixy. ¹² Yi jäy ajcxy huídibi mibijcp co Cristo o'cy ma yí' cruudz mïid ajt nbocy ycixpi etz nañ jadu'n mïjpidacp yí' tiy'ajttíhuíi, hue' ajcxy tzach ñaygömayaanigixy ma yí' judíojäy ajcxy, jigix ca' pín y'ixhuídidiyb ypahuídidíyb. ¹³ Yi huídi ajcxy tzach mïjpidacp tiy'ajttíhuíi, nañ ni ca' ajcxy cuydundäy tüg'óciy jada Dios ycötujcim je jecyí. Hue' yí' ajcxy tzojccixy co miich ajcxy myajtiy'ajttíhuip jigix ajcxy jëbi ñaygömáayigixy mïid co miich ajcxy ti myajtiy'ajttíyigixy. ¹⁴ Yi jäy ajcxy huídibi jim yaj'ixpijcp aní, cí'm ajcxy chach ñaygömayaanigixy. Per ñch ca' jadu'n naygömaya'ñyíjich mïid huídibi ndumybich huídibi nyaj'ixpijcpyich. Hue' janchtiy ngapx-padaamybich ñch ajt nHuindzín Jesucristo ytiy'ajt, jadu'n nej yajcruudzpejti mïid ajt nbocy ycixpi. Co ti nmibicyich Cristo Jesús, huin'it ti n'ixmachich je naaxhuiñyjäy yjibic-huinma'ñ. E paady cham ni nga'ocnijot'ajtnich yí' jibic-huinma'ñ. ¹⁵ Co nmibijcim Jesucristo, oy ixypiy ti nyajtiy'ajttíyím o oy ixypiy ca' ti nyajtiy'ajttíyím, ca' ma choobaady. Huídibi tzoubatp yí' je' co nmibijcim Jesucristo, etz co nmïid'ajtim jemybi jot huinma'ñ. ¹⁶ Huen Dios xyajjotcugíhuipy etz xypa'ayoohuipy, etz nañ jadu'n yajjotcugíhuipy etz pa'ayoohuipy nidüg'óciy jäy huídijaty cuydumb Cristo ytiy'ajt, tüg'óciy Dios yjäy janchypí tiydudägyí.

¹⁷ Jadu'n nej jadachambi, etz jadu'n nej xí tiempo jacmiimb jaccídaacp, ca' ñch pín huaad xyjac'amayíyich, com nmïidich je tiy'ajt ma nninícxich jadu'n nej jäy ajcxy ti xyhueenduuních ti xychaachytuuñích mïid co ti nduuních mïid Jesucristo ycixpi.

¹⁸ Mígügtíjc ajcxy, huen ñch ajt nHuindzín Jesucristo tunipy nígi may'ajt oy'ajt ma miich ajcxy. Jadu'n jada ngapxycíxyich. Amén.

EFESIOS

Yi Necy Huidibi San Pablo Yajnigujx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajñibicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtip, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy mïid miich ajcxy etz xyajjotcugihup ajcxy.

Nej je Espiritu Santo conucxy Cristo yjäy

³ Tzoc ñbaatim capxpaatim Dios ñch ajt nHuindzin Jesucristo yTeedy. Mïid co nyajpaatim ma Cristo, paady Dios ti xyconuucxim mïid tüg'óciy huidijaty tzomb tzajpjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huädz oy njot nhuinma'ñ, ca' ti bocy nmïd'ajtim. ⁵ Mïid co Dios ooy xychojcm xyjihuiñyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyiy, co xycöbigaanim nejjihuiñy ycim y'ung. Co Dios jadu'n quejxy je Cristo ya naaxhuingixy, chi yi' yaj'oyiy nej jëbi xycöbajcm nej ycim y'ung, e jadu'n xymïd'adaanim tzajpjoty. Dios jadu'n ytuñ jadu'n nej yi' anajty tzocyin. ⁶ Tzoc ñbaatim capxpaatim Dios ooy mïid co mijmay'ajt mij'oy'ajt tuuñ mïid ñch ajt ycixpi, co quejxy y'ung ya naaxhuiñ mïid ñch ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuiñy. ⁷ Mïid co Dios ooy xychojcm xyjihuiñyim paady ycixp yi' y'ung ñi'py teemy yojcy co y'o'cy mïid ajt nbocy ycixpi, ti ajt n'alma xyajñidzoocim etz nbocy ajt ti xyhuinmeecxim. Co jadu'n ytuuñ, chi Dios mijmay'ajt mij'oy'ajt tuuñ mïid ñch ajt ycixpi. ⁸ Co Dios jadu'n mijmay'ajt mij'oy'ajt tuñ mïid ñch ajt ycixpi, ti xyajhuinjihuiñyim ti xyajnejhuñyim yi' ytiy'ajt yi' yhuinma'ñ. ⁹ Dios yjäygidacpy jadu'n co ti xyajnejhuñyim nej anajty mïidty capxcöducy huidibi ca' pin jecy'ajty huinjihuiñy. Nañ jadu'n Dios ti xyajnejhuñyim nej ti yhuinma'ñypidacy jecy'ajty nej ytuna'ñ anajty mïid Cristo. ¹⁰ Je huidibi Dios jecy'ajty ti yajnihuinmayiy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiy anajty co pidäga'ñ tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jiiiby tzajpjoty etz ya naaxhuiñ Dios jayijp capxcödujcy. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumyby jadu'n nej yi' tzocy etz nej jäygidägy. ¹² Jadu'n Dios cuydumyby mïid ñch ajt ycixpi, huidibi jayijp ti nmibajcm ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios mïid yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmïdooy je ayuc tiy'ajt nej jëbi m'alma ñidzögipy ajcxy, e ti mmibajccixy Cristo, huin'it ajcxy myajpaatcixy ma yi', e je Dios yjihuiñy ymic'ajt huidibi miich ajcxy mïid ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espiritu Santo huidibi Dios y'ahuaniy jecy'ajty co xymöhuaanim. ¹⁴ Jada Dios yjihuiñy ymic'ajt jada je' nidiy'ajt'ajtp

co nbadaanim it lugar ma Dios y'it. Dios xymöhuaanim it lugar ma y' y'it co anajty xii tiempo yhuaad'ajtni huin'it Dios nihua'na'nñ yajnidzöga'nñ pinjaty yjây'ajtip ajcxy. Jadu'n Dios tuna'nñ, jigix jëbi ñch ajt n'ñbaatim ngapxpaatim Dios müd y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cujc'ajt

15-16 Com ti nnejhuiyich jadu'n nej tydudägy miich ajcxy ti mmibijccixy ñch ajt nHuindzin Jesús, e nañ jadu'n ti nnejhuiyich jadu'n nej mdzojccixy mjihuuygixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidacacn ma Dios müd miich ajcxy ycixpi. 17 Mibijctzooybich Dios, nHuindzin Jesucristo yTeedy, je mijpi Dios Teedy, co y' xymöhuij ajcxy je huinma'nñ je xpijcin huidibi je Espíritu Santo yejcpy, etz nañ jadu'n xyajnejhuñhuipy xyajhuinjihuñhuipy ajcxy jac'oy y' y'ayuc, e tüg'óciy nej y' ti ytuuñ. 18 Dios nmibijctzooybich müd miich ajcxy ycixpi, co xyaj'anñyip ajcxy mjot mhuinma'nñ müd y' ytiy'ajt, jigix jëbi mnejhuuygixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuuygixy nej ymijty yjanchity je pidägy huidibi Dios yegamyb müd tüg'óciy ajcxy huidibi Dios yjây'ajtip. 19-20 Dios nmibijctzooybich jigix jëbi ajcxy mnejhuñhuipy jadu'n nej Dios ymic'ajt müdity. Je' ymic'ajt ca' ycixipy ytigoyipy, e ni pin ca quipxipy. Etz y' ymic'ajt tumb ma ñch ajt njot nhuinma'nñ nidüg nidüg co ajt nmibijcim. Dios ti xyajnejhuñyim y' ymic'ajt huidibi ymüd may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jiby tzajpjoty. Y' ñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxy müd Dios. 21 Cristo jac mij'ane'min ymüd, jac mic'ajt müd, ca'ydi jactinaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cömay y'ity ñgi, ca'ydi jac pin huidibi cham tzinaayb, etz huidibi jacjiini tzinähuaamni. 22 Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuñ Cristo nihuäcpejtäy tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. 23 Je mibijcpidijc jadu'n nipaady nej Cristo ñinñcx, paady ycixpi y' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

2

Dios chojcpy yjihuñyb jäy ajcxy, paady ñidzooccixy y'alma

1 Ca'ni miich anajty ajcxy mmibijccixy Cristo, ooy anajty mdundigooygixy müd Dios ytiy'ajt, ooy anajty ajcxy mbocymüdity, e jadu'n nipaady nej jihuñ ti m'o'ccixy müd mbocy ajcxy ycixpi etz Dios xyajjugypijccixy huinjemy müd jemybi jugy'ajtin. 2 Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñyây ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma y' jäy ajcxy yjot yhuinma'nñ huidibi ca' capxymidoogixy Dios. 3 Ma je tiempo tiibi ñaxy, nañ jadu'n anajty ndzinaayim jadu'n nej y' jacjadyii naaxhuiñyây ajcxy huidibi capxymidoob y' ca'oybi. Ngapxymidoohuim anajty nninñcx chojcin. Ndundigooyim anajty müd ngi'mjot ngi'mhuinma'nñ. Nguipxyñyim anajty müd y' jacjadyii naaxhuiñyây ajcxy huidibi Dios tzaachytunaanip müd ypocy ycixpi, etz nañ jadu'n nmihuaad'ajtim co Dios xychaachytuunim müd ajt nbocy ycixpi. 4-5 Oy ixipy ñch ajt mihuaadity tzaachyp müd ajt nbocy ycixpi, per Dios mij ooy

ti xypa'ayoohuim, e mij ooy ti xychojcm ti xyjihuuyim, paady ycixp tuuñ may 'ajt miid ich ajt ycixpi co yajjugypijcy je Cristo. E jadu'n quipxyi miid Jesucristo ich ajt nbaatim jemybi jugy'ajtin huudibi ca' ycixipy ytigoyipy ni mina. Jadu'n Dios may'ajt tuuñ miid ich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin huudibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcm quipxy miid Jesucristo, paady ycixp Dios xymohuaanim it lugar jiiby tzajpjoty quipxy miid Jesucristo. ⁷ Jadu'n nej xii tiempo mimb cidacp Dios jadu'n oy tuñ jigix jebi tiy'ajt nmuid'ajtim jadu'n nej Dios xychojcm xyjihuuyim etz xypa'ayoohuim mijcajee, etz mijmay'ajt mij'oy'ajt tuun miid ich ajt ycixpi co nyajpaatim ma Cristo. ⁸ Miid co Dios miich ajcxy ti xychojccixy ti xyjihuuygixy, paady ycixp yi m'alma ajcxy ti patcixy nidzoocin co ti mmibijccixy Jesucristo. Ca' nminaanim co tijaty ti mdungixy, paady ycixp yi m'alma ajcxy ti patcixy nidzoocin. Hue' janchtiy Dios ti xymoogygixy ninigoob ajcxy m'alma nidzoocin. ⁹ Ca' nminaanim huin'it jay ajcxy y'alma nidzoocin paadip co oybi tungixy. Hue' janchtiy Dios jadu'n ci'm ti yaj'oyiy ninigoob nej jay ajcxy jebi patcixy y'alma nidzoocin, jigix ca' pin jebi huaad amij agix nayjihuyii. ¹⁰ Com Dios ci'm ti oyduñ ich ajt njemybi tzinaayin jugy'ajtin miid je may'ajt huudibi Cristo ytuun co y'o'cy miid ajt nbocy ycixpi. Jadu'n Dios tuuñ miid ich ajt ycixpi, jigix jebi nduunim oyjay'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yi' tzocy co nduunim oyjay'ajtin.

Jotcuyc cham n'ijtim miid Dios, com Cristo xyajpocyhuaatzim

¹¹ Jadu'n miich ajcxy ocjamejtzcodii nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudiojyity, e ni ca' miich anajty ajcxy myajtiy'ajtiygixy nej huaad mnaydijigixy Dios yjay. Paady ycixp yi judiojay ajcxy yminañ co Dios je' yjay ajcxy, e miich ajcxy ca', miid yi'da'ajty co miich ajcxy ca' myajtiy'ajtiygixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judiojay xycobijccixy, etz ni ca' anajty mbadaangixy huudibi Dios y'ahuaniiy ma yi judiojay ajcxy, etz ni ca' anajty ti mjijp'ijxcixy ma Dios, etz ni ca' miich anajty ajcxy myajpatcixy ma Dios. ¹³ Jadachambi, miich ajcxy huudibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ni'py teemy yojcy miid miich ajcxy mbocy ycixpi. ¹⁴ Jesucristo ci'm yaj'oyiiy je tzip je capxy nej anajty ich ajcxy judiojay etz miich ajcxy huudibi ca' yjudiojyity naymidzip'ajtim, e cham jotcuyc n'ijtim. Jesucristo ci'm yajtigoy je judiojay ycotujcin huudibi anajty tzipcojp capxycojp ma ich ajcxy etz ma miich ajcxy. Jesucristo yajtugmujc judiojay, etz huudi ca' yjudiojyity. ¹⁵ Jesús miid yci'm ninicx yajtigoy je jecy'ajtypi cotujcin co oy yaj'ogyii cruudzcixy. Co Jesús y'o'cy, huin'it yajtugmujcy judiojay etz huudibi ca' yjudiojyity. Huin'it oy yaj'ahuimbity tugpicy jay jemybi huudibi Dios yjay'ajtip. E jadu'n ajcxy yajcijxy yajmay je tzip capxy. ¹⁶ Co Cristo oy yaj'ogyii cruudzcixy, huin'it yajcijxy yajnaxxy je tzip capxy jadu'n nej yi judiojay anajty midzip'adyii yi' ajcxy huudibi ca' yjudiojyity. Etz nañ huin'it Cristo yajtugmujcy yi judiojay miid huudibi ca' yjudiojyity. Paady ycixp Dios ycobiga'nyii judiojay ajcxy etz huudibi ajcxy ca' yjudiojyity agujc jotcuyc.

¹⁷ Je Cristo miin anajty ya naaxhuiñ etz capxhuacxy oybi tiy'ajt jadu'n nej jebi ajt nbaatim jotcuyc'ajtin ma Dios. Ycapxhuacxyp anajty ma miich

ajcxy huídibi ca' yjudíojäyity, huídibi ca' anajty müdíty Dios ytiy'ajt. Etz nañ jadu'n ycapxhuäcxp Dios ytiy'ajt anajty ma ñich ajcxy judíojäy huídibi jamüid anajty Dios ytiy'ajt. ¹⁸ Müid co Cristo may'ajt ti tuuñ co xy'adigüim xyjottigüim Dios yjihu'iñ ymic'ajt, paady ycixp nidüg'óciy ñich ajt nyajpaatim ma Dios jadu'n nej tügpicy jäy, tanto judíojäy etz nañ jadu'n huídibi ca' yjudíojäyity. ¹⁹ Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huídibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tú'ciy miich ajcxy mnaygomájtzigixy ma Dios müid judíojäy ajcxy. Jadu'n miich ajcxy etz judíojäy ajcxy nipaady cham nej jihuüy ajcxy mdüguugy mdügmigüg. ²⁰ Miich ajcxy ti mmijpidaaccixy je tiy'ajt huídibi Jesús y'apóstol ajcxy ti capxhuäcxy etz je tiy'ajt huídibi Dios y'ayucnajtzcaxüyb ti capxhuäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huídibi jaccopicyip ma je poch'ijx chondägy. ²¹ Dios jadachambi tiempo ycojyp ymacxyp jadügpicy jäy huídibi yjäy'adaanip huídibi tügjip mijpidaaccixy Cristo, huídibi tú'ciy ijtcixyp müid Cristo. Jadu'n jadaayaabi tügpicy jäy nipatcixy nej tüg tijc ma jäy ajcxy Dios ojadajtcixy. ²² Miich ajcxy myajpatp ma Cristo quipxy müid nidüg'óciy yi' mayjay ajcxy huídibi mijpidacp Dios etz huídijaty müijtp je Espíritu Santo ma ajcxy yjot yhuinmañ, jadu'n miich ajcxy mjogy'ajtin nipaady nej Dios chinaydac.

3

Pablo yi' je' müid cötujcin co capxhuäcxy Dios y'ayuc ma pin ca' yjudíojäyity

¹ ñich Pablo, nyajpatpich pujxtigoty müid co nduuñich ma Jesucristo ytung ma miich ajcxy huídibi ca' yjudíojäyity. Paady ycixp nmibijctzooybich Dios müid miich ajcxy m'oy'ajtin ycixpi. ² Mnejhuüy ajcxy com Dios mijmay'ajt ti tuuñ müid miich ajcxy ycixpi, paady yi' ti xyajnibicyich ngapxhuäcxibich ma miich ajcxy yi' y'ayuc ytiy'ajt. ³ Dios ti xyajnejhuüyich yi' ytiy'ajt huídibi jecy'ajty yüch y'ijt. Jada tiy'ajt yinjaty hueeñjaty ñich miich ajcxy ti nni-jayüygixy jayijp'aty. ⁴ Co miich je necy mgapxip, huin'it ajcxy mnejhuüipy co ñich nnejhuüyich je Cristo ytiy'ajt huídibi ijtp yüch. ⁵ Jada tiy'ajt maabi Jesucristo, Dios ca' ni pin yajnejhuüy jecy'ajty. Jadachambi xi tiempo Dios müid je Espíritu Santo yajnejhuüy Jesucristo ytiy'ajt je Jesús y'apóstoles ajcxy etz je Dios y'ayuc najtzcaxüyb ajcxy. ⁶ Jada je' je tiy'ajt huídibi jecy'ajty yüch anajty ijtp, co yi' jäy ajcxy huídibi ca' yjudíojäyity ypadamyb ajcxy Dios y'oy'ajtin quipxy müid yi' judíojäy ajcxy, etz nañ jadu'n yi' ajcxy yajpaady ma Dios tú'ciy müid yi' judíojäy ajcxy, etz nañ jadu'n yi' ajcxy padaangixy oybi huídibi Dios jecy'ajty yajnimay yi' judíojäy co möhuaangixy pinjaty mibijccixp Jesucristo.

⁷ Dios mijmay'ajt ti tuñ müid ñich ninigoob co ti xyajnibicyich jada tung, e xymöyich mic'ajt co ngapxhuäcxibich Jesucristo y'ayuc ytiy'ajt oybi ma yi' jäy ajcxy huídibi ca' yjudíojäyity. ⁸ ñich jactimmudzip ma yi' maybi mibijcpidijc ca'ydi jacpin, per ca' ñejity. Dios may'ajt oy'ajt ti tuuñ ma ñich, e ti xypidägyich ma yi' ytung co ngapxhuäcxyich jada oybi tiy'ajt ma jacjadyii jäy ajcxy jigix jëbi ajcxy patcixy ma Cristo Jesús mij'oy'ajtin, huídibi ca' pin huinjhuüy jadu'nyi ymijity. ⁹ Dios ti xyajnibicyich co ngapxticxibich ma tüg'óciy jäy ajcxy je Dios y'ayuc ytiy'ajt oybi huídibi yüch anajty ijtp. Yi' je' je ayuc huídibi Dios ti cojy ti macxy jecy'ajty, jadu'n nej yi' tunañ je oybi müid tüg'óciy jäy ajcxy. Yi' je' Dios huídibi ti yajcojtäy tüg'óciy tijaty ya naaxhuñ etz jilby tzajpjoty yajpatp. ¹⁰ Jadu'n Dios capxcödujcy co je tzajpjoty tzinaaybi ajcxy huídibi ane'min etz mic'ajt müid, tiy'ajt padaangixy ma yi' mibijcpidijc jadu'n nej

Dios mijhuinma'ñ canaagnax tuñ mïd jäy ajcxy nidüg'óciy huidibi mibijccixp Cristo Jesús. ¹¹ Jadu'n Dios ti cuyduuñ mïd ajt nHuindzin Jesucristo jadu'n nej jecy'ajty capxcödujcy. ¹² Mïd co nyajpaatim ma Jesucristo paady ycixp agujc jotcujc nmigapxim nmihuingonim Dios. Mïd co nmibijcim Jesucristo paady ca' ndzigüym ndzo'yduunim ma Dios yhuinduu. ¹³ Paady ycixp may'ajt nbijctzooyich mïd miich ajcxy co ca' nigi m'ixtigihuäccixy ma ajcxy mmibijcin. Etz ca'ajcxy xyñidajipy xyñimayípyich co tzaachypi nminaxyich nyajnaxyich mïd miich ajcxy ycixpi. Com mïd co ti nyajnaxyich tzaachypi mïd miich ajcxy ycixpi, paady jëbi miich ajcxy oy'ajtin mbatcixy.

Cristo chojpy yjihuüyb jäy ajcxy

¹⁴ Com Dios mijmay'ajt ti tuuñ mïd judíojäy etz mïd huidibi ca' yjudíojäyity, paady njatyhuingoxtinaaybich Dios, ñch ajt nHuindzin Jesucristo yTeedy, e nmibijctzooybich Dios mïd miich ajcxy ycixpi. ¹⁵ Tüg'óciy tzajpjoty tzinaayb etz tüg'óciy naaxhuiñyjäy huidibi mibijccixp Dios, jëbi nidüg'óciy yminaangixy: “Dios ñch ajt nDeedy.” ¹⁶ Paady nmibijctzooybich Dios Teedy mïd miich ajcxy ycixpi, co Dios je huidibi mic'ajt etz oy'ajt ymïd mijcajee, co xymöhüipy mic'ajt ma ajcxy mmibijcin mïd yi' yjihu'ñ ymic'ajt huidibi yajpatp ma ajcxy mjot mhuinma'ñ. ¹⁷ Dios nmibijctzooybich mïd miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ mïd co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix jëbi miich ajcxy huidibi mmibijccixp Cristo, jëbi mdzójcxixipy mjihuüygixipy mijcajee huinixi huinitempo je mibijcpidijc etz tüg'óciy jac-jadyii jäy. ¹⁸ Nañ jadu'n Dios nmibijctzooybich mïd miich ajcxy ycixpi co miich ajcxy etz tüg'óciy mibijcpidijc mnejhuüygixipy jadu'n nej Cristo xychojcm xyjihuüym mijcajee. E yi' chojcin yjihuüym jadu'n nipaady nej tüg' tije huidibi jac cixip jac mijip, jac yooñip jac cücyip ca'ydi ni huidi tijc. ¹⁹ Nmibijctzooybich Dios co xyajnejhuüygixipy xyajhuinjihuüygixipy nej Cristo xychojcm xyjihuüym mijcajee nidüg'óciy ñch ajt, ixti ca' huaad nhuinjihuüydaayim jadu'n nej Cristo xychachchojcm xychachjihuüym. Nmibijctzooybich Dios co xypubéjtcixip, ixti mabaad mmïd'ajttaaygixy Dios y'oy'ajtin.

²⁰ Jadachambi, cömay Dios y'ity huidibi mic'ajt mïd, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, mïd je ymic'ajt ycixpi huidi tumb ma ñch ajt. ²¹ Huen tüg'óciy mibijcpidijc ajcxy jäymejtcixy ojadájtciy Dios etz Cristo Jesús jabom jabom huinixi huinitempo. Jadu'n jada. Amén.

4

Tú'ciy n'ijtim mïd Espíritu Santo ycixpi

¹ Nyajpatpich pujxtigoty mïd ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jäy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy. ² Pidaaccix mjot mhuinma'ñ yung naxy, nicy xeemy jäy'ajtcixy, naymecxtújcgix miñ xyipy, naymi'oyjäy'ájtigixy, jigix ñiguëxigip co mnaychójcgixy mnayjihuüygixy miñ xyipy. ³ Mïd'adipy ajcxy mjot mhuinma'ñ tú'ciy mïd je Espíritu Santo ypubejtin jigix jëbi mdzinaaygixy jotcujc ca' ma tzip capxy. ⁴ Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'ñ. Dios ti xyhuin'ijxim, jigix jëbi quipxyjaty njijp'ijxtaayim je oybi huidibi nbadaanim jüby tzajpjoty. ⁵ Ji yajpaady tügpajc ajt nHuindzin Jesucristo, etz tügpajc

je ayuc tiy'ajt huídibi jëbi nmijpidaacim, etz tügpajc nnibejtim mïid Jesucristo yxiï. ⁶ Ji yajpaady tügpajc Dios Teedy huídibi cuendi'ajtp yajtzinaayb nidüg'óciy mibijcpidijc. Yi' je' huídibi nihuindzin'ajttaayb. Yi' je' huídibi may'ajt tumb mïid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinma'ñ.

⁷ Dios may'ajt oy'ajt ti tuñ mïid nidüg nidüg ïch ajt co Cristo xymooyim mic'ajt, jigix jëbi nidüg nidüg tuunipy Dios ytung nej ypadyii. ⁸ Paady ycixp jaybety ymiñ ma Dios jadu'n ymina'ñ:

Co Cristo ypättigiiy tzajpjoty, chi ymiidpättigiiy may machjäy, e nañ jadu'n Cristo moy jäy ajcxy mic'ajt (dones).

⁹ ¿Nej co jadu'n Dios y'ayuc ymina'ñ co je Cristo ypättigiy tzajpjoty? Hue' je' jadu'n ymina'ñ mïid co je Cristo jayjip ycidacy etz ooy ayoooy ya naaxhuiñgixy. ¹⁰ Je Cristo yi' je' huídibi cidaac ya naaxhuiñ choon tzajpjoty, nañ jadu'n ypättigiiy jadüg'oc tzajpjoty jactim'o'c'am. E yi' je' ymic'ajt yajpatp ma tüg'óciy huídijaty jiiy tzajpjoty etz tüg'óciy huídijaty ya naaxhuiñ.

¹¹ Je Cristo ymooygixyp nidüg nidüg yi' ytumbi mic'ajt. Nijëjity mooygixy mic'ajt jëbi nidiy'ajt'ajtigixy co je' je' je' Cristo. Nijëjity mooygixy mic'ajt jëbi najtzcapxiygixy Dios y'ayuc. Nijëjity mooygixy mic'ajt jëbi capxhuäcxcixy yi' y'ayuc. Nijëjity mooygixy mic'ajt jëbi capxhuijcixy yi' mibijcpidijc mïid Dios ytiy'ajt. Nijëjity mooygixy mic'ajt jëbi yaj'ixpijccixy Dios ytiy'ajt. ¹² E jadu'n je Cristo mic'ajt moydaaygixy yi' yjäy, e jadu'n yajni'ixiydaaygixy mïid ytung ycixpi. E mïid yi' ajcxy ytung yjacyujcpedipy yi' mibijcpidijc y'ixpijcin, ixti mabaad jac mïid'adipy ajcxy Cristo y'oy'ajtin. ¹³ Jadu'n Cristo mic'ajt xymooyim, jigix jëbi nidüg'óciy ïch ajt ytügiiyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot yhuinma'ñ, nmi'ijtim Jesucristo ytiy'ajt cixy ca'pxy. ¹⁴ Ca' n'idaanim mïid ajt yhuinma'ñ nej pi'ctijc yhuinma'ñ ymiidity. Je pi'ctijc ajcxy janam jadzoc yhuinma'ñ ytigajtzcixy. Jadu'n ajcxy nipaady nej je miy huídibi je poj yajpojmiyby yajpojxiypy. Co cixy ca'pxy nmïid'ajtim Cristo ytiy'ajt, ca' pinjaty xyhuin'änim mïid huing ayuc oymibijcnip huídibi ca' yjanchity. ¹⁵ Hue' janchity ngapxim je tiy'ajt tiybi mïid tzojcin jihuüyin, jaydëbi njacyeecim ajt nmibijcin etz njacnejhuüyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huídibi nigohuajc'ajtp tüg'óciy mibijcpidijc.

¹⁶ Cristo etz je mibijcpidijc nipatp nej tüg ninïcx. Cristo ñipatp nej je ninïcx cohujc huídibi ane'mb etz mic'ajt mooyb je ninïcx. Etz yi' mibijcpidijc ñipatp ajcxy nej je ninïcx huídibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huídibi yajtügiiyyp ajcxy ymibijcin etz nañ jadu'n yaj'ijtigixy tügmucy. Nidüg nidüg mibijcpi ymic'ajt patcixy ma Cristo, jëbi tungixy Cristo ytung nej ypadyii. E jadu'n yeeccixy nidüg'óciy ma ajcxy ymibijcin, etz nañ jadu'n yajyeeccixy chojcin yjihuüyin mïid ymigügtijc.

Je jemybi jugy'ajt huídibi nbaatim ma Cristo

¹⁷ Paady ycixp nnimäyich miich ajcxy etz nyajniibijccixy mïid ajt nihuindzin Jesucristo ycötujcin, co ca' huaad mdungixy loci huinma'ñ huídibi ca' choubaady ma Dios, jadu'n nej jacjadyii jäy ytungixy huídibi ca' mijpidaaccixy ajt nihuindzin Jesucristo. ¹⁸ Ca' huaad mdzinaaygixy jadu'n nej jacjadyii jäy ajcxy chinäy mïid loci huinma'ñ. Ca' ajcxy yajpaady ma Dios, je huídibi jugy'ajtin yejcp huinixibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihuüy co ytundigooygixy. Ooy ajcxy minicxnajxcixy yi' jibic-huinma'ñ. Ooy ajcxy nijot'ajtcixy mijcajee co túngixipy tüg'óciy tijaty jibic-huinma'ñ. ²⁰ Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy

Cristo ytiy'ajt, ²¹ pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huudibi yajpatp ma Cristo. ²² Ti miich ajcxy m'ixpiy co copicy m'ixmájtzcixipy yi jibic-huinma'ñ nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy müid je jibicpi huudibi anajty ajcxy mnijot'ajtcixyp, ci'm anajty mnayhuin'ünigixy. ²³ Ixmajtzcix jibicjot jibic-huinma'ñ. Pidaaccix mjot mhuinma'ñ co mguydunaangixy Cristo ytiy'ajt jemybi. ²⁴ Müid'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ müid tudägy'ajtin etz huädz'ajtin.

²⁵ Paady ycixp ca'huaad m'üindaaccixy, nidüg nidüg cápxcix huudibi janchip müid migügtijc, müid co quipxyjaty nyajpaatim ma Jesucristo.

²⁶ Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäydigóoygixipy yi mjotmädi yajijp ca'ni anajty xii ycidacyñi. ²⁷ Ca' mnayyéjicigixy ma je mujcu' co je mujcu' xymimadägiy.

²⁸ Yi jäy ajcxy huudibi meetzcixp, huen ixmajtzcixy meedzii, etz ijxtähuipy ytung. Co ytunipy ma ci'mdung jëbi pubedipy ajcxy ymigügtijc huudibi yajmayajtcixp tijaty.

²⁹ Ca' mgápxcixipy jibic ayuc. Cápxcix oy ayuc huudibi jëbi migüg ajcxy jäygidaaccixy, huudibi pubejtp etz yajyeegy je mibijcin, huudibi yejcp oy'ajtin ma pin ajcxy amido'ijtp. ³⁰ Ca' huaad mgapxcixy mmiydaaccixy ayuc huudibi yajjotmaybijcp je Espíritu Santo huudibi Dios yjë'ajtpy. Je Espíritu Santo huudibi miich ajcxy müid ma mjot mhuinma'ñ, yi' je' huudibi tiy'ajt yejcp co miich ajcxy Dios yjäy'ájtigixy, co anajty Cristo ymiñ ya naaxhuñ jadüg'oc huin'it mbadaangixy jugy'ajtin etz tzinaayin huudibi ca' ycixipy ytigoyipy ni mina.

³¹ Yajqueeccix yi jibicpi ma ajcxy mjot mhuinma'ñ, jadu'n nej co mjot mhuinma'ñ ta'm mjihuüygixy, jadu'n nej co tzojc mjotma'tcootcixy, jadu'n nej co mnaymijotmä'tigixy, jadu'n nej co mnayhuin'ójiigixy nayijp'ójiigixy. Ca' huaad mmigüg mnigapxcixy mni'ojüygixy. Ca' jibicpi mnijot'ajt'adütcixy müid ajcxy mmigüg ycixpi. ³² Hue' janchtiy oybi mhuinmáaygixipy müid mmigüg ajcxy ycixpi. Nayba'ayóohuigixy nidüg nidüg. Nayméecxigix nidüg nidüg. Com nañ jadu'n Dios ti huinmecxy miich ajcxy mbocy müid co myajpatcixy ma Cristo.

5

Nej jëbi chinaaygixy yi Dios yjäy ajcxy

¹ Com miich ajcxy ñipatpy nejjihuüy Dios y'ung'ájtigixy, e Dios ooy xychojccixy xyjihüüygixy, paady copicy naychójcigixy nayjihüüygixy miñ xyipy, jadu'n nej Dios ti xychojccixy ti xyjihüüygixy. ² Jabom jabom ma mdzinaayin naychójcigix nayjihüüygix nidüg nidüg, tim jadu'n nej Cristo xychojcin xyjihüüyim, e yjugy'ajt yejcy müid ajt nbocy ycixpi, e jadu'n Dios jäygidacy nej Cristo ytuñ.

³ Müid co miich ajcxy Dios xyjäy'ájtigixy, paady tzinaaygixy müid huädz mjot mhuinma'ñ. Ca' huaad m'oc'üibáatcixyñi m'occapxpáatcixyñi yi töxyjäy migapxtigoyii, etz yi jibic ayuc capxi, yi jibic-huinma'ñ nijot'adi etz yi meeñ adzogi. ⁴ Müid co mDios miich ajcxy xyjäy'ajtp, paady ycixp ca' huaad mgápxcixipy ayuc huudibi tzo'ydu'ñ yejc, ni ca' huaad mgápxcixipy huudi ca' y'oyjäygidaacnity, etz ni ca' huaad mguxiiccixy m'anüdaaccixy, com yi jibic ayuc ca' Dios jäygidägy. Tzoc yajnaxim jäygidaacin ma Dios com Dios ti xyajhuaatzim ajt njot nhuinma'ñ. ⁵ Janch tiy'ajt jada co pinjaty tundigooyb

müid huingbi töxyjäy, pinjaty jibic-huinma'ñ müid, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meen adzojcp, Dios ca' tzocy, tim jadu'n nej yi' ca' tzocy pinjaty ojadajtp tzaadzech etz quipychech. ⁶ Ca' mnayyéjcgixy co jäy ajcxy xyhuin'ingixipy müid ayuc huidibi ca' ytiy'ajtity ca'p choubaad. Müid co jäy ajcxy capxcixy ayuc huidibi ca' ytiy'ajtity, paady ycixpi Dios tzaachytuna'ñ tüg'óciy jäy ajcxy huidibi capxycömidodacp yi' y'ayuc. ⁷ Ca' huaad miich ajcxy mnaymüg'ájtigixy, ca' müid mnayyöymújcgixy yi' jadu'mbi jäy ajcxy huidibi ca' capxymidoogixy Dios.

⁸ Jayjip ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuüy, e jadu'n nipaady anajty nej jihuüy myajpaady ajcxy agootztuum. Jadachambi mnejhuüygyxyp Cristo ytiy'ajt, e jadu'n nipaady nejjihuüy mdzinaaygixy ma tüg tñcxin. Paady ycixp jatyim cuydungixyp Cristo ytiy'ajt ma yi' mdzinaayin mjogy'ajtin ajcxy, jadu'n nej jëbi huaad quëxigy co mmibijccixy Cristo. ⁹ Co nmüid'ajtim Cristo ytiy'ajt, chi nduunim huidibi y'oyip, huidibi tudägyip, huidibi tiy'ajtip. ¹⁰ Ixpjccix je tiy'ajt huidibi Dios yjäygidacpy. ¹¹ Ca' miich ajcxy mnaymüg'ájtigixy müid yi' jäy ajcxy huidibi yajpatcixp agootztuum, huidibi tungixy huidibi Dios ca' jäygidägy. Miich ajcxy capxhuicix müid Dios ytiy'ajt yi' ajcxy huidibi agootztuum tzinaayb. ¹² Tzo'yduunim ajt co jay nigapxcixy nimydaaccixy je jibicpi huidibi ajcxy ytumyb ayüch ameech. ¹³ Co n'ixquipxim yi' jadu'mbi jäy ajcxy ayuc müid Dios y'ayuc, chi niguëxigy pen janch tiy'ajt o pen ca' ytiy'ajtity, jadu'n nipaady nej ti nyajpidzimim je ajcxy ayuc ma yi' agootztuum, etz nbidaacim ma yi' tñcxin. ¹⁴ Paady ycixpi Dios y'ayuc jadu'n yminañ:

Mäyhuijip miich ajcxy huidibi jadu'n nipatp nejjihuüy mdzachmaagixyp. Juypijccix miich ajcxy huidibi jadu'n nipaady nejjihuüy ti m'öccixy. Cristo xycodñcxcixipy müid yi' ytiy'ajt.

¹⁵ Paady naygüend'ájtigixy huidibi tiy'ajt yajtungixp ma yi' chinaayin. Tzinaaygix jadu'n nejjihuüy mnejhuüygyxyp Cristo ytiy'ajt, e ca' mdzinaaygixy jadu'n nej huidibi ajcxy ca' nejjihuüygyxyp Cristo ytiy'ajt. ¹⁶ Ni'ix'ijtcix jabom jabom jëbi mguydungixy Cristo ytiy'ajt. Jadachambi xii tiempo mayjäy ytundigooygixy müid Cristo ytiy'ajt. ¹⁷ Ca' loci huinma'ñ myajtungixy, per nejhuygyxyp nej Dios tzocy co mdúngixipy. ¹⁸ Ca' huaad m'ijtcixy amügy jäy, com yi' jocni xyajñcxcixipy ayo'nduum. Nigi oy m'ijtcixy Dios yjihuñ ymic'ajt may'amy ma ajcxy mjot mhuinma'ñ. ¹⁹ Naymigápxigixy miñ xyipy müid yi' salmo ayuc, müid yi' himnos. Huin'ügix Dios müid je iy' huidibi je Espíritu Santo xymooygixyp. Huin'ügix etz ojadajtcix Dios cixyjot huinijot. ²⁰ Jatyim yajnajxcixy jabom jabom jäygidaacin ma ajt nDios Teedy ma ajt nHuindzin Jesús yxii, müid tüg'óciy ycixpi nej ndunim n'ayoohuim.

Nej huaad chinaaygixy pinjaty picychinaaygixy

²¹ Müid co miich ajcxy mhuindzigiy Dios, paady ycixp miich ajcxy mnayyajmij'ájtigixy mnaygapxymidóohuigixy miñ xyipy.

²² Miich ajcxy töxyjäydijc yajmij'ajtcix capxymidoogix yi' mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo.

²³ Com je töxyjäy ñäy nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi' mibijcpidijc ymiñ. Yi' Cristo yi'je' huidibi nihuänamb yajnñdzögamb yi' mibijcpidijc. ²⁴ Tim jadu'n nej yi' mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidóogixipy yi' ñäy ajcxy.

²⁵ Nañ jadu'n tzocy co je yëydijc huen tzocy jihuüy ytöxyijc, tim jadu'n nej Cristo tzocy jihuüy yi' mibijcpidijc, e paady ycixp yejc yi' yjogy'ajtin müid yi'

ajcxy ycixpi. ²⁶ Cristo yejc yjugy'ajtín m̄id je m̄ibijcp̄idijc ycixpi, jigix jēbi huinmecxy ajcxy ypocy, yajhuaatz̄ip ajcxy yjot yhuinma'ñ. Cristo yajhuaatz̄i yi m̄ibijcp̄idijc ajcxy yjot yhuinma'ñ m̄id yi'y'ayuc etz co n̄ibejt ajcxy m̄id n̄i. ²⁷ Jadu'n Cristo yajhuäch yi m̄ibijcp̄idijc ajcxy yjot yhuinma'ñ, jigix jēbi ajcxy nayguëx̄iḡiyyb ma yi' yhuinduu m̄id huädz yjot yhuinma'ñ. Je m̄ibijcp̄idijc ajcxy nipaady nej t̄üg n̄jen huidibi huädz̄ip, ca' ma ytijy ymächity. ²⁸ Jadu'n tzocy co je yēydijc huen tzocy jihuiy ytōxyjc t̄im jadu'n nej c̄i'm naychogyii. Yi yēydijc huidibi tzojcp̄ jihuiy ytōxyjc nañ jadu'n c̄i'm ñaychogyii. ²⁹ Ca' ji ni p̄in huidibi ca' ñaychogyii c̄i'm. Hue' jancht̄iy ycuend'ajtpy etz yajcūxyii yajpedyii yci'm nin̄icx, t̄im jadu'n nej jāy ajcxy cuend'ajtcixy yci'm ñin̄icx nañ t̄im jadu'n Cristo ycuend'ajtpy yi m̄ibijcp̄idijc. ³⁰ Jadu'n Cristo cuend'ajtpy yi' yjāy, com jadu'n ajcxy nipaady nej yi' ñin̄icx. ³¹ Com cop̄icy je yēydijc tzoḡip jihuihuip ytōxyjc jadu'n nej Cristo tzocy jihuiy yi m̄ibijcp̄idijc. Paady ycixp̄ je yēydijc ixmadz̄ipy ytaj yteedy, e ypudiḡihuipy ytōxyjc, e jadu'n ajcxy chin̄ahuipy nej jihuiy yt̄ügpajcity. ³² Ooy chachm̄ijhuinma'ñity jada t̄iy'ajt huidibi yūch anajty ijtp, e yi' ñich jadu'n tijpy yi Cristo etz je m̄ibijcp̄idijc. ³³ Cuend̄ip̄jccix jada t̄iy'ajt co nid̄üg nid̄üg miich yēydijc̄ijc ajcxy huidibi p̄jccixp̄ cop̄icy mdzoḡipy mjihuipy ajcxy mdōxyjc, t̄im jadu'n nej c̄i'm ajcxy mnaychogyii, e nañ jadu'n cop̄icy co nid̄üg nid̄üg tōxyjāydijc yajm̄ij'adipy ñāy.

6

¹ Pi'ct̄ijc ajcxy huidibi m̄ibijcp̄ Jesucristo, cop̄icy mgapxym̄idoohuipy ajcxy mdaj mdeedy, com t̄iy'ajt jadu'n. ² Yi Dios ycōtujc̄in huidibi m̄inaamb: “Yajm̄ij'ajtcix mdaj mdeedy”, yi' ooy ytimycop̄icyity. Nañ jadu'n co nguyduunim jada cōtujc̄in, huin'it Dios jecy xyajtz̄inaayim. ³ Co miich ajcxy jadu'n myajm̄ij'adipy mdaj mdeedy, huin'it Dios xymōhuipy ajcxy jotcujc'ajt̄in, e nañ jadu'n xyajtz̄ināaygixipy jecy ya naaxhuiñ.

⁴ E miich ajcxy huidibi ungededy'ajtcixp̄, ca' nigoo myajjotma'tcotcixy yi m'ung ajcxy. Ane'mgix yajyeccix yi m'ung ajcxy m̄id Dios y'ayuc ytiy'ajt, jaydēbi capxym̄idōogixipy ajcxy Dios.

⁵ Miich ajcxy huidibi tumbi'ajtp ya naaxhuiñ, capxym̄idoogix yi mhuindz̄in ajcxy, etz tungix m̄id tudāgy'ajt̄in, etz yajm̄ij'ajtcix etz tziḡiyygix. T̄im jadu'n nej jihuiy mgapxym̄idoogixy yi mHuindz̄in Jesucristo.

⁶ Tungix yajxon m̄id ajcxy mhuindz̄in. Ca' janch xypaat oy mic mduungixy co ajcxy mhuindz̄in jim xyhuind̄icxcixy, e chi co je' yjihuäcni, chi nigoo mhuäccixni mdināaygixni. Tungix jadu'n nej huaad jāy ytuungixy yi huidibi mijp̄idaaccixp̄ Jesucristo. Tungix cixyjt̄ huinijot jadu'n nej Dios tzocy mdūngixipy.

⁷ Tumbidijc ajcxy, tungix mdung cixyjt̄ huinijot, t̄im jadu'n nej jihuiy mdungixy je Huindz̄in Jesucristo ytung, e ca' yjāydungity. ⁸ Mnejhūiyb miich ajcxy co ajt nHuindz̄in Jesucristo oybi mōhua'ñ nid̄üg nid̄üg jadu'n nej ti ytuuñ, ca' ñejity pen yci'mdung ytumy, o pen ytumb m̄id t̄üg huindz̄in.

⁹ Miich ajcxy huidibi nihuindz̄in'ajtp tumbidijc, oy'amy ane'mgix mdumbi ajcxy. Ca'm'adz̄iḡiyygixipy ca' mdzaachytungixipy. Ajihūiygixy co miich ajcxy etz nañ jadu'n mdumbi ajcxy m̄id ajcxy mHuindz̄in tzajpjoty, e yi mHuindz̄in tzajpjotypi quipxyjaty t̄iyduna'ñ nid̄üg'óc̄iy miich ajcxy.

Je mic'ajt huidibi je m̄ibijcp̄idijc ajcxy ypatcixyp m̄id Dios yjihuiñ

¹⁰ Jadūgnax, migūgt̄ijc ajcxy, yi mmic'ajt mbaad̄ip ajcxy ma ajt nHuindz̄in Jesucristo. Com Jesucristo ooy mic'ajt m̄idity, paady jēbi miich ajcxy mbatcixy yi mmic'ajt̄in ma yi'. ¹¹ Naygohuaanigixy miich ajcxy ma je mujcu' m̄id

tüg'óciy tìy'ajt huídibi Dios xymooyim, huídi mîid naygohuaanim ma je mujcu', e jadu'n ca'ydi je mujcu' xymimadaacim mîid anîi. Jadu'n Dios ytìy'ajt nipaady nej tujt etz pujxnîjen huídibi soldados ajcxy mîid naygohuaangixy tzipjoty. ¹² Hue' janchtìy xymîdzip'ajtm poj naaxhuiñ, ca'oybi, mujcu'dijc, etz tüg'óciy mic'ajt mîidpi huídibi midzip'ajtp Dios ya naaxhuiñ etz jilby tzajpjoty, ca'p ñch ajt nmîdzip'ajtm naaxhuiñjây. ¹³ Paady ycìxp yajtúngixy tüg'óciy mic'ajt etz tìy'ajt huídibi Dios ti xymooygixy, jigix jêbi mmimadaaccixy je ca'oybi co anajty xyajtundigoyaangixy. E jadu'n jêbi mimadaaccixy je ca'oybi mîid ajcxy mmibijcin. E co anajty ti mmimadactaaygixy, huiñ'it m'ijtcìxipy mic ma ajcxy mmibijcin. ¹⁴ Ca' m'ixtìgìhuáccix ma ajcxy yì mmibijcin. Nayñi'ixìyigix mîid Dios ytìy'ajt, jadu'n nej jây ajcxy ñayhuñdädzigixy co ytunaangixy. Nayñi'ixìyigix tim jadu'n nej soldados ajcxy ñayñi'ixìyigixy mîid pujx nîjen ma caach co chiptunaangixy. ¹⁵ Nayñi'ixìyigix mîid Dios y'ayuc, jigix jêbi ajcxy nicxy mgapxhuäcxì Dios y'ayuc huídibi jotcujc'ajtin yejcp. Co jadu'n mdúngixipy, jadu'n nibaadip tim jadu'n nej soldados ajcxy ñayñi'ixìyigixy co yajtigìyigixy yzapato co ytüyöyaangixy. ¹⁶ Yi' huídibi jac copìcyip ca'ydi jac ni ti, mibijccix tìydudägy Jesucristo. Mîid ajcxy yì mmibijcin jêbi mnaygohuáangixy ma je mujcu'. Miich ajcxy mmibijcin jadu'n nipaady nej tüg escudo huídibi je soldados ajcxy yajtumyb co ñaygohuáangixy ma je tìp huídibi yajnajtztìbìyb mîidi jîin. ¹⁷ Nayñi'ixìyigix mîid Cristo ytìy'ajt huídibi mîid ajcxy m'alma xyajnîdzoocìp, tim jadu'n nipaady nej soldados ajcxy ñaygohuáangixy co pidaaccixy ypujx cöjup co chiptunaangixy. Naygohuáangixy miich ajcxy mîid Dios y'ayuc huídibi jadu'n nipatp nej tüg espada huídibi je Espiritu Santo ti xymooygixy. ¹⁸ Mibijctzoogix Dios mîid tüg'óciy ycìxpi huídibi ajcxy mdumyb. Mibijctzoogix etz pijctzoogix may'ajt ma Dios jabom jabom mîid je Espiritu Santo ypubejtin. Huijy ycujc m'ijtcìxipy, ca' mjetmetzcìyigixipy. Mibijctzoogix Dios mîid tüg'óciy mibijcpidijc ajcxy ycìxpi. ¹⁹ Nañ jadu'n mibijctzoogix Dios mîid ñch ycìxpi, co huen xymöyich ayuc etz jotcujc'ajtin, jigix jêbi ngapxhuäcxìbìch huiñmic jotmic yì' y'ayuc ytìy'ajt huídibi ca' pìn jecy'ajty nejhuìyigixy. ²⁰ Dios ti xyajnìbìcyìch jada tung jêbi nyajnicxyìch yì' y'ayuc ytìy'ajt ma je mayjây ajcxy. Paady ycìxp nyajpaadyìch pujxtìgoty cham. Tungix may'ajt mibijctzoogix Dios mîid ñch ycìxpi co xyajjotmicpìgìpyìch jigix jêbi ngapxhuäcxìyìch yì' y'ayuc huiñmic jotmic.

Capxpooxìn huídibi cogixìyñip

²¹ Ooy ndzocy njihuìyìch je Tíquico, nañ jadu'n yì' ooy xypubejtyìch ma ajt nHuindzin Jesucristo ytung. Yi' Tíquico miich ajcxy xyajmîdmìydägìpy tüg'óciy je tìy'ajt nej nyajpaadyìch ya, etz tüg'óciy tung huídibi ya ndumybìch. ²² Nguexaamybìch Tíquico ma miich ajcxy jigix jêbi xymîdmìydägìpy ajcxy jadu'n nej nyajpaadyìch ya, e mîid jada tìy'ajt jêbi miich ajcxy mjetcugìyigixy.

²³ Huen Dios Teedy etz ajt nHuindzin Jesucristo may'ajt tunìpy mîid miich ajcxy, jigix jêbi jotcujc mdzìnaaygixy, etz nañ jadu'n jêbi mnaychójcìgixy mnayjihuìyìgixy miñ xyìpy, etz jigix jêbi mjacmibijccixy Cristo. ²⁴ Huen Dios may'ajt oy'ajt tunìpy mîid miich ajcxy huídibi yajmìj'ajtcìxp ajt nHuindzin Jesucristo huiñixì huiñitiempo. E ca' m'ixmàjtzcìxip nimina nej ajcxy mìjpidaaccixy Jesucristo. Jadu'n jada. Amén.

FILIPENSES

Yi Necy Huidibi San Pablo Yajnigujx Je Mibijcpidijc Jim Filipos

¹ Ich Pablo mid Timoteo tumbich ma Jesucristo ytung. Jada necy ich ajcxy nguejxpy ma tug'ociy huidibi mibijcp Dios jim Filipos huidibi yajpaatp ma Jesucristo. Nañ jadu'n jada necy nyajniguexyich yi' ajcxy migtungmidpi etz mutztungmidpi ma Dios ytung. ² Huen ich ajt nDios Teedy etz ajt nHuindzin Jesucristo may'ajt etz oy'ajt tunipy mid miich ajcxy ycixpi etz xyajjotcugiygixipy.

Pablo mibijctzoy Dios mid je mibijcpidijc ycixpi

³ Naag'oc naag'oc njäymeich miich ajcxy njatytimyajnaxpyich jäygidacän ma Dios mid miich ajcxy ycixpi. ⁴ Njatytimjotcuje'ajtpich ooy naag'oc naag'oc Dios nmibijctzooyich mid miich ajcxy ycixpi. ⁵ Jotcuje'ajtpich com miich ajcxy ti xypubéjtcixyich co ngapxhuäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapxhuäcxych Jesucristo y'ayuc ixti chambaad. ⁶ Nejhuüybich tydudägy co Dios ti yajtzondägy yi oybi ytung ma miich ajcxy mjot mhuinma'ñ, etz jactunaamni ma miich ajcxy mjot mhuinma'ñ ixti mabaad Jesucristo anajty ymiñ jadüg'oc ya naaxhuiñ mid y'ane'min etz ymic'ajt. ⁷ Ooy ytudägyity co jadu'n jotcuje'ajtpich mid miich ajcxy ycixpi, com ooy ndzocy njihuüyich miich ajcxy. Dios may'ajt oy'ajt ti tuñ co ti xyajñibicyich jada tung, etz miich ajcxy myajpaady quipxy mid ich ma Dios ytung, mid co miich ajcxy xyjäymeich etz nañ xypubetyich ajcxy, huenma'amy ich nyajpaady, oy ixyipy pujxtigoty, oy ixyipy ma tungmidpi yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. ⁸ Dios ñejhuüyb jadu'n nej mijcajee ooy ndzocy njihuüyich miich ajcxy mid je tzojcin jihuüyin huidibi Jesucristo ti xymöyich. ⁹ Nmibijctzooybich Dios mid miich ajcxy ycixpi co xypubedipy ajcxy jigix jëbi nigi mdzogipy mjihuüipy migügtijc, etz jigix ajcxy nigi m'ixpigipy je tiy'ajt tudägyi, etz nañ nigi mhuinjihuüipy tug'ociy nej Dios tzocy co nduunim. ¹⁰ Nañ nmibijctzooybich Dios mid miich ajcxy ycixpi jigix jëbi mnejhuüygixipy, etz nañ jigix jëbi mhuin'ijxcixipy huidibi jac'oy mdúnggixipy. Co oy mdúnggixipy, huin'it jëbi mdzináaygixy mid huadz jot huadz huinma'ñ, e ca' ni ti jotmay miich anajty ajcxy mmidiñ, co anajty je xi je tiempo paady co Jesús anajty miñ ya naaxhuiñ jadüg'oc mid y'ane'min mid ymic'ajt. ¹¹ Dios nmibijctzooybich mid miich ajcxy ycixpi co ajcxy mbattähüp tug'ociy oyjot oyhuinma'ñ, je oyjot oyhuinma'ñ huidibi Jesucristo tügpajc jëbi xymoogyixy. E jadu'n jäy ajcxy capxpaadip Dios etz nañ huin'igixip Dios co ajcxy ixipy nej tudägy mdzinaaygixy.

Mid ich, yi njugy'ajtich, yi' yi' Cristo

¹² Ndzocjpyich co miich ajcxy mnejhuüipy co mid je tzaachypi ycixpi huidibi nminaxyp nyajnaxypich ya pujxtigoty, nigi mayjäy ti midoy Jesús y'ayuc ytiy'ajt. ¹³ Jadu'n ti yhuimbizimy co tug'ociy soldadtijc etz jacjadyii jäy ya ma je gobierno ymijtijc ti nejhuüydäy ajcxy co nbujxtijc'inäyich mid co nduunich ma Jesucristo ytung. ¹⁴ Nañ jadu'n mid co nbujxtijc'inäyich, paady ycixpi yi jacjadyii mibijcpidijc ti yjotmicpijccixy ma ajt nHuindzin Jesucristo tung, etz ycapxhuäcx'y'adiichpy ajcxy Dios y'ayuc ytiy'ajt, ca' ma tzig'iñ jihu'iñ.

¹⁵ Janch t̄iy'ajt jada co nij̄j̄ity jāy capxhuäcxy je Cristo y'ayuc yt̄iy'ajt m̄id co ca' xyajmidzojccixy, etz nañ m̄id co xyajmidzip'ajtcixy. Nañ t̄iy'ajt jada co jacjadyii migügt̄ijc xychojcp xyjihuiyb ajcxy, e capxhuäcxy ajcxy je Cristo y'ayuc yt̄iy'ajt m̄id oyjot oyhuinma'ñ. ¹⁶ Janch t̄iy'ajt co nij̄j̄ity migügt̄ijc capxhuäcxcixy Jesucristo y'ayuc m̄id co ñaygömaya'ñyii ci'm, ca' nminaanim ycapxhuäcxp ajcxy cixyjot huinijot. Yi' ajcxy y'ixtaayb nej xyajtaj̄ipy xyajmaȳipyich, jadu'n nej ñich pujxtigoty n'ityich. ¹⁷ Yi' ajcxy huidibi xychojcpich xyjihuiybich ycapxhuäcxpy ajcxy Cristo y'ayuc com ñejhuuib ajcxy co ñich yam n'ityich pujxtigoty, m̄id co ti nhuinma'ñ nbidägyich co nn̄igapxpeda'ñich Jesucristo y'ayuc yt̄iy'ajt. ¹⁸ Pen jāy ajcxy capxhuäcxp Cristo y'ayuc m̄id co ñaygömaya'anigixy ci'm, o pen ycapxhuäcxp m̄id oyjot oyhuinma'ñ, ca' ñej̄ity, jotcuje'ajtpich co capxhuäcxy ajcxy Jesucristo y'ayuc.

¹⁹ Com nnejhuuibich co miich ajcxy mm̄ib̄ijctzoogixy Dios m̄id ñich ycixpi, e nañ nnejhuuibich co Jesucristo yjihui'ñ ymic'ajt xypubetyich, paady ñigi njotcuḡiyich, e nañ nj̄jp'ijxypich co nbidzima'ñich pujxtigoty. ²⁰ Ndzojcpyich etz nañ nj̄jp'ijxpyich co nm̄imadactähua'ñich t̄üg'óciy ma ñich mdzinaayin, e ca' ti tzöydu'n nbáadibich ma Dios yhuinduu. Ndzojcpyich nañ nj̄jp'ijxpyich co njaccapxhuäcxibich Jesucristo y'ayuc huinmic jotmic, jigix Jesucristo ycōmay'idipy. Ca' ñej̄ity pen jactzinaayb, o pen n'o'cpich. ²¹ ñich ndzinaayin njuugy'ajtin Cristo yi' ycixpi, e peni n'o'cpich, ti ñich anajty mij nmadägy. ²² Pen njactzinaaybich, mayjāy oybi pada'ñ m̄id ñich ndung ycixpi. Ca' nnejhuuibich huidibi jac'oy nhuin'ixipyich co tzojc n'ögibich, o co njactzināhuibich. ²³ Ooy chachchipity nnejhuuibich huidibi jac'oy nhuin'ixipyich, co n'ögibyich, o co njactzināhuibyich. ñich ci'm nayjihuiyijich ñigi jotcuje co ixypy tzojc n'ögyich, jigix ixypy mic'amy nicxy n'ityich j̄iby tzajpjoty ma Cristo yajpaady. ²⁴ Per jaccopity m̄id miich ajcxy m'oy'ajtin ycixpi, co njactzināhuibich. ²⁵ Com nnejhuuibich co copicy njacpubeda'ñich miich ajcxy, paady nnejhuuibich co njactzināhuibich, e jigix j̄ebi nbubejtcixy ma Dios ytung etz ma yi' mm̄ib̄ijcin. E jadu'n miich ajcxy ñigi mjotcuje'adipy ma mm̄ib̄ijcin. ²⁶ Miich ajcxy huidibi yajpaatp ma Jesucristo, ñigi jotcuje m'idipy co nicxy n'ida'ñich jadüg'oc ma miich ajcxy.

²⁷ J̄eyi jancht̄iy co mdzinaayin mjugy'ajtin m̄ij̄itcixy jadu'n nej Cristo y'ayuc yt̄iy'ajt y'ane'my. Pen nicxp̄ich anajty ci'm ma miich ajcxy, o pen ca' nn̄icxyich, per ndzojcp̄ich co xypáadibich t̄iy'ajt co miich mic m'ij̄itcixy ma mm̄ib̄ijcin, tú'ciy cixyjot huinijot mdungixy. Mic mjanchmidinaaygixy ni'amugi' yi' mm̄ib̄ijcin, jadu'n nej ti mm̄ij̄idaaccixy Jesucristo yt̄iy'ajt, ²⁸ e ca'ajcxy mdziḡihui co jāy ajcxy xym̄idziptzóngixipy, jada je' t̄iy'ajt co t̄igoyamb ajcxy y'alma, e nañ jada je' t̄iy'ajt co miich ajcxy chóocixipy yi' m'alma, e nañ jadu'n jada t̄iy'ajtip co Dios y'ity m̄id miich ajcxy. ²⁹ Dios may'ajt oy'ajt ti tuñ m̄id miich ajcxy ycixpi co yaj'oȳiy nej j̄ebi miich ajcxy m̄ib̄ijccixy Jesucristo etz nañ nej j̄ebi tzaachyp̄i m̄inajxcixy myajnajxcixy m̄id Jesucristo ycixpi. ³⁰ ñich etz miich ajcxy quipxyi ti n̄inajxim ti nyajnajxim tung ayo'n m̄id Jesucristo ycixpi. Miich ajcxy ti m'ixy ti mnejhuuib jadu'n nej ñich ndung n'ayo'n ti n̄inaxy ti nyajnaxyich, co jim anajty n'ityich ma miich ajcxy. E nañ miich ajcxy mnejhuuib nej ñich chambaad n̄inaxy nyajnaxyich ndung n'ayo'nich m̄id Cristo ycixpi.

2

Cristo yung'ajt ñax'ajt etz ymij'ajt

¹ Pen Cristo miich ajcxy mjot'amijmooyb mïd yjihuï'ñ mïd ymic'ajt, pen ti jotcuyc'ajtin mbatcixy mïd co Cristo xychojccixy xyjihuïyigixy, pen yï' yjihuï'ñ ymic'ajt ijtp ma miich ajcxy, pen mdzojccixyp mjihuïyigixyp etz nañ mba'ayoogixy migügtjic, ² jotcuyc'adipich mïd co mdzinaaygixy ooy yajxon, xic xon, tügyi mnaychójcigixy mnayjihuïyigixy miñ xyipy, tzinaaygixy quipxyjot quipxyhuinma'ñ. ³ Ca' ajcxy ti mdunipy mïd mgï'mdzojcin ycixpi. Nañ ni ca' amij agix naybidáacigixy co ti mdungixy. Tüg'óciy huidibi mdungixyp, mdunipy ajcxy mïd yung naxy mjot mhuinma'ñ. Nidüg nidüg myajmij'adipy nigü migügtjic, ca'ydi nej miich ci'm mnayyajmij'adyii. ⁴ Ca' huaad pin naydügpajc yci'm'oy'ajt ixtäy, nañ jadu'n tzocy co migügtjic myajmidzogipy y'oy'ajt.

⁵ Pidaaccix mjot mhuinma'ñ tú'ciy jadu'n nej Jesucristo anajty yhuinma'ñ mïdity co ya naaxhuiñ chinay. ⁶ Oy Jesucristo yjaDiosity ti yhuinma'ñypidägy co jëbi ixmach yï' ymij'ajtin huidibi anajty yjamïd. ⁷ Jesucristo ahuingujc pidaactay je mij'ajt huidibi anajty ymïd, e chi jadu'n chinay nej tüg tumbi co oy jadu'n ypi'c'aty jadu'n nej jäy. ⁸ E co jadu'n ñaybidaaci nej naaxhuiñjäy, chi yung naxy pidacy yjot yhuinma'ñ, e nañ capxymidooy Dios ixti mibaad ñayejci, huen jäy yaj'ögyii. E ooy anajty cho'ydu'nity co jäy yaj'o'ci cruudzcixy. ⁹ Paady ycixp Dios ti cömay jacnigi Jesucristo, e ti pidäci yï' yxi jaccömay, ca'ydi jacpinjäy yxi. ¹⁰ Jadu'n Dios ti cömay Jesús, jigix jëbi tüg'óciy tzajpjoty tzinaaybi etz tüg'óciy naaxhuiñjäy, etz tüg'óciy jäy ajcxy huidibi ti ñaaxtigiy, co anajty ajcxy nidüg'óciy midoogixy co Dios capxpaatip Jesús yxi, chi ycojxtinaay'ihuïydähuipy ajcxy ma yï' yhuinduu, etz y'ojadadipy ajcxy Jesús nidüg'óciy. ¹¹ E co nidüg'óciy ajcxy cöbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycömay'ida'ñ.

Yi pin ajcxy Cristo mibijcp, yï' yï' ajcxy jadu'n nej tüg tïcxin jajin

¹² Migügtjic ajcxy huidibi ooy ndzocy njihuïyich, com Jesucristo jadu'n ijxpejtin ti yecy, capxymidoogich cham co jigügy nyajpaadyich ma miich ajcxy, tim jadu'n nej jayhuin ich miich ajcxy xycapxymidooy co n'ijtyich ma miich ajcxy. Naymijottigóoyigix jabom jabom mguydungixy Jesucristo ytiy'ajt etz mmi'ijtcix huädz mjot huädz mhuinma'ñ. Tungix Dios ytung mïd yung naxy ajcxy mjot mhuinma'ñ, e huindzigüygix Dios. ¹³ Com Dios yï' tumb jabom jabom ma miich ajcxy mjot mhuinma'ñ, jigix jëbi miich ajcxy mdunipy yï' ytung yï' chojcin cixyot huinijot jadu'n nej Dios tzocy.

¹⁴ Tungix cixyot huinijot Dios ytung, ca'y'aametzity yjotmetzity, nañ ni ca' mïd tzip ejcin. ¹⁵⁻¹⁶ Jadu'n mdunipy ajcxy ca'ydi pinjaty yxigixy co ti mdundigoogixy. Miich ajcxy Dios xy'ung'adiib, ca' mnigix'adiyb ajcxy ti jibicpi. Tzinaaygix mïd oyjot oyhuinma'ñ ma yï' jäy ajcxy yajpaady huïdi jibic-huinma'ñ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjogy'ajtin mooyb ma jibicjäydijc ajcxy, jadu'n nipaady nej tüg madzä ytïcxy coodz. Pen jadu'n mdungixy, co anajty Cristo ymiñ jadüg'oc ya naaxhuiñ, jotcuyc'adipich co anajty nnejhuïyich co ca' ich ndung etz nxii ndiempo yñadigï'aty co n'ijtyich ma miich ajcxy. ¹⁷ Co n'ögibich mïd Cristo ytung ycixpi, jadu'n nipaady nejjihuïy ich nni'py ti ndem ti nyocyich mïd miich ajcxy ycixpi co ti ngapx-huäcxich Dios y'ayuc ma miich ajcxy. E co miich ajcxy ti mmijpidaaccixy ich n'ayuc, jadu'n nipaady nejjihuïy miich ajcxy ti myoxy ti mdoogy yï' mjogy'ajtin ma Jesucristo. Jotcuyc'ajtpich jadu'n co miich ajcxy mjogy'ajtin ti myoxy ti mdoogy ma Jesucristo. ¹⁸ Nañ jadu'n miich ajcxy mjotcuyc'adipy quipxy mïd ich.

Timoteo etz Epafrodito

¹⁹ Pen ñich ajt nHuindzin Jesús tzojczy, njjyp'ijxypich co jëbi nguexipyich Timoteo ma miich ajcxy, jaydëbi njotcuyc'adipyich co anajty yí' xyajnimiiñich tiy'ajt nej miich ajcxy myajpaady. ²⁰ Timoteo tügpaic huídibi huinma'ñ tú'ciy mïd jadu'n nej ñich nhuinma'ñ nmïdidyich, etz nañ huídibi janch naybidaacip mïd miich ajcxy m'oy'ajtín ycixpi. ²¹ Yí jacjadyii migügtjic huídibi yajpatp ma ñich, yajcopijczy ajcxy yci'm'oy'ajtín, e ca' ajcxy yajcopicy Jesucristo ytung. ²² Miich ajcxy mnejhuñyb jadu'n nej Timoteo tudägy ytuñ mïd ñich co ngapxhuäcxyich Jesucristo y'ayuc ma miich ajcxy, tim jadu'n nej tüg ung ytuñ mïd yteedy. ²³ Paady ycixp njjyp'ijxypich co jëbi nguexyich Timoteo ma miich ajcxy mina anajty nnejhuñyich nej ycixipy ñich njotmay huídibi nmïdich ya. ²⁴ Nañ nmibijcypich ajt nHuindzin Jesucristo co yaj'ahuädzip ñich nnñ'a ndü'a co jëbi ñich ci'm ñicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yí' huídibi xypubejtpich ma ndung n'ayo'nich ya. Yí' huídibi miich ajcxy ti mguexy ma ñich, jëbi xypubetyich ma tüg'óciy huídijaty nyajmayajtypich. ²⁶ Epafrodito ooy nijot'aty co jëbi ñicxy y'ixaangixy miich ajcxy nidüg'óciy. Ooy yí' ytajy ymaay co miich ajcxy ti mnejhuñy co ypygyii. ²⁷ Janch tiy'ajt co Epafrodito ooy ti ypygyii, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi ñigi ayo'n jotmay nbaadyich. ²⁸ Paady ycixp ñigi ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcugihup co m'ixipy. E nañ jadu'n jëbi yquëgy ñich ndajin mayin mïd yí' ycixpi. ²⁹ Cöbijccix Epafrodito jotcuyc, jadu'n nej tüg migüg huídibi yajpaatp ma ajt nHuindzin Jesús. Yajmij'ajtcix tüg'óciy migügtjic huídibi yjugy'ajtín yojxp toocp mïd Jesucristo ytung ycixpi, jadu'n nej yí' ti ytuñ. ³⁰ Com jago jago Epafrodito ti yca'ögy mïd Cristo ytung ycixpi. Tzip tzaach yjugy'ajtín ti minaxy ti yajnaxy co ti xypubetyich ya. Com miich ajcxy ca' ci'm jëbi xypubéjtcixyich ya, paady yí' miich ajcxy ti xycodinäy.

3

Je tudägy'ajt je janchypí

¹ Jadügnax, migügtjic ajcxy, jotcuyc'ajtcix co myajpatcixy ma ajt nHuindzin Jesucristo. Ca' ti adzjipin njihuñyich co nnëgapxpetyich jada tiy'ajt jadüg'oc huídibi jayhuin ti nyajnijayñygyxy. Jadu'n nduñich mïd miich ajcxy m'oy'ajtín ycixpi. ² Naygüendi'ajtigix mïd yí' ajcxy y'ayuc huídibi ajcxy tundigooyb co ajcxy yajcopijczy yí' tiy'ajt huídibi pidacp ma jäy ñinïcx mïd tzujc. Jibic jäy yí' ajcxy, jadu'n ajcxy nipaady nej uc. ³ Yí jäy ajcxy huídibi tiydudägy mibijcp Dios, ca' nmïnaanim je' yí' ajcxy huídibi tiy'ajttiyip ñinïcx. Yí Dios yjäy ajcxy janchypí, yí' ajcxy cixyjot huinijot mibijcp mijpidacp Dios ytiy'ajt jadu'n nej ñich ajt. ñich ajt n'ojadajtim Dios mïd ajt n'espíritu, etz mïd ajt njot nhuinma'ñ. Jotcuyc'ajtim com je' co nyajpaatim ma Cristo Jesús, e ca' nyajcopijcim tijaty tiy'ajt huídibi jäy ajcxy ytumyb. ⁴ Co ixypy ytiy'ajtiy yí' jadu'mbi huinma'ñ, jëbi ixypy naygömayijich ci'm, com jecy'ajty ca' anajty ni pin huídibi ñigi cuyduun yí' jadu'mbi tiy'ajt ca'ydi ñich. ⁵ Co nductujcxñijyich ma anajty ti nma'xung'atyich, chi oy nyajtiy'ajttiyich. Raza hebrea ñich, Benjamín nmij'ap'ajtpyich nmijteedy'ajtpyich. Nma'xung'ajtich hebreojäy. ñich ndaj ndeedy hebreojäy ajcxy anajty. Nañ nmijpidaacich fariseo y'ixpijin, jadu'n nej ajcxy yajnëguejy judíojäy ycötujcin. ⁶ ñich janchmictägy anajty nguyduñich ngi'mhuinma'ñich, ixti mabaad anajty n'ixhudity nbahudityich

mictägy yi jäy ajcxy huídibi anajty mijpidacp Jesucristo. Ti nguydundäyich tüg'óciy judíojäy ycötujcín. Ni pin ca' huaad yxíyich co ti ndundigooyich ma yi' ajcxy ycötujcín. ⁷ Tüg'óciy yi judíojäy yhuinma'ñ huídibi ti nyajcopicyich anajty, jadachambi ca' ytimychobaady mïd ñich, co ti nmijpidägyich Cristo ytiy'ajt. ⁸ Jadachambi janchtiy, huídijaty anajty nyajcopijcpiyich, ti nnajtz'ixíydäyich, jigix jëbi nnejhuíhuibich etz nguydunipich yajxon ajt nHuindzin Jesucristo oybi y'ayuc ytiy'ajt. Mïd co ti nmijpidägyich Jesucristo, paady nnajtz'ixíydaayich tüg'óciy huídibi anajty nyajcopijcpiyich, yi jadu'mbi huinma'ñ cham ca' chobaady mïd ñich, jadu'n nipaady nej püx. Jadu'n nduuñich mïd Jesucristo ytiy'ajt oy'ajt ycixpi. ⁹ E jadu'n nduuñich jigix jëbi nyajpaadyich ma Jesucristo. Jadu'n ti nnajtz'ixíydäyich je tudägy'ajtin huídibi ti nbaadyich co ti nguyduuñich Moisés ycötujcín je jecyip. Nañ jadu'n nduñich jigix jëbi nbáadibich je tudägy'ajtin huídibi Dios yejcpy co nmibijcim nmijpidaacim Jesucristo. ¹⁰ Ndzojcpyich co njacnejhuíhuibich Cristo y'ayuc ytiy'ajt. Nañ ndzojcpyich co njacnejhuíhuibich Cristo ymic'ajt, jadu'n nej yjugypicy co y'o'cy. Nañ ndzojcpyich co njacminaxipyich njacyajnaxipyich tzaachypi jadu'n nej Jesús minaxy yajnaxy tzaachypi, ixti mabaad jadu'n njatyich jadu'n nej Cristo yajty co y'o'cy. ¹¹ E paady ycixpi njjip'ijxpyich co n'ögibich njugypigipyich jadüg'oc co anajty Dios yajjugypicy yi jäy ajcxy tiibi y'öccixy.

Naymic'ijxim jigix nbaatim huídibi Dios ti xyaj'ahuaníyim

¹² Ca' nminaanim jadu'n nmína'ñich co ti nmimadactäyich nej Cristo ti mimadactäy. Nañ ni ca' jadu'n nmína'ñich co ñich njot nhuinma'ñ ti nyajhuätztäyich. Njactumnich, jigix jëbi Cristo y'oy'ajtin nbáadibich. Com Jesucristo ti xyhuin'ixyich jayijp, jaydëbi jada oy'ajtin nbáadibich. ¹³ Migügtijc ajcxy, ca'ñich ci'm naygömayiijich, co ti nmimadactäyich Cristo y'oy'ajtin. Jada janchtiy ndumbyich, njäydigoydaaybich tüg'óciy huídibi ti ñaxy, e mictägy nduuñich jëbi nbáadibich je oy'ajtin huídibi Dios jiiby tzajpjoty xymöhuaambich mïd co nyajpaadyich ma Jesucristo. ¹⁴ Mictägy nduuñich mïd tüg'óciy nmic'ajtich, jigix jëbi nbáadibich je oy'ajtin huídibi Dios jiiby tzajpjoty xymöhuaambich. Jadu'n nipaady nejhuíy mïd pin nayboyicquipxyijich co nbada'ñich tüg premio.

¹⁵ ñich ajt ti nhuinma'ñ ycixni yca'pxni, tzoc panícxim je ixpijcin huídibi nmïd'ajtim. E pen nidügti miich ajcxy tigachjaty huinma'ñ mïdity, Dios xyajnejhuíhuip ajcxy je tiy'ajt. ¹⁶ Jada janchtiy, je tiy'ajt huídibi ti nbaatim copicy nguydundaayim, ca' n'ixmajtzim.

¹⁷ Migügtijc ajcxy, paníxcix ñich n'ijxpejt jadu'n nej ti ndzinäyich ma miich ajcxy. Nañ jadu'n miich ajcxy ixpejt mbigipy ma yi' ajcxy chinaayin huídibi ixpejt ti patcixy ma ñich. ¹⁸ Canaag'oc ti nnimaaygixy, e nnimaaygixy jadüg'oc mïd tajin mayin co may nmigügtijc chinaaygixy jadu'n nej jihuíy midzip'ajtcixy je Cristo huídibi o'c cruudzcíxy mïd ajt nbocy ycixpi. ¹⁹ Dios yajtigoyip je ajcxy y'alma. Yi' ajcxy ypidacpy yhuinma'ñ ma yi' caayin uucin jicxy ypiy, ma yjapadyii huen yjot yhuinma'ñ pidaaccixy ma Dios. Yi' ajcxy chachñaygömáayigixy ci'm ma yjapadyii tzo'ydu'n jihuíyigixipy. Hue' pidaaccixy yhuinma'ñ ma naaxhuiñ jäy chinaayin. ²⁰ ñich ajt hue' nyajpaatim njäy'ajtim tzajpjoty, e njjip'ijxim co ñich ajt nHuindzin Jesucristo miinaamb ya naaxhuiñ jadüg'oc, chona'ñ tzajpjoty, je huídibi xyajnïdzögaanim ajt n'alma. ²¹ Jesucristo xyajtigadzaanim ajt nninícx pocymïdipi, e xymöhuaanim tüg ninícx jemybi oybi, tim jadu'n nej yi' ñinícx mïdity. Cristo xyajtigadzaanim ajt nninícx mïd yi' ymic'ajt huídibi mïd ane'mdäy mimadactäy.

4

Jotcuje'ajtcixy ajcxy ma je mHuindzin Jesús

¹ Com Jesús xyajtigadzaanim ajt nninix, paady ycixpi migügtijc huidibi ooy ndzocy njihuiyich, tiydudägy mibijccix ajt nHuindzin Jesucristo, ca' m'ixtigihuäccixy ma mmibijcin. Migügtijc ajcxy huidibi ooy nicxy nja'ixa'ñich, ooy njotcuje'atyich miid miich ajcxy ycixpi. Miid miich ajcxy ycixpi nbada'ñich n'oy'ajtin ma Dios.

² Nbijctzooybich may'ajt ma Evodia etz ma Síntique co huen ajcxy ixmajtcixy yi tzip etz huen naymigügpjicigixy jadüg'oc, com hue'ajcxy yajpaady mibijcpi ma Cristo. ³ Miich migüg huidibi ti xpubetyich ma Cristo ytung, may'ajt nbijctzooybich ma miich co mgapx'oyihuipy je tzip ma ajcxy je metzpi töxyjäy. Yijibi metzpi töxyjäy tumb anajty ajcxy quipxyi miid ñich co ngapxhuäccixyich Jesucristo y'ayuc ytiy'ajt. Yi' ajcxy xypubejtich quipxyi miid Clemente etz yi jacjadyii huidibi anajty tumb quipxyi miid ñich. Jada metzpi töxyjäy ajcxy yxi ycojayiy ymiin ma Dios ñecy, je necy ma Dios mädity cojay je jäy ajcxy yxi huidibi padamb jugy'ajtin huinixibi.

⁴ Jotcuje'ajtcix huinixi, miid co myajpatcixy ma ñich ajt nHuindzin Jesucristo. Jadüg'oc nigapxpetyich co huen jotcuje'ajtcixy. ⁵ Jadu'n tzinaaygix jadu'n nej jëbi jäy ajcxy nejhuuygixy co miich ajcxy myajtungixy mecxtujcin ma mdzinaayin. Com huington je xi je tiempo mina ymiina'ñ ñich ajt nHuindzin Jesucristo jadüg'oc.

⁶ Ca' ni ti mnidajcixy mnimaygixy. Capxpizimdaaygix ma Dios tüg'óciy ti jotmay miich ajcxy mmid. Mibijctzoogix Dios, e nañ yajnajxcix jäygidaacin ma Dios. ⁷ Co Dios mmibijctzóogixipy, huin'it ajcxy yi' xymöhuip jotcuje'ajtin mijcajee, e mayñaaxhuiñyjäy ajcxy ooy yhuinmay ahuididipy miid miich ajcxy m'oy'ajtin ycixpi. Co myajpaady ajcxy ma Cristo Jesús, paady ycixpi Dios xyajtzinahuipy ajcxy jotcuje etz xymöhuip ajcxy huinma'ñ tudägyi.

Tzojccix nijot'ajtcix huidibi oyip

⁸ Jadügnax, migügtijc ajcxy, pidaaccix mhuinma'ñ ma tüg'óciy tiy'ajt huidibi janchip, tüg'óciy tiy'ajt huidibi jëbi nyajmij'ajtim. Pidaaccix mhuinma'ñ ma tüg'óciy tiy'ajt huidibi tudägyip. Pidaaccix mhuinma'ñ ma tüg'óciy huinma'ñ huidi huädzip etz tüg'óciy huinma'ñ huidi oy jäygidaacni. Pidaaccix mhuinma'ñ ma tüg'óciy huinma'ñ huidibi jëbi yajcapxaady. Huinmaaygix tüg'óciy jada oybi huinma'ñ etz huidibi huaad njäygidaacim.

⁹ Yajtungix je tiy'ajt huidibi ti nyaj'ixpijicixy, etz je cötuje huidibi ti nmooygixy, etz je ayuc huidibi ti mmidoogixy co ti ngapxyich. Etz nañ tungix je iixpejt huidibi ti nyecyich. Cuydungix jada tiy'ajt, huin'it yi Dios yajpaadipy ma miich ajcxy etz xyajjotcuje'idipy ajcxy.

Filipenses ajcxy y'ofrendi miid Pablo ycixpi

¹⁰ ñich ajt nHuindzin Jesucristo ti ooy xyajjotcugiyich co je tiy'ajt xypaadyich co miich ajcxy xyjäy mechich jadüg'oc. Ca' nminaanim nmina'ñich co miich ajcxy ti xyjäy digoydaayñich. Hue' anajty ycanibidzimy nej jëbi xypubejtixyich. ¹¹ Ca' nminaanim jadu'n nmina'ñich co ooy ti jaty nyajmayajtnich. Com ti huinma'ñ nbidägyich co njotcuje'adipyich miid tijaty nmidich, oy tim minaaxi tim mnaatiempo. ¹² Com ñich ci'm nejhuuybich nej jay ajcxy y'ayoy yjottigooy, e nañ nejhuuybich nej jäy ajcxy chinäy co miid'aty tijaty may'amy. Ti nnejhuuydäyich nej jëbi ndzinäyich, nej jëbi nyajnajxich xi tiempo; pen cu'xyi ngaayich, o pen ca' cu'xyi ngayich, pen nmidich conax, o pen ca' ti nmididyich. ¹³ Jëbi ndzinahuibich jotcuje huenti huennejity, com

Cristo xymic'ajtmooybich. ¹⁴ Ooy oy ti mdungixy co ti xypubéjtcixyich ma ich n'ayo'n n jotmay.

¹⁵ Jadu'n nej miich ajcxy huidi jim Filipos mnejhuib ajcxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzooñich jim Macedonia miich ajcxy ti xymiooxyich, e jac tigati ti mguejxcixy ma ich. E miich ajcxy jim Filipos huidibi mibijcp Jesús, miich ajcxy tügpajc xypubejtich ca' jac ni pin. ¹⁶ Co n'ijtyich jim Tesalónica miich ajcxy xyajnigüe-jxyich pubejtin metz'oc tugig'oc, e jadu'n miich ajcxy xypubejtyich müd huidibi anajty nyajmayjajtpich. ¹⁷ Ca' nminaanim ooy ndzachjipp'ixynich pubejtin, jada janchtiy ndzojcpyich co miich ajcxy nig' oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadiy yi mbubejtin ixti nyajconajxpich. Müd je pubejtin huidibi ti myajmiguejxcixy Epafrodito cham nmüdidyich ca'pxy, ca'ti n'ocyajmayjajtnich. Müd jada pubejtin huidibi miich ajcxy ti xymöyich, ti ooy njäygidägyich, tim jadu'n nej Dios jäygidacy je poomjoc huidibi yajhuindzigiyi. ¹⁹ Ich nDios miich ajcxy xymöhüip tüg'óciy huidibi miich ajcxy myajmayjajtpy. Mijcajee yi' miich ajcxy xymöhüip yi oybi mijpi oy'ajtin huidibi yi' ymüd ma yi Jesucristo. ²⁰ ¡Huen ich ajt nDios Teedy cömay'idipy huinixi huinitempo! Jadu'n jada. Amén.

Capxpoox'in huidibi cijxnip je necy

²¹ Tungix may'ajt capxpooxcix müd ich ycixpi tüg'óciy migügtijc huidibi yajpatp ma ajt nHuindzin Jesucristo. Je migügtijc huidibi yajpatp müd ich nañ jadu'n xyajnigüe-jxcixy capxpoox'in. ²² Tüg'óciy je mibijcpidijc huidibi yajpatp ya cajpjoty xyajnigüe-jxp ajcxy capxpoox'in, yi' ooy ytimyjayijpity huidibi ajcxy yajpatp ma je mij ane'mbi César ycötujctac xyajnigüe-jxyp ajcxy capxpoox'in.

²³ Huen ich ajt nHuindzin Jesucristo may'ajt oy'ajt tunipy müd tüg'óciy miich ajcxy. Jadu'n ngapxycixyich. Amén.

COLOSENSES

Yi Necy Huidi San Pablo Yajniejx Je Mibijcpidijc Jim Colosas

¹ Hich Pablo, Dios jadu'n tzojcp, paady Jesucristo ti xyajniejcyich jëbi ngapx-huäcxyich yi 'y'ayuc. ² Hich mïd ajt nmigüg Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjyä'ajtíp e mmibijccixy yi Cristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy mïd miich ajcxy etz xyajjotcugiygixip.

Pablo mibijctzoy Dios mïd mibijcpidijc ycixpi

³ Jabom jabom co ich ajcxy Dios nmibijctzoy, chi nyajnaxich jäygidacïn ma Dios, nHuindzin Jesucristo ajt yTeedy, mïd miich ajcxy ycixpi. ⁴⁻⁵ Ti nnejhuïyich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjihuïygixy tüg'óciy migügtijc. Mïd co miich ajcxy mjijp'ixy co Dios mïdity tijaty yujcpiy tzajpjoty huidibi miich ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzojccixy mjihuïygixy migügtijc. Co jayhuin migügtijc capxhuäcxy Jesucristo y'ayuc ytiy'ajt ma miich ajcxy, huin'it ti mnejhuïygixy co Dios mïdity tzajpjoty huidi njijp'ijxyp mbadaangixp. ⁶ Jadayaabi tiy'ajt huidibi migügtijc ti capxhuäcxy ma miich ajcxy, nañ yajcapxhuäcx'aditzn ma tüg'óciy naax cajp etz mayjäy mijpidaaccixy. Miich ajcxy ti mmibijccixy jadu'n nej oga'n yajnimiydacy e chambaadni co Dios may'ajt ti tuñ mïd jäy ajcxy ycixpi, e nañ miich ajcxy mnejhuïyb tiydudägy Dios ytiy'ajt. ⁷ Jada tiy'ajt ti xyajnejhuïygixy je Epafras, ich ajt nmigüg huidibi ooy ndzocy njihuïyich, huidibi tudägy tumb ma Dios y'ayuc quipxyi mïd ich. Epafras ti xycodinäyich ma miich ajcxy, e tiydudägy miich ajcxy xyaj'ijxpjicy Cristo ytiy'ajt. ⁸ Epafras ti xyajnejhuïyich tiy'ajt jadu'n nej miich ajcxy myajpatcixy, etz jadu'n nej je Espíritu Santo ymic'ajt xymoogixy, jigix ajcxy mdzogipy mjihuïhuipy tüg'óciy migügtijc.

⁹ Mïd jada ycixpi ich ajcxy jabom jabom Dios nmibijctzooyich mïd miich ajcxy ycixpi, jadu'n nduunich chondacy co oga'n nnejhuïyich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhujnhuïhuipy mnejhuïhuipy tüg'óciy Dios chojcin. Dios nmibijctzooybich co yi' Espíritu Santo miich ajcxy xyaj'ijxpigipy xyajnejhuïhuipy ajcxy tüg'óciy yi' ytiy'ajt etz yi' chojcin. ¹⁰ Dios nmibijctzooybich jaydëbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjogy'ajtin. E nañ jaydëbi ajcxy mdunipy oyjäy'ajtin. E nañ jaydëbi jabom jabom yjacyujcpejtcixy yi' m'ixpjin ma Dios. ¹¹ Dios nmibijctzooybich jigix yi' xymöhuipy ajcxy mic'ajt jadu'n nej yi' mïdity ymic'ajt mijpi, jigix jëbi miich ajcxy jotcuyc myajnaxipy etz mecxtujctähuip tüg'óciy tzaachypi etz ayo'n. ¹² Dios nmibijctzooybich co miich ajcxy agujc jotcuyc myajnaxipy Dioscojuyip ma Dios Teedy, com Dios Teedy ajt xyajpocyñhuaatzim, e jadu'n ti xyñ'ixiyim jëbi nbaatim tüg it lugar tzajpjoty quipxyi mïd tüg'óciy mibijcpidijc huidibi tiydudägy tzinaaygixp mïd Dios ytiy'ajt, jadu'n nipaady nejihuïy nej miich ajcxy mdzinäy ma je ticxin. ¹³ Ti Dios xyajniehuädzictuutim ma yi' jibic-huinmañ ma je mujcu' xy'ane'mim, jadu'n nipaady nejihuïy ti xyajpidzimim agootztuum. Ti Dios

xypidaacim ma y'ung y'ane'my, je' y'ung huidibi yi' ooy tzocy ooy jihuüy. ¹⁴ Dios y'ung ti xyajñihuädzictuutim ma yi jibic-huinma'ñ co ñi'py temy yojcy ma yi cruudz miid ajt nbocy ycixpi, e ti xypocyhuinmeecxim.

Co Cristo y'o'cy miid ajt nbocy ycixpi, chi jotcuyc n'ijtım miid Dios

¹⁵ Ca' pin ti ixyc Dios. Pinjaty ti ixyc Dios y'ung, jadu'n nipaady nej ti ixyc Dios. Dios y'ung yi' je' anajty tim jayijp ma anajty Dios ca' ti yaj'oyiñi. ¹⁶ Dios y'ung ti cojtay tög'óciy tijaty yajpaatp jiihy tzajpjoty etz ya naaxhuiñgíxy. Dios y'ung cojtay tög'óciy huidibi jébi huaad n'ijxim etz nañ cojtay huidibi ca' huaad pin ixyc. Dios y'ung pidaactay tög'óciy y'ane'min tög'óciy mic'ajt ya naaxhuiñ, etz nañ jadu'n pidactay ane'min miid yi tzajpjoty tzinaaybi. Dios y'ung ti yajcojtäy ti yaj'abadiydäy tijaty miid yigixp. ¹⁷ Je Cristo jayijp y'ane'm'ajt ymic'ajt ti paady, ca' jac ni pin. Je Cristo yaj'ijtpy tög'óciy huidijaty ya yajpatp huijtz'ijttaayb. ¹⁸ Je Cristo ñihuindzin'ajttaayb ñigohuajc'ajttaayb, etz y'ane'mdaayb tög'óciy jäy huidibi mibijcip mijpidaacip. Je Cristo yajtzinaayb yajjugy'ajtpy tög'óciy mibijcpidijc, com yi' je' huidibi jayijp ti yjugypicy co y'o'cy. Paady ycixp yi' cötujcin mijpi miidity. ¹⁹ Dios hue' tzojcy co tög'óciy yi' ymic'ajt etz ymij'ajt yajpaadip ma yi' y'ung. ²⁰ Je naaxhuiñyäjy etz je tzajpjoty tzinaayb ajcxy ca'oy'ijtcixy miid Dios miid je mijpocy ycixpi. Dios oy jäygidägy ooy jotcuyc nayjihuiyi co y'ung y'o'cy cruudzcixy miid je mijpocy ycixpi e jadu'n oyiiy nej jébi je naaxhuiñyäjy etz je tzajpjoty tzinaaybi ajcxy oy'ijtcixy miid Dios.

²¹⁻²² Miich ajcxy co anajty ca' mmibijccixy je Cristo, ca' anajty oy m'ijtcixy miid Dios. E jadu'n anajty m'ijtcixy nej tög midzip ma Dios, miid co jibicpi anajty mdungixy, etz miidity ajcxy jibic ma mjot mhuinma'ñ. Per jadachambi je Cristo ti capx'oyiy miich ajcxy je mdzip m'ejcin huidibi ajcxy miid Dios, co ti chinäy ya naaxhuiñ miid ñinïcx, e nañ co ti y'ögy miid miich ajcxy mbocy ycixpi. Miid co Cristo y'o'cy miid miich ajcxy mbocy ycixpi, jaydëbi myajpaaatcixipy ma Dios yhuinduu janch oyjäy, janch huätzjäy, ca' ti pocy mmidity, ca' ti xihuïn yjac-hu'my ma Dios miid miich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt huidibi ti mmidoogixy, jadu'n nej mijp'ijxcixy co je Cristo xyajñidzögaani ajcxy yi' m'alma. Je ayuc huidibi miich ajcxy ti mmidooy, je' je' huidibi migügtijc ti capxhuäcxy etz ycapxhuäcx'adiichñi ma tög'óciy naax cajp, jadu'n nej jébi jäy ajcxy y'alma yajñidzögipy. Nañ jadu'n iich, Pablo ngapxhuäcxypich jada ayuc quipxy miid nmigügtijcich.

Pablo cötujcmoy co ytunipy ma mibijcpidijc ajcxy

²⁴ Jotcuyc nnayjihuiyijich co tzaachypi nminaxy nyajnaxyich miid nninïcxich miid miich ajcxy ycixpi e jadu'n njacyajcixy njacyajca'pxich je tzaachypi huidibi Cristo yajtzondac co yi' tzaachypi minaxy yajnaxy miid je mibijcpidijc ycixpi e je mibijcpidijc ni paady nej Cristo ñinïcx. ²⁵ Dios ti xyyajñibicyich co ndunipyich miid yi jäy ajcxy huidibi mijpidaacip. Dios ti xypidägyich ma jada tung, jigix ngapxhuäcxibich tög'óciy Dios y'ayuc ytiy'ajt ma tög'óciy jäy ajcxy. ²⁶ Jecy'ajty canaag jimijt ti ñaxy co Dios ca'ni anajty yajniguëxigy yi' ytiy'ajt. Cham Dios ti yajniguëxigy yi' ytiy'ajt ma yi jäy ajcxy huidibi yi' yjäy'ajtipy. ²⁷ Dios oy nihuinmayiy co anajty yajnejhuñhua'ñ yi jäy ajcxy nidög'óciy je oybi ayuc tiy'ajt huidibi jecy'ajty ca' pin nejhuüy. Yi' je' je' tiy'ajt co Cristo yajpaady ma miich ajcxy mjot mhuinma'ñ, paady ycixpi jébi miich ajcxy mbaadip oy'ajtin jiihy tzajpjoty.

²⁸ Hich ajcxy ngapxhuäcxypich Cristo y'ayuc, n'ihuijpyich ngapxhuijpyich, nyaj'ixpijcpyich yajxon yi Cristo ytiy'ajt ma tüg'óciy jäy ajcxy, jaydëbi nya-jquëxigibich ma Cristo yhuinduu nidüg nidüg mibijcpidijc ca'pxy yhuinma'ñ. ²⁹ Müid jada ycixpi nduñich mictägy müid tüg'óciy je nmic'ajtich huidibi Cristo xymooybich jabom jabom.

2

¹ Ndzojcpyich co miich ajcxy mnejhuihuipy jadu'n nej mictägy nduuñich müid tajin mayin müid miich ajcxy ycixpi, etz müid yi mibijcpidijc huidi jim Laodicea ycixpi, etz nañ tüg'óciy mibijcpidijc ycixpi huidibi ti xy'ixyich ahuin ajijp. ² Mictägy nduuñich jaydëbi yi mibijcpidijc paadipy jotcujc'ajtin ma y'ay yjot, etz jaydëbi ajcxy ñaychójcigixipy ñayjihuiyigixipy mabaad jëbi m'ijtcixy yjot yhuinma'ñ tú'ciy. Mictägy nduuñich jaydëbi je mibijcpidijc m'ijtcixy mij jotcujc'ajtin co ajcxy huinjihuidyähuib Dios ytiy'ajt, je tiy'ajt huidibi jecy'ajty anajty ca' pin nejhuüy, je Dios ytiy'ajt maabi Cristo Jesús. ³ Ma je Cristo jim tüg'óciy tiy'ajt janchypi etz ixpijcin janchypi yajpaady. Jadu'n yi ytiy'ajt etz y'ixpijcin nej tüg'ajty. ⁴ Jadu'n nimaaygixy jigix ca' pin oy cohuin'ini e midigihuipy oy ayuc ma miich ajcxy ooy ymibijcni, e ca'yjanchity. ⁵ Ooy ich ngadim jimity, ixna' guëxna' ma miich ajcxy myajpatcixy. Hich njot nhuinma'ñ ca' yi jim ytigoy'ity ma miich ajcxy myajpatcixy. Jotcujc nayjihuiyijich co n'ijxcixy yajxon myajtyöygyxxy tüg'óciy etz mic yi mmibijcin müidity ajcxy ma Cristo.

⁶ E müid jada ycixpi jadu'n nej miich ajcxy ti mgöbijccixy je Huindzin Jesús oga'n'aty, jadu'n ajcxy jactzinaaygix jacjugy'ajtcix ma yi'. ⁷ Je tiy'ajt etz je mic'ajt jim yi' mbaatcixy ma Cristo. Yjacyujcpedipy ajcxy yi m'ixpijcin ma Cristo ytiy'ajt jabom jabom. Ca' m'ixtigihuäccixy ma yi mmibijcin. Jacmibijcix jadu'n nej anajty ti nyaj'ixpijccixy Cristo ytiy'ajt. Jatytim myajnájxcixipy jäygidacın ma Dios cixyjot huinijot jabom jabom.

Je jemybi jugy'ajtin huidibi Cristo xyajni'ixiyim

⁸ Ooy naygüend'ájtigix, ca' myajhuin'ingixy, co huingjäy xya-jhuinma'ñytigóoygixipy müid huingbi ayuc huingpi ixpijcin huidibi jäy c'm ti cojy ti macxy, huidi ca' choobaady, huidi nigoo xychachhuin'ingixp müid canaag ayuc huinma'ñ jadu'n nej poj naaxhuiñ huinma'ñ. Yi jadu'mbi ixpijcin huidibi jäy ti cojy ti macxy ca' ajcxy paady ma Cristo.

⁹ Tüg'óciy nej Dios yajpaady nañ jadu'n yajpaady ma Cristo. ¹⁰ Com je Cristo ñihuindzin'ajttaayb tüg'óciy ane'min ya naaxhuiñ, etz nañ jadu'n tzajpjoty, paady ycixpi co miich ajcxy myajpaady ma Cristo, miich ajcxy müid'ajttaayb tüg'óciy huidi Cristo ymüid. ¹¹ Co anajty Cristo miich ajcxy xyjäy'adyii, chi yi'pidacy ma ajcxy mjot mhuinma'ñ je tiy'ajt co myajpatcixy ma Dios. Hue' je' yajtigooyb yi pocytunii huinma'ñ. Jada je' je tiy'ajt huidi Cristo Jesús ypidac, ca' miich ajcxy xyjäy'adyii. Ca' miich ajcxy mdiy'ajttiy ma mninix. Tigach Jesús ytuuñ müid miich ajcxy, ca' yjadu'nity nej judíojäy ajcxy tiy'ajt pidaaccixy ma ninix müid tzuyc. ¹² Co ti mnibejtixy müid Cristo yxii, jadu'n nipaady nejhuüy ti mnaaxtigiiygixy quipxyi müid Cristo co yi' ñaaxtigiiy. Co ti mmijpidaaccixy Dios ymic'ajt jadu'n nipaady nejhuüy quipxyi müid Cristo ti mjugypijccixy co Dios yajjugypijcy y'ung co y'o'cy. ¹³ Co ca' anajty miich ajcxy Dios xyjäy'adyii, müid miich anajty ajcxy pocytunii huinma'ñ jadu'n miich anajty m'ijtcixy nej öcpi. E co ti mmijpidaaccixy Cristo, Dios ti xyhuinmeecxi ajcxy tüg'óciy mbocy, e jadu'n nipaady nejhuüy Dios ti xyajjugypijccixy quipxyi müid Cristo. ¹⁴ Co Cristo y'o'cy ma yi cruudz müid ajt nbocy ycixpi, jadu'n nipaady nejhuüy Dios ti xyjödzim xihuin huidi

anajty xychaachytunaanim. Co Dios anajty yajtigooy #ch ajt nxihuin, jadu'n nipaady nejihuüy ti mijxojtzpety je xihuin necy ma Jesús ycruudz. ¹⁵ Co Cristo y'o'cy cruudzcíxy, chi ycödigooy je ca'oybi ymic'ajt, etz je poj naaxhuiñybi ymic'ajt. Chi je Cristo yajtzo'yduñ je ca'oybi etz je poj naaxhuiñybi co yajcixy yajnaxy ma jäy yhuinduu.

Tzoccix nijot'ajtcix tüg'ócy huudijaty tzomb ma Dios tzajpjoty

¹⁶ Ca' mdungixy cuenti co pinjaty ajcxy xy'agapxihuipy etz xyñimahuipy:

—Amay'at jada jicxy picy, etz amay'at jada xii, etz amay'at je jemybo', etz amay'at yi Sábado xii. ¹⁷ Jecy'ajty jäy jadu'n ti yajtuñ yijadu'mbi huinma'ñ, jayijpni ca' anajty Jesucristo ymiiñi ya naaxhuiñ. Jadachambi xii tiempo Jesucristo ytiy'ajt tügpajc yi' je' ooy ycopicyity. ¹⁸ Ca' huaad yi jäy ajcxy xypijci je Cristo y'oy'ajtin huudibi ajcxy mbadamyb. Yi' ajcxy huudi oygohuin'inii naybidaacip jadu'n nejihuüy ooy yung naxy ajcxy yjäy'ajtcixy, e ca' yjanchity. Yi' ajcxy yi' y'ojadajtpy ángeles. Yi' ajcxy naygömayip co ti tiy'ajt patcixy ma cumäy, ninigoob ajcxy amij agix ñayjihuiüyigixy miid co tzachmijpidaaccixy yci'mhuinma'ñ etz ñinix chojcín. ¹⁹ Yi' jadu'mbi jäy ca' ajcxy yajpatcixy ma Cristo, je huudibi nigohuajc'ajtp tüg'ócy mibijcpidijc. Je mibijcpidijc Cristo yajyeecp ma ajcxy ymibijcín jadu'n nej Dios tzocy, e yi' ajcxy patcixy tüg'ócy mic'ajt etz tiy'ajt ma yi'. Miid co Cristo nigohuajc'aty je mibijcpidijc, paady ajcxy y'ijtcixy tügpicy, jadu'n ajcxy nipaady nej tüg jäy ñinix miid ycohuajc huudi ane'm je ñinix etz miid emy huudibi yajyücxtaayb je ninix.

²⁰⁻²¹ Co miich ajcxy ti mmibicy Cristo, jadu'n nipaady nejihuüy ti m'öccixy quipxyi miid Cristo, e nañ ti mbidzimgixy ma yi' naaxhuiñyjäy yhuinma'ñ xyaj'ane'mgixy. ¿Na'ámy co chambaad mjactzinaaygixy jadu'n nej jihuiy yi' naaxhuiñyjay yhuinma'ñ xy'ane'mgixy? ¿Na'amy co mjaccuydungixy yi' jäy ajcxy ycötujcín huudibi mínaamb co ca' huaad mgonigy jada, ni ca' huaad mjicxy jada, ni ca' huaad nidoñ yijimbi? ²² Tüg'ócy huudibi ngonícim, njicxim, e nnidonim, co ytundäy, chi ytigoydäy. Yi' jadu'mbi huinma'ñ c'i'm jäy ajcxy cojcixy macxcixy, e nañ c'i'm jäy ajcxy yaj'ixpijccixy huudibi ca' yajpaady ma Cristo. ²³ Yi' jadu'mbi cötujcín jadu'n yquëxigy nej ooy y'oyity ooy y'oymibijco'cnity, e ca' yjanchity. Co jäy ajcxy cuydungixy ooy ajcxy ñaybidaacigixy tudägy, etz nañ chaachytungixy ñicx ycohuajc. Yi' jadu'mbi cötujcín ca' ti mic'ajt m'idity, com co ca' jadu'n jëb yajtigoy jibic-huinma'ñ yi' jadu'mbi cötujcín.

3

¹ Miich ajcxy huudibi ti mmibicy je Cristo jadu'n nipaady nejihuüy ti mjugypijccixy quipxyi miid Cristo, e jemybi jugy'ajtin ti myajtzondaaccixy. ² Ixtaaygix je tiy'ajt huudibi tzomb tzajpjoty ma je Cristo yajpaady ma Dios ymijc a'oy'amybi, e yi' je' je' mij'ane'mbi. ³ Co ti mmibijccixy je Cristo jadu'n nipaady nejihuüy co ti m'o'ccixy miid yi', etz ma je Cristo jemybi jugy'ajtin miich ajcxy ti mbaady. Jadachambi yi' mjugy'ajtin Cristo miid c'i'am, e yi' yajpaatp ma Dios. ⁴ Co anajty je Cristo ñayguëxigyii jadüg'oc ya naaxhuiñ, huin'it xii miich ajcxy mnaybada'ñyii miid yi' jiihy tzajpjoty ma yi' oybi it.

Je jecy jugy'ajt etz je jemybi jugy'ajt

⁵ Yajtigooygix je jibic-huinma'ñ huudibi miich ajcxy miid, huudibi naaxhuiñyjäy ajcxy yhuinma'ñ'ajtip. Ca' huaad miidcapxtigoyipy töxyjäydijc. Ca' huaad jibic-huinma'ñ mdunipy. Ca' huaad mdungixy ninix chojcín, etz huudibi ca'p y'oyhuinma'ñity. Ca' huaad m'adzogipy comeeñ'adii, com ñipaapty jadu'n nej ajcxy huudibi tzaadzech quipychech ojadajtp. ⁶ Miid co

jäy ajcxy jadu'n ytundigooygixy, paady ycixpi jacjiini Dios tzaachytunip jäy ajcxy huidibi ca' ycapxymidoogixy yi' ycötujcin. ⁷ Nañ jadu'n miich ajcxy jayijp co ca'ni anajty mmijpidaaccixy je Cristo, mdzinaaygixy anajty müd jibic-huinma'ñ quipxy müd je jacjadyii naaxhuiñyjäy co anajty mguydungixy yi' jäy ycötujcin huidibi ca' ytiy'ajtiy. ⁸ Jadachambi ixmajtzcix miich ajcxy yi' jibic-huinma'ñ jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mni-gapxcixy ni'ojüygixy, jadu'n nej co jibic ayuc mgapxcixy. ⁹ Ca' huaad mnay-huin'iniigixy miñ xyipy. Co ti mmibijccixy Cristo ti m'ixmajtzcixy je jibicjot je jibic-huinma'ñ huidi anajty ajcxy müd. ¹⁰ Jemybi jot jemybi huinma'ñ ti mbatcixy e Dios yjacyejcyp jemybi jot jemybi huinma'ñ jabom jabom ma miich ajcxy co m'ixpijccixy yi' ytiy'ajt. Jadu'n Dios tzocy co mjot mhuinma'ñ mbidáaccixipy jadu'n nej Cristo jot huinma'ñ müdity, je Cristo huidibi ti yaj'oyiy je jemybi jot jemybi yhuinma'ñ. ¹¹ Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nijejity ajcxy müd griegojäy y'ixpijcin etz jacjadyii müd judíojäy y'ixpijcin, ca' ñejity pen ti myajtiy'ajtiy o ca' mdiy'ajtiyity. Ca' ñejity co nijejity ajcxy jigügy chooñ, e ca' y'ixpiyity, etz jacjadyii ooy adzip ahua'n ñaybidáacigixy. Ca' ñejity co nijejity ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'ñ.

¹² Com Dios miich ajcxy ti xyhuin'ixy, e ti xychojccixy ti xyjihuiygixy, e Dios ti xyajhuädzi ajcxy mjot mhuinma'ñ, paady ycixpi pidaaccix mjot mhuinma'ñ co mba'ayoohuaangixy migügtijc. Pidaaccix mjot mhuinma'ñ co oyjäy'ajtin mdunaangixy etz co nicy xemy mnaybidägaangixy. Pidaaccix mjot mhuinma'ñ yung naxy etz mimecxtujccixy migügtijc ajcxy. ¹³ Naymimexctújcigix nidüg nidüg. Co mmigüg ajcxy xymidundigooyipy jëbi mhuinmeecxipy tim jadu'n nej iich ajt nHuindzin Jesucristo ti mecxy miich ajcxy mbocy. Com Cristo ti xyhuinmeecxcixy, paady copicy miich ajcxy meecxip yi' migüg huidibi ajcxy xymidundigooyb. ¹⁴ Mnaychójcigix mnayjihuiygix nidüg nidüg. Co mnaychójcigixipy nayjihuiygixipy, chi jëb huaad mdzinaaygixy müd mjot mhuinma'ñ tú'ciy. ¹⁵ Je jotcuje'ajtin huidibi Dios xymooyim, huen ajcxy xy'ane'mi mjot mhuinma'ñ. Dios ti xyajnibijccixy, jaydëb tú'ciy m'ijtcixy müd mjot mhuinma'ñ. Mjatytim yajnaxipy ajcxy jäygidacín ma Dios jabom jabom.

¹⁶ Naybidáacigix co je Cristo y'ayuc ytiy'ajt yajtigüydähuamyb ajcxy mjot mhuinma'ñ. Nayyaj'ixpijcgix etz nay'ihuüjigix naygapxhuüjigix müd je Cristo y'ayuc ytiy'ajt, jadu'n nej Dios iixpijcin yecy. Iigix Salmo etz igix himno etz yi' iy' ihuidibi je Espíritu Santo ypidägip ma mjot mhuinma'ñ, e jadu'n jäygidacín mi'ijtcixy ma ajcxy mjot mhuinma'ñ müd Dios ycixpi. ¹⁷ Huen ti ayuc huidibi ajcxy mgapxyp, huen ti tung huidibi ajcxy mdumby, hue' capxcix tungix müd ajt nHuindzin Jesús yxii. Etz jatytim yajnaxcixy Dioscojuyip ma Dios Teedy ma Jesucristo yxii.

Je mibijcpidijc ajcxy chinaayin ma ypicchinaaygixy

¹⁸ Miich töxyjäydijc ajcxy, capxymidoogix mñäy ajcxy com jadu'n iich ajt nHuindzin Jesucristo tzocy co mgapxymidohipy ajcxy mñäy. ¹⁹ Miich yëydijctijc ajcxy, tzojccix jihuiygix ajcxy mdöxyijc, ca' ejcin mmii'dipy müd mdöxyijc. ²⁰ Miich ajcxy ung anäg, mgapxymidohipy ajcxy mdaj mdeedy müd tüg'óciy. Jadu'n Dios jäygidägy co ung anäg ajcxy capxymidooy ytaj yteedy. ²¹ Miich ajcxy ungdeedy ca' oyñinej mmigapxcixy m'ung m'anäg

ajcxy. Co jadu'n oyñinej m'ojipy m'ung ajcxy, ca' yjeyity co ñicxy ajcxy taj may chinaaygixy yjugy'ajtcixy. ²² Miich ajcxy tumbidijc, capxymidoogix yi mHuindzin, ca' janch xypaat oy mic mdungixy co mhuindzin jim xyhuindicxcixy, e chi co je' yjihuäcni, chi nigoo mhuäccixni mdinaaygixni. Hue' janchtiy oy tungixy miid oyjot oyhuinmañ, com je' je' je tiy'ajt co Dios mhuindzigiygixy. ²³ Je tung huidibi mdungixyp, tungix cixyjot huinijot. ²⁴ Com miich ajcxy mnejhuib co Cristo xymöhuaangixy it lugar tzajpjoty, paady ycixpi oy tunggix jigix Cristo jäygidägipy huidibi ajcxy mdumyb. ²⁵ Dios chaachytunipy pinjaty tundigooyb. Ca' Dios huin'ijxpety tzaachytunipy jäy.

4

¹ Miich ajcxy yajtumbidijc, yajtungix mdumbi nej ypadyii etz nej ytudägyity, com miich ajcxy mnejhuib co nañ miid miich ajcxy tüg mHuindzin jilby tzajpjoty.

² Jabom jabom Dios mibijctzoogix, ca' m'ixmajtzcixy Dios mibijctzoohuin. Huijy ycujc m'idipy ajcxy etz jatytim yajnajxcixy jäygidaacin ma Dios co anajty mgapxtaaccixy. ³ Nañ jadu'n miich ajcxy tun may'ajt mibijctzoogix Dios miid ich ajcxy ycixpi. Mibijctzoogix Dios co huen it lugar xymöhuiyich ma jëbi ngapxhuäcxyich Dios y'ayuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuib. Miid co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴ Mibijctzoogix Dios miid ich ycixpi, jigix jëbi ngapxhuäcxyich je Cristo ytiy'ajt huädz oy, nej jäy ajcxy jëb huädz huinjihuigixy, jadu'n nej ypadyii ngapxhuäcxyibich.

⁵ Tiydudägy mdzináaygixipy miid yi jäy ajcxy huidibi ca' mibijccixy Cristo. Yajniguëxiccix miich ajcxy Dios ytung jabom jabom, ca' huaad xi tiempo myaj'ayoogixy. ⁶ Yi mgapxin yi mmiydaacin yajtungix oy'amy huindzigiñ'amy nej jëbi huaad jäy ajcxy jäygidaacixy. Copicy mhuinmayipy ajcxy jayijp nej jäy huaad m'adzoogixy.

Je capxpooxñin huidibi cogixiyñip je ñecy

⁷ Tíquico co ñicxipy jim ma miich ajcxy, yi' xyyajmüdmüydáaccixipy tüg'óciy nej ytunyii yjadyii ma ich. Ooy ndzocy njihuüyich ich ajt nmigüg Tíquico. Yi' ooy tudägy ytuuñ quipxyi miid ich ajcxy ma ajt nHuindzin Jesucristo ytung. ⁸ Paady yam nguexyich Tíquico ma miich ajcxy jigix ajcxy xyajmüdmüydägipy nej yam ich ajcxy nyajpaatcixy, etz nañ jigix xyjotmicmigápxcixipy. ⁹ Quipxyi miid Tíquico yam nguexyich Onésimo, tüg ajt nmigüg huidibi ooy ndzocy njihuüyich, huidibi tudägy ti ytuuñ miid ich ajcxy. Onésimo miich ajcxy yi mmigogajp. Tíquico y Onésimo xyajmüdmüydägip ajcxy tüg'óciy tijaty tuunip jajtíp yam ma ich ajcxy.

¹⁰ Je Aristarco, huidibi pujxtijc iñayb quipxyi miid ich, cham quexy capxpooxñin ma miich ajcxy. Marcos, je Bernabé y'uch, cham quexy capxpooxñin nañ jadu'n ma miich ajcxy. Ti ich ayuc nguexyich jayhuin ma miich ajcxy co ixypy ñicxy Marcos ma miich ajcxy, mgöbigipy ajcxy agujc jotcujc. ¹¹ Nañ jadu'n je Jesús huidibi jäy ytijpy Justo, cham quexy capxpooxñin ma miich ajcxy. Yi Aristarco, Jesús etz Marcos yi' ajcxy ni tugigpajc, judíojäy huidibi tumb miid ich ma Dios ytung co ngapxhuäcxyich Dios y'ane'min. Yi nidugügipi ich ooy ti xyajjotcuje'atyich. ¹² Je Epafras, miich ajcxy mmigogajp je Cristo ytumbi, nañ jadu'n cham quexy capxpooxñin ma miich ajcxy. Je Epafras jabom jabom Dios mibijctzoy miid miich ajcxy ycixpi. Yi' mibijctzoo Dios co miich ajcxy cuydunda' tüg'óciy je Cristo y'ayuc ytiy'ajt, etz co nanyéjigix amumdügot ma Dios, e jadu'n ajcxy mguydunipy nej Dios tzocy. ¹³ Ich jëbi tiy'ajt nyecyich co Epafras ooy jotmay jihuüy miid miich ajcxy

ycixpi, etz nañ ooy nidajy nimay mïd yi' ajcxy ycixpi huidibi tzinaayb jim Laodicea etz jim Hierápolis. ¹⁴ Je Lucas, je doctor, huidibi je mibijcpidijc ooy tzojccixy ooy jihuuygixy etz Dimas nañ cham ajcxy quexy capxpooxïn ma miich ajcxy.

¹⁵ Yajnajxcix ñch ngapxpooxïn ma yi mibijcpidijc jim Laodicea. Nañ yajnajxcix ñch ngapxpooxïn ma yi Ninfas etz ma yi mibijcpidijc huidibi yöymujccixp ma yi' ytijc. ¹⁶ Co anajty jada necy ti mgapxtaaygixy, tungix may'ajt quejxnajxcix jada necy ma yi mibijcpidijc ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy capxcix je necy huidibi ti nguexyich jim Laodicea. ¹⁷ Tungix may'ajt mñimähuipy je Arquipo co huen cuydundäy je tung huidibi ñch ajt nHuindzin je Cristo ti yajñibedyii.

¹⁸ ñch Pablo, ñch ci'm njaaybich jada capxpooxïn ma miich ajcxy. Ca' ajcxy mjäydgoyipy co ñch nbujxtijc iñäy. Huen Dios may'ajt oy'ajt tunipy mïd miich ajcxy ycixpi. Jadu'n ngapxcixyich. Amén.

1 TESALONICENSES

Yi Jayijp Neczy Huidi San Pablo Yajnigujx Je Mibijcpidijc Jim Tesalónica

¹ Hich Pablo muid Silvano etz Timoteo cham nguexyich jada necy ma miich ajcxy jim Tesalónica huídibi yajpaatp ma Dios etz ma ajt nHuindzin Jesucristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy muid miich ajcxy etz xyajjotcugiygixip.

Je mibijcin huídibi anajty yejcpy ijxpejt

² Jabom jabom ich ajcxy nyajnaxyich jäygidaaacin ma Dios muid tüg'óciy miich ajcxy ycixpi. Jabom jabom ich ajcxy Dios nmibijctzooyich muid miich ajcxy ycixpi nidüg'óciy. ³ Co Dios Teedy nmibijctzóoygixyich, chi njäymeichich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njäymeichich jadu'n nej oyyä'ajtin mdungixy etz jadu'n nej mdzojccixy mjihuuygixy mmigügtijc. Nañ jäymejtzipich jadu'n nej miich ajcxy mjijp'ixy jabom jabom co ich ajt nHuindzin Jesucristo xymöhuaangixy it lugar jii by tzajpjoty, e ca' mjetmetzcuygixy. ⁴ Migügtijc ajcxy, ich ajcxy nejhuuyb co Dios xychojccixy xyjihuygixy, e nañ ich ajcxy nejhuuyb co Dios ti xyhuin'ijxcixy. ⁵ Co ich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcxich, nañ nduunich mjihuinma'ñ muid Dios yjihui'ñ ymic'ajt. Jotcujc nduunich ma miich ajcxy. Miich ajcxy mnejhuuyb co tudägy nduunich jigix jëbi mmijpidáaccixipy Jesús y'ayuc ytiy'ajt.

⁶ Oy anajty ooy mjayaj'ixhuídijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigiygixy ich je n'ijxpejt, e nañ jadu'n ajt nHuindzin Jesús y'ijxpejt. ⁷ Co tzaachypí ti mmijnajxcixy ti myajnajxcixy muid Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo y'ayuc ytiy'ajt. ⁸ E jadu'n miich ajcxy ti myejccixy je ijxpejt muid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy ijxpejt ma canaag'it naax cajp. Je mayjäy ti nejhuüydäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy ich ajcxy njacyajnimäy je mayjäy jadu'n nej miich ajcxy ti mmibijccixy. ⁹ Je mayjäy ma canaag'it naaxcajp ooy ñaymüdmüydáacigixy jadu'n nej ich oy ngogapxiyich miich ajcxy, etz nañ jadu'n nej ich miich ti xycöbijccixyich e nañ je mayjäy ñaymüdmüydáacigixy jadu'n nej ti m'ixmajtzccixy yi tzaadzech ojadadi, e ti mbadüdigiygixy je Dios juugypí janchypí etz tudägypí. ¹⁰ Nañ jadu'n je mayjäy ajcxy ñaymüdmüydáacigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'ñ ya naaxhuiñ, chona'ñ tzajpjoty. Je huídibi Dios ti yajjugypijc co ti y'ögy. Yi' je' je Jesús huídí ti xycohuaanim ma yi mijpi tzaachypí huídibi Dios yquexamyb muid co jäy ajcxy chach pocytungixy.

2

Pablo ytung huíbidi anajty ymüdjim Tesalónica

¹ Migügtijc ajcxy, mnejhuuyb ajcxy co ca' ñaadigí'aty, co ich oy ngapxhuäcxy Dios y'ayuc ytiy'ajt ma miich ajcxy. ² Miich ajcxy mnejhuuyb co jayijp ca'ni anajty nmechich ma miich ajcxy ich ajcxy ooy tzaachypí etz ayo'n ti

nyajnajxcixy jim Filipos. Ti jäy xyhuin'ojy xyjijp'ojyich. Co nmejchich ma miich ajcxy, ca' ñejity co tzaachypi ti nminaxyich ti nyajnaxyich jayijp, chi Dios ti xyajjotmicpicyich, jigix huinmic jotmic ngapxhuäcxibich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy, oy ñich jäy anajty xyca'ixa'ñ xycatzoga'ñ. ³ Ca' ñich ngapxhuäcxyich anii, ni jibic ayuc, e ni ngamiydägyich jibic ayuc jibic huinma'ñ nej huaad nhuin'ñngixy. ⁴ Ca' ti nhuin'ñngixy. Dios ti xyajni bicyich co ngapxhuäcxibich yi' y'ayuc ytiy'ajt, e jadu'n nguyduuñich. Ca' nduuñich co huen jäy ajcxy jäygidägy ñich ndung. Jada janchtiy ndumybich jigix Dios jäygidägipy ñich ndung. Com Dios yi' ñejhuñyb nej jäy tüg'óciy yjot yhuinma'ñ müdity. ⁵ Miich ajcxy mnejhuñyb co ca' nyajxondaaccixy müd ayuc oyjatypi huidi ca' choobaady. Nañ ni ca' ñich ajcxy nhuinma'ñ 'ijxtäy nej jëbi ñich ajcxy nmeeybaat. E Dios nañ ñejhuñyb co yjanchity jada. ⁶ Nañ ni ca' ñich ajcxy njijp'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcxibich yi' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷ Oygixy oy'amy ti nduuñich ma miich ajcxy, jadu'n nej tüg ungday müdity y'ung y'anäg müd oyjot oyhuinma'ñ. ⁸ Ti ñich miich ooy ndzojccixy njihuñygyixy, canan jëyi Dios y'ayuc ytiy'ajt ti nmooygixy, nañ naygïyegáanibich anajty ma yi' o'cin müd miich ajcxy ycixpi. ⁹ Co jayhuin ngapxhuäcxyich Dios y'ayuc ma miich ajcxy, mjäymejchpy miich ajcxy jadu'n nej ñich ajcxy nduuñ n'ayooyich anajty xim tzuum müd ñich ajcxy ngaayin n'uucin ycixpi. Ca' anajty n'adzibaangixy, paady ñich ajcxy nduuñ n'ayooyich xim tzuum müd ñich ajcxy ngaayin n'uucin ycixpi.

¹⁰ Miich ajcxy huidibi mibijcp mnejhuñyb ajcxy, e nañ ñejhuñyb Dios, co ñich ajcxy ndzinaayich ma miich ajcxy tudägy, huadz ñich anajty ajcxy njot nhuinma'ñ müdityich. Ca' ma ndundigooyich ajcxy nej pin xy'ocnihuambedipyich ajcxy. ¹¹ Mnejhuñyb miich ajcxy nej n'ñhuijccixy ngapxhuijccixy etz njotmicmigapxcixy nidüg nidüg, tim jadu'n nej tüg ungdeedy ñhuij capxhuijy y'ung y'anäg. ¹² Ti ngapxhuijccixy co ooy chach copicyity co mdzinaaygixipy nej Dios jëbi jäygidägipy yi' mdzinaayin. Com yi' miich ajcxy ti xyhuin'ijxcixy jëbi mdigïygyixipy ma yi' chinaaydac, ma yi' müdity y'oy'ajtin ymij'ajtin.

¹³ Paady ycixpi nyajnajxpich jäygidaacin ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxich ma miich ajcxy. Ti mmibijccixy anajty co ñich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'ñ, miich ajcxy huidibi mibijcp. ¹⁴ Migügtijc ajcxy, jadu'n ti mjajtccixy jadu'n nej yjajty müd je judíojäy huidibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymigogajp ajcxy ooy y'ixhuidijti ypahuidijti. ¹⁵ Je judíojäy ymidziptzoon ñich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcapxñyip jecy'ajty. Etz nañ jadu'n ajcxy xyajpidzimyich jim ma ajcxy judíojäy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymijotmädyii tüg'óciy jäy. ¹⁶ Yi' judíojäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma yi' jäy ajcxy huidibi ca' yjudíojäyity, nej huaad ajcxy y'alma ñidzóoccixipy. Co jadu'n ajcxy ytundigooy, chi ajcxy ooy ñigi ypocy ñibety ma Dios. Per Dios ti ooy chip y'ejin pidacy ma judíojäy müd ajcxy ypocy ycixpi.

Pablo ñijot'ajtp co nicxy cogapxihuaangixy yi mibijcpidijc

¹⁷ Migüctijc ajcxy, cham hueeni xi tiempo ti ñaxy ma ca' n'oc'íxcixni ajcxy, per ca' ich miich ajcxy njäydigoy. Ooy ich ajcxy nja'nicxa'ñ ma miich ajcxy jadüg'oc, e ca' y'oyiy nej ich ajcxy nicxiybich ma miich ajcxy. ¹⁸ Ooy ich ajcxy njanicxa'ñ anajty ma miich ajcxy. E ich, Pablo, ci'm anajty njanicxa'ñich mejtz'oc tugig'oc, e je mujcu' nnii'aa ndü'aa ti xy'adujcich. ¹⁹ ¿Ti mij'ajt miich ajcxy mdiy njjip'ijxpich? ¿Ma mdiy ajcxy nbada'ñich njotcujc'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotcujc'ajtin etz oy'ajtin mij'ajtin müd je tibi nduunich ma miich ajcxy co ti mmijpidaaccixy Dios y'ayuc ytiy'ajt. ²⁰ Müd miich ajcxy ycixpi nmüdich jotcujc'ajtin etz xondaacin.

3

¹⁻² Müd jada tajin mayin co ich anajty ca' nmimadäga'ñ müd miich ajcxy ycixpi, paady ich ajcxy nhuinma'ñ nbidägy co jëbi nhui'ma'ñich naydüg jim Atenas, etz jëbi nguexyich ich ajt nmigüg Timoteo ma miich ajcxy. Timoteo nañ jadu'n ytuñ ma Dios ytung quipxy müd ich co ngapxhuäcxyich je Cristo y'ayuc ytiy'ajt oybi. Yi Timoteo ñigapxpedipy ich n'ayuc etz xyjotmicmigapxip ajcxy, jigix jac mic ajcxy myajpaadip ma mmibijcin. ³ Jadu'n Timoteo ytunipy ma miich ajcxy jigix ca' mhuinma'ñtigóoygixip müd je tzaachypi huidibi ajcxy mmijnajxyp myajnajxyp. Miich ajcxy mnejhuüyb co copicy myajnaxipy ajcxy tzaachypi müd Jesucristo ycixpi. ⁴ Co oga'n n'ijtyich ma miich ajcxy, chi ich miich ajcxy nnimaayich co tzaachypi mmijnáxcixipy myajnáxcixipy müd Jesucristo ycixpi. E miich ajcxy cham mnejhuüygyxyp co janch tiy'ajt jadu'n nej nnimaaygixy, müd co cham tzaachypi mmijnajxcixy myajnajxcixy. ⁵ Com nejhuüybich co tzaachypi mmijnajxyp myajnajxyp ajcxy, paady ycixpi tajpich maybich müd miich ajcxy ycixpi. E com ca' nmimadäga'ñich je tajin je mayin, paady ycixp ti nguexyich Timoteo ma miich ajcxy jaydëbi tiy'ajt xypaadibich pen tiydudägy miich ajcxy mmibicy. Tzigüybich anajty co ndiy je mujcu' ti xyajhuinma'ñtigooygixy, etz jadu'n anajty ñaadig'ada'ñ ich ndung ma miich ajcxy.

⁶ Jadachambi Timoteo ti xyñihuimbityich, chooñ ma miich ajcxy jim Tesalónica, etz ti xyajnejhuüyich jadu'n nej miich ajcxy mmüdity mmibijcin, etz nañ ti xyajnejhuüyich jadu'n nej mnaychójcigixy mnayjihuiüyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihuiüyich, etz nañ ooy miich ajcxy xyja'ixaangixyich jadüg'oc, jadu'n nej ich miich ajcxy nañ jadu'n ooy nja'ixaangixy. ⁷ Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicy tiydudägy yi mibijcin, chi mij ooy ti njotcugiyich. ⁸ Jadachambi jëbi njactzinäyich jotcujc, com ti nnejhuüyich co miich ajcxy ca' m'ixtigihuäccixy ma mmibijcin. ⁹ Nyajnajxpich jäygidaacin ma Dios yhuinduu müd miich ajcxy ycixpi, müd co janch jotcujc nayjihuiüyijich co miich ajcxy ca' m'ixtigihuägy ma mmibijcin. ¹⁰ Xim tzuum nmibijctzooyich Dios müd tüg'óciy njot nhuinma'ñich, jigix Dios xyaj'ahuáatzibich nnii'aa ndü'aajich, jëbi nicxyich ci'm ma miich ajcxy, jaydëbi njacyaj'ijxpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹ Njijp'ijxypich co Dios Teedy ci'm etz ajt nHuindzin Jesús xyaj'ahuáatzibich nnii'aa ndü'aa jigix nicxy n'ijxcixy jadüg'oc. ¹² Ich ajcxy ndzojcpy co ajt nHuindzin Jesucristo xyjacmóoygixipy tzojcin jihuüyin, jigix nigí ajcxy mnaychogüyb mnayjihuiüyib miñ xyipy, e nañ nigí mdzójcixipy

mjhuiyigixipy tüg'óciy je mayjäy, tim jadu'n nej ich miich ajcxy ndzocy njhuüy. ¹³ Ich ajcxy ndzojcpy co Dios xyaj'ijtip ajcxy mjot mhuinma'n tücci'y ma Jesucristo ytiy'ajt, e ca' m'ixtigihuaccixy, jigix co anajty ich ajt nHuindzin Jesús ymiñ jadüg'oc ya naaxhuiñ miid tüg'óciy je mibijcpidijc huidibi miid huadz yjot yhuinma'n, jëbi miich ajcxy mnayguëxigiyb ma Dios Teedy yhuinduu miid huadz mjot mhuinma'n, ca' ti xihuñ ma Dios miid miich ajcxy.

4

Je tzinaayin jugy'ajtin huidibi Dios yjäygidacyp

¹ Jadüg nax, migügtijc ajcxy, jadachambi may'ajt nbijctzooyich, e nyajnijccixy miid ajt nHuindzin Jesucristo ycipi co ajcxy mjaccuychinahuipy Dios y'ayuc ytiy'ajt, jadu'n nej ti nyaj'ixpicyich miich ajcxy, etz mjactzinahuipy ajcxy jadu'n nej jëbi Dios jäygidägy ajcxy mdzinaayin, jadu'n nej ti mdungixy.

² Miich ajcxy mnejhuüyb je cötujcin huidibi ti nyaj'ixpijccixy. Jada cötujcin ich ajt nHuindzin Jesucristo ti xyajnijbicyich. ³ Miich ajcxy mnejhuüyb je cötujcin jadu'n nej Dios tzocy co huadz jot huadz huinma'n myajtungixipy ma yi mdzinaayin mjogy'ajtin. Ca' huaad mmigapxtigooygixy tüg töxyjäy.

⁴ Miich ajcxy mnejhuüyb Jesús ycötujcin co copicy nidüg nidüg yëydijc pigipy tüg töxyjäy etz yajmij'adip ytöxyijc, etz nañ miiddzinahuipy miid oyjot oyhuinma'n. ⁵ Ca' Dios jadu'n tzocy co je yëydijc nijot'aty töxyjäy miid jibichuinma'n, jadu'n nej yi jäy ajcxy y'idich huidibi ca' nejhuüy Dios ytiy'ajt.

⁶ Ca' huaad ni pin migapxtigooyi ymigüg ytöxyijc, com Dios y' tzaachytunib mijcajee pinjaty migapxtigooyb ymigüg ytöxyijc. Jada cötujcin ti nyajni'ixiygixy jayhuin. ⁷ Com Dios jadu'n ti xyhuin'ixim jigix oyjot oyhuinma'n ndunim, canan co ndunim jibic jot jibichuinma'n. ⁸ Co tüg jäy ytundigooy miid huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espíritu Santo huidibi Dios ti quexy ma ich ajt.

⁹ Miich ajcxy mnejhuüyb je cötujcin co copicy mdzogipy mjihuühuipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijctzooybich co jacnaychójcigix jacnayjihuüyigix. ¹⁰ Janch tiy'ajt jadu'n co miich ajcxy ndzocy mjhuüy tüg'óciy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnaychójcigixy nayjihuüyigixy etz mnayyajmij'ajtigixy mij cajee. ¹¹ Jatyim tzinaaygix nicy xeemy, agujc jotcuyc. Pidäg ajcxy mjot mhuinma'n ma mgi'mdzinaayin, etz nañ jatyim naymidúunigix. Jada tiy'ajt ti najtzcapxiiyi ajcxy jayhuin. ¹² Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojcpyich co miich ajcxy mhujihuühuip je tiy'ajt ma je' yajpaady y'alma je migügtijc tiibi y'occixy, jigix ca' mdajcixipy mmäyigixipy, jadu'n nej je jäy ajcxy nidajcixy nimaygixy huidibi ca' mibijccixy co Jesús yajjugypiga'n jadüg'oc je tiibi ajcxy y'o'ccixy. ¹⁴ Jadu'n nej ich ajt nmibijcim co Jesús yjugypijcy co y'o'cy, nañ jadu'n Dios yajjugypijctähua'n je öcpidijc huidijaty ajcxy mibijc Jesús.

¹⁵ Paady ycipi ich miich ajcxy nnimaaygixy co ajt nHuindzin Jesús tiy'ajt ti yecy co ich ajt huidibi jacjugy'ajtp co anajty Jesús yhuimbity ya naaxhuiñ, tügmucy xyajnicxaanim miid yi mibijcpidijc tiibi y'o'ccixy. Ca'

ich ajt njayijp'adaanim yi tibi y'o'ccixy, yi' ajcxy jayijp'adamb. ¹⁶ Ich ajt nHuindzin Jesús c'm yhuimbida'n ya naaxhuiñ chona'n tzajpjoty mid ycotujcin, mid ymic'ajtin, e yi' mic capxamb ane'mamb. Huimbidamb Jesús quipxyi mid tüg ángel mijtungmidpi huidibi nañ jadu'n mic capxamb ane'mamb. E co anajty yhuimbity, chi Dios yajxuxa'n yi' ytrompeta, e tim huin'itiy Jesús xyajpidictáhuaanim ya naaxhuiñ, e chi ajt naybadaanim mid Jesús jocjoty. ¹⁷ E chi ich ajt huidijaty anajty jactzinaayim, naybadaanim mid ajt nHuindzin Jesús jocjoty quipxyi mid je'ajcxy huidibi anajty ti yjugypicy jadüg'oc. E jadu'n ndzináhuaanim huinixi huinitempo mid ajt nHuindzin Jesús. ¹⁸ Mid jada ayuc tiy'ajt nayyajotcugiyigix miñ xyipy.

5

¹ Migügtijc ajcxy, ca' ycopicyity njacnijayiygixipy jadu'n nej je xii je tiempo yca'pxa'n. ² Miich ajcxy mnejhuib co ich ajt nHuindzin Jesucristo yhuimbida'n ya naaxhuiñ tzaachytuna'n yi mayjäy mid ypocy ycixpi. Jesús miinaamb mina anajty je mayjäy ca' ti ocijp'ijxni. Jadu'n ymiina'n jadu'n nejjihuüy tüg meetzpi ymiñ coodz co ymeedza'n. ³ Co anajty je mayjäy ymiinaangixy: "Cham ooy jotcujc ndzinaayim, ca' ma tzip capxy", chi timitiina jotcömoñi Dios yajtigoya'n je naaxhuiñybi. Timitiina ayo'n ñimiinib jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'n. E ni pin huaad cacöguëgipy je tzaachypi co Dios anajty ymiñ ya naaxhuiñ yajtigoydähua'n yi mayjäy. ⁴ Per migügtijc ajcxy mid miich ajcxy Dios ytiy'ajt, paady miich ca' jadu'n myajpáatcixni nejjihuüy mdzinaangixy agootztuuby. Ca' ajcxy mgixipy mgüedípy mina anajty Jesús miñ jotcömoñi, jadu'n nej jäy nigoobi ycixy ycuery co ti ymeechyii. ⁵ Com tüg'óciy miich ajcxy Dios y'ayuc ytiy'ajt mhuinjihuüygy, jadu'n nipaady jadu'n nejhüiy ti mgoximiygy ti mgodixccixy. Ich ajt ca' njacyajpaatim agootztuuby. ⁶ Paady ycixpi ca' huaad njäydgoooyim Dios ytiy'ajt, ca' huaad nmi'öctigooyim jadu'n nej yi jacjaydyii jäy ajcxy huidibi ca' cuenditüñ Dios y'ayuc ytiy'ajt, jadu'n yi' ajcxy nipaady jadu'n nejjihuüy ajcxy ti ymi'öctigoy. Ijtcix ni'ixi mid tüg'óciy Dios y'ayuc ytiy'ajt. Mi'ijtcix huijy cujc mjot mhuinma'n. ⁷ Yi jäy ajcxy huidibi maab, coodz ajcxy ymäy. Yi jäy ajcxy huidibi muucip, coodz ajcxy ymúucigixy. ⁸ Ich ajt huidibi nnejhuüyim Dios ytiy'ajt, copicy huijy ycujc ajt ndzinaayim, e nañ copicy nmibijcim Jesucristo e nañ naychójcigix nayjihuüyigix miñ xyipy, jadu'n nipaady nej soldadtijc ñaygohuáangixy mid pujx huidibi ymid ma ycaach. E mid co njijp'ijxim co Dios xyajnidzögaanim ajt n'alma, jadu'n nipaady nejjihuüy soldadtijc ñaygohuáangixy mid ypujxcöjup. ⁹ Com Dios xyajjugy'ajtim co xyachachytunaanim xyajtigoyaanim, Dios xyajjugy'ajtim nej n'alma jébi paatim ndzoocin co nmijpidaacim ich ajt nHuindzin Jesucristo. ¹⁰ Jesucristo ti y'ögy mid ajt nbocy ycixpi, jigix jébi huaad ndzinaayim jilby tzajpjoty quipxyi mid yi', ca' ñejity pen ti anajty n'o'cim o pen jiini anajty njugy'ajtim co anajty Jesucristo yhuimbity ya naaxhuiñ. ¹¹ Paady ycixpi jacnayjotmicmigápxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹² Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma miich ajcxy mid Dios y'ayuc ycixpi. Yi' ajcxy huidibi xyajni'ixiyb Dios y'ayuc ytiy'ajt, yi' ajcxy xycapxhuijip mid ajt nHuindzin Jesucristo y'ayuc ytiy'ajt. ¹³ Copicy myajmij'ajtcixipy ooy, etz nañ mdzójcixipy

müid je Dios ytung ycxipi huidibi ajcxy ytumyb ma miich ajcxy. Tzinaaygix jotcuje ca' ma tzip capxy.

¹⁴ Nañ jadu'n, migügtijc ajcxy, nyajñibijcipy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjetmicmigapxip huidibi ajcxy tajp maayb, etz nañ mbubedipy ajcxy huidibi hueeni müid ymibijcin, etz yajtungix mecxtujcin müid tüg'óciy migügtijc.

¹⁵ Hich miich ajcxy nimaayb co ca' ni pin huaad yaj'ahuimbidip jibic ma ymigüg huidibi ti ymidundigoyii. Nañ jadu'n nimaaygixy co naymi'oyjäy'ájtigix nidüg nidügti. Nañ jadu'n oyjäy'ajtin mdunipy ajcxy müid tüg'óciy naaxhuiñyây.

¹⁶ Jatytim müid'ajtcix jotcuje'ajtin jabom jabom. ¹⁷ Capxtaaccix etz mibijctzoogix Dios jabom jabom. ¹⁸ Yajnajxcix jäygidaacin ma Dios pen ji ajcxy mjajtcixy ayogixy nejaty, com Dios ooy yjotcujeity co je migügtijc huidibi mibijcp Cristo Jesús yajnaxy ajcxy jäygidaacin ma yi' jabom jabom müid tüg'óciy huidibi tuunip jajtíp ma yi' ajcxy.

¹⁹ Capxymidoogix je Espíritu Santo, co ngacapxymidoohuim je Espíritu Santo huin'it nyajtigooyim Dios yjihui'ñ ymic'ajt huidibi yajpatp ma hich ajt. ²⁰ Yajjotcuje'ajtcix huenpinity pin Dios y'ayucpidzimb ma miich ajcxy. ²¹ Jeyi janchtiy m'ixipy peni quipxyiyb müid Dios y'ayuc huidibi ajcxy ycapxyp. Mijpidaaccix je ayuc tiybi. ²² Ixmajtzcix tüg'óciy jibic ayuc jibic-huinma'ñ.

²³ Dios nmibijctzooybich, je Dios huidibi yejcpy jotcuje'ajtin, co ajcxy xya-jhuaatztaayip mjot mhuinma'ñ ma yi jibicpi. Dios nmibijctzooybich co yi' ci'm xycuendi'ajtip huadz oy yi m'alma ajcxy, etz yi mjihui'ñ, etz mnicx mgohuajc, ca' ma pocy yquëxigy, ixti mabaad anajty hich ajt nHuindzin Jesucristo ymiñ ya naaxhuiñ. ²⁴ Je Dios huidibi ti xyajmibijccixy, tudägy yi', e ycuydunipy yi' y'ayuc müid miich ajcxy.

Capxpooxñin huidibi cijxnip je necy

²⁵ Migügtijc ajcxy, mibijctzoogix Dios müid hich ajcxy ycxipi.

²⁶ Naygapxpóocxigix xic xon nidüg nidüg müid oyjot oyhuinma'ñ.

²⁷ Nhuindzin Jesucristo ajt ti xyajñibicyich jada tung, paady nyajñibijccixy co jada necy mgápccixipy ni'abidzimy ma tüg'óciy mibijcpidijc.

²⁸ Dios nmibijctzooybich co hich ajt nHuindzin Jesucristo xyconuucxip ajcxy. Jadu'n jada. Amén.

2 TESALONICENSES

Yi Mimetz Necy Huidi San Pablo Yajniguejx Je Mibijcpidijc Jim Tesalónica

¹ Ich Pablo mid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ich ajt nDios Teedy etz ajt nHuindzin Jesucristo. ² Huen ich ajt nDios Teedy etz ich ajt nHuindzin Jesucristo may'ajt oy'ajt tunipy mid miich ajcxy etz xyajjotcugiygixip.

Dios tiydunipy yi pocyjäydijc ajcxy co anajty Cristo ymiñ jadug'oc

³ Migügtijc ajcxy, njatytimyajnaxypich jabom jabom jäygidaacin ma Dios mid miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcpy Jesucristo nigä jabom jabom, etz nañ nigä jabom jabom naychójcigixy nayjihuiyigixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachypä etz ayo'n huidibi ajcxy mminajxyp myajnaxyp, e nañ ooy mmijpidaaccixy Jesucristo, paady ycixpi ngapx-paadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' ijxpejtäp co Dios ytudägyity mid ajcxy ytiyduunin, e xycöbijccixy co jëbi mdigiygixipy ma yi y'ane'mdac mid mmibijcin ycixpi. Mid jada ycixpi miich ajcxy mminajxcixy myajna-jxcixy tzaachypä ayo'n.

⁶ Mid co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcuje'ajtin tim jadu'n nej xymöhuäängixyich jotcuje'ajtin je huin'it xä co anajty ajt nHuindzin Jesucristo ñayguexigyii co anajty miñ ya naaxhuiñ jadug'oc choon anajty tzajpjoty. Nañ je ángeles ajcxy mic'ajt midpä miinaamb quipxy mid Jesucristo. Miinaamb Jesús mid ane'min cötujcin e yajtigoydähua'ñ pocyjäydijc, tim jadu'n nej tüg mijjin yajhuindigoydäy huen ytijity. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt oybi. ⁹ Yi jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaanip ajcxy y'alma huinixä huinitempo. Dios ypidägaanip yi' ajcxy y'alma jigüegy ma ni camanaxä ajcxy ijxcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xä huin'it tiempo co anajty ajt nHuindzin Jesús miñ ya naaxhuiñ, Jesús je mibijcpidijc yajmij'ada'ñ etz huindzigihua'ñ, e nañ jadu'n miich ajcxy myajmij'adipy etz mhuindzigihuipy mid co anajty y'ayuc ajcxy ti mmibijcci, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios nmibijctzooyich mid miich ajcxy ycixpi, jaydëbi tudägy ajcxy mdzinähuipy, e Dios huidibi ti xyhuin'ijxcixy yjäygidägyipy yi' miich ajcxy mdzinaayin. Nañ jadu'n Dios nmibijctzoogixy mid jada ycixpi co yi' cuydunipy huidibi miich ajcxy mbijctzooyb m'amidooyb mid oyjot oyhuinma'ñ. E nañ ycuydunipy yi' huidibi miich ajcxy mdumyib mid mmibijcin. ¹² Com Dios jadu'n tunamb ma miich ajcxy mjot mhuinma'ñ, paady ycixpi ajt nHuindzin Jesucristo yxä capxpaady y'idipy ma miich ajcxy mdzinaayin etz nañ jadu'n miich ajcxy capxpaady m'idipy ma Jesucristo. Jadu'n yjadipy com ich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

2

Je jibic jäy huudibi huin'imb mayjäy

¹⁻² Migügtijc ajcxy, cham nyajmüdmiydaaccixy je xii je tiempo co anajty ajt nHuindzin Jesucristo huimbidaanü jadüg'oc ya naaxhuiñ, etz naybadaanim müd yi'. Nminucxtaacyich müch ajcxy, ca' mhuinma'ñyitigooygixy co pinjaty ymina'ñ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi jäy ajcxy y'ayuc huudibi minamb co tüg espíritu ti yajnejhuuygixy co yjadu'nity, o co muum a'ijxnaxy amidoonaxy capxy ayuc, o co muum ijxpizimy jada ayuc ma tüg necy huudibi ajcxy ytijpy co ich nnecy'adyii. ³ Ca' myajhuin'ingix janch ni nej. Jayijp ca'ni anajty je xii je tiempo yhuaad'atyñi ma anajty Jesucristo ymiina'ñ jadüg'oc ya naaxhuiñ, mayjäy ajcxy midziptzona'ñ Dios tiydudägy co ñayguëxigiyb tüg jibic jäy mic jäy huudibi Dios yajcödigoyamy tücc'yi. ⁴ Jada jibic jäy ymidziptzonamyb tüg'óciy tijaty huudibi jäy Dios'ajtpy, e nañ ymidziptzonamyb huudibi jëbi yaj'ojadaty. E nañ yi' naybidägiib amij agix jadu'n nejhuüy yjacmijity ca'ydi Dios. E nañ yi' ypidägamb y'ane'mdac ma Dios ytijc, e naybidägaanip nejhuüy Diosity.

⁵ ¿Nej ca' mjäymejtzcixy co jadu'n nimiydacyich tüg'óciy jada tiy'ajt jayhuin je taab anajty n'ityich ma müch ajcxy? ⁶ Jadachambi müch ajcxy mnejhuüyb pin yajhuäcxijp jada mic jäy jada jibic jäy, jigix ca'ydi ñayguëxigyii jayijpni ma ca'ni tiempo yhuaad'atyñi mina Dios a'ixihuip co ymiinipy. ⁷ Je mic jäy je jibic jäy cham ñi'ixiiyb ameech je jibicpi huudibi ytunamyb, jëyi ytigoy'ityñi mina je tü'aa y'ahuächyii, je huudibi yajhuäcxijpip. ⁸ Co anajty je jibic jäy ytü'aa y'ahuäch, chi ajt nHuindzin Jesús yajcödigoyipy müd tüg puxujin. Jesús yajcödigoyipy je jibic jäy müd yi' y'oy'ajtin etz ymij'ajtin co anajty yhuimbity ya naaxhuiñ. ⁹ Je jibic jäy, yi' je' ymüid je mujcu' yhuinma'ñ etz ymic'ajt, e ytunamyb mijhuinma'ñ etz ijxpejt huudibi anijip. ¹⁰ Je jibic jäy ytunamyb tüg'óciy tijaty jibic-huinma'ñ jigix jëbi huin'iniip yi jäy ajcxy huudibi y'alma tigoyipy, müd co ca' ajcxy cöbijccixy, e nañ ca' tzojccixy Dios y'ayuc ytüy'ajt huudi müd jëbi y'alma ñidzooccixy. ¹¹⁻¹² E je' ycixpi co ca' ajcxy cöbiga'ñ Dios ytüy'ajt, paady Dios y'ixmadzáanigixy huen yajhuin'ingixy, huen mibijccixy je mujcu' y'anii, e müd jada ycixpi jëbi Dios yajtigooyi yi' ajcxy y'alma nidüg'óciy huudibi ca' mibiga'ñ Dios ytüy'ajt. Jacjotcuyc ajcxy co jibic-huinma'ñ tungixy.

Je jäy ajcxy tibi Dios yhuin'ixyü jigix ypocyñihuädziipy

¹³ Migügtijc ajcxy huudibi ajt nHuindzin Jesucristo ooy tzocy jihuüy, jabom jabom nyajnaxyich jäygidaacin ma Dios müd müch ajcxy ycixpi, müd co Dios ti xyhuin'ijxcixy oga'n'aty, jigix jëbi m'alma ñidzooccixy müd Dios yjihui'ñ ymic'ajt, etz nañ müd Dios y'ayuc ytüy'ajt huudibi ti mmibijccixy. Je Dios yjihui'ñ ymic'ajt xyajhuaatzip ajcxy mjibicjot mjibic-huinma'ñ. ¹⁴ Paady ycixpi Dios ti xyhuin'ijxcixy, e nañ xyajmibijccixy müd yi' y'ayuc ytüy'ajt huudibi ich ajcxy ngapxhuäcxyp, jigix jëbi mbáatcixipy oy'ajtin ma ich ajt nHuindzin Jesucristo.

¹⁵ Paady migügtijc ajcxy, mibijccix tiydudägy, ca' m'ixtigihuäccixy, e ca' mjäydigoygixy je tiy'ajt huudibi ich ajcxy ti ngapxhuäcxy ma müch ajcxy, etz jadu'n nej ti nnimaaygixy necyjoty. ¹⁶⁻¹⁷ Huen ich ajt nHuindzin Jesucristo ci'm etz ajt nDios Teedy may'ajt oy'ajt tunipy müd müch ajcxy, e xya-jjotmicpíjccixipy etz xyajmibíjccixipy tiydudägy, jigix oybi ayuc mgápccixipy etz mdunipy ajcxy tüg'óciy oybi huinma'ñ. Ich ajt nDios Teedy etz ich ajt nHuindzin Jesucristo xychojcm xyjihuyim, e ti xymooyim jotcuyc'ajtin

huinixibi, e nañ ti tuñ may'ajt oy'ajt miid ich ajt yixpi, jaydebi nijp'ijxim oy'ajtin jibby tzajpjoty.

3

Mibijctzoogix Dios miid ich ajcxy yixpi

¹ Jadügnax, migügtjic ajcxy, tungix may'ajt mibijctzoogix Dios miid ich ajcxy yixpi, jigix jëbi ngapxhuäcxibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi jäy ajcxy mijpidägipy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ² Nañ mibijctzoogix Dios miid ich ajcxy yixpi, jigix ich ajcxy Dios xyñihua'nipy xcohua'nipy ma yi jäy ajcxy huidibi jibic-huinma'n ymiid, huidibi jibic ich ajcxy xytunamb, com mayjäy ca' mijpidägy Jesús y'ayuc ytiy'ajt. ³ Ich ajt nHuindzin Jesucristo tudägy yi', e xypubedip xypudigihup ajcxy jigix miich ajcxy ca' mjetmetzcihuipy ma yi mmibijcin, e nañ xypubedip ajcxy, jigix ca' xymimadáaccixipy je jibicjäy huidibi Dios ca' capxymido. ⁴ Ich ajt nHuindzin Jesús jotcuyc'ajtin ti xymóoygixyich miid miich ajcxy yixpi. Nmibijcxyich co miich ajcxy mguydumyib je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵ Com ca' ich njaty nej nijpcogapxihuibich, chi nguejxyich cogapxy, nnejhuñhua'nich nej anajty ajcxy myajpatcixy ma yi mibijcin, tzigiyyb ich anajty co nicxy mujcu' xypidaaccixy jibictuum, chi ich anajty ajcxy ndung ti ñaadigi'aty.

Ooyycopicyity co nduunim ma ajt ndung

⁶ Migügtjic ajcxy, miid ajt nHuindzin Jesús yxi etz ymic'ajt jada ane'min ajcxy nyajnibijcxy, co copicy ajcxy m'ixmadzipy yi mmigüg huidibi ca' ytuna'n ma yci'ndung, etz huidibi ca' cuyduñ Dios ytiy'ajt jadu'n nej ich tiy'ajt ti nyecy. ⁷ Miich ajcxy mnejhuñyb jadu'n nej ich ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma ich ndzinaayin nej jëbi miich ajcxy mdzinaaygixy. Co anajty ich njimity ma miich ajcxy, ca' ich n'ixmajch ngi'ndung. ⁸ Tüg'óciy ich ajcxy ngaayin n'uucin ngojuuyich. Nduñ n'ayooyich anajty xim tzuum, co anajty ca' n'adziba'nich ni tüg. ⁹ Dios ti xymöyich mic'ajt ane'min co ixipy ajcxy mbubejtin ti nbijctzoohui o ti nbijctzoohui ixipy ajcxy mgaayin m'uucin, per ca' ich ajcxy jadu'n ti ndungixyich, jigix ijxpejt ajcxy mbigipy ma ich ajcxy. ¹⁰ Com co anajty n'ityich ma miich ajcxy jada cötujcin ajcxy nyajnibijc co pinjaty ca' ytuna'n, ca' ajcxy myajcayipy myaj'ügipy. ¹¹ Jadu'n ich ti nnejhuñ co nijjity miich ajcxy ca' mdunaangixy mgi'ndung, jëyi myöygixy mnajxcixy jäyjin jäydijc. ¹² Yi jadu'mbi jäy ajcxy nyajnibijcxyich miid ich ajt nHuindzin Jesús yxi co huen tungixy jabom jabom ma yci'ndung, ca' huaad pin adzijpcix anajxcix jigix jëbi paadip ajcxy ycaayin y'uucin.

¹³ Migügtjic ajcxy, oybi jatyim tungixy jabom jabom, ca' mjetmetzcixyigixipy. ¹⁴ Pen nidügti ma miich ajcxy ca' tuñ cuendi jada ayuc huidibi ajcxy nyajni-jayiyb, ijxcix pin je', e chi ca' mjactungixip cuendi, e ni ca' miid myöymujc mnaxmujcixipy, jigix chöydunipy. ¹⁵ Ca' ajcxy huaad midzip'ajtcixy yi jäy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijcx oy'amy jadu'n nej tüg mibijcpi.

Capxpoocxin huidibi cijxnip je necy

¹⁶ Huen ich ajt nHuindzin Jesucristo huidibi jotcuyc'ajtin yejcp, ci'm xya-jjotcugixyigixipy jabom jabom oytim minaaxijity oytim yma'amyity. Huen je Huindzin Dios xypubejtcixy xypudigixyigixy.

¹⁷ Hich, Pablo, jada capxpooocxin ci'm njaayich. Jadu'n nfirmajiyich tüg'óciy hich nnecy, e jadu'n miich ajcxy mnejhuñhuipy co hich jada necy'adyii. ¹⁸ Huen hich ajt nHuindzin Jesucristo may'ajt oy'ajt tunipy mid tüg'óciy miich ajcxy. Jadu'n jada. Amén.

1 TIMOTEO

Yi Jayijpi Necy Huidibi San Pablo Yajniguejxy Timoteo

¹ Hich Pablo, Cristo Jesús xyaj'apóstol'ajtpich. Yi Dios huidibi xyñihuaanim xyyajnidzoocim ajt n'alma, etz Cristo Jesús huidibi xymöhuaanim jugy'ajtin huinixibi, yi' ajcxy ti xyajnbicyich co yi' y'ayuc ngapxhuäcxibich. ² Cham hich miich nijayiy Timoteo. Jadu'n njihuüy nej hich miich ngi'm'ung'adyii, co miich Dios ytiy'ajt ti mbaady ma hich. Huen Dios Teedy etz Cristo Jesús hich ajt nhuindzin may'ajt tunipy mid miich, huen xypa'ayoohuipy etz xya-jjotcugihuipy.

Nijëjity jäy yaj'ixpicy huidibi ca' ytiy'ajtity

³ Hui'mi' miich jim Efeso, jadu'n nej nimay je taabi anajty ndzona'nich jim Efeso nnicxa'nich anajty Macedonia. Hui'mi' jim, jigix mgapxadugipy je jäy huidibi najtzcaxiyb je ayuc ca'p ytiy'ajtity. ⁴ Mgapxadugipy je nigoobi y'ayucity. Mgapxadugipy yi' ajcxy huidibi tzachnigapxp tzachnimiydacy yi' judiojäy ajcxy y'ayuc jadu'n nej huidibi ñi'ap'ajtpy ñideedy'ajtpy ajcxy. Yi jadu'mbi ayuc nigoob yajhuinma'nydigoy pinjaty ixpijcp Dios ytiy'ajt.

⁵ Jadu'n Dios tzocy co huen jäy ajcxy naychojctäyüi mid oyjot oyhuinma'n. Huen ajcxy Dios yajmij'aty janch cixyjot huinjot. Co pin yajmij'aty Dios janch cixyjot huinjot, ooy ajcxy oy ñayjihuiyigixy. ⁶ Nijëjity jäy ajcxy ti ixmajtzn je Dios ytiy'ajt, ti ajcxy jiptigiyüi je ayuc huinma'n huidibi ca'p choobaady. ⁷ Ooy yi' ajcxy jayaj'ixpiga'n yi' Dios ycötujcin, ni ca' huinjihuiyigixy huidibi ycapxcixyp, ni huidibi ajcxy ñgapxpejtpy.

⁸ Hich ajcxy nnejhuüyim co yi' Dios ycötujcin oy yi' pen nyajtunim nej ypadyii nej ytiy'ajtity. ⁹ Nejhuüyim co yi' Dios ycötujcin ca' yi' tzaachytuñ oyjäydijc, jëyi tzaachytuñ pin ca' capxymidooy Dios, pin midundigooyb Dios ycötujcin. Je Dios ycötujcin chaachytumyb jäy huidibi ca' cuydungixy, jäy ajcxy huidibi ca' ytuädgyity, jäy huidibi ca' capxymidoogixy Dios, jäy huidibi pocytungixy, jäy huidibi ca' huindzigi'n yajtungixy mid Dios, jäy ajcxy huidibi capxtigooyb, huidibi ytaj yteedy yaj'öccixy, huidibi jäy yaj'öccixy. ¹⁰ Je Dios ycötujcin chaachytumyb pin migapxtigooyb töxyjäydijc etz yëydijctijc, huidibi miyëydijc ymahua'n. Dios nañ chaachytumyb je jäy huidibi jäy majtzip etz toognaxy, chaachytumyb indaacpidijc etz ñihuambejtpidijc. Je Dios chaachytumyb jac-jadyii jäy huidibi y'ayuc ca' ytiy'ajtity nej Dios tiy'ajt midity. ¹¹ Jadayaabi tiy'ajt huätzpi oybi tügüyb mid Jesucristo y'ayuc ytiy'ajt oybi huidibi hich nDios, je conuucxy yTeedy, ti xyyajnbicyich co ngapxhuäcxibich.

Pablo yjäygidacpy co Dios may'ajt ti tuñ mid yi'

¹² Ooy njäygidägyich co hich ajt nhuindzin Cristo Jesús ti xyajmicpicyich, yi' ti xy'ijxtiyyich, yi' ti xyajnbicyich Dios y'ayuc co ngapxhuäcxpich. ¹³ Hich jecy'ajty jibic anajty nigapxy ni'ojüyich Jesús. N'ixhuidijty nbahuidijtyich Jesús yjäy. Hich yi' ajcxy nmidundigooyich. Ti yi' Dios xypa'ayooyich com hich jadu'n anajty ti n'adich mid co nganejhuüyich je tiy'ajt, ngamibicyich Jesús ngamijpidägyich Jesús. ¹⁴ Paady ycixpi hich ajt nhuindzin Dios may'ajt oy'ajt ti tuñ mijcajee mid hich, co ti xyajmbicyich Jesús. E Jesús ti xymöyich tzojcin jihuiyün mid yi' yjäy ycixpi.

¹⁵ Ooy jada yjanchity, e nidüg'óciy jäy ajcxy jëbi mibijccixy co Cristo Jesús miñ ya naaxhuiñ co yajpocynihuädza'n pocyjäydijc. E hich ñigi pocy

nmídidyich ca'ydi ni pinjäy. ¹⁶ Míid jada ycixpi Dios ti xypa'ayooyich ti xymimecxtucyich, jigix co jäy ajcxy ijxip nej Dios ti ytuñ míid íich, huin'it ajcxy mijpidägipy yi' y'ayuc etz ypaadipy jugy'ajtin huinixíibi ma Jesús. ¹⁷ Paady chojcpy co ngömayim Dios, je rey huidibi ane'mb huinixii, huidibi niminaa yca'o'cy, etz nipin ca'ixy. Je Dios tügpajc huidibi Dios'ajtp huen ycömay'idipy cham etz tüg'óciy xii tiempo huidibi mimb cidacp.

¹⁸ Timoteo, ooy íich miich ndzocy njhuüy. Jada ayuc íich miich nyajnimaydaayb. Mihuindináhuip Dios y'ayuc ca' mhuinma'ñyidigoyipy. Mgyudunipy jadu'n nej Dios y'ayucnajtcapxíybi xy'íhuuijy xycapxhuijy co mdung mnímajch. ¹⁹ Mihuindináhuip Dios y'ayuc ytiy'ajt, huin'it ca' jibic mnayjihuühuüybi, jadu'n nej ajcxy jadyii huidibi nejhuüyb je tiy'ajt, e ca' cuydungixy, e jadu'ñyi yhuinma'ñyidigooygixy. ²⁰ Jadu'n nej Himeneo míid Alejandro ajcxy jaty, huidibi íich ti nyajcidigüygixy je mujcu', jigix ajcxy yhuinma'ñymedzipy, ca'ydi yajjotma'tcixy Dios.

2

Jadu'n nej jëb Dios mibijctzoohuim

¹ Yi' njatyyajnimayb co ooy ycopicyity capxtaaccixy mibijctzoogixy Dios etz yajnajxcixy Dioscojuyip míid tüg'óciy jäy ajcxy ycixpi. ² Copicy nnibijctzoohuim ma Dios: reydiyc, ane'mbidijc etz codungdiyc, jigix jëbi jotcuyc ndzinaayim, ca' ma tzip. Co jadu'n nduunim, yi' anajty ngoduunim Dios y'ayuc, etz huin'it tiydudägy ndzinaayim. ³ Com yi' jadu'mbi huinma'ñ ooy yi' y'oyity, e Dios huidibi íich ajt n'alma yajnidzoocp, oy yi' jäygidägy. ⁴ Dios chojcpy co tüg'óciy je jäy ajcxy huen y'alma nidzooccixy, huen ijxcixy nejhuüygixy Dios y'ayuc ytiy'ajt. ⁵ Tüg je' je nHuindzin'ajtim Dios, etz tüg je' je huingapxpi huidibi jëbi ytiy'ajt ma Dios míid íich ajt ycixpi, etz huidibi jëb Dios y'ayuc capxnajxy ma íich ajt: je huingapxpi, je' je' je jäy, je Cristo Jesús. ⁶ Cristo Jesús nayyojxi naydooci míid íich ajt nbocy ycixpi, ñaygíyeci huen jäy yaj'ögyii, jigix jëb íich ajt nbidzímim ma je mujcu' anajty cí'am xymíid'ajtim. Jadu'n nej Dios cham jäy yajnejhuüy co je tiempo yhuaad'ajtni, ⁷ paady Dios ti xyajníbicyich ngapxhuäcxibich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpich, ca' n'indägyich. Ti xyajníbicyich jada tung nej jëb huaad nyaj'ixpicyich, nej jëb huaad mibijccixy Dios, etz nyaj'ixpicyich Dios ytiy'ajt ma yi' jäy ajcxy huidibi ca' yjudíojäyity.

⁸ Ndzojcpyich co yi' yëydijctijc huen mibijctzoogixy ojadajtcixy Dios ma tüg'óciy naymujctac míid oyjot oyhuinma'ñ, ca' y'adzip y'ahuan'nity, ca' y'ametz yjotmetzity. ⁹ Nañ jadu'n ndzojcpich co yi' töxyjäydijc huen yhuit yxojx yajtungixy nej ypadyii, huidibi quipxpaady ajcxy paatip. Huen yhuit yxojx pidaaccixy nej töxyjäydijc huidib tudägyip. Huen ycöhuay cüdigy caaxigy nej ypadyii, ca' ymígügtijc huinnaxtugipy míid yhuit yxojx, ca' nayxójxigixy míid oori, míid perla, e míid tijaty ooy choohuity. ¹⁰ Ca' huaad töxyjäydijc ñaygómáyigixy míid yhuit yxojx, huen janch yajcömaygixy míid y'oyjäy'ajtin, jadu'n nej je jäy ajcxy tungixy huidibi ti ñaygíyécigixy cixyjot huinijot ma Dios. ¹¹ Co jäy ajcxy yaj'ixpicy Dios y'ayuc ma je naymujctac, huen töxyjäydijc ajcxy amoyñi amidoo'ijtcixy míid yungnaxy yjot yhuinma'ñ. ¹² Yi' töxyjäydijc ca'p niducyich yaj'ixpigipy jäy ajcxy ma je naymujctac. E ni ca' ypadyii nicxy yëydijc ane'my. Huen ajcxy amoyñi y'ity. ¹³ Dios jayijp yajcojy Adán, jac'axam Eva, paady ycopicy yi' yëydijctijc huen ane'my yi' töxyjäydijc. ¹⁴ Adán ca' yajtzu'ijxy. Eva yajtzu'ijx, je' ca' Dios capxymidoy. ¹⁵ Paady yi' töxyjäydijc ca' ypadyii nicxy nigohuajc'aty yi' mibijcpidijc. Dios jotcuyc ñayjihuüyii míid

co jëyi y'ung'ijxcixy, etz yajmij'ajtcixy Dios, etz tzojctaaygixy ymígügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy müd oyjot oyhuinma'ñ.

3

Nej jëbi ytungixy huídibi ajcxy nigohuajc'ajtp

¹ Tiy'ajt jada nej jäy ymínaangixy. Pen ji pin najtzogïy nigohuajc'ada'ñ yi mibijcpidijc tüg yi' oybi anajty ytunamyb. ² Pin nigohuajc'ajtp yi mibijcpidijc ooy ycopicyity je' jadu'n naydijib huídibi ca' ti tundigoy, huídibi tüg töxyjäy müd ca'p ycanaagity, huídibi huijycujc jäy'ajtp, huídibi müd oybi yhuinma'ñ etz tudägy pi yhuinma'ñ, huídibi ooyjäy'ajtin tumb, huídibi jajtp nej jäy ajcxy yaj'ixpigipy. ³ Pin nigohuajc'ajtp chojcpy tüg jäy huídibi ca' y'amügity, huídibi ca' yhuindzipity, huídibi yajtumb mecxtujcin, huídibi ca' chipcapxy y'ahua'ngapxy, huídibi ca' ti adzocy. ⁴ Pin nigohuajc'ajtp chojcpy tüg jäy huídibi tiydudägy tzinaayb ma yjin ytijc, huídibi y'ung y'anäg yajtzinaayb nicy xeemy. ⁵ Pen ca' jaty nej y'ung y'anäg migapx ane'mip ma yjin ytijc, ¿nej oc'ane'ma'ñ yi mibijcpidijc? ⁶ Nañ ca'p yjéjity huídibi namni mibicy Dios y'ayuc ytiy'ajt. Ycadimjegyity nicxy ooy amij agix ñayjihuiyüi, e nicxy camadägy je ane'min, e yjadipy jadu'n nej Satanás yjajty co jibic tumb ñayyajhui'mi müd Dios. ⁷ Chojcpy tüg jäy huídibi nidüg'óciy je mayjäy oy ijaxip. Pen ca' yjadu'nity nicxy pin yxiyüi, e chi jada anajty je mujcu' ti ymimadägyüi co jäy jibic ñigapxiyb.

Yi mutz tungmüd nañ chojcpy huídibi oyjot oyhuinma'ñ müd

⁸ Yi mutz tungmüd huídibi yajpat ma mibijcpidijc chojcpy jäy tudägy pi, huídibi nicy xeemy jäy'ajtp, huídibi ca' jäy'aty aguejtmñ aguejtxipy, huídibi ca' y'amügity, huídibi ca' y'adzocy ca' y'ameeñity. ⁹ Huen naybidáacigixy cixyot huinjot ma je tiy'ajt janchypi. Je tiy'ajt huídibi je mayjäy ca' huinjihuiy. Je tiy'ajt huídibi ich ajt nmibijcim. Je' chojcpy pinjaty huídibi ca' ti jibicpi jot'adyüi huinma'ñ'adyüi. ¹⁰ Pinjaty mutztung yajnicxamb, jajjip jot'ix huinma'ñ'ix pen tudägy yhuinma'ñ. Huin'it jëbi mdungmöy. ¹¹ Yi mutz tungmüdpi ytöxyijc chojcpy co huen tudägy jäy'aty, huídibi ca' ñigapx ñi'ojïy ymígüg, huídibi nicy xeemy jäy'ajtp, huídibi cuydundaayb tüg'óciy. ¹² Yi jäy huídibi mutztung yajnicxamb chojcpy tüg jäy huídibi picy chinaayb, huídibi ca'p müdity metz o tugiig töxyjäy, huídibi y'ung y'anäg yajtzinaayb nicy xeemy, huídibi tiydudägy tzinaayb ma yjin ytijc. ¹³ Yi mutz tungmüdpi huídibi yajxon ytung cuydungixy, cómay yi' ajcxy idipy ma mibijcpidijc. Nañ ñigi ajcxy ixpijcidich Cristo y'ayuc.

Dios mijhuinma'ñ tuun müd ich ajt ycixpi

¹⁴ Jada necy ich müch nyajniguejxyp. Njijp'ijxypich co tzojc nnicxa'ñich jim ma müch. ¹⁵ Pen ca' y'oyïy nej tzojc nnicxibich ma müch, ti yam nyajnijayïy je janchypi. Müd jada necy huaad jëbi nidüg nidüg mibijcpi yjäy'ajtigixy ma yi mibijcpidijc huídibi mijpidacp Dios juugypi, je Dios huídibi huijtz'ijtaayb etz cohuandaayb je tiy'ajt janchypi. ¹⁶ Janch tiy'ajt jada co mij yi' yi Dios y'ayuc ytiy'ajt huídibi ti xyajnejhuïyim, je huídibi jecy'ajty ca' pin nejhuïy. Je tiy'ajt huídibi xyajnejhuïyim co quexy y'ung ya naaxhuiñ.

Dios y'ung hue' je' yaj'ijxy müd ñinïcx. Tudägy nayguëxici müd Dios yjihui'ñ ymic'ajt. Je Dios y'ángeles ajcxy ti ixüi. Ti yajnigapxy yajnimiydägy Dios y'ung ma huídibi ca' yjudiojäyity nañ ti jäy yajmij'ajtcixy Dios y'ung ya naaxhuiñybi. E ti ycöbigyüi tzajpjoty ma yi oybi it.

4

Mayjäy ixmadza'ñ yí Dios ytiy'ajt

¹ Yí Espíritu Santo mīnaan co anajty je xī tiempo ycīxa'ñ, mayjäy ixmadzaangixy yí Dios y'ayuc ytiy'ajt. Mijpīdaaccixy anajty jäy ajcxy y'ayuc huīdibī yí huīn'ñmbī etz ca'oybī ytiy'ajt mīid. ² Jada jäy ajcxy mīid anī anajty naybīdáacīgixy nej ytudägyity, e ca' anajty yjanchity. Ca' ajcxy nej ñayjihuiyī co ajcxy ytīgīy anīdaacpī. Tī jadu'n yhuīnma'ñypīdaaccixy janch mīc. ³ Yí ajcxy ymīna'ñ co ca' huaad jäy ypijccixy, etz ca' huaad caaygixy nijējity caayīn uucīn. Yí caayīn uucīn Dios yí tī conucxy jīgix jēbī jäy ajcxy huīdibī mībījccixy etz huīnjihuiyīgixy je tīy'ajt, jēbī yajnajxcixy Dioscojuyip ma Dios etz cōbīgipy ajcxy agujc jotcujc je caayīn uucīn. ⁴ Tüg'ócīy huīdibī Dios tī yaj'oyīy, oy yí'. Ca' huaad pīn ymīna'ñ co ca' y'oyity. Agujc jotcujc ngōbījcm, jēyī nyajnajxīm Dioscojuyip ma yí'. ⁵ Dios ymīna'ñ co huen huīdibī caayīn huīdibī uucīn ooy y'oy yí'. Jēyī co nyajnajxīm Dioscojuyip, e huīn'it Dios conucxy je caayīn uucīn.

Ca' ajcxy mmijpīdägīp yí nīgoobī'ayucity

⁶ Pen mīich ajcxy jada ayuc jada tīy'ajt myajñīmaayb yí mīgügtījc, oy anajty mduñ ma Cristo ytung. Co jadu'n myaj'ixpīcy Dios y'ayuc janch cīxyjot huīnijot, chī anajty myajyēegy yí mmībījcm. Ca' mjäydgoyīpy yí oybī ayuc huīdibī nyajñīmaayb, huīdibī ayuc mbanīcxyp mbayōyp. ⁷ Ca' mmijpīdägy yí nīgoobī'ayucity huīdibī ca' choobaady ma Dios. Panīcxī' payōyī' Dios ytiy'ajt. ⁸ Jac'oy co n'ixpījcm Dios y'ayuc, ca'ydi co nīnīcx ymīc'ajt nbaatīm. Co yajyujctäy jäy ñīnīcx, chī ñīnīcx ymīc'ajt paady jēyī. Co n'ixpījcm nguīduunīm Dios ytiy'ajt, chī tīy'ajt nbaatīm nej ya naaxhuīñ ndzīnaayīm, etz nañ jadu'n nbaatīm jadüg jugy'ajtīn ma Jesús co anajty n'o'cīm. ⁹ Jada tīy'ajt huīdibī tī nyajñīmāy, janch tudägy jada, jēbī ngōbījctaayīm, e nīdüg nīdüg jēbī mībījccixy. ¹⁰ Paady nduunīm n'ayoohuīm oy pīn xyca'īxaanīm. Njīp'ījxīm co je Dios huīdibī jugy'ijtp xyajñīdzōgaanīm n'alma. Jēyī yajñīdzōgīpy ajcxy y'alma huīdibī mijpīdaacīp Dios y'ayuc.

¹¹ Yajñīma' yí mīgügtījc huen cuydundaaygixy jada ayuc. Yaj'ixpīc jada tīy'ajt. ¹² Huen jäy ajcxy m'ayuc xymijpīdaacī, oy mīich mutz anācīnity. Myegīpy ijxpejt ma mīgügtījc nej jēb huaad ycapxcixy ymīydaaccixy, nej jēb huaad ytungixy, jadu'n nej jēb huaad oyjäy'ajtīn tungixy, jadu'n nej jēb huaad mībījcm yajtungixy ma Dios, jadu'n nej jēb huaad huädz yhuīnma'ñ mīid'ajtcixy. Co jadu'n mdunīpy, huīn'it ajcxy mijpīdägīpy mīich m'ayuc. ¹³ Mabaad ñch anajty nīcxy ma mīich, capx Dios ñecy ma yí naymujctac, capx huäcx etz yaj'ixpīc yí tīy'ajt. ¹⁴ Yajtun yí huīj'ajt cujc'ajt huīdibī Dios xymoy je taabī je mībījcpīdjīc mījtungmīdīpī xycīnīxajy, e xy'ayucmoy xymīc'ajtmoy ajcxy mīid je Espíritu Santo ymīc'ajt.

¹⁵ Naybīdägīy yajcopījc tüg'ócīy huīdibī tī nyajñīmāy, e nīgüxīgīpy mayjäyduum co tī yajxon m'ixpīcy je tīy'ajt. ¹⁶ Nayguend'adī mīich ooy cī'm, nañ jadu'n naygüend'adī ma yí Dios ytiy'ajt, ca' m'ixmach Dios y'ayuc. Co mīich jada mdunīpy cī'm anajty nayyajñīdzōgyī, nañ jadu'n anajty myajñīdzōccixy huīdibī anajty ajcxy amīdoo'ijtp mīich m'ayuc.

5

Nej jēbī huaad mīgügtījc m'ñhuījīpy mgapxhuījīpy

¹ Ca'p huīnjīp m'ojīp mīj'anāctījc. Oy'amy ñhuījīcixy capxhuījīcixy jadu'n nej jīhuīy mdeedy'adyī. Nañ jadu'n yí yujcyēcytījc ñhuījīcixy capxhuījīcixy oy'amy jadu'n nej jīhuīy mgi'mjuugy mgi'mmīgüg. ² Yí mīj'anāctījc ajcxy

töxyjäybi nañ jadu'n oy'amy m'ihhuijcixy capxhuijcixy, jadu'n nej jihuïy yí ajcxy mdaj'adyii mdzitz'adyii. Yí töxy'anäctijc ajcxy mutz'anäcniþ mïd'ijtcixy mïd tudägyi mjot mhuinma'ñ.

³ Huen yí mibijcpidijc ajcxy yajmij'adipy etz pubedipy yí töxyjäydijc ajcxy co'ögypi, huidibi janch ni yþin ycaca'ty. ⁴ Pen jim töxyjäydijc co'ögypi huidibi mïd y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidity mïd ytaj etz ñambiid. Com yí jadu'mbi huinma'ñ Dios yjäygidacpy. ⁵ Je töxyjäy co'ögypi ca'p þin tim mïdity, yí yjijp'ijxyp co Dios ypubediiyb etz Dios ymibijctzooyb y'ojadajtpy jabom jabom xim tzuum. ⁶ Je co'ögy töxyjäy huidibi tzinaayb mïd mayñax xondaacin, jadu'n Dios yajnaxyii jadu'n nej jihuïy y'ögity ytigoyity. ⁷ Yajñima' ajcxy huen cuydungixy Dios ytiy'ajt, jigix ca' jibic ajcxy yajnigapxy. ⁸ Pen ji þin huidibi yajmij'ajtp Dios, e ca' pubeda'ñ y'amigüg, pen ca' y'ung ytöxyijc yajxon icy may'aty, ca' yí cuyduni Dios y'ayuc ytiy'ajt. Niþi anajty yjibicity nej ti y'idich ca'ydi jadu'n nej huidibi ca' ymibicy.

⁹⁻¹⁰ Yí töxyjäy co'ögypi ajcxy tiibi ytugi'px jimijtiy, jëbi mgojayiiyi yxi ma yí lista huidibi yí mibijcpidijc ypubedamyb. Yí mibijcpidijc ypubedamyb pen tüg ñäy anajty mïddzinäy, pen oyjot oyhuinma'ñ ymïd, pen ti y'ung yajxon yajyeegy, pen ti migügtijc mi'oyjäy'aty, pen ti may'ajt tuñ mïd Dios yjäy, pen ti pa'ayooy huidibi ayooþ huidibi jottigooyb, pen ti yajtüyöy yajxon nej ytiy'ajtity.

¹¹ Yí co'ögy töxyjäy mutz'anäcniþi ca' mgojayiiyipy yxi ma yí lista huidibi yí mibijcpidijc ypubedamyb. Pen capxytumb co tuna'ñ mïd Cristo yciþpi tijaty tung ma naymujctac, ycajeyity co je oybi anajty yam y'octumyþ, chi nijot'ajtni ypigaani, chi ytung ixmajtznip. ¹² Co yí mibijcpidijc ajcxy ca' jäygidacaci yí ytung, chi jibic ñayjihuiyii co ca' cuyduñ y'ayuc nej ti ycapxytuñ mïd yí Cristo Jesús. ¹³ Jadügnax ca' ytung yajcopicy, jëyi yhuidijtni jayjin jaydijc, e ca' yí'yity, nañ jadu'n ymigüg nigapxni ni'ojiiyñi, capxni miydaacni huidibi ca' y'oyity. ¹⁴ Ndzojcpyich co yí töxyjäy co'ögy mutz'anäcniþi huen þijccixy, huen tzinaaygixy jugy'ajtcixy yajxon, huen ung'ijxcixy anäc'ijxcixy, huen yajxon cuend'ajtcixy yjin ytiþ, jigix ca' ajcxy nihuambediiyb ni'ojihuiyþ huidibi ca' Dios y'ayuc ixaani midohuaani. ¹⁵ Nijëjity töxyjäy ajcxy co'ögypi ti ixmajtzcixni Dios y'ayuc ytiy'ajt, e ti ajcxy jijptigiyiiygixni yí mujcu' yhuinma'ñ.

¹⁶ Pen ji mibijcpidijc yëydijcpi o töxyjäybi mïdity y'ajuugy y'amigüg co'ögypi, yí je' paatip ixipy may'adipy je y'ajuugy y'amigüg co'ögypi, e ca' yaj'idipy ma yí mibijcpidijc niþixp. E jadu'n je' huaad je mibijcpidijc ajcxy pubejtcixy co'ögypi ca'p ti tim mïdity.

¹⁷ Yí ajcxy huidibi nigohuajc'ajtp yí mibijcpidijc huidibi yajxon tumb capxpaady y'idipy. Niþi ajcxy capxpaady y'idipy huidibi Dios y'ayuc capxhuäcxip etz yaj'ixþicy. ¹⁸ Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo miiy co yajpajc'ada'ñ yí trigo tim." Nañ jadu'n jadüg'it yjaybetyity: "Yí huidibi tumb paatip yí ymuju'ñ." Jadu'n jada ayuc yhuimbidity: Yí huidibi yaj'ixþijc Dios y'ayuc paatip huen yajmujuy.

¹⁹⁻²⁰ Ca' mic'amy mdiydunipy þin tungmïdþi ma yí mibijcpidijc pen tügpajc huidibi xihuip. Ca' mdiydunipy þin tungmïdþi ixti cooni metz o tugüg testigo yquëxigipy pen janch ti ytundigooy. Pen ytundigooy yí huidibi nigohuajc'ajtp, capxidzim mayjäydumb jigix jacjadyii chigi'ñ þijccixipy. ²¹ Jada tiy'ajt miich nyajñimaayb, Dios Cristo Jesús etz yí y'ángeles ajcxy huidibi Dios

tí huin'ixcixy ñidiy'ajt'ajtcixy co yjanchity jada ayuc. Co mbanicxip jada tity'ajt, ca' huin'ixpety mdiydunip mdzaachytunip mibijcpidijc. ²² Ca' mic'amy mginixajipy co myajtungbiga'nip jäy huidibi ca' m'ixy'adyii. Ycajegyity ypocytunipy, e tú'ciy mbocycâhuaangixy miich müd yi'. Miich nayguend'adi jigix ca' mbocycâhuipy.

²³ Miich Timoteo, pen pijcp mjot, tzoy'adi hueen vino, com jac'oy yi' ca'ydi co m'ügipy huadz ni.

²⁴ Jadyii jäy huidibi jibic-huinma'ñ müd yajnejhuihuipy yi' ajcxy yjibic-huinma'ñ ma anajty ca'ni yajtydungixy. Jacjadyii jäy ca' yajnejhuüy yjibic-huinma'ñ ixti cooni yajtydungixy. ²⁵ Nañ jadu'n jadyii jäy yajnejhuihuip co oyjäy'ajtin anajty ti tungixy, jacjadyii jäy ca' mic'amy yajnejhuihuipy co oyjäy'ajtin ti tungixy. Yi oyjäy'ajtin ca'p yi' yhuimipy coyüch.

6

¹ Tüg'óciy tumbidijc huidibi ajcxy mibijcp huidibi ajcxy ijtp cojuyiy codoogy, huen yajxon yajmij'ajtcixy yhuindzin. Pen ca' jadu'n tungixy, chi je huingjäydijc jibic nigapxaani ni'ojihuaani yi Dios etz yi' ytiy'ajt. ² Pen yi tumbi müd yhuindzin huidibi yajmij'ajtp Dios, ca' y'oyity co nixigipy yajxigipy yhuindzin. Huen ajcxy nigä yajxon yajmij'ajtcixy, com hue' je' Dios yjäy. Yi huidibi nihuindzin'ajt ypadamyb je oybi huidibi je' ytumbi ytung'ajtpy. Jada tity'ajt yaj'ixpic etz capxhuäcx.

Jotcuyc'ajtin nbaatim ma Dios ytiy'ajt

³⁻⁴ Pen ji pin huingbi tity'ajt yaj'ixpicy huidibi ca' ñaybadyii müd je Huindzin Jesucristo y'ayuc ytiy'ajt, e ni ycanaybadyii müd je tity'ajt huidibi ich ajt nmijpidaacim, hue' jada nej tüg jäy huidibi amij agixip huidibi ca' ni ti nejhuüy. Chachnijot'aty tzip capx, e jadu'n yhuimbizimy jada tzip capxy co migüg ca' yaj'oy'ixy, chi ñaymidziptzoongixy nihuambejtcixy etz jibic nigapxcixy ymigügtijc. ⁵ Yi jadu'mbi jäy huidibi ca' mijpidägy Dios ytiy'ajt cojpy ymacxpy tzip capxy huidibi ca' ycixy ytigoy. Yhuinma'ñdigoy ajcxy, ca' huinjihuüygyxixy tity'ajt. Hue' ajcxy yaj'ixpicy Dios y'ayuc müd co ycomeñ'adaangixy. Puhuäctuat miich jadu'mbi jäy ajcxy. ⁶ Co Dios y'ayuc ytiy'ajt nguydunim, huin'it jotcuyc ndzinaayim, etz nbaatim oy'ajt mijpi. ⁷ Ni ti ich ajt ya naaxhuiñ ca' ti nmimiinim co nma'xung'ajtim, nañ ni ti ngaminicxim co n'o'cim. ⁸ Pen nmüd'ajtim caayin uucin huit tucxy, jëbi njotcuyc'ajtim müd yi'yi. ⁹ Je' ajcxy huidibi ooy nijot'aty comeñ'adi, hue' je' ajcxy jibic tumb ajcxy ycâhua'ñ. Je' ajcxy chachtunamyb huidibi ca' oyhuinma'ñity, huidibi nayjotmayduunip. Ayo'n ajcxy ypadamyb, tigoyamb ajcxy y'alma. ¹⁰ Yi meeñy'adzojin yi' je' yi jibic-huinma'ñ cop'ajtip. Müd yi meeñy'adzojin may yi jäy huidibi jäydigoy Dios ytiy'ajt. Hue' je' ajcxy nayjotmayduunip.

Timoteo, tiydudägy mdzinähuipy miich

¹¹ Timoteo, Dios yjäy, cöguëg yi jäy huidibi müd yi jadu'mbi jibic-huinma'ñ. Tiydudägy mdzinähuipy, cuyduni Dios y'ayuc ycötujcin, mijpidäg Dios y'ayuc ytiy'ajt, tun oyjäy'ajtin, mihuindina' yi tung, müd'at mjot mhuinma'ñ yung naxy. ¹² Mic mjot mhuinma'ñ pidäg ma Dios ytiy'ajt, ca' mjotmetzciy. Tun jadu'n nej jäy huidibi nayboyicquípaxigixy naymic'ixigixy. Nijot'at cixyot huinjot yi jugy'ajtin huidibi m'alma ypadamyb ma Dios. Dios xyajnißicy jigix mgapxhuäcxip jada tity'ajt. Ti miich mgapxypidzimy nej mmibicy mayjäyoty. ¹³ Dios je huidibi yajjugy'ajttaayb tüg'óciy, yi' nidiy'ajt'aty co ooy ycopicyity jada ayuc jadu'n nej cham nyajnißaayb. Nañ jadu'n je Cristo Jesús je huidibi

tíy'ajt capxypídzim ma Poncio Pilato ñidiy'ajt'ajt co oy ycopicyity jada ayuc jadu'n nej cham nyajnímaayb. ¹⁴ Copicy cuydun jada ayuc ane'mín. Huädz mguydundähuipy, huädz myaj'ixpigipy je tíy'ajt jigix ca' pín jibic ni'ojíhuipy Dios ytíy'ajt. Jadu'n mdunipy ixti cooni ñch ajt nHuindzin Cristo Jesús ñayguëxigíyib ya naaxhuiñ jadüg'oc. ¹⁵ Dios yajniguëxigamyb Cristo Jesús mína anajty je tiempo yhuaad'aty. Dios je' je mij'ane'mbí, je mijpi rey, etz je mijpi huindzin. Yí' je' je Huindzin Dios huídibi ane'mdaayb. ¹⁶ Yí' je' tügpaic je jugy'ajt cop ymíid. Yí' ijtp ma je tíicxin je jajín huídibi ca' pín huaad ninej míhuingoñ. Janch ni tüg jáy tí ca' ixty, e ni ca' ixa'ñ. Yí' je' cōmay'idipy etz yí' ane'mdaayb tüg'óciy. Amén. Jadu'n jada.

¹⁷ Yí' comeeñydíic huídibi jadachambi tiempo tzínaayb jugy'ajt, níma' miich yí' ajcxy co ca' huaad amij agix ñayjihuíyigixy, ni ca' nígi adzojccixy anaxy yí' meeñ huídibi jadu'ñyí tígoydaayb. Huen ajcxy mijpidägy yí' Dios huídibi xy-mooyim tüg'óciy mijmay mijcajee jigix njotcujc'ajtim. ¹⁸ Huen yí' comeeñydíic oybi tungixy, jigix ajcxy cōmay ypidzimipy co oyjäy'ajtin tungixy. Huen ajcxy pa'ayoogixy ymígügtíic huídibi ca' tí mídity míid oyjot oyhuinma'ñ. ¹⁹ Co ajcxy jadu'n tungixpy, chi padaangixy je oybi huídibi miimb gidaacp. Ypadamyb ajcxy je jugy'ajtin huínixíibi.

Timoteo, mijpidäg jada tíy'ajt

²⁰ Timoteo, mijpidäg jada ixpíicín huídibi tí myajníbic'aty. Ca' mmijpidägipy yí' nígoobi y'ayucity, yí' huídibi ca' Dios huindzigíy. Ca' mmijpidägipy yí' jáy huídibi ajcxy naybidaacip jadu'n nej jíhuíy ooy ycohuinma'ñity, e ca' yjanchity, huídibi mídzip'ajtp Dios ytíy'ajt. ²¹ Jadu'n nej níje' ajcxy paníxcixy jada ca'pí ytíy'ajtity, e jadu'ñí ñitígoy.

Huen Dios je oy'ajtin tuñ míid miich. Amén. Jadu'n jada.

2 TIMOTEO

Yi Mimetzpi Necy Huidibi San Pablo Yajniguejx Timoteo

¹ Ich Pablo, Dios ti xyajñibicyich huen Cristo Jesús xy'apóstol'adyiijich. Yi ti xyquexyich co yi' y'ayuc ngapxhuäcxibich. Dios ti yajhuinhuaniiygixy yi jäy co pin mijpidägiipy Cristo Jesús yajjugypigipy co anajty ti y'ögy. ² Ooy ich miich ndzocy njihuiy nej ngi'm'ung'adyii. Dios Teedy etz ich ajt nHuindzin Cristo Jesús huen tuñ oy'ajt may'ajt mid miich, huen xypa'ayooy, huen xyyajjotcugiy.

Pablo jotcujc co Timoteo ti mijpidägy Dios y'ayuc

³ Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios mid miich ycixpi jabom jabom xim tzuum. Janch cixyjot huinijot nyajmij'atyich Dios, paady ooy oy nayjihuiyijich. Nañ jadu'n n'ap ndeedy jecy'ajty janch cixyjot janch huinijot yajmij'ajty Dios. ⁴ Ooy miich nicxy njaco'ixihua'ñ jigix njotcugihuibich. Ooy njajäymejtzcodyiijich nej miich mjiiy myaax mid ich ycixpi je taabi jim ndzooñich. ⁵ Njäymejtzpich jadu'n nej miich mmijpidägy yi' Dios janch cixyjot huinijot co xymid'ityich. Nañ njäymejtzpich co jayijp mnambiid Loida etz yi mdaj Eunice mijpidacy Dios janch cixyjot huinijot. Minambich co chambaad miich mmijpidägy Dios janch cixyjot huinijot.

⁶ Jada nyajjäymejtzcootpy: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷ Dios ca' xyajhuindzigy'aty, hue' xyajjotmic'ajtp. Mid Dios ymic'ajt jeb mnaychójcigixy mnayjihuiyigixy, jeb oyjot oyhuinma'ñ myajtungixy. ⁸ Paady ca' mmidzöyduniiyb ich ajt nHuindzin Cristo Jesús ytiy'ajt. E nañ ca' xymidzöyduniiybich co ti nbujxtijc iñayich mid ich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypi huidibi myajnajxpy co mgapxhuäcxy yi' Cristo Jesús ytiy'ajt. Dios xyajjotmicpigipy. ⁹ Canan paady ti xyajñidzoocim n'alma co ajt ndzach'oyjäyity. Com Dios jadu'n ti yajnihuinmayiy tuna'ñ oy'ajtin mid ich ajt ycixpi co quejxy Cristo Jesús ya naaxhuiñ. Dios jayijp ti huinmay co quexa'ñ je Cristo Jesús ca'ni anajty pin ya naaxhuiñ. ¹⁰ Dios ti cham jada oy'ajtin yajniguëxigy co yaj'ijxy ya naaxhuiñ ich ajt nnihuambi nyajñidzoocpi, je Cristo Jesús, huidibi ti yajcödigooy yi' o'cin. E ti yajnejhuüy yi jäy mid yi' ytiy'ajt nej jeb huaad ndzinaayim huinixii ma yi Dios y'it oybi.

¹¹ Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi' huidibi ajcxy ca' yjudíojäyity. ¹² Paady ycixpi tzaachypi nbaadyich. Per ca' ndzo'yduñich, com ich nejhuüy pin nmijpidacpyich, nejhuüybich co yi' ymid cötujcin etz mic'ajt jeb xycuend'adipyich, ixti huin'it xii minaa Cristo Jesús tiyduna'ñ yi' naaxhuiñjäy.

¹³ Mijpidäg je tiy'ajt tiydudägyi' huidibi ti nyaj'ixpicy, jada je' tiy'ajt iixpejt nej jeb mbanicxy mbayöy. Yajmij'at Cristo Jesús, ca' m'ixmajtzä yi' ytiy'ajt, mdunipy oyjäy'ajtin jadu'n nej yi' tzocy. ¹⁴ Mihuidina' yi' oybi ayuc tiy'ajt huidibi ti nyaj'ixpicy. Huen je Espíritu Santo huidibi miich mid jotjoty huinma'ñjoty xypubedipy xypudigihuipy.

¹⁵ Ti jada' mnejhuüy co tüg'óciy yi' mibijcpidijc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz

jacjadyii jadu'n ajcxy ti y'aditcixy. ¹⁶ Yi Huindzin Jesús yi' pa'ayoohuipy yi Onesífero yjuugy ymigüg, com ooy ich mij xypa'ayooyich etz xypubejtyich, ca' xymidzo'yduyijich co nmach'inäyich. ¹⁷ Co Onesífero oyja'ty ya Roma, chi mictägy xy'ixtaayich cooni xypatyich. ¹⁸ Huen yi Huindzin Dios ypa'ayoohuigy Onesífero co anajty Cristo Jesús tyduna'n naaxhuiñjy. Huadz miich mnejhuüy nej yi Onesífero xypubejtyich jim Efeso.

2

Huen Cristo Jesús may'ajt tunipy müd miich Timoteo

¹ Miich Timoteo, jadu'n njihuüy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmicpigipy. ² Miich ti mmidoy may'ayuc tity'ajt huídibi ti nyaj'ixpicy. Jada ayuc mayjy midoy e jeb ajcxy nidiy'ajt'ajtcixy. Jada tity'ajt miich mgapxnaxipy mgapxhuäcxipy ma jacjadyii yeydijctijc huídibi oyhuinma'n ymüd, jigix yi' ajcxy nañ jadu'n capxnaxipy ma jacjadyii jäy.

³ Miich mämädäg yi ayo'n yi tzaachypi huídibi mminajxyp myajnajxyp, jadu'n nej tüg Cristo Jesús ysoldado huídibi oy tumb. ⁴ Yi soldado huídibi soldad'ajtp ca' huaad huingbi tung nicxy tuñ, jigix je' yjotcuje'adipy pin anajty ti ypidägyii soldado, nañ jadu'n miich adügiip Dios ytung mdunipy. ⁵ Pin jäy nayboyicquipxip ca' yi' premio pada'n, oy ti yjamadägy, pen ca' cuyduñ yi tity'ajt. Nañ tzocy co miich mguydunipy yi tity'ajt. ⁶ Je jäy huídibi tumb ma ycam ytu' je' jayijp huídib huen yajpidigy yi ujtztim huídibi ti y'ity. Nañ jadu'n miich co Dios ytung mduunip mbaadip yi oy'ajtin. ⁷ Yajxon mhuinmayipy huídibi nyajnimaa'yb, yi Huindzin Cristo Jesús xyajnejhuiydähuipy tüg'óciy je' ytity'ajt.

⁸ Jäymetz jadu'n nej Jesucristo, yi David y'ap y'oc, y'o'cy, chi Dios yajjugypijcy jadügtecy. Jada je' je ayuc tity'ajt oybi huídibi nnajtzcapxyibich. ⁹ Müd yi' ycixpi n'ayooyich etz tzaachypi nyajnajxyich. Nbujxtijc inäyich jadu'n nej jihuiy njibicjäyich. Oy njapujxtijc inäyich ca' ñejity, Dios y'ayuc ca' yi' mach y'ity, yajcapxhuäcx'aditzp nigi. ¹⁰ Paady ich tüg'óciy jada tzaachypi ngöbijctäy nmecxtujctäy, jigix jebi je jäy ajcxy huídibi Dios ti yhuin'ixigixy chinähuipy ajcxy huinixi ma yi' y'it oybi, Cristo Jesús yajnidzögüib yi' ajcxy y'alma.

¹¹ Tity'ajt jada ayuc:

Pen ti ich ajt n'o'cim müd Cristo ycixpi, yi' müd ndzinaayim tzajpjoty.

¹² Pen nyajnajxim tzaachypi ayo'n müd Jesús ycixpi, nañ quipxyi müd yi' n'ane'maanim. Pen ca' ya Jesús y'ayuc ngöbijcim, nañ ca' jüib tzajpjoty xycöbigaanim.

¹³ Oy ich ajt nyajmij'ajtim Cristo Jesús o ngayajmij'ajtim, Dios ycuydundaayb yi' y'ayuc. Com ca' huaad yci'm ayuc yajxigy.

Naybidägi cixyjot huinjot ma Dios ytiy'ajt

¹⁴ Yajjäymejtzcood yi mibijcpidijc jada tity'ajt huídibi ti nyajnimäy. Nima' je jäy ajcxy co je Huindzin Dios ca' oy'ixy tzip capxy ayuc huídibi ca' choobaady. Müd yi' tzip capxy ca' ni ti oybi nbaatim, jeyi yajhuinma'nydigoy huídibi amidoo'ijtp. ¹⁵ Naybidägi cixyjot huinjot ma Dios y'ayuc ytiy'ajt, nej jeb huaad cömay mbidzimy ma Dios, jadu'n nej Dios ytumbi huídibi ca' ni ti midzöyduyii, huídibi Dios y'ayuc ytiy'ajt yajxon yajhuinjihuیداayb ymigügtijc. ¹⁶ Ca' mgöbigipy yi ayuc huídibi ca' ytiy'ajtity, yi nigoob ayuc huídibi yajtüöyp mayjy ajcxy, yi tity'ajt huídibi ca' Dios ytiy'ajt'adyii. ¹⁷ Yi huídibi ajcxy y'ayuc ca' ytiy'ajtity yajhuinma'nydigooyb ymigügtijc. Yi' ajcxy

müid jibic ayuc yajhuinma'nydigoy yi mayjäy ajcxy, jadu'n nej pützpa'm huídibi ninicx jicxp oñydägy. Jadu'n nej ti yjaty müid Hemeneo etz Fileto co ajcxy yhuinma'nydigooy. ¹⁸ Yi' ajcxy anajty Dios y'ayuc cuyduuni, chi oyhuinma'nydigooyñi. Chi ajcxy yminángixni co je tiibi y'öccixni, ti ajcxy je' yjugypicy, e jadu'n ajcxy yajhuinma'nydigoy nijëjity jäy. ¹⁹ Huídibi Dios ti cojy ti macxy, niminaxi ycacixy ycatigooy, com yi' ytiy'ajt ijtp yi' huinixi. Tiy'ajt jada co yi Huindzin Dios y'ixcajpy pinjaty yjäy'ajtpy. Tüg'óciy pin mijpidacp yi nHuindzin Jesucristo y'ayuc, huen jiphuäctüdy yi jibic-huinma'ñ yi jibic-tung.

²⁰ Ma tüg mij comeeñydijc jim oori taasi, oori texy, etz oori cuchara, etz tijaty oyjatypí. Nañ ymüid jim naax taasi, naax texy, quipy cuchara etz jactijaty ca'p y'oyjatyity. Yajtuñ yi oori taasi etz oori texy ma tügi caayin uucin oybi. Yajtuñ yi naax taasi etz naax texy oyñiminaa. ²¹ Jadu'n yi' pin jäy jibic-huinma'ñ ixmajtzp etz tuñ oyhuinma'ñ, jadu'n yi' nej oori taasi oori texy. Cömay'idip yi' ma yi Dios. Huädz yi' yjot yhuinma'ñ, jëbi nHuindzin'ajtim Dios yajtunipy ma tüg'óciy oybi tung.

²² Ixmatz müich yi yujcyec'anäg ajcxy yjibic-huinma'ñ. Tudägy mdzinähuipy. Yajmij'ajtcix Dios cixyjot huinijot. Mdunipy oyjäy'ajtin. Ixmatz yi tzip. M'ojadadipy yi Huindzin Dios müid oyjot oyhuinma'ñ. ²³ Ixmatz yi nigoobi'ayucity yi loci huinma'ñ, ca' yi' y'oyity. Mnejhuüyb co yi nigoobi'ayuucity tzipcojp capxycojp yi'. ²⁴ Yi Huindzin Dios ca' yi' tzocy co yi' ytumbidijc nicxy tzip capxy yajtzondägy. Hue' janchtiy tzocy huen jäy'ajtcixy yung naxy müid tüg'óciy jäy etz pe'cy y'idipy müid yaj'ixpijcin. Nañ chojcpy co mimecxtugipy ymigügtijc ajcxy. ²⁵ Müich müid yung naxy mjot mhuinma'ñ capxhuij je jäy huídibi midzip'ajtp je tiy'ajt. Ycadimjegyity co Dios ytiy'ajt nijothuimbijtcixipy, e nejhuüygyxyipy je tiy'ajt oybi. ²⁶ Co anajty ajcxy ti ymejtzcixy yhuinma'ñ, chi ajcxy ycöguëgyyb je mujcu' huídibi ajcxy ycapxymidooyb ma anajty ymüid'ajtcixy cijoty etz ycapxymidoogixpy yi Dios.

3

Jäy jotmay müid y'idaangixy

¹ Müich mnejhuüyb ma je xii tiempo anajty ycixaani jadaanip ayo'n, je jäy ajcxy jotmay müid y'idaangixy. ² Ji adipy jäy huídibi adzojcp, huídibi amij agix nayjihuiyip, jäy huídibi ameeñ, jäy huídibi ci'm naygömayib, huídibi oyñinej capxtigooyb ma Dios, jäy huídibi ca' capxymidohua'ñ ytaj yteedy, jäy huídibi ni ti ca' jäygidäga'ñ, jäy huídibi ca' yajmay'aty Dios. ³ Co anajty tiempo ycixaani, ji adipy jäy huídibi ca' ymigüg ixa'ñ tzoga'ñ, jäy huídibi ca' pa'ayo'n müidity, jäy huídibi ymigüg nihuambejtp, jäy huídibi oy ahua'nity, jäy huídibi midzip'ajtp yi oybi. ⁴ Ji adipy jäy huídibi ymigüg agojix midundigooyb, jäy huídibi ytunamyb ti ytunamyb, ca' ajcxy tuñ cuendi capxhuijin, jäy huídibi amij agix nayjihuiyip, huídibi tzachnijot'ajtcixy mayñaxy xondaacin, e ca' cuyduna'ñ Dios ytiy'ajt. ⁵ Ji adipy jäy huídibi naybidácigixp jadu'n nej jihuiy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtin ñiguëxícp co ca' tiy'ajt yajtuñ. Cöguëg yi jadu'mbi jäy. ⁶ Ma yi jadu'mbi jäy ajcxy jim chooñity huídibi coyöyib conaxib ma je töxyjäy huídibi ca' ytudägyty, huídibi oy ypocyjäyity, huídibi jibic-huinma'ñ nijot'ajtp. ⁷ Yi jadu'mbi töxyjäy ajcxy panicxp payöyp canaagnax huinma'ñ, e niminaa ajcxy cahuinjihuihuipy yi Dios ytiy'ajt. ⁸ Jadu'n nej Janes etz Jambres midziptzooñ je Moisés, yi jadu'mbi yëydijc ajcxy nañ jadu'n midziptzoonip yi tiy'ajt. Jibicjot jibic-huinma'ñ ajcxy ymüid. Ñaybidägyib ajcxy jadu'n nej jihuiy cuydungixy

yí tìy'ajt, e ca' cuydungixy. ⁹ Ca' ajcxy mímadağıpy nej huin'ñinipy Dios yjāy. Niguēxīgipy yí' ajcxy yjibic-huinma'ñ jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñmōy je huidibi jaay

¹⁰ Miich ti mhuinjihuidyāy nej ñich ti nyaj'ixpicy Dios y'ayuc nej njāy'atyich, nej nhuinma'ñ nduñich, nej Dios nmijpidāgyich cixyjot huinjot, nej ñich jāy nmimecxtucyich, nej oyjāy'ajtin nduñich, nej ti mihuindināyich Dios ytung.

¹¹ Miich m'ijxyp mnejhuñyb nej ti nyaj'ixhuidityich nej ti nyajpahuidityich, miich mnejhuñyb je ayo'n je tzaachypí huidibi ti nminaxyich ti nyajnaxyich jim Antioquía, jim Iconio, etz jim Listra. Jadu'ñyibaad yí ayo'n tñibi nbaadyich Dios ti xyñihua'ñ ti xycohua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpicyich, nañ tim jadu'n ajcxy yaj'ixhuididipy yajpahuididipy. ¹³ Yí jibic jāydijc huidibi naybidáacigixp jadu'n nej jihuiy cuydungixy yí tìy'ajt, e ca' yjanchity, ñigi jibic y'ididzaangixy. Huin'ñnaangixy ymigügtijc ajcxy, e ñayhuin'ñnāangixy ci'm.

¹⁴ Miich Timoteo, ixmatz yí jadu'mbi jāy ajcxy etz panicx yí tñibi m'ixpicy, yí tñibi myajnibic'aty. Mnejhuñyb co ñich ti nyaj'ixpicyich je tìy'ajt. ¹⁵ Com miich pi'cni mutzni ti mjaty ti mnejhuñy yí Dios ñecy. Jada necy ti xyajnejhuñy nej huaad mijpidāgy yí Cristo Jesús, e ñigi jadu'n jēb huaad yí m'alma nñzoocin paady. ¹⁶ Tüg'óciy Dios ñecy Dios ci'm ti huinma'ñmōy je huidibi jaay. Paady jēbi nyajtuunim co jāy nyajni'ixñyim nyaj'ixpicim. Jēb nyajtuunim co njijpcogapxñyim huidibi ca' ytìy'ajtity, etz co n'ñhuijim ngapxhuijim. Jēb nyajtuunim co nyaj'ixpicim nej jēb huaad tìy'ajt nbanicxim, ¹⁷ jigix yí jāy ajcxy huidibi mijpidacp Dios ytìy'ajt, jēb ni'ixi' y'idipy, tunipy tüg'óciy oybi huinma'ñ oybi tung.

4

¹ Ooy ycopicyity mido'mbic jada ayuc jadu'n nej cham ñich miich nijayiy. Dios etz ñich ajt nHuindzin Cristo Jesús tìy'ajt yejc co copicy jada ayuc. Cristo Jesús ytiydunamyb yí jāy ajcxy juugypí etz yí jāy ajcxy tñibi y'o'ccixy, e chi yajjugypigipy jadüg'oc ajcxy. Yí' yajtiydunamb ajcxy co anajty ymiñ ya naaxhuiñ pidāga'ñ y'ane'min. ² Nyajnibijcipy mgapxhuäcxip Dios y'ayuc ytìy'ajt hueñytimyminaajity, oy pin midoohua'ñ o camidoohua'ñ. Copicy co mjijpcogapxñhuipy huidibi ca' ytìy'ajtity, capxhuij pin yinjaty huenjaty camadacp, ñhuij capxhuij yí jāy ajcxy mñid Dios y'ayuc ytìy'ajt. Mimecxtuc etz yaj'ixpic yí jāy ajcxy. ³ Minip je xñi je tiempo ma jāy ajcxy ca' cōbiga'ni oybi tìy'ajt. Nijējity mñid yci'mdzojcin mñid yci'm-huinma'ñ ixtāhuip ajcxy yhuindzin huidibi yaj'ixpigñib nej ajcxy jāygidāgy, oy ca' ytìy'ajtity. ⁴ Chi ajcxy anajty jñphuäctúutcixni camidoohuāangixni je Dios y'ayuc ytìy'ajt. Mijpidaacni anajty ajcxy ñigi yí ñigoobi'ayucity. ⁵ Miich huijy ycuje m'idipy. Mecxtujcta' nej jāy ajcxy xy'ixhuidity xypahuidity. Yajñima' jāy ajcxy Dios ytìy'ajt, jēb ajcxy mijpidāğıpy etz jothuimbidipy ajcxy Dios. Yaj'ixpic Dios y'ayuc ytìy'ajt nej ypadyii.

⁶ Jadu'n miich cham njacnimāy, je' co ti yhuaad'ajtni je tiempo minaa ndzanaanich ya naaxhuiñ xyaj'ōgaamich jāy, ti nayxoxyñijich naydogyñijich mñid Cristo Jesús yci'xpi. ⁷ Ti ñich ooy mic mihuindināy Dios y'ayuccapxhuäcxñi ma anajty ypadyii. Ti nyajcixy nyajmayich je tung huidibi anajty xypatpich. Ooy ti nyajmij'atyich Cristo Jesús, ni ca' ti n'ixmajchich yí y'ayuc ytìy'ajt. ⁸ Cham njijp'ijxypich co Cristo Jesús je tiydumbi tudāgypí xycōmayipyich jñib tzajpjoty, mñid co tiydudāgy ti ndzināyich ti njugy'atyich.

Pablo pijctzoy may'ajt ma Timoteo co tzojc yminipy ma yí'

⁹ Tun may'ajt tzojc yminiꝑy ma ñich. ¹⁰ Yi Demas ti ñich yam xycögueecni co yjactzojꝑy yi mayñax xondaacin ya naaxhuiñ. Hue' ti ñicxy jim Tesalónica. Crescente nañ hue' ti ñicxni Galacia. Yi Tito ti ñicxy Dalmacia. ¹¹ Jëyi naydügpajc Lucas yam müd ñich. Co mminiꝑy, müdminiꝑy Marcos, com ooy ti xychachpubetyich ma Dios ytung. ¹² Yi Tíquico ti nguexyich jim Efeso. ¹³ Je joxhuit huidibi nyajhui'müyich jim Troas ma Carpo ytijc miminiꝑy. Nañ jadu'n mîmindähuipy je necy. Je' ooy ytimycopyity yi pergamino necy.

¹⁴ Alejandro je ca'tzpi ti yi' ooy mij xymidundigooyich. Yi nhuindzin'ajtim Dios paatip nej yajmidzogyii. ¹⁵ Naygüend'adii ca' miich yi' mmijyöybedipy, com ooy mic ti jipꝑogapxy Dios y'ayuc huidibi ñich ajcxy nyaj'ixꝑijꝑy.

¹⁶ Co yi' oga'n xyxyich ma je mij tungmüdpi, naydüg ayuc nmihuindinaayich. Nipin xycapubejtyich, nigi ajcxy xycögueectayich. Huen Dios ocmeecxy nej ajcxy ti y'idütcixy. ¹⁷ Ca' y'ocnejity Dios ti xypubetyich ti xypudigiyich. Dios ti xyyajjotmicꝑicyich, jigix ngapxhuäcxtähuibich yty'ajt ma tüg'óciy jäy. Jëb tüg'óciy jäy huidibi ca' yjudiojyity huen mido'mbijtaaygixy Dios yty'ajt. Dios ti xyñihua'ñich ti xycohua'ñich ma yi o'cin. ¹⁸ Yi Huindzin Dios yi' xyñihua'ñ xycohua'ñibich ma tüg'óciy jäy huidibi ajcxy jibic-huinma'ñ müd. Yi'xycuend'adipich, ca' ni ti xyjadipyich, cooni anajty njädyich jilby tzajꝑjoty ma y'ane'my. ¡Huen Dios cömay idipy janch huinixi huinítiempo!

Pablo ymigügtijc capxpooꝑxñ yajniꝑy

¹⁹ Yajnax ñich ngapxpooꝑxñ ma yi Prisca etz ma Aquila etz ma Onesífero yjuugy ymigüg. ²⁰ Erasto ti je' yhui'my jim Corinto. Je Trófimo com ꝑijꝑ anajty, ñich je' n'ixmajch jim Mileto. ²¹ Tzojc mjatyminiꝑy ma ca'ni tüchꝑy ymiini. Yquejxyp ajcxy capxpooꝑxñ ma miich, je Eubulo, je Pudente, je Lino, je Claudia etz jacjadyii migügtijc.

²² Huen je Huindzin Cristo Jesús xypubedipy xypudigihuipy. Huen Dios tuñ may'ajt müd miich ajcxy. Amén. Jadu'n ngapxcixyich.

TITO

Yi Necy Huidibi San Pablo Yajniguejx Tito

¹ Ich Pablo, Dios jada miid nduunich, Jesucristo xy'apóstol'ajtpich. Yi ti xyquexyich ma yi jäy ajcxy huidibi Dios ti yhuin'ixyii, jigix ajcxy mibigipy yi' ytiy'ajt. Nañ nyajnimähuibich nej jëb ajcxy cuyduuni Dios ytiy'ajt. ² Jadu'n nduunich jigix co anajty y'o'ccixy, chi jadüg'oc yjugypijccixipy e tzináaygixipy huinixi. Dios yajhuinhuaniy je jäy ajcxy je jugy'ajtin huinixibi, ca'ni anajty naaxhuiñybi chondägy. Jada tiy'ajt jëb nmijpidaacim com Dios ca' yi' y'anidägy. ³ Jada jugy'ajtin huidibi ijtp huinixi, Dios ti yajnejhuüy je jäy ajcxy cham co je tiempo ti yhuaad'ajtni, miid yi' y'ayuc huidibi ngapxhuäcxibich. Je Dios huidibi xyajnidzoocim ich ajt n'alma ti xyajniñicyich co yi' y'ayuc ngapxhuäcxpyich. ⁴ Miich Tito, cham nijayiy jadu'n nej jihuüy nijayiyich ngi'm'ung. Com tú'ciy nmij'ixim nmijpidaacim Dios. Huen Dios ich ajt nDeedy tzajpjotpy etz Cristo Jesús ich ajt nihuambi yajtzoocpi tuñ may'ajt oy'ajt miid miich, huen xypa'ayooy etz xyajjotcujc'adipy.

Myajniñigipy yëdyjc huidibi jëb nigohuajc'aty ymügügtjc

⁵ Paady ich miich jim Creta ñaaxjot nyajhui'my, jigix mjacyajniñihuipy je migügtjc jadu'n nej ich ca' ti nyajni'ixiydäyich ajcxy. Tügpi cajp nidüg nidüg myajniñigipy yëdyjctjc huidibi nigop'adiñ nigohuajc'adiñ yi mibijcpidijc, jadu'n nej ti nyajnimäy. ⁶ Yi' myajniñigipy yi' huidibi ca' ti tundigoy; huidibi tüg töxyjäy miid, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymidooyb. ⁷ Copicy huidibi nigohuajc'adamb yi mibijcpidijc huen jäy'aty tiydudägy, ca' huaad ti tundigoy; huen yajxon cuend'adipy huidibi Dios yje'ajtpy; jäy huidibi ca' ycöjuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸ Yi' jëbi myajniñigipy huidibi oyjäy'ajtin tuñ miid hueñytimypinity; huidibi ooy y'amügügit; huidibi huijycujc; huidibi tiydudägy yhuinma'ñ; huidibi huindzigüñ Dios; huidibi ci'm yajxon naygüend'ajtp. ⁹ Huen cixyjot huinijot naybidáacigixy ma je ayuc tiy'ajt huidibi ti ixpijccixy, jigix jëbi ajcxy jot'amijmöhuiipy jacjadyii jäy ajcxy miid tiy'ajt janchypi, e capxjotcidägipy ajcxy je pin ajcxy ca' ixa'ñ Dios y'ayuc.

¹⁰ Com ji may judíojäy huidibi ca' ycapxymidoogixy, huidibi niñoobi tijaty ayuc tzachnimiydacp; huidibi ajcxy huin'imb ymügügtjc, jadu'n nej yi' ajcxy huidibi minamb co copicy tüg'ócay mibijcp i huen yajtiy'ajtiy ymang ajcxy, jadu'n nej judíojäy tungixy. ¹¹ Copicy co mgapx'adugipy yi' ajcxy huidibi ymügügtjc yajco'inñyb tüg jin tüg tijc; huidibi ajcxy yaj'ixpijcp mujuy; huidibi ca' tiy'ajt yaj'ixpijccixy.

¹² Nidüg yi' ajcxy cohuinma'ñybi nigapxy ymügügtjc ymina'ñ co yi' Creta jäy ooy ajcxy y'anijity, ooy ajcxy huinducity, ooy ajcxy ñuuxity, ooy ajcxy ycaaxity. ¹³ Tiy'ajt jadu'n nej jada cohuinma'ñyjäy ymina'ñ. Yaj'oj ajcxy mictägy, huen huinjihuüygyxy yajxon Dios y'ayuc. ¹⁴ Ca'p ajcxy mijpidaacipy yi' judíojäy ycostumbre etz ni ca' ajcxy mijpidaacip yi' y'ane'min huidibi jäy ci'm ti nihuinma'ñ'aty, huidibi ajcxy ti jippyöyduutni Dios y'ayuc ytiy'ajt.

¹⁵ Pin jäy huädz yjot yhuinma'ñ miid, oy ti jacuyduñ costumbre, o oy ca' ti cuyduñ, Dios yjäygidacpy yi' co oyjot oyhuinma'ñ miidity. Pin jäy ca' huädz yjot yhuinma'ñ miidity, oy ti jacuyduñ costumbre, Dios ca' jäygidägy yi' com jibic ajcxy yjot yhuinma'ñ miidity, ca' ajcxy nej ñayjihuiyigixy. ¹⁶ Yi' jadu'mbi

jäy hue' ñaybidáacigixy jadu'n nej jihuïy nej ooy Dios ytiy'ajt ajcxy mijpidaaci, chi ma huidibi ajcxy ytumyb ji yajniguëxëccixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'ñ, ca' ajcxy capxymidoogixy Dios, ca' ajcxy Dios ytung mihuaadity.

2

Nej jëb huaad chinaaygixy yjugy'ajtcixy

¹ Miich huädz myaj'ixpigipy yi migügtijc nej jëb huaad cuydungixy Dios ytiy'ajt. ² Miich m'ihuijip mgapxhuijip yi mijjäydijc huen ca' ajcxy y'amügyjäy'adipy; huen huijycujc jäy'ajtcixy; huen miid'ajtcixy oyjot oyhuinma'ñ; huen mijpidaaccixy Dios ytiy'ajt cixyjot huinijot; huen oyjäy 'ajtin tungixy miid huentimypinjäyity; huen ajcxy mecxtujcin yajtungixy ma yi chinaayin. ³ Nañtymyjadu'n mijjäydijc ajcxy töxyjäybi huen ajcxy jadu'n jäy'ajtcixy nej huidibi ajcxy Dios yajmij'ajtp; ca'p ajcxy ymigügtijc nigapxip ni'ojihuipy, ni ca' ajcxy nihuambedipy; nañ ni ca' ajcxy y'amügyjäy'adipy; huen ymigügtijc ihuijixy capxhuijixy miid ayuc oybi tudägy. ⁴⁻⁵ Yi mijjäydijc ajcxy töxyjäybi huen ihuijixy capxhuijixy yi mutz'anäg töxyjäydijc ajcxy nej jëb huaad chinaaygixy yjugy'ajtcixy; nej jëb huaad ytiyc ñay yajmij'ajtcixy; nej jëb huaad tzojccixy jihuïygixy y'ung y'anäg; nej jëb huaad oyjot oyhuinma'ñ yajtungixy. Ihuij capxhuij yi töxyjäy mutz'anäcpi co huen tiydudägy chinaaygixy, ca' ti jibic-huinma'ñ ajcxy mibidzimipy. Huen ihuij capxyhuij ajcxy nej jëb huaad yjin ytiyc cuend'ajtcixy yajxon; nej jëbi y'amigüg'ajtcixy, nej jëb huaad capxymidoogixy ñäy. Pen jibic-huinma'ñ anajty ajcxy ytumyb, chi anajty Dios ytiy'ajt yajnigapxy yajni'ojiy.

⁶ Miich Tito, nañ jadu'n jaty ihuij jaty capxhuij yujcyecpidijc etz anäctijc nej jëb huaad oyjot oyhuinma'ñ yajtungixy, ca' huaad ytundigooygixy ycapxtigooygixy. ⁷ Tito, tiydudägy mdzinähuipy, oyjot oyhuinma'ñ myajtunipy. Jim yi migügtijc iixpejt pigipy ma miich, nej jëb huaad ytungixy. Huädz ajcxy myaj'ixpigipy yi tiy'ajt, huijycujc m'idipy. ⁸ Tito, m'ihuijip mgapxhuijip yi migügtijc miid oy'ayuc oyhuinma'ñ, jigix co pinjäy jipcogapxihuaanip miich m'ayuc, chi tzo'ydu'ñ jihuïhua'ñ, e jadu'n ca' jadipy nej jibic xyñigápccixipy xyñi'ojiygixipy.

⁹⁻¹⁰ Je tumbidijc huidibi ijtp cojuyiy codoogiy, huen yhuindzin imidoogixy capxymidoogixy nej ypadyii. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yjë'ajtpy, huen yajmij'adipy yajxon yhuindzin, huen yajxon ytung tundaayi. Pen jadu'n ajcxy yhuindzin midungixy yajxon, huin'it cömay y'idipy yi Dios ytiy'ajt, je Dios huidibi xyajnidzoocim ajt n'alma.

¹¹ Cham n'ijxim nnejhuïyim nej Dios may'ajt ti tuñ miid tüg'óciy jäy ajcxy ycixpi, co ti yaj'oyiy nej jëb huaad hueñypinity pinjaty mijpidaacip yi' y'ayuc, ypadamyb ajcxy y'alma ñidzoocin co anajty y'o'ccixy. ¹² Dios cham ti xyajnejhuïyim pen tzögamb ich ajt n'alma, chojcpy co n'ixmajtzim je jibic-huinma'ñ huidibi Dios ca' jäygidägy. Ca' huaad ooy nijot'ajtim yi mayñaxpi tzinaayin ma jadachambi xii tiempo yjacyöy. Copicy ndzinaayim huijycujc etz tudägy, e nguydunim Dios y'ayuc ytiy'ajt. ¹³ Njijp'ijxim mina Jesucristo, je huidibi xy'ane'mdaayim, ymiina'ñ ya naaxhuiñ jadüg'oc miid ich ajt ycixpi. Njotcugüyim ich ajt co n'ijxim ymiin miid y'oy'ajtin ymic'ajtin, yi Dios huidibi yajnidzögam ich ajt n'alma. ¹⁴ Yi Cristo Jesús ti ñayyoxyii ti ñaydoogyii co y'o'cy ma yi cruudz miid ich ajt ycixpi. Yi ti xyjuybidzimim

ma anajty yi mujcu' cï'am xymiid'ajtim, co anajty ti nbocytuunim. Yi' ti xya-jpocyñihuätztaayim nidüg'óciy, jigix Dios xyjäy'ajtimip müd huädz jot huädz huinma'ñ, jëb nduunim oyjäy'ajtin cixyjot huinijot.

¹⁵ Tito, jada tiy'ajt migügtijc myajnimaydähuipy. M'ihhuijip mgapxhuijip ajcxy yajxon. Dios ti xymöy cötujcin co m'ojipy pinjaty xycacapxmidoob, jëb ajcxy yi m'ane'min xyajmij'ajtip.

3

Huen mijnicxpejtcixy yi gobierno ytungmüdpi

¹ M'ihhuijip mgapxhuijip yi migügtijc huen capxymidoogixy yi gobierno ytungmüdpi etz cajpjäy ytungmüdpi. Huen capxymidoogixy jadu'n nej y'ane'myii ajcxy. Huen tungixy huidibi tiydudägyip huidibi ajcxy yaj'ane'mip.

² M'ihhuijip mgapxhuijip yi migügtijc ajcxy ca'p ajcxy ni pin nigapx ni'ojihuip, nañ ni ca' tzipcapxy ajcxy ixtähuip, huen ñaybidáacigixy amigüg, huen mimecxtujctaaygixy yi ymigügtijc ajcxy, huen nicy xyeemy jäy'ajtcixy müd yi mayjäy ajcxy.

³ Jecy'ajty ma ca'ni anajty nmijpidaacim Cristo Jesús, hue' anajty nyajpaatim müd jibic-huinma'ñ. Ca' anajty n'imidoohuim ngapxmidoohuim. Je mujcu' anajty ti xyhuin'inim, paady anajty nnidigooyim ndüdigoooyim. Ndzachnijot'ajtim mayñaxpi tzinaayin, ni ngajajtim anajty nej n'ixmajtzim yi jadu'mbi huinma'ñ. Jibic-huinma'ñ nduunim. Jadu'n njäy'ajtim njot anajty n'iditizim, nga'oy'ijxim anajty nmigügtijc. Paady jäy anajty xymüddziptzoonim, chi naymijotma'tcootim miñ xyipy. ⁴ Jadu'n anajty nduunim ixti cooni Cristo Jesús ñayguëxigüyb ya naaxhuiñ, etz nnejhuuyim jadu'n nej Dios ich ajt nihuambi yajtzoocpi may'ajt oy'ajt ti tuñ müd tüg'óciy jäy ajcxy ycixpi. ⁵ Yi' xyajnidzoocim ajt n'alma canan co ich ajt ndzach'oyjäyity. Hue' je' jadu'n ti tuñ müd co pa'ayo'n ti yajtuñ müd ich ajt ycixpi. Ninigoob ti tuñ may'ajt oy'ajt müd ich ajt ycixpi. Chi yaj'oyünyñi ajt njot nhuinma'ñ huinjemy müd je Espiritu Santo huidibi xyajtigüyim njot nhuinma'ñ, e jadu'n ajt njugy'ajtin ndzinaayin chondaacni huinjemy.

⁶ Dios ti yecy yi Espiritu Santo janch mijcajee ma ich ajt njot nhuinma'ñ. Jadu'n Jesucristo xytuunim, je huidi ich ajt nihuaanim yajtzoocim. ⁷ Yi' ti xyaj'ahuimbijtim tudägy müd je may'ajtin oy'ajtin huidibi ti tuñ co yi' ti y'ögy müd ich ajt ycixpi. Jëyi cham y'oy'ahuijxnity mina anajty nbadaanim je jugy'ajtin huidibi Dios müd huidibi ca' ycixipy ni minaa xi.

⁸ Jada ayuc jada tiy'ajt ndzojcpyich co müch mnigapxpedipy. Ooy ycopicyity co yi' ajcxy huidibi mijpidacp Dios huen oyjäy'ajtin tungixyp. Ooy y'oyity co oyjäy'ajtin tungixyp ajcxy. Yjäygidägipy yi jäy ajcxy müd je oyjäy'ajtin huidibi anajty ajcxy ytumyb etz ypaadipy ajcxy oy'ajt. ⁹ Ixmatz yi jäy ajcxy huidibi nigapxy nimiydägy yi nigooobi'ayucity, yi huidibi ca' choobaady. Nañ jadu'n yi' ajcxy huidibi nigapxp nimiydacp huidibi ñi'ap'ajtpy ñideedy'ajtpy. Ca' mijjptigiyihuipy yi tzip capxy ma yi judiojäy ycötujcin huidibi ajcxy ypanicxyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt müdity.

¹⁰ Yi jadu'mbi jäy huidibi tzip capxy ixtaayb, müd tüg'oc mejtz'oc myaj'ojipy pen ca' ycapxcöbicy, tim ix'oj, huen nicxy. ¹¹ Mnejhuuyb co yi jadu'mbi jäy ajcxy ti ixmajtzixy je tiy'ajt, tundigooyb yi' ajcxy, ci'm jadu'n nayya-jpocycähuuygixy.

Pablo nimay Tito co müd naybadaanip

¹² Nyajniguexipich nidüg, aver huidibi ich anajty n'ocquejxyp yi Artemas o yi Tíquico. Co yi' jim yjadipy, chi müch xyjatyñiminipyich mic'amy jim Nicópolis

com jim nyajnaxa'ñich yi tich poj tiempo. ¹³ Co yi Zenas, yi huingapxi, etz Apolo ajcxy jim yjadipy, quejxnajxcix miich yi', e mooygixy ytu'amgixpi ca'ydi ti yajmayajtcixy tü'am. ¹⁴ Huen yi nmigügtijc'ajt ixpijccixy nej jäy y'oyjäy'aty, huen pubejtcixy pin tijaty yajmayajtp. Pen ca' jadu'n tungixy, Dios ca' yi jäygidaacip yi' ajcxy yhuinma'ñ.

Pablo ycapxcíxy mñd Tito

¹⁵ Yi migügtijc ajcxy huidibi ya yquejxyp ajcxy capxpocxin ma miich. Nquejxpich ngapxocxin ma tüg'ócay yi nmigügtijc ajt huidijaty jim yajmij'ajtp Cristo Jesús. Huen Dios mij may'ajt tunip mñd miich ajcxy ycixpi. Amén. Jadu'ñyi ngapxcíxyich.

FILEMÓN

Yi Necy Huidibi San Pablo Yajniguejx Filemón

¹ Hich Pablo etz Timoteo, ich ajt nmigüg, nijayiybich miich Filemón huidibi ooy ndzocyich, huidibi quipxyi müd nduunim. Nmach'ihñäyich müd co nyajmij'atyich Cristo Jesús. ² Nañ jadu'n nijayiybich yi Apía, ich ajt nmigüg töxyjäybi, etz yi Arquipo, huidibi capxhuäcx Dios y'ayuc tú'ciy müd ich ajcxy, etz tüg'óciy yi migügtijc huidibi naymújcigixp ma miich mdijc Dios ojadajtcixy. ³ Huen Dios Teedy etz yi Huindzin Jesucristo tuñ may'ajt oy'ajt ma miich ajcxy etz xyajjotcugiygixipy.

Pablo capxpaady Filemón co mijpidägy Dios

⁴ Nyajnajxpyich Dioscojuyip ma Dios müd miich ajcxy ycixpi. Njatyimjäymejtzpich miich ajcxy jabom jabom co Dios nmibijctzooyich. ⁵ Ti ich ayuc nmidooy jadu'n nej miich mdzocy mjihuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios müd miich ajcxy ycixpi, huen oyjäy'ajtin mdunipy müd je migügtijc, jadu'n nej Dios ti xyajnejhuüy yi tiy'ajt jigix ajcxy tiy'ajt paadipy ma miich nej jëb ajcxy cuyduñ Cristo y'ayuc. ⁷ Hermano, ti ich ooy njotcugiyich müd yi m'oyjäy'ajtin huidibi miich mdumyb co ti mbubety yi Dios yjäy.

Pablo pijctzoy tüg may'ajt ma Filemón müd Onésimo ycixpi

⁸⁻⁹ Njapijctzoohuamybich tüg may'ajt ma miich. Oy njamüdidyich cötujcin huidibi Jesús xymooyich jëb nja'ane'my co miich mgöbigipy Onésimo oy'amy. Per ca' jadu'n n'ane'mañ müd co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yi Onésimo oy'amy. Hich Pablo, ti nmijjäyihñich. Cham jäy ti xypidägyich pujxtigoty müd co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma miich co mba'ayoohuipy yi Onésimo. Jadu'n njihuüyich nej n'ung'adyiijich müd co yi' ti mijpidägy Jesús ya ma ich nbujxtijc'ihñäyich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'ihmidoy ti xycapxymidooy. Jadachambi janchtiy capxymidoohuam jadu'n ma miich etz jadu'n ma ich. ¹² Cham nyajniguesy Onésimo. Ooy njajihuüyich co yam nguexyich. ¹³ Ooy ich yam njayaj'idañich ma ich jigix ixipy yam xymüdtuñich. Ytimyñipaatpy ixipy jadu'n nej miich xymüdtuñich ma yam nbujxtijc'ihñäyich müd co ngapxhuäcxich je jemybi oybi ayuc nej Jesucristo yjaty ayooy. ¹⁴ Per ca' ich n'a'ixiyich nicxy nyajhuim'yich, pen ca' miich jadu'n minañ. Ca'p ndzocyich adzip ahuañ tijaty miich mdunipy. Jëyi ndzocyich co miich oy'amy xypubedipyich. ¹⁵ Ca' yjeczyty paady ycixpi ti xycöguëgy jëbi mijpidägy Jesús. Hueeni xii tiempo ti y'ity ya, e cham co yhuimbidipy ma miich, müd y'idipy jim huinixii. ¹⁶ Ca' jadu'n m'ocmüd'ajtnip cham jadu'n nej jac'oyñipin cojuyiy codoogiy tumbi. Hue' je' mmü'adip jadu'n nej Jesús yjäy huidibi ooy mdzocy mjihuüy. Pues ooy ich yi' ndzocy njihuüyich. Jac nigü cham miich mdzogipy mjihuüipy müd co yi' cham y'oyjäyity, etz co cham mijpidägy yi Huindzin Jesús.

¹⁷ Pen janch miich xymigüg'adyiijich cöbic yi Onésimo jadu'n nej ich miich ixipy xycöbicyich. ¹⁸ Pen ti yi' yinjaty huenjaty xymidundigoy o xyminucx'adyii ich miich nmigüedipy. ¹⁹ Hich Pablo, ich miich njaaybich nfirmajiyich müdich ngi'mgi' ngi'mletra. Hermano, nmigüedipyich nej

Onésimo xymínucx'adyii. Oy ìich yam ca' n'ìbaady ngapxpaady co miich xymínucx'adyiijich mîd co Dios ytîy'ajt tî mbaady ma ìich. ²⁰ Xypubedîpîch mîd Onésimo. Yi nHuindzin'ajtm Jesús yjâygidägîpy pen jadu'n mduñ. Mdunîpy may'ajt mîd Onésimo mîd Jesús ycîxpi, e jadu'n ìich jêb huaad njotcujc'atyich.

²¹ Nnejhuîybîch co ooy m'îmidoy mgapxmîdoy, e jadu'n nej yam njacni-jayîy, jac'anaxy mduna'ñ. ²² Nañ jadu'n yam nîmäy. Tun may'ajt ni'ixî tûg jättac. Njîjp'îjxypîch co nbujxtîjcpîdzîmîpyîch tzojc mîd co miich ajcxy Dios mîbîjctzoogîxy mîd ìich ycîxpi, e jadu'n jêbî nîcxîbîch ma miich.

Pablo ycapxycîjxy mîd Filemón

²³ Nañ nbîdacpyîch necyjoty yam. Xycapxpooocxp Epafra ìich nmîbujxtîjc jây mîd Cristo Jesús ycîxpi. ²⁴ Nañ xycapxpooocx Marcos, Aristarco, Demas etz Lucas. ìich yi' ajcxy xypubejtp ya. ²⁵ Huen yi nHuindzin'ajtm Jesucristo may'ajt oy'ajt tunîpy ma miich ajcxy, jêb miich ajcxy oy m'ity. Amén. Jadu'n ngapxcîxyîch.

HEBREOS

Yi Necy Huidi Pinjaty Yajniguejx Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaag-nax mïid je yprofetas ajcxy, je' ajcxy huidibi najtzcaxiïy Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma ïich ajt mïid je' y'ung. Dios mïid y'ung yaj'oyiïy je naaxhuiñybi etz tüg'óciy tijaty huidibi yajpatp. E Dios ti y'ung yajmïgo'ixmadziydäy tüg'óciy. ³ Dios y'ung ymïid Dios y'oy'ajtïn, yi' je' Dios ytïcxin'ajtpy yjain'ajtpy. Yi' je' codinaayb etz yajniguëxïgy nej je' je Dios. Dios y'ung huijtz'ijtaayb tüg'óciy mïid je' y'ayuc etz ane'mïn mic'ajt mïidpi. Co Dios y'ung ti xyajhuaatzim ajt nbocy, chi cöbijcy je mij'ane'mïn jiiby tzajpjoty, jadu'n nej jihuïy y'ixtacy a'oy'amy ma je mijpi Dios ymïjc jiiby tzajpjoty.

Dios y'ung jacmij yi'ca'ydï ángeles ajcxy

⁴ Je Dios y'ung jac mij je' ymic'ajt y'ane'mïn mïidity, ca'ydï je ángeles ajcxy. Com yi' je' Dios y'ung, paady ycixpi mic'ajt mïidity jaydëbi ane'my huidibi Dios yje'ajtpy, e ca'ydï yi' ángeles ajcxy yi' jadu'mbi mic'ajt mïid. ⁵ Com Dios ca' yi' ni tüg ángel nimay:

ïich miich n'ung'ajtpy. ïich miich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Miich xyteedy'adïbich, ïich miich n'ung'adïyb.

⁶ Co Dios y'ungoob oy quexy ma naaxhuiñyjäy chinäy, chi yi' ane'mïn pidacy: Huen je ángeles ajcxy nidüg'óciy huindziñhuïpy pa'tjihuïhuïpy je' y'ung.

⁷ E mïid je ángeles ycixpi, Dios ymïna'ñ:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidzuc, nej jïinye'n.

⁸ Jadu'n Dios ymïnañ mïid y'ung ycixpi:

Miich, Dios'ajtp, miich m'ane'mïn huinixii huinitiempo yi' y'idïpy. Mïid mdudägy'ajtïn miich m'ane'mïpy.

⁹ Ti mdzocy je tiy'ajt tiybi, e ca' ti m'ixa'ñ je jibicpi. Paady ycixpi Dios, miich mDios, ti xyhuin'ixy, e ti yejctäy nïgi ma miich je jotcuju'ajtïn je xondaacin, ca'ydï ma yi' mmi'ane'mbidïjc.

¹⁰ Dios nañ jadu'n ymïna'ñ:

Miich, Huindzin Dios, oga'n'aty mbidac nej naaxhuiñybi chondacy, e mïid miich mmic'ajt myaj'oyiïy je tzajp.

¹¹ Cijxtähuiip yi' naaxhuiñybi etz yi' tzajp, per miich hui'mïp huinixii huinitiempo. Jadu'n yi' naaxhuiñybi etz yi' tzajp y'amijïydähuiipy nej huit.

¹² Jadu'n miich yi' naaxhuiñybi etz yi' tzajp m'anëgiipy nej tüg huit yaj'anëgyïn. Jadu'n miich yi' naaxhuiñybi etz yi' tzajp myajtigadzïpy nej jäy ajcxy yajtigach yhuït. Chi miich je'ni m'idïpy, je mxii mjimïjt ni mïna ycacixïpy ycatigoyïpy.

¹³ Ni camïna Dios canïmay ni tüg je ángeles ajcxy:

ïña' ma ïich nmïjc a'oy'amy, ixti mabaad ïch miich je mmïdzip nmïmadactäyich, jadu'n yi'ajcxy nipaadïpy nej yi' miich mdecypocxpejt'adyii.

¹⁴ Tüg'óciy je ángeles ajcxy ac espíritu yi' ajcxy, e ytungixy ma Dios, yquexyöygyxy jigix pubedïpy je jäy ajcxy huidibi ajcxy y'alma padam ñidzoocïn.

2

Ca' n'ijxnajx nmidonajxim nigoo yi pocyhuinmeecxin

¹ Miiid jadaayaabi tiy'ajt ycixpi, oy co yajxon n'ocjäyguüiyim Dios ytiy'ajt huidibi ti nmidoohuim, jigix ca' nijjpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yejc jecy'ajty, huim je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii miiid ypocy ycixpi. ³ ¿Nej tijy ich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jébi xyajnidzoocim ajt n'alma? Yi Huindzin Jesús jayijp'aty ci'm nigapxy Dios ytiy'ajt jadu'n nej jébi Dios xyajnidzoocim ajt n'alma. E jac'axam je discipulos ajcxy nañ jadu'n najtzcaxix Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma ich ajt. ⁴ Jadu'n anajty capxhuäcxix Jesús y'ayuc ma ich ajt, chi Dios yajniguëxip Jesús y'ayuc co yjanchity co tuñ ijxpejt, mijhuinmañ etz milagro. E co Dios xymooyim je yihuñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymigü

⁵ Dios ca' yi ángeles ajcxy ti cötujcin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi ich ajt nnimiydaacim. ⁶ Hue' janchity ji tüg'it yjaybetyity ma Dios ñecy, ma yminañ:

Miich Dios, ¿ti yi' je naaxhuiñjyä, co miich yi' ajcxy mjäymedziyb? ¿Ti yi' je naaxhuiñjyä, co miich je' ajcxy mjotmay'adyii?

⁷ Janch con xii tiempo miich ti mmöy yi' naaxhuiñjyä ajcxy e nañ ti mmöy jacminacy ymic'ajt y'ane'm'ajt ca'ydi yi' ángeles ajcxy. Per jac'axam miich mmöhuañ naaxhuiñjyä ajcxy nigü ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyiy anajty ti mbidactahuip yi' ma yi' naaxhuiñjyä ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuüy tüg'óciy tijaty huidibi ti myaj'oyiy, y'idipy ma yi' ajcxy ytecpa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ixim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹ Dios ti xyaj'ixim co Jesús miiid mij'ajt ane'm'ajt. Je ángeles ajcxy nigü mic'ajt oy'ajt anajty miiidity, ca'ydi Jesús co yi' chinay ya naaxhuiñ. Jadu'n Dios tuñ jaydebí Jesús y'ögy miiid jäy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay miiid je tzaachy'o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' miiid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuuñ co yajca'pxi Jesucristo y'oy'ajtin miiid je tzaachypi huidibi ti minaxy ti yajnaxy. Miiid co Jesucristo tzaachypi ti minaxy ti yajnaxy, paady ycixp jäy ajcxy padaangixy Cristo y'oy'ajtin. ¹¹ Miiid co Jesucristo, je huidibi jäy ajcxy yajpocyñhuaatzp, jibiy mic'ajt ti paady ma Dios Teedy, paady ycixp yi' ajcxy huidibi patcixp pocyñhuaatzin nañ jim mic'ajt patcixy ma Dios Teedy. E miiid co Jesucristo etz yi' yjäy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuüy co yi' yminañ co je mibijcpidijc jadu'n nipaady nej yi' yjugytijc ymigügtijc. ¹² Paady je Cristo yminañ ma yjaybetyity:

Miich Dios, ich miich ngapxpadipyich ma nmigügtijcich. N'ihuipyich iy miiid miich ycixpi ma je jäy ajcxy ti nayoymújciixy.

¹³ Nañ jadu'n Cristo yminañ ma yjaybetyity:

Nmijpidägyich Dios.

E jadüg'oc ymínaanip:

Cha ñich, mïd je ung anäg ajcxy tibi Dios xymöyich.

¹⁴ Ma jäy ajcxy ytügquëx'ajtcixy, tügpí yxiixy, tügpí ni'py je' ajcxy. Nañ jadu'n Jesús ymïd je' anajty yxiixy ñi'py jadu'n nej jäy ajcxy ymïdity jigix jëbi y'ögy, e jadu'n je' yajhuindigoydähuipy je huïdibi anajty jamic'ajtmïd co jäy yaj'ögiiyb, je' je' je' mujcu'. ¹⁵ E jadu'n je Cristo yajnihuädzictuty tüg'óciy pinjaty anajty cojuyiy codoogiy y'ijtp ma je mujcu', mïd co tzigiiygixy yi y'o'cin. ¹⁶ Janch co Jesús ymiiñ ya naaxhuiñ, ca' nmínaaním co pubedañ je ángeles ajcxy, je' janchtiy ypubedamyb Abraham y'ap y'oc. ¹⁷ E mïd jada ycixpi, Jesucristo jadu'n anajty mïdity ñinïcx etz yjugy'ajtin tú'ciy mïd je jugy'ajc ymïgügtijc ninïcx etz jugy'ajtin, jigix jëbi yi' naydügpajc codináy naaxhuiñjäy ajcxy ma Dios yhuinduu mïd tudägy'ajt etz pa'ayoohuin. Etz nañ jadu'n jigix jëbi huindzigiy Dios mïd yci'm ñinïcx mïd jäy ajcxy ypocy ycixpi, e jadu'n yajpocyhuaatztähuip yi mayjäy ajcxy. ¹⁸ Com Jesucristo ci'm tzaachypí minajx yajnax, etz nañ jadu'n je mujcu' Jesucristo jot'ijxy huinma'ñ'ijxy, paady ycixp Jesucristo jëbi pubety pinjaty jadu'n tzaachypí minajxp yajnaxp, etz ma yjot'ixyii yhuinma'ñ'ixyii je mujcu'.

3

Jesús jacnigi mijity yi' ca'ydí Moisés

¹ Mïd co Jesucristo jadu'n ti tuñ, paady ycixp miich ajcxy mïgügtijc huïdibi cixy'ot huinijot mijpidacp Jesucristo, je huïdibi ajcxy Dios ti xyhuin'ijxcixy co xyje'adánigixy. Pidaaccix mhuinma'ñ yajxon ma je Cristo Jesús, je huïdibi nejhuiyim co Dios ti quexy ya naaxhuiñ, je huïdibi tügpajc mïjtungmïd ma Dios, huïdibi tügpajc xycodínaayim ma Dios. ² Jesús tudägy yi' ti y'ity ma Dios yhuinduu, je Dios huïdibi ti yajnibigiyi je mïjtung, tim jadu'n nej Moisés y'ijty tudägy ma je ytung mïd tüg'óciy jäy huïdibi anajty ti cöbijccixy Dios ycötujcin ma Moisés. ³ Jesús ymihuaad nigí huindzigíñ etz cömayin, ca'ydí Moisés. Tim jadu'n nej pin tüg tijccojpi je' je' ijtp cömay, ca' nmínaaním je tijc ijtp cömay. ⁴ Tüg tüg tijc jim je' pin cojp. Per Dios yi' ti yajcojtäy yaj'oyäydäy tüg'óciy huïdibi ji'ajtp. ⁵ E jadu'n je Moisés tudägy je' ytuñ mïd tüg'óciy jäy huïdibi ti paady Dios ycötujcin ma yi'. Je Moisés je' ytung'ajti yejcy je tiy'ajt huïdibi anajty Dios jac'axam yegamyb. ⁶ Je Cristo tudägy ytuñ mïd tüg'óciy ñich ajt huïdibi mijpidacp Dios, tim jadu'n nej tüg jäy y'ung tudägy ytuñ ma yteedy ytijc yteedy ypidägy. Jadu'n ñich ajt nbaady nej Dios ytijc, e Cristo tudägy ytuñ mïd ñich ajt, pen tudägy nmibijcim Dios y'ayuc, ca' n'ixmajtzim ajt nmibijcin. Pen nmijpidaacim Dios agujc jotcujc ixti mabaad n'o'cim mïd je' ycixpi huïdibi njijp'ijxim ma Dios.

Dios yjäy ajcxy ypoocxin

⁷ Paady ycixp jadu'n yjaybetyity ma Dios ñecy ma je Espíritu Santo jadu'n ymínañ:

Jadachambi pen mïdooyb miich ajcxy nej Dios ymínañ,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huïdibi mibidigy Dios jecy'ajt (co ajcxy y'ijty jim mïjtig'duum). Je xii je tiempo jecy'ajty co ajcxy jot'ijxy huinma'ñ'ijxy Dios.

⁹ Chi Dios ymínañ:

Miich ajcxy mmij'ap mmijteedy ajcxy jim mïjtig'duum xyjot'ijx xyhuinma'ñ'ijxich ajcxy jecy'ajty. Ca' ajcxy jäymech co ajcxy y'ijxy anajty canaag mijhuinma'ñ huïdibi ndumywich anajty mïd yi' ajcxy ycixpi huixchiguipx jimijt.

10 Paady njotma'tyich mïd miich ajcxy mmij'ap mmijteedy jecy'ajty, e nmïnaañich: "Nïdigoy tïdigoy ajcxy jabom jabom ma yjot yhuinma'ñ. E ca' ajcxy nejhuïhuaangixy anajty ïch nni'aa ndü'aa."

11 Paady yi' ajcxy nmijotma'tyich, e janch janch nmïmaayich ajcxy, e ca' n'ïndägyich, co ca' ajcxy ytigïhuipy ma ïch nbocxtac.

12 Migügtijc, naygüend'ájtigix nidüg nidüg co ni tüg miich ajcxy mgamïd'adip jibicjot jibic-huinma'ñ, e ni mga'ixmájtzcixipy Dios juugypi y'ayuc, mïd co ca' mmibijccixy. 13 Hue' janchtiy nayjot'amijmóoyigixy miñ xyipy jabom jabom nami xï tiempo yjacnicxñi. Jadu'n miich ajcxy mdunipy, ca'ydi ajcxy yi pocytunï xyhuin'ïngixy, e chi anajty mnaybidáacigixy jotjuuñ.

14 Pen nmibijcim nmijpidaacim Cristo y'ayuc tïbi nbaatim oga'n'aty, e ca' n'ixtigïhua'cim mabaad n'o'cim, chi jëbi n'ijtim mïd Cristo.

15 Je' je' je huïdibi jaybetyity ma Dios y'ayuc:

Cham, pen mmïdooyb miich ajcxy nej Dios ymïna'ñ, ca' ajcxy m'ijtcixy jotjuuñ, jadu'n nej je' anajty ajcxy huïdibi Dios mijotma'tp anajty mïd co ajcxy mïbidïgy Dios.

16 ¿Pinjaty ajcxy huïdibi jecy'ajty midou Dios y'ayuc e mïbidïgy Dios? Nidüg'óciy je' ajcxy huïdibi tzomb Egipto naaxjot jecy'ajty mïd Moisés.

17 ¿Pinjaty je Dios ymijotma't jadu'n huixchiguïpx jimij? Je huïdijaty ajcxy tundigoy mïd Dios ytiy'ajt, e je' ajcxy cijx y'öctaaygixy jim mijtigïduum.

18 ¿Pinjaty Dios ñimay co ni camina ytigïhuipy ma je Dios y'it ylugar ma jëbi ypooxcixy mïd yi'? Je' ajcxy huïdibi ca' ycapxymïdoy. 19 Paady nnejhuïyim co janch ca' ajcxy jaty nej ytigïyigixyipy ma Dios y'it ylugar mïd co ajcxy ca' mibijcy Dios y'ayuc.

4

1 Com nmïdni ajt Dios y'ayuc, jadu'n nej ti xyaj'ahuanïyim co ndigïyim ma yi' chinaydac yjugy'ajttac, e nboocxim mïd yi'. Paady ooy tzocy co ndzigïyim Dios. Ca' jecyity co nidüg miich ajcxy ca' mdigïhuipy mïd co ca' mmibijccixy Dios y'ayuc. 2 Nañ jadu'n ti ïch ajt nmïdoohuim je Dios y'ayuc oybi, tim jadu'n nej yi' ajcxy jecy'ajty ti mïdooy. Per ca' Dios y'ayuc ma ti ypubedyii ajcxy co ti jamïdoogixy je tiy'ajt. Com hue' ajcxy ymidou, e ca' ajcxy mijpidacy. 3 ïch ajt com ti nmibijcim je Dios y'ayuc oybi, ïch ajt je' tigïyimip ma je it huïdibi Dios ti tijy ma jëbi nboocxim mïd yi'. Com Dios jadu'n ymïnañ:

Paady yi' ajcxy nmijotma'tyich, e nmïmäyich ajcxy, n'ïbaadyich ngapx-paadyich n'ayuc, co ni camina xï yi' ajcxy ypocxtac capaadipy ma ïch.

Tüg'óciy huïdibi Dios yajcojy yaj'oyïy, hue' ti yajcojy ti yaj'oyïy jayijpni ca'ni anajty naaxhuïnybi chondacy. 4 Com ma yjaybetyity je tiy'ajt jiiby muumity nigapxy je mïhuixtujcxïbi ma jadu'n ymïna'ñ:

Dios ypooxcy je mïhuixtujcxïbi mïd je' ytung ycixpi tïbi anajty tuñ.

5 E jadüg it yjaybetyity ma Dios ñecy ma jadu'n ymïnañ:

Ca'p yi' ajcxy ytigïyigixyipy ma ïch nbocxtac.

6 Hue' janchtiy Dios yjacmïd'ajtyñi it lugar ma ypocxtac ma jëbi pinjaty ytigïhuip. Yi' ajcxy huïdibi tzinay jecy'ajty huïdibi jayijp midou Dios y'ayuc, ca' je' ajcxy ytigïy ma Dios ypocxtac, mïd co ajcxy capxycömidoodacy Dios.

7 Paady ycixpi Dios ti pidägy tüg xï tüg tiempo mina jëbi pinjaty tigïhuipy ma yi' ypocxtac. Je' jadachambi xï tiempo Dios ti pidägy. Dios ti xyñïmaayim nej David ymïnañ tzach com jecy, nej miñ jaybety huïdibi ti yajnigapxy co jadu'n ymïna'ñ:

Jadachambi pen midooyb miich ajcxy nej Dios ymina'n, ca' ajcxy mnaybidáacigixy jotjuuñ.

⁸ Co Josué je Israel jäy ajcxy camoy je poox'in, ca' Dios canigapxy huingbi xii mina ytigihua'n ajcxy ma Dios ypocxtac. ⁹ Paady ycixp, jadu'n yjac-hui'myñi jadüg xii tiempo mina Dios yjäy ytigihua'n ma Dios ypocxtac. ¹⁰ Com pinjaty tigiyb ma Dios ypocxtac hue' je' ypocxy miid je' ytung ycixpi tiibi anajty tuñ, tim jadu'n nej Dios ypooxxy je mihuixtujcxibi miid je' ytung ycixpi tiibi anajty tuñ. ¹¹ Hue' tzocy co naymic'ijxim nej huaad ndigiyim ma je Dios ypocxtac, ca' yjegyty co nijety miich ajcxy mbaduunipy nej ajcxy y'idich huidibi ajcxy ca' mibijcy Dios y'ayuc, e ca' mdigiygixipy ma Dios ypocxtac.

¹² Com yi Dios y'ayuc ijtp yi' huinixii huinitempo, e ymiid mic'ajt. Nigi yajtigiyñajxtäy ninicx, jot almi, ca'ydi tüg espada huidibi mejtz'adu'm'amy jipip etz yjixpu'ñity. E Dios y'ayuc nehuiydaayb nej jäy ajcxy yjot yhuinma'n miidity, e tüg'óciy tijaty ajcxy ñijot'ajtcixyp. ¹³ Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'óciy nej ajt njot nhuinma'n nmidity ñiguëxictähuiy yi' ma Dios, je Dios ma ich ajt nguendi ngiyegaanim, yi' ijxtaayb ajt njot nhuinma'n.

Jesús yi' je' je' mijhuingapxy ma Dios

¹⁴ Jesús, je Dios y'ung, yi' je' tügpajc jacmijtungmiid huidibi xycodinaayim ma Dios miid ajt nbocy ycixpi. E Jesús ti ytigiy ma Dios yhuinduu, paady ycixp tzoc ijtım tudägy ma ajt nmibijcin. ¹⁵ Pues com Jesucristo, je huidibi tügpajc mijtungmiidip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej ich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jebi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcujc nmihuingoonim je Dios y'ane'mdac e n'ojadajtim nmibijctzoohuim Dios, jaydebi co anajty jotmay nmid'ajtim, chi Dios may'ajt oy'ajt tunipy miid ich ajt ycixpi.

5

¹ Tüg tüg mijtungmiidpi huidibi huingapxp jäy ajcxy ma Dios, hue' je' yajhuin'ijxp ma yeydijctijc, etz yajnigapxpejty, jaydebi yhuingapx jäy ajcxy ma Dios etz yajnaxipy Dioscojuyip miid jäy ajcxy ma Dios, etz yegipy huindzig'i'n ma Dios miid jäy ajcxy ypocy ycixpi. ² Je mijtungmiidpi jäy ajcxy yajnibijc huidibi huingapxp jäy ajcxy ma Dios, jebi yi' ajcxy pa'ayooy huenpinity huidibi pocy ymiid, com nañ jadu'n yi' ajcxy pocy jihuüy. ³ E miid yci'mbocy ycixpi copicy yegipy huindzig'i'n ma Dios etz miid jacjadyii jäy ajcxy ypocy ycixpi.

⁴ Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yi' miid jäy ajcxy ycixpi, tim jadu'n nej Dios huin'ijxy Aaron jecy'ajty etz yajnibijcy yi' jadu'mbi tung. ⁵ Jadu'n yjajty miid je Cristo, ca' ci'm nayñibijctzoohuüy ma yi' jadu'mbi tung. Dios yajnibijci co huingapxip miid jäy ajcxy ycixpi, e ti ymöyii je mij'ajt jadu'n nej anajty ti nimäy:

Miich je' ich n'ung. Ich miich mjogy'ajt ti mmöy cham.

⁶ Nañ jadu'n ymina'n jadüg'it ma Dios ñecy:

Miich je' mhuingapxyp je jäy ajcxy ma Dios huinixii huinitempo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydägy minucxtägy Dios, chi ooy mibijctzoy janch mic je Dios huidibi jebi ycohua'ñyii ma je o'cin. Miid co ooy mibijcy ooy huindzigiy Dios miid yung naxy yjot yhuinma'n, paady

Dios ymidoohui. ⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, miid je' ycixpi nej anajty ti y'ayoy ya naaxhuiñ. ⁹ Co Cristo yajca'pxy yi' y'oy'ajtin miid je' tzaachypí huídibi yminajxy yajnajxy, chi ni'ixi' anajty y'ity jébi cop'adyii alma nidoocin huinixii, jaydēbi tūg'óciy pinjaty capxymidoob Cristo, ypaadip ajcxy y'alma nidoocin. ¹⁰ Dios jadu'n yajnibjcy Jesús co yajnicxip je' jac mijpi tung ma yi' co huingapxip jāy ajcxy ma Dios, tim jadu'n nej Melquisedec ytuñ jecy'ajty.

Je ayo'n co nijjpyöduutim yi mibjcin

¹¹ Ooy ñich miich ajcxy mij nmíidmíydäga'ñ ma jadyaabi tiy'ajt, per ooy chachchip nimíydaacnity, com ca' miich ajcxy mic'amy mhuinjihuipy Dios ytiy'ajt. ¹² Jadu'n nej jada xii tiempo ti yječni ma miich ajcxy oga'n ti mmibicy. Hue' miich ixypy ajcxy mniyaj'ixpijcnip Jesucristo ytiy'ajt je tzipjatypi. Per miich ajcxy mdzojcyñi co myajnajtzcaxihuipy huinjemy je Dios y'ayuc huídibi ca' chipity. Ti miich ajcxy m'ahuimbijttaaygixy ca' mic majaa ma mmibjcin. Hue' jēyi miich ajcxy jadu'n nipaady nej pi'ctijc huídibi leche uucp, e ca' jadu'n paady nej mij'anactijc huídibi caagy caayb. ¹³ Pinjaty yajpatp ma jada ixpijcin huídibi ca' chipity, jadu'n yi' nej ma'xungdijc com ca' jajtciy je ayuc tiy'ajt tiybi. ¹⁴ Je' tzipjatypi tiy'ajt je je' winjihuiyigixp, je' huídibi ymibjkin mij may mid'ajtkixpin, jidu'n nej je' huídibi y'aa ytitz jim ajkixyin je' titzpi jich kaagy je' ykaaygixpy, je' ko yajtkixpy je' nej winjiwiiygixichin je' huídibi oy, etz je' huídibi ka'oyin.

6

¹ Paady tzoc ñigi yajyujcpejtím n'ixpijcin ma Dios ytiy'ajt, tzoc ajt yajyeecim nmibjcin, jigix jadu'n nipaadip jadu'n nej jāy tiibi yhuinma'ñ yca'pxtaayñi. Ca' n'agapxiyo'cim canaag'oc jabom jabom je' tiy'ajt huídibi ti nbaatim co oga'n nmibjcin Cristo. Ca' janam jatzojc n'ixpijco'cim huídibi oga'n ti n'ixpijcin jadu'n nej co njothuimbijtim nej anajty ndunim jibicpi huídibi xyajnicxim ma yi' o'cin, e jadu'n nej nmibjcin Dios oga'n. ² Ca' jadüg'oc n'ixpijco'cim je' ixpijcin miid je' nibejtin ycixpi, etz jadu'n nej yajcñixajy je' mibjcpidijc jaydēbi paadip ajcxy je' Dios yjihui'ñ ymic'ajt, etz jadu'n nej yi' öcpi ajcxy yjugypigipy co anajty ti öccixy, etz jadu'n nej Dios tzaachytuna'ñ huinixii pocyjädijc. ³ Chi njac'ixpijcin Dios y'ayuc je' tzipjatypi, pen Dios jadu'n tzojcpy.

⁴ Com pinjaty ti huinjihuỹ Dios y'ayuc ytiy'ajt, e jāygidägy huídibi Dios yejcpy, etz miidity Dios yjihui'ñ ma y'ay yjot, jadu'n je' nipaady nejjihuỹ chinay ma jün ytícxin. ⁵ Etz ti ajcxy jāygidägy Dios y'ayuc ytiy'ajt, e ti jihuiyigixy Dios yjihui'ñ ymic'ajt huídibi yajtzinaayip ajcxy y'alma ma je' xii je' tiempo huídibi miimb cidacp. ⁶ Yi' jadu'mbi jāy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibjccixy Jesucristo, ca'p jēbi jadüg'oc jothuimbijtcixy ma Dios miid pocy ycixpi e pijctzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbizimy nej ajcxy jadüg'oc yajcruudzpejtciy je' Dios y'ung miid ajcxy ypocy ycixpi, e nixiiccixy yajxiiccixy nej Jesucristo y'o'cy miid ajcxy ypocy ycixpi. ⁷ Jadu'n yi' ajcxy nej naax nū'uuctích naag'oc naag'oc ytu'y. E pen je' naax yejcpy ooy cosecha ma pin ti ñipy ti ytuñ, Dios je' anajty yconuucxin ymiid. ⁸ Pen actim apy etz actim jibic ujtz ypidzimy ma je' naax, ca' je' ti tzoohuity, e Dios je' yajtigoyamb etz nöctāhuip ma je' mij jün. (Jada naax jadu'n jada' nipaady jadu'n nej jāy huídibi ti ixmach ymibjcin.)

Yi huídibi nmibjcin yi' xyhuijtz'ijtim tudägy

9 Migügtijc ajcxy huidibi ooy ndzocyich, oy ich ajcxy jadu'n njamüdmüydägyich miich ajcxy, janch nejhüüybich co ca' ajcxy ti m'ixmach yi mibijcin, etz nejhüüybich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰ Com Dios ooy yi' ytudägyity, e ca' yi' jäydigoy huidibi miich ajcxy mdumyb müd yi' ycixpi, jadu'n nej oyjäy'ajtin ti mdungixy müd jacjadyii mibijcpidijc, e chambaad jadu'n mdungixy. ¹¹ Hue' ich ajcxy ndzocyich co miich ajcxy nidüg nidüg mnixondaaccix tungix oyjäy'ajtin ixti mabaad m'öccixy, jigix mbaadipy ajcxy tüg'ócüy huidibi ajcxy mjijp'ijxyp ma Dios. ¹² Ca' ich ajcxy ndzojccixy co miich ajcxy m'ahuimbidity nuux. Padungix miich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydëbi mbaatcixy tibi Dios xyaj'ahuanüygixy.

¹³ Co jecy'ajty Dios moy Abraham je' y'ayuc, ci'm je' nïgapxpejty y'ayuc, com ca'anajty ji jac mijpi pin nïgapxpedipy je' y'ayuc. ¹⁴ Chi Dios Abraham nimay: "Janch co ich miich ngonucxip, e nmöhuipy may m'ap'ung m'apmang." ¹⁵ E jadu'n Abraham y'ahuijxy müd mecxtujcin, e jadu'n ycädigüiyi huidibi anajty Dios ti yaj'ahuanüyü. ¹⁶ Co ajcxy jäy ycapxcixy co yjanchity, jim je' pin nïgapxpejtp je' y'ayuc, je pin jacmijp, je' nïgapxpejtpy jada ayuc. E co nïgapxpety je' y'ayuc, chi je ayuc y'ity, e ca' huaad pinjaty ymina'n co ca' yjanchity. ¹⁷ Paady ycixpi Dios nïgapxpejty yci'm'ayuc, müd co anajty yajnejhuühua'n je jäy ajcxy co cuyduna'n y'ayuc tibi ahuanüy. ¹⁸ Ji yajpaady mejtnax Dios y'ayuc huidibi ca' huaad capxtigach, e Dios ca' y'anüdügy nimina. E co Dios jadu'n tuñ, chi xyajjotcugüiyim mij, ich ajt huidibi n'ixtaayim e ndzojcin yi' ypubejtin. E ti nmijpidaacim yi' y'ayuc jadu'n nej jip'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E müd co njip'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcuyc ijtim ca' ma tzigüñ jihui'n. Jadu'n Dios y'ayuc nipaady müd ich ajt ycixpi nej tüg pujx huidibi je barco huon'ijtp mejyoty, ca'ydi nej yjaty je barco. Ich ajt njip'ijxim co ndigühuaanim ma Dios y'it tzajpjoty, tim jadu'n nej je judío sacerdote mïtungmüdpï ytigüy anajty jecy'ajty ma Dios y'it ma je Dios ytijc, je it huidibi anajty adyducyip müd huit. ²⁰ Tigühuaanim ich ajt ma je Dios y'it tzajpjoty ma Jesús ytigüy müd ich ajt ycixpi, Jesús ti yaj'ahuäch nej jëbi ndigüiyim ma Dios y'it. E jadu'n Jesús naydügpajc huingapxy etz codinäy mayjäy ma Dios yhuinduu huinixü huinitiempo. Jesús ytung tim jadu'n nipaady nej Melquisedec ytuñ jecy'ajty.

7

Yi Jesús tim jadu'n ymijty nej Melquisedec

¹ Je Melquisedec hue' je' anajty rey'ajtp ma je cajp huüdi yxü Salem, e je' anajty huingapxp ma je mijpi janchypi Dios tzajpjoty. Co anajty Abraham yhuimbity co anajty oy ti chiptuñ, ma anajty je reyüijc oy ti yajqueec-huäcxtäy ti mimadactäy, chi Melquisedec choon oy jipcoyöyü Abraham, e chi ooy Dios mijuydacy minucxtacy müd Abraham ycixpi. ² Huidibi anajty Abraham ti paady ma anajty oy ti chiptuñ, chi je' pijc-huäcxy majcpicy, chi pugoon tüg-picy mooy je Melquisedec. Melquisedec yxü hue' yhuimbidity "rey tudägypi". E com co anajty yrey'aty jim Salem, hue' Salem yhuimbidity "jotcuyc'ajtin", paady jëbi nminaanim jadu'n, "je rey huidibi jotcuyc'ajtin yejcp". ³ Je Melquisedec ca'p anajty yajnejhuüy ytaj yteedy, ni y'ap yteedy. Ni ycajajnimüydägy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huingapxp jäy ajcxy ma Dios huinixü huinitiempo.

⁴ Occuenditungixy miich ajcxy nej je Melquisedec anajty ooy ymijity. Je Abraham, ñch ajt nmij'ap nmijteedy ci'm mooy Melquisedec je tüg picypí huídibi anajty ti pijci je rey ajcxy ma oy chiptuñ. ⁵ Nej Moisés ycötujcín y'ane'my je' anajty ajcxy yhuingapxy ma Dios ytijc je pinjaty Leví y'ung'ajtpy y'anác'ajtpy, y'ap'ung'ajtpy y'apmang'ajtpy. Je' ajcxy cötujc mïd co jäy ajcxy yajcuend'adipy tügpicy je majc-picypí huídibi xii diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'óciy. ⁶ Per Melquisedec oy je' anajty ca' Leví ap'adyii teedy'adyii, yajcujt je Abraham tügpicy je majc-picypí. Je' je' anajty huídibi cidigiiyi tibi anajty Dios yaj'ahuaníyii. Jadu'n Melquisedec yajpuhuaníy Dios je Abraham. ⁷ Ni pin ycamina'nip co ca' yjanchity co je pin conuucxin yejcp, jac mij je', ca'ydi je pin yajconuucxp. ⁸ Ya ma ñch ajt, pin cidigiiyip tügpicy je majcpicypí (diezmo), hue' je' ajcxy jäy huídibi öcp. Per jadu'n nej anajty Melquisedec, jadu'n ymina'nñ ma yjaybetyty co je' yjactzinaayñi. ⁹ E jëbi yajmina'nñ co je Leví etz jadu'ñyibaad je y'ap y'oc huídibi ajcxy huingapxp ma Dios, e yajcujtcixy Israel jäy huídibi Dios patip, nañ jadu'n nipaady nej jihuiy ymigüety je' ajcxy je Melquisedec huin'it co Abraham ymigüejti. ¹⁰ Jadu'n nipaady nej jihuiy Abraham ñigix'ajtyñi y'ap'ajtin yteedy'ajtin Leví etz jacjadyii je huídibi anajty ajcxy ca'ni ypi'c'atyñi yma'xung'atyñi co oy Melquisedec yijpcobadiyii.

¹¹ Je Israel cajp yajcidigiiyi je' je Dios y'ane'min ycötujcín je Levita ajcxy huídibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcín payöyb, ca'p tim je' anajty ycopicyty co ycajacquëxigy jadüg huídibi codinähuij je mayjäy ma Dios, ca' y'ocje'jiñ ma ymiiñ Aarón y'ap y'oc. Je jadügpí huídibi codinähuyb je mayjäy ma Dios, hue' copicy co tú'ciy naybadiiyb mïd Melquisedec. ¹² Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcín. ¹³ ñch ajt nHuindzin Jesucristo, je huídibi ñimiydacy ma Dios ñecy co huingapxa'nñ je mayjäy ma Dios, huingbi ap huingbi Teedy je' anajty, ca' y'ocLevíjin. E ni tüg yi' y'amigüg ca' yhuingapxy ma Dios. ¹⁴ Huädz yajnejhuiy co ñch ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy pinjaty anajty huingapxp je mayjäy ma Dios ytijc.

¹⁵ Jacnigüëxícip jada ooy co jadüg ytigiiy huídibi tumb ma Dios, huídibi tú'ciy naybaatip mïd Melquisedec. ¹⁶ Ca'p Jesucristo yajtungbijci co huingapxip je mayjäy ma Dios mïd je cötujcín huídibi minaamb co yi' y'amigügtijc patip yi' jadu'mbi tung, je huídibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxip je mayjäy ma Dios. ¹⁷ Com mïd je' ycixpi jadu'n Dios tiy'ajt yejcy co jadu'n ymina'nñ:

Miich je' cham mhuingapxyp je mayjäy ma ñch. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcín huídibi Moisés yejcp, ca' y'octuni cham, ca' jac ti mic'ajt mïdity co jaydëbi yajtzögipy jäy ajcxy y'alma. ¹⁹ Je Dios ycötujcín huídibi Moisés jayhui'm jecy'ajty, ca'p je' ni ti yaj'oybidzimy yajhuätzpidzimy. Mïd je huingapxpi ycixpi huídibi nmïd'ajtim cham jac'oy yi' huídibi njijp'ijxim ma Dios.

²⁰ Co Dios Jesucristo yajtungbicy, chi nïgapxpejty yci'm ayuc co yjanchity. ²¹ Jacjadyii ajcxy huídibi anajty tungixp ma Dios ytijc, hue' je' ajcxy tungmooyi, e ca' Dios nïgapxpejty yi' ajcxy y'ayuc. Per co Jesucristo ytungbijcy,

chi Dios nġapxpejty yci'm'ayuc. Com jaybety jadu'n ma Dios ñecy ma jadu'n ymina'ñ:

Je Huindzin Dios ti nġapxpety yci'm'ayuc, e ni mina ycajotmetzcġhuipy.

Jadu'n Dios nimay y'ung:

Miich mhuingapxamyb etz mgodināhuamyb je mayjāy ma ġch huinixġ huinitiempo. Jadu'n miich mdunġpy nej Melquisedec ytuuñ.

²² Com Dios nġapxpejty yci'm'ayuc co yjanchġty co Jesucristo ytungbġjcy, paady yġ Jesús yġ je' majamoy mic'ajtmoy je jemybġ ayuc huġdibġ yajhuġ'm mġd jāy ajcxy ycġxpġ, je jac'oybġ cġtujcġn. ²³ Jacjadyġ huġdibġ anajty yhuġngapxcġxy ma Dios ytġjc, nimay anajty ajcxy ooy. Com co tġg y'o'cy, chi huġngbġ ytġġy ma je' ytung. ²⁴ Jesús com ca' yġ yjugy'ajtin ycġxġpy ytġgoyġpy ni mina, paady ca' ytung ixmach, etz ca' yġ'ytungmġy ni pġn. ²⁵ Mġd je' ycġxpġ Jesucristo mic'ajt mġdġty jaydġbġ yajnġdzoocġpy jāy ajcxy y'alma huinixġ huinitiempo, pġnjaty mġbġjctzooyb Dios ma Jesucristo yxġ. Jesucristo jġbġ tunġpy jadu'n, com yġ yjugy'ajtin ca' ycġxġpy ytġgoyġpy ni mina. E yġ Dios mġbġjctzodġb mġd jāy ajcxy ycġxpġ jabom jabom huinixġ huinitiempo.

²⁶ Je Jesús je' je' tġgpajc je mġjtungmġd pġ ma Dios, huġdibġ ġch ajt nyajmay-jajtim, je huġdibġ mġd huādz yjot huādz yhuinma'ñ, e ca' je' mġdġty ni ti jġbġcpġ ni ti pocy. Je' ca' tġgnax y'ġty mġd pocytumbġdġjc. Nġġ je' ymġġty ycġxġty, ca'ydi jac ti huġdibġ yajpat tzajpjoty. ²⁷ Ca' Jesús yjadu'nġty nej ajcxy jacjadyġ huġdibġ tuun ma Dios ytġjc jecy'ajty, co yaj'ocġxġ ġyujc, e je' ajcxy yejcpġ huġndzġġ'ñ jabom jabom, mġdġg co je' ajcxy ñayyajpocyñġhuāchġyġ, e chi jada' mġd jāy ajcxy ypocy ycġxpġ. Jesús tġgtecpajc je' yejc huġndzġġ'ñ mġd mayjāy ycġxpġ, co je' cġ'm ñayyejci ma yġ o'cġn jadu'n nej tġg huġndzġġ'ñ. ²⁸ Je Dios ycġtujcġn huġdibġ Moisés yjayhuġ'm jecy'ajty, hue' y'ane'my co huen tungmġy jāy ajcxy huġdibġ pocy mġd, co mġjtungmoy ma Dios ytġjc. Chi jac'axam Dios yajhuġ'my jemybġ ayuc jemybġ cġtujcġn, e nġapxpejty yci'm'ayuc co yjanchġty. E mġd je jemybġ ayuc Dios tungmoy yci'm'ung, huen yajnġcxġp je mġj pġ tung ma yġ y'ġt, je Dios y'ung huġdibġ ġjtp huinixġ ca' ti bocy mġdġty.

8

Jesús yġ je' je' mġjhuġngapxpġ ma yġ Dios y'ayuc jemybġ

¹ Huġdibġ ooy nġġ ycġpġcyġty, huġdibġ yajnġmġydaacp, co ġch ajt nmġd'ajtim pġn xycodġnaayġm ma Dios, je' je' je' Cristo, je huġdibġ jġby ġjtp mġj'ane'mbġ tzajpjoty, jadu'n nġpaady nej jġhuġy yġ y'ñāy a'oy'amy ma Dios ymġjc. ² Jġby je' ytuñ ma je janchypġ Dios y'ġt ylugar, je amaaybġ, huġdibġ oyhuġndzġġy ġjtp. Je it huġdibġ Dios yajcoj, e ca' nmġnaanim jāy ajcxy yajcoj. ³ Tġg'ocġy pġnjaty huġngapxp ma Dios, yajnġbġcy je' paady, e copġcyġty co cġyegġpy ofrenda etz tijaty huġndzġġ'ñ ma Dios mġd jāy ajcxy ypocy ycġxpġ. Paady ooy ycġpġcyġty nañ jadu'n co Jesucristo yegġpy ofrenda etz huġndzġġ'ñ ma Dios mġd jāy ajcxy ypocy ycġxpġ. ⁴ Co Jesucristo ġxyġpy ya y'ocġyajpaady naaxhuġñ, ni ycahuġngapxy ġxyġpy mayjāy ma Dios. Com jġnġ ya yajpaady pġn huġngapxġp ma Dios ytġjc, pġn yejcp ofrenda etz huġndzġġ'ñ jadu'n nej Moisés ycġtujcġn y'ane'my. ⁵ Jadayaabi huġngapxpġ ajcxy ytungġxy ma Dios ytġjc ya naaxhuġñ. Je' je' tġg ġjxpejt nej Dios y'ġt jġby tzajpjoty, jadu'n yġ nġpaady nej tġg anecpġ huġdibġ tzomyb jġby tzajpjoty. Co Moisés jecy'ajty Dios ytġjc je' cojġ mġd huġt, chi Dios ñġmaayġ: “Cuendġtun yajxon co anajty mgojy je tġjc tġgnax jadu'n nej je ġjxpejt huġdibġ nyaj'ġjx jġm copġxġy.” ⁶ Per je mġjtung huġdibġ Jesús ytumyb ma Dios mġd jāy ajcxy ycġxpġ, jac'oydung yġ ca'ydi je tung huġdibġ je jāy ajcxy ytumyb huġdibġ mġjtung mġd ma Dios ytġjc ya naaxhuġñ. Com jemybġ etz jac'oy etz jacmic'ajt mġd je cġtujcġn huġdibġ Dios ymoy Jesús, ca'ydi je cġtujcġn

huidibi Dios ymoy Moisés jecy'ajt. Com hue' je' jac'oy alma nīdzocin Dios yaj'ahuanīy jāy ajcxy ma je jemybi cōtujcin.

⁷ Co je jayījp'atypī cōtujcin huidibi Moisés ymooyī cayaj'oyīydaayī jāy ajcxy ypocy mīid Dios, ca' yī' ixyipy ycopīcyīty je mīmetzpi cōtujcin huidibi Dios ymoy jāy huinjemy. ⁸ Per Dios y'ijx co je jāy ajcxy ca' yajxon cuydungixy je cōtujcin huidibi Moisés ymoy, jadu'n nej ymīna'ñ ma yjaybetyīty ma Dios ñecy mīid je' ajcxy ycīxpi, ma jadu'n ymīna'ñ:

Jadu'n je Huindzin Dios ymīna'ñ: “Mimb xīi tiempo ma huingbi cōtujcin nmōhuībich yī Israel jāy etz Judá jāy ajcxy.

⁹ Ca' y'ocjadu'nīñ nej īich ngōtujcin huidibi nmooyīch je' ajcxy y'ap yteedy jecy'ajty, je huin'it tiempo taabi nyajtzooñīch ajcxy jim Egipto naaxjot. Ca'p je' ajcxy cuyduñ je cōtujcin huidibi ajcxy nmooyīch, e paady ca' nduūñīch cuendī yī' ajcxy.” Jadu'n ymīna'ñ je Huindzin Dios.

¹⁰ Jadu'n je Huindzin Dios ymīna'ñ:

Je cōtujcin huidibi nyegaamybīch ma Israel jāy ajcxy co anajty yījadu'mbi xīi tiempo tī ñaxy, jadu'n je'. Nbidāgībīch ngōtujcin ma yī' ajcxy yhuinma'ñ, e jadu'n nipaady nej jihuīy tī njayīch n'ayuc ma ajcxy y'ay yjot. E īich yī' ajcxy xyDios'adīb, e yī' ajcxy njāy'adiybīch.

¹¹ Tūg'ócy ajcxy nejhuīhuīpy pīn īich. Nī pīn jī cayaj'ixpīgīpy pīn je' je Huindzin Dios, nī pīn, nī ymīgūg, nī ymījīn ymīdījc, nī pī'ctījc nī mīj'anāctījc. Com nidūg'ócy ajcxy nejhuīhuīpy pīn īich; ypi'city ymutzīty, ymījāyīty, etz ymīj'anācity.

¹² E īich yī' ajcxy nmeecxīp yjībīcjāy'ajtn, nī camīna ngajac'ajihuīhuīybīch ajcxy ypocy. Jadu'n Dios ymīna'ñ.

¹³ Co Dios je' ycōtujcin jemybi nīmīydāgy, je' je' co yaj'amījīyñī je jayījp'atpyī cōtujcin. Je huidibi amījīyñīp ca' je' y'octuunīp, tzojc yī' yaj'ijxtīgoyaani.

9

Je Dios ytījc huīdi ya naaxhuīñ etz Dios y'it huīdi tzajpjoty

¹ Je Dios ycōtujcin jayījp'atypī ymīd je' anajty ñīdīy'ajt nej huaad ytuñ ma Dios ytījc ya naaxhuīñ, ma jāy ajcxy huindzīgīhuīpy Dios. ² Je Dios ytījc jadu'n je' ycojīty. Je jayījpī cuarto hue' anajty xījīty Lugar Santo, jīiby anajty y'ity je candelero etz je mesa ma tzajcaagy y'ity ma Dios yhuinduu. ³ Jīxcī'py'amy ma je mīmetzpi huit y'agīyducyīty jīiby jadūg'it huīdibi xījīp Lugar Santīsimo (ma Dios nī'ixcīdāgy je jāy). ⁴ Jīiby anajty tūg mīj mesa ac tīm orī je' anajty ma ajcxy ypoomjojccīxy, e ma je' jīm anajty y'ity tūg cajoon ac orī je' anajty yñīnīcx huīdityī. Jīiby cajoonjoty anajty y'ity tūg tu'tz ac orī huīdibi anajty mīid je jīcxy ijxpejt huīdibi Dios Israel jāy ajcxy ymooy jecy'ajty. Etz jīiby anajty Aarón ytajc huīdibi huījp huam. Etz jīiby anajty je tzaa y'ity ma je' anajty ycījxjāyīty Dios y'ane'mīn. ⁵ Ma je cajoonnīcx jīm anajty je querubines ñīgojtūdyīty huīdibi Dios y'oy'ajtn mīid. Je querubines anajty codīnaayb Dios, e je' anajty ajcxy yajnīdīgooyb mīid yqueec je cajonnīcx ma ajcxy je huīdzīgī'ñ ñī'py ypidacy mīid jāy ajcxy ypocy ycīxpi. Ca' huaad yjacyajnimīydacy mījcajee jadachambi tijaty huīdibi anajty yajpatp jīiby ma Dios ytījc.

⁶ Jabom jabom co anajty jadu'n y'ijttāy nī'ixī', chī je huingapxpi ytīgīygyīxy ma Dios ytījc ma je jayījpī cuarto, je Lugar Santo, tuñ ajcxy huīdzīgī'ñ etz cuydungixy yī' ajcxy ytīy'ajt mīid Dios ycīxpi. ⁷ Jīmījt jīmījt ma je mīmetzpi cuarto huīdibi je huit adīydujcp, jīiby ytīgīy tūgtecypajc je huingapxpi huīdibi jacmījtungmīid ma Dios ytījc. E co jīiby ytīgīy, chī mīdīgīy huaj ñī'py, huīdibi mīid huīdzīgīy Dios mīid yci'mbocy ycīxpi etz mīid tūg'ócy jāy ajcxy ypocy ycīxpi etz mīid ajcxy ypocy ycīxpi co ca' nejhuīygyīxy co ytundīgooygyīxy.

8 M̄id jada yc̄ixpi je Esp̄ritu Santo xyajnejhūiyim co je tungm̄idpi hūidibi hūingapxi je mayj̄ay ma Dios, ma ajcxy jacyajtungixy anajty je jayijp cuarto ma Dios yt̄ijc, chi ca'ni je' anajty y'ahuächñi nej jēbi pinjaty yt̄iḡiy ma je it lugar Sant̄ísimo ma Dios yhuinduu. 9 Je Dios yt̄ijc hūidibi ijtp anajty ya naaxhuiñ ca' je' yjējity je janchypi. Hue' je' anajty ijxpejt'ajtp hūid̄i Dios y'it'ajtpy tzajpjoty. Jiiby je tungm̄idpi hūindziḡiy Dios m̄id ofrendas etz m̄id hūindziḡi'ñ. Per jada hūindziḡi'ñ ca' yajtigoy je pocytun̄i ma je jāy ajcxy yjot yhuinma'ñ. 10 Je jud̄ioj̄ay yt̄iy'ajt hūidibi tuun ma Dios yt̄ijc jecy'ajty, hue' je' ñigapxy caayin uucin, etz jadu'n nej ajcxy ñayyajpocyñ̄ihuáatziḡixy m̄id n̄i etz canaag costumbre hūidibi ajcxy cuydumyb. Jadu'n ajcxy ytuñ ixti coon̄i Dios yajtigajztay t̄üg'óciy yí' yc̄otujcin.

11 Per ti y'oy ya naaxhuiñ je Cristo, e yí' je' cham ijtp jacm̄ijtungm̄idpi ma Dios, yí' ti mimiñ jemybi c̄otujcin jac'oybi. E yí' je' codinaayb je mayj̄ay ma Dios y'it' tzajpjoty, je it jac'oybi jacm̄ijpi, jacca'pxypi, ca' nm̄inaanim jāy ti cojy, e ca' yaajity naaxhuiñ. 12 Cristo ti yt̄iḡiy ma je Dios y'it, je lugar Sant̄ísimo. Ca' ti yt̄iḡiy m̄id co jiiby yajquēx̄iga'ñ pi'cchivo ñi'py o toro ñi'py, hue' yci'mni'py jiiby yejcpy ma Dios. Jadu'n ti yt̄iḡiy t̄ügtecy t̄iḡiy hūinix̄i hūinitempo, etz xyyajñidzoocim ajt n'alma hūinix̄i. 13 Ooy yjanch̄ity co yí' toro ñi'py etz je chivo ñi'py etz yí' cuyjam co ajcxy nõccixy huaj n̄ix ma je Dios ojadajttac, co ajcxy je pocyj̄ay yajñihuāxcixy je ni'py etz yajñix̄idujtcixy je cuyjam ym̄id mic'ajt co yajpocyhuáatziḡixy ñin̄icx, per jotjoty ca' yajhuäch. 14 (Je hūingapxi hūidibi tumb ma Dios yt̄ijc ya naaxhuiñ ca' ymad̄agy co jāy yajpocyhuādzipy m̄id toro ñi'py), Jesucristo ñigi ti ymad̄agy yajpocyhuäch jāy ajcxy m̄id yci'mni'py. Com Jesucristo ym̄id je Dios yj̄ihui'ñ ymic'ajt hūidibi ca' yc̄ixipy yt̄igoyipy ni m̄ina, chi ñayḡiyejci ci'm ma Dios m̄id Dios yj̄ihui'ñ ymic'ajt, jadu'n nej t̄üg hūindziḡi'ñ huātzpi, com ca'ni ma ni ti tundigoy. E m̄id yci'mni'py Jesucristo xyajhuaatzim je jib̄icpi ma ajt njot nhuinma'ñ, ca'ydi ndunim hūidibi Dios ca' jāygid̄agy, e jadu'n ajt huaad ndunim ma je Dios juugypi ytung.

15 Paady yí' Jesucristo yí' je' hūingapx'ajtp ma Dios m̄id ñich ajt yc̄ixpi m̄id je jemybi yc̄otujcin hūidibi Dios yajhui'm. Yí' Jesucristo co y'o'cy, yí' ajt je' nbocy xymecxim tiibi ndundigooyim ma je jayijp'atyp c̄otujcin hūidibi Moisés jayhui'm. E jiḡix pinjaty Dios ti yhuin'ixyii, jēbi ajcxy yc̄idiḡiyii je tz̄inaydac ma jēbi n'ijtim hūinix̄i. Je tz̄inaydac hūidibi Dios ti xy'ahuan̄iyim. 16 Co t̄üg jāy j̄ijp'ixy y'o'cin, e yajcojy t̄üg testamento, ooy ycop̄icyity co yajnejhūihuipy pen janch je' ti y'ögy je pin yajcoj je t̄iy'ajt jiḡix je' yt̄iḡihuipy tumbi je t̄iy'ajt. 17 Co t̄üg jāy j̄ijp'ixy y'o'cin e yajcojy t̄üg testamento, ca' je' ti mic'ajt m̄id̄ity je testamento pen jugy'ajtni pin je' anajty ti yajcojy. Huin'itni janch̄ity co anajty ti y'ögy, huin'it je testamento mic'ajt m̄id̄ity. Je jemybi t̄iy'ajt hūidibi Dios xyajhui'my jadu'n yí' nipaady nej jāy testamento yajcojy co anajty j̄ijp'ixy je y'o'cin, e co Jesús y'o'cy, huin'it mic'ajt moy je Dios yt̄iy'ajt je jemybi. 18 Paady yc̄ixpi jecy'ajty co Dios Moisés moy c̄otujcin, yajtzoobaat je' m̄id iyujc ñi'py. 19 Moisés je' capxhuācx je Dios yt̄iy'ajt ma t̄üg'óciy mayj̄ay. Chi jada' hūijtz̄igy t̄üg lana tzaptzpi m̄id t̄üg quipy aacx hūidibi ooy oy yxuugy. Je' yajxooc ma huaj mang ñi'py etz chivo ñi'py teemhūidity m̄id n̄i, chi Moisés yajñihūi'ch je libro m̄id je ni'py, je libro hūidibi anajty ti capxy etz nañ jadu'n jāy ajcxy yajñihūi'ch je ni'py. 20 Co Moisés jadu'n ytuuñ, chi ym̄inañ: “Jada je' je ni'py hūidibi yajtzoobatp je ane'm̄in je t̄iy'ajt hūidibi Dios ti yecy ma miich ajcxy.” 21 Moisés nañ jadu'n ñi'pyñihūi'ch je cochac t̄ijc ma anajty yDios ojadajtcixy, e t̄üg'óciy tumbejt hūidijaty jiiby tumb. 22 Dios yc̄otujcin, je jecyip, ym̄ina'ñ

co tüg'óciy huídijaty yajtungixyp co Dios ojadajtcixy, copicy yajhuádzipy miid ni'py. E pen ca' ajcxy teemy yocy ni'py, Dios ca' huinmecxa'ñ yí' ajcxy ypocy.

Co Cristo y'o'cy miid ajt nbocy ycixpi, yí' yajnicxy ajt nbocy

²³ Ooy jada anajty ycopicyity iyujc ñi'py huindzigi'ñ, jigix yhuádzip huídijaty tumb ma Dios ytijc ya naaxhuiñ, je huídibi iixpejt'ajtp anajty nej Dios y'it jii by tzajpjoty. Per je Dios y'it huídibi jii by tzajpjoty chojcpy jac'oybi huindzigi'ñ ca'ydi huídi ya naaxhuiñ. ²⁴ Com Cristo ca' je' ytigíy ma Dios ytijc huídibi jáy ajcxy ti cojy. Je tije huídibi jáy ajcxy ti cojy, je' je' ñigojtuutin je it lugar janch janchypi huídi jii by tzajpjoty. Cristo tigíy ma je Dios y'it ylugar jii by tzajpjoty, ma je' cham xycodinaayim ma Dios yhuinduu. ²⁵ Je judío migtungmídpi huídibi huingapxp ma Dios ytijc, huinjimíjity ytigíy ma je Dios ytijc co yecy ni'py huídibi ca' cí'mni'py'adyii. Cristo ca' yí' ñay'ahuaníyii y'ogípy canaag'oc, jéyi tügtecypajc ytigíy ma Dios y'it miid yci'mni'py. ²⁶ Co ixypy ca' yjadu'nity, canaag'oc Cristo ixypy patni chaachy'öcin maabi naaxhuiñybi chondagy. Per jadachambi ma xii tiempo ycixaani ytigoyaani, Cristo tügtecypajc ñayguéxici ya naaxhuiñ, jigix codináhuipy tüg'óciy jáy ma Dios miid ajcxy ypocy ycixpi. Jadu'n Cristo tuuñ jigix yajtigoyipy pocytuni. ²⁷ Dios ane'min pidac ya naaxhuiñ co nidüg nidüg jáy paadip yí' o'cin tügtecypajc. E Dios ti pidägy je xii je tiempo mina tiyduna'ñ nidüg nidüg jáy miid ypocy ycixpi. ²⁸ Je Cristo jotcuje tügtecypajc nayyejci ma je o'cin co yajpocyñhuaatztäy je mayjäy. Chi jada' ñayguéxiga'nyii je mimejtz'ocpi ya naaxhuiñ, e ca' nmīnaanīm co yajpocyñhuaatzaanip jadüg'oc je mayjäy, hue' je' nihua'namyb ycohua'namyb tüg'óciy pinjaty jipp'ixip cixyjot huinijot co je' miina'ñ miid yí' ajcxy ycixpi.

10

¹ Je Dios ycötujcin huídibi Moisés jayhuí'my jecy'ajty, hue' je' anajty ñidiy'ajt je oybi huídibi miinamb. Ca'p je' anajty yjéjity je oybi. Paady je cötujcin huídibi Moisés yjayhuí'm ca' je' jébi huádz yaj'ahuimbity pinjaty pocy ytumb, pinjaty mijhuäcp anajty ma Dios miid je iyujc huídibi ajcxy Dios yajhuindzigi'yb, huídibi ytun'ahuimbijtcixyp jimíjt jimíjt. ² Co ixypy je cötujcin y'ocmadägy huídibi Moisés yjayhuí'm yaj'ahuimbity ixypy huádz ajcxy je pocy ytumbi, ca' ixypy je jadu'mbi huindzigi'ñ y'ocyajtuuni jimíjt jimíjt. Com pin je jadu'mbi huindzigi'ñ yejcp, co ixypy je' ypocy yajnicxtäy, ca'p je' ma ñayjihuihuíybi ti bocy miidity jadüg'oc. ³ Co jadu'n yaj'öccixy je iyujc miid ypocy ycixpi, je' je' je' tiy'ajt co ajihuiygotigixy ypocy jimíjt jimíjt. ⁴ Com yí' huaj mang ñi'py etz yí' chivo ñi'py ca' mic'ajt miidity co pocyyajnicxtähuiybi nimina.

⁵ Paady co Cristo ymiiñ ya naaxhuiñ, chi nimay je Dios: Ca' miich ni ti huindzigi'ñ mdzojcnī ma ymiiñ iyujc'ögy, ti miich xyñi'ixi'yich tüg ninīcx.

⁶ Ca' m'ocjäygidaacni huindzigi'ñ iyujc huídibi yajno'cp. Ca' miich m'ocjäygidaacni co jáy xyajhuindzigi'y iyujc miid ypocy ycixpi.

⁷ Chi nmīna'ñich: “Dios, cha nmīñich jigix miich mdzojcin yajcuydunipy, jadu'n nej yjaybetyity ma miich mnecy miid ich ycixpi.”

⁸ Tim jayipp, Cristo ymina'ñ co Dios ca' octzojcnī, ni cajäygidägy je iyujc ögy huídibi yajhuindzigi'yip, ni je huídibi yajno'cp, jigix je pocyñicxtähuiybi, oy yí' yjajéjity huídibi ñigapxy yajtunipy ma je Dios ycötujcin huídibi Moisés yjayhuí'm. ⁹ Chi jada' jadüg'it yjaybetyity co Cristo jadu'n ymina'ñ: “Cha ich nmīñ, jigix miich mdzojcin yajcuydunipy, miich huídibi Dios'ajtp.” Hue' mīnaanīm, yajtigoy je cötujcin huídidi ane'mb co jáy ajcxy huindzigi'y iyujc miid ypocy ycixpi, etz mic'ajt mo' je jemybi cötujcin huídibi Jesucristo

xymooyim. ¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcin co ci'm ñinixc tügtecpajc yejcy ma yi o'cin mïd tüg'óciy jäy ypocy ycixpi.

¹¹ Tüg'óciy judío sacerdote huidibi tungmïd ma Dios ytijc jabom jabom jadu'n tun'ahuimbijtcixy tügpi huindzig'i'ñ, huidibi ni camina yajnicxtaayi jäy ajcxy ypocy. ¹² Yi Jesucristo tügtecpajc yi' yejcy ñinixc ma yi o'cin huinixi huinítiempo, chi jada' y'ixtacy a'oy'amy ma Dios ymijc ma ane'mdäy tüg'óciy. ¹³ Jiiby tzajpjoty Jesucristo cham y'ahuixy, ixti cooni Dios yi' ymidzip mimadactaayip, e jadu'n ajcxy nipaadipy nej jihuiy Jesucristo ytecpocxpejt. ¹⁴ Mïd tügpaic je huindzig'i'ñ huidibi Jesucristo yejc, tudägy yaj'ahuimbijttäy huinixi huinítiempo pinjaty ti ypocyhuäch. ¹⁵ Yi Espiritu Santo nidiy'ajtp ma ñich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymina'ñ:

¹⁶ Je huin'it xii je huin'it tiempo nyajmihu'i'maamybich je Israel jäy jemybi ayuc jemybi tiy'ajt. Nbidägibich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ymina'ñ:

Ni camina njäymedzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzig'i'ñ mïd pocyhuinmeecxin ycixpi.

Chojcpy nmihuingoonim yi Dios

¹⁹ Paady miich ajcxy migügtijc, jëbi ñich ajt ndigiiyim agujc jotujc ma Dios yajpaady mïd co Jesucristo ti temy ti yocy ñi'py mïd ñich ajt nbocy ycixpi. ²⁰ Cristo ti yaj'ahuäch je ñi'aa je tü'aa mïd ñich ajt ycixpi mïd yci'm ñinixc, je ñi'aa tü'aa jemybi oybi huidibi tigiiyb ma Dios y'it. E je' yñinixc jadu'n nipaady nej je huit huidibi anajty adujcp je Lugar Santísimo ma Dios ytijc ya naaxhuiñ, je huit huidibi cüchhuäcx co Cristo y'o'cy. ²¹ Jesucristo yi' je' je mijtungmïdpi huidibi xycodinaayim ma Dios ytijc jiiby tzajpjoty. ²² Paady ycixpi jëbi nmihuingoonim Dios mïd oyjot oyhuinma'ñ, etz mïd je mibijcin janchypi. Cristo ajt ti xyajhuaatzim njot nhuinma'ñ co ñi'py temy yojcy mïd ajt nbocy ycixpi jigix ca'ydí nayjihuiiyim pocymïd, jadu'n nej jihuiy ti ndziihuim mïd huädz ñi. ²³ Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tibi xyaj'ahuaniiyim. ²⁴ Tzoc nhuinma'ñypidaacim co njot'amijmooyim ajt nmigügtijc, jaydëbi naychojcin nayjihuiiyim miñ xyipy, e nduunim oyjäy'ajtin. ²⁵ Ca' n'ixmajtzim je nayyöymugii, jadu'n nej ajcxy nijëjity costumbre mïdity co ca' ajcxy yöy ma naymujctac. Niigi tzoc nayjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen ñich ajt jacpocytunim tzojcingixy ma anajty ti nejhuiiyim Dios ytiy'ajt, ca'p ji huingbi huindzig'i'ñ huidibi xyajpocyhuaatzim. ²⁷ Je' janchtiy njacjijp'ijxim mïd tzig'i'ñ jihui'ñ je tzaachypi co anajty Dios xtyidyunim, e xypidaacim mijjinjoty huidibi yajhuindigoydähuamb Dios ymidzip. ²⁸ Co pin cacuyduun Dios ycotujcin huidibi Moisés yjayhui'm, e jim metz o tugüg testigo co yjadu'nity, yajmoy je' y'o'cin ca' mïd'ajty ti pa'ayoohuin. ²⁹ ¿Nej miich ajcxy minaangixy? ¿Nej cay jac'öctiy je tzaachypi mihuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocyñhuaatzp, jadu'n nej je jemybi ayuc ymina'ñ huidibi Dios yajhui'm. Etz nañ jadu'n ajcxy ni'ojiiygixy Dios yEspiritu huidibi may'ajt oy'ajt tumb mïd je' ajcxy. ³⁰ Nejhuiiyim co je Huindzin Dios ymina'ñ: “ñich xypatp ndzaachytunipyich jäy ajcxy mïd ypocy ycixpi. ñich yi' nyajcomidohuiipy ajcxy ypocy.” Etz nañ jadu'n yjaybetyity ma Dios ñecy: “Yi Huindzin Dios yi' yjäy tiydunipy.” ³¹ ¡Ooy

chach mij y'ayo'nity pen je Dios juugypí xychaachytunim miid ajt nbocy ycixpi!

³² Per ajihuúyigixy miich ajcxy je xi je tiempo tibi ñaxy, je taabi miich anajty ajcxy ti xycidigíyigixy je tiy'ajt janchypí, ñipaty je' anajty nej tüg tücxin jain ajcxy miidity. Ti ooy mhuindinaaygixy mijiptinaaygixy tzaachypí ayo'n miid yi mmibijcin ycixpi. ³³ Nijëjity miich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n jacjadyii ti abaatcixy tzaachypí jadu'n nej je tibi ajcxy ooy yajtzaachytungixy. ³⁴ Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcuyc ajcxy ti myajtungixy mecxtujcin co ajcxy xypijci tijaty anajty ajcxy miid. Nejhuiyim co jii by tzajpjoty miich ajcxy miidity ti jaty jac'oybi huidibi huinixi huinitiem po ijtp. ³⁵ Jacmijpidaaccixy Dios, ca' mjetmetzciiygixy. Co mmijpidaaccixy Dios, huin'it ajcxy mbaadipy oybi may'amy ma Dios. ³⁶ Chojcxy co miich ajcxy myajtungixy mecxtujcin co mguydunaangixy nej Dios tzocy, e Dios xyajcidigíyigixy hudibi yi' ti ahuaníy. ³⁷ Jaybety jadu'n ma Dios ñecy ma jadu'n yminañ:

Tzojc, janch tzojc ymiina'ñ je huidibi tzonamb tzajpjoty, e ca'p je' jecyñity.

³⁸ Jadu'n Dios ymina'ñ:

Pinjaty ich ti ngöbicy co ytudägyjäyity, tzinahuip je' miid ymibijcin. E pen ixtigihua'cp ma ymibijcin, ca' jadu'n njotcuyc'adipyich miid je'.

³⁹ Ca'p ich ajt njëjity hudibi ixtigihua'cp ma nmibijcin, e ytigoy y'alma, je' ich ajt pin mibijcp, e jadu'n n'alma paadipy nidzoocin.

11

Yi mibijcin

¹ Jotcuyc najjihuúyim jadu'n co hudibi nmibijcin janch yi', oy co ca' n'ijxim. Je hudibi nmibijcin je' xymooyim jotcuyc'ajtin miid hudibi njip'ijxim ma Dios. Je hudibi nmibijcin nejhuúyim co janch janch jadu'n, oy ca' n'ijxim.

² Com miid co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³ Miid ajt nmibijcin ycixpi nejhuúyim co Dios oyduñ tüg'óciy hudibi jii'ajtp miid y'ayucti'ajty, jigix hudibi cham n'ijxim je' yi' yaj'oyiy hudibi ca' yaj'ixy.

⁴ Miid co Abel mibijcy Dios, paady Abel ymoy Dios huindzigí'ñ jac'oybi ca'ydi Caín, e Dios cöbijci Abel yhuindzigí'ñ, e miid je' ycixpi Abel ooy ycomaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuúy yjacmiydägyñi chambaad. Com miid je mibijcin hudibi anajty ymiid yejc ijxpejt ma ich ajt.

⁵ Miid co Enoc mibijcy Dios paady yajnicxi jadügpí tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'ñ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayin."

⁶ Pen ca' nmid'ajtim mibijcin ni jadu'ñyi, ca' Dios jäygidägy ajt ndzinaayin. Com co nmihuingonaanim Dios, hue' tzocy co nmibijcin co Dios yjijity, e co yaj'ahuimbipy oybi miid pin mibijcp.

⁷ Miid co Noé mibijcy Dios, paady Dios ñimaayi jayijp co ytuna'ñyii yjada'ñyii mijnigom hudibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñigomdzögipy. Miid co anajty Noé miidity mibijcin, paady yajpocycäy je naaxhuiñjyäj ajcxy ca'pi ymibicy. Chi Dios cöbijcy Noé jadu'n nej tudägyjäy miid co mibijci Dios y'ayuc.

⁸ Miid co Abraham anajty Dios mibicy, paady Dios yhuin'ijxi e ycapxymidouhui. Chi je' chooñ ma ñaax ycajpin ñicxy ma je it lugar

huidibi Dios anajty möhuaanip co je'adüyb. Choñ, ni ca' anajty nejhuüy ma ñicxy. ⁹ Mïd co Abraham mibijcy Dios, paady chinaydaciycy nej tüg huingjäy ma je naax huidibi Dios yaj'ahuanüyi, huidibi ca' yjëjity. Chinay ma huittijc, nañ jadu'n ajcxy y'idüich Isaac etz Jacob huidibi ajcxy nañ jadu'n Dios yaj'ahuanüyi je naax. ¹⁰ Abraham je' anajty y'ahuijxyp mina jëbi chinaydaciycy ma Dios y'it ylugar huidibi jadu'n nipatp nej tüg cajp huidibi müd y'ijx ta'tzpiicy y'oyduñity, je huidibi Dios ñihuinmayüy, je huidibi Dios yajcojy yaj'oyüyb.

¹¹ Sara hue' anajty pumäy, ti anajty ymijäyüyñi, ti ñajxni tiempo mina jëbi y'ung'ixy. Per müd co mibijcy Dios y'ayuc huidibi ti ñimaayü co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tübi ahuanüy. ¹² Müd tügpi jäy, je Abraham, ti choondacy tügpiicy y'amigügtijc huidibi oy ti ymayüy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'óciy je jäy ajcxy huidibi ya yajnimiydaccp, öctay ajcxy ni ycacidigiüyi je tzinaydac huidibi anajty Dios ti yaj'ahuanüyü. Müd co ajcxy mibijcy Dios, paady nejhuüy ajcxy co jacjiini Dios ymöhuüyb je huidibi ti yaj'ahuanüyü. Com ymibijc ajcxy Dios, paady jotcuyc ñayjihüyü co Dios möhua'ñyü jacjiini huidibi ti yaj'ahuanüyü. Yminañ ajcxy co anajty y'adzinaaygixy ya naaxhuñ. ¹⁴ Pinjaty jadu'n minamb co adzinaaybi ajcxy yajpaady, hue' yajhuimbizimy co chinaydac yjugy'ajttac ajcxy y'ixtaayb. ¹⁵ Co ixypy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy ñigi anajty nijot'ajtcixy it lugar jac'oybi, je' je' je' tzajpjoty. Müd jada ycixpi Dios ca' y' cho'yduñ co ñaydijyü Dios ma je' ajcxy. Com ti ñixüyü ajcxy chinaydac jüby tzajpjoty.

¹⁷ Abraham mibijcy Dios, e co Dios Abraham y'ijxmajtzi, chi yajmiiñ Isaac co anajty yajhuindzigihua'ñ Dios. E janch cixyjot je y'ung tügpaic anajty yecy, je y'ung huidibi Dios ti yaj'ahuanüyü anajty. ¹⁸ Dios ñimay Abraham co müd Isaac müd'ada'ñ may y'ap y'oc. ¹⁹ Abraham yhuinmaayb anajty ooy co Dios tügpaic cötujcmüdip yajjugypigipy öcpi. Paady jëbi ñich ajt nmïnaanïm co Abraham ycidigiüyi jadüg'oc y'ung co anajty ti yjugypicy co anajty ti y'ögy.

²⁰ Isaac mibijcy Dios, paady Isaac Dios mibijctzoy müd Jacob etz Esau ycixpi co huen ajcxy oybi paadip ma je tiempo huidibi mim cidacni. ²¹ Jacob ymibijcy anajty Dios, paady co anajty y'ögaani, chi ahuanüy conuucxin ma nidüg nidüg José y'ung y'anäg. E jadu'n Dios ooy huindzigüy ojadaoty yam ñaygodajc'adyü müd ytajc co anajty ooy ti ymijäyüyñi. ²² José co anajty Dios mibicy ma anajty y'ögaani, yminañ co Israel jäy ajcxy anajty ypidzimaangixy comjeyc jim Egipto, chi yajhu'my t'y'ajt nej ypajc ytunüyb co anajty choñ ajcxy jim Egipto.

²³ Müd co anajty ajcxy mibicy Dios, paady co Moisés yma'xung'ajty, chi ytaj yteedy yützi tugüg po'. Com co ajcxy ijxy co anajty ooy y'oyity je ma'xung, ca' ajcxy anajty tzigüy je rey y'ane'min co anajty yaj'öctähua'ñ tüg'óciy ungmä'xung yëydijcpi. ²⁴ Müd co Moisés mibijcy Dios, paady co oy ymij'anäccojni, ca' tzojcy co ñaydijüyb co rey ñix y'ung'adüb. ²⁵ Hue' janchty Moisés ñigi nijot'ajty co ayo'n tzaachypü minaxipy yajnaxipy quipxy müd Dios yjäy, ca'ydi co nixondägipy je jugy'ajtin ma je rey ytijc huidibi Dios ca' jäygidägy. ²⁶ Moisés ñigi ñayjihüyü jotcuyc co tzaachypü ayo'n anajty minaxy yajnaxy müd Cristo ycixpi, ca'ydi co müd'ajttähüpy jugy'ajt comeeñ'ajt jim

Egipto. Com Moisés ti anajty yhuinma'ñypidägy co Dios yega'ñ je oybi. ²⁷ Mïid co Moisés mibicy anajty Dios paady choñ jim Egipto, ni catzigiy co anajty rey yjotmädy, jadu'n y'ijty tudägy nej jihuïy ixty je Dios ca'pi yaj'ixy.

²⁸ Mïid co mibicy Dios paady Moisés tuuñ je pascuaxii, chi ni'ane'mdïy co huen tijc'aguu tüg tüg yajni'pyïy, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹ Mïid co ajcxy mibicy Dios paady je israelitas ajcxy yajnaxty je tzaptz meyy jadu'n nej jihuïy ñajxcixy huindïztuuy, e co ajcxy je Egipto jäy nañ jadu'n yjanaxañ, cijx ajcxy ñii'o'ctäy.

³⁰ Mïid co ajcxy mibicy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtujc xii. ³¹ Mïid co Rahab, je töxyjäy jibic tzinaaybi, mibicy Dios, paady ca' y'o'cy quipxyi mïid je huidibi anajty ca' capxymidoogixy Dios. Com co je' yajjättacy ma ytijcin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcïyögyixy yajtecyögyixy Canaán naaxjot.

³² ¿Ti njacmïydägibich? Nyajtigoy'idaamybich tiempo co nimïydägibich Gedeón, Barac, Sansón, Jefe, David, Samuel, e jacjadyii Dios y'ayucnajtzcaxïybi. ³³⁻³⁴ Mïid co ajcxy mibicy Dios, paady ymïmadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuanïyigixy. Yaj'adujc ajcxy caa y'ahuac, yajxeem ajcxy jin huïdi anajty ooy ymïjity, tzooc ajcxy co anajty yaj'ögaangixy mïid espada. Pinjaty anajty pumäyip ypaat je' ajcxy ymic'ajt ymïjaa, mij je' ajcxy ooy y'ijtcixni ma chiptungixy, e ymïmadactay ajcxy maymidzip.

³⁵ Jim anajty töxyjäy yjätigixy huidibi ajcxy cidigïy y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxïybi ooy ñixiici yajxiici, yajcï'ajty, etz tzumy mach ypujxtijc'ïñäy. ³⁷ Jadyii Dios y'ayucnajtzcaxïybi y'o'cy ajcxy tzaagögäch, jadyii yaj'ajidïy ajcxy janch tim cup y'ijxmajtzi ajcxy, jadyii yaj'o'ci mïid espada. Ymiñ xyijpy xii yaa yhuïdijtcixy ymïd ajcxy ñinïcx yüch mïid cöbixy'ac etz mïid chivo'ac, ayooob jäy ajcxy, jotmay mïid, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcaxïybi ajcxy ni je naaxhuiñjäy anajty camihuaadity. Mïid ymidzip pahuidijtcixy, paady yhuïdijtcixy anajty titznaaxtuum etz yuugjoty, chinaaygixy naaxpa'tci'py etz majaty ang. ³⁹ Nidüg'óciy je' ajcxy oy cömay ajcxy yjanaxty mïid co mibicy ajcxy Dios, ca' ajcxy paty tiibi anajty Dios y'ahuanïy. ⁴⁰ Com Dios jac'oybi je' anajty yegamyb mïid ñich ajt, paady ca' ajcxy paty je oybi tiibi Dios y'ahuanïy. Ti anajty Dios nihuinmayïy co yajca'pxaani yi' ajcxy ytudägy'ajtin quipxyi mïid ñich ajt co Cristo y'o'cy mïid ñich ajt nbocy ycixpi.

12

Tzoc ñich ajt nhuinma'ñybidaacim ma Jesús

¹ Com nmïid'ajtim canaag ijxpejt nej jäy jecy'ajty mibicy Dios, paady ñich ajt jadu'n nipaady nej jihuïy huïnduy jajïxcï'py nmïid'ajtim jäy huidibi ti yajniguëxigty ymibijcin. Paady ycixp tzoc ahuing pidaacim je huïdijaty xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydidgooyim, e tzoc naymic'ijxim cuydunim yi tiy'ajt mïid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquixigixy. ² Tzoc nhuinma'ñybidaacim ma Jesús. Jim ijxpejt nbaatim ma Jesús nej jëbi nmibijcim Dios. Jesús yi' je' ti xyajnejhuïyim Dios ytiy'ajt.

Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuuyb anajty co jadu'n y'oc'ayoohuipy, chi ypaadipy jotcuyc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ijxpejt, nej pocyjäydijc chaachytuungixy etz ñi'ojiiygixy, etz ca' y'ixaani, paady ca' mdzljpcigixy ni mgamijotmetzciiygixy. ⁴ Ca'ni miich ajcxy ayo'n tzaachypi myajnaxy mabaad ni'py ajcxy mxiiibidyii jadu'n nej Cristo yjajty. ⁵ ¿Nej ti miich ajcxy mjäydidgooygixy je capxhuijin huidibi Dios ti xymooygixy nej jihuiy yci'm'ung? Jadu'n ymĩna'ñ ma Dios ñecy:

Miich n'ungich, ca' mbidägy nej jihuiy ca' ytim ytiiity je tzaachypi huidibi Dios miid xycapxhuijy, ni ca' mjotmetzciihuipy co xyaj'ójipy.

⁶ Dios ycapxhuijpy yi' pinjaty chojcpy yjihuiyb. Dios chaachytumby yi' ajcxy co ytundigooy, pinjaty yi' ti cöbicy nej jihuiy yci'm'ung.

⁷ Mimadaaccix miich ajcxy je castigo, com Dios jadu'n yi' xymiidity ajcxy nej jihuiy yci'm'ung. ¿Nej ji jada' tüg ung, e ca' yteedy chaachytunuyb co ytundigooy? ⁸ Pen ca' miich ajcxy Dios ti tzaachypi xymooygixy, jadu'n nej yi' moy castigo tüg'óciy y'ungdijc y'anäctijc, ca' miich ixypiy ajcxy Dios xy'ung'adyii tiydudägy. Jadu'n miich ajcxy m'idipy nej tüg pi'canäg huidibi yteedy ca' y'ixa'ñyii. ⁹ Jadüg nax, taabi anajty ajt nbi'cnity, ich ajt ndeedy ya naaxhuiñ xy'iihuijim xycapxhuijim anajty, e xychaachytuunim co ca' ngapxymidoohuim nhuindzigiiyim ajcxy. ¿Nej co ca' huaad n'ijtim ane'my ma ajt ndeedy huidibi tzajpjoty yajpatp? E jadu'n jëbi nbaatim je jugy'ajtin huidibi ca' ycixipy ytigoyipy nimina. ¹⁰ Ich ajt ndeedy ya naaxhuiñ xy'iihuijim xycapxhuijim anajty miid jada conbi jugy'ajt ycixpi, jadu'n nej je' anajty ajcxy oy'ixy. Nañ jadu'n Dios ich ajt xychaachytuunim miid ajt n'oy'ajt ycixpi etz jigix nmiid'ajtim huädz jot huädz huinma'ñ nej Dios ymiiidity huädz yjot huädz yhuinma'ñ. ¹¹ Oy yjanchity co ca' ti tzaachypi ndzojcm ma yam nbaatim je tzaachypi, com ooy ndzachjihuiyim je tzaachypi, e ca' jotcuyc nayjihuiyim. Per pinjaty ixpijcp Dios chojcin miid je tzaachypi ycixpi, chi je' yhuimbizimiiygixy tüg jugy'ajtin tädägy etz jotcuycpi.

Je huidibi ayo'ngojp co Dios y'ayuc ngacöbiganim

¹² Paady miich ajcxy jotmicpijccix ma mmibijcin, jadu'n nipaadip nej jihuiy myajpidiccixy mgi' tiibi y'anucxiiyñi, etz mgoxcohuajc mic'ajt paady huidibi anajty ca' mic'ajt miidity. ¹³ Ixtaaygix ñi'aa tü'aa tiybi ma mdzinaayin, jadu'n nipaadip nej jihuiy yi' mdecy huidibi mädiip ti chögy, e camina jadüg'oc yhuiidip.

¹⁴ Tzinaaygix miid oyjot oyhuinma'ñ miid nidüg'óciy jäy. Ca' mdungixipy ti tzip. Miid'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. ¹⁵ Ooy cuenditungixp co ni pin cajijpyöydüdiipy je pubejtin huidibi Dios ti ahuanñy, jigix nañ jadu'n ni pin ycayajpaadipy janch mät yjot yhuinmañ, e yajhuindigoydäy yajmättäy jacjadyii ymügütijc, tim jadu'n nej tüg ujtz ta'mbi ypa'mduñ. ¹⁶ Ni tüg miich ajcxy ca' huaad ti ayuc miid'aty miid huingbi töxyjäy huidibi ca' miich mdöxyijc'adyii. Ca' nañ jadu'n m'ixtijipy je ayuc huidibi Dios yajhui'my miid miich ajcxy ycixpi, jadu'n nej y'idich Esaú. Miid tüg caayin uucin Esaú toocnax je huidibi anajty möhuaanip yteedy co y'unggoobity. ¹⁷ Miich ajcxy mnejhuuyb co Esaú tocy huidi anajty paatip co japada'ñ je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'ñ nej yjothuimbidip miid je' ycixpi tiibi anajty tuñ.

¹⁸ Ca' miich ajcxy ti mjayty ti m'ixy, nej jecy'ajty yi israelitas ajcxy yjayty etz y'ixy co ajcxy mihuingoñ je cop Sinaí ma anajty Dios ti pidägy mij jñn, ma anajty ooy yhuudzucy yjidity etz mijpoj mijtigoy ñaxy, ma anajty ooy y'agoodziy anaxy. ¹⁹ Ni mgamidoy ajcxy je trompeta ni je Dios y'ayuc huídibi anajty ajcxy je' migapxi. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigiiygixy. ²⁰ Je' je' anajty ycixpi co anajty ca' mimadägaangixy je ane'min cötujcin huídibi anajty minamb: "Pin anajty ytecy pidacp ma yi cop, hue' yi' y'oyyaj'o'cnity cögäch mäd tzaa o mäd quipyjipxu'ñ, oy ixypy y'iyujcity." ²¹ Oy chigiiyñi huídibi anajty yaj'ixp, Moisés ci'm minaan: "Tziyuuybich yam mäd tzig'i'ñ."

²² Per miich ajcxy jadu'n nipaady nej jihuiy ti mmihuingoongixy yi cop huídibi yxi Sión etz je Dios juugypí ycajp. Je' je' je Jerusalén tzajpjoty ma canaag mil je ángeles ajcxy yöymujccixy. ²³ Ti miich ajcxy mmihuingoongixy ma ti yöymujccixy je jaccómaaybi jäy huídibi ajcxy yxi cojaay ma Dios ñecy jiiyby tzajpjoty, je huídibi ajcxy huin'ib huingapxtacp Dios. Ti miich ajcxy mihuingoongixy Dios je huídibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjäydijc y'espíritu huídibi Dios ti yaj'ahuimbijttäy tudägy. ²⁴ Miich ajcxy ti mihuingoñ yi Jesús, yi huídibi xycodinaayim ma Dios mäd je jemybi cötujcin huídibi Dios yajhui'my mäd ich ajt ycixpi. Yi Jesús huídibi mic'ajtmoy je Dios y'ayuc jemybi, co ñi'py teemy yojcy mäd ajt nbocy ycixpi. Yi Jesús co ci'm ñi'py teemy yojcy mäd jäy ajcxy ypocy ycixpi, nigí oy yi' ca'ydí co Abel iyujc ñi'py teemy yojcy mäd ypocy ycixpi.

²⁵ Paady ycixp ooy cuenditungix miich ajcxy, ca'ydí yaj'ixtijy Dios, je pin ti xyajmihui'mim jemybi y'ayuc. Je jäy ajcxy huídibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctíy ich ajt ca' ndzoocim, pen nmooyim ajt njix je Dios, je pin y'ayuc xyajmihui'mim huídí tzoon tzajpjoty.

²⁶ Co Dios y'ayuc yejcy jecy'ajty, chi yajtzuyuuy ooy naax. Jadachambi Dios ymina'ñ: "Jadügtecypajc nyajtzuyuya'ñich je naax, e ca' nminaanim naaxti'ajty, nañ jadu'n nyajtzuyuya'ñich je tzajp." ²⁷ Co jadu'n Dios ymina'ñ: "Jadügtecypajc nyajtzuyuya'ñich je naax." Hue' yajhuinjihuiy co ytigoydähuipy huídijaty yücxp huídibi Dios yaj'oyiy, e je' huimip je huídijaty ca' yu'cxy. ²⁸ Paady je Jesucristo ycötujcin huídibi Dios xyajmihui'mim, ca' yi' huaad ytigoy. Tzoc yajnaxim Dioscojuyip mäd Jesús y'ayuc ycixpi, e nyajmij'ajtim n'ojadajtim Dios mäd tudägy'ajt etz mäd huindzigi'ñ nej je' jäygidägyin. ²⁹ Ich ajt nDios jadu'n yi' nej tüg jñn huídibi nöctayb tüg'óciy.

13

Nej jëbi nyajjäygi daacim Dios

¹ Miich ajcxy huídibi mibijcp Jesucristo, ca' mjäydi gooygixy co ajcxy mnaychójcigixipy miñ xyipy nej jihuiy ajcxy mdügquëxyity. ² Ca' ajcxy mjäydigóoygixipy co oyjäy'ajtin mdúngixipy mäd pinjaty ajcxy xycojädiyb. Mäd co oyjäy'ajtin ajcxy tuuñ, chi nijëjity ajcxy yajjättacy ángeles ajcxy, ni ca' ajcxy huinjihuiy co ángeles anajty ti yajjättaaccixy.

³ Mjäymedzip ajcxy pinjaty tzumy'iñaayb mach'iñaayb jadu'n nej jihuiy miich ajcxy nañ jadu'n mdzumy'iñaaygixy mmach'iñaaygixy quipxy mäd je' ajcxy. Jäy medzip miich ajcxy pinjaty tzaachypí ayo'n minajxp yajnaxp, com nañ jadu'n miich ajcxy mädity je ninicx huídibi jëbi y'ayoy.

⁴ Huen nidüg'óciy jäy huindzigiygixy yajmij'ajtcixy je pijcin casada'ajtin. Huen je yëydijc etz je ytöxyijc naymüdtzináaygixy yajxon, com Dios yi' tzaachytunipy pinjaty tundigooyb mäd huingbi töxyjäy.

⁵ Ca' m'adzojccixy meen. Mijotcuyc'ajtcixy ti ajcxy ii m'ad. Dios ti je' ym'ina'n: "Cam'ina xii ñch miich ajcxy n'ixmadzi'py, ni ñch miich ajcxy ngajäy digoy'py."

⁶ Jadu'n jëbi nm'inaanim agujc jotcuyc: "Yi Huindzin Dios yi' xypubejtpich, ca' ndzig'ihua'n'ich jäy nej xyjatuna'n'ich."

⁷ Jäymejtzcix miich ajcxy je pinjaty ti xyñigohuajc'ajtcixy, je pinjaty ti xyajm'idmiydaaccixy Dios y'ayuc ytiy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy m'idity ymibijcin.

⁸ Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'n huinixii huinitiempo, ca' yi' yajtigadzip yi yhuinma'n ni m'ina.

⁹ Ca' miich ajcxy myajhuin'ingixy m'id canaag ixpijcin huidibi ca' ytügnaxity m'id Jesucristo ytiy'ajt. Nigi oy co ajt nbidaacim nhuinma'n ma je Dios y'ayuc, nej yi' xychojcim xyjihuiyim, nej yi' may'ajt tuñ m'id ñch ajt. Ca' mbidaacim mhuinma'n ma je cötujcin huidibi adujcp nijëjity caayin uucin. Ni ti jotcuyc'ajt ajcxy capaty pinjaty panixp yi' jadu'mbi cötujcin.

¹⁰ Je judío tungm'idpi huidibi huindzigi'n tumb anajty ma Dios yhuittijc je jecy'ip, ca' yi' jëbi yjactuuni ma ñch ajt nmibijcin jadu'n nej Jesucristo tuñ huindzigi'n m'id ñch ajt ycixpi. ¹¹ Je judío m'it tungm'idpi ma Dios ytiyc ypidac iyujc ñi'py ma je Lugar Santísimo nej tüg huindzigi'n huidibi yajpocyñihuaatzp je mayjäy. Je iyujc ögy ñin'cx jiguem je' yajnögy, ca' jiibyity cajpjoty ma je Dios anajty huindzigi'yigixy. ¹² Tim jadu'n nej je judío sacerdote yajnögy je huindzigi'n iyujc ñin'cx cajp n'naxy, nañ tim jadu'n Jesús paty tzaachy'o'cin cajp n'naxy jigix m'id je' yci'mni'py pocyñihüadzip je mayjäy.

¹³ Tzoc m'ipidaacim je Jesús tiibi y'ögy cajp n'naxy m'id ñch ajt nbocy ycixpi. Tzoc minajxim yajnaxim je canayyajmij'adi je canay'ixa'nii, tim jadu'n nej Jesús minajx yajnax je canayyajmij'adi je canay'ixa'nii. ¹⁴ Ya naaxhuiñ ca' ya ajt nm'idity tüg ciudad ma jëbi n'ijtim huinixii huinitiempo, je' ñch ajt njijp'ijxim je tzinaayin huidibi miimb cidaacp. ¹⁵ Paady ycixp chojcpy co Dios n'ojadajtim nmibijctzoohuim jabom jabom huinixii m'id Jesucristo yxi. Co jadu'n n'ojadajtim nmibijctzoohuim Dios jadu'n nipaady nej tüg huindzigi'n nmooyim. Tzoc ii m'ibijctzoohuim, tzoc ojadajtim m'id ajt ngi'm'ahuac ngi'm'ayuc. ¹⁶ Ca' mjäy digóoygixipy co oybi mdúngixipy etz naybubéjtigix naybudig'iyigix miñ xyipy. Co jadu'n mdúngixipy jadu'n nipaady nej tüg huindzigi'n ti myejccixy ma Dios huidibi yi' ooy jäygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi' m'alma. Nejhuuyim co c'iyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb m'id yi' ajcxy, jotcuyc ajcxy ñayjihuihuuyb. Pen jibic miich ajcxy mduñ m'id yi' ajcxy, tajp mayip ajcxy. E pen yi' ajcxy tajp maayb, chi miich ajcxy ca' ni ti jotcuyc'ajt mm'id'adipy.

¹⁸ Mibijctzoogix Dios m'id ñch ycixpi etz je pinjaty xym'idhuidijtpich. Jatytim naymic'ixibich tudägy nduun'ich ma tüg'ócixy ñch ndung, paady ycixp jotcuyc nayjihuiyijich. ¹⁹ May'ajt nbijctzooybich ma miich ajcxy co Dios mmibijctzoogix m'id ñch ycixpi, jigix Dios a'ixihui'py co n'icxibich tzojc ma miich ajcxy.

Oy'ajt etz capxpoocxin huidibi cogixiyñip je necy

²⁰ Dios nmibijctzooybich m'id miich ajcxy ycixpi. Je Dios huidibi yajjugypijc jadüg'oc ñch ajt nHuindzin Jesucristo co y'o'cy, je huidibi cuend'ajtp je maymibijcpidijc. Co Jesucristo ñi'py teemy vojcy, chi mic'ajt moy je jemybi cötujcin huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg

cöbixy cuend'ajtpi huiðibi cuend'ajtp may ngöbixy. ²¹ Je Dios huiðibi xya-jjotcuyc'ajtm je' huen xyaj'ahuimbijtcixy huädz etz oyjäy ma tüg'óciy ajcxy mmibijcin etz ma tüg'óciy ajcxy mdzinaayin, jigix ajcxy mdunipy nej yi' tzocy. Dios huen tuñ ma ñich ajt njot nhuinma'ñ mñid Cristo ymic'ajt nej yi' tzocy. ¡Huen Cristo y'idipy mij cömay huiñixi huiñitiempo! Amén. Jadu'n jada.

²² Nmigügtijc, nbijctzooybich may'ajt yajtungixy mecxtujcin ma jada ayuc capxhuijn. Ti ajcxy ii con nijayñygixy. ²³ Nejhuñygix miich ajcxy co ajt nmigüg Timoteo y'ity ahuätztuum. Pen tzojc yjädy ya ma nyajpaadyich, chi yi' xymñidñicxibich co ñich anajty miich ajcxy nicxy n'ijxcixy.

²⁴ Nguejxpyich ngapxpooxñin ma nidüg'óciy pñin ajcxy xyñigohuajc'ajtp etz je migügtijc ajcxy huiðibi mibijccixyp. Je migügtijc huiðibi ajcxy yajpatp ya Italia yquejxyp ajcxy capxpooxñin ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO Yi Neczy Huidi Santiago Yajniguejx Je Judío Mibijcpidijc

¹ Hich Santiago, ndzojcingíx hich nduñ ma Dios etz je Huindzin Jesucristo ytung. Cham jada necy nyajniguexyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajp cajp mïd co yqueecpidzimy ajcxy Judea naaxjot co ymidzip ajcxy chach'ixhuuididyii chachpahuuididyii ajcxy.

Je tïy'ajt huudib tzoon ma Dios

² Migügtijc ajcxy co yi mmidzip ajcxy xychach'ijxmadzaangixy nej miich ajcxy mjot mhuinma'ñ mïdity, co yi' ajcxy xy'ixhuuidijtcixy xypahuuidijtcixy, co xyñigapxcixy xyñi'ojiiygixy, co xyajhuinma'ñydygoyaangixy, ca' mdajipy mmayipy ajcxy, jotcuyc ajcxy mnayjihuihuiyb. ³ Miich ajcxy mnejhuiygixyp co jadu'n mmimecxtujccixyp je tzaachypi ayo'n huudibi mminajxcixyp myajnajxcixyp mïd co ti mmijpidaaccixy Jesucristo, huin'it mbáatcixipy mic'ajt, jigix jëbi mimadactaygixy tüg'óciy jibic-huinma'ñ. ⁴ Copicy miich ajcxy mimadactáaygixipy tüg'óciy jibic-huinma'ñ, ca' ma mdundigóoygixipy, e huin'it huadz mjot mhuinma'ñ mmid'adipy ajcxy, ca' ti myajtigoy y'idipy ajcxy.

⁵ Pen nidüg miich ajcxy myajmayjaty oyhuinma'ñ, co jäy ajcxy xychach'ijxmadzaani mjot mhuinma'ñ nej mïdity, mibijctzou Dios huen xymöy je oyhuinma'ñ, com yejcpy yi' oyhuinma'ñ mïd tüg'óciy jäy co pijctzoy. Ca' yi' cohuindugyii, ca' huaad xy'ojim co nbijctzoohuim oyhuinma'ñ. ⁶ Copicy pijctzohui Dios huijy'ajt cujc'ajt cixyot huinijot, ca' y'ametz yjotmetzity. Pinjaty ametz jotmetz Dios mibijctzoob, ca' tú'ciy mïdity yjot yhuinma'ñ, janam jatzojc yajtigach yhuinma'ñ jadu'n nej je mejy co ypidigy y'ixtägy mïd je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'ñ ajcxy mïdity, ca' tügijp yhuinma'ñ pidaaccixy ma Dios.

⁹ Yi ayoobitijc huudibi mijpidaaccixyp Dios, ooy jäygidägaangixy co Dios ypubediiyb ypudigihuiyb. ¹⁰ Yi comeñyjäy ajcxy huudibi mijpidaacp Dios, ooy jotcuyc ajcxy ñayjihuihua'nyii co ajcxy ymeeñ ytictähuiipy jadu'nyii. Com yi' ajcxy ymeeñ tigoyamb yi' jadu'n nej tüg pijy co ñiicxni mïd xi an. ¹¹ Co xi ypejtni, chi ooy y'andaacni mic, e chi je jünboj ypidzimy, chi je pijyquipy ytich, chi yhuingädaayñi je pijy, e jadu'nyii ytigoydäy je pijy oy'ajtin. Jadu'n nej yjaty yi pijy, ñan tim jadu'n yjada'ñ comeñydijc ajcxy, jadu'nyii ñitigoyaangixy yjugy'ajtin.

Co yjot yhuinma'ñ chach'ijxmadza'nyii

¹² Jotcuyc pinjaty mimecxtujctaayb jadu'n nej ajcxy yjot yhuinma'ñ chach'ijxmadza'nyii. Co jadu'n mimecxtujctáaygixipy, Dios möhuib ajcxy jugy'ajtin huinixibi, huudibi yajhuinhuaniiy tüg'óciy jäy ajcxy huudijaty Dios tzojcp yajmij'ajtp. ¹³ Co pin nijot'aty co tuna'ñ ti jibicpi, ca' ymina'nipy co Dios anajty jadu'n yajtundigoyaani. Dios ca' ti jibicpi tuñ mïd jäy ajcxy. E nañ ni pin ca' huaad ijxmach Dios nej yjot yhuinma'ñ ymïdity. ¹⁴ Ci'm ajcxy jadu'n ñaydunyii, co tzachnijot'ajtcixy canaagnax jibic-huinma'ñ. ¹⁵ Co jäy ajcxy nijot'ajtcixy jibic-huinma'ñ, pocy anajty ytungixy. Ti ajcxy anajty ooy ypocyñibejtni co nicxy y'ó'ccixni.

¹⁶ Migügtijc ajcxy, huídibi ooy ndzocy njihuïyich, ca' mnayhuin'ínigixy. ¹⁷ Ich ajt nDios Teedy huídibi tzajpjoty tzinaayb, yi' huídibi yajcojtaay xii madza' huídibi jajp tixcp, yi' je' yejctaayb tüg'ociy tijaty oybi, tüg'óciy yhuinma'ñ huídibi ich ajt nmíid'ajtim. Dios ca' yi' yjot yhuinma'ñ yajtigach jadu'n nej yi xii madza' yjajin ytíicxin ytigach. ¹⁸ Dios y'oydumyb huinjemy ich ajt njot nhuinma'ñ míid yi' y'ayuc ytiy'ajt, jigix jébi ich ajt nmi'ijtim oyjot oyhuinma'ñ. Yi jáy ajcxy huídibi yajmij'ajtcixp Jesucristo, Dios nigí tzocy ajcxy ca' jac ti huídibi oyduñ.

Je tiy'ajt tiydudäcypí

¹⁹ Migügtijc huídibi ich ooy ndzocy njihuïyich, mnejhuïhuipy miich ajcxy jada co ooy ycopicyity mmíido'mbíctähuipy ajcxy Dios y'ayuc ytiy'ajt, ca' mjäydgóoygixipy, ca' mgapxmayiygixipy, pen mjotmätcotp ajcxy ca' anajty mguydungixy Dios ytiy'ajt. ²⁰ Je jáy huídibi jotma'tp, ca' je' tuñ huídibi Dios yjäygdacyp. ²¹ Ixmajtzaaygix yi jibic ayuc, ca' mnijot'ajtcixy yi jibic-huinma'ñ. Cöbiccix míid oyjot oyhuinma'ñ yi Dios y'ayuc ytiy'ajt, yi huídibi Dios ti yajnicödugiy, huin'it jébi ajcxy m'alma nídzoocin paady.

²²⁻²⁴ Cuydungix ajcxy Dios y'ayuc ytiy'ajt, ca' ajcxy mjotcuje'adipy míid yi'yi co m'amído'ijtcixy, hue' anajty nigoo mnayhuin'ínigixy. Peni nigooob Dios y'ayuc m'amído'ijtcixy, e ca' mmíjpidaaccixy ca' mguydungixy, naadigi' anajty m'amído'ijtcixy. Jadu'n miich ajcxy nipaady nej pin yhuinñyijp aa'ijxnajxp ma tügi ixx. Co ñay'aa'ijxnajxtäyíi, chi yjihuägy, e mic'amy jäydgoydäy nej yhuinñyijp ti ixy. Naadigi' anajty ti ñay'aa'ijxnaaxyíi. ²⁵ Pen miich ajcxy yajxon m'ixpijcy Dios ytiy'ajt, je tiy'ajt huídibi yaj'oyíhuip ajcxy mjot mhuinma'ñ, pen mmíjpidaaccixyp, pen mguydungixyp Dios y'ayuc, e ca' mjäydgóoygixy, chi jada' Dios xyconuucxip ajcxy míid jégixpi huídibi anajty mguydungixyp.

²⁶ Pen ji pin ñayjihuíyíi co cuyduni Dios ytiy'ajt, e ca' ñay'ahuijtzigíyíi, ci'm anajty ñayhuin'íñyíi, tundigooyb anajty, e ca' yjanchity co míjpidaaci Dios ytiy'ajt. ²⁷ Pen miich ajcxy huädz míjpidaaccixy Dios etz mguydungixy yi' ytiy'ajt jadu'n nej jébi Dios jäygdägy, hue' tzocy co mbubéjtcixipy mba'ayóogixipy co'ögy'ungdijc, etz co'ögy ytöxyjäydijc ma ayo'n jotmay ajcxy patcixy. E ca' huaad jibic-huinma'ñ mjactungixy, jadu'n nej jadyíi naax-huínjyá y'idíitcixy, huídi ca' míjpidaaccixy Dios.

2

Ca' huin'ijxpety migüg myajmij'ájtciixipy

¹ Migügtijc ajcxy, co m'ojadajtcixy co mmíjncxpejtcixy ich ajt nHuindzin Jesucristo, yi huídibi tzajpjoty ane'm, ca' ajcxy huin'ijxpety migügtijc myajmij'ajtcixipy. ² Pen jim jáy ytiyíy ma mnayyöymújciyixy comeñybi míid oori cijiit, etz míid yhuít yxojx janch oybi, etz pen nañ tigíyib tüg jáy ayoob huídibi yhuít ytucxy cíitz tuc nübüdy ixpüdy. ³ Chi miich ajcxy je' jac nigí myajmij'ada'ñ je comeñybi huídibi oyxoxy, e chi mnímähua'ñ: “Íña' miich ya ma jada oybi íñaaybejt.” E je ayoob jáy mnímähuaangixy: “Íña' naaxcíy o jim jadu'n tina'.” ⁴ Co jadu'n m'idítzip ajcxy, ca'p anajty jadu'n ytiy'ajty. Mdundigooygixy anajty ma Dios ytiy'ajt co huin'ijxpety ajcxy migüg mdzogipy. Hue' anajty myajtungixyp jibic-huinma'ñ co jadu'n m'ixtíjciixipy jáy huídibi ayoob.

⁵ Migügtijc ajcxy, Dios ti huin'ixy yi ayoobitijc, jébi ajcxy míjpídagy Dios etz jébi ajcxy paadipy it lugar ma Dios y'it tzajpjoty. Jadu'n Dios yajhuinhuaniy pinjaty tzojcp jihuíyip co it lugar möhua'ñ jüby tzajpjoty. ⁶ Myajtzo'yduungixyp miich ajcxy ayoobitijc. ¿Nej cayí comeñyjáy ajcxy

huidibi miich ajcxy xychachxip ma cötujctac, e xyajnicxcixy ma tungmüdpi yhuinduu, oy ajcxy mdzocy mgatzocy? ⁷ ¿Nej ca yjējity ajcxy huidibi jibic nigapxp ni'oj#yb Jesucristo, je oyjäy huidibi miich ajcxy myajmij'ajtcixyp?

⁸ Pen janch miich ajcxy mguydungixy je tiy'ajt huidibi jaybety ma Dios ylibro: “Mdzogipy mjihuïhuipy mmigügtijc hueñytimypinity, jadu'n nej miich ajcxy ci'm mnaychogyii mnayjihuiyii.” Pen jadu'n anajty mdungixy, tüg anajty oybi mdungixyp. ⁹ Pen hui'n'ixpety ajcxy anajty jäy myajmij'ajtcixy jadu'n nej yhuit yxoxy ajcxy müdity, mdundigooygixp, e ti anajty mnayya-jpocycähuigixy ma Dios ytiy'ajt. ¹⁰ Pen tüg jäy cuydundaayi Dios ycötujcin, co nicxy tüg cacuyduñ, jadu'n nipaady nej jihuiy anajty janch ni tüg cötujcin ti cacuyduñ. ¹¹ Je Dios je cötujcin ti pidägy co ca' huaad mmigapxtigooyipy töxyjäydijc, etz nañ ti cötujcin pidägy co ca' huaad njäyyaj'o'cim. Pen mmigapxtigooyb töxyjäydijc, oy ca' ti mjäyyaj'ögy, ti anajty mdundigooy mij ma Dios ytiy'ajt. ¹² Capxcix miydaccix, tungix nej jēbi huaad jäygidägy #ch ajt nHuindzin Jesucristo nej je' cuyduñ yi' ytiy'ajt. ¹³ Ca' ti pa'ayoohuin paadipy ma Dios, pin ca' tuñ ti pa'ayoohuin ma ymigügtijc. Pin pa'ayoohuin tumb ma ymigügtijc, je' capxpaady y'idip co anajty Dios tiyduñ yi' yjäy.

Je mibijcpi etz je oyjäy'ajtin

¹⁴ Migügtijc ajcxy, ni ti m'alma capada'ñ pen miich mmänaamb co myajmij'ajtyp Dios, e pen ca' myajniguëxigy ni ma co oybi mduñ. Ca' Dios yajnidzöga'ñ yi' m'alma müd co nigooob mmäna'ñ co Dios mmijpidägy, e ca' mguyduni yi' ytiy'ajt. ¹⁵⁻¹⁶ Pen miich ajcxy müd tüg migüg yēydijcpi o töxyjäybı huidibi yajmayajtp yhuit ytucxy caayin uucin, e chi nigoo miich ajcxy mnimähuipy: “Nicx agujc jotcujc, Dios xypubedipy xypudigihuipy, ca' mdich'ögipy ca' myuu'ögipy.” E miich ca' anajty ti ti mmöy huidijaty yajmayajtpy. ¿Ti oyjäy'ajtin anajty ti mduñ? ¹⁷ Pen miich minamb co myajmij'ajtyp Dios, e ca' oyjäy'ajtin mduñ müd mmigügtijc, ytimyñipaty jadu'n nej ixipy ca' mmibicy yi' Dios ytiy'ajt.

¹⁸ Ca' yjegyity co tüg jäy xyñimähuibich jadu'n: “Miich mdzachmijpidacpy yi' Dios ytiy'ajt, e #ch ndumybich oybi.” #ch n'adzohuipyich yi' jadu'mbi jäy co ca' jadu'n ytiy'ajtiny nej miich mäna'ñ. Pen ca' miich mmijpidägy Dios y'ayuc, ca' mjadipy nej mdunipy oybi jadu'n nej Dios huaad jäygidägy. Co #ch oybi nduñ, jadu'n ñigüexigy co nmijpidägyich Dios. ¹⁹ Miich mmibijcpi co Dios ji tügpajc, e oy jadu'n co mmibicy. Nañ jadu'n yi' ca'oybi ajcxy mibijcp etz chigiyb ajcxy Dios. ²⁰ Loci miich, ca' mhuiñjihuihua'ñ je tiy'ajt. Co pinjaty mibicy Dios, e ca' yajniguëxigy co oybi tuñ, ca' tiydudägy mibicy Dios. ²¹ Je Abraham yejc tüg iixpejt nej jēbi huaad ngapxymidoohuin Dios co jecy'ajty je' ymang Isaac cıyejcy nej tüg huindzigi'ñ ma Dios. ²² Je Abraham ymibijc co Dios yjijity etz nañ ycapxymidou nej Dios ñimaayi. Paady nejhuuyim co yjanchity co Abraham mijpidacy je' Dios müd co cuyduñ jadu'n nej Dios ñimaayi. ²³ E jadu'n oy cuydundäy nej yjaybetyity ma Dios ñecy: “Yi' Abraham ymijpidac Dios, paady Dios ymecxtaayi ypocy, e ycöbijci jadu'n nej jihuiy ca' anajty ytundigoy.” Paady ycixpi Abraham oyñaydiyii: “Co Dios minaymigüg'adyii.”

²⁴ Cham nejhuuyigix co Dios ycöbijcpi jäy huidibi cuydungixp yi' ytiy'ajt, e ca' nmänaanim müd jēy co ymibijccixy. ²⁵ Tim jadu'n nej Abraham yjajty, nañ tim jadu'n yjajty müd je töxyjäy hui'di anajty yxi Rahab, huidibi anajty ooy ti ytundigoy müd mayyēydijc. Je Rahab ycoyüdz ma ytijc nimetz jäy huidibi anajty Israel jäy yaj'ijx'ijtyp, e chi yajqueegiy ma huingbi tü'aa, e jadu'n ajcxy yajtzoocy ma ymidzip. Müd co jadu'n oyjäy'ajtin tuñ müd je Israel jäy, chi Rahab oy paady je nidzoocin ma Dios. ²⁶ Je ninicx huidibi ca' alma müdity,

ca' ni ti mic'ajt miidity. Nañ tim jadu'n pinjaty mibijcp co Dios yjiijity, e ca' cuyduñ Dios ytiy'ajt, yi' ymibijcin ca' Dios cuendipicy.

3

Co pinjaty nigapxy ni'ojy ymigüg

¹ Migügtijc ajcxy, huinmaygix yajxon pen janch mnajtztzogiygixy co ajcxy mnihuindzin'adaangixy Dios y'ayuc. Com ich ajt huidibi nyaj'ixpijcin Dios y'ayuc, pen tundigooyim nigü mij nyajtiydunaanim. ² Nidüg'ócüy ich ajt ndundigooyim minajity. Pen ji pin ca' y'idigooy ycapxtigooy, yi' tiydudägy anajty yjyä'aty, jëbi ñaygüend'adyii yajxon, e ca' huaad y'ocjactundigooyñi. ³ Ypidacpy jäy freno ma cohuay y'ahuac jigix jëbi ane'my je cohuay nej tzocy. Nañ jadu'n tzocy co jäy ajcxy huen y'ahuac ahuijtzocy jadu'n nej jäy cohuay ane'my miid freno. ⁴ Nañ jadu'n yi' barco oy mabaad ooy yjamijity, per ooy poj ytijminyii ytijxybyii. Je barco yaj'ane'm yajxon miid tüg pi'c pujx yindi'cni huidib xijip timón. Yajxon ytüyöy je barco ma je' timdzocy je huidibi ane'mip. ⁵ Nañ jadu'n yjaty miid yi' tootz, janch tim yindi'cni yi', per ooy mij cajee tuñ jibicpi, jëbi y'idigooy ycapxtigooy mij cajee. M'ijxyp miich ajcxy nej tim yindi'cni jin mij ooy nögy quipychaa miy'ujtz. ⁶ Yi' jäy ajcxy y'ahuac nañ tim jadu'n nej pi'c jin, miid nhuin n'ahuac mijcajee n'idigooyim ngapxtigooyim. Co jadu'n n'idigooyim ngapxtigooyim, chi jëbi mijcajee midundigooyim mayjäy. Co n'idigooyim ngapxtigooyim, etz nayyapocycähüim, chi ñiguëxigy canaagnax jibic-huinma'ñ huidibi nmid'ajtim. Jada jibic-huinma'ñ jim yi' nbaatim ma je mujcu' huidibi tzinaayb ma yi' inferno. ⁷ Yi' naaxhuiñyjäy ti mimadaaccixy yi' iyujc animal huidibi queegicp queec-huidijtp, naag iyujc ahua'nbi, etz iyujc nijotyp. Ti ooy yajmaxiygixy yajxon iyujc huindzicyp etz ahua'nbi. ⁸ Yi' naaxhuiñyjäy oy ti mimadaaccixy yi' iyujc animal, per nitüg ycaca'ty pin yajxon y'ahuac ahuijtzigipy, ac'idigooygixp capxtigooygixp ajcxy. Pin ymigüg nigapxy ni'ojyib, huin'it je ymigüg ooy jibic ñayjihühua'ñyii, jadu'n nej jihuy veneno ti möy ymigüg. ⁹ Miid jada' nhuin n'ahuac ajt ngapxpaatim ich ajt nHuindzin Jesucristo etz ich ajt nDios Teedy. Nañ jadu'n miid nhuin n'ahuac nigapx ni'ojyim nmigügtijc. Dios ti yajcojy yi' jäy miid oyjot oyhuinma'ñ jadu'n nej yi' oyjot oyhuinma'ñ miidity, paady ca' y'oyity co n'idigooyim ngapxtigooyim. ¹⁰ Miid nhuin n'ahuac ajt miid ngapxim oybi ayuc etz jibic ayuc. Miid nhuin n'ahuac yi' miid ngapxpaatim etz ni'ojyim nmigügtijc. Ca' jadu'n y'oyity co jadu'n n'aditizim. ¹¹ ¿Nej jëbi jada' ma tüg nigop ypidzimy ni' päcpi etz ni' ta'mbi? ¹² Migügtijc ajcxy, ¿nej jëbi jada' yi' higeri ytim'aty aceituna etz yi' muuxy'aadz ytim'aty higos? Nañ tim jadu'n ma ni' ymuxy tamtzpi, ca' jim ypidzimy ni' päcpi. Paady ycixp ca' y'oyity co jäy ajcxy capxcixy oybi etz jibicpi.

Je tiy'ajt janchyp

¹³ Pen miich ajcxy huijycujc mnayjihuyi, pen oyhuinma'ñ ajcxy mmid, yajtungix m'oyhuinma'ñ ma mdzinaayin mjogy'ajtin. Ca' huaad ci'm ñaygömáayigixy. Miid je oyjäy'ajtin huidibi ajcxy mdumyb huen jäy ci'm nejhuyigixy co oyhuinma'ñ miich ajcxy miid'ajtcixyp. ¹⁴ Pen ta'm mjot mhuinma'ñ mjihuyigixy, pen mga'oy'ijxcixyp ymigügtijc, pen mhuinnaxtugaangixyp ymigügtijc, pen jadu'n mjihuyigixy mhuinmaaygixy, huin'it ca' huaad mnaygömáayigixy ci'm co mdzachcuydungixy Dios ytiy'ajt, com ca' yjanchity, nigoo m'anidaaccixy. ¹⁵ Jada jibic-huinma'ñ ca' jada chooñ ma Dios huidibi tzinaayb tzajpjoty. Ya naaxhuiñ jada jibic-huinma'ñ yajpaady, miid co jäy tzachnijot'ajtcixy jibic-huinma'ñ. Yi' mujcu' yejcpy jada jibic huinma'ñ,

e ca' nminanim co Dios yecy jada jibic-huinma'ñ. ¹⁶ Paady ycixp co jäy ajcxy ycanay'ixa'ñyii, co huinnaxaangixy ymigüg, chi ca' oy y'ijtcixy, oy ajcxy ñaymidundigóoyigixy mijcajee. ¹⁷ Je huijy'ajt cujc'ajt huidibi Dios yejcp, ooy yi'. Yi Dios huidi tzinaayb tzajpjoty oyhuinma'ñ ymüid. Pen nyajtuunim je tiy'ajt huidibi Dios ti xymooyim, chi jotcuje ndzinaayim, ca' ma tzip capxy, etz nmimecxtujcim nmigügtijc, etz yung naxy jot huinma'ñ nmüid'ajtim, etz nba'ayoohuim nmigügtijc, etz nduunim oyjäy'ajtin, etz tudägy nhuinma'ñ nmüid'ajtim. E ca' nigoo naybidaacim jadu'n nej jihuüy nmijpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcpy, chi jotcuje ndzinaayim müid tudägy njot nhuinma'ñ, jadu'n nej jëb Dios jäygidägy.

4

Co pinjaty nijot'ajtcixy mayñax tzinaayin

¹ ¿Ma'amy ajcxy mdijy choon je tzip capx huidibi yajpatp ma miich ajcxy? Tüg'óciy yi' jadu'mbi jibicpi yajpatp ma ajcxy mjot mhuinma'ñ, paady ycixp mganay'ayuc-huinjihuiyigixy, e tzipcapxy myajcojciy myaj'abadiyigixy. ² Ooy miich ajcxy tijaty mjatzojccixy, e ni ti mgapaatcixy, e huin'it mjäyyaj'öccixy. Ooy m'adzojccixy tijaty migüg yjë'ajtyp, paady ycixpi mdzip-tungixy, etz mganay'ixáanigixy. Ca' ti jotcuje'ajtin mbaatcixy, com ca' ajcxy mbijctzoogixy ma Dios. ³ Co mjamibijctzoogixy Dios, chi ca' ti mbaatcixy, müid co mbijctzoogixy müid jibic-huinma'ñ. Mbijctzoogixyp co myajtunaangixy ma ca' ypadyii. ⁴ Mdundigooyb ajcxy. ¿Nej ca' mnejhuüyigixy co Dios ca' jäygidägy pen mdzachnijot'ajtyp ajcxy yi' mayñax tzinaayin? Pinjaty nijot'ajtcixyp yi' mayñaxpi tzinaayin, jadu'n yi' ajcxy nej yi' jacjadyii jäy ya naaxhuin huidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵ Nej miich ajcxy mdijy, naadigi' ymiñ jaybety ma Dios yñecy: “Je Espíritu Santo huidibi Dios ti xy'adigüyim ti xyjottigüyim ooy xychojcm xyjihuiyim mijcajee.” ⁶ Dios ninigoobi may'ajt oy'ajt tuun müid ich ajt ycixpi, paady ycixpi ymina'ñ ma Dios ñecy co ca' yi' oy'ixy pinjaty amij agix nayjihuiyip. Dios yejcpy may'ajt oy'ajt ma yi' jäy ajcxy huidibi yung naxy jot huinma'ñ müidity. ⁷ Naybidáacigix cixyjot huinijot ma yi' Dios. Mic mihuindinaaygix yi' mujcu', e jihuägipy yi' ma miich ajcxy. ⁸ Ojadajtcix Dios müid oyjot oy-huinma'ñ, e Dios xypubedipy xypudigihuipy ajcxy. Miich ajcxy pocyjäydijc, ixmajtzcix yi' jibic-huinma'ñ. Yajhuaatzcix yi' mjot yi' mhuinma'ñ miich ajcxy huidibi ametz jotmetz mibijcp. ⁹ Tajcix maygix, amutzciyigix. Huen yi' mxiiicm yi' mxondaacin ahuimbity jüy in yaaxin. E yi' mjotcuje'ajtin huen ahuimbity tajii mayii. ¹⁰ Pidaccix yung naxy yi' mjot yi' mhuinma'ñ ma yi' mHuindzin Dios, e yi' may'ajt oy'ajt tunipy müid miich ajcxy ycixpi.

Ca' huaad nigapxcixy ni'ojüygixy ymigügtijc

¹¹ Migügtijc ajcxy, ca' mnayñigápxigixy mnayñi'ojüygixy miñ xyipy. Pen mnigapxyp mni'ojüyib mmigügtijc, hue' mniixiicpy myajxiicpy Dios ytiy'ajt huidibi minaamb co myajmij'adipy yi' mmigüg jadu'n nej mnayyajmij'adyii ci'm. Pen mniixigamyb myajxigamyb Dios ytiy'ajt, ca' anajty mguyduñ yi' tiy'ajt, e jadu'n yhuimbizimyb nej ixipy miich mina'ñ co Dios ytiy'ajt ca' yi' y'oyity. ¹² Dios tügpajc huidibi ane'min pidägy, e yi' je' tügpajc huidibi tiydunamb pocyjäy. Yi Dios tügpajc huidibi yajtzögip o yajtigoyip jäy ajcxy y'alma. Paady ycixpi miich ajcxy ca' ypadyii nicxy migüg mnigapxcixy mni'ojüygixy.

Dios tügpajc nejhuüy nej je jabombi mimb cidacp

¹³ Tungix cuendi ich n'ayuc miich ajcxy huídibi minamb: “Cham o jabom nnicxim ma yijimbi naax cajp, e jim nyajnajxim jimijt agujc jotcujc, jim negocio nduunim, ooy mijcajee nbaatim.” ¹⁴ E miich ajcxy ni mganejhuuygixy ti je' anajty je jabombi mimb cidacp. Je jugy'ajtin ni pin ca' nejhuuy nej pin chinähua'ñ yjugy'ada'ñ. Jadu'n miich ajcxy mjogy'ajtin nej joc co y'ocquëxigy cham, e tim tögjaxigy ti ñitigooyñi. ¹⁵ Jac'oy ajcxy mmina'nip: “Pen Dios jadu'n tzojp, pen xymooyim jugy'ajtin, jëbi cham o jabom nduunim tijaty.” ¹⁶ Miich ajcxy ci'm mdzachyajnihuinmaaygixy ti mdunamyb, ci'm mdzachnaygömayyii ajcxy. Ca' jadu'n y'oyity co ci'm mnaygömayyigixy; co ci'm mnaybidáacigixy amij agix, ni Dios mgamibjccixy. ¹⁷ Pin janejhuuyb je oybi, e ca' tuñ, pocytumb anajty.

5

Je comeñjyäjy yjugy'ajtin nitigoyam

¹ Comeñydijc, oc'amidoo'ijtcix nej cham mmina'ñich. Amutzciygyix, tajcix maygix co xyñiminaangixy ayo'n. ² Miich ajcxy mmeñ etz ajcxy mjogy'ajt ñitigoyamb yi', miich ajcxy mhuit mducxy ti uucxyting yjicxtäyii. ³ Miich ajcxy m'oori, ajcxy mplata, ajcxy mmeñ naadigi' ti myujpijccixy ti m'amay'ajtcixy. Ti ixypy myajtungixy müd oyjäy'ajtin. Co ti myujpijccixy ti m'amay'ajtcixy ji jadu'n je tiy'ajt co mdundigooygixy ma Dios. Müd co yi mmeñ ca' ti myajtungixy müd oyjäy'ajtin, paady ycixpi ayo'n mbadaangixy müd je xii tiempo huídibi mimb cidacp, mina Dios tiydunaangixy pocyjäydijc. Nitigoyamb miich ajcxy m'oy'ajtin. ⁴ Mdundigooygixyp co ca' ca'pxy ti mmujuuygixy mdumbidijc huídibi ti myajtungixy ma ajcxy mgamdu'. Yi mdumbidijc cham ooy miich ajcxy xiy ma Dios. Yi Dios, je Huindzin mijpi, huídi ane'mdaayb tüc'óciy jii by tzajpjoty etz ya naaxhuiñ, yi' ñejhuuydaayb nej miich mdumbi ajcxy ymínaangixy. ⁵ Ti miich ajcxy agujc jotcujc mdzinaaygixy ya naaxhuiñ müd mayñax xondaacin. Ti miich ajcxy mgüxyii mbedyii, ti ajcxy mjotcujc'ajtcixy. Cham m'ahuijxcixyp yi tzaachypí yi ayo'n huídibi ajcxy mbadamyb ma Dios, jadu'n nej huaj nixpi ahuixy co jäy ajcxy chüdzá'ñyii. ⁶ Miich ajcxy comeñjyäydijc ti miich ajcxy mxigixy mnihuambejtcixy, mdzaachtungixy ti myaj'öccixy jäy ajcxy tudägypi, e ca' yi' ajcxy xymihuimbijty.

Je mecxtujcin etz je capxtägü

⁷ Migügtijc ajcxy, yajtungixy mij yi mecxtujcin mabaad anajty je Huindzin Jesús ymiñ jadügtecy ya naaxhuiñ. Tim jadu'n nipaady nej naymidumbidijc ahuijxcixy je tibi nidunggygixy, ahuijxcixy müd mecxtujcin je oga'n tuu etz je poj tuu huídi müd je' ypidägy yhuindihuipy. ⁸ Müd'ajtcix nañ jadu'n ooy mecxtujcin, etz ca' mjotmetzcgygixy, com huingomb je tiempo mina ymiina'ñ je Huindzin Jesús ya naaxhuiñ jadügtecy. ⁹ Migügtijc ajcxy, ca' jadüg jadüg mnayñigápxigixy nayñi'ojgygixy. Pen jadu'n mdungixy Dios miich ajcxy xyajpocycáhuipy, com tim huingonip je xii je tiempo mina Dios tiyduna'ñ jäy ajcxy müd ypocy ycixpi. ¹⁰ Migügtijc ajcxy, pijccix je iixpejt jadu'n nej tzaachypí minajxy yajnajxy je profetas ajcxy huídibi ajcxy ihuácxp capxhuácxp je Huindzin Dios y'ayuc. ¹¹ Minaanim jadu'n, müd co ajcxy ooy mímecxtucy nej jäy jibic ytuuñ müd yi' ajcxy, e chi jotcujc cham yajpaady ma Dios. Ti jada' mjatymidoogixy je ayuc nej Job ayo'n tzaachypí minajxy yajnajxy, e ymímecxtujc je'. Müd co ooy anajty mijpidägy Dios, paady Dios pa'ayoy Job, e conuucx mijcajee.

¹² Migügtijc ajcxy, co tijaty ayuc m'adzohuimbidity, tıydudägy ajcxy m'adzohuıpy: “Janch jadu'n o ca' yjadu'nıty”, ca' ajcxy m'ındägıpy. Ca' Dios nigoo m'ıbaadıpy mgapxpaadıpy. Ni ca' m'ıbaadıpy mgapxpaadıpy yı naaxhuiñybı o tijaty ya naaxhuiñ. Huin'ıt ca' mnayyajpocycähıyb ma Dios.

¹³ Pen ji pın ma miich ajcxy ti ayo'n mıdıty, huen mıbijctzoogıxy Dios mıd yı jäy ycıxpi huidıbı ayo'n mıd. Pen miich ajcxy jotcuyc nayjıhuıyıp, huen huin'ıgıxy Dios. ¹⁴ Pen ji pın nidügtı ypıgyıı ma miich ajcxy, huoomııngıx yı' huidıbı ajcxy nigohuajc'ajtp yı mıbijcpıdıjc, jıgıx ajcxy mıbijctzoohuıpy Dios mıd je pa'mjäy ycıxpi, etz pıdägıpy hueeni aceite ma je jäy ycohuajc etz capxpaadıpy yı Huındzın Jesús yxıı. ¹⁵ Mıd co miich ajcxy mmıjıpıdaaccıxy e mıbijctzoogıxy Dios, paady ycıxpi tzögıpy yı pa'mjäy. Chi je Huındzın Dios yejcnıp mıc'ajtı oy'ajtı, etz ymecxtaayıpy yı' ypocy huidıbı anajty tı tuñ. ¹⁶ Capxpıdzım yı mbocy nidüg nidüg. Ñayñıbijctzoohuıyıgıx nidüg nidüg ma Dios, jıgıx ajcxy mdzögıpy. Pen tüg tudägypı jäy ymıbijctzooyb yı Dios cıxyjot huınıjot, madägıpy yı' mıd y'oracıón. ¹⁷ Elıas nañ tım jadu'n anajty yjothuınma'ñ mıdıty nej ıch ajtı. Janch cıxyjot huınıjot mıbijctzooy Dios ca'jıty ytüy, e ca' je' jadu'n ytuuy tugıg jımıjt ja tudujc po'. ¹⁸ Chi jadüg'oc Elıas mıbijctzoy Dios co huen tüy, chi Dios yajtuuy, e chi ya naaxhuiñ yhuındıy je jäy ajcxy ypıdägy.

¹⁹⁻²⁰ Migügtijc ajcxy, pen ji miich ajcxy nidüg ñıdıgoy ytüdıgoy ma yı Dios ytıy'ajtı, e huin'ıt tüg quëxıgıpy pın ymıgüg yajhuimbidity ma Dios ytıy'ajtı, nejhuıygıx miich ajcxy co pın huıdı yajhuımbıjtp ymıgüg ma Dios ytıy'ajtı, huıdıbı tı ñıdıgooy tı ytüdıgooy, tı je' anajty tüg alma yajtzögy ma yı o'cın, e tı anajty yajpocyıñhuaatztäy.

1 PEDRO

Yi Necy Huidibi San Pedro Yajniguejx Je Judio Mibijcpidijc

¹ Hich Pedro, Jesucristo ti xyajniñbicyich ngapxhuäcxibich yi' y'ayuc. Jada necy nyajniguejxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy migügtijc Dios Teedy ti xyhuin'ijxcixy, jayijp Dios ti nejhuüy co xyjäy'ada'ñyii ajcxy. Dios ti yajtigiyiy yi' yjihui'ñ ymic'ajt ma miich ajcxy mjot mhuiñma'ñ, huen oyjot oyhuinma'ñ myaj-tunipy ajcxy jadu'n nej Dios huinma'ñ xymooygixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuj miid miich ajcxy ycixpi. Pidaaccix mhuiñma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajniñidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcuyc mdzináaygixipy.

Jijp'ijxcix jugy'ajtin huinixibi

³ Yi Dios, hich ajt nHuindzin Jesucristo yTeedy, huen capxpaady y'ity, miid co may'ajt oy'ajt ti tuñ miid hich ajt co ti oyduñ huinjemybi hich ajt njot nhuiñma'ñ, jëbi n'ijtim Dios yjäy. Jadachambi ooy njijp'ijxim je jugy'ajtin huinixibi, miid co Jesús yjugypijcy huinjemy ma anajty ti y'ögy. ⁴ Nañ ooy njijp'ijxim tijaty Dios xymöhuaanim jii by tzajpjoty, huidibi ca' yhuindigoy, huidibi ca' yjibicüy, etz huidibi ca' ycixy ytigoy. ⁵ Dios xycuend'adip ajcxy miid yi' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuiñ ycixy ytigoy. Mbadaangixy m'alma nidzoocin miid co ti mmijpidaaccixy Dios ytiy'ajt.

⁶ Paady miich ajcxy ooy jotcuyc'ajtcixp. Oy cham tzaachypi m'ocminajxcixy m'ocyajnajxcixy miid co jäy tzach'ijxmadza'ñ miich ajcxy mjot mhuiñma'ñ. Nigi ooy jotcuyc nayjihuiyigixy co ajcxy yi' m'alma nidzoocin pada'ñ. ⁷ Dios y'ixamyb ñejhuñhuamyb pen janch miich ajcxy cixyjt huinijot mmijpidaaccixy yi' y'ayuc. Paady miich ajcxy ayo'n tzaachypi mminajxcixy myajnajxcixy jëbi nigi myajhuaatzcixy mjot mhuiñma'ñ, tim jadu'n nej jäy yajhuaatzcixy yi' oori miid jin. Dios nigi tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuiñma'ñ, pen ca' mhuiñma'ñytigajtcixy co tzaachypi mminajxcixy myajnajxcixy, chi capxpaady ajcxy m'idipy etz mbaadipy ajcxy jotcuyc'ajtin co anajty Jesús ñayguëxigyii jadügtecy ya naaxhuiñybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtip ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuiyii nigi jotcuyc anaxy. Je jotcuyc'ajtin huidib miid Dios je' yejcp. ⁹ Paady ycixpi ti mmijpidaaccixy Jesucristo co ajcxy m'alma xyajnidzögaani.

¹⁰ Jadu'n nej Jesucristo xyajnidzögaani miich ajcxy m'alma je Dios y'ayuc najtzcapxiiybi ooy anajty jecy'ajty janejhuñhuaangixy nej Dios y'ayuc ñiguejy, e ca' ajcxy huinjihuüy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ miid miich ajcxy ycixpi.

¹¹ Je Dios y'ayucnajtzcapxiiybi jecy'ajty ooy ajcxy jahuinmay, ooy ajcxy

jahuinjihuñhuaañ nej yhuimbídzimy je ayuc huídibí ajcxy ymíid jotjoty huinma'ñjoty, je ayuc huídibí Jesucristo yajmiguejx yí' yjihuí'ñ ymic'ajt, je Espíritu Santo, jadu'n nej ajcxy najtzcaxíy co je Cristo tzaachypí minaxa'ñ yajnaxa'ñ, etz co ñicxa'ñ jadüg'oc tzajpjoty. ¹² Dios yajnejhuíy yí' y'ayucnajtzcaxíybi co je' huídibí ajcxy ycapxhuäcx jini je' ytuna'ñyí yjada'ñyí, ca' ajcxy íxa'ñ. Migügtíjc ajcxy, Dios tí yajtuunyí tí yajjadyí ma miich ajcxy je mxí mdiempo nej anajty je' y'ayucnajtzcaxíybi najtzcaxíy jecy'ajty je tíy'ajt. E jadachambí jadu'n nej Dios tí yajtuñyí tí yajjadyí tí jäy capxhuäcxtäy ma ích ajt nidüg'ócíy. Je jäy huídibí capxhuäcx je tíy'ajt ymíid anajty ajcxy je Dios yjihuí'ñ ymic'ajt huídibí Dios anajty yajniguejxip, chooñ tzajpjoty. Ixtí je ángeles huídibí ajcxy tzajpjoty tzinaayb yjanejhuíhua'ñ nañ jadu'n nej Dios tí yajtuñyí tí yajjadyí ma miich ajcxy, e ní ca' ajcxy nejhuíy.

Chojcpy Dios co tudägy ndzinaayim

¹³ Paady ycíxp ní'ixí pídaaccíx mjot mhuinma'ñ. Huijy ycujc ajcxy mdzinähuij. Jíjp'íjxcíx je may'ajtin oy'ajtin huídibí Dios tunamyb míid miich ajcxy ycíxpi co anajty Jesucristo yhuimbity ya naaxhuiñ. ¹⁴ Capxymidoogíx Dios jadu'n nej pí'c'anäg capxymidoogíxy ytaj yteedy. Ca' huaad m'octundígóoygíxni jadu'n nej anajty mdundígooygíxy co anajty ca'ni mnejhuíygyxí Dios ytíy'ajt. ¹⁵ Oyjot oyhuinma'ñ ajcxy myajtunípy jadu'n nej Dios oyjot oyhuinma'ñ yajtuñ, je huídibí tí xyhuin'íxy ajcxy. ¹⁶ Com jadu'n ymííñ jaybety ma Dios ñecy, jadu'n Dios migapxy je' yjäy: “Mí'idíp ajcxy oyjot oyhuinma'ñ jadu'n nej ích nmí'ityích oyjot oyhuinma'ñ.”

¹⁷ Miich ajcxy m'ojadajtpy je Dios Teedy. Dios ca'p tzaachytuna'ñ yí jäy ajcxy huin'ixpety. Hue' je' chaachytunípy ajcxy nidüg nidüg jadu'n nej ajcxy yhuinma'ñymíidity, pen jibíic-huinma'ñ ymíid, chí tzaachytunípy nígi. Paady ycíxp tíydudägy ajcxy mdzinähuijpy. Tzigíygyxí Dios. ¹⁸ Je Dios canan hue' tí xyajpocyñíhuaatzím co tí cojuy ích ajt nbocy míid oorí o plata, jadu'n nej anajty nbocytuuním co nmíj'pídaacím n'ap ndeedy y'ayuc ytíy'ajt huídibí ca' ytíy'ajtity. ¹⁹ Hue' janchtíy Dios tí xyajpocyñíhuaatzím míid Cristo co y'o'cy cruudzcíxy, e chí ñí'py teemy yojcy míid ích ajt nbocy ycíxpi. Jadu'n nej anajty Israel jäy ñayajpocyñíhuaatzígíxy co yaj'ögy tüg boregí ung, huídibí ca' anajty tí jibíicpi míidity, e chí ñí'py teemí cují. ²⁰ Jadu'n nej Cristo y'o'cy míid ích ajt nbocy ycíxpi, Dios jayíj'pni jadu'n yajnihuinmayíy co jadu'n tuna'ñ, ca'ni anajty naaxhuiñybi chondägy. Jecy'ajty ca'ni anajty pín nejhuíy, e jadachambí Dios ajt tí xyajnejhuíyím. ²¹ Paady ycíxp miich ajcxy míj'pídägy Dios. Dios yajjugypíjc huinjemy je Cristo co y'o'cy, e Cristo cómay ooy y'pídzimy jíiby tzajpjoty. Yajmíj'ajtcíx Dios etz jíjp'íjxcíx co Dios xyajnídzögaaníp ajcxy m'alma.

²² Tí myajhuaatzcíxy mjot mhuinma'ñ co tí mmíj'pídaaccíxy Dios ytíy'ajt. Naychójcígíx nayjihuíyígyxí nidüg nidüg cíxyjot huiníjot, ca' y'ametz yjot-metzity. ²³ Com tí Dios oyduñ miich ajcxy mjot mhuinma'ñ huinjemybí míid yí' y'ayuc ytíy'ajt, co tí mmíj'pídaaccíxy je tíy'ajt huídibí tudägyip, je huídibí ca' ycíxy ytígoy, huídibí huiníxí íjtp, je tíy'ajt huídibí jugy'ajt yejcpy. ²⁴ Jadu'n ymííñ jaybety ma Dios y'ayuc:

Je jäy ninícx nidígooyb yí' etz je ninícx y'oy'ajtin nidígooyb yí'. Tím jadu'n nej tüg píjy co ñidecy ytíitzní, chí je píjy jadu'ñyí yca'ni, e chí jadu'ñyí je píjy y'oy'ajtin ytígooy.

²⁵ Dios y'ayuc ytíy'ajt huiníxí y'ity, ca' ycíxy ytígooy nímina.

Jada je ayuc je tíy'ajt huídibí Dios yjäy ycapxhuäcxyp ma miich ajcxy.

2

¹ Paady ycixp copicy co m'ixmájtzcixipy yi jibic-huinma'n nej migüg ajcxy jibic mnigapxcixy. Ca' m'anidáaccixipy. Ca' ajcxy mnaybidägiiyb jadu'n nej jihuüy ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'idigoyipy mgapxtigoyipy. ² Jadu'n nej yi ma'xungdijc tzocy chidz, nañ tim jadu'n miich ajcxy tzojccixy jot'ajtcixy Dios y'ayuc ytiy'ajt, jigix jëbi ca'pxy yi mhuinma'n m'idipy ajcxy miid je ixpijcin huidibi Dios xymooygixp, e chi ajcxy m'alma paadipy nidzoocin. ³ Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuüygixy nej Dios may'ajt oy'ajt ti tuñ miid miich ajcxy ycixpi.

Cristo je tügpajcpi jaccopicyip

⁴⁻⁵ Yajmij'ajtcix yi Huindzin Jesucristo. Dios ti yhuin'ixyii jëbi yHuindzin'aty ma naaxhuiñjyay etz ooy tzocy. Yi naaxhuiñjyay ca' ajcxy ti tuñcuend, tim jadu'n nipaady nej tüg tzaa huidibi pojtzpidijc ninigoob ca' yajtuna'n ma yi tzaadijc ycojy. Yajmij'ajtcix miich ajcxy je Huindzin Jesucristo. Dios yaj'oyi huamyb miid miich ajcxy tügpicy jäy huidibi yi' yjäy'adaanip, huidibi ojadadaangixp Dios, huidibi Dios ytung tunaangixp. ⁶ Jadu'n yjaybetyity ma Dios ylibro, Dios jadu'n ymina'n:

Jim ma Israel jäy nbidägibich tüg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njäygidägibich. Je mij'ame'mbi jadu'n je' nipaady nej tüg tzaa oybi huidibi tighuamb ma tijctaatz co tzaadijc ycojy.

⁷ Miich ajcxy huidibi mijpidacp Jesús, miid miich ajcxy je mij'ame'mbi ooy je' ymijity yjanchity. Per yi' ajcxy ca' mijpidägy Jesús, je' yi' ajcxy ycuydumyby nej ymina'n ma jaybetyity:

Pinjaty ca' capxymidohua'n Dios, ca' ajcxy ixaangixy je Cristo, e jadu'n ajcxy nipaady nej pojtzpidijc huidibi ca' yajtunaangixy tüg tzaa oybi co tzaadijc cojciy. Yi Cristo yi' je' je' mij'ane'mbi huidibi ane'mdähuamb tüg'óciy.

⁸ Nañ jadu'n yi' ajcxy huidibi ca' mijpidägy Jesús cuydumyby nej ymina'n ma yjaybetyity:

Jadu'n je Cristo nipaady nej tüg tzaa ma jäy ajcxy yconejpcixy etz ycidaagixy. Je jäy ajcxy huidibi ca' mijpidägy Jesús, jadu'n nipaady nej jihuüy yconejpcixy ma tüg tzaa co ajcxy ca' tungixy cuendi Jesús y'ayuc, paady ycixpi padaangixy tzaachypi miid ypocy ycixpi, jadu'n nej Dios ti yajcöducy.

Je huidibi Dios yjäy'adyii

⁹ Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca'capxymidoy Dios. Dios miich ajcxy ti xyhuin'ixcixy. Je rey Jesús je' miich ajcxy ytung mduunip. Oyjot oyhuinma'n miich ajcxy myajtumyby. Dios miich ajcxy xyjäy'ajtip. Miich ajcxy je' xypaat mnidiy'ajt'adipy jadu'n nej Dios ti xyajpidzimgixy ma anajty mdundigooygixy, e ti xya-jhuinjihuüygixy je' ytiy'ajt nej jëb huaad mguydungixy. Jadu'n nipaady nej jihuüy Dios ti xyajtzoongixy agootztuuyb, e ti xyajtigüygixy ma yticxy yjajy.

¹⁰ Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjäy'ajtp cham.

Yajtungix Dios y'ayuc ma mdzinaayin

¹¹ Migügtijc ajcxy huidibi ooy ndzocy njihuüyich, jada nyajnimaaaygixyp, jadu'n nej tüg adzinaaybi huidibi ca' chinäy ma ycajp, huidibi nihudijtp, ca' tüg it mdzinaaygixy, copicy co ca' mnijot'adipy ajcxy yi jibic-huinma'n,

jadu'n nej je jäy ajcxy ma m'adzinaaygixy nijot'ajtcixy jibic-huinma'ñ. Je jibic-huinma'ñ ca' ñaygodigiiygixy miid oyhuinma'ñ. ¹² Tiydudägy mdzinähuiipy ajcxy, yajtúngix oyhuinma'ñ miid je jäy ajcxy ma miich ajcxy m'adzinaaygixy, je jäy ajcxy huidibi ca' nejhuuygixy Dios ytiy'ajt. Oy ajcxy ca' xy'ixaangixy etz jibic xyñigapxcixy xyñi'ojiiygixy, miid co oyjäy'ajtin mdungixyp, chi ajcxy jäygidägipy, etz miich yi' ajcxy xycapxpátcixipy ma Dios, mina anajty Dios ñinmiñyii ajcxy.

¹³ Miid je Huindzin Jesucristo ycixpi, capxymidoogixy tüg'óciy gobierno tungmiidpi etz cajp tungmiidpi y'ane'min ycötujcin, nañ capxymidoogixy jadu'n nej je mij'ane'mbi y'ane'my. ¹⁴ Nañ capxymidoogix tungmiidpi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'ñ ytumyb. ¹⁵ Dios chojcyp co tiydudägy mdzináaygixipy, jigix jëbi je jäy ajcxy huidibi ca' huinjihuuygixy Dios ytiy'ajt, huidibi tzuu huinma'ñ miid, ca' ajcxy mihuinma'ñybaady nej jibic xyñigapxip.

¹⁶ Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmiidpi y'ane'min ycötujcin, ca' huaad mnaybidáacigixy jadu'n nej jihuiy Dios xylugarmooygixy jigix jëbi mdundigooygixy. Copicy mdzinähuiipy ajcxy jadu'n nej Dios ytumbi huidibi oy tumb. ¹⁷ Migüg'adii ajcxy tüg'óciy jäy. Naychójcigix nayjihuiyigix nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypi yajnajx

¹⁸ Tumbidijc ajcxy, iimidoogix capxymidoogix mhuindzindijc. Pen oyjäy yi mhuindzin huidibi yung naxy yjot yhuinma'ñ miidity, o pen ahua'njäy jibicjäy, ca' yñejity, capxymidoogix. ¹⁹ Yjäygidägipy Dios pen mmecxtujctaaygixyp nej jäy ajcxy xychaachtungixy miid co oyhuinma'ñ miich ajcxy mmidity. ²⁰ Pen ti anajty mdundigooygixy, e paady anajty myajtzaachytungixy, ca' pin xycömáaygixipy xycapxpáadygixipy, oy ti mjamecxtujctaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jäygidägipy nej mmimecxtujctaaygixy. ²¹ Dios chojcyp co mmecxtujctáaygixipy je tzaachypi huidibi mminajxyp myajnajxcixyp miid co oybi mdungixy. Paady ycixpi je Cristo tzaachypi ayo'n minajxy yajnajxy miid ich ajt ycixpi, e yejc ijxpejt jadu'n nej jëbi huaad mminajxcixy myajnajxcixy tzaachypi ayo'n, nañ nej jëbi huaad mbanicxcixy mbayöygixy yi' y'ijxpejt. ²² Je Cristo ca' je' ma ytundigooy, e nañ ca' pin huin'ññ. ²³⁻²⁴ Je Cristo co jäy ajcxy y'oji, ca' je' y'adzouhuimbijty; e co jäy ajcxy chaachytuuni, ca' mijotmäthuimbijty je jäy ajcxy, ñigi Dios yajpuhuaniiy. Com Dios je' paatip nej chaachytuna'ñ huidi ajcxy tundigooyb. Je Cristo ci'm yajnicx ich ajt ndzaachypi co y'o'cy cruudzcixy. E miid co jadu'n y'o'cy cruudzcixy miid ajt nbocy ycixpi, chi jëbi n'ixmajzim jibic-huinma'ñ etz tudägy jëbi ndzinaayim. Miid co Cristo je tzaachypi minajxy yajnajxy miid ich ajt nbocy ycixpi, paady nidzoocim ajt n'alma. ²⁵ Miich ajcxy jecy'ajt mnidigooyb mdudigooyb anajty ajcxy ma Dios, mgi'mhuinma'ñ anajty ajcxy myajtumyb nidüg nidüg, jadu'n nej jäy yborregi ñidigoy ytudigoy ma yuugjot. Cham miich ajcxy ti mni-jothuimbijtcixy Dios, ti ajcxy mhuinma'ñyech ti mmijpidaaccixy Jesucristo je huidibi xycuend'ajtp ajcxy.

3

Nej huaad chinaaygixy pinjaty ti pijccixy

1-2 Jadu'n nej tumbidijc capxymidooy yhuindzin, nañ tim jadu'n miich ajcxy töxyjäydijc capxymidoogixy mñäy. Pen mñäy ca' capxymidooy Dios, ca' mijpidäga'ñ Jesucristo, mïid co miich oyjot oyhuinma'ñ myajtunipy mïid yi', ycadimjetyity huin'it mñäy yhuinma'ñymedzip etz mijpidägiipy Jesucristo, co y'ixipy nej miich mmiidity tudägy'ajtin. ³ Töxyjäydijc ajcxy, ca' mnaygömayiyb mïid mhuit mxojx oyjatpyi tzoujatypi, mïid oori çjiitz etz oori taatztiy, mïid co mgöhuay mdzachcüdägy mïid cüd oyjatyp. ⁴ Hue' janchtiy jäy miich ajcxy xycömayip mïid co oyjot oyhuinma'ñ anajty myajtungixy, mïid co yung naxy mjot mhuinma'ñ ajcxy mïidity. Co jadu'n mdungixipy jada je' oy jäygidaacni ma Dios huinixii. Yi mhuit yi mxojx etz oori taatztiy cixip tigoyip yi'. ⁵ Nañ tim jadu'n anajty jecy'ajty je töxyjäydijc huidibi anajty ajcxy cömay ijtp, yajtuuñ anajty ajcxy oyjot oyhuinma'ñ, ymijpidacyp anajty ajcxy Dios, nañ ycapxymidooyb anajty ajcxy ñäy. ⁶ Jadu'n nej Sara capxymidooy Abraham. Sara xügoyäxy Abraham: "Ich nhuindzin." Pen myajtumyib miich ajcxy oyjot oyhuinma'ñ jadu'n nej Sara, jadu'n miich ajcxy anajty nej jihuüy Sara ajcxy xy'ung'adyii, pen ooybi mdunipy ajcxy, ca' ti ajcxy mdzigihuipy.

⁷ Nañ jadu'n miich ajcxy yëydijctijc, yajtungix pa'ayo'n mïid mdöxyijc, yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ tú'ciy mïid miich ajcxy, paady ycixpi copicy yajxon naymïddzináayigix jigix Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidipy

⁸ Jada ayuc cham njacyajnimaydaayb nidüg'óciy miich ajcxy. Tú'ciy mjot mhuinma'ñ mi'ijtcix, naymigüg'ájtigix yajxon, naychójcigix nayjihuiiyigix nidüg nidüg, nayba'ayouhuigix nidüg nidüg, pidaaccix yung naxy mjot mhuinma'ñ. ⁹ Co ajcxy migüg xymidundigoyipy, ca' myaj'ahuimbidipy jadu'n nej anajty ti xytuñ. Co ajcxy migüg xyñi'ojihuipy, ca' myaj'ahuimbidipy jadu'n nej anajty ti xyñi'ojiy. Nigi nibijctzohui' ma Dios mïid yi' ajcxy ycixpi, nigi mi'oyjäy'at mmigüg. Huin'it nigi Dios xyconuucxip. ¹⁰ Com jiiyby ymiñ jaybety ma Dios ñecy:

Pinjaty jotcuyc tzinähuamb e yajnaxa'ñ xii tiempo agujc jotcuyc, nay'ahuijtzigiib ca'ydi y'iidigooy ycapxtigooy, ca'ydi y'anidägy.

¹¹ Huen jihuägy ma je jibicpi e huen oyjäy'ajtin tuñ. Huen ixmach tüg'óciy tzipcaxy, ca' tzipcaxy ixtähuipy.

¹² Je Huindzin Dios ycuend'ajtpy yi' je jäy huidibi tiydudägy tzinaayb etz ypubejtcixyp ypudigiygixyp migügtijc co tijaty mibijctzoy. Dios ymijotma'tpy je jäy ajcxy huidibi jibic-huinma'ñ tumb.

¹³ Pen mdumyib oyjot oyhuinma'ñ ajcxy, huin'it ca' pin ajcxy xymijotmädiipy. ¹⁴ Co oyjot oyhuinma'ñ myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigüygixipy, ni ca' mhuinma'ñydidigöoygixipy. ¹⁵ Mijpidaaccix yi Jesucristo ich ajt nhuindzin Dios cixyot huinijot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy mïid yung'ajt nax'ajt jadu'n nej mijp'ijxcixy co Jesucristo xyajnidzögaani ajcxy yi m'alma. ¹⁶ Ca' mgapxipy ajcxy je ayuc huidibi xyajtzo'yduunip. Pen jäy ajcxy xymi'idigooygixp xymigapxtigooygixp, chi ajcxy jihuihuamyb tzo'ydu'n mïid co ca' yjanchity nej ajcxy ymina'ñ com oybi anajty ti mdungixy. ¹⁷ Pen Dios miich ajcxy jadu'n xyajnijot'ajt co tzaachypi mminájxcixipy myajnáxcixipy, jac'oy co tzaachypi mminájxcixipy myajnáxcixipy mïid yi m'oyjäy'ajtin ycixpi, e ca' anajty tzaachypi mminájxcixy myajnáxcixy mïid co anajty ti mdundigooygixy.

¹⁸ Je Cristo nañ jadu'n tzaachypi minajxy yajnaxxy co y'o'cy cruudzcixy miid jäy ajcxy ypocy ycixpi. Oy je' anajty ca' tibocy miidity, chi je' ti codinäy je jäy ajcxy ypocy, e jadu'n ñch ajt ti naymi'oyñiyim miidi Dios. Oy je Cristo ñinix y'o'cy, per je' y'alma ca' je' y'o'cy, jugypijcy je' jadügtecy miid jemybi ninix. ¹⁹ Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jäy y'alma ajcxy huidibi jibictuuyb ijtp. ²⁰ Je jäy ajcxy je' jiby y'alma ijtp jibictuuby huidibi anajty ca' capxymidoy Dios. Je taab Noé yajcojy je mij barco, ooy Dios ajcxy jecy ymimexujci, huen tijy cayjothuimbijty ajcxy. Jeyi niductujc je jäy choocy ma je mijtuu je mijñigom. Je' co je jacjadyi ca' ajcxy yjothuimbijty. ²¹ Jadu'n nej je nidujtucjpi ajcxy mijpidacy Dios y'ayuc, e chi ajcxy choocy, nañ tim jadu'n ñch ajt co nnibejtim je' ñch ajt ndiy'ajt'ajtim co nmijpidaacim Jesucristo je huidibi co y'o'cy jugypijc miid jemybi ninix, etz ti xyajhuaatzim njot nhuinma'ñ jigix ooy oy nayjihuñiyim, etz nañ jadügtecy co anajty n'o'cim xyajjugypijcim miid jemybi ninix. Co nnibejtim, je' je' je' tiy'ajt co Dios ti xyajhuaatzim njot nhuinma'ñ. ²² Je Cristo ti je' ñicxy tzajpjoty. Jiby je' cham y'ity mij'ane'mbi ma Dios, yi' je' ane'mb je ángeles ajcxy huidi tzajpjoty tungmiid etz huidijaty mic'ajt miid tzajpjoty.

4

Yajtungix je mic'ajt huidibi Dios ti xymooygixy

¹ Je Cristo ayo'n tzaachypi minajx yajnaxx co yhuidijty ya naaxhuiñybi, e chi yajtuuñ oyjot oyhuinma'ñ miid jäy ajcxy ycixpi. Paady ycixpi copicy miich ajcxy myajtunipy oyjot oyhuinma'ñ miid migügtijc jadu'n nej Cristo yajtuuñ. Pen miich ajcxy mminajxyp myajnaxyp tzaachypi miid co oyjot oyhuinma'ñ myajtuñ, chi ca' mjacnijot'ajtip ajcxy jibic-huinma'ñ. ² Jadu'n nej ajcxy mjactzinähua'ñ mjacjugy'ada'ñ, ca' huaad mjacnijot'ajtcixy je jibic-huinma'ñ. Hue' janchtiy mdunipy ajcxy jadu'n nej Dios tzocy. ³ Jecy'ajty co anajty ca'ni mnejhuñiygixy Jesucristo ytiy'ajt, jibic-huinma'ñ anajty ajcxy myajtumyb ma mdzinaayin mjugy'ajtin, jadu'n nej jäy ajcxy jacjadyi hidibi ca'ni nejhuñiygixy Dios ytiy'ajt. Chi anajty myajtungixy canaagnax je jibic-huinma'ñ, ooy ajcxy mnijot'ajtcixy maynax jibic-huinma'ñ. Ooy anajty anaxy mdzach'üccixy vino, huin'it anajty ooy ajcxy ymügyii. Ooy anajty mnixondaaccixy coodz hididi, huin'it anajty ooy m'uuccixy anaxy. Ooy mnijot'ajtcixy xi, ooy anajty m'ojadajtcixy tzaadzech quipychech hidibi Dios ca' jäygidägy. ⁴ Paady ycixpi je jäy ajcxy hidibi ca' nejhuñiygixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy xyñi'ojñiygixy. ⁵ Ca' mdungixy cuendi yi' ajcxy, com Dios paatip nej ytiyduna'ñ ajcxy. Je Dios je' tiydunamb nidüg'óciy jäy ajcxy hidibi cham jugy'ajtp, etz tiibi y'öccixy. ⁶ Paady ycixpi ti yajnimäy Jesucristo ytiy'ajt je jäy tiibi y'öccixy jigix yajtiydunipy ajcxy miid Dios ytiy'ajt jadu'n nej yajtiyduna'ñ yi' ajcxy hidibi jacjugy'ajtp cham. Jebi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷ Ti ytimyhuingoni je xi je tiempo mina ycixaani ytigoyaani tüg'óciy tijaty ya naaxhuiñybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzohuipy ajcxy Dios. ⁸ Ooy ycopicyty co jacnaychójcigix jacnayjihuñiygix nidüg nidüg. Miid co mnaychójcigixy, paady ycixpi jebi mnayméecxigixy. ⁹ Naymi'oyjäy'ajtigix nidüg nidüg agujc jotcujc, ca' y'ametz yjotmetzity. ¹⁰ Yajtungix miid je migügtijc jadu'n nej Dios xymooygixy ixpijcin nidüg nidüg. Naybubéjtigix naybudigñiygix miñ xyipy jadu'n nej jäy ajcxy hidibi yajxon Dios ytiy'ajt padungixp. ¹¹ Pen Dios ti xymooygixy ixpijcin jigix jebi capxhuäcxy yi' y'ayuc, yajxon Dios

y'ayuc mgapxhuäcxip. Pen miich xypaat puġġi jëdzġi, yajxon mduniy aycxy jadu'n nej Dios huinma'ñ ti xymooygixy. Co yajxon Dios ytiy'ajt mguyduuniy, huin'it Dios cōmaya'ñ miich aycxy, mïd co ti mmijpidaaccixy Jesucristo. Je Jesucristo je' cōmay'idip etz ane'mip huinixi huin'itempo.

Mimecxtujccixy tzaachypi ayo'n

¹² Migügtijc aycxy huidibi ooy ndzocy njihuïyich, ca' ooy mhuinmay'ahuidijtcixy co jäy xy'ixhuidijtcixy xypahuidijtcixy, co jäy xychaachytunaangixy jigix jëbi ñiguëxigipy pen janch mmibijccixy Jesucristo. ¹³ Ca' aycxy mdajipy mmayipy, jotcuyc aycxy mnayjihuihuïyb jigix jëbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigyii ya naaxhuiñ mïd ymic'ajt y'oy'ajt, jëbi aycxy jotcuyc mnayjihuihuïyb. ¹⁴ Pen xymi'idigooyb xymigapxtigooyb jäy aycxy, mïd co miich aycxy ti mmijpidaaccixy Jesucristo, jotcuyc mnayjihuihuïpy, mïd co miich aycxy mïd je Dios yjihuiñ etz Dios ymic'ajt ma mjot mhuinma'ñ. ¹⁵ Pen nidüg miich aycxy ayo'n tzaachypi mbaatcixy, oy ca' anajty ti mjäyyaj'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶ pen miich aycxy tzaachypi mminajxyp myajnajxp mïd co ti mmijpidaaccixy Jesucristo, ca' ti tzo'ydu'n mjihuïhuipy, ñigi Jesucristo cōmay'idipy.

¹⁷ Ti xi tiempo tim paatni mina Dios tiyduna'ñ je jäy aycxy huidibi cuydumb je' ytiy'ajt. Pen Dios ich ajt huidi nmibijcim xtytyduunim e nbaatim hueeni tzaachypi, ñigi tzaachypi padaangixy aycxy huidibi ca' mijpidaaccixy Dios. ¹⁸ Pen je jäy huidibi oyjot oyhuinma'ñ mïd mic tzaach padaangixy je' y'alma nidzoocin, çti jada ytunaangixy pinjaty jibic-huinma'ñ mïd, pinjaty pocytungix? ¹⁹ Pen tzaachypi mminajxyp myajnajxyp aycxy mïd co Dios jadu'n chojcyp, ca' aycxy mjotmetzcihuipy, ñigi aycxy panixcix payöygix oyhuinma'ñ, ñigi cixyot huinijot mijpidägipy aycxy Dios; com yi' miich aycxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

5

Pedro capxhuijp je mibijpidijc

¹ Jada ich miich aycxy yajniimaayb huïdibi nigohuajc'ajtp je mibijcpidijc, ich nañ jadu'n nigohuajc'ajtpyich mibijcpidijc. Ich n'ixyich co je Cristo ayo'n tzaachypi minajxy yajnajxy. Nañ jadu'n ich yi' nmïd'idaamybich jadüg'oc co anajty ymiñ ya naaxhuiñ mïd y'oy'ajtin ymij'ajtin. ² Jada ich miich aycxy nyajniimaayb: yaj'ixpijccix etz cuend'ajtcix Dios yjäy agujc jotcuyc. Ca' myaj'ixpigipy aycxy ametz jotmetz, cuend'ajtcix Dios yjäy, tim jadu'n nej jäy ycöbixy cuend'aty. Ca' meeñgixy myaj'ixpigipy aycxy. Mïd oyjot oyhuinma'ñ myaj'ixpijccixy. ³ Ca' adzip ahua'n m'ane'mipy Dios yjäy. Hue' janchtiy ixpejt oybi yejccix. Cuydungix Dios ytiy'ajt. ⁴ Co anajty Jesucristo, je huïdibi nihuindzin'ajttaayb tüg'óciy, ñayguëxigyii ya naaxhuiñ jadüg'oc, chi cōmay miich aycxy mbidzimipy. Tim jadu'n nej jäy aycxy co y'iyiygixy e co ymadaaccixy, chi cōmay ypidzim aycxy. Miich aycxy cōmay nañ jadu'n m'idipy huinixi.

⁵ Myajmij'adipy anäctijc aycxy, je' aycxy huïdibi nigohuajc'ajtp je mibijcpidijc. Ooy ycopicyty co nidüg'óciy miich aycxy mnayyajmij'ajtigixipy miñ xyipy mïd oyjot oyhuinma'ñ. “Dios ca' je' jäygidägy pinjaty amij agix jäy'ajtigixy. Dios ypubejtyp mïd y'oyjot pinjaty yung naxy yjot yhuinma'ñ mïd.” ⁶ Mgapxcöbigipy aycxy tiydudägy Dios, je mij'ane'mbi, chi Dios

xycömayipy mina anajty. ⁷ Mibijctzougix Dios müd tüg'óciy tijaty jotmay ajcxy müd'ajtyp, chi jëbi Dios xypubedipy xypudigihuiipy ajcxy.

⁸ Huijycujc m'idipy ajcxy. Nixi' m'idipy ajcxy. Com je mujcu' huídibi xymüdzip'ajtim, ooy je' xy'ix'ijxim xypa'ijxim. Hue' xya-jhuinma'nydigoyaanim, tim jadu'n nej je caa co ixtay ti chüdaamyb.

⁹ Huindina' jijptina' ajcxy je mujcu'. Yi jacjadyii jäy huídibi mijpidaaccixy Jesucristo, nañ yminajxcixyp yajnajxcixyp tzaachypi nañ jadu'n. ¹⁰ Co anajty ajcxy hueeni tzaachypi ti m'ocyajnaaxy, huin'it Dios xyaj'oyiipy ajcxy yi m jot yi mhuinma'ñ, xyajmibigip ajcxy yi' ytiy'ajt, xyajjotmicpigip ajcxy. Com Dios yi' je' huídibi may'ajt ti tuñ mijcajee müd nidüg'óciy jäy ajcxy. Yi' je' huídibi ti yaj'oyiy nej jëbi cömay huinixi' n'ijtim müd Jesucristo jiiby tzajpjoty. ¹¹ Huen Dios y'oy'ajtin etz ymij'ajtin idipy huinixi'.

Capxpooxin yajnaxp

¹² Jada necy nyajnigüeexy ajcxy müd Silvano ich ajt nmigüg huídibi ndi-jpyich co ooy yajmij'aty Jesucristo. Hueeni jada ayuc huídibi nyajnijayiyb, nañ ti nbidägyich necyjoty capxhuijin etz ti nbidägyich necyjoty yi Dios ytiy'ajt tudägyyp, nej Dios may'ajt oy'ajt tuuñ müd miich ajcxy ycixpi. Mijpidaaccix nigi Dios ytiy'ajt, ca'ydi mhuinma'nydigoogyixy.

¹³ Je jäy huídibi ya Babilonia huídibi ajcxy yajmij 'ajtcixp Jesucristo, je jäy ajcxy huídibi Dios ti huin'ixy, xyajnigüeexp ajcxy capxpooxin. Nañ jadu'n Marcos ich nmigüg, je huídibi njihuüyibich nej jihuüy ngi'm'ung'adyiijich xyajnigüeexp capxpooxin nañ jadu'n. ¹⁴ Naygapxpóocxigix xic xon nidüg nidüg miñ xyipy. Je' je' je tiy'ajt co mnaychójcigixy mnayjihuiyigixy miñ xyipy.

Jotcujc mnayjihuihuüyib ajcxy nidüg'óciy huídib yajmij'ajtp Jesucristo. Amén.

2 PEDRO

Yi Mimetzpi Neczy Huidibi San Pedro Yajnigujx Yi Mibijcpidijc

¹ Hich Simón Pedro, tumbich ma Jesucristo ytung. Yi' xy'apóstol'ajtpich etz ngapxhuäcxpyich yi' y'ayuc. Cham hich miich ajcxy jada neczy nyajnijayhygixy huidibi ajcxy ti mbaatcixy mibijcin janch oybi, tim jadu'n nej hich ajcxy ti nbáatcixyich mibijcin janch oybi. Hich ajt nDios je Jesucristo huidibi xya-jnidzoocim ajt n'alma tudägy je', e tudägy ytuñ muid hich ajt nidüg'óciy. ² Huen Dios mijmay'ajt tunipy muid miich ajcxy, etz jotcuyc'ajtin xymöhuipy mijcajee, muid co tiy'ajt ti mbaatcixy ma Dios etz ma je Jesús hich ajt nHuindzin.

Je mibijcpidijc chinaayin jugy'ajtin

³ Dios muid je' ymij'ajt ti xymooyim tüg'óciy huidibi nyajmayjajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun muid hich ajt ycixpi co ti xyajnejhuuyim Jesucristo y'ayuc ytiy'ajt. Je Jesucristo ti xyhuin'ijxim jigix jébi nmuid'ajtim yi' ymij'ajtin y'oy'ajtin, etz jigix jébi nduunim oyjäy'ajtin nej Jesucristo tuuñ.

⁴ Dios ti xymooyim huidibi janch oydi'cni e janch copicyip jigix jébi miich ajcxy mbaatcixy Dios yjihu'iñ ymic'ajt huidibi xyajtzinaaygixy muid huadz jot huinma'ñ, etz jigix jébi muid jada ycixpi tibi xyaj'ahuanhyim, miich ajcxy mijjpyöyduutcixy je jibicpi huidibi naaxhuiñyäy ajcxy ñijot'ajtcixyp. ⁵⁻⁷ Com Dios muid ymic'ajt ti xymooyim huidibi nyajmayjajtim, paady ycixp miich ajcxy naymic'ijxigixy co ajcxy mmibijcin mjacyajmijtigihyigixipy tudägy'ajtin; e muid mdudägy'ajtin mjacyajmijtigihyigixipy ajcxy Dios y'ixpijin; e muid je Dios y'ixpijin mjacyajmijtigihyigixipy yi' Dios yjihu'iñ ymic'ajt ma ajcxy mjot mhuinma'ñ huidibi muid mmimadägyip ajcxy yi' jibicjot jibic-huinma'ñ; e muid je mic'ajt ma ajcxy mjot mhuinma'ñ jacyajmijtigihuipy ajcxy mecxtujcin; e muid je mecxtujcin mnejhuuyigixipy nej jéb huaad myajmij'ajtcixy etz mdzigihyigixy Dios; e muid je mecxtujcin mjacyajmijtigihyigixipy je tzojin je jihuuyin muid migügtijc; e nañ mijtigihuipy nañ jadu'n je mibijcin nej jéb huaad Dios myajmij'ajtcixy etz nej jéb huaad cixyot huinjot mjacyajtungixy oyjäy'ajtin.

⁸ Pen ma miich ajcxy mdzinaayin mjugy'ajtin yajpattäy e ymijiy ymayiy, yi' mjugy'ajt ajcxy ca' yi' ñaadigi'aty; nañ ca' anajty ajcxy naadigi' ti mmibijccixy hich ajt nHuindzin Jesucristo, ti mnejhuuyigixy yi' y'ayuc ytiy'ajt. ⁹ Pin jada ca' capxymidooy tüg'óciy jada yaabi capxhuijin ma yjugy'ajtin, jadu'n yi' nipaady nej tüg huiintzpi o huidibi y'ijxin con, ti jäydigoy co Jesucristo ti yajpocyñhuaatzp. ¹⁰ Paady ycixp miich ajcxy migügtijc, naymic'ijxigixy tungix tüg'óciy jada jigix mnejhuihuipy ajcxy tiydudägy co Dios ti xyajmibijccixy e ti xyhuin'ijxcixy. Pidaaccix mhuinma'ñ co jada tiy'ajt huen copicy, huen tictztigiy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹ E jadu'n miich ajcxy myajmöhüipy tiydudägy tigiydac mijpi ma hich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytiyoyipy nimina.

¹² Paady ycixp hich miich ajcxy jatymy yajjäymejtzcoodaangixy jada tiy'ajt. Oy miich ajcxy jada tiy'ajt mjajajtcixy mjanejhuuyigixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham muid. ¹³ Minaambich co yjanchity nami njactzinaayñich co hich miich

ajcxy nmöhuipy capxhuijn. ¹⁴ Hich ajt nHuindzin Jesucristo ti xyajne-jhuüyich co tzojc n'ixmadzipyich jada njugy'ajtin (n'ögibich). ¹⁵ Paady ycixp naymic'ixyijich mictägy ma miich ajcxy co ngapxhuijicy jigix co anajty n'ögyich mjäymetziiyb ajcxy tüg'óciy jada tiy'ajt.

Yi' ajcxy huídibi y'ijxy je Cristo ymij'ajtin y'oy'ajtin

¹⁶ Hich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt müdity, e jadu'n nej je' yhuimbidañ jadüg'oc ya naaxhuiñ. E ca' hich ajcxy nyaj'ixpicy nigoo'ayuc anii'ayuc huídibi ci'm ti ngojyich ti nmacxyich. Müd hich ngi'mhuin ti n'ijxcixyich je Huindzin Jesús ymij'ajtin. ¹⁷ N'ijx hich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: “Jada je' hich n'ung huídibi ooy ndzocyich njihuüyich, e ooy jotcuyc nayjihuiyijich müd yi' ycixpi.” ¹⁸ Hich ajcxy nañ jadu'n ci'm ti nmidóogixyich je ayuc huídibi anajty tzomb tzajpjoty. Jim hich ajcxy anajty quipxyi müd je Huindzin Jesús ma je amay gop.

¹⁹ Nañ jadu'n nmüd'ajtim je ayuc jac'oybi jactiiybi. Je' je' je tiy'ajt je ayuc huídibi ajcxy yjay je Dios y'ayucnajtzcaxiiybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huídibi jadu'n nipaady nej tüg'jin tixcp agootztuum etz jadu'n nipaady nej je xii co yxii'miydäy, etz jadu'n nipaady nej je mijmadza' jayhuixtujcp co ypidzimy. Jada tiy'ajt xycodiixcip ajcxy mjot mhuinma'ñ. ²⁰ Cuendtungix miich ajcxy jada: tüg'óciy je tiy'ajt, huídibi Dios ytiy'ajtmüdp yejc huídibi ijtp jaybety ma Dios ylibro, ca' huaad pin yajnigejip müd yci'mhuinma'ñ. ²¹ Com je Dios y'ayucnajtzcaxiiybi camina je' ajcxy ayuccapxhuäcxy müd yci'mdzojc in yci'mhuinma'ñ. Dios anajty ajcxy huin'ixyip jëbi ayuccapxhuäcxy müd Dios ycixpi com je Espíritu Santo anajty ajcxy mooyip ayuc huídibi ajcxy ycapxhuäcxyp.

2

Yi' ajcxy huídibi yaj'ixpijcp anii

¹ Per nañ ji anajty nañ jadu'n ayucnajtzcaxiiybi huídibi anajty ajcxy anii daacp ma je Israel jäy. E nañ jadu'n yji'adipy ayuccapxhuäcxpi huídibi anii yaj'ixpigipy ma miich ajcxy. Je' ajcxy ayüch ameech yaj'ixpigipy yci'm'ayuc yci'mhuinma'ñ huídibi ajcxy yajhuinma'ñ ydigooyipy je mibijcpidijc. Ymina'ñ ajcxy co ca' yjanchity je Huindzin Jesús y'ayuc, je huídibi yajnidzooc ajt n'alma, e jadu'n ci'm ñay'ayo'nmóoyigixy müd Dios mic'amy. ² Mayjäy ooy panicxa'ñ je jibicpi huídibi ajcxy ytungixyp, e müd je' ajcxy ycixpi yajnjigápxipy yajnimiydägipy ajcxy jibic je huídibi ajcxy cuydumb je tiybi ayuc, je Jesucristo y'ayuc oybi. ³ Müd co anajty tzach'adzojccixy meen, chi anajty xyhuimbijccixy xyhuimmeetzixy müd ajcxy y'ixpijcin ca'p yjanchity. Per je pocycähuin ajcxy ahuijip, ca' ma ñidzooy. Ti yjejni maabi ajcxy ypocya'ni ma Dios. Dios tzaachytunib ajcxy müd ypocy ycixpi.

⁴ Dios ca' je' huinmeecxy je ángeles ajcxy huídibi tundigooygixp. Hue' janchity ycötijnajxtaayb ayoodactuuyb etz yajhui'my agootztuuyb, cadenijy y'ijtcixy cuend'aty, ixti cooni anajty paady xii tiempo co anajty yajtiyduna'ñ naaxhuiñjäy müd ypocy ycixpi. ⁵ Nañ ni ca' Dios huinmeecxy je naaxhuiñjäy huídibi tundigooy jecy'ajty. Chi quejxy ayo'nduu etz mijniigom ma je jibicjäydijc. Jëyi yajtzoocy je Noé huídibi capxhuäcx je tiy'ajt. Quipxy müd Noé yajtzoocy jahuixtujc y'amigügtijc. ⁶ Dios nañ jadu'n tzaachytuñ müd ypocy ycixpi etz yajhuindigoy müd jin metz cajp, Sodoma etz Gomorra, ixti cooni yajhui'my accuyjam jigix y'idipy je iixpejt ma je jibicjäydijc huídibi ajcxy

jac'axam jactzināhuam jacjugy'adam. ⁷ Dios yajtzooc je Lot, hue' je' anajty janch oyjāy, e janch ymūd anajty jotmay co anajty je jibicjāydijc ajcxy ijxi chinaayin yjugy'ajtin janch jibic. ⁸ Jabom jabom anajty je Lot, je jāy oyjāybi huidibi anajty tzinaayb quipxyi mūd je jibicjāydijc, ni ca' anajty yjotcuyc'aty co anajty ixymidoy nej anajty ytundigooygixy je jāy ajcxy ca'pi ytudāgyity. ⁹ Dios mūd mic'ajt jēbi nihua'ñ yajtzōgy pinjaty mibijccixp cixygot huinijot co je mujcu' yjot'ijxigixy huinma'ñ'ijxigixy. Nañ jadu'n Dios mic'ajt mūdity jigix jēbi yaj'ijtcixy je jibicjāydijc mūd tzaachypi ayo'n, huidibi ymōhuamy co anajty naaxhuiñyāy tiyduñ mūd ypocy ycixpi.

¹⁰ Dios ymūd mic'ajt jēbi tzaachytunipy pinjaty tumb jibic-huinma'ñ nej ñinīcx nijot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiyīi. Ytumb ajcxy yci'mjot yci'mhuinma'ñ. Ni ycatzigiygixy co oyñinej ajcxy ni'ojhiygixy pinjaty mic'ajt mūd ma Dios ytung. ¹¹ Oy je ángeles ajcxy mūdity mijcōtujcin etz ane'min, ca'p je' ajcxy yjot yhuinma'ñ mūdity nicxy ni'ojhiygixy ma Dios yhuinduu pinjaty mic'ajt mūd ma Dios ytung.

¹² Per jadayaab jibicjāydijc ajcxy jadu'n ajcxy yi' nej iyujc, ca' yhuinma'ñ; nigoob ytimyhuidity etz yma'xun'ajtcixy jigix jāy ymadzhiyb etz yaj'ōgihyb. Ñixiicpy yajxiicpy ajcxy yi' huidib ca' huinjihui'y. Per nañ tim jadu'n ajcxy y'ōgipy nej iyujc y'ōgy ytigoy. ¹³ Cobadihuaangixy jadu'n nej ti ytundigooygixy. Hue' nayjihuiygixy capin yjadu'nity, yxondaaccixy tūg jaxicyjaty. Jadayaab jāy ajcxy pocy ypa'tcipy ajcxy yi' chinaaygixy yjugy'ajtcixy. Tūg tzo'ydu'n co ajcxy nañ jadu'n xymijyōybejtcixy ma m'amughiygixy.

¹⁴ Co ajcxy huindūxcixy tōxyjāydijc, chi ajcxy ooy nijot'ajtcixy co mūd tundigoya'ñ. Ca'p ajcxy chíjpigixy y'anucxhiygixy mūd pocytunīi. Yaj-tundigooygixy pinjaty amūtzip ma mibijcin, ooy ajcxy yhuijity ycuycity yco-huinma'ñity ma meeñ'adzoogīi. Dios yajtigoyib ajcxy y'alma. ¹⁵ Tigoyjāy yi' ajcxy, je' co ti ñidigajtcixy ti ytūdīgajtcixy ma je tihybi je janchypi tiy'ajt. Je' ajcxy ypanicxy ypayōyp je profeta Balaam y'ijxpejt, je Beor y'ung, co ooy ymeeñybada'ñ anajty mūd yjibic-huinma'ñ. ¹⁶ Chi Balaam oy yaj'ojyīi ypocy tūg tōxyburro, ycapxy jadu'n nej tūg jāy, e jadu'n je' yajhuācxijpy je profeta Balaam mūd je' ylocihuinma'ñ.

¹⁷ Com jada jāy ajcxy ca' panicxcixy je janchypi tiy'ajt, paady ycixp jadu'n ajcxy nipaady nej tūg niipozojut ca'pi ñi mūdity, etz jadu'n ajcxy nipaady nej joc huidibi poj yajyōyip (ca' ytu'y). Dios mōhuib ajcxy tzaachypi mūd ypocy ycixpi, idam ajcxy agootztuuyb huinixi huinītiempo. ¹⁸ Com ycapxyp ajcxy ayuc huidibi ca' choubaad. E mūd je jibic-huinma'ñ ycixpi huidibi ajcxy chachnijot'ajtpy yajtundigooygixy pinjaty tihbi choongixy ma je huidibi ajcxy tzinaayb mūd jibic-huinma'ñ. ¹⁹ Yi' ajcxy yaj'ixpijcp je mayjāy co jēbi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'ñ yaj'ixpijcp, ci'm ajcxy ñay'ijtigixy pocypa'tcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuiy ajcxy ane'my y'ity. ²⁰ Pinjaty ti ymibijccixy ti ñehuiygixy je Huindzin Jesucristo ytiy'ajt huidibi yajnīdzoocp ajcxy y'alma, e jadu'n ti yjihuāccixy ma je naaxhuiñyāy yjibicjāy yjibicjugy'ajtin, pen jadūg'oc anajty y'ayōyhiyñip ma je jibicpi, e je jibicpi ymīmadāgyīi ajcxy, o'ctiy anajty nigī yhui'mgixy ca'ydi nej je jayijp'atypi. ²¹ Nigī oy co ixypy je' ajcxy ca' ytimnejhuiygixy je janchypi tiy'ajt. Com ti ocnejhuiygixyp, e chi jada' y'ixtigihuāccixy ma je huātzpi Dios ycōtujcin huātzpi Dios ytiy'ajt tihbi anajty y'ocjamōoyigixy. ²² Per je' yi' ajcxy ytimycuydumy nej je ayuc y'ity: “Je uc yci'm'ich ñihuimbijtpy, e je idzim huidibi namdziidaayb, nicxy je' yajtznip yquitnīp mo'ntzjoty jadūg'oc.”

3

Je Huindzin Jesús huimbidaamb ya naaxhuiñ

¹ Miich ajcxy migügtijc huídibi ñich ooy ndzocyich ooy njihuüyich, jada je' je mímetzpi necy huídibi ajcxy nyajnijayñyb. Ma jada metzpi necy hue' ñich ndzoga'ñich co nyajhuinma'ñymedzip ajcxy ma Dios ytiy'ajt mñid jada capxhuiñ huídibi ti njaayich. ² Ti nnijayñygixy jigix m'ajihuñhuñyb ajcxy je ayuc huídibi ajcxy pa'tcipy'aty ñajtzcapxñy je Dios y'ayucnajtzcapxñybi ajcxy huídibi huädz yhuinma'ñ anajty ymñid. Nañ ajihuñyigix je Huindzin Jesucristo je' y'ane'mñin huídibi yajnñdzoocp ajt n'alma, je ane'mñin huídibi apóstoltijc miich ajcxy xyajñimaayb.

³ Nejhuñygixy miich ajcxy jada jayijp ma yam ca'ni yhuaad'ajtni mña naaxhuiñ ycixipy, miinip jäy ajcxy huídibi nixigip yajxigip huídibi Dios yjè'ajtpy. Chinaaygixy yjugy'ajtcixy anajty mñid jibic-huinma'ñ huídibi ci'm ñijot'ajtcixyp. ⁴ Chi ajcxy ymñina'ñip: “¿Ti co mdzachmibijccixy co Cristo yhuimbida'ñ jadüg'oc ya naaxhuiñ? Nej ajcxy je' y'o'ctay je mij'ap je mijteedy, je'ni y'ijttäy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'ñ jadüg'oc ya naaxhuiñ,” jadu'n ymñinaangixy. ⁵ Yi' ajcxy ca' huinjihuñhuaangixy cuendtunaangixy co mñid Dios y'ayuc yi tzajp ji'ajtp anajty yi' tzachjeyip, e mñid Dios y'ane'mñin huin'it je naax oy yguëxigy huídibi ijtp anajty ñijoty. ⁶ Nañ jadu'n mñid Dios y'ayuc je jecy'ajtpy naaxhuiñyjäy y'ayo'nbaty, ñijicxtay nidüg'óciy e ytigoyday ñijoty. ⁷ Per Dios mñid yi' y'ayuc yaj'ijtpy jada naaxhuiñybi etz tzajp huídibi cham ji'ajtp ixti coon yajtigoydähuiipy mñid jñin. Je jñin huin'it je' nöctähua'ñ co anajty yhuaad'ajtni ma Dios tiyduna'ñ je camadacpidijc je jibicjäydijc, etz yajtigoya'ñ ajcxy y'alma.

⁸ Jadügnax miich ajcxy migügtijc huídibi ooy ndzocy njihuüyich, ca' mjäydigooygixy co ma yi Huindzin Dios, tüg xñi jadu'n yi' nej tüg mil jimijt, e tüg mil jimijt jadu'n yi' nej tüg xñi. ⁹ Ca' nmñinaanim co yi Dios yajhuäcxibaamyñi yi' mña cuyduna'ñ huídibi yi' ti ahuanñy, jadu'n nej nijejity jäy a'ixñygixy. Dios yajtumyb mecxtujcin mñid miich ajcxy, com hue' yi' tzocy co ni tüg jäy ayo'n paadipy. Yi' chojcpy co nidüg'óciy jäy huen jothuimbijtcixy etz ixmajtzcixy pocytni.

¹⁰ Co anajty je Huindzin Jesús ymñiñ jadüg'oc ya naaxhuiñybi chaachytunipy je' tüg'óciy jibicjäydijc, hue' je' ytunñyb yjadñyb ma anajty ca' pin jijp'ixy, jadu'n nej tüg meetzpi ymñiñ coodz co meedza'ñ tijaty. Huin'it je tzajp yhuindigoydähuiipy mñid tüg ne'mñin jidijtin oyçigñyñip. E tüg'óciy huídibi mñid ndzinaayim njugy'ajtim toydähuiip yi' mñid jñin, yi naax toydähuiip yi', etz tijaty yajpatp ya naaxhuiñ toydähuiip nañ jadu'n.

¹¹ Com tüg'óciy tijaty huídibi ji'ajtp yhuindigoydähua'ñ mñid jñin, paady ycixpi ñigi copicy miich ajcxy co mdzinaaygixp tudägy e myajmij'ajtcixyp Dios. ¹² Ahuijxcix ajcxy je xñi tzuu mña Dios anajty yajhuaad'aty co yajhuindigoya'ñ je naaxhuiñybi. Naymic'ijxigix co tzojc ymñipy yi' jadu'mbi xñi tzuu. Co yhuaad'ajtnip huin'it xñi, je tzajp yhuindigoydähuiip mñid jñin; je xñi po', je pojpp xemembi, je tuu enee jadu'ñyi yticxtähuiipy yjyidähuiipy jñinjoty. ¹³ Per ñich ajt n'ahuijxim je jemybi tzajp jemybi naax huídibi Dios ti xyaj'ahuanñyim, tüg tzinaaydac janch'oybi ma ca' ti jibicpi.

¹⁴ Paady ycixp miich ajcxy migügtijc huídibi ñich ooy ndzocyich njihuüyich, namñi m'ahuijxyp miich ajcxy co Dios yajhuindigoyaanip jada naaxhuiñ, naymic'ijxigix ma tüg'óciy ajcxy yi' mdzinaayin co mguydunipy ajcxy Dios ytiy'ajt jigix ajcxy Dios xypaady, ca' ajcxy ti tzip ti gapxy, ni ti jibicpi, e ni ti pocy, ac huädz jot huädz huinma'ñ anajty mñid'ajtcixy. ¹⁵ Cuenditungix

je mecxtujcín huídibí ñch ajt nHuindzín Jesucristo yajtumyb mñd ñch ajt jigix jëbí xyajñidzoocím ajt n'alma. Nañ jadu'n yí, ñch ajt nmigüg Pablo huídibí ooy ndzojcím, tí miich ajcxy xyñijayñygixy, jadu'n nej ixpijcín Dios tí ymöyí ma yí y'ayuc. ¹⁶ Ma tüg'óciy Pablo ñecy tíbí xyajñigüejxcixy, jada tíy'ajt tí xyajmñdmíydaaccixy. Nijëjity Pablo ñecy ooy chachchiphuinjihuñity, e nijëjity jäy ajcxy tigach ajcxy huinjihuñy Pablo y'ayuc, ca' ajcxy huinjihuñy nej Pablo yjamina'nañ. Huingjaty ajcxy ñigüej Pablo y'ayuc, e cí'm ñayyajhuinma'ñydgóoyigixy.

¹⁷ Paady ycixp miich ajcxy migügtijc huídibí ooy ndzocy njihuñyich, miich mnejhuñydaaygix jada tíy'ajt. Nayguend'ájtigix ca'ydi jibicjäydic mñd y'aní xyajñidigajtcixy xyajtüdigajtcixy, e ca'ydi m'ixtigñhuäccixy ma ajcxy mmibijcín jadu'n nej tíydudägy tí mmibijccixy. ¹⁸ Huen ñch ajt nHuindzín Jesucristo huídibí yajñidzoocp ajt n'alma ñgi may'ajt oy'ajt tunipy mñd miich ajcxy, e nañ ñgi yujcpedipy ajcxy yí m'ixpijcín ma yí y'tiy'ajt. Huen Jesucristo cōmay y'idipy etz m'idipy oy'ajtín mij'ajtín jadachambi xí tiempo etz jadu'n nej xí tiempo miimb cidacp. Jadu'n ngapxycíxyich. Amén.

1 SAN JUAN

Yi Jayijpi Necy Huidibi San Juan Yajnigujxy Je Mibijcpidijc Nidüg'óciy

¹ Dios y'ayuc jiiyim anajty co naaxhuiñybi chondacy. E tiy'ajt nyejcypich jadu'n nej nmidooyich ci'm yi' y'ayuc, jadu'n nej n'ixyich mïd ngi'mhuinich, jadu'n nej nhuindicxyich yi' ci'm, e nañ jadu'n nej nnidoñich mïd ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yegañ huidibi ca' cixañ tigoyañ niminaabi. ² Ti ñayguëxigyii ya naaxhuiñ je Dios y'ung huidibi ymïd jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajnimaaigyxy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jiiy ijtp ma Dios Teedy, nayguëxici je' ma ïch ajcxy. ³ Je huidibi ïch ajcxy n'ixyich nmïdohuich, cham miich ajcxy nyajnimaaigyxy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijäyiy ajcxy jigix ajcxy jotcujc'ajtin mbattáaygixipy mïd jada ayuc tiy'ajt.

Dios yi' je' je tïcxin jájin

⁵ Jadayaabi Dios y'ayuc ytiy'ajt Jesucristo ti xyajnimäyich e nañ cham ïch miich ajcxy nyajnimaaigyxy. Dios huädz ytiy'ajt mïdity, ca' ma Dios anïdägy. Jadu'n Dios nipaady nej tüg jïin ytïcxy ma tüg it e ni ca' ni mina ypich. ⁶ Co nmïnaanïm co Dios ajt mïd n'ijtim tú'ciy, e ca' yjanchity, ca' anajty ajt Dios ytiy'ajt nyajtuunïm, jadu'n nipaady nej jihuiy ndzinaayim agootztuum. Nïgoo n'ïndaacim, ca' anajty ajt nguyduunïm Dios ytiy'ajt. ⁷ Co nguyduunïm Dios ytiy'ajt jadu'n nej yi' ytiy'ajt mïdity, jadu'n nipaty nej jihuiy ndzinaayim ma jïin ytïcxy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy mïd ïch ajt nbocy ycixpi.

⁸ Co ixipy nmïnaanïm co ca' nbocytuunïm, nïgoob nayhuin'ïnim ci'm, e ca' jadu'n Dios ytiy'ajt yajpaady ma ïch ajt njot nhuinmañ. ⁹ Pen ngapxypïdzimim ajt nbocy ma Dios, yi' ñïdinaayb yi' y'ayuc huidibi ti xyajnimaaayim co ymecxamy ajt nbocy, e nañ tudägy ytuñ mïd ïch ajt ycixpi. Dios xyhuinmeecxim ajt nbocy etz xyajhuaatzim njot nhuinmañ jëbi n'ixmajtzim jibic-huinmañ. ¹⁰ Co ajt nmïnaanïm co ca' nbocytuunïm, hue' anajty Dios nyajnajxim anï, e ca' anajty ti ngöbijcim cixyjot huinijot yi' ytiy'ajt.

2

Cristo, ïch ajt nhuingapxi ma Dios

¹ Miich ajcxy migügtijc huidibi ooy ndzocy njihuiyich jadu'n nej ixipy ngi'm'ungich ngi'm'anäcïch, cham jada tiy'ajt nyajnijayiygixy, jigix ca' ajcxy mdundigóoygixipy. Pen ji nidügti miich ajcxy huidibi tundigooyb, jada migüg huidibi tundigooyb huen mibijctzoy Dios ma Jesucristo yxi mïd ypocy ycixpi. Jesucristo yi'je' huingapxp ma Dios Teedy mïd ajt nbocy ycixpi. Tudägy je', e jëbi xyhuingapxim ma Dios Teedy. ² Com Jesucristo ti y'ögy mïd ïch ajt nbocy ycixpi, paady ycixp jëbi capx'oyiy ma Dios mïd ïch ajt ycixpi e xycapx'oyiyim ïch ajt nbocy etz nañ capx'oyiyip tüg'óciy naaxhuiñ jäy ajcxy ypocy, yi' jäy ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it nejhuuyim tiydudägy jadu'n nej Dios may'ajt oy'ajt ti tuñ mïd ïch ajt ycixpi. ⁴ Co ixipy pinjaty yminañ co ñejhuuyi Jesucristo ytiy'ajt e ca' cuychinaayi yi' ytiy'ajt hue' yi' tzach anïdaacpi, e ca' mïdity Dios ytiy'ajt. ⁵ Yi jäy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuuyim co nyajmij'ajtim Dios. ⁶ Yi jäy ajcxy pinjaty minamb co ymïd Jesucristo y'ayuc ytiy'ajt ma je' y'ay yjot, copicy ajcxy chinaaygixipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtijc huïdibi ooy ndzocy njhuuyich, ca' nmïnaanim jemybi tiy'ajt ajcxy nyajnimähuamy ma jada necy. Je' jada je tiy'ajt huïdibi jecy'ajty ti mnejhuuygixy co oga'n ajcxy mmijpidacy Jesucristo. Jada tiy'ajt jecyip jada je' huïdibi cham ajcxy mmidooyb jadüg'oc. ⁸ Nañ jemy jada tiy'ajt nañ jadu'n huïdibi nyajnimaaygixyp ma jada necy. Jada je'je tiy'ajt huïdibi Jesucristo ymïd ma yjot yhuinma'ñ etz nañ ïch ajt nmïd ma ajt njot nhuinma'ñ. Yi jecyip ayuc huïdibi ca' ytiy'ajtiy, ti yi' ñaxy e cham Dios ytiy'ajt tiydudägy nyajtuunim, jadu'n nej jihuuy je coodzpi ti ñaxy e cham ti yximïy.

⁹ Yi jäy ajcxy huïdibi minam co Dios y'ayuc ytiy'ajt ajcxy cuyduuni e ca' ixáanigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbizimy jadu'n nej jihuuy agootztuuy ijtcixy. ¹⁰ Yi jäy ajcxy pinjaty tzojcp jihuuyb ymigügtijc hue' yi' yajpaatcixy mïd Dios ytiy'ajt ma ajcxy yjot yhuinma'ñ, jadu'n nipaady nej jihuuy y'ijtcixy ma xï ytïcxy, ca' ajcxy ñïdigoy ytüdigoy ma Dios ytiy'ajt. ¹¹ Yi jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuuy agootztuuby y'ijtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuuygixy huïdibi tiy'ajt jëbi yajtungixy, com jibic-huinma'ñ chachtuumyb ajcxy huïdibi ca' Dios tiy'ajt'adyii.

¹² Miich ajcxy migügtijc huïdibi ooy ndzocy njhuuyich ajcxy jadu'n nej ixipy ngi'm'ung ngi'm'anäcïch, com Dios ti miich ajcxy mbocy xyhuinmecxtayi co Jesucristo y'o'cy mïd ajcxy mbocy ycixpi, paady ycixp cham nnijayïygixy. ¹³ Cham nnijayïygixy miich ajcxy mij'anäctijc, com ti mmijpidaaccixy Jesucristo huïdibi jii'ajt co naaxhuiñybi oga'n choondacy etz chambaad yjii'atyñi. Cham nnijayïygixy miich ajcxy anäctijc, com ti mmimadaaccixy je ca'oybi.

Cham nnijayïygixy miich ajcxy pi'ctijc mutztijc com ti mmijpidaaccixy Dios Teedy. ¹⁴ Cham nnijayïygixy miich ajcxy mij'anäctijc, com ti mmijpidaaccixy ajcxy Jesucristo huïdibi jii'ajt co naaxhuiñybi oga'n chondacy etz yjii'atyñi chambaad. Cham nnijayïygixy miich ajcxy anäctijc, com mic mjot mhuinma'ñ mïdity ajcxy etz Dios ytiy'ajt yajpatp ma ajcxy mjot mhuinma'ñ, paady ycixp ajcxy ti mmimadaaccixy yi' ca'oybi.

¹⁵ Migügtijc, ca' anaxy m'adzójccixip yi huïdibi mïd ndzinaayim ya naaxhuiñ. Yi jäy ajcxy huïdibi adzojctaaayb anaxy yi huïdi mïd ndzinaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzojctähuipy ajcxy tüg'ócïy huïdijaty ya naaxhuiñ yajpatp, jadu'n nej njot nhuinma'ñ tzojcm, jadu'n nej tijaty n'ijxim, jadu'n nej huïdibi amij agix mïd ndzachnayjihuuyim. Com yi' jadu'mbi huinma'ñ ca' yajpaady ma Dios Teedy, hue' yi' yajpaady ya naaxhuiñ. ¹⁷ Huïdijaty ya naaxhuiñ yajpatp cixipy tigoyipy yi', nañ jadu'n ytigoya'ñ huïdijaty yi huinma'ñ y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je t̄iy'ajt etz je an̄i

¹⁸ Miich ajcxy migügt̄ijc huiḍibi ooy ndzocy njihūiyich nej ixyipy ngi'm'ung ngi'm'an̄ac̄ich, tim c̄ixn̄ip tiempo ya naaxhuiñ. Ti jada mnejhūiyḡixy co miinaam jāy ajcxy huiḍibi nayyajnaxaan̄ip nej Cristo' e ca' yjanch̄ity. Miid co cham ji mayjāy ajcxy huiḍibi nayyajnax̄ip jadu'n nej Cristo, paady ne-jhūiyim co tim c̄ixn̄ip ȳi tiempo miid ḥch naaxhuiñyāy ajt yc̄ixpi. ¹⁹ Ȳi jāy ajcxy huiḍibi nayyajnaxaan̄ip jadu'n ixyipy nej Cristo, naybījc-huāc̄xaan̄ip ȳi ajcxy miid ḥch ajt, ca' anajty ajcxy yt̄üḡiy ȳi' ajcxy yhuinma'ñ miid ḥch ajt nhuinma'ñ, t̄ügmucy ixyipy ajt xym̄id'ijtim. Ji jadu'n ñiguēx̄igy co ca' yt̄üḡiy yhuinma'ñ miid ḥch ajt nhuinma'ñ co ti ajcxy xypuhuāctuutim.

²⁰ Ti miich ajcxy xy'adiḡiy xyjottiḡiy Dios ȳjhūi'ñ ymic'ajt, paady miich ajcxy mhuj̄ihūiy t̄üg'óciy Dios y'ayuc yt̄iy'ajt. ²¹ Ca' nm̄inaan̄im paady miich ajcxy nijaȳiyḡixy co ca' mhuj̄ihūiyḡixy Dios yt̄iy'ajt. Paady nnijaȳiyḡixy miich ajcxy jiḡix mnejhūiyḡixyip Dios yt̄iy'ajt etz mnejhūiyḡixyip co ȳi jāy ajcxy huiḍibi indaacp, ca' ȳi' ajcxy Dios yt̄iy'ajt miid̄ity.

²² Ȳi' je' indacp huiḍibi minamb co Jesús ca' ȳi' yj̄ej̄ity je Cristo huiḍibi Dios yquejx. Ȳi' indacpi je'midzip'ajtp Jesucristo etz ca' mibicy Dios Teedy etz nañ ca' mib̄ijci Dios y'ung. ²³ Je jāy ajcxy huiḍibi indacp minam co Jesús ca' yj̄ej̄ity je Cristo, e nañ ca' ajcxy miid̄ity Dios Teedy yt̄iy'ajt. Ȳi' jāy ajcxy huiḍibi minam co Jesús yj̄ej̄ity je Cristo je Dios y'ung, nañ ym̄id ajcxy Dios Teedy yt̄iy'ajt.

²⁴ Je ayuc t̄iy'ajt huiḍibi miich ajcxy mm̄idou co oga'n ajcxy mm̄ijpidacy Jesucristo, jada ayuc t̄iy'ajt mguyd̄unḡixyipy e ca' mj̄äydḡooyḡixipy. Pen mmi'ijtc̄ixp ȳi' ayuc huiḍibi Dios yj̄äy oga'n ajcxy xyaj'ixpījc, huin'tit j̄ebi miich ajcxy myajpatc̄ixy ma Dios y'ung etz je' yajpaady ma Dios Teedy. ²⁵ Dios ti xyajhuinhuan̄iyim co xyajtz̄in̄ahuaan̄im ajt n'alma huinix̄i huin̄ityempo.

²⁶ Jada t̄iy'ajt ajcxy nyajnijaȳiyb jiḡix ca' mm̄ijpidáacc̄ixipy ȳi' ajcxy y'ayuc huiḍibi xyajhuinma'ñydḡoyaam ajcxy. ²⁷ Ȳi' Dios ȳjhūi'ñ ymic'ajt huiḍibi ti xy'adiḡiyḡixy ti xyjottiḡiyḡixy ijtt̄ib̄ ȳi' ma miich ajcxy mjot mhuj̄inma'ñ. Paady yc̄ixp ca' myajmayajtc̄ixy p̄in xyaj'ixpīḡip ajcxy com je Esp̄iritu Santo xyaj'ixpīḡip ajcxy. Je Esp̄iritu Santo xyajni'ix̄iydaayb ajcxy t̄üg'óciy Dios yt̄iy'ajt, t̄iydud̄ägy ȳi', ca' ȳi' y'an̄ij̄ity. E jadu'n nej je' xyajni'ix̄iyḡixy, jadu'n mguydun̄ipy ajcxy. Mi'ijtc̄ix Dios ȳjhūi'ñ ymic'ajt ma mjot mhuj̄inma'ñ ajcxy.

²⁸ Miich ajcxy migügt̄ijc, mi'id̄ipy ajcxy Jesucristo yt̄iy'ajt ma mjot mhuj̄inma'ñ jiḡix co ñayyajniguēx̄igyb Jesucristo ya naaxhuiñ jadüg'oc, huin'tit jotcujc ajt nnaȳihūiyim etz ni ca' j̄ibic naȳjhūiyim co anajty xyñimiin̄im. ²⁹ Ti mnejhūiyḡixy co ȳi' Jesucristo t̄iydud̄ägy ytuñ, e ti mnejhūiyḡixy nañ jadu'n co t̄üg'óciy ȳi' jāy huiḍibi t̄iydud̄ägy tumb, ȳi' je' ajcxy Dios y'ung'ajtp.

3

Dios ḥch ajt xy'ung'ajtim

¹ J̄ihūi'ñybījcc̄ix t̄üg'óciy je m̄ijpi may'ajt Dios Teedy ti tuñ miid ḥch'ajt yc̄ixpi jiḡix j̄ebi naydij̄im Dios y'ung. Ȳi' naaxhuiñyāy ajcxy huiḍibi ca' m̄ijpidaacc̄ixy Jesucristo ca' ajcxy nejhuȳiḡixy huinj̄ihūiyḡixy Jesucristo yt̄iy'ajt, paady yc̄ixp ca' ajcxy nejhuȳi huinj̄ihūiy co Dios xy'ung'ajtim. ² Miich ajcxy migügt̄ijc huiḍibi ooy ndzocy njihūiyich, jadachambi Dios ḥch ajt xy'ung'ajtim. Jadachambi ca'p y'ocniguēx̄igyñi nej ḥch ajt jiini n'idaan̄im. Co anajty Jesucristo ym̄iñ jadüg'oc ya naaxhuiñ, huin'tit nguipxyjatyt̄iyim miid je', com n'ixaan̄im ajt Jesucristo jadu'n nej je' yajpaady. ³ T̄üg'óciy jāy ajcxy huiḍibi j̄ijp'ijxp co Jesucristo ymiina'ñ jadüg'oc ya naaxhuiñ, copicy

yajhuädziipy ajcxy yjot yhuinma'ñ. Huen mi'ijtcixy oyjot oyhuinma'ñ jadu'n nej Jesucristo mi'ity oyjot oyhuinma'ñ.

⁴ Tüg'óciy jäy ajcxy huidibi pocytumb, hue' ajcxy ymidundigooyb Dios ycötujcin. Co ajcxy ytundigoy, ca' ajcxy ymadägy nej cuydunipy Dios ycötujcin.

⁵ E mnejhuüyb miich ajcxy co yi Jesucristo ti ñayguëxigyii ya naaxhuiñ jigix jëbi xyajpocyñihuaatzim. Jesucristo ca' anajty ti pocy müidity, ca' anajty ma ti ytundigoy.

⁶ Tüg'óciy jäy ajcxy huidibi cuydundähuam Jesucristo ytiy'ajt, ca' huaad pocytuñ. Yi jäy ajcxy huidijaty pocytundib, ca'ni icy ajcxy yi Jesucristo, nañ ca'ni ajcxy huinjhuüy yi' ytiy'ajt. ⁷ Miich ajcxy migügtijc huidibi ooy ndzocy njihuüyich jadu'n nej ngi'm'ung ngi'm'anäcich, ix ni pin xychuin'ingix. Yi jäy ajcxy huidibi oyjot oyhuinma'ñ yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chinay yjugy'ajty.

⁸ Yi jäy ajcxy huidibi tzachpocytundibni, yi' ajcxy mujcu' yjäy'ajtip. Com jadu'n nej chondacy je naaxhuiñybi oga'n yi mujcu' jëni anajty jadu'n chachpocytuñ. Paady ycixp Dios quejxy y'ung ya naaxhuiñ co je mujcu' yhuinma'ñ yajcödigoyaani.

⁹ Yi jäy huidibi Dios ajcxy ti ymöyii jemybi jot jemybi huinma'ñ, ca' ajcxy ypocytundüy com je'co tú'ciy ajcxy yjot yhuinma'ñ müidity, jadu'n nej anajty Jesucristo yjot yhuinma'ñ müidity, ca' huaad ajcxy ypocytundüy com Dios ti ymöyii ajcxy jemybi jot jemybi huinma'ñ. ¹⁰ Paady ycixp yñiguëxigy yi jäy ajcxy pinjaty Dios y'ung'ajtip etz pinjaty mujcu' ung'ajtip. Yi huidibi ajcxy ca' tiydudägy cuydungixy Dios ytiy'ajt etz ca' ajcxy ixa'ñ ymigügtijc, etz ca' ajcxy tzocy jihuiy ymigügtijc, hue' ca' ajcxy Dios ymöyii jemybi jot jemybi huinma'ñ, mujcu' ajcxy y'ung'ajtip.

Naychojcin nayjihuiyim miñ xyipy

¹¹ Jada je' je ayuc tiy'ajt huidibi miich ajcxy ti mmidoogixy co oga'n ajcxy mmijpidacy Jesucristo co copicy naychojcin nayjihuiyim nidüg nidüg. ¹² Ca' huaad jadu'n n'iditizim nej Cañ y'idich co anajty mujcu' huinma'ñ müidity, chi y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'ñ yajtuñ, e je' y'uch oyhuinma'ñ anajty yajtumyb paady ycixp je y'uch yaj'o'cy.

¹³ Miich ajcxy migügtijc, ca' ooy ndzachhuinmaay ajcxy co ca' yi naaxhuiñyjäy ajcxy xy'ixa'ñ, huidibi ajcxy ca' Dios y'ayuc mijpidaaci. ¹⁴ Com ich ajt nnejhuüyim co je nmigügtijc ajcxy ndzojcin njihuüyim co n'o'cim, huin'it njugypigaanim e ndzinähaanim jiiby tzajpjoty huinixi huin'it tiempo. Yi jäy ajcxy pinjaty ca' ymigügtijc ixa'ñ ajcxy co ajcxy y'ögipy, huin'it ca' ajcxy chinähua'ñ jiiby tzajpjoty. ¹⁵ Huenpinjäyity huidibi ca' ymigüg ixa'ñ, nipatpy nej ytundigoy jadu'n nej jäyyaj'o'cpi ytundigoy e nañ jadu'n nejhuüyim, co je' y'ögipy, ca' chinähua'ñ jiiby tzajpjoty. ¹⁶ Ya icyipy jëbi ich ajt ijxpejt nbjicim nej huaad migügtijc ndzojcin njihuüyim, jadu'n nej Jesucristo ijxpejt yejcy co ñayyojxi ñaydooci co y'o'cy müid ich ajt nbocy ycixpi. Paady ycixp ich ajt jëbi huaad ndzojcin njihuüyim nmigügtijc, oy jada ndimco'ögyim. ¹⁷ Janch pinjaty yjamid ymadaacin, e yja'ixpy co ymigüg tigati yajmayjaty, e amij agix ñayjihuiyii, ca' pa'ayo'n müidity, ca' pubeda'ñ ymigüg, ca' je' anajty tzocy jihuiy ymigüg jadu'n nej Dios chogyii yjihuiyii. ¹⁸ Miich ajcxy migügtijc huidibi ooy ndzocy njihuüyich jadu'n nej icyipy ngi'm'ungich, müid oyjäy'ajtin etz müid Dios ytiy'ajt tzoc yajxon naychojcin nayjihuiyim miñ xyipy. Ca' nminaanim nigoo ngapxim nmiydaacim ahuac aguuy.

Cixyjot huinjot naybidaacim ma Dios

¹⁹ Co nyajtuunim oyjäy'ajtin müid ich ajt nmigügtijc, huin'it nejhuüyim co Dios ytiy'ajt nguyduunim e jotcuyc nayjihuiyim co Dios n'ojadajtim. ²⁰ Co jibic

njot nhuinma'ñ ajt njihuüyım, mıd co ca' oyjäy'ajtin nduunım, jac nigı Dios jıbic ñayjihuiyım com yı' jacmıjhuinma'ñ mıd, ca'ydi ñch ajt, e yı' nejhuiydaayb tüg'óciy tijaty ajt nduunım. ²¹ Miich ajcxy migügtıjc huıdibi ooy ndzocy njihuıyich, co ca' ti jıbicpi njihuıyım ma ajt njot nhuinma'ñ mıd co oybi nduunım, huin'it jotcuyc ajt n'ıjtım mıd Dios. ²² E huentımtııjıty huıdibi ñch ajt Dios nyajmıbjctzoohuım, yı' xymooyım mıd co yı' y'ayuc nguyduunım, e nduunım je huıdibi yı' yjäygidacpy. ²³ Dios jada ti xyajnajtz'ane'mıyım co tzoc mıbjcım mıjpıdaacım yı' y'ung Jesús etz tzoc naychojcım nayjihuiyım mıñ xyıpy, jadu'n yı' ti xyajnajtz'ane'mıyım. ²⁴ Yı jäy ajcxy pinjaty cuydumb Dios ytıy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuiyım co Jesucristo ytıy'ajt yajpaady ma ñch ajt mıd co je Dios yjihui'ñ ymic'ajt ti xy'adigıyım xyjottıgıyım.

4

Dios yjihui'ñ ymic'ajt etz je ca'oybi yjihui'ñ

¹ Miich ajcxy migügtıjc huıdibi ooy ndzocy njihuıyich, ca' ajcxy mmıbjctähuıpy tüg'óciy jäy huıdibi Dios y'ayuc capxhuäcxıp. Mıdo'mbjccıxy jayıp penı janch ajcxy mıdıty Dios yjihui'ñ ymic'ajt. Com jı mayjäy ya naaxhuiñ huıdibi mınam co Dios y'ayuccapxhuäcxı yı' ajcxy e ca' yjanchıty. ² Jada je' je tıy'ajt ma huaad mjihuı'ñybjccıxy pen janch mıdıty ajcxy Dios yjihui'ñ ymic'ajt, yı' ajcxy huıdibi Dios y'ayuccapxhuäcxıp: tüg'óciy jäy huıdibi capxhuäcxp co Jesucristo yma'xung'ajty ya naaxhuiñ mıd ñinıcx, Dios yı' ytıy'ajt ymıd. ³ E tüg'óciy jäy ajcxy huıdibi ca' ñıgapxpety ajcxy co Jesucristo chinäy ya naaxhuiñ mıd ñinıcx, ca' yı' Dios ytıy'ajt mıdıty. Ti miich ajcxy ayuc mıdoogıxy oga'n co mınaam yı' naaxhuiñyjäy ajcxy mıd je mujcu' yjihui'ñ ymic'ajt, huıdibi mıdzip'ajtp Jesucristo. E ti je'du'n ajcxy ymiingıxy. Jada je'du'n ajcxy huıdibi ca' ñıgapxpejtcıxy co Jesucristo yma'xung'ajty ya naaxhuiñ mıd ñinıcx.

⁴ Migügtıjc huıdibi Dios yjihui'ñ ymic'ajt ti xy'adigıygıxy ti xyjottıgıygıxy, e ti miich ajcxy mmımadaaccıxy yı' huıdibi ajcxy ñıgapxpejtp co Jesucristo ca' ma'xung'ajty ya naaxhuiñ mıd ñinıcx. Com Dios huıdibi miich ajcxy xy'ane'mb, jac mıj yı' ca'ydi je mujcu', paady miich ajcxy ti mmımadaaccıxy je mujcu'. ⁵ Je huıdi ajcxy jadu'n jamınaamb co Dios y'ayuc capxhuäcxı e ca' yjanchıty ya naaxhuiñ ajcxy tıy'ajt ti patcıxy ma je mujcu', paady ycıxp yı' naaxhuiñ yhuıjy'ajtin ajcxy tzachcapxhuäcx, e yı' naaxhuiñyjäy tzachmıjpıdaaccıxy etz amıdoo'ıjti ajcxy y'ayuc. ⁶ ñch ajt tıy'ajt ti nbaatım ma Dios. Tüg'óciy jäy ajcxy huıdibi Dios ytıy'ajt huınjihuiyıp, y'amıdoo'ıjtyp ajcxy ñch ajt n'ayuc. Yı jäy ajcxy huıdibi ca' Dios ytıy'ajt mıdıty, ca' ajcxy amıdoo'ıjtcıxy ñch ajt n'ayuc, paady ycıxp n'ıjxcajpım je jäy ajcxy huıdibi tudägyıp, etz je jäy ajcxy huıdibi ñıgoo tzach'anıdaacp.

Dios ooy xychojcım xyjihuiyım

⁷ Miich ajcxy migügtıjc huıdibi ooy ndzocy njihuıyich, tzoc oy yajxon naychojcım nayjihuiyım mıñ xyıpy. Dios ti yecy ymic'ajt ma ajt njot nhuinma'ñ jıgıx jėbi ajt naychojcım nayjihuiyım mıñ xyıpy. Tüg'óciy jäy huıdibi ymigügtıjc chojccıxyp yjihuiyıgıxyp, ti Dios yjihui'ñ y'adigıyıgıxy yjottıgıyıgıxy etz ñejhuiyıp yhuınjihuiyıp ajcxy Dios y'ayuc ytıy'ajt. ⁸ Pinjaty ca' ymigüg tzocy jihuiy, ca' yı' nejhuiyı huınjihuiyı Dios ytıy'ajt, com Dios tüg'óciy yı' tzojctäy. ⁹ Jada je'je tıy'ajt co Dios ajt xychojctaayım co je y'ung huıdibi tügpajcpi ymıd, quejxy ya naaxhuiñ jıgıx ñch ajt nbaatım Dios yjihui'ñ ymic'ajt mıd yı' ycıxpi. E Dios yjihui'ñ ymic'ajt ca' ycıxa'ñ ytıgoya'ñ

nimina, paady ich ajt njugy'ajtin ca' ycixa'n ytigoya'n. ¹⁰ Dios ti xychojcin ti xyjihuiyim, paady quejxy y'ung ya naaxhuiñ jigix jëbi xycodinaayim ma yi Dios ycötujctac miid ich ajt nbocy ycixpi. Ca' nminaanim miid co Dios ti ndzachmijpidaacim ooy mijcajee, hue' janchtiy yi' ninigoob may'ajt tuñ miid ich ajt ycixpi.

¹¹ Miich ajcxy migügtijc huidibi ooy ndzocy njihuiyich, miid co Dios jadu'n ajt ti xychojcin ti xyjihuiyim mijcajee oga'n, paady ycixp tzoc ich ajt naychojcin nayjihuiyim miñ xyipy. ¹² Ni minaabi pin ca' icyñi Dios. Co naychojcin nayjihuiyim miñ xyipy, huin'it Dios yjihuiñ ymic'ajt ijttiy ma ich ajt njot nhuinma'n. Jadu'n Dios yjihuiñ ymic'ajt xypubejtim xypudigiyim, jëbi nigë naychojcin nayjihuiyim nidüg nidüg jadu'n nej Dios jäygidägy. ¹³ Nejhuiyim ich ajt co nyajpatim ma Dios, e nañ jadu'n Dios yajpaady ma ich ajt, miid co yi' yjihuiñ ymic'ajt ti xy'adigiyim ti xyjottigiyim. ¹⁴ E ich ajcxy, ti ich ajcxy yi' Jesucristo n'ixyich, paady ich ajcxy nidiy'ajt'ajtyich co je Dios Teedy quejxy y'ung ya naaxhuiñ co yajnëdzöga'n tüg'óciy naaxhuiñyây co anajty Dios nbocy ajt xyajcomidoohuaanim. ¹⁵ Tüg'óciy jäy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ Ich ajt nnejhuiyim etz nmijpidaacim jadu'n nej Dios ajt xychojcin xyjihuiyim nidüg'óciy. Dios chojctaayb yi' nidüg'óciy yi' jäy. Pinjaty tzojccixp jihuiyigixp ymigügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Miid co yajxon nmijpidaacim Dios paady jotcuje nnaanaanim ma Dios ycötujctac, mina anajty xyajcomidouhuim ajt nbocy. Com tú'ciy ich ajt nyajpaatim ya naaxhuiñ, tim jadu'n nej yi' Jesucristo. ¹⁸ Co nmijpidaacim Dios, huin'it ca' ajt nmidzigiyim nmidzo'yduunim. Peni yajxon nmijpidaacim Dios, huin'it jëbi tzig'iñ nyajqueecim. Yi' jäy ajcxy huidibi tzig'i'yb etz tzo'yduim, ca' ajcxy Dios mijpidägy yajxon.

¹⁹ Com Dios jayijp ti xychojcin ti xyjihuiyim, paady ycixp tzoc ajt naychojcin nayjihuiyim nidüg nidüg etz nañ nmijpidaacim Dios. ²⁰ Yi' jäy ajcxy pinjaty jadu'n minamb co mijpidaaccixy Dios, e ca' ymigüg tzogaangixy ixaangixy, hue' je' ajcxy anidaacp. Com peni ca' jajtciy nej tzojccixipy jihuihuyigixipy yi' ymigügtijc huidibi ajcxy icy'ajtpy, ca' ajcxy jadip nej mijpidaaccixipy Dios huidibi ca' icy'ajtigixy. ²¹ E Dios ich ajt xyñajtz'ane'miyim co pin Dios mibijcp mijpidacp, huen nañ jadu'n ymigügtijc tzocy jihuiy.

5

Yi pin huidibi ca' ixa'n midohua'n Cristo y'ayuc

¹ Tüg'óciy jäy huidibi mibijccixp co Jesús je' je' je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiyigixy je' ajcxy huidibi Dios y'ung'ajtip. ² Co ndzojcin njihuiyim huidibi Dios y'ung'ajtip, je' jada je' je ijxpejt co nañ jadu'n jëbi nmijpidaacim Dios etz jëbi nguyduunim nej xyñajtz'ane'miyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'miyim e yi' y'ayuc ca' ooy chipity co nguyduunim. ⁴ Com tüg'óciy yi' jäy ajcxy huidibi Dios ti y'adigiyii ti yjottigiyii yjihuiñ ymic'ajt, ymihuindinaayb ajcxy yi' jibic-huinma'n ya naaxhuiñ. Co mibijcin Dios, huin'it jëbi mihuindinaayim yi' jibic-huinma'n ya naaxhuiñ. ⁵ Yi' jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi' jibic huinma'n ya naaxhuiñ.

Je ayuc huidibi nidiy'ajt yi' Dios y'ung

⁶ Yi Jesucristo je' je' huídibi miin ya naaxhuiñ, je' je' huídibi niibejt etz ñi'py teemy gujy co y'o'cy miid jāy ajcxy ypocy ycixpi. Ca' nmīnaanīm jēyi anajty ti ñībety, hue' nañ jadu'n ti y'ōgy miid ajt nbocy ycixpi. ⁷ E yi Espíritu Santo yi' tiy'ajt yejcp co Dios Jesús y'ung'adyii, com je Espíritu Santo yi' Dios ytiy'ajt ymiid. ⁸ Ji tugñgnax huídibi tiy'ajt yejcp co Dios Jesús y'ung'adyii: je Espíritu Santo, je niibejtīn, etz Jesús ñi'py co teemy cujy miid ich ajt nbocy ycixpi. E jadu'n nidugñg ñaybaatigixy tūgnax, e tūgnax ytiy'ajt yejccixy. ⁹ Miipidaacīm ich ajt jāy y'ayuc co Dios Jesús y'ung'adyii, niği copicy co nmīpidaacīm Dios ytiy'ajt huídibi ti yecy miid y'ung ycixpi, com jac mic'ajt miid yi' ca'ydi jāy ajcxy. ¹⁰ Yi jāy huídibi miipidaaccixp Dios y'ung, ymi'ijtpy ajcxy je tiy'ajt ma yjot yhuinma'ñ. Yi jāy ajcxy huídibi ca' miibijccixy miipidaaccixy je Dios y'ayuc ytiy'ajt, hue' ajcxy yajnajcixy Dios nej anñdāgyīn co ca' miibijccixy yi' Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyīm ajt n'alma yjugy'ajtin huídibi ca' ycixipy ytiyoyipy nimīna. Dios y'ung ca' y'alma ycixipy ytiyoyipy nimīna, paady yi' ti yaj'oyiy nej jēbi ajt n'alma y'ijtim huinixi huinitiempo. ¹² Pinjaty ti miipidaaccixy Dios y'ung, yi' ajcxy y'alma ca' ycixipy ytiyoyipy nimīna. Pinjaty ca' miipidāgy Dios y'ung, yi' ajcxy y'alma cixipy tiyoyipy co y'ōgipy.

Capxycijxin etz capxhuijin

¹³ Jadayaabi ayuc ajcxy nyajnijayiygixp ma jada necy jigix jēbi miipidaaccixipy Dios y'ung, etz jēbi mnejhuīygixy tiydudāgy co mjugypijccixipy jadūgtecy co anajty ti m'o'ccixy e ca' ajcxy m'alma ycixipy ytiyoyipy.

¹⁴ Jada jotcuyc'ajtin ich ajt nmīd'ajtim co nmībijctzouhuīm Dios jadu'n nej Jesucristo xyñajtz'ane'miīm, yi' ich ajt jēbi xymīdouhuīm. ¹⁵ Miid co nnejhuīiyīm co yi' ajt xymīdouhuīm ma tijaty Dios nyajmiibijctzouhuīm, paady ycixp nejhuīiyīm co nmīd'ajtim tijaty anajty ti nyajmiibijctzou.

¹⁶ Co pinjaty ixycy co ymīgūg ypocytuñ huídibi huaad jēbi Dios meecxy, huen miibijctzooyi Dios miid yi' ycixpi, e Dios yajtzināhuīyb pen ca' anajty ooy ymiipocyty je tiibi anajty tuñ. Com ji tūg miipocy huídibi Dios ca' huinmecxy. Pen ti miipocytuñ ca' huaad Dios ocjacmiibijctzooni com ca' yi' y'oc-huinmecxaani. ¹⁷ Tūg'ócy jibic-huinma'ñ huídibi jāy ytumyb, pocy yi', per ji jibic-huinma'ñ huídibi jāy ytumyb, huídi jēbi Dios huinmecxy e ca' y'alma ytiyoyip.

¹⁸ Nejhuīiyīm co tūg'ócy pinjaty Dios ti ymōyīi jemybi jot huinma'ñ, ca' yi' y'ocpocytuni. Yi Dios y'ung, huídibi ti ymōoyigixy jemybi jot huinma'ñ, cuend'ajtip yi' ajcxy, ca'ydi je mujcu' xyajhuinma'ñydgóoyigixy.

¹⁹ Nejhuīiyīm ich ajt co Dios jadu'n xy'ane'mīm njot nhuinma'ñ etz nejhuīiyīm co tūg'ócy jacjadyii naaxhuiñjāy huídibi ca' miipidaaccixy Dios, je mujcu' jadu'n yjot yhuinma'ñ y'ane'mip ajcxy.

²⁰ E nejhuīiyīm co yi' Dios y'ung ya y'oy naaxhuiñ e ti xyajnejhuīiyīm yi' y'ayuc ytiy'ajt, jigix jēbi nejhuīiyīm huinjihuīiyīm yajxon je Dios janchypī tudāgypi. Nmī'ijtim ma ich ajt ndzinaayīn je janchypī je tudāgypi je Dios y'ung je Jesucristo. Jada jēdu'n je tiydudāgypi Dios, etz je Dios yjugy'ajtin camīnaabi ycacixy ycatigoy. ²¹ Miich ajcxy migūgtijc huídibi ooy ndzocy njihuīiyich jadu'n nej ixipy ngi'm'ung ngi'm'anācīch, ca' nigoo mdzachDios'ajtigixy tijaty huídibi ca' ni ti mic'ajt miidity, jadu'n nej Dios Teedy tzajpjtopy ymic'ajt miidity.

2 SAN JUAN

Yi Mimetzpi Necy Huidibi San Juan Yajnigüejsx Tüg Mibijcpi Töxyjäybi

¹ Ich Juan huidibi nigohuajc'ajt Dios yjäy. Nyajnigüejsxpich miich töxyjäy jada necy, miich Dios xyjäy'ajtp, e ti mmijpidägy Jesucristo. Nañ nyajnigüe-jxypich jada necy tüg'óciy miich m'ung m'anác ajcxy. Ooy ndzocy njihuüyich miich ajcxy. Ca' nminaanim ich naydügpajc ndzojcyp njihuüybich miich ajcxy, nañ jadu'n tüg'óciy jäy ajcxy, huidibi hujihuüygixp Dios ytiy'ajt, xychojccixp xyjihüüygixp ajcxy. ² Ich miich ajcxy ndzojccixyp njihuüygixyp com Dios ytiy'ajt yajpatp ma ich ajt njot nhuinma'ñ, etz yi' ijtp huinixi ma ich ajt. ³ Huen Dios Teedy etz ich ajt nHuindzin Jesucristo, yi Dios y'ung oy'ajt may'ajt tuñ müd miich ajcxy, huen xypa'ayoogixy huen xyajjotcugüygixy müd co mguydungixy yi' ytiy'ajt etz mnaychójcigixy mnayjihüüygixy miñ xyipy.

⁴ Ti nminaybadyiijich nijëjity miich m'ung m'anác, e ooy njotcugüyich müd co tiydudägy ajcxy payöy Dios ytiy'ajt, jadu'n nej Dios Teedy ajt ti xyñajtz'ane'müyim. ⁵ Cham njacnimäyich miich ajcxy co jëbi ajcxy mnaychójcigixy mnayjihüüygixy miñ xyipy. Ca' nminaanim hujemy jada tiy'ajt huidibi cham nyajnijayüygixipy. Je' jada je ayuc huidibi oga'n'aty ti nbaatim co ti nmibijcim Jesucristo. ⁶ Co ndzojcm njihuüyim nmigügtijc, jada je' tiy'ajt co nguyduunim nej Dios ajt ti xyajnajtz'ane'müyim. Jada huidibi Dios ti xyajnajtz'ane'müyim huidibi miich ajcxy ti mbaatcixy, co oga'n ti nmibijccixy Jesucristo, copicy co ajcxy mnaychójcigixipy mnayjihüüygixipy.

Yi jäy ajcxy huidibi anüdaaccixp

⁷ Com ji mayjäy ya naaxhuiñ huidibi huin'ümb yi jäy ajcxy. Yi' ajcxy ti puhuäctüdy mibijcpidijc, yaj'ixpijcp ajcxy co Jesucristo ca' ñayguëxici ya naaxhuiñ müd ñinix. Jadayaabi jäy ajcxy yhuin'ümyb yhueñypinity etz Jesucristo ymidzip'ajtyp ajcxy. ⁸ Naygüendi'ájtigix ci'm. Ix mgamijpidaaccixy yi' ajcxy y'ayuc. Co ajcxy myajhuin'üngixipy, huin'it anajty myajtigooygixy je oy'ajt huidibi mbadaangixyp ma Cristo. Co mguydúngixipy Jesucristo ytiy'ajt, huin'it mbaatcixipy tüg oy'ajt ca'pxypi jilby tzajpjoty.

⁹ Tüg'óciy jäy huidibi ca' cuydungixy je Jesucristo y'ayuc ytiy'ajt, ca' ajcxy müdity Dios ytiy'ajt ma ajcxy yjot yhuinma'ñ. Je jäy ajcxy huidibi cuydundüib je Cristo y'ayuc ytiy'ajt, ymüid ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Peni ji pinjaty ñicxy ma miich ajcxy huidibi yaj'ixpijcp huidibi ca' ytiy'ajtity, ca' ajcxy mgöbiguipy ma mdijcin, e ni ca' ajcxy mjijp'ixihuipy. ¹¹ Com Dios yjäy pinjaty anajty jijp'ixiüyb je jäy ajcxy huidibi yaj'ixpijc huidibi ca' ytiy'ajtity, hue' je' tundigooyb ma Dios ytiy'ajt. Hue' je' anajty paady jadu'n nej jihuüy ti jijptigüyñi ajcxy je huingbi ixpijcin huidibi ca' ytiy'ajtity.

Capxyçixin

¹² Oy ich ooy mij may miich ajcxy njamüidmüydägaangixy per ca' miich ajcxy jadu'n nijayihuaangixy necy'am. Hue' janchtiy njijp'ixyich co ci'm nninixangixy jim, e nmüid müydägaangixy au'am jigix ajcxy ooy jotcuje mnayjihüüygixipy.

¹³ Je mdzi' y'ung ajcxy huídibi ya yajpatcixp xyajniguejxp ycapxpocxin, je huídi ajcxy Dios nañ jadu'n ti yhuin'íjxigixy. Jadu'n ngapxycíxyich miíd miich. Amén.

3 SAN JUAN

Yi Necy Huidibi San Juan Yajniguejx Gayo

¹ Señor Gayo:

Nguejxypich capxocxin ma miich. Hich miich nyajniguejxyp jada necy. Nnigohuajc'ajtypich ma je mibijcpidijc. Ooy ndzocy njihuïyich miich.

² Miich migüg, ooy nmigüg'adyii. Dios nmibijctzooybich müd miich ycixpi, huen agujc jotcuyc mdzinähuiipy etz mmic'idipy m'oy'idipy. Nejhuïybich co oy m'ity ma Dios. ³ Com oy ti njotcugiyich co je mibijcpidijc ajcxy ymiin ya huidibi jim tsoon ma miich ajcxy, e yi' ajcxy xytiy'ajtmooyich jadu'n nej tiydudägy mdzinäy e nañ jadu'n nej yajxon mguyduni Dios ytiy'ajt. ⁴ Ooy njotcújcidyich jac nigí co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuïyich, ooy njäygidägyich co oyjäy'ajtin mduñ müd je migügtijc. Nigi oy co oyjäy'ajtin mduñ müd je migügtijc huidibi ca' m'ixy'adyii. ⁶ Yi mibijcpidijc, huidibi ti choon ma miich ajcxy, ti tiy'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtijc yi ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnajxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuïyi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuidijtcixy. Co jadu'n nbubejtim, chi jadu'n paady nej jihuïy tú'ciy nduunim müd yi' ajcxy ma Dios y'ayuc capxhuäcxii.

Je Diótrfes yjibic-huinma'ñ

⁹ Ti nnijayiyich jayhuin je mibijcpidijc huidibi naysöymújcigixp jim. Jim yajpaady tüg jäy huidi xii Diótrfes huidibi ca' cöbiga'ñich n'ayucich etz ngötújcínich. Amij agix jada jäy chachñayjihuiyii, yi' ci'm tzach'ane'mam ma miich ajcxy. ¹⁰ Paady ycixp co nnicxibich jim ma miich ajcxy nyajnimähuamy ajcxy tüg'óciy yi jibic-huinma'ñ huidibi Diótrfes ytumyb, jadu'n nej jibic xyñigapxy xyñi'ojiyich etz jadu'n nej anii yaj'ixpicy. E nañ ni yi' ca' mmüidity jotcuyc'ajtin jadu'n nej chach'idich. Nigi ytundigoy co ca' yajjättäga'ñ ajt nmigügtijc huidibi Dios müd ycixpi yhuidity. E co hich ajt nmigüg pinjaty yajjättäga'ñ, chi yi' capx'aducy e yajpidzimy je mibijcp huidibi jäy yajjättäc, e ca' je' cöbiga'ñ ma miich mnaysöymujctac.

¹¹ Miich hermano, huidibi ooy ndzocy njihuïyich, ca' mguydunipy jada jibic-huinma'ñ. Cuydun janchtiy yi oybi huinma'ñ. Yi jäy ajcxy huidibi oybi tungixp, yi' ajcxy ymiid Dios ytiy'ajt ma yjot yhuinma'ñ. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuïyi.

Je Demetrio tüg y'ijxpejt oybi

¹² Yi jäy, huidibi yxii Demetrio, tüg'óciy jäy ajcxy yminaangixy co ooy y'oyjäyity, e janch yajpaady ma Dios ytiy'ajt. Hich nañ jadu'n nmına'ñich co ooy y'oyjäyity yi Demetrio, e miich mnejhuïyb co hich ajt ndiy'ajt janch janch yi'.

Capxycíjxin

¹³ Ooy hich anajty miich mijcajee ayuc njayajmüdmüydäga'ñ. Per ca' nijayihua'ñ necy'am. ¹⁴ Hue' janchtiy njijp'ixyich co nnicxa'ñich tzojc ma miich ajcxy, e nmüdmüydäga'ñich miich ajcxy ci'm.

¹⁵ Jotcujc'ájtciix. Yi mibijcpidiic ajcxy huidibi ya yajpatp yajnaxpy ajcxy capxpocxin ma miich ajcxy. Tun may'ajt yajnájxigich ngapxpocxin ma nmigügtijcich jim nidüg nidüg etz xibety xibety. Cham ngapxycíxyich, Juan je Apóstol.

SAN JUDAS

Yi Necy Huidibi Judas Nijayiy Je Huidibi Dios Ti Huin'ijxigixy

¹ Hich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jëbi mibijccixy yi' y'ayuc huidibi jëbi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymüid. ² Huen Dios miich ajcxy mijcajee xypa'ayoogixy etz xyajjotcugiygixy etz chojccixy xyjihuygixy.

Yi' ajcxy huidibi yaj'ixpijcp anii

³ Miich ajcxy migügtijc huidibi ooy ndzocyich njihuüyich, müid je nüdzoocin ycixpi müid ajt n'alma huidibi miich ajcxy etz hich cham nmüid'ajtim, ooy chachycopicity co nijayihuibich miich ajcxy müid yi mibijcin ajcxy ycixpi, e ngohuanüyb ajcxy co jëbi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuiñyäj.

⁴ Naagity jäy ajcxy ti ytihiygixy ma miich ajcxy ayüch ameech müid anii. Jecy'ajty Dios tiy'ajt yejcy ma yi' y'ayuc co yi jadu'mbi jäy tigoyam ajcxy y'alma müid ypocy ycixpi. Hue' yi' ajcxy jibic jäy huidibi ca' huindzigiygixy Dios. Anüidaacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jëbi nduunim huen tiijity huidibi nijot'ajtim. Ca' cöbijccixy je Dios huidibi nHuindzin'ajtim, etz ca' cöbijccixy hich ajt nHuindzin Jesucristo.

⁵ Oy miich ajcxy ti mjanejhuüydaaygixy jada tiy'ajt, per nyajjäymetzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'axam tzaachytuuñ müid o'cin je huidibi anajty ajcxy nijëjty ca' ymibijccixy. ⁶ Je ángeles huidibi ajcxy ca' yhuim'y ma Dios ytung huidibi ajcxy capxycömüidodacy Dios, y'ixmajztay ajcxy y'it chinaydac. Dios je' cham müid'ajtp ajcxy ahuing. Mach ajcxy y'ity agoodztuuby huinixi huinitiempo ixti cooni je mij xii anajty Dios ti yajhuaad'aty, mina anajty tiyduna'ñ naaxhuiñyäj ajcxy müid ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuudungixyp ñinücx chojcin, naygijeyci ajcxy ma je jibic-huinma'ñ. Yëydijctijc ytundigooygixy müid huingbi yëydijc. Je' jadu'n huim'ijxpejt ma tüg'óciy jäy co je tzaachyp ajcxy paatcixy.

⁸ Jim yajpaady ma miich ajcxy jäy huidibi nejhuüyb co Dios jecy'ajty tzaachytuuñ ángeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicciygixy je ñinücx müid pocytunü. Jijpcogapxiygixy je Dios ycotujcin, nigapxcixy ni'ojiygixy je huidibi ajcxy Dios mooyip mij'ajtin. ⁹ Je arcángel, Miguel, je ángel huidibi mij'ane'min müid, co anajty ychiptuñ müid je mujcu', yajcapxyoongixy yaj'ayucyoongixy je Moisés ñinücx, ca'p je' müid'ajty huinma'ñ nicxy yajpocycäy je mujcu' müid nay'ojii. Jëyi janch co nimay: "Yi Huindzin Dios miich xy'ix'ojip." ¹⁰ Per jada jäy ajcxy jibic ooy nigapxcixy huidibi ca' nejhuüygixy. Tügüyb ajcxy yhuinma'ñ müid iyujc animal yhuinma'ñ, etz iyujc animal ca' ajcxy müidity huinma'ñ tiydudägyi. Ci'm jada jäy ajcxy ñayyajhuinma'ñydidigóoyigixy, e jadu'n ajcxy y'alma yajtigoyaangixy.

¹¹ Ypadamyb ajcxy tzaachyp mijcajee müid pocy ycixpi com je' yi' ajcxy ypadumyib nej Caín y'idüch. Müid co meen' tzach'adzojccixy, paady

ñidigooygixy ytüdigooygixy jadu'n nej Balaam ñidigoy ytüdigooy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucjijpcogapxñiyi. ¹² Yi jadu'mbi jäy tzo'ydu'n yejcp ma miich ajcxy co mgaaygixy m'uuccixy tügmucy miid yi' ajcxy, e jadu'n iixpejt yejccixy co mnaychójcigixy. Caaygixp uuccixp tügmucy miid miich ajcxy agujc jotcuje per ni ca' ajcxy mädity huindzig'iñ miid ymigügtijc. Jadu'n ajcxy nipaady nej cöbixycuend'ajtpi huidibi ci'm ñaygüend'ájtigixyp, e ca' tungixy cuendi je cöbixy. Jadu'n ajcxy nej joc huidibi ca'pi ni miidity, huidibi je poj yajhuidijtip. Jadu'n ajcxy nej quipy huidibi ca' ytiim'aty mina yjapadyü, jayijp y'ocniicxy, e chi jada ytüich, e ytimypidigy miid ñidictz. ¹³ Yi' ajcxy ytündigoyñ ooy cho'ydu'n yecy, tim jadu'n nipaady nej je meyy y'oobigy co ypidigy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixñ huinítiempo, mij'agootztuuyb y'idipy ajcxy.

¹⁴⁻¹⁵ Nañ jadu'n Enoc, je mihuixtucpi co anajty Adán ti yjayijp'aty, yminañ co Dios yhuinma'ñymooyi miid jada ycixpi, e yminañ: “N'ijxich je Huindzin Dios co anajty ymiñ miid janch canaag mil je huidibi ajcxy tudägyity etz huätzip. Co anajty tyduna'ñ ajcxy tüg'óciy naaxhuiñjyay miid ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytündigooygixy miid yjibicjäy'ajt etz miid jibic ayuc tübi miid nigapxcixy ni'ojñygixy Dios.” ¹⁶ Jada jibic jäydijc ca' ajcxy ni ti mijotcuje'ajtcixy, ooy nigapxcixy ni'ojñygixy ymigügtijc. Jeyi ajcxy yci'm jotcuje'ajt ixtaaygixy. Ycapxcixy amij agix. Ooy oy nigapxcixy nijejty jäy miid co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷ Per miich ajcxy migügtijc huidibi ñich ooy ndzocy, jäymejtzciy je ayuc huidibi jécyip ti najtzcapxiygixy je Huindzin Jesucristo y'apóstoles ajcxy. ¹⁸ Je apóstoles miich ajcxy xyñimay: “Ma anajty xi tiempo ycixaani, j'adip jäy ajcxy huidibi nixigipy yajxigipy huidibi Dios yje'ajtpy, e chináaygixipy jadu'n nej yi' ajcxy ci'm tzachnijot'ajtcixy jibic-huinma'ñ.” ¹⁹ Je' ajcxy yajnaybijc-huäcxñib mibijcpidijc co ca' ajcxy mädity je Dios yjihu'iñ ymic'ajt.

²⁰ Per miich ajcxy migügtijc huidibi ooy ndzocyich njihuüyich, ijtcix miich ajcxy tudägy ma yi mmibijcin. Jäymejtzciy mibijctzoogix Dios miid je Espiritu Santo ypubejtin. ²¹ Naygüend'ájtigix jigix jebi Dios xychojccixy xyjihuüyigixy ajcxy, e ahuijxcix je xi mina anajty ñich ajt nHuindzin Jesucristo xymöhuaanim je jugy'ajtin huidibi ca' ycixipy ytigoyipy ni mina miid co ti xypa'ayoohuin.

²² Capxjotcidaaccix pinjaty ca' ti mijpidägy janchypidägy. ²³ Yajmüdmüydaaccix jacjadyii migügtijc jigix ajcxy jeb paatcixy nañ jadu'n nüdzoocin miid ajcxy y'alma. Jadu'n anajty paady nej jihuüy myajpidzimgixy jijnjoty. Yajtungix pa'ayo'n miid jacpinjaty pocytumbi. Naygüend'ájtigix ma yi' ajcxy ypocytunñ, ca' mbocytungixy nañ jadu'n. Jadu'n yi' ajcxy ypocytunñ nipaady nej huit huidibi ti yjibicci'y.

Judas capxycixy miid je' ymigügtijc

²⁴⁻²⁵ Je Dios tügpajcpi, je Dios huidibi xyajnidzoocim ajt n'alma, je huidibi yjajtaayb ñejhuüydaayb, ymiid je' mic'ajt etz cötujcin jebi miich ajcxy xy-cuend'adipy jigix ca' mbocycägixipy, etz je' ymiid mic'ajt jigix jebi xyajja'tcixy agujc jotcuje ma Dios yhuinduu, ma yi' yajpaady miid y'oy'ajtin ymij'ajtin ca' ti mbocymädity ajcxy. Yi' paatip je oy'ajtin etz mij'ajtin etz mic'ajt etz cötujcin miid nHuindzin Jesucristo ycixpi, tüyip etz cham etz huinixñ. Amén. Jadu'n ngapxycixyich.

EL APOCALIPSIS O Je Huidibi Dios Yajhuin'ijx San Juan

¹ Jayhui'my ity ma jada necy je Jesucristo y'ayuc ytiy'ajt huidibi ca' pin nejhuiy huiñihuñy jecy'ajty. Dios moy Jesucristo jada tiy'ajt jigix ya-jni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt mñd tüg ángel ma Juan. E je ángel yajhuin'ijxy Juan jada y'ayuc etz ijxpejt. ² E Juan yejcy tiy'ajt janchypi tüg'óciy jadu'n nej anajty ti huiñ'ixy ti huiñmidoy. E Juan ñidiy'ajt'ajtpy jada Dios y'ayuc etz nañ jadu'n ñidiy'ajt'aty je ayuc tiy'ajt huidibi Jesucristo yajnejhuñyi.

³ Janch jotcuyc je' pinjaty capxp jada necy etz pinjaty mido'mbñc jada Dios y'ayuc huidibi Juan ñidiy'ajtpy etz ñajtcapxiyb. E jotcuyc je' pinjaty cuydumb tüg'óciy huidibi jaybety ma jada necy, com je xñ je tiempo huingoonñ je' mina ytuna'ñyii yjada'ñyii.

Juan nijayñy huixtujc'itpi mibijcpidijc

⁴ ñich Juan nijayñybich yam je mibijcpidijc huixtujcpicypñi huidibi yajpatp jim Asia naaxjot. Huen Dios etz je huixtujcpñi espíritu huidibi yajpatp ma je' y'ane'mdac may'ajt oy'ajt tunipy mñd miich ajcxy etz xymóoygixipy jotcuyc'ajtin. Dios je' huidibi cham ijtp, je huidibi jecy'ajty ijt, etz je huidibi miinaamb. ⁵ Huen Jesucristo may'ajt oy'ajt tunipy mñd miich ajcxy etz xymóoygixipy jotcuyc'ajtin. Jesucristo je' huidibi tydudägy Dios ytiy'ajt yejci, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcin xyjihuiyim, ti xyñihuaanim mñd ñi'py ma je tzaachypi huidibi mihuaad'ajtim mñd ajt nbocy ycixpi. ⁶ Jesucristo ti xycötujcmooyim etz ti xytungmooyim mñd Dios Teedy, huñdi yi' yteedy'ajtpy. Jadu'n ñich ajcxy ndung etz ngötujcin nipaady nej je tung etz cötujcin huidibi reydiyc etz teedytjic ajcxy ymñd. Huen Jesucristo y'idipy cömay huiñixñi huiñitiempo etz huen yi' y'ane'min cötujcin y'idipy huiñixñi huiñitiempo. Jadu'n jada. Amén.

⁷ Cuendtungix ñich n'ayuc, ¡Cristo miinaamb jocjoty e tüg'óciy je mayjäy y'ixa'ñyii! E y'ixamyb je' ajcxy huñdijaty Cristo yaj'ayoo yajtzaachypijc. Tüg'óciy naaxhuiñyjäy yjihuihua'ñ yäxa'ñ ytaja'ñ ymaya'ñ mñd je'ycixpi. Jadu'n jada. Amén.

⁸ Jadu'n je mijpi Dios huidibi tüg'óciy mic'ajt mñd ymina'ñ:

—ñich je' huidibi yajtzondacp je naaxhuiñybi, je tzajp etz je huidibi jac-cogixiyb. Jadu'n ñich nej letra A huñdibi yajtzondacp je alfabeto etz je letra Z huñdibi cogixiyb ma je alfabeto. ñich je' huidibi cham'ijtp, etz huñdibi jecy'ajtyp ijt etz huñdibi miinaamb.

Juan ijxy yi Cristo oybi ymijity

⁹ ñich Juan, miich ajcxy mmigüg, quipxyi mñd miich ajcxy nminaxy nyajnaxyich ayo'n tzaachypi. Quipxyi mñd miich ajcxy ndzinäyich ma Dios y'ane'my. Etz quipxyi mñd miich ajcxy nyajtuñich je mecxtujcin ma ndzinaayin huñdibi Jesucristo ti xymooyim. Jim ñich anajty mach n'ityich ma je naax huñdibi mejy agujc, huñdibi xñ Patmos, mñd Dios y'ayuc ytiy'ajt ycixpi, je ayuc tiy'ajt huñdibi Jesucristo xyajnejhuñyim. ¹⁰ Jadu'n tügtecy ti njatyich, hue' anajty tüg domingo xñ co ñich Dios n'ojadajtyich, e Dios yjihuiñ ymic'ajt ti anajty xymimadactayich njot nhuñma'ñich. Chi nmidooyich jñxc'i'py'amy

tüg huidibi mic capx, jadu'n yi' ycapxin nmidooyich nej tüg trompeta yxüxy.
¹¹ Chi je huidibi xymigapxpich anajty yminañ:

—Hich je' huidibi yajtzondacp etz je huidibi yajcogixiyb tüg'óciy tijaty ya naaxhuiñybi etz tzajpjoty. Jadu'n hich nej je letra A huidibi yajtzondacp je alfabeto etz je letra Z huidibi yajcogixiyb je alfabeto. Cojaay miich ma tüg libro huidibi mhuiñijxyp, e quex je necy jim Asia naaxjot ma je huixtujc picypi mibijcpidijc ma je huixtujcpi cajp: Efeso, Esmirna, Pérgamo, Teatira, Sardis, Filadelfia etz Laodicea.

¹² Chi n'ijxhuimbityich n'ixañich pin hich anajty xymigapxpich. Co nnayjñijxich, huin'it nhuin'ijxyich huixtujc candelero ac tim oori. ¹³ E cujc'amy ma je huixtujc candelero nhuin'ijxyich tim jadu'n nej je jäy huidibi tzoon tzajpjoty (je Cristo), yxoxyity mid tüg huit yjädy anajty mabaad ytecy, e yhuññity ma ycaach mid tüg oorihuñ. ¹⁴ Yi' ycohuajc etz ycohuay janch poob, jadu'n nej lana huidibi janch poob, jadu'n nej nieve ypoobity, e je yhuñ jadu'n nej jñnye'n. ¹⁵ Je' ytecy tim jadu'n nej latón huidibi janch oy, nej jihuñy jñnjoty ornojoty yam ypidzimy. E je ymiydaacin janch mic, tim jadu'n nej canaag mijñi y'a'hich y'agimimy. ¹⁶ E ymid anajty ma a'oygi' huixtujc madza'. E ypidzimy ma y'ahuac tüg espada mejtz'adu'm'amy yjijpity. E yhuñyijp jadu'n anajty nej xi janch mic y'añ.

¹⁷ Co je' nhuin'ijxyich, chi janch ögy oy ngidägyich ma ytecy ymijc, chi xycñixajyich mid y'a'oygi', chi xyñimaayich:

—Ca' mdzigiy; hich je' huidibi jayijp'ajtp ya naaxhuiñ etz tzajpjoty etz hich je' je huidibi cogixihuamb. ¹⁸ Jugy'ajtpich; ti n'ögyich, e ti njugypicyich jadüg'oc, e jugy'adipich huinixi huinitiempo. Nmüdich mic'ajt jigix ane'mibich yi o'cin etz je it ma je öcpi ajcxy y'alma ity. Jadu'n nipaady nej jihuñy nmüdiyich je öcpi it ahuaazti. ¹⁹ Cojay cham tijaty mhuiñijxpy mhuiñidooyb, jadu'n nej huidibi tunaanip jadaanip jadachambi xi tiempo, etz huidibi tunaanip jadaanip jacjiini. ²⁰ E jadu'n yhuimbizimy je tiy'ajt janchypí huidibi ca' pin nejhuñy maabi je huixtujcpi madza' tiibi mhuiñixy ma hich n'a'oygi', etz je huixtujcpi oricandelero. Je huixtujcpi madza', je' je' je ángeles ajcxy huidibi cogapxy'ajtp mid Dios ycixpi ma je huixtujcpi cypí mibijcpidijc. E je huixtujcpi candelero huidibi ti m'ixy, je' yi' je huixtujcpi cypí mibijcpidijc.

2

Je ayuc huidi yajmoy yi mibijcpidijc jim Efeso

¹ Nijayi' miich je ángel huidibi cogapxy'ajtp jim ma je huidibi ajcxy mibijcp jim Efeso: “Nima' ajcxy co jadu'n yminañ je huidibi huixtujc madza' mid ma y'a'oygi', je huidibi jim yajpatp agujc'amy ma je huixtujcpi candelero, je' jadu'n minamb: ² Hich nejhuñybich tüg'óciy ti miich ajcxy mdumy, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhuñybich co ca' m'ocmimexxtugaani ajcxy jibicjäydijc, e ti m'ijxmajtcixy je ajcxy huidibi naydijp co Cristo ti huin'ijxigixy, per ca' je' ajcxy ytudägyity, e miich ajcxy ti mnejhuñy co ajcxy ooy y'anñdaaccixy. ³ Nejhuñybich co ooy ayo'n mij miich ajcxy mmijnajxcixy myajnajxcixy mid hich ycixp, etz ooy mij mecxtujcin ajcxy myajtungixy, etz ooy janch mic mdungixy mid hich ycixp, e ca' ti mmidzjipigixy hich ndung. ⁴ Per nejhuñybich ma miich ajcxy mduñdigoy. Ca' miich ajcxy xyajmij'atyich mijcajee, jadu'n nej anajty xyajmij'atyich ajcxy mijcajee co oga'n ajcxy mibijcy. ⁵ Mid jada ycixpi jäymetz miich ajcxy ma oy m'agänajxcixy. Jothuimbijtcix, e tungix nej anajty m'octungixp co ogañ ajcxy mmibijcy. Pen ca' ajcxy jadu'n mdungixy, chi tzojc nícxibich ma miich ajcxy, chi huingbi nbidägyibich ma miich ajcxy

xyjapaady, tim jadu'n nipaady nej jihuïy nbicyich yi mgandelero. Jadu'n ndunipyich pen ca' anajty mjothuimbity ajcxy. ⁶ Per njäygidaacypich jadu'n nej miich ajcxy m'ijxtigoydaaygixy mjäydgoydaaygixy je jibicjäydijc ajcxy yhuinma'ñ. Nej je nicolaïtas ajcxy ytungixy, miich ajcxy ca' mjäygidaaccixy e nañ jadu'n ñich ca' njäygidägyich. ⁷ Pinjaty ytädzac müid huen amidoo'ity nej je Espíritu Santo ymína'ñ ma je mibijcpidijc huidibi yajpatp xi ya. Pinjaty madacp ma ymibijcin, ñich yi' nmöhuipy tzinaayin jugy'ajtin ma Dios y'ane'my, jaydeb jotcuje chinahuipy ma Dios y'it, jadu'n nipaady nej jihuïy ajcxy jicxy je quipytim ma Dios y'it huidibi jugy'ajtin yejcp.”

Je ayuc huïdi yajmoy yi mibijcpidijc ajcxy jim Esmirna

⁸ Nijayi' je ángel, je cogapxy'ajtpi huidibi yajpatp ma je mibijcpidijc jim Esmirna: “Jadu'n ymína'ñ je huidibi yajtzondac je naaxhuiñybi etz tzajp etz huidibi cogixihuip, je huidibi o'c e yjugy'aty jadüg'oc: ⁹ ñich nejhuïybich tüg'óciy ti miich ajcxy mdumyb. N'ijxcajpyich nnejhuïybich je m'ayo'n mjotmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuïybich co ayooob jäy miich ajcxy, per müid miich ajcxy Dios y'oy'ajtin, e jadu'n nipaady miich ajcxy nej comeeñydijc. Nejhuïybich co nijëjity jäy miich ajcxy xyñigapxyp xyñi'ojñyb. Ñaydiyii ajcxy co yjudíojäyity, e ca' yjanchity. Hue' ajcxy müid y'ijtcixy je mujcu'. ¹⁰ Ca' ni ti mdzigëy miich ajcxy nej mjadaangixy m'ayoohuaangixy. Yi mujcu' miich ajcxy nijëjity xya-jpujxtijccähuamb, m'ocyaj'ijxmadzangixy pen janch miich ajcxy nidüg'óciy myajpatcixy ma Dios. Jadu'ñyi miich ajcxy m'ayohuipy majc xi. Ijtcix tudägy mabaad ajcxy m'öccixy. E ñich miich ajcxy je jugy'ajtin huinixibi nmöhuipy jadu'n nej premio co ti mmadaaccixy ma mmibijcin. ¹¹ Pinjaty müid ytädzac, huen mido'mbijccixy nej je Espíritu Santo nimäy je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayoohuipy ayoodactuuyb, ca' y'öga'ñ mimejtz'ocpi.”

Je ayuc huïdi yajmoy yi mibijcpidijc jim Pérgamo

¹² Nijayi' je ángel huidibi cogapxy'ajtp jim ma je mibijcpidijc ajcxy jim Pérgamo: “Nijayi' je ayuc co jadu'n ymína'ñ je huidibi y'espada müid mejtz'adu'm'amyb yjijpity: ¹³ ñich nejhuïydaaybich jadu'n nej miich ajcxy mdzinaaygix mjogy'ajtcix. Nejhuïybich co miich ajcxy mdzinaaygixy mjogy'ajtcixy ma tüg cajp ma je mujcu' y'ane'my. Per mi'ijtyñi je nxñijich, e ca' m'ixmach je mmibijcin ma ñich. Ni mga'ixmajch je mmibijcin je huin'it xi co Antipas yaj'o'ci jim ma miich ajcxy, tüg ñich nmigüg, je tudägypi testigo, jim je' y'o'cy ma mujcu' chinäy. ¹⁴ Nmüidich tigati huidibi ca' n'oy'ixyich ma miich ajcxy huidibi mdumyb ajcxy jim Pérgamo. Nijëjity miich ajcxy ca' m'ixmadza'ñ je Balaam y'ixpijin, je huidibi yaj'ixpijc jecy'ajty co huen jicxcixy je huidibi anajty tzaadzech quipychech ti yajhuindzigëygyxxy. E nañ jadu'n yaj'ixpic co huen tundigooygixy müid huingbi töxyjäy. ¹⁵ Nañ jadu'n miich ajcxy mmüidity nije' jäy huidibi ajcxy ca' ixmadzaangixy nicolaïtas y'ixpijin, je ixpijin huidibi ñich ca' ndim'ixa'ñich. ¹⁶ Paady jothuimbijtcixy miich ajcxy, yajtigajtzni ajcxy mjot mhuinma'ñ. Pen ca' jadu'n mdunipy, n'icxibich jim tzojc ma miich ajcxy. Chi jada' ndziptunipyich müid yi' ajcxy huidibi midundigooyb ñich ngötujcin huidibi ngapxpich. ñich n'ayuc jadu'n nipaady nej espada. ¹⁷ Pin ytädzac müid, huen mido'mbicy je ayuc huidibi je Espíritu Santo ñigapxyp ma je huidibi ajcxy Dios y'ayuc ytiy'ajt mibijcip. Pin jada tiydudägy mimadacp cuyduunni Dios ytiy'ajt, ñich yi' nmöhuipy oy'ajtin huidibi Dios yjë'ajtpy. Jada oy'ajt jadu'n nipaady nej maná huidibi yüch ijtp ma Dios chinaydac. Nañ jadu'n ñich yi' nmöhuibich tüg pi'cpoobtzaa, e ma je

poobtzaa jim yaayity tüg xii jemybi huidibi ca' ni pin ijxcabipy, jeyi janchity ijxcabip je xii pin anajty cöbijcp je tzaa.”

Je ayuc huidi yajmoy yi mibijcpidijc jim Tiatira

¹⁸ Nijayi' je ángel huidibi cogapxy'ajtp ma je mibijcpidijc jim Tiatira: “Niima' ajcxy, jadu'n je Dios y'ung ymina'n, je huidibi yhuin miid jadu'n nej jihuüy jiiñye'n, e ytecy jadu'n miidity nej bronca tübi ytoyhuäch ma jiiñ: ¹⁹ Jadu'n yi' ymina'n: Nejhuüybiich tüg'óciy ti ajcxy mdumyb. Nejhuüybiich jadu'n nej miich ajcxy mijcajee myajmij'ajtcixy Dios etz mdzojccixy mjihuüygixy ymigügtijc; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuüybiich co cham nigi mdungixy ma Dios ytung, ca'ydí jadu'n ajcxy nej myajtzondacy. ²⁰ Ji tüg huidibi miich ajcxy mdumyb huidibi iich ca' n'oy'ixyich. Mdzachmimcxtujccixy yi töxyjäy Jezabel huidibi naydijip co ycapxyp Dios y'ayuc e ca' yjanchity. Je' yajniidigooyb yajtüdigooyb iich ndumbi miid anii. Jadu'n je' ymina'n co jébi huingbi töxyjäy migapxtigooygixy e co jébi caaygixy jiiñcixy je huidibi ajcxy yajhuindzigüyb quipychech tzaadzech. ²¹ Ti iich je Jezabel nmöy tiempo co ixypy yothuimbity, per yi' ca' ixmadza'n yjibic-huinma'n. ²² Jdachambi nyajcähua'nich je Jezabel cijx'am miid pa'm, e jadu'n ajcxy nmöhua'nich ayo'n je yéydijc ajcxy huidibi miid chachtundigoy. Jadu'n ndunipyich pen ca' ajcxy yothuimbijtcixy nej ajcxy chachpadungixy je jibic-huinma'n huidibi je Jezabel ymiid. ²³ E nyaj'öctähuibich tüg'óciy ajcxy pinjaty panixp cixyot huinijot je Jezabel y'ixpijcin jigix nidüg'óciy je mibijcpidijc ajcxy nejhuüydaahupy co iich je' nejhuüydaayb tüg'óciy jäy ajcxy yjibic-huinma'n. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyii miich ajcxy jim Tiatira ca' mbanixcixy mbayöygixy Jezabel y'ixpijcin, e ni ca' mmijpidaaccixy huidibi ajcxy ytipy mujcu' y'ixpijcin huidibi tzip huinjhuüyb. Iich miich ajcxy nimaayb co ca'p iich miich ajcxy huingbi ixpijcin njacmóoygixipy. ²⁵ Mi'ijtcixy je Dios ytiy'ajt huidibi miich ajcxy miid, ixti cooni anajty nhuimbityich. ²⁶ Pin madacp ma ymibijcin etz pin cuydumb iich ndiy'ajt mabaad anajty je' y'ögy, iich je' nmöhuibich je cötujcin, jaydeb ane'my naaxhuiñjyáy ajcxy. ²⁷ Iich je' nmöhupy je ane'min cötujcin ma naaxhuiñjyáy huidibi Dios Teedy, iich nDeedy, ti xymöyich. E je' ane'mipy miid Dios ymic'ajt. E je' yajhuindigoydaahupy naaxhuiñjyáy y'ane'min, tim jadu'n nej jäy püy pochutu'z miid pujxtajc. ²⁸ Nañ jadu'n iich je' nmöhupy iich nmic'ajt huidibi nipaady nej je madza' jayhuixtujc. ²⁹ Pin ytádzac miid, pin midoohuamb, huen midoy nej je Espíritu Santo ymina'n ma yi mibijcpidijc nidüg'óciy.”

3

Je ayuc huidi yajmoy yi mibijcpidijc jim Sardis

¹ Nijayi' je ángel huidibi cogapx'ajtpi ma yi mibijcpidijc ajcxy huidibi yajpatp jim Sardis: “Jadu'n ymina'n je pin miid je huixtujcpi Dios y'espíritu, huidibi miid je huixtujcpi madza': iich nejhuüybi ti mdumyb. Nejhuüybiich co cömay ajcxy m'ijtcixy co mmidity yjugy'ajtin huinixibi e ca' yjanchity. Jadu'n miich ajcxy nipaady nej öcpi. ² Cuenditungix miich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huidibi ajcxy mjacmidity. Ti iich n'ixy co huidibi ajcxy mdumyb ca' yi' yhuädzity ytudägyity ma Dios yhuinduu. ³ Jäymejtzcootcixy je Cristo ytiy'ajt je tübi m'ixpijccixy, je tübi mmidoogixy. Panixcix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nicxibich ma miich ajcxy

jadu'n nej tög meetzpi, ni mganejhuühuüygixipy anajty nnicxyich. ⁴ Miich jacmüdni mibijcipi ajcxy jim Sardis huidibi ca'ni ajcxy ymibijcin yajtigooygixy, ca'ni ajcxy ytundigooygixy, tim jadu'n nipaady nej jihuüy ajcxy müdity poob huit huidibi ca' yjibiciy. Yi' ajcxy xymüid'idipich müd huädz jot huädz huinma'ñ, tim jadu'n nipaady nej ypoob huit ajcxy müdity, com ajcxy ypadyii jadu'n. ⁵ Pin mimadacp cuyduñ etz mijpidägy Dios y'ayuc ytiy'ajt, ymüid'adipy ajcxy je huätzpi jot huinma'ñ, huidibi jadu'n nipatp nej poob huit ajcxy müdity. E ni ca' ajcxy yxiü yajjödzip ma je libro ma ycojaayity je tudägyipi jäy ajcxy yxiü. E üch yi' ajcxy ngapxquëxüccixy yxiü ma nDeedyich yhuinduu, e nañ jadu'n ma nDeedyich y'ángeles yhuinduu ajcxy. ⁶ Pin midoohuamb, pin ytädzac müd, huen midoy nej je Espiritu Santo ymina'ñ majaty je huidibi ajcxy Dios y'ayuc ytiy'ajt mibijcip.”

Je ayuc huidi yajmoy yi mibijcipidijc jim Filadelfia

⁷ Nijayi' je ángel huidibi capxy'ajtp ma je mibijcipidijc jim Filadelfia: “Jada ayuc tiy'ajt ñigapxyp je tügpajcipi huätzpi, tügpajcipi janchypü, huidibi ane'my Dios yjäy jadu'n nej David ane'my Dios yjäy jecy'ajty. Je huidibi yaj'ahuatp e co yaj'ahuäch ni pin ca' huaad yaj'aducy. Je huidibi yaj'adujcp e co yi' yaj'aducy, ni pin ca' huaad yaj'ahuäch: ⁸ Cuenditungix nej nmina'ñich: Üch nejhuüybich nej mdungixy. Ti nyecyich mic'ajt ma müch ajcxy huidibi nipaady nej tög tigiydac ahuätzpi ma müch mhuinduu, huidibi ni pin ca' huaad yaj'aducy. Nejhuüybich co hueeni Dios yjihu'ñ ymic'ajt müch ajcxy müdity. Per ti mguydungixy üch n'ayuc, e ca' nxüjich xycoyützi. ⁹ Cuenditungix nej nmina'ñich. Yi' ajcxy huidibi mijpidacp Satanás y'ayuc, je huidibi anüdacp ajcxy co ñaydijigixy judíojäy, e ca' yjanchity. Üch yi' ajcxy nmimadägibich jigix yi' ajcxy müch xyhuingojxtinähüipy xyajmij'adipy. E chi nejhuühuip ajcxy co üch müch ajcxy ti ndzocy. ¹⁰ Müd co ti myajtungixy mecxtujcin ma mdzinaayin, ti mguydungixy üch n'ayuc n'ane'min. Paady üch nihua'ñip yajtzögip müch ajcxy ma anajty jäy ajcxy mictägy xyjot'ijxcixy xyhuinma'ñ'ijxcixy ajcxy. Miinipy je xiü je tiempo mina je mujcu' jot'ixipy huinma'ñ'ixipy tög'óciy je mayjäy huidibi yajpatp ya naaxhuiñ. ¹¹ Üch tzojc nnicxa'ñich jüby naaxhuingixy. Mi'ijtcixy yi' Dios y'ayuc huidibi müch ajcxy müd jigix ni pin xycapijcip ajcxy mbremio, huidibi ti mganar'ajtcixy ma Dios. ¹² Pin mimadacp cuyduñ Dios y'ayuc ytiy'ajt etz cuyduñ yajxon, üch yi' nbidägibich mij'ane'mbi ma üch nDios y'it, jadu'n yi' nipaadip nej tög pilar huidibi midinaayb jemxypü ma Dios ytiyc. E yi' ni camina ypidzimipy ma Dios y'it, e njayüybich ma yi' ñinücx üch nDios yxiü, e nañ jadu'n njáayibich je üch nDios ycajp yxiü, je Jerusalén jemybi huidibi tzoon tzajpjoty ma Dios yajpaady. E nañ jadu'n njáayibich nxü jemybi ma yi' ñinücx. ¹³ Pin ytädzac müd huen midoy ti je Espiritu Santo ñigapxyp ma tög'óciy je mibijcipidijc.”

Je ayuc huidi yajmoy yi mibijcipidijc jim Laodicea

¹⁴ Nijayi' je ángel huidibi cogapxy'ajtpi ma je mibijcipidijc jim Laodicea: “Jadu'n ymina'ñ je huidibi janchip tudägyip, je huidibi tudägy yejcp Dios ytiy'ajt e ca' yajtigach y'ayuc, je huidibi yajtzondac tög'óciy tijaty huidibi Dios ti oyduñ: ¹⁵ Nejhuüybich nej mdungixy. Nejhuüybich co müch ajcxy mibijccixy huenjaty, ca' myajtigoydaygixy yi' mmibijcin, e ni ca' ooy mij mmibijccixy. Jadu'n müch ajcxy nipaady nej nü huidibi ni ca' ytichity, e ni ca' y'anity. Jac'oy ixypy co ooy mij mmibijccixy, o co ca' ixypy mdimmibijccixy. ¹⁶ Müd co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, müd jada ycixpi üch müch ajcxy njijpcogapxiüipy müd je ndzip n'éjcinich, tim jadu'n nej jäy

ajcxy ixtzujy huídibi y'ahuac yca'tzojcpy. ¹⁷ Miich ajcxy minamb co ooy ajcxy mgomeeñity, ooy ajcxy mij mdzinaayin mjugy'ajtin mmíidity, e ca' ti ajcxy myajmayajtcixy, e ni ca' miich ajcxy nejhuíygixy co ayo'nduum myajpatcixy. Jadu'n miich ajcxy nipaady nej ayoobitijc, nej huíintzpi, nej huídibi níhuädz ixhuädz huídijtp. ¹⁸ Paady íich miich ajcxy nimaaygixy co copicy ajcxy mbaadip ma íich Dios ytiy'ajt janchypi, huídibi jadu'n nipaadipy nej jihuíy ajcxy mjuuygixy huädz oori ma íich, huídibi ti y'oybidzimy míd jín jigix mgomeeñ'ájtciixip. Nañ jadu'n íich miich ajcxy nnimaaygix co copicy ajcxy mbáatciixip pocyhuinmeecxin ma íich, huídibi jadu'n nipaady nej jihuíy huit oyjatypi poopjatypi mjuuygixy ma íich, jigix mxójxcixipy mninícx ca'ydi tzo'ydu'n mbáatciixipy. Nañ jadu'n íich miich ajcxy nnimaaygix co mbaadip tiy'ajt ma íich nlibro, huídibi jadu'n nipaady nej jihuíy huindzooy mjuuygixy, jigix mdzoydúngixipy mhuin e huin'it ajcxy m'íjxcixipy huädz. ¹⁹ N'ojypich etz ndzaachytumyb tüg'óciy pinjaty ndzojcpyich njihuíybich, paady ycixpi miich ajcxy mhuindina'mjijptina' mic íich ndiy'ajt etz jothuimbijtcix nej mbocytungixy. ²⁰ Cuenditungix nej cham nnimaaygix. Jadu'n nipaady nej jihuíy ndináyich ma nidüg nidüg jäy ytijc'aguu e ngojxnojciich ajcxy ytijc agí'. Nbijctzooybich co xyajtígihuíbich ajcxy ma ytijcin. Pinjaty xyyöcmidoobich, e yaj'ahuäch ytijc, tigíhuíbich ma yi', e cayipich míd yi', e yi' míd íich. ²¹ Pinjaty cuydundaayb Dios y'ayuc ytiy'ajt, íich je' nmöhuípy it lugar tzajpjoty quipxy míd íich ma íich n'ane'mdac. Ti nguydundaayich Dios y'ayuc, e nmídich it lugar ma íich nDeedy y'ane'mdac, paady ycixp jébi nmöhuíbich miich ajcxy it lugar ma nyajpaadyich. ²² Pin ytádzac míd, pin midoohuamb, huen midoy huídibi je Espíritu Santo ycapxyp majaty mibijcpidijc huídibi canaagpicy yajpatp.”

4

Íibaatcixy capxpaatcixy yi Dios huídibi tzajpjoty tzinaayb

¹ Co jada jadu'n yjajti, chi nhuindíxcyich tzajpjoty, e nhuin'ijxyich tüg tijc aguu ahuädz jii by tzajpjoty. E nmidooyich tüg ayuc janch tim jadu'n nej tüg trompeta yxüxy huídibi íich anajty jayijp ti xy'ocmigapxpi, xyñimáyich:

—Pet ya ma íich, cham nyajni'ixíhua'ñ tijaty copicy tunaanip jadaanip co anajty jadayaabi xii tiempo ñaxy.

² Chi Dios yjihuíñ ymic'ajt xymimadactaayich njot nhuinma'ñich, e nhuin'ijxyich tüg ane'mdac jii by tzajpjoty. E ma je ane'mdac jim anajty tüg iñäy. ³ E je huídibi anajty jim iñäy ma je ane'mdac, jadu'n anajty yquëxígy nej tüg tzaa janch oybi janch adícxp. E júhudity ma je ane'mdac je Dios yhuätz'ajt quëxígy nej tüg i'ñch janch oycolor huídibi janch adícxp nej tüg tzaa tzuxjatypi. ⁴ Nañ jadu'n júhudity ma je ane'mdac jii by anajty iipx madaax silla, e ma je silla iñäy iipx madaax mijjáy, ac poob huit míd. E ymíd anajty ajcxy ma ycohuajc coroni ac tim oori. ⁵ Ma je ane'mdac anajty ypidzimy huídizuc, e ooy anajty enee yjidijtin ñe'my. E ma je ane'mdac huinduu jii by anajty Dios yjihuíñ ymic'ajt je huixtujcpi, huídibi quëxígy nej huixtujc tzinhuaty huídibi ooy mic ytíxcy. ⁶ E je tigot ma je ane'mdac huinduu jadu'n quëxígy nej vidrio mejy, janch huädz janch adícxp.

E cujc'amy júhudity ma je ane'mdac mídaax iyujc huídibi míd mayhuin jahuinduu yajixcipy. ⁷ Je midügpi iyujc tim jadu'n anajty nej tüg jamгаа. Je mimetzpi iyujc tim jadu'n nej tüg huajmang. Je midugígpí tim jadu'n anajty yhuiñyijp nej jäy. Je mimadaaxpi tim jadu'n nej me'ty yqueec-huídityin. ⁸ Je nimídaaxpi iyujc ymíd anajty ajcxy nidüg nidüg tudujc yqueec, e ymíd

anajty ajcxy yhuiin queecnigixy etz queecpa'tci'py. E ca' anajty ajcxy ypocxy xim tzuum, chachminaangixy:

Santo, Santo, Santo, je Huindzin Dios huidibi tög'óciy nejhuiydaayb, huidibi tög'óciy mic'ajt mïd, je huidibi anajty ji'ajtp, je huidibi cham ji'ajtp, etz je huidibi miinaamb.

⁹ Je iyujc ajcxy huin'igixy etz huindzigiygixy etz yajmij'ajtcixy Dios, etz yajnajxcixy Dioscojuyipy ma Dios je huidibi anajty iñaayb ma je ane'mdac, je huidibi tzinaayb jugy'ajtp huinixi huinitempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjáy ycojxtinaydaaccixy ma je' yhuinduu huidibi anajty iñaayb ma je ane'mdac. E ooy anajty huindzigiygixy je huidibi tzinaayb huinixi huinitempo. Pidaaccixy anajty ajcxy ycorona ma je' yhuinduu, cham chachminaangixy:

¹¹ Miich, ich ajt nHuindzin, ich ajt nDios, miich mihuaad co mmidity tög'óciy oy'ajtin mij'ajtin etz mic'ajtin, mihuaad co miich nyajcömayip, mihuaad co miich mid'ity tög'óciy mic'ajt etz mij'ajt. Jadu'n miich mihuaad, com miich ti myajcojy, ti myaj'abadïy tög'óciy huidibi ji'ajtp. Com miich jadu'n ti mdzocy, paady ycixpi tög'óciy tijaty ji'ajttäy.

5

Je libro etz je Dios y'ung, je Cordero

¹ Chi jada' nhuin'ijxyich ma je huidibi anajty iñaayb ma je ane'mdac midity anajty ma y'a'oygi' tög libro abugucy, yjaayity jotjoty'amy etz nigixy'amy, yco'aducyity mid huixtujc selli. ² Chi nañ jadu'n nhuin'ijxyich tög ángel huidibi mij cötujcin mid, yajtiy mid ycapxin janch mic:

—¿Pin jada' janch tudägyip co yaj'ahuädzip jada libro etz migidziydähuipy yi yseli?

³ Ni tzajpjoty, ni naaxhuiñ, ni naaxpa'tci'py ycacá'ity pin tudägyip huidibi mihuaad je libro co yaj'ahuädzip, o oy nigoodi'ajty ja'ixaanip. ⁴ Ich janch yaaxpich mid tajin mayin anajty, com ca' anajty yajpaady pin je libro mihuaad co yaj'ahuädzip, o oy nigoodi'ajty huindicxip. ⁵ Chi nidüg je mijjáy xyñimaayich:

—Ca' myäxy. Chi je' je mic'ajt midpi ma yi judíojäy, je David y'ap y'oc huidibi nipatp nej tög ama'ycaa, yi' ti mimadactäy tög'óciy jibicpi. Yi' mihuaad yi libro yaj'ahuädzip, etz miguejydähuipy je huixtujcpi yseli.

⁶ Chi nhuindicxpejtyich, e agujc'amy ma je ane'mdacin, etz agujc'amy ma je midaaxpi iyujc, etz agujc'amy ma je mijjädijc ajcxy, jim anajty ytinäy je Dios y'ung, je Cordero. Ooy anajty ñiguëxigy chaachi'au nej anajty ayo'n tzaachypí ti yajnaxy. Ymid anajty huixtujc ymu'n, e huixtujc yhuiin, je' je' je huixtujcpi Dios yihui'ñ ymic'ajt huidibi yquejx huindu'my naaxhuiñ. ⁷ Chi je Cordero, je Dios y'ung, ninicxy je huidibi anajty iñaayb ma je mij'ane'mdac, e chi oy cychoy je libro huidibi je mij'ane'mbi anajty ymid ma je a'oy'amybi yci'. ⁸ Co je' anajty ti cychoy je libro, chi je midaaxpi iyujc etz je iipxmidaaxpi mijjáy ycojxtinay'ahuiday ajcxy ma je Dios y'ung, je Cordero, yhuinduu. Ymid anajty ajcxy nidüg nidüg y'arpa etz oori copí ujtziy mid poom, je' je' anajty nipaady nej ajcxy chajpcapxy capxy je huidibi ajcxy mibijcp Dios. ⁹ Janch y'iyb anajty ajcxy iy jemybi, yminaangixy:

Miich mihuaad co mgiyigy yi libro, e mmiguejydaayi je huixtujcpi yseli. Com miich ti myaj'ögyii, ti mgojuy jäy ajcxy ypocy ma Dios mid mgimni'py. Ti mgojuy ma Dios nidüg'óciy jäy ajcxy ypocy, huen huidibi razity, pinjaty capx huen huidibi ayucity, pinjaty tzomb huen huidibi cajpity huen huidibi naciónity.

¹⁰ Miich ti xymóoygixyich ane'min etz je tung mijpi nej huaad ich ajcxy n'ojadajtcixy nmibijctzoogixy Dios, jigix jébi ich ajcxy n'ane'ngixy yi naaxhuiñjáy etz n'ojadajtcixy nmibijctzoogixy Dios mïd jáy ajcxy ycixpi.

¹¹ Chi ich oy nhuin'ixyich e nhuinmidooyich may ángeles ajcxy ycapxin ymïydaacin jühuidity ma je ane'mdac, ma je iyujc ajcxy yajpatcixy, etz ma je mijjáy ajcxy yajpatcixy. E janch canaag millon je ángeles anajty ajcxy. ¹² Janch mic je' anajty ajcxy chachmïnaangixy:

Je Dios y'ung, je Cordero, je huïdibi oc mïd jáy ajcxy ypocy ycixpi, yi' mihuaad paadip ane'm'ajtin, comeñ'ajtin, xpijcin, mic'ajt, cömayin, oy'ajt mij'ajt, etz huin'ïhuin huïnyaaxin.

¹³ E tüg'óciy iyujc animal je huïdijaty Dios ti yajcojy ti yaj'abadïy huïdibi jiiby tzajpjoty, etz huïbi ya naaxhuiñ etz naaxpa'tci'py, huïdibi jiiby mejyjoty, nhuinmidooyich co tüg'óciy ajcxy chachmïnaangixy:

Tzoc huin'ïhuim tzoc cömayim, tzoc mooyim oy'ajtin etz mij'ajtin huinixï huïntiempo je Dios y'ung, je Cordero, etz je huïdibi ñaayb ma je ane'mdaacin.

¹⁴ Je mïdaaxpi iyujc anajty chachmïnaangixy:

—Jadu'n huen tuñyï jadyï. Amén.

Chi nañ jadu'n je iïpxmïdaaxpi je mijjáy ajcxy ycojxtinaygidactay, chi ajcxy ooy huïndzigïy patjïhuïy je huïdibi huinixï huïntiempo tzïnaayb.

6

Je huïxtujcpi selli

¹ Huin'it nhuin'ijxyich je Dios y'ung, je Cordero, quejtzciich tüg selli ma je huïxtujcpi chi nmïdooyich, co nidüg je mïdaaxpi iyujc ycapxy, jadu'n nmïdooyich nej enee yjidity, chi ymïnañ:

—Min ya, e chi m'ixipy.

² Chi nhuïndicxpejtyich, chi nhuin'ijxyich tüg poob cohuay. E je huïdibi yaj'ñaayb je poob cohuay ymajtz'ijtpy anajty tüg tip ma yci'. Chi je' yajmoy tüg coronï co yrey'adïpy. Chi jada' choñ tziptunaangixy jigix jacmïmadägïpy ymïdzip.

³ Co je Dios y'ung, je Cordero, yaj'ahuaach je mïmetzpi selli ma je necy, huin'it nmïdooyich je mïmetzpi iyujc ma je mïdaaxpi ymïna'ñ:

—Min ya, e chi m'ixipy.

⁴ Chi ypidzimy jadüg cohuay tzaptzpi ycolor. E huïdibi yaj'ñaayb je cohuay chaptzpi, ycïdigïyi cötujcin co je naaxhuiñjáy canayyajjotcujc'adïb ajcxy, e ñayyaj'ócigixipy miñ xyipy. E yajmooy tüg espada mijpi.

⁵ Co je Dios y'ung, je Cordero, agïtztuudy je mïdugïgpi selli ma je necy, chi nhuinmidooyich je mïdugïgpi iyujc ma je mïdaaxpi, ymïna'ñ:

—Min ya, e chi m'ixipy.

Chi nhuïndicxpejtyich, chi nhuin'ijxyich tüg cohuay tzixypi. E je huïdibi anajty yaj'ñaayb je cohuaychixy, ymïd tüg pujxtzim ma yci'. ⁶ Huin'it nhuinmidooyich tüg ayuc choñ ma je mïdaaxpi je iyujc ajcxy yajpaatcixy, ymïna'ñ:

—Tüg denario meeñ chohuïy tüg libra trigo; nañ jadu'n tüg denario meeñ chohuïy tudujc libra cebada, ca' myaj'ayoohuipy aceite etz vino.

⁷ Co je Dios y'ung, je Cordero, yaj'ahuaach je mïmadaaxpi selli ma je necy, chi nhuinmidooyich co je mïmadaaxpi iyujc ma je madaaxpi ymïna'ñ:

—Min ya, chi m'ixipy.

⁸ Huin'it nhuin'ijxyich tüg cohuay nitzuxy pu'tz, e je huidibi anajty yaj'iñaayb je cohuay, hue' anajty yxi öcpi. Axi anajty ymiiñ je huidibi ane'mb je it ma je öcpi ñimucy. Chi ajcxy yajmoy cötujcin je huidibi yaj'iñaayb je cohuay, jigix yaj'ó'ccixipy je tügpicypi ma je madaaxpicypi naaxhuiñjyä ajcxy. Chi yaj'ögip ajcxy miid tzip, miid yuuba'm, etz miid iyujc ahua'nbi huidibi ya naaxhuiñ.

⁹ Co Dios y'ung yaj'ahuaach je mimigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huidibi ajcxy yaj'öcpat miid Dios y'ayuc ycixpi, huidibi anajty ajcxy capxhuäcxixp etz nidiy'ajt'ajtcixp Dios y'ayuc. ¹⁰ Je' anajty ajcxy huidibi yaj'ögy patp miid Dios y'ayuc ycixpi chachminaangixy janch mic:

—Huindzin, janch mijpi janch huätzpi, huidibi cuydundaayb yi m'ayuc huidibi myejc ma ñch ajcxy. ¿Jadu'ñyi jada' mjac-huäcxiba'ñ mina anajty yi jäy ajcxy mdiydunaangixy mdzaachytunaangixy miid ypocy ycixpi huidibi xyaj'o'c ñch ajcxy, yi' ajcxy huidibi tzinaayb naaxhuiñgixy?

¹¹ Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huidibi quipxy miid miich ajcxy tumb ma Dios ytung, je' ajcxy huidibi yaj'ögy paadipy miid Dios y'ayuc ytiy'ajt ycixpi, tim jadu'n nej miich ajcxy ti mbaatcixy yaj'ögy.

¹² Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuiñxijty, chi je xii yajty janch tzixy, jadu'n nej tzixyhuit huidibi co'ögytjic ypidacpy, e je po' y'ahuimbijty nej ni'pyin.

¹³ Chi madza' ooy yca'y naaxcixy tim jadu'n nej piidztim tzuxpi ycäy co micpoj mixidiy. ¹⁴ Chi je tzajp yjihuañi jadu'n nej tüg libro'abidity. Tüg'óciy tungop huidibi naaxhuiñgixy etz huidibi mejy'agujc, cijx chondägy ypidictäy ma anajty y'ity. ¹⁵ Huin'it ñayyützaayi je reydiyc, je mjtungmüdpidijc, generaltjic, comeñydiyc, pinjaty ymic'ajt miid, je tumbidijc etz je midumbidijc ñayyützaayi ajcxy nidüg'óciy majaty tzaajut tzaa'ang. ¹⁶ Tzachnimaaygixy anajty tungop tzaajot:

—Ñigägootcich ñigägootcich, ca'ydi ñch ajcxy njac'ijxi yhuiñyjip je huidibi iñaayb ma Dios y'ane'mdac, e nañ ca'ydi nbáatcixyich je tzaachypí ayo'n huidibi yegamyb Dios y'ung, je Cordero.

¹⁷ Com ti je xii je tiempo yhuaad'ajtni mina Dios etz Dios y'ung y'ahua'ndägaangixy etz tzaachytunaangixy naaxhuiñjyä. ¿Pin je' ocmimadägip ajcxy chip y'ejin?

7

Huidibi anajty ajcxy tiy'ajtmüid ma je Israel jäy ajcxy

¹ Chi co jadu'n yajti, chi nhuin'ijxyich madaax ángeles ajcxy ytinaaygixy ma madaax'itpi naaxhuiñybi ytatzcüy. Adujccixy anajty je midaax'it poj ca'ydi ypoj ya naaxhuiñ, ni ma mejy, ni ma quipy. ² Chi nhuin'ijxyich jadüg ángel ymiiniy anajty xibidzimy'amy, müidity ma yci' je Dios juugypí ysellí. Jadayaabi ángel ooy mic miyaaxy je jamidaaxpi ángeles ajcxy huidibi anajty ajcxy ti ycidigiiyigixy je mic'ajt je cötujcin nej huaad yajhuindigooygixy tijaty ya naaxhuiñ etz ma ñi mejy.

³ Chi je ángel ymina'ñ:

—Ca' ti ayo'n mdungixy naaxhuiñ, ni ma mejy, ni ma quipy chaa, ixti cooni anajty Dios ytiy'ajt y'ijxpejt nbidaacim ma je' ajcxy yhuimbocin, je tibi ajcxy huin'ixy huidibi tungixp ma Dios ytung.

⁴ Chi nmidooyich jadu'ñyi je' tibi anajty ajcxy Dios ytiy'ajt y'ijxpejt ti ymóoyigixy. Migo'px jahuixchiguipx mīdaax mil je' ñaybaati huídibi anajty ajcxy tiy'ajt mīd ma yhuimboc ma nidüg'óciy Israel jāy ajcxy. ⁵⁻⁸ Majmetz mil anajty ajcxy tiy'ajt y'ijxpejt mīdity je Judá jāy, majmetz mil je Rubén jāy, majmetz mil je Gad jāy, majmetz mil je Aser jāy, majmetz mil je Neftalí jāy, majmetz mil je Manasés jāy, majmetz mil je Simeón jāy, majmetz mil je Leví jāy, majmetz mil je Isacar jāy, majmetz mil je Zabulón jāy, majmetz mil je José jāy, etz majmetz mil je Benjamín jāy.

Je mayjāy ajcxy huídibi yxoxip mīd poob huit

⁹ Chi jada' nhuin'ijxyich janch mayjāy chooñ ma canaag nación, hue' ajcxy canaagnax raza'adyii, e capxy ajcxy canaagnax ayuc, etz chooñ ajcxy ma canaag cajp. Hue' je mayjāy ytīnay'ahuiyday ma je mij'ane'mdac huinduu, etz ma Dios y'ung, je Cordero yhuinduu. Janch mayjāy ñimujcy ma je Dios y'ung yhuinduu, ni pīn je' anajty huaad camichoudāy ajcxy. Ac poob huit anajty ajcxy mīd yxoxyity, e ymīd anajty ajcxy tixy'aay ma yci'. ¹⁰ E janch mic anajty ajcxy miyaaxcixy Dios, chachmīnaangixy:

ñich ajt nDios yi' je' tūgpajc huídibi xyajpocyhuaatzim. ñich ajt nDios yi' je' huídibi ane'mdaayb tūg'óciy, e nañ jadu'n yi' y'ung, je Cordero.

¹¹ E nidüg'óciy je ángelestijc anajty ajcxy ytīnaaygixy jūhuídityi ma je Dios y'ane'mdac. E cham je mijjāy ajcxy etz je mīdaaxpi iyujc huíjoj'ihuñy ajcxy ma je ane'mdac huinduu, huindzīgīyigixy yajmij'ajtcixy je Dios.

¹² Chachmīnaangixy:

Jadu'n jada. Amén. ñich ajt nDios, je' mīhuaad huinixii huinītiempo tūg'óciy je ñhuin, je xondaacīn, je oy'ajtīn, je xpijīcīn, je jāygidacīn, je cōmayīn, je ane'mīn, je mij'ajtīn. Amén. Jadu'n jada.

¹³ Huin'it nidūgti je mij jāy ycapxy, e xy'amīdooyich:

—¿Pīn jada ajcxy jada' huídibi poob huit mīd yxoxyity, e ma yi' jada' ti choongixy?

¹⁴ Chi ñich je' n'adzooy:

—Huindzīnich, miich mnejhuñyb.

Huin'it je' xy'adzooyich:

—Jada je' ajcxy tibi je mij ayo'n mīnajxcixy yajnajxcixy, e ti ypocyhuaatzcixy mīd je Dios y'ung, je Cordero ñi'py, tim jadu'n nej jihuñy yhuit ti yajhuaatzcixy janch poob ma Dios y'ung ñi'py. ¹⁵ Paady yi' ajcxy yajpaady ma Dios chinaydac yjugy'ajttac, e ytungixy xīm tzuum ma Dios ytīc tza-jpjoty. E yi' Dios y'ung huídibi ñāayb ma je mij'ane'mdac, yi' yi' mī'ijttaayb cuend'aty ma yi' yhuinduu. ¹⁶ Ca'p ajcxy jacjihuñyigixipy yuu tidzibi, ni xī'an ycajacnōgīyb ajcxy, ni anbi ycajacyajtzibīyb ajcxy. ¹⁷ Com je Dios y'ung, je Cordero, huídibi cujc'amy yajpatp ma je Dios y'ane'mdac, je' yi' cuend'ajtp ajcxy, jadu'n nej jihuñy cōbixy cuend'aty, e yajnicxip ma je nī huätzpi ymuxy huídibi yejcp jugy'ajtīn. Dios yajquēgipy yi' ajcxy ytajīn ymayīn jigix ca' yjacjīyigixipy yjacyáaxcixipy mīd tajīn mayīn.

8

Je mīhuixtujcpī selli etz je poomjogī'ñ ac oori

¹ Co Dios y'ung, je Cordero, yaj'ahuaach je mīhuixtujcpī selli, huin'it y'ijty oy jahuengi cup hora amōñi jīiby tzajpjoty. ² Chi nhuin'ijxyich Dios y'ángeles huixtujc ajcxy ytīnaaygixy anajty ma Dios yhuinduu, e yajmoy ajcxy huixtujc trompeta. ³ Huin'it jadüg ángel mīñ, chi je' ytīnaay'ihuñy ma mesi huinduu ma je Dios ojadajttac. Je ángel ymīd anajty tūg poomjogī'ñ ac oori. Chi

ymooyi poom may'amy huídibi jojcp. E je poomjoc tigiiyb ma Dios yhuinduu quipxi miid juydacin nuuctacin huídibi je jäy ajcxy ytumyb huídibi Dios ti huin'ixy ajcxy. ⁴Ma je ángel yci'am jim je poomjoc choon ñicxy ma Dios yhuinduu quipxyi miid je oración huídibi ajcxy ytumyb je tiibi ypocyhuaatzcixy. ⁵Huin'it je ángel majch je poomjogi'ñ, chi yaj'ujch miid jinbajc huídibi anajty jim ma je Dios ojadajttaacin, chi najtzjibibi'y naaxcíxy, huin'it ooy yajmidooy jidijtin micpi etz huídizuc e je naax ooy yücxy.

Je maytrompeti

⁶Je huixtujcpi ángeles ajcxy huídibi anajty miid je huixtujcpi trompeti, ñayni'ixiiyi ajcxy co yajxüxaangixy.

⁷Je midügpi ángel yajxuuxy je ytrompeti, e huin'it ooy eneediitz yca'y mihuídidi jin etz ni'py. Chi oy ycäy naaxcíxy. E jahueengi cujc-huäcxy oy nögy je naax, je quipy etz je aay ujtz tzuxjatyp etz nöctay miy.

⁸Je mimetzpi ángel yajxuuxy ytrompeti, chi ooy ycäy meyyjoty jadu'n nej tüg mijcop janch tooyb anajty miid jin, e jahuengi cujc-huäcxy je meyy oy y'ahuimbity ni'py. ⁹E jahuengi cujc-huäcxy oy y'ögy huídijaty anajty tzinaayb ma je meyy. E je maybarco huídijaty anajty ma je meyy, nañ jadu'n jahuengi cujc-huäcxy oy ytimyhuindigoydäy.

¹⁰Chi je midugigpi ángel yajxuuxy je' ytrompeti, e huin'it oy tüg madza' mijpi ycäy. Je madza' jadu'n nipaady nej tüg mijjin huídibi nayyajcodicxim. Je madza' oy ycäy ma jahuen cacujc-huäcxy mijni, etz ma ni müxy. ¹¹Je madza' hue' je' anajty xii'adyii ta'm'ujtz. E je ni jahuen cacujc-huäcxy oy yjajtni ta'm, jadu'n yta'mity nej ta'm'ujtz, e ooy jäy may y'o'cy miid je ni ycixpi co anajty ti y'ahuimbity ta'm.

¹²Je mimadaaxpi ángel yajxuuxy je' ytrompeti, e huin'it jahuen cacujc-huäcxy je xii oy yhuindigooy, e nañ jadu'n je po' etz je madza' jahueng cacujc-huäcxy oy yhuindigooy. E miid jadu'n ycixpi je po' etz je madza' yhuimgixy jahuen cacujc-huäcxy agootz, e jahuen cacujc-huäcxy yticxin ocyejcn ajcxy xim tzuum.

¹³Chi nhuin'ijxyich tüg me'ty anajty yqueec-huidity cuptzajp, e nmidooyich co ymina'ñ janch mic:

—¡Ay! ¡Naaxhuiñjyäy ajcxy ayoobidijc! co anajty trompeti yajxüxy je jatugigpi ángeles ajcxy, huin'it ayo'n ypadañ je naaxhuiñjyäy ajcxy, ayo'n ypadamy ajcxy, ayo'n ypadamy ajcxy.

9

¹Chi je migooxpi ángel yajxuuxy je' ytrompeti, chi nhuin'ijxyich tüg madza' anajty ti ycäy naaxcíxy. E chi je madza' yajmoy je ahuaasti huídibi miid yaj'ahuädzi je ayoodac ma Dios cuend'aty miidity je ca'oybidijc. ²Chi je ángel yaj'ahuaach je jut ma je ayoodac, e ma je jut jii by ypidzimy jadu'n nej jinjoc huídibi pidzim ma tüg horni. ³E ma je joc ypidzimy ooy maymu' naaxhuiñgixy chachqueec-huidijtcixy ooy, e je mu' ajcxy ymooyi mic'ajt, jadu'n nej ca'ty miidity ytijp. ⁴Chi je' ajcxy yajcötujcmoy co ca' ni ti aay ni ti ujtz yajhuindigóoygixipy huídibi yajpatp naaxhuiñ, ni ujtz ni quipy. Jëyi janchtiy ycötujcin mooyi co huen yajtzaachihuipy je jäy ajcxy huídibi ca' miidity Dios ytiy'ajt y'ijxpejt ma yhuimboc. ⁵Ca' ajcxy yajcötujcmoy co yjäy'aj'ó'ccixipy, jëyi co janchtiy ayo'n ajcxy yegipy migoox po'. E je ayo'n huídibi anajty ajcxy yejcipy jadu'n je' nej co ca'ty jäy yajtzaachiy miid ytijp. ⁶Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcixipy. Ooy anajty janijot'ajtcixy o'cin, e cöguëgiiib ajcxy je o'cin.

⁷ Je maymu' jadu'n je' anajty yquëxïgy nej maygohuay huïdibi ni'ix'i'ijtcixp co yajnicxáanigixy ma tzip ytuna'ñyii. Ymïid anajty je maymu' ma ycohuajc jadu'n anajty quëxïgy nej oori coroni. E je maymu' yhuiñyjijp jadu'n yquëxïgy nej jäy yhuiñyjijp. ⁸ Je maymu' ymïid anajty ycöhuay jadu'n nej töxyjäy ycöhuay, e ytïitz jadu'n nej jamgaa ytïitz. ⁹ E je maymu' ymïid anajty ajcxy jadu'n nej pujx huïdibi mïid ñinïcx cohuangixy. E co ajcxy queec-huïdity, ooy ajcxy yqueec yaj'amüy jadu'n chachne'mïy nej je carro huïdibi cohuay ajcxy yjugujcypy co ñicxcixy ma tzip ytuñyii. ¹⁰ Je maymu' ymïid anajty ajcxy ypïxy tim jadu'n nej ca'ty ypïxy, e ma ajcxy ypïxy ymïid anajty ytïjp. E ma ajcxy ypïxy mïidity anajty je mic'ajt co jäy ajcxy yajtzaachïhuipy migoox po'. ¹¹ E je maymu' je' ajcxy yrey'ajtpy je ángel huïdibi nigohuajc'ajtp je ayoodac, hue' xii'adyii hebreo'amy Abadón, e griego'amy yxii'jity Apolión, hue' je yxii yhuimbïdzïmy: je huïdibi yajhuindïgooyb.

¹² Najx je' je ayo'n jayïjpi, e ytïgoy'ity je jametzpi ayo'n co je jayïjpi ti y'ocjadyii.

¹³ Je mïdudujcpi ángel yajxuuxy je ytrompeti, chi nmïdooyïch tüg ayuc chooñ ma je mïdaaxpi huaj mu'n ity ma je altar ac óoribi, huïdibi anajty ijtp ma Dios yhuinduu. ¹⁴ Je ayuc ymïna'ñ:

—Nïma' je mïdudujcpi ángel huïdibi anajty trompeti mïd: “Najtzmazdi' yi mïdaaxpi ángeles huïdibi ajcxy coxoch ijtp ma Eufrates mïjnïba'.”

¹⁵ Huin'it oy yajcoguejtтуutcixy je mïdaaxpi ángeles, jigix yjäyyaj'o'ccixipy jahuen cacujc-huäcxy huïdibi yajpatp ya naaxhuiñ. Je mïdaaxpi ángeles ni'ix'i' je' anajty y'ijtcixy, je huin'it hori, je huin'it xii, je huin'it po', je huin'it jimïjt co anajty yaj'ögaangixy jahuen cacujc-huäcxy je naaxhuiñybi jäy ajcxy. ¹⁶ E nmïdooyïch co ajcxy mïchoy je soldadtïjc huïdibi anajty ajcxy cohuaygïx. E hue' mejtz mïgo'px millón anajty ajcxy ñaybattáayigixy je soldados ajcxy.

¹⁷ Jadu'n nhuin'ijxyïch je cohuay ajcxy, e mïid je ñijäy ajcxy huïdibi anajty yaj'ïñaayb. E je ñijäy ymïid anajty ajcxy pujx ma ycaach, je' mïid ñinïcx cohuaangixy. E je pujx hue' anajty ycolor tzaptz, azul etz pu'tz. Je cohuay ajcxy jadu'n anajty ycohuajc nej jamgaa ycohuajc, e ma ajcxy y'ahuac ypidzïmy nej jïin, nej jïinjoc, etz nej azufre. ¹⁸ E mïid jada jahueng cacujc-huäcxy naaxhuiñyjäy chach'o'cy ajcxy mïd je jïin, je jïinjoc etz je azufre ycixpi huïdibi anajty pidzïmb ma je cohuay ajcxy y'ahuac. ¹⁹ Je cohuay ajcxy ymïid anajty mic'ajt ma y'ahuac etz ma pïxy. Com je' ajcxy ypïxy jadu'n je' anajty nej xoox mïid ycohuajc, e je cohuay ajcxy chach'ahua'ndaaccixy mïid ypïxy.

²⁰ E je jacjadyii jäy ajcxy huïdibi ca' y'o'cy mïd jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibïcpi huïdibi ytungïxp. E ni ca' ajcxy ixmajch nej ajcxy je ca'oybi huindzïgïygixy. Nañ jadu'n ca' ajcxy ixmajch nej ajcxy huindzïgïygixy huïdijaty ajcxy oyduñyip mïd plata, mïd bronce, etz tzaadzech etz quipychech. Je huïdijaty ajcxy y'oydumyb etz ñïdzejtтуutcixy, ni yca'ijxcixy, ni ycamïdoogixy, ni yca'yöygixy. ²¹ E ni ca' je jäy ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjäyyaj'o'ccixy, jadu'n nej ajcxy tzachcaxpojccixy ymïgügtïjc, jadu'n nej ajcxy huingbi töxyjäy tzachmïgapxtïgooygixy, etz jadu'n nej ajcxy chachmeetzcixy.

10

Je ángel mïd je mutz libro

¹ Nhuin'ijxyïch co chooñ tzajpjoty tüg ángel micpi ñïducyity mïd joc, e mïidity i'ñch ma ycohuajc. Je yhuiñyjijp yquëxïgy nej xii. Je' ytecy jadu'n yquëxïgy nej mïjïinye'n. ² E ma yci' mïidity tüg libro yëphuäcxy, e pidacy

y'a'oydecy mejyhuingíxy, e y'anajtytecy pidacy naaxhuiñgíxy. ³ Chi je ángel oy janch mic yaaxquency jadu'n nej tüg jamгаа yäxy. E co anajty jadu'n ti yaaxquëgy, chi oy yajmidoy huixtujc jidijtin huidibi ycapx yci'm'ayuc. ⁴ Co je huixtujcpi jidijtin oy ycapxtaaygíxy, chi ñich anajty njaaya'ñich huidibi ti capxy. Chi nmidooyich tüg ayuc chooñ tzajpjoty xyñimäyich:

—Mi'it jada ayuc yüch huidibi yi huixtujcpi jidijtin ti capxy, ca' mjaay.

⁵ Chi je ángel huidibi nhuin'ijxich co mejyhuingíxy etz naaxhuiñgíxy ytinäy, yujcxajy yci' a'oy'amybi tzajpcíxy. ⁶ Chi je ángel capxcödujcy co je Dios huidibi jugy'ajtp huinixi huinitempo, je huidibi yajcojy je tzajp, je naaxhuiñybi, je mejy etz tüg'óciy huidibi jüby yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachypi ayo'n ya naaxhuiñ.

⁷ Co yhuaad'ajtnip je xii je tiempo ma anajty je mihuixtujcpi ángel yxuux yajxutzondägy, chi cuyduunip je Dios y'ayuc ytiy'ajt huidibi ca'pin anajty huiñihuüy, je ayuc huidibi je Dios ytumbidijc je profetas ajcxy ñajtzcapxiy jecy'ajty.

⁸ Je ayuc huidibi nmidoohuich, je huidibi anajty ti chooñ tzajpjoty, ycapxy je' jadüg'oc, e xyñimaayich:

—Ñicx miich etz ciyig yi libro huidibi yëphuäcxy yi ángel ymiid ma yci'. Je' je' je' ángel huidibi anajty tinaayb mejyhuingíxy etz naaxhuiñgíxy.

⁹ Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojicxnax, e xyajta'mmiyip mjot e ma miich m'ahuac mjihuñhuipy päg jadu'n nej ceripäg.

¹⁰ Huin'it ñich je pi'clibro ngiyigy huidibi je ángel anajty ymiid ma yci', e chi ñich je' ngöjicxnajxy. Ma ñich n'ahuac njihuñyich janch päg jadu'n nej ceripäg. Co oy ngojicxnajxtäyich, chi oy y'ahuimbijtni janch ta'm ma ñich njot. ¹¹ Chi mic'amy nyajñimaayich:

—Ñicx miich capxhuäcx jadüg'oc je ayuc huidibi Dios ti xymöy, je huidibi ti mgapxhuäcxy ma je mayñaax maygajp, ma je mayñaciones, huidibi canaag ayuc capxcixp, etz ma je reydijc ajcxy.

11

Je metzpi testigo

¹ Chi jada' nyajmooyich tüg paxy, jahuengi jadu'n anajty yquëxigy jadu'n nej baari huidibi quipx yajhuamb. Chi ajcxy xyñimaayich:

—Pidig e quipxta' yi Dios ytijc, nañ jadu'n quipx je mesi ma Dios yajhuindzigíy, etz nañ jadu'n michou naag jäy ajcxy jüby Dios huindzigíygyxy.

² Je Dios ytiba' ahuing miich je' pidäg, ca' mguipxipy. Com yi' yi' ti ycidigíyii yi jäy ajcxy huidibi ca' yjudíojäyity. Yi jäy ajcxy huidibi ca' yjudíojäyity ymimadägamyb ajcxy je Jerusaléngajp ma Dios miidity tzinaydac etz ane'mamb ajcxy jüby huixchiguipx metz po'. ³ ñich metz testigo nguexipyich ma je cajp ma Dios miidity tzinaydac, e yi' ajcxy capxhuäcxamb ñich n'ayuc tüg mil jametzmigo'px jatugi'px xii. Yxoxyity ajcxy miid huit nücuyjaam ixcuyjaam.

⁴ Je metzpi testigo jadu'n nipaady nej je metzpi olivo cop etz je metzpi candelero huidibi tinaaygixp ma je Dios yhuinduu, je huidibi ñaaxhuiñybi ane'mb. ⁵ Pen ji pin nej jaty midundigoya'ñ je metzpi testigo, je' ajcxy yajpidzimip je' ajcxy jin ma y'ahuac, yjicxtahuipy yjindahuipy je' ymidzip. E jadu'n je' y'ögipy pinjaty anajty je metzpi testigo midundigooyb. ⁶ Je

metzpi testigo ymüd yi' ajcxy cötujc co ahuäctúccixity je tzajp, ca'ydi ytüy jadu'ñyi tiempo anajty ihuäcxixy capxhuäcxixy Dios y'ayuc ytiy'ajt. E nañ jadu'n ymüd ajcxy cötujcin co nñ yaj'ahuimbíjtcixipy ni'py. Yi' ajcxy yajtuniib yaj'jadüib canaagnax ayo'n ya naaxhuiñ, naag'oc anajty ytimdzójccixy. ⁷ E co anajty je metzpi testigo ajcxy yajmaaygixy ytung, chi je iyujc huidibi anajty pidzim ma je ayoodac, je abismo, je' je' tziptuunip müd je metzpi testigos etz yaj'öctähuip je metzpi testigo. ⁸ Chi je metzpi testigo ñinícx ajcxy yhui'mipy mijñigujc mjtügujc jim ma je mij ciudad ma je Huindzin Jesucristo yajcru-udzpejti, je cajp huidibi tundigooy müd Dios tim jadu'n nej Sodoma etz Egipto ytundigooy jecy'ajty. ⁹ Nijëjity jäy ajcxy huidibi xi ya conaaxip cogajpíp, oy ypinjäyity, oy ti ayuc capxcixy, y'ixipy ajcxy tugüg xijagup je metzpi testigo ñaaxnícx mjtügujc, e ni ca'a'ixihuiipy ajcxy co yajnaaxtigihuyb. ¹⁰ Huidijaty ajcxy tzinaayb ya naaxhuiñ ooy yxondáaccixipy etz yjotcugíyigixipy müd je' ycixpi co je metzpi Dios ytestigos ajcxy anajty ti y'o'ccixy. Chi je mayjäy ajcxy miñ xyipy ñaymóoyigixipy tijaty, e ñayyajniguéjigixipy tijaty. Com je metzpi yëdyjc huidibi nidiy'ajt'ajtp anajty Dios ytiy'ajt, ti anajty ooy ayo'n yejccixy ma naaxhuiñyjäy ajcxy. ¹¹ Codugügxi jacup naxy, chi Dios cix yajjugypijctäy je metzpi öcpi, e chi ajcxy jadüg'oc ypidigy, e pinjaty je' iix, ooy je' ajcxy chachchigiy. ¹² Je metzpi testigo huidibi nidiy'ajt Dios, midoy ajcxy tüg ayuc janch mic jüby tzajpjoty anajty ñimáayigixy:

—Pejtcix yeeby cix.

Chi ajcxy ypa'ttigiy tzajpjoty ma tüg joc, e iixi ajcxy ymidziptijc. ¹³ E janch huin'ity ooy naax yücx müd tüg mic uix. E tüg picypí je majc picypí jäy jim Jerusalén oy ymijähuiygixy. E müd je uix ycixpi y'o'cy ooy mayjäy, ñaybaati je öcpi huixtujc mil yëdyjc. E jacadyii jäy ooy chigíyigixy yjihuiygixy, e ojadajtixy mibijctzoogixy ooy je Dios tzajpjoty.

¹⁴ Ti ñaxy je mimetzpi ayo'n, chi tzojc ymiñ je midugügpi.

Je mihuixtujcpi trompeti

¹⁵ Chi je mihuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic yminañ:

Je ane'min huidibi ya naaxhuiñ, yi' je' cham müd ajt nHuindzin Dios etz yi' yCristo, e yi' je' ane'mip huinixi huinitempo.

¹⁶ Je iipxmidaaxpi mijjäy huidibi anajty ajcxy iñaayb ma y'ane'mdac ma Dios yhuinduu, cix je' ajcxy yhuijo'ihuiydaaygixy, e chi ajcxy ooy Dios ibaty capxpaty, yminaangixy:

¹⁷ Huindzin Dios, Dioscojuyip nyajnájxcixpich ma miich, huidibi jac mic'ajt müd ca'ydi jac pin. Miich tüg'óciy mdundaayb mjajtaayb mnejhuíydaayb. Miich je' huidibi ijtnaayb, e ti m'ijtnäy, e m'ida'ñyi, com miich ti m'ijxcugiy je mgötujcin, e ti mbidägy m'ane'min.

¹⁸ Mayñaax maygajp mayñaaxhuiñyjäy ooy yjotmäty ajcxy, müd co ti xii hori paady co miich mdzaachytuna'ñ je jäy ajcxy müd ypocy ycixpi. Ti je xii je hora paady co miich mdiyduna'n je jäy ajcxy tiibi y'o'ccixy. Ti je xii je hori paady co miich mmöhua'ñ je mdumbidijc ypremio, je mdumbidijc huidijaty najtzcaxiy ajcxy miich m'ayuc, huidijaty tudägy'ajtin ti patcixp ma miich, je huidijaty miich mxii xychigiyip, huen ymij'ana'city huen ymutz'ana'city. Ti je xii je hora paady co miich myajtigoya'ñ je pinjaty yajhuindigooygixyp naaxhuiñyjäy ajcxy.

¹⁹ Je huin'it tiempo oy Dios je ytiyc y'ahuäch jüby tzajpjoty, e chi nhuin'ijxyich je caax ma Dios ycötujcin y'ity. Nañ jadu'n oy nhuin'ijxyich huizuc, etz nmidooyich co ooy ñe'my, etz nmidooyich enee yjidijtin, etz njihuiyich tüg uix, etz ooy yca'y eneedüitz mijatypi.

12

Tüg töxyjäy etz je ama'y tza'ñ

¹ Je huin'it hora oy yquëxigý tzejpcíxy tüg ijxpejt mijpi. Tüg töxyjäy ñidigooyity mïid xii, jadu'n nej jihuiy mïid tüg huit ñimochity, e jadu'n yquëxigý nej jihuiy anajty po' yajhuäcpety, e ymïid ma ycohuajc tüg corona ac oori huïdibi majmetz madza' mïid. ² Jadayaabi töxyjäy hue' anajty ungmijäy'ajtp, e janch yaax tinaayb je' anajty mïid je tzaachypi, mïid co y'ung anajty yajma'xung'ada'ñ. ³ Huin'it oy yquëxigý jadüg tiy'ajt ijxpejt tzejpcíxy. Tüg ama'y tza'ñ janch mij, tzaptz ycolor, e mïidity huixtujc ycohuajc, majc ymu'n, e tüg corona majaty ycohuajc. ⁴ Je mij tza'ñ mïid je' ypíxy jugujcmujcy jahueng cacujc-huäcxy je madza' jim tzejpcíxy. Chi je' najtzyemiyday je maymadza' naaxhuiñygyxy. Je mij tza'ñ oy yhuäcxiy ma je töxyjäy yhuïnduu huïdibi anajty ungbadamb tzojc, chi tzüdzá'ñ je pi'c'ungma'xung janch tim jëyi anajty yma'xung'aty. ⁵ Chi je töxyjäy yajma'xung'ajty tüg pi'cyëdyjc, huïdibi ane'mip mïid Dios ymic'ajt, ymïid yi' tüg pujxtajc huïdibi ijxpejt ajt co mij ane'min mïidity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶ Chi je töxyjäy yqueecy ñicxy mijtigïduum, ma anajty Dios ti ñi'ixiyii y'it ylugar co jim y'idipy, e jim ymöhuiyb ycaayin y'uucin tüg mil jamejtmigo'px jatugi'px xii.

⁷ Je huin'it tiempo tüg tzip yajti tzejpjoty mïid je' ycixpi. Chi Miguel huïdi mij cötujcin mïid, mïid jadyii y'ángeles ajcxy, ooy chiptuñ mïid je ama'y tza'ñ etz yi' y'ángeles ajcxy. ⁸ E ca'p je ama'y tza'ñ ajcxy ymadacy ma je tzip, e ca'p je' ajcxy mïid'ajty tigiydac tzejpjoty. ⁹ E jadu'n Dios yajqueecy je mujcu', je ama'y tza'ñ mijjäybi, jilby tzejpjoty. Je' je' je ama'y tza'ñ huïdibi xii'ajtp diablo etz Satanás, je huïdibi huin'imb tüg'óciy naaxhuiñyjäy. Je mujcu', je ama'y tza'ñ, mïid je' y'ángeles ajcxy oy yajcötijnajxtäy ya naaxhuiñ.

¹⁰ Je huin'it hora nhuinmidooyich tüg ayuc janch mic tzejpjoty chooñ, yminañ:

—Ti je xii je tiempo nigoody mina Dios ti nihua'ñ ti yajnidzögy jäy ajcxy ma je mujcu'; mina Dios ti yajniguëxigý yi' ymic'ajt; mina Dios ti yajniguëxigý yi' y'ane'min; etz mina Cristo ytigiiy ane'mbi mïid ymic'ajt. Com ti Dios cötijnaxy je mujcu' huïdibi tzachxip ich ajt nmigügtijc, je mibijcpidijc. Je mujcu' anajty tzachxip ajcxy xim tzuum ma Dios. ¹¹ Ich ajcxy nhermanotijc ti yi' mimadaaccixy je mujcu' mïid je Dios y'ung ñi'py, etz mïid je' y'ayuc ytiy'ajt tiibi mibijccixy, je huïdibi ajcxy nidiy'ajtcixp ma yi mayjäy. Ca' ajcxy tzigiy anajty co yjugy'ajt ytigóoygixip. Nigi ni'ixi y'ijtcixy anajty mïid ymibijcin oy ytimy'óccixipy. ¹² Jotcujc'ajtcix etz jotcugiiygix huïdibi jilby tzinaaygixp tzejpjoty. Ayo'n ypadamyb ajcxy huïdibi tzinaayb naaxhuiñygyxy etz mejyjoty. Com je mujcu' ti je' ycidägy ma miich ajcxy mïid chip y'ejin. Com je mujcu' ñejhuiyb co tim jayinjaty jahuenjaty xii tiempo jacmïidity.

¹³ Co je mujcu' ijxy co ti yajcötijnaxy ya naaxhuiñygyxy, chi ooy pahuidijttacy je töxyjäy huïdibi anajty ti yajpi'c'aty pi'cyëdyjc. ¹⁴ Chi je töxyjäy metz me'tyqueec mijpi yajmoy, jigix cöguëgipy je ama'y tza'ñ, ñicxip agreeegïccip mijtigïduum ma je ama'y tza'ñ ca' ñijädiiby. Jim mijtigïduum yajmoy ycaayin y'uucin tugig jimijt ja cup. ¹⁵ Chi je ama'y tza'ñ ooy ñii yajpidzimy ma y'ahuac, jigix y'ahuimbidipy mij ñii huïdi je töxyjäy pagujip mij ñijoty. ¹⁶ E yi naax ooy je töxyjäy pubejty, chi je naax y'ahuäcxy, e uuctiiztay je ñii huïdibi anajty je ama'y tza'ñ ti yajpidzimy ma y'ahuac. ¹⁷ Mïid jada ycixpi je ama'y tza'ñ ooy y'ahua'ndacy mïid je töxyjäy, chi ñicxy tziptumbi mïid je töxyjäy y'ap y'oc

huidibi jacjimip, je' ajcxy huidibi cuydumb Dios y'ane'min ycötujcin, je' ajcxy huidibi cuydumb je ayuc huidibi Jesucristo anajty capxhuäcxyp.

13

Je metzpi ca'oy'iyujc

¹ E jim ndinay'ihuuyich ma püjot mejypäbi. Chi nhuin'ijxyich co tüg iyujc janch oy chigüyñi ypidzimy mejyjoty ymüd anajty huixtujc ycohuajc, e majc ymu'n. E ma ymu'n müdity majc corona. E ma ycohuajc müdity anajty cojaay yxüi huidibi yajjotma'tp Dios. ² Jadayaabi ca'oy'iyujc huidibi nhuin'ijxyich, jadu'n anajty yquëxigy nej tüg cuuxyubijy. E ytecy jadu'n anajty yquëxigy nej osi ytecy, e y'ahuac jadu'n anajty yquëxigy nej jamгаа y'ahuac. Chi je ama'y tza'ñ oy cötujc möy, mic'ajt möy, mij'ane'min möy, je ca'oy'iyujc. ³ E n'ijxyich tüg ycohuajc ma je ca'oy'iyujc co mij chaachijity, nej jihuüy je' yaj'ögüib. Chi je chaach'au oy choogy, e tüg'óciy naaxhuiñjyay ooy janch jihuiyigy huinmaaygixy müd jada ycixpi co ti choocy. Chi je mayjáy ajcxy panixy je ca'oy'iyujc. ⁴ Je mayjáy ajcxy ooy huindzigüygixy je ama'y tza'ñ, je mujcu', com je' co anajty ti möy cötujcin ane'min je ca'oy'iyujc. Chi ajcxy nañ jadu'n ooy huindzigüygixy je ca'oy'iyujc, chachminaangixy:

—¿Pin jada' ocjadu'nip nej jadayaabi ca'oy'iyujc, e pin jada' octziptuunip müd yi'? Ca' pin.

⁵ Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi müd'adipy ane'min cötujcin huixchigüipx metz po'. ⁶ E jadu'n je' tuuñ. Nigapxy ni'ojüy ooy Dios. Nigapxi Dios yxüi oy ca'oy, etz nigapxi ni'ojüy Dios ytijc. Nañ jadu'n nigapxy ni'ojüy huidibi ajcxy jüby tzinaayb tzajpjoty. ⁷ Chi mic'ajt ymooyi, jigix chiptuunip müd je huidijaty mibijcp Dios, huidijaty müd ity Dios, ixti mibaad mimadaaccixy. Nañ jadu'n mooyi cötujcin mic'ajt, jigix ane'mip naaxhuiñjyay huen huidibi razaity huen huidibi cajpity, huidibi capxcixp huen huidibi ayucity. ⁸ Tüg'óciy mayñaaxhuiñjyay ajcxy huidijaty janch ni ycamiiñ yxüi jaybety ma je jugy'ajt libro huidibi je Dios y'ung, je Cordero, ymüd. Dios yhuinma'ñypidacy jayijp ca'ni naaxhuiñybi anajty chondägy co y'ung y'öga'ñ müd jäy ajcxy ycixpi, jaydëbi cijxjaayi ajcxy yxüi ma yi jugy'ajt libro.

⁹ Pinjaty tädz'ac müd, pinjaty mido'mbigamb jada ayuc, huen mido'mbijccixy. ¹⁰ Pen Dios ti yhuinma'ñypidägy co pinjaty ymügüg yajnıcx mach, nañ jadu'n je' ajcxy nıcxıp mach ci'm. Pinjaty ymügüg yaj'öcp nañ jadu'n y'ögıp jadu'n nej ymügüg anajty yaj'ögy. Paady ycıxp yi' ajcxy huidijaty mibijcp Dios, huen yajtungixy müd ymügügtıjc mecxtujcin etz mibijcin.

¹¹ Huin'it nhuin'ijxyich jadüg ca'oy'iyujc chooñ naaxjoty, e ymüd anajty metz ymu'n, tim jadu'n nej pi'ccöbixymang ymu'n. E je' jadu'n anajty ycapxy nej je ama'y tza'ñ ycapxy. ¹² Je mimetzpi ca'oy'iyujc ymüd ane'min huidibi je jayijpi ca'oy'iyujc ti ymöyüi. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñjyay huen ojadajtcixy huindzigüygixy je jayijp'atypi ca'oy'iyujc huidibi anajty je chaach'au ti chögy. ¹³ Nañ jadu'n ooy anajty tijaty mijhuinma'ñ tuñ, ixti jin yajcödıgıyb tzajpcıxy, yajcay naaxcıxy ma jäy ajcxy yhuinduu. ¹⁴ E müd je mijhuinma'ñ huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'ıñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajnıgojtıutcıxıpy je ca'oy'iyujc huidibi anajty tzachıjp müd espada, e ca' y'ögy, jadu'n anajty jactzinäy. ¹⁵ Je mimetzpi ca'oy'iyujc yajmic'ajtmoy co yajjugy'adip je tzaadzech tıibi anajty yajnıgojtıutcıxy, jigix je' ycapxıpy etz nañ jadu'n jigix je' ane'min

pidägipy co yaj'öctähuiipy pinjaty ca' y'ojadadyii. ¹⁶ Chi je mimetzpi ca'oy'iyujc ane'my yi pi'ctijc, mij'anäctijc, mijjäydijc, comeeñydijc, ayoobitijc, tumbidijc, midumbidijc etz jac pinjaty co huen ajcxy tiy'ajt ijxpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymüid je ca'oy'iyujc tiy'ajt y'ijxpejt, o yxii, o je' yxii ñinúmero. ¹⁸ Jadayaabi ayuc chojcpy ixpijcin, pinjaty huinjihu#yb jëbi mihuinma'ñybaady ti número je ca'oy'iyujc müid. Je' je' je número huidibi tüg jäy müidity. Je jäy ñinúmero hue' je' tudujc migo'px jatugipx tudujc.

14

Je nimigo'px jahuixchiguipx milbi yëydijc ajcxy y'iy

¹ Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögor huidi yxii Sión. Ymüid anajty migo'px jahuixchiguipx madaax mil jäy huidibi anajty ajcxy müid cojay ma yhuimboc je Dios y'ung yxii, etz yi' yTeedy yxii, je Dios Teedy. ² Nhuinmidooyich tüg ayuc chooñ tzajpjoty, jadu'n nmidooyich nej mijñii y'a'ich, nej enee yjidity. Hue' je' anajty nmidooyich nej mayjäy y'arpa yajcoogixy. ³ Ooy anajty ajcxy igixy tüg iy jemybi ma je mij'ane'mdac yhuinduu, ma je madaaxpi iyujc jugy'ajtmüidpi yhuinduu, nañ jadu'n ma je mijjäy ajcxy yhuinduu. Jac ni pin je' anajty ca' huaad ixpicy je iy, jëyi ajcxy je huixchiguipx madaax milbi jëbi ixpijccixy je iy, je huidibi ajcxy Dios ti yhuin'ixyii etz ti yajnödögy ya naaxhuiñ. ⁴ Jada je' ajcxy huidibi ca' ajcxy migapxtigoogixy töxyjäydijc, huadz tudägy ajcxy yjot yhuinma'ñ müidity, ca' ajcxy pijccixy. E ypanicxyp ajcxy je Dios y'ung, je Cordero, oy tim ma'ámy ñicxy. Yi' ajcxy je jayijp'atypi jäy ya naaxhuiñ huidibi Dios ti yjuybidzimy ma anajty ijtcixy codoogiy müid ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huidibi ti yajpidzimy ya naaxhuiñ. ⁵ Ni ti anii ti ycaaypaady ma je' ajcxy. Com ca' ajcxy tibocy müidity, ca' ti xihuin ajcxy müidity ma Dios y'ane'mdac.

Je nidugigpi ángeles ajcxy y'ayuc ytiy'ajt

⁶ Chi nhuin'ijxyich jadüg ángel yqueec-huidity cuptzajp, e ymüid anajty Dios ytiy'ajt jemybi oybi huidibi ijtp huinixii. Hue' je' yajcapxhuäcxip ma huidibi anajty ajcxy tzinaaygixp naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷ E je ángel ymina'ñ anajty janch mic:

—Tzigiygix Dios, huin'igix huinyaaxcix cömaygix Dios. Ti paady je xii je hori mina Dios tiyduna'ñ yajtigoya'ñ yi' ajcxy huidibi jibic tumb. Ojadajtcix je huidibi yaj'oyiiy je tzajp etz je naax, je meyy etz majaty nii ymuxy.

⁸ Co je midügpi ángel ycapxtaay, chi je mimetzpi ángel ymina'ñ:

—Ti ymic'ajt ytigoydäy je Babilonia je mijpi cajp. Yi Babilonia jäy ti yajhuinma'ñydgoydäy je naaxhuiñyjäy müid yjibic-huinma'ñ, paady yi Babilonia jäy ayo'n müidity cham, com je Dios ti ymijotmättäyii ajcxy. Jadu'n Babilonia nipaady nej tüg töxyjäy huidibi huin'imb yëydijctijc müid anii etz jocñii.

⁹⁻¹⁰ Co je mimetzpi ángel ycapxtay, chi je midugigpi ángel ymina'ñ janch mic:

—Pen pinjaty huindzigiyb yajmij'ajtip je ca'oy'iyujc etz je ñigojtuutin etz nañ jadu'n cöbijccixy je ca'oy'iyujc ytiy'ajt y'ijxpejt ma yhuimboc o ma yci', hue' Dios tzaachytunib yi jadu'mbi jäy ajcxy mictägy, ypaadip ajcxy Dios chip y'ejcñ. Tim jadu'n nipaady nej jihuüy Dios yaj'ügyii ajcxy je vino nii huidibi yi' ti ni'ixiy. Dios ti ni'ixiy je it ma ajcxy ayo'n pada'ñ, tim jadu'n nipaady nej je

tasi ma Dios yvinon¹¹ ijtp. Chi je' ajcxy ayo'n paadipy ma ytoy je mijj¹¹n m¹¹id azufre ma je Dios y'ángeles yhuinduu etz je Dios y'ung, je Cordero, yhuinduu. ¹¹ Je j¹¹injoc hu¹¹idibi anajty p¹¹idzimb ma anajty je mayj¹¹ay ayo'n paatcixy, p¹¹idzimip je' hu¹¹inix¹¹ hu¹¹in¹¹tiempo. E ni p¹¹ocxin ycaca'ty x¹¹im tzuu¹¹m m¹¹id je p¹¹injaty anajty hu¹¹indzig¹¹iyb pa'tjihui¹¹iyb je ca'oy'iyujc etz m¹¹id y'ahu¹¹inax, o pen yc¹¹öb¹¹ijcipy anajty je ca'oy'iyujc yx¹¹ ycojay¹¹ty ma yhuimboc o ma yci'. ¹² Com Dios chaachytunamyb je j¹¹ay ajcxy hu¹¹idibi ijtp m¹¹id je ca'oy'iyujc, paady ycixp copicy co y¹¹ j¹¹ay ajcxy hu¹¹idibi ijtp m¹¹id Dios huen cuydungixy yajxon Dios y'ane'min yc¹¹ötujcin etz huen m¹¹ibijccixy mijpidaaccixy tudägy Jesús, etz nañ jadu'n yajtungixy mecxtujcin ma ajcxy chinaayin.

¹³ Nmidoohuich t¹¹ug ayuc tzajpjoty chooñ xyñimäyich anajty:

—Cojay jada ayuc: “Jadachambi etz jacnicxpi x¹¹ tiempo, jotcuyc ajcxy hu¹¹idijaty öccixp co m¹¹ibijccixy je Huindzin Jesús.” Je Espíritu Santo yminañ co jadu'n tunamb jadamb, pocxnip ajcxy nej ytungixy, e co ajcxy yjadipy tzajpjoty, chi ajcxy nejhu¹¹huip je' ajcxy tzajpjoty tzinaaybi jadu'n nej je m¹¹ibijcpi ajcxy anajty oybi ti tungixy.

Co Jesús anajty miñ t¹¹yduñ tzaachytuñ jibicjäydijc

¹⁴ Chi jada' nhuin'ijxyich t¹¹ug joc janch poob. E ma je joc n¹¹icx iñäy t¹¹ug yquëxigy nej je j¹¹ay hu¹¹idibi tzoön tzajpjoty (je Cristo). Je' ym¹¹id anajty ma ycohuajc t¹¹ug corona ac oori, e ma yci' m¹¹idity t¹¹ug hoz janch jippi. ¹⁵ E ypidzimy ma je Dios chinaydac jadüg ángel, je' tzachmiyäxy anajty janch mic je hu¹¹idibi anajty iñäyb jocnigixy, yminañ:

—Pidäg y¹¹ mhoz, e yajpidig y¹¹ cosecha, com ti paady je x¹¹ je hori etz je cosecha ti chamni jilby naaxhuiñ.

¹⁶ Huin'it je' pidacy je' yhoz ya naaxhuiñ, je hu¹¹idibi anajty iñäyb jocnigixy, chi ya naaxhuiñ yajpidigy je y cosecha.

¹⁷ Nañ tim jadu'n huin'it jadüg ángel ypidzimy ma je Dios chinaydac jilby tzajpjoty. Nañ jadu'n je' anajty m¹¹idity yhoz janch jipp. ¹⁸ Chi jadüg ángel ypidzimy ma je Dios ojadajttac hu¹¹idibi anajty c¹¹ötujc m¹¹id ma je j¹¹n. Chi yaaxi janch mic je hu¹¹idibi anajty je' yhoz janch jippi m¹¹id, chi nimay:

—Pidäg y¹¹ mhoz janch jippi ma y¹¹ muuxycha'm cosecha hu¹¹idibi yajpatp jilby naaxhuiñ, com ti ooy chamni.

¹⁹ Chi je ángel yajnaxxy je' yhoz naaxhuiñ, chi yajpidigy je camuuxycha'm cosecha, chi t¹¹ug'it¹¹y yajnigidacy ma huaad yajhuinm¹¹icxy. Hue' je' yhuimb¹¹dzimy co je' je' je mij ayo'n je m¹¹ijtzaachypi hu¹¹idibi Dios yquexamyb m¹¹id j¹¹ay ajcxy ypocy ycixpi. ²⁰ Je camuuxycha'm hue' je' oy yajhuinm¹¹icxy Jerusalén cajppa'. Ma anajty ti y'ocnigidacpi ypidzimy ooy ni'py janch com, ycoody mabaad je cohuay ajcxy m¹¹idity yfreno, e ym¹¹jhuin'ajt¹¹n hue' anajty m¹¹idity tugig migo'px kilómetro.

15

Y¹¹ ángeles ajcxy m¹¹id je huixtucnajxpi ayo'n

¹ Huin'it nhuin'ijxyich jadüg t¹¹y'ajt ijxpejt janch mijpi tzajpjoty, e janch oy huinmaayñi. Huixtuc ángeles anajty m¹¹idity c¹¹am je huixtucpi tzaachypi ayo'n hu¹¹idi cogixiyñip, e m¹¹id jadu'n ycixa'ñ ytigoya'ñ Dios chip y'ejc¹¹n.

² E nhuin'ijxyich jadu'n nej t¹¹ug mejy ac vidrio, e je vidrio m¹¹ihu¹¹idid¹¹ j¹¹n. E j¹¹m anajty je j¹¹ay ajcxy hu¹¹idijaty madac co ca' hu¹¹indzig¹¹y anajty je ca'oy'iyujc etz je' y'ahu¹¹inax, je hu¹¹idijaty ca' ajcxy c¹¹öb¹¹ijci je ca'oy'iyujc yx¹¹ ñinúmero. E j¹¹m anajty ajcxy ytinaaygixy nigixy ma je mejy ac vidrio hu¹¹idibi janch ad¹¹icxp ajajp anajty, ym¹¹id ajcxy je arpas hu¹¹idibi ajcxy Dios mooyi. ³ Ooy anajty igixy

je Moisés y'iy, je Dios ytumbi etz nañ jadu'n anajty ñgixy je Dios y'ung, je Cordero, y'iy huídibi minamb:

Mij ooy, etz janch mijhuinma'ñ huídibi miich ti mduñ. Huindzin, miich Dios huídibi jac mic'ajt miidip ca'ydi jac pin. Janch tudägy miich mnii'aa mdu'aa. Miich rey'ajtp huindu'myñaaxhuiñ huinixii huinítiempo.

⁴ ¿Pin miich xyca'octzigíhuamb, Huindzin? ¿Pin miich xyca'occömayaanip mxii? Tug'óciy naaxhuiñjáy xyajmij'adipy xyhuindzigíhuipy, com miich naydügpajc je huätzpi Dios, com miich nyaj'ijxp mgötujcin co ytudägy.

⁵ Co jadu'n yajti, chi n'ijxyich co y'ahuaach je Dios y'it jii by ma Dios ytijc huídibi yajpatp tzajpjoty, ma y'ity je tzaa ma yjaybetyity Dios ycötujcin. ⁶ E ma je Dios yajhuindzigíy yajpa'tjihuiy, jii by ypidziimy huixtujc ángeles. Ymíd anajty ajcxy yci'am huixtujc ayo'n tzaachypí. Hue' anajty ajcxy yxoxity míd huit janch oybi janch huätzpi, e janch adicxp ajajp anajty. Ymíd anajty ajcxy oorihuín mabaad ycaachyjip. ⁷ Nidüg je mídaaxpi iyujc jugy'ajtmídpí moy je huixtujcpi y'ángeles huixtujc tasi ac tím oorí, janch ujtz je tasi míd je Dios chip y'ejcín. ⁸ E je it ma Dios yajhuindzigíy yajpa'tjihuiy yajpa'tjihuiy ujtztay je' míd je jijnjoc huídibi jadu'n ñipaty nej je Dios y'oy'ajtin etz Dios ymic'ajtin. E ni pin anajty huaad ca' jii by ytigíy ma je Dios ytijc jii by tzajpjoty, ixti cooni je' yci'xtáhuipy je huixtujcpi ayo'n, je tzaachypí huídibi je huixtujcpi ángeles ajcxy ymíd.

16

Je tasi huídibi ujtz míd ayo'n tzaachypí

¹ Chi nmidooyich tüg ayuc chooñ ma Dios ytijc jii by tzajpjoty, nimay anajty janch mic je Dios y'ángeles ni huixtujcpi:

—Nix ajcxy yajyojctuticx jii by naaxhuiñ yi huixtujcpi tasi huídibi ujtziy míd Dios chip y'ejcín.

² Chi ñicxy je midügpi y'áγγελ, chi je' ytasi yajtemduty jii by naaxhuiñ ujtz míd may'ayo'n. E tüg'óciy je mayjáy huídibi anajty ajcxy míd ma yhuimboc je ca'oy'iyujc ytiy'ajt, pinjaty anajty je ñigojtuutin huindzigíyip pa'tjihuiyip, chi je' ajcxy ypaati ñibidzim tüg ñibüd z janch jibicpi, e huídibi janch pijcp.

³ Je mimetzpi y'áγγελ yajyojctuty je' ytasi huídí anajty ujtz míd ayo'n mejyhuingíxy. Chi je mejy y'ahuimbijty ni'py, jadu'n nej jihuiy öcpi ñi'py. E huídijaty iyujc jii by tzinaayb mejyjoty, cijx je' y'öctäy.

⁴ Je midugígpí y'áγγελ yajyojctuty je' ytasi huídí anajty ujtz míd may'ayo'n maajaty je mjiní, etz maajaty ni ymuxy, nañ jadu'n ac ñi'py je' y'ahuimbijttay. ⁵ Chi nmidooyich co je áγγελ ymína'ñ huídibi ane'mb je nií:

—Huindzin Dios, tudägy mduñ co ti mdiyduñ je naaxhuiñjáy ajcxy míd ypocy ycixpi, e jadu'n ti mguexy mij ayo'n ya naaxhuiñ, Huindzin Dios, janchypí huätzpi miich, huídibi ijtnaayb etz ti m'ijtnäy. ⁶ Com je naaxhuiñjáy ajcxy tundigooy co ajcxy teemi yojci je mibijcpídic ñi'py, je huídibi mhuin'ijx, je huídibi ajcxy miich m'ayuc najtzcaxiyb anajty. Paady ycixp miich je nií huídibi yi naaxhuiñjáy y'uuccixyp, ti myaj'ahuimbity ni'py, com jadu'n ajcxy mihuaadity je tzaachypí míd ajcxy ypocy ycixpi.

⁷ Nmidooyich co pinjaty ma je it ma yajhuindzigíy Dios, ymína'ñ:

—Janch jadu'n, Huindzin Dios, huídibi tüg'óciy mic'ajt míd, míd mdiy'ajt etz míd mdudägy'ajtin, ti mdiyduñ je naaxhuiñjáy ajcxy míd ypocy ycixpi.

⁸ Je mímadaaxpi Dios y'áγγελ yajyojctuty ma je xii je' ytasi huídí anajty ujtz míd Dios chip y'ejcín. Chi je xii yajmoy ymic'ajt co jáy nögiib míd je' yjiiñ. ⁹ E tüg'óciy jáy ajcxy yxidzaydaayi janch mic. E ni ca' ajcxy yhuinma'ñ

yajtigajch, ni ca'ojadajtcixy ni ca' cömaygixy Dios. Nīgi ajcxy ooy jibic Dios nigapxy ni'ojñy, je Dios huídibi ane'mdaayb tüg'óciy ayo'n mïd ymic'ajt.

¹⁰ Je mimigooxpi y'ánel yajtemduty je ytasi, huídi anajty ujtz mïd Dios chip y'ejcín, ma je ca'oy'iyujc y'ane'my etz ma tüg'óciy it lugar ma je ca'oy'iyujc y'ane'mín, e huín'it oy ycoodzygidactáy. Yi jáy ajcxy ooy ytoodz oc'adzütmúccixni mïd je ayo'n tibi anajty ytuñyí yjadyí. ¹¹ Per ni jadu'n ajcxy ca'ixmajch je jibicpi huídibi anajty ajcxy ytumyb. Nīgi ajcxy ooy oyñinej ycapxcixy etz ni'ojñygyxy Dios tzajpjoty mïd je jübii pa'mii etz je nibüdz ycixpi.

¹² Je midudujcpi y'ánel yajtemduty je ytasi huídi anajty ujtz mïd Dios chip y'ejcín ma je Eufrates mijñii. Chi je mijñii ytich jigix jébi ajcxy je reydiyc ñaxy huídibi ajcxy tzoomb xibidzimy'amy.

¹³ Chi nhuin'ijxyich co ypidzimy ma je ama'y tza'ñ y'ahuac, etz ma je ca'oy'iyujc y'ahuac, etz ma je profeta falso y'ahuac ypidzimy tugig ca'oybi. E je tugigpi ca'oybi jadu'n anajty yquëxigy nej tugig Tuc. ¹⁴ E je tugigpi Tuc hue' ajcxy ca'oybi ymïd, e tungixy anajty mijhuinma'ñ mïd je mujcu' ymic'ajt. E oy ajcxy huoomucy huídijaty anajty rey'ajtp huindu'my naaxhuiñ, jigix je' ajcxy chiptungixipy mïd je mijpi Dios huídibi tüg'óciy mic'ajt mïd, co anajty je xii je tiempo yhuaad'ajtni huídibi Dios ti yajniödugiy. ¹⁵ Jadu'n Dios ymina'ñ:

—Cuenditungix ich n'ayuc. Ameech nhuimbida'ñich naaxhuiñ jadu'n nej meetzpi ameech nicxy meech tijaty. Paady ycixp jotcujc pinjaty ni'ixi xy'ahuijxpich, je huídibi ypocy ti ymecxyii, e tudägy'ajtn ti paady ma ich jigix ca' jadu'n paadip nej tüg jáy huídibi yhuít ti meechyí, e jadu'n je' yhuímy nihuädz, e tzo'ydu'n jihuíy co jáy yhuídicxyii. ¹⁶ Chi je tugigpi ca'oybi huoomujctay ajcxy je reydiyc ma tüg it huídibi yxii Hebreo'amy Armegeción.

¹⁷ Je mihuixtujcpi angel yajyojctuty je' ytasi jim pojoty, e ma je it ma ajcxy huíndzigiy Dios etz ma je' y'ane'mdac tzajpjoty, jüby tüg ayuc chooñ janch micpi ymina'ñ anajty:

—Ti ytuñyí yjadyí.

¹⁸ Huín'it ooy yajti huídzuc, ne'mín micpi etz jidiñtin, ooy naax yücxxy mïd tüg uyx janch micpi, niminaabi jadu'n ycajadyí maabi jáy chinay'igtigixy naaxhuiñ. ¹⁹ Chi je mij ciudad, je Jerusalén, oy yhuäcxy tugig picy, nañ jadu'n je may ciudad huídibi huindu'myñaaxhuiñ, cijx ymijähuidäy. Chi Dios jáymejtzcoty je Babilonia cajp nej je jáy ajcxy jim ytundigooygixy, e chi quejxy may ayo'n jim mïd chip y'ejcín ycixpi. ²⁰ Tüg'óciy je naax mejy'agujcpi ytigoyday. Etz tüg'óciy tungop naaxhuiñgixy cijx je' ytigoydäy. ²¹ Nañ jadu'n ooy ycäy chooñ tzajpjoty eneeditz mijjatypí majaty jáy ajcxy, janch jempxy anajty je eneeditz, tügjatypí huixchiguüpxy kilo. Chi jáy ajcxy ooy oyñinej nigapxy ni'ojñy je Dios mïd je eneeditz ycixpi, com ooy je' mij chachajti je ayo'n je castigi.

17

Je töxyjäy jibictzinaaybi chaachypí ycastigi

¹ Nidüg je huixtujcpi ángeles huídibi anajty ajcxy mïd je huixtujcpi ytasi ymiiñ. Chi ajcxy ymíydacy mïd ich, xyñimaaygixich:

—Min yam, miiñ nyajni'ixiy je tzaachypí huídibi ypadamyb je töxyjäy pocyumbi, huídibi iñaayb mejyhuingixy. ² Je reydiyc ya naaxhuiñ ti ooy ytundigooygixy mïd jada töxyjäy, e je naaxhuiñjäy ajcxy ti ooy huinma'ñyidigooygixy mïd jada töxyjäy ypocytunii huinma'ñ, jadu'n nej jihuíy ajcxy ooy ti ymúucigixy.

³ E Dios yjihui'ñ ymic'ajt xyajcumäyich e cumäyjoty xyajnicxyich je ángel mijtígíduum. E jim n'ijxyich tüg töxyjäy yaj'iñäy tüg ca'oy'iyujc huídibi ycolor tzaptz, e janch niducy müd pinjaty yxii cojaayip huídibi yajjotma'tp Dios, e ymüid anajty huixtujc ycohuajc etz majc ymu'n. ⁴ Je töxyjäy hue' anajty yxojx müidity müd huit janch oyjatypi, ycolor ucy etz tzaptz, ooy anajty yaj'oyguëxigy müd oori, müd pi'ctzaa janch oybi etz perla. Ymüid anajty ma yci' tüg tasi ac tim oori janch ujtz je' anajty müd jibic-huinma'ñ huídibi ca' y'oyjäygidaacnity, huídibi pocyunüi huinma'ñ müd. ⁵ E ymüid anajty cojaay tüg xii ma yhuimboc huídibi ca' pin huinjihuüy. Je letra jadu'n ymüina'ñ: "Je mijpi Babilonia, huídibi nigop'ajtip pocyunüi huinma'ñ etz tüg'óciy tijaty ca' y'oyjäygidaacnity ya naaxhuiñ." ⁶ Mic'amy iich oy nhuinma'ñ nyajmiñ nyajmech co je töxyjäy hue' je' anajty ti yaj'o'ccixy je huídibi ajcxy mibijcp Dios etz huídibi ajcxy Jesús yjäy'ajtip, e jadu'n nipaady nej jihuüy je töxyjäy ti ooy ymügyii müd je mibijcpidijc ñi'py. Co jadu'n nhuin'ijxyich, chi ooy ngijxy ngüejtyich njihuüy nhuinmaayich. ⁷ Chi je ángel xyñimaayich:

—¿Nej co mgixy mgüety? Iich miich nyajnimähuüpy nej yhuimbüdzimy huídibi ca' pin huinjihuüy ma yi töxyjäy etz ma yi ca'oy'iyujc huídibi yaj'iñäy, huídibi ycohuajc huixtujc müd etz majc ymu'n. ⁸ Yi ca'oy'iyujc huídibi ti m'ixy, je' yi tiibi chinäy e cham ca'p je' ma. Chi ypidzimipy ayoodactuuyb, jayijp ma anajty ca'ni nicxy y'ayoy ytigoy tücci'yi. E je jäy ajcxy huídijaty tzinaayb naaxhuiñ, e ca'p yxii y'ity cojaay ma je jugy'ajt libro huídibi oyiiy ca'ni anajty naaxhuiñybi chondägy. Ooy je' ajcxy huinmäyigixipy jihuüygixipy co ijxcixipy je ca'oy'iyujc huídibi jecyip ti y'octzinaaybi, e cham ca' je' ma, e chi jada' jadüg'oc yhuimbida'ñ.

⁹ Ya ii tigati pin jëbi huinjihuüy je huixtujcpi cohuajc, je' je' je huixtujcpi copjot ma je cajp y'ity. E je cajp jadu'n je' nipaady nej jada töxyjäy pocyumbi. ¹⁰ Je huixtujcpi cop jadu'n ajcxy nej huixtujcpi rey. Ma je huixtujcpi rey migoox je' ajcxy tiibi ymic'ajt ytigooygixy. Nidüg je' cham y'ane'my. Je jadügpi ca'ni je' ymiñ. E co je' ymiinipy je huídibi cogixiyb, ca'p je' mijcajee yhuäcxibipy. ¹¹ Je ca'oy'iyujc huídibi jecyip tzinay, e cham ca' ma, je' je' je mductujcpi rey, oy je' yjajëjity nidüg ma je nihuixtujcpi rey. Huin'it je' ñicxnipy ayooobi jottigooybi tücci'yi ayoodactuuby.

¹² Je majcpi mu'n tiibi m'ixy, je' je' je majcpi rey huídibi ca'ni ajcxy ytigüygixy ane'mbi. E cidigihuüib ajcxy ycötujcin co yrey'ajtcixipy tüg hora quipxyi müd je ca'oy'iyujc. ¹³ Jada majcpi rey ajcxy tú'ciy ajcxy y'ijtcixy, tú'ciy ajcxy yhuinma'ñ, e yegipy ajcxy y'ane'min ycötujcin ma je ca'oy'iyujc. ¹⁴ Tziptuunip ajcxy müd je Dios y'ung, je Cordero. E je Cordero ymimadactähuüpy je' je majcpi rey ajcxy. Com je' je' tügpajc Huindzinip ma pin janaydíjip huindzin. Je' je' tügpajc reyip jac mic'ajt müdipi ma je reydiyc ajcxy. E pinjaty Cristo müd y'ity, Dios je' ti huin'ixy, e tudägy je' panicxy Dios y'ung.

¹⁵ Nañ jadu'n je ángel xyñimaayich:

—Yi mejy tiibi m'ixy ma je töxyjäy pocyumbi iñäy, hue' je' jadu'n nipaady nej maygajp, nej mayñación ma mayjäy chinaygixy huídibi capxcip canaagnax ayuc. ¹⁶ Je majcpi mu'n tiibi m'ixy ma je ca'oy'iyujc, je' ajcxy ca'ixa'nip catzoga'nip je töxyjäy pocyumbi. Chi ajcxy ix'ijxnip je töxyjäy pocyumbi, yajhui'mipy ajcxy nihuädz. Chi ajcxy je töxyjäy pocyumbi ñinix tzu'tzipy, e nöccixipy müd jin. ¹⁷ Dios ti pidägy ma ajcxy y'aa yjot huen tungixy nej Dios tzocy, müd co anajty ti pidaaccixy tú'ciy yhuinma'ñ. E cötujc möhuaangixy ane'min möhuaangixy co yrey'adipy je ca'oy'iyujc, ixti cooni yajcuydundähuüpy je ayuc huídibi Dios anajty ti capxy. ¹⁸ Je töxyjäy

t̄ibi mhuin'ixy, je' je' je mij cajp huidibi ane'mdaayb je reydiyc ajcxy huindu'myñaaxhuiñ.

18

Babilonia cajp oy yhuindigooy

¹ Co jada jadu'n yjajti, chi nhuin'ijxyich jadüg ángel ycidägy naaxhuiñgixy, chooñ tzajpjoty müid ymij'ane'min ymijcötujcin, e ooy je naax yaj'aniiy müid je ytiicxin yjajin. ² Chi je ángel ooy mic yaaxqueecy ymina'ñ anajty:

—Ti ymic'ajt ytigooy, ti ymic' ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuädzity, huidibi ca' y'oyjäygidacnity. ³ Com ti je mayjäy huidibi tzinaayb ma tüg'óciy nación yhuinma'ñyidigooygixy müid je Babilonia yjibic-huinma'ñ pocytunii huinma'ñ. Ti je reydiyc huidibi ane'mb ya naaxhuiñ müid ytundigooygixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñybatcixy müid je Babilonia pocytunii ñegocio. Je Babilonia jadu'n yi' nej tüg töxyjäy jibic-huinma'ñ müidpi.

⁴ Chi nmidooyich jadüg ayuc chooñ tzajpjoty, e ymina'ñ anajty:

—Pidzimgix ma yjiibi cajp com ich müich ajcxy një'ajtpy, jigix müich ajcxy ca' m'aminmugipy ma yi' ajcxy ypocy, e ni xycapaadip müich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵ Yi' jadu'mbi cajpjäy ypocy ti oy mayiiyñi e Dios yi' ajcxy tzachytunib müid ajcxy ypocy ycixpi. Dios yjäymejchp yi' yjibic-huinma'ñ ajcxy huidibi ti tungixy. ⁶ Dios ymoyhuimbidity je tzaachypi yi' Babilonia cajpjäy, jadu'n nej ajcxy yi' je' tzaachytuñ Dios yjäy ajcxy, Dios ymoyhuimbidity je Babilonia cajp tzaachypi mejtz jadu'ñi ca'ydi jadu'n nej yi' ti yecy. ⁷ Mo' yi' Babilonia cajp yi' tzaachypi ayo'n, tim jadu'n nej yi' ti ñaymöyii ma yi' chinaayin etz ñayjihuiyi amij agix. Yi' ymina'ñ jotjoty huinma'ñjoty: “Ich mij'ane'mbi ich. Ca' nyajpaadyich nej tüg co'ögytöxyjäy müidity tajin mayin. Ni nga'ixipyich jiiyin yaaxin.” ⁸ Müid je' ycixpi tügxiiyi ymiinipy je mij'ayo'n o'cin, tajin mayin, jiiyin yaaxin etz yuuba'm ma je Babilonia cajp. Chi ninöghuipy je Babilonia cajp müid jin. Com yi' Huindzin Dios ooy yi' ymijity, e yi' ti yajpocycäy yi' Babilonia cajp, huidibi nipatp nej tüg töxyjäy pocytumbi.

⁹ Je reydiyc ya naaxhuiñ huidibi jibic-huinma'ñ pocytunii huinma'ñ tungixp quipxy müid je Babilonia jäy, chi ajcxy ytáxcixipy ymáygixipy yjiygixipy yáaxcixipy co anajty ijxcixyp je Babilonia cajp jinjoty co anajty ytooybicy. ¹⁰ Jiguem ajcxy yjacmij'ijxcixipy müid co anajty chigiiygixy co páatcixipy ayo'n quipxy müid Babilonia, e ymináangixipy:

—¡Ay, müich Babilonia mij cajp, huidibi ooy mgapxpaadyity, ooy mmijity, ooy mmic'ajt müidity! Per janch tim tüg jaxigy ti xyñimiiñ je' ayo'n huidibi Dios ti quexy müid mbocy ycixpi.

¹¹ Je ajuybidijc adoocpidijc huidibi ajcxy naaxhuiñ jiiygixipy yáaxcixipy ajcxy müid je Babilonia cajp ycixpi, com ca'p anajty pin juuyip ajcxy yjuy ytoocy. ¹²⁻¹³ Je ajuybidijc adoocpidijc ajcxy ymüid oori, plata, tzaa oyjatypi, perla oyjatypi, lino huit oyjatypi, sedi huit oyjatypi, rey yhuit, huit color tzaptzpi, nañ jadu'n ymüid ajcxy canaagnaxpi quipy huidibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymüid ajcxy canela, etz tijaty ooy oy xuucin müidity, poom, mirra, perfume, vino aceite, trigo tim, iyujc animal huidibi tzimiy yajyöyb, cöbixy, cohuay, carreti, tumbi huidibi codoogyip, etz jacjadyii jäy juugypi. ¹⁴ Je ajuybidijc adoocpidijc ajcxy ñimähuipy je Babilonia jäy ajcxy:

—¡Ca' ajcxy m'ocmüdiñ je tñm tza'm huidibi ajcxy mjot yjatzojcxy, ca' ma anajty y'ocyajpatni. Ti tigoydäy miich ajcxy mjogy'ajt, je mgomeeñ'ajt, etz m'ijxin huidibi anajty miich ajcxy mmüid, ca' ma ocyajpatnïp jadüg'oc!

¹⁵ Je huidijaty anajty huit ixtaayb meeñ ixtaayb, e ti ycomeeñygojcixy ma yijimbi cajpïn, jiguem ajcxy yhui'mdähuipy müid tzig'i'ñ jihu'i'ñ, co nañ jadu'n je tzaachypi castigi padaangixy. Yäxip ajcxy etz nidájcxipy nimáaygixipy je Babilonia cajp. ¹⁶ Chi ajcxy ymïnaanïp:

—¡Ay! ¡Miich mij cajp huidibi ayo'n patp! Jadu'n miich anajty nej tüg töxyjäy huidibi xoxyip müid huit oyjatypi, huidi ycolor ucy etz tzaptz, yaj'oyguëxigy müid oori, müid pi'ctzaa oyjatypi, müid perla. ¹⁷ ¡Janch tñm tüg jaxigy, janch tñm tüg hori, ti ycixy miich mmïjjogy'ajtin mmïjcomeeñ'ajtin!

Tüg'óciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je mejy, ti je' ajcxy yhui'mdaaygixy jiguëgy. ¹⁸ Co ajcxy ijxy nej anajty ytoy yjocy je mij ciudad, chi ajcxy ymïnañ:

—¿Huidibi cajp jada' ji jadu'nïp nej jada anajty jadayaabi mij cajp?

¹⁹ Chi ajcxy ooy naax ñayyajcöhuoogixy müid jotmay, cham ooy yaaxcixy, ytajcixy ymaygixy, e mic chachmïnaangixy:

—¡Ay! ¡Je mijpi oybi cajp huidibi ayo'n patp, ma je tüg'óciy pinjaty anajty ymüid barco ma mejy, ti ycomeeñygojcixy anajty müid je'! ¡Janch tñm tüg mij jaxigy, tñm tüg hori, ti yhuindigoydäy miich mmïjjogy'ajtin mgomeeñ'ajtin!

²⁰ Jotcugixy müid je Babilonia cajp ycixpi, miich tzajpjoty tzïnaayb ajcxy, etz miich ajcxy huidibi Dios xyhuin'ijx co jëbi m'apóstol'ajtcixy, etz nañ jadu'n miich ajcxy huidibi najtzcapxixy Dios y'ayuc ytiy'ajt, etz nañ jadu'n pinjaty ijtp ma Dios. Com co Dios ti yajpocycäy Babilonia cajp, je' yi' ti yaj'adigach jadu'n nej ajcxy xymüiddundigoy.

²¹ Huin'it tüg ángel janch mic'ajtmüidpi conigy tüg tzaa, jadu'n nej tüg molino paandzaa mijpi, chi je' cogädzixy mejyjoty, e ymïnañ:

—Nej jada tzaa ti ytigooyïn, nañ tñm jadu'n je mijpi oybi Babilonia cajp ytigoydähuipy. E janch ni mina pin cajac'ixipy. ²² E ni camina ajcxy mgajac'mïdohuipy jim Babilonia co pin arpi coob etz flauta yajxuuxp trompeti yajxuuxp mijni mijtu'. E ca' jacyajpaadip pinjaty ti dung ii jajtp, ti oficio jajtp, ni mgamïdohuipy je molino paandzaa ñe'mïn. ²³ Ni mina ti ycatïcxipy jadüg'oc ma je Babilonia cajp. Ni mina ycayajmïdohuipy jadüg'oc je xii je xondaacin huidibi jajtip co jäy ypicxy. Oy je Babilonia ajuuybi y'adoocpi ajcxy anajty ooy yjamïcjäyity ya naaxhuiñ, e ti ajcxy huin'ïñ mayñaaxhuiñjäy müid ajcxy brujerías.

²⁴ Jim ma je Babilonia cajp jim yajpaady je' ajcxy ñi'py je tñbi ajcxy Dios y'ayuc najtzcapxixy, je huidibi ajcxy huin'ixyip ma Dios etz tüg'óciy mïbijcpïdijc tñbi yaj'ögyaatcixy naaxhuiñgixy.

19

¹ Co jadu'n yjajti, chi nmïdooyich may'ayuc micpi co mayjäy ajcxy ooy ycapxcixy ymïydaaccixy tzajpjoty, ymïna'ñ ajcxy:

¡Aleluya! Ich ajt nDios yi' tügpaic ti xyajnidzoocim ajt n'alma. Yi' je' tügpaic mij'oy'ajt müid.

² Com janch etz tudägy Dios y'ane'mïn ycötujcïn. Ti je' möy ycastigo je Babilonia cajp huidibi ti yajhuinma'ñydgoy je naaxhuiñjäy müid je ycatudägy'ajtin ycixpi. Yi' je' ti yaj'adigach ma je Babilonia cajp je Dios ytumbi, huidibi yaj'ögy ajcxy, pat jim.

³ Chi ajcxy jadüg'oc ymïnaanïp:

—¡Aleluya! Je jinjoc huídibi jim Babilonia co ytoy je cajp, pa'ttigi'huip tzajpcíxy huinixi huinítiempo, ca' yjin ypidzip ni mina.

⁴ E je iipx madaaxpi mijjáy etz je madaaxpi iyujc, huídibi jugy'ajt m'id ñaygojxtinaygidaaci naaxcíxy, chi ajcxy ooy Dios ojadajty huídibi anajty ane'mb ma je mij'ane'mdac, e yminaangixy:

—¡Jadu'n jada! ¡Aleluya!

⁵ Huin'it yajmidooy jiiyby ma je Dios y'ñaydac ycötujctac tüg ayuc ymina'n: Huindzigi'ygi'x iibatcix capxpatcix iich ajt nDios nidüg'óciy pinjaty tumb m'id yi', pinjaty yi' tzigiyb, huen mutztijcity huen ymij'anäctijcity.

Je jotcuyc'ajtin huídibi nbadaanim co anajty Cristo yjáy nimiñ

⁶ Nmidoohuich nañ jadu'n nej jihu'iy ooy mayjáy ycapxy ymiydägy, nej canaag mijni y'a'ich, nej enee micpi yjidity, yminaangixy:

¡Aleluya! Ti y'ane'mdig'iy jiiyby naaxhuiñ je Huindzin Dios huídibi tügpajc mijip.

⁷ Agujc'ajtim jotcuyc'ajtim, tzoc cömaayim Dios, tzoc mooyim mij'ajt. Com ti paady je xii je tiempo mina Dios y'ung naybadáanigixp tümugáanigixp m'id yi' yjáy, tim jadu'n nej jihu'iy ypiga'n m'id yi' ajcxy. Ti Cristo yjáy ñayñi'ixiyigixy, jaydëbi ñaybátigixip ytügmúccixip m'id yi', tim jadu'n nej tüg jáy ñayxoxiyii co ypiga'n.

⁸ Dios ti a'ixiy co Cristo yjáy ajcxy ñayxoxiyb m'id yhuit oyjatypi, huídibi adicxp ajajp.

Je huit xojx oyjatypi jadu'n nipaady nej je tudägy'ajtin huídibi je mibijcpidijc ti paatcixy ma Dios.

⁹ Chi je ángel xyñimaayich:

—Jaay jada ayuc. “Jotcuyc ajcxy pinjaty huooyip ma yajhuinxiduna'n Dios y'ung, je Cordero, co naydügmugáanigixy m'id yi' yjáy ajcxy.”

Chi je ángel xyñimaayich:

—Jada je' Dios y'ayuc janchypi.

¹⁰ Chi ngojxtinay'ihu'iyich ma je ángel yhuinduu co njahuindzigi'huaañich. Chi je' xyñimaayich:

—Ca' jadu'n m'idich. Dios iich xytumbi'ajtp jadu'n nej miich etz nej jacjadyii migügtijc huídibi mijpidaaccixp cixyot huinijot je ayuc tiy'ajt janchypi huídibi Jesús ycapxhuäcx. Huindzigi' Dios.

Jadayaabi ayuc tiy'ajt janchypi huídibi Jesús ñidiy'ajt'ajt, yi' je' je Dios y'ayuc huídibi je profetas ajcxy ñajtzcapxiy.

Je mij'ane'mbi huídibi poobcohuay yaj'iñaayb

¹¹ Chi nhuin'ixyich tzajp'ahuädz, chi yquëxigy tüg poobcohuay, e je pin anajty yaj'iñaayb hue' anajty naydijyii je tudägypi je janchypi. Je huídibi tiydumb naaxhuiñyjáy m'id tudägy'ajtin etz huídibi tziptumb m'id tudägy'ajtin. ¹² E je' huídibi yaj'iñaayb je poobcohuay, je' yhuin jadu'n je' nej jinnye'n, e ym'id anajty ma ycohuajc maycoroni huídibi nidiy'ajt'ajtp co yrey'aty ma tüg'óciy jáy. E je' ym'id anajty tüg xii cojaay, e je' anajty naydügpajc nejhu'iyb yxii ca' jac pin. ¹³ Hue' anajty yxoxiyty m'id huit y'uucyity m'id ni'py, e je' yxii hue' anajty xii'adyii Dios y'ayuc. ¹⁴ Je ángeles ajcxy huídibi soldad'ajtp tzajpjoty ypayöyii anajty ajcxy ac poobcohuaygixpi, yxoxiyty ajcxy m'id sedi huit janch oybi, poobi etz huätzpi. ¹⁵ Je huídibi yaj'iñaayb je poobcohuay, ma yi' y'ahuac ypidzimy anajty tüg espada janch jiiipi, e je' m'id yajtzaachihua'n je maynaaxhuiñyjáy. E je' ane'ma'n m'id Dios ymic'ajt. E m'id yi' y'ayuc castigí möhua'n je mayjáy m'id ypocy ycixpi huídibi tzinaayb ma je may it lugar ya naaxhuiñ. Yi' y'ayuc jadu'n yi' nej tüg espada

janch jippi. E yi' m'iid'adaanip je mijpi Dios chip y'ejcin, je Dios hu'idibi t'üg'óciy mic'ajt m'iid. E mictägy tzaachypí castigi yega'n ma je mayñaaxhuiñyäjy m'iid ypocy ycixpi, jadu'n je maynaaxhuiñyäjy nipaady nej jihuiy Dios y'ung tenmicx uvas m'iid ytecy. ¹⁶ E ym'iid anajty cojaay ma yhuit etz ma ypuj jadayaabi ayuc: “Reydijc ajcxy yrey. Huindz'indijc ajcxy yHuindzin.”

¹⁷ Huin'it nhuin'ijxyich t'üg'ängel ytinäy xi'agujc, chi ooy janch mic miyaaxy t'üg'óciy je joon hu'idijaty queec-hu'idijtp tzajpcujc yminañ:

—Miingix naymujctáayigix ma Dios adzuu'ibi yecy. ¹⁸ Miingix, jigix mdzüdzcixipy reydijc ajcxy ñinicx, capitán ajcxy etz micjäydijc ajcxy ñinicx, cohuay chüch etz nañ jadu'n je' ajcxy ñinicx hu'idibi yaj'iñaayb. Mdzüdzip t'üg'óciy jäy ñinicx: tumbidijc midumbidijc, je huindz'indijc, comeeñydijc etz je ayoo'idijc.

¹⁹ Chi nhuin'ijxyich je ca'oy'iyujc etz je rey ajcxy hu'idibi yajpatp ya naaxhuiñ m'iid t'üg'óciy ypubejtpidijc ysoldadotijc ajcxy. Nhuin'ijxyich co ti ñayyöymújigixy co chiptunaangixy midziptzonaangixy je hu'idibi poob-cohuay yaj'iñaayb quipxyi m'iid je' ypubejtpidijc ysoldadtijc ajcxy. ²⁰ Chi je ca'oy'iyujc ymachycäy quipxyi m'iid je profeta ca'pi yjanchity, je t'ibi anajty tuñ mijhuinma'n ma je ca'oy'iyujc yhuinduu. M'iid je mijhuinma'n ycixpi je profeta, ca'piy yjanchity, ti anajty ooy huin'ññ t'üg'óciy je hu'idijaty ajcxy nayyejci co je ca'oy'iyujc ytiy'ajt ijxpejt cöbijci ma yhuimboc etz co huindzigixy je ñidzejtzuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma j'ñn ytoy m'iid azufre, jadu'n je j'ñn nej t'üg' meyy huadz j'ñn. ²¹ Jacjadyii jäy hue' ajcxy o'cin patcixy m'iid espada hu'idibi anajty pidzimb ma je' y'ahuac je hu'idibi anajty poobcohuay yaj'iñaayb. E t'üg'óciy je joon etz luud hu'idibi ajcxy queec-hu'idijtp cijx je' ajcxy ytimycuuxtáayigixy ytimypejtáayigixy m'iid may öcpi chüch.

20

Je mil jimijtpi

¹ Huin'it nhuin'ijxyich t'üg'ängel ycidägy choon tzajpjoty m'iidity je ahuasti hu'idibi m'iid yaj'ahuäch je mij jut hu'idibi oy yciicyity, ym'iid anajty nañ jadu'n t'üg' mijcadena ma yci'. ² Jadayaabi ángel majch je ama'y tza'n hu'idibi yajtijp mujcu' etz Satanás, chi yajcadenitigixy, e yajhui'my mach t'üg' mil jimijtp. ³ Chi je ángel cötijnajxy je mujcu' ma je mij jut, chi cö'agixy. Chi t'üg' selli pidacy ma je mij jut aguu. Pidacy je mujcu' ma je mij jut, ca'ydi jac-huin'ññ je mayñaaxhuiñyäjy, ixti cooni t'üg' mil jimijtp yca'pxipy. E co jadu'n anajty mil jimijtp ti ñaxy, ooy ycopicyity co yajnajtzmaz'ihuipy je mujcu' tzojccixy.

⁴ Chi canaag ane'mdac nhuin'ijxyich ma anajty ajcxy iñäy t'ibi ajcxy patcixy cötujcin co tiydúngxixipy naaxhuiñyäjy. Nañ jadu'n nhuin'ijxyich ajcxy y'alma hu'idibi anajty ajcxy ti yajyöctzujctuuticixy m'iid co ajcxy capxhuächy je Dios y'ayuc ytiy'ajt hu'idibi Jesús ñidiy'ajt'ajt. Ca'p je' ajcxy anajty huindzigixyixy je ca'oy'iyujc, ni je' ñidzejtzuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi m'iid Cristo t'üg' mil jimijtp. ⁵ Je jacjadyii je öcpi, hu'idibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy t'üg' mil jimijtp huin'itni. Co t'üg'óciy je mibijcpidijc yjugypigipy jadüg'oc, jada je' je ogá'nibi tiempo mina öcpi ajcxy yjugypijccixy, e ca' y'oc'ó'ccixnip jadügtecy. ⁶ Jotcujc etz huadz, ca' tibocy m'iidity, je' ajcxy öcpidijc hu'idibi jugypigipy co Jesús yajjugypigipy y' t'üg'picy öcpi hu'idibi jayijp'adamb. Je mimetzpi o'cin ca' ni ti mic'ajt m'iidity ma je' ajcxy. Hue' janch ajcxy ytung'adiyb huingapxi ma Dios etz Cristo. E je' ajcxy Cristo quipxy m'iid y'ane'mip t'üg' mil jimijtp.

⁷ Co anajty ti ñaxy je mil jimijt, huin'it je Satanás yajcoguejttüdiipy ma ymach'ity. ⁸ Chi Satanás nicxy huin'ññ je mayñaaxhuiñjyá huindu'mybi ñaaxhuiñ. Je' nicxy huin'ññ Gog jäy etz Magog jäy. E yi' ajcxy y'ane'mbidijc yajmujctähua'ñ soldado ajcxy, jigix chiptúngixipy müd je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypá'am. ⁹ E jadu'n ajcxy ypediyy ma ymijhuiniity naax, chi ajcxy yajnaadujcy je it ma chinaaygixy huidibi Dios ti huin'ixigixy etz yajnaadujccixy je ciudad huidibi Dios chojcpy. Chi Dios quejxy jin huidibi tzoomb tzajpjoty, huidibi oy ñöcigixy huädz huädz je may soldados ajcxy. ¹⁰ Je mujcu', huidibi anajty ti huin'ññ je mayjäy, oy yajcötijnaxy ma je mij jin ytoy müd azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiiby je' ajcxy ayo'n tzaachypi paadiipy xim tzuum huinixi huinítiempo.

Je tyduunin ma je mij'ane'mbi yhuinduu

¹¹ Nhuin'ijxyich tüg mij'ane'mdac janch poob, müd je huidibi anajty iñaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ijtcixipy. ¹² Chi nhuin'ijxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E ñañ jadu'n yajciyhuäcxy jadüg libro huidibi müd je jäy yxi cojay huidijaty ajcxy jugy'ajtin huinixi müd. Chi je' ajcxy yajtyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³ Je meyy yciyejctay je' je öcpi ajcxy huidibi anajty jiiby yajpatp. E je o'cin etz je öcpijut yciyejctay je' je öcpi huidibi jiiby yajpatp, e tüg'óciy je' yajtydunday nidüg nidüg nej anajty ti chinaaygixy. ¹⁴ Je o'cin etz je it ma je öcpi y'ity yajnajtztijyday jinjoty ma je mijjin ytoy. Je' je' je mimetzpi o'cin ma je mijjin ytoy. ¹⁵ E huidijaty anajty ajcxy ca' yxi ymiiñ ma je libro huidibi jugy'ajtin huinixibi müd, hue' je' ajcxy yajnajtztijy jinjoty ma je mijjin ytoy.

21

¹ Huin'it nhuin'ijxyich tüg tzajp jemybi etz tüg naax jemybi, com je jayjipi tzajp etz je jayjipi naax ti je' anajty ytigoydäy, e ni ma anajty meyy ycacädy. ² Ich, Juan, nhuin'ijxyich je ciudad huätzpi jemybi, je Jerusalén, ycidägy anajty choñ tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñyii ñayxoxyii co ypiğa'ñ müd yeydijc. ³ Nmidoohuich tüg ayuc micpi choñ anajty tzajpjoty, e ymíañ:

—Cuenditun ich n'ayuc. Dios tzinaydac pigamb ma naaxhuiñjyá ajcxy. Yi' tzináhuipy müd yi' ajcxy, e yi' ajcxy Dios yjäy'adiyb. E Dios ci'm idaamb müd yi' ajcxy jigix yi' ajcxy Dios'adiyb. ⁴ Dios yajquégib ajcxy ytajin ymayin etz yajtidzib ajcxy yhuinni, e ca'p yjadib o'cin ni jiyin ni yaaxin, ni jotmay, ni pin ycajihuihuip je ju'pin je pa'min. Com je huidibi anajty ijtñaayb, ti je' ñaxy.

⁵ Huin'it je' ymíañ huidibi anajty iñaayb ma je mij'ane'mdacin:

—Cuenditungix ich n'ayuc. Huinjemy ngojtigadza'ñich tüg'óciy huidibi jii'ijtp.

Ñañ jadu'n ymíañ:

—Jaay jada ayuc. Com jada yaabi ayuc ooy jada yjanchity, e ooy yi' jot'amij'ajt müdity.

⁶ Huin'it je mij'ane'mbi xyñimaayich:

—Ti tüg'óciy ytunyii yjadyii. Ich je' nyajtzondacp tüg'óciy tijaty, etz ich nyajcogixiyb tüg'óciy tijaty, tim jadu'n nej je letra A huidibi yajtzondacp je alfabeto etz je letra Z huidibi yajcogixiyb je alfabeto. Pinjaty tzojcp jemybi jugy'ajtin ich yi' nmöhuip. Jadu'n nipaady nej jihuüy ajcxy

ytidz̄iigixy, e nyaj'ügich ma ymuxy je n̄i huídibi yejcp jugy'ajt̄n, ni ca' ajcxy m̄imeeñyduun̄ip ni jadu'n̄i. ⁷ P̄injaty m̄imadactaayb j̄ib̄ic-huinma'n̄ etz pocytun̄i, ȳi' je' c̄idiḡihuīb huídibi nj̄e'ajtpy, e ñch ȳi' xyDios'ad̄ib, e ȳi' ñch n'ung'ad̄iyb. ⁸ Je huindz̄icyt̄ijc ajcxy, p̄injaty ca' ym̄ib̄icy ñch nd̄iy'ajt, p̄injaty tumb huídibi ca' y'oyj̄äygid̄aacn̄ity, p̄injaty j̄äy yaj'öcp, p̄injaty m̄igapxt̄igooyb töxyj̄äyd̄ijc, p̄injaty tumb capxpoḡi, p̄injaty m̄ijpidacp huijȳäy yhuinma'n̄, p̄injaty huindz̄iḡiyb quipychech tzaadzech, etz p̄injaty an̄idacp, je' ajcxy nid̄üg'óc̄iy nib̄idz̄im̄ib ñ̄icx̄ipy ma m̄ijj̄in ytoy m̄id azufre, huídibi qūex̄icp nej j̄inmejy. Je' je' je m̄imetzp̄i o'cin.

Ȳijemybi Jerusalén

⁹ Huin'it nid̄üg ángel je nihuixtujcp̄i huídibi anajty m̄id huixtujc tasi ujtz-jatyp̄i m̄id je huixtujcp̄i ayo'n tzaachyp̄i huídibi jac'axam tunaan̄ip jadaan̄ip, je' xyñ̄imaayich:

—Min, e cham nyajni'ix̄ihua'n̄ je m̄ib̄ijcp̄id̄ijc huídibi t̄ügmugamb m̄id Dios y'ung, je Cordero, jadu'n nej t̄üg ȳeyd̄ijc yt̄ügmucy m̄id yt̄öxyj̄c co ajcxy yp̄icy.

¹⁰ Je huídibi Dios ȳihui'n̄ ym̄ic'ajt xyaj'ijx̄ich cum̄äȳjoty, chi je ángel c̄üm̄äȳjoty xyaj̄nicx̄yich ma t̄üg cop m̄ijp̄i etz c̄ixp̄i, chi xyaj'ijx̄yich je m̄ijp̄i ciudad santa. Je ciudad santa hue' je' yx̄i Jerusalén, e ycid̄äy anajty chooñ tzajp̄joty j̄iiby ma Dios yajpaady. ¹¹ Je m̄ij ciudad santa janch ad̄icxp̄ je' anajty m̄id Dios y'oy'ajt̄in. J̄im jadu'n anajty y'ad̄icx̄y nej t̄üg tzaa janch oybi nej mármol, janch yaj'ijxnajxp̄ nej ijx̄in. ¹² J̄ühuíditȳi anajty m̄id̄ity je ciudad santo ac poch janch m̄ij etz c̄ixy. Je poch ym̄id anajty majmetz y'aguu. E ma je majmetz̄p̄i y'aguu majmetz ángel ajcxy y'ijtc̄ixy, t̄ügp̄i ángel ma t̄ügjaty ciudad aguu. Etz yjaybetȳity je' ajcxy yx̄i je majmetz̄p̄i Israel tribu, t̄ügp̄i tribu yx̄i yjaybetȳity ma t̄üg t̄üg poch y'aguu. ¹³ Tuḡüg anajty y'aguu m̄id̄ity x̄ib̄idz̄im'amy, tuḡüg y'aguu ma t̄ichypo ymiin̄iy, tuḡüg y'aguu ma j̄inboj ymiin̄iyin, etz jatuḡüg y'aguu ma x̄iḡid̄ägy'amy. ¹⁴ Je poch huídibi anajty ym̄id je cajp, ym̄id anajty majmetz tzaa huídibi y'ijx'ajt̄ip, e majmetz̄p̄i tzaa ym̄id anajty cojaay je nimajmetz̄p̄i apóstoles ajcxy yx̄i huídibi Jesús, je Cordero, yhuin'ijx, t̄ügp̄i apóstol yx̄i ma t̄üg t̄üg tzaa.

¹⁵ Je ángel huídibi anajty m̄iydacp m̄id ñch, ym̄id anajty t̄üg quipx ac tim oori je' anajty. Je' anajty m̄id quipxa'n̄ je cajp, je poch y'aguu, etz je poch. ¹⁶ Je cajp, je ciudad, hue' je' anajty cuadradi; nej anajty yoñ'ajt, nañ jadu'n anajty y'agon'ajt, etz nañ jadu'n yc̄ix'ajt. Chi je ángel quipxy je ciudad santa m̄id je' yquipx. E hue' quipxy mejtz mil jamejtz m̄igo'px kilómetros, y'ayooñ'ajt̄in yc̄ix'ajt̄in etz y'agon'ajt̄in quipxyjaty je' anajty. ¹⁷ Huin'it je ángel quipxy je poch, hue' quipxy m̄igo'px jahuixch̄iguipx m̄idaax c̄inuux, jadu'n nej naaxhuiñ̄ȳäy ajcxy yc̄inuux, huídi je ángel yajtumyb.

¹⁸ Je poch hue' je' anajty ypoch̄ity m̄id tzaa oyjatyp̄i, e je cajp hue' je' anajty ac tim oori, ygūex̄igy nej ijx huätz̄p̄i. ¹⁹⁻²⁰ Je tzaa huídibi je poch y'ijx'ajt̄ip hue' je' anajty y'oyduñ̄ity huídi m̄id y'oygūex̄igy, tzaa janch oy-jatyp̄i canaagnax color. Je jayijp̄i poch y'ijx hue' anajty y'oyduñ̄ity m̄id jaspe tzaa, je m̄imetz̄p̄i poch y'oyduñ̄ity m̄id safiro tzaa, je miduḡüḡp̄i poch y'oyduñ̄ity m̄id ágate tzaa, je m̄imadaaxp̄i y'oyduñ̄ity m̄id esmeralda tzaa, je m̄imigooxp̄i poch y'oyduñ̄ity m̄id ónice tzaa, je midudujcp̄i poch y'oyduñ̄ity m̄id coralina tzaa, je m̄ihuixtujcp̄i poch y'oyduñ̄ity m̄id crisólito tzaa, je m̄ituctujcp̄i poch y'oyduñ̄ity m̄id berilo tzaa, je midaxtujcp̄i poch y'oyduñ̄ity m̄id jacinto tzaa, je m̄imajmetz̄p̄i poch y'oyduñ̄ity m̄id amatista tzaa. ²¹ Je majmetz̄p̄i poch'aguu hue' anajty y'oyduñ̄ity m̄id t̄ügp̄i perla. E je m̄ijtu'

huidibi najxp cajpcujc hue' y'oyi y mïd oori huätzpi, e yquëxïgy nej vidrio huätzpi yaj'ijxnajxp.

²² Ma je Jerusalén cajp jemybi ca'p nhuin'ijxyich ni tüg templo, ni tüg tijc ma jäy ajcxy Dios ojadajtcixy. Com je Huindzin Dios, yi huidibi tügpaic mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjäy ajcxy y'ojadajtigixy Dios etz je' y'ung. ²³ Je jemybi Jerusalén ca'p je' anajty yajmayjaty xii po' huidibi yaj'anihuip yajtiicxihuip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je tiicxin jajin huidibi amb tiicxp ma je Jerusalén jemybi. ²⁴ Je mayñaaxhuiñyjäy huidibi ti patcixy y'alma nidzoocin naxïpy tigïhuipy ajcxy mïd je jemybi Jerusalén ytïcxin yjajin huidi anajty ti ymöyïi. Je ane'mbidijc ajcxy ya naaxhuiñ ymimiinipy ajcxy mij'ajt, oy'ajt, etz cömay'ajt ma je jemybi Jerusalén. ²⁵ E je cajp aguu ni camina je' agïy yca'idipy xïm, com jim ca' jim ycoodz'idipy, paady ni mina yca'agi' y'idipy. ²⁶ Jim je naaxhuiñyjäy, canaag agajp, minicxip ajcxy ymij'ajt y'oy'ajt ycoamay'ajt ma je Jerusaléngajp, je jemybi. ²⁷ Ca'p jim ytigïhuipy ni pin huidibi ca' y'oy'ajti huächni, ni pin huidibi tumb ca'pi y'oyjäy gidaacnity, etz huidijaty jäy huin'ïmb. Jëyi jim tigïhuip pinjaty ijtp yxii cojay ma je libro huidibi Dios y'ung, je Cordero, ymïd, ma cojay y'ity je jäy ajcxy yxii huidibi ymïd jugy'ajtin huinixïbi.

22

¹ Huin'it je ángel xyajni'ixiych tüg mijni huätzpi, je nïi huidibi yejcp jugy'ajt huidibi ca' ycixip ytigoyip. Janch huädz janch tiicx je' anajty je nïi nej tüg ijxin. E je nïi jim anajty ymuxy ma Dios etz je Cordero y'ane'mdac. ² Jada mij nïi hue' je' anajty ñaxy cuidad mijtügujc, etz ma je mejtz'adu'm'amybi mijni'ba', jim anajty je quipy huidibi jugy'ajt mïd, huidibi tim'ajt majmetz'oc tügpi jimijt, po' po' ytim'aty, e je quipy y'aay hue' anajty ytuñ jigix huaad naaxhuiñyjäy choocixy. ³ Ca'p jim y'adipy ni ti ayo'n ni ti jotmay mïd pocytuni ycixpi. Je Dios etz je' y'ung je' jim y'ane'mdac ycotujctac yajpaadipy. E je' ytumbidijc je' ajcxy jim yajmij'adiib ojadadiib. ⁴ Y'ijxipy ajcxy je Dios y'ung yhuiñyjiip etz yminicxip ajcxy je' yxii ycojay ma ajcxy yhuimboc. ⁵ Ca'p jim ycootzihuity. E pinjaty jim tzinaayb ca'p ajcxy yajmayjadipy linterna jin, lamparajin, ni xidicxpi, com Dios ïch ajt nHuindzin yi' yi' ajcxy codicxiib. Je Huindzin Dios etz je' y'ung je' ajcxy jim ane'mip huinixii huinitempo.

Huingooniñ yi Jesucristo ymin'aa

⁶ Huin'it je ángel xyñimaayich:

—Jadayaabi ayuc tiy'ajt ma jada necy, ooy jada yjanchity, e jëbi miich myajmij'adipy. Je Huindzin, je Dios huidibi ayuc moy je profetas ajcxy jecy'ajty, quejxy y'ángel jigix yajni'ixihuipy je' ytumbidijc tijaty tzojc tunaanip jadaanip.

⁷ Jesucristo jadu'n yminañ:

—iMiimbich tzojc! Jotcujc pinjaty tumb cuendi etz cuydumb Dios y'ayuc ytiy'ajt huidibi jaybetyip ma jada libro.

⁸ ïch Juan, nmidoohuich etz nhuin'ijxyich jadayaabi huidibi jaybety ma jada necy. E co oy jadu'n nhuin'ixyich, chi nhuijoj'ihuixyich ma je ángel ytecymijc huidibi anajty yam xyajni'ixiybich. ⁹ Chi je' xyñimaayich:

—Ca' jadu'n m'idich. ïch, Dios xytumbi'ajtp jadu'n nej miich etz jacjadyii migügtijc huidibi Dios y'ayuc najtzcapxiyip, e tüg'ócay pinjaty tumb cuendi huidibi jaybetyip ma jada necy. Huindzigi' etz ojadat Dios.

¹⁰ Chi je' xyñimaayich:

—Capxhuäcxí je Dios y'ayuc huídibí tí mjay ma jada necy, ca' myüdzíp. Com tí yhuingoñ je tiempo mína Dios cuyduna'ñ yí y'ayuc huídibí yjayhuí'm ma jada necy. ¹¹ Pínjaty ca' ytudägyíty, huen jadu'n jacyajpaady míid ycatudägy'ajt. Pínjaty jíbícjot jíbíc-huinma'ñ tumb, huen nígi jíbícjot jíbíc-huinma'ñ tuñ. E pínjaty tudägyí tumb, huen jactuñ tudägy'ajtín. Pínjaty huädz yjot huädz yhuinma'ñ míid, huen huädz yjot huädz yhuinma'ñ jacmí'ity ma Dios.

¹² Chi je Cristo ymínañ:

—Tímetiini nhuimbídipyích jadüg'oc naaxhuiñ. Co anajty tí nmíiñich, huín'it nyajjotcugíhuíbích pínjaty oybí tí tuñ, e ndzaachytunípyích pínjaty jíbícpi tí tuñ. ¹³ Ích je' tí njayíjp'atyích ya naaxhuiñ, etz ích je' cogíxíhuamb, tím jadu'n nej je letra A chondägy ma je alfabeto etz je letra Z ycogíxíy ma je alfabeto. Ích tí nyajtzondacyích je naaxhuiñ etz nyajcíxípyích.

¹⁴ Jotcujc ajcxy pínjaty tí ypocyníhuäch, jadu'n nípaady nej ajcxy yhuít tí pujcíxy e míid ajcxy yhuít huätzpi. Com tí ajcxy ypocyníhuaatzcíxy, paady jébi jíxcxíxíp je ujtz tza'm huídibí jugy'ajt yejcpy huídibí ca' ycíxípy ytígoyípy ní mína, e jadu'n jébi ytígíy ma je jemybí Jerusaléngajp. ¹⁵ Dios ca' yí' ajcxy cóbiga'ñ ma je jemybí Jerusalén etz huí'míp ajcxy cajppa' tüg'óciy pínjaty huídibí jíbíc-huinma'ñ míid, pínjaty ca' míbicy Dios, pínjaty míjpidacp huíjyáy yhuinma'ñ brujo yhuinma'ñ, pínjaty ajcxy mígapxtígooyb mídundígooyb töxyjáydíjc, pínjaty ajcxy jáy yaj'óc, pínjaty ajcxy huíndzígyíyb quípychech tzaachech, etz tüg'óciy pínjaty tzachnixonacp aní ayuc.

¹⁶ Ích Jesús huídibí capxp. Tí nguexyích n'ángel ma míich jígíx jada tíy'ajt capxtícxípy majaty míbícjpidíjc ma tüg tüg cajp. Ích je' íjx'ajtp cop'ajtp ma je rey David míiñ. Etz ích je' nmíj'ap'ajtpyích nmíjteedy'ajtpyích je rey David. Jadu'n ích nípaady nej je míjmadza' huídibí yajtíjp jayxím.

¹⁷ Je Espíritu Santo etz je míbícjpidíjc huídibí jadu'n nípatp nej Cristo ytóxyíjc ymínaangíxy:

—Min ma Jesucristo.

E píñ amídoo'íjtp ích n'ayuc ymínáangíxípy:

—Min ma Jesucristo.

E píñ tzojcp jugy'ajtín huídibí ca' ycíxípy ytígoyípy nímina, jadu'n nej jíhuíy ytídzíyí e tzocy jada ní, huen míiñ, e nmóhuíbyích jugy'ajtín, jadu'n nej jíhuíy nyajní'ügích je ní huídibí jugy'ajtín míid e ní ca' mímeeñydunípy ní jadu'ñyí.

¹⁸ Tüg'óciy pínjaty amídoo'íjtp Dios y'ayuc ytíy'ajt huídibí jaybetyíp ma jada libro, ích míich ajcxy nímaaybích co pínjaty jacyaj'anajxp jada ayuc ma jada necy, Dios jac'anaxy móhuíb tzaachypí ayo'n, ca'ydí huídi jaybetyíp ma jada libro. ¹⁹ E píñ puuhuíjtzp hueení jada Dios y'ayuc huídibí jaybetyíp ma jada Dios ylibro, Dios yí' jótzíib yxí huídi cojaayíp ma je jugy'ajt libro. Nañ jadu'n ypuhuídzíyb huídi anajty japaatíp ma je jemybí Jerusaléngajp, huídi jada libro nímiydacpy.

²⁰ Yí Jesucristo huídibí jada ayuc capxp, yí' mínamb:

—Ca' ooy jecy njac-huäcxíba'ñích co nhuimbídipyích naaxhuiñ jadüg'oc.

Jadu'n jada. Amén. ¡Min, Huíndzín Jesús!

²¹ Huen je nHuíndzín Jesucristo may'ajt oy'ajt tunípy míid míich ajcxy huídibí míbícj. Jadu'n ngapxycíxyích. Amén.